


# Cana Coaunera Ere



New Testament in Urarina (PE:ura:Urarina)

**Cana Coaunera Ere**  
**New Testament in Urarina (PE:ura:Urarina)**

copyright © 2008 Wycliffe Bible Translators, Inc.

Language: Urarina

Translation by: Wycliffe Bible Translators, Inc.

Urarina [ura], Peru

**Copyright Information**

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Urarina

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

## Contents

Mateeocha Laenai . . . . .	1
Marocohacha Laenai . . . . .	70
Locasiicha Laenai . . . . .	113
Joaancha Laenai . . . . .	191
Ichanohichuru . . . . .	239
Roma Nenacaauru Rai . . . . .	315
Coriintoo Nenacaauru Rai Leinjiin . . . . .	345
Coriintoo Nenacaauru Rai Coroataja . . . . .	372
Galasia Batane Nenacaauru Rai . . . . .	390
Efesoo Nenacaauru Rai . . . . .	400
Filipoo Nenacaauru Rai . . . . .	409
Colosau Nenacaauru Rai . . . . .	416
1Te . . . . .	423
2Te . . . . .	429
Timoteeo Rai Leinjiin . . . . .	432
Timoteeo Rai Coroataja . . . . .	440
Tito Rai . . . . .	446
Filemoon Rai . . . . .	450
Ebereeocuru Rai . . . . .	452
Saantiaaocha Letoai . . . . .	475
Fedoroacha Letoai Leinjiin . . . . .	484
Fedoroacha Letoai Coroataja . . . . .	492
Joaancha Letoai Leinjiin . . . . .	497
Joaancha Letoai Coroataja . . . . .	505
Joaancha Letoai Nichataja . . . . .	506
Jodasiicha Letoai . . . . .	508
Afocarifisi . . . . .	510

## **Mateeocha laenai Ena Nenea Cana Coaunera Ere**

*Cana Coaunera Calaoahi Jesocurisito foerateracuru  
(Lc 3.23-28)*

<sup>1</sup> Caate Cana Coaunera Calaoahi Jesocurisito foerateeurera Rabiri aina Abaraaun foeratenojoinuru foerateeurera curuaacurune.

<sup>2</sup> Isaca inaca neein nenaalu jetao Abaraaun.

Jana Isaca calaohilu jetao Jacobo.

Jana Jodaa aina rai nocoalacuru inaca neein nenaalu jetao Jacobo.

<sup>3</sup> Faresi aina Sara jetaote, Tamara que nebateein Jodaa bereecuru nelu.

Jana Faresi calaohilu jetao Esroon.

Jana Esroon calaohilu jetao Armi.

<sup>4</sup> Jana Armi calaohilu jetao Aminadaba.

Jana Nasoon jetaote, Aminadaba calaoahi nelu.

Jana Salomoon jetaote, Nasoon calaohinelu.

<sup>5</sup> Jana Raba que nebateein Salomoon calaohilu jetao Bosi.

Jana Roto que nebateein Bosi calaohilu jetao Oberi.

Jana Oberi calaohilu jetao Isaihasi.

<sup>6</sup> Jana Isaihasi jetaote, *reyneein* nenaalu Rabiri inaca nelu.

Jana Oriasi comasaineein nenaalu que nebateein, Rabiri calaohilu jetao Salomoon.

<sup>7</sup> Jana Salomoon calaohilu jetao Roboam.

Jana Roboam calaohilu jetao Abiasa.

Jana Abiasa calaohilu jetao Asa.

<sup>8</sup> Jana Asa calaohilu jetao Josafa.

Jana Josafa calaohilu jetao Joraam.

Jana Joraam calaohilu jetao Osiasi.

<sup>9</sup> Jana Osiasi calaohilu jetao Jotaam.

Jana Jotaam calaohilu jetao Acasi.

Jana Acasi calaohilu jetao Esequiha.

<sup>10</sup> Jana Esequiha calaohilu jetao Manasee.

Jana Manasee calaohilu jetao Amoon.

Jana Josiasi jetaote, Amoon calaohinelu.

<sup>11</sup> Jana Jeconiasi aina rai nejeraauru inaca neein nenaalu jetao Josiasi.

Nii bana jetaote, Isaraelitaauru mucuhin amanajaaurelu, acaauru atane caje roconajaain, Babilonia batane que ichaaoru coina.

<sup>12</sup> Nitohaneein mucuhin amanajaauruhane baiha jetaote, rai calaoahi Salatieli sirilu Jeconiasi. Salatieli calaohilu jetao Sorobaberi.

<sup>13</sup> Jana Sorobaberi calaohilu jetao Abiod.

Jana Abiod calaohilu jetao Eliaquiin.

Jana Eliaquiin calaohilu jetao Asoro.

<sup>14</sup> Jana Asoro calaohilu jetao Sadoco.

Jana Sadoco calaohilu jetao Aquiin.

Jana Aquiin calaohilu jetao Elioon.

<sup>15</sup> Jana Elioon calaohilu jetao Eleasar.

Jana Eleasar calaohilu jetao Mataan.

Jana Mataan calaohilu jetao Jacobo.

<sup>16</sup> Nii jana Jacobo jetaote, Curisito Mesihasi neba Mariha lana Jose inacanelu.

<sup>17</sup> Nitohaneein jetaote, niha Abaraaunne caje coaauneein lechoonca jena saain nichoalateurelu, Abaraaun nefoerateeuru, niha Rabirine que tiaa-joaain.

Nii Rabiri caje coaauneein jetaote, lechoonca jena saain nefoerateeurelu, Babilonia batane Isaraelitaauru mucuhin amanajaauruhane que tiaa-joaain.

Nii mucunajaain amanajaauruhane baiha jetaote, lechoonca jena saain nefoerateeurelu, nejanoaa Curisitone que tiaa-joaain.

### *Nejanoaa Jesocurisitone*

*(Lc 2.1-7)*

<sup>18</sup> Naojoaainte nenea nelu Jesocurisito. Nii bana jetaote Jose aina ita raauruhane rai niha Marihane jana jetaote, jaiti ita aina neeuruhane ajiniha Cana Coaunera Suujue ichanohineein inae ausirinelu Mariha. <sup>19</sup> Nii jana esinae rauhijiriin jeriha Cana Coaunerane rijijieein cacha caohachaaain suujua coaraniha Josene jaun jetaote, nii chuni cacha rai canaanai siriha Marihane belanaala jianein caje amunaa jerelu.

<sup>20</sup> Nitohaneein inae amuhane coina suujua cuhane coaauca Josene jana jetaote, sinihu rai ococohin jetao: “Jiaoriha Mariha raai ii comasainu quene coasiinera Rabiri nefoerateneein nenea Jose. Nii canaanai niicha siriite Cana Coaunera Suujue ichanohineein nenaanera. <sup>21</sup> Inae leinjiin calaohirichaain Marihara. Inae nejanoaa nii rai canaanaine jana Jesusoneein curuaateeura. Osa caje rai cachaneein neeninuuru ichoteraanu nihane jaunte, Jesusoneein curuaareeinha,” nae jetao rai Cana Coaunera letono anjera.

<sup>22</sup> Nitohaneein jetaote, rai nere bera inoaensi *profeta* que:

<sup>23</sup> “Chariji bana quicha aina ichoaelanaala nenea ranunate, inae ausirineein leinjiin canaanai siricheein.

Inae nejanoaane janate,

Emanoel neein curuaateeurureein cachaaaurura,”

naain nere bera inoaensi que beratitha Cana Coaunerane nainaelu.

“Emanoel,” naanete: “Cana Coaunera cana aina ne,” nae.

<sup>24</sup> Inae niritiin sinihocane caje nocohin jetaote, nii rai aitoha Cana Coaunera letono anjerane tonoraain, comasainu que Mariha raelu Jose.

<sup>25</sup> Nejetaote, nejanoaa nii Mariha calaohi- Jesuso neein Joseecha curuaatine reentiaain, nirijieein ita que turuelanaala ita aina ichaaorelu.

## 2

### *Enoto mitu nichajai jeloon caje tururuha Jesuso nejanoa coaraa arasijie caje cha coitucuurerane*

<sup>1</sup> Nitohaneein jetaote, Jodea batane que nenea Beleeun nejanoaelu Jesuso, jelai batane curuaanaaneein niha *rey* Erodesine bana. Nii jana jetaote, Jerosaleeun enoto mitu nichajai jeloon caje turuha uure itolere que nere-laain arasijieeuru caje cha coitucuureraauru cachaauru. <sup>2</sup> Inae ecu turuhin jetaote:

“Chu ne, nii Jorioocuru Curuaanaa *rey* nejanoanaa. Ocooca rai arasijiene coaracaanune jaunne turuhin coaraa uhacaanu, coroaecaanune coina,” naaure jetao turuhin, nii itolere coitucuurera cachaauru.

<sup>3</sup> Nii nejanoaane coitucuhin jetaote, jataain nererojoeae *rey* Erodesi, satiin Jerosaleen cocoaichacuru aina jiniiquiin. <sup>4</sup> Nii jaun jetaote, satiin saseredotecuru curuaanaacuru, Moisesa aitonjoan rauhi que cacha relaaurera, naaonjoainuri cotiharate Erodesi: “Chu nejanoareein Mesihasi,” naain acaauru caje bajaane coina. <sup>5</sup> Nii jaun rene turuhin jetaote:

“Jodea batane que nenea Beleeunte nejanoareeincha. Nitohaneein ecu nejanoaane coinatae:

<sup>6</sup> ‘Jodaa atane que nenea Beleen nese,  
 coatiha ansijiin natiin  
 ii amurijiriin tabaain nenacaauru  
 neseuru fautaain neriheeni,  
 ii que netiin nejanoarihani leinjiin Curuaanaa  
 canu cachaauru  
 Isaraeli cocoaichacuru  
 coroatajaneranein  
 nenaane jaanra,’  
 naain laenaelu Cana Coanera ere bera *profeta* inoaensicha,” naaure jetao Erodesi rai.

<sup>7</sup> Nii jaun jetaote, nii chuni rai belanaala nii arasijie caje itolere coitucuurera cotiharatiha Erodesine jaun jetao, rai turuhin beeuruhane jaun acaauru caje esinae rauhijiriin, “Naaonjoain banate ococoelu,” naain nii ocooca arasijiene coitucue. <sup>8</sup> Inae nitohaneein rai beeuruhane caje coitucuhin jetaote:

“Chajaain Beleeun cuhin nii canaanai coanihuiche. Chucha ne. Cha cajecha nefoeratanaaneein ne. Chaen inae eruhichene carai biha uuchene canuhetonai coaraa uhene coroaiera,” naain jetao nii itolere coitucuurera letoae Beleeun Erodesi.

<sup>9</sup> Niritiin acaauru letoaa *reyne* tonoraain Beleeun cuuruha nii itolere coitucuurerane jana jetaote, acaauru ajiniha cuujue nii arasijie- enoto mitu nichajai que ococane jana acaauruhacha coarai. Inae nii niha canaanaine jaan turuhin jetaote, ecu nichoae inacue nii arasijie.

<sup>10</sup> Inae ecu inaauca nii arasijiene coaraain jetaote, jataain rachoojoeure nii arasijie caje cha coitucuureraauru. <sup>11</sup> Nitohaneein rachoojoeuruhane baiha lorero asae enohin coaracuruhane jana jetaote, neba Mariha aina niha nii canaanaine coaraain jetao, rohan nelauriaain nii canaanai coroaecuruhane baiha rai camela caje oro, enuha sacari jujui, chaen coretiin nenea jujui, naaonjoainuri rochoin que nii canaanai belaihure.

<sup>12</sup> Nii baiha jetaote, nii niha acaauru letoaera Erodesine jaan jeloan situhin cauha cuuruhane coataa acaauru sini anuu caje coitucuhin jetao, leeocha bero cuhane cuhin jelaiha nataneu cauha cuure.

### *Egipto cuhin soroha Josene*

<sup>13</sup> Inae jelai caje amuuruha nii itolere coitucuurera *magocurune* jana jetaote, Jose sinihu rai ococohin jetao:

“Inae jetao nii canaanai ariha Erodesi sohin jaohane coina. Nii ajinihane ichei aitoon, nii canaanai aina rai neba amaain Egipto batane que cuhin sorohine coina. Chaen ichei bihanune reentiaain ecu neeura,” nae jetao rai Cana Coanera letono anjera.

<sup>14-15</sup> Nii jaun jetaote, sini caje nocohin nii canaanai aina rai neba amaain jetao, janotiin soroe Egipto nichae cunaa bero cuhane cuhin Jose, oha Erodesine reentiaain ecu nihane coina.

Nitohaneein jetaote:

“Egipto caje coauneeinne canu Calaohi cotihareeunni,” naain beratihalu nere bera inoaensi *profeta* que Cana Coaunerane nainaane coina ailu.

### *Canaanaihuru soajeratiha Erodesine*

<sup>16</sup> Nitohaneein coritaain comarohin caauruha nii arasijie caje itolere coitucuurerane que nainaane jaun jetaote, jataain obajeein, ena nejanoanaa caje coauneein, coroata jaanacai que tiaaajoaain, Beleeun sacuritaain nenacaauru canaanaihuru, nii Jesoso nejanoa beeuruha itolere coitucuerane bana caje coauneein nejanoanacaauru jitariin soajerate Erodesi.

<sup>17-18</sup> Nitohaneein jetaote:

“Rama nese quete  
 aohanrareein jataain inaderaain  
 chananaa tabaihuri.  
 Raquerite  
 calaohichuru coisihaitoreein.  
 Nete inae esinae rauhijiriin  
 ooruha calaohichurune jaun,  
 ajetera jerelanaala aite,”  
 naain laenaalu *profeta* inoaensi Jeremihazine ninaelu.

<sup>19</sup> Nejetaote, inae oha Erodesine baiha jetao, Egipto niha Josene jana sinihu rai ococohin jetao: <sup>20</sup> “Chajaain nii canaanai aina rai neba amaain jelaiha Israeli batane que caunihura. Inae ooruha nii canaanai sohin jaonaa jereraaurulura,” nae jetao rai Cana Coaunera letono anjera.

<sup>21</sup> Nii jaun jetaote, nii canaanai aina rai neba amaain jelaiha Israeli batane que cauha cuelu Jose. <sup>22</sup> Nejetaote, nii rai inaca Erodesi coreeraniha niha Arquelaone coitucueratiha sinihu que Cana Coaunerane caje coitucuhin jetao, Jodea cuhane coasihacalileea batane que cue Jose. <sup>23</sup> Inae nii Calileea batane que turuhin jetaote, rauhijiriin cuhin Nasarete neseu ichaoha cuelu. “Nasarete cocoaicha neeinte curuaareein Jesoso,” naain beeuruhalu *profetacurune* nainaane coina.

## 3

### *Cana Coaunera Ere beebejiha Joaan Baotisitane*

(*Mr 1.1-8; Lc 3.1-9, 15-17; Jn 1.19-28*)

<sup>1</sup> Nii bana jetaote, Jodea batane que nenea cacha areroo ecocohin, ecu situnacaauru cachaauru cotijiaain acaauru rai Cana Coaunera Ere beebeje Joaan Baotisita. <sup>2</sup> Nitohaneein acaauru relaain jetaote:

“Inae nichuuntaa Cana Coaunera cojoanonaa. Aihane jaun nacoauneein Cana Coaunera ere tonoraain, caohachaaain inara ichao coreein neeuche,” naain jetao cachaauru rai beebejeein relanajae Joaan Baotisita. <sup>3</sup> Nii Joaan que jetaote:

“Nerichaaain cacha areroo  
 eheehejeein cacha cotiharanu.  
 Nii ajiniha caohachaaain inara suujua baaso jianeein,  
 caohachaaain inara suujua coaraain,  
 caohachaaain neeuche,  
 turuha Cana Curuaanaane  
 raotojeein raachene coina,”  
 naain laenaelu *profeta* inoaensi Isaihasi.

<sup>4</sup> Camecho ujui caje ichanohin cajione que cajionequiin jetaote, jacari caje ichanohin siitoroon que ichoraquiin, sisiincho, irichaje, naaonjoainuri que lenoneein nelu nii Joaan.

<sup>5</sup> Nii cacha areroo neein cachaauru relaa Joanne coitucuhin jetaote, satiin Jodea batane caje, Jerosaleen caje, Jorodaan batane rohan caje, naaonjoainuri cajene maajeein turuhacoaain aonaa cuure arajii cachaauru. <sup>6</sup> Nitohaneen rene turuhin esinae rauhijiriin suujelanaala osaacuhane beeuruhane jetaote, cojunacatenaaca nucuhe Jorodaan cuhane tein acaauru baotisurejetelu Joan.

<sup>7</sup> Nejetaote, jataain arajiin rene turuhacoaauruha acaauru baotisaane coina fariseeocuru aina sadosseeocurune coaraane jaun jetao:

“Cha inara rai aite turu rai nenea caseteco tabai caje nichoteeichene coinata taibinaecuru- acano rijijieein nenacaauru cachaauru. <sup>8</sup> Aihane jaun nii ajiniha caohachaain inara suujua coaraain caohachaain ichaaoche. Aihute esinae rauhijiriin nacoaauneein Cana Coaunera coitucuhin, inara ichao coreein caohachaain nenea jerequichene coaracurumiin leeochoauru cachaauru. <sup>9</sup> Jiaonrihachu chaen nejesinajeein: ‘Canacaanune Abaraaun nefoeratenichaanu,’ naain irihache. Cana Coaunera naine caa ajeri caje niha natiin Abaraaun nefoerateeuru coaunaa ne. <sup>10</sup> Chaen techu inaana inaeniha temulene, cojoaisi aina curuataain tero que sauhin usihanau mocohaca. Nii rijijieeinte inae esenetaaichuru letoaa cureein nii turuha uhenenu usi tabai jana. <sup>11</sup> Canune esinae rauhijiriin nacoaauneein Cana Coaunera ere tonoraain neeichene coarateeichene coujunacane que, acauhanau tein inara coujunacatein inara baotisaan. Jana canu baiha turuha uhenite laen, inara suujue cuhane Cana Coaunera Suujue tein, usi quene maajeein inara coujunacatein inara baotisurein. Acate jataain canu amurijiriin coainain letononeein ne. Canune fautaain cocoaain letononeein neun. Nii rai safato amaeranu que niha natiin nelatejeehaan. <sup>12</sup> Charijieein teeinti aroso taojiaain, jelai tein rai fero taojiae mocohane coina taicha. Nii rijieeinte, jelai tein coitucuurera raain, jana nii nere tonorana jerelanaala nenacaauru jelai tein mocoha cureein, chabana jacanaa charanejeein nena usi que,” naain jetao cachaauru rai beebeje nii Joan.

### *Jesoso cojunacatiha baotisaa Joanne*

*(Mr 1.9-11; Lc 3.21-22)*

<sup>13</sup> Nii jana jetaote, baotisaa Joanne coina Calileea caje cuhin, nii niha Joanne jaun nucuhe Jorodaan turuha cue Jesoso. <sup>14</sup> Nii jana jetaote, jauriaanejeein baotisanaa jerelanaala jetao:

“Chanuna ii canu baotisanaa naineei natiin, ii canu rene uhi,” naa Joanne jana jetaote:

<sup>15</sup> “Jauriaa niriimiin ena. Jauriaanejeein satiin aitoha Cana Coaunera jaan ichacaanete caohachae,” nae jetao Joan rai Jesoso. Niritoha raine jaun jetaote, jerihane rijijieein baotisae Joan. <sup>16</sup> Nitohaneen coujunacatiha acauhanau tein baotisaa Joanne jana, acau caje mituha Jesusone rijieeoriin jetaote, neboraca dede bacuujuane jana, leinjiin serori rijijieein nichoae fauha uha Cana Coaunera Suujuene jana coarae Jesoso. <sup>17</sup> Nii jana jetaote:

“Caate jataain quiicha belain canuhacha cocoaianohin canu Calaohi nera,” naain toniha erena dedeune jana aonajeeunre.

## 4

### *Baaso que Jesoso sarunaa jeriha moconajaerane*

*(Mr 1.12-13; Lc 4.1-13)*

<sup>1</sup> Nii baotisaa Joanne baiha jetaote, Cana Coaunera Suujue amanojineen cacha areroo cue Jesoso, ecu coujuhin coaraa moconajaerane coina.



<sup>2</sup> Nitohaneein cacha areroo niha jenachoonca jiiichooneein, jenachoonca janotiineein lenone lanaalane baiha mijiitoha Jesusone jana jetaote, <sup>3</sup> coujuhin coaraane coina rene turuha cue moconajaera.

Nitohaneein rene turuhin jetaote: “Chajaain aihane esinae rauhijiriin Cana Coaunera Calaohi neeine, caa ajeri jaberocooru rai aitoote lenoneneein nerotomiincha,” naa Jesuso rai moconajaerane jana jetaote: <sup>4</sup> “Nete Quiricha inoansi cuhane: ‘Coatiha lenoneecha que ichaonaa nainihe i cacha. Cana Coaunera ere tonoraain, jerihane rijijieein ichaohanete nainere, jerichanejeein ichaoha cachane,’ naain laenanohineein ne Cana Coaunera Quiricha inoansi cuhanera,” nae jetao moconajaera rai Jesuso.

<sup>5</sup> Niritoha raine baiha jetaote, Cana Coauneraacha que banijiaain nenea Jerosaleeun nese que nenea Teenforo ecuunni choae Jesuso inaan jetao:

<sup>6</sup> “Chajaain aihane esinae rauhijiriin Cana Coaunera Calaohi neeine caalai caje nomaroteeute coaraca. Cana Coaunera Quiricha inoansi cuhanete:

‘Rai letonocuru anjeraaurute

letoareein Cana Coaunera,

ii beraaihuruhane coina.

Acaaurute

rai biji que ii michuurureein,

nabana ajeri que necunaitaaine coataa,’

naain laenaerate Cana Coaunera,” naa rai moconajaerane jaun jetaote:

<sup>7</sup> “Chaen techu Cana Coaunera Quiricha inoansi cuhane: ‘Jiaonriha ii Curuaanaa ii Coaunera coujuhin coaraaine,’ naain laenanohineein ne,” nae jetao moconajaera rai Jesuso.

<sup>8</sup> Satononejeein jetaote, jataain ecuuneein nenea ichatane ucuuno que amaain jetao, jitariin caa chauratane que nenacaauru neseuru coarateein, que nelateein ichaonacaaurune maajeein coarateein jetao:

<sup>9</sup> “Jitariin caa ena iicha coaraine ichei tereeni, neseonriaain canu coroaquine,” naa Jesuso rai moconajaerane jana jetaote: <sup>10</sup> “Cana Coaunera Quiricha inoansi cuhanete: ‘Leinjiin ii Curuaanaa ii Coaunera corojeein raaicha nelateein rai nere tonoraau,’ naain laenanohineein nera. Chajaain ena canu caje amuhachaura moconajaera,” naain jetao moconajaera sitae Jesuso. <sup>11</sup> Niritiin moconajaera sitaa Jesusone jaun caje amuhane jana jetaote, rene turuhacoaain coroatajanecure anjeraauru.

### *Calileea cachaauru relaane nunuhetiha Jesusone*

*(Mr 1.14-15; Lc 4.14-15)*

<sup>12</sup> Caresero cuhane Joaan enoaaauruhane coitucuuriin jetaote, Calileea nichae cuelu Jesuso. <sup>13</sup> Nejetaote, Nasarete ichoaelanaala, Saboloon aina Nefatalii nefoerateuru atane que nenea nemuri auhaniha Caferenaan ichaoha cuelu.

<sup>14</sup> Nitohaneein jetaote:

<sup>15</sup> “Cucuana auhaniha Jorodaan jerau

Saboloon aina Nefatalii atane-

Calileea ichaonacaauru

Jorioniheichurute

inae jianacoon rai nichao baaso caje mituurureein.

<sup>16</sup> Jana nii ooruhane bana nitajeeneeurite,

inae leeocho ichaonaa que ichaaoe,”

naain laenaalu *profeta* inoansi Isaihasine nainaelu.

<sup>17</sup> Nii caje coauneein jetaote: “Inae nichuuntaa Cana Coaunera cojoanona. Aihane jaun nacoauneein Cana Coaunera coitucuhin, caohachaain inara suujua coaraain, caohachaain neeuche,” naain jetao cachaauru rai beebjeein acaauru relae Jesoso.

*Jenai ate mucuurera cotihaca Jesusone*  
(Mr 1.16-20; Lc 5.1-11)

<sup>18</sup> Nii cachaauru relaane caje Calileea conemuri auhaniha cuujihane jaun jetaote, coroatajai ita nejeraauru Simoon Fedoro neein acaauruhacha curuaatei, chaen rai nejera Anderesi, naaonjoainuri erue jetao Jesoso, acaauru amihaneeo niha ate mucuuruhane jaun, ate mucuuruhane coina acauhanau rai rede nalaecuruhane jana. <sup>19</sup> Nii jana acaauru coariin jetaote:

“Chajaauche canu ainate nii ate mucuhichene rijijieein, canu rai cachaauru mucuhin raeraneein neeiche,” nae jetao acaauru rai Jesoso.

<sup>20</sup> Nii rijieeoritiin jetaote, acaauru rai redeeuru ratiriin Jesoso aina cure. <sup>21</sup> Nii caje basiinjiin cutiin jetaote, coroatajai ita nejeraauru Sebedeo calaohichuru Saantiaao, Joaan, naaonjoainuri coari Jesoso, leinjiin bote cuhane neein acaauru rai redeeuru rucuheca neeuruha rai inaca ainane jana. Nitohaneein coarinajaain cotihanaaca Jesusone jaun jetaote, <sup>22</sup> nii rijieeoritiin bote cuhane acaauru inaca ratiriin caaijie cuure.

*Arajii cachaauru relaa Jesusone*  
(Lc 6.17-19)

<sup>23</sup> Nitohaneein cuhin jetaote, Calileea sacuritaain cuhecujueein, sinacocaauru naineein enohenojoein cachaauru relaain, Cana Coaunera cojoanonaa erenaa raotono que ereerejeein, itolere cunai caaun cunaite-nacaauru, jaberoco que cunainojoiriin nenacaauru, naaonjoainurine maa-jeein rautaacoae Jesoso. <sup>24</sup> Nii jana jetaote, satiin Siria batane sacuritaain inae Jesoso benaa coitucuhin jetao, araai laurii cunai caaun cunaitenacaauru, jaberoco que cunanacaauru, coitucuchuhi que suujueconacaauru, otonacaauru, bacosacuru, naaonjoainurine maa-jeein rene amaauruhane jana jetao, acaauru rautaacoae Jesoso.

<sup>25</sup> Nitohaneein jetaote, Calileea nenacaauru neseeuuru, Decapolis, Jerosaleen, Jodea, Jorodaan batene uurihuru, naaonjoainuri cajeeeurune maa-jeein cuhacoaain jetao, Jesoso sacuhin rene turuhacoaure arajii cachaauru.

## 5

*Ichatane ucuuno que cuhin ecu cachaauru relaa Jesusone*  
(Lc 6.20-23)

<sup>1</sup> Arajiin rene turuuruha cachaaurune coaraane jaun jetaote, aina nere-lanacaauru aina jiniiquiin ichatane ucuuno que iniin jetao, ecu nelauriariin lauheque Jesoso. <sup>2</sup> Nitohaneein ecu netiin acaauru relaain jetaote:

<sup>3</sup> “Nerausiaaecuruha latiha acaauru suujuane coitucuhin nenacaauru, Cana Coaunera Cojoanona que neeuruhane jaun.

<sup>4</sup> Nerausiaaecuruha inaderaaeriin ichaonacaauru.

Niichurute cairichaaajoaain coarae Cana Coaunera.

<sup>5</sup> Nerausiaaecuruha leeochoauru amurijiriin nena coacuelanaala raotojoein ichaonacaauru.

Niichuru raite, acaauru que banihateein niicha rucujuei atane tereein Cana Coaunera.

<sup>6</sup> Nerausiaaecuruha corajeein esinae rauhijiriin jeriha Cana Coaunerane rijijieein leeocheenein namute cacha coaraelanaala, niheichu namute cacha

cairichanaa coacuhin niha leechane jerelanaala, naaonjoaain caohateraneein nenacaauru niicha coana jerei coaracururichaaaine jaun.

<sup>7</sup> Nerausiaaecuruha cairichaaajoaain leechaauru coaraain, chaelai la-teen neeuruhane, acaauru coroatajanein naaonjoaain nenacaauru.

Nii rijijieeinte cairichaaajoaain acaauru coaraain, jeelai amuritoheriin acaauru coroatajanereein Cana Coaunera.

<sup>8</sup> Nerausiaaecuruha caohachaain suujua coaraain caohachaain ichaonacaauru.

Niichurute esinae rauhijiriin Cana Coaunera aina jiniiquiin niha cuurureein.

<sup>9</sup> Nerausiaaecuruha raotojoein jiniiquiin ichaauru cachaurune coina coroatajanein ichaonacaauru.

Niichurute rai calaohineein tein acaauru coareein Cana Coaunera.

<sup>10</sup> Nerausiaaecuruha Cana Coauneraacha jerei ichacuruhane coreniha mucunojoneein, casetecanojoneein, arinojoneein, naaonjoaain nenacaauru, Cana Coaunera cojoanona que neeuruhane jaun.

<sup>11</sup> Nerausiajeeinte neeiche canu cachanein neeichene coreniha inara nocoeje chanuhin, inara sohin, joareein inara que ereein, naaonjoaan cachane.

<sup>12</sup> Nitohanein techu cairichaerinojoneein rautanohinelanaala ichaorelu Cana Coaunera ere bera inoaensihuru *profetacuru*, inara ajiniha nenacaaurulu.

Aihana jaun raotojoein rachoojoein, chaque tonajelanaala neeuche, dedeeu raoti ichaonaa que inara coreterihani Cana Coaunerane jaun.

*Lenone raotono tera aina cache conaeranein nena*  
(Mr 9.50; Lc 14.34-35)

<sup>13</sup> Charijieein teeinti setuhane coataa, tebe que iniho colaain rucuhecaa. Nii rijijieeinte nabana nitajeeuruha cachaurune coataa, acaauru ichao baaso rucuhanein neeiche. Inae lenone cotebetenaa naineniha tebene, inae lenone raotono tenaa nainerihe. Nechu joaenreen atane ichoae jaonojoneein, shaonohineein nihane coinaachate nelate. Nii rijijieein inara netonai, cache rai ichaonaa raotono coaratelanaala cache relaeneeichene, inara netonai nii chaque nelatelanaala neriquicheein.

<sup>14</sup> Ichatane ucuuno que niha leinjiin nesene, nihei chuni coaraelanaala nainejei. Nii rijijieein techu satiin cache notaracae inara aina cuaain niicha jerei coaratiha Cana Coaunerane jaan- cono rijijieein neeiche.

<sup>15</sup> Nii rijijieein nihei chuni cono mocohin darohe asae tera. Bujuaihu telanaalate ucuun tihaca, satiin conohanau tururuha loreri asae turunacaaurune coina.

<sup>16</sup> Nii rijijieein cache cononein satiin cachauru que caohacha ichaquichene coarateein, acaauru que coitucuerateein neeuche. Aihute esinae rauhijiriin caohacha ichaquichene coaraain Cana Coaunera coroaecuruhine cachauru.

*Cachauru relaa Moisesane jaan- rauhi coitucueratiha Jesusone*

<sup>17</sup> Coatihana inara relaa inihalu Moisesane jaan rauhi jianein neeichene coina, cau turuhin nihaaun. Nihieichu inara relaauruha *profetacurune* jaan jianequichene coina turuhaaun. Nenacaen nejian, nii inara relauruhane jaan coitucuhiche esinae rauhijiriin jeelai amuritoheriine coina, 'Naaonjoain quete aite,' naain inara rai biha uun. <sup>18</sup> Esinae rauhijiriine inara rai aitoreeunni, jaiti niha dede, chauratane, naaonjoainurine que tiaaajoaain, coatihana aninoerarinaai le erenaanejein, satiin nii aitohane rijijieein situhane reentiaain, nii Cana Coaunera tenojoin Rauhi Inoaensi.

19 Nitohaniane jaun nii rauhi inoansi caje leinjiin leeochoaauru fautaain nelatihei rijijieein nenea rauhi tonoraelanaala nenea, niheichu que leeochoaauru relaenihane, acate Cana Coaunera Cojoanonaa que jataain nelatenereein. Nete caohachaaain tonoraain, nii aitoa Cana Coaunerane rijijieein ichaohin, esinae rauhijiriin leeochoaauru relaerate, jataain nelatineein nereein Cana Coaunera Cojoanonaa que. <sup>20</sup> Rauhijiriine inara rai aitoree-unni, Moisesa aitoonjoan rauhi que cacha relaaurera aina fariseeocuru amurijiriin, inara rai Cana Coaunera aitoonjoan tonoraain rijijieein niicha icharatei ichaeneeichene, coatiha Cana Coaunera Cojoanonaa que ichaonaa naineriheicheein.

*Namute cacha aina obaecane caseteco coarianine que cacha relaa Jesusone*

*(Lc 12.57-59)*

<sup>21</sup> Inarate coitucuhiche: 'Jiaoriha sonajaain jaohichene. Sonajaain joerate caseteco coareein,' naauruha inara foerateeurera rai ne. <sup>22</sup> Nena laen canu inara rai aitoon. Chunocoha namute cacha aina obajei, nii obaecane jaan jera aina rucujueein que suujua acatelanaala nenaate, caseteconeein niha cureein. Jana rai nejera que 'Cha coitucuhiei,' naain ereite, casetecaer-aterrein nitohanai rucuhecuruhane coina nenacaauru- *Junta Supremacuru*. Jana, 'Chaque nelatiheei inacojoeinte neei,' naain namute cachaauru que ereite, usi tabai jana nijiaoreein.

<sup>23</sup> Aihana jaun ii que suujua acatiha Cana Coaunerane coina chaelai amaai que belaine coina Teenforo asae nenea rori- *altar* ichoae jana, ii cotaairiin niha chamute cachane que coaauquine, <sup>24</sup> jauriaanejeein caohachaaain neein ii cotaairicha ainane coina, nii rori acatiha nii iicha amai ratiriin, aina rucuhenu. Inae aina caohachaaain rucuhequine baihate laen nainereei jelaiha cuhin nii rori- *altar* ichoae nii Cana Coaunera belaine jaan teeine.

<sup>25</sup> Chunocoha inara amute cacha, cocoinanacaaihuru rai inara couluru-jeein nihane, raotojoein aina ereein rucuhecuche, joesio rai inara coluruji-hane coataa. Aineeichenete folisiaa rai inara tiha joesione, caresero cuhane inara enoaurureein. <sup>26</sup> Nitohaneein ichaeneeichenete nii caresero cuhane neriquicheein mituhelanaala, nii baaso ichaquichene coretequichene reen-tiaain. Esinae rauhijiriine aitoon inara rai.

*Comasainelanaala nenea ene dadaeniha cachane coina relaa Jesusone*

<sup>27</sup> Inarate: 'Jiaonriha inara sinijeranelanaala nenea ene dadaaichene,' naain inoanlu inara relaauruhane coitucuhiche. <sup>28</sup> Esinae rauhijiriine laen canu inara rai aitoon. Chunocoha suujua cuhane ene jereein coarate, suujua cuhane nejelau ene que naosate.

<sup>29</sup> Inara nota osa que inara sarunaa jerihane nii inara nota que coaraain, inaraacha jerei caje amuuche, nabana inara nota coreniha baaso ichaquichene, inara notaacha usi jana cuelanaala, satiin inara jaberoco usi jana nitajihane coataa. <sup>30</sup> Jana inara biji osa que inara sarunaa jerihane, coa nii inara biji turuaache nii inara sarueratenaajerihane jaan que. Mucuhichene ajiniha caje amuuche. Nii inara bijiicha mocoelanaala, inara jaberocone maajeein usi tabai jana nitajihane coataa.

*Ene raain joeranihane, osa que nesaruha cachane que, cacha relaa Jesusone*

*(Mt 19.9; Mr 10.11-12; Lc 16.18)*

<sup>31</sup> Chaen techu inoanlu: 'Chunocoha comasai joeranihane, nii comasai jaohane jaan cocoiricha teeuche raite aina comasai jaohine,' naain inara

relaurelu. <sup>32</sup> Esinae rauhijiriine laen canu inara rai aitoon. Leeocha cacha aina ichoanihanane jana comasai joerate, inae osa que nesarue. Jana nii quicha jaonojoin ene raerate, jerichanejeein osa que nesarue.

*Cana Coaunerate coaraje, naain nohaniha cachane que, cacha relaa Jesusone*

<sup>33</sup> Chaen techu inara inoaensihuru rai: 'Jiaonriha Cana Coaunera notara-cae netiin, Cana Coaunera bajaain, rai chaelai benatequichene nihanatiin teneeichene,' naauruhane coitucuhiche. <sup>34</sup> Esinae rauhijiriine canu inara rai aitoon. Jiaonriha joareein inacojoein: 'Cana Coaunera coreniha,' naain ereeichene. Niheichu: 'Dede coreniha,' naain erenaa nainiheeiche, Cana Coaunera nelaurianaja niha dedene jaun. <sup>35</sup> Niheichu atane coreniha nihanatiin nainiheeiche, nichaauraa Cana Coaunerane jaan nihane jaun. Niheichu Jerosaleen coreniha nihanatiin, Cana Coaunera nese nihane jaun. <sup>36</sup> Niheichu inara couturi coreniha chaelai ichaquichene coina erenaa nainiheeiche, inara jerequichene que jichosiin, nesomaraain, naaonjoaain nenerihani inara coturijine jaun. <sup>37</sup> Chaelai que: 'Icharihanuhin,' naaichene ichacuche. Jana: 'Icharihaauni,' naaichene coa ichacache. Nelatihei cha ichaeraanu rijitiin nohaneein irihacane. Niite baaso ne.

*Soeraane, nerinanaa nainenih chunine que cacha relaa Jesusone*  
(Lc 6.29-30)

<sup>38</sup> Inarate inoaenlu: 'Chatohaneein inara soeraniha inara cunaitaaine, inara netonai cunaitaain nii inara soera sooche,' naauruhane coitucuhiche. <sup>39</sup> Esinae rauhijiriine canu inara rai aitoon. Jiaonriha chatohaneein baasoneein teraquichene neurinanaa coaauquichene. Aihane jaun inara meri faohitoroanihanane, rai jera netonai icharatecuche. <sup>40</sup> Chunocoha co-cainanacai rai inara colurujeein inara obiri ruluhane, nii jelaronaa bana inaraacha jiai inara obirine maajeein teeuche. <sup>41</sup> Inara que anajiin amaeratiha cocoainanacai, inara laurinelanaala nenaane, nii bajaane amuritoheriin amanaa nainequichene coarateein amaauche. <sup>42</sup> Inara caje niicha latei bajaain niha cachane, rai teeuche. Jana inara rai cainaane coina chaelai bajaain niha cachane, chunaelanaa rai niicha latei teeuche.

*Cotaicha belaa in niha cachane coina cacha relaa Jesusone*  
(Lc 6.27-28, 32-36)

<sup>43</sup> Chaen techu inoaenlu: 'Inara belaichaauru belaa in, inara cotaihurera cotaihuche,' naauruha inara raine coitucuhiche. <sup>44</sup> Nena laen canu inara rai aitoon. Inara que nejeratenacaauru belaihuche. Inara rerohecaera rai Cana Coaunera bajaauche. <sup>45</sup> Nitohaneein neeichenete, dedeeu nena Cana Inaca Cana Coaunera calaohineein neriquicheein. Acate enoto coaanae, cojoanonetoejin nechu aansainein nenacaauru rai, caohachain nenacaauru rai, naaonjoainuri conaeranu que nihane coina. Chaen techu suujua coaraelanaala nenacaauru rai, suujua coaraain nenacaauru rai, naaonjoainuri rai elo letoae acaauru rai caohachanu que. <sup>46</sup> Jana acaihaniji inara belaichaauruhacha belaaichene, chatohanai que jana inara belaaiche Cana Coaunera, inae cuu tihane bana. Coaracuche nachuhinti Roma curuaanaa rai *impoestonu* que coriqui bajaaurera netonai jataain nechu aansainein neuruha natiin, nitohaneein ichaauruhane. <sup>47</sup> Jana inara belaichaauruhacha rai raotojoein ereein, leeochoauru aina raotojoein erelanaala, naaonjoaain neeichene, chatohaneeinna jana esinae rauhijiriin inara ichao coreein neeichene coaracurure cachaauru, Cana Coaunera coitucuuruhi nihanatiinte, inara rijijieein neure. <sup>48</sup> Aihana jaun caohachain rauhijiriin neeuche, aiha Cana Coaunerane rijijieein.

## 6

### *Caohacha ichaa cachane coina cacha relaa Jesusone*

<sup>1</sup> Jiaonriha nechu raujiaain inara coaracuruha cachaurune coinaacha cacha notaracaae Cana Coaunera jerenohin ichaquichene. Nitohanein neeichene coatiha chaque inara rai cainarinaain Cana Coaunera. <sup>2</sup> Aihana jaun cha latein nenacaauru coroatajanequichene, jiaonriha itolerenein cachauru rai been acaauru coroatajanequichene. Cana Coaunera coitucutoha nocoetonacaaurute cacha notaracaae, nechu jataain acaauru aina caohachaaain niha cachane coina, Sinacoca asaae, bero cuhane, naaonjoaain cacha belaihure. Jiaonriha acaauru rijijieein ichaquichene. Acaaurute nechu jataain aihure, acaauruhacha esenetaain, caohachaaain acaauru coaraa cachane coina. Nete inae caohachaaain acaauru coaracuruha cachaurune que inae cainanohine acaauru rai.

<sup>3</sup> Aihana jaun inara, cairichaihuru coroatajaniha cha teeichene, jiaonriha jataain inaraacha belaa rai niha natiin beeichene. <sup>4</sup> Nitohanein esinae chuni que coaratelanaala teeichene coaraanete, inara rai cainareein cana Inaca Cana Coaunera.

### *Cana Coaunera bajanaa que cacha relaa Jesusone (Lc 11.2-4)*

<sup>5</sup> Cana Coaunera bajaachene, coa bajaauruha Cana Coaunera coitucutoha nocoetonacaaurune rijijieein bajaache. Acaaurute sinacoca asaae, joaereein bero cuhane, naaonjoaainu neeichuru Cana Coaunera bajaure, nechu jataain caohacha ichaa nocoetiin aihuruhane coaracuruha cachaurune coina. Nete nii coaracuruha cachaurune coina aihuruhaneecha que, inae cainanohine acaauru rai.

<sup>6</sup> Nete laen ii Cana Coaunera bajanaa jereeine, caohacha jelai netiin coaraeniha chunine jana, bujuaihu ucuha cuhane netiin ii Inaca Cana Coaunera bajaaine caohachae. Nitohanein chuni que necoharaerate-lanaala netiin bajaachene coaraanete, inara rai inaraacha bajai tereein ii Inaca Cana Coaunera.

<sup>7</sup> Cana Coaunera bajaachene, coa acaauru rai ecaantocuru bajaee bajaecuruha araai saain Cana Coaunera coitucuhichurune rijijieein joaenreen ereerejeein bajaache. <sup>8</sup> Aihana jaun jiaonriha acaauru rijijieein neeiche inarane.

Cana Coaunerate, caje bajaachene ajiniha inara suujua cuhane inaraacha latei latequichene coitucue.

<sup>9</sup> Aihane jaun Cana Coaunera bajaachene:  
'Satiin canacaanu Inacanein dedeeu nena Ofa,  
Iineein neeine coitucuurumiin satiin cachauru.

<sup>10</sup> Turuhine Ii Cojoanona.

Caa chauratane que iicha jerei ichacurumiin,  
dedeeu ichacuruhane rijijieein.

<sup>11</sup> Cojoanonetjoein canacaanu rai lenone ocoteeu.

<sup>12</sup> Baaso ichacaaunne,  
canacaanu que ii suujua acateeu,  
canacaanu rai baaso icharaauru que,  
canacaanu suujua acatichaanune rijijieein.

<sup>13</sup> Jiaonriha osa que nesaruhin  
nihacaanune nainatejeein neeine.  
Canacaanu caje moconajaera sitaau.  
Inae,  
naain Cana Coaunera bajaache.

<sup>14</sup> Inara rai baaso icharaauru que, inara suujua acatein, acaauru aina caohachaaain neeichenete, Cana Coaunera netonai inara que suujua acatena nainereein. <sup>15</sup> Jana inara rai baaso ichaaain neeruha leeochoaurune jana, acaauru que inara suujua acateneeichene, Cana Coaunera netonai inara osa que suujua acatenereein.

*Suri noitelanaala netiin Cana Coaunera bajaauruha cachaaurune que, cacha relaa Jesusone*

<sup>16</sup> Inara suri couu netiin Cana Coaunera bajaachene, jiaonriha aihuruha Cana Coaunera coitucutoha nocoetonacaurune rijijieein, nechu inara suri couu neeichene coaracuruha cachaaurune coina coa cunaitenaa meri tocohaneein inara meri tihache. Inae nitohaneein ichacuruhane coaraain acaauru belaichuruha cachaaurunete, nii acaauru belaichuruhaneecha que inae cainanohi ne acaauru rai. <sup>17</sup> Jana inara, inara suri couu netiin Cana Coaunera bajaachene, inara meri culejeein neruujueein raotojoeein bajaache, <sup>18</sup> inara suri couu netiin Cana Coaunera bajaachene que nainacuruha cachaaurune coataa. Nii banate laen leinjiin Cana Coauneraacha inara belaicheein, inara suri couu netiin bajaachene coreniha.

*Dedeeu raoti ichaonaanaja  
(Lc 12.33-34)*

<sup>19</sup> Coa caa chauratane que raotiin nenea coacuhin, coriquihona neein itolere rucuhale sirina coacuhin nihache, inara rai cojoanojoiin nitajeein, basijiaaurureein asijiautooru, naaonjoanrichaaine jaun. <sup>20</sup> Caa chauratane que caohachaaain nenea coacuhin mainajeein amihaneein coriqui taaojiaaichene jianein, nii aaichene rijijieein mainajeein Cana Coaunera rai itolere caohachanu ichana que amihaneechete dedeeu inara rai cainanohinemii. Nii dedeeu laen asijiatooru nihanatiin turuhin inara basijiauna nainerinaain. Niheichu cojoano, ecu enohin aasaena nainerinaain. <sup>21</sup> Nitohanihane jaun jauriaanejeein caohatiin coaucuche, inara ichao rai inaraacha ichanenu que. Inara ichao rai jataain nelateineein niha coriquine esenetaaichene acaacha ichacuche. Jana inara ichao rai nelateineein niha Cana Coauneraacha icharatenohine esenetaaichene acaacha ichacuche.

*Cacha jaberoco conaeranein niha cacha suujuane  
(Lc 11.34-36)*

<sup>22</sup> Inara notate inara suujua que itolere inaraacha coarai coitucueratera ne. Aihana jaun inara nota que inaraacha coarai coitucuhin, ichaquichene caohatiha inara suujuane tonoraai ichaeneeichenete jianacoon neriquicheein. <sup>23</sup> Jana inara nota que baasonihane coaraqichene saijieein, inara suujua nii baaso ichaquichene jerihane rijitoejin baaso ichaquichene, nocohenaanau nijiaonreein inara suujue.

*Coriquiicha que coacuhin Cana Coaunera jerenohi ichana jereniha cachane  
(Lc 16.13)*

<sup>24</sup> Nihei chuni coroatajai curuaana letononeein nenea nainei. Leinjiin belaaain acaacha ere tonoraain, nii leeocho que jaolequiin nere tonoraenerihane jaun. Nii rijijieinte Cana Coaunera sacunaa nainene cacha, coriquiicha que coacuhin nihane.

*Jerihane rijijieein ichaonacauru cachaauru ichao beraiha Cana Coaunera  
(Lc 12.22-31)*

<sup>25</sup> Nitohanihane jaunne inara rai aitoon. Coa lenoneein acau cohin ichao-hichene jaanu, inara cajione, naaonjoain que nererojoeceeriin nihache. Tana lenone amurijiriin nelatiha inara ichaone jana, cajione amurijiriin

nelatiha inara jaberocone coitucuhin neeichene. <sup>26</sup> Coaracuche nachuhinti temule jaain niicha quiineuri taojiaain rucuhecuruhane jaanu coloheri siriin naaonjoaain neeururiha tajaecuru. Nete laen cana Inaca Cana Coaunera, lenoneein ichaaoruhane coina acaauruhacha quiine teein ne. Inarate nii tajaecuru amurijiriin jataain nelateein neeiche. <sup>27</sup> Inaaonjoan sanein niha natiin itolereneein suujua cuhane coaauca cachane niha natiin, nichao cariaain ichaonaa nainihe. <sup>28</sup> Chanuna inara cajione que nererojoecaaeriin neeiche. Coaracuche nachuhinti ajenacuru niicha jiaaenine que nichanaa ichaain, amihaneein, naaonjoaane que airijiin omarohin, jataain caohatonanaain ujuaneein naaonjoaain neeuruhane. <sup>29</sup> Jana rey Salomoon, coatiha nii aihuruha ajenacurune rijijieein niheil, caohati cajione que necoreetein nihalune saijieein. <sup>30</sup> Tana mocohin nitajerai niha ajaenane saijieein, caohachaain omarohin nihane jaanu teein niha Cana Coaunerane coitucuhichene. Chanuna jana chaen, nii amuritoheriin inara cajioneterichaain Cana Coaunerane esenetaeneeichete, cha esenetana jeriheichuru cachauru. <sup>31</sup> Nitohanihane jaun nainiheiche: 'Chaque lenoneinna acau cohin, necoreetein, naaonjoaain nerichaache,' naain que nererojoecaaain nena nainiheiche. <sup>32</sup> Cana Coaunera coitucuhichurute, niicha que nererojoecaaain niicha sacunaa jere. Nete laen Cana Coaunera inaraacha latei latequichene coitucue. <sup>33</sup> Aihana jaun Cana Coaunera Cojoanonaacha que coacuhin, jeriha Cana Coaunerane rijijieein ichaohin, niicha jereeicha ichaechajeein neeichenete, satiin caa inara rai aitocooaunne jaan tereein Cana Coaunera. <sup>34</sup> Jiaonriha eresi inaraacha ichaneni que coacuhin nererojoecaaichene. Le janonaa bana naineein, canaacha ichaneni que coaaucaachenete caohachae.

## 7

### *Jiaonriha leeochoauru ichao coulurujueeichene*

*(Lc 6.37-38, 41-42)*

<sup>1-2</sup> Coa leeochoauru ichao coaraain coulurujueein nihache. Nabana nii leeochoauru colurujueeichene rijijieein, inara coulurujaha Cana Coaunerane coataa. Nii leeochoauru coaraain neeichene rijijieeinte inara netonai coareein Cana Coaunera. <sup>3</sup> Chanuna aansijiin laojoiri ichaain baaso ichacuruha leeochoaurune coaraain, acauru que ereein neeiche, inara, acauru amurijiriin jataain baaso ichaain ichaohichene saijieein. <sup>4</sup> Inasiina jataain amurijiriin leinjiin enuha jaberoco que funojoi niha ii notane saijieein, 'Jereeune ii nota que nena utoone rocoe,' naain erenaa nainereei inejera rai. <sup>5</sup> Cha coitucuha nocoetohine saijieein cha coitucuhi. Jauriaanejeein nii ii nota fuera enuha jaberoco rocohin jaaote, caohatiin coaraain nii inejera nota que nena utoone coaraain rocohi.

<sup>6</sup> Coa remaaecuru rijijieein nenacaauru rai, inara que banijiaain Cana Coaunera tenojoin tihache. Nabana inara coinetein inara cunaitaauruhane coataa. Niheichu coosi rijijieein nenacaauru rai, inara rai nelateein nena nii Cana Coauneraacha tei tenaa nainiheiche, que jaolequiin chaque nelatihei rijijieein coaracuruhane jaun.

### *Cha lateein bajaera raite tereein Cana Coaunera*

<sup>7</sup> Cana Coaunera caje cha lateein bajaera raite, inara rai inaraacha latei tereein. Cha lateein ariin bajaera raite, cha teein ne Cana Coaunera. <sup>8</sup> Nii rijijieein techu lateein rene cuha cachane, rae Cana Coaunera. <sup>9</sup> Coaracuche nachuhinti inara caje lenone bajaa inara calaohine, rai ajeri telanaala lenone caohacha teeichene. <sup>10</sup> Ainihane inara caje ate bajaane, rai acano



telanaala rai iniho caohacha teeichene. Nii amuritoheriinte, cha lateein caje bajaa cachane rai caohacha tein ne Cana Coaunera. <sup>11</sup> Coaracuche nachuhinti inara netonai baasoneein inara suujua coaraain ichaaohichene saijieein, cha bajaain niha inara calaohichurune, cha caohacha tein naaonjoaain neeichene. Nii amuritoheriinte cha caohacha tein nereein inara rai Cana Coaunera, caje cha lateein bajaachene.

<sup>12</sup> Nitohanihane jaun inara aina caohachaaain neeuruha leeochoaurune jeriquichene rijijieein, leeochoauru aina caohachaaain neeuche. Nitohaneein ichoai coinate aite nii rauhi aina *profetacuru* inoaensihuru laenanajoi. Aitoha nii rauhine rijijieein ichaoha cachane coina.

*Ichaonaa coero aina cache itajera coero*  
(Lc 13.24)

<sup>13</sup> Nii jaratoelanaala nena coero aina acujua siricha jeroon enooche. Nii cache ichao itajeranu que nena bacujua aina rai coerote, jaraaotokane jaun cuhane cuhin arajiin nitajeeure cachaauru. <sup>14</sup> Jana ichaonaa chabana nitajenaachara nejeein nena rene cache turuaera bacujua aina rai coerote, aansijin jaratohelanaala. Nii jaunte caaintatoha ecu turuha cachane jaun, coroatajajeeincha turuujue cache.

*Ninaa caje enuha baaso coitucuhacane*  
(Lc 6.43-44)

<sup>15</sup> Caohachaaain necohalajiin neeuche, nii Cana Coaunera coitucuha no-coetiinchuru erenacaauru casajeeuru que. Acaaurute turuurureein nii Cana Coaunera coitucuurera tocorijianeichuru inara rene. Nete acaauru suujua cuhane, inara ichao itajeranu baaso uhaain inara rene turuurureein. <sup>16</sup> Inarate nainequiche coitucunajaaiche acaauru ichao cajene. Coatiha inoeri que inaana nainihei oja, niheichu meseri que inaana nainihei acusa. Nii rijijieeinte cache baaso caje ocoona nainene ichaonaa caohacha. <sup>17</sup> Nii rijijieein techu satiin temule caohacha, caohacha que inacae. Jana enuha baasote, jerichanejeein baaso que inacae. <sup>18</sup> Satiin temule caohacha baaso que inaana nainihei. Jerichanejeeinchu caohacha que inaana nainihei enuha baaso. <sup>19</sup> Satiin enuha baasooru- baaso que inaanacaaurute, inae sauhin moconojoiniha cureein. <sup>20</sup> Nii rijijieein techu acaauru ichao caje cache caohachaneein, cache baasoneein, naaonjoaain ichaauruhane coitucuriquicheein.

*Coatiha satiin cachaauru, Cana Coaunera Cojoanonaa que ichaaururinaain.*  
(Lc 13.25-27)

<sup>21</sup> Coatiha satiin canu rai: ‘Canu Curuaanaa,’ naain erenacaauru, Cana Coaunera Cojoanonaa que turuhin ichaonaa nainecururinaain. Canu Inaca Cana Coaunera jerenohin icharate laen, nainereein rai Cojoanonaa que ichaoha ne. <sup>22</sup> Inae nii cojoanonaa que turuhane banate, arajiin cachaauru nesoone caaun: ‘Curuaanaa, Curuaanaa, canacaanune ii coitucuuruha cachaaaurune coina, ii que ereerejetocaaanu, ii curuaa corenihane moconajaera letonocuru sitaain, arajii cojoelanaacojoi ichacaanulu,’ <sup>23</sup> naauruha canu raine janane: ‘Coatiha inara coitucuhaaun, naain cacaje amuuche baaso ichajeein ichaonacaauru,’ naain acaauru sitareeunni.

*Canu ere aonaain caintoonjoan icharate, chabana nitajenereein*  
(Mr 1.22; Lc 6.47-49)

<sup>24</sup> Nitohanihane jaun canu ere aonaain caintoonjoan icharate, leinjiin cache jataain nainain niicha ichai coitucuhi nena, enuha suujui caohacha

que banesijiateein, ucuacaain temuhin neloheritihane jana, <sup>25</sup> uha elone jaun tabaacoaa nucuhecuro aina uha cujuana tabaine jana, nii loreri inasine, enuha caohacha suujui que banesijiateein ucuacaain temuhin ichaa nii icharane jaun. Nii rijiicha canu ere aonaain caitoonjoa ichara cacha. <sup>26</sup> Jana canu ere aohanra nii caintoonjoa ichaelanaala baaso ichajeein ichaonaate, leinjiin cacha aaso erenaa tonoraai, enuha suujui baaso que banesijiateein, araracaaeriin temuhin neloheritihane jana, <sup>27</sup> uha elone jaun tabaacoaa nucuhecuro aina uha cujuana tabaine jaun comohin nerataneein nitaje nii loreri. Nii rijiicha canu ere aonaane saijieein caitoonjoan tonoraain ichaelanaala nenea cacha,” naain jetao cachaauru rai ereereje Jesoso.

<sup>28</sup> Niritiin acaauru rai beebejiha Jesusone jana jetaote, jataain cojoelatoore satiin cachaauru, <sup>29</sup> Moisesa aitoonjoan rauhi que acaauru relaaurera amurijiriin, esinae rauhijiriin suujua caje coitucuhin aitohane jaun.

## 8

### *Cosibi caaun cunaitenaa cacha rautaa Jesusone*

*(Mr 1.40-45; Lc 5.12-16)*

<sup>1</sup> Inae nii cachaauru relaane nainaan, ichatane ucuunno caje fauha uha Jesusone jana jetaote, arajiin sacuure cachaauru. <sup>2</sup> Nii jana jetaote, turuha uhe leinjiin cacha cosibi caaun cunaitenaa. Aca jetaote, Jesoso rene turuhin nacatiha neseeonriaain jetao:

“Ii jereeine canu rautaa caa canu cosibi cajera Curuaanaa,” naane jana jetao:

<sup>3</sup> “Jerichaaun chujian. Ii caje amuhine caa ii cosibi,” naain biji que dadaa Jesusone rijieeoritiin, nii rai cosibi caje nerautaa somaraain ne nii cacha. Nitohanai cunai siricha cacha rohan nichuuntaain dadanaa naineniha chunine que airijiin, rohan nichuuntaain dadae Jesoso. <sup>4</sup> Nitohaneein rautaa jetaote:

“Aonaau. Jiaonriha chuni rai catohaneein ii rautaa nihanune beeinera. Raujiaaincha nii Moisesa aitoonjoan rijijieein, Cana Coanera belaiha saseredote rai iicha teeni amaaun cunihunte caje inae nerautaa coaracurumiin cachaauru. Chaen techu inae nii ii cunai caje nerautaa somaraain leeochoauru rohan turunaa naineeine coaracurureein satiin cachaauru,” nae rai Jesoso.

### *Romanocuru rai soondarooru curuaanaa letono rautaa Jesusone*

*(Lc 7.1-10)*

<sup>5</sup> Inae Caferenaan turuha Jesusone jana jetaote, rene turuhin jetao:

<sup>6</sup> “Curuaanaa, canu letononeein nenaate cunaiteein ne canu loreri asae, itolereneein jiurohin cunaacoaa rai jaberocone jaun,” naain Jesoso rai biha leinjiin Romanocuru rai soondarooru curuaanaane jaun jetao:

<sup>7</sup> “Inae rautaa urichaaunni,” naa rai Jesusone jaun jetao:

<sup>8</sup> “Curuaanaa, coatiha chaque ichei nelatejeehaaun canu loreri asae turuha uhine coina. Raujiaaincha nii cunai sitaaun canu letono caje, aihute nerautamiin. <sup>9</sup> Nitohaneeinne canu letoaaun neeuruha canu curuaanaacurune acaauru ere tonoraain neeun. Nii rijijieein techu, neeure canuhacha letoaeni soondarooru. Leinjiin letoaanunete quere tonoraain cue. Jana leeocho cotihacaunnete uhe. Chelai ichaa canu letonone coina letoaanune techu ichae quere tonoraain,” naa Jesoso rai Romanocuru rai soondarooru curuaanaane jana, <sup>10</sup> cojoelatiin jetaote: “Esinae rauhijiriin coatiha nihei chuni Israeli cocoaicha, caa cacha rijijieein jataain quesentaera coarahaun chabana. <sup>11</sup> Esinae rauhijiriinte enoto mitu nichajai, enoto so nichajai, naaonjoainuri cajeeuru arajiin uhin, Abaraaun, Isaca,

Jacobo, naaonjoainuri aina raotojoein turuhin lenonecurureein, inae Cana Coaunera cojoanona que turuhane bana. <sup>12</sup> Jana Isaraelitaauru tabaaaurute, rai cachanu que ranajaain nihalu Cana Coaunerane saiijeein, inae Cana Coaunera cojoanona que turuhane bana, nocoheanaanau jaoleneein chanaa curureein nesoone caaun,” nae jetao aina cunacaauru cachaauru rai Jesoso.

<sup>13</sup> Niritohane baiha jetaote:

“Chajaain chenenajaun caunihute, nii esenetaain jereeine rijijeein nerautamiin ii letono,” nae Jesoso. Nii rijieeoritiin jetaote, inae nerautae nii soondarooru curuaanaa letono cunaitenaa.

*Fedoro tano rautaa Jesusone*

*(Mr 1.29-31; Lc 4.38-39)*

<sup>14</sup> Nii baiha jetaote, Fedoro loreri asae turuha cuha Jesusone jana jetao, ecu sininaja ichoae ajaa caaun cunaiteein niha Fedoro tanone jana eruuruha cue. <sup>15</sup> Inae ecu turuhin nii cunaitenaa biji mucuha Jesusone rijieeoritiin jetao, inae caje amuha nii ajaane jaun, nerautaaain nimichuhin acaauru rai lenone chalue.

*Arajii cunaitenacaauru rautaa Jesusone*

*(Mr 1.32-34; Lc 4.40-41)*

<sup>16</sup> Inae nocohejihane jana, arajiin suujua cuhane coitucuchuhichuru siriin caaun cunaitenacaauru uhaain turuuruha cachaaurune jana jetao, nereecha que nii cacha suujua cuhane nenacaauru coitucuchuhichuru sitaain, satiin cunaitenacaaurune maajeein rautaacoae Jesoso.

<sup>17</sup> Nitohaneeinte ichae Jesoso,

“Acate turureein

cana caje cana osa aina

cana cunainunru itajihane coina,”

naain besihalu Cana Coaunera ere bera inoaensi Isaihasine nainaane coina.

*Jesoso aina cunaa jereraauru*

*(Lc 9.57-62)*

<sup>18</sup> Nii jana arajiin curuhacaain neeuruha cachaaurune coaraane jaun jetaote, nemuri jerau amauruha aina nerelanacaaurune coina acaauru rai aite Jesoso. <sup>19</sup> Nii jana jetaote, rohan nichuuntaain jetao: “Curuaanaa, ii ainane unaa jereeun, chunijiun cuhine jaun niha natiin,” naa Jesoso rai Moisesa aitoonjoan que cacha relaerane jana jetaote:

<sup>20</sup> “Arolarihurute sininajaanu siriin naaonjoaunre. Jerichanejeein techu sininajaanu siriin naaonjoaunre tajaecuru. Nena laen canu Cana Coaunera Calaohi cacha caje nejanoanaa nichaanne, nene canu rai chunijiun nesurucuaanne jaanura,” nae jetao rai Jesoso. <sup>21</sup> Nii jana jetaote, aina nerelanaa netonai jetao: “Curuaanaa, inae oha canu inacane janane conautichaaune baiha ii aina ureuni,” naa raine jaun jetao:

<sup>22</sup> “Niriimiin. Canu sacuhachaaute ecu nejesinajeein Cana Coaunera coitucuhi nesinanejeein ichaoruhine ooruhane reentiaain,” nae jetao rai Jesoso.

*Cujuana aina fichafichanaa suruaa Jesusone*

*(Mr 4.35-41; Lc 8.22-25)*

<sup>23</sup> Niritiin jetaote, aina nerelanacaauru aina jiniiquiin bote cuhane fauhin jelai caje amue Jesoso. <sup>24</sup> Nii jana inae bote cuhane cuujueeuruhane jana, uha cujuana tabai aina fichafichanaane jaun jetaote, enohe bote cuhane acau. Nii jana jetaote, tonajelanaala bote cuhane sinii siniicha Jesusone jana <sup>25</sup> nocoain jetao:

“Curuaanaa, inae nalunaa jerichaache. Chajaain caa acau caje cana ichoterateeu,” naauruha aina nerelanacaaurune jana jetaote:

<sup>26</sup> “Chanuna jataain nesooneeiche. Jataainachura ansijieeinijin cha esenetaeneeichete,” naain nimichuhin cujuana aina fichafichanaa suruaa Jesusone jaun jetao, inae neniha fichafichanaane jaun raotojoein cuujueeure.

<sup>27</sup> Nii jana cojoelatiin jetaote:

“Chatohanaineeinna ne caa cacha, cujuana aina cucuana cuhane niha natiin nere tonoraain nesuruhane coina,” naaure jetao ecu nejesinajeein aina nerelanacaauru.

*Cadara batane que coroatajai suujua cuhane coitucuchuhi sirichaauru rautaa Jesusone*

*(Mr 5.1-20; Lc 8.26-39)*

<sup>28</sup> Inae nemuri jerau aina nerelanacaauru aina jiniiquiin Cadara batane que turuha Jesusone jana jetaote, atanebana jelai caje cuhin jetao, coineteure coroatajai cachaauru, suujua cuhane coitucuchuhi sirichaauru. Acaauru jetaote, enaacha cacha cunaitaane jaun, nene chuni nii neeurunaja bero cuhane amui. <sup>29</sup> Acaauru jetaote:

“Coo canacaanu rene turuhin canacaanu rerohecaa Cana Coanera Calaohi Jesuso. Nechu jataain canacaanu rerohecaain, canacaanu cairichaaine coinete, jaiti cojoanona que turuenihane jana turuhicha,” naaure jetao ehequuin. <sup>30</sup> Nii jana ecu rohan arajiin lenoniha neeuruha coosichurune jaun jetaote:

<sup>31</sup> “Caa cachaauru suujua caje canacaanu sitanaa jereeine, nii coosichuru suujua cuhane canacaanu letoaaura,” naauruha Jesuso rai, nii cachaauru suujua cuhane nenacaauru coitucuhichurune jaun jetaote:

<sup>32</sup> “Taa coosichuru suujua cuhane cunichuchera,” naain jetao nii coitucuhichurune letoae Jesuso. Nii jaun jetaote, nii cachaauru suujua caje mituhin, coosichuru suujuaniha enooruha nii coitucuhichurune rijiee-oritiin jetao, satiin ramarau nemarotihacoaain nereeonohin ohacoaure nii coosichuru.

<sup>33</sup> Nitohanihane coaraain jetaote, jelai caje sorohin jetao, neseu turuhin nii coosichuru suujua niha enooruha coitucuhichurune jana, ooruha coosichurune beure nii coosichuru beraihurera cachaauru. <sup>34</sup> Nii jaun jetaote, satiin nii nese caje cuhin, nii niha Jesusone jaun rene turuhin coaraain jetao, rai aitocure chajaain jelai caje amuhane coina.

## 9

*Jiurona cacha rautaa Jesusone*

*(Mr 2.1-12; Lc 5.17-26)*

<sup>1</sup> Nii baiha jetaote, aina nerelanacaauru aina jiniiquiin bote cuhane fauhin cuhin nemuri jerau ichaohalune jaun Caferenaon turuha cue Jesuso.

<sup>2</sup> Inae ecu turuuruhane jana jetaote, nela cuhane leinjiin jiurona cacha turuaa cuuruha Jesuso rene cachaaurune jana, jataain rautaane esenetaain aihuruha nii cachaaurune coaraane jaun, nii cunaitanaa rai jetao:

“Nelararajiaaura cacalabi. Inae ii osa caje ichoteratenohi neeicha,” nae jetao rai Jesuso.

<sup>3</sup> Nii aonaain jetaote:

“Chanuna caritiin Cana Coanera baijiaraanu rijitiin ere caa cacha,” naain jetao suujua cuhane coarajeeure Moisesa aitoonjoan que cacha relaureraauru tabaauru. <sup>4</sup> Nejetaote niritiin baasoneein suujua cuhane coaucuruhane coitucuhane jaun jetao:

“Chanuna baasoneein itolere bana inara suujua coaraquiche. <sup>5</sup> Chaa quena caaintare: ‘Inae ii osa caje ichoteratenohineein,’ naenihacane: ‘Chajaain nimichuhin chela seriin amuun,’ naacane. <sup>6</sup> Coarajeeuche nachuhintine, canu Cana Coaunera Calaohi- cacha caje nejanoanaa nichaaunne co-cainaan lethanojoinichaaun osa caje cacha ichoteratichaaunne coina, caa chauratane quene coarate inara que,” naa acaauru raine baiha jetaote, nii jiurona cacha rai jetao:

“Chajaain nimichuhin chela seriin chenenajaun cauninura,” nae nii jiurona rai Jesoso. <sup>7</sup> Nii rijieeoritiin nimichuhin jetao, rai nenajaun cauha cue nii jiurona cacha. <sup>8</sup> Nii coaraain jetaote, rai suujua rauhi inaaoritelanaala que casiin Cana Coaunera coroaacure. Nitohanai ichana nainiha cachane jaanu tein niha Cana Coaunerane coaraain.

*Mateo cotihaca Jesusone*  
(Mr 2.13-17; Lc 5.27-32)

<sup>9</sup> Nii jiurona cunaitenaa rautaane jaan jelai caje uhin canu- Mateo nichaaunne, Roma curuaanaa rai *impoestonu* que cachaauru cobaraain coriqui bajaanune jaan rori ichoae lauhecohanune jana canu coaraainte:

“Chajaau canu aina,” naain canu cotihaca Jesusone jaun, nii rijieeoritiin nimichuhin Jesoso aina cuun.

<sup>10</sup> Nitohaneein kuhine canu loreri asae turuhin, satiin aina nerelanacaauru aina curuaaecaain Jesoso coroaateun. Nii janate ecu canacaanu rene turuhin nelauriaain lenonecure jataain arajiin Roma curuaanaa rai *impoestonu* que coriqui bajaaureraauru canu leeochoauru, chaen leeochoauru cachaauru- nechu aansaineein ichaonacaauru, osaaonacaauru, naaonjoainuri. <sup>11</sup> Nii coaraainte Jesoso aina nerelanacaauru rai:

“Chanuna caa *impoestonu* que coriqui bajaaureraauru aina, caa osaaonacaauru aina lenone caa inara relaera,” naauruha fariseeocurune <sup>12</sup> aonaainte:

“Coatiha coichaera latecuruhi raurohin nenacaauru. Leinjiin cunaite-nacaauruhachate coichaera latecure. Nii rijijieein canu latecuruhi caohachaaain ichaoha nocoetonacaauru. <sup>13</sup> Chajaain nii Quiricha Inoensi kuhane: ‘Coatiha chelai sohin mocohin que canu belaaichene jerinaaun. Raujiaaincha jiniiquuin cairichaaajoaain ita coaraain ita belaaain neeichenena jereun,’ naain laenanohi nihane jaan que nerelanihuhe. Aihane jaun, coatiha nii caohachaaain ichaoha nocoetonacaauru cotihaca uhaaun, osaaocuruhane coitucuhin nichao coreein caohachaaain ichaonaa jereraaurune cotihaca uun,” nae fariseeocuru rai Jesoso.

*Suri couu neein cosinacaain Cana Coaunera bajaauruhane*  
(Mr 2.18-22; Lc 5.33-39)

<sup>14</sup> Nii janate Jesoso rohan nichuuntaain:

“Chanuna fariseeocuru aina canacaanuhacha canacaanu suri couu netiin cosinacaain Cana Coaunera bajaacaanune jana, ii aina nerelanacaauru aihurene,” naauruha Joaan Baotisita aina amuhemuhenacaaurune jana jetaote:

<sup>15</sup> “Chasiina suri couu netiin cosinacaain inaderaaurure ene ranaa jerera beseta que cotihanohichuru, jaiti acaauru aina niha nii ene ranaa jerera cacha natiin. Nete inae nii jianacoon tein cacha ranaa jerera nichaaunne mucuhin amaaauruhane banate laen, suri couu cosinacaain niha cuurureein- nii beseta que cotihanohichuru.

<sup>16</sup> Coaracuche nachuhinti, nihei chuni obiri enachasine soaain, cajione siri que counera. Nitohaneein nii obiri enachasine soaihanete, nii obiri

enachasine asaaere nii cajione siri. Chaen caohachaaain nedanaa nainerihehi nii obiri enachasine, nii cajione siri que couneraane. <sup>17</sup> Nii rijijieeinchu nihei chuni inae conaca que tiha coaeraine jana, cuhane ichonai tera. Nitohaneein cuhane teraa ichonainete naasaaere nii coaerai. Nitohanihane jaunte, caohachae coaerai nejesinaneein niha coaeraine. Chaen ichonai, ichonai nejesinajeein nihane caohachae,” nae acaauru rai Jesuso.

*Jesoso cajione dadaera ene aina Jairo cacunu*  
(Mr 5.21-43; Lc 8.40-56)

<sup>18</sup> Niritiin acaauru rai ereereeca Jesusone janate, rene turuhin nacatiha neseonriaain:

“Jataain enate nijioaen canu cacunu. Nete canu jiniichaain uhin dadaaine nacoaaneein ichanareein,” naain Jesoso cotihaca leinjiin Jorioocuru curuaanaane jaun, <sup>19</sup> nii rijieeoritiin nimichuhin aina nerelanacaauru que corihaneraain caaijie cue Jesuso. <sup>20</sup> Nii janate lechoonca coroata jaanacaain, rai jaberoco caje ichana jaohajeein niha leinjiin enene jaun, Jesoso rohan nichuuntaain caaijie cutiin cajione auha mucuuri: <sup>21</sup> “Caa rai cajione auha mucuhanuneecha caaunne nerautareeunni,” naain esenetaane jaun. <sup>22</sup> Nete rai cajione auha mucuhane jana nauriteriin nii ene coariin:

“Nelararajiaaura ene, jataain nerautaaaine esenetaain aaine jaunte inae nerautaaicha,” naa rai Jesusone rijieeoritiin, inae nerautae nii ene ichana jaohane caje.

<sup>23</sup> Nii ene rautaane caje cuhin, nii Jorioocuru curuaanaa loreri asaae turuha Jesusone janate, inae atane rucuhacuruhane rai neein cojioriinchuru coinaderaauruha cachaaurune jana turuhin:

<sup>24</sup> “Satiin caalai caje mituuche. Coatiha ohane jaun aihei caa ranuna, sinihane jaunte aicha,” naa acaauru rai Jesusone jana coenacure ecu neein coarajeeurera cachaauru. <sup>25</sup> Nete coenacuruhane saijieein, jitariin nii loreri caje mitanajaane baiha, nii ranuna rene enohin biji que mucuhin michuha Jesusone jana nimichue nii ene. <sup>26</sup> Nii coaraante ita rai beeuruha cachaaurune jaun, satiin jelai batane sacuritaain coitucunojoi ne nii o caje ranuna ichatiha Jesusone.

*Coroatajai maosa rautaa Jesusone*

<sup>27</sup> Nii ranuna ichatihane baiha caje amuha Jesusone janate caaijie cuhin:

“Jataain cairichaaajoaain canacaanu coaraaura Rabiri nefoerate,” naain eheehequiin sacuure coroatajai maosacuru. <sup>28</sup> Nii janate inae loreri asaae turuhin, ecu enoha Jesusone jana rohan nichuuntaauruha nii coroatajai maosacurune jaunte:

“Caa maosa neeichene caje inara nota teein nihanune esenetaaichena,” naain acaauru caje bajaa Jesusone janate:

“Aihacaanura Curuaanaa,” naauruhane jaun, <sup>29</sup> biji que acaauru nota dadaain:

“Nii esenetaaichene rijijieein conohine inara notara,” naa acaauru rai Jesusone rijieeoritiin, <sup>30</sup> inae conoe acaauru nota. Nii jaunte:

“Coa leeochoauru rai caa inara nota teein nihanune bihache,” naain acaauru suujuatiha Jesusone saijieein, <sup>31</sup> jelai caje amuuru rijieeoritiin beeuruhane jaun, inae satiin jelai batane sacutaain acaauru nota teein niha Jesusone coitucuure.

*Erenaachara cacha rautaa Jesusone*

<sup>32</sup> Inae jelai caje amuuruha nii coroatajai maosacuru niicha rautaurine janate, erenaachara cacha, coitucuchuhi que suujuequiin nenea turuaa

uure Jesoso rene. <sup>33</sup> Nii janate nii coitucuchuhi sitaa Jesusone rijieeoritiin, inae irihane nunuhete nii erenaachara cacha. Nii coaraainte:

“Coatiha chabana catohanai coarahaacache Israeli lauri nichaachene janata,” naaure cojoelatiin cachaauru.

<sup>34</sup> Nete:

“Jeelai coitucuhuhichuru curuaanaate, caa catohaneen coitucuhuhichuru sitaain niha caa cachane jaanu teein nera,” naaure ecu neen coarajeein fariseecuru.

### *Cairichaaajoaain cachaauru coaraa Jesusone*

<sup>35</sup> Nitohaneente neseeuu cuhecujueein nenaanajaauru naineen amuhemujueein, netaojiaain Cana Coaunera rai rauhi que ereereecuruhane jaan coloheri sinacocacuru naineen cuhecujueein, Cana Coaunera Cojoanonaa erenaa raotono que cachaauru relaain, itolere cunai caaun cunaitenacaaurune maajeein rautae Jesoso. <sup>36</sup> Nii jana cachaauru coaraa Jesusone janate, nii chaque nelatihei rijijieein beraicha colane nena carenero rijijieein amuhemuhecuruhane jaun cairichaaajoaain acaauru coarae. <sup>37</sup> Nii jaunte:

“Jataainte esinae arajiin neeure cachaauru, Cana Coaunera coitucunaa jereraauru. Nete nene acaauru relaeranura. <sup>38</sup> Aihane jaun Cana Coaunera bajaachete neeine acaauru raain acaauru relaeranu,” nae aina nere-lanacaauru rai Jesoso.

## 10

### *Aina nerelanaa nichaanune caje, lechoonca coroatajai nichaanune janijiin cocoainaa Jesoso afosotoneeine*

*(Mr 3.13-19; Lc 6.12-16)*

<sup>1</sup> Nii jaunte lechoonca coroatajai aina nerelanaa nichaanune cotijiaain janijiin, canacaanu cocoainaan canacaanu letoae Jesoso, cachaauru suujua cuhane nenacaauru coitucuhuhichuru sitaain, itolere cunai caaun cunaitenacaaurune maajeein rautaacaanune coina. <sup>2</sup> Nii lechoonca coroatajai afosotoorunu que niicha cocoainai nichaanunete, jauriaanejeein Simoon Fedoroneein acaauruhacha curuaatei, rai nejera Aanderesi, Saantiaao aina rai nejera Joaan Sebedeo calaohineein nenacaauru, <sup>3</sup> Ferifi, Bartolomee, Tomasi, chaen canu Mateeo nichaanne Roma curuaanaa rai *impoestonu* que cachaauru cobaraain coriqui bajaera nichaaulune, Arafeeo calaohi Saantiaao, Tadeo, <sup>4</sup> chaen jauriaanejeein Romanocuru que nejeratenacaauru aina nenaalu Simoon Seloteneein niicha curuaateuri, chaen nii baiha Jesoso coulurujueranu Jodasi Isacariote, naaonjoainichaanu.

### *Cana Coaunera Cojoanonaa que cachaauru relaauruhane coina aina nere-lanacaauru letoaa Jesusone*

*(Mr 6.7-13; Lc 9.1-6)*

<sup>5</sup> Nitohaneen nii lechoonca coroatajai aina nerelanaa nichaanune letoainte canacaanu suujuate: “Coo nii Cana Coaunera coitucuelanaala ichaonacaauru atane que cuhache. Niheichu Samaria cocoaichacuru rene niha natiin coa turuhache. <sup>6</sup> Ucuuae cuelanaala, Cana Coaunera cachaneen nitajera nenacaauru Israeli cocoaichacuru rene cunichuche. <sup>7</sup> Chajaain ucuuae cuhin, inae nichuutaa Cana Coaunera Cojoanonaane benichuche acaauru rai. <sup>8</sup> Chaen cunaitenacaauru rautain, onacaauru nihanatiin ichateen, cosibi caaun cunaitenacaaurune maajeein rautain, cacha suujua cuhane nenacaauru coitucuhuhichurune maajeein sitaauche. Inarate core colane nitohanai ichana nainequichene jaanu raain neeiche. Aihana jaun nitohanai ichaain neeichene, coa core bajaache.

9-10 Coa inara coriqui, inara atora, inara cajione necoreeteiechene jaanu, inara safato, inara biji achune, naaonjoainuri amaain cuhache. Niha rauhi, amihanenacaauru coroaateeuruha cachaaaurune coina. <sup>11</sup> Leinjiin neseu, nenaanajaun, naaonjoainu turuhichene, chunocoha caohachaaain inara raera cacha ariin, rai loreri asaae neeuhe jelai caje amuhichene reentiaain. <sup>12</sup> Inae nii loreri asaae turuhichene neein, loreri asaae nenacaauru rai ereein turuuche. <sup>13</sup> Nii jana raoti ichaonaa que ichaonaa jerecuruhanete, raotojoein inara raaurureein nii loreri asaae nenacaauru cachaauru. <sup>14</sup> Jana caohachaaain inara raelanaala inara aohana jerecurenihane, nii loreri caje, chaen nii nese caje, naaonjoaain caje inara amuneein inara tijia que nena utoone rihariaain ratiriin amuuche. <sup>15</sup> Esinae rauhijiriin acaaurute cana janonaa besaute que inae tihane bana, Sodoma, Comora, naaonjoainuri batane que ichaonacaauru amurijiriin caseteco coaracurureein.

### *Mucunojoinecuruhane coina arichacuruhane*

<sup>16</sup> Aonacuche, canune inara letoaaun janolari mululune jana situha cuha irine rijijieein cuhichene coina. Aihana jaun cacha cunaitaane coina nainaa acanone rijijieein cunichuche. Chatohaneein teraane nihanatiin nerinanaa naineniha serorine rijijieein. <sup>17</sup> Aihane jaun caohachaaain nainaa necohalajiin cunichuche. Cocoainanacaihuru rai inara teeuruhane janate, sinacoca asaae inara amaain inara bisiin, <sup>18</sup> coberenadorocuru rene inara amaain, reychuru raine maajeein inara amaaurureein canu coreniha. Nii janate canuneein nihanune coitucuerateriquicheein acaauru que, chaen nii Cana Coaunera coitucuelanaala nenacaauru quene maajeein. <sup>19</sup> Inae cocoainanacaihuri bijiu inara teeuruhane, coa acaauru tonoraain ereeichene jaanu que tonajianche. Inae ereeichene coina neeichene janate, Cana Coaunera Suujue, inara rai ereeichene jaanu tereein. <sup>20</sup> Aihane jaun coatiha inara ecu ereriheeicheein. Cana Inaca Cana Coaunera Suujuete inara coreniha ecu erereein.

<sup>21</sup> Nitohanerichaaine jaunte, rai nejeraauruhacha, nejeraauru tereein ateinanohineeuruhane coina. Nii jana rai inacaauruhachate, rai calaohichuru tereein cocoainanacai rai. Nii jana acaauru calaohichuruhachate, inacaauru que nejerateein inacaauru teeurureein ateinanohineeuruhane coina. <sup>22</sup> Satiin cachaauru caa chauratane sacuritaain canu coitucuelanaala nenacaaurute, canu coreniha inara que nererojoecaa cuurureein. Nete nii esenetaane jianelanaala, atiin satono que tiaain jerichanejeein sacuera nichotereein. <sup>23</sup> Leinjiin neseu turuhichene jana, inara rohecaain inara mucunaa jerecuruhane, leeocho neseu cuhin sorooche. Esinaene aitoon. Jaiti Isaraeli nefoerateeuru sacuritaain turuheneeichene janane, canu inara ichohaichaniha ecu turureeunni canu acaihaniji Cacha Calaohineein nejanoanaa nichaaunne.

<sup>24</sup> Niheichu rai relaera amurijiriin nena nainihe i aina nerelanaa. Niheichu rai fatoroon amurijiriin nena nainihe rai cachaneein nena. <sup>25</sup> Relanojoneein nenacaauru, acaauru relaera rijijieein neeuruhine. Jana letononeein nenacaauru acaauru curuaanaa rijijieein neeuruhine. Canu inara Curuaanaa neein inara relaera nihanune que moconajaera Beelseboo niha canu beeuruha natiin, tonacururiha jana inara que.

### *Coasinacaineein niha ohacachene baiha cana itajeraneein nenaane* (Lc 12.2-7)

<sup>26</sup> Aihane jaun, coa cachaauru coasichache. Coitucueraelanaala, asinojoneein chaachaaain niha chunine niha natiinte, coitucunojoiniha cureein. <sup>27</sup> Jana caa coitucueraelanaala nena nii chuni aonaenihane jana, caa



caitoonjoan coitucuerateeu che satiin cachaauru urichoo netiin. <sup>28</sup> Coa inara atinana naineraauru que casihache, inara atinaauruhane baiha chabana satonoelanaala neeni janonaa que neeni, inara suujue itajenaa nainecurenihane jaun. Nete laen nainequiche chabana satonoelanaala nena usi jana inara jaberoco aina inara suujue itajeranu neein nena- Cana Coaunera que casiin neeichene.

<sup>29</sup> Tana nii chaque nelatejee cane que airijiin leinjiin moneda que coriha coroatajai tajaelineane coitucuhichene. Nete jereniha cana Inaca Cana Coaunerane nii leinjiinijin nitajenaa nainecurene. <sup>30</sup> Nii amurijiriin inarate, inara couturijine maajein leinjiana leinjianaain janiinojoneein ne. <sup>31</sup> Aihane jaun coa casiin ichaohache. Inarate jataain tajaelineaacuru amurijiriin nelateein neeiche.

*Cachaauru que Jesocurisito coitucuerateeurera*  
(Lc 12.8-9)

<sup>32</sup> Chunocoha cachaauru que canuneein nihanune coitucueraneein, canu cachaneein nihane coitucueratera ne, acaentonai coitucueratereeeunni dedeeu nena Ofa Cana Coaunera acatiha neein. <sup>33</sup> Nena laen canuneein nihanune coitucueraneein canu cachaneein nihane saijieein, canu coitucuerate lanaala nena que acaentonai coitucuenereeeunni Ofa Cana Coaunera acatiha neein.

*Ita caje cache lerueraneein niha Jesusone*  
(Lc 12.51-53; 14.26-27)

<sup>34</sup> Coatiha raoti ichaonaanaja turuaa uhaaunlu caa chauratane que, ita que nererojoecaain ichaoha cachane jaane turuaa uunlu. <sup>35</sup> Nitohanihane jaunte, rai inaca que nejeratiha rai calaohine jana rai neba que nejeratereein rai cacunu. Jana rai nebaene quete nejeratereein rai nacana. <sup>36</sup> Nitohaneeinte nechu naraaicha que nejeratenaaneein neeurureein cachaauru. <sup>37</sup> Rai inaca, neba, calaohi, cacunu, naaonjoainuri belaihane amurijiriin cacoelainihane, nii chuni canu cachaneein nena nainihe. <sup>38</sup> Itolere necairichanaa abaantaain coroso que nerichaaunnine rijijieein necairichanaa abaantaenihane, canu cachaneein nena nainihe. <sup>39</sup> Nete laen canu, rai nichao ichoteratena nainichaaunne coitucuhin canuhacha cohajein nena, nichao ichoteratereein canu coreniha. Jana canu esenetaelanaala, canu colane nichao ichoteratena jererate rai nichao itajereein.

*Cainanohinerichaaain namute cache rai cha tera*  
(Mr 9.41)

<sup>40</sup> Chunocoha inara raerate canu raa aicheein. Jana caohachaaain canu raerate canu letoaera raa aicheein. <sup>41</sup> Cana Coaunera letononiha leinjiin *profetane* coreniha caohachaaain raain nenaate, *profeta* rai cainanohiniha rai namihaneone rijijieein nii raane coreniha rai cainanohiniha cureein. Chunocoha leinjiin cache caohachaaain nena raain neite, jerichanejeein nii cache caohachaaain nena rai cainanohinihane rijijieein, nii raane coreniha rai cainanohiniha cureein. <sup>42</sup> Chunocoha caa ena canu sacunaa nunuhetejeeureraauru rai, nechu jataain canu sacueranihane coreniha le eraurujeein conacai tein nei raite, esinae rauhijiriin cainanohiniha cureein,” nae aina nerelanaanichaanune rai Jesoso.

## 11

*Jesoso rene turuuruha Joaan Baotisita letonocurune*  
(Lc 7.18-35)

<sup>1</sup> Nii lechoonca coroatajai aina nerelanaa nichaanune relaane baihane, jelai batane que nenacaauru neseuru naineen cuhacaanu, Cana Coanera beratenojoin erenaa beebejeein cachaauru relaa amuhemuheca Jesusone coina. <sup>2</sup> Nii janate caresero cuhane netiin benaa caje itolere ichaa Curisitone coitucuhin aina amuhemuhenacaauru letoae Joaan: <sup>3</sup> “Iina esinae rauhijiriin, nii turuha uheneni Curisito niha. Aca neneeine beeune turuha leechane cohacaanu,” naain rene turuhin bajaauruhane coina. Nii jaunte letoanajaane rijitjoeein aitocuruha rene turuhinne jaun:

<sup>4</sup> “Chajaain caa inaraacha coarai, inaraacha aonai benichuche Joaan raicha. <sup>5</sup> ‘Inae maosa neeuruhane caje conoa maosacuru notara. Bacosacuru niha natiinte, inae nichaaurain amuurera. Cosibi caaun cunaitenacaauru niha natiinte, inae somaraain neeure cosibi cajera. Urichosaaecuru niha natiinte, inae enene erenaa aonacurera. Onacaauru niha natiinte, inae o caje ichanacurera. Jana cairichainejeein nenacaauru raite, Cana Coanera beratenojoin erenaa beebejeein, nosa caje nichoteeururichaaine beebeje. <sup>6</sup> Nerausiaaejeeinte neeure rai suujua corelanaala acanihane esenetaain acaacha cohajeein nenacaauru,’ naain benichuche Joaan raicha,” naain Joaan letonocuru letoae Jesoso. <sup>7</sup> Inae jelaiha cauha cuuruha Joaan letonocurune janate:

“Chatohanai coaraa cuhichelu cacha areroo cuhin. Leinjiin jiarana nujua cujuana ichanohineein nerurujuanaana coaraa cuhichelu. <sup>8</sup> Ainihane leinjiin cacha, cajione caohacha que necoreteein neina coaraa cuhichelu. Inarate raotojoein coitucuhiche, cajione caohacha que necoreteein nenacaauru, *reychuru* loreri asaae neeuruhane. <sup>9</sup> Chatohanai coaraa cuhichelu. Leinjiin Cana Coanera ere bera *profetana* coaraa cuhichelu. Aiha laesinaae, nii choae tacaain jataain leinjiin *profeta* amurijiriin nenaate esinae rauhijiriin coaraa cuhichelu. Acate Joaan ne. <sup>10</sup> Nii Joaan quete:

‘Canune ii ajiniha

cachaauru rai ereerecane coina

canu ere bera letoareeunni

turuhine jaanu rucuheranu que,’

naain ne laenanohineein Cana Coanera Quiricha cuhane. <sup>11</sup> Esinae rauhijiriine aitoon, satiin cachaauru caje nihei chuni cacha Joaan amurijirii jataain nelatein nei, Moisesa que Cana Coaneraacha teratenojoi Cojoanona bana. Nete laen, ena turunaa Cana Coanera Cojoanona, Joaan fautaain nelatihei rijijieein nena, jataain nii Joaan amurijiriin nelateineein ne.

<sup>12</sup> Turuhalu Joanne caje coauneeinte, enanetojoein ena turunaa Cana Coanera Cojoanona turuaera nichaanne que nejerateein itajenaa coaacure Cana Coanera coitucuhichuru curuaanaacuru. <sup>13</sup> Satiin *profetacuru* aina Cana Coanera aitoonjoaunru rauhite, nii turuha uheni Cana Coanera Cojoanona coitucuerateein neeurelu, turuha Joanne que tiaa-joaain. <sup>14</sup> Inarate esinae rauhijiriin nacoauneein turuha urichaaain Irihasine que aitocuruhalune coitucuhiche. Acate nii Joaan neein turuhelu. <sup>15</sup> Caa aitocoaunne aonacurumiin urichonacaauru. <sup>16-17</sup> Caa cachaauru, enene cojoanona que nenacaauru ichao bihanune jaannu coitucuhaaun. Aihuruha canaanaiuru nenaanaja cataaun nocoatijiaan, rai corihacuru rai eheehequuin:

‘Raansaichene coina auno totihacaanu. Nete canacaanu auno rautaelanaala raansanaa jereneeiche. Inara cotijiaain, berane jaain inaderaacaanune jana, canacaanu aina inaderaaheiche,’ naauruhane rijichuruha.

<sup>18</sup> Nii rijijieein techu, turuha Joaan joaenreen lenone que lenonelanaala, bino conaa inaelanaala, naaonjoaaine jana, moconajaera suujue siriha beeiche. <sup>19</sup> Nii baiha turuhanu canu, cacha calaohineein nejanoanaanichaaunne jana, bino cohin, joaenreein lenone que lenoneein, naaonjoaineeinne jana, 'Achotoritiin, ajetoriaaneein, baasoneein ichaonacaauru osaaonacaauru belaichaneein, Roma curuaanaa rai *impoestonu* que cachaauru cobaraain coriqui bajaaurera belaicha niha' canu beeiche. Nete jataain itolere que nainaaain, chaachaain niha Cana Coaunerane caje coaraain, coitucunojoi ne niicha ichai," nae Jesoso cachaauru rai.

*Caseteco coaracururichaain erenaa tonoraauruhi cachaaurune*  
(Lc 10.13-15)

<sup>20</sup> Cojoelanaacojoai ichaalu Jesosone saijieein nichao coreein nacoaauneein Cana Coaunera coitucuureniha nii nese que ichaonacaauru cachaaurune jaunte: <sup>21</sup> "Jataainte cairichaaajoaiche nohane, Corasiin cocoaichacuru. Cairichaaajoaiche nohane Betesaaida cocoaichacuru. Inara que cojoelanaacojoai ichaain coaratihanulune tocohaneein, Tiro, Sidoon, naaonjoain cocoaichacuru rai cojoelanaacojoai ichaain coaratihanulune jana nihanete, inae inoaelnu nejeein inae nichao coreein, nacoaauneein Cana Coaunera coitucueraneein neeuruhane coarateeurure niicha jerenohin ichaain. <sup>22</sup> Nete inae coitucuhichuru coulurujueein casetecaeratihane jaan Cojoanona que turuhane bana, Tiro, Sidoon, naajoainunri cocoaichacuru amurijiriin caseteco coaraa curiquicheein inara. <sup>23</sup> Jana inara, Caferenaaon cocoaicha neeichene, inacojoein caohachaain niha nocoetiin raotiin nena coaauquiche. Nete ohichene bana nocoehena tabai jana nitajiha curiquicheein. Nii inara que cojoelanaacojoai coaratihanulune tocohaneein, Sodoma cocoaichacuru que coaratihanune jana nihanete, enanetojoein neeurure jelai cocoaichacuru. <sup>24</sup> Nete inae coitucuhichuru coulurujueein casetecaane coina turuha Cana Coaunera Cojoanona que turuhane bana, Sodoma batane cocoaichacuru amurijiriin caseteco coaraa curiquicheein inara," nae cachaauru rai Jesoso.

*Canu esenetaerate raotojoein ichaoreein.*  
(Lc 10.21-22)

<sup>25</sup> Niritohane baihate: "Itolere chauratane, dede, naaonjoaain Coaunereaneein neeine coroaajihanu jataaincha, Ofa, itolere coitucutoha nocoetonacaauru que iicha asii coitucuerateei cairichainejeein nenacaauru quene jaauru. <sup>26</sup> Aihara Ofa, nitohaneein jereine jaunte ichaacha," naane baihate:

<sup>27</sup> "Canu Inaca Ofate satiin raineen nena tein ne carai. Nihei chuni Cana Coaunera Calaohi cachaneein nejanoanaa nichaaunne coitucuera. Leinjiin Ofa Cana Coauneraachate cacoitucue. Niheichu chuni, Ofa Cana Coaunera coitucuera. Canu- Calaohineeeichane coitucun. Canu-Calaohi nichaaune coitucueratenaa jerichaaunne jaauru que, coitucueratihane banaachate, Canu Inaca Ofa Cana Coaunera coitucuurureein cachaauru. <sup>28</sup> Nii inara baasoneein ichaonacaauru, inara nererojoecaeriin ichaonacaauru, inara osaaonacaauru, naaonjoaineeichene canu esenetaain canu sacuuchena raotojoein ichaonaanaja te inara rai. <sup>29</sup> Caa inara rai caitoonjoa esenetaain, Canu que nerelaain aihanune rijijieein ichaaoche. Coatiha chabana inara aina baasoneein nerinaaunni. Nii bana coatiha nitajerinaain inara suujue. <sup>30</sup> Coatiha caaintaai, caa inara rai caitoonjoa tonora cachane," nae.

## 12

*Nebetacanaa cojoanonaa bana tirico inaa molooruha Jesuso aina nerelanaacaaurune*

(Mr 2.23-28; Lc 6.1-5)

<sup>1</sup> Nii amuhemuhecaanne jaun, nebetacanaa cojoanonaa bana tirico cocana jana situha cuhacaanu Jesuso aina jiniiquiin aina nerelanaa nichaanune. Nii janane mijiitohacaanune jaun, situnacanejeein nii tirico moloonejeein rai nucuhe quihacaanu. <sup>2</sup> Nii coaraainte:

“Nii ii aina nerelanaacaauru coaraau. Cooaaeraa nebetacanaa cojoanonaa bana nitohanai ichara natiinte, inae tirico taihure,” naauruha Jesuso rai fariseeocurune jaunte:

<sup>3-4</sup> “Tana lesajei que mijiitooruhane jaun, corihacuru aina jiniiquiin Cana Coanera loreri Teenforo asaae enohin, Cana Coanera que banijiaain nena faan, saseredotecuruhacha nii faan quinaa nainihane saijieein, corihacuru aina faan quihacuru curuaanaa Rabirine jaan reretaain coitucuhichene.

<sup>5</sup> Tana Moisesa aitoonjoa cuhane nebetacanaa cojoanonaa bana carenero narejeen sohin Teenforo asaae mocooruha saseredotecurune niha natiin, osa que nesaruhin naaonjoaurenihane jaan reretaain coitucuhichene.

<sup>6</sup> Aihane jaun Teenforo amurijiriin jataain nelateein cau nihanune coitucuhin neeuche. <sup>7</sup> Coatih: ‘Naaonjoain quete aite caa Quiricha cuhane,’ naain coitucuhiche. Nii Cana Coanera Quiricha cuhane: ‘Nii inihocuru mocuhichene jianein inara amute cacha belaaain, naaonjoaain neeichenena jereun,’ naain ne, laenanohineein. Nitohanai coitucuhin neeichenenoote, chatohanai baaso ichaain neniha inara amute cachane jana colurujueein naaonjoaain neriquiche. <sup>8</sup> Nitohanihane jaunna, canu- cacha calaohineein nejanoanaa nichaanune, nebetacanaa cojoanonaa amurijiriin cocoaain letononeein neeun,” naain fariseeocuru tonorae Jesuso.

*Leinjiin jiurona bijii cacha rautaa Jesusone*

(Mr 3.1-6; Lc 6.6-11)

<sup>9</sup> Inae jelai caje amuhinte, ecu nena sinacoca asaae enoha cuha Jesusone jana, <sup>10</sup> ecu najiniha ne leinjiin jiurona bijii cacha. Nii jana Jesuso colurujueeruhane jaanu lera ariiriichuruhane jaunte:

“Nainihanacha cocoaeraane saijieein, cunaitenaa rautaaca nebetacanaa cojoanonaa banane,” naain Jesuso caje bajaauruha fariseeocurune janate:

<sup>11</sup> “Tana chunocoha inara, leinjiin carenero siriquichene jana nebetacanaa cojoanonaa bana acau mitunajaan ucuha jachu cuhane naluha inara raine coaraa curiquiche jelai caje rocohichene coinane. <sup>12</sup> Tana leinjiin carenero amurijiriin nelatiha leinjiin cachane coitucuhichene. Aihane jaun, cha caaunna cunaitenaa rai caohacha icha rautaenerichaaca nebetacanaa janonaa bana,” naain fariseeocuru tonoraane baihate:

<sup>13</sup> “Ii bijii raujiaaura,” naa nii jiurona bijii leinjiin cacha rai Jesusone janate, biji sijitaane rijieeoritiin, inae nerautae nii biji jera rijijieein nii cacha biji.

<sup>14</sup> Nete jelai caje mituhin nejesinajeein ita suujua tacaure fariseeocuru Jesuso sohin jaaoruhane coina.

*Jaiti neniha Jesusone jana, tururichaine biha Isaihasine*

<sup>15</sup> Nitohaneein inae sohin jaonaa jerecuruhane coitucuriin jelai caje amuha Jesusone janate, sacuuruha arajiin cachaaurune jaun, jitaain cunaitenacaauru rautaaain, <sup>16</sup> aonajeeuruha cachaaurune urichoo, nii rautanaacane que ereeuruhane caohate Jesuso. <sup>17</sup> Nitohaneeinte bihalu Cana Coanera ere bera inoansi Isaihasine nainaane coina:

<sup>18</sup> “Caate,

janijiin belaaain cocoaain  
 Canu Suujue que suujuequiin  
 canu letononeein nena ne,  
 ‘Inae nerinaain baasoneein cachaauru cairichaaurera,’  
 naain,  
 satiin chauratane que  
 lauri lauri nenacaauru cachaauru rai  
 beebejihane coina.

<sup>19</sup> Coatiha  
 cachaauru que nejerateein, cachaauru cotaain,  
 bero cuhane niha natiin  
 tonijiaain ereein cachaauru relaain,  
 naaonjoaane aohanrarinaain.

<sup>20</sup> Coatiha  
 nelatelanaala nenacaauru,  
 cairicheineein nenacaauru,  
 naaonjoainuri cairichaeranu que airinaain.  
 Niheichu  
 aasaeriin esenetaeraauru que jaolecorinaain,  
 lauri lauri nenacaauru cachaauru  
 ichao rucuhecane jaan que  
 turuhane reen tiaaajoaain.

<sup>21</sup> Satiin lauri lauri nenacaauru cachaaurute  
 acaacha que jaacoorureein,”  
 naain belu Isaihasi.

*Moconajaera letononeein niicha ichana nainei ichaa Jesoso beeuruhane  
 (Mr 3.20-30; Lc 11.14-23; 12.10)*

<sup>22</sup> Nii janate, suujua cuhane coitucuhuhi siricha leinjiin cache ere-  
 naachara maosa amauruha Jesoso rene jana, irihane jaanu tein, rai nota  
 cono te. <sup>23</sup> Nii coaraain cojoelatiinte: “Tana caa cache Rabiri ichoala nihane,”  
 naain ecu nejesinajeein satiin ita caje bajaacoaure.

<sup>24</sup> Nii aonajeeinte: “Moconajaera curuaanaa Beelseboote, caa cache rai  
 catohanai ichana nainihane jaan tein ne,” naaure fariseeocuru.

<sup>25</sup> Niritiin coaucuruhane coitucuha Jesoso raotojoeine jaunte: “Satiin  
 caa chauratane que ichaonacaauru cachaauru, ita que nejerateein  
 neeuruhanete jiniiquiin nitajenaa nainecurure. Niheichu leinjiin nese  
 que ichaonacaauru ita que nejerateein neeuruhane, jiniiquiin raotojeein  
 ichaonaa nainecururihei. <sup>26</sup> Nii rijijieein techu, moconajaera netonai rai  
 letonocuru que nejerateein nihane, nii rai letonohacha sitaain nihane,  
 nii chaque nelateein nena nainerihei. <sup>27</sup> Nii aitocohichene tocohaneein  
 moconajaera suujue aina cuaain moconajaera sitaanu nechujianra, jeelai  
 moconajaeraacha itajiha aicheeunna. Nete nii aitocohichene tocohanene,  
 nitohanihane, cha jana inara letonocuru letohare nitohanai ichana naineein  
 neeuruhane jaanu siriin neeuruhane coina. Nitohanihane jaunte, nechu  
 jataain inara raajenihane jataain baasoneein aitocohichene coarateeiche.

<sup>28</sup> Caa cache suujua cuhane nenacaauru moconajaeracuru sitaanu Cana  
 Coanera Suujue aina cuaainnete, inae inara aina niha Cana Coanera  
 Cojoanonaane coujunacaneein ichaun.

<sup>29</sup> Leinjiin cache jataain laraajiin nena loreri asae enohin nihei nii chuni  
 caje niicha sirii ruluhera. Biji ichojoaainchate naine nitohanein caje niicha  
 sirii ruluhane.

<sup>30</sup> Chateeinti canuhacha ichai ichaene. Niite canu que nejeratenaanein ne. Nii rijijieein techu canuhacha ichai itajeraneein ne canu esenetana jerihe.

<sup>31</sup> Nitohanihane jaunne inara rai aitoon, satiin osaonacaauru cachaauru quete suujua acatereein Cana Coaunera. Nete laen tonaain baasoneein Cana Coaunera Suujue que erei que suujua acatenereein. <sup>32</sup> Canu- Cacha Calaohineein nejanoanaa nichaanne que nihanatiin tonaain baasoneein erei quete suujua acatereein. Nete laen rai Suujue que tonaain baasoneein erei nihane, caa ena nena janonaa, caa baiha neeninu janonaa, naaonjoain que nihanatiin neein suujua acatenereein Cana Coaunera.

*Ninaa caje temule caohacha coitucuhacane  
(Lc 6.43-45)*

<sup>33</sup> Tana temule jaain neeichene, caohacha que inaacane caje temule caohacha coitucuhin neeichene. <sup>34</sup> Nitohanein necha ansainein neeichene jaunte, inara suujua caje mitunaa nainene caohacha. Inara suujua cuhane baasoneein inaraacha coacuite, inara ujuae caje mitue. <sup>35</sup> Jana caohachaain suujua coara cachate, caohacha nejesina que ereein ne, suujua cuhane niha caohachane jaun. Jana baasoneein suujua coara cachate baaso que ereein ne, suujua cuhane niha baasone jaun. <sup>36</sup> Canune inara rai beeun, inae caseteco coaracururichaaain satiin caa chauratane que nenacaauru cachaaurune bana, tonaain baasoneein ereeichene nihanatiinte coitucunojoinereein. <sup>37</sup> Nitohaneinte, inara ujuaae caje baaso ichaain neeichene ujuaihoneein neneeichene, caohacha ichaain neeichene coitucunojoiniha cureein,” nae acaauru rai Jesoso.

*Cojoelanaacojoai bajaauruha necha aansai cachaaurune*

<sup>38</sup> Nii jaunte:

“Cacha relaera, canacaanu rai cojoelanaacojoai ichaain coarateeinene jerichaanura,” naauruha Moisesa aitonjoan que cacha relaurera aina fariseeocuru tabaaurune janate:

<sup>39</sup> “Caa necha ansainein suujua coitucuelanaala ichaonacaauru cachaaurute, acaauru rai cojoelanaacojoai ichacaanne jerecure. Nena inae acaauru que cojoelanaacojoai coaratihalu *profeta* Jonasine jaun, inae nenacaanein acaauru que coaratenaa jereneun. <sup>40</sup> Nii nichata jiichoo nichata janotiineein, ate tabai suri cuhane nihalu Jonasine rijijieeine, canu- Cacha Calaohinichaaunne nichata jiichoo nichata janotiinejeeincha atane cuhane nereeunni. <sup>41</sup> Aihana jaun, coitucunojoiniha caohacha ichaeraauru aina baaso ichaeraauru ichao que tihane banate, nacoaaunein nimichucureein Ninibe cocoaichacuru, acaauru coulurujueeuruhane coina, acaauru rai beratenojoin beebejiha Jonasine aonaain nacoaaunein Cana Coaunera que coacuhin neeuruhane jaun. Jana ena cau inara aina neinichaaunnena Jonasi amurijiriin nena nichaanne saijieeinte caitoonjoa esenetana jereneeiche. <sup>42</sup> Jerichanejeein techu nacoaaunein nimichureein enoto mitu nichajai coarajeein cana raotono nichajai que nenaalu ene curuaanaanein nena netonai inae caseteco coaracururichaaain caa ena nenacaauru cachaaurune bana acaauru coulurujihane coina, niicha coitucuhi beebejiha cachaauru rai Salomoonne jana, coriaji atane caje uhin aonaa uhalune jaun. Cau caa ena inara aina neinichaaunnena Salomoon amurijiriin nena neeun. Nete nii saijieein canu esenetana jereneeiche.

*Nacoaaunein cacha suujueniha jelaiha enoha coitucuhine  
(Lc 11.24-26)*

<sup>43</sup> Cacha suujua caje mituha leinjiin coitucuchuhinete, cajihaneen amuhemujeein nihane jaanu ariirijie. Nii jana eruhenihanete: <sup>44</sup> ‘Taolu mituhanulune jaaunne jelaiha cauha cureeun,’ naain coacue. Niritiin jelaiha turuhin nii cacha coaraane jana, aiha leinjiin loreri conera colane caohatiin lojoino-joinneen nenea rijijieein eruhanete, <sup>45</sup> nacoaauneen jelaiha cuhin, caainsineen amurijiriin baasoneen nenacaauru aina ita taojiaain, jiniiquiin nii cacha suujua cuhane jeelaiha enooruhane, jataain jeelai amuritoheriin baasoneen ichoae nii cacha. Nitohaneente, ichaoha cuurureein caa necha ansaineen ichaonacaauru cachaauru netonai,” nae acaauru rai Jesoso.

*Jesoso rene turuuruha neba aina nejeraaurune*  
(Mr 3.31-35; Lc 8.19-21)

<sup>46</sup> Niritiin jaiti cachaauru aina ereereeca Jesusone janate, rene turuhin aina erenaa jerecure neba aina nejeraauru. Loreri asae enohelanaala airiniha neeuruhane janate:

<sup>47</sup> “Taute airiniha turuhin neeure ii neba aina ii nejeraauru, ii ainate erenaa jerecure,” naain Jesoso rai beeure.

<sup>48-50</sup> Nete, nii rai biha unaa rai:

“Caaurute canu neba aina canu nejeraaurune. Chunocoha caletoaera Ofa ere tonoraain niicha jerenohin icharate, canu nejera, canu bai, canu neba, naaonjoainuri ne,” nae aina nerelanaa nichaanune cojeluhin Jesoso.

## 13

*Temule jaera que cuaain cachaauru rai iriha Jesusone*  
(Mr 4.1-9; Lc 8.4-8)

<sup>1</sup> Nii bananeeinte, nii loreri nihacaanune jaan caje cuhin, nemuri auhaniha turuhin ecu nelauriaain lauheque Jesoso. <sup>2</sup> Nii jana, arajiin rene turuhacoaauruha cachaaurune jaunte, leinjiin bote cuhane fauhin lauheque, carene ichoae neeuruha cachaaurune tonohana. <sup>3-4</sup> Nii bote cuhane netiinte, araai laurii nereretanaa rijijiei *parabola* que cuaain cachaauru rai ereerejeein:

“Leinjiin temule jaera temule jaa cunajaun ucuhe riiaacane janate tabaauru bero cuhane naluha nii niicha riajaiine jaun, turuhin coaraain quihure tajaacuru. <sup>5</sup> Jana le turijieein niicha riajaite, neniha mululuhin atanene jaan jelon ajeri ichoae nalunacaauru carajaelanaala omaroe. <sup>6</sup> Nete inae omarohane jana mituhin ajajaa enotone jaun ohe, mululuhin neniha atanene jaaun, ucuacaain neniha rai cojoaisine jaun. <sup>7</sup> Le turijieein niicha riajai ucuhe, ajena jana naluhane jaun, amurijiriin omaroha ajane nane jaun atinae. <sup>8</sup> Jana atane caohacha que le turijieein niicha riajaite, le ucuhecuru caje le temuracuru lefashaananaain incae. Jana tabaaurute saotachoonca ucuhenneen, nichatachoonca ucuhenneen, naaonjoaain inaacure. <sup>9</sup> Caa caitoonjoan aonacurumiin irichonacaauru,” naain cachaauru rai ereereje Jesoso.

*Jesoso caje parabola que cachaauru rai ereereecane bajaacaanu aina nerelanaa nichaanune*  
(Mr 4.10-12; Lc 8.9-10)

<sup>10</sup> Nii jaunne, Jesoso rohan nichuuntaain nii araai laurii nereretanaa rijijiei *parabola* que cachaauru rai ereereecane jaan bajaacaanu caje aina nerelanaanichaanune. <sup>11</sup> Nii jaunte: “Cana Coaunerate rai cachaneen neechene jaun, coitucueraelanaala nenea Cojoanona coitucuerate inara que. Nete laen rai cachanelanaala nenacaauru que coitucueratena jerene.

<sup>12</sup> Nitohanihane jaunte, naitoonjoa tonoraain niicha jerei ichajeein nenacaauru rai, jataain jeelai amuritoheriin itolere coitucuhin neeuruhane jaanu tereein Cana Coaunera. Jana naitoonjoa tonoraelanaala niicha jerei ichaelanaala nenacaauru cajete, jitariin acaihaniji acaauruhacha coitucujei rulureein. <sup>13</sup> Nitohanihane jaunne araai laurii nereretanaa rijijiei que cuaain acaauru rai ereeun. Coaracuruhane niha natiin coitucuurenihane jaun. Niheichu aonacuruhane niha natiin aonaain coitucuurenihane jaun.

<sup>14</sup> Nitohaneeuruhane cinate: Aonacuruhane niha natiin:  
 ‘Naaonjoain quete aite,’  
 naain coitucuururihaain.  
 Niheichu  
 nii coana jerecuruhane niha natiin coaracururinaain.

<sup>15</sup> Inae jataain nauhaca  
 caa cachauru suujuane jaunte,  
 cha aonacuruhane nihanatiin,  
 ‘Naaonjoai quete aite,’  
 naain coitucunaa nainecurene.  
 ‘Niheichu  
 cha coaracuruhane niha natiin  
 coitucunaa nainecuruhi.

Nabana  
 canuhacha ichai coaraain,  
 aonaain coitucuhin  
 canu rene uuruhane,  
 acaauru rautaanune coataa,’  
 naain bihalu Cana Coaunera ere bera inoaensi Isaihasine jaa nainaelu,”  
 naain aina nerelanaa nichaanune rai bihane baihate:

<sup>16</sup> “Nete laen inara nerausiajeein niha curiquicheein, aonaain, coaraain, coitucuhin, naaonjoainchene jaun. <sup>17</sup> Arajii *profetacuru*, chaen caohachaain suujua coaraauru cachauru, naaonjoainurine maajeeinte niqui, caa inaraacha coarai coana jerecurelu. Nete coana nainecurenelu. Inaraacha aonaine maajeein aohana jerecuruhane saijieein aonacuruhilu.

*Temule jaera parabola que irihane biha Jesusone*  
 (Mr 4.13-20; Lc 8.11-15)

<sup>18</sup> Aonacuchene caa temule jaera que cuaain araai laurii *parabola* que irihanune be inara raite coitucuhiche. <sup>19</sup> Cana Coaunera Cojoanona que erenaa aonacuruhane saijieein coitucuhichurute, nii bero cuhane nalunaa temule ucuhe rijijieein neeure, acaauru suujua cuhane Cana Coaunera beratenojoi erenaa jereein aonacuruhane niha natiin, turuha acaauru suujua cuhane baasone jianeraauru ne. <sup>20</sup> Jana nii ajeri ichoae nalunacaauru temule ucuhecurute, Cana Coaunera ere aonaain esenetaain corojeein jereein raauruhane jana, <sup>21</sup> inae cairichaaerinojoneein mucunojoinecuruhane coina arinojoneein neeuruhane, canu esenetaain neeuruhane jianeraauru rijijie. <sup>22</sup> Jana nii ajaena jana temunojoin temule ucuhecurute, Cana Coaunera ere aonacuruhane saijieein, nechu jataain caa atane que netiin necoriquijiaain, raotiin nena coacuhin, niicha que suujua cuaain necoritanacaauru rijijie. Niite, inae nii erenaa esenetaauruhane jianein, leeochoauru relaauruhane jianein neeure. <sup>23</sup> Nii atane caohacha que temunojoin temule ucuhecurute, Cana Coaunera ere aonaain leeochoauru relaain, naaonjoaain nenacaauru rijijie. Acaaurute, nii le ucuhecuru caje lefasha ucuheenein, saotachoonca ucuheenein, nichata choonca ucuheenein, naaonjoaain le tijiriichuru caje teeurera rijiiichure,” naain aina nere-lanacaauru rai beebeje Jesoso.



*Tirico temuurerera rai ajaena baaso temuha acaauru que nejeratenaane*

<sup>24</sup> Niritiinte, nacoaauneein leeocho nereretanaa que cuaain acaauru rai ereerejeein:

“Cana Coaunera Cojoanonaate, leinjiin cache, rai nocoana jana cachaauru que tirico temueratihane jana, <sup>25</sup> temuhin satiin sinihuruhane tonohana, nii tirico niicha temuuri jana turuhin ajaena baaso temuha leinjiin cache acaauru que nejeratenaane rijijie. <sup>26</sup> Nii jana inae omarohin, inae in-aaca nii tiricone jana inanacae nii ajaena baaso netonai. <sup>27</sup> Nitohanihane jana coaraante: ‘Curuaanaa, chasiinna temule caohacha ucuhe nejesina temuerateeilune saijieein, jana mituhe ajaena baaso,’ naauruha nii ocoana erora rene turuhin nii amihanenacaaurune janate: <sup>28</sup> ‘Chunocoha canu que nejeratenaate, nii ajaena baaso temucaiha,’ naa acaauru rai nii ocoana erorane janate: ‘Ta, nii ajaena baaso rocohin jaohacaanune jereeine,’ naain bajaauruha nii amihanenacaaurune jana: <sup>29</sup> ‘Niriimiin, nii ajaena baaso ro-cohalaante tiricone maajeein rocoriquiche. <sup>30</sup> Nirijieein ecu neein jiniiquiin omarocurumiin, tainaca que tihane reentiaain. Inae tainaca que tihane banane jelai teein nii ajaena baaso raain, jelai teein tirico raain rucuhecaaune jaa cuhane rucujueein, nii ajaena baaso jelai teein mocoheratereeeunni,’ nae nii ocoana erora,” naain cachaauru rai beebeje Jesoso.

*Mosatasa ucuhe rijicha Cana Coaunera Cojoanonaane que erenaa parabola*

*(Mr 4.30-32; Lc 13.18-19)*

<sup>31</sup> Niritiinte nacoaauneein:

“Cana Coaunera Cojoanonaate leinjiin cache, rai nocoana jana mosatasa ucuhe temuhera rijijie. <sup>32</sup> Esinae rauhijiriinte, jataain leeochoauru temule ucuhecuru amurijiriin aansijian rai nucuhene saijieein, inae omarohane leeochoauru ocoana jana nenacaauru temulecuru amurijiriin fohecane, rai nunecuru que tajenajaanu ichacure tajaecuru,” naain nereretanaa que cuaain beebeje cachaauru rai Jesoso.

*Faan jorerera rijicha Cana Coaunera Cojoanonaane que erenaa parabola*

*(Lc 13.20-21)*

<sup>33</sup> Niritiinte: “Cana Coaunera Cojoanonaate nichata sajeein coujunaca que arina coujunacateriin rai jorerera que jasiiteein tabaain nii coliha joreerein caje arajiin faan jaa leinjiin enene rijijie. Nii neleeriha tabaain colihane coina nena jorerera rijijieeinte, cache ichao sacuritaain nefaane coina nena ne Cana Coaunera Cojoanonaa,” naain beebeje Jesoso.

*Nereretanaa rijijiei parabola que ereerejihane biha Jesusone*

*(Mr 4.33-34)*

<sup>34</sup> Nitohaneeinte, nereretanaa rijijiei *parabola* nejesina que cachaauru relae Jesoso. Chabana nii *parabola* colane irihehi cachaauru rai.

<sup>35</sup> Nitohaneeinte:

“Cana rai chauratane coaana Cana Coaunerane caje coaauneeinte, satiin asinojoneein nena que erereein, nereretanaa rijijiei *parabola* cuaaincha,” naain beeuruhalu Cana Coaunera ere bera inoaensihuru *profetacurune* nainaane coina nitohaneein ichae Jesoso.

*Tirico temuurerera rai ajaena baaso temuera que irihane biha Jesusone*

<sup>36</sup> Nitohaneein inae cachaauru rai irihane nainaaante, acaauru rai no-coeein jelai caje cuhin nii neeuruhane jaan lorero asaae enoha Jesusone jana, rohan nichuuntaain nii tirico coocana jana ajaena baaso temuhera

que cachaauru rai iriha Jesusone bajaacaanu caje aina nerelanaa nichaanune. <sup>37</sup> Nii jaunte: “Nii temule ucuhe caohacha temuherate canu- Cacha Calahineein nejanoanaanichaaunne rijijie. <sup>38</sup> Jana nii ocoana que caitoonjoate, cana rai chauratane ne. Jana nii temule ucuhe caohachate, Cana Coaunera esenetaain aina ijiin rai Cojoanonaa que neenihuru ne. Jana nii ajaena baasote, moconajaera letononeein nenacaauru ne. <sup>39</sup> Jana nii ajaena baaso temuherate, acaauru que nejeratena moconajaera ne. Jana nii taojiaera que aitocooaunnete, inae ecu tihane bana sarichaain cana cojoanonaane que aite. Jana nii taain rucuheraaurute anjeraaurune. <sup>40</sup> Charijieein teeinti, ajaena baaso taojiaain mocohaca, nii rijijieeinte inae saa cana janonaane bana moconojoiniha cuurureein osa que leeochoauru saruhin nenacaauru moconajaera aina. <sup>41</sup> Nii banane canu- Cacha Calahineein nejanoanaanichaaunne canu rai anjeraauru letoareeunni, nii cana cojoanonaa que nenacaauru baaso ichaain, osa que leeochoauru saruhin, naaonjoaain nenacaauru raain <sup>42</sup> usi charijibana jacanaacharanejeein nena jana jaonajaauruhane, ecu neein auhaaahaquiin chanaaurureein. <sup>43</sup> Inae nitohanihane banate, esinae rauhijiriin Cana Coaunera jerenohin ichaain tonoraain nenacaauru, aiha enotone tocohaneein jiquihaquiin conohin niha cuurureein, canu Inaca Cana Coaunera Cojoanonaa que neein. Caa aitocooaunne aonacurumiin irichonacaauru.

*Oro rijijieein nena coreti tesoro rijiicha Cana Coaunera Cojoanonaane*

<sup>44</sup> Charijieein teeinti, leinjiin oro rijijieein nena coreti tesoro eruha leinjiin cachane, nii eruhane jaaun teein conauteein ratiriin, rachoojoein jitariin niicha sirii rucuhele que necorete nii cacha, nii niicha eruhi conautihane jaan atane coretihane coina. Nii rijijieeinte, itolere cachaacha jerei amurijiriin jataain nelateine Cana Coaunera Cojoanonaa.

*Oro rijijieein nena perla coreti rijiicha Cana Coaunera Cojoanonaane*

<sup>45-46</sup> Charijieein teeinti, leinjiin recatoon, perla coretiin nena ariirijieein amuhin, inae nii perla coretiin nena eruhane, jataain nii corei eruhane coitucuhin rachoojoein cuhin, rai rucuhele que jitariin necoreteein, nii niicha eruhi perla corete nii recatoon. Nii rijijieeinte, itolere cachaacha jerei amurijiriin jataain nelateine Cana Coaunera Cojoanonaa.

*Rede que ate mucuhera rijiicha Cana Coaunera Cojoanonaane*

<sup>47-48</sup> Charijieein teeinti, nemuri cuhane rede jaaoruha ate mucuurerane jana, itolere ate mucuha nii niicha jaori redene, inae memoha ate caaunne jana carene ichoae inaan ate caohachauru janijiin omari cuhane teein, nii baasooru foranacaauru jaaore nii ate mucuurerana, nii rijiicha Cana Coaunera Cojoanonaa. <sup>49-50</sup> Nitohaneein techu, inae cana janonaa satono que turuhane bana, caohachaaain ichaonacaauru janijiin raain, baasoneein ichaonacaauru jaaorureein usi chariji bana jacaelanaala nena jana anjeraauru. Nii banate chanaa cuurureein auhaaahaquiin,” nae aina nerelanaa nichaanune rai Jesoso.

*Canacaanu relaane jaan aonaain coitucuhacaanune bajaa Jesusone*

<sup>51</sup> Niritiinte: “Caa inara rai caitoonjoan aonaaina coitucuhiche,” naain canacaanu caje bajaa Jesusone janane: “Enjeen, aihacaanura Curuaanaa,” naacaanu. <sup>52</sup> Nii jaunte: “Coaracuche nachuhinti leinjiin Cana Coaunera rai rauhi que cacha relaera- cacha relaante, ‘Naaonjoan caa Ena Turunaa Cana Coaunera Cojoanonaa Caohacha’ naain been, ‘Naaonjoan nii rauhi inoaei’ naain nii ena canuhacha bei Cana Coaunera Cojoanonaa aina rauhi

inoaesí que aitiin caohatiin cachaauru rai beein cachaauru relae,” nae Jesoso.

*Rai nataneu Nasarete turuha Jesusone*  
(Mr 6.1-6; Lc 4.16-30)

<sup>53-54</sup> Inae nii nereretanaa rijijiei *parabola* biha cachaauru raine nainainte, jelaí caje canacaanu aina amuhin rai nataneu turuhin, ecu nenea sinacoca asaas enohin, ecu nenacaauru cachaauru relaane nunuhete Jesoso. Nii janate cojoelatiin: “Chuna jataain cojoelanaacojoai ichaane coinane maajeein nerelaete toritiin itolere coitucuhin ere. <sup>55</sup> Tana enuha caje itolere ichana inaera cacha calaohi nihane, jana rai neba niha Marihane. Nii jana rai nejeraauru niha Saantiaao, Jose, Simoon, Jodasi, naaonjoainurine. <sup>56</sup> Jana rai baihuru netonai cau cana aina ichaaoruhane. Chaa cajena jataain nainain itolere coitucuhin aite,” naaure ecu neein aonajeeurera cachaauru.

<sup>57</sup> Niritocuruhane jaunte inae Jesoso esenetaain nere tonorana jerecurene cachaauru. Nii jaunte acaauru rai:

“Chunijiun cuhane jaaurute niqui leinjiin *profeta* que suujua acateein coitucure laurinelanaala nenacaauru cachaauru. Nete laen esenetaaurene laurineein nenacaauru naraaichuru. Niheichu nii loreri ichaohane jaun nenacaauru niha natiin,” nae cachaauru rai Jesoso. <sup>58</sup> Nii jaunte ecu arajiin cojoelanaacojoai ichaanelu, esenetaaureniha ecu nenacaauru cachaaurune jaun.

## 14

*Oha Joaan Baotisitane*

<sup>1</sup> Nii banate, Calileea batane curuaanaaneein niha Erodesine jaun, nii amuhemuheca Jesusone coitucuriin: <sup>2</sup> “Acate, Joaan Baotisitane. Inae o caje ichanacaihara. Acanihane jaunte, nii cojoelanaacojoai ichana nainera,” naain jetao ereereje Jesoso que rai letonocuru rai.

<sup>3-4</sup> Rai nocoala Ferifi comasai Erodiási siriha comasaine que Erodesine jana jetaote: “Jiaonriha chochala comasai sirii ii comasaine quera,” naa Joanne coreniha jetao, caresero cuhane Joaan enoaeratelu *cadena* que ichoarateein Erodesi.

<sup>5</sup> Nitohaneein caresero cuhane enoaain jetaote, Joaan sohin jaonaa jerihane niha natiin, ichana nainenelu Erodesi, satiin cachaauru Cana Coanera letononiha Joanne esenetaauruhane jaun, cachaauru coasiha. <sup>6</sup> Nejetaote, nejanoaane bajaanaa bitoaane coina beseta ichaa Erodesine jana jetao, nii beseta bitoaa turunacaauru acatiha raansae nii Erodiási cacunu. Nii acaauru acatiha raansaa nii ranunane coaraain jetaote, jataain rautatiin coaraane jaun, <sup>7</sup> niicha jerei bajaa caje nii ranunane, Cana Coanera notaracaae rai tihane coina aite Erodesi. <sup>8</sup> Nii jaun jetaote, rai neba suujuatenojoneein Erodesi rai: “Canu rai aihane, leinjiin ojaichu cuhane Joaan Baotisita coturi uhaau caraicha,” naa nii ranunane jaun <sup>9</sup> inaderae *rey* Erodesi. Nejetaote, satiin niicha cotihacuri acatiha tein Cana Coanera notaracaae, niicha jerei bajaa caje nii ranunane rai tihane coina aitohane jaun, <sup>10</sup> caresero cuhane niha Joanne jana coturi moloherateein raerate. <sup>11</sup> Nii jaun jetaote, leinjiin ojaichu cuhane Joaan coturi amaain teuruha nii ranuna raine jaun, neba rai te nii ranuna.

<sup>12</sup> Inae nitohaneein teratiha Erodesine coitucuhinte, Joaan jaberoco raain conauteein ratiriin, biha uure Jesoso rai Joaan sacuureraauru.

*Saoqui oaraancai cacha coroaatiha Jesusone*  
(Mr 6.30-44; Lc 9.10-17; Jn 6.1-14)

<sup>13</sup> Nii jaunte, rai beeuruhane caje coitucuhin, nii nihane jaan jelai caje canacaanu aina amuhin, canacaanuhacha aina leinjiin bote cuhane fauhin, neniha cachane jaan cue Jesuso. Nete nii bote cuhane fauhin amuhacaanu Jesuso ainane coitucuuriin, neseuru cajeeuru uhacoaain sacuure atanechoae uhi cachaauru. <sup>14</sup> Inae niicha coinetihu turuhin, bote caje fauhin, iniha cuha Jesusone janate, najiniha cunaitenacaauru uhaain arajiin neeruha cachaaurune jaun, cairichaojoaain acaauru coaraane jaun, niicha uhaauri cunaitenacaauru rautae Jesuso. <sup>15</sup> Nii jana, inae nocohena jerihane jaunte, Jesuso rohan nichuuntaain: “Chajaain caa cachaauru rai necoeete, nenajaun cauha cuuruhinete, ucuhae rai lenone coretecurumiin. Coatiha caa jana ichaohi cacha,” naacaanune jana: <sup>16</sup> “Chajaain inara acaauru coroaateeuche. Coatiha caohacharihei ena caauruhane,” naa canacaanu rai Jesusone jaun: <sup>17</sup> “Nihei canacaanu rai lenone. Saoquijieein faan, itaque jerajejeein ate, naajeeinchate neeje,” naacaanune janate: <sup>18</sup> “Cajiha carai uhauuche,” naain <sup>19</sup> omane choae nelauriaauruha cachaaurune coina aitiin, biji cuhane nii ate aina faan mucuhin teberiaain: “Narihara Cana Coaunera,” naain Cana Coaunera bajaain cataun nii faan teruhin aina nerelanaa nichaanune rai te Jesuso, chaluhacaanune coina. <sup>20</sup> Nii jana satiin cachaauru naineein chaluhacaanune janate, que lenoneein obeecuruhane jana, jaiti cautihane jaun, rai caute que lechoonca coroata omarii, omari memoaare. <sup>21</sup> Canaanaihunru aina enecuru janijilanaala, quichaauruhacha janijiinte, saoqui oaraancai cachaauru nii lenonecure.

*Acau ichoae amuha Jesusone*  
(Mr 6.45-52; Jn 6.16-21)

<sup>22</sup> Nii baihate, ecu nedaaain cachaauru rai necoihane tonohanau, bote cuhane fauhin ichoaichaniha nemuri jera jaaohacaanune coina aina nerelanaa nichaanune letoae Jesuso. <sup>23</sup> Inae cachaauru rai necoihane baihate, jelai caje amuhin, acaachanejeein ichatane ucuuno que cue, ecu Cana Coaunera bajaane coina. <sup>24</sup> Inae nocohejihane janate, cuu acaachanejeein niha Jesuso nii ichatane ucuunone jana, inae coriaeneein cue nii bote, atane auha caje. Nii jana, mijiaaaineein uha cujuana aina fichafichanaane jaunte, amusine nii bote. <sup>25</sup> Nii jana inae janonaa jerihane janate, nii ichatane ucuuno nihane caje uhin, canacaanu caaijie uhe Jesuso acau ichoae rurujeein. <sup>26</sup> Nii jana acau ichoae rurujeein uhane coaraainne, coasiha cojioriin: “Nechu aansai coitucuhuhite aicha,” naacaanu aina nerelanaa nichaanune. <sup>27</sup> Nii jaunte: “Coa nesooneetoache. Canune aihunra,” naain canacaanu rai iriha Jesusone jaunte: <sup>28</sup> “Ti aaine, jereeune ii rene tiaain uhe acau ichoera Curuaanaa,” naa Jesuso rai Fedorone jaunte: <sup>29</sup> “Chajaaujian,” naa Jesusone jaun, bote caje fauhin acau ichoae cuhin ruruje Jesuso rene cuhin Fedoro. <sup>30</sup> Nete jataain mijiaaaineein uha cujuana aina fichafichanaane coaraain, nesooneetohane jaun, asaun naluha cue Fedoro. Inae naluhane jaunte, nesoone caun auhaquuin: “Curuaanaa, canu comaleeu,” naa Fedorone jaunte, <sup>31</sup> biji que mucuhin: “Chanuna jataain cha esenetaeneei. Chanuna necoatohi,” nae Jesuso, Fedoro rai. <sup>32</sup> Inae bote cuhane faauruhane rijieeoritiin, nesuruha nii fichafichanaa aina cujuanane janane, <sup>33</sup> Jesuso acatiha neseonraain: “Iite esinae rauhijiriin Cana Coaunera Calaohineeincha,” naacaanu satiin nii bote cuhane cuinichaanune.

*Jenesaree batane que turuhin, ecu nenacaauru cunaitenacaauru rautaa  
Jesosone*

*(Mr 6.53-56)*

<sup>34</sup> Inae nii nemuri jerau turuhinne, Jenesaree batane que turuhacaanu.  
<sup>35</sup> Nii Jenesaree bataneu turuhacaanune janate, Jesoso coitucuure ecu  
ichaonacaauru cachaauru. Nii jaunte, jelai batane sacuritiin ecu turuha  
Jesosone coitucuhin, rene cunaitenacaauru uhaacoain <sup>36</sup> turuhin, caje  
acaauru rautana nainihane bajaare, jeriha Jesosone rai cajione auha mu-  
cuuruhane coina. Nii rai cajione auha mucuurera cunaitenacaaurute satiin  
nerautaaure.

## 15

*Baasoneein cache ichao tera que iriha Jesosone*

*(Mr 7.1-23)*

<sup>1</sup> Nii janate, Jerosaleen caje turuha uure Jesoso coaraa, Moisesa aitoonjoan  
rauhi que cache relaureraauru aina fariseeocuru tabaauru. Acaaurute,  
Jesoso rohan nichuuntaain:

<sup>2</sup> “Chanuna aihuruhalu canacaanu inoaesihurune rijijieein neeurene  
caa ii aina nerelanacaauru. Chanuna jeriha canacaanu ichaone rijijieein  
lenonecuruhane ajiniha, jauriaanejeein biji culeecurene,” naain Jesoso caje  
bajaauruhane janate:

<sup>3</sup> “Chanunajian inara netonai Cana Coaunera aitoonjoa tonoraelanaala,  
inara ichaohacha sacuhiche. <sup>4</sup> Nitohaneeichene jaunte: ‘Ii inaca, ii neba,  
naaonjoainuri ere tonoraain caohachaaain ichaaoche. Necha ansai, naain  
baasoneein rai inaca, rai neba, naaonjoaain que ereein neite ateanohiniha  
cureein,’ naa Cana Coaunera Quiricha Inoaensi cuhane natiin tonorae-  
lanaala ichaohiche. <sup>5-6</sup> Cana Coaunera Quiricha Inoaensi cuhanete niqui  
ne rauhi, satiin cache, rai fojiaraauru rai cha teein nihane coina. Nete  
inara: ‘Coatiha inara rai cha tenaa nainihaaun, satiin quiicha sirii inae  
Cana Coaunera que banijiaaaineein nihane jaun,’ naain erei cache, inaca,  
neba, naaonjoain rai chaelai tenaa nainenihane que aitocoiche. Nitoha-  
neeinte, Cana Coaunera aitoonjoan que jaolecohin tonoraeneeiche, nechu  
jataain inara ichaohacha sacuhichene coina. <sup>7</sup> Esinae rauhijiriinte, necha  
ansaineein neeichene que aitiin, inara que laenaclu Cana Coaunera Ere bera  
*profeta* inoaensi Isaihasi:

<sup>8</sup> ‘Caa cachaaurute,  
rai nereecha que  
canu corojeein neeure.

Jana  
acaauru suujua cuhane aihuruhi.

Cacajete  
coriaae ne acaauru suujua.

<sup>9</sup> Nii jaun,  
nii chaque nelatejeehai,  
netaojiaain canu  
coroaecuruhane  
nechu jataain acaauru relauruha cachaaurune  
que nejesinajeein ita relajeein  
neeuruhane jaun,’

naelu inara que Cana Coaunera Ere bera inoaensi Isaihasi,” nae acaauru  
rai Jesoso. <sup>10</sup> Niritohane baihate, nii ecu nenacaauru cachaauru cotiji-  
aain: “Caohachaaain caa inara rai aitocooaunne aonacuchete coitucuhiche.

11 Coatiha baasoneein cacha ichao aasaehai joaereen lenone canaacha quii. Baasoneein suujua cuhane niicha coacui, nujuae caje mitunaate laen, baasoneein cacha ichao aasaje,” naainte acaauru rai beebeje Jesoso. 12 Nii janate rohan nichuuntaain: “Nii aitohine aonajeein jataain ii que nerero-joecaauruha fariseeocurune aonaaina,” naain caje bajaacaanu aina nerelaa nichaanune janate: 13 “Niicha temunojoinelanaala nenea ajaenate, cojoaisi aina curuataain rocohin jaoreein Cana Inaca Cana Coaunera. 14 Aihane jaun, coa acaauru rerohecaachete nainaurumiin. Maosa rijijieein neeuruhane rijijieein nenacaauru relaeraneein neeuruhane jaunte aitocure. Chaen techu leeocha maosa amanaa jeriha leeocha maosane, jiniiquiin atane jachu cuhane naluhin nitajeeururihane rijiichuruhane jaun aitocure,” nae aina nerelanaa nichaanune rai Jesoso. 15 Nii janate Jesoso rai: “Canacaanu rai, nii aitohine jaan beeune coitucuhacaanu,” naa Fedorone janate: 16 “Inara niha natiin inachura coitucueneeichete. 17 Tana satiin cacha ujuae cuhane enonaa, cacha suri cuhane cuhin, nii baiha cacha jaberoco caje mituhane coitucuhichene. 18 Jana cacha ujuae caje mitunaate, cacha suujua caje mituhe. Niite laen baasoneein cacha ichao aasaerane. 19-20 Nitohanihane jaunte, cacha suujua caje mituha itolere baasone jaun, sonajaain jaohin, sini-jeranelanaala nenea ene aina ichaohin, asijiauhin, casejenetiin, ita cotaain, naaonjoaan cachanete laen, baasoneein cacha ichao asaaerane. Jana nitohaniha cana ichaone tonoraelanaala cana biji culejelanaala lenonichaane, coatiha baasoneein cana ichao aasaehai,” nae Jesoso.

*Leinjiin ene Jorionelanaala nenea Jesoso esenetaane  
(Mr 7.24-30)*

21 Jelai caje amuhin Tiro, Sidoon, naaonjoainuri batane nichae cuha Jesusone jaun aina cuhin, 22 inae ecu turuhacaanune janate, eheehequiin: “Curuaanaa Rabiri nefoerate, cairichaaajoaain canu coaraau. Moconajaera siriha canu cacunune jaunne aitoonchera,” nae canacaanu caaijie uhin leinjiin Canaan bene, natane caje uhin ecu ichaonaa. 23 Nii jana inauheneecha aonajian Jesusone jaunne: “Chajaain caa ene rai aitoote amuhine. Nete cana caaijie ujuueein eheeheque,” naacaanu rohan nichuuntaain aina nerelanaa nichaanune. 24 Nii jaunte: “Cana Coaunerate rai cachaneein nenacaauru Israaeli cocoaichacuru nitajeeuruhane rai nenacaauru reneecha caletoaelu,” nae Jesoso. 25 Nete, nacatiha neseonraain: “Canu coroatajaneuechera Curuaanaa,” naa rai nii enene janate: 26 “Coatiha caohacharihei Cana Coaunera cachaneein nenacaauru que banijiaain nenea ruluhin remaae rijijieein neinequichene rai tihanuchenera,” naa Jesusone janate: 27 “Aihachechuhisi niquicha Curuaanaa. Nete remaae rijijieein canacaanu coaraaichene niha natiin, atiin canu coroatajaneuechera Curuaanaa,” naain Jesoso tonorae nii ene. 28 Nii jaunte: “Quesenetaaine corenihate, inae ii jerenohi rijijieein nerautareein nii ii cacunuchera,” naa Jesusone rijieeoritiin, inae nerautae nii rai cacunu.

*Arajii cunaitenacaauru rautaa Jesusone*

29 Jelai caje amuhinte, Calileea conemuri auhaniha turuhin, ichatane ucuunno que iniin, ecu nelauriaain lauheque Jesoso. 30 Nii janate, rene netaojiaaure arajii cachaauru, bacosacuru, maosacuru, biji que jiuronacaauru, erenaacharaauru, leeochaauru arajii cunaitenacaaurune maajeein uhaacoaain, Jesoso acatiha tenajaauruhane acaauru rautaane coina. 31 Nitohaneein rautanaacane janate, inae nerautaaain, nichaauraaain, amuure bacosacuru, maosaneeuruhane caje conoe maosacuru nota, inae nerautaaure biji que jiuronacaauru, erenaacharaauru niha natiin inae

ereeure, naaonjoaauruhane coaraante, jataain cojoelatiin, Cana Coaunera Israeli Coaunera coroaecure nii ecu neein coarajeeurera cachaauru.

*Jena oaraancai cachaauru rai lenone faa Jesusone  
(Mr 8.1-10)*

<sup>32</sup> Nii janate, aina nerelanaa nichaanune cotijiaain canacaanu rai: “Inae jataain cairichaojoaain caa cachaauru coaracaan. Inae nichata janoha cau canu aina neeuruhane. Nii jana nihei acauru lenone. Naininaaun coroate-najaelanaala acauru letoaanu acauru nenajaunne. Mijiintena caaun aterocuruha bero cuhanene coataa,” naa canacaanu rai Jesusone jaunne: <sup>33</sup> “Chuna caa araaine cacha rai lenone erurichaache, neniha cachane jaaun nihacache natiin,” naacaanu aina nerelanaa nichaanune janate: <sup>34</sup> “Inatajajeein nihun faan siriquiche,” naa canacaanu rai Jesusone jaunne: “Caainsinejeein faan, corootajajeein ate, naajeeichate neeje,” naacaanune janate, <sup>35</sup> atane ichoae nelauriaauruha cachaaurune coina aitiin <sup>36</sup> rai biji cuhane faan aina ate mucuhin, Cana Coaunera bajaane baiha, cataaun taturiin aina nerelanaa nichaanune rai te, cachaauru rai chaluhaacaanune coina. <sup>37</sup> Nii jaunne, satiin cachaauru rai chaluhaacaanune jana, inae nainaan lenonecuruhane saijieein cautihane jaun, rai caute que caainsine omari memoaure. <sup>38</sup> Canaanainuru, enecuru, uha elone jaun tabaacoa nucuhecuru aina uha cujuana tabaine janijilanaala quichaauruhacha janijinte jena oaraancaure nii lenonenacauru cachaauru. <sup>39</sup> Nii lenonecuruha cachaaurune baihate, cachaauru rai necoein, leinjiin bote cuhane fauhin, Maadala batane que cue Jesoso.

## 16

*Cojoelanaacojoai icharatecuruha sadosseeocuru aina fariseeocurune  
(Mr 8.11-13; Lc 12.54-56)*

<sup>1</sup> Nii janate, Jesoso coaraa uure fariseeocuru aina sadosseeocuru. Nitohaneinte inae rene turuhin coulurujueeuruhane jaanu leranu ariha, acauru rai cojoelanaacojoai ichaane coina aitocure. Chaen esinae rauhijiriin, Cana Coaunera letono nihane coitucuuruhane coinane maajeein.

<sup>2</sup> Nete acauru rai: “Charijieein teeinti, sonaina cafarane nocohaca dedene: ‘Caohatorichaaain janonaa,’ naain ereeiche. <sup>3</sup> Jana, janone cafarane nocohaca dede nijichoriaaajoaaine: ‘Urichaaain elo,’ naain ereeiche. Nitohanein dede caje itolere coitucuhin naaonjoaainchene natiin, chanuna jana: ‘Naaonjoaane coinata caa aicha,’ naain caa enene cojoanonaa coitucunaa naineneeiche. <sup>4</sup> Caa cachaauru nechua aansainein suujua coitucuelanaala nenacaaurute, cojoelanaacojoai ichacaanune coina canu rai aitocure. Nene inae acauru que coaratesihalu Jonasine jaun inae nenacaenein acauru que cojoelanaacojoai coaratenaa jereneun,” naane baiha acauru ratiriin, jelai caje amuhe Jesoso.

*Faan jorerera- lebadora rijiicha fariseeocuru ichaone  
(Mr 8.14-21)*

<sup>5</sup> Inae Calileea conemuri jerau cuhacaanune jaun faan baiteein ratirihacaanu aina nerelanaa nichaanune jaunte: <sup>6</sup> “Aonacuche. Faan jorera rijiicha fariseeocuru aina, sadosseeocuru ichaone que necohalajihuche,” naa canacaanu rai Jesusone jaunne: <sup>7</sup> “Chanuna caa aite. Faan uhaenihacachene jaunna caa aitohate,” naacaanu ita raine aonajeeinte:

<sup>8</sup> “Chanuna faan uhaeneeinchene que aitocoiche. Jataain asaaeriinchate quesetaaiche. <sup>9</sup> Tachu jaiti nainquiche taolu saouijiei faan chaluheratihanu, saou oi oaraancai cacha raine jana, inata omariin rai caute taojiaaichelu. <sup>10</sup> Niheichu taolu, caainsinejei faan chalueratihanulu jena oaraancai cacha raine coaauheeiche, inata omariin jana rai caute taojiaaichelu. <sup>11</sup> Chanuna faan que inara rai aitenihanune que naineneeiche. Faan jorerera rijicha fariseeocuru aina sadoseeocuru ichaone que necohalajihuche,” nae aina nerelanaa nichaanune rai Jesuso. <sup>12</sup> Nii jaunne, faan jorerera que aitelanaala, cacha relauruha fariseeocuru aina sadoseeocurune que aitoha canacaanu rai Jesusone que nainacaanu.

*Mesihasi niha Jesusone biha Fedorone*  
(Mr 8.27-30; Lc 9.18-21)

<sup>13</sup> Inae Filipo Sesareea batane que turuhinte, aina nerelanaa nichaanune rai: “Tonacuruha cachauru, Cana Coanera Calahineein cacha caje nejanoanaa nichaanune que,” nae Jesusone janate: <sup>14</sup> “Tabaaurute, Joaan Baotisita niha, ii beure. Jana tabaaurute, Irihasi niha, ii beure. Jana leeochoaurute, Jeremihasi niha ii beure. Jana tabaaurute, chunocoha Cana Coanera ere bera *profetane* caiha, naaure,” naain tonoraacaanune janate: <sup>15</sup> “Tonaquiche jana inara. Cha nichaanun jana Canu inara rai,” naain canacaanu caje bajaa Jesusone janate: <sup>16</sup> “Iite esinae rauhijiriin ichaahin nena Cana Coanera Calahi Mesihaseinei,” nae rai Simoon Fedoro. <sup>17</sup> Nii jaunte: “Raotojoeinte rausiaaenoinenei, Jonasi calahi Simoon. Chuni cacha ichei benihane janate, Canu Inaca Cana Coanera ii que canu coitucuerate. <sup>18</sup> Jana iite Fedoro neei. Canune ichei aitoon. Iite canuhacha tei ajeri rijijieein, canu coitucuruha canu cachaneein neenihurune coina icharaneein neriquiin. Nii ii que canuhacha icharatei amuritonaa nainerinaain chuni, onaaniha natiin itajenaa nainerinaain. <sup>19</sup> Ii raine, Cana Coanera Cojoanona que nena naineeine coina, ichei chabi tereunni. Caa chauratane que netiin, iicha ichaite, Cana Coanera Cojoanona que nereein. Jana caa chauratane que netiin, jaolecohine jaante, Cana Coanera Cojoanona que tihane bana jaolenereein,” nae Simoon Fedoro raine baihate: <sup>20</sup> “Jiaonriha chuni rai: ‘Acate Mesihaseine,’ naain beeichene,” nae aina nerelanaa nichaanune rai Jesuso.

*Orichaine biha Jesusone*  
(Mr 8.31-9.1; Lc 9.22-27)

<sup>21</sup> Inae mainajiriin cairichaururichain Jorioocuru bichauhenaauru, saseredotecuru curuaanaacuru, Moisesa rai Cana Coaneraacha tei rauhi que cacha relaureraauru, naaonjoainurine catainaane jaunte, Jerosaleeun curichainne beebeje aina nerelanaa nichaanune rai Jesuso. Sohin jaaoruhane nichata janone cuhane ichanarihanine que aitohane jaunte, <sup>22</sup> jelai Jesuso teteriin: “Jiaonriha nitohanein chetecuruhane jeriha Cana Coanerane Curuaana. Nitohanein chetena nainecuruhi jerihane,” naain caohatiha Fedorone janate, nauriteriin Fedoro coaraain: <sup>23</sup> “Naain cacaje amuura moconajaera. Nechu canu cairichaeranu quete aitohicha. Cana Coanera jerenohin aina, cha coitucunaa nainiheeii. Cachauruhacha jerenohinchate coitucuujeei,” naane baihate: <sup>24</sup> “Chunocoha canu esentaain, canu aina nerelanaa jerihane, rainuhacha que niicha coacuhi jaineein, itolere necairichanaa abaataain canu sacuhine. <sup>25</sup> Jana canu colane rai nichao ichoteratena jerate, rai nichao itajereein. Jana, canu coreniha necairichanaate, rai nichao ichoteratereein. <sup>26</sup> Coatihacheque nelatihei, itolere niichajerei, niicha coacui sirihane nihanatiin, nichao itajiha cachane.



Inaonjoaain coretihane niha natiin, nii nichao ichoteratena nainihehi cacha. <sup>27</sup>Inae Cojoanonaa que turuhane banane turuha ureeunni esinae rauhijiriin canu- Cana Coaunera Calaohineein cacha caje nejanoanaa nichaaunne, canu Inaca Cana Coaunera necaohacha que necaohachaain, rai letonocuru anjeraauru aina jiniiquiin. Nitohanihane banane, le cachaauruhacha ichai cainareeunni acaauruhacha ichai rijinanaain. <sup>28</sup>Cau caa ena nenacaauru tabaaurute oorenereein, itolere curuaanaa neein nihanune coina turuhanu cacha caje nejanoanaa nichaaunne Cojoanonaa coaraane reentiaaajoaain,” nae aina nerelanaa nichaanune rai Jesoso.

## 17

### *Nejelauneein necoriha Jesoso jaberocone (Mr 9.2-13; Lc 9.28-36)*

<sup>1</sup> Nitohaneein atinaaururichaaainne bihane baiha, saota janonejeeinte, Fedoro, Saantiaao, Saantiaao ocoala Joaan, naaonjoainuri amaain jelai acaauruhacha aina jataain ucuuneein nena ichatane ucuuno que cue Jesoso. <sup>2</sup>Inae ecu turuhin jetaote, acaauru acatiha netiin, necoriha Jesoso jaberocone jana, rai nomeri netonai enoto tocohaneein jiquihacohane jana, rai cajione netonai cono tocohaneein jiquihaque. <sup>3</sup> Nitohaneein necoriha nomeri aina rai cajionene jana jetaote, Jesoso rene ecocohin aina ereeuruha Moisesa aina Irihasine jana coarajeeure. <sup>4</sup> Nii jaun jetaote Jesoso rai:

“Curuaanaa, caohatoha cau nihacachene. Ii jereeinene nichatajaain loanari jareeunni, leinjiin ii rai, leinjiin Moisesa rai, leinjiin Irihasi rai, naaonjoaain,” nae jetao rai Fedoro. <sup>5</sup> Niritiin ereereeca Fedorone jana jetaote, luhecotariin jiquihaquiin acaauru conaacotaa dede sacarine jana jetao: “Caate jataain belaaain janijiin quiicha cocoinai Canu Calaohi ne. Rai nere tonoraain neeuche,” naain jetao toni nii dede sacari jana erena. <sup>6</sup> Niritiin toniha erenaane aonaain jetaote, atane ichoae comoore jataain coasina caaun, nii nichatajaain aina cunacaauru aina nerelanacaauru. <sup>7</sup> Nii jana jetaote, acaauru rene nichuuntaain mucunajaain jetao:

“Nimichucuche. Coa casihache,” naa Jesoso acaauru raine jana, <sup>8</sup> coaracuruhane jana jetao, inae neniha chuni ainane jana, jelai acaachanejeein ecu ne Jesoso. <sup>9</sup> Inae nii ichatane ucuuno caje jeelaiha fauha cuuruna jaun jetaote: “Jiaonriha chuni rai caa inaraacha coarai beeichene, Cana Coaunera Calaohi cachaneein nejanoanaa nichaaunne ohanune caje ichanacaunne reentiaain,” naa aina nerelanacaauru rai Jesusone jana jetaote:

<sup>10</sup> “Chanuna jana chaen: ‘Irihasite jaurihanejeein turuha ureein,’ naaure Cana Coauneraacha tei rauhi que cacha relaaaureraauru,” naain jetao Jesoso caje bajaure aina nerelanacaauru.

<sup>11</sup> Nii jaun jetaote: “Esinae rauhijiriin Irihasite ichoaichaniha turuha ureein. Acate itolere rucuhereein. <sup>12</sup> Nena canu inara rai aitoon. Nii Irihasite inae ichoaaichaniha turuhelu. Nete, acanihane coitucuelanaala que nocoatijiaain, mainajeriin cairichaaurelu. Nii rijijieeinne acaauru bijiu necairichaa cureeunni Cana Coaunera Calaohi cachaneein nejanoanaa nichaaunne,” naa acaauru rai Jesusone jana jetaote, <sup>13</sup> Joaan Baotisita que, acaauru rai aitoha Jesusone que nainacure aina nerelanacaauru.

### *Suujua cuhane coitucuchuhi siricha canaanai rautaa Jesusone (Mr 9.14-29; Lc 9.37-43)*

<sup>14</sup> Inae nii cachaauru aina nihacaanune jaan turuuruhane janate, Jesoso rohan nichuuntaain, nacatiha neseonraain: <sup>15</sup> “Curuaanaa, cairichaa-joaain canu calaohi coaraau. Araain saainte mijiaaainein mucuha rai cunaine, usihanauniha natiin comohin, acauhanau niha natiin naluhe. <sup>16</sup> Ii aina nerelanacaauru raine niqúi teeun, nete rautasihurene,” nae rai leinjiin cacha. <sup>17</sup> Nii janate: “Cha esenetaain, caohachaaain suujua coaranacharaauru cachaauru. Cha carajaneaina inara aina neein inara relaain, inara abaantareeun. Cajiha canu rene nii canaanai uhaauche,” naain <sup>18</sup> nii canaanai caje coitucuchuhi sitaa Jesusone rijieeoritiinte inae nerautae. <sup>19</sup> Nii baihane, jelai Jesoso teteriin: “Chanuna jana canacaanu coitucuchuhi sitanaa nainesinihacaanu,” naain Jesoso caje bajaacaanu aina nerelanaa nichaanune janate:

<sup>20</sup> “Jataain aasaeriin esenetaaichene jaunte, rautana nainesineeiche. Esinae rauhijiriin mosatasa ucuhe tabaainejeeiniin esenetaaichene jana nihanete, caa ichatane ucuunno rai: ‘Caalai caje amuhin, tajiha cunihun,’ naaichene amure jelai caje. Nihei chanerihai inara rai cha, rauhijiriin esenetaaichene. <sup>21</sup> Nete laen, catohanei moconajaera letono, cana suri couu neein Cana Coaunera bajaee bajajeein sitanacai ne,” nae aina nerelanaa nichaanune rai Jesoso.

*Caa quete orichaainne be coroata saain Jesoso.*  
(Mr 9.30-32; Lc 9.43-45)

<sup>22</sup> Inae nii canaanai caje coitucuchuhi sitaane baiha, jiniiquiin Calileea batane que amuhemuhecaanne janate, aina nerelanaa nichaanune rai: “Cana Coaunera Calaoihi cachaneein nejanoanaa nichaannete necha aansainein nenacaauru cachaauru bijihu canu tiha cuurureein, <sup>23</sup> casohin cajaanoruhane coina. Nena, nichata janone cuhane ichanareeunni,” naain aina nerelanaa nichaanune rai biha Jesusone jaunne, jataain inaderaacaanu.

*“Coriqui tihana Teenforo rai nii inara relaera,” naain caje bajaauruhane*

<sup>24</sup> Niicha relainichaanune aina jiniiquiin Caferenaan turuha Jesusone janate, Fedoro coaraa uure, Teenforo asaae cacha caje coriqui bajaaureraauru. Inae Fedoro rene turuhinte: “Coriqui tihana Teenforo rai nii inara relaera,” naain caje bajaauruhane janate: <sup>25</sup> “Ejeen, coriqui tiha,” naain acaauru tonorae Fedoro.

Nii janate inae loreri asaae enoha cuhacaanune jana, Fedoro rai: “Tonaai iite Simoon. Charijihuru caje coriqui bajaare caa chauratane que nenacaauru cachaauru curuaanaacuru. Rai lauri cajena. Ainihane, laurine lanaala nenacaauru cajena,” naain bajaee Fedoro caje Jesusone janate: <sup>26</sup> “Laurine lanaala nenacaauru cajete bajaare,” naa Fedorone jaunte: “Nitohanein, acaauru lauri coretena nainenihane chujian, cana netonai coretena nainerihaaca. <sup>27</sup> Nete nabana chunocoha acaauru caje nena baijiaera tocohanihacane coataa, caohachae coretichaane. Chajaain taa nemuri cuhane ate cojunihu. Chaen jauriaanejeein dadaera ate raain, rai nujuaan cuhane coaraainete, cuhane nereein coata caje coriqui. Acaachate nainejereein que canu rai aina ii rai *imposto* coretichaane. Chaen amaain coretenihun,” nae Fedoro rai Jesoso.

## 18

*Charijicha jataain nelateineein ne Cana Coaunera Cojoanona que.*  
(Mr 9.33-37; Lc 9.46-48)

<sup>1</sup> Nii rijieeoritiinne, Jesoso rohan nichuuntaacoaain: “Charijicha jataain nelateineein ne Cana Coaunera Cojoanona que,” naain caje bajaacaanu

aina nerelanaa nichaanune. <sup>2</sup> Nii jaunte, leinjiin canaanai cotijiaain, canacaanu cataaun teein: <sup>3</sup> “Esinae rauhijiriine aitoon. Inara ichao coreein, aiha caa canaanaine rijijieein nenea naineneeichene, coatiha Cana Coaunera Cojoanonaa que nenea naineriheeicheein. <sup>4</sup> Cana Coaunera Cojoanonaa que nelateineein neite, leeochoaauru amurijiriin nenea coacuelanaala, aiha caa canaanaine rijijieein rai nichao coreein ne. <sup>5</sup> Chunocoha, canu coreniha leinjiin canaanai raerate canu raa aicheein,” nae aina nerelanaa nichaanune rai Jesoso.

*Jataainte alalacarae osa que nesarucuaane*

*(Mr 9.42-48; Lc 17.1-2)*

<sup>6</sup> “Chunocoha, caa ena Canu esenetaeraauru canaanaihunru saruheraniha osa quene, nuluno que ajeri jaberoco tijichain, cucuana ucuaano jelon joeraanete caohachae. <sup>7</sup> Jataainte cairichaojoaaure caa chauratane que nenacaauru cachaauru, enaicha osa que sarunojoneein neeuruhane jaun. Itolere banate nitohaniha cureein. Nete acaauru amuritoheriin jataain cairichaojoareein nii osa que acaauru saruhera cacha. <sup>8</sup> Nii jaunte caohachae, ii biji, ii tijia, naaonjoain osa que ii saruhin nihane, molohin jaohine. Nenacaeneein tejian caohachare, ii biji, ii tijia, naaonjoain mauhecaain ichaonaa esine que neeine. Nabana, ii biji, ii tijia, naaonjoain, ii saruhane coreniha, satiin ijiabereeo chabana jacanaacharanejeein nenea usi jana nijiaohine coataa. <sup>9</sup> Jana, ii nota, osa que ii saruhane, rocohin jaao. Nenacaeneein tejian caohachare, leinjiin ii nota aina ichaonaa esine que neeine. Nabana jerane ii nota aina jiniiquiin chabana jacanaachara usi jana nijiaohine coataa.

*Carenero nitaje que cuaain relanjaane*

*(Lc 15.3-7)*

<sup>10</sup> Jiaonriha, chunocoha caa canaanaihunru que jaolecohichene. Dedeu neein itolere bana acaauru beraihuraha Ofa Cana Coaunera rohan neein rai letonocuru anjeraaurune jaunne inara rai aitoon. <sup>11</sup> Canu- Cana Coaunera Calaohi cachaneein nejanoanaa nichaannena, nitajerai nenacaauru ichoterateraanu que turuhin neein.

<sup>12</sup> Aonacuche. Tana leinjiin cacha, lefashaain niha rai carenerone jana, nitajiha leinjiinne, ichatane ucuunno que nii iscoon choonca iscoonni ratiriin, <sup>13</sup> nii nitajenaa ariin eruhane, nii iscoon choonca iscoonneein nitajelanaala nenacaauru coroaecane amurijiriin, esinae rauhijiriin niicha eruhi coroaerihane. <sup>14</sup> Nii rijijieeinte, nii leinjiinejein nitajeeuruha caa canaanaihunrune jerene dedeeu nenea cana inaca Cana Coaunera.

*Chatohaneein nainecure ita que suujua acatecuruha Jesocurisito coitucurerane.*

*(Lc 17.3)*

<sup>15</sup> Chunocoha leinjiin inara caje Jesocurisito coitucuera, baaso ichaain niha chunocoha raine, jelai teein cotijiaain baaso ichaain niha raine coitucuerateein rai raotojoein ereeine, nii rai irihane jana rai nere tonoraain coitucuhin nihanete, inae jataain raotojoein neriquicheein jiniiquiin. <sup>16</sup> Jana ii ere tonoraenihane, leinjiin coroatajaainniji cotijiaain, acaauru aina jiniiquiin rai ereeuche, ii coroatajanena nainecuruha nii leeochoaauru netonaine coina. <sup>17</sup> Jana, acaauru ere nihanatiin tonoraenihane, netaojiaain Cana Coaunera coroaeraauru rai been, acaauru rai teute rai ereeuruhine. Nii netaojiaain Cana Coaunera coroaeraauru ere tonoraenihane, Cana Coaunera coitucuelanaala nenacaauruneein teein, Roma curuaanaa rai cacha cobaraain coriqui bajaaurera rijijieein coaracuche.

<sup>18</sup> Caa chauratane que netiin, inara ichanohite, jerichanejeein dedeeu icharareein. Jana, caa chauratane que netiin jaolecohichene jaante, dede caje jaonjoinereein. <sup>19</sup> Caa quene inara rai aitoreeunni. Caa chauratane que netiin, ita que jerajejeein neein ita suujua rijijieein coacuhin Cana Coaunera bajaain, cha bajanaa jeriquichenete, inara rai inaraacha bajai tereein canu inaca Cana Coaunera. <sup>20</sup> Chunijiun neeichene jaaunru, Canu coreniha, coroatajaain, nichatajaain, naaonjoaain netaojiaain neeichenena canu netonai, ecu inara aina nereeunni,” naa Jesusone janate:

<sup>21</sup> “Curuaanaa, inata saain canejera que casuujua acatichaaunne cao-hachae, baaso ichaain niha caraine, caainsi saneeina,” naa Fedorone janate:  
<sup>22</sup> “‘Coatiha, caainsi saneein,’ nahaau. ‘Caainsichoonca saneein caainsinei quene aitoon, ii suujua acateeine coina,’ ” nae Fedoro rai Jesuso.

*Rai fatoroon cachaauru rebe aninoana jereniha acaauru beraichaneein nenaane*

<sup>23</sup> “Nitohanihane jaunne, naaonjoaa Cana Coaunera Cojoanonaane que inara rai aitoreeunni. Aonacuche. Rebe rucuhena jeriha leinjiin curuaanaa reyne rijijiei nereretanaa quene inara relareeunni. <sup>24</sup> Inae rebe rucuhena nunuhetihane janate, jataain arajiin que rebeeona rai cacha turuaa uure rene. <sup>25</sup> Nete, neniha cha coretihane jaanne jaun, jitariin bereecuru, rai sinijera, rai rucuheleeru, naaonjoainuri aina curuaecaain, letononeein neeuruhane coina acaauru que necoretihane coina aite nii *rey*. Jitaain rai rebe coretihanereein tiaaajoaain satiin jiniiquiin amihaneeuruhane coina. <sup>26</sup> Nii jaunte, nii *rey* acatiha neseonraain: ‘Curuaanaa, atiin caque ii suujua acateein, canu cohacori hune ii rai jitariin corete,’ naa rai nii cachane jana, <sup>27</sup> cairichaaajoaain coaraane jaun, nii rai rebe aninoaain que suujua acateein nirijieein jianerate. <sup>28</sup> Nete inae jianiha nii rebeeonajaane jana, caje cuhin rai corihanera que coroatajajeein rebeeona aina ita eruhin, nii rebeeoca quene coreniha mucuhin rai raro tororohin: ‘Caque rebeoquine jaan coreteeu,’ naa raine janate, <sup>29</sup> nacatiha neseonraain: ‘Canu que ii suujua acateein, canu cohacune ii rai jitariin corete,’ naa rai nii leeochoane saiijieein, <sup>30</sup> tonoraelanaala caresero cuhane enoaerate, cuu niha rebe jitaain coretihane reentiaaine coina. <sup>31</sup> Nitohaneein, caresero cuhane nii acaauru leeochoa tihane coaraainte, jataain rautaaurenihane jaun, nii acaauru curuaanaa *rey* rai biha cuure leeochoauru. <sup>32</sup> Nii jaunte, que suujua acateein jianihane baiha nihane jaun, cotiharateein: ‘Nechu aansaineein ichaonaa cacha. Nii rebe coreniha rebeoquine janane, ii que casuujua acateein, carichaaajoaine jaun ii jianeeunlu carai aitohine jaun. <sup>33</sup> Chanuna jana, nii cairichaaajoaain ii coaraain casuujua acatichaaunne rijijieein, nii ii leeochoa que, ii suujua acateneei,’ naain, <sup>34</sup> inae jataain obaecane jaun, caresero cuhane enoaerate nii *rey*, jitaain rebe coretihane reentiaain,” naain nii nereretanaa que canacaanu relaane baihate: <sup>35</sup> “Nitohaneinte inara casetecareein canu inaca Cana Coaunera, inara suujua aina cutaain inara amute cacha que inara suujua acateein belaineeichene,” naainte aina nerelanaa nichaanune rai beebeje Jesuso.

## 19

*Sinijera joaera quete cacha relae Jesuso.*  
*(Mr 10.1-12; Lc 16.18)*

<sup>1</sup> Niritiin acaauru rai irihane baihate, aina nerelanaa nichaanune aina Calilea caje amuhin, Jodea batane que turuhin, nucuhe Jorodaan jera

que cue Jesoso. <sup>2</sup> Nii janate, arajiin sacuure cachaauru. Ecute arajiin cunaitenacaauru rautae. <sup>3</sup> Nii janate, nechua cairichaauruhane jaan lera ariha, Jesoso rohan nichuuntaain: “Tonaai. Caohachaana joaereen coreniha rai comasai jaoha cachane,” naauruha Jesoso rai fariseeocuru tabaaurune janate: <sup>4</sup> “Tana Cana Coaunera Quiricha inoansi cuhane laenanohineein nenea ereretaain aonaquichene. Jaurihanejeein itolere coaunaane nunuheneeinte, quicha, ene, naaonjoaain coaunaelu Cana Coaunera. <sup>5</sup> Nitohaneein acaauru coaunaainte: ‘Rai fojiaraauru caje amuhinte comasai raain, leinjiin cachanein nenea rijijieein ichaaorureein,’ naalune coitucuhichene. <sup>6</sup> Nitohanihane jaunte, lesajeein necoansajiaa cachane, leinjiin ita jaberoco que jaberocooa rijijieein neeure, rai comasai aina. Niheichu ita caje, Cana Coaunera tenojoihunru batunaa nainiheijoaereen cacha,” naain acaauru tonoraa Jesusone janate: <sup>7</sup> “Chanuna jana chaen, comasai jaonaa jerera nihane, rai ita jaaoruhane jaan cocoiricha teein, comasai joaera coina aitelu Moisesa tenojoi rauhi,” naauruhane janate: <sup>8</sup> “Niritiinte aitelu Moisesa, nechua aansaineein nere tonorana jereneeichene jaun. Coatihani niqui jauriaanejeein nitohaneein niheilu. <sup>9</sup> Nena laen canu inara rai aitoon. Chunocoha, chuni quicha aina ichoaeniha rai comasaine jana, jaohin leeochoa ene raanete, nii ene niicha rai coreniha inae osa que nesarue nii quicha,” naa Jesoso fariseeocuru raine janate: <sup>10</sup> “Nitohanihane jaun chujian, caohacharihei necoasajiaa cachane,” naacaanu aina nere-lanaa nichaanune janate: <sup>11</sup> “Coatihani nitohanai coitucunaa nainesihuruhi satiin cachaauru. Acaihanijin coitucuuruhane coina, coitucueratiha Cana Coaunerane jaan curuhachate, nii coitucuujuureein. <sup>12</sup> Niha araai lauriin nitohaneein necoansaijianaa nainelanaala niha cachane jaanu. Tabaurute, inae nejanoae nitohaneein necoansaijaurenihane coina. Jana tabaurute acaauru cule rocoorua acaauru amute cachaaurune jaun necoansaijianaa nainecurene. Jana leeochoaurute raotojoein Cana Coauneraacha tei amihanenaa que amihaneeuruhane coina necoansaijianaa jerene. Nitohaneein ichaonaa jereraauru, nitohaneein ichaaoruhine,” naain ereereje canacaanu rai Jesoso.

*Canaanainunru rausiaaeca Jesusone*  
(Mr 10.13-16; Lc 18.15-17)

<sup>13</sup> Nii janate, canaanainunru uhaaure Jesoso rene cachaauru, acaauru rai Cana Coaunera bajaain, biji que acaauru mucuhin acaauru rausiaaecane coinane janane, acaauru que tacaain caohatihacaanu aina nerelanaa nichaanune. <sup>14</sup> Nii jaunte: “Coa Canu rene turuuruha canaanainunrune caohatihache. Cana Coaunera Cojoanonaate aihuruha caa canaanainunrune rijijieein nenacaauru rainein ne,” naainte, <sup>15</sup> bijique nii canaanainunru mucuhin rausiaae najaane baiha, jelai caje amuhe Jesoso.

*Jesoso ainate ere leinjiin enamanaa coriquihona.*  
(Mr 10.17-31; Lc 18.18-30)

<sup>16</sup> Nii janate, Jesoso rene turuhin: “Cacha relaera, chariji caohacha ichareeun, chariji bana nitajenaachara ichaonaa que ichaohanune coina,” naa leinjiin enamanaa Jesoso raine janate: <sup>17</sup> “Chariji caohachana Canu caje bajaai. Caohachate ne leinjiincha. Nitajenaachara ichaonaa caohacha que ichaonaa jereeine, aitohalu Cana Coaunera rai Rauhine jaan tonorain ichaao,” naa rai Jesusone janate: <sup>18</sup> “Chariji Rauhina,” naain baajaane janate: “ ‘Coa sonajaain jaoha. Jiaonrihachu, ii comasaine lanaala nenea ene dadaain, asijiauhin, leeochoauru cairichaa casaje que

ereein, naaonjoaain neeine. <sup>19</sup> Chaen ii fojiaraauru ere tonoraain, iji-abereeo belaaaine rijijieein, chamute cacha belaaain ichaao,' ” naa Jesusone janate: <sup>20</sup> “Jitariinne, nii chaitoonjoa tonoraaun. Chana nenacaaen carai lanare,” naa Jesuso rai nii enamanaane janate: <sup>21</sup> “Esinae rauhi-jiriin, chaque lanaelanaala Cana Coaunera aitoonjoa tonorana jereeine, chajaain jitariin nii iicha sirii que necoreteein, cairichaaihuru rai tenihun. Nii banaachate, jelai amuritoeriin nereein iicha latei dedeeu. Nii baiha canu sacuu,” <sup>22</sup> naa rai Jesusone aonaante, jataain inaderaain cauha cue nii enamanaa, jataain coriquihocane jaun. <sup>23</sup> Nii jaunte, aina nerelanaa nichaanune rai: “Esinae rauhijiriinte caaintate, Cana Coaunera Cojoanona que enoha leinjiin coriquihonane. <sup>24</sup> Nacoauneeine aitoree-unni. Charijieein teeinti leinjiin toro seeonjoan amuritoojaain nena camecho, oco jachu cuhane situnaa nainene. Nii amurijiriin enonaa nainihe leinjiin coriquihona Cana Coaunera Cojoanona que,” nae aina nerelanaa nichaanune rai Jesuso. <sup>25</sup> Niritoha Jesusone jaunte, jelai amuritoheriin canacaanu suujua elonaane jaun: “Nitohaniane, chariji jana enohin nichotena nainereein,” naacaanu ita raine janate, <sup>26</sup> canacaanu coariin: “Nihei chuni raajenihane enohin nichotena nainihe. Nete laen Cana Coaunera jerihane joaenreein cacha enohin nichotena naine,” naa canacaanu rai Jesusone janate: <sup>27</sup> “Canacaanune, ii sacuhacaanune coina jitariin canacaanuhacha sirii ratirihacaanulu. Cha jana rarichaanuhin canacaanu nii coreniha,” naa Fedorone jaunte: <sup>28</sup> “Esinae rauhijiriinte, inae Cana Coaunera cojoanona que turuhane bana canu, Cana Coaunera Calaohi cachaneein nejanoanaa nichaaunne itolere cocoainanacaaihuri amurijijiriin cocoainanohi nichaaunne jaan rori- *trono* ichoae nelauriaanune banate, inara netonai lechoonca coroatajai cocoainanacai nequichene rori- *trono* ichoae nelauriariquicheein, nii lechoonca coroata lauriin nenacaauru Israeli cocoaichacuru ichanaa coaraain, ‘Acaauru acaaurute cao-hacha ichae. Jana acaauru acaaurute baaso ichae,’ naain been coitucuhin rucuhequichene coina. <sup>29</sup> Chaen techu, canuhacha icharate ichacuruhane coina, rai bereecuru, naraaichuru, comasai, fojiaraauru, rai natane, naaonjoain ratirichate, lefasha saneein jelai amurijiriin eruurureein. Chaen techu, chabana nitajenaachara nejeein nena ichaonaa que ichaoreein. <sup>30</sup> Chaen techu, caa ena leeochoauru amurijiriin nelaetoha nocoetonacaauru, caa ena chaque nelatihei rijijieein nenacaauru fautaain chaque nelatelanaala nedaurureein. Jana ena caa leeochoauru fautaain nelatihei rijijieein nenacaaurute, jataain nelateineein neeurureein,” naain Fedoro tonorae Jesuso.

## 20

### *Leinjiin ocoana erora- cacha amiharatera rijicha Cana Coaunera Cojoanonaane que canacaanu relaa Jesusone*

<sup>1-2</sup> Niritoha canacaanu raine baihate nocoana que cacha amiharatiha leinjiin ocoana erorane rijicha Cana Coaunera Cojoanonaane que canacaanu relae.

Niritiinte: “Leinjiin cacha janohetiin nimichuhin, nocoana jana amiha-neeuruha cachaaurune coina ariin, inae cachaauru eruhin, rai nocoana jana le jiichooneineein acaauru amihaneeo coretihane coina rucujueein, nii cachaauru letoae nii amihanenaa erora. <sup>3</sup> Inae acaauru letoaane baiha, enoto chujutaelalajeein nacoauneein mituhin cuhin leeochoauru cachaauru arihane janate, najiniha neeure nenaanaja cataaun nelanaaejeein cachaauru. <sup>4</sup> Nii jaunte, nii nelanaaejeeunruhane coaraane jaun:

‘chajaain inara netonai amihanenihuche canu ocoana jana. Inara amiha-  
neon rijijieeine inara coretereunni,’ naa nii amihanenaa erorane jaun  
cuure nii cachaauru. <sup>5</sup> Nii baihate coaiten, enoto chujutaain mituhin  
cachaauru ariin, nii baiha sonaiha mituhin cachaauru ari nii amihanenaa  
erora. <sup>6</sup> Inae nuna macohi ichoae teejiha enotone jana, mituhin nacoaunein  
cachaauru arihane jana, nenaanaja cataaun neeuruha rai namihaneoo  
colane nelanaaejeein cachaaaurune jaun, erunajaain: ‘Chanuna sonafaa-  
jeein amihanelanaala neeiche,’ naain acaauru caje bajaa nii amihanenaa  
erorane jana: <sup>7</sup> ‘Neniha canacaanu rai amihanenaa terane jaunna, ami-  
hanenihacaanu,’ naauruhane jaunte: ‘Chajaain aihane inara netonai canu  
ocoana jana amihanenihuche,’ naain letoanajae nii amihanenaa erora.

<sup>8</sup> Inae nocohena jerihane janate, rai cachaauru beraicha rai: ‘Chajaain, nii  
cachaauru cotijiaain, acaauru satononiha turuhin amihanenacaauru que  
nunuheteiin coretenaacu, nii jauriaanejeein nunuheteraauru que satono-  
teein,’ naa nii amihanenaa erorane janate, <sup>9</sup> inae ichoaichaniha cuuruha  
nii satononiha nuna macohi ichoae teejiha enotone jana nunuheteiin ami-  
hanenacaaurune jana, le cachaauru corete jerichanejeein le jiichooneein,  
nii coretera. <sup>10</sup> Nii janate, inae nii ichoaichaniha turuhin amihane-  
nacaauru coretihane jaan que turuhane jaun: ‘Nii satononiha turuhin  
amihanenacaauru amurijiriin jecha, rai namihaneoo core raaurureein,’  
naaure. Nete, nii satononiha turunacaauru rijijieein, jerichanejeein le  
jiichoo coreneein raare acaauru netonai. <sup>11</sup> Nii jaunte, rai namihaneoo  
core raauruhane ucuaaetoha nejesinajeein nii amihanenaa erora rai: <sup>12</sup> ‘Caa  
canacaanu satononiha turunacaaurute, basiinjiincha amihaneeuruhane  
saijjeein, canacaanu coreteeine jeoneein acaauru coreteei, mainajeein  
amihaneein, enoto ajaanone maajeein abaantacaanune saijjeein,’ naaure.  
<sup>13</sup> Niritocuruha nii amihanenaa erora raine jaunte, leinjiin rai: ‘Coatihana  
baasoneein ii coretihaunte quiicha belaa. Tana canu aina, le janohineein  
ii coretichaaunne coina rucuhequine coitucuhine. <sup>14</sup> Aihana jaun, noco  
ii amihaneoo core. Chajaain amuu. Canune, nii inara satononiha turuhin  
amihanenacaauru rai, jerichanejeein inara coretichaaunne jeoneein core-  
teeun, <sup>15</sup> carai niha rauhi cacoriqui aina quiicha jerei ichacaunne jaanune  
jaun. Raunajetocaaunne jaunna baasoneein canu coaraaite,’ naain nii  
cacha tonorae nii amihanenaa erora.

<sup>16</sup> Nii rijijieeinte, caa enene ichoaichaniha nenacaauru satononiha neeu-  
rureein. Jana satononiha nenacaaurute, nunuheneein neeurureein,” nae  
Jesoso.

*Orichaainne biha nacoauneein Jesusone*  
(Mr 10.32-34; Lc 18.31-34)

<sup>17</sup> Inae bero cuhane Jerosaleen nichaae cuujihacaanune janate, nii le-  
choonca coroatajaain aina nerelanaa nichaanune cotijiaain, jelai canacaanu  
teteriin: <sup>18-19</sup> “Inae enate laen Jerosaleeun cuhacache. Ecute, Cana Coanera  
Calaohi cachaneein nejanoanaa nichaaunne mucuhin, saseredote curu-  
aanaacuru, chaen Moisesa rai Cana Coaneraacha tei rauhi que cacha re-  
laaureraauru, naaonjoainuri rai canu tiha cuurureein. Chaen techu nejelau  
atane caje unacaauru cachaauru rai caetecurureein, caque nocoatijiaain,  
canu faojoaain coroso que canu teein canu ateinaauruhane coina. Nena  
nichata janojoin cuhane ichanareeunni,” naain aina nerelanaa nichaanune  
rai beebeje Jesoso.

*Saantiaao aina Joaan nebaacha bajai*  
(Mr 10.35-45)

<sup>20</sup> Nii janate, Jesuso rene turuha uhe Sebedeeo comasai, rai calaohichuru Joaan, Saantiaao, naaonjoainuri aina. Turuhinte, nii calaohichuru rai atiin chaelai ichaa Jesusone coina nacatiha neseonriaane jana: <sup>21</sup> “Chate jerequicheta,” naain caje bajaa Jesusone janate: “Inae ii Cojoanonaa que turuhane bana, atiin ii raotono nichajai que nelauriaa leijiinne jana, ii jaabiji nichajai que nelauriamiinche caa leeochara,” naa Jesuso raine janate: <sup>22</sup> “Cha bajaachene, coatiha coitucuhin bajaheeiche. Necairichanaa abaan-tarichaaunnine rijijieeinna necairichanaa abaantana nainequiche,” naain acaauru caje bajaa Jesusone janate: “Abaantana nainichaanu,” naain tonoraauruhane jaun:

<sup>23</sup> “Nii necairichanaa abaantana nainequiche niqui. Nete laen, canu raotono nichajai que, canu jaabiji nichajai que, naaonjoaain nelauriana naineneeiche, nitohanai rai tihanune coina nenihanune jaun. Banihateein ichaalu Ofane jaancuruhacha raite, tenojoin niha cureein,” nae acaauru rai Jesuso.

<sup>24</sup> Nii Jesuso caje bajaa Sebedeeo calaohichuru nebane aonaainne, nii coroatajai ita nejeraauru que nejeratihacaanu nii lechooncaain aina nerelanaa nichaanune.

Nii jaunte, <sup>25</sup> canacaanu cotijiaain canacaanu rai: “Inarate rai cachaauru cairichaaeriin, acaauru amurijiriin niha nocohetiin neeuruha Cana Coaunera coitucuhichuru curuaanaacurune coitucuhiche. <sup>26-27</sup> Nete laen, inara nitohaneein nenea naineneeiche. Aihana jaun, chunocoha inara jana leeochoauru amurijiriin nenea coaucane, leeochoauru coroatajanemiin. Jana, chunocoha leeochoauru amurijiriin nenea coaucane, rai letononeein neeine.

<sup>28</sup> Nitohaneein nihanune coinane cau turuhin neeun canu- Cana Coaunera Calaohi cachanein nejanoanaa nichaaunne. Coatiha carai quiicha latei teein niha cachane coina cau turuhaaun. Canune, cachaauru rai nelatichaaunne coina letononeein neeun. Canune, osa caje nichotiha arajii cachaaurune coina ohin cacoichana que coretiha cureeunni,” nae aina nerelanaa nichaanune rai Jesuso.

### *Coroatajai maosa rautaa Jesusone*

*(Mr 10.46-52; Lc 18.35-43)*

<sup>29</sup> Inae Jerico caje amuhacaanune janate, Jesuso caaijie uure arajii cachaauru. <sup>30</sup> Nii janate, bero cuhane babaecooruha coroatajai maosacurune jaun, acaauru rohan situha cuha Jesusone aonaain: “Canacaanu Curuaanaa Rabiri nefoerateneein nenea, tana cairichaaajoaain canacaanu coaraaine,” naauruha ehequiine janate, <sup>31</sup> aitocuruhane caohateeuruha cachaaurune jana, que rutaain tonijiaain ehehequiin: “Canacaanu Curuaanaa Rabiri nefoerateneein nenea, cairichaaajoaain canacaanu coaraau,” naauru janate ecu inacuhin acaauru cotijiaain: <sup>32</sup> “Chatohanai inara rai ichacaaunne jeriquiche,” naain acaauru caje bajaa Jesusone janate: <sup>33</sup> “Conoha canacaanu notanena jerichaanura Curuaanaa,” naauru jana, <sup>34</sup> cairichaaajoaain acaauru coaraane jaun, biji que acaauru nota dadaa Jesusone rijieeoritiin inae conoha acaauru notane jaun, Jesuso caaijie uure, nii coroatajai maosacuru.

## 21

### *Jerosaleen turuha Jesusone*

*(Mr 11.1-11; Lc 19.28-40; Jn 12.12-19)*

<sup>1</sup> Inae Jerosaleen catainajeein leinjii nese Betafajee ichtatane ucuunno-Oliboneein acaauruhacha curuaatei rohan turuhacaanune janate, aina



nerelanaa nichaanune caje coroatajai letoae Jesoso. <sup>2</sup> “Chajaain taa ni-ita canaacha coarajei neseu cunichuche. Ecute, cositenojoneein leinjiin bene, leinjiin curuaanaa narejeen, naonjoaain borocuru eruriquicheein. Chaen inae erunajaaichene, carai cajiha acaauru cosichuru rututaain uhanajaauche. <sup>3</sup> Inae uhanajaaichene jana, chunocoa inara caje bajaane: ‘Latenaaca curuaanaane jaunna amanajaacaanu. Enate jelaiha acaauru cainaratereein,’ naain uhanajaauche,” naain letoanajae Jesoso.

<sup>4-5</sup> Nitohanihalu:

“Sioon cocoaichacuru,  
joanreen rijjijeein nenea inara *Rey*  
coaracuche.

Acate, inara rene turuha uhe  
leinjiin boro laaojiri ichoae.

Cabario ichoae amuuruha  
leechoaauru curuaanaacurune saijieeinte,  
leinjiin boro

anajiin tabai ruhacaera  
narejeen laojiri ichoae uhe,”

naain been laenaalu *profeta* inoaensine nainaane coina ailu.

<sup>6</sup> Niritiin acaauru letoaa Jesusone jaun cuuruha nii coroatajai aina nere-lanaa nichaanune caje cunacaaurune janate, nii been letoanajaane rijjijeein, <sup>7</sup> rai narejeen aina boro eruhin, nichoae cajione maritaain amana-jaain, Jesoso rai tenajaaunruha aina nerelanacaaurune jana, nichoae lau-toroaain cue Jesoso.

<sup>8</sup> Nii janate, najiniha neeure arajiin cachaauru. Acaauru tabaaurute, bero cuhane acaauru cajione maririjiacoaure. Jana tabaaurute, ajaena raain, najiniha meriaacoaure. <sup>9</sup> Jana, ichoachaniha cunacaaurute, acaauru caaijie cunacaauru aina corojeein eheehequuin:

“*Rey* Rabiri ichoala coroaecuruhine.

Raotojoein turuhine acaneein nenea rijjijeein Cana Curuaanaa- Cana Coaunera letono.

Dedeeune maajeein Cana Curuaanaa coroaecuruhine,” naaure Jesoso que.

<sup>10</sup> Nii Jerosaleen turuha Jesusone coaraainte, satiin nii nese sacutaain que suujua rohecaain cajihaneei amuhemujueein: “Cha cajena unaa ne caa cacha,” naain ita caje bajaain: <sup>11</sup> “Caate, Cana Coaunera ere bera *profeta* Jesoso ne, taolu Calillea nenea Nasarete cocoaicha,” naaure cachaauru.

*Teenforo asajai caje cachaauru sitaa Jesusone*  
(*Mr 11.15-19; Lc 19.45-48; Jn 2.13-22*)

<sup>12</sup> Nii jana inae Teenforo asaae enoha cuhane jana, najiniha neeuruha necoretenacaauru aina acaauru caje coreteraaurune jaunte, jelai caje sitanajae Jesoso. Coriqui coreeuruha cachaauru raina jaan rori lachohitiin, ecu serori que necoretiha nenacaauru rorine maajeein lachohitiin:

<sup>13</sup> “Cana Coaunera Quiricha cuhanete: ‘Canu lorerite, acaihaniji Canu ba-jaabajaacuruhane jaan coloherineein nereein,’ naain ne laenanohineein. Nete, inara leinjiin asijaunanaja coloherineein teeiche,” naain acaauru cotai Jesoso.

<sup>14</sup> Nii Teenforo asae, rohan turuhacoaauruha maosacuru, bacosacuru, naonjoainurine janate, acaauru rautae Jesoso. <sup>15</sup> Nii cojoelanaacojoai ichaain acaauru notaaca Jesusone jana ecu neein coarajeeuruha saseredote curuaanaacuru aina Moisesa rai Cana Coauneraacha tei rauhi que cacha relaaureraauru, naonjoainurine janate: “Coroaenjoinemiin *rey* Rabiri

ichoala,” naain cojiorichuruha canaanainunru Teenforo asaaene aonaain obajeeinte:

<sup>16</sup> “Toon ii rai ereeuruhane aonaaina,” naain bajaare.

Nii jaunte: “Aihanu. Aonacaaun. Tana: ‘Canaanainunru, sisinacaaurune maajeein ii coroaecuruhane coinete, caohacha ichaai,’ naain laenanohineein nena reretaaichene,” naain acaauru tonorae Jesoso. <sup>17</sup> Niritoha acaauru raine baihate, ecu acaauru ratiriin, nii nese caje amuhin, Betaniau cue Jesoso, ecu sinihane coina.

*Inacaenihane coina iquera cojiotaa Jesosone*

*(Mr 11.12-14, 20-26)*

<sup>18</sup> Inae janone jelaia neseeu cuhane jana mijiitohane jaunte, <sup>19</sup> bero auhaniha niha leinjiin *iquerane* jaun nichuuntaain coarae Jesoso, inaacane lihane coina niqiu. Nete inacaenihane jaun:

“Inae chabana coaiten inaariheeni,” naa Jesosone rijieoritiin ohe nii *iquera*.

<sup>20</sup> Nii coaraainte: “Chasiinna luhecotariin ohe,” naauruha cojoelatiin aina nerelanaa nichaanune tabaaurune janate:

<sup>21</sup> “Esinæ rauhijiriin esenetaain, icharichaaain Cana Coaunerane esenetaain neeichene, caa ena *iquera* ichacaanne amurijiriinte naineriquiche. Caa ichatane rai: ‘Caalai caje amuhin, cucuana cuhane cunihun,’ naaichene, nii aitocoichene rijieoritiin cucuana cuhane cure nii ichatane. <sup>22</sup> Nii rijieein techu, Cana Coaunera caje cha bajaaiche, terichaaanne esenetaanne, inara rai inaraacha bajai tereein Cana Coaunera,” nae aina nerelanaa nichaanune rai Jesoso.

*Cocoinaai letono niha Jesosone*

*(Mr 11.27-33; Lc 20.1-8)*

<sup>23</sup> Nii baiha Teenforo asae enohin cachaauru relaa niha Jesosone janate, rene turuhin: “Chatohanai Cocoinanacai neeinna neei ii, catohanai ichaaine coina. Chana cocoinanacai neein ii cocoinae,” naain Jesoso caje bajaauruha saseredote curuaanaacuru aina Joriocuru bichauhenaaurune janate:

<sup>24-25</sup> “Canuhetonaina inara caje bajanaa jereeun. Cha Joaan letoaelu cacha cojunacatihane coina. Cana Coaunerana letoaalu, ainihane cachaauru letononeinna aihalu. Canu rai beeichenena, canuhetonai inara rai canu cocoinaera bereeunni,” naain acaauru tonoraa Jesosone janate:

“ ‘Cana Coaunera letoaelu,’ naacachenete: ‘Chanuna jana esenetae-neeichelu,’ nareein cana rai. <sup>26</sup> Niheichu ‘Cachaaurute letoaelu,’ nanaa nainihaacache acaauru coasiha. Satiin cachaauru, Cana Coaunera, Joaan letoaalune esenetaauruhane jaun,” naaure nejesinajeein ita rai. Niritiin ita rohecaainte:

<sup>27</sup> “Coitucuhaacaanu,” naauruha Jesoso raina jaunte acaentonai:

“Aihana jaun chujian canuhetonai, inara rai canu cocoinaera benaa nainihaaun,” naain acaauru tonorae Jesoso.

*Coroatajai calaohichuru letoaa leinjiin cachane rijijiei que acaauru relaa Jesosone*

<sup>28</sup> Nii baihate acaauru rai:

“Tonaquiche jana inara caa erena que. Leinjiin cachate coroatajaain neeuruha rai calaohichurune jana, leinjiin rai: ‘Canu calaohi, enene canu ocoana jana amihanenihu,’ naa rai inacane jana: <sup>29</sup> ‘Coatiha curinaaunni’ naain cunaa jerenihane baiha cue nii leinjiin rai calaohi. <sup>30</sup> Nii baiha coaiten, nii rai calaohi coroataja letoaane janate: ‘Saan ahi. Inae

curichaaunnicha ofa,' naane saijieein cuene. <sup>31</sup> Chariji inara rai, rai inaca ere tonoraain niicha icharatei ichae," naain canacaanu caje bajaa Jesusone janate:

"Nii ichoaichaniha rai inaca letoanojointe, inacaacha icharatei ichaain inaca ere tonorae," naauru janate:

"Nii rijijieein techu, inara aineeichene jana, Cana Coaunera Cojoanonaa que niha cuurureein Roma curuaanaa rai cachaauru cobaraain coriqui bajaaurera aina ene cojoaelorohecuru. <sup>32</sup> Caohachaain rai nichao coreein neeuruha cachaaurune coina, relanajaa uhalu Joanne jana, inara esenetaeneeichelune jana, Roma curuaanaa rai cachaauru cobaraain coriqui bajaaureraauru aina, nii ene cojoaelorohecuru esenetaauruhalune jaunte, Cana Coaunera Cojoanonaa que neeurureein. Jana inara, coaraquichene saijieein esenetaain inara ichao coreneeichene jaun, coatiha Cana Coaunera Cojoanonaa que neriheeicheein," nae saseredotecuru aina Joriocuru bichauhenaauru rai Jesoso.

*Nechu aansaineein ichaonacaauru amihanenacaauru que cachaauru relaa Jesusone*

*(Mr 12.1-12; Lc 20.9-19)*

<sup>33</sup> "Caa leeochoa erenaa aonacuche. Leinjiin cachate oba coocana sirihane jaun, bino ichaane jaanu ichaain corihateein, nii baiha ucuuneein rori jae nichoae netiin amihanenacaauru beraihane coina. Inae satiin besautiaane baihate, rai leruhin teeuruhane coina que amihanenaa inaaaureraauru cachaauru rai teein ratiriin amue. <sup>34</sup> Inae tainacaane janate, leruhin rai niicha teeuruheni teeuruha raine coina letonocuru letoaa nii ocoana erorane jana, cuhin bajaauruha nii letonocurune jana, <sup>35</sup> tabaauru letonocuru faojoaain, tabaauru atinaain, ajeri que tabaauru bодоosiin, naaonjoainchuru sonajaaure. <sup>36</sup> Nii jaunte, nitohaneein rai letonocuru letoaane jana, sonajaauruhane jaun, coaiteen jelai amuritoheriin, enacoauneein letonocuru letoaane jana, jerichanejeein sonajaaunre nii amihanenacaauru.

<sup>37</sup> Nii letonocuru letoaane naineein sonajatocuruhane jaunte, satononiha rai calaohi letoae: 'Canu calaohi nihane jaunte laen que suujua acatecurureein,' naain niqiu letoae. <sup>38-39</sup> Nete inae cuha nii rai calaohine jana coaraain ecu ita rai: 'Caate laen, nerora calaohi nihane jaun, jitariin cana caje caa rai inaca raineein nena raa cureein satiin aina nedaane coina. Coanete sohin jaohacache. Nii banate, satiin cana raineein nedareein nii raineein neenu,' naain nii rijia caje mitaain sohin jaore nii amihanenacaauru.

<sup>40</sup> Aihana jaun, inae turuhane bana, cha ichareein acaauru aina, nii amihanenaa erora," naain bajaa acaauru caje Jesusone janate:

<sup>41</sup> "Nii nechu aansaineein ichaonacaauru cachaauru sohinte jaoreein, cairichaaajoaain acaauru coaraelanaala. Sohin jaonajaainte, leeochoaauru rai nii amihanenaa tiha cureein, inae ecu tihane bana rai leruhin niicha taojiaauri teeuruhane coina," naauru janate:

<sup>42</sup> "Tana, Cana Coaunera Quiricha cuhane:  
'Nii ajeri, loreri ichacuruhane jaanu que nena jaolecooruhane jaan que temurateeinte loreri jaure nii loreri icharaauru. Niine cojoelatohacaanu, nitohaneein icha Cana Coaunerane jaun,' naain laenanohineein nihane reretaain aonaquichene.

<sup>43</sup> Nitohanihane jaunna inara rai aitoon, rai Cojoanonaa que neeichene coina tihalune saijieein nii inara rai niicha teilu ruluhin, janijiin niicha

ranojoinunru Cojoanonaanu que terichaain Cana Coaunerane jaun. <sup>44</sup> Jana canu nii ajeri nichaaunne ichoae comoite raajenihane chalutoroaain nedareein. Jana, canu nii ajerineein chunocoha ichoae comohanunete ajane neein nedareein,” naain raajenihane neque aite Jesuso.

<sup>45-46</sup> Niritiin acaauru que aitoa Jesusone que nainacuruhane jaunte, Jesuso mucueratena jerecuruhane saijieein, ichana nainecurene, satiin cachaauru coasiha nii saseredote curuaanaacuru aina Joriocuru bichauhenaauru, satiin cachaauru Cana Coaunera letono *profeta* niha Jesusone esenetaauruhane jaun.

## 22

*Leinjiin rey calaohi nisirihatihane quete cache relae Jesuso.*

*(Lc 14.15-24)*

<sup>1-2</sup> Nitohaneeinte coaiten acaauru rai nereretanaa rijjije que cuaain ereerejeein:

“Leinjiin *rey*, nisirihatihane rai calaohine coina beseta ichaane jaunte niqui, <sup>3</sup> rai letonocuru letoae, nii cotihanohichuru cotihacuruhane coina. Nete tonoraelanaala, nii beseta que turunaa jerecurene. <sup>4</sup> Nii turunaa jerecurenihane jaunte, enacoauneein rai letonocuru leeochoaauru letoae: ‘Inae jatoroainjete ne lenone. Coerenetonanaain nenacaauru nirihurujete soerate. Chajaain beseta bitoaa uucheje,’ naain cotihanaacuruhane janate, <sup>5-6</sup> tonorana jerelanaala nocoana jana cue leinjiin. Jana leechate, rai rucuhete que necoretiha cue. Jana leeochoaurute, nii *rey* letonocuru mucuhin atinanajaain sonajaaure.

<sup>7</sup> Nii corenihate jataain obajeein, rai soondarooru letoae acaauru *rey*, nii rai letonocuru sohin jaaoreraauru sohin jaohin, acaauru nese mo-cooruhane coina. <sup>8</sup> Inae nitohaneein turunaa jerecurenihane niicha cotiharateeurine jaunte, ‘Satiinte niqui inae jatoroain ne, caa nisirihatena beseta. Nete nelatecurenihane jaun turunaa nainecurene nii jauriaanejeein cotihanohichuru. <sup>9</sup> Aihana jaun, chajaain nese cataun situnacaauru berooru cuhane cuhecujeein, inaraacha erui cachaauru cotihacuchete, caa nisirihatena beseta bitoaa uuruhine,’ naain rai letonocuru letoae nii *rey*. <sup>10</sup> Nii jaunte, nese cataun situnacaauru berooru cuhane cuhin, aansaineein ichaonacaauru, cachaauru caohachaain suujua coaraauru, naonjoainurine majeein cotihacuruhane jaun, cache que memoe loreri asajai.

<sup>11</sup> Inae satiin nii *reycha* tei cajione jiaain neeuruha cotihanoichurune jana enohin coaraa *rey* janate, ecu ne leinjiin cache *reycha* tei nisirihateeuruhane jaan cocoajione jiaelanaala nena. <sup>12</sup> Nii cache raite: ‘Chasiina nisiriataanaa cocoajione satiin rai canuhacha tei jiaeralanaala cau enohite quiicha belai,’ naa rai nii *rey* jana, ecu inaheneeicha neein aonaje nii cache. <sup>13</sup> Niritiinte lenonecuruha cachaaurune jana coaraneein nenacaauru rai: ‘Caa cache biji aina, rai tijia ichojoaain airiniha nocohenaanau jaochete, ecu neein chanaaine,’ nae nii *rey*. <sup>14</sup> Arajiite niqui cotihano hi ne; nete coroatajaaecure janijiin ranojoinunri. Nii rijjicha Cana Coaunera Cojoanona,” naain que jaolequiin nenacaauru que cuaain ecu nenacaauru cachaauru rai ereereje Jesuso.

*Roma curuaanaa rai coriqui bajaaurera aina iriha Jesusone*

*(Mr 12.13-17; Lc 20.20-26)*

<sup>15</sup> Niritiin acaauru que aitoa Jesusone que nainacuruhane jaunte, jelai caje amuhin Jesuso coulurujeeuruhane jaanu leranu arihure ita suujua tacaain fariseocuru. Chaelai que aitocuruhane jana, baasoneein acaauru

tonoraa Jesusone colurujeeuruhane caina. <sup>16</sup> Nitohaneein coacuhinte, acaauru ere tonoraeraauru, chaen Erodesi ere tonoraeraauru, naaonjoainuri letoaaure Jesuso rene, coulurujeeuruhane jaan lera ariha coritaauruhane caina. Nii jaunte rene turuhin:

“Cacha relaera, iite iique tonaain iriha cachane tonoraelanaala, esinae rauhijiriin aitiin jeriha Cana Coaunerane rijijieein ichaoha cachane caina relai, rai suujua caje rocohin cacha relaauruha leeochoaurune rijijielanaala. Chaen nechu inanacaa cacha ichaone caje coaraain coulurujueneeine coitucuhacaanu. <sup>17</sup> Nii jaunna, canacaanu rai beeine jerichaanu. Caohachaana Romanocuru curuaanaacuru curuaanaa- enferadoroacha bajaeratenojoi coriqui *impoesto* tihacachene,” naain bajaare Jesuso caje. <sup>18</sup> Nete, nechu cairichanaa coacuhin letononeein aitocuruhane que nainaana jaun:

“Casajenetiin cacha caohacha niha nocoetonacaauru, chanuna baasoneein cacairichaa canu coritana coauquiche. <sup>19</sup> Canu rai, nii enferadoro rai inaraacha tei coriqui uhaauchena coarae,” naa Jesusone jaun, rai coata caje nena coriqui denario teuruhane jaun coaraante:

<sup>20</sup> “Chariji coujunaca cau caa ne, rai curuaa aina laenanohineein,” naain acaauru caje baja Jesusone jana:

<sup>21-22</sup> “Caate enferadoro coujunacane,” naain tonoraauruhane jaunte:

“Aihana jaun chujian, nii enferadoro rainein nena teeuche enferadoro rai. Jana, nii Cana Coaunera rainein nena teeuche Cana Coaunera rai,” naa acaauru rai Jesusone jaunte inauheneeicha cojoelatiin ecu Jesuso ratiriin amuure.

*Oha cachane baiha ichanaa cachane bajaauruhane  
(Mr 12.18-27; Lc 20.27-40)*

<sup>23</sup> Nii bananeeinte, Jesuso coaraa uure sadoseeocuru tabaauru, oha cachane baiha nacoauneein ichanaane esenetaaurenihane jaun, bajaauruhane caina. Nitohaneein uhinte:

<sup>24</sup> “Cacha relaera, Moisesate canacaanu rai aitelu, chunocoha leinjiiniji canaanai sirilanaala rai comasai ratiriin ohane, nii onaa ocoala nii rai ninana autana raa rai comasaineein ne, nii onaa bereeneein teein, nii autana bereetihane caina. <sup>25</sup> Nii janate, cau canacaanu aina neurelu caainsineein ita nejera nejesinaneein cachaauru. Nii acaauru inanate, leinjiiniji rai comasai aina canaanai sirilanaala ohe. Nete leinjiiniji canaanai sirilanaala ohane jaun, rai nocoala rai, nii rai nautana teein ratiri. <sup>26-27</sup> Nete jerichanejeein canaanai sirilanaala oha acaentonaine jaun, que jaurii nocoala rai nii nautana teein ratiri. Nirijieein cuaajeente satiin ooruha nii ita nejera nejesinaaurune jana, ohe nii ene netonai. <sup>28</sup> Aihana jaun, inae nacoauneein o caje ichanaa cachane bana, chariji comasaineein nereein nii ene, satiin ita nejeraauru comasaineein nihalune jaun,” naain Jesuso caje bajaauruhane jaunte:

<sup>29</sup> “Cana Coaunera Quiricha inoansi reretaain niicha ichana nainei coitucueeneichene jaunte, cha coitucueeneichene jaun aitocoiche. <sup>30</sup> Inae ohane caje ichanaa cachane, ene, quicha, naaonjoainuri ita que nesinijerateein neeururinaain, inae Cana Coaunera letono anjera dedeeu nenacaauru rijijieein neeururichaine jaun. <sup>31</sup> Tana o caje ichanacuruha onacaaurune que, raaje nujae caje: <sup>32</sup> ‘Canune, Abaraaun, Isaca, Jacobo, naaonjoainuri Coauneraneun. Aihana jaun, coatiha onacaauru Coauneranihaaun. Canune ichaohin nenacaauru coauneraneun.’ naain aitohalu Cana Coaunerane reretaain coitucuhichene,” nae acaauru rai Jesuso.

<sup>33</sup> Niritiin sadoseeocuru relaa Jesusone jaunte, cojoelatiin aonajeeure cachaauru.

*Jataain leeochoauru amuritoeriin nelateein tenojoi Rauhi*  
(Mr 12.28-34)

<sup>34</sup> Nitohaneein acaauru relaa Jesusone jana, inauheneeicha aonajeeuruha sadoseeocurune coitucuhinte, ita taojiaaure fariseeocuru. <sup>35-36</sup> Nitohaneente, leinjiin acaauru caje Cana Coaunera rai rauhi que cacha relaeraneein nenea fariseeo, Jesoso rai:

“Cacha relaera, chariji rauhi cana ichao rai leeochoauru amuritoeriin jataain nelateineein tenojoin ne,” naain nechu coulurijiane jaan leranu ariha, Jesoso caje bajaane janate:

<sup>37</sup> “Ii Curuaanaa Cana Coaunera belaihu, ii coichana, ii suujua, ii suujue, iicha coacui, naonjoain aina cuaritaain. <sup>38</sup> Caritiinte jataain jauriaanejeein cana rai nelateineein nenea rauhi beratelu cana rai Cana Coaunera. <sup>39</sup> Nii que jauriineein tenojote, jerichanetjoein: ‘Chamute cacha belaa coaraau, ichaajenhane ijiabereeo belaa ine rijitjoein,’ nae. <sup>40</sup> Caa coroatajai rauhite, jataain nelateein cana ichao rai tenojoi ne. Acatechu nii Moisesa aitoonjoa rauhichuru cana relaauruha *profetacurune* jaan rauhi temuraneein ne,” nae fariseeocuru rai Jesoso.

*Cha caje nefoeratenaa ne Curisito Mesihasi.*  
(Mr 12.35-37; Lc 20.41-44)

<sup>41</sup> Nitohaneein jaiti netaojiaain ita aina neeuruha fariseeocurune janate:

<sup>42</sup> “Tonaquiche inara Curisito Mesihasi que. Cha caje nefoeratenaa neeicha ne,” naain acaauru caje bajaa Jesusone janate: “Rabiri caje nefoeratenaneente ne Curisito Mesihasi,” naain tonoraauruha fariseeocurune janate:

<sup>43</sup> “Chasiina jana nitohanihane, que aitoroatiha Cana Coaunera Suujuene jaun: ‘Canu Curuaanaa,’ naelu Rabiri, Curisito Mesihasi que. Chaen techu:

<sup>44</sup> ‘Canu Curuaanaa raite:

“Cau carohan,  
caraotono nichajai que nelauriaau,  
ii que nejeratenacaauru amuritiin  
ii tijia asaee tenajaanune reentiaaincha,” nae Cana Coaunera,  
naain belu Rabiri.

<sup>45-46</sup> Aihana jaun, chasiina Rabiri caje nefoeratenaa nere Curisito Mesihasi: ‘Canu Curuaanaa,’ naalu rai Rabiri natiin,” naa acaauru rai Jesusone janate, le erenaanejeeiniji tonoraarenehane jaun, inae nii caje coauneein, caje cha bajanaa jerecurene fariseeocuru.

## 23

*Fariseeocuru aina, Cana Coaunera rai rauhi que cacha relaaurera ichao biha Jesusone*

(Mr 12.38-40; Lc 11.37-54; 20.45-47)

<sup>1</sup> Nii baihate, ecu nenacaauru cachaauru, chaen aina nerelanaa nichaanune, naonjoainichaanune rai:

<sup>2</sup> “Cana Coaunera rai rauhi que cacha relaaurera aina fariseeocurute, aitoha nii rauhine jaan belanaala joaenreen cuaain cachaauru relaaure. <sup>3</sup> Atiin acaauru ere tonoraain acaauru aitoonjoa ichacuche. Nete laen caohachaene chaachacuruhane rijijieein cha ichaquichene, tonaain ereeuruhane nihanatiin, enaacha leeocheenein chaachacuruhane jaun. <sup>4</sup> Nitohaneente, nii chabana nitohanei ichaonaa que ichaonaa nainenihacachane saijieein, cachaauru rai caaintati ichaonaa teeure, nii acaauru nihanatiin nitohanei ichaonaa que ichaonaa naineralanaala.

<sup>5</sup> Nechu caohacha ichaa nocoetocuruhane coaracuruha cachaurune coinete, nitohaneen neeure. Nii jaunte, rai naurichuru, rai bijihuru cuhane, naaonjoain Moisesa rai Cana Coauneraacha tenojoin rauhi laenanohineen nenea amauruhane rautatoore. Chaen techu jataain nelatiha nocoetocuruhane jaan coujunacanu que, cajione ererianohineen nenea jiaanne maajeein aihure. <sup>6</sup> Nii rijijieen techu niha lenonena jaanru rori caohachauru janijiin ichoae nelauriaain lenoneen, sinacoca asaene maajeein enooruhane, rori caohachauru janijiin nichoae nelauriaaure. <sup>7</sup> Nitohaneehurane jaunte, bero cuhane acauru que tacaain, acauru que suujua acateen iriha cachaurune jereen: ‘Cacha relaera,’ naa acauru rai cachane jereinchuru aihure.

<sup>8</sup> Nete laen inara: ‘Canu relaera,’ naain inara rai iriha cachane jereen nenea naineneeiche, satiin inara ita nejeraneen neeichene jaun, leinjiincha niha inara Relaerane jaun. <sup>9</sup> Niheichu nainiheeiche chuni rai: ‘Canu inaca,’ naain erenea nainiheeiche, leinjiincha niha inara Inaca dedeeune jaun. <sup>10</sup> Niheichu nainiheeiche: ‘Canu curuaanaa,’ naa inara rai cachane jereen neeichene, leinjiin Curisito nichaanne inara Curuaanaa neen nihanune jaun. <sup>11</sup> Nitohanihane jaun, leeochoauru amuritoheriin nenea coaauca chunocoha inara janane, cha lateen neeuruha leeochoaurune, acauru coroatajanemiin. <sup>12</sup> Nitohaneen leeochoauru amurijiriin nenea jerenacaaurute leeochoauru fautaain tenojoinereen. Jana leeochoauru fautaain neite, leeochoauru amuritoheriin tenojoinereen.

<sup>13</sup> Coaraain nainacuche Cana Coaunera rai rauhi que cacharelaaurerauru aina fariseeocuru. Inarate Cana Coaunera Cojoanona que nenea jerecuruha leeochoaurune caohateraneen neeiche. Inara netonai que ichaonaa naineneeichene jaunte, que ichaauru leeochoaurune caohateraneen neeiche. <sup>14</sup> Coaraain nainacuche Cana Coaunera rai rauhi que cacharelaaurera aina fariseeocuru, autanaauru loreri nihanatiin ruluhin neeichene jaun. Nitohaneen ichaohichene aninoeraneete, Cana Coaunera bajaichene carajaan bajaiche. Nitohaneen neeichene jaunte, jataain caseteco coaraa curiquicheen inara.

<sup>15</sup> Coaraain nainacuche Cana Coaunera rai rauhi que cacharelaaurerauru aina fariseeocuru. Inarate chauratane sacuritaain cucuana cuhaneuru amuhemujeein chauru ariiriiquiche, nechu jataain Cana Coaunera esenetaera niha nocoetiin relanajaainchene, coroata saain inara amurijiriin moconajaera cachaneen neeuhane coina.

<sup>16</sup> Coaraain nainacuche inara maosa rijijieen nenacaauru chauru relaeraneen nenacaauru. Inarate chunocoha, Teenforo coreniha cha ichaane coina aitohane sainejeein nii naitonjoa ichaeniha cachane, cha ujuaihoneen nenihane que aitocoiche. Nete laen Teenforo corujele oro coreniha chaachaain nihane coina aitohane jana, chatohanai ichaain nenihane cocoaeraane que aitocoiche. <sup>17</sup> Aaso aina maosa rijijieen nenacaauru chauru. Cha jataain inara rai nelateen nenaane orona. Tana nii Teenforo coreniha que banijiaineen niha nii orone jaun, jataain nelateineen nihane coitucuhichene. <sup>18</sup> Chaen techu: Chunocoha, Cana Coaunera que banijiai lenonecuru mocohichene jaan rori- *altar* coreniha cha ichaane coina aitohane sainejeein ichaeniha, cha ujuaihoneen nenihane que aitocoiche. Nete laen, nii rori- Cana Coaunera que banijiai iniho mocohichene jaan- *altar* ichoae nenea coreniha cha ichaane coina aitocoichene, esinae rauhijiriin nohanelanaala ichaane coina aitocoiche. <sup>19</sup> Maosa rijijieen nenacaauru chauru. Cha jataain inara rai nelateineen ne. Nii Cana Coaunera que banihateen tenojoin inihona, ainihane rorina. Tana

nii rori coreniha Cana Coaunera que banijiaineen niha nii inihone coitucuhichene. <sup>20</sup> Aihane jaun nii rori coreniha chaachaaain nihane coina aitoha chunine, nii roriicha coreniha coatiha icharinaaain, nii nichoae nenea corenihane maajeente ichareein. <sup>21</sup> Jana Teenforo coreniha chaachaaain nihane coina aitohane, coatiha Teenforo corenihacha ichaane coina aitorinaaain, Cana Coaunera quene maajeente aitoreein ecu nihane jaun. <sup>22</sup> Jana dede coreniha chaachaaain nihane coina aitoha chuninete, Cana Coaunera nelaurianajaneen niha dedene jaun, Cana Coaunera quene maajein aitoreein.

<sup>23</sup> Coaraain nainacuche fariseeocuru aina Cana Coaunera rai rauhi que cacha relaaureraauru, inaraacha ichai coitucuhin ichoaneeneichene jaun. Caohacha ichaa nocoetiinte niqui jataain ansijiin laajojiri niha natiin Cana Coaunera rai teeiche. Nete jataain nelatei Cana Coaunera rai rauhi tonoraain neneeiche. ‘Caohacha nejesinaacha ichaain, baaso coacuelanaala neein, cairichaaajoaain leeochoauru coaraain, Cana Coaunera ere tonoraain aca jerihane rijjijeein que asiin cha ichaelanaala neeuche,’ naa Cana Coaunera rai rauhine sainejeein tonoraeneeiche. Nii leeochoa jianelanaala nii rauhi aitoonjoa ichaquichenete caohachae. <sup>24</sup> Inarate, maosa rijjijeein nenacaauru cachaauru relaeraneen neeiche. Jataain ansijin laajojiriniha natiinte niqui tonoraain niha cachane jereein neeiche. Nete jataain banejelanaala baaso ichaain neeichene coaraain coitucunaa naineneeiche.

<sup>25</sup> Coaraain nainacuche Cana Coaunera rai rauhi que cacha relaaureraauru aina fariseeocuru. Inara cacha coritaera nequichenete, acau cohichene jaan janoriicha culeequiche. Nete cuhanai culejeneeichene jaun jataain calanine cuhanai. Nii rijiicha inara suujua cuhanai, inara suujua cuhane coacuhin baasoneen cacha basijiaauhin, inara amute cacha caje cha chunaain, naaonjoaainchene jaun. <sup>26</sup> Cha coitucuelanaala nitajenaa neein nenacaauru fariseeocuru. Jauriaanejeein nii acau cohichene jaan janori culeequichene rijjijeein, nii inara suujua cuhanai itolere baaso ichaquichene jaan caaun calanineen niha inara suujua cuhanaine jaan jaochete, somaraain neeiche.

<sup>27</sup> Coaraain nainacuche Cana Coaunera rai rauhi que cacha relaeracuru aina fariseeocuru, aiha atanebana airichai nichajaine rijjijeein somaraain, jana asaun itolere onaa bucuuru calani sirihane rijiicha inara suujua cuhanaine jaun. <sup>28</sup> Nii aiha atanebanane rijjijeeinte, cachaauru nota rai, inara jaberocohacha cacha caohacha tocohaneein inanacae. Nete, inara suujua cuhane casajenetiin, cacha coritaeraniha caohacha ichaa nocoetiin aaichene jaun, leinjiin calani rijjijeein neeiche. <sup>29</sup> Coaraain nainacuche Cana Coaunera rai rauhi que cacha relaeracuru aina fariseeocuru, inaraacha ichai coitucuhin ichaeneeichene jaun. Casajenetohichene jaunte, nechu cacha coritaeraniha, nii inara foerateracuru sonojoihunru *profetacuru*, cacha caohachaaain suujua coaraauru, naaonjoainuri cojunaca ichaquiche ajeri caje, caohatiin itolere que corujueleteein. <sup>30</sup> Nitohaneen ichaainte: ‘Cana foerateracuru jiniichaain ichaohacachelune jana nihane, coatiha acaauru coroatajane rihahacache, *profetacuru* sohin jaaoruhane jana,’ naain ereeiche. <sup>31</sup> Niritiinte, inara raajenihane, nii inoaenlu *profetacuru* sohin jaaoreralu nefoeratenequichene coitucuhiche. <sup>32</sup> Inae nitohaneen nunuheteuruhalu inara foerateracurune jaan besautiaauche.

<sup>33</sup> Acanocuru, acano caje nefoeratenacaauru. Coatiha usi tabai jana caseteco neriquicheeinne caje nichoteriheicheein. <sup>34</sup> Nii coinante inara rene *profetacuru*, cha cojoeluinanaa inaurera, cacha relaeracuru, naaonjoainuri letoaanune jana, tabaauru sohin jaohin, coroso que tabaauru teein, tabaauru faohariquicheein sinacoca asae teein. Chaen techu, neseeuru



neseeu ru naineein arinajariquicheein. <sup>35</sup> Nii jaunte inara, satiin cacha caohachaauru atinanohichuru coreniha caseteco coariquicheein. Caohachaa in suujua coara Abeli atinaauruhalune que nunuhetein, Cana Coaunera rai jelai tein nenea teuruhane jaan rori rohan nenea *santuario* rohan tein inaraacha soilu- Berequihasi calaohi Sacariasi que tiaa-joaain, caseteco coaraa curiquicheein. <sup>36</sup> Esinae rauhijiriinte nitohanihane coreniha, caseteco coaracurureein caa enene nenacaauru cachaauru,” nae Cana Coaunera rai rauhi que cacha relaa urera aina fariseeocuru rai Jesoso.

### *Jerosaleen cocoaichacuru coreniha chanaa Jesusone*

<sup>37</sup> Niritohane bai hate: “Cairichaa joa aiche Jerosaleen cocoaichacuru, inara rene Cana Coaunera letonocuru *profetacuru* sohin jaohin, Cana Coaunera ere beracuru bодоosiiche ajeri quene jaun. Araai saaine niqui, ii cocoaichacuru ranaa jereeun, nitaro asae calaohichuru taojiaa ataoharine rijjijeein. Nete canu esenetaeneeichene jaun canu rene unaa jereneeiche. <sup>38</sup> Aonacuche. Ena caje coauneein, inae inara aina nerihaaunni. Aihana jaun, inae nerinaain inara beraicha. <sup>39</sup> Inae nacoauneein canu coariheecheein, turuhanune bana: ‘Caa ena turunaa Cana Curuaanaa coroaecuruhine satiin chauratane que nenacaauru cachaauru,’ nariquicheeine que tiaa joaain,” nae Jesoso.

## 24

### *Nitajerichaa in Teenforone biha Jesusone (Mr 13.1-2; Lc 21.5-6)*

<sup>1</sup> Inae Teenforo caje mituhin jelai caje amuhane rai niha Jesusone janane, rohan nichuuntaa coain caohatiin ichanohiniha nii Teenforone coaracaanu aina nerelanaa nichaanune.

<sup>2</sup> Nii jaunte: “Caohatiin ichanohiniha caa Teenforonena coarajeeiche. Esinae rauhijiriine inara rai aitoon, coatiha nii leinjiinniji ita ichoae nerinaain caa ena inaraacha coarajei ajeri, inae satiin nitajerichaa ine jaun,” nae aina nerelanaa nichaanune rai Jesoso.

### *Nacoauneein tururichaa in Curisitone bajaauruha aina nerelanacaurune (Mr 13.3-23; Lc 21.7-24; 17.22-24)*

<sup>3</sup> Nii bai hane, Oliboneein acaauruhacha curuaatei ichatane ucuunno cuhacaanu, ecu turuhin jelai lauhecoha Jesusone jana, rohan nichuuntaa caanu aina nerelanaa nichaanune. Nitohanein rohan nichuuntaainne:

“Canacaanu rai nii chaitoonjoan beeenene jerichaanu Curuaanaa. Chabana nacoauneein cau tururiquiin. Chatohanaicha inae turuhe lalajeeine jana, ii turu cojoinaca beraneein coarichaanuhin, inae saaelalajiha cana janonaane bana,” naain caje bajaacaanune janate:

<sup>4</sup> “Caohachaa in necohalajiin neeuche, nabana inara coritaa uruha chunocohacurune coataara. <sup>5</sup> Arajii cachaaurute, canu niha nocoetiin inara coritana jerecurureein: ‘Canune Curisito Mesihaseeunra,’ naante, arajii cachaauru coritaa urureeincha. <sup>6</sup> Niha sonaana cau, tajiha, naaonjoaaine coitucuhichene, jiaonriha nesoonetohichenera, nitohanihate cureein nii ajinihara. Nete, nitohanihane nihanatiin, jaiti cana janonaa satono que turuenereeincha. <sup>7</sup> Nejelau lauri nenacaauru ainate, sonaana que neeurureein leeo cha lauri nenacaurura. Nejelau atane que nenacauruniha natiinte, leeo cha atane que nenacaauru aina sonaana que neeurureeincha. Chaen techu, itolere sacuritaain niha mijetenane jana, araai laurii atanecuru

que niha cureein carorara. <sup>8</sup> Nitohaneeinte nunuheca cureein, inae cana cojoanona satono que turuhelalajihane jana, jataain inaderaauruha cachaaurune jaan cojoanonaara.

<sup>9</sup> Nii jana inarate tenojoiniha curiquicheein cocoinanacaaihuri rai, inara faojoaain, inara atinaain, naaonjoaain inara teeuruhane coina. Chaen techu, satiin cachaauru, canu coreniha inara que nererojoecaaeriin neeurureeincha. <sup>10</sup> Nii banate, arajii canu esenetaera niquichene, inaraacha esenetai janeein, ita que nererojoecaaain, nejesinajeein ita colurujueein ita teriquicheein cocoinanacaaihuri rai.

<sup>11</sup> Arajiite *profetaniha* nocoetiin turuhin namute cachaauru coritaauruhane, acaauru esenetaaurureein arajii cachaauru. <sup>12</sup> Nitohaneeinte, jataain baaso coacuhin inae ita belaihuruhane janeein niha cuurureein cachaauru. <sup>13</sup> Nete laen, nii niicha esenetai esenetaane nunuhetihane caje coauneein, jerichanejeein satono que tiaain sacuera nichotereeincha. <sup>14</sup> Caa ena nena ichaonaa erena raotono quiicha beebejei Cana Coaunera Cojoanonaate, satiin chauratane sacuritaain benojoinereein, satiin cachaauru inae coitucuuruhane jana, besaute que turuha cana cojoanonaane coinara.

<sup>15</sup> *Profeta* Danieriicha laenailu reretaain coarate nii coitucuhin nichotena nainereein. Aihana jaun, inae nii Teenforo asaae jelai teein Cana Coaunera que banijiaain *altar* ichoae ecooca Cana Coaunera que nejeratena casicheine coaraquichene, <sup>16</sup> Jodeau nenacaauru sorooruhine ichatane ucuunno que cuhinch. <sup>17</sup> Jana, rai loreri janori ichoae nena, jiaonriha fauhin rai rucuhale raane. <sup>18</sup> Jana rai nocoana jana nena, jiaonriha rai nenajau cauhin rai cajione ranaa coaucane. <sup>19</sup> Jataainte cairichaojoaurureein nii cojoanona que turuhane bana ausurineein nenacaauru enecuru, sisihajeein canaanai sirichauru enecuru, naaonjoainuri. <sup>20</sup> Cana Coaunera bajaache, nabana jelarona bana, niheichu nebetacanaa cojoanona, naaonjoain bana niha nii sorohichene jaan cojoanonaane coataa. <sup>21</sup> Nitohaneeinte niha cureein jataain necairichanaa tabai, cana necoaauna caje coauneein nii chabana niha nitohanaine que airijiin niheichu nerinaain nii baiha. <sup>22</sup> Jana, nii cojoanona sarotiaeniha Cana Coaunerane, satiin cachaauru nichotena nainecururihei. Nete, atiin sarotiareein, janiijiin niicha ranojoihunru belaitohane jaun acaauru coreniha.

<sup>23</sup> Chunocoha inara rai: 'Caute ne Curisito Mesahasicha. Chajaau tejian coanicha,' naa inara raine, jiaonriha esenetaaichene. <sup>24</sup> Turuururichaain inara rene casajeeuru *profetaniha* nocoetonacaauru aina Curisito mesahasiniha nocoetonacaauru. Nitohaneein turuhinte, itolere cojoelanaacojoai ichacurureein, janiijiin Cana Coauneraacha ranojoinunrune maajeein coritana nainecuruhane coritacuruhane coina. <sup>25</sup> Nitohanihane ajinihane inara rai beeun, caje coitucuhin nainaain ichaohichene coina. <sup>26</sup> Aihane jaun, inara rai: 'Nota tajiha cache areroote ne,' naauruhane nihanatiin jiaonriha cuhichene. Niheichu: 'Nocoe caute ne nasiincha,' naa inara rai chunine, jiaonriha esenetaaichene. <sup>27</sup> Charijieein teeinti, enoto mitu nichajai caje jilenetoha jiacane enoto soo nichaae kuhine, satiin coanojoi ne. Nii rijijieeinte, satiin coanojoiniha cureein, inae nacoauneein cau turuhanu acaihaniji Cache Calahineein nejanoanaa nichaanne bana. <sup>28</sup> Charijieein teeinti, niha caanii setune que fauha ichotarine caje coitucuerae. Nii rijijieeinte coitucunojoinereein turuhanu canu Curisitonichaaunne bana.

*Tururichaain acaihaniji cache calahineein nejanoanaane*  
(Mr 13.24-37; Lc 21.25-33; 17.26-30, 34-36)

<sup>29</sup> Inae nitohaneein niha nii necairichanaa tabai cojoanonaane janate, no-cohenaneein nerotoreein enoto cono. Atene netonaite, conohane jianereein nii cojoanonaa bana. Jana arasijieeurute, dede caje naluurureein. Dedeu nenacaauru nihanatiinte nerurujuaurureein.

<sup>30</sup> Nitohanihane janate laen, inanacareein dede caje inae fauha uhanu canu acaihaniji Cacha Calaohineein nenea nichaaunne bera. Nii jana, satiin chauratane sacuritaain nenacaauru cachaurute, jataain coasinacaun chanaain coaracuruhane janane, dede sacari jana uhin fauha ureeunni acaihaniji Cacha Calaohineein nenea nichaaunne, jataain necaohachaain itolere ichana naineein nelateein. <sup>31</sup> Nitohaneein turuhinne canu letonocuru anjeraauru letoareeunni, tonijiaain jaaiha toteein, satiin chauratane sacuritaain, itolereenein satono tinonoritiin nenacaauru janijiin canu ranojoinunri cachauru taojiaauruha canu raine coina.

<sup>32</sup> Aihana jaun, caa uhera que inara relaunne jaan que nerelaache. Charijieein teeinti, inae rai nunecuru caohatonanaain alohacoaain ujuanihane caje, inae cataainjia ajaanaane coitucuhiche. <sup>33</sup> Nii rijijieein, caa inara rai caitoonjoa tocohanihane coaraquichene, inae turuhelalajihanu acaihaniji Cacha Calaohineein nejanoanaa nichaaunne que nainacuche. <sup>34</sup> Esinae rauhijiriinte, jaiti ooreniha caa enene nenacaauru cachaurune jana aicheein. <sup>35</sup> Dede aina chauratanete nitajeeurureein. Nete laen, nitajenereein, caa caitoonjoa nainaane reetiaain, canu ere. <sup>36</sup> Coatihalaen nihei chuni, rai cojoanonaa aina, 'Naaonjoain rijiu tiaainte aicheeincha,' naain nii coitucuera. Niheichu, Cana Coaunera letonocuru anjeraauru dede u nenacaauru nihanatiin coitucuuruhi; niheichu canu- Calaohinichaaune saijieein coitucuhaaun canuhetonai. Acaihaniji canu Inaca Cana Coauneraachate, nii coitucuhin ne.

<sup>37</sup> Nihalu Nohene bana aihalune tocohaneeinte aicheein, inae nacoauneein turuha urichaaunni acaihaniji Cacha Calaohineein nenea nichaaunne cojoanonaa que turuhane bana. <sup>38</sup> Coaracuche nachuhinti, jaiti uheniha elo tabaine jana, rai bote cuhane fauhin enoha Nohene que tiaaajoaain, raotojoeein lenoneein, acau cohin, necohansajiaain, naaonjoauruhalu cachaurune. <sup>39</sup> Nejetaote laen, urichaaain elo tabaine coaujeeurenihane jana, uha elo tabaine jaun jetao, jitariin acaauru joocalu ne. Nii rijijieein nechu, coohatejeeurenihane cachaurune jana, nacoauneein tureeunni acaihaniji Cacha Calaohineein nejanoanaa nichaaunne. <sup>40</sup> Nii turuhanune rijieeoritiinte, ocoana jana neeurureein coroatajai cachauru. Leinjiinte, amanojoinihane jana, leeocho ratirinojoinereein. <sup>41</sup> Nii jana, coroatajai enecurute, tutune jaa neeuruhane jana, leinjiin amanojoinihane jana, leeocho ratirinojoinereein.

<sup>42</sup> Nitohaneein: 'Cuu tiaainte, turuha ureein canu Curuaanaa,' naain coitucuneeichene jaun, tururichaaunnine que nainaan ichaaoche. <sup>43</sup> Charijieein teeinti, leinjiin cacha: 'Cuu tiha janotiine janate turuha ureein cau asijiauto,' naain coitucuhane que nainaane jaun, nii chuni rai lorero asae enohane jerelanaala caohatiin rai lorero beraihanne jaun, nenere basijiaera. Nii rijijieein inara netonai jatoroaain neeuche. <sup>44</sup> Aihane jaun, Cana Coaunera Calaohi cacha caje nejanonaa nichaaunne turu cojoanonaa coitucuneeichene jaun, inara netonai nainaan jatoraaain canu cohacuche.

*Fatoroon ere tonoraain nenea cacha aina, fatoroon ere tonoraelanaala nenea cacha*

*(Lc 12.41-48)*

<sup>45</sup> Cha teeinti letoaain ratirihaha rai fatoroonne tonoraain, inae cuu tihane jana rai lorero asae nenacaauru cachauru coroate, <sup>46</sup> nii jataain

raotojoeein neeine, nii letoaain ratirihane jaan ichajihane jana eruha nii rai fatoronne. <sup>47</sup> Nitohaneein rai fatoroon aitoonjoa tonoraain icharate, esinae rauhijiriin satiin rai niicha sirii beraichaneein tereein rai fatoroon. <sup>48-49</sup> Nete laen: ‘Jaitijiecha carajareein rai fatoroon,’ naain nii leeochoaauru letonocuru faojaain sonajaain, ajetoriaacuru aina netaojiaain lenoneein ajeein, naaonjoaan, <sup>50</sup> cha cohatejelanaala nihane jana turuhane, nii nechu aansai letono casetecareein rai fatoroon, <sup>51</sup> caseteco coaracuruha nechu cacha coritaa Cana Coaunera coitucuha nocoetonacaaurune rijijieein. Ecute catu rioneein chanareein,” nae jetao aina nerelanacaauru rai Jesoso.

## 25

### *Lechooncai ranunaauru ichanohi que erenaa*

<sup>1</sup> “Cana Coaunera Cojoanonaate, aihuruha lechooncai ranunacuru nisirihatena beseta quene rijijie. Nii lechooncai ranunacurute, rai cono erene que mocohin nena amaain, nii nisirihateneini cohaca cuure turu jana raauruhane coina. <sup>2</sup> Nii lechooncai ranunacuru caje, saoquii ranunacurute, niicha ichai que caohachaaain coacuelanaala icharaauru ne. Jana, leeochoaauru saoquii ranunacurute, jataain nainaaain niicha ichai icharaauru ne. <sup>3</sup> Nii saoquii cha coacuelanaala nenacaauru ranunacurute, rai cono amaauruhane saijieein, nacoaauneein noitecuruhane jaanu erene amaarene. <sup>4</sup> Nete laen, nii saoquii jataain nainaaain nenacaauru, rai cono amaauruhane choae tacaain, le botichananaain rai noinu erene amaare. <sup>5</sup> Nitohaneein cuuru jana, jaiti turueniha nii nisirihateneine jaunte, inae siniitoruhane jaun, satiin sinihure nii ranunacuru. <sup>6</sup> Nii janate, inae dede catai rijiu: ‘Inae uha nii cacha nisirihateneini. Chajaain que tacaain rauchera’ naain toniha eheonane jaunte, <sup>7-8</sup> nimichucutaain rai cono noitecuruhane jana, nii saoquii cha coacuhelanaala nenacaauru ranunacuru, nii saoquii nainaaain cono noinu que erene uhaurera rai: ‘Atiin canacaanu sihuche aansijiin, nii inara cono noi erene quera. Inae saa rai noi erenene jaun, jaca canacaanu conone jaunne aitocooanura,’ naauruhane janate: <sup>9</sup> ‘Nainihaacanuta. Inara sihaacaunune, canacaanu rai nihanatiin nerihane coalanaalata. Chajaaincha que necoreteeuruhane jaun cuhin, coretenichuchera,’ naaure nii rai cono noinu amaain cunacaauru ranunacuru. <sup>10</sup> Nete nii rai cono noinu erene coretiha cuuruha nii saoquii cha coacuelanaala nenacaauru ranunacurune jana, inae turue nii nisirihateneini cacha. Nitohaneein turuha nii cacha nisirihateneine janate, aina jiniiquiin loreri asae enooruha beseta que nii saoquii ranunacuru nainaaai nenacaaurune jana inae nefue acujua. <sup>11</sup> Nii janate, inae nii acujuanaha turuhin: ‘Curuaanaa, atiin canacaanu rai acujua joaracaane canacaanu netonai enohacaanu,’ naauruha nii saoquii ranunacuru cha coacuelanaa nenacaauru, rai cono noinu coretecuruhane caje turuhinne janate: <sup>12</sup> ‘Esinae rauhijiriin inara coitucuhanune coalanaala,’ nae acaauru rai nii curuaanaa. Nii rijichate cureein Cana Coaunera Cojoanonaate.

<sup>13</sup> Aihana jaun, itolere bana nii que nainaaai jatoroaain ichaaoche, ‘Naaonjoai janonaa banate aicheein. Cuu tiariinte aicheein,’ naain coitucueeneicheene jaun.

*Cachaauru rai coriqui teein ratiricha fatoroon rijicha Cana Coaunera Cojoanonaate*

*(Lc 19.11-27)*

<sup>14</sup> Cana Coaunera Cojoanonaate, leinjiin cacha coriajai atane cuhane jaun, rai cachaauru cotijiaain, acaauru que coriqui beraichatera rijijie,

<sup>15</sup> leinjiin rai saogui oaraacai coreneein nenea coata caje coriqui te. Jana leeocha raite, coroata oaraacaain te. Jana leeocha raite le oaraacaain te, le cachaauru rai coretena nainecuruhane jeeonijihanaain teeinte amue. <sup>16</sup> Nii saogui oaraancaain raera cachate, nii coriqui que rucuhele coreteein, que necoreteein saogui oaraancaain nii coriqui jojoe. <sup>17</sup> Jerichanejeein techu, coroata oaraacaain niicha rai jojoe nii coroata oaraancaain raera cacha. <sup>18</sup> Nete laen, nii le oaraancaain raera, niicha bajei atane jachu cuhane nii rai fatoroon tenojoi coriqui asi. <sup>19</sup> Nii baiha carajaain catiaainte, inae turue nii acaauru curuaanaa coriqui teein ratiricha. Nitohaneein turuhinte, nii acaauru rai niicha tei coriqui coreniha acaauru rebe bajae. <sup>20</sup> Nii saogui oaraancaain raerate ichoaichaniha turuhin: ‘Curuaanaa, noco ha taolu canu rai, saogui oaraancaain iicha tei coriqui. Nocoa chaen leeocha saogui oaraancaain joocaaune jaan,’ naain, nii coriqui niicha jojoi tiha nii rai cachane janate: <sup>21</sup> ‘Jataain caohachate ichaaicha, jelai amuritoriin nenea beraichaneein ii tereunnicha. Aihana jaun, chajaain caloheri asaae enoote jiniiquiin rachoojihacara,’ nae nii curuaanaa. <sup>22</sup> Nii baihate turue, nii cacha coroata oaraacaain coriqui raera. Nitohaneein turuhinte: ‘Curuaanaa, noco ha taolu canu rai coroata oaraancaain iicha tei coriqui. Nocoa chaen coroata oaraancaain joocaaune jaan,’ naa nii coroata oaraacaain raera cachane jana jetaote: <sup>23</sup> ‘Jataain caohachate ichaaicha, coroatajajei aina caohachaaain erena tonoraain ichaine jaunne, jelai amuritoherii beraichaneein ii tereunni. Aihana jaun, chaajaain caloheri asaae enoote, jiniiquiin rachoojihaca,’ nae nii curuaanaa.

<sup>24</sup> Nete laen, nii le oaraancaain raera cacha turuhin: ‘Curuaanaa, nechu aansai cachaneeine jaun, temueneeine jaunru jelai caje temule raain, ii ocoananelanaala nenacaauru caje nihanatiin temule raain, <sup>25</sup> naajoaaine jaunna ii coasiha, atane jachu cuhane ii coriqui asihun. Nete cau ne nii ii coriqui,’ naain nii coriqui cainaa nii cachane jaunte: <sup>26</sup> ‘Tite, canu cacha baasoneein bajeriti cacha neei. Inae raotojoein canu temulenelanaala nenea niha natiin raain, canu ocoananelanaala nenea caje temule raain naajoaanne coitucuhine saijieein, <sup>27</sup> chanuna chaen, canu coriqui amaain teneei banco cuhane. Bana nitohaniane jana nihane, canu turuneeine nii banco cuhane neein nejocane jaanne maajeein rareeun,’ nae nii curuaanaa. <sup>28</sup> Niritiinte, ecu nenacaauru rai: ‘Caje nii le oaraancai niicha sirii coriqui ruluhin, nii lechoonca oaraancaneein siricha rai teeuche. <sup>29</sup> Nitohaneainte, siricha rai jataain jelai amuritoheriin tenojoinereein, jelai amuritoheriin sirihane coina. Jana, cha sirilanaala nenaate, acaihaniji niicha sirii, jitariin caje ruluerareein. <sup>30</sup> Aihana jaun, caa canu cacha baaso cha coitucuhi mucuhin, naain airiniha nocohenaanau jaochete, ecu neein mainajeein chanaaine,’ nae ecu nenacaauru rai.

*Rucuhenerichaain baaso icharaauru aina caohacha icharaauru ichaone*

<sup>31</sup> Inae rai cono caohacha que conohin, rai anjeraauru cataaun uhin turuhin rai rori- *trono* ichoae nelauriaanu canu Cana Coaunera Calaoheinein cacha caje nejanoanaa nichaaune banate, <sup>32</sup> satiin lauri lauri nenacaauru cachaauru turuureein canu acatiha. Nitohaneein nacatiha turuuhane janate, carenerocuru caje, jelai teein cabraauru leruha carenero beraichane rijijieein, <sup>33</sup> raotono nichajai que, nii janijiin niicha ranojoihunru- rai cachaauru teein, najaabiji nichajai que nii rai cachanelanaala nechu aansaneein nenacaauru tereein. <sup>34</sup> Nitohaneein jelai tihacoaain lerunajaainte, nii raotono nichajai que nenacaauru rai: ‘Chajaauche cajiha satiin, nii canu Inaca rausiaenojineein neiniquichene. Chajaauchete, cana rai

chauratane coaunaane caje coauneein, inara que banihateein canu Inaca Cana Coauneraacha rucujuei Cojoanonaa que ichaohiche. <sup>35</sup> Inarate, mijitichaaunne canu coroaateein, cocoirichaaunne acau que cacocaaain, canu nesurunaja colane amuhemuhecaunne, canu nesurunajaanu teein, <sup>36</sup> lanaa canu rai cajionene, carai cajione teein, cunaitichaaunne turuhin cacoharaain, caresero cuhane nihanune jana, turuhin canu coaraain, naaonjoaain canu rai nelateein nerejetocoiche,' narichaaunni acaauru rai canu Cana Coaunera Calaohi cacha caje nejanoanaa nichaaune. Niritocaaun acaauru raine janate: <sup>37</sup> 'Curuaanaa, esinaaena mijiteeine ii coroaateein, cocoireeine ii cocoaain, <sup>38</sup> ii nesurunaja colane amuhemuhequine, ichei ii nesurunaja teein, ii cajione colane neeine, ichei cajione teein, <sup>39</sup> cunaiteein, caresero cuhane neein naaonjoaine turuhin ii coaraain, naaonjoa rejetocooaanulura,' naauruha rai nii couluuonojoi suujuaquiin nenacaaurune janate: <sup>40</sup> 'Satiin canu nejeraauru cairicheinejeein nenacaauruhacha latei terejetocoichenete, canu rai tiha nii terejetocoichelu,' naain acaauru tonorareein nii acaauru Curuaanaa *Rey*," nae acaauru rai Jesoso.

<sup>41</sup> "Niritohane baihate, nii najaa biji nichajai que rai cachanelanaala nenacaauru rai: 'Naain cacaje amuhin, moconajaera aina rai letonocuru que banihateein ichanohin chabana jacanaa charanejeein nena usi rene cunichuche, nii coina neiniquichene jaun,' naain usi rene letoanajareein. <sup>42</sup> Niritiin usi rene letoanajaainte: 'Inarate, mijitichaaunne niha natiin, canu coroaatelanaala, cocoirichaaunne niha natiin, acau que canu cocoaelanaala, naaonjoa rejetocoichelu. <sup>43</sup> Niheichu canu nesurunaja colane amuhemuhecaunne niha natiin, canu nesurunaja tiheeiche. Canu rai lanaa cajionene niha natiin, canu rai tiheeiche. Niheichu cunaiteein, caresero cuhane neein naaonjoaanune niha natiin turuhin cacoharaheeiche,' naanu acaauru raine janate: <sup>44</sup> 'Curuaanaa, esinaaena ii coroaatelanaala, cocoireeine ii cocoaelanaala, ii nenajanu lateeine ii rai telanaala, cajione lateeine ii rai telanaala, cunaiteein, caresero cuhane neein naaonjoaaine jana turuhin ii coaraelanaala, naaonjoan rejetocooaanulu,' naain bajaauruhane janate: <sup>45</sup> 'Esinae rauhijiriinte, satiin cairicheinejeein nenacaauru cachaauruacha latei teneeichene canu raite nii teneeiche. <sup>46</sup> Satiin nitohaneein nenacaaurute, chabana sanaachara caseteco que neeurureein. Jana, coluunojoi suujuaquiin nenacaaurute, chabana sanaachara ichaonaa que neeurureein,' naain tonoranaareein nii acaauru Curuaanaa *Rey*," nae canacaanu rai Jesoso.

## 26

### *Jesoso mucuuruhane coina que ereereecuruhane* (Mr 14.1-2; Jn 11.45-53)

<sup>1</sup> Inae cachaauru rai niritohane nainaaunte, niicha relai nichaanune rai:  
<sup>2</sup> "Nii coitucuhichene rijijieeinte, coroata janai cuhane nereein Fasocoa beseta. Inae laen Cana Coaunera Calaohi cacha caje nejanoanaa nichaaunne mucuhin teeururichaaain coroso que catinaauruhane coina," nae Jesoso.  
<sup>3</sup> Nii bananeeinte, saseredotecuru curuaanaa curuaanaa Caifasi loreri asae ita taojiaaure saseredotecuru aina Jorionichaanune bichauhenaauru,  
<sup>4</sup> Jesoso mucuhin, nechu nohaneein colurujueein sohin joerateeuruhane que coaucuruhane coina. <sup>5</sup> Nejetaote: "Nainihaacache beseta cojoanonaa bana ichacaachene, nabana cachaauru suujua rerohecana coataa," naaure jetao ita rai.

*Jesoso ichoaete nejujuaauruhane jaan choohite leinjiin ene.*  
(Mr 14.3-9; Jn 12.1-8)

<sup>6</sup> Betaniau, “Nabero caje nerautanaa,” naain niicha curuaateuri- Simoon loreri asae niha Jesusone janate, <sup>7</sup> ajeri coreti caje ichanohin boticha laajoiri cuhane, le curuhin jujuhin- jataain coretiin nena amaain jetao, rori ichoae lauhecoha Jesusone jana, coturi ichoae nii jujuhi choohite nii leinjiin ene. <sup>8</sup> Nii coaraainte obajeein:

“Chanuna jataain coretohaneein, catohanein jujuhi lanaje caa ene. <sup>9</sup> Bana jataain coreein que necoreteein, nii rai core coriqui que, cairichei-huru coroatajanelanaala,” naacaanu aina nerelanaa nichaanune janate: <sup>10-11</sup> “Chanuna niritiin caa ene rohecaache. Jataain canu rai caohachate ichae caa ene. Inae itolere bana inara aina nerihaaunni. Jana, cairichei-hurute laen itolere bana neurureein inara aina. <sup>12</sup> Caa jujuhi choroha cajabereeo ichoae caa enenete, canu conautecuruhane coina cajabereeo rucuhaca ichae. <sup>13</sup> Esinae rauhijiriinte, cana rai chauratane sacutaain caa osa caje nichoterichaa cachane jaan que cachaauru relaaauruhane jaanru, caa cajabereeo ichoae jujuhi tiha caa ene quene maajeein cachaauru rai ereerecureein. Nitohaneinte, coaunojoinereein itolere bana caa ene,” nae Jesoso aina nerelanaa nichaanune rai.

*Jesoso coulurujiha Jodasine*  
(Mr 14.10-11; Lc 22.3-6)

<sup>14</sup> Nii jana, nii aina nerelanaa nichaanune lechoonca coroataja neein nena Jodasite, saseredotecuru curuaanaa coaraa cue. <sup>15</sup> Nitohanein cuhin jetaote:

“Inaajoaain carai coriqui tenaa nainequiche, inara rai Jesoso tihanune coinata,” naain acaauru caje bajaane jana nichata chooncaain coata caje nena coriqui teuruhane coina rai aitocure. <sup>16</sup> Nii jaun jetaote, jelai neerihane jana inae acaauru rai Jesoso tenaa nainihane jaan que coacuhin jetao, amuhemujue Jodasi.

*Aina nerelanaa nichaanune aina janotiin lenoniha Jesusone*  
(Mr 14.12-25; Lc 22.7-23; Jn 13.21-30; 1Co 11.23-26)

<sup>17</sup> Inae nunuheca jorerera colane ichanohi faan quihuruhane jaan beseta Fasocoa cojoanonaane janate, Jesoso rohan nichuuntaacaanu:

“Chu Fasocoa cojoanaa nunuhe cojoanotiin que, canaacha quiinene lenone ichacaanne jereita,” naain Jesoso caje bajaacaanu aina nerelanaa nichaanune janate:

<sup>18</sup> “Chajaain taa neseeu leinjiin cacha loreri asaa cuhin: ‘Cacha relaerate ichei, “Inae canu cojoanona que tihane jaunne ii loreri asaa ureeun, cuu canu aina nerelanacaauru aina Fasocoa beseta bitoanune coinara,” naain aitoroate ii rai, nanichuchera,” naain canacaanu caje tabaauru letoae Jesoso.

<sup>19</sup> Niritiin letoanajaa Jesusone jaun cuhin, nii naitoonjoa rijijieein Fasocoa cojoanotiin que canacaanuhacha quiinene lenone ichacure aina nerelanaa nichaanune tabaauru.

<sup>20</sup> Nitohaneinte, inae nocohecane jana, lechoonca coroatajaain aina nerelanaa nichaanune aina lenoniha ne Jesoso. <sup>21</sup> Nitohanein lenoniha nihacaanune janate:

“Esinae rauhijiriin, leinjiin inara cajete, cacoelaichaneei neeichene saijieein, caque nejeratenacaauru rai cacolurujueein, acaauru rai caetereecha,” naa canacaanu rai Jesusone jaunne, <sup>22</sup> jataain inaderaain le chanichaanune:

“Curuaanaa, canu quenacha aitohi,” naacaanu satiin aina nerelanaa nichaanune janate: <sup>23</sup> “Caa ojoaichu cuhane faan setejiarichate nii cacolorujueein caetereein. <sup>24</sup> Nitohaneeine, canu que aitiin laenanohineein niha Cana Coaunera Quiricha inoansi cuhanena rijijieein, Cana Coaunera Calaohi cacha caje nejanoanaa nichaaunne, nii nainaa cureeunni. Nete laen, jataain cairichaaajoareein nii canu colurujuera. Caohatorihalu niqui nitohanesihane ajiniha nejanoaenihalu nii cachane,” naa Jesusone janate:

<sup>25</sup> “Cacha relaera, canu quenacha aitohi,” naa nii colurujueranu Jodasine janate:

“Mmmjjjm, nii bajaaine rijijieeinte aicheein,” nae Jodasi rai Jesuso.

<sup>26</sup> Nitohaneein lenonichaanune janate, faan mucuhin: “Narihara Cana Coaunera,” naain, cataaun nii faan tatuhin beeune beeunein aina nerelanaa nichaanune rai teein:

“Caa quihuiche. Caate, cajabereeo nenaaneein ne,” naain canacaanu rai teeinte, jerichanejeein nii faan ichaane rijijieein <sup>27</sup> acau cooruhane jaan curu cuhane, conacai bino mucuhin: “Narihara Cana Coaunera,” naane baiha canacaanu rai nii conacai teeinte:

“Satiin jiniiquiin leruune leruunein caa conacai cooche. <sup>28</sup> Caate ca-coichananeein arajii cachaauru caohachanu que canuhacha ichaneni cojunacanein chorohi jaonjoinereein. Acate arajii osaonacaauru que suujua acaterichaaaine coina orichaaunine cojunacane. <sup>29</sup> Nena laen, inae nacoauneein inara aina jiniiniquiin, caa oba caje ichanohin conacai coenereeunni, Ofa Cana Coaunera Cojoanona que inara aina jiniiquiin neein nii bana ocoonaneein nena bino cohacachene reentiaaajoaain,” nae aina nerelanaa nichaanune rai Jesuso.

*Coitucuha nocoetoenerichaaain Fedorone biha Jesusone  
(Mr 14.26-31; Lc 22.31-34; Jn 13.36-38)*

<sup>30</sup> Nii baihane, Quiricha Inoansi cuhane laenanoineein nena salmo tabaauru que nenatichaanune nainain, Oliboneein niicha curuateuri ichatane ucuunno que cuhacaanune janate:

<sup>31</sup> “Enene cojoanotiin cuhanete, satiin inara, Canu esenetaain canu que jaaequiin neeichene jianein, ita caje riaaneriquicheein, Quiricha inoansi cuhane:

‘Carenero beraicha sohin jaaoruhane janate,  
ita caje riaaneeurureein

niicha beraihuri carenerocuru,’

naain canu que aitiin besihalune rijijieein. <sup>32</sup> Nena inae ohanune caje ichanacaunne, inara ajiniha Calilea cureeunni, ecu nacoauneein jiniiquiin nena coinara,” naa Jesusone janate:

<sup>33</sup> “Ii esenetaain ii que jaaecooruhane jianein, neeuruha leeochoaurune nihanatiin, coatiha laen canu ii esenetaain ii que jaaecohanune jianerihaaunni Curuaanaa,” naa Jesuso rai Fedorone janate:

<sup>34</sup> “Esinae rauhijiriinte, enene cojoanotiin cuhane jaiti ereniha ataohari curuaanane ajiniha, nichata saain canu coitucuha nocoetoeneriquiin,” naa Fedoro rai Jesusone janate:

<sup>35</sup> “Airihaauni bajaata Curuaanaa. Ii aina curuaaecaain jereraa casohin cajaanuhane coinane nihanatiin, nainihaaun ii que jaaecohanune jianein ii coitucuha nocoetoenihanunera Curuaanaa,” naa Jesuso rai Fedorone janane, leeochoauru aina canacaanu netonai, nii aitoha Fedorone rijitoein aitocaaunu.



*Jetesemarii netiin Cana Coaunera bajaa Jesusone*  
(Mr 14.32-42; Lc 22.39-46)

<sup>36</sup> Nii baihate, aina nerelanaa nichaanune aina jelai caje amuhin, Jetesemaniineein niicha curuateeuriu cue Jesuso. Inae ecu turuhacaanune janate:

“Cau nelauriaain canu cohacuchena, inara tonohanau tajiha cuhin Cana Coaunera bajani,” naain <sup>37</sup> jiniichaain Fedoro, coroatajai Sebedeeo calao-hichuru, naonjoaihunri amaain jataain nererojoecaaajoaain naonaain jetao, jataain inaderae Jesuso. <sup>38</sup> Nitohaneein inaderaain jetaote:

“Jataaine onaanajaanu rijitocojoaain casuujua cuhane inaderaaunra. Cau nedaaain, canu jiniichaain ichaaojoein cacohacuchera,” naain ratirinajaan jetao, <sup>39</sup> acaauru caje, nita cuhin neseonraain atane que coturi temetaain jetao: “Ofa, icheine aitoon. Bana ii jereeine jana nihane, caa necairichanaa tabai caje canu rocohi. Nena canuacha jerei rijijieein ichaaine jereneeun. Ii jereeine rijijieein ichaainene jereeunra Ofa,” naain Cana Coaunera bajaane nainaan jetaote, <sup>40</sup> jelaiha cuhin nii neeuruha aina nerelanacaaurune jaau turuha Jesusone jana jetao, najiniha sinihuruhane jana erunajaan jetao Fedoro rai:

“Chanuna canu aina leratojoein, sinilanaala ichaaojoein nenea naineeiche. <sup>41</sup> Sinilanaala ichaaojoein neein Cana Coaunera bajaauche, nabana chatohanai que nesaruhin neeichene coataa. Inara suujuate niqui aitona naine, nete inara jaberoco jataain nii abaantasine,” naain jetao acaauru ratiriin jelaiha nii Cana Coaunera bajaane jaan cue Jesuso.

<sup>42</sup> Nitohaneein inae coroata saain, jelaiha cuhin Cana Coaunera bajaane cuhane jetaote: “Ofa, caa necairichanaa tabai canu cojuhin canu coaranu caje canu roconaa jereneeine, ii jereeine rijijieein ichaau,” naain jetao Cana Coaunera bajae Jesuso.

<sup>43</sup> Niritiin Cana Coaunera bajaane caje, nacoaauneein jelaiha cuhin, aina nerelanacaauru coaraa cuha Jesusone jana jetaote, jataain banetojoe niha acaauru rai sinirenane jaun nimirichaa acaauru notane jaun, sinihuru jana erunajaane jaun jetao, <sup>44</sup> ecu ratirinajaan jelaiha cuhin, Cana Coaunera bajaane nichatasatiha cue, nii jauriaanejeein aitohane rijitoein Jesuso. <sup>45</sup> Nitohaneein jetaote, jelaiha nacoauneein nii neeuruha aina nerelanacaaurune jaun, acaauru rene turuhin jetao:

“Jaitinachura caohacha nainetojoein siniichete. Inae laen, Cana Coaunera coitucuhichuru bijiu tenojoinichaaun, canu Cana Coaunera Calaohi cacha caje nejanoanaa nichaaunne cojoanona que turuha. <sup>46</sup> Chajaan nimichucuchete amuhacachera, inae nichuuntajiha nii acaauru rai caeteraanura,” nae jetao Jesuso aina nerelanacaauru rai.

*Jesoso mucuuruhane*  
(Mr 14.43-50; Lc 22.47-53; Jn 18.2-11)

<sup>47</sup> Niritiin, jaiti aina nerelanaa nichaanune aina ereereeca Jesusone janate, turuha uhe, Jesuso aina nerelanaa nichaanune lechoonca coroatajanein nenea Jodasi, letoanajaanu saseredotecuru curuaanaacuru curuaanaa, chaen Jorionichaachene bichauhenaauru, naonjoainurine jaun, enuha, sabere, naonjoain que biji achunequuin nenacaauru arajii cachaauru uhaain. <sup>48</sup> Jaiti Jesuso rene turuelanaalate, nii aina cunacaauru rai jetao: “Inae cuu turunaane: ‘Sohara cacha relaera,’ naain rai nomeri lohitoreeuni, caje coitucuhin, aca mucuhichene coinara,” naain acaauru rai be jetao. <sup>49</sup> Niritiinte Jesuso rohan nichuuntaain: “Sohara cacha relaera,” naain Jesuso meri lohitoha Jodasine janate:

<sup>50</sup> “Cacoelaicha, ii jereeine rijijieein coaraain chatohaneein caetecuru-miin,” nae Jodasi rai Jesoso.

Nii janate Jesoso rohan nichuuntaain, Jesoso mucuure nii Jodasi amano-joinuri cachaauru.

<sup>51</sup> Nii janate, rai sabere rocohitiin, que nii saseredotecuru curuaanaacuru curuaanaa letono uricho sauhitiin beuhitoha leinjiin cacha, Jesoso aina cunaane janate:

<sup>52</sup> “Jelaiha rai curu cuhane, nii ii sabere teeu. Satiin sabere que sonajaain jaaoreraaurute, sabere que acaauru netonai sonojoiniha cuurureeincha.

<sup>53</sup> Tana ena canu Inaca caje bajaanune, canu rai lechoonca coroata lauriin anjeraauru letoanaa nainiha, acaauru aina canu coreniha ita sooruhane coinane coitucuhine. <sup>54</sup> Nene naineneen nitohanai ichacaaunne. Inae rai Quiricha inoansi cuhane, catohaneein caetecururichainne que aitiin laenaeratihalu Cana Coaunerane nainaane nihane jaun,” naainte nii mucuha unacaauru rai:

<sup>55</sup> “Chanuna necha aansai cacha mucuha unaa tocohaneein, sabere, enuha, naaonjoainuri que biji achunequiin canu mucuha uhiche. Cojoanoonetojoeine inara notaracaae, Teenforo asaae cachaauru relaa najacoon. Nii saijieeinte, canu mucunaja queneeiche, <sup>56</sup> inae nitohaneriquicheeine que aitiin, rai *profetacuru* que laenaeratihalu Cana Coaunerane nainaaichene coina,” naa acaauru rai Jesosone janate, ecu jelai ratiriin, satiin sorohacaanu aina nerelanaa nichaanune.

*Niha chatohanaine rucuhaneein nenacaauru Jorioocuru bichauhenaauru acatiha niha Jesosone*

*(Mr 14.53-65; Lc 22.54-55, 63-71; Jn 18.12-14, 19-24)*

<sup>57</sup> Nitohaneein Jesoso mucuhinte, saseredotecuru curuaanaacuru curuaanaa Caifasi loreri asaae amaaure nii mucuureraauru. Nii janate, nii Caifasi loreri asaae ita taojiaain neeure Moisesa aitoonjoa rauhi que cacha relaaurera aina fariseeocuru. <sup>58</sup> Nitohaneein, inae Jesoso amaauruhane janate, nita acaauru coarajeein cujueein sacuhin, Caifasi loreri chaje rohan neeuruha Teenforo beraichacurune jaaun, ecu acaauru aina enohin lauhequiin, jelai caje coaauneein Jesoso coaraje Fedoro: “Chatohanerichaincha,” naane jaun.

<sup>59</sup> Nii janate, nechu jataain nohaneein, colurujueein Jesoso atinaeratecuruhane jaanu que coaacure saseredotecuru curuaanaacuru, chaen niha chatohanaine rucuhaneein nenacaauru Jorioocuru bichauhenaauru, naaonjoainuri. <sup>60</sup> Nete, nitohaneein arajii cachaauru colurujeeuruha nohaneeine saijieein, nii chatohaneein teeuruhane jaanu lera erusichurene. Nii jaunte inae satononiha coroatajaain nimichuhin:

<sup>61</sup> “Esinaete chuhisi: ‘Nainichaaun caa netaojiaain Cana Coaunera coroaecuruhane jaa coloheri Teenforo chamuhintiin, nichata janojoein cuhane jerichanejeein michuhanunera,’ naain erenajaquera,” naauruha nechu nohaneein colurijihane janate, inauheneeicha acaauru aonaje Jesoso.

<sup>62</sup> Nii jaunte laen nimichuhin:

“Chanuna ereneei iitonai. Esinaena rauhijiriin aitoine jaunna caa ii colurujeeuruha,” naain caje bajae saseredotecuru curuaanaacuru curuaanaa, nete inauheneeicha aonaje Jesoso <sup>63</sup> Nii jaunte rai nacoaunein:

“Esinae rauhijiriin, Cana Coaunera coreniha beeinena jereen. Iina esinae Cana Coaunera Calaohi Mesihaseinei,” naa rai saseredotecuru curuaanaacuru curuaanaane janate:

<sup>64</sup> “Esinae rauhijiriinte, acanichaaunne que aitohicha. Canu Cana Coaunera Calaohi cacha caje nejanoanaa nichaaunnena, coarajeeichene

jana canu Inaca itolere ichana nainera Cana Coaunera raotono nichajai que lauhecreeunnicha. Chaen techu, dede sacari jana uhin fauha uhanune coariquicheeincha,” nae nii saseredotecuru curuaanaacuru curuaanaa rai Jesoso.<sup>65</sup> Nii jaunte obaecane cojunacaniha rai cajione romaromaain:

“Nechu jataain Cana Coaunera baijiaate, caritiin ere caa cacha. Cha nacaenneeina coaraain cana rai colurujuera laterihacache. Inae inara netonai, Cana Coaunera baijiaeraanu rijitiin irihane aonaquiche.<sup>66</sup> Tonaquiche jana inara, caa naitoonjoa que,” naa rai leeochoauru rai janate:

“Esinaete chuhisi, aca colurujeeuruhane jaan ujuaihane. Aihane jaun ohanete caohachae,” naaure.

<sup>67</sup> Niritiinte, nomeri colunecuruha tabaaurune jana faohacure leeochoauru.<sup>68</sup> Jana leeochoaurute:

“Chajaain aihane, ii Mesihaseine, caa ii soera cojoeluinaaura,” naain rai nomeri faojaain soore.

*Jesoso coitucuha nocoeteniha Fedorone*  
(Mr 14.66-72; Lc 22.56-62; Jn 18.15, 25-27)

<sup>69</sup> Nii tonohanau, ecu airiniha lauhecoba Fedorone janate, rohan nichuuntaain:

“Itonaite, Calileea cocoaicha Jesoso aina nerejetohilu,” naa leinjiin ene coseenraaneein nenaane janate:

<sup>70</sup> “Nii aitohine jaan cacha coitucuhaaun,” naain satiin aonajeeuruha ecu nenacaaurune urichoo suujue Fedoro.

<sup>71</sup> Nii baihate jelai caje amuhin, rijia acujua rohan cuha Fedorone janate, coaiten coaraain:

“Caa netonaite, Nasarete cocoaicha Jesoso aina nena ne,” naain leeochoauru rai biha leinjiine janate:

<sup>72</sup> “Esinae rauhijiriin, Cana Coaunera notaracae nii cacha coitucuaaunta,” naain nacoauneein suujue Fedoro.

<sup>73</sup> Nii catiariinte Fedoro rohan nichuuntaacoaain: “Esinae rauhijiriinte, iitonai aina nenaaneein, ii ereecha cajete necoitucuerateeicha,” naaure nii ecu nenacaauru Fedoro rai.

<sup>74</sup> “Esinae rauhijiriin, Cana Coaunerate coaraje nii cacha coitucuenihanunera,” naain nesuujiha Fedorone janate, nii rijieoritiin inae ere ataohari curuaana.<sup>75</sup> Nii jaunte: “Jaiti ereniha ataoharine janate, nichata saain cacoitucuhine suujeriquiinchae,” naalu rai Jesosone coacuhin, jelai caje mituhin amuhin, jataain inaderaain chanae Fedoro.

## 27

*Filato rai Jesoso teeuruhane*  
(Mr 15.1; Lc 23.1-2; Jn 18.28-32)

<sup>1</sup> Inae janohane jana jetaote, satiin saseredote curuaanaacuru aina Jorioocuru bichauhenaauru, ita suujua rijitoein ita suujuau tacaure, Jesoso sohin jaaoruhane caina.<sup>2</sup> Nitohaneein jetaote, Jesoso ichojoaain amaain, Roma cocoaichaneein nena coberenadoro Filato rai teure.

*Oha Jodasine*

<sup>3</sup> Inae nitohaneein Jesoso cairichain atinaaururichaanne que nainaain jetaote, jataain inaderaain netojoeete nii coulurujuera Jodasi. Nii jaun jetaote, nii saseredotecuru curuaanaacuru curuaanaa, chaen Jorioocuru bichauhenaauru, naaonjoainuri rai jetao:

<sup>4</sup>“Osa quene nesaruun, inara rai atinaaichene coina cha ujuaihonelanaala nena cacha teecha,” naain nii nichata chooncai coataneen nena coriqui coretecuruhane jaan cainaa Jodasine jana jetao, ranaa jerelanaala:

“Nihei cha coitucunaa nainihaacaanu nii aina canacaanuta. Iichate nii coitucuujeecha,” naaure jetao Jodasi rai. <sup>5</sup>Nii jaun jetaote Teenforo asae nii coriqui rialaaitiin ratiriin jelai caje amuhin raajenhane rai raro ruluhi ohe Jodasi.

<sup>6</sup>Nii jana jetaote, nii coriqui raain jetao:

“Caa coriquite, ichana corenihane jaun, leinjiin calaniheein ne. Aihana jaun, jelai teein Cana Coaunera rai canaacha tei coriqui curu cuhane, caa coriqui tenaa nainihaacache,” naaure jetao ita rai saseredotecuru curuaanaacuru curuaanaacuru.

<sup>7</sup>Niritiin coacuhin ita suujua tacaain jetaote: “Atane rocoorua, caje ojoaichucuru jaauruhane coinane jaan,” naain niicha curuaateuri jelai coretecore nii coriqui coreniha, niha nejelau atane caje uhin onaane, cuu teein conautecuruhane jaanu que. <sup>8</sup>Nii jaun jetaote, Ichana Batane neein jelai curuaateure enanetojoein cachaauru. <sup>9</sup>Nitohaneente: “Rai core nichata chooncaain coataneen nena coriqui, Isaraelitacuruhacha cainai raainte, <sup>10</sup>coreniha: ‘Atane rocoorua, caje ojoaichu ichacuruhane coinane jaan,’ naain acaauruhacha curuaatei atane coretecore,” naain beratihalu *profeta* Jeremihasi que Cana Coaunerane rijijieein, nii naitoonjoa ninaaure.

#### *Filato acatiha niha Jesusone*

*(Mr 15.2-5; Lc 23.3-5; Jn 18.33-19.38)*

<sup>11</sup>Inae coberenadoro Filato rene Jesuso amaain turuaauruhane jana jetaote:

“Iina Jorioocuru curuaanaacuru curuaanaa-*Rey* ineein,” naain caje bajaa Filatone jana jetaote:

“Esinaete, acanichaaunne que aitothicha,” naain Filato tonorae Jesuso.

<sup>12</sup>Nii nainiha jetaote, cuu teein, Filato rai coulurujeeuruha saseredotecuru curuaanaacuru curuaanaacuru aina, Jorioocuru bichauhenaaurune jana jetao, cuu inauheneecha aonajenajae Jesuso.

<sup>13</sup>Nii jaun jetaote:

“Toon ii que ereein ii coulurujeeuruhane aonaaina,” naa Jesuso rai Filatone jana jetaote, <sup>14</sup>cuu inauheneecha tonoraelanaala aonajian Jesusone jaun jetao, inae rai tonaain irihane jaanu coitucue Filato.

#### *Jesoso ateinaauruhane rai neeuruhane*

*(Mr 15.6-20; Lc 23.13-25; Jn 18.38-19.16)*

<sup>15</sup>Beseta bana naineein jetaote, janijiin: “Acate caohachae mituhanera,” naauruha satiin cachaurune jaan mitai nejesinane caseteco nihane caje Filato. <sup>16</sup>Nii bana jetaote, caresero cuhane niha itolere sacutaain cachaauruhacha coitucui Jesuso- Barabasineein acaauruhacha curuaatei caseteconeinne jaun jetao, <sup>17</sup>satiin netaojiaain codohacooruha, nii Jesuso colurujeeurera cachaaurune jana:

“Chariji caa coroatajaaihuri caje, jianichaaunne jeriquiche. Caa Jesuso Barabasina jianerihanu. Ainihanena caa Jesuso Mesihaseein acaauruhacha curuaatei jianerihanu,” naain jetao acaauru caje bajae Filato, <sup>18</sup>nechu necoelai caaun, nii coulurujeeuruha raine que nainaane jaun.

<sup>19</sup>Niritiin jetaote, nii cha rucuhacane jaan rori ichoae lauhaca Filatone jana: “Jiaonriha chatohaneen nii cha ujuaihonelanaala nena cacha tenaa coaauquine. Janotiine nii cacha coreniha, jataain baasoneein sinicoonni,” naain jetao berate rai comasai.

<sup>20</sup> Nejetaote, satiin nii cuu nenacaauru cachaauru suujuau tacaare, saseredotecuru curuaanaacuru curuaanaacuru aina Jorioocuru bichauhenaauru: “Nii Barabasi jianeein nii Jesoso atinaerateeu,” naauruhane coina. <sup>21</sup> Nii jana jetaote:

“Chariji jianichaaunne jeriquiche, caa coroatajaaihuri caje,” naain acaauru caje nacoauneein bajaa coberenadoro Filatone jana jetaote:

“Nii Barabasi que tacaajeein jianeeinena jerichaanu,” naauruhane jana:

<sup>22</sup> “Chajana laen ichareeun, caa Jesoso Mesihasee in acaauruhacha curu-aatei aina,” naa Filatone jana jetaote:

“Coroso que laen aca teeu,” naaure jetao satiin. <sup>23</sup> Niritocuruhane jaun jetaote:

“Chatohanai baasona ichae,” naa Filatone jana jetaote:

“Chajaain coroso que teechnau,” naaure jetao tonijiaain ehequuin.

<sup>24</sup> Nitohaneen Jesoso jianena jeriha Filatone saijieein, jianena jerelanaala rai suujua rerohecaauruha jelai ichoae jauhecotojoeriin cachaaaurune jaun jetao, acau raerateein jetao:

“Coatiha canu, orichaa in caa cachane ujuaihoneein nerinaaunni. Inarate nii ujuaihoneein neriquicheein,” naain jetao, satiin coarajeeuruha nii cuu nenacaauru cachaaaurune jana jetao, rai biji culeje Filato, nii ujuaihoneein nenihane coujunacaneein, nitohaniha acaauru ichaone jaun.

<sup>25</sup> Niritoha acaauru rai Filatone jana jetaote:

“Satiin canacaanune, canacaanu bereecuru aina jiniiquiin, oha caa cachane ujuaihoneein nerichaanuhi,” naaure jetao Filato rai cachaauru.

<sup>26</sup> Nii jaun jetaote, Barabasi jianeein, nii baiha Jesoso bisichateein acaauru bijiu tein, coroso que terate Filato.

<sup>27</sup> Nii jana jetaote, niha chatohanaine rucuhecuruhane jaan coloherineein nena- loreri seeonjoa asae Jesoso amaain jetao, curuhacaain netaojiaain neure satiin coberenadoro rai soodarooru. <sup>28</sup> Nitohaneen tein jetaote, rai cajione rocohin que cajione lanajai curuhacure. <sup>29</sup> Chaen couturi que oja caje ichanohin comai lauriaain jetao, rai biji raotono nichajai que otiha teure. Nii baiha jetaote, natiha neseeonriaain: “Laraajiin ichaohine Jorioocuru curuaanaacuru Curuaanaa Reycha,” naain jetao, <sup>30</sup> couluneeinchuru nii rai niicha teuri otiha que jetao, rai couturi faoha facoaain que ninichaa- jeeure. <sup>31</sup> Nitohaneen mainajeein ninichaajeeuruhane baiha jetaote, nii cajione lanajai, que niicha curuhacuri rocohin, nacoauneein nii rai cajione esine curujuaai amaure coroso que teeuruhane coina.

### *Coroso que Jesoso teeuruhane*

*(Mr 15.21-32; Lc 23.26-43; Jn 19.17-27)*

<sup>32</sup> Inae nii neeuruhane jaan jelai caje Jesoso amaauruhane jaun jetaote, Sirene cocoaicha Simoon eruhin, que nii Jesoso teeuruhane jaanu coroso baijiaeratecure.

<sup>33</sup> Inae nitohaneen cuhin: “Couturi Bejero,” naain acaauruhacha curu-aateihu turuhin jetaote, <sup>34</sup> elonai que jasisii bino que jetao Jesoso cocoaare. Nejetaote, aansijiin cohin aonaain conaa jerene Jesoso.

<sup>35</sup> Inae coroso que Jesoso tein jetaote: “Chariji raineicha nedareein,” naain jetao Jesoso cajione que nocoatijiaaure soodarooru. <sup>36</sup> Nii baiha jetaote, Jesoso asaa nelauriaacoaain beraihure.

<sup>37</sup> Nitohaneen tein jetaote, rai couturiniha nii casetecaauruhane jaan leranu rai curuaa laenacure:

Caate Jorioocuru curuaanaacuru Curuaanaa Rey ne.

naain.

<sup>38</sup> Cuu jetao techu aina teein, coroatajai asijiautooru teeure coroso que, leinjiin najaa biji nichajai que, leeocho rai raotono nichajai que, naaonjoaain. <sup>39</sup> Jeloon situnacaauru cachaauru jetaote, couturi jisijisihanaain jetao:

<sup>40</sup> “Teenforo chamuhitiin, nichata janojoein nacoauneein michuhin jerichanejeein tiha nocoetona jeree inatiin, chajaain ichaajenhane iji-abereeo ichoterateeu. Esinae rauhijiriin Cana Coanera Calaohineeine, nii coroso caje faau,” naaure. <sup>41-43</sup> Jerichanetojoein jetaotechu:

“Leeochoaauru ichoteratihane saijieein, tana laen raajenhane rai jaberocho ichoteratena nainihane. Aca Isaraelitacuru Curuaanaa *Rey* nihane, coroso caje fauhinete cana netonai esenetaacache. Cana Coaneraacha que jaaecohane jaun, chajaain ena ichoteratemiin Cana Coanera, esinae rauhijiriin niicha belaa nihanete, cana netonai esenetaacache. Acate cana rai aitelu, Cana Coanera Calaohi nihane que,” naain jetao que ninichajeeure saseredotecuru curuaanaacuru curuaanaacuru, Moisesa rai rauhi que cacha ralaaureraauru, chaen Jorioocuru bichauhenaauru, naaonjoainuri.

<sup>44</sup> Nii coroatajai asijiautooru coroso que nenacaauru nihanatiin jetaotechu, nocoeeje chanuure.

### *Oha Jesusone*

*(Mr 15.33-41; Lc 23.44-49; Jn 19.28-30)*

<sup>45</sup> Nii jana jetaote, enoto chujutoroa caje coauneein, nuna macohi amuritoheriha enotone reein tiaaajoaain nocojoe cana rai chauratane. <sup>46</sup> Nii rijieeoritiin jetaote, tonijiaain ehequiin: “Cana Coanera, chanuna jelai canainatejeei,” naane neein jetao: “*Eli Eli lema sabactani*,” nae jetao Jesuso.

<sup>47</sup> Niritohane jana, tabaauru ecu neein aonajeeurera jetaote: “*Profeta Irihasi cotihacate aite*,” naaure.

<sup>48</sup> Nii jana, leinjiin acaauru caje jetaote, soroneein jeluhariin cuhin jetao, sie tocohaneein nena ariin ruhini, elohanti bino sisiaain jetao, jiarana nujua que nujuatein Jesuso ujuae que te, cohane caina. <sup>49</sup> Nii jana leeochoaauru jetaote:

“Coa rohecaate, ichoteratiha uha niicha cotijiai Irihasine coarajihacachera,” naaure.

<sup>50</sup> Nejetaote, nacoauneein tonijiaain auhaquiin inae ohe Jesuso. <sup>51</sup> Nii rijieeoritiin jetaote, ecui caje coauneein ocoai cuhin nesoaiheite Teenforo cuhanai bujuaneein nena cajione. Nii jana jetaote, nerurujuaa cana rai chauratanene jana jetao, netatujuacoae ajerichuru. <sup>52</sup> Atane banaaurune maajeein, netatujuacoane jana jetaote, Cana Coanera coitucueranein onacaauru cachaauru nihanatiin jetao, o caje ichanajacoaain ichaao. <sup>53</sup> Nitohanein jetaote, inae o caje ichanaa Jesusone baiha jetao, Cana Coanera nese Jerosaleeun cuuruha nii o caje ichananacaaurune jana jetao, coaranaacure arajii cachaauru.

<sup>54</sup> Nitohanein uha carorane jana, nihacoa cojoelanaacojoaine jana coaraain jetaote, jataain nesooneein jetao:

“Esinaete chuhisi, Cana Coanera Calaohine caa cacha,” naaure jetao, soondarooru curuaanaa aina ecu Jesuso beraiha nenacaauru.

<sup>55</sup> Nii jana jetaote, caje icharaain netiin Jesuso coarajeeure arajii enecuru Calileea caje coauneein coroatajaneranein sacuureraauru. <sup>56</sup> Acaauru aina jetaote cuurelu Maadala bene Mariha, chaen Saantiaao aina Jose neba Mariha, chaen Sebedeeo calaohichuru neba, naaonjoainuri.

*Jesoso jaberoco rucuhecuruhane*  
(Mr 15.42-47; Lc 23.50-56; Jn 19.28-42)

<sup>57</sup> Inae nocohecane jana jetaote, turuha uhe leinjiin Jesoso ere tonoraera coriquihonaneen nena Arimatea cocoaicha Jose. <sup>58</sup> Nii Jose jetaote, Filato coaraa cue, caje Jesoso jaberoco bajaane coina. Nii jana rai Jesoso jaberoco teratiha Filatone jaun jetaote, <sup>59</sup> Jesoso jaberoco raain, lino caje ichanohi shojoera que conajaain, <sup>60</sup> que banijiaain niicha bajarateilu ajeri jachu cuhane Jesoso jaberoco rucujue Jose. Nii baiha jetaote, ajeri que caohatiin nii ajeri jachu bacuujuua fuhin ratiriin jelai caje amue. <sup>61</sup> Nii jana, Maadala bene Mariha, chaen nii leeocha Mariha, naaonjoainuri jetaote, nii ajeri jachu Jesoso jaberoco teeuruhane jaan acatiha laurijatiin nedaaure.

*Jesoso jaberoco rucuhecuruhane jaan beraihurua sondaroorune*

<sup>62</sup> Nii cojoanoo, inae nebetacanaa cojoanonaa nihane jana jetaote, Filato coaraa cuure jiniiquiin saseredotecuru curuaanaacuru curuaanaacuru aina fariseeocuru. Nitohaneen cuhin, inae rene turuhin jetaote:

<sup>63</sup> “Curuaanaa, jaiti ichaohane banate: ‘Inae nichata janoha ohane baiha jete, o caje ichanareein,’ naain ererejetoha nii casajeneen ichaonaa cachane quene coaaucaun. <sup>64</sup> Aihane jaun, nii rucuhecuruhane jaan ajeri jachu beraichateeu nichata janoi reentiaain. Ainihanete, janotiin uhin rai jaberoco amaain: ‘O cajete ichanae,’ naain cachaauru coritaaurure aina nere-lanacaauru. Niite laen, nii jauriaanejeein amurijiriin, jataain banejelanaala casaje nere,” naauruha Filato raine jana jetaote:

<sup>65</sup> “Caa nitohanei beraichane que nenacaauru soondarooru aina cuhin, caohatiin jerequichene tocohaneein nii ajeri jachu funichuche,” nae acaauru rai Filato. <sup>66</sup> Nii jana cuhin jetaote, nii ajeri jachu niha Jesoso jaberococone jaan rai fuera sechaure leinjiin secho que. Nitohaneen sechaain jetaote, ecu beraichanu que soondarooru ratiriin cauha cuure saseredotecuru curuaanaa curuaanaacuru aina fariseeocuru.

## 28

*O caje ichanaa Jesusone*  
(Mr 16.1-8; Lc 24.1-12; Jn 20.1-10)

<sup>1</sup> Inae situha nebetacanaa cojoanonaane jana, inae ena janohajiha semana nunuhene jana jetaote, Jesoso jaberoco rucuhecuruhane jaan- ajeri jachu coaraa cuure Maadala bene Mariha aina leeocha Mariha. <sup>2</sup> Nii jana dede caje fauha anjerane jana jetaote, luhecotariin uhe jataain mijiaainetiin carora. Nitohaneen fauhin jetaote, nii Jesoso jaberoco rucuhecuruhane jaan ajeri jachu fuuruhane jaan ajeri jaberoco raain nichoae laujuae nii anjera. <sup>3</sup> Nii anjera jetaote, aiha jiacanene tocohaneein jiquihacoha rai jaberococone jana, jataain somajae rai cajione aiha dede sacarine tocohaneein. <sup>4</sup> Nii coaraain jetaote, coasina caaun rijijijianeen onaa rijinanaain nedaaure nii beraihurera soondarooru. <sup>5</sup> Nii jana jetaote, nii coaraa cunacaauru enecuru rai jetao:

“Jiaoriha casiichene. Inae, nii coroso que teein niicha ateinaauri Jesoso ariha aaichene coitucuhanura. <sup>6</sup> Inae cau nihei. Inae nii aitoroetohane tocohaneein o caje ichanaa. Chajaauchete, nii teeuruhane jaan jelai coarae,” naain acaauru que nii Jesoso jaberoco teeuruhane jaan jelai coarate nii anjera. <sup>7</sup> Niritiin jetaote: “Chajaain erojoeen cuhin aina nerelanacaauru rai: ‘Inae jetao o caje ichanaa. Calileea cuhin jetaote, inara ajiniha turee. Ecu jetaote coariquicheen,’ nanichuche. Inara rai bihanune coinane cau turuun,” naain jetao, nii enecuru letoae anjera.

<sup>8</sup> Nii jaun jetaote, jataain casihuruhane saijieein rachoojoein nii Jesoso atane bana jelai caje erojoein uhin biha uure nii enecuru, aina nerelanaa nichaanune rai. <sup>9</sup> Nii jana jetaote, ujuueuruha nii enecurune jana acauru rohan neeoritiin acauru rai iriha Jesusone jana rohan nichuuntaain, rai tijia que nebalurucaain cutujuaain jetao coroaecure nii enecuru. <sup>10</sup> Nii jana jetaote:

“Jiaonriha casiichenera. Chajaain canejeraneein nenacaauru rai benichuchete, Calileea cuuruhine. Ecune ita coarichaanuhi,” nae jetao, nii enecuru rai Jesoso.

*Niicha coarai beeuruha soondaroorune*

<sup>11</sup> Nitohaneein biha cuuruha enecurune nainiha jetaote, saseredotecuru curuaanaacuru curuaanaa rai jetao, neseeu cuhin jitariin niicha coaracuri biha cuure nii atane banau Jesoso jaberoco beraiha nenacaauru soondarooru tabaauru. <sup>12</sup> Nii jaun jetaote, ita suujuau tacaauruhane coina Jorioocuru bichauhenaauru coaraa cuure saseredotecuru curuaanaacuru curuaanaacuru. Nitohaneein inae ita suujuau tacaain jetaote, jataain arajiin soondarooru rai coriqui teein jetao:

<sup>13</sup> “ ‘Janotiin sinihacaanune tonohanaute, turuhin Jesoso jaberoco amaure aina nerelanacaauru,’ naauche. <sup>14</sup> Nii jana coitucuhin, chatohaneein inara tenaa coauca coberenadoro Filatonena, ita suujua tacaain caohaterichaanuhi, nabana baasoneein inara tihane coataa,” naain jetao, nii soondarooru suujuateure saseredotecuru curuaanaacuru curuaanaacuru aina Jorioocuru bichauhenaauru.

<sup>15</sup> Nii jaun jetaote, nii coriqui raain jerichanetoein nii sujuatenajauruhane rijitoein jetao, aitocure nii soondarooru. Nii jaun jetaote, niritiin acauru coritaauruhane jaun, eneenetoein nii esenetaaure Jorioocuru.

*Niicha icharatei ichacuruhane coina aina nerelanacaauru rai aitoha Jesusone*

*(Mr 16.14-18; Lc 24.36-49; Jn 20.19-23)*

<sup>16</sup> Nitohaneein canacaanu rai beratiha Jesusone jaunne, Calileea nii naitoonjoa ichatane ucuunno cuhacaanu lechoonca leinjiin Jesoso aina nerelanaa nichaanune. <sup>17</sup> Ecu turuhacaanune janate, ecu canacaanu ajiniha niha Jesusone jaun, rohan turuhin jaiti acanilhane esenetaaureniha tabaaurune saijieein coroaecaanu.

<sup>18</sup> Nii janate canacaanu rohan nichuuntaain:

“Canu Inaca Cana Coaunerate, chauratane, dede, naaonjoainuri rai coacainacaineein nihanune coina caeteein ne. <sup>19</sup> Aihane jaun, chajaain satiin caa chauratane sacutaain lauri lauri nenacaauru cachaauru relanichuche inara relaanune rijijieinte, canu ere tonoraera neeuruhine. Chaen, Canu Inaca, canu- rai calaohinichaaunne, Cana Coaunera Suujue, naaonjoain nichaanune rai canacaanu cachaneein nenea jereraauru cojunacateein baotisanajaauche. <sup>20</sup> Chaen inara rai aitonajaaocaaunne rijijieein, nii caitoonjoa tonoraain ichaauruhane coina relanajaauche. Jerichanejeeinne besautiha cana cojoanonaane reeintiaaajoaain itolere bana inara aina nereeunni,” naain necoe Jesoso.



## **Marocohacha laenai Ena Nenea Cana Coaunera Ere**

*Cana Coaunera ere beebejiha Joaan Baotisitane  
(Mt 3.1-12; Lc 3.1-9, 15-17; Jn 1.19-28)*

<sup>1</sup> Caate nunuhe caje coauneein Cana Coaunera Calaohi Jesocurisito que erenaa raotono ne. <sup>2-3</sup> Niite inoaenlu nere bera inoaensi Isaihasi que berateein laenaratiha Cana Coaunerane jaun, nii aitohane rijitoojeein:

“Nii Canuhacha letoai  
Canu ere berate,  
ii ajiniha cuhin turuhine jaan  
bero rucuhereein.  
Nitohanihane jaunte:  
‘Cana Curuaanaa turunajaanu  
bero raujiaauche,’ naain cacha  
areroo rohan situnacaauru  
cotijiaain suujuatereein,”

naain nere bera inoaensi Isaihasi que berateein laenaratiha Cana Coaunera

<sup>4</sup> Nii rijijieein jetaote chuhisi, inae cacha areroo cachaauru baotisaain:

“Inara osa jianeein, esinae rauhijiriin Cana Coaunera coitucuhin na-coauneein inara ichao coreein neeichene cojunacaneein acauhanau tein baotisanoojoneein neeichene inara osa caje inara ichoteratemiin Cana Coaunera,” naain belu jetao acaauru rai Joaan. <sup>5</sup> Nii jana jetaote, satiin Jodea batane que nenacaauru aina Jerosaleeun nenacaauru naaonjoainuri nii Joaan ere aonaa curejetecurelu.

Nitohaneein cuhin ecu turuhin esinae rauhijiriin suujuelanaala osaacu-ruhane beeuruhane jaun jetao, nucuhe Jorodaan cuhane tein acaauru cojunacatiha acaauru baotisarejete nii Joaan.

<sup>6</sup> Camecho ujui caje ichanohin cajione que cajionequin jetaote, jacari caje ichanohi que ichoraquiin, sisiincho, irichaje, naaonjoainuri que jetao lenoneein nerejetelu nii Joaan.

<sup>7</sup> Nitohaneein jetaote, Cana Coaunera ere beebejeein jetao:

“Canu baihate ureein leinjiin jataain canu amurijiriin nelateein nenea. Niheichu rai safato ichora rutuhanune coina nihanatiin nelatejeerinaauni.

<sup>8</sup> Canune acau que inara camujuaain inara baotisaain. Jana acate laen inara baotisaain ureein Cana Coaunera Suujue que,” nae jetao cachaauru rai Joaan.

*Jesoso baotisaain Joanne  
(Mt 3.13-17; Lc 3.21-22)*

<sup>9</sup> Nii cojoanonaa bana jetaote, Calileea batane que nenea Nasarete caje amuhin, nucuhe Jorodaan auhaniha turuha Jesusone jana jetao, ecu Jorodaan cuhane tein acaentonai camujuaain baotisaain Joaan. <sup>10</sup> Nii baotisaain Joane jana acau caje mituhane rijieeoritiin dede coaraa Jesusone jana jetaote, neyoracaa dede bacuujuane jana caje uhin serori rijijieein nichoae fauha uhe Cana Coaunera Suujue. <sup>11</sup> Nii jana dedeeu tonii jetaote:

“Ti te jataain canuhacha jereein canuhacha cocoinanohin cacalabineein neeicha,” naain toniha erenaane jana jetao aonajeeure.

*Baaso que Jesoso saruha Moconajaerane  
(Mt 4.1-11; Lc 4.1-13)*

<sup>12</sup> Nii baiha jetaote, cacha nenaja nihei que Jesoso amae Cana Coaunera Suujue. <sup>13</sup> Nii jaun ucuae ataibinaecuru jana niha jena chonca janohin Cana Coaunera Calaohi Jesusone jana jetaote, baaso que saruhane coina cojuhin coaraa moconajaerane jana jetao, Jesoso coroatajanecure Cana Coaunera letonocuru anjeraauru.

*Calileea batane cuhin, rai namihaneeo nunuhetiha Jesusone*  
(Mt 4.12-17; Lc 4.14-15)

<sup>14</sup> Inae caresero cuhane Joaan enoaauruhane baiha jetaote, Calileea batane que cue Jesoso, Cana Coaunera ere Erenaa Raotono que ereerejeein cachaauru rai bihane coina.

Nitohaneein inae ecu turuhin jetaote: <sup>15</sup> “Inae ichuunijiha Cana Coaunera Cojoanona. Aihane jaun Cana Coauneraacha beratenojoin Erenaa Raotono esenetaain tonoraauche,” naain beebeje cachaauru rai Jesoso.

*Jenai cachaauru ate mucuurera cotihaca Jesusone*  
(Mt 4.18-22; Lc 5.1-11)

<sup>16</sup> Nii jana jetaote, Calileea conemuri auhaniha cuujihane jaun jetao, coroatajai ate mucueracuru Simoon, chaen nejera Aanderesi, naaonjoainuri coarae Jesoso, acauhanau rai rede nalaaecuruhane jana. Nitohaneein acaauru coaraain jetaote: <sup>17</sup> “Chajaauche canu aina. Aihate nii ate mucuhichene rijijieein, canu rai cachaauru mucuhin raeraneein neeiche,” nae jetao acaauru rai Jesoso.

<sup>18</sup> Nii rijieeoritiin jetaote, rai rede ratiriin Jesoso aina cuure.

<sup>19</sup> Nii caje basiinjiin cutiin jetaote, coroatajai ate mucuurera- Sebedeo calaohichuru Saantiaao aina rai nejera Joaan eruha cue Jesoso, bote cuhane neein redeeuru rucuheca neeuruhane jana. <sup>20</sup> Nii coaranaacane rijijieeoritiin cotihanaacane jaun jetaote, bote cuhane acaauru coroatajaneraauru aina nii acaauru inaca Sebedeo ratiriin Jesoso aina cuure.

*Leinjiin cacha suujua cuhane niha Moconajaera letonone*  
(Lc 4.31-37)

<sup>21</sup> Inae Caferenaanon turuhin jetaote, nebetacanaa cojoanona bana ita taojiaain, Cana Coaunera rai rauhi que ereereecuruha Joriocurune jaan coloheri sinacoca asaae cuhin cachaauru relaane nunuhetiha cue Jesoso. <sup>22</sup> Nii jana jetaote, cojoaelatiin aonajeeure cachaauru, Moisesa aitonjoan rauhi que cacha relaurera amurijiriin esinae rauhijiriin suujua caje coitucuhin aitohane jaun.

<sup>23</sup> Nii jana jetaote, nii netaojiaauruha cachaaurune jaan coloheri sinacoca asaae ne leinjiin cacha- suujua cuhane Moconajaera letono siricha. <sup>24</sup> Aca jetaote ehequiin:

“Chanute canacaanu rene turuha uhita Nasarete cocoaicha Jesoso. Jerihane nechu jataain canacaanu itajeranu quete turuha uhicha. Raotojoeinne canu, ii Cana Coaunera Calaohi neeine coitucunra,” nae Jesoso rai.

<sup>25</sup> Nii jana jetaote:

“Coo iriha. Caa cacha jianeein amuura,” nae jetao Jesoso, nii cacha suujua cuhane nena Moconajaera letono rai. <sup>26</sup> Nii jana jetaote, rijijijianeein nii cacha teein, tonijiaain ehequiin mitue nii Moconajaera letono, nii cacha suujua caje. <sup>27</sup> Nii jana satiin nesoonetiin jetaote:

“Chatohanai cacha relaera cachana caa ai. Coatihaca cacha relauruha cacha relaurerane rijijieein cacha relai. Caate laen nohanelanaala esinae rauhijiriin cacha relae. Chaen techu moconajaera letonocuru nihanatiin nere tonoraain cacha suujua caje mituhin amuure,” naain jetao ita caje bajaure nii cachaauru.

<sup>28</sup> Nii jana jetaote, coa carajaaeriin Jesoso benaa coitucuure satiin Calillea batane que nenacaauru cachaauru.

*Simoon Fedoro tano rautaa Jesusone*  
(Mt 8.14-15; Lc 4.38-39)

<sup>29</sup> Inae netaojiaain Cana Coaunera rai rauhi que ereerecuruha Jorioocurune jaan coloheri sinacoca caje mituhin jetaote, Saantiaao, Joaan, naaonjoanuri aina jiniiquiin, Aanderesi aina Simoon loreri asaae cue Jesoso. <sup>30</sup> Nii jana jetaote, inae nii loreri asaae turuuhane jana, ajaa caaun cunaiteein ecu tocoeeque Simoon tano. Nii jaun jetaote, Jesoso rai beeuruhane jaun, <sup>31</sup> rohan nichuuntaain rai biji que michuhane jana jetao, inae caje amue ajaa. Nii rijieoritiin inae caje amuha ajaane jaun jetaote, nimichuhin acaauru coroaate nii cunaitenaa Simoon tano.

*Arajiin cunaitenacaauru rautaa Jesusone*  
(Mt 8.16-17; Lc 4.40-41)

<sup>32</sup> Inae sohane jaun nocohecane jana jetaote, Jesoso rene satiin cunaitenacaauru, chaen suujua cuhane Moconajaaera letono sirichaauru, naaonjoainuri cachaaurune maajeein amaare, acaauru rautaa Jesusone coina. <sup>33</sup> Nii jaun jetaote, satiin nenaanajaauru caje cuhin, ecu acuujua niha netaojiaaure cachaauru. <sup>34</sup> Nitohaneein jetaote, araai laurii cunai caaun cunaitenacaauru cachaauru rautaa, Moconajaaera letono sirichaaurune maajeein rautae Jesoso. Nejetaote laen ereeuruha nii cacha suujua cuhane nenacaauru Moconajaaera letonocurune caohate Jesoso, raotojoein acanihane coitucuuruhane jaun.

*Calillea batane cuhin, Cana Coaunera ere beebejiha Jesusone*  
(Lc 4.42-44)

<sup>35</sup> Inae janonaa jerihane jaun jetaote, nimichuhin nii nese caje cuhin, jelai Cana Coaunera bajaa cue Jesoso. <sup>36</sup> Nii jaun jetaote, leeochoaauru aina jiniiquiin cuhin Jesoso ariha cue Simoon. <sup>37</sup> Eruhin jetaote:

“Satiin cachaaurute ii ariirijia amuhemuhecure,” naauruha Jesoso raine jaun jetaote:

<sup>38</sup> “Chajaau chacuchete ichuun nenacaauru leeochoa nenanajaauru cuhin Cana Coauneraacha beratenojoin erenaa benichaache. Nii coinane jelai caje mituhin cajiha uun,” naain acaauru tonorae Jesoso.

<sup>39</sup> Nitohaneein jetaote, cajihaaneein nenaanajaauru amuhemujeein, satiin Calillea batane sacuritaain Joriocuru rai netaojiaauruhane jaan coloheriuru asaae Cana Coaunera ere beebejeein, moconajaaera letonocuru sirichaauru cachaaurune maajeein rautaa in amuhemujue Jesoso.

*Leinjiin cosibi siricha rautaa Jesusone*  
(Mt 8.1-4; Lc 5.12-16)

<sup>40</sup> Nii jana jetaote, Jesoso rene turuhin jetao: “Jereeine jana nihane canu rautaa caa canu cosibi caje,” naa leinjiin cacha cosibi caaun cunaitenaa, nacatiha neseonrihaainne jaun jetaote,

<sup>41</sup> cairichaaajoaain coaraane jaun jetao, biji que mucuhin:

“Jerichaaun chujian. Ii caje amuhine caa ii cosibi,” naa nii cacha rai Jesusone <sup>42</sup> rijieoritiin caje amuha nii cosibine jaun jetaote, inae somaraain ne nii cacha. <sup>43-44</sup> Nii nerautaane rijieoritiin rai necoein jetaote:

“Aonaun. Coa caa ii rautaanune biha chuni rai. Raujiaain Cana Coaunera ere que cacha relaera neein nena saseredote coanahun ii coaraane coina. Chaen inae nerautaa nii ii cosibi cajene coaracuruhane coina, aitoa Moisesa aitonjoan rauhine rijijieein, Cana Coaunera belaa ine jaanu amaain

cunihute inae ii cosibi caje nerautaaaine coitucuurumiin satiin cachaauru,” naain jetao jataain suujuateein nii cacha letoae Jesuso. <sup>45</sup> Nii jana jetaote, satiin cachaauru rai nii nitohaneein jaberoco rautaa Jesusone que nereretaa cue nii cacha. Nii jaun jetaote, inae neseeuuru raotojoein turunaa nainenihaane jaun jetao, neniha cachane jaaun cuhin amuhemujue Jesuso. Nejetaote, lauri laurichuru caje cuhin coaraa cuure cachaauru.

## 2

### *Leinjiin jiuirona cacha rautaa Jesusone* (Mt 9.1-8; Lc 5.17-26)

<sup>1-2</sup> Nii baiha janojanoheriin catiaain jetaote, coaiten Caferenaanon cue Jesuso. Inae ecu turuhin, loreri asaae nihane coitucuhin jetaote, rene turuha cuuruha arajii cachaaurune jana jetao, acaauru rai Cana Coanera ere beebeje Jesuso. Nitohaneein arajiin turuuruha cachaaurune jaun jetaote, jataain nemoha loreri asajine jaun, nii acuujua rohan nihanatiin nene turuha cachane jaannu. <sup>3</sup> Nii jana jetaote, Jesuso rene leinjiin cacha jiuirona amaare jenai cachaauru. <sup>4</sup> Nejetaote, jataain arajiin turuha cachane jaun, Jesuso rene nii jiuirona cacha turunaa nainecurenihana jaun jetao, loreri coarana joaracaain rai nela cuhane tijichaain, nii niha Jesusone jaan jelon nii jiuirona cacha faaure. <sup>5</sup> Nii cunaitenaa rautarichaaanne esenetaain amaauruha nii amaaurerane coaraane jaun jetaote:

“Inae ii osa caje ii ichoterateein, ii que casuujua acatichaaunra cacalabi,” nae jetao nii cunaitenaa rai Jesuso.

<sup>6-7</sup> Nii jana ecu neein aonajeein jetaote: “Chanuna caritiin ere caa cacha. Nechu jataain Cana Coanera niha nocoetohane jaunte aite. Leinjiin Cana Coaneraachate nainere osa sitaa cacha cajene,” naain jetao suujua cuhane ereerejeein laurujaalaurujuaain aonajeeure Moisesa aitoonjoan que cacha relaaureraauru tabaauru. <sup>8</sup> Niritiin suujua cuhane coaacuruhane que nainaan jetaote:

“Chanuna niritiin inara suujua cuhane coaauquiche. <sup>9</sup> Cha caaintaneri-hana nii jiuirona rai: ‘Inae ii osa caje ichoteratenojoein,’ naain irihaca ne. Ainihane: ‘Nimichuhin chela seriin amuu,’ naacane. <sup>10</sup> Coarajeeuchenejian, Cana Coanera Calaohi cachaneein nejanoanaa nichaaunne, itolere curu-anaa neein nihanu caa cana rai chauratane quene coaratete, rai nosa caje cacha ichotena nainichaaunne coitucuhiche,” naain jetao, nii jiuirona rai:

<sup>11</sup> “Ii raine aitoon. Nimichuhin chela seriin chenenajau caunihu,” naa Jesusone rijieeoritiin jetaote, <sup>12</sup> satiin nii ecu neein coarajeeurera notaracae jetao, nimichuhin rai nela seriin jelai caje amue nii jiuro caaun cunaitenaa. Nii jaun jetaote, satiin cojoelatiin jetao: “Chabana catohani coarahaacheta,” naain jetao Cana Coanera coroaecure cachaauru.

### *Leinjiin cacha Lebi cotihaca Jesusone* (Mt 9.9-13; Lc 5.27-32)

<sup>13</sup> Nii baiha jetaote, coaiten nemuri auhaniha cuha Jesusone jana, rene turuuruha arajiin cachaaurune jaun jetao, acaauru rai Cana Coanera ere beebejeein acaauru relae Jesuso. <sup>14</sup> Nii caje cuujuein jetaote, Romanocuru rai *impoestonu* que cacha cobaraain coriqui raeranein nihane jaun rai rori ichoae lauhecoha Arafeeo calaohi Lebine jana coariin jetao:

“Chajaau caniha,” naa Jesusone jaun jetao, nii rijieeoritiin nimichuhin Jesuso aina cue Lebi. <sup>15</sup> Nii baiha jetaote, nii Lebi loreri asae lenoniha niha aina nerelanacaauru aina Jesusone jana jetao, cuu nii Lebi aina lenoniha neure arajiin leeochoauru Romanocuru rai *impoestonu* que cacha

cobaraain coriqui raaurera, leeochoaauru cachaauru- baasoneein ichaoha benojoihunri, naaonjoainuri. <sup>16</sup> Nitohaneein Jesoso aina lenoniha neeuruha nii nitohaneein ichaonacaauru cachaaurune coaracuruhane jaun jetaote, nii Jesoso aina nerelanacaauru rai jetao:

“Chasiina taa Romanocuru rai *impoestonu* que cacha cobaraain coriqui raaurera, baasoneein ichaoha benojoihunri, naaonjoaihunri aina lenone inara relaera,” naaure jetao fariseecuru aina Moisesa aitoonjoan que cacha relaaurera, Jesoso aina nerelanacaauru rai.

<sup>17</sup> Nii jana jetaote, acaauru aonajeein jetao:

“Coatiha coichaera latecuruhi rauronacaauru. Leinjiin cunaitenacaauruhachate coichaera latecure. Coatiha osa colane nenacaauru cotihaca uhaaun. Osa aina nenacaaurune cotihaca uun,” naain jetao acaauru tonorae Jesoso.

*Suri couu netiin Cana Coaunera bajaauruhane  
(Mt 9.14-17; Lc 5.33-39)*

<sup>18</sup> Joaan Baotisita sacuurera aina fariseecuru sacuurera jetaote niqui, suri couu netiin Cana Coaunera bajaebajaecure. Nii jana jetaote, Jesoso rene turuhin jetao:

“Chanuna jana chaen, Joaan, fariseecuru, naaonjoaihunri relanojoinuru jataain Cana Coaunera bajaee bajaecure suri couu netiin. Nete laen itolere bana ii aina nerelanacaauru, coaerai cohin, lenoneein, naaonjoaunreta,” naauruha Jesoso raine jana jetaote:

<sup>19</sup> “Aiha chuhisi niqui. Nete ene ranaa jeriha cachana jaa beseta que neeuruhane jaun, suri couu nenea nainecurene caa cotihanohinchuru, jaiti acaauru aina niha nii ene raeranu cachane jaun. <sup>20</sup> Nete laen inae nii ene ranaa jerera cacha amaauruhane, suri couu neein inaderaa cuurureeincha,” naain jetao: <sup>21</sup> “Coaracuche nachuhinti, nihei chuni obiri enachasine soaain, cajione siri que counera. Nitohaneein nii obiri enachasine soaihanete, nii obiri enachasine asaaere nii cajione siri. Chaen caohachaain nedanaa naineriheii nii obiri enachasine, nii cajione siri que couneraane. <sup>22</sup> Nii rijijieeinchu, nihei chuni inae conaca que tiha coaeraine jana, cuhane ichonai tera. Nitohaneein cuhane teraa ichonainete naasaere nii coaerati. Nitohanihane jaunte, caohachae coaerai nejesinanein niha coaeraine. Chaen ichonai, ichonai nejesinajeein nihane caohachae,” naain jetao cachaauru tonorae Jesoso.

*Nebetacanaa cojoanona bana aroso rijijieein nenea tirico moloonejeein quihuruha Jesoso aina nerelanacaaurune  
(Mt 12.1-8; Lc 6.1-5)*

<sup>23</sup> Nebetacanaa cojoanona bana aina nerelanacaauru aina jiniiquiin temule jana situhin, amuhemuheca Jesusone jana jetaote, quihuruhane coina aroso rijijieein nenea tirico inaa moloonejeeure aina nerelanacaauru.

<sup>24</sup> Nii coarajeein jetaote:

“Chanuna nebetacanaa cojoanona nihane jaun cocoaeraa nitohanai ichara natiin, nitohanai ichacure nii ii aina nerelanacaauru,” naauruha Jesoso rai fariseecurune jana jetaote:

<sup>25</sup> Tana nitohanihalu Rabirine coitucuhichene: <sup>26</sup> “Nii Rabiri jetaote, saseredotecuru curuaanaa neein niha Abiatane bana Teenforo asaae enohin Cana Coaunera que banijiaain nenea faan qui, nii rai corihacuru aina jiniiquiin mijiitooruhane jaun, saseredotecuruhacha nii faan quinaa nainihane saijieein,” tana naain laenanohiniha Cana Coaunera Quiricha cuhanene ereretaain aonaquichene.

27-28 “Nebetacanaa cojoanonaate coaunaelu Cana Coaunera, bana nebetacanaa nainiha cachane coina. Coatiha cache cairichaeranu que nebetacanaa cojoanona coaunaailu Cana Coaunera. Nii jaunne laen canu naineeun nebetacanaa cojoanona bana nihanatiin quiicha ichana jerei ichaain nihanune. Nitohaneeinte inara rijijieein cachaneein rai Calaohi nichaaunne cocoinaain letoae Ofa Cana Coaunera,” naain jetao fariseeocuru tonoraе Jesuso.

### 3

#### *Jiurona bijii cache rautaa Jesusone (Mt 12.9-14; Lc 6.6-11)*

<sup>1</sup> Nii baiha jetaote, coaiten netaojiaain Cana Coaunera rai rauhi que ereereecuruha Joriocurune jaan coloheri sinacoca asae enoha cuha Jesusone jana jetao, cuu ne leinjiin cache jiurona bijii. <sup>2</sup> Nii jaun jetaote, nebetacanaa cojoanona bana nihane jaun nii Jesuso coarajeeure fariseeocuru, nii jiurona bijii cache rautaane niha nechu jataain colurujeeuruhane jaan leranune coina. <sup>3</sup> Nii jaun jetaote, nii jiurona bijii cache rai jetao:

“Nimichuhin nii cache cataaun chujutoroau,” naain jetao: <sup>4</sup> “Chatohanai ichacaane caohachae nebetacanaa cojoanona bana, baaso ichaain cache ichao itajihacanena. Ainihane cache ichao rai caohacha ichacaanena,” naain fariseeocuru caje bajaa Jesusone jana jetaote, inauheneecha curuaaequuin aonajeeure. <sup>5</sup> Nii jaun jetaote, nii nere aohana jerecurenihane jaun, nererojoecaaajoaain inaderaain, nii curuacaain nenacaauru coaraain jetao:

“Ii bijii raujiaau,” naa nii cache rai Jesusone jana, bijii sijitaain raujiaa nii cachane jana jetaote, inae nerautaaain neraujiaе rai bijii. <sup>6</sup> Nii coaraain jetaote, airiniha mituhin ita suujuatiha cuure Erodesi ere tonoraeraauru aina fariseeocuru, Jesuso sohin jaauruhane coina.

#### *Nemuri auhaniha netaojiaauruha arajiin cachaaurune*

<sup>7</sup> Nii baihate, rene tururuha arajiin Calileea cocoaichacurune jana, nii Calileea conemuri auhaniha cue aina nerelanaauru aina Jesuso. <sup>8</sup> Jataain itolere ichaain, cunaitenacaauru cachaauru rautaain, naaonjoane coitucuuruhane jaun jetaote, coaraa cuure Jodea batane, Jerosaleen, Idomea batane, nucuhe Jorodaan auhaniha neein enoto mitu nichajai cajeeurune maajeeinchuru cuhin jetao, Tiro, Sidoon, naaonjoainuri batane cajene maajeein turuha cuure arajiin cachaauru. <sup>9</sup> Nii jaun jetaote, chajaain letona jatoraaain bote coaracuruha aina nerelanacaaurune coina, acaauru rai aite Jesuso, nabana sururucuruha nii arajiin turunacaauru cachaaurune coataa. <sup>10</sup> Jataain araai laurii cunai caaun cunaitenacaauru rautaane jaun jetaote, satiin cunaitenacaauru Jesuso jaberoco dadanaa jerecure nerataauruhane coina. <sup>11</sup> Nii jana suujua cuhane moconajaenra letono sirichauru jetaote, Jesuso coaracuruhane jetao, nacatiha neseeonriaain:

“Iite Cana Coaunera Calaohi neeicha,” naain jetao cojiorichure.

<sup>12</sup> Nejetaote aonajeeuruha cachaaurune jana, que ereeuruha nii moconajaera letonocurune caohate jataain Jesuso.

#### *Afosotoorunu que, lechoonca coroatajai niicha cocoinanenu janiicha Jesusone (Mt 10.1-4; Lc 6.12-16)*

13-14 Nii baiha jetaote, ichatane ucuuno que iniin caohachaaain niicha coaracuri cotijiae Jesoso. Inae satiin netaojiaauruhane jana jetaote, janiinajaain acaauru caje lechoonca coroatajaain nenacaauru cocoainae, corihaneein jiniichaain amuhemujeein, chaen nere beraanu que naaonjoaauruhane coina. Nii lechoonca coroatajai niicha cocoainauri jetaote, afosotoorunein curuaatenajaain letoanajaen, <sup>15</sup> cacha suujua cuhane nenacaauru moconajaera letonocuru sitaain, cunaitenacaaurune maajeein rautaaauruhane coina. <sup>16</sup> Nii lechoonca coroatajaain niicha janiichuri jetaote, nii jauriaanejeein Simoonneein niicha curuaatei Fedoro, chaen <sup>17</sup> nejera Joaan aina Sebedeeo calaohichuru Saantiaao naaonjoainurine. Acaauru jetaote, Boanerges neein curuaatenajae: “Arara calaohichuru,” naaneenein. <sup>18</sup> Chaen Anderesi, Ferifi, Bartolomee, Mateeo, Tomasi, Arafeeo calaohi Saantiaao, Tadeeo, Celotenein niicha curuaatei- Simoon, <sup>19</sup> chaen nii acaauru lechoonca coroataja, Jesoso colurujueranu Jodasi Isacariote naaonjoainurine.

*Moconajaera letononiha Jesoso beeuruha Moisesa aitoonjoan que cacha relaaurerane*

*(Mt 12.22-32; Lc 11.14-23; 12.10)*

<sup>20</sup> Nii baiha jetaote, leinjiin loreri asaae enoha cuha Jesusone jana jetao, ecu rene arajiin netaojiaauruha cachaaurune jaun jetao, nii aina nere-lanacaauru aina jiniiquiin lenonena nainecurene. <sup>21</sup> Inae nitohaneein ecu niicha ichanenu coitucuelanaala niha Jesusone beeuruhane coitucuuruhane jaun jetaote, raa cuure naraaichuru.

<sup>22</sup> Chaen Jerosaleen caje turunacaauru Moisesa aitoonjoan que cacha relaaurera netonai jetaote,

“Moconajaeracuru curuaanaa Beelseboote, caa cacha rai catohanei ichaane jaan teein ne, nii aina cacha suujua cuhane nena moconajaeracuru letono sitaane coina,” naaure jetao ita rai.

<sup>23</sup> Niritocuruhane aonaain jetaote, acaauru cotijiaain:

“Chasiina nejesinanejeein, chatohaneein ita teein, ita sitanaa nainere moconajaera. <sup>24</sup> Niheichu leinjiin atane que ichaonacaauru, nejesinanejeein itaque nejerateein nihane raotiin ita aina ichaonaa nainecururihei. <sup>25</sup> Niheichu leinjiin loreri asaei ita que nejesinanejeein nejerateein nena nainecuruhi coroatajai cacha, lesajeein ita que nejerateein nihane raotiin ita aina ichaonaa nainecurenihane jaun. <sup>26</sup> Nii rijijjeein chu ita que nejesinanejeein nejerateein nena nainecuruhi moconajaera aina rai letonocuru, enaacha jiniiquiin ita itajenaa nainecururihane jaun.

<sup>27</sup> Nihei chunei jataain laraajiin nena cacha loreri asaae enohin niicha sirii rulunaa nainera. Jauriaanejeein biji ichohacane banaachate nainere caje niicha sirii ruluhane.

<sup>28</sup> Cana Coaunerate, itolere baaso ichaain neosateein, itolere baaso que ereein naaonjoaauruha cachaaurune niha natiin acaauru que suujua acateein ne. <sup>29</sup> Nete laen rai Suujue que baasoneein iriha cachane, chabana que Suujua acatenereein Cana Coaunera. Nii cacha baasoneein que ereite chabana satonoelanaala caseteconihane cureein,” nae jetao Moisesa aitoonjoan que cacha relaaurera rai Jesoso. <sup>30</sup> Moconajaera letono sirihane beeuruhane jaun jetaote, acaauru rai aite Jesoso.

*Neba aina turuuruha Jesoso nejeraaurune*

*(Mt 12.46-50; Lc 8.19-21)*

<sup>31</sup> Nii jana jetaote, turuha uure neba aina Jesoso nejeraauru. Nejetaote loreri asae enoelanaala, airiniha neein cotiharateure. <sup>32</sup> Nii jana jetaote, nii

Jesoso curuhacaain nenacaauru cachaauru jetao: “Taute airiniha turuhin ii ariiriichure ii neba aina ii nejeraauru aina ii baihuru,” naauruha raine jana jetaote:

<sup>33</sup> “Charijina canu neba, canu nejeraauru, naaonjoainere,” naane baiha jetao, <sup>34</sup> nii curuhacaain nenacaauru cachaauru coaraain jetao: “Caaurute canu neba, canu nejeraauru, canu baihuru, naaonjoainuri ne. <sup>35</sup> Chunocoha jeriha Cana Coaunerane rijijieein ichaohin, Cana Coaunera jerenohin icharate, canu neba, canu nejera, canu bai, naaonjoainurine,” nae jetao acaauru rai Jesoso.

## 4

### *Ucuhe riaara que cuaain cache relaa Jesusone (Mt 13.1-9; Lc 8.4-8)*

<sup>1</sup> Nii baiha nacoaauneein nemuri auha niha teein cachaauru relaa Jesusone jana jetaote, ecu arajiin netaojiaauruha cachaaurune jana, nii nemuri cuhane niha leinjiin botene jaun jetao, cuhane fauhin nelauriariin lauheque Jesoso, nemuri auhaniha neein coarajeeuruha cachaaurune jana. <sup>2</sup> Nitohaneein bote cuhane fauhin jetaote, ecu neein aonajeeuruhane jana araai laurii itolereeuuru que cuaain acaauru relae. <sup>3</sup> Nitohaneein acaauru relaan jetaote:

“Caohachaain caa quere aonacuche. <sup>4</sup> Leinjiin cache, ucuhe riaacane jana tabaauru bero cuhane nalunacaaurute turuhin quihure tajaecuru. <sup>5</sup> Jana tabaauru jataain neniha atane jioonone jaun samaata choae nalunacaaurute erojoein omaroe, ucuacaain neniha atane jioonone jaun. <sup>6</sup> Nete enoto ajaano caun, neniha cojoaisine jaun ohe nii omarona. <sup>7</sup> Jana tabaauru ucuhecuru, ojoa jana nalunacaaurute omarohane saijieein amurijiriin omarohin soha ojoane jaun, inacae lanaala ohacoe. <sup>8</sup> Jana tabaauru ucuhecuru atane caohacha choae nalunacaaurute omarohin caohachaain inaacane jaun, le ucuhecuru caje tabaauru nichata choonca ucujeein, saota choonca ucuheneein, le fasha ucuheneeichuru inacae,” naain acaauru relaan jetaote:

<sup>9</sup> “Caohachaain aonacurumiin urichonacaauru,” nae jetao acaauru rai Jesoso.

### *Acaauru relaa Jesusone jaan bajaauruha caje aina nerelanacaaurune (Mt 13.10-17; Lc 8.9-10)*

<sup>10</sup> Inae caje amuuruha nii cachaaurune jana, jelai nedaa Jesusone jana jetaote, nii cachaauru relaane jaan bajaauru caje, nii lechoonca coroatajaain aina nerelanacaauru aina ecu rohan nenacaauru leeochoauru cachaauru, coitucuuruhane coina. <sup>11</sup> Nii jana jetaote, acaauru rai: “Inara quete asinojoneein nena rai Cojoanonaa coitucuerate Cana Coaunera. Nete laen rai cachane lanaala nenacaauru que, nereretanaa que cuaain acaauru rai be, <sup>12</sup> coaracuruha neniha natiin coitucuurenihane coina. Niheichu aonacuruhane niha natiin, coitucuuruhane coataa. Nabana aonaain aina cuaain esenetaauruhane, acaauru osa acaauru ichoterateein acaauru que suujua acatiha Cana Coaunerane coataa,” nae jetao acaauru rai Jesoso.

### *Ucuhe riaara que acaauru relaane jaan coitucueratiha Jesusone (Mt 13.18-23; Lc 8.11-15)*

<sup>13</sup> Niritiin jetaote, aina nerelanacaauru rai jetao: “Ta caa inara relaane jaan aonaain coitucuhichene. Chatohaneeina jana leeochoauru que cuaain inara relaane coitucuriquiche. <sup>14</sup> Nii ucuhe riaarate Cana Coaunera ere bera rijijieein ainaa ne.



<sup>15</sup> Niha nii coina tabaauru tabaauru nii bero cuhane naluhin nitajenaa ucuhe rijijieein nenacaauru cachaauru. Nii coinata Cana Coauneraacha beratenojoin aonacuruhane niha natiin, inae acaauru coritaa uha moconajaerane acaacha esenetaain, inae suujua cuhane Cana Coaunera coaacuruhane jianecure.

<sup>16</sup> Nii leeocho cachaaurute, nii samaata choae nalunaa ucuhe rijichure. Nii jaunte Cana Coaunera beratenojoin jereein rautaaain aonacuruhane baiha, <sup>17</sup> caohachaaain acaauru suujua cuhane coaacurenihane jaun, Cana Coaunera esenetaauruhane jianecure. Nii jaunte Cana Coauneraacha beratenojoin esenetaain neeuruhane jana, cairichanojoneein, cojunojoneein, naaonjoaauruhane, Cana Coaunera esenetaauruhane jianecure.

<sup>18</sup> Jana leeocho cachaaurute, nii ojoa jana nalunaa ucue rijijieein neeure. Cana Coaunera beratenojoin aonacuruhane baiha niha natiin, <sup>19</sup> jataain acaauru ichaohacha que suujua teuruhane jaunte, nechu jataain raaje necoritaain coriquihonaneein nena jereein, itolere sirina jerecuruhane jaun, caohachaaain Cana Coaunera esenetaain tonoraarenihane jaun nitajeeure.

<sup>20</sup> Jana leeochoaurute atane caohacha choaae nalunaa ucuhe rijijieein neeure. Acaaurute Cana Coaunera ere aonaain, caohachaaain Cana Coaunera esenetaaure, nii chabana jianelanaala.

Nii esenetaeraauru tabaaurute, le ucuhe caje nichata choonca ucuheneein le tijirii caje tera, saota choonca ucuheneein, le fasha ucuheneein tera, naajoaain le tijirii caje teurerera rijijieein neeure,” nae jetao acaauru rai Jesuso.

*Cono que cuaain cachaauru relaa Jesusone  
(Lc 8.16-18)*

<sup>21</sup> Niritiin jetaote: “Nihei chuni cono mocohin bujuaihu tera. Nitohaneein bujuaihu telanaalate, jianacoon conohanau neeuruha turunacaaurune coina ecuun teeure. <sup>22</sup> Nii cono aina cuaainte jianacoon coitucunojoiniha cureein coitucuerae lanaala itolere asinojoneein inaraacha ichai. <sup>23</sup> Aonacurumiin urichonacaauru,” naain jetaote:

<sup>24</sup> “Caohachaaain nainaaain inaraacha aonai aonacuche. Charijieein teeinti leeochoauru coaraquiche, nii rijijieeinte inara netonai coareein Cana Coaunera. <sup>25</sup> Caohachaaain niicha jerei rijijieein ichaohin nere tonoraerate, jeelai amuritoheriin coroatajanereein Cana Coaunera. Nii rijijieein techu ena canuhacha tei raera jelai amuritoheriin rareein inae ecu tihane bana. Jana nii canuhacha tei latelanaala nenaate cha colane nedaareein inae ecu tihane bana,” nae jetao acaauru rai Jesuso.

*Omaroha ucuhene que cuaain acaauru relaa Jesusone*

<sup>26</sup> Niritiin jetaote: “Temule jaera cacha rijiiicha Cana Coaunera cojoanonaa. <sup>27</sup> Charijieein teeinti temule jaain, janotiin berailanaala sinii, jerichanejeein jiiichoo berailanaala nihane tonohanau coitucuenihane jana omaroe nii niicha temui, nii rijiiicha Cana Coaunera Cojoanonaa. <sup>28-29</sup> Charijieein teeinti, raajenihane omarohin, nalojoaacoaain, inacaain, inae tainaca que teein cataa nii temulene taihure cachaauru, nii rijiiicha Cana Coaunera cojoanonaa,” nae jetao acaauru rai Jesuso.

*Mosatasa ucuhe que cuaain acaauru relaa Jesusone  
(Mt 13.31-32; Lc 13.18-19)*

<sup>30</sup> Niritiin jetaote: “Chaaquenejianra inara rai Cana Coaunera cojoanonaa que cuaain aitete coitucuhicheta. <sup>31</sup> Leinjiin mosatasa ucuhe temunacai

rijiicha. Acate itolere temulecuru ucuhe fautaain jataain aansijien. <sup>32</sup> Nete inae temunojoineein nihane, itolere temulecuru ocoana jana nenacaauru amurijiriin neleereein fojoein nuna seeonjoan nihane jana, nichoae tajejin loroore tajaecuru, nii rijiicha Cana Coaunera cojoanonaa,” nae jetao acaauru rai Jesoso.

*Coitucunaa nainecuruha nereentiaain araai laurii que cachaauru relaa Jesusone*

*(Mt 13.34-35)*

<sup>33</sup> Nitohaneein jetaote, araai laurii que cuaain itolere acaauruhacha coitucui- acaauru ichao que cuaain cachaauru relaa Cana Coaunera ere beebejeein acaauru relae, aonaain coitucunaa nainecuruha nereentiaain Jesoso. <sup>34</sup> Nitohaneein jetaote, rai cacha nelanaala nenacaauru relaa Cana Coaunera Cojoanonaa quene, acaauruhacha coitucui- acaauru ichao que cuaain relanajae. Jana aina nerelanacaauru relaane jetaote, rauhijiriin, “Naaonjoainte ne Cana Coaunera Cojoanonaa,” naain Cana Coaunera Cojoanonaa been que relanajae.

*Fichafichanaa aina cujuana suruaa Jesusone*

*(Mt 8.23-27; Lc 8.22-25)*

<sup>35</sup> Nii cojoanotiin bananeein aina nerelanacaauru rai jetaote:

“Jamaauchete nemuri jerau cunichaache,” nae jetao acaauru rai Jesoso.

<sup>36</sup> Nii jaun jetaote, ecu cachaauru ratiriin, nii fauhin lauhequiin cachaauru relaa Jesusone jaan bote cuhane fauhin amaauruha aina nerelanacaaurune jana jetao, acaauru jiniichaa cuure leecha boteuru.

<sup>37</sup> Nitohaneein cuuruhane jana jetaote, jataain mijiaaieein uha cujuana tabai aina fichafichanaane jana jetao, acaauru bote cuhane acau enoaa fichafichanaane jaun, inae nalunaa jere nii cuurunaja bote. <sup>38</sup> Nii jana bote roe cuhane binaao choae tocoeequiin sinii siniicha Jesusone jana jetaote:

“Cacha relaera chajaain nocoo. Inae nalurichaacheje. Tana inae nalunaa jerichaachene que tonajeeine,” naauruha nocoain aina nerelanacaaurune jana jetaote, nimichuhin:

<sup>39</sup> “Coaa inooniha. Chajaain nesuruu,” naa nii nemuri fichafichanaa rai Jesusone rijieeoritiin jetao, nesuruha cujuana aina nii fichafichanaane jaun raotojoein cuujeeure. <sup>40</sup> Inae nesuruha nii fichafichanaane baiha jetaote:

“Chanuna jataain nesooneeiche. Chanuna cha esenetaeneeiche,” nae jetao nii aina nerelanacaauru rai Jesoso. <sup>41</sup> Nejetaote jataain nesoone-tooruhane jaun jetao:

“Chatohanaineeinna ne caa cachate, nere tonoraain nesurue cujuana tabai aina nemuri fichafichanaa,” naaure jetao ecu ita rai nii aina nere-lanacaauru.

## 5

*Cadara bataneu niha suujua cuhane moconajaera letono siricha cachane*

*(Mt 8.28-34; Lc 8.26-39)*

<sup>1-2</sup> Nitohaneein cuhin inae nemuri jerau turuuruha Cadara batane que jana, iniha cuha Jesusone jana jetaote, que tacaain coinetiha cue leinjiin cacha- suujua cuhane moconajaera letono siricha. Nii cacha jetaote atane bana caje uhin ai, <sup>3</sup> ecu ichaohane jaun. Nitohaneein rai suujua cuhane moconajaera letono sirihane jaun jetaote, *cadena* que niha natiin ichohana nainene chuni. <sup>4</sup> Araai saain tijia aina biji ichohacuruha *cadena* quene niha natiin jetaote, molomolonijihanaane jaun, chatohaneein tenaa nainene nii chuni. <sup>5</sup> Nii jaun jetaote, janotiin, jiichoo netojoeinchuru ichatane

janaauru amuhemujueein, atane banaauru ichoae amuhemujueein, eheehejeein, ajeri jaberoco ichoae comohin, naaonjoain amuhemujue nii cacha. <sup>6</sup> Nii jaun jetaote, coriaae uujiha Jesusone coariin, jeluhariin coinetein nacatiha neseeonriaain ehequiin jetao:

<sup>7</sup> “Jiaonriha caniha nenoaain carerojoecaaine, acaihanijin nena Cana Coaunera Calaohi Jesuso. Jiaonriha atiin nohane Cana Coaunera coreniha chatohanein caeteine,” nae jetao <sup>8</sup> nii cacha suujua cuhane nena moconajaera letono. Nii cacha suujua jianein amuhane coina: “Nii cacha suujua cuhane neein, cacha suujua aasaequine caje mituhin amuura moconajaera letono,” naa Jesusone jaun. <sup>9</sup> Niritiin jetaote:

“Tonaa ii curuaa,” naain caje baja Jesusone jana jetao,  
“Jataain araichaanune jaunte Lejion ne canu curuaara,” nae jetao Jesuso rai.

<sup>10</sup> Nejetaote, jelai batane caje jaoha Jesusone caohate jataain nii moconajaera letono nii cacha suujueniha nena. <sup>11</sup> Nii jana ichatane ucuuno rohan lenoniha neeuruha arajiin coosichurune jaun jetaote:

<sup>12</sup> “Atiin taa coosichuru suujua cuhane canacaanu letoaa,” naaure jetao Jesuso rai, nii moconajaera letonocuru cacha suujua cuhane nenacaauru.

<sup>13</sup> Nii jaun caje bajaauruhane rijitjoein jeriha Jesusone jaun jetaote, nii coosichuru suujuanuha enooruhane jaun, ucui caje nomarotein acauhanau naluhin, acau que nereeonohin oore nii coroata oaraancai coosichuru.

<sup>14</sup> Nii jaun jetaote, nii coaraain jelai caje sorohin, neseeu cuhin, nenaana-jaaunru, naaonjoainu cuhecujueein biha cuuruha nii coosichuru beraihur-erane jaun jetao, turuhin coaraa cuure cachaauru. <sup>15</sup> Nii jana jetaote, nii niha Jesusone jaun turuuruhane jana jetao, cojurihu cacha caohachanein nena tochanein necoreetein lajuae, nii suujua cuhane arajiin moconajaera letono coitucuchuhi siricha cacha. Nii jana coaraain nesoone-toorua nii coaraa cunacaauru cachaaurune jana jetaote, <sup>16</sup> nii coosichuru suujua cuhane enooruha nii moconajaera letonocurune jana, ooruha nii coosichurune jana, nerautaa nii moconajaera letono siricha cachane beeuru nii coaraa cunacaauru rai, nii ecu neein coarajeeurera cachaauru. <sup>17</sup> Nii jaun jetaote, chajaain erojoein jelai caje amuha Jesusone luhecaure cachaauru.

<sup>18</sup> Nii jana, inae jelaiha bote cuhane fauha cuha Jesusone jana jetaote, aina cuhane coina rai aite nii moconajaera letono sirihane caje nerautanaa cacha.

<sup>19</sup> Nejetaote, aina cuhane jerelanaala:

“Chajaaincha chenenajaun cauhin, charaichuru rene turuhin, cairichaaajoaain ii coaraain itolere ichaa iniha Cana Coaunerane benihun acaauru rai,” nae jetao rai Jesuso.

<sup>20</sup> Nii jaun jetaote, Decapolis batane que nenacaauru nenaanajaauru cuhecujueein, itolere ichaa coreniha Jesusone biha nii cachane jaun jetao, satiin cojelatoore aonajeeurera cachaauru.

*Jairo cacunu aina leinjiin ene rautaa Jesusone  
(Mt 9.18-26; Lc 8.40-56)*

<sup>21</sup> Nii baiha jelaiha nemuri jerau cauha cuha Jesuso, bote cuhane jana jetaote, najiniha arajiin netaojiaain cohacuruha nemuri auhaniha cachaaurune jaun jetao, ecu turuhin ne nii cachaauru aina Jesuso. <sup>22</sup> Nii jana jetaote, turuha cue leinjiin sinacoca curuaanaa neein nena Jairo. <sup>23</sup> Turuhin jetaote:

“Onaa jeriha canu cacunune jaunne ii coaraa uun. Chajaaute atiin nohane turuhin nichoae ii biji meracaete nerautain ichaohine,” nae jetao Jesuso acatiha neseeonriaain nii Jairo.

<sup>24</sup> Nii jaun jetaote, aina cuha Jesusone jana, jiniichain cuuruha arajiin cachaaurune jaun jetao, jataain arajii cachaauru cataaun cuujue. <sup>25</sup> Nii arajiin cunacaauru cachaauru jana jetaote cue, leinjiin ene lechoonca coroata jaanacaain jaberoco caje ichana jaohajeein nena. <sup>26</sup> Aca jetaote, nii rai chaque nelatejeecane que airijiin jitariin niicha sirii jaohin arajii cacha coicharaauru que nocoicharatihane niha natiin nerautasilanaala jataain taaenein cuujue nii rai cunai. <sup>27</sup> Nii ene jetaote, Jesoso benaa inaoriin cuhin coaraain, leeochoauru cachaauru jana cutiin, Jesoso janori nichae marotiin cajione auha mucuuri, <sup>28</sup> “Caa cajione auha mucuurihanune niha natiine nerautareeunni,” naain esenetaane jaun. <sup>29</sup> Nii Jesoso cajione mucuhane rijieeoritiin nesuruha ichanane jana jetaote, inae nerautanaanein naonae rai jaberoco. <sup>30</sup> Nii jana caje mituha niicha ichana nainei cacha rautaane jaaque nainain jetaote, nii cachaauru coaraain:

“Chana toon cacajione mucue,” naa Jesusone jana jetaote,

<sup>31</sup> “Tana jeranu ii sururucuruha cachaaurune coaraainete. ‘Chana toon cacajione mucue,’ naain bajaai,” naaure jetao Jesoso rai nii aina nere-lanacaauru.

<sup>32</sup> Nejetaote, rai cajione mucuera coaraane coina, nii rohan nenacaauru cachaauru cajanaain coarae Jesoso. <sup>33</sup> Nii jaun jetaote, nesoone caaun rijijijianeein nacatiha neseonriaain, nii suujue lanaala esinae rauhijiriin, “Naaonjoaain ii cajione mucuhanune rijijieeoritiinne caa canu cunai caje nerautaaun” naain be nii ene. <sup>34</sup> Nii jaun jetaote:

“Ii rautana nainichaaunne esenetaaine jaunte, inae nerautaa. Raoto-joein raurohin caunihun,” nae jetao nii ene rai Jesoso. <sup>35</sup> Niritiin ereereeca nii ene rai Jesusone jana jetaote, nii ranuna inaca sinacoca curuaanaa Jairo loreri caje turuha uure cachaauru. Rene turuhin jetaote:

“Inae oha ii cacunu. Coa inacojoein nii cacha relaera rerohecaa,” naaure jetao nii cachaauru. <sup>36</sup> Nejetaote, nii acaauru aohana jerelanaala nii sinacoca curuaanaa rai jetao:

“Jiaonriha acaauru esenetaain nesooneine. Raujiaaincha rautaanune esenetaau,” nae jetao Jesoso.

<sup>37-38</sup> Nitohanein inae nii sinacoca curuaanaa loreri asae turuuhane jana tonijiaain cojioriin chanaauruha cachaaurune jana jetaote, aina cuuruha leeochoaurune jerelanaala, Fedoro, Saantiaao, chaen nii Saantiaao nejera Joaan, naaonjoainuri aina jiniiquiin enohin jetao:

<sup>39</sup> “Chanuna niritiin cojioriin chanaaiche. Coatiha ohane jaun aihei caa ranuna. Sinihane jaunte ai,” naa Jesusone jana jetaote, <sup>40</sup> Jesoso coenacure cuu nenacaauru cachaauru. Nii jana jetaote, satiin nii cuu nenacaauru cachaauru mitaain, nii ranuna inaca aina neba, chaen corihaniha cunacaauru, naaonjoainuri aina jiniiquiin nii ranuna rene enohin jetao, <sup>41</sup> biji que mucuuriin:

“Talita coom,” nae jetao nii ranuna rai Jesoso. “Icheine aitoon ranuna. Nimichuu,” naa jetaote aite Joriocuru ere cuhane.

<sup>42</sup> Nii rijieeoritiin nimichuhin ruharuhaca nii lechoonca coroata jaanacai ranunane jana jetaote, cojoelatiin coarajeeure nii cuu neein coarajeeurera cachaauru. <sup>43</sup> Nii jana jetaote, jataain chuni rai beeuruhane caohatihane baiha jetao, nii ranuna coroaateeuruhane coina aite Jesoso.

## 6

*Nasarete cuha Jesusone  
(Mt 13.53-58; Lc 4.16-30)*

<sup>1</sup> Nii baiha jetaote, aina nerelanacaauru aina jiniiquin, jelai caje cuhin rai nataneu cauha cue Jesoso. <sup>2</sup> Inae nataneu turuhin, nebetacanaa cojoanonaa bana sinacoca asae enohin cachaauru relaane nunuhetiha Jesusone jana jetaote, nii relanajaa Jesusone aonajeein jetao:

“Chuna nerelaete toritiin itolere coitucuhin que cache relae. Chaa cajena itolere coitucutiin, chabana coaraai cojoelanaacojoai ichaane coinane maajeein nerelae. <sup>3</sup> Tana caa, Mariha calaohichuru Saantiaao, Jose, Jodasi, Simoon, naaonjoainuri nejera, tabara caje itolere rucuhele icharaneen nenea carfinteroneein nerejetohane. Tana chaen rai baihuru cau cana aina ichaauruhane,” naain jetao ita caje bajaure cojoelatiin, nii ecu arajiin nenacaauru cachaauru. <sup>4</sup> Niritiin rai nere tonorana jerecurenihane jaun jetaote:

“Itolere banate niqui cuhane jaaunru, Cana Coaunera ere bera *profeta* que suujua acateein esenetaain neeure cachaauru. Nete laen rai nataneu nenacaauru naraaichuru que suujua acateein esenetana jerecurene. Niheichu nii nihane jaan loreri asaae nenacaauru niha natiin esenetaauruhi,” nae jetao acaauru rai Jesoso.

<sup>5</sup> Niritiin jetaote, ecu cojoelanaacojoai ichaelanaala, coroatajajeein ecu nenacaauru cunaitenacaauruhacha mucuhin rautanajae. <sup>6</sup> Nitohanein esenetana jerecurenihane cachaaurune jaun jetaote, acaauru cojoelate Jesoso.

*Cana Coaunera cojoanonaa beebejeeuruhane coina aina nerelanacaauru letoaa Jesusone*

*(Mt 10.5-15; Lc 9.1-6)*

Nii baiha jetaote, Nasarete rohan nenacaauru neseeu cuhecujeein, cachaauru relaa cue Jesoso. <sup>7</sup> Nitohanein jetaote, leecha neseeu cuhecujeein cache suujua cuhane nenacaauru moconajaera letonocuru coitucuhichuru sitaain cachaauru rautauruhane coina nii lechoonca coroatajaain aina nerelanacaauru cotijiaain cocoainanajaain letoanajae coroatajaanana coroatajaananaain Jesoso. <sup>8</sup> Nitohanein letoanajaain jetaote, acaauru atora, acaauru achano, coriqui, naaonjoain amaelanaala, <sup>9</sup> acaauru safatocuruhacha curujuaain, nii necoreeteuruhane coina acaauru cajione amaelanaala, acaauru biji achuneecha baejeein bero cuhane cuuruhane coina acaauru rai aite. <sup>10</sup> Niritiin letoanajaain jetaote:

“Leinjiin loreri asae turuhichene, ecu sinihuche inaraacha ichai nainaain jelai caje amuhichene reentiaain. <sup>11</sup> Chunijihun turuhichene jaaunru, caohachaain inara coana jerelanaala inara aohana jerecurenihane, jelai caje amuuche, inara safato que nenea utoone riariaain ratiriin, inae nitajeeuruhane rai neeuruhane que nainacuruhane coina,” naain jetao nii aina nerelanacaauru letoae Jesoso.

<sup>12</sup> Nitohanein cuhin jetaote, nacoaauneein Cana Coaunera coitucuhin aca jerihane rijijieein neeuruha cachaaurune coina acaauru rai aitiin, <sup>13</sup> arajii moconajaera letono sirichauru cachaaurune maajeein raautaain, arajii cunaitenacaauru rautaaure erene que rujuanajaain nii aina nerelanacaauru.

*Oha Joaan Baotisitane*

*(Mt 14.1-12; Lc 9.7-9)*

<sup>14</sup> Nitohanein itolere ichaa Jesusone beeuruha itolere sacuritaaine jaun jetaote, Erodesi netonai coitucue.

Chaen jetaotechu: “Joaan Baotisitane ichanacaihara. Nii jaunte, nii itolere cojoelanaacojoai ichana naineraneen necaihara,” naa Erodesine jana jetaote; <sup>15</sup> “Jerihanete *Profeta* Eliasinecaihara,” naaure leechaauru. Nii jana leechaauru jetaote: “Inoanlu *profetacuru* rijijieein nenea *profetate*

aicaihara,” naaure. <sup>16</sup> Nejetaote, niritocuruhane aonajihane jaun: “Acate Joaan ne. Rai nuluno moloeratihanulu natiinte, inae nacoaauneein o caje ichanacaiha,” nae jetao Erodesi.

<sup>17</sup> Erodiasi coreniha jetaote, Joaan mucuerateein *cadena* que ichojoaain caresero cuhane terate Erodesi. Nii Erodiasi jetaote, Erodesi nejera Ferifi comasaineein nelu. Nejetaote, comasaineein sirilu Erodesi nii rai nejera comasainihane saijieein. <sup>18</sup> Nii jaun jetaote:

“Jiaonriha ii comasaineein taa inejera comasai siriinera,” nae jetao Erodesi rai Joaan.

<sup>19</sup> Niritoha Erodesi rai nii Joaane caje coaauneein jetaote, nii Joaan cotaairiin sohin jaohene rijitojoein nerejete Erodiasi. <sup>20</sup> Nejetaote sohin jaonaa nainene, esinae rauhijiriin leinjiin cacha- saantoneein Cana Coaunera letononeein nihane coitucuhane jaun, coasiha cocoaerateraneein niha Erodesine jaun. Nitohanihane jaun jetaote, iriha Joaane rautatiin aonaae jaun nii aina chatohanai niicha ichanenu coitucuelanaala ne Erodesi. <sup>21</sup> Nejetaote, nejanoa bajaanaa bitoaaane coina lenone jaain, que jauriineein nenacaauru curuaanaacuru, chaen rai soondarooru curuaanaacuru, chaen Calileea cocoaichacuru jataain nelatecuri cotijiaain beseta ichaa Erodesine jana jetao, Joaan sohin jaohene rijitjoenajaaocane jana, suujua rijijieein erue Erodiasi. <sup>22</sup> Nii jana jetaote, nii beseta ichaane jaa coloheri asaae enohin raansaa cuha nii Erodiasi cacunune jana jetao, nii raansaane jana rautatiin coaraje Erodesi, nii ecu aina lenoniha nenacaauru aina jiniiquiin. Nii jana jetaote:

“Joaareen iicha jerei bajaau cacajene ichei tera. <sup>23</sup> Cana Coaunera notaracaene chaelai, iicha jerei bajaai cacajene tereunicha. Nainichaaun cataaun leruhin caa quiicha beraai atane tihanunera,” nae jetao araai saain nii ranuna rai Erodesi. <sup>24</sup> Nii jaun jetaote, jelai caje mituhin:

“Cha bajareeun cajete oma,” naa cuha neba raine jana jetaote:

“Chajaain ena caje Joaan Baotisita couturi bajaau,” nae jetao nii ranuna neba.

<sup>25</sup> Nii jaun jetaote, jelaiha soroneein enohin jetao,

“Ena carai leinjiin plato cuhane Joaan Baotisita couturi teeinene jereeun,” naa jetao cue nii ranuna Erodesi rai.

<sup>26</sup> Nii jaun jetaote, jataain inaderae Erodesi. Nejetaote, satiin niicha cotihacuri urichoo Cana Coaunera notaracae aitohane jaun, nii caje niicha bajai tenaa nainenihane que aitona nainene. <sup>27</sup> Nitohanihane jaun jetaote, nii rijieeoritiin leinjiin soondaro letoae Erodesi, Joaan couturi molohin raa cuhane coina. <sup>28</sup> Nii jaun jetaote, caresero cuhane cuhin Joaan couturi molohin leinjiin plato cuhane uhaain, nii ranuna rai tiha soondarone jaun jetao, neba rai te nii ranuna.

<sup>29</sup> Nii jana jetaote, inae nitohaneein Joaan teeuruhane coitucuhin jetao, nii Joaan jaberoco raain conautiha cuure sacuureraauru.

*Saoqui oaraancai cachaauru rai lenone faa Jesusone*  
(Mt 14.13-21; Lc 9.10-17; Jn 6.1-14)

<sup>30</sup> Nitohaneein letoanajaa Jesusone caje turuhin jetaote, aina netaojiaain itolere ichaain Cana Coaunera ere que cachaauru relaain, naaonjoaauruhane beere Jesuso rai, nii lechoonca coroatajaain niicha cocoainaauri afosotoorune jana jetaote:

<sup>31</sup> “Chajaau chete neniha cachane jaun cuhin, jelai raotojoein nebeta-canichaachera,” nae jetao acaauru rai Jesuso, cauhajeeuruhane niha natiin arajiin turuhajeeuruha cachaaurune jaun, lenonecuruhane teurenihane

acaauru raine jaun. <sup>32</sup> Nii jaun jetaote, leinjiin bote cuhane fauhin neniha cachane jaun, jelai Jesoso aina cuure nii niicha cocoinaauri afosotooru. <sup>33</sup> Nejetaote, arajii cacha cuuruhane coarajihane jaun, nii cuuruhane jaan jelai coitucuhin, satiin neseeuuru caje arajiin cuhin jetao, acaauru ajiniha soroneein jeluhariin cuhin turuure. <sup>34</sup> Nitohaneein cuhin acaauru ajiniha turuuhane jaun jetaote, ecu turuhin bote caje iniha cunajaun jetao, arajiin ecu cachaauru coaraa Jesusone jana, beraicha colane nenea carenerocuru rijijieein aihuruhane jaun jetao, cairichaaajoaain acaauru coaraane jaun, ecu araai laurii niicha coitucui que relanajae Jesoso. <sup>35</sup> Nii jana inae sohane jaun jetaote, rohan nichuuntaain:

“Inae soha. Coatiha nihei caa jana cacha. <sup>36</sup> Chajaain cachaauru rai nocoeute ichuun nenacaauru nenaanajaauro, neseeuuru, naaonjoainuri cuhin, chaelai lenone ariin coretiha cuuruhine,” naauruha aina nere-lanacaaurune jana jetaote:

<sup>37</sup> “Niriimiin. Chajaain acaauru coroaateeuchoe inara,” naa Jesusone jana jetaote,

“Aihana jaunna, coroata fashai denario coreneein faan coretiha cuhacaanune jeree, acaauru coroaatichaachene coina,” naaure Jesoso rai aina nere-lanacaauru. Nii le denariote le jiiichoo amihanenaa core ne. Niritocuruha aina nerelanacaaurune jaun jetaote:

<sup>38</sup> “Inatajaain faan siriquiche. Chajaain coanihuchoe,” naa Jesusone jaun, coaraain jetaote, “Saoquijieein faan, ita que jerajejeein ate, naajeeichate neeje,” naaure jetao aina nerelanacaauru.

<sup>39</sup> Nii jaun jetaote, joaenreen omene ichoae nelauriaauruha cachaaurune coina aitoha Jesusone jaun jetao, <sup>40</sup> tabaauru le fashaain, tabaauru saoqui chooncaain, naaonjoaain neleruhin nelauriaaure cachaauru. <sup>41</sup> Nitohaneein laurianaacane baiha jetaote, nii saoquii faan aina coroatajai ate raaoriin jabaaequiin dede coarajeein jetao, Cana Coanera bajaain cataaun faan taturiin aina nerelanacaauru rai te jetao Jesoso, cachaauru rai chaluuruhane coina. <sup>42</sup> Nitohaneein jetaote, jerecuruhane jaaun tiajoaain nainaain lenonecuruhane baiha, <sup>43</sup> lechoonca coroata omariin, nii faan aina ate caute que omari memoaure.

<sup>44</sup> Saoqui oaraancai cachaauru jetaote, nii saoquii faan que lenonecure, acaauru rai faa Jesusone jaun.

*Acau choaee amuha Jesusone*  
(Mt 14.22-27; Jn 6.16-21)

<sup>45</sup> Nii baiha jetaote, aina nerelanacaauru letoae, bote cuhane fauhin nemuri jerau Betesaaidau ichoachaniha turuuhane coina. Nii tonohanau jetaote, ecu nedaaain cachaauru rai necoe Jesoso. <sup>46</sup> Inae cachaauru rai nocoihane baiha jetaote, ichatane ucuuno que cuhin Cana Coanera bajaa cue. <sup>47</sup> Nii jana jetaote, inae nocohejihane jana, nemuri cataaun cuujeeure nii aina nerelanacaauru bote cuhane. Nii jana jetaote, ecu jelai atane choae jaiti nihane jana, <sup>48</sup> acaauru que tacaain uha cujuanane jaun, necairichajeein taraacajeein cuujeeuruhane coaraje Jesoso. Nii jana inae janohe lalajihane jana jetaote, acaauru caajie acau choae cuhin acaauru rohan situha cunaa rijijieein acaauru nichae cuujue. <sup>49-50</sup> Nitohaneein acau choae cuujihane jana, satiin coaracuruhane jaun jetaote, nesoonetiin anucainiha been auhaaocure. Nii rijieeoritiin jetaote, acaauru rai:

“Jiaonriha inacojoein nesoonetiin casiichene. Canune aihunra,” naain, <sup>51</sup> acaauru aina bote cuhane fauha Jesusone jana jetaote, inae nesuruha cujuanane jaun, jataain cojoelatoore, <sup>52</sup> nii cojoelanaacojoaain faan faain

acaauru notaacane sainejeein itolere ichana nainihane que ninaelanaala, “Naaonjoanne jaunte catohanai ichae,” naain coitucunaa nainecurenihane jaun.

*Genesareta bataneu turuhin cunaitenacaauru rautaa Jesusone*

*(Mt 14.34-36)*

<sup>53</sup> Nitohaneein cuhin nemuri jera jaaoruhane jaun jetaote, Genesareta bataneu turuhin, ecu acaauru bote jauriaain cositeeure. <sup>54</sup> Inae bote cositeein caje inihuruhane rijieeoritiin jetaote, Jesoso nihane coitucure nii cocoaichacuru cachaauru. <sup>55</sup> Nii jaun jetaote, satiin nii jelai batane sacuritaain nii niha Jesusone jaan jelai coitucuhin jetao, rene cunaitenacaauru amaare ela cuhane tijichanajaain. <sup>56</sup> Chunijihun nenaanajaauru, ne-seeuru, berooru cuhane, naaonjoainu cuha Jesusone jaaunru jetaote, najiniha situnajaauru jelon ela choae cunaitenacaauru teein, Jesoso rai aito-cure, cajione auha mucuuruhane coina. Nitohaneein satiin Jesoso cajione mucuurera cunaitenacaauru jetaote, nerautaacoaure.

## 7

*Baasoneein cacha ichao tera*

*(Mt 15.1-20)*

<sup>1</sup> Nitohaneein jetaote, Jesoso coaraa cuure Jerosaleeun caje turunacaauru Moisesa aitoonjoan que cacha relaaureraauru aina fariseeocuru. <sup>2</sup> Acaauru jetaote, aihuruhalu acaauru inoaensihurune rijijieein acaauru rai rauhi tonraelanaala lenonecuruhane ajiniha biji culejelanaala lenonecuruha Jesoso aina nerelanacaauru tabaaurune coaraain jetao, acaauru que ereeure. <sup>3</sup> Nitohaneein aihuruhalu acaauru inoaensihurune rijijieein ichaaoruha fariseeocuru aina satiin Jorioocurune jaun jetaote, lenonecuruhane ajiniha biji culejeein lenonecure itolere bana. <sup>4</sup> Jerichanejeein jetaote, lenone arihuruhane caje turuuruhane nii aitoha acaauru rai rauhine rijijieein biji culejeein lenonecure. Nitohaneein jetaote, araai lauriin ne acaauru ichao, lenonecuruhane ajiniha acau cooruhane jaan curu niha natiin culejeein, acau curu culejeein, coadarojoe culejeein, acaauru sininaja jelai niha natiin culejeein, naaonjoaauruhane jaun.

<sup>5</sup> Nitohaneeuruhane jaun jetaote:

“Chanuna nii aitoha rauhine rijijieein aihuruhalu cana inoaensihurune rijijieein, lenonecuruhane ajiniha biji culejeein lenonecurene ii aina nere-lanacaauru,” naaure jetao Jesoso rai Moisesa aitoonjoan que cacha relaaurera aina fariseeocuru.

<sup>6</sup> Nii jaun jetaote acaauru rai:

“Esinae rauhijiriinte, inara que aitiin laenaelu Cana Coaunera ere bera inoaensi *profeta* Isaihasi, nechu jataain nohaniha Cana Coaunera coitucutoha nocoenacaauru.

Nii que aitiin:

‘Caa cachaaaurute,  
nechu jataain nujuaaecha que  
canu corojeein neeure.

Nete acaauru suujua,  
cacaje coriaae ne.

<sup>7</sup> Nii jaun  
nii chaque nelatejeehai  
netaojiaain  
canu coroaecuruhane,  
nechu jataain



caitoonjoanelanaala nenea que  
nejesinajeein ita relajeein  
aihuruhane jaun,'

naa Cana Coaunera acaauru quene laenaelu *profeta* Isaihasi.

<sup>8</sup> Chanuna nitohaneein Cana Coaunera aitoonjoan que jaolecohin inara inoaensihuru rijijieein ichaonaa jeriquiche inara," naa acaauru raine baiha jetaote:

<sup>9</sup> "Itolere bana inara inoaensihuru ichao rijijieein ichaonaa jeriquichene jaunte, Cana Coaunera aitoonjoan que jaolecohin aohana jereneeiche.

<sup>10</sup> 'Inara inaca, inara neba,  
naaonjoainuri que  
inara suujua acateein neeuche.

Chateeinti

baasoneein neba, inaca,  
naaonjoain que ereein ne.

Niite ateinanohiniha cureein,'

naelu jetao Moisesa. <sup>11</sup> Nete inara aitocoiche, leinjiin cacha, rai inaca, neba, naaonjoain rai. 'Coatiha inara rai cha tenaa nainihaaun, satiin quiicha sirii corban neein nihane jaun,' naane caohachae inara rai. ('Corban,' naane jetaote, acaauru ere cuhane, 'Cana Coaunera que banijiaain nenea,' naa aite.) <sup>12</sup> Chaen techu, inara rai caohachae, inae niritiin erei cacha, rai inaca, neba, naaonjoain rai chaelai tenaa nainenihane que aitocoichene.

<sup>13</sup> Nitohaneein inara inoaensihuru ichao sacuhin neeichene jaunte, Cana Coaunera aitoonjoan tonorana jerelanaala itajeein neeiche, nejesinajeein jelaacha que ita relaain neeichene jaun," nae jetao Moisesa aitoonjoan que cacha relaurera aina fariseeocuru rai Jesoso.

<sup>14</sup> Niritiin jetaote, nacoaauneein nii ecu nenacaauru cachaauru cotijiaain jetao:

"Satiin caa ena inara rai aitocooaunne jaan aonaain coitucuche.

<sup>15</sup> Coatiha joaereen lenone quiha cachane coreniha que jaolequiin nihei Cana Coaunera. Leeochaauru cairichanaa jerenacaun, suujua cuhane baasoneein coacuhin baaso ichaeraauru quete laen jaolequiin ne Cana Coaunera. <sup>16</sup> Esinae rauhijiriin urichocoichene aonacuche," nae jetao acaauru rai Jesoso.

<sup>17</sup> Niritohane baiha ecu cachaauru ratiriin loreri asae enoha cuha Jesusone jana jetaote, nii cachaauru relaane jaan bajaure caje aina nerelanacaauru.

<sup>18</sup> Nii jana jetaote:

"Tana inara netonai aonaain coitucuhichene. Tana joaereen lenone quiha cachane coreniha que jaolequiin neniha Cana Coaunerane coitucuhichene.

<sup>19</sup> Nii cachaacha quii lenonete, nii cacha suriicha cuhane enohin, nii baiha mitue, suujua cuhane enoelanaala," nae jetao.

Niritiinte, joenreein lenone quiha cachane niha natiin, que jaoleconaa nainenihana Cana Coaunerane coitucuerate cana que Jesoso. <sup>20</sup> "Cacha suujua caje mitunaa baaso niicha coacui, niicha ichai, naaonjoain corenihate laen, cacha que jaolequiin ne Cana Coaunera. <sup>21</sup> Nitohaneein suujua cuhane baasoneein coacuin baaso ichaeraaurute, namute quicha aina niha natiin ichao jeracohin, asijiauharitiin, sonajaain jaohin, <sup>22</sup> sinijeranelanaala nenea ene aina ichaohin, laurijira rucuhale jereein, namute cacha cairichanaa jerenacaun que ereein, namute cacha coritaain, itolere niicha jerei nejesina ichaain, necoelajauharitiin, namute cacha cairichaa casajenetiin, namute cacha que necohasitaain, suujua coaraain chaachaelanaala, naaonjoaunre.

<sup>23</sup> Niichurute satiin cacha suujua caje mituhin cacha que jaolequii niha Cana Coaunerane jaan teraneein ne,” nae jetao acaauru rai Jesoso.

*Leinjiin Jorio nihei cacunu rautaa Jesusone*  
(Mt 15.21-28)

<sup>24</sup> Inae cachaauru relaane nainaain jetaote, jelai caje coauneein Tiro bataneu turuha cue Jesoso. Nejetaote, ecu turuhin leinjiin loreri asae enoe, coitucuuruha jelai cocoaichacurune jerelanaala. Nii sainejeein jetaote, ecu turuhin nihane coitucuurihure. <sup>25</sup> Nii jaun jetaote, inae ecu nihane coitucuhane jaun, rene turuhin Jesoso acatiha neseeonriaa cue leinjiin ene, suujua cuhane moconajaera letono coitucuchuhi siriha rai cacunune jaun. <sup>26</sup> Nii ene jetaote, Jorio niheichuru Sirofenicia batane cocoaichacuru bene ne. Aca jetaote, Jesoso rene turuhin conujue cacunu suujua cuhane nena moconajaera letono coitucuchuhi sitaane coina. <sup>27</sup> Nii jaun jetaote:

“Coa canu rerohecaa. Naininaaun Cana Coaunera cachaneein nenacaauru que banijiaain nena ruluhin tihanu remaae raine,” naa rai Jesusone jana jetao:

<sup>28</sup> “Aihachuhisi niquicha Curuaanaa. Atiin ii araichuru Joriocuru rautaaaine rijijieein canu cacunu rautaaainene jereeunra. Remaae rijijieein canacaanu coaraaine niha natiincha,” naa Jesoso rai nii enene jana jetaote:

<sup>29</sup> “Aihachuisi. Esinae rauhijiriinte aitohi. Inae ii cacunu caje mituhin amuha moconajaera letono coitucuchuhi. Inae nainein jelaiha chenena-jaun cauha cuhinera,” naa Jesusone jaun, <sup>30</sup> nenajaun cauha cuhane jana jetaote, loreri asaa sininajaun niha nii cacunu ranunane jana eruha cue nii ene. Nejetaote, inae nii ranuna suujua caje mituhin amue moconajaera letono coitucuchuhi.

*Urichoelanaala, raotiin eresilanaala naajoaain nena cacha rautaa Jesusone*

<sup>31</sup> Nii baiha jetaote, nacoaaunein Tiro batane jelai caje amuhin, Sidoon batane, Decapolis batane, naaonjoainuri nenacaauru neseuru ichoae rauhijiriin situhin nitihonohin cuhin jetao, Calileea conemuri turue Jesoso. <sup>32</sup> Nitohaneein inae ecu turuhane jana jetaote, rene leinjiin urichoelanaala, raotiin eresilanaala, naaonjoaain nena turuaain jetao, biji que dadaain nii cacha rautaaane coina rai aitocure. <sup>33</sup> Nii jaun jetaote, jelai cachaauru udaa nii cacha amaain jetao, nuricho jachuuru cuhane biji couturichuru enoaain, lune soriin lele ichoae tein, <sup>34</sup> ecuun jabatoroaain dede coaraain neraain jetao: “Efata,” naane jetao: “Najachuu,” naa aite Joriocuru ere cuhane.

<sup>35</sup> Niritohane rijieeoritiin, inae najachuha nurichone jana jetaote, inae raotojoein erenaa naine rai lele netonai. <sup>36</sup> Nitohaneein rautaaain jetaote niqui, nii chuni rai beeuruhane caohate Jesoso. Nejetaote, jataain beeuruhane caohatiha sainejeein jataain que naurutaain beure. <sup>37</sup> Nii caje coitucuhin jetaote: “Itolere banate caohacha ichae, uricho saecuru niha natiin urichohin, raotiin eresilanaala niha natiin erenaa nainein, naaonjoanne jaun,” naaure jetao cojoelatiin cachaauru.

## 8

*Jena oaraancai cachaauru rai lenone faa Jesusone*  
(Mt 15.32-39)

<sup>1</sup> Nii baiha nacoaaunein netaojiaauruha arajiin cachaaurune jaun jetaote, jataain neniha acaauru lenonena jaun aina nerelanacaauru cotijiaain jetao:

<sup>2</sup> “Inae nichata janohinte canu aina neeure caa cachaauru. Jana nihei caohachanainejeein lenonecuruhane jaanu. Nii jaaunne jataain cairichaa-joaain acauru coaraaun. <sup>3</sup> Coroaatenajaelanaala acauru nenajaun letoanajaanunete mijitenacaaun aterona nainecure, tabaauru coriae caje uuruhane jaun,” naa Jesusone jana jetaote:

<sup>4</sup> “Chaa caje eruhin najian caa jeeoni cacha coroaaterichaache, caa jana ichaoha chuni cacha, caje coretichaachene jaanune coaalanaala,” naauruha aina nerelanacaaurune jana jetaote: <sup>5</sup> “Inatajaain najian faan siriquiche,” naain acauru caje bajaa Jesusone jana jetaote:

“Caaunsinejeeinchate neeje faan,” naaure jetao aina nerelanacaauru.

<sup>6</sup> Nii jaun jetaote, atane choae nelauriaauruha cachaaurune coina aitiin jetao, jerane biji que nii caaunsini faan mucuhin Cana Coaunera bajaain, cataaun nii faancuru tatuhin aina nerelanacaauru rai tiha Jesusone jaun jetaote, jitariin nii cachaauru rai chaluure. <sup>7</sup> Nii jana niha coroatajajeein ate netonaine jaun jetaote, acaentonai mucuhin Cana Coaunera bajaain nii ate nemaajeein chaluherate Jesuso. <sup>8</sup> Nitohaneein nainaan lenonecuruhane baiha jetaote, caute que caaunsineein omari memooaunre. <sup>9</sup> Itolereneein jena oaraancai cachaauru jetaote, lenonecure. Nii baiha jetaote, acauru rai necoein, <sup>10</sup> aina nerelanacaauru aina bote cuhane fauhin jetao, Dalmanotau bataneu cue Jesuso.

*Cojoelanaacojoai ichaa Jesusone coina aitocuruha fariseeocurune  
(Mt 16.1-4; Lc 12.54-56)*

<sup>11</sup> Nitohaneein jetaote, Jesuso rene turuhin aina ereeuruhane baiha jetao, nechuhata jataain coujuha, Cana Coaunera letononeein unaa nihane coaratihata acauru quene coina cojoelanaacojoai ichaane coina rai aitocure fariseeocuru. <sup>12</sup> Nii jaun jetaote, jataain mijiaaineein nerai raain jetao:

“Chanuna acauru rai cojoelanaacojoai ichacaaunne coina aitocure caa cachaauru. Coatiha nii acauru que chatohanai cojoelanaacojoai coarate-naa nainihaaun,” naane jaun jetao, <sup>13</sup> ecu acauru ratiriin jeelaiha bote cuhane fauhin nemuri jerau cue Jesuso.

*Faan jorerera lebadora rijiicha fariseeocuru ichaone  
(Mt 16.5-12)*

<sup>14</sup> Nitohaneein jelai caje bote cuhane fauhin amuuruhane jaun jetaote, rai nachano baiteein leinjiin faancha amaain cuure. <sup>15</sup> Nii jana jetaote, acauru nainalaaca jetao:

“Aonacuche. Faan jorerera lebadora rijiicha fariseeocuru aina Erodesi ichaone que caohachaaain nainacuche,” nae jetao aina nerelanacaauru rai Jesuso.

<sup>16</sup> Niritoha acauru rai Jesusone jana jetaote, neniha acauru rai faanne que nejesinajeein ita rai ereeuruha aina nerelanacaaurune aonajeein jetao:

<sup>17</sup> “Chanuna faan sirineeichene que ereereequiche. Jataain nachura nainanachara nejeein coitucuneeichete. Jataainte asoneeojoaain nainanachara nejeeiche. <sup>18</sup> Niha niqui inacojoein inara nota, inara uricho, naaonjoaain. Nete nii cha coaraain, cha aonaain coitucunaa naineneeiche. <sup>19</sup> Saoqui oaraancai cachaauru rai saouqui faan chaluhanune bana, inata omariin caute raaichelu,” naa Jesusone jana jetaote:

“Lechoonca coroata omariin,” naauruha aina nerelanacaaurune jana jetao:

<sup>20</sup> “Chajana jena oaraancai cachaauru rai caaunsini faan chaluhanune bana, inata omariin caute raaichelu,” naa Jesusone jana jetaote:

“Caaunsi omariineein,” naauruha aina nerelanacaaurune jaun jetao:

21 “Nii saijieein nachura jaiti nainaeneeichete,” nae jetao acaauru rai Jesoso.

*Betesaaidau leinjiin maosa rautaa Jesusone*

22 Nitohaneein cuhin Betesaaida turuuruhane jana jetaote, Jesoso rene leinjiin maosa amain rautaane coina conujeeunre cachaauru. 23 Nii jaun jetaote, biji que nii maosa mucuuriin jelai cachaauru udaa amain jetao, lune que jerane nii maosa nota rujuarujuariin nichoae biji tein: “Inae chaelai coana naineei,” naa Jesusone jana 24 nenotaain jetaote:

“Nuna tocohaneente murimurihonanae carai cachaauru,” naa nii maosane jaun jetaote, 25 nacoaauneein jerane nota ichoae biji tiha Jesusone jana, nacoauneein nota jirichaane jana jetao, inae conoha notane jaun, caohachaaain cha coarae nii maosa. 26 Nitohaneein rautaaain jetaote, rai nenajaun letoaaain jetao:

“Coa taa neseu cauha,” nae rai Jesoso.

*Mesihasi niha Jesusone que aitoha Fedorone*

*(Mt 16.13-20; Lc 9.18-21)*

27 Nii baiha jetaote, Filipino batane que nenea Sesareea nenacaauru ne-seeuru cue jetao, aina nerelanacaauru aina jiniiquiin Jesoso. Nitohaneein bero cuhane aina nerelanacaauru aina cuujeeurunajau jetaote:

“Tonacuruha canu que cachaauru. Cha nichaaunje,” naa Jesusone jaun jetaote:

28 “Tabaauru cachaaurute Joaan Baotisita niha ii beeure. Jana leeochoaurute, inoaenlu nenea Cana Coaunera ere bera *profeta* inoaensi Eliasi niha ii beeure. Leeochoaurute, inoaenlu nenacaauru *profetacuru* tabaauru niha ii beeure,” naauruha raine jaun jetaote:

29 “Cha nichaaun jana inara rai,” naa acaauru rai Jesusone jaun jetaote:

“Iite nii canacaanuhacha cohajei Mesihaseinein,” nae jetao rai Fedoro.

30 Nejetaote, chuni rai acaneein nihane beeuruhane caohate jetao Jesoso.

*Orichaaine biha Jesusone*

*(Mt 16.21-28; Lc 9.22-27)*

31 Nii caje nunuhetein jetaote: “Canu Cana Coaunera Calaohi cachaneein nejanoanaa nichaaunne cairichaaeriinte caque jaolecohin niha cuurureein Jorioocuru bichauhenaauru aina saseredotecuru curuaanaacuru, chaen Cana Coaunera aitoonjoan que cache relaaureeraauru, naaonjoainuri. Acaaurute catinaa cuurureein, nena nichata janone cuhane ichanareeunni,” naain jetao, 32 esinae rauhijiriin cachaauru rai bee Jesoso. Niritiin esinae rauhijiriin suujuelanaala aitohane jaun jetaote jelai amain niritiin irihane caohate Fedoro. 33 Nejetaote niritoha Fedorone jaun, jaotoroain nii aina nerelanacaauru coaraain jetao cotaicha rijitiin: “Coa carerojoecaa moconajaera. Cacaje amuun. Coatihana Coauneraacha coacui coitucuheeii. Joaareein cachaauruhacha coacuhite coaauqui,” 34 naane baiha jetaote, nii aina nerelanacaauru aina ecu nenacaauru cachaauru cotijiaain jetao:

“Aonacuche. Chunocoha canu cachaneein nenea jerihane suujua letono ichana jerihane jianeein, coroso que canu tein canu cairichaaururichaaine rijijieein necairichanaa abaantaain caitoonjoa tonoraain, jerichaaunne rijijieein neeine. 35 Chunocoha canuhacha icharatei ichaelanaala neein nichao ichoteratena jerera, coatihana nichoterinaain. Nete laen canu coreniha, canuhacha beratei bihane coreniha, naajoain coreniha nichao itajera, ichoteratenojoiniha cureein. 36 Chaaquena rai nelatere, itolere caa chauratane que nenaacha que coacuhin rai nichao itajihana cachane.

<sup>37</sup> Nitohanihane jaun inaaonjoaain coretihane niha natiin nii nichao ichoteratena nainihe cache. <sup>38</sup> Nitohanihane jaun, chunocoha canu nichaaunne been quiicha beratenojoin biha caa necha aansaineein osaaonacaauru cachaauru raine que nocoejihanena, canu- cache calaohi nichaaunne inae que tihane bana canu Inaca necaohacha que necohachaain rai letonocuru anjeraauru aina nacoaauneein turuha uhanune banane canuhetonai que necoejereeunni,” nae jetao acaauru rai Jesoso.

## 9

<sup>1</sup> Niritiin jetaote:

“Esinaae rauhijiriin coatiha oorurinaain cau ena canu aina nenacaauru tabaauru, niicha ichaneni ichaain turuha Cana Coanera Cojoanonaane coaracuruhane que tiaain,” nae jetao acaauru rai Jesoso.

### *Nejelauneein ocooca Jesoso jaberocone (Mt 17.1-13; Lc 9.28-36)*

<sup>2</sup> Saota janone baiha jetaote, ichatane ucuuno cue Jesoso, Fedoro, Saantiaao, Joaan, naaonjoainuriicha amaaain. Inae ecu turuuruhane jana jetaote, acaauru notaracae nejelauneein ocooca Jesoso jaberocone jana jetao, <sup>3</sup> jataain caohatiin bichoronohin cajione amurijiriin somajaain jiquihaquuin nedae rai cajione. <sup>4</sup> Nii jana jetaote, ecu Jesoso aina ecocohin ereeuruha inoaelu nenacaauru Cana Coanera ere bera inoensihuru, Irihasi, Moisesa, naaonjoainurine jana coarajeeure.

<sup>5</sup> Nii jaun jetaote,

“Cacha relaera, jataante caohate cau nihacachene. Coanete nichatajaain loanari jaacache, leinjiin ii rai, leinjiin Moisesa rai, leinjiin Irihasi rai, naaonjoaain,” nae jetao Jesoso rai Fedoro.

<sup>6</sup> Jataain nesoonetooruha nii Jesoso aina cunacaauru, aina nerelanacaaurune jaun jetaote, nii tonaain irihane jaa coitucuenihane jaaun aite Fedoro. <sup>7</sup> Niritohane jana acaauru conaacotaa dede sacarine jaun jetaote, nii dede sacari jana tonii: “Caate jataain quiicha belaa canuhacha letoai canu Calahinera, nere tonoraain neeuchera,” naa erenaane jana jetao aonajeeure. <sup>8</sup> Nii rijieeoritiin roaichu coaracuruhane jana jetaote, inae acaauru rohan neniha chunine jana jetao, ecu jelai acaauru aina niha Jesusone jana coaracure.

<sup>9</sup> Nitohanein jetaote, nii ichatane ucuuno caje jelaiha faaujueein, nii niicha coaracuri beeruha chuni rai nii aina nerelanacaaurune caohate Cana Coanera Calaochi Jesoso, inae o caje ichanaane baiha beeuruhane coina. <sup>10</sup> Nii jaun jetaote, suujuaacha cuhane nii niicha coaracuri ruhecure, oo caje ichanarihanine que aitohane coitucuurenihane jaun ita caje bajaeba-jajeein. <sup>11</sup> Nii jaun jetaote:

“Chanuna jauriaanejeein Irihasi tururichaaaine que aitocure- Moisesa aitoonjoan que cache relaaaureraauru,” naain Jesoso caje bajaauruhane jana jetaote:

<sup>12</sup> “Esinae rauhijiriinte niqui, itolere rucueraanu que jauriaanejeein tururichaaain Irihasine que aitocurelu. Chanuna jana Cana Coanera Quiricha inoensi cuhane cache Calahineein nena cairichanojooinein, jaolenein niha curichaaaine que aite. <sup>13</sup> Aonacuche. Inae turuha uhalu Irihasine janate, que niicha jerei ichaain cairichaaurelu, nitohanihane coina Cana Coanera Quiricha cuhane aitiin laenanohinihane rijijieein,” naain jetao tonoraie Jesoso.

*Moconajaera letono coitucuchuhi siricha leinjiin enamanaa rautaa Jesusone*

(Mt 17.14-21; Lc 9.37-43)

<sup>14</sup>Inae jelaiha nii neeuruha aina nerelanacaauru leeochoaurune jaun tuuruhanane jana jetaote, ecu acaauru aina neeure arajiin cachaauru. Chaen Moisesa aitoonjoan que cacha relaaurera tabaauru netonai ecu neein jetao acaauru aina ereereecure. <sup>15</sup>Nii jana uujiha Jesusone coariin jetaote, que tacaain satiin jeluhariin cuhin jetao, jataain cojoelatiin rai iriha cuure. <sup>16</sup>Nii jana jetaote, acaauru rai:

“Tonaai acaauru aina ereereequiche,” naain acaauru caje bajaa Jesusone jana jetaote:

<sup>17</sup>“Cacha relaera, coaraaine coinane, cau ii rene canu calaohi uhaaun, moconajaera letono coitucuchuhi sirihane suujua cuhanena jaun, erenaachara neein nihane jaun. <sup>18</sup>Nitohanihane jaunte, chunijihun cuhane jaunru baasoneein mucuhane naineein atane choaae tocojoaain tacaain, nujuae caje lajaaqui mitaain, catu rihoneein, sefetaain te nii suujua cuhane nena coitucuchuhi. Nii jaunne niqui ii aina nerelanacaauru rai aitoon nii suujua cuhane nena coitucuchuhi sitaauruhane coina. Nete sitanaa nainesihurene,” naa nii acaauru jana nena leinjiine jaun jetaote:

<sup>19</sup>“Jataain cha esenetaaichuru cachaauru. Cha carajaneeinna inara aina nereeeun. Cha carajaneaina inara abaantareeun. Chajaain cajiha nii enamanaa uhaauche,” naa acaauru rai Jesusone jaun jetaote, <sup>20</sup>Jesoso rene nii enamanaa amaare. Nii jana Jesoso coariin jetaote, atane choae nii enamanaa siheite nii suujua cuhane nena moconajaera letono coitucuchuhi. Nii jana jetaote, najaabu jabubuhin nujuae caje lajaaqui mitujuae nii enamanaa. <sup>21</sup>Nii jana jetaote, nii enamanaa inaca rai jetao:

“Chabana caje coauneein caa catohane,” naa Jesusone jana jetaote:

“Causine caje coauneeeinte aicha. <sup>22</sup>Nii jaunte araai saain usihanaauru comaaichuru, acauhanaauru comaain ateinana jere nii suujua cuhane nena coitucuchuhi. Nitohanihane jaun, atiin cairichaojoaain canacaanu coaraain, canacaanu coroatajaneun, rautana naineeine,” naa nii enamanaa inacane jaun jetaote:

<sup>23</sup>“Tana rautana nainichaaunne esenetaainete cacaje bajaai. Satiin que-senetaera raine niicha bajai ichaain neeun,” naa Jesusone jaun jetaote:

<sup>24</sup>“Jataainnachujian chesenetaaun. Cacorataaneune jataain jelai amuri-toheriin chesenetaera,” nae jetao ehequiin nii enamanaa inaca.

<sup>25</sup>Nii jana arajiin netaojiaauruha cachaaurune coaraane jaun jetaote, nii enamanaa suujua cuhane nena moconajaera letono coitucuchuhi rai jetao:

“Erenaachara neein urichoelanaala caa enamanaa tera coitucuchuhi, canune ichei aitoon caa enamanaa jianeein caje mituhin amuhine coina. Jiaonriha nacoauneein caa enamanaa suujua cuhane enohine,” naain suruaa Jesusone jana jetaote,

<sup>26</sup>nacoauneein baasoneein nii enamanaa jaberoco teein cojioriae nii suujua cuhane nena coitucuchuhi. Nitohanein tihane baiha onaa rijijieein teein, caje mituhin amuhane jaun jetaote, “Inae baasoneein jaberoco tihane caunte jerihane inae ohe,” naaure nii ecu arajiin neein coarajeeurera cachaauru. <sup>27</sup>Nejetaote, biji que mucuhin michuha Jesusone jana jetao, nimichuhin nichaaurae nii enamanaa.

<sup>28</sup>Nitohanihane baiha aina nerelanacaauru aina jiniiquiin leinjiin loreri asaane enoha Jesusone jaun jetaote, jelai ecu teteriin:

“Chanuna canacaanu nii coitucuchuhi sitanaa nainesinihacaanu,” naain caje bajaauruhane jana jetaote:

<sup>29</sup> “Catohanai moconajaera letonote nainichaa Cana Coaunera bajaacane ainaacha sitaacane,” nae jetao acaauru rai Jesoso.

*Caa quete coroata sae ohane biha Jesoso.*

*(Mt 17.22-23; Lc 9.43-45)*

<sup>30</sup> Nitohaneein nii canaanai rautaane jaan jelai caje amuhin jetaote, Calileea turuhin rauhijiriin situujueein cuujeeure. Nejetaote, nii acaniane coitucuha chunine jerene Jesoso, <sup>31</sup> aina nerelanacaauru relanaa nainihane coina. Nii acaauru relaane jaaun jetaote:

“Cacha Calaohineein nenaate cachaauru bijiu tenojoinihane jana ateinaa cuurureein. Nete nichata janohane baiha ichanareein,” naain aina nerelanacaauru relaane jana jetaote, <sup>32</sup> nii acaauru rai aitohane inaaureniha natiin jetao caje bajaarene necoatocuruhane jaun.

*Charijina jataain nelateineein nere*

*(Mt 18.1-5; Lc 9.46-48)*

<sup>33</sup> Nitohaneein cuhin, inae Caferenaanon turuhin loreri asaae enooruhane jana jetaote, aina nerelanacaauru rai jetao:

“Chaaque ita rai ereerejeein uhicheein bero cuhane,” nae jetao acaauru rai Jesoso.

<sup>34</sup> Nejetaote inauheneecha curuaaequiin aonajeeure, bero cuhane uu-jueein, “Charijina caa cana jana jataain nelateein nenaane,” naauruha ita raine jaun. <sup>35</sup> Nitohaneein inauheneecha aonajeeuruhane jaun jetaote, nelauriariin nii aina nerelanacaauru lechoonca coroatajai cotijiaain jetao: “Leeochaauru amurijiriin nena jeriha chunine, acaauru rai nelateein itolereenein acaauruhacha jerei icharaneein neeine,” <sup>36</sup> naane baiha jetaote, biju que leinjiin canaanai mucuuriin acaauru cataaun teein jetao:

<sup>37</sup> “Canu coreniha caa canaanai raerate, jerichanejeein canu raane rijijeein aicheein. Nii jaun canu raera coatihane canuhacha raa airinaain, caletoera Ofa netonai raate aicheein,” nae jetao aina nerelanacaauru rai Jesoso.

*Canaacha ichai ichara, coatihane cana que nejeratena nihei.*

*(Lc 9.49-50; Mt 10.42)*

<sup>38</sup> Nii jana jetaote:

“Cacha relaera, ii curuaa aina cuaain moconajaera letono coitucuchuhi sitaain que suujuequiin nenacaauru rautaa leinjiinne janane eruhin caohatihacaanu, cana jana nenaaneein ainihane jaun,” naa Joanne jana jetaote: <sup>39</sup> “Jiaonriha caohateein neeichene. Chunocoha canu curuaaneein netiin cojoelanaacojoai ichaera, nii baiha baasoneein erena nainihe canu que. <sup>40</sup> Canaacha ichai ichara, coatihane cana que nejeratena nainihe. <sup>41</sup> Chunocoha canu Curisito cachanequichene coreniha inara rai esinaeca niha natiin terate, esinae rauhijiriin rai cainanohiniha cureein,” nae jetao rai Jesoso.

*Jataain alalacaraan osa que nesarucuaane*

*(Mt 18.6-9; Lc 17.1-2)*

<sup>42</sup> Niritiin jetaote: “Chunocoha ena canu esenetajeeureraauru saruha osa quenete, nii ajiniha caohachare nuluno que leinjiin ajeri jaberoco tijichaain ichojoaain cucuana cuhane joeraane. <sup>43</sup> Jana osa que ii saruha ichohiine moloo. Nii amuritoheriintejian caohachare le jerajei ichohii aina Cana Coaunera cojoanona que neeine. <sup>44</sup> Nabana le jerajei ichohii coreniha, nii chariji bana nii riano niha natiin ohin, nii usi tabai jacanaachara jana cuhine

coataa. <sup>45</sup> Jerichanejeein osa que ii saruha ii tijiane moloo. Nii amuritoheriintejian caohachare le jerajei ii tijia aina Cana Coaunera cojoanonaa que neeine. <sup>46</sup> Nabana osa que ii saruha ii tijiane coreniha nii riano niha natiin ohin, nii usi tabai jacanaachara jana kuhine coataa. <sup>47</sup> Jerichanejeein osa que isharuha inotane, le jerajei inota rocoo. Nenacaeneetejian nii amuritoheriin caohachare le jerajei inota aina Cana Coaunera Cojoanonaa que neeine. Nabana usi que isharuha inotane, <sup>48</sup> nii riano niha natiin ohin, nii usi jacanaachara, naonjoain jana kuhine coataa.

<sup>49</sup> Usi jana situnaa rijijieeinte nichoterichaacheein satiin. <sup>50</sup> Nelatiha niqui tebe. Nete inae lenone cotebetenaa nainenihane, inae nii chaque nelatene. Nii rijijieeinte chaque nelateneeiche inara que icharatenohi ichaain, raotojoein ichaauruha leeochoaurune jaan ichaeneeichene,” nae jetao acaauru rai Jesoso

## 10

### *Comasai jianiha cachane que cache relaa Jesusone (Mt 19.1-2; Lc 16.18)*

<sup>1</sup> Inae Caferenaan caje amuhin jetaote, aina nerelanacaauru aina jiniiquiin nucuhe Jorodaan auhaniha kuhin, enoto mitu nichajai jeroon nena Jodea batane que cue Jesoso. Ecu jetaote, rai netaojiaauruha cachaaurune jana jetao, nacoaauneein relanajae Jesoso, cachaauru relanaa rautatohane jaun. <sup>2</sup> Nii jana jetaote, rohan nichuuntaain jetao, nechu jataain cairichauruhane jaanu lera ariha jetao, comasai jianena nainiha cachane bajaaure jetao Jesoso caje fariseeocuru tabaauru. <sup>3</sup> Nii jaun jetaote:

“Tonaa inara rai Moisesa, comasai jianiha cachane que,” naain acaauru caje bajaa Jesusone jana jetaote:

<sup>4</sup> “ ‘Comasai jianiha cachane coina, jauriaanejeein comasai jianihane jaaque aitiin nena quiricha teeuchete, aina comasai jianemiin cache,’ naainte aite Moisesa,” naauruha fariseeocurune jana jetaote:

<sup>5</sup> “Aiha niqui. Nete, nere tonorana jerelanaala neeichelune jaun, nitohaneein ichaquichene rautaenihane saijieein ichaquichene coina aitelu Moisesa. <sup>6</sup> Nete jauriaanejeein itolere coaunaane nunuheneein, quicha, ene, naonjoain coaunaelu Cana Coaunera. <sup>7</sup> Nii jaaunte, inaca, neba, naonjoain ratiriin amuhin necoaansaijiae cache. <sup>8</sup> Chaen leinjiin cachanein nena rijijieein cocuhin, jiniiquiin ita aina neeure. <sup>9</sup> Nitohaneein niha cachane coina icha Cana Coaunerane jaun, nii comasai jianena nainihe cache,” nae jetao fariseeocuru rai Jesoso.

<sup>10</sup> Inae loreri asaa enooruhane jana jetaote, nii cachaauru relaane jaan bajaaure nacoaauneein caje aina nerelanacaauru. <sup>11</sup> Nii jaun jetaote, acaauru rai:

“Comasai jianein leecha ene raerate, osa que nesaruha aicheein. <sup>12</sup> Jerichanejeein techu, osa que nesarureein lana jianein leecha cache que nelanajaane ene,” nae jetao aina nerelanacaauru rai Jesoso.

### *Canaanainuru rausiaaeca Jesusone (Mt 19.13-15; Lc 18.15-17)*

<sup>13</sup> Nii jana jetaote, acaauru mucuhin rausiaaeca cojiotanaaca Jesusone coina jetao, rai canaanainuru amaure acaauru fojiaraauru. Nejetaote, nii canaanainuru amaauruha nii amaaurerane caohateeure nii Jesoso aina nerelanacaauru. <sup>14</sup> Nii rene amanajaauruhane caohateeuruhane coarajeein jetaote, obajeein jetao:



“Coa carene turuuruha canaanainurune caohatihachete, canu rene turu-  
uruhine. Aihuruha caa canaanainurune rijijieein nenacaauru raineente ne  
Cana Coaunera Cojoanona. <sup>15</sup> Esinae rauhijiriin aiha leinjiin canaanaine  
rijijieein neniha cachane coatiha Cana Coaunera Cojoanona que nena  
nainerinaain,” <sup>16</sup> naane baiha jetao, jerane biji cuhane nii canaanaihu  
raane baiha jetao acaauru mucuhin, acaauru rausiaaeca cojiotanajae Jesoso.

*Jesoso aina iriha leinjiin cacha coriquihonane*  
(Mt 19.16-30; Lc 18.18-30)

<sup>17</sup> Nitohaneein inae jelai caje amunaa jeriha Jesusone jana jetaote, rene  
jeluhariin cuhin turuhin jetao, nacatiha neseoriaain:

“Caohachanejei cacha relaera. Cha ichareeun charijibana nitajenaachara  
ichaonaa raotono que nena nainichaaune coina,” naain Jesoso caje bajaa  
leinjiin cachane jaun jetaote: <sup>18</sup> “Chanuna caohachanejei cacha neein canu  
curuaateei, leinjiin Cana Coauneraachate caohachanejeineein ne. <sup>19</sup> Inae  
raotojoeein Cana Coaunera aitoonjoan coitucuhi: ‘Jiaonriha sonajaain jao-  
hine. Coa ii sinijerane lanaala nena ene aina ichaohin niha. Coa asijiauha.  
Coa chamute cacha cairichanaa jerenacaun chuni cacha coacuhin casaje  
que ereein niha. Chae efojiaraauru ere tonoraain caohachaain acaauru aina  
neen,’ naane coitucuhi,” naa rai Jesusone jaun jetaote:

<sup>20</sup> “Aihanu chujian. Canu enamanaca caje coauneeinne jitariin nii naitoon-  
joan tonoraain ichaon,” naa nii cachane jana jetaote, <sup>21</sup> jataain cairichaa-  
joaain coaraain jetao:

“Esinae rauhijiriin, chaque lanaelanaala Cana Coaunera aitoonjoa tonora-  
na jereeine, chajaain jitariin nii iicha sirii que necoreteein cairichaaihu  
rai tenihun. Nii banaachate, jelai amuritoeriin nereein iicha latei dedeeu.  
Nii baiha laen canu aina uu,” naa rai Jesusone jaun jetaote, <sup>22</sup> jataain nerero-  
joecaain jelai caje amue inaderaain nii enamanaa, jataain coriquihocane  
jaun.

<sup>23</sup> Nii jaun jetaote, nii rohan curuacaain nenacaauru cachaauru coaraain,  
aina nerelanacaauru rai jetao:

“Jataainte caaintate Cana Coaunera Cojoanona que nena jeriha coriqui-  
honane,” naa acaauru rai Jesusone jaun jetaote, <sup>24</sup> jataain cojoelatiin ecu  
aonajeure aina nerelanacaauru. Nejetaote nacoauneein acaauru rai  
jetao:

“Cacoelaichaauru, jataainte caaintate Cana Coaunera Cojoanona que  
nena jerichaane. <sup>25</sup> Leinjiin oco jachu cuhane situnaa naineniha leinjiin  
camechone amurijiriinte, jataain caaintate Cana Coaunera Cojoanona que  
nena jeriha coriquihonane,” naa aina nerelanacaauru rai Jesusone jaun  
jetaote, <sup>26</sup> jataain jeelai amuritoheriin naurutaain cojoelatiin jetao, ecu  
nejesinajeein ita rai jetao:

“Nitohaniane nichotenaa naineriaain chuni,” naauruha nii aitothane  
aonajeeinne jaun jetaote, <sup>27</sup> ecu coaranaacane baiha jetao:

“Caaintatiin cachaauruhacha coaraite, Cana Coaunera rai caaintajene,”  
naa Jesusone jaun jetaote: <sup>28</sup> “Canacaunune jitariin canacaanuhacha sirii  
ratiriin ii sacuhacaanulu,” naa rai Fedorone jaun jetaote:

<sup>29</sup> “Chunocoha esinae rauhijiriin canu coreniha, chaen, cacha ichoteratera  
caitoonjoan- canu ere beebejeein, naaonjoanne coina, rai loreri, rai nejer-  
aauru, rai fojiaraauru, rai calaohichuru, rai natane, naaonjoain ratirichate,  
<sup>30</sup> caa chauratane que neein jataain jeelai amuritoheriin lefasha sanein  
rai loreri, rai nejeraauru, rai fojiaraauru, rai calaohichuru, rai natane,

naonjoainuri siricheein. Cairichaerinojoneein neeuruhane niha nati-inte, turuha uheni Cana Coanera Cojoanona charijibana nitajenaachara ichaonaa que niha cuurureein. <sup>31</sup> Ena jataain arajii itolere que nelaetoha nocoetonacaaurute, nii chaque nelatelanaala niha cuurureein. Jana ena chaque nelatelanaala arajiin nenacaaurute, nelateein niha cuurureein,” naain jetao Fedoro tonorae Jesuso.

*Caa quete inae nichata sae orichaainne biha Jesusone*  
(Mt 20.17-19; Lc 18.31-34)

<sup>32</sup> Jerosaleen nichaae cuuruhane jaun jetaote, aina nerelanacaauru ichoaaichaniha cuujiha Jesusone jana jetao, cojoelatiin cuujeeuruhane jana jetao, nii niritohane que casiin jetao, cuujeeure acaauru caaijie cunacaauru. Nii jaun jetaote, jelai nii aina nerelanacaauru lechoonca coroatajai cotijiaain jetao:

<sup>33</sup> “Inae caa ena coitucuhichene rijijieeinte, Jerosaleen cuujihacache. Inae ecu turunaate, canu inaraacha cohajei cachaneein nejanoanaa nichaaune mucuhin saseredotecuru curuaanaacuru rai, Moisesa aitoonjoan que cacha relaaureraauru rai, naonjoainuri rai caetecuruhane jana, catinanacanejeein nejelau cachauru Jorionelanaala nenacaauru bijihu caetecurureein. <sup>34</sup> Nii janate, caque necoatijiaain canu couluneein, canu bisiin catinaa cuurureein. Nena nichata janohane baiha, nacoaauneein ichanareeunni,” nae jetao nitohaneein teeururichaainne que Jesuso.

*Acaauru coroatajaniha Jesusone coina caje bajaauruha Saantiaao, Joaan, naonjoainurine*  
(Mt 20.20-28)

<sup>35</sup> Niritohane jana jetaote, rohan nichuuntaain jetao:

“Cacha relaera, caa ena ichei canacaanuhacha bajaani ichaaenene jerichaanu,” naauruha Sebedeeo calaohichuru, Joaan, Saantiaao, naonjoainurine jana jetaote: <sup>36</sup> “Chatohanai inara rai ichacaaunne jerequiche,” naa Jesusone jana jetaote:

<sup>37</sup> “Canacaanu rai, inae ii Cojoanona necaohacha que neeine bana, ii ajaabiji nichajai que, ii raotono nichajai que, naonjoaain nihacaanune jaanu ichaaenene jerichaanu,” naauruhane jana jetaote:

<sup>38</sup> “Coatiha nohane inaraacha bajai coitucuhin aitoheeiche. Caa necairichanaa abaantarichaaunnine rijijieeinote, necairichanaa abaantanaa nainequiche inara. Chaen noote, nitohanihanune coina cojunacatenohi nichaaunne rijijieein cojunacatenohineein neeiche,” naa acaauru rai Jesusone jaun jetaote:

<sup>39</sup> “Abaantanaa nainichaanu,” naauruhane jana jetao:

“Inarate niqui, caa necairicharichaaunnine rijijieein necairichanaa abaantaain cojunacatenohineein niha curiquicheein, cojunacatenohineein nihanune rijijieein. <sup>40</sup> Nena laen, canu raotono nichajai que, canu ajaabiji nichajai que, naonjoaain nelauriaaichene coina inaraacha bajai tenaa naineneun, nii coina inae acaauru que banihateein rucuhenojoneein nenacaauru raineen nihane jaun,” nae jetao acaauru rai Jesuso.

<sup>41</sup> Niritoha acaauru rai Jesusone aonajeein jetaote, Saantiaao, Joaan, naonjoainuri aina obaecure nii lechooncaihuri aina nerelanacaauru. Ne-jetaote, acaauru cotijiaain jetao:

<sup>42</sup> “Inarate raotojoein, Cana Coanera coitucuhichuru, leeochoauru amurijiriin nena jereein acaauru cocoainanacai neeuruhane que suujua acateein neeuruha leeochoaurune jereein neeuruhane coitucuhiche.

<sup>43</sup> Nete laen nejesinajeein nitohaneein nenea naineneeiche inara. Nitohaneein nenea coacuelanaala, nejesinajeein ita coroatajaneein neeuche.  
<sup>44</sup> Jana leeochoaauru amurijiriin nenea jerera, leeochoaauru letononeein neeine. <sup>45</sup> Coaracuche nachuhinti canu Cana Coaunera Calaohi cacha caje nejanoanaa nichaaunne canu coroatajaneeeichene coina tururichaaun. Arajii cachaauru osa caje nichoteein jianacoon neeuruhane coinane, nii coreniha cajabereeo cairichaeratiha uunlu acaauru coroatajaniha,” nae jetao acaauru rai Jesuso.

*Maosanihane caje Bartimeeo rautaa Jesusone*  
*(Mt 20.29-34; Lc 18.35-43)*

<sup>46</sup> Inae Jericoo turuhin jetaote, ecu basiinjiin neoriin jelai caje amuha aina nerelanacaauru aina Jesusone jana jetao, acaauru aina cuure arajiin cachaauru. Nii jana bero auhaniha lauhequiin coriqui bajaa leinjiin Timeeo calaohi cairichei maosa Bartimeeone jaun jetaote, <sup>47</sup> Nasarete cocoaicha Jesuso nihane aohanriin jetao:

“Rabiriicha foeratei Jesuso, cairichaaajoaain atiin cacoharaau,” naain eheeca nii maosane jana jetaote, <sup>48</sup> arajiin cachaauru, ehequiin aitohane caohateure inauheneecha nihane coina. Nejetaote, que rutaain ehequiin:

“Rabiriicha foeratei, atiin cairichaaajoaain cacoharaau,” naa nii maosane jaun jetaote, <sup>49</sup> ecu inacuhin jetao:

“Chajaain cajiha cotihanihuche,” naa Jesusone jaun jetao:

“Chajaauje nimichuhinte, toon ii cotihara coarae,” naauruha nii maosa raine jaun jetaote, <sup>50</sup> cajione buri rocohitiin siheetiin ratiriin jetao, Jesuso rene jeluhariin turuha cue nii maosa. <sup>51</sup> Nii jana jetaote:

“Chatohaneein chetichaaunne jereeita,” naa Jesusone jaun jetao:

“Conoha canotanena jereunra cacha relaera,” naa nii maosane jana jetaote: <sup>52</sup> “Inae jataain quesetaaine jaun inae conoha inota. Inae naineein amuhinera,” naa rai Jesusone rijieeoritiin jetaote, inae conoha nii maosa notane jaun jetao Jesuso jiniichaaain bero cuhane cue nii maosa.

## 11

*Jerosaleeun turuha Jesusone*  
*(Mt 21.1-11; Lc 19.28-40; Jn 12.12-19)*

<sup>1</sup> Nitohaneein cuhin, inae Jerosaleen catainaauruhane jaun jetaote, Betafajee, Betania, naaonjoainuri rohan Olibo bichatane turuuruhane jaun jetao, caje coauneein coroatajai aina nerelanacaauru letoae Jesuso.

<sup>2</sup> “Chajaain taa nita canaacha coarajei neseu cunichuche. Inae ecu turuhicheneete, ecu cositenojoneein teecoha jaiti chuni cacha amunajanelanaala nenea asno narejeene jana eruha curiquicheein. Cosi rutuhin uhaaichene jana: <sup>3</sup> ‘Chanuna cosi rutuhin amaaiche,’ naa chunocoha inara raine: ‘Latiha Cana Curuaanaane jaaunne raa uhacaanu. Inae enate ichei jelaiha cainaratereein,’ naauche,” naain jetao letoanajae Jesuso.

<sup>4</sup> Nii jaun jetaote cuhin, nii acaauru rai aitohane rijijieein bero auhaniha teecoha cositenojoneein acujua rohan asno narejeene jana, eruhin jetao cosi rutuhin amauruhane jana jetao: <sup>5</sup> “Cha ichaquiche inooneein. Chanuna nii asno narejeen cosi rutuhin amaaiche,” naain jetao, acaauru caje bajaure nii cuu nenacaauru cachaauru tabaauru.

<sup>6</sup> Nii jaun jetaote, nii acaauru suujuateein letoanajaa Jesusone rijitoejin nii cachaauru tonoraauruhane jaun jetao, inauheneecha nii asno narejeen amauruhane coarajeeure. <sup>7</sup> Nitohaneein jetaote, nii asno narejeen ichoae cajione tein jetao, Jesuso rai nii asno amauruhane jana jetao, inae rene

turuhaauruhane jana nichoae nelauriaain cue Jesoso. <sup>8</sup> Nitohaneein asno ichoae nelauriaain cuhane jana jetaote, najiniha bero cuhane rai cajione buri maririjiacoaauruhane jana jetao, leeochoaauru elele alo rijijieein nenea ajaena alo raain najiniha bero cuhane maririchure. <sup>9</sup> Nii jana najiniha cunacaauru, caaijie cunacaauru, naaonjoainuri jetaote:

“Raotojoein turuhine Cana Coanera rijijieein nenea cana Curuaanaa. <sup>10</sup> Raotojoein turuhine Cana Coanera Cojoanona, cana inoensihuru foerateraneein nenea Rabiri nefoerate cojoanona. Aihute coreniha raotojoein neeurumiin dedeeu nenacaaurune maajeein,” naaure jetao cojioriin cachaauru.

<sup>11</sup> Nitohaneein Jerosaleen turuhin jetaote, Teenforo asaae enohin, ecu basijiin neeoriin jitariin nasajai coaraane baiha jetao Betaniau cue lechoonca coroatajai aina nerelanacaauru aina Jesoso, inae sohane jaun.

*Inacaelanaala oha uherane coina cojiotaa Jesusone*  
(Mt 12.18-19)

<sup>12-13</sup> Nii cojoanoo Betania caje amuuruhane jana jetaote, niita bero auhaniha niha uhera alone jana coaraain jetao, coaraa cue Jesoso mijiintohane jaun. Nejetaote, inaacane bana rijiu nenihane jaun, ninna colane nalohacha baejeein ne. <sup>14</sup> Nitohaneein inacaenihane jaun jetaote:

“Inae nacoaauneein inacaeneriquiinne jaun, neriaain chuni ii inaa lerata,” naain uhera cojiotaa Jesusone jana jetao, ecu aina neein aonajeeure aina nerelanacaauru.

*Teenforo asaae necoretenacaauru sitaa Jesusone*  
(Mt 21.12-17; Lc 19.45-48; Jn 2.13-22)

<sup>15</sup> Inae nacoaauneein Jerosaleen turuhin jetaote Teenforo asaae enohin, nii Teenforo asaae chaelai que necoreteein, chaelai coretiha, naaonjoain nenacaauru sitaain, atanichoae coriqui coreeuruha cachaauru raine jaa rorihurune maajeein lacojoaain jetao, serori que necoretenacaauru rorihurune maajeein lacojoaain, <sup>16</sup> nii Teenforo asaae nenacaen rucuhele enoauruhane caohate Jesoso. <sup>17</sup> Nitohaneein jetaote:

“Cana Coanera Quiricha inoensi cuhanete: ‘Cana Coanera bajaauruha satiin chauratane sacuritaain que nenacaauru cachaaurune jaan coloheri-neeite ne canu loreri,’ naain laenanohineein ne. Nete asijiaauruhane jaan coloheri rijijieein teeiche inara,” naain jetao ecu acaauru relae Jesoso.

<sup>18</sup> Niritiin cachaauru relaane aonajeein jetaote, Jesoso sohin jaonaa coaacuruhane jaun, sohin jaaoruhane jaanu lera arihure saseredotecuru curuaanaacuru, Moisesa aitoonjoanque cacha relaaaureraauru, naaonjoainuri. Ne jetaote, sohin jaaoruhane coasichure, nii acaauru relaa Jesusone jaan rautatiin aonajeeuruha satiin cachaaurune jaun. <sup>19</sup> Inae nocohecane jana jetaote, aina nerelanacaauru aina jiniiquiin nii nese caje amue Jesoso.

*Inacaelanaala oha uherane*  
(Mt 21.20-22)

<sup>20</sup> Nii cojoanoo janone nii uhera rohan situha cuuruhane jana jetaote, inae cojoaisi aina curuaaequuin oha nii uherane jana coaracure. <sup>21</sup> Nii jaun jetaote, cojiotaa Jesusone coacuhin que nainnaain jetao:

“Cacha relaera, inae raca cojiotaaine jaunte, inae ohe taa uhera. Coaraau nachuhinti,” naa Fedorone jaun jetaote:

<sup>22</sup> “Jataain Cana Coanera esenetaauche. <sup>23</sup> Chunocoha esinae rauhijiriin airichaaanne esenetaain nii batoelanaala: ‘Niilai caje nefaruhin cucuana cuhane cunihun,’ naa caa ichatane ucuuno rainete, esinae nii aitohane rijijieein aihane ne. <sup>24</sup> Nitohaniane jaaunne inara rai aitoon, inaraacha

latei eruhichene coina Cana Coaunera bajaaiiche, inara rai terichaaaine esenetaainete eruriquicheein. <sup>25</sup> Inara rai chatohanai cotainacai ichaain neeuruha inara amute cachaaurune niha natiin, acaauru que inara suujua acateein Cana Coaunera bajaaiichene bajaaiuche. <sup>26</sup> Aihute baaso ichaain osa que nesaruquichene niha natiin inara osa que suujua acatemiin cana Inaca dedeeu nena Cana Coaunera,” nae jetao Fedoro rai Jesoso.

*“Cha ii cocoainae,” naauruha Jesoso raine  
(Mt 21.23-27; Lc 20.1-8)*

<sup>27</sup> Nii baiha jetaote, nacoaauneein Jerosaleen cauha cue aina nere-lanacaauru aina Jesoso. Inae ecu turuhin Teenforo asaee enohin amuhe-muheca Jesusone jana jetaote, rohan nichuuntaain jetao:

<sup>28</sup> “Cha ii cocoainae catohanai ichaain neeine coina. Chatohanai cocoainanacai neeinna neei,” naaure jetao Jesoso rai saseredotecuru curuaanaacuru, Moisesa aitoonjoan que cacha relaaaureraauru, Jorioocuru bichauhenauru, naaonjoainuri.

<sup>29-30</sup> Nii jaun jetaote, acaauru rai: “Canuhetonaine inara caje bajareeunni. Cha Joaan letoaelu, cachaauru cojunacatiha uhane coina. Cana Coaunera letoaenihanena cachaauruhacha letoanojoneein uhalu. Catoonraain carai beeichenena, canuhetonai canu cocoainaan canu letoaera bereeunni inara rai,” naain jetao acaauru tonorae Jesoso.

<sup>31</sup> Nii jaun jetaote, ecu nejesinajeein ita rai jetao: “‘Cana Coaunera letoanojoneeinte uhelu,’ naacachenete: ‘Chanuna jana nere tonoraain esenetae-neeichelu,’ nareein. <sup>32</sup> Coatihachu: ‘Cachaauru letoanojoneeinte uhelu,’ nanaa nainihaacache,” naaure jetao ita rai. Satiin cachaauru Cana Coaunera letoanojoneein uhalu Joaane esenetaauruhalune jaun, cachaauru coasiha.

<sup>33</sup> Niritiin jetaote:

“Chachaainti Joaan letoaain nelu. Coatihacu coitucuhaacaanu,” naauruha Jesoso raine jaun jetaote:

“Aihane jaaunchujian canuhetonai, caa catohanai ichacaaunne coina canu cocoainaan canu letoaera berinaaunni inara rai,” nae jetao acaauru rai Jesoso.

## 12

*Ocoana jaaurera necha ansaineein ichaonacaauru que cuaain cachaauru relaa Jesusone*

*(Mt 21.33-46; Lc 20.9-19)*

<sup>1</sup> Niritohane baiha jetaote, ocoana jaaurera que cuaain cachaauru relaa in jetao: “Leinjiin cacha jetaote, ocoana jaain jitariin corihateein bino jaauruhane jaanu coloherinu que loreri jaain, leinjiin jataain ucuuneein teein rori jae ecu neein amihanenacaauru beraihane coina. Nitohanein caohachaaain rucuhacane baiha jetaote, nii ocoana que amihanenacaauru rai atane teein ratiriin amuhe nii atane erora. Inae tainaca que turuhane bana ita rai lerruhane coina. <sup>2</sup> Nitohanein teein ratiriin jetaote, inae tainaca que tihane jaun, leinjiin rai cacha letoae, nii amihanenacaauru caje que banihateein niicha taihuri bajaa cuhane coina. <sup>3</sup> Nejetaote, nii cacha mucuhin faojaain sooruhane baiha, nii cacha letoaaure cha colane nii temule erora rene. <sup>4</sup> Nii jaun jetaote, nacoaauneein leeocho cacha letoaa nii temule erorane jana, nocoejehanuhin, couturi cunaitaan cha colane acaentonai letoaaure jelaiha. <sup>5</sup> Nii jana nacoaauneein leeocho cacha letoaane jana jetaote, acaentonai sohin jaaore nii temule beraichacuru. Nii baiha nacoaauneein arajiin rai cachaauru letoajeein sacuha nii temule

erorane jana jetaote, tabaauru sohin jaonajaain, tabaauru faojoaain cunaitanajaaure.

<sup>6</sup> Satononejeein jetaote leinjiin jataain niicha belaa rai calaohi neeorihane jana, aca letoae: ‘Jerihane canu calaohi quete laen suujua acatecurureein,’ naain coaucane jaun, sohin jaaoruhane esenetaelanaala. <sup>7</sup> Nejetaote, ita rai jetao: ‘Inae uha caa atane erora calaohi. Coanete sohin jaohacachete, cana raineen nedaaaine caa atane,’ naaure jetao nii ocoana que amiha-nenacaauru cachaauru, uha nii atane erora calaohine jana coarajeein. <sup>8</sup> Niritocuruhane jaun jetaote, inae acaauru rene turuhane jana mucuhin ateinaain nii ocoana udaa amaain jaberoco jaaore,” naain jetaote:

<sup>9</sup> “Tonaquiche jana inara, nii calaohi sohin jaaoruhane que, tohanrihacha jana nii ocoana erora. Raajenihane cuhinacha nii ocoana que amiha-nenacaauru sohin jaohin, leeochoaauru cachaauru bijiu nii ocoana teriha beraihuruhane coina. <sup>10</sup> Tana Cana Coaunera Quiricha inoensi cuhane:

‘Ajeri jaolecoorua  
loreri icharaaurune jaante,  
jauriaanejeein  
loreri nunuheneein ne.

<sup>11</sup> Acate

jataain cana rai  
cojoelanaacojoaain ichae

Cana Coaunera,’

naain laenanohinihane jaan reretaain aonaquiche chariji banane,” naain jetao ocoana icharaauru que cuaain cachaauru rai ereerejeein acaauru relae Jesoso.

<sup>12</sup> Niritiin acaauru que cuaain relanajaa Jesusone que nainacuruhane jaun jetaote, Jesoso mucunaa jerecure Moisesa aitoonjoan que cacha relaureraauru, saseredotecuru curuaanaacuru, naaonjoainuri. Nejetaote, Jesoso aina neeuruha arajiin cachaaurune jaun cachaauru coasiha ecu ratiriin jelai caje amuure.

*Impoestonu que coriqui teeuruhane que iriha Jesusone  
(Mt 22.15-22; Lc 20.20-26)*

<sup>13</sup> Nitohaneein ecu ratiriin jelai caje amuuruhane baiha jetaote, Erodesi ere tonoraeraauru, fariseecuru, naaonjoainuri letoaaure, rai ereeuruhane jana tonaain acaauru tonoraa Jesusone nechu jataain coulurujueeuruhane jaanu lera ariha cuuruhane coina. <sup>14</sup> Acaauru jetaote rene turuhin jetao: “Ii que tonaain iriha cachane niha natiin, tonoraelanaala esinae rauhijiriin ereein neeine coitucuhacaanu. Chaen techu nohanelanaala esinae rauhi-jiriin jeriha Cana Coaunerane rijijieein ichaoha cachane coina cacha relai. Aihane jaun, caohachaana Romanocuru curuaanaa rai *impoestonu* que coriqui tihacaanune. Ainihane chatohaneraha. Coretena nainichaanuna. Ainihanena niriiraha,” naaure jetao Jesoso rai fariseecuru aina Erodesi ere tonoraeraauru.

<sup>15</sup> Nejetaote, nechu jataain cairichaa aitocuruhane que nainaane jaun jetao:

“Chanuna cacairichanaa coacuhin niritiin carai ereeiche. Carai cajiha nii coriqui uhauchene coarae,” naa acaauru rai Jesusone jaun, <sup>16</sup> rai coriqui teeuruhane jana jetaote: “Chaa curuaa caa laenanohineein ne rai cojunaca aina,” naa acaauru rai Jesusone jaun jetao: “Romanocuru curuaanaa enferadoro curuaa,” naaure jetao rai.

<sup>17</sup> Nii jaun jetaote acaauru rai: “Aihana jaun chujian enferadoro que banijiaain nena teeuche enferadoro rai. Chaen Cana Coaunera que banijiaain

nenaa teeuche Cana Coaunera rai,” naain acaauru tonoraa Jesusone jaun jetaote, ecu jataain cojoelatiin aonajeeure.

*Ohane baiha oo caje ichanaa cachane bajaauruha sadoseeocurune  
(Mt 22.23-33; Lc 20.27-40)*

<sup>18</sup> Nii jana jetaote, Jesoso coaraa uure sadoseeocuru, oo caje ichanaa cacha suujuene esenetaaurenihane jaun caje bajaauruhane coina. Acaauru jetaote rene turuhin jetao:

<sup>19</sup> “Cacha relaera, Moisesate canacaanu rai laenaain ratirilu, oha leinjiin cacha nesirihateein nii comasai aina canaanai sirilanaalane, nii onaa comasai autana raa nii onaa nejerane, nii onaa aina siricha rijijieein canaanai sirihane coina. <sup>20</sup> Nitohanihane janate, ita nejera nejesinaneein neeuruha caaunsineein cachaaurune jana, jauriaanejeein acaauru nejera nesirihateein, nii nesirihatenajan aina calaojoilanaala ohe. <sup>21</sup> Nii jaunte, nii autana rae nii onaa nejera. Nete acaentonai ohe aina calaojoilanaala. Jerichanejeein techu ohe nii acaauru nichataja. <sup>22</sup> Nii jaaunte, nii chunocohacuru nii caaunsini ita nejeraauru calaojoilanaala oore. Nii janate tabiicha nii ene netonai ohe. <sup>23</sup> Aihane jaun ooruhane baiha nacoaauneein ichanaa acaauru suujuene bana, chariji comasaineein jana nereein nii ene, caaunsini ita nejeraauru aina nesirihateein nihalune jaun,” naain jetao Jesoso caje bajaasure sadoseeocuru.

<sup>24</sup> Nii jaun jetaote:

“Nechu jataain joaenreeinte ereereequiche inara, Cana Coaunera Quiricha ereretaain aonaain niicha ichanenu coitucueneeichene jaun. <sup>25</sup> Ohane baiha jerichanejeein jaberoconeein nena rijijieein ichanaain niha quichaauru, enecuru, naaonjoainuri suujuene, inae nesirihatenaa nainecuruhi, dedeeu nena anjeraauru rijijieein inae neeuruhane jaun. <sup>26</sup> Tana ohane baiha jerichanejeein jaberoconeein nena rijijieein ichanaa cacha suujuene que aitoa nuna laojoiri moconaau neein Moisesane jaa quiricha reretaain aonaquiche inarane. Ecu jetaote Moisesa rai: ‘Canune Abaraaun, Isaca, Jacobo, naaonjoainuri Coaunera neeun,’ nae jetao Cana Coaunera. <sup>27</sup> Coatihahin nitajenacaauru coaunera nihei Cana Coaunera- ohin nii baiha jerichanejeein jaberoconeein nena rijijieein nenacaauru cachaauru coaunera Cana Coaunera. Nitohanihane jaunte, jataain joaareein nii cha coitucuelanaala ereereequiche inara,” naain jetao sadoseeocuru tonorae Jesoso.

*Cana Coaunera aitoonjoan-jataain cacha ichao rai nelateein nena  
(Mt 22.34-40)*

<sup>28</sup> Niritiin esinae rauhijiriin sadoseeocuru tonoraa Jesusone jana aonajihane jaun jetaote, Jesoso rohan nichuuntaain jetao:

“Chariji jataain jauriaanejeein Cana Coaunera aitoonjoanein cacha ichao rai nelateineein ne,” nae jetao, rai Moisesa aitoonjoan que cacha relaera.

<sup>29</sup> Nii jaun jetaote:

“Jauriaanejeein cana ichao rai nelateein nena Cana Coaunera aitoonjoante: ‘Aonacuche Israeli cocoaichacuru. Cana curuaanaa Cana Coaunerate, leinjiin acaacha itolere curuaanaa neein ne. <sup>30</sup> Aihane jaun, ii suujua, ii suujue, ii coichana, naaonjoainuri aina curataain cana curuaanaa Cana Coaunera belaihu. <sup>31</sup> Chaen ichaajenihane ijiabereeo belaaain coaraaine rijijieein chamute cacha belaaain coaraau,’ nae. Nihei caa baiha jataain cacha ichao rai nelateein nei Cana Coaunera aitoonjoan,” nae jetao Moisesa aitoonjoan que cacha relaera rai Jesoso. <sup>32</sup> Nii jaun jetaote:

“Esinae rauhijiriinte chuhisi aitohicha cache relaera. Leinjiinte chuhisi ne Cana Coanera. Nihei nii baiha acaneein nei. <sup>33</sup> Cana suujua, cana suujue, cana coichana, naaonjoain aina curitaain Cana Coanera belaaain, cana jaberoco belaichaane rijijieein cana amute cache belaaain, naaonjoaancanete chuhisi, itolere inihocuru, itolere jujuaihuru, naaonjoainuri mocohaca rori ichoae teenne amurijiriin jataain nelateine,” nae jetao Jesoso rai Moisesa aitoonjoan que cache relaera. <sup>34</sup> Niritiin esinae rauhijiriin tonoraa nii Moisesa aitoonjoan que cache relaerane coitucuhane jaun jetaote:

“Coatiha icharaain nihee Cana Coanera Cojoanonaa que neeine coina,” naa Jesusone jaun jetaote, inae nii tonaai caje chatohanai bajanaa coitucue.

*“Chatohanai caje nefoeratenaa ne Mesihasi” naain bajaa Jesusone  
(Mt 22.41-46; Lc 20.41-44)*

<sup>35</sup> Nii baiha Teenforo asaae neein cachaauru relaane jaun jetaote:

“Chanuna Rabiri caje nefoeratenaa niha Mesihazine que aitocure Moisesa aitoonjoan que cache relaaaureraauru. <sup>36</sup> Cana Coanera Suujue aitoroatenojieein:

‘“Cau carautono nichajai que

nelauriaau carohan,

ichei nejeratenacaauru amuritoherateein,

itiha asaae tenajaanune reen tiaajeein,”

naa Cana Coanera cana curuaanaa rai,’ naa Rabiri inatiin.

<sup>37</sup> Aihane jaun, inasiina Rabiri nefoerate caje nenaanere Mesihasi, Cana Curuaanaa neein curuaatiha Rabiri netonai inatiin,” naa cachaauru rai Jesoso jana jetaote, rautatiin Jesoso aonajeeure nii ecu arajiin nenacaauru cachaauru.

*Moisesa aitoonjoan que cache relaaaureraauru ichao biha Jesusone  
(Mt 23.1-36; Lc 11.37-54; 20.45-47)*

<sup>38</sup> Nitohaneein cachaauru relaane aina cuaain jetaote:

“Caohachaaain nocohalajiin ichaaoche, Moisesa aitoonjoan que cache relaaaureraauru que. Cache relaaauruhane jaa cocajione jiaainte, bero cuhane neuru acaauru que suujua acatecuruhane coarateein neuruha cachaaurune jereinchuru amuure. <sup>39</sup> Chaente netaojiaain Cana Coanera rai rauhi que ereerecuruhane jaan coloheri sinacoca asaae enooruhane jataain nelateein nena rijijieein rori caohacha ichoae nelauriana rautatiin, beseta ichaaain lenonecuruhane jaun niha natiin rori caohachaauru ichoae nelauriana rautatiin aihure. <sup>40</sup> Chaentechu, autanaauru caje acaauru loreri niha natiin ruluure. Nitohaneeinte necha aansaneein ichaaoruhane que nainacuruha cachaaurune coataa sonafaajianaichuru Cana Coanera bajaae bajajeein ichaao. Acaaurute leechaauru amuritoheriin caseteco coaraa cuurureein,” naain jetao cachaauru relae Jesoso.

*Nichaonajaanu que niicha sirii coriqui tiha Cana Coanera belaiha leinjiin  
autana cairicheine  
(Lc 21.1-4)*

<sup>41</sup> Nii jana jetaote, coriqui teuruhane jaan curu cuhane coriqui teuruha cachaaurune jana coarajiha lauhequiin Jesusone jana jetao, jataain araainanaain coriqui teure coriquihonacaauru. <sup>42</sup> Nii jana jetaote, turuhin jataain coroatajajeei coreein nena coriqui tiha cue, nii teuruhane jaa curu cuhane ita que jerajeein, leinjiin autana jataain cairichei. <sup>43</sup> Nii coarajeein jetaote, aina nerelanacaauru cotijiaain jetao:



“Esinae rauhijiriin satiin caa curu cuhane coriqui teeurera amurijiriinte coriqui te caa leinjiin autana cairichei. <sup>44</sup> Jana satiin caa coriquihonacaaurute, acaauru rai cautena coriqui caa teure. Nete laen caa ene jataain cairicheinijian natiin, acaihanijin nichaonajaanu que niicha sirii te jitariin,” nae jetao acaauru rai Jesoso.

## 13

### *Itajenojoinerichaain Teenforone biha Jesosone*

*(Mt 24.1-2; Lc 21.5-6)*

<sup>1</sup> Inae nii Teenforo caje mituha cuha Jesosone jana jetaote rai jetao:

“Cacha relaera, jataain caohatiin ajeri caje ichanohiniha caa Teenforone coaraaina,” naa rai aina nerelanacaauru caje leinjiine jaun jetaote:

<sup>2</sup> “Jataainte niqui caohatiin tasiojoaain ichanohineein coaraai. Nete inae turuha cojoanonaane bana, nii leinjiinijin nenereein caa ajeri ita ichoae teein ichanohineein inaraacha coarajei, satiin itajenojoiniha curichaaine jaun,” naain jetao aina nerelanaa tonorae Jesoso.

### *Nacooauneein tururichaain Cana Coaunera Cojoanonaane*

*(Mt 24.3-28; Lc 21.7-24; 17.22-24)*

<sup>3</sup> Nii baiha jetaote, nii Teenforo coarajeein rohan nenea Olibo bichataneu cue jetao aina nerelanacaauru aina Jesoso. Inae ecu turuuruhane jaun nelauriariin lauhecoba Jesosone jana jetaote:

<sup>4</sup> “Chatohanai janonaa banana nunuhereein nitohanai. Chatohanaina jana, inae jataain cataainjian nitohanaine jana coaarareein,” naain caje bajaauruha jelai teteriin, Fedoro, Saantiaao, Joaan, Aanderesi, naaonjoainurine jaun jetaote: <sup>5</sup> “Inara coritaain niha chunine coataa caohachaain nainaan neeuche. <sup>6</sup> Arajiiichurute canuniha nocoetiinchuru turuhin: ‘Canune Curisito neeunra,’ naa uuruhane, arajii cachaauru nii acaauru coritaauruhane esenetaa cuurureein. <sup>7</sup> Jiaonriha: ‘Ecuuru ecuurute ne sonaana,’ naain coitucuhichene nesooneein casiichene. Nitohaneinte nunuheca cureein. Nete caa caitonjoan cojoanonaa satono que turuhane jaun ainenereein. <sup>8</sup> Laurihu laurihu nenacaauru cachaaurute, leeochoauru aina nejerateein, ita que nererojoecaain niha cuurureein. Jana leeocho atane que ichaonacaaurute, leeocho atane que ichaonacaauru aina sonaana que niha cuurureein. Chaentechu araai lauriin aihane jaanru, jataain mijiaaaineein niha cureein carora tabai. Nii janate, niha cureein mijitena. Niite aasaaeriin necairichanaa nunuheniha cureein.

<sup>9</sup> Aihane jaun caohachaain nainaan neeuche. Canu corenihate, cocoinanacaihuru, reychuru, naaonjoainuri bijiu inara teeuruhane janate, sinacocacuru asaecuru teein inara bisiha cuurureein. Nitohanein inara teeuruhane banate, esinae rauhijiriin canuneein nihanune biha curiquicheein acaauru rai. <sup>10</sup> Jaiti nitohanein satono que turuenihane ajinihate, satiin cachaauru chauratane sacutaain lauri lauri nenacaauru rai caa caitonjoan nosa caje nichoteeururichaine beebejiha curiquicheein. <sup>11</sup> Aihane jaun, cocoinanacaihuru rene inara amaauruhane, jiaonriha acaauru rai ereeichene jaaque tonajeein cuichene. Inae ecu ereeichene coina turuhichene coatiha inara aitorihcheein. Cana Coaunera aitoroatenojoin Cana Coaunera Suujue letononeeinte aitoriquicheein. <sup>12</sup> Rai nejeraauruhachate nejeraauru colurujihate colurujihate cuurureein acaauru inacaauru. Jana rai calaohichuruhachate colurujihate cuurureein acaauru inacaauru. Nii janate rai inaca colurujueeuruha acaauru calaohichurune jana, acaauru ateinaa cuurureein. <sup>13</sup> Canu cachanein neeichene corenihate inara cotaairiin

inara coaraa cuurureein satiin caa chauratane sacuritaain nenacaauru cachaauru. Nete nitohaniha sainejeein satono que tiaain caitoonjoan tonoraain neite ichoteratenojoiniha cureein.

<sup>14</sup> Aihane jaun caa reretaain aonaain tonoraauche. Inae nii Teenforo asaae jelai teein Cana Coaunera que banijiaain *altar* ichoae ecooca Cana Coaunera que nejeratenaa casicheine coaraquichene, ichatane jana cuhin sorooruhine Jodea ichaonacaauru. <sup>15</sup> Ecuun rai loreri satono coarana ichoae niha chunine jana niha nitohanaine, jiaonriha rucuhene niha natiin roconaa coaucane. Rauhijiriincha fauhi amuhine. <sup>16</sup> Jana ocoana jana nihane jana aihane, jiaonriha jelaiha nejenohin cajione ranaa coaucane. <sup>17</sup> Jataainte cairichaaajoaurureein nii cojoanonaa que inae turuhane bana ausirineein nenacaauru enecuru, sisihajeein canaanai sirichaauru, naonjoainuri. <sup>18</sup> Nabana elohena bana niha nitohanaine coataa Cana Coaunera bajaauche inara. <sup>19</sup> Cana rai chauratane coaunaain nihalu Cana Coaunerane baiha, nitohanai necairichanaa coaraa chariji banane que airijiinte, jataain niha cureein necairichanaa cojoanonaa. <sup>20</sup> Nii necairichanaa cojoanonaa sarotiaeniha Cana Coaunerane, nerihei chuni nichotei nii caje. Nete rai cachaneein janijiin niicha ranojoinunri jataain belaihane jaun, nabana nitajeeuruhane coataa nii cojoanonaa sarotiareein.

<sup>21</sup> Aihane jaun chunocoha inara rai: ‘Caute ne Mesihasi. Ecute ne,’ naa inara rene turuhinne, jiaonriha esenetaaichene. <sup>22</sup> Mesihasi niha nocoetiinchurute *profetane* lanaala nenacaaurune maajeeichuru, inara coritaa cojoelanaacojoai ichaa cuurureein. Janijiin Cana Coaunera ranojoinuru niha natiinte coritaurureein. <sup>23</sup> Aihane jaun, caohachaain necohalajiin itolereenein neeichene coinane caraajenihane inara rai aitoon, que nainaan neeichene coina,” nae jetao aina nerelanacaauru rai Jesoso.

*Nacooauneein tururichaain cacha caje nejanoanaa Curisitone*  
(Mt 24.29-35, 42-44; Lc 21.25-36)

<sup>24</sup> Niritiin jetaote: “Nitohaneein inae niha necairichanaa cojoanonaane baihate, nocoena niha enotone jana, atene netonai conoenereein. <sup>25</sup> Nii janate, dede cajene maajeeichuru naluhacoaa arasijieeurune jana, nesoone caaun rijijijianiha cuurureein dedeeu nenacaauru netonai. <sup>26</sup> Nitohanihane janate, itolere ichana nainihane coarateein nelate que nelateein dede sacari jana fauha uhanu canu Cana Coaunera Calaohi cacha caje nejanoanaa nichaaunne jana coariquicheein. <sup>27</sup> Acate rai anjeraauru letoareein, nii janijiin niicha raauri, rai cachaauru taojiaain raauruha satiin caa chauratane tinonoritiin nuurihuru cajeeurune maajeein, dede uurihuru cajeeurune maajeeichurune coina.

<sup>28</sup> Caohachaain nainacuche, caa uhera que cuaain inara relaanune que. Inae satiin naluha nune alone baiha nacooauneein nalojoaa uherane coaraquichenete, caje inae nichuuntaa ajaanaane coitucuhiche. <sup>29</sup> Nii rijijieein nainacuche caa caitoonjoan rijijieein aihane coaraquichene, canu Cana Coaunera Calaohi cacha caje nejanoanaa nichaaune inae nichuuntaa turuhanune que. <sup>30</sup> Esinae rauhijiriine aitoon, jaiti ooreniha ena caa satiin canu aina nenacaaurune janate, <sup>31</sup> nitajereein caa chauratane aina dede. Nete lae caa aitocooaunne jaa quere, caa aitocooaunne rijijieein que tihane reeintiaain nereein.

<sup>32</sup> Nete laen: ‘Naaonjoain cojoanonaa banate ecu tiaain aicheein,’ nene naain nii chuni coitucuera. Niheichu dedeeu nenacaauru anjeraauru niha natiin coitucuuruhi. Niheichu canu niha natiin coitucuhaaun, leinjiin Ofaachate coitucujue. <sup>33</sup> Niique tihaneree tiaain caohachaain nainaan

Cana Coaunera bajajeein neeuche. Coatiha coitucueraai nii airichaaaine jaa cojoanonaa. <sup>34</sup> Acate coriaji ataneu cunaa jeriha leinjiin cachane, rai cachaauru que loreri beraichateein, le cacha cachaauru rai amihanenaa teein, nii loreri beraicha que beraichatenajaain ratirinajaain amuhane rijjie. <sup>35-36</sup> Aihane jaun, caohachaaain nainaaain turuhane cohajeein neeuche inara. Coatiha coitucueraai turuha nii loreri erorane, sona naluque, dede cataaun, ataohari irihanau, janone, naaonjoaainijin, turuhane jana letona jatoroaaain neneeichene coataa. <sup>37</sup> Caa inara rai aitocoaaunne rijitoeine leeochoauru rai netonai aitoon, caohachaaain nainaaain cohaquichene coina,” nae jetao, Fedoro, Saantiaao, Joaan, Aanderesi, naaonjoainuri rai Jesoso.

## 14

*Jesoso mucuuruhane coina ita taojiaauruhane*  
(Mt 26.1-5; Lc 22.1-2; Jn 11.45-53)

<sup>1</sup> Coroata janohin lanajeeca jorerera colane ichanohin faan quihuruhane jaan beseta fasocoane jana jetaote, chunocoha que coritaerateein, Jesoso mucuhin ateinaauruhane jaan lera arihure saseredotecuru curuaanaacuru aina Moisesa aitoonjoan que cacha relaaaureraauru. <sup>2</sup> Nii jana tabaauru jetaote:

“Nainihe nitoohanai ichacaache beseta nunuhe banane. Nabana cana que nejerateeuruha ecu aina nenacaauru cachaaurune coataa,” naaure jetao ecu ita rai.

*Alabastro caje ichanohi que curuhin nena jujuai choro ha leinjiin ene*  
*Jesoso ichooaene*  
(Mt 26.6-13; Jn 12.1-8)

<sup>3</sup> Betaniau cosibi ruhecaeraneein niicha curuaateuri Simoon loreri asaae turuhin, ecu nelauriana najaan rori choae lauhecoha Jesusone jana jetaote, *alabastro* caje ichanohi que curuhin- ujuane nejesina caje ichanohi jataain coretiin nena jujuai nardo amaain turuha cue leinjiin ene. Nitohaneein turuhin jetaote nii jujuai curu raiheitiin Jesoso couturi choae chorohe. <sup>4</sup> Nii jana ecu neein coarajeeurera tabaauru jetaote obajeein jetao:

<sup>5</sup> “Chanuna que cairichaaihuru coroatajanena richaae, nichata fashai denario core jeeoni amurijiriin nii jataain coretiin nena jujuai nardo que necoretelanaala joaereen nii jujuaain ichanohi jaohiche,” naain jetao nii ene que ereein nocoeje chanuure. Nii le denario jetaote le jiiichoo amihanenaa core ne.

<sup>6</sup> Nii jana jetaote acaauru rai:

“Coa nocoeje chanuhin, coa rerohecaache. Jataain caohachate ichae catohaneein canu tein. <sup>7</sup> Itolere banate inara aina neeurureein cairicheihuru. Nii jaunte, acaauru coroatajanena jeriquichene jaan que, acaauru coroatajanena naineriquicheein. Jana canu, itolere cojoanonaa bana inara aina neriaauni. <sup>8</sup> Caa enete niicha ichana nainei ichae, cajabereeo jujuaauruhane jaanu que niicha rucujui nihane jaun. <sup>9</sup> Esinae rauhijiriine aitoon. Chunijihuunru chauratane sacuritaain nosa caje nichoteeuru richaaaine coina caitoonjoan canu ere beebejeeuruhane jaaurute, caa catohaneein canu jaberoco jujuaa caa enene jaan coaauca cuurureein. Nitohaneinte coaunojoi niha cureein,” nae jetao acaauru rai Jesoso.

*Jesoso coulurujia Jodasine*  
(Mt 26.14-16; Lc 22.3-6)

<sup>10</sup> Nii Jesoso aina nerelanacaauru lechoonca coroataja Jodasi Isacariote jetaote, saseredotecuru curuaanaacuru coaraa cue, acaauru aina ereein,

Jesoso rene amanajaane coina. <sup>11</sup> Nitohaneein acaauru rene turuhin amana-jaane coina acaauru rai aitoha Jodasine jaun jetaote, jataain corojeein rai coriqui tenaa jerecuruhane jaun, jelai nedaaoriha Jesusone que coacue, rene amanajaane coina Jodasi.

*Aina nerelanacaauru aina janotiin lenoniha Jesusone  
(Mt 26.17-29; Lc 22.7-23; Jn 13.21-30; 1Co 11.23-26)*

<sup>12</sup> Jorerera colane ichanohin faan quiin, Cana Coaunera rai carenero narejeen sooruhane jaan fasocoa beseta cojoanonaa nunuhe bana jetaote:

“Chu fasocoa cojoanotiin que lenonichaachene jaanu que lenone jaa cuha-caanune jeree,” naain jetao Jesoso caje bajaure aina nerelanacaauru.

<sup>13</sup> Niritocuruha raine jaun jetaote, coroatajai aina nerelanacaauru letoain jetao:

“Chajaain taa neseu cunichuche. Inae ecu turuhichene jana, baichaje cuhane acau baaibaaichaain cuujuiha leinjiin cachane jana eruhichene sacuuche. <sup>14</sup> Chaen inae loreri asaae enohane, nii loreri erora rai: ‘Cacha relaerate ii caje bajaerate, Chariji ucuha cuhane canu aina nere-lanacaauru aina lenonerichaanuhin fasocoa cojoanotiin que, naain bajaer-ate,’ naaiche rainete, <sup>15</sup> aca inara que ecuunetiin coaranai loreri asaae, cao-hatiin rucuhenojoneein nena ucuha seejoan coaratereein. Chaen inae inara que coaratiha nii loreri erorane, ecu teein janotiin cana lenonenu enoalaauche,” naain jetao, nii aina nerelanacaauru suujuateein letoanajae Jesoso.

<sup>16</sup> Nii jaun jetaote, nii neseu cuhin acaauru rai aitoha Jesusone rijijieein leinjiin cacha eruha cuure nii coroatajai aina nerelanacaauru. Nii jana jetao acaauru que leinjiin ucuha coaratiha nii cachane jaun, ecu teein fasocoa cojoanotiin que lenonecuruhane coina lenone jaaure.

<sup>17</sup> Inae nocohejihane jana jetaote ecu leeochoaauru aina nerelanacaauru aina turuha cue Jesoso. <sup>18</sup> Nitohaneein lenonecuruhane jaaun neein jetaote:

“Esinae rauhijiriin ena cau caniha inara jiniichaain lenoniha nenaate, canu que nesuujeein cacoluruheca cureein,” naa acaauru rai Jesusone jaun jetaote, <sup>19</sup> jataain inaderaain:

“Canuna ii coulurujuerichaaunte,” naain caje bajaure le cacha cachaauru. <sup>20</sup> Nii jaun jetaote:

“Ena, cau canu aina lechoonca coroatajai nequichene caje nena, canu jiniichaain canu ojaichu cuhane faan setejaain quichate acane. <sup>21</sup> Cana Coaunera Quiricha inoansi cuhane aitohane rijijieein itolereneein aihanete ne. Nete jataain cairichaojoareein nii caque nesuujeein cacoluruhera. Jataainte caohacharelu, nejanoaenihalu nii cachane,” nae jetao acaauru rai Jesoso.

<sup>22</sup> Nitohaneein lenonecuruhane ucuaetoha jetaote, faan mucuuriin Cana Coaunera bajaain, cataaun tacaain taturiin acaauru rai teein jetao:

“Nocoo caa quihuiche. Caate cajabereoneein nena ne,” naain jetao acaauru rai te Jesoso.

<sup>23</sup> Nii baiha, acaauru coconein nena bino curu mucuuriin, Cana Coaunera bajaain acaauru rai tihane jana jetaote, satiin ita rai leruune leruunein cooruhane baiha jetao: <sup>24</sup> “Caa canaacha coite canu coichana ne. Acate arajii cachaauru osa coreniha nijiaonrichaainne coina Cana Coauneraacha icharatei ichacaanne jerichaaunne jaan cojunacanein nena ne. <sup>25</sup> Esinae rauhijiriin nacoaunein caa baiha bino corihaaunni, Cana Coaunera Cojoanonaa necoahacha que neein ecu nena bino coha-nune reentiaain,” nae jetao aina nerelanacaauru rai Jesoso.

*Coitucuha nocoetelanaala nesuujuerichaain Fedorone biha Jesusone  
(Mt 26.30-35; Lc 22.31-34; Jn 13.36-38)*

<sup>26</sup> Nitohaneein jetaote, salmo que nenatein Cana Coaunera coroaecuruhane baiha jetao aina nerelanacaauru aina jiniiquiin Olibo bichataneu cue Jesuso. <sup>27</sup> Inae ecu turuhin jetaote:

“Enene cojoanotiin cuhanete, satiin canu esenetaaichene jianeein ita caje riaaneriquicheein. Nitohaneeichene cointate: ‘Carenerocuru beraicha sooruhane janate, cajihaneein riaaniha cuurureein carenerocuru,’ naain laenanohineein ne Cana Coaunera Quiricha inoaensi cuhane. <sup>28</sup> Nena inae ichanacaanne, jaiti Calileea turusiquichene ajiniha, canu inara ichoaachaniha ecu niha cureeunni,” naa acaauru rai Jesusone jana jetaote: <sup>29</sup> “Satiin ii esenetaauruhane jianecuruhane nihanatiin coatihana laen airinaaunni canu,” naa Fedorone jana jetaote:

<sup>30</sup> “Esinae rauhijiriin enene cojoanotiin cuhanete, jaiti coroata saain ereniha ataoharine jana, canu coitucuha nocoetelanaala nichata saain nesuujia curiquiin,” naa Fedoro rai Jesusone jana jetaote: <sup>31</sup> “Ti aina jiniiquiin ateinanohi nihanune cointa aitocuruhane nihanatiin, coatihana nii choitucuha nocoetelanaala nesuujerihaaunni,” naa Jesuso rai Fedorone jana jetaote leeochoaauru netonai jerichanetojoein aitocure.

*Jetesemani Cana Coaunera bajaa Jesusone  
(Mt 26.36-46; Lc 22.39-46)*

<sup>32</sup> Nii baiha jetaote, Jetesemaniineein niicha curuaateuri cuhin, inae ecu turuuhane jana jetao:

“Cau nelauriaain canu cohacuchene, inara tonohanau Cana Coaunera bajani,” nae jetao aina nerelanacaauru rai Jesuso.

<sup>33</sup> Niritiin jetaote, Fedoro, Saantiaao, Joaan, naaonjoainuri amaain cuhin jetao, jataain inaderaain nererojoecae Jesuso.

<sup>34</sup> Nitohaneein nererojoecaain jetaote: “Jataain onaanajaanu rijitocojooante inaderae casuujua. Cau nedaauche inara. Jiaonriha siniichene. Nirijieein ichaajojein canu cohacuche,” nae jetao acaauru rai Jesuso.

<sup>35-36</sup> Niritiin ratirinajaain acaauru caje nita cutiin jetaote, notoroaain atane que nauri temetaain jetao: “Ofa, coatihana ii rai caaintajerihei caa necairichanaa tabai caje canu ichoteratena jereeine. Nena canu jerichaanne rijijieein ichaaine jereneun, ii jereeine rijijieein ichaau,” naain jetao Cana Coaunera bajaa Jesuso. <sup>37</sup> Inae Cana Coaunera bajaane baiha, jelaiha acaauru coaraa cuhane jana jetaote, sinihuruhane jana erunajaa cue. Nii jaun jetaote: “Inaenachura siniite Simoon. Jataainachura aasaeriinijin sinirena abaantaain ichaajojena naineneite. <sup>38</sup> Nabana osa que nesaruquichene coataa sinirena abaantaain ichaajojein Cana Coaunera bajaache. Jataante niqui inara suujua cuhane ainaa jeriquiche. Nete jataain abaantasine inara jaberoco,” nae jetao Fedoro rai Jesuso.

<sup>39</sup> Niritiin jetaote, nacoaauneein jelaiha cuhin jerichanetojoein Cana Coaunera bajaa cue. <sup>40</sup> Inae Cana Coaunera bajaane baiha, acaauru coaraa cuhane jana jetaote jataain siniitooruhane jaun, sinihuruha aina nerelanacaaurune jana erunajaa cue Jesuso. Nii jaun jetaote, nii tonaain tonoraauruhane jaanu coitucurene. <sup>41</sup> Inae nichata saain jelaiha cuhane baiha nacoaauneein turuhin jetaote:

“Jaitinachura neloraain siniichete. Inae laen necha aansaineein osaaonacaauru bijiu Cacha Calaohi nichaane mucuhin teeuruhane rai nihane cojoinaca que tiha. <sup>42</sup> Chajaain nimichucuchete amuhacache. Inae

tajiha nichuutaa canu belaihane saijieein canu colurujuera,” nae jetao aina nerelanacaauru rai Jesoso.

*Jesoso mucuhin amaauruhane*  
(Mt 26.47-56; Lc 22.47-53; Jn 18.2-11)

<sup>43</sup> Niritiin jaiti ereerejiha aina nerelanacaauru aina Jesusone jana jetaote, sabere, enuha, naaonjoainuri que biji achunequiin arajii cachaauru que corianeraain turuha cue nii Jesoso aina nerelanacaauru lechoonca coroatajaneein nenea Jodasi. Acaauru letoaauruha saseredotecuru curuaanaacuru aina Moisesa aitoonjoan que cacha relaaureraauru, Joriocuru bichauhenaauru, naaonjoainurine jaun. <sup>44</sup> Nitohaneein que nesuujueein colurujueein jetaote: “Nii quiicha meri lioracaite acanereein. Chaen mucuhin caohatiin biji ichojoaain amaauche,” naain jetao amanajae Jodasi.

<sup>45</sup> Niritiin acaauru amaain jetaote, inae rene turuhin rohan nichuutaain jetao:

“Cacha relaera,” naain jetao Jesoso meri lohite Jodasi. <sup>46</sup> Nitohaneein jetaote, Jesoso mucuhin amaaure.

<sup>47</sup> Nii jana jetaote, sabere mucuhaneecha neeoriin leinjiin saseredotecuru curuaanaa cacha uricho beuhite, ecu acaauru aina nenea cacha. <sup>48</sup> Nii jana jetaote, nii mucuha cunacaauru cachaauru rai jetao: “Chanuna necha aansai asijiauto mucuera tocohaneein enuha, sabere, naaonjoain uhaain canu mucuha uhiche. <sup>49</sup> Itolere cojoanonaa banane inara jana Teenforo asaae neein cachaauru relanajacoon. Nii jana chabana canu mucunajaaohееiche. Nete Quiricha inoansi cuhane aitoha Cana Coaunerane nainaaichene cointe caa aaiche,” nae jetao nii mucuha cunacaauru cachaauru rai Jesoso.

<sup>50</sup> Nii jana jetaote, ecu jelai Jesoso ratiriin, satiin soroore aina nerelanacaauru. <sup>51</sup> Nii jana leinjiin enamanaa jetaote, shojoera que shoheshohequiin caaijie cuujihane jana jetao, acaentonai mucuuruhane jaun, <sup>52</sup> nii shojoera ratiriin machohequiin cha colane soroe.

*Jorioocuru bichauhenaauru- niha chatohanaine rucuheraneein nenacaauru- Junta Suprema acatiha niha Jesusone*  
(Mt 26.57-68; Lc 22.54-55, 63-71; Jn 18.12-14, 19-24)

<sup>53</sup> Nitohaneein saseredotecuru curuaanaacuru curuaana rene Jesoso amaauruhane jana jetaote, satiin ecu netaojiaaure saseredotecuru curuaanaacuru, Joriocuru bichauhenaauru, Moisesa aitoonjoan que cacha relaaureraauru, naaonjoainuri. <sup>54</sup> Nii jana jetaote, nita coarajeein caaijie cuuje Fedoro, saseredotecuru curuaanaacuru curuaanaa loreri chajeniha tiaajeein. Inae ecu turuhin jetaote, Teenforo beraaihurera aina nelauriaain usi que nichaatiha nedae.

<sup>55</sup> Nii jana jetaote, Jesoso sohin jaaoruhane jaanu lera airihure saseredotecuru curuaanaacuru, chaen satiin Joriocuru bichauhenaauru- *Junta Supremacuru*, naaonjoainuri. Nejetaote, nii chatohaneein teeuruhane jaanu lera eruurene, <sup>56</sup> nitohaneein nohaneein colurujueeuruha arajiin cachaaurune saijieein ita rijitoein aitocurenihane jaun. <sup>57</sup> Nii jana tabaauru jetaote, nimichuhin nechu jataain nohaneein:

<sup>58</sup> “Canacaanu uricho quene aonacaun: ‘Caa cachaauruhacha ichai Teenforo itajeeinne, nichata janojoein cuhane leecha ichana naineeun cachaauruhacha ichanohinelanaala,’ naane jana,” naain jetao colurujueeure.

<sup>59</sup> Nejetaote, ita rijitoein cuaain colurujeeurenihane jaun esenetana nainecurene.

<sup>60</sup> Nii jana jetaote, sating nii ecu nenacaauru cataaun nichaauraain jetao: “Chatohanaina ichaaite, toon toritiin icholuruhecuruhane jana tonorana-jaeneein,” naain jetao Jesoso caje bajaee saseredotecuru curuaanaacuru curaanaa. <sup>61</sup> Nejetaote, tonoraelanaala inauheneecha aonaje Jesoso. Nii jaun jetaote, nacoaauneein rai jetao:

“Iina itolere icharaanu que turuha uheni Cana Coaunera Calaohi Mesihasi neei,” naain caje bajaa saseredotecuru curuaanaacuru curuaanaane jana jetaote: <sup>62</sup> “Ejeen, acaneeunchujanrana. Inarate itolere ichana nainera neein nenea Ofa raotono nichajai que lauhecohanune jana cacoarariquicheein. Chaen techu, inae ecu tihane bana dede caje, dede sacari jana uhin fauha uhanune jana canu coariquicheein,” nae jetao rai Jesoso.

<sup>63</sup> Nii jaun jetaote, obaecane cojunacaneein cajione soaisoain jetao: <sup>64</sup> “Cha nenacaeneena coara lateriquiche. Inara uricho quete, inae Cana Coaunera Calaohiniha nocoetiin irihane aonaquiche. Tonaquiche jana nii que,” naa acaauru rai saseredotecuru curuaanaacuru curuaanaane jana jetaote, sating ita suujua rijitoein nii coulurujeeuruhane ujuaaihoneein aca ohane coina aitocure.

<sup>65</sup> Nii jana tabaauru jetaote, coluneeinchuru nota conajaain bisiin jetao: “Aihane caa ii bisicha coitucuhin beeu,” naauruhane jana jetao, Teenforo beraichacurune maajein nomeri faohacure.

*Jesoso coitucuha nocoeteniha Fedorone*  
(Mt 26.69-75; Lc 22.56-62; Jn 18.15-18, 25-29)

<sup>66-67</sup> Nii jana jetaote, loreri chajeniha usi que nichaatiha lauhecoha Fedorone coariin: “Ii netonaite Nasarete cocoaicha Jesoso aina amuhemuhena neei,” nae jetao Fedoro rene turuhin saseredotecuru curuaanaacuru curaanaa coseenra.

<sup>68</sup> Nii jana jetaote: “Coatiha nii carai aitohine jaan cacha coitucuhaaun. Chaa que chaainti nii aitohi,” naain jetao neesuujue Fedoro. Niritiin jetaote, jelai caje amuhin acujuaniha neorihane jana, inae ere ataohari curaanaa. <sup>69</sup> Nii jana jetaote, nacoaauneein Fedoro coaraain leeochoauru rai jetao:

“Caa netonaite, nere tonoraeraneein nenea ne,” nae jetao nii coseenra, leeochoauru rai.

<sup>70</sup> Nejetaote nacoaauneein nesuujue. Nii baiha neoriin jetaote, nacoaauneein Fedoro rai jetao:

“Rauhijiriinte bajiaa acaauru caje nenea neei. Nii choae tacaain Calillea cocoaicha neei inatiin,” naaure jetao nii cuu nenacaauru.

<sup>71</sup> Nii jana jetaote: “Esinae rauhijiriin Cana Coaunerate coaraje, nii aitocoichene jaa cacha coitucuenihanune,” <sup>72</sup> naa Fedorone rijieoritiiin irihane coroata sating itaoharine jana jetaote: “Jaiti coroata saain ereniha ataoharine ajinihate, cacoitucuha nocoetelanaala nichata saain nesuujueriquiin,” naalu rai Jesosone coacuhin jetao chanae Fedoro.

## 15

*Coberenadoro Filato acatiha niha Jesusone*  
(Mt 27.1-2, 11-14; Lc 23.1-5; Jn 18.28-38)

<sup>1</sup> Nii jana jetaote, jataain janohetiin netaojiaaure saseredotecuru curuaanaacuru aina Jorioocuru bichauhenaauru, Moisesa aitoonjoan que cacha relaaureraauru, chaen niha chatohanaine rucuheneein nenacaauru-

*Junta Supremacuru*, naonjoainuri. Nitohaneein jetaote, Jesuso biji ichojoaain amaaain Roma curuaanaacha letoai Jorionelanaala nenea- coberenadoro Filato rai tiha cuure. <sup>2</sup> Inae nii Filato rene turuaauruhane jana jetaote:

“Iina Jorioocuru Curuaanaa *Rey* niha,” naa rai Filatone jana jetaote:

“Ejeen. Esinae rauhijiriin acanichaaunne quete aitohi,” nae jetao rai Jesuso.

<sup>3</sup> Nii jana saseredotecuru curuaanaacuru jetaote, jataain araai laurii itolere ichaain nihane que aitiin colurujeeure.

<sup>4</sup> Nii jaun jetaote, nacoaauneein rai jetao:

“Aonaun, jataain araai laurii itolere ichaain neeine que aitiinte icholuruecure. Chanuna jana tonaain acaauru tonoraeneei,” nae jetao rai Filato.

<sup>5</sup> Nejetaote, tonoraeniha Jesusone jaun: “Chatohanihane jaunna caa catoonraene,” nae suujua kuhane Filato.

*Ateinanohi niha Jesusone coina rucuecuruhane*

(*Mt 27.15-31; Lc 23.13-25; Jn 18.38-19.16*)

<sup>6</sup> Nitohaneein beseta bana naineein niha chuni colurujuenojoine jetaote, jerecuruha nii cachaaaurune rijijieein jianenajaque Filato. <sup>7</sup> Nii jana jetaote, caresero kuhane ne leinjiin cache Barabasineein niicha curuaatehuri. Nii Barabasi leeochoauru aina acaauru curuaanaacuru que nejerateein sonajaain jaaorera ne. <sup>8</sup> Nii jana jetaote Filato rene turuhin, nii beseta bana naineein ichanajaaocane rijijieein ichaa Filatone coina caje bajaure cachaauru. <sup>9</sup> Nii jaun jetaote, acaauru rai jetao:

“Aihane jaunna, inara Jorionequichene Curuaanaa *Rey* jianichaaunne jeriquiche,” nae jetao acaauru rai Filato, <sup>10</sup> saseredotecuru curuaanaa amurijiriin coitucuhin cachaauru relaa Jesusone jaun, arajii cachaauru esenetaain sacuuruhane jaun que necoelai caaun mucuhin rai teeuruhane que nainaane jaun. <sup>11</sup> Nejetaote, cachaauru suujuau tacaure saseredotecuru curuaanaacuru, Barabasi jianeratecuruhane coina. <sup>12</sup> Nii jana jetaote, acaauru rai jetao:

“Chatohanai jana ichacaaunne jeriquiche caa Jorioocuru curuaanaa *Rey*neein inaraacha curuaatei aina,” naain acaauru caje bajaa Filatone jana jetaote:

<sup>13</sup> “Coroso que teeinene jerichaanura,” naauruha ehequiinne jaun jetaote:

<sup>14</sup> “Chatohanai baasonajian ichae,” naa acaauru rai Filatone jana jetaote, nacoaauneein ehequiin jetao:

“Coroso que teechaaura,” naaure cachaauru.

<sup>15</sup> Nii jaun jetaote cachaauru aina caohachaaain nenea jerihane jaun Barabasi jianeein, Jesuso bisichatihane baiha acaauru rai te Filato, coroso que teeuruhane coina.

<sup>16</sup> Nii jana jetaote, nii cocoainanacai loreri chajeniha Jesuso amaaain, sondaro nejesinanejeein ecu satiin netaojiaaure. <sup>17</sup> Nitohaneein netaojiaain jetaote, que cajione jichohajiojoaai lanajai curujuaain, ojoa caje ichanohin comai lauriaaure coturi que. <sup>18</sup> Nii baiha jetaote:

“Acaneein neeine Jorioocuru Curuaanaa *Rey*,” naaure jetao ehequiin nechu jataain cairichaa que nocoatijiaa.

<sup>19</sup> Niritiin jetaote, enuha que rai couturi faojoaain coulunecuruhane baiha, nechu jataain que ninichaaajia nacatiha neseonriaaure soondarooru.

<sup>20</sup> Nitohaneein jataain que ninichaaajeeuruhane baiha jetaote, nii cajione lanajai jichohajiojoai que niicha curuhacuri rocohin jetao, rai cajione esine curujuaain, jelai caje amaaain coroso que tiha cuure.



*Coroso que Jesoso teeuruhane*  
(Mt 27.32-44; Lc 23.26-43; Jn 19.17-27)

<sup>21</sup> Nii jana jetaote, ocoana caje caaujiha Alejaandoro, Rufo, naaonjoainuri inaca leinjiin cache Sirene cocoaicha Simoonne jana coaraain jetao cotihacure, nii Jesoso teeuruhane jaanu coroso amaane coina.

<sup>22</sup> Nitohaneein jetaote, Golgotau Jesoso amaaure. Golgota naane jetaote, “Niha couturi bejeronaa jaan,” naane aite. <sup>23</sup> Inae ecu turuhin sacari mirra jujuaain nena que jasiiteein bino que cocoaanaa jerecuruhane jana jetaote conaa jerene Jesoso. <sup>24</sup> Nitohaneein cairichaaain jetaote coroso que teein, “Chariji raineeincha nedareein,” naain que nocoatijiaain ecu nejesinajeein ita rai Jesoso cajione chaluure soondarooru. <sup>25-26</sup> Janone nichae nuna macohi ichoae teejia enotone jana coroso que teein jetaote: Jorioocuru curuanaa niha nocoetohane jaunte, “Jorioocuru curuaanaa *Rey* ne,” naain que aitiin, laenanohineein nena tabara teure coturiniha. <sup>27</sup> Chaen jetaote ecu aina corotajai asijiautooru teure coroso que, leinjiin raotono nichajaique, leecha rai najaabiji nichajaique, naaonjoain. <sup>28</sup> Nitohaneein jetaote: “Necha ansai asijiautoorunein nena rijijieeinte nereein,” naain laenanohineein niha Cana Coaunera Quiricha inoaensi cuhanene nainae.

<sup>29</sup> Nii jana jetaote, coturi rurujuaain:

“Ichalaraa. Chajaain aihane Teenforo itajeein nichata janojoin cuhane nacoauneein michunaa jereeine rijijieein <sup>30</sup> ichaajenihane ijabereeo ichoterateein coroso caje faau,” naain jetao Jesoso nocoeje chanuure satiin ecu situnacaauru.

<sup>31</sup> Saseredotecuru curuaanaacuru, Moisesa aitoonjoan que cache relaaureeraauru, naaonjoainuri netonai jetaote:

“Leeochaauru ichoteratiha niqii, nete raajenihane jaberoco ichoteratena nainene. <sup>32</sup> Chajaain aihane caa coroso caje fauhine Mesihasi-Israelitaauru curuaanaa *Reyte* coaraain esenetaacache,” naain jetao que ninichaajeeure nii Moisesa aitoonjoan que cache relaaureeraauru. Nii ecu jiniichaaain coroso que nenacaauru netonai jetaotechu Jesoso nocoejechanuure.

*Oha Jesusone*  
(Mt 27.45-56; Lc 23.44-49; Jn 19.28-30)

<sup>33</sup> Nii jana jetaote, enoto chujutora caje coauneein nunuhetein nocohena ne satiin caa chauratane nuna macohi ichoae teejiha sonanereentiain. <sup>34</sup> Nii rijieeoritiin jetaote, jataain tonijiaain jetao:

“Eloi, eloi, lema sabactani,” naane jetao: “Cana Coaunera cacorataaneun, chanuna catohaneein canu nainatejeei,” naa jetao aite Jesoso.

<sup>35</sup> Nii jana nii ecuneein aonajeeurera tabaauru jetaote:

“Aonacuche *profeta* inoaensi Eliasi cotihacate aite,” naaure jetao ita rai.

<sup>36</sup> Nii jaun jetaote, leinjiin acaauru caje nena cache jetao, jeluhariin cuhin cajione que bino baaso elohanti sisiaain amaain jetao, Jesoso rai sijirichae jiarana nujuan macohi que teein cohane coina. “Coa rohecaachete aihane coroso caje fauha uha Eliasine coaracaache,” naain.

<sup>37</sup> Nii jana jetaote, jataain tonijiaain auhaquiin inae ohe Jesoso. <sup>38</sup> Nii jaun jetaote, ecui nichajai caje nunuhetein ecoai nichae cuhin nesoaiheite nii Teenforo bujuatecuruhane jaan cajione. <sup>39</sup> Nii jana, ecu neein coarajiha Roma rai soondarooru curuaanaane jana niritiin oha Jesusone jaun jetaote:

“Esinae rauhijiriinte, Cana Coaunera Calaohinecaiha caa cachara,” naain jetao ecu coaraje.

<sup>40</sup> Chaen enecuru tabaauru jetaote, caje icharajeriin neein coarajeeuruhane jana, ecu acaauru aina ne Maadala bene Mariha, chaen Jose ocoala

Saantiaao neba Mariha, chaen Salomee, naaonjoainuri. <sup>41</sup> Nii ecu neein coarajeeurera enecuru jetaote, aina cuhin Calileea niha Jesusone bana coroatajaneraneein nenacaauru ne. Chaen jetaotechu, ecu neeure arajiin leeochoaauru cachaauru, Jerosaleeun cuha Jesusone jana aina cunacaauru.

*Jesoso jaberoco rucuhecuruhane*  
(Mt 27.57-61; Lc 23.50-56; Jn 19.38-42)

<sup>42</sup> Inae nocoheca nebetacanaa cojoanonaa que janohane coinane jana, neruujeeuruha Jorioocurune jaa cojoanonaa jana jetaote, <sup>43</sup> Filato coaraa cue Arimatea cocoaicha Jose, Jesoso jaberoco bajaane coina. Nii Josete Jorioocuru rai nelateein nenacaauru Jorioocuru bichauhenaauru- *Junta Supremacuru* caje jataain nelateein nena ne. Acaentonaite tururichaaain Cana Coanera Cojoanonaane cohajeein nelu. <sup>44</sup> Nii jaun jetaote, rene turuhin inae oha Jesusone que aithane jaun cojoelatohane jaun jetao soon-darooru curuaanaa cotiharate Filato, esinae rauhijiriin ohane biha raine coitcuhane coina.

<sup>45</sup> Nii jana rene turuhin inae ohane bihane jaun jetaote Jose rai nii Jesoso jaberoco terate Filato. <sup>46</sup> Nii jaun jetaote, Jesoso jaberoco fauhin jataain cajione caohacha lino coreteein nii cajione que conajae Jose. Nitohanein conaacane baiha jetaote, ajeri jachu cuhane teein, rai bacuujuu fuhin ratiri ajeri jaberoco que. <sup>47</sup> Nii jana jetaote, ecu aina neein nii Jesoso jaberoco teeuruhane jaa jelai coarajeeure Maadala bene Mariha, chaen Jose neba Mariha, naaonjoainuri.

## 16

*O caje ichanaa Jesusone*  
(Mt 28.1-10; Lc 24.1-12; Jn 20.1-10)

<sup>1-2</sup> Inae situha nebetacanaa cojoanonaane jana jetaote, semana nunuhe cojoanonaa tomiho bana jataain janohetiin enanejeein mituhajiha enotone jana jujuaihuru coreteein amaain, que Jesoso jaberoco jujuaa cuure Saantiaao neba Mariha, Maadala bene Mariha, Salomee, naaonjoainuri. <sup>3</sup> Nitohanein cuhin jetaote ita rai:

“Chana jana cana rai nii fueraneein nena ajeri elonare,” naain jetao niqui cuure.

<sup>4</sup> Nejetaote coaracuruhane jana, elonanohineein ne nii ajeri seeonjoan fueraneein nena. <sup>5</sup> Nii jana nii ajeri jachu cuhane enooruhane jana jetaote, acaauru raotono nichajai que lauhaca leinjiin enamanaa soma-jaain tarararoti que cajionecohine jana coaraain nesooneetooore nii enecuru.

<sup>6</sup> Nejetaote, acaauru rai: “Coa nesooneetohache. Coroso que niicha teuri Nasarete cocoaicha Jesusona ariiche. Inae ichanaane jaun coatiha inae cau nihei. Nii teeuruhane jaan jelai coaracuche. <sup>7</sup> Chajaain jelaiha cauhin, Fedoro, chaen aina nerelanacaauru, naaonjoainuri rai: ‘Inae inara ajinihate Calileea cue Jesoso. Ucuaaete coariquicheein, inara rai aitoroetohane rijijieeincha, nanichuche acaauru raicha,’ ” nae jetao nii enecuru rai anjera.

<sup>8</sup> Nii jana jetaote, jataain nesooneetooruhane jaun chatatajanein jelai caje sorohin, nii chuni rai belanaala inauheneecha neeure.

*Maadala bene Mariha rai ecooca Jesusone*  
(Jn 20.11-18)

<sup>9</sup> Inae semana cojoanonaa nunuhe bana ichanaane baiha jetaote, nii suujua cuhane caaunsini moconajaera letono siricha- niicha rautailu Maadala bene Mariha rene ococoe jauriaanejeein Jesoso. <sup>10</sup> Aca jetaote, chanaain

inaderaauruha nii Jesoso aina nerelanacaaurune jana jetao, acaauru rene turuhin biha cue.

<sup>11</sup> Nitohaneein acaauru rene turuhin, jerichanejeein jaberoconeein ichaoha Jesusone coaraain biha cuha acaauru raine jana jetaote esenetaaurene.

*Coroatajai aina nerelanacaauru rai ocooca Jesusone  
(Lc 24.13-35)*

<sup>12</sup> Nii baiha jetaote, bero cuhane cuujeeuruha coroatajai aina nerelanacaaurune jana nejelauneein acaauru rai ococoe Jesoso. <sup>13</sup> Nitohaneein acaauru rai ococane coaraain, leechoaauru rai biha cuuruhane jana jetaote, nii acaauru niha natiin esenetaaurene.

*Niicha cocoainaaauri afosotooru rai, acaauruhacha ichaneni tiha Jesusone  
(Mt 28.16-20; Lc 24.36-49; Jn 20.19-23)*

<sup>14</sup> Nii baiha neeriin jetaote, lenoniha neeuruha nii lechoonca leinjiin aina nerelanacaaurune jana jetao, ecu acaauru rai ococohin, nii o caje ichanaane coaraain beeurera esenetana jerelanaala baasoneein rai suujua coaracuruhane caohate.

<sup>15</sup> Nii baiha jetaote: “Chajaain caa chauratane sacuritaain nenacaauru satiin cachaauru rai, nosa caje nichoteeururichaaaine coina jitariin caa caitoonjoan beebejenichuche. <sup>16</sup> Caa caitoonjoan beeichene jana esenetaain acauhanau tein nebaotisaerateite nichotiha cureein. Jana caa caitoonjoan beeichene jana esenetana jeriheichurute caseteco coaraa cuurureein. <sup>17</sup> Canu esenetaain canu ere tonoraain neeichenete canu neein nena rijijeein moconajaera letonocuru sitaain, nejelauneeichuru nereeuuru cuhane ereein, <sup>18</sup> acano niha natiin mucunaa naineein, naaonjoaain, corianiha natiin coichene nii chatohaneein baasoneein inara tenereein. Nii choae tacaain techu, cunaitenacaauru mucuhichene nerautaa cuurureein,” nae jetao niicha cocoainaaauri rai Jesoso.

*Dedeeu cuha Jesusone  
(Lc 24.50-53)*

<sup>19</sup> Niritiin niicha cocoainaaauri afosotooru rai irihane baiha jetaote, dedeeu iniin rai Inaca Cana Coaunera raotono nichajai que nelauriaa cuelu Cana Curuaanaa Jesoso. <sup>20</sup> Nii jaun jetaote, satiin chauratane sacuritaain amuhemujeein nosa caje nichoteeururichaaaine beebejiha cuuruhane jana jetao, nii acaauruhacha beebejei esenetana nainecuruha cachaaurune coina acaauru aina cuaain cojoelanaacojoai ichae Cana Coaunera.

## **Locasiicha laenai Ena Nenea Cana Coanera Ere**

### *Teofilo rai Locasiicha laenai quiricha*

<sup>1</sup> Arajii cachaaurute caa canacaanu jana Jesoso ichanohichuru lae-nacurelu. <sup>2</sup> Nii laenaeraaurute nunuhe caje coauneein aina amuhemu-jueein niicha coarai que canacaanu relaeraneein neeuruhane coina tenojoi-neein neurelu. <sup>3</sup> Nii jaunna, canuhetonai satiin coitucuurera caje bajaun, rai nunuhe caje coauneein colalajiin, caohachaain coitucuhanune coina. Nii jana, carai netonai jataain caohachaane jaunna carai nelatein neeine rai laenaauru Teofilo, <sup>4</sup> esinae rauhijiriin erenaa niha nii ii relaauruhane jaa esenetaain caohachaain coitucuhin neeine coina.

### *Nejanoarichaain cacha baotisaera Joanne biha anjerane*

<sup>5</sup> Jodea batane curuaanaa- *rey* neein niha leinjiin Jorioneein nenea Erodesine bana jetaote, ichoaelu leinjiin Cana Coanera aina caohachaain niha cachane coina rucuhaneein nenea saseredote Sacariasi. Aca jetaote, acauru inoansi saseredotecuru Abiasa lauri caje nenaanelu. Nii jana rai sinijera Isabeli jetaote, jauriaanejeein saseredoteneein nenea Aaroon nefoerateeuru caje nenaanelu. <sup>6</sup> Acauru jetaote, esinae rauhijiriin jini-iqiiin Cana Coanera esenetaain naitoonjoan tonoraain neurelu. Nitohaneunruhane jaun jetaote nii chuni- acauru que chatohanai ujuaitena nainecurenelu.

<sup>7</sup> Nejetaote, canaanai sirina inaeniha nii Isabeline jaun, leinjiinejei canaanai sirilanaala jiniiquiin biinaaneeurelu.

<sup>8-9</sup> Nitohaneein jetaote, inae Cana Coanera notaracae saseredote neeu-ruhane ichanohin jujui mocooruhane coina neeuruha Sacariasi laurichu-rune jaa cojoinacaque tihane jaun jetaote, nitohaniha saseredote neeu-ruhane ichaone jaun, Sacariasi que tacaajeein dadae, rori ichoaae teein jujui mocoha Teenforo asaane coina.

<sup>10</sup> Nitohaneein jujui mocoha enohane tonohanau jetaote, aerene neein Cana Coanera bajae bajaecure leeochoauru saseredotecuru aina cachaauru.

<sup>11</sup> Nii jana jetaote, Sacariasi rai ecocohin, nii jujui mocohane jaa rori raotono nichajai que jetao chujujuae Cana Coanera letono anjera. <sup>12</sup> Nii jaun jetaote, nii anjera coariin, nesoonetiin cojoaelatoha Sacariasine jana jetao:

<sup>13</sup> “Coo nesoonetohara Sacariasi. Bajaebajaequiine aonajian Cana Coanerara. Nii ii sinijera Isabelite leinjiin canaanai siricheeincha. Acate Joann neein curuaateriquiincha. <sup>14</sup> Chaentechu aina jataain raotojoein neriquiincha. Leeochoauru cachaauru netonaite nejanoa coroaecurureein, <sup>15</sup> jataain Cana Coanera rai nelateinnein nerichaaanne jaunra. Coatiha bino, abariinti, naaonjoainuri corinaainta. Acate esinae rauhijiriin Cana Coanera suujue que suujuecoha cureein nejanoaane ajiniha caje coauneeincha. <sup>16</sup> Acate, Cana Coanera Ere tonoraache Israeli cocoaichaneeichene coina ichareeincha. <sup>17</sup> Nii Joante turuha uheneni Cana Curuaanaa ajiniha cureein, Cana Coanera ere bera inoansi Irihasi rai niicha tei suujueque suujuequiin- Cana Coaneraacha ichana naini ichaain naaonjoaaincha. Acate aicheein calaohichuru aina jiniiquiin ita que suujua acatein neeuruha acauru fojiaraaurune coinara. Chaen erenaa tonorana jeriheichuru netonai erenaa tonoraain naaonjoaauruhane,

raotojoeein Cana Curuaanaa ranaa nainecuruhane coinara,” naa rai nii anjerane jaun jetaote:

<sup>18</sup> “Inasiine bajiaa nitohaneein nerichaaunnine esenetareeun, inae casinejera aina jiniiquiin jataain biinaanihacaanu natiinta,” naa Sacariasine jana jetaote:

<sup>19</sup> “Canune, Cana Coaunera letono Cabirieli neeun. Acate caletoe, ichei caa erenaa raotono bihanune coina. <sup>20</sup> Nete caa ichei aitocaaunne esenetaeneeine jaun, ena caje coauneei caa ichei caitoonjoan cojoinaca que tihanereein tiaain erenaachara neein neriquincha,” nae jetao Sacariasi rai nii anjera.

<sup>21</sup> Nii tonohanau jetaote, aerene neein Sacariasi cohacuruha cachaurune jana, jataain carajaane jaun jetao, “Chana jataain ichae carajaain Teenforo asaae caje mituenihane coina,” naain jetao ita caje bajaure nii aerene neein coharaauru.

<sup>22</sup> Nii jana jetaote, tabiicha acaauru rene eresilanaala Teenforo caje mituha uhe nii Sacariasi, acaauru rai biji nejesinaacha que bihajein. Nii jaun jetaote: “Jerihanete chaelai coaratiha Cana Coaunerane jaa coaracaiha Teenforo asaaera,” naaunre jetao ita rai.

Nii caje nunuhetein jetaote, erenaa nainelanaala nelu Sacariasi.

<sup>23</sup> Inae nitohaneein teenmforo asaae niicha ichanenu nainaan jetaote, jelaiha nenajaun cauha cue Sacariasi. <sup>24</sup> Nii baiha neeonriin, inae ausirinein jetaote, rai loreri caje amuelanaala ecuhacha ne saogui ateein rai sinijera Isabeli:

<sup>25</sup> “Cana Coaunera, caa catohaneein caete, nabana caque nererojoeccain jaolecooruha cachaurune coataa,” naain suujua ereein.

### *Nejanoarichaain Jesusone biha leinjiin anjerane*

<sup>26</sup> Inae saota ateniha canaanai siriha Isabeline jana jetaote, Calileea batane que nenea Nasareteu jetao, leinjiin letono anjera Cabirieli letoae Cana Coaunera. <sup>27</sup> Chariji bana quicha aina ichoaelanaala nenea leinjiin ranuna Mariha rene turuha cuhane coina. Nii ranuna jetaote, cana inoensihuru curuaanaa Rabiri nefoerateneein nenea Jose que nelanajaane rai ne.

<sup>28</sup> Nitohaneein cuhin jetaote, nii niha Marihane jaun rene turuhin enohin jetao:

“Ii renena bedaeniha uunra, Cana Coauneraacha rausiajei. Jataainte ii rausiaje Cana Coaunerara” naa rai nii anjerane jaun jetaote, <sup>29</sup> coariin nesoonetiin: “Chanuna caritiin ere canu rai,” naa suujua cuhane Marihane jana jetao,

<sup>30</sup> “Coa nesoonetohara Mariha. Cana Coaunera ii janiiji, ii rai caohacha ichaane coina. <sup>31</sup> Inae leinjiin canaanai siririquincha. Inae nejanoaane jana Jesuso neein curuaateenicha. <sup>32</sup> Acate itolere cacha amurijiriin itolere que nelateinnein, acaihaniji Cana Coaunera Calaohinein nenaanein coitucuha cuurureein cachaurura. Nii jana Cana Curuaanaa Cana Coaunera, nii rai foeratera inoensihuru curuaanaa neein nenea Rabiri rijjijeein reyneein tereein, inara Curuaanaanein nihane, <sup>33</sup> rai nere tonoraache inara Israeli cocoaichaneeichene, chabana satonoelanaala inara Curuaanaanein nihane coinara,” naa nii anjerane jana jetao:

<sup>34</sup> “Inasiine bajiaa nitohaneein leinjiin canaanai siricheeun nii chuni cacha aina ichaohanune coaalanaalata,” naa Marihane jana jetao:

<sup>35</sup> “Cana Coaunera Suujuete aiha suruaane rijjijeein ichoae fauha ureein, leinjiin canaanai siriine coinara. Nii jaunte nii canaanai iicha sirii, Cana Coaunera Calaohinereeincha.

<sup>36</sup> Ii araai Isabeli netonai techu, inae leinjiin canaanai siricheeincha. Inae biinaa nihane sainejeeinte inae canaanai siricha. ‘Canaanai sirina inaenhane jaun jete canaanai sirine,’ naauruhane jaate, inae saota atene rai canaanaicha. <sup>37</sup> Coatiha Cana Coaunera rai caaintaai chata,” naa Mariha raine jana jetaote:

<sup>38</sup> “Aihachuhisicha. Niicha belai nichaaunne rai aitohine rijijieein, niicha ichana jerei ichamiin Cana Coaunerara,” naa Marihane jana jetao, inae jelai caje amue nii anjera.

*Isabeli rene turuha cuha Marihane*

<sup>39</sup> Nii bana jetaote, erojoeein cuhin Jodea bichatane que nenea neseu cuhin Isabeli rene turuha cue jetao Mariha.

<sup>40-41</sup> Nitohaneein cuhin jetaote, inae ecu turuhin Sacariasi loreri asae enohin, Isabeli rai iriha Marihane aonaain jetao, Isabeli suri cuhane neein nerurujuae nii rai canaanai.

Nii jaun jetaote, Cana Coaunera Suujue que suujuequiin jetao, <sup>42</sup> jataain tonijiaain:

“Cana Coaunerate, itolere enecuru rai caohacha ichaane amurijiriin ichei caohacha ichae. Nii rijijieeintechu nii ii calaohi rai netonai caohacha ichae.

<sup>43</sup> Nii jaun chaneeinna jana nereun canu, Cana Curuaanaa nebaneeine saijieein carene turuha uhine coina. <sup>44</sup> Nii carene turuhin ereeine aonaainte, rachoojoenaa caaun canu suri cuhane neein nerurujuae carai canaanai.

<sup>45</sup> Nii jaunte raotojoeein neei, ii rausiaaeca nii ichei aitoha Cana Curuaanaane esenetaain tonoraaine jaun,” naa Mariha rai Isabeline jana jetaote:

<sup>46</sup> “Aihanuchujian.

<sup>47</sup> Canu suujuate,  
itolere niicha ichana naineei ichaain,  
canu ichoterateein niha  
Cana Curuaanaa  
Cana Coaunerane jaun  
coroaje,

<sup>48</sup> rai chaneein nenihanune saijieein  
canu janijiin canu rausiaaeca  
Cana Coaunerane jaun.

Nii jaunte  
ena caje coauneein  
Cana Coauneraacha rausiajeineein  
cacurujuatiha cuurureein  
itolere janonaa bana cachaauru,

<sup>49</sup> nitohaneein  
jataain canu belaiha  
itolere que nelateein  
itolere ichana nainera  
Cana Coaunerane jaun.

Leinjiin acaachate  
Acaneein ne.

<sup>50</sup> Nii Cana Coaunerate,  
cairichaojoaai itolere bana  
que suujua acateein  
ichaonacaauru coarae.

<sup>51</sup> Nitohaneein itolere niicha  
ichana naineei ichaainte,  
nii chaque nelatelanaala neeuruha  
nii itolere que nelaetoha

nocoetonacaaurune coina  
 icharaneein ne.  
<sup>52</sup> Chaentechu, curuanaacuru  
 reychuru nihanatiin,  
<sup>53</sup> inae cha nelanaala  
 neeuruhane coina ichae.  
 Chaentechu,  
 nii leeochoaauru rai  
 chaque nelatelanaala  
 cairicheinejeein nenacaauru  
 rausiaeraneein ne, itolere que.  
 Jana nii coriqui nebaneein nenacaaurute,  
 nii cha colane bijiicha baejeein  
 niha cuurureein.  
<sup>54</sup> Aihane jaunte  
 rai cacha Israelitanichaachene  
 cairichaaajoaain cana  
 coaraane jaun,  
 cana coroatajanereein,  
<sup>55</sup> inae nitohaneein ichaane coina,  
 cana inoaensi Abaraaun,  
 nii rai inamacooru,  
 naaonjoainuri rai aitohalu  
 Cana Coaunerane jaun,”

naain jetao Cana Coaunera coroaaje Mariha.

<sup>56</sup> Nitohaneein turuha cunajau nichata ateein Isabeli aina nihane baiha jetaote, jelaiha nenajaun cauha cuelu Mariha.

*Inae nejanoaa cacha coujunacateein baotisaera Joanne*

<sup>57</sup> Inae nejanoaane que tiha nii Isabeli rai canaanaine jaun jetaote, quicha cojoaajineein janoae rai neba Isabeli.

<sup>58</sup> Nii jana jetaote, rene turuhacoaain jetao coroaeca cuure rai naraaichuru aina rai laurijiracuru, rai caohacha ichaa Cana Coaunerane coitucuuruha raotojoeine jaun.

<sup>59</sup> Inae fosa janoniha nii canaanai nejanoane jana jetaote, amaain rai jabero-roco cari saerateein jetao, rai inaca Sacariasi curuaa que jetao curuaatenaa jerecure. <sup>60</sup> Ne jetaote jerelanaala:

“Aihei, jiaohine. Joaan neein curuaacanete caohachae,” naa rai nebane jaun jetao:

<sup>61</sup> “Chanuna. Inasiina niha niritocojoaain curuajaain charaaine coalanaala niritocohare rai curuaa,” naain jetao jerecurene.

<sup>62</sup> Niritiin jetaote, nii canaanai inaca coujueluhin: “Tohanriani rai curuaata,” naain jetao bajaare coitucuuruhane coina.

<sup>63</sup> Nii jaun jetaote, acaauru caje que teein laenaane jaanu bajaee jetao biji nejesinaacha que. Nitohaneein bajaain jetaote, “Joaan neein curuaacanete ne,” naain jetao laenae rai inaca, jaiti mituheniha rai nerene jaun. Nii jaun jetaote, satiin cojoelatoore cachaauru.

<sup>64</sup> Nii rijieeoritiin inae nacoauneein mituha nerene jaun jetaote, rachoojoeiin Cana Coaunera coroaaje Sacariasi. <sup>65</sup> Nii jana jetaote, nitohanihane jaun cojoelatoore rai laurijiracuru coarajeuurera. Nii jaun jetaote, itolere-neein Jodea bichatane batane sacuritaain coitucuhin ita rai beebejerejeto-curelu.

<sup>66</sup> Nii aonaain cojoelatiin jetaote: “Chatohanai neeinna nereein nii canaanai,” naaure jetao, esinae rauhijiriin niicha jerenohineein nena nihane coaratiha acauru que Cana Coaunerane coaracuruhane jaun.

*Rachoojoiha Sacariasine*

<sup>67</sup> Nii jana, nii canaanai inaca Saciasia suujueniha neein que beratiha Cana Coaunera Suujuene jaun jetaote:

<sup>68</sup> “Jataainte caohacha ichae  
Cana Curuaanaa Israeli Coaunerara,  
raotojoein neeuruha  
rai cachaaurune coina,  
ichoteratiha uhana jaunra.

<sup>69</sup> Nii jaunte,  
cana inoaensihuru curuaanaa  
Rabiri nefoerateneein,  
jataain itolere amurijiriin  
nelateein laraajiin nena letoae,  
jianacoon cana mitaeraanu quera.

<sup>70</sup> Inae catohaneein  
ichaane coinate,  
rai nere bera inoaensihuru  
que beratelura.

<sup>71</sup> Itolere  
cana que nererojoecaain,  
cana aina nejerateein nenacaaru,  
naaonjoaihunri caje  
cana mitaane coina  
aitohalune jaunte,

<sup>72</sup> nii baitena nainene,  
cairichaojoaain  
cana inoaensihuru coaraain  
aitohalune jaun,  
Cana Coaunerara.

<sup>73</sup> Nitohaneein  
esinae rauhijiriin ichaane coina,  
cana foeratera inoaensi Abaraaun rai:

<sup>74</sup> ‘Jianacoon,  
cana aina nejeratenacaaru caje  
jete cana mitaane,  
cha que casilanaala nere tonoraain  
leinjiin raacha nelateein,

<sup>75</sup> esinae rauhijiriin  
caohacha nejesina ichaain,  
baaso coacuelanaala  
inoenlu netojoein,  
itolere janonaa bana  
nerichaacheeinje,  
naain belu Cana Coaunera,  
cana foeratera inoaensi Abaraaun rai.

<sup>76</sup> Jana ii, cacalabineeinete,  
acaihanijin Cana Coaunera  
neein nena ere beraneein,  
Cana Curuaanaa ajiinchatera  
neein niha curiquiin,



jeriha Cana Coaunerane rijijieein,  
 turunaa nainihane jaanu  
 beebejeeine coina,  
<sup>77</sup> acaauru osa caje  
 acaauru ichoteraterichaain  
 Cana Coaunerane  
 coitucuuruha cachaaaurune coinara.  
<sup>78</sup> Jataain cairichaaajoaain  
 cana coaraane jaunte,  
 dede caje cana rai  
 ena nena Cojoanonaa teein  
 ne Cana Coaunera,  
<sup>79</sup> nocohena tabai caje nichoteein,  
 nii rai Cojoanonaa que  
 neconaa'in cuhin,  
 cana rai niicha tenojoin  
 raotojoeein rachoojoein  
 ichaonaanaja que  
 turuhacachene coinara,”

naain jetao nii canaanai inaca Sacariasi suujueniha neein que beratiha Cana Coaunera Suujue.

<sup>80</sup> Nii jana jetaote, esinae rauhijiriin Cana Coaunera Suujue que suujuequiin jetao, fohejeein cuujue nii canaanai. Nitohaneein fohejeein ichauhenaneein jetaote, catcha areroo amuhemujueein nelu, rai lauri Israelitacuru que necoitucueratihane reein tiaaajoaain.

## 2

### *Nejanoa Jesusone* *(Mt 1.18-25)*

<sup>1</sup> Nii nejanoa rai niha Jesusone bana jetaote, itolereneein cana rai chauratane sacuritaain catchaauru letoaelu reychuru curuaanaacuru curuaanaa enferadoro Aogosto, satiin catchaauru janijiin acaauru curuaacuru cocoirichaaauruhane coina. <sup>2</sup> Nii jauriaanejeein catchaauru curuaa cocoirichaaauruhane bana jetaote, Siria batane coberenadoro neein nelu Sirenio. <sup>3</sup> Nii jaun jetaote, satiin acaauru foerateracuru atane cuhacoaain, quiricha cuhane curuaa teratiha cuhacoaarelu lauri lauri caje uhin ecu turunacaauru catchaauru.

<sup>4</sup> Nii jaun jetaote, Calillea batane que nena Nasarete caje cuhin jetao, Jodea batane que nena Beleeun cuelu jetao Jose, jelai caje nejanoanaaneein nihalu rai foeratera reyneein nenaalu Rabirine jaun. <sup>5</sup> Nii jaun jetaote, canaanai cousurihu niha Marihane jana, aina jiniiquiin quiricha cuhane curuaa laenaratiha Beleeun cue jetao Jose, ita raauruhane rai netiin. <sup>6</sup> Nii jana inae nejanoaane que tiha nii Mariha rai canaanaine jaun jetaote, nii Beleeun neeurunajau nejanoaelu rai canaanai. <sup>7</sup> Nitohaneein, inae nejanoa nii jauriaanejeein nena rai calaohine jana jetaote, rai belaae que conaconariin jetao, baca lenone omane ichoae tocoecae rai neba, neniha loreri turuurunajaanune jaun baca coloheri asaee neuru jana nejanoaane jaun.

### *Carenero beraihurera renete turuure anjeraauru.*

<sup>8</sup> Nii jana jetaote, Beleen rohan neeure fasoto jana janoaajihanaain, letononeein carenerocuru beraihurera catchaauru. <sup>9</sup> Nii jana jetaote, acaauru rai ecooca Cana Coaunera letono anjerane jana jetao, acaauru

curuhacaain jilinetoha Cana Coaunera conone jaun, luaa nesoonetoore eluhatothane jaun. <sup>10</sup> Nejetaote acaauru rai: “Coa nesoonetohachera. Raotojoein satiin rachoojoein neriquicheeine jaanune inara rai jataain erena caohachaneein biha uunra. <sup>11</sup> Eneñete inara inoaensihuru curuaanaa Rabiri neseu nejanoae inara Curuaanaa- inaraacha cohajei Mesihasi jianacoon inara ichoterateraanura. <sup>12</sup> Caa inara rai aitocooaunne jaate, coaraa cuhichene, baca coloheri asaae omane ichoae rai belaae que conaanojoein tocoeecha jana eruha curiquicheeincha,” <sup>13</sup> naa acaauru rai nii anjerane rijieeritiin jetaote:

<sup>14</sup> “Jataain rachoojoein  
Cana Coaunera coroaecuruhine dedeeu.  
Raotojoein rachoojoein  
neuruhine cau chauratane quene maajeein  
niicha rausiajeineein  
nenacaauru-  
rai cachaaurura,”

naain jetao Cana Coaunera coroaecure dede caje arajiin ecoojoacoaain anjeraauru, nii leecha anjera rohan ecocohin.

<sup>15</sup> Inae niritiin jelaiha dedeeu cuuruha nii anjeraaurune jana jetaote:

“Chajamaaunchete aihane, caa cana rai Cana Coauneraacha beratenojohin coanichaache Beleeun cuhincha. Chatohanaiquecha aiteta,” naaure jetao ita rai, nii letononeein carenerocuru beraaihurera- cachaauru.

<sup>16</sup> Niritiin erojoein cuhin coaracuruhane jana jetaote, Mariha aina Jose eruuruhane jana jetao, baca lenone omane ichoae rai belaaeque conaanojoein tocoeeque nii canaanai. <sup>17</sup> Nitohaneein eruhin, nii acaauru rai nii canaanai que aitoha anjerane beuruha nii letononeein carenerocuru beraihureraane jaun jetaote, <sup>18</sup> cojoelatoore jetao satiin ecu neein aonajejurerera cachaauru. <sup>19</sup> Nii jana, rai neba Mariha jetaote, rai suujua cuhane nitohanihane coacuhin jetao, suujuaacha cuhane coaraje. <sup>20</sup> Nitohaneein esinae rauhijiriin nii acaauru rai biha anjerane rijijieein, jitariin coaracuruhane jaun jetaote: “Caohachate ichae cana rai Cana Coaunerara,” naain Cana Coaunera corojeein jelaiha cauha cuure nii letononeein carenerocuru beraihureraauru cachaauru.

*Cacha que suujua acatiha Cana Coaunerane jaa coloheri Teenforo asaae Jesoso causine amaauruhane*

<sup>21</sup> Inae fosa janoniha nejanoane jana jetaote, nii canaanai jaberoco macohi cari saerateein, Jesoso neein curuaateure, jaiti ausirineniha Marihane jana aitohalu anjerane rijijieein.

<sup>22</sup> Inae nii aitohalu Moisesane jaan cojoanonaa rijiu que tihane jaun jetaote, jiniiquiin nocoulucoherateeuruhane baiha jetao, Jerosaleeun nii canaanai amain Cana Coaunera que coitucueratiha cuure. <sup>23</sup> Nitohanihane coina: “Satiin jauriaanejeein quicha cojoajineein bereeconaa Cana Coauneraacha que nii rai beree banihatemiin. <sup>24</sup> Chaen coroatajai tajaee laaojiori serori rijijieein nena torotola nenihane, coroatajai serori aao uhaaine,” naain aitohalu Cana Coaunerane rijijieein nii niicha bajai tajaee amain cuure, rai naitoonjoan rijijieein nii tajaee niicha amaauri mocohin que Cana Coaunera belaaain, que nii beree banihateeuruhane coina.

<sup>25</sup> Nii bana jetaote, Jerosaleen ichoaelu leinjiin cacha Simeon. Aca jetaote, esinae rauhijiriin Cana Coauneraacha jerei ichajeein, tururichaain jianacoon Israeli cocoaichacuru mitaeranune cohajeein nelu. Aca jetaote,

que coitucueratiha Cana Coaunera Suujuene jaun, <sup>26</sup> nii niicha letoaeni Mesihasi coaraelanaala ohenihane coitucuelu. <sup>27</sup> Nitohanihane jaun jetaote, nii cachaauru que suujua acatiha Cana Coaunerane jaa coloheri Teenforo asaae Jesoso causine amaauruha rai fojiaraaurune jana que coitucueratiha Cana Coaunera Suujuene jaun coitucuhin, Teenforo asaae cuha Simeonne jana jetaote, que jiniichaain nii Jesoso causine turuaaure rai fojiaraauru Teenforo asaae, Cana Coaunera aitoonjoan nainaaruhane coina. <sup>28</sup> Nii jana jetaote, nii canaanai coariin, raain baiichaain jetao:

<sup>29</sup> “Inae laen  
nii iicha ichanenu  
carai chaitoonjoan  
coaracaaunne jaun,  
inae laen nainichaaun ohanu  
iicha jerei icharanichaaunnera,  
<sup>30</sup> itolere notaracae  
<sup>31</sup> iicha tei jianacoon  
canacaanu mitaeranu  
coaracaaunne jaunra.  
<sup>32</sup> Acate Cana Coaunera  
coitucuelanaala  
Israelitaniheichuru  
lauri lauri nenacaauru que  
acaauru aina  
Cana Coauneraacha  
ichanenu coitucueratereein.  
Chaentechu  
raotojoein rachoojoein  
neeurureein Isaraelitaauru,  
acaauru lauri caje nena  
neein niha caa iicha letoaine jaun,”

naain jetao Cana Coaunera coroaaje Simeon.

<sup>33</sup> Niritoha nii canaanai que Simeonne aonajeein jetaote, ecu cojoelatoore nii canaanai fojiaraauru. <sup>34</sup> Nii jana jetaote: “Inara corootajanemiin Cana Coaunera,” naa acaauru raine baiha jetao, Mariha coarajeein:

“Aonaun. Caa canaanaite, arajii Israeli cocoaichacuru itolere que nelaaetoha nocoetonacaauru nelatelanaala nedaauruhane jana, leeochoauru tabaauru itolere que nelateein nedaauruhane coina nenaane. Nitohanein nihane corenihate, que jaolecoorureein arajii Isaraelitaauru, <sup>35</sup> satiin que acaauru ichao coitucueraterichaaaine jaun. Nete jataain cunaain cacha jaberoco sauha saberene rijijieein, jataain cunaain ii suujuaque tacareein, que nejerateeriin neeururichaaaine jaun,” nae jetao Mariha rai Simeon. <sup>36</sup> Nii jana jetaote, ecu nelu leinjiin ene netonoai- Cana Coaunera ere beraneein nena. Acate Asere laurineein nena- Fanoeri cacunu camotojoe Ana ne. Aca jetaote, jataain ranuna neein nelanajaain, caaunsi jaanacanejeein lana aina ichoaelu. <sup>37</sup> Nii baiha jetaote, fosachoonca jana jaanacaaneein nirijieein autananeein ichaohin jetao, suri couu netiinchuru janotiin inetojoeinchuru, sonafaajihanaainchuru Cana Coaunera bajaee bajajeein nerejetelu nii Teenforo caje mituhelanaala. <sup>38</sup> Nii Ana jetaote, nii Jesoso causine turuaauruhane jana ereereeca Simeonne coaraain jetao, acaentonoai nii Jesoso causine que ereereje, satiin nii nichoteeururichaaain Jerosaleen cocoaichacurune cohajeraauru cachaauru rai.

*Jelaiha Nasarete caauruhane*

<sup>39</sup> Inae nitohaneein jeriha Cana Coaunerane rijijieein rai naitoonjoa ichacuruhane baiha jetaote, jelaiha rai natane- Calileea batane que nenea Nasarete jetao cauha cue Jose, Mariha aina. <sup>40</sup> Nii jana jetaote, fohejeein itolere que nainain ichauhenanihajein sacue nii canaanai, coroatajaniha Cana Coaunerane jaun.

### *Teenforo asaae niha canaanai Jesusone*

<sup>41</sup> Ajaanaa naineein jetaote, Jerosaleeun cuhin Fasocoo beseta bitoaa cunajaoncure nii Jesuso fojiaraauru. <sup>42</sup> Nitohaneeruhane jaun jetaote, inae lechoonca coroata jaanacaa Jesusone jana jetao, nitohaniha acaauru ichaone jaun satiin cuhin nii beseta bitoaa cuure Jerosaleen. <sup>43</sup> Inae beseta bitoauruhane baiha, jelaiha nenajaun cauha cuuruha rai fojiaraaurune jana jetaote, Jerosaleeun nedae coitucuuenehane jana nii canaanai Jesuso. <sup>44</sup> Nii jaun jetaote, “Inae jecha ichoaichaniha cunacaauru aina cauha cuha nii Jesuso,” naa fojiaraauru suujuane jaun jetao, le janohin cuuru baiha, niicha coitucuuri, naraaichuru, naaonjoaihunri jana arihure niqui rai fojiaraauru, nejetaote eruurene. <sup>45</sup> Nitohaneein eruurenihane jaun jetaote, jelaiha nejenohin ariha cuure Jerosaleeun.

<sup>46</sup> Nitohaneein cuhin jetaote, nichata janohane cuhane jetao Teenforo asaae, Moisesa aitoonjoan que cacha relaureraauru aina, ita rai ereeruhane aonajeein, acaauru caje nii ereeruhane jaan bajaa lauhequinne jana eruha cuure. <sup>47</sup> Nii jana, jataain nainain, nii ereeruhane aonajeein, acaauru caje bajaain, acaauru tonoraane jaun jetaote, cojoelatoore satiin ecu neein aonajeeurera cachaauru. <sup>48</sup> Nitohanihane jana eruhin jetaote:

“Chanuna canacaanu rai belanaala nitohaneeinte canaanai. Ii inaca ainane ii ariirijiacaanu, neeine jaa coitucuenihacaanune jaun ii coinaderain,” naa rai nebane jana jetaote:

<sup>49-50</sup> “Chanuna canu ariirijieeiche. Tana canu inaca loreri asaae nihanu niicha jerenohineeine coitucuhicheneta,” naain acaauru tonoraa Jesusone jana jetaote: “Naaonjoaiquete aitera,” naain coitucusichurene rai fojiaraauru.

<sup>51</sup> Nitohaneein fojiaraauru jiniichaain Nasarete cauhin jetaote, rai fojiaraauru ere tonoraain nerejetelu.

Satiin niriinanai jetaote, rai suujuaacha cuhane coarajerejetelu rai neba.

<sup>52</sup> Nitohaneein fohejeein ichauhenanihajein, itolere que jataain nainain jetaote, satiin cachaauru aina caohachaaain ne nii Jesuso, coroatajanein aina caohachaaain niha Cana Coaunerane jaun.

## 3

### *Cacha areroo niha cacha cojunacatera Joaan ne (Mt 3.1-12; Mr 1.1-8; Jn 1.19-28)*

<sup>1</sup> Inae lechoonca saouqui jaanacaain satiin cocoainanacaaihuri curuaanaa enferadoro neein niha Tiberione bana jetaote, Jodea batane rai coberenadoro neein nelu Ponsio Filato. Nii jana Erodesi jetaote, Calileea batane rai coberenadoro neein nelu. Nii jana rai nejera Ferifi jetaote, Taraconite, Itorea, naaonjoahuinri batane rai coberenadoro neein nihane jana, Abilinia batane rai coberenadoro neein nelu Lisania. <sup>2</sup> Nii jana Caifasi, Anasi, naaonjoaihunri jetaote, saseredotecuru curuaanaacuru- curuaanaanein neurelu. Nii bana jetaote, Sacariasi calaohi Joaan rai jetao erelu Cana Coaunera, cacha areroo rai ecocohin.

<sup>3</sup> Nii jaun jetaote, Jorodaan auhaniha nenacaauru nenaanajaauru cuujecujeein jetao, “Jerihha Cana Coaunerane rijijieein inara suujua coreeuchete

acauhanau tein cojunacatenohineein baotisanajoineein neeichete, inara osa caje inara ichoteratemiin Cana Coaunerara,” naain jetao, cachaauru rai beebeje Joaan. <sup>4-5</sup> Nitohaneein jetaote, icharejete Joaan. Niritiin laenaalu Cana Coaunera ere bera inoaensi Isaihasine rijijieein:

“Nerichaaïn cacha areroo eheehejeein:  
 ‘Cana Curuaanaa turunajaanu coeroteeuche,  
 raujuuin cuaain.  
 Satiin turiararoorute  
 nemoanojoinereein.  
 Atane ucuunooru nihanatiinte  
 ranaasiin macaracanojoi  
 nijihacooa cureein.  
<sup>6</sup> Nii banate,  
 satiin caa chauratane que  
 nenacaauru cachaauru  
 jianacoon cacha mitaeraanu  
 letoaa Cana Coaunerane  
 coaracurureein,’ ”

naain nii Joaan que aitiin laenaalu *profeta* inoaensi Isaihasine rijijieein jetaote ichae Joaan.

<sup>7</sup> Inae nitohaneein cachaauru cojunacatiha acauhanau tein baotisaa Joanne coitucuhin, rene cuuruha cachaauru, acaauru baotisaane coinane jana jetaote: “Chaa inara osa coreniha caseteco tabai turu rai nenea caje nichoteein, jianacoo mituriquicheeine que inara rai aite, taibinae-curu. <sup>8</sup> Nitohanihane jaun, nii ajiniha caohachaaïn inara ichao coreein, Cana Curuaanaa Cana Coaunera coitucuhin esenetaain neeuchete, Cana Curuaanaa coitucueraneein inanacaichene coaracurumiin cachaauru. Chaenchu jiaonriha: ‘Abaraaun nefoerate nichaanune jaun cha latihaa-caanu canacaanu,’ naain inara raajenihane necoritanaa nainiheeiche. Cana Coauneraachate nainere, caa ajeri jaberoco caje Abaraaun nefoerate coaunaane. <sup>9</sup> Chaentechu, inae ajianojoineein ne tero, inaana inaeniha temulene rai cojoaisi aina curuataain sauhin usihanau mocohacane rijijieein, inae jaoleneein neeuruha Cana Coaunera coitucutoha nocoetonacaaurune coina,” nae jetao acaauru rai Joaan.

Niritoha acaauru rai Joanne jaun jetaote: <sup>10</sup> “Chatohanai jana ichariha-caanu canacaanuta,” naain caje bajaauruhane jaun jetaote:

<sup>11</sup> “Coroatajaain obiri siricha, nii obiri colane nenea rai leinjiin teeine. Chaen lenone siricha, nii lenone colane nenea rai teinera,” nae jetao acaauru rai Joaan.

<sup>12</sup> Nii jana jetaote, Roma curuaanaa rai *imposto* nuque cachaauru cobaraain coriqui bajaaurera tabaauru netonai, acaauru baotisaa Joaan necoina turuhin jetao:

“Chatohanai jana ichariacaanu canacaanuta cacha relaera,” naauruhane jana jetao:

<sup>13</sup> “Jiaonriha aitocuruha inara curuaanaacurune amuritoojoaain cachaauru cobaraain leruhin basijiauhichenera,” naa acaauru rai Joanne jana jetaote:

<sup>14</sup> “Chatohanai jana icharihacaanu canacaanuta,” naain caje bajaauruha soondarooru tabaaurune jana jetaote:

“Jiaonriha chatohanai ichaeniha chunine jana coulurujeein sonaa coacuhin cotaain niicha sirii rulunaa coauquichene. Inara amihaneeo

corenihacha ichaaochera,” naa Joanne jana jetaote, <sup>15</sup> jataain turuha Mesihazine cohajeeuruhane jaun jetao:

“Caa canaacha cohajei Mesihasi chara inae caa turuera,” naain jetao ita caje Joaan bajaure nii ecu neein coarajeeurera cachaauru.

<sup>16</sup> Niritiin ita caje bajaauruhane jaun jetaote, acaauru rai: “Canune esinae rauhijiriin, raujiaain acauhanau inara teein inara baotisaaun. Jana nii cacaaijie uhenite, Cana Coaunera Suujue, usi, naaonjoain que inara baotisaa ureein. Acate jataain camurijiriin nelateein cocoainaan letononeein ne. Nii rai safato ichora rutueranuque nihanatiin nelatejeehaaun. <sup>17</sup> Chaentechu leinjiin inaro uhareein que aroso jiatuhin rai caohacha raain, rai bano mocoaha charijibana jacanaacharanejeein nena usihanaau teeine coina. Nii rijijieeinte, nii jeriha Cana Coaunerane rijijieein nena jeriheichuru mocoaha cureein, jerihane rijijieein nenacaauru janijiin raaincha,” nae jetao satiin ecu rene turunacaauru cachaauru rai Joaan.

<sup>18</sup> Niritiin acaauru suujuateein jetaote, acaauru rai Cana Coaunera beratenojoi Jesoso que Erenaa Raotono beebeje Joaan. <sup>19</sup> Chaen jetaotechu, coberenadoro Erodesi netonoai suujuate, rai nocoala Ferifi comasai Erodiyasi siria comasaineeine jaun, chaen itolere baasooru ichaain nihane jianihane coina. <sup>20</sup> Nejetaote, nitohaneein nii baaso ichaane ichoae tacaain, caresero cuhane Joaan enoae, rai niritohane coreniha.

*Jesoso baotisaa Joanne*  
(Mt 3.13-17; Mr 1.9-11)

<sup>21</sup> Nitohaneein jetaote, jaiti caresero cuhane enoaniha Erodesine jana, acauhanau satiin cachaauru teein cojunacatenaca acaauru baotisarejete Joaan. Nitohaneein cachaauru baotisaa Joanne jana jetaote, Jesoso netonai nebaotisaerateein Cana Coaunera bajaane jana, neyoracaa dede bacuujuane jana jetao, <sup>22</sup> nichoae fauhin nelauriaa uhe inanacaain Cana Coaunera Suujue leinjiin serori rijijieein. Nii jana jetaote: “Iite acaihaniji quiicha jeree, quiicha janijiin cacalabineein neeicha,” naain toniha erenaa dedeeune jana jetao aonajeure.

*Jesocurisito foerateeureraauru*  
(Mt 1.1-17)

<sup>23</sup> Inae nii Cana Coauneraacha icharatenohin namihaneon nunuheti-hane bana jetaote, nichata choonca jaanaca nelu- nii Jose calaohi niha acaauruacha bei Jesoso.

Nii jana nii Jose jetaote Eli calaohi nelu.

<sup>24</sup> Jana Mataa calaohilu jetao Eli.

Jana Lebi calaohilu jetao Mataa.

Jana Meriqui calaohilu jetao Lebi.

Jana Janaa calaohilu jetao Meriqui.

Jana Jose calaohilu jetao Janaa.

Jana Matatiasi calaohilu jetao Jose.

<sup>25</sup> Jana Amoso calaohilu jetao Matatiasi.

Jana Naaoso calaohilu jetao Amoso.

Jana Esili calaohilu jetao Naaoso.

Jana Nacaai calaohilu jetao Esili.

<sup>26</sup> Jana Maati calaohilu jetao Nacaai.

Jana Matatiasi calaohilu jetao Maati.

Jana Semei calaohilu jetao Matatiasi.

Jana Jose calaohilu jetao Semei.

Jana Jodaa calaohilu jetao Jose.

- 27 Jana Joanaan calaohilu jetao Jodaa.  
Jana Resaa calaohilu jetao Joanaan.  
Jana Sorobaberi calaohilu jetao Resaa.  
Jana Salatieli calaohilu jetao Sorobaberi.  
Jana Neeri calaohilu jetao Salatieli.
- 28 Jana Meriqui calaohilu jetao Neeri.  
Jana Adiin calaohilu jetao Meriqui.  
Jana Cosamii calaohilu jetao Adiin.  
Jana Eremadaan calaohilu jetao Cosamii.  
Jana Eri calaohilu jetao Eremadaan.
- 29 Jana Jesoso calaohilu jetao Eri.  
Jana Eliseri calaohilu jetao Jesoso.  
Jana Jorimi calaohilu jetao Eliseri.  
Jana Mataa calaohilu jetao Jorimi.
- 30 Jana Lebi calaohilu jetao Mataa.  
Jana Simeon calaohilu jetao Lebi.  
Jana Jodaa calaohilu jetao Simeon.  
Jana Jose calaohilu jetao Jodaa.  
Jana Jonaaun calaohilu jetao Jose.  
Jana Eliaquiin calaohilu jetao Jonaaun.
- 31 Jana Meleea calaohilu jetao Eleaquiin.  
Jana Mena calaohilu jetao Meleea.  
Jana Matata calaohilu jetao Mena.  
Jana Nataan calaohilu jetao Matata.
- 32 Jana Rabiri calaohilu jetao Nataan.  
Jana Isaihasi calaohilu jetao Rabiri.  
Jana Oberi calaohilu jetao Isaihasi.  
Jana Bosi calaohilu jetao Oberi.  
Jana Sala calaohilu jetao Bosi.  
Jana Nasoon calaohilu jetao Sala.
- 33 Jana Aminadaba calaohilu jetao Nasoon.  
Jana Admin calaohilu jetao Aminadaba.  
Jana Esroon calaohilu jetao Armi.  
Jana Faresi calaohilu jetao Esroon.  
Jana Jodaa calaohilu jetao Faresi.
- 34 Jana Jacobo calaohilu jetao Jodaa.  
Jana Isaca calaohilu jetao Jacobo.  
Jana Abaraaun calaohilu jetao Isaca.  
Jana Tare calaohilu jetao Abaraaun.  
Jana Nacoro calaohilu jetao Tare.
- 35 Jana Seroo calaohilu jetao Nacoro.  
Jana Raco calaohilu jetao Seroo.  
Jana Fele calaohilu jetao Raco.  
Jana Eberi calaohilu jetao Fele.  
Jana Sala calaohilu jetao Eberi.
- 36 Jana Cainaa calaohilu jetao Sala.  
Jana Arafasa calaohilu jetao Cainaa.  
Jana Sem calaohilu jetao Arafasa.  
Jana Nohe calaohilu jetao Sem.  
Jana Lamee calaohilu jetao Nohe.
- 37 Jana Matosalee calaohilu jetao Lamee.

Jana Enoco calaohilu jetao Matosalee.  
 Jana Jaredi calaohilu jetao Enoco.  
 Jana Malareri calaohilu jetao Jaredi.  
 Jana Cainaa calaohilu jetao Malareri.  
<sup>38</sup> Jana Enoso calaohilu jetao Cainaa.  
 Jana Seti calaohilu jetao Enoso.  
 Jana Adaan calaohilu jetao Seti.  
 Nii jana Adaan jetaote, jauriaanejeein Cana Coauneraacha counaineen nelu.

## 4

### *Jesoso coujuhin coaraa moconajaerane*

*(Mt 4.1-11; Mr 1.12-13)*

<sup>1</sup> Nii baotisaa Joanne baiha Cana Coaunera Suujue que suujuequuin nucuhe Jorodaaun caje cauha cuha Jesusone jana jetaote, cacha areroo amaa Cana Coaunera Suujuene jaun jetao, <sup>2</sup> ucuaae niha jena choonca janoneeinne jana, nechu cojuha sarue moconajaera.

Nitohaneen jenachoonca janoneein lenone lanaala nihane jaun mijiintohane jana jetaote:

<sup>3</sup> “Chajaain aihane esinae rauhijiriin Cana Coaunera Calaohi neeine, caa ajeri jaberoco rai aitoote lenoneneen nerotomiincha,” naa nechu saruha rai moconajaerane jana jetao:

<sup>4</sup> “Coatiha lenoneecha que ichaonaa nainihe cacha,’ aite Cana Coaunera, rai Quiricha cuhane,” naain tonoraa Jesusone jaun jetaote, <sup>5</sup> luhecotariin ecuun amaain, satiin caa chauratane coarateein jetao:

<sup>6</sup> “Canune jitariin canuhacha ichana nainei aina satiin caa chauratane que nenacaauru curuaanaacuru curuaanaaneen neeine coina, ichei tenaa naineen. Satiin acaauru canu rainneen neeuruhane jaunne chunicoha jerera rai tenaa naineen.

<sup>7</sup> Aihane jaun neseoriaain canu corojeein, canu bajaeein, canu bajaeequinete satiin ichei niha cureein,” naa moconajaerane jana jetao,

<sup>8</sup> “Nete, ‘Acaihanijin ii Coauneraacha corojeein, rai nelateein niicha jerei ichaau,’ naain laenaerate Cana Coaunera, rai Quiricha cuhane,” naain jetao tonorae Jesoso.

<sup>9</sup> Nii baiha jetaote, Jerosaleeun amaain ecuun Teenforo ichoae inaain jetao:

“Chajaain aihane esinae rauhijiriin Cana Coaunera Calaohi neeine caalai caje nemaroteeute coaracaa. <sup>10</sup> Cana Coaunera Quiricha inoensi cuhane te: ‘Rai letonocuru anjeraauru

letoarichaain Cana Coaunera ii beraaihuruhane coina.

<sup>11</sup> Acaaurute rai biji que ii michuurureein, nabana ajeri que necunaitaaine coataa,’

naain laenaerate Cana Coaunera, rai Quiricha cuhane,” naa moconajaerane jana jetao,

<sup>12</sup> “Chaentechu: ‘Coa ii Coaunera coujuhin coaraara,’ naain laenaerate Cana Coaunera, rai Quiricha cuhane,” naain tonoraa Jesusone jana jetaote,

<sup>13</sup> ecu ratiriin carajaojoaain caje amuhe nii Moconajaera, neniha tonaain Jesoso coujuhin coaraane jaane coitucuenihane jaun.

### *Calileea bataneu namihaneeo nunuhetiha Jesusone*

*(Mt 4.12-17; Mr 1.14-15)*



<sup>14</sup> Nitohaneein, Cana Coaunera Suujue que suujuequuin niicha ichana nainei coitucuhin, Calillea cauha cuha Jesusone jana jetaote, satiin atane sacuritaain jetao que ereeure coitucuhacoaain cachaauru. <sup>15</sup> Nitohaneein cuhin jetaote, netaojiaain Cana Coaunera rai Rauhi que ereerecuruhane jaa coloheri sinacocaauru nainein cuhecujeein cachaauru relaane jaun jetao, satiin coroaecure cachaauru.

*Nasareteu niha Jesusone*  
(Mt 13.53-58; Mr 6.1-6)

<sup>16</sup> Nitohaneein cuujue cuujueein jetaote, nii neein fohecalune jaan Nasareteu jetao cauha cue Jesoso. Nii jana jetaote, nitohaniha rai nicheaone jaun jetao, nebetacaanaa cojoanonaa bana sinacoca asae enoha cue, Cana Coaunera Quiricha ereretaane coina. Nitohaneein ecu enohin chujuhecohane jana jetaote, <sup>17</sup> rai *profeta* inoansi Isaihasicha laenai quiricha teeure, ereretaane coina. Nii Quiricha ereretaane coina jasasaane jana jetaote:

<sup>18</sup> “Cana Coaunera Suujuete caniha ne,  
niicha jerenohineein,  
‘Inae raotojoein neriquicheein,’  
naain cairichaihuru rai bihanune coina.  
Chaentechu,  
‘Inae jianacoo neriquicheein,’  
naain casetecocuru rai bihanune coina caletoe.  
Nii choae tacaain techu,  
maosacuru coichaaain acaauru nota rautaaain,  
cairichaihuru ichoteratichaaunne coina caletoe,  
<sup>19</sup> nitohanerichaaain  
inaraacha cohajei Cana Coaunera Cojoanonaa  
coitucueratihanu inara quene coina,”

<sup>20</sup> naain ereretaane baiha jelaiha nii quiricha seriin, sinacoca curuaanaa rai teein nelauriariin lauhecoha Jesusone jana jetaote, chaque tonaelanaala coarajeeure satiin ecu nenacaauru cachaauru. <sup>21</sup> Nii jana jetaote: “Eneete esinae rauhijiriin caa Cana Coaunera Quiricha cuhane aitohane rijijieein, satiin inara acatiha turuhe caa naitoonjoa coarajeeichene notaracae,” naa acaauru rai Jesusone jana jetaote, <sup>22</sup> ita rai ereerecure caohacha ichaa Jesusone que, satiin cojoelatiin coarajeein, acaauru rai raotojoein ereerecane jaun. Nejetaote tabaauru:

“Tajian caa Jose calaohinihaneta,” naain jetao ita caje bajaare.

<sup>23</sup> Nii jaun jetaote:

“Jerihanete esinae rauhijiriin caque, ‘Aihane, cache coichana inaeraneeine, ichaajenihane nocohichaaain canacaanu notaacune coaracaanura,’ naain caque ereeiche. Chaentechu jerihane, ‘Aihane itolere ichaai Caferenaanone rijijieein, cau chatane que jerichanejeein itolere ichaain canacaanu notaacune coaracaanura,’ naain ereeiche canu esenetaeneeinchene jaun,” naain jetaote:

<sup>24</sup> “Esinae rauhijiriine inara rai aitoreeunni. Coatihane esinae rauhijiriin, caohachaaain ranojoneein niheilu chuni Cana Coaunera ere beraneein nenacaauru *profetacuru* rai nataneque. <sup>25</sup> Coaracuche nachuhinti jataain arajiin neeuruhalu Isaraelitanichaachene benecuru autanaaunru, nihalu Cana coaunera ere bera *profeta* Irihasine banane. Nii banate nichata jaanaca amurijiriin uheniha elone jaun, banejelanaala cana atane Isaraeli batane sacuritaain nelu mijitena omaroeniha temulene jaun. Nete nii

cana benecuru autanaauru rene letono nenelu nii bana nenea *profeta* Irihasi. <sup>26</sup> Nete laen coriaae atane que leinjiin Sidoon nese roha nenea Sarepta neein curuajai neseu cana lauri Isaraelitanelanaala nenea autana renecha letononeein kuhelu nii Irihasi, nii autana rai lenone faane coina. <sup>27</sup> Jerichanejeein techu, arajii cana laurichuru Isaraelitacuru somane cauun cunaitecuruhane jana, acaauru rautaaenelu Cana Coaunera ere bera *profeta* inoansi Iriseeo, cana lauri caje nenea nihane saijieein. Nete laen, leinjiin Siria cocoaicha cana lauri Isaraelitanelanaala nenea Naamaanha jetaote rautaelu,” nae jetao acaauru rai Jesoso.

<sup>28</sup> Niritoha acaauru rai Jesusone jaun jetaote, satiin aina jataain obaaecure nii sinacoca asaae nenacaauru cachaauru. <sup>29</sup> Nitohaneein aina obajeein nimichucutaain jetaote, nii sinacoca caje sitaain, ichatane ecuunoo ichoae ichanohi niha nii nesene jaun jetao, ecu amaaunre jelai caje coaauneein nii Jesoso saruhitocuruhane coina niqui, <sup>30</sup> nejetaote, cha que tonajelanaala acaauru cataaun situhin amuhe Jesoso.

*Suujua cuhane coitucuchuhi siricha cache*  
(Mr 1.21-28)

<sup>31</sup> Nitohaneein sitaauruhane jaun amuhin jetaote, Calileea batane que nenea Caferenaanon cue Jesoso. Nitohaneein cuhin, ecu turuhin jetaote, ecu neein nebetacanaa cojoanonaa bana, <sup>32</sup> ecu nenea sinacoca asaae neein cachaauru relaane jana jetao, rautatiin aonajeeure cachaauru, leeochoaauru cache relaurera rijijielanaala, esinae rauhijiriin rai suujua caje rocohin acaauru relaane jaun.

<sup>33</sup> Nii jana jetaote, nii sinacoca asaae ne leinjiin rai suujua cuhane coitucuchuhi siricha cache. Aca jetaote, tonijiaain ehequiin:

<sup>34</sup> “Coa canacaanu rohecaara Nasarete cocoaicha Jesoso. Nechu canacaanu cairichaaain canacaanu itajihate uhicha. Canune raotojoein ichoitucunra. Iite acaihaniji Cana Coaunera letononeein nenaaneeicha. Canacaanu jianeera,” naane jana jetao,

<sup>35</sup> “Coaa maitaa. Nii cache suujua jianein caje amuura,” naa Jesusone jana jetaote, satiin cachaauru acatiha chatohanein cunaitaelanaala atane ichoae nii cache siheitiin rai suujua caje amue nii coitucuchuhi.

<sup>36</sup> Nii jana jetaote, satiin nesoonetiin coarajeein jetao:

“Chatohanai cocoaainacaineein nenaana caa cache, jataain chaque tonajelanaala nere nejesinaacha que caritohane jana caa cache suujua caje mituha coitucuchuhi, rai nere tonoraainne coina,” naain jetao ita caje bajaure ecu neein nii coarajeeurera cachaauru.

<sup>37</sup> Nitohanihane jaun jetaote, satiin nii atane sacuritaain jetao, Jesoso que ita rai ereereecure cachaauru.

*Simoon Fedoro tano rautaa Jesusone*  
(Mt 8.14-15; Mr 1.29-31)

<sup>38</sup> Inae nii sinacoca caje mituhin, Simoon loreri asae turuha cuha Jesusone jana jetaote, najiniha ajaa caaun cunaiteein niha Simoon tanone jaun jetao, Jesoso rai aitocure rautaane coina. <sup>39</sup> Nii jaun jetaote, nichoae nenoracaain nii ajaa sitaa Jesusone jana jetao, inae caje amuhe nii ajaa. Nii jaun jetaote, inae nerautaane jaun nimichuin acaauru rai lenone chalue.

*Arajii cunaitenaacuru rautaa Jesusone*  
(Mt 8.16-17; Mr 1.32-34)

<sup>40</sup> Nii jana jetaote, inae nuna macohi ichoae teejia enotone jana, araai laurii cunai caaun cunaitenacaauru turuaa cuure Jesoso rene, acaauru rautaane coina. Nii jana jetaote, cajanae cajanajeein acaauru ichoae biji

meracaane jaun jetao nerautaacoaaure. <sup>41</sup> Chaen jetaotechu, suujua cuhane moconajaera letono sirichaauru netonoai rautaane nii nerautanacaauru cachaauru caje mituhin:

“Iite Cana Coaunera Calaohi neeicha,” naauruha cojiorinne jetao, ereeuruha nii coitucuhichurune caohate Jesoso, Aca Mesihaseen nihane coitucuruha nii coitucuhichurune jaun.

*Sinacoca asae Cana Coaunera cojoanona beebejia Jesusone*

<sup>42</sup> Nitohaneen jetaote, inae nemataraca janaane jana, nii nese caje amuhin neniha cachane jaa cue Jesoso. Nii jaun jetaote ariin, nii nihane jaa turuhin, jelai caje amuhane caohateuruha cachaaurune jana jetao,

<sup>43</sup> “Nena leeochoaauru nenaanajaaunru cuhecujeein Cana Coaunera Cojoanona beebejia cureeun, nii coina letononeen nihanune jaun,” nae jetao acaauru rai Jesoso.

<sup>44</sup> Nitohaneen jetaote, Jodea batane sacuritaain nenacaauru Israeli-tacuru rai sinacocacuru naneen cuhecujee niicha beeni beebejeen.

## 5

*Cojoelanaacojoaain ate mucuuruhane*

*(Mt 4.18; Mr 1.16-20)*

<sup>1</sup> Calileea conemuri auhaniha turuhin, ecu Cana Coaunera naitoonjoan que cachaauru relaa Jesusone jaun, aonaa turuuruha arajiinne jaun jetaote, sururucure cachaauru. <sup>2</sup> Nitohaneen sururucuruhane jana jetaote, caje fauhin redeeuru culeecuruha ate mucuurerane jana, carene que conera colane coroatajaain boteeuru coaari Jesoso. <sup>3</sup> Nii jana, Simoon rai niha nii ecu nena leinjiin botene jaun jetaote, cuhane fauhin, nemuri auha caje acuu cataaunjeri nii bote amaa Simoonne coina aite Jesoso. Inae nemuri auha caje acuu cataaunjeri amaauruhane jana jetaote, nii bote cuhane netiin, ecu nelauriariin caje coauneen cachaauru rai ereerejeen acaauru relaje.

<sup>4</sup> Inae acaauru relaane nainaan jetaote:

“Taa nemuri ucuaano que caa bote amaan, ecu caa inara rai redeeuru jaochette ate mucuhichera,” naa Simoon raine jana jetaote:

<sup>5</sup> “Nena inae janoaajeen rede jaohacaanu natiin, leinjiinnijin ate mucuelanaala janohacaanura cacha relaera. Nenachu ii aito hine jaun, na-coauneen caa redeeuru jaohin coaraa curichaanura,” naain jetao tonora Simoon.

<sup>6</sup> Niritoha acaauru rai Jesusone jaun redeeuru jaoruhane jana jetaote, jataain arajiin ate mucuuruhane jaun jetao, ate caaun nesoaiji nii acaauru rai redeeuru. <sup>7</sup> Nii jaun jetaote, leeochoa bote cuhane nenacaauru acaauru leeochoaauru cotihacure biji que, acaauru coroatajaniha cuuruhane coina. Nii jaun jetaote cuhin, nii coroatajai bote nemoaauruha ate quene jaun jetao, jataain naluhene rijijeein nelemue nii coroatajai bote. <sup>8-9</sup> Nitohaneen jataain arajiin ate mucuuruhane jaun jetaote, jataain cojoelatiin satiin ne-soonetooruhane jaun, Jesoso tijia asae neseonriaain jetao:

“Jataain osaaotohanune jaun ii rohan nena nainihaaunta Curuaanaa,” nae jetao Simoon Fedoro nesoone caaun.

<sup>10</sup> Nii jana jetaote, nii Simoon aina neeurelu Sebedeo calaohichuru, Joaan, Saantiaao, naaonjoaihunri, nii Simoon aina ate mucueraneen neeuruhane jaun.

Niritoha Jesoso rai Simoonne jana jetaote:

“Coa nesoonetohara, Simoon. Inae ate mucueraneein neriheeini. Ena caje coauneeinte, cachaauru mucuhin raeraneein neriquiincha,” nae jetao rai Jesuso.

<sup>11</sup> Niritoha raine jaun jetaote, atane ichoae acaauru rai boteuru inaain, jitariin niicha sirii ratiriin jetao Jesuso aina cuure Simoon Fedoro, Joaan, Saantiaao, naaonjoaihunri.

*Leinjiin cosibi ruhecaera cacha rautaa Jesusone*

<sup>12</sup> Nii baiha leinjiin neseu neeuruhane jana jetaote, Jesuso rene turuha cue leinjiin cacha cosibi ruhecaain caaun cunaiteein, nitohanai cunai siricha cacha leeochoauru rohan turunaa nainenihane saijieein. Aca jetaote, Jesuso coariin atane que nauri turuanacanejeein notoroaain jetao:

“Ii jereeine canu rautaaau caa canu cosibi cajera Curuaanaa,” naane jana jetao:

<sup>13</sup> “Jerichaaun chujian. Ii caje amuhine caa ii cosibi,” naain biji que dadae Jesuso, nihei chuni cacha, nitohaneein cosibi ruhacaera dadanaa nainenihane saijieein. Nitohaneein dadaa Jesusone rijieeoritiin jetaote, inae caje amue nii rai cosibichuru.

<sup>14</sup> Nitohaneein rautaaain jetaote:

“Inae nerautaaicha. Coa chaen chuni rai: ‘Acate canu rautaera,’ naain cague iriha. Raujiaaincha Cana Coaunera aina caohachaaain niha cachane coina rucuhenein nenea saseredote rene turunihute, inae coulunohinein ii cosibi caje nerautaaaine coaramiincha. Chaen nerautaaaine coujunacane que nii aitohalu Moisesane rijieein belaaaine jaanu amaain teeu saseredote raicha. Aihute inae nerautaaain somaraain neei nii ii cosibi cajene coaraain, inae acaauru rohan turunaa naineeine coitucuurumiin satiiin cachaaurura,” naain jetao letoae Jesuso.

<sup>15</sup> Ne jetaote, niritiin bihane caohatiha Jesusone saijieein, acaauru rautaaane coinane maajeein jataain jelai amuritoheriin turuhacoaain coaraain aonaa uure cachaauru. <sup>16</sup> Ne jetaote, tabaauru que acaauru caje amuhin, nii neniha cachane jaau cuhin jetao Cana Coaunera bajarejetelu Jesuso.

*Leinjiin jiurona rautaa Jesusone*

*(Mt 9.1-8; Mr 2.1-12)*

<sup>17</sup> Nii baiha, cachaauru relaa Jesusone jana jetaote, ecu nelauriaacoaain aonajeeure fariseeocuru tabaauru, Cana Coaunera naitoonjoa que cacha relaaaurera, naaonjoainuri, Calileea batane, Jodea batane, Jerosaleen, naaonjoaihunri sacutaainchuru caje uhacoaain. Nii jana jetaote, aina cuaain niicha ichana nainei ichaa Cana Coaunerane jaun, cunaitenacaauru rautaa-coaa Jesusone jana jetao, <sup>18</sup> leinjiin cacha jiurona turuaa uure cachaauru, rai nela cuhane tijichaaain amaain. Inae turuaain jetaote, loreri asae enoanaa jerecure, nacatiha coaraa Jesusone coina niqui. <sup>19</sup> Ne jetaote, nene enooruhane jaanu, jataain araaicha cachana jaun. Nii jaun jetaote, loreri coarana joaracaain jetao rai nela cuhane tijichaaain, satiiin cachaauru cataaun jetao Jesuso acatiha nii jiurona cacha faaure. <sup>20</sup> Nii jana, esinaen rauhijiriin rautarichaaanne esenetaain aihuruha nii cachaaurune coaraane jaun jetaote:

“Inae ii que suujua acateein ii osa caje ichoteratenohineeicha cacalabi,” naa Jesusone jana jetao, inae nerautae nii cunaitenaa cacha.

<sup>21</sup> Niritiin nii jiurona rautaa Jesusone aonaain jetaote:

“Chaneeinna ne caa cacha, caritiin ereein Cana Coaunera baijiaraanu rijitiin irihane coina. Leinjiin Cana Coauneraachate nainere nosa caje cacha

ichoterateein cacha que suujua acateein nihanera,” naain jetao ereeure Cana Coaunera naitoonjoan que cacha relaaurera aina fariseeocuru.

<sup>22</sup> Niritiin que ereeuruhane que nainaan jetaote: “Chanuna niritiin ereeiche. <sup>23</sup> Chaquena caaintare: ‘Inae ii que suujua acateein ii osa caje ichoteratenohineeicha,’ naenihacane: ‘Nimichuhin amuun,’ naacane. <sup>24</sup> Coarajeeuchenejian, Cana Coaunera Calaohi cachaneein nejanoanaa nichaaunne, itolere Curuaanaa neein nihanu caa cana rai chauratane quene coaratete, rai nosa caje cacha ichotena nainichaaunne coitucuhiche,” naain jetao, nii jiurona cacha rai jetao:

“Icheine aitoon. Nimichuhin chela seriin chenenajaun caunihu,” naane <sup>25</sup> rijieeoritiin jetao, satiin coarajeeuruhane notaracae nimichuhin, nii toco-hacane jaa nela seriin jetao, Cana Coaunera corojeein rai nenajaun cauha cue nii jiurohane caje nerautanaa cacha.

<sup>26</sup> Nitohaneine coaraain jetaote, satiin cojoelatiin Cana Coaunera corooaecuruhane saijieein jetao coasiin:

“Charijibana coaraa catohanaine que airijiinte, enene catohanai cojoelanaacojoai coaracaachera,” naaure jetao ita rai.

### *Lebi cotijiaa Jesusone*

*(Mt 9.9-13; Mr 2.13-17)*

<sup>27</sup> Nitohaneein nii jiurona cacha rautaane baiha, jelai caje mituha cuuruhane jaun jetaote, leinjiin cacha, Roma curuaanaa rai *impoestonu* que coriqui que cachaauru cobaraera Lebi coari Jesoso, nii coriqui teeuruhana jaa rori ichoae lauheco jana. Nitohaneein coariin jetaote:

“Chajaau canihara,” naain cotihaca Jesusone <sup>28</sup> rijieeoritiin nimichuhin jetao, satiin niicha ichanenu ratiriin Jesoso jiniichaain aina cue Lebi, caaijie cunacaauru aina.

<sup>29</sup> Nitohaneein Jesoso jiniichaain cuhin jetaote, nii baiha neenejeein coroaena caaun rai loreri asae beseta ichaa Lebine jana jetao, ecu neeure arajiin leeochoauru Roma curuaanaa rai *impoestonu* que coriqui que cachaauru cobaraaurera, chaen leeochoauru cachaauru, naaonjoaihunri.

<sup>30</sup> Nii jaun jetaote, Jesoso aina nerelanacaauru rai:

“Chanuna cocoaeraa Roma curuaanaa rai *impoestonu* que coriqui que cachaauru cobaraaurera aina leeochoauru osaaonacaauru aina lenoneein, acau cohin, naaonjoainchene saijieein, nii acaauru aina netaojiaain lenonequiche,” naaure jetao acaauru rai, nechuhatain acaauru que iriha Cana Coaunera naitoonjoa que cacha relaaureraauru fariseeocuru aina leeochoauru fariseeocuru.

<sup>31</sup> Niritocuruha nii aina nerelanacaauru raine aonaain jetaote:

“Coatiha coichara latecuruhi raotojoein raurohin nenacaauru. Leinjiin cunaitenacaauruhachate coichara latecure. <sup>32</sup> Coatihachu baaso ichacuruhane nihanatiin coitucunaa jeriheichuru cotihaca uhahaun. Leinjiin osaaocuruhane coitucuureraaurune cotijiaaun, rai suujua coreein jeriha Cana Coaunerane rijijieein neeunruhane coinara,” naain jetao tonoranajae Jesoso.

### *Ena Niicha Tei Ichaonaa que cacha relaa Jesusone*

<sup>33</sup> Nii jana jetaote:

“Chanuna jana chaen, Joaan, fariseeocuru, naaonjoaihunri relanojoinuru jataain Cana Coaunera bajaee bajaecure suri couu netiin cosinacaain. Nete laen itolere bana ii aina nerelanacaauru, acau cohin, lenoneein, naaonjoaunreta,” naauruha Jesoso raine jana jetaote:

<sup>34</sup> “Aiha chuhisi niqui. Nete ene ranaa jeriha cachana jaa beseta que neeuruhane jaun, suri couu neein cosinacanaa nainecurene caa coti-hanohinchuru, jaiti acaauru aina niha nii ene raeranu cachane jaun. <sup>35</sup> Nete laen, inae nii jianacoon tein cacha ranaa jerera nichaanne amauruhane suri couu neein cosinacaain inaderaa cuurureeincha,” naain jetao: <sup>36</sup> “Coaraanachuhinti, nihei chuni, obiri enachasine soaain que cajione siri counera. Nitohaneein nii obiri enachasine soaihanete nii obiri enachasine asaaere, nii cajione siri. Chaen caohachaain nedanaa nainihei nii obiri enachasine, nii cajione siri que couneraane. <sup>37</sup> Nii rijijieeinchu, nihei chuni inae conaca que tiha coaeraine jana cuhane ichonai tera. <sup>38</sup> Nitohaneein cuhane teraa ichonainete naasaaere nii coaerai. <sup>39</sup> Niheichu coaerati cohane baiha ichohanti coera, ichonai amuritoheriin raotoha coaeratine jaun,” nae jetao, cacha relaauruha fariseeocurune rijijielanaala, leecha-neein cacha relaane jaun.

## 6

*Nebetacanaa janonaa bana tirico moloonejeeuruha Jesuso aina nerelanacaaurune*

*(Mt 12.1-8; Mr 2.23-28)*

<sup>1</sup> Nebetacanaa janonaa bana tirico cocana jana situujeeuruha aina nerelanacaauru aina Jesusone jana jetaote, nii tirico moloonejeein biji cuhane situsitunijihanaain nucuhe quihure nii aina nerelanacaauru.

<sup>2</sup> Nii coaraain jetaote:

“Chanuna nebetacanaa janonaa bana cocoaeraa nitohanai ichara natiin, nitohanai ichacure nii ii aina nerelanacaauru,” naain bajaauruha fariseeocuru tabaaurune jana jetaote:

<sup>3-4</sup> “Aiha niqui. Nete laenanohineein ne Cana Coanera Quiricha cuhane. Tana lesajei que Cana Coanera loreri taberenacolo asae enohin Cana Coanera que banijiaineein niha nii faan natiin, mijitenacaaun rai corihacuru aina jiniiquiin nii faan quihua Rabirine ereretaain coaraquicheneta. Acaihaniji saseredotecuruhacha nii faan quihane rai nihanatiinte quihurelu,” naain jetao:

<sup>5</sup> “Canu- cachaneein nejanoanaa nichaunnena, nebetacanaa cojoanonaa amurijiriin cocoinanohineein neeun.” naain jetao acaauru tonorae Jesuso.

*Jiurona bijihona cacha*

*(Mt 12.9-14; Mr 3.1-6)*

<sup>6</sup> Nii baiha jetaote, coaiten nebetacanaa cojoanonaa bana, sinacoca asae enohin cachaauru relaa Jesusone jana jetao, ecu acaauru jana niha leinjiin cacha, rai biji raotono nichajai que jiuronane jaun jetaote: <sup>7</sup> “Necha caa nebetacanaa janonaa bana nihane saijieein, caa jiurona jijii cacha rautarichaaainta,” naain jetao, Jesuso cojoelaaure colurujeeuruhane jaan lera ariha aihuruhane jaun, Cana Coanera naitoonjoa que cacha relaurera aina fariseeocuru. <sup>8</sup> Ne jetaote, nii cojoelaauruhane que nainaan jetao, nii jiurona jijii cacha rai jetao:

“Nimichuhin nii ena cataaun nichaauraa,” naa nii Jesusone jana jetaote, nimichuhin nichaauraa nii cachane jaun jetao, nii fariseeocuru rai:

<sup>9</sup> “Inara raine leinjiin erenaa bajanaa jereeun. Chatohanai ichacaane caohachae. Nebetacanaa janonaa bana, cacha ichao rai caohacha ichacaanena caohachaa. Ainihane cacha ichao itajihacanena caohachaa,”

<sup>10</sup> Nii baiha jetaote, nii ecu satiin curuhacaain nenacaauru coaraain jetao, nii cacha rai aitoaha jetao:

“Ichoii raujiaaute coaracaara,” naa rai Jesusone jana jetao, rai biji raujiaa nii cachane jana jetao, jiurohane caje inae nerautae nii cacha biji.

<sup>11</sup> Nitohaneein nii jiurona rautaane coaraain jetaote: “Chana ichariha-cache caa aansai aina,” naain jetao, jataain Jesuso aina obaaecure nii ecu neein coarajeeurera fariseeocuru aina Cana Coanera aitoonjoan que cacha relaaureerauru.

*Lechoonca coroatajai rai afosotooru janiicha Jesusone  
(Mt 10.1-4; Mr 3.13-19)*

<sup>12</sup> Nii bana jetaote, ichatane ecunno que cuhin, janoajeein Cana Coanera bajaebajajeein janoe jetao Jesuso. <sup>13</sup> Inae janohane jana jetaote, nii aina nerelaa amuhemuhenaacuru jitariin cotihanajaain acauru caje janijiin lechoonca coroatajaihuri cocoinaain, afosotooru neein acauru curuaate. “Afosoto” naanete, “Letononeein nena” naane aite.

<sup>14</sup> Nii niicha janijiichuru jetaote, Simoon- nii Fedoro neein niicha curuha-teeni, chaen nii Simoon nejera Aanderesi, chaen Saantiaao, Joaan, Ferifi, Bartolomee, <sup>15</sup> Mateeo, Tomasi, chaen Arafeeo calaohi- Saantiaao, chaen Selote neein niicha curuaateuri- Simoon, <sup>16</sup> chaen Saantiaao calaohi- Jodasi, chaen nii Jesuso coulurujueranu Jodasi Isacariote, naonjoaihurine.

*Arajii cacha relaa Jesusone  
(Mt 4.23-25)*

<sup>17</sup> Inae nitohaneein ichatane ecunno cuhin, nii rai afosotooru janijiin cocoinaane nainaain jetaote, acauru aina jiniiquiin atane macararo que fauha cue Jesuso. Nii jana jetaote, ecu turuhin nii aina amuhemuhenaacuru aina netaojiaaure arajii cachaauru. Jodea batane, Jerosaleeun, cucuhana auhaniha nenacauru neseuru- Tiro aina Sidoon, naonjoaihunri cajeeurune maajeein turuhacoaure. Acauru relaa Jesusone aonanacanejeein, acauru rautaa acauru cunain cajene coinane maajeeinchuru turuuure jataain arajiin cachaauru.

<sup>18</sup> Nii coitucuchuhi ichanohineein cunaitenacauru rautaane jana jetaote, nerautaacoaure. <sup>19</sup> Nii coaraain jetaote, satiin cachaauru, Jesuso dadanaa jerecure biji que, aca jerihane rijijieein nerautaacoauruha nii cunaitenacaaurune coaracuruhane jaun.

*Raotojoein neeuruha tabaaurune jana tabaaurute raotelanaala neeurureein.  
(Mt 5.1-12)*

<sup>20</sup> Nii jana jetaote, nii aina nerelanacauru coaraain jetao:

“Ena cairicheineein neeichene natiinte, nerausiajeein neeiche, Cana Coanera cojoanona inara rai nihane jaun.

<sup>21</sup> Ena mijitenaanaun neeichene natiinte, nerausiajeein neeiche, nii chaque lanaelanaala neriquicheeine jaun.

Ena chanaaiche natiinte, nerausiajeein neeiche, rachoojoein enoanaain neriquicheeine jaun.

<sup>22</sup> Canu cachaneein neeichene coreniha, inara cotaain, inara sitaain, inara nocoeje chanuhin, inara que jaolequiin naonjoaauruha canu corenihane nihanatiinte nerausiajeein neriquicheein. <sup>23</sup> Nitohaneein inara teeuruhane nihanatiin jataain raotojoein rachoojoein neeuche, canu coreniha dedeeu raotojoein neriquicheeine jaun. Coaracuchenachuhinti, inara cairichaauruha inara araachurune rijijieein, Cana Coanera ere beracuru *profetacuru* cairichaeriin nerejetucuruhalu acauru inoaensihuru.

<sup>24</sup> Coaraain nainacuche coriquihonacauru. Inae ena aachene rijijieein rachoojoein niha curieeicheein.

<sup>25</sup> Coaraain nainacuche ena raotojoein lenoneein nenacaauru. Inae nerinaain inara rai lenone.

Coaraain nainacuche ena enoanaain nenacaauru. Inae inaderanaa caaun chanaa curiquicheein.

<sup>26</sup> Coaraain nainacuche itolere neein atane sacuritaain coroaenohineein nenacaauru. Nitohaneeinte *profetaniha* nocoetonacaauru corojeein nere-jetocurelu inara inoensihuru.

*Ichei nejeratenacaauru belaihu.*

<sup>27</sup> Nena laen inara canu ere tonoraera nequichene rai aitoreeunni. Inara que nererojoeaain jaolequiin nenacaauru belaaain caohachaaain acaauru aina neeuche.

<sup>28</sup> Nechu jataain inara cotaiha: ‘Coaraain nainacuche necha aansai-huru,’ naain inara que ereein nei belaaain, rai Cana Coaunera bajaauche.

<sup>29</sup> Chunucoha lejerajei chomeri faohitohane, rai jera netonai icharateeu. Jana chunucoha ii cajione buri ruluhane, rai ii obiri netonoai teeute amaaine. <sup>30</sup> Jerichanejeeinchu, ii caje chaelai bajaeranihane teeu. Coa ii caje iicha sirii rulueranihane, coa tonaain iriha. <sup>31</sup> Charijieeinchaainti, inara belaiha cachane jeriquiche, nii rijijieein acaauru belaihuiche inara netonai.

<sup>32</sup> Inara belaichaauruhacha belaaain neeichenete, aihuruha nii Cana Coaunera coitucuelanaala nenacaaurune rijijieein neriquicheein. <sup>33</sup> Nii rijijieeintechu, inara coroatajaneraauruhacha belaaain neeichene, aihuruha nii Cana Coaunera coitucuelanaala nenacaaurune rijijieein neriquicheein.

<sup>34</sup> Chaentechu, chaelai lateein niha cachane jana, inara rai cainaane coina teeichene, aihuruha nii Cana Coaunera coitucuelanaala nenacaaurune rijijieein neriquicheein. <sup>35</sup> Jana laen, nii inara que jaolequiin, inara que nererojoeaeriin, naaonjoaain nenacaaru aina caohachaaain neein, chaelai latecuruhane acaauru rai teeiche, inara rai cainacuruhane latelanaalane, caohachae. Nii rijijieein neeichenete, esinaen rauhijiriin jerihane rijijieein ichaquichene jaun, inara rai nii cainareein Cana Coaunera, nitohanein acaauru belaiha natiin coitucunaa jerelanaala nenacaauru, neechu aansainein ichaonacaauru, naaonjoaihunri belaaain ichaa Cana Coaunerane jaun. <sup>36</sup> Nii cairichaaajoaain cachaauru coaraa Cana Inaca Cana Coaunerane rijijieein, inara netonoai cairichaaajoaain inara amute cachaauru coaracuche.

*Jiaonriha leeochoaauru que baasoneein ereein neeichene*

*(Mt 7.1-5)*

<sup>37</sup> Jiaonriha leeochoaauru amurijiriin nena coacuhin, leeochoaauru que baasoneein ereein neeichene, nabana, nii leeochoaauru ichaquichene rijijieein inara tiha Cana Coaunerane coataa. Chatohanai ichaa inara leeochoaurune, acaauru que inara suujua acatecuchete, inara que netonoai suujua acateemiin Cana Coaunera. <sup>38</sup> Chaelai lateein neeuruha inara amute cachaaurune jana rai teeichenete, inara rai inaraacha latei tereein Cana Coaunera. Jitariin inaraacha sirii teeichene nihanatiinte, jelai amuritoheriin inara rai cainareein Cana Coaunera. Chaentechu leeochoaauru coaracquichene rijijieein, inara netonain coareein Cana Coaunera,” naain jetaote:

<sup>39</sup> “Coatiha nelaterihei, leinjiin maosa amaeraanu que niha leeochoa namute maosane. Enaachate nitohanihane, leinjiin ecuha jachu cuhane naluhin jiniiquiin nitajenaa nainecurure.

<sup>40</sup> Niheichu nii chuni, rai relaera amurijiriin nena nainera. Nii inara relaera rijijieein nerelaichene banaachate nainereiche, raujiaain rijijieein neeichene.



<sup>41</sup> Chanuna inejeraacha baaso ichajeein ichaohane coaraai. Tana iitonai jataain amurijiriin baaso ichajeein ichaohine coaraaine. <sup>42</sup> Chasiina iitonai baaso ichajeein ichaohine coitucueeneine, baaso ichajeein ichaoha inejerane coitucureei. Jauriaanejeein ii baaso ichajeein ichaohine coitucuhin jianein ichaao. Nii baihate laen nainereei inejera rai: ‘Baaso ichajeeinte ichaohi. Chajaain baaso ichajeein ichaohine jianein caohachaain ichaao,’ naain erenaa nainereei.

*Rai ninaa cajete, coitucunacaine temule caohacha*

*(Mt 7.17-20; 12.34-35)*

<sup>43</sup> Nihei chuni temule caohacha, baaso que inaana nainei. Niheichu temule baasoniha natiin caohacha que inaana nainei. <sup>44</sup> Nitohaneeinte, rai ninaa caje temule caohacha coitucuhaca. Nitohaniane jaunte, chabana tijiemule que inaana nainene oja. Jerichanejeeinchu chabana cajiauhi que, inaana nainihe ijaan soririji. <sup>45</sup> Nii rijijeein techu, caohachaain suujua coaraacha, caohacha nejesina que ere, satiin caohacha- rai suujua cuhane nihane jaun. Jana cacha, baasoneein suujua coarate baasoneein ere, satiin baasorai suujua cuhane nihane jaun. Nitohaneeinte cacha ujuae caje mitue satiin rai suujua cuhane nena.

*Coroata laurii loreri icharaauru rijiiicha nere aonaera biha Jesusone*

<sup>46</sup> Chanuna itolere bana, ‘Canu Curuaanaa,’ naainchene sainejeein quere tonoraain quiicha jerei ichaeneeiche.

<sup>47</sup> Aonacuchena inara rai canu ere tonoraain caitoonjoan icharaauru que erete coitucuhiche. <sup>48</sup> Charijiein chaainti, loreri jaane coina jauriaanejeein ucaatiin bajeein, enuha suuji caohachaauru temuhin ichaa leinjiin cachane jana, uha tabanaane jana que taca uujinaa mijiaaanein nihanatiin nii loreri comaene, caohatiin ichanohin nihane jaun. Nii rijiiicha cacha, canu ere tonoraain caitoonjoan ichaa chabana jianelanaala ne. <sup>49</sup> Jana quere tonoraeniha cachanete, araracaeriin atane bajeein, baasooru que banesijiateein loreri ichara cacha rijijeein ne. Nii jana uha tabanaane, que mijiaaanein taca ujuinaane jana, beraujuaain nitaje nii loreri, nii rijiiicha nii canu aonaane sainejeein, quere tonoraelanaala nenacaauru cachaauru,” nae acaauru rai Jesoso.

## 7

*Romanocuru rai soondarooru curuaanaa cafitaan letono rautaa Jesusone*

*(Mt 8.5-13)*

<sup>1</sup> Inae nii cachaauru rai irihane nainaan jetaote, Caferenaaon cue aina nerelanacaauru aina Jesoso. <sup>2</sup> Nii jana jetaote, nii Caferenaaon ichoae leinjiin Romanocuru rai soondarooru curuaanaa cafitaan. Nii jana nii cafitaan letono- jataain belain niicha sirii jetaote, cunaiteein ohane rai ne.

<sup>3</sup> Nii jaun jetaote, nii Caferenaaon turuhin niha Jesusone inaoriin jetao, Jorioocuru bichahenaauru letoae nii cafitaan, conujueein Jesoso cotihaca cuuruhane, nii rai letono cunaitenaa rautaa uhane coina. <sup>4</sup> Nii jaun jetaote, rene turuhin:

“Iine cotihaca uhacaanu canacaanu letoaa cafitaane jaunra. <sup>5</sup> Jataain canacaanu araichuru belaichanein, aca canacaanu rai sinacoca ichaerateein, naonjoaain nihane jaunne, caa cafitaan coroatajanein rai letono rautaa ine jerichaanura,” naaure jetao Jesoso rai.

<sup>6</sup> Nii jaun jetaote, acaauru aina cuhin, inae turuhe lalajeein cujueeruha Jesoso ainane jana jetao, rai belaichaauru letoae nii cafitaan: “Curuaanaa, coatihai nii chaque ichei nelateein nihaaun canu loreri asae turuhine coina.

<sup>7</sup> Nii jaunne caraajenhane ii cotihaca uheneen. Acaihaniji aitoote ner-autamiin canu letono. Ii aitohine rijijieein nerautarichaaain canu letonone coitucuhanune jaunne ichei raujiaain berateen.

<sup>8</sup> Nii rijijieeinne canu letoauruha canu curuaanaacurune tonoraain neen. Nii rijijieeintechu, canu bijiu nenacaauru soondarooru caje chunucoha letoaanune, canu ere tonoraain cue. Jana chunucoha cotihacaaun uhane coinanete canu ere tonoraain uhe. Jana canu letono letoaanu chaelai ichaane coinanete canu ere tonoraain ichae, nanichuchera,” naain letoaa cafitaane jaun inae aitoha cuuruhane jana jetaote, <sup>9</sup> cojoelatiin, nii aina amuhemuhenaacauru cachaauru coarajeein jetao:

“Coatiha Isaraelita nichaachene lauri jana, caa cacha tocohaneein jataain quesenetaera coarahaunta,” nae jetao acaauru rai Jesoso.

<sup>10</sup> Nii jana inae jelaiha cauha cuuruha nii cafitaan loreri asae nii niicha letoaurine jana jetaote, inae acaauru ajiniha nerautaaain niha nii rai letono cunaitenaane jana turuure.

### *Leinjiin autana calaohi ichatiha ohane caje Jesusone*

<sup>11</sup> Nitohanihane baiha jetaote, aina nerelanacaauru, chaen arajiin sacurera cachaauru, naaonjoaihunri aina leinjiin nese Naain ineen curuajai nichae cue jetao Jesoso. <sup>12</sup> Nii jana jetaote, inae turuhelalajeein cuujueeruha nii nese quene jana jetao, leinjiin ene autana calaohi- leinjiin acaacha calaohineein nena onaa conautiha jetao cuure. Nii jana jetaote, nii nese caje cuhacoaain arajiin corihaniha cuure cachaauru. <sup>13</sup> Nii jana nii autana coaraa Jesusone jana, cairichaaajoaain coaraane jaun jetaote: “Coo chanaara,” naain jetao, <sup>14</sup> nii rijieeoritiin, nii onaa roha nichuuntaain, nii amaaunruhane jaa rori dadaane jaun jetao, ecu inacuhin coarajeeuruha nii baijiaain amaaurerane jana jetao:

“Enamanaa, nimichuhin nelauriaaura,” naa Jesusone jana jetao, <sup>15</sup> inae nimichuhin nelauriaain ere nii onaa. Nitohaneen nii neba rai nii onaa ichateen tiha Jesusone <sup>16</sup> coaraain jetaote, satiin acaneein nihane que suujua acateen cojoelatiin jetao:

“Jataain itolere amurijiriin nelateen, itolere ichana nainera *profetate* cana rene turuera,” naain jetao:

“Cana Coaunera rai cacha nichaachene coroatajaniha uhera,” naaure jetao Cana Coaunera corojeein, neebana nitohanai coaracuruhane jaun.

<sup>17</sup> Nitohaneen coaraain jetaote, satiin Jodea batane sacuritaain jetao beeuruhane jaun, nii onaa ichatiha Jesusone coitucuure.

### *Joan Baotisita letonocuru (Mt 11.2-19)*

<sup>18</sup> Nitohaneen onacaauru ichateen, naaonjoan Jesusone coaraain jetaote, Joan rai biha cuure sacuureraauru. Nii caje coitucuhin jetaote, coroatajai sacuurera cotijiaain jetao: <sup>19</sup> “ ‘Iina esinae rauhijiriin canacaanuhacha cohajei turuha uheneenei. Aca neneene canacaanu rai beeu, leecha cohacaanune coina,’ naain bajanichuche rene turuhincha,” naain jetao letoanajae Joan Baotisita. <sup>20</sup> Nii jaun cuhin, Jesoso rene turuhin:

“Joan Baotisitate canacaanu letoae, ii esinae rauhijiriin nii canacaanuhacha cohajei turuha uheneeneine bajaacanune coina. Aca neneene leecha cohacaanune coina,” naauruha Jesoso rene turuhin Joan letonocurune <sup>21</sup> rijieeoritiin jetaote, araai laurii cunai caun cunaitenacaauru cachaauru rautaaain, arajii maosacuru nota teen, coitucuhuhi caun cunaitenacaaurune maajeein rautaacoane baiha jetao, nii coroatajai Joan letonocuru rai jetao:

<sup>22</sup> “Chajaain Joaan rai caa ena inaraacha coarai aina inaraacha aonai benichuche. Chaen, inae maosa neeuruhane caje notaauruha maosacuru. Bacosacuru netonaite inae nichaauraaain amuure. Cosibinacaauru netonoaite inae cosibi caje nerautaacoaaure. Iricho saaecuru netonaite, inae irichohin neeure. Nii jana onacaaurute jerichanejeein cacha neein jaberoconeein nichaauraaain neeure. Jana cairicheinejeein nenacaauru raite, jataain acaauru rausiaerichaaain Cana Coaunerane beebeje. <sup>23</sup> Nitohanihane jaunte, nerausiajeein neeurureein canu que jaecohane jianelanaala nenacaauru,” naain jetao, “Chajaain caritiin benichuche Joaan raicha,” naain jetao acaauru letoae Jesoso.

<sup>24</sup> Niritoha acaauru raine jaun, jelaiha cauha cuuruha nii Joaan letonocurune jana jetaote, nii Joaan que cachaauru rai ereereje jetao Jesoso. “Chatohanai coaraa curejetocoichelu nii cacha areroo cuhin. Leinjiin jiarana nujuan cujuanaacha rurujuaina coaraquichelu. <sup>25</sup> Chatohanai coaraquichelu. Leinjiin cacha cajione caohacha que necoreeteein neina coaraquichelu. Nete nii cajione caohacha que necoreeteein nenacaauru, cocoinanacaihuru loreri asae neeuruhane coitucuhiche raotojoein. <sup>26</sup> Chatohanai jian coaraquichelu. Leinjiin *profetana* coaraquichelu. Aiha jerihane, jataain *profetacuru* amurijiriin nena leinjiin *profetate* coaraquichelu.

<sup>27</sup> Nii Joaan que tejian, rai Calaohi nichaunne rai aitelu jetao:

‘Chajinihane quere beranu que leinjiin letoareeunni, turuhine jaanu rucuheraanu quera,’

naain belu Cana Coaunera, niicha laenaeratenojoi rai Quiricha inoaensi cuhane. <sup>28</sup> Coatiha inoaenlu caje coauneein, enanetojoein nihei chuni nii Joaan amurijiriin nei cacha. Nete laen ena turunaa Cana Coaunera Cojoanona, canuhacha tei que nena cacha, leeochoauru fautaain nihane niha natiin jataain Joaan amurijiriin ne.

<sup>29</sup> Nete cachaauru relaa Joanne jana, satiin aonaraauru cachaauru, nii Joaan que acauhanau tein nebaotisaerateeurelu. Nii choae tacaaintechu, Roma curuaanaa rai *impoestonu* que cachaauru cobaraain coriqui bajaaurera netonai necha ansaineein neeuruhane saijieein nebaotisaerateeurelu, esinae rauhijiriin Cana Coauneraacha icharatenohi ichaa Joanne esentaauruhane jaun. <sup>30</sup> Jana fariseeocuru aina Cana Coaunera naitoonjoa que cacha relaaaureraauru, itolere amurijiriin Cana Coaunera coitucutoha nocoetocuruhane saijieein nebaotisaeratenaa jerecuruhilu, Cana Coaunera icharatenohi icharaneein aiha Joanne esenetana jerelanaala que jaolecooruhane jaun.

<sup>31</sup> Nitohaneente itolere acaauru rai baaso ne. Nihei acaauru rai chabana caohacha.

<sup>32</sup> Acaaurute nenaanaja cataaun nocoatijiana jaun auno toteeuruha acaauru amute canaanaihurune jana, raasanaa jerelanaala neein, niheichu berane ichacuruhane jana chanaaurene acaauru amute canaanaihuru. Nii rijiichuruha caa enene nenacaauru cachaauru. <sup>33</sup> Nii rijiichuruhane jaunte, turuha Joaan Baotisita coaerai conaa inaelanaala, faan niha natiin quinaa inaelanaala, naaonjoaaine jana, ‘Nechu aansainihane jaunte ai, nechu jataain coitucuchuhi sirihara rai suujua cuhanene jaun,’ naain que ereeichelu.

<sup>34</sup> Nii baiha canu- Cachaneein nejanohanaa nichaunne turuhin, coaerai cohin, lenoneein, naaonjoaanune jaunte, ‘Ahotiritiinjine tabaain lenoneein ajetoriaaneeun. Chaen jene nechu aansaineein ichaonacaauru cachaauru belaaain, Roma curuaanaa rai *impoestonu* que cachaauru cobaraain coriqui bajaaurerane maajeein belaitoon,’ naain ereeiche caque. <sup>35</sup> Nete inae ecu tihane bana esinae rauhijiriin Cana Coauneraacha

icharatenohi ichacaaunne coitucuha cuurureein satiin cachaauru,” nae jetao acaauru rai Jesuso.

*Leinjiin fariseeonein nenea Simoon rene turuha Jesusone*

<sup>36</sup> Leinjiin fariseeo jetaote, Jesuso cotijiae rai loreri asae turuhin lenoniha cuhane coina. Nitohaneein cotihacane jaun cuhin, inae loreri asae turuhin, lenonecuruhane coina rori ichoae nelauriaa Jesusone jana jetaote, <sup>37</sup> turuha cue leinjiin ene cojoaeloroheri nii neseu ichaonaa. Nii ene jetaote, nii fariseeo loreri asaae turuhin lenoniha cuha Jesusone inaoriin jetao, lecuruhin jataain coretiin nenea erene jujui amaa'in turuhin jetao, <sup>38</sup> chanaain Jesuso tijia rohan nelauriaain, rai nota baca que jetao rai tijia rujuae. Nitohaneein rujuaane baiha jetaote, rai couturiji que caruruhin jetao liosiin, erene jujui que rujuae.

<sup>39</sup> Nitohaneein ichaane coaraain jetaote: “Esinae rauhijiriin leinjiin *profetanihane* jana nihanete, caoneein tiha caa ene cojoaeloroerine jana, baaso nihane coitucure caa cachara,” naain jetao suujua ereein coaraje nii Jesuso cotihara fariseeo.

<sup>40</sup> Nii jaun jetaote, nii fariseeo rai:

“Simoon, icheina erenaa jereeun aonaane coina,” naa Jesusone jana jetao:

“Saan. Aitoo caraine aonaera, cacha relaera,” naa nii fariseeone jaun jetao:

<sup>41</sup> “Leinjiin cacha jetaote, coroatajai cacha rai coriqui te, jelai amuritoheriin rai cainacuruhane coina niqui. Nitohaneein jetaote, leinjiin rai te saoqui fashaain. Jana leeocho rai jetaote, te saoqui chooncaain. <sup>42</sup> Ne jetaote, coretena nainecurenihane jaun, nii coroatajai que rebeonacaauru cachaauru cobaraelanaala acaauru que suujua acate nii coriqui erora. Tonaai jana nii que. Chariji jana nii coroatajaaihuri caje, jataain nii coriqui erora belaa'in coaare,” naa Jesusone jana jetao:

<sup>43</sup> “Jerihane nii leeocho amurijiriin rebeona cachate jataain nii coriqui erora belaa'in coaraera,” naa nii Simoonne jaun jetao:

“Esinae rauhijiriinte aitohicha,” nae jetao Jesuso.

<sup>44</sup> Niritiin jetaote, nii ene coarajeein, nii Simoon rai jetao:

“Caa ene coaraaunachuhinti. Coatiha jauriaanejeein ii loreri asae turuhanune jana, catiha culeecaaunne coina carai acau tiheei. Nete laen caa ene, rai nota baca que catiha culejeein rai couturiji que caruruhin jacorae. <sup>45</sup> Coatihachu turuhanune jana canu meri lioracaheei. Caa enete laen turuhin enohane caje coauneein canu tijia lioracaane jianene.

<sup>46</sup> Niheichu nii jujui niha natiin cacouturi ichoae tiheei. Jana caa enete laen catiha ichoae erene jujui chorohin que catiha rujuae. <sup>47</sup> Nitohanihane jaunne ichei aitoon. Arajii rai nosate inae que suujua acate, jataain canu esenetaain canu belaihanee coaratihane caa ene ne jaun. Nete laen, nii leeochoaauru amurijiriin caohachaa'in ichaoha nocoetonacaauru, rai nosa caje chabana nichoteeurenereein, chabana osaaocuruhane coitucuhin canu belaina jerecurenihane jaun,” naa nii fariseeo raine baiha jetao, <sup>48</sup> nii ene rai:

“Inae itolere baaso ichajeein ichaohine caje ichoteratenojoinneeichera,” naa Jesusone jana aonajeein jetao:

<sup>49</sup> “Chaneeinna ne caa cacha, itolere baaso ichajeein niha caa enene jaan caje niha natiin ichoterateein nihane coina,” naauruha nii aina ecu cotihanohineei neein aonajeeurerane coitucuhin jetao:

<sup>50</sup> “Quesenetaaine jaunte, ichoteratenojoinneen neeiche, baaso ichajeein neeine jaan caje. Raotojoein chenenajaun caunihuchera,” nae jetao Jesoso, nii ene rai.

## 8

### *Jesoso coroatajaneraauru enecuru*

<sup>1</sup> Nitohanein jetaote, itolerenein neseuru nainein, nenanajaaunru nainein amuhemujueein Cana Coaunera cojoanonaa que ereerejeein amuhemuherejete Jesoso, lechoonca coroatajai rai afosotooru,<sup>2</sup> chaen coitucuchuhi caje, joenreein cunai caje, naaonjoaihunri caje niicha rautauri enecuru tabaauru que corihaneraain. Niichuru aina jetaote cuelu, nii caaunsinein suujua cuhane coitucuchuhi sirihane jana nii Jesusohacha rautai “Maadala bene” naain niicha curuaateuri Mariha,<sup>3</sup> chaen Erodesi amihaneeo beraichanein nena Cosa comasai Joana, chaen Sosana, naaonjoaihunri aina leeochoauru arajii enecuru jetao, acaauruhacha sirii que acaauru coroatajaneranein cuure.

### *Temule jaera parabola que erenaa* (Mt 13.1-9; Mr 4.1-9)

<sup>4</sup> Nii jana jetaote, neseuru caje cuhacoain Jesoso coaraa cuuruha arajii cachaaurune jaun, arajiin netaojiaauruhane jaun jetao acaauru rai: “Aonacuchene ena inara rai temule jaera *parabola* que erete coitucuhiche.

<sup>5</sup> Leinjiiin cacha, ucuhe riaaca cuhane jaun jetaote, bero cuhane naluha nii niicha riaajai nuchehene jaun shaaocure cachaauru. Chaen tabaauru quihure tajaaelinaacuru. <sup>6</sup> Nii jana tabaauru ajeri choae nalunacaauru jetaote, omarohane sainejeein ohijiaocoe. <sup>7</sup> Tabaauru oja neenjoai jana nalunacaauru jetaote, omarohane jana amurijiriin omaroha ajaenane jaun ohacoae. <sup>8</sup> Jana tabaauru atane caohacha choae nalunacaauru jetaote, caohachaain omarohane jaun, ele ucuhecuru caje ele fashai ucuheneeinchuru nefae,” naain jetaote, acaauru rai tonijiaain: “Caa caitoonjoan coitucunaa jeriquichene aonacuche,” nae jetao Jesoso.

### *Temule jaera parabola que acaauru relaa Jesusone bajaauruhane* (Mt 13.10-17; Mr 4.10-12)

<sup>9</sup> Niritiin temule jaera que cachaauru relaa Jesusone jaun jetaote: “Chatohanai quena nii temule jaera que cuaain cachaauru rai aitohi,” naain Jesoso caje bajaauruha aina nerelanacaaurune jaun jetaote:

<sup>10</sup> “Inaraacha quete rai Cojoanonaa coitucuerate Cana Coaunera. Nena laen, nii canu esenetana jeriheichuru cachaauru rai carijieein erenaa *parabola* que cuaain acaauru rai beeun, nabana coaracuruhane nihanatiin coitucurenihane coina, niheichu aonacuruhane nihanatiin coitucuruhane coataa.

### *Temule jaera parabola que cachaauru relaane biha Jesusone* (Mt 13.18-23; Mr 4.13-20)

<sup>11</sup> Nii temule ucuhe riaara que aitocooaunne jaan erenaa *parabolate*, Cana Coaunera beratenojoi rijijieein ne.

<sup>12</sup> Jana nii bero cuhane nalunaa nuchehene que caitoonjoante, Cana Coaunera beratenojoin aonaain inae esenetaain neeuruhane jana, nabana nichoteeuruhane coataa acaauru coritaa uha moconajaerane jaun suujua elonaain nenacaauru cachaauru rijijie.

<sup>13</sup> Jana nii ajeri choae nalunaa nucuhe que caitoonjoante, Cana Coaunera beratenojoin aonaain, corojeein esenetaain neeuruhane nihanatiin, cara-jaelanaala basiinjiincha esenetaaoriin, inae necairichanaa coaracuruhane que nererojoeaain jianeraauru rijijie.

<sup>14</sup> Jana nii ajaena jana nalunaa nucuhe que caitoonjoante, tonoraain aonacuruhane nihanatiin, jeraaen jianejeein cuaajeein, jataain niicha lateeicha que coacuhin, coriquiquiin raotojoein neeururichaaanne coacuhin, itolere bana niicha jereeicha ichajeein, jeriha Cana Coaunerane rijijieein cha chana jerelanaala nitajerai nenacaauru rijijie.

<sup>15</sup> Jana nii atane caohacha choae nalunacaauru nucuhe que caitoonjoante, nii jataain jereein aonaain, nii beratiha Cana Coaunerane rijijieein naitoonjoan ichajeein, itolere bana tonoraain laraajiin jianelanaala nenacaauru cachaauru rijijie,”

*Cono que cache relaa Jesusone*  
(Mr 4.21-25)

<sup>16</sup> “Nihei chuni cono mocohin bujuaihu tera. Niheichu arana asae tenaa nainihei, nabana nocohenaanau turuuruha loreri asaae turunacaaurune coataa. Nitohaneein bujuaihu telanaalate ecuun te, conohanau loreri asaae enooruha turunacaaurune coina. <sup>17</sup> Nii rijijieeintechu, ena caa inara relaanune jaan coitucuelanaala nenacaauru, rijieeori bana coitucuurureein.

<sup>18</sup> Aihane jaun, caohachaain aonacuche. Nii rijijieeintechu ena canuhacha tei raera jelai amuritoheriin rareein inae ecu tihane bana. Jana nii canuhacha tei latelanaala nenaate cha colane nedaareein inae ecu tihane bana,” naain acaauru rai be Jesuso.

*Rai neba aina Jesuso nejeraauru*  
(Mt 12.46-50; Mr 3.31-35)

<sup>19</sup> Niritiin cachaauru rai ereerejiha Jesusone jana jetaote, rene turuha ure neba aina rai nejeraauru. Ne jetaote, rohan turunaa nainecurene, jataain arajiin ecu turuuruha cachaaurune jaun. <sup>20</sup> Nii jana ecu nenacaauru tabaauru jetaote,

“Taute aerene neeure ii nejeraauru, ii neba aina. Jataainte ii coana jerecure,” naain Jesuso rai beeuruhane jana jetaote,

<sup>21</sup> “Aiha niqúi. Nete Cana Coaunera beratenojoi esenetaain, rijijieein ichaohin, naintonjoa rijijieein ichara cachate, canu fojiara aina canu nejeraaurunera,” naain jetao tonoranajaen Jesuso.

*Fichafichanaa aina cujuana suruaa Jesusone*  
(Mt 8.23-27; Mr 4.35-41)

<sup>22</sup> Nii baiha jetaote: “Amaauchete caa nemuri jerau cunichaachera,” naain jetao, aina nerelanacaauru aina leinjiin bote cuhane fauhin cuhin jetao, <sup>23</sup> nemuri jera jaohajeeuruhane jana jetao, uhe cujuana tabai aina fichafichanaa. Nii jana, sinitoha Jesusone jana jetao, inae nemoha acaune jaun, caaun nalunaa jere nii cuurunaja bote. <sup>24</sup> Nii jaun jetaote nesoone caun

“Cache relaera, cache relaera, inae nalurichaacheje,” naain Jesuso no-coauruhane jaun jetao, nimichuin cujuana aina fichafichanaa suruha Jesusone jaun jetao, tonajelanaala cuujeeure.

<sup>25</sup> Nitohaneein cujuana aina fichafichanaa suruaain jetaote, nii aina nerelanacaauru rai jetao,

“Chanuna cha esenetaeneeiche,” naa acaauru rai Jesusone jana jetao, nesoonetiin cojoelatiin jetao, “Chaneeina ne caa cache, nere tonoraain nesuruha cujuana aina fichafichanaane coina,” naain jetao nejesinajeein ita caje bajaure.

*Jerasa batane que nenea coitucuchuhi siricha*  
(Mt 8.28-34; Mr 5.1-20)

<sup>26</sup> Nirijieein cuujeein jetaote, tabiicha nemuri jera jaohin, najauriaa cuure Calileea jeraniha nenea Jerasau batane que.

<sup>27</sup> Inaen ecu turuhin najauriaain, atane choae iniha cuha Jesusone jana jetaote, nii nese caje cuhin que taca cue suujue cuhane coitucuchuhi siricha cacha. Nii cacha jetaote, nii chaabana cajione jiaain, niheichu loreri asae nihanatiin ichoaelanaala atane bana ichoaecha ichoae.

<sup>28</sup> Aca jetaote, Jesoso coariin nacatiha auhaquuin semojaain tacaain jetao;

“Coa caniha nenoain carerojoecaara, acaihaniji nenea Cana Coanera Calaohi Jesoso,” nae jetao Jesoso rai, <sup>29</sup> caje mituha, nii suujua cuhane neein aasaera coitucuchuhi coina aitoha Jesusone jaun.

Nitohanihane jaun jetaote, araai saain *cadena* que caohatiin bijii aina tijia ichohacuruhane nihanatiin, rai molohin cacha nenajanihu amauruha nii coitucuhicurune, ecu nii cacha areroo ne. <sup>30</sup> Nitohaneein rai irihane jana jetaote:

“Tonaa ichurujuata,” naain caje curuaa bajaa Jesusone jana jetao,

“Lejioon niha canu curuaara,” nae jetao nii cacha, jataain arajiin suujua cuhane neeuruha coitucuhicurune jaun. <sup>31</sup> Nii arajiin suujua cuhane nenacaauru jetaote, usi jana acaauru letoaa Jesusone coataa jetao, <sup>32-33</sup> ichatane ucuunno que arajiin lenoniha neeuruha coosichurune jaun jetao, nii coosichuru suujueniha enooruhane coina Jesoso caje bajaaure. Nii jaun jetaote, nii jereein caje bajaauruhane rijijieein jeriha Jesusone jaun jetao, nii cacha caje mituhacoaain nii coosichuru suujueniha enooruhane jaun jetao, nemuri cuhane nichorohin acauhanau naluhin ohacoaure nii coosichuru.

<sup>34</sup> Nii coaraain jetaote, satiin jelai caje sorohin, nenaanajaaunru, neseuru, naonjoaihunri naineein biha cuure nii coosi beraihurera cachaauru. <sup>35</sup> Nitohaneein beeuruhane jaun, cuhin coaraa cuuruha cachaaurune jana jetaote, Jesoso tijia asae lauhaca coujurihu cacha neein necoreetein nii suujua caje coitucuhichuru mitunaja cachane jaun jetao, coaraain coasichure nii cachaauru.

<sup>36</sup> Nii jana, nii cacha caje mituuruha coitucuhichurune jana coaraauru jetaote, esinae rauhijiriin nii nerautaane rijijieein beure leeochoauru cachaauru rai.

<sup>37</sup> Nitohaneein coaraain jetaote, satiin nii Jerasa batane que nenacaauru cachaauru jetao, jelai caje amuha Jesusone jerecure, jataain coasichuruhane jaun.

Nii jaun jetaote, bote cuhane fauhin, jelai caje amuha Jesusone jana jetao, <sup>38</sup> aina cunaa jere nii coitucuhichuru mitunaja cacha. Ne jetaote, aina cuhane jerelanaala:

<sup>39</sup> “Jiaohine. Chajaaincha jelaiha chenenajaun cauhin, ii rautaain niha Cana Coaneranee beebenihun,” nae jetao rai Jesoso.

Nii jaun jetaote, ecu nedaain, satiin nenaanajaaunru naineein cuhecujeein jetao, rautaain niha Jesusone beebenihun amuhemujuen nii cacha.

*Jairo cacunu. Chaen leinjiin ene Jesoso cajione dadaera*  
(Mt 9.18-26; Mr 5.21-43)

<sup>40</sup> Nitohanihane baiha, jelaiha nemuri jerau cauha cuuruhane jana jetaote, jataain corojeein Jesoso raaure, turuhane cohajeeurhane jaun, satiin cachaauru. <sup>41</sup> Nii jana jetaote, turuha uhe leinjiin cacha- sinacoca curuaanaa neein nenea Jairoonein niicha curuaateuri. Nii cacha jetaote,

Jesoso tija asae neseoriaain jetao conujueein cotijiae, rai loreri asae turuha cuhane coina, <sup>42</sup> jataain ohane rai niha leinjiin rai cacunu- lechoonca coroata jaanacajine jaun.

Nii jaun cuha Jesusone jana jetaote, jataain arajiin sacuuruha cachaaurune jaun, sururucure cachaauru.

<sup>43</sup> Nii arajiin cunacaauru jana jetaote cue leinjiin ene- lechoonca coroata jaanacaain nirijieein ichana jaohajeein cunaiteein nena. Nii jetaote, jitariin niicha sirii coriqui jaohin nocoicharate niqui. Nejetaote, rautasihurene nii chuni coichaeraauru.

<sup>44</sup> Nii ene jetaote, Jesoso caaijie cuhin, rohan nichuuntaain rai cajione auha dadae. Nii Jesoso cajione auha dadaane rijieeoritiin jetaote, inae nesurue rai ichana.

<sup>45</sup> Nitohaneein dadaane jana jetaote:

“Chatoon canu dadae,” naain bajaa Jesusone jana, satiin dadaauruhane suujueeuruhane jaun jetaote,

“Cacha relaera jataain araicha cachane jaunte, ii sururucure jerane,” naa rai Fedorone jana jetaote:

<sup>46</sup> “Aihei bajiaa. Chunucohate jerihane canu dadae. Cacaje mituha cacha rautacaaunne jaan cajene coitucunra,” naain jetao bajae Jesoso.

<sup>47</sup> Niritoha Jesusone jaun, nesuujuenaa nainenihane jaun jetaote, rijijijianein Jesoso acatiha neseoriaaain: “Naaonjoaain cunaitichaaunne jaunne, nii caje nerautasinihanune jaun, ii dadaaunra. Nii ii dadaaunne rijieeoritiine inae nerautaaun canu cunai cajera,” naain satiin aonajera urichoo jitariin biha nii enene jana jetaote;

<sup>48</sup> “Aihachuhisi. Jataain ii rautaanune esenetaaine jaunte, ii cunai caje nerautaaicha ene. Chajaain chaque tonajelanaala chenenajaun caunihunra,” nae jetao rai Jesoso.

<sup>49</sup> Nitohaneein jaiti ereerejiha Jesusone jana jetaote, turuhin jetao:

“Coa nenacaaeneein nii cacha relaera reroecaa. Inae oha ii cacunura,” naain jetao biha uhe letoauruhane jaun leinjiin cacha, nii sinacoca curuaanaa Jairo rai.

<sup>50</sup> Niritoha nii cachane aonajeein jetaote,

“Coa tonajian. Raujiaaincha quesenetaaute nacoaaunein ichanamiin oo caje ii cacunura,” nae jetao Jairo rai Jesoso.

<sup>51</sup> Niritiin cuhin jetaote, nii Jairo loreri asaae turuhin, Fedoro, Saantiaao, Joaan, chaen, nii ene fojiaraauru, naaonjoaihunriicha enoae jiniichaaain nii loreri asae. <sup>52</sup> Nitohaneein inae loreri asae enooruhane jana jetaote, jataain satiin coinaderaain nii ene coisichuruha nii loreri asaae nenacaurune jaun:

“Coa chanaache. Coatihane ohane jaun aihei caa ranuna. Sinihane jaunte aicha,” naa acaauru rai Jesusone jana jetaote, <sup>53</sup> satiin esenetaelanaala coenacure- nii ecu neein coarajeeurera cachaauru, esinaen rauhijiriin oha nii ranunane coaracuruhane jaun.

<sup>54</sup> Nii jana jetaote, biji que nii ranuna onaa mucuhin tonijiaain jetao: “Ranuna, chajaain nimichuura,” naa Jesusone rijieeoritiin nimichuhin jetao, <sup>55</sup> nacoaaunein raurononeein oo caje ichanae nii ranuna. Nitohaneein ichateein jetaote, corohateeuruhane coina aite Jesoso. <sup>56</sup> Nii jaun jetaote, jataain cojoelatooruha rai fojiaraaurune jana jetao: “Jiaonriha caa catoa- neein ichateein nihanune beeiche chuni rainera,” naain jetao suujuatena- jaen Jesoso.



## 9

*Cana Coaunera Cojoanona biha cuuruhane coina aina nerelanacaauru letoaa Jesusone*

*(Mt 10.5-15; Mr 6.7-13)*

<sup>1</sup> Jelai lechoonca coroatajai aina nerelanacaauru taojiaain, acaauru aina neein cocoainanajaain jetaote, letoanajae Jesuso, cacha suujua cuhane nenacaauru itolere coitucuchuhichuru sitaain, cunaitenacaaurune maajeein rautauruhane coina. <sup>2</sup> Nitohaneein jetaote, Cana Coaunera Cojoanona bein, cunaitenacaaurune maajeein rautauruhane coina acaauru letoae.

<sup>3</sup> Nitohaneein letohanajaain jetaote:

“Coa inara biji achune, inara atora, inara achano, inara coriqui, necoreeteichene jaanu que inara cajione, naaonjoainuri amaain cuhache.

<sup>4</sup> Chunijihun loreri asae turuhichene ecu neeuche jelai caje amuhichene reentiaain. <sup>5</sup> Jana chunijihun nese que turuhichene jana, inara ranaa jerelaanaala inara aohana jerecurenihane, jelai caje amuuche. Inara tija batane faofaohin riariaain ratiriinte, ‘Coaraain cau neein nainacuche,’ naain ichaquichene coitucuumiin caje,” naain jetao letoanajae Jesuso.

<sup>6</sup> Nii jaun jetaote, nii letoanajaane rijijieein cuhin, neseuru naineein cuhecujeein jetao, ichoteratenajaane jaa erenaa rauhi raotono beebejeein jetao, cunaitenacaaurune maajeein rautacooaure.

*Suujua auhacaa Erodesine*

*(Mt 14.1-12; Mr 6.14-29)*

<sup>7</sup> Nitohaneein itolere ichaechajeein niha Jesusone coitucuhin jetaote, que suujua auhacaain nererojoecae Jorioocuru curuaanaa Erodesi. Tabaauru, “Joaan jete oo caje ichanaain ai,” naauruhane jana, <sup>8</sup> leeochoauru, “*Profeta* Irihasi jiete, oo caje ichanae,” naaure. Jana tabaauru jetaote, “Cana Coaunera Ere bera inoansi tabaauru jete, oo caje ichanaain ai,” naaure.

<sup>9</sup> Ne jetaote, niritocuruhane coitucuhin jetao: “Caraajenihanena nii Joaan uluno moloheratihanune jana moloorelura. Chaaquena jana, nii itolere ichaa beein ereeure,” nae jetao Erodesi.

Nii jaun jetaote, jataain Jesuso coana jere Erodesi.

*Saoqui oharaancai cacha rai lenone tiha Jesusone*

*(Mt 14.13-21; Mr 6.30-44; Jn 6.1-14)*

<sup>10</sup> Inae nii letoanajaa Jesusone caje turuhin, jitariin acaauruhacha ichai beeuruha nii cocoainaan niicha letoauri afosotoorune jana jetaote, jelai cachaauru caje acaauru amaain, leinjiin nese Betesaaidau amanajae niqui Jesuso. <sup>11</sup> Nejetaote, inae cuhane coitucuumiin, sacuhin, rene turuha cuuruha cachaaurune jana jetao, raotojoein acaauru raain, Cana Coaunera Cojoanona que acaauru rai ereerejeein, cunaitenacaaurune maajeein rautae.

<sup>12</sup> Nii jana inae sohane jaun jetaote, Jesuso rohan nichuuntaain:

“Chajaain caa cachaauru rai aitoote, taa ichuunucohacuru nenacaauru neseuru cuhin, nesurunajaanu aina lenone ariha cuurumiincha. Coatih nihei cau cacha caje lenone coreteein acaauru coroaatenaa jaanuta,” naauruha nii lechoonca coroatajai aina nerelanacaaurune jana jetaote:

<sup>13</sup> “Niriimiin. Atiin inara, acaauru coroaateeuche,” naa acaauru rai Jesusone jana jetaote:

“Saoquijieeinchate neeje faan, chaen coroatajaain ate naajeeinchara. Coretiha cuhacaanune banaachate nena nainere lenone, satiin caa cachaauru raicha,” naaure jetao Jesuso rai, <sup>14</sup> itolereenein saoqui oharaancaain acaauru aina neeuruha cachaaurune jaun.

Ne jetaote aina nerelanacaauru rai jetao:

“Saoquichooncaa nanaain ita rohan teein acaauru lauriaauchera,” naa acaauru rai Jesusone jaun jetao, <sup>15</sup> nii aitohane rijijieein, ita rohan teein acaauru lauriaacoaure nii aina nerelanacaauru.

<sup>16</sup> Inae satiin nelauriaacoaauruhane jana jetaote, nii saoquii faan aina coroatajai ate mucuhin, coreniha dede coarajeein Cana Coaunera coroaecane baiha jetao, nii faan aina ate beeunebeeunein aina nerelanacaauru rai jetao te Jesoso, jitariin cachaauru rai chaluuruhane coina.

<sup>17</sup> Nitohanein jetaote, inaeneeuruhane jaaun tiaaajoaain lenonecuruha satiin cachaaurune natiin jetao, lechoonca coroata omariin, omari nemoaure caute que.

*Esinae rauhijiriin Mesihasi niha Jesusone biha Fedorone*  
(Mt 16.13-19; Mr 8.27-29)

<sup>18</sup> Nii baiha jetaote, jelai aina nerelanacaauru aina cuhin Cana Coaunera bajaane jaun jetao:

“Tonacuruha canu que cachaauru. Chanichaaunchata,” naain acaauru caje bajaa Jesusone jana jetaote:

<sup>19</sup> “Tabaaurute, ‘Joaan Baotisita jete, oo caje ichanaain ai,’ naaurera. Jana tabaaurute, ‘Cana Coaunera Ere bera inoaensi Irihasite ai,’ naaure. Jana tabaaurute, ‘Cana Coaunera Ere bera inoaensi caje leinjiin jete, oo caje ichanaain ai,’ naaure,” naain beeuruhane jaun jetaote:

<sup>20</sup> “Tonaquiche jana inara canu que. Cha nichaaun,” naain acaauru caje bajaane jana jetaote:

“Iite, Cana Coauneraacha letoai Mesihaseeicha,” naain jetao tonorae Fedoro.

*Orichaaine biha Jesusone*  
(Mt 16.20-28; Mr 8.30-9.1)

<sup>21</sup> Ne jetaote, niritocuruha raine jana, nii acaneein nihane beeuruha chuni raine coataa, caohate Jesoso.

<sup>22</sup> Niritiin jetaote: “Nii inaraacha cohajei Cachaneein nejanohanune cairichaeriinte, caque jaolecoha cuurureein Jorioocuru bichauhenaauru aina saseredotecuru curuaanaacuru, chaen Cana Coaunera naitoonjoan que cacha relaaureraauru, naaonjoainuri. Acaaurute catinaa cuurureein niqii, nena nichata janohane cuhane ichanaa cureeunnicha,” nae jetao acaauru rai Jesoso.

<sup>23</sup> Nii baiha jetaote, nii satiin ecu aina nenacaauru rai jetao:

“Chunucoha canuhacha relainein canu ere tonoraeranein nenea jerihane, itolere suujua letono ichana jerihane jianein, coroso que canu tein canu cairichaururichaaine rijijieein necairichanaa abaataain caitoonjoan tonoraain, jerichaaunne rijijieein neeine. <sup>24</sup> Nitohanihane jaunte, coreniha nichao itajera, nichotiha cureein. Jana suujua letonohacha ichajeein, itolere bana rai caohachanuhacha coacuhin neite nitajereein.

<sup>25</sup> Chaaquena nelatere caa chauratane que neein, itolere rai nelateeicha que coacuhin rai nichao itajiha cachane. <sup>26</sup> Chunucoha, canu que coejein caitoonjoa quene maajein coejera quene necoejereunni canuhetonai, canu- inaraacha cohajei Cachaneein nejanohanune, itolere ichana nainichaaunne coarateein, Canu Inaca necaohacha que necaohachain rai letonocuru anjeraauru aina turuha uhanune bana. <sup>27</sup> Esinae rauhijiriin satiin cau nenacaauru tabaauru cachaauru oorurinaain, Cana Coaunera Cojoanonaa coaracuruhane reentiaain,” nae jetao acaauru rai Jesoso.

*Nejelaunein nerotoha Jesusone*  
(Mt 17.1-8; Mr 9.2-8)

<sup>28</sup> Nii cachaauru rai irihane baiha, fosa janoneein catiaain, ichatane ucuuno que cuhin Cana Coanera baja cuha Jesusone jana jetaote, corihaniha cuure Fedoro, Saantiaao, Joaan, naaonjoaihuri. <sup>29</sup> Inae ecu turuhin Cana Coanera bajaane jana, ecu neein coarajeeuruhane jana jetaote, itolereneein nejelauneein nerotoha nomerine jana jetao, rai cajione netonai jataain somajaain jiquihaquiin nerotohane jana, <sup>30</sup> ecu aina ocochin aina ereeure coroatajai cachaauru Moisesa, Irihasi, naaonjoainuri. <sup>31</sup> Nitohaneein jetaote, jataain cono caohacha que conaeraain neein jetao, Jerosaleeun cairichanojoinnein oha curichaain Jesusone que jetao ereeure.

<sup>32</sup> Nii jana jataain siniitooruhane sainejeein jetaote, nirijieein ichaojoein jetao, cono caohacha cataaun neein coroatajai cacha aina iriha Jesusone jana, coaraje rai corihacuru aina Fedoro.

<sup>33</sup> Inae Jesuso rohan neeuru caje amuuruha nii coroatajai cachaaurune jana jetaote:

“Cacha relaera, jataainte caohate cau nihacachene. Coanete nichatajaain lohanari jaacache, leinjiin ii rai, leinjiin Moisesa rai, leinjiin Irihasi rai, naaonjoaain,” nae jetao Fedoro. “Naaonjoaane coinete catohanein coarate Cana Coanera,” naain coitucuenihane jaun nirite Fedoro.

<sup>34</sup> Niritiin ereerejihane jana, acaauru conaacotaa dede sacarine jana jetaote, jataain nesoonetooruhane jana jetao, <sup>35</sup> nii dede sacari jana toniin jetao: “Caate jataain jereein canuhacha cocoainain quiicha letoai Canu Calaohinera. Nere tonoraain neeuchera,” naain jetao toni erena.

<sup>36</sup> Niritiin toniha erenaane aonajeeuruhane baiha, Jesuso coaracuruhane jana jetaote, inae jelai ecu ne. Ne jetaote, nii bana nii chuni rai nitohaniha Jesusone belanaala inauheneecha suujua cuhane coarajeein nii chuni rai beurene.

*Coitucuhuhi siricha leinjiin canaanai rautaa Jesusone  
(Mt 17.14-21; Mr 9.14-29)*

<sup>37</sup> Nii cojoanoo nii ichatane ucuuno neeuru caje jelaiha fauha cuuruhane jana jetaote, Jesuso que taca cuure arajiin cachaauru. <sup>38</sup> Nii arajiin que taca cunacaauru cachaauru jana toniin jetaote:

“Cacha relaera, atiin nohane caa acaihanijin quiicha sirii canu calaohi coaraau. <sup>39</sup> Suujua cuhane coitucuhuhi sirihane jaunte, baasoneein tihane, auhaquiin tocojoaain tacaane, nujuuae caje lajane mitae. Jataainte, baasoneein jaberoco teein jianena jerene. <sup>40</sup> Nii jaanne niqii ii aina nerelanacaauru rai aitoon, caje nii coitucuhuhi sitaauruhane coina. Nete ichana nainesihurene,” naa tonijiaain ehequiin, nii leinjiin cachane jaun jetaote:

<sup>41</sup> “Jataainachura cha esenetaeneeichete nitaje rai nenacaauru cachaauru. Inaonjoan saneena inara aina neein inara abaantareeun. Chajaain cajiha nii ii calaohi uhaaura,” naa Jesusone jaun, <sup>42</sup> rohan nichuuntaa nii cunaite-naa canaanaine jana jetaote, atane ichoae tacaain siheite nii suujua cuhane nena coitucuhuhi.

Nii jaun jetaote, nii suujua cuhane nena coitucuhuhi suruaain jetao, nii canaanai rautain, rai inaca rai te Jesuso. <sup>43</sup> Satiin nii coaraain jetaote, itolere que nelatein, itolere ichana nainiha Cana Coaneranane coaraain cojoelatoore.

*Orichaainne biha coroata saain Jesusone  
(Mt 17.22-23; Mr 9.30-32)*

Nitohaneein cojoaelanaacojoai ichaain, acaauru notaaca Jesusone cojoaelatoorua satiin cachaaurune tonohanau jetaote:

<sup>44</sup> “Caohachaain caa inara rai aitocooaunne aonacuche. Coa baitichache. Canu acaihaniji inaraacha cohajei Cachaneein nejanohanaa nichaaunne, cocoinanacaihuru bijihu tenojoiniha cureeunicha,” nae jetao aina nere-lanacaauru rai Jesoso.

<sup>45</sup> Ne jetaote, acaauru que coitucuerateniha Cana Coaunerane jaun, nii acaauru rai aitohane coitucuurenihane sainejeein, acaauru rai biha Jesosone coina caje bajanaa nainecurene, bajaauruhane que nocoatocuruhanane jaun.

*Chariji jataain nelateineein ne*  
(Mt 18.1-5; Mr 9.33-37)

<sup>46</sup> Nii jana jetaote: “Charijina, caa cana jana, jataain leeochoauru amurijiriin nelatineein nere,” naauruha nejesinajeein ita rai aina nerelanacaaurune <sup>47</sup> aonajeein jetao, leinjiin canaanai mucuhin rohan teein jetao:

<sup>48</sup> “Canu coreniha, caa canaanai raerate, canu raane rijijieein aicheein. Jerichanejeein canu raain neitechu, caletoaera Ofa raa aicheein. Nitohanihane jaun, cau inara jana nelatihei rijijieein inaraacha coaraite, jataain nelatineein ne,” nae jetao acaauru rai Jesoso.

*Canaacha ichai icharate, cana lauri rijijieein nenacaauru ne.*  
(Mr 9.38-40)

<sup>49</sup> Nii jana jetaote: “Cacha relaera, ii letononeein nena rijijieein coitucuhu que suujuequiin nenacaauru rautaa in niha leinjiinne janane eruhin nii caohatihacaanu, cana aina nenaaneein ainihane jaun,” naa Joanne jaun jetaote:

<sup>50</sup> “Jiaonriha nitohanai ichara caohateein neechene. Canaacha ichai ichaain nenaate cana lauri rijijieein nenacaauru ne,” nae jetao rai Jesoso.

*Joan aina Saantiaaocha ichana jerei caohatiha Jesusone*

<sup>51</sup> Inae jelaiha dedeu cuhane catainajeein jetaote, Jerosaleeun necairichanaa coaraane rai nihane saijieein, atiin nelararajiaain, nii Jerosaleeun turuhane coina ucuae cue Jesoso. <sup>52</sup> Nitohaneein cuhin jetaote, najiniha nere beraanuuru letoaelu, turuhane jaanu ariha cuuruha leinjiin nese Samariaune coina. <sup>53</sup> Ne jetaote, ecu ranaa jerecurenelu Samaria cocoaichacuru, rauhijiriin Jerosaleeun cuhane coitucuuruha raotojoeeinne jaun.

<sup>54</sup> Nitohaneein, acaauru ranaa jerecurenihane jaun jetaote:

“Curuaanaa, jereeune acaauru ichoae usi letoaacaanute, satiin mocohin nitajeeuruhine,” naaure jetao Joan aina Saantiaao. <sup>55</sup> Ne jetaote, acaauru rene nauriteriin jetao:

“Caohachaai nitohanai ichaain nihacachene,” naain jetao, acaauru co-taicha rijitiin caohate Jesoso.

<sup>56</sup> Niritohane baiha jetaote, leeocho neseu jetao cuure.

*Jesoso aina cunaa jerecuruha cachaaurune*  
(Mt 8.19-22)

<sup>57</sup> Inae bero cuhane cuujeeuruhane jana jetaote:

“Curuaanaa, cuhine jaun niha natiine, itolere bana ii aina nena jere-unra,” naa Jesoso rai leinjiin cachane jana jetaote:

<sup>58</sup> “Aonaan, arolarihuru niha natiinte, sininajaanu siriin naaonjoaaurera. Jerichanejeeintechu, sininajaanu siriin ne tajaecurura. Nii jana canu inaraacha cohajei- Cachaneein nejanohanune, coatiha nihei chunijihun neloraain nesurucuaaunne jaanuta,” nae jetao rai Jesoso.

<sup>59</sup> Niritiin jetaote, leeocho rai:

“Chajaau canihara,” naa Jesusone jana jetao:

“Curuaanaa, jauriaanejeein canu cohacune, oha canu inacane reentihain aina nenicha,” naane jana jetaote:

<sup>60</sup> “Niriimiin, caa chabana nitajenaachara quiicha tei ichaonaa ranaa jeriheichuru, ecu nejesinajeein ita coaracurumiincha. Ii caniha uute, Cana Coaunera Cojoanonaa beebejeeicha,” naa Jesusone jana jetaote, <sup>61</sup> leeochoa netonai:

“Curuaanaa, ii ainane unaa jereeun canuhetonai. Jauriaanejeein canu cohacune, canu nenajaun nenacaauru rai necoenicha,” naane jana jetao:

<sup>62</sup> “Nete, Cana Coaunera Cojoanonaa que nena jeriha cachane, itolere bana niicha ichana jerei jianihane caohachae,” nae jetao Jesuso.

## 10

### *Caainsi choonca coroatajai Jesuso letonocuru*

<sup>1</sup> Nitohanihane baiha jetaote, caaunsi choonca coroatajaain jetao aina nerelacaauru janijiin jetao, coroatajaanana coroatajaananaain najiniha letoanajae Cana Curuaanaa Jesocurisito, nii turuha curichaaainne jaun neseuru naineein cuuruhane coina.

<sup>2</sup> Nitohanein letoanajaain jetaote: “Esinae rauhijiriin arajiinte neeure Cana Coaunera coitucunaa jereraauru cachaurura. Nete jataain coroatajaacure acaauru relaeranuurura. Aihane jaun Cana Coaunera bajaachete neeine acaauru relaeranuurura. <sup>3</sup> Nii nitohanihane jaunne ena inara letoaanra. Nete jataain alalacaraan nii curiquicheein, taebiaen mululune jana situha cuha irine rijijieein curiquicheeinne jaunra. <sup>4</sup> Jiaonriha inara coriqui, inara atora, inara safato, naaonjoaihunri amaain cuhichenera. Coa chunijiun inacuhin, chuni rai caeneenejeein ereein cuhache. <sup>5</sup> Chaen chunijiun loreri asae turuhichene, ‘Raotojoein neeuche saain caa loreri asae neinequichenera,’ naauche inara turuneeicha. <sup>6</sup> Nii jana nii loreri asae niha caohachaaain nena jereraaurunete nerausiajeein neeurureeincha. Jana caohachaaain raotojoein nena jerecurenihane, coatiha nerausiaecururiaainta. <sup>7</sup> Chaen chunijiun nese que turuhichene, leinjiin loreri asaecha neein, lenonecuruhane jaan que lenoneein, acau cohin, naaonjoaanchera. Niha rauhi, coreteraauruha amihanenacaaurune jaanura. Jiaonriha lorerichuru naineein cajihanein amuhemuhequichenera. <sup>8</sup> Chaen chunijiun nese que turuhichene jaan, caohachaaain inara raain inara coroateeuruhane jaan que lenonecuchera. <sup>9</sup> Chaen ecu neeuruha cunaitenacaaurune, acaauru rautaaain, ‘Inaen ichuunnijiha, inara caje Cana Coaunera Cojoanonaara,’ naain acaauru rai beeuchera. <sup>10</sup> Leinjiin neseu turuhichene jana, ecu inara coana jerecurenihane: <sup>11</sup> ‘Cau inara neseu turuhacaanune jana canacaanu tijia que nitirichana utoonena riariaain ratirihacaanu, ‘Coaraain cau neein nainaacuche,’ naain ichacaaunne que nainaquichene coina. Nete laen, inae ichuunnejeeoriha inara caje Cana Coaunera Cojoanonaane saijieein que jaolecohichene coitucuhichene caohachaera,’ naain acaauru rai beein, jelai caje amuuchera. <sup>12</sup> Nii inara coiinteraauru cachaurute, neecha aansaineein ichaonacaauru Sodoma cocoaichacuru amurijiriin jataain caseteco tabai coaraa cuurureeincha,’ naain nii rai niicha letoanojoinunri rai be Jesuso.

### *Erenaa tonoraachuru cachauru (Mt 11.20-24)*

<sup>13</sup> Niritiin jetaote: “Cairichaojoaache, Corasiin, Betesaaida, naaonjoaain nese cocoaichacuru, jataain necairichanaa coariquicheeinne jaun. Bana

inara rai cojoelanaacojoai ichacaaunne rijijieein, Tiro, Sidoon, naaonjoaihun cana lauri Isaraelitanelanaala ichaonacaauru rai cojoelanaacojoai ichacaaunne jana niha nete, acaauru ichoaichaniha inae Cana Coaunera que suujua acatecuruhane coarateein, baaso ichajeein ichaaoruhane jianein neeuruhane coujunacane que inaderaain costaro siri caje nenea cajione jiaain, ajane que nerujuaain neeurure.

<sup>14</sup> Nitohaneeichene jaunte, inae nii cojoanonaa que turuhane bana, Tiro, Sidoon, naaonjoaihun cana lauri Isaraelitanelanaala ichaonacaauru amurijiriin, caseteco tabai coaraa curiquicheein. <sup>15</sup> Jana inara Caferenaon cocoaichaneeinchene, inacojoein dedeeu cuha nocoetona jereein coaauquiche. Inarate, usi tabai cataaun jaonojoein nitajiha curiquicheein,” naain bihane baiha jetaote:

<sup>16</sup> “Nitohanihane jaun, caohachaain inara raerate, jerichanejeein caohachaain canu netonoai raa aicheein. Jana, inara que jaolequiin, inara ranaa jeriheichurute, jerichanejeein canu que jaolequiin canu ranaa jerenihane jaun aihurureein. Nii rijijieein techu, canu que jaolequiin, canu ranaa jeriheichuru, jerichanejeein caletaera Cana Coaunera que jaolecoha aihurureein,” nae rai nii letonocuru rai Jesoso.

### *Jelaiha cauha cuuruha caaunsi choonca coroatajai nii niicha letoanojoinurine*

<sup>17</sup> Nitohaneein letoanajaane jaaun cuhin jetaote, caje jelaiha rachoojoein turuhin jetao:

“Curuaanaa, ii letononeein nihacaanune jaunte irihacaanune, coitucuhichuru nihanatiin canacaanu ere tonoraain neeure,” naauruha nii caaunsi choonca coroatajai letonocurune jana jetaote:

<sup>18</sup> “Aihachuhisi. Jiacane amuneein dede caje naluha uha Moconajaerane janane coarajeeun. <sup>19</sup> Canune, nitohaneein itolere que nelateein laraajiin cuhin, acanocuru, canaauru, naaonjoaihunri ichoae situhin, itolere coitucuhichuru amuritohiche, nii necairichanaa coaraelaanaalane coina inara letoaaun. <sup>20</sup> Nete, nii nitohaneein inara ere tonoraain neeuruha coitucuhichurune nihanatiin que rachoojoein nenea naineneeiche. Inae laenanohineein niha Cana Coaunera Quiricha cuhane dedeeu inara curuaacuruneecha quete laen nainequiche rachoojoeichenera,” nae jetao acaauru rai Jesoso.

### *Rachoojiha Jesusone (Mt 11.25-27; 13.16-17)*

<sup>21</sup> Nitohaneein turuhin itolere ichacuruhane beeuruha nii rai letonocurune jaun jetaote, rachoojoein Cana Coaunera Suujue que suujuequiin jetao:

“Ii, dede, chauratane, naaonjoaain Coaunera neein, itolere Curuaanaa neein neeine coroaecaunra Ofa. Iite, nii itolere coitucutoha nocoetonacaauru que coitucueratelanaala, nii cha que nelatihei rijijieein nacaauru que nii coitucueraelanaala nenea coitucuerateeicha. Aihara Ofa. Nitohaneein jereine jaunte ichaaiha,” naa Cana Coaunera raine baiha jetao:

<sup>22</sup> “Ofate caque itolere coitucuerateein ne, coitucuhin nihanune coina. Nihei chuni canu coitucunaa nainera, cacoitucuerateniha Ofane. Nii rijijieein chu canu, rai Calaohineein, que coitucueratenihanune, nihei chuni Ofa coitucuera. Canu, rai Calaohineein coitucueratenaa jerichaunne jaanruhachate Ofa coitucuurureein,” nae jetao rachoojoein Jesoso.

<sup>23</sup> Nii baiha jetaote, jelai teein aina nerelanacaauru rai jetao: “Nerausia-jeente neeiche, caa ena inaraacha coarai coaraain neeichene jaun. <sup>24</sup> Arajii profetacuru, chaen reycuru, naaonjoaihunru inoasihurute niqui, caa ena inaraacha coarai coana jereein, caa inaraacha aonai aohana jecurelu. Nete, nii coaraain, aonaain, naaonjaaunrenelu,” nae jetao acaauru rai Jesuso.

*Samaria cocoaicha que parabola que cuaain, leinjiin cacha relaera relaa Jesusone*

<sup>25</sup> Niritoha Jesusone jana jetaote, rene turuhin jetao, “Tohanrihanicha,” naain nechua jataain coujuha jetao:

“Cacha relaera, cha ichareeun chariji bana nitajenaachara ichaonaa que ichaonaa nainichaaunne coina,” naa rai leinjiin Moisesa naitoonjoan rauhi que cacha relaerane jaun jetao:

<sup>26</sup> “Tonaainjia laenanohineein ne Moisesa aitoonjoan rauhi cuhane erere-taain coaraaine jana,” naa rai Jesusone jaun jetaote:

<sup>27</sup> “ ‘Jataain ishujua, ii suujue, ii coichana, naaonjoain aina cutaain, ii Curuaanaa ii Coaunera que ii suujua acateein, aca jerihane rijijieein coitucuhin naitoonjoan ichaain neeu. Chaen ijiabereeo belaaain coaraain neeine rijijieein, chamute cacha belaaain neeu,’ naainte ne nii rauhi cuhane,” naain jetao tonorae nii Moisesa naitoonjoan rauhi que cacha relaera.

<sup>28</sup> Nii jaun jetaote:

“Jataain caohatiinte aitohi. Nitohaneein neeinete, ichaonaa chariji bana nitajenaachara que niha curiquiinchu,” nae jetao rai Jesuso.

<sup>29</sup> Nii jaun jetaote, jaiti jitaain nii niicha coitucunaa jerei beniha raine que nainaa Jesusone coina jetao:

“Charijina camute cacha neein belaaain ichaoreeun,” naa Jesuso raine jana jetao:

<sup>30</sup> “Aonaun. Coaraaunachuhinti, leinjiin cacha jetao, Jerosaleen caje Jericoo cuhane jana, bero cuhane eruhin, enuha que faofoaain sohin- rai cajione ruluhin- jitariin niicha siriine maajeein ruluhin- ateinane lalajeein ratiriin amuuruha necha aansaineein ichaonacaauru cachaaurune.

<sup>31</sup> Nii jana jetao, nii jeelai bero cuhane cuujiha leinjiin Israelitanichaachene lauri caje nena saseredotene jana, najiniha niha nii cachane coariin, comarohin rauhijiriicha situhin amue. <sup>32</sup> Nii jana jetao coaiten caaijie cuujiha, leecha Israelitanichaachene lauri caje nena Lebitane jaun, acaantonai coariin, inauheneeicha coarajeein comarohin rauhijiriicha situhin amue. <sup>33</sup> Nii jana jetao, acaauru caaijie cuujiha leinjiin cana lauri Israelitanelanaala nena inara jaole Samaria cocoaichane jaun jetao, coariin, cairichaojoaain coaraane jaun jetao, <sup>34</sup> rene nichuuntaain erene aina bino caje ichanohineein nena coi que culejeein jetao, nii nocoasaja coichaain, cajione que conajaain jetao rai cabario ichoae lauriaain, coreteein turunaanaja leinjiin loreri asaee amaain ecu teein jetao berai.

<sup>35</sup> Nii cojoanooon jetaote, rai coriqui rocohin jetao nii nenaanaja erora corete jetao nii Samaria cocoaicha. Nitohaneein coreteein jetaote, ‘Atiin canu rai caa cacha beraain coichau. Caa cacha coreniha ii coriqui jaohinene ii rai cainareeunni caaujiataain,’ nae jetao nii cacha, nii nenaanaja erora rai.

<sup>36</sup> Nitohanihane jaun, chariji jana nii nichatajaihuri caje nii necha aansaineein ichaonacaauru cachaauru sonojoi cacha belaaain coarae, rai jaberoco belaihanerijijieein,” naa Jesusone jana jetaote:

<sup>37</sup> “Nii cairichaojoaain coaraain belaaain coichaera,” naa nii Moisesa aitoonjoan que cacha relaerane jaun jetaote:

“Inae laen coitucuhi. Nitohaneein iitonai ichaaau,” nae jetao, rai Jesuso.

*Mariha aina Marata loreri asaae turuha Jesusone*

<sup>38</sup> Nii baiha jetaote, jelai caje amuhin leinjiin neseu turuhane jana jetao, rai loreri asaae rae leinjiin ene Marata. <sup>39</sup> Nii Marata nejera Mariha jetaote, ecu turuhin ereerejiha Jesusone jaun jetao aonaane coina rai tijia asaae nelauriariin lauheque. <sup>40</sup> Nii jana jetaote jelai niicha ichanenu aina ratiriin aihane jaun jetao, Jesuso rohan nichuuntaain jetao:

“Curuaanaa, tana itolereenein camijianeeon aina jelai caratiriin aiha caa canejerane coaraainete rai aiteneei canu coroatajaniha uhane coina.” naa Maratane jaun jetaote:

<sup>41</sup> “Marata, aonaan. Jataain niha iicha ichanenune jaunna jataaain nererojoecai. <sup>42</sup> Nete jataain leinjiincha ne cacha rai jataain nelatei. Caa Marihate nii jataain cacha rai nelateein nei janijiin rae. Nii jaun nerinaain chuni caje ruluera,” naain jetao tonorae Jesuso.

## 11

*Cana Coaunera bajanaa que aina nerelanacaauru relaa Jesusone*

*(Mt 6.9-15; 7.7-11)*

<sup>1</sup> Jelai cuhin Cana Coaunera bajaa cuha Jesusone jana jetaote, inae nainaane jana jetao:

“Curuaanaa, aina nerelanacaauru relaalu Joanne rijjijeein canacaanu relaau Cana Coaunera bajanaa quera,” naauruha aina nerelanacaaurune jana jetaote: <sup>2</sup> “Saan ai. Cana Coaunera bajaachene:

‘Cana Coaunera,  
ii acaihaniji Cana Coauneraneein  
neeine coitucuhin neeurumiin satiin cachaauru.  
Nihei chuni ii baiha ii rijjijeein nei.  
Dedeeu iicha jerei ichacuruhane rijjijeein,  
cau chauratane que netonai  
ichacurumiin satiin chauratane que nenacaauru.

<sup>3</sup> Canacaanu rai lenone teeute  
canacaanu rai lanaeneeine lenone.

<sup>4</sup> Baaso ichaechajeein  
nihacaanune nihanatiin  
canacaanu que ii suujua acateeu,  
canacaanu rai baaso ichaain  
nenacaauru que  
canacaanu suujua acateein nihacaanune rijjijeein.

Jiaonriha osa que nesaruhin nihacaanune  
nainatejeein neeine,’  
naain Cana Coaunera bajaauche bajaachenera,” naain jetao acaauru relae  
Jesuso.

<sup>5</sup> Niritiin jetaote:

“Coaracuchenachuhinti inara tabaauru niha rai belaichane jana, janotiin dede cataaun rai loreri asae turuhin: ‘Quiicha belai, taa niha ii lenone cautene. <sup>6</sup> Ena canu loreri asae turuha jataain quiicha belaine jaunne, que coroaathanune coina aitoon, neniha rai canuhacha teeninune jaun. Ii raine jeelai que corereenni,’ naane janate nainere: <sup>7</sup> ‘Coa carerojoe-caa. Inae canu bereecuru aina nesurucuaaunne jaun nimichuhin tenaa nainihaaun,’ naainte nesurunajaun neein tonorana nainere nii belaicha. <sup>8</sup> Netechu nimichuhin tenaa jerenihane saijieein conujiha nii belaichane, atiin nimichuhin jitariin niicha latei tenaa nainere. <sup>9</sup> Nii rijjijeeinte Cana



Coaunera caje cha lateein bajaachene, inara rai inaraacha latei tereein. Cha lateein ariin bajaera raite, cha teein ne Cana Coaunera. <sup>10</sup> Satiin cha lateein ariin bajaerate, niicha latei eruhin ne. Nitohaneeinte rohan nichuutaain cha baja cachane, rai cha teein naaonjoareein Cana Coaunera,” naain jetaote,

<sup>11</sup> “Coaracuchenachuhinti inara, inara caje ate bajaain niha inara calaohine jana, inara, inacaneein rai acano teriquiche. <sup>12</sup> Ainhane inara caje taje bajaane jana rai canau teriquiche.

<sup>13</sup> Coaracuchenachuhinti inara baasoneein ichaohichene natiin, caohacha nejesina teein neeiche inara bereecuru raine. Nii amurijiriin techu lateein caje bajaain neeichene, rai Suujue que suujuequiin neeichene coina, nii bajaera rai Suujue teein nereein dedeeu nena Cana Inaca Cana Coaunera,” nae jetao acauru rai Jesoso.

*Moconajaera ichanohineein niicha ichai ichaa Jesoso beeuruhane*  
(Mt 12.22-30; Mr 3.20-27)

<sup>14</sup> Nii baiha jetaote, suujua cuhane coitucuchuhi sirihane jaun, caaun eresilanaala niha leinjiin cachane jana jetao, caje sitaain rautae Jesoso. Inae caje mituhin amuha nii moconajaera letono coitucuchuhine jana, inae iriha nii eresilanaala nena cachane coaraain jetaote, jataain cojoaelatoore nii ecu neein coarajeeurera cachaauru. <sup>15</sup> Ne jetaote tabaauru: “Coitucuhichuru curuaanaa Beelseboote caa cacha rai catohanai ichaane jaan tihane jaun, caa catohanai ichaera,” naaure jetao Jesoso coarajeein.

<sup>16</sup> Jana tabaauru jetaote, esinae rauhijiriin aina niha Cana Coaunerane coaracuruhane coina nechuhane cojuha jetao, cojoelanaacojoai ichaane coina caje bajaure. <sup>17</sup> Ne jetaote, nechuhane cojuha aitocuruhane coitucuhane raotojoeine jaun jetao:

“Inarate caa coitucuchuhi ichanohineein cunaitenaa cacha rautaanune jaun, Moconajaera letononiha canu beeiche. Nete inara coitucuhichene rijijieein, satiin caa atane que nenacaauru ita que nejerateein neein ita sooruhane, jiniiquiin ita ichao itajeeurureein. <sup>18</sup> Nii rijijieein techu, nii coaauquichene rijijieein, nejesinajeein ita que nejerateein neeuruha rai letonocuru ainane, ita ichao itajeeurureein Moconajaera aina rai letonocuru. Nitohanihane jiniiquiin nii cha que nelatein neeururihei. ‘Nii coitucuhichuru curuaanaa Beelseboo caletaanee aina, coitucuhuhi ichanohineein cunaitenaa caa cacha rautaa,’ canu beeichene jaunne caa inara rai aitoon.

<sup>19-20</sup> Inara tabaauru, chunocoha cacha suujua caje coitucuchuhi sitanaa jerecuruhanete, ‘Cana Coauneraacha ichaneni ichaeraniha’ beriquiche. Jana laen canu, cacha suujua caje coitucuchuhi rocohanune jaunne, ‘Moconajaeraacha ichai ichaeraniha’ canu beeiche. ‘Nete laen, Moconajaera letono coitucuhuhi rocohanu cajene jaun, canu, Cana Coauneraacha ichai ichaeraneein, Moconajaeraacha ichai itajeraneein nihanune coaraquichene saijieein aitocoiche.

<sup>21</sup> Nii rijijieein techu, jataain laraajiin nena cacha, rai biji achune aina rai loreri beraihanee, satiin rai loreri asaae nenacaauru rai rucuhele rulunaa nainene caje chuni. <sup>22</sup> Nete laen, jataain amurijiriin jataain laraajiin nena, turuhin caje nii rai rucuhele niicha berai ruluha uhane, enaacha caje nii biji achune ruluhin jitariin raine que nii rai rucuheleuru rulureein,’ naain jetao Moconajaera amurijiriin laraajiin itolere ichana nainihane,” be Jesoso.

<sup>23</sup> Niritiin jetaote: “Nitohanihane jaun canuhacha ichai rautaelanaala coarate, canu que nejeratenaa neein nihane jaun ai. Jana canu aina Cana Coaunera rai cachaauru ranaa jeriheite, moconajaera aina nitajeeuruha cachaaurune jerihane jaun ai,” nae jetao Jesoso

*Jelaiha mitunaja rene cauha moconajaera letono coitucuchuhine*  
(Mt 12.43-45)

<sup>24</sup> Niritiin jetaote: “Nitohaneein leinjiin cacha caje mituhin amuha coitucuhuhinete, enohane jaanu ariirijie cajianeein joaereein amuhemujueein. Nii jana erusinihanete, ‘Jelaiha taolu mituhanune jaa rene cauha cuhanunete caohachae,’ nae. <sup>25</sup> Niritiin nii mituhallune jaa cacha suujua cuhane turuhane, aiha leinjiin loreri coneraelanaala caohatiin lojainojoineein rucuhenojoineeine rijijieein nii cacha suujua eruhane, <sup>26</sup> nacoaauneein jelaiha cauhin, caaunsineein amurijiriin jataain baasoneein nenacaauru coitucuhuhicuru cotijiaain amaaain, nii cacha suujua cuhane enohin ichaauruha nii coitucuhuhichurune, jauriaanejeein aihalune amuritoheriin jataain baasoneein ichoae nii cacha,” nae jetao acaauru rai Jesoso.

*Esinae rauhijiriin rausiaenojoineein niha cachane jaan esine*

<sup>27</sup> Niritiin jaiti acaauru rai ereerejiha Jesusone jana jetaote, nii cachauru jana toniin jetao:

“Nerausiaeeca ene ii janoaain efojialura,” naa rai leinjiin ene ehequine jaun jetaote:

<sup>28</sup> “Aiha chuhisi niqui. Nete Cana Coaunera aitoonjoan aonaain tonoraain nenacaauru nii amuritoheriin nerausiaecure,” naain jetao tonorae Jesoso.

*Cojoelanaacojoai bajaauruha necha aansai cachaurune*  
(Mt 12.38-42; Mr 8.12)

<sup>29</sup> Nitohaneein netaojiajeein, jataain arajiin turuuruha curuhacaain cachaurune jaun jetaote, acaauru rai: “Caa Moconajaera cojoanonaa que nenacaauru cachaurute, jataain necha aansaineein ichaauruhane jaun, acaauru rai cojoelanaacojoai ichacaunne jerecure.

Nete Isaraelita neeurenihane saijieein, dede caje cojoelanaacojoai coaracuruhane latelanaala, acaauru rai Cana Coauneraacha beratei biha Jonasine jana esenetaaurelu Ninibe cocoaichacuru. <sup>30</sup> Nii rijijieeinne canuhetonai inaraacha cohajei Cachaneein nejanohanaa nichaunne, caa enene cojoanonaa que ichaonacaauru cachauru rai Cana Coauneracha ichaneni beraneein neeun.

<sup>31</sup> Nitohanihane jaunte, inae satiin cachauru ichao coitucuhin rucuheca Cana Coaunerane Cojoanonaa que turuhane bana, nimichureein Egipto bujuau nena atane curuaanaa enenein nena reina, caa enene neiniquichene coulurujiane coina. Acate coriaji atane caje uhin turuelu, niicha coitucui biha Salomoonne jana aonaane coina. Nitohanihalu natiinte, Salomoon amurijiriin neinichaaunne saijieein, canu ere aohana jereneeiche. <sup>32</sup> Nii rijijieein techu, inae enene cojoanonaa que ichaonacaauru cachauru ichao coitucuhin rucuheca Cana Coaunerane jaan Cojoanonaa que turuhane bana, inara colurujueeuruhane coina nimichua cuurureein Ninibe cocoaichacuru. Aiha nii Ninibe cocoaichacuru, inae caseteco coaracuruhane rai neeuru jana acaauru rai Jonasi que beratiha Cana Coaunerane jana, cojoelanaacojoai coaracuruhane latelanaala esenetaain nichao coreeruhane jaun. Nete laen, Jonasi amurijiriin nei nichaunne sainejeein canu esenetaeneeiche,” nae jetao acaauru rai Jesoso.

*Cacha cono niha cacha notane*  
(Mt 5.15; 6.22-23)

<sup>33</sup> Niritoha acaauru raine baiha jetaote: “Charijieein teeinti, nene chuni cono mocohin bujuaihu tera. Niheichu rori asae nii cono telanaala ecuun nii cono mocohin te, satiin nii loreri asae turunacaauru conohanau neeruhane coina. <sup>34</sup> Nii rijijieein techu inara jaberoco cononeein ne inara

nota. Aihane jaun, esinae rauhijiriin jataain caohachaaain cha coaraain coitucuhin neeichenete, satiin jianacoon niha cureein inara suujua. Nete laen caohachaaain cha coaraquichene nihanatiin que jaolequiin joaenreein chachaquichene, jataain nocohena tabai jana niha cureein inara suujua. <sup>35</sup> Aihane jaun, cha coaraain coitucuhin caohachaaain nocohalajiin neeuche, nabana cha coaraquichene nihanatiin que jaolequiin neeichene, nocohenee neerin nerotoha nii inara conaerane coataa. <sup>36</sup> Aihute itolere inaraacha coarai coitucuhin ichaquichene, nocohena coaraelanaala satiin jianaacoon neeine inara suujua, raafariin conohanau cha coana rijijieein, esinae rauhijiriin satiin itolere coaraain neeichene,” nae jetao acaauru rai Jesuso.

*Cacha relaaurera aina fariseeocuru colurujaha Jesusone*  
(Mt 23.1-36; Mr 12.38-40; Lc 20.45-47)

<sup>37</sup> Inae niritiin cachaauru rai ereerejihane nainaa Jesusone jana jetaote, rai loreri asae lenoniha cuhane coina jetao cotijiae leinjiin fariseeo. <sup>38</sup> Nii jaun cuhin, rai loreri asae turuhin nitohaniha acaauru ichaone saijieein biji culeje lanaanla rori ichoae nelauriaa Jesusone jaun jetaote, cojoaelate jetao nii cotihara fariseeo.

<sup>39</sup> Nii jaun jetaote:

“Inara fariseeo neeichenete jataain inara jaberoco culeena inaaiche niqui. Nete nii saijieein jataain banejelanaala calanaineein ne asi-jiauhin, naosateein, naonjoaainchene coreniha inara suujua cuhanai. <sup>40</sup> Asoneeojooaichenaate. Tana nii jianacoon nena inara jaberoco coaunera inara jaberoco cuhane nena, inara suujua netonai coaunaane coitucuhichene. <sup>41</sup> Aihana jaun inara suujua coaraain inaraacha ichaneni ichaain neeuchete nuculocohin neeine inara suujua aina inara jaberoco,” naain jetaote acaauru rai,

<sup>42</sup> “Cairichaojooaiche fariseeocuru, cache caohachaniha nocoetocoichene coaracuruha cachaaaurune coina, biha inara rai rauhine rijijieein nii lechoonca turineein inaraacha taojiai inara temule caje le turii teeichene saijieein jeriha Cana Coaunerane rijijieein inara amute cachaauru belaaain, nii chuni que jaolequelanaala satiin ita rijijieein cachaauru coaraain neneeichene jaun. Aihane jaun, nii cache caohachaniha nocoetocoichene jianein inara amute cache belaaain, nii choae tacaain aitoa inara rai rauhine rijijieein ichaaoche.

<sup>43</sup> Cairichaojooaiche fariseeocuru, esinae rauhijiriin jataain nelateein nena rijijieein sinacoca asaae rori caohacha janijiin nichoae nelauriaain, inara que suujua acateein, chunijiun inara eruuruhane inara rai ereein, naonjoaauruha cachaaaurune jeriquichene jaun.

<sup>44</sup> Cairichaojooaiche. Charijieein teeinti atane bana shaquiin nichoae situhin amue cache, asaaun niha calanaine coitucuelanaala. Nii rijijieeinte ne, inara suujue cuhane calani neosateichene coreniha,” naa acaauru rai Jesusone jaun jetaote:

<sup>45</sup> “Cache relaera, fariseeocuru que niritiin canacaanu quene maajeein ereeine jaunne, sanein rautaenihacaanu,” naa acaauru caje leinjiin Cana Coaunera aitoonjoan que cache relaerane jaun jetaote,

<sup>46</sup> “Cairichaojooaiche inara netonai. Nitohanein ichaohiche inarane que ainaan tochaneein, ichaonaa anajiin teein, inara amute cachaauru cairichaaeriin neeichene jaun.

<sup>47-48</sup> Cairichaojooaiche, Cana Coaunera ere bera *profetacuru* sohin jaoruhane inara foerateracurune coitucuhin, baaso ichacuruhane coitucuhichene saijieein inara netonai acaauru rijijieein neeichene jaun.

<sup>49</sup> Nitohaneriquicheeine coitucuhinte: ‘Acaauru raine, *profetacuru*, afosooru, naaonjoainuri letoareeunni. Nii janate, tabaauru sohin jaohin, tabaauru que nejerateein, acaauru que nererojoecaa curiquicheeincha,’ naain besilu Cana Coaunera, nitohaneechene coitucuhane jaun.

<sup>50</sup> Nii jaunte, cana rai chauratane coaunaalu Cana Coaunerane caje coauneein, nii inara foerateracuru aina nii inaraacha sohi inaraacha jaorilu *profetacuru* coichana core coaratihane cureein inara que Cana Coaunera.

<sup>51</sup> Nitohaneente nii Abeli sohin coichana jaohalune jaan caje coauneein, Cana Coaunera rai lenonecuru mocooruha saseredotecuruhachane jaan rori aina *santuario* cataaun teein inara foerateracuruhacha atinailu Sacariasi que tiaaajoaain caa enene neiniquichene que nii core coaratihane cureein Cana Coaunera.

<sup>52</sup> Cairichaaajoaiche, Cana Coaunera ere bera Moisesa naitoonjoan que cacha relaurera; Cana Coaunera naitoonjoan coitucuhin neeichene saijieein tonorana jerelanaala neein, coitucuhin tonoraauruha cachaaurune jerelanaalane maajeeine jaun,” nae caauru rai Jesoso.

<sup>53-54</sup> Niritoha acaauru raine jaun jetaote, aina obajeein, nechu jataain tonaane coulurujeeuruhane jaan lera ariha jetao, Jesoso rohehecaure Cana Coaunera naitoonjoan que cacha relaurera aina fariseeocuru.

## 12

*Baaso ichacuruhane nihanatiin caohacha ichaa nocoetocuruhane coataa cachaauru relaa Jesusone*

<sup>1</sup> Nitohaneein araai oharaancaain netaojiaauruha cachaaurune jaun jetaote, nejesinajeein ita sururucuruhane jana jetao, aina nerelanacaauru rai jetao: “Jiaonriha aihuruha fariseeocurune rijijieein asinojoneein baaso ichaain caohacha ichaa nocoetiin nihache. <sup>2</sup> Nii asinojoneein coitucueraelanaala baaso ichaain caohacha ichaa nocoetocoichene nihanatiinte inae ecu tihane bana coitucunojoinereein. <sup>3</sup> Nitohanihane jaunte, inae nii cojoanona que inae turuhane bana, nii coitucueraane coataa asiin ereeichene jaan coitucunojoinereein. Jana nii coaraa chunine coataa asiin inaraacha beite satiin aonajera urichoo coitucunojoinereein.

*Esinae rauhijiriin coasinacai*

<sup>4</sup> Nitohanihane jaunne, jataain canuhacha belaaicheeine rai aitoreeunni. Jiaonriha inara sohin inara jaonaa jerera que casiin neeichene, nii inara atinaaruhane baiha nii chatohaneein inara teein inara itajenaa nainecurenihane jaun. <sup>5</sup> Nena laen esinae rauhijiriin coasinacai que inara rai aitoreeunni. Nii ohin niha inara jaberocone baiha usi jana inara suujue itajeranu quete laen nainequiche casiin neeichene. Aiha laen, nitohaneein cana tenaa nainerate laen naine coasiin ichaohacane.

<sup>6</sup> Tana nii coitucuhichene rijijieein jataain corelanaala nena coroatajajei moneda coriqui coreniha saouqui tajaee laaoinaa que necoreteeichene. Nete nitohaneein cachaauru rai jataain cha que nelatenihane saijieein, nii leinjiinniji acaauru baitene Cana Coaunera. <sup>7</sup> Nii rijijieein techu, leinjiana leinjianaain janiinojoneein ne inara couturijihuru. Aihana jaun, itolere tajaee laaoinaacuru amurijiriin nelateein neeiche Cana Coaunera raine jaun, jiaonriha casiin neeichene.

*Cachaauru que acaneein nihane coitucurateeuruhane jeriha Jesocuristone*

*(Mt 10.32-33; 12.32; 10.19-20)*

<sup>8</sup> Chunocoha cacoitucuhin canu coreniha laraajiin cachaauru acatiha netiin ereein neine, inae Cana Coaunera Cojoanona que turuhane bana,

Cana Coaunera aina letonocuru anjeraauru notaracaae netiin canu, acaihaniji inaraacha cohajei cachaneein nejanohanaa nichaaunne aca coreniha erereunni. <sup>9</sup> Jana chunocoha, cachaauru que canu neein nihanune coitucueratelanaala nenaane, acaentonoai coitucuha cuhenereunni canuhetonai, Cana Coaunera aina rai anjeraauru acatiha netiin.

<sup>10</sup> Canu acaihaniji inaraacha cohajei Cachaneein nejanohanune que baasoneein ereein nei que nihanatiinte suujua acatena nainereein ofa Cana Coaunera. Nete laen baaso neein Cana Coaunera Suujue que ereein nei que suujua acatenereein.

<sup>11</sup> Nitohanihane jaun inara colurujueein inara amaauruha sinacoca asae Joriocuru cocoainanacaihuri, joesiocuru, naonjoainuri renene, jiaonriha chaque tonajeein cuhichene. Coa: ‘Tonaainnera erereunta,’ naain nocoatiin ereeichene jaanu coacuhin cuhache. <sup>12</sup> Inae ereeichene coina neeichene janate, caohachaain ereeichene coina inara relaa cureein Cana Coaunera Suujue. Coatiha inara suujua caje rocohin ecu ereriheicheein,” nae jetao aina nerelanacaauru rai Jesoso.

### *Jataain alalacaraa coriquihonacaauru ichaone*

<sup>13</sup> Nitohanein cachaauru relaa Jesusone jana jetaote, nii arajii cachaauru caje leinjiin cacha jetao Jesoso rai:

“Cacha relaera, canu nejera rai aitoote, canu rai canacaanu inaca amureecha ratirii rucuhele canacaanu rainein nena leruhin teeine canu raicha,” naa Jesoso raine jaun jetaote;

<sup>14</sup> “Chana jana chaen, cocoainanacainein canu tein, nitohanai rucuhenein inara rene caletoe inara inaca amureecha sirii rucuhele leruhin tihanu inara raine coina,” naain jetao,

<sup>15</sup> saain nii ecu neein aonajeeurera cachaauru rai jetao: “Jiaonriha itolere siriin necoriquijiaain nena coauquiche inara netonaine. Coatiha coriqui siriin nihacaneecha que nelateein nihei cana ichaota,” naain jetaote;

<sup>16</sup> “Coaracuchenachuhinti niqiu niha leinjiin cacha, jataain itolere siriin coriquihonane. Nii jaun jetao, jelai tein atane siriin, arajiin ocoana sirihane jaun jataain arajiin rai temulecuru taojiae.

<sup>17</sup> Nii jaun jetaote: ‘Cha laen ichareeun canu temulecuru canuhacha taojiaa ainata. Inae nihei rucuhacaaunne jaanuta,’ naain jetao coacuhin; <sup>18</sup> ‘Saan. Inae canuhacha ichaneni coitucuhanu. Jitariin canu temulecuru coloheri ihuru comaain jaohinne, nacoauneein leeochoauru lorerichuru tabaihuri jareeun, jitariin catemuleeuru canuhacha taojiaa rucujueein, jitariin carujueleeurune maajeein rucuhacaaun nasae teinne coina. <sup>19</sup> Nii baihane laen caraajenhane: Inae niha araai jaanacanein ichaohin, tonajelanaala acau cohin, lenoneein, rachoojoein naonjoaanune jaanu,’ naain suujua cuhane iriha nii coriqui coriquihonane jana jetaote; <sup>20</sup> ‘Asoneejoaainaate, ena cojoanotiin cuhanete oriquincha. Nii ii rucuhele inacojoein arajiin rucujueein chunaain iicha sirii, chaa rainein chaainti niha cureeinta,’ nae jetao rai Cana Coaunera.

<sup>21</sup> Nitohanihane jaunte, nechu jataain rainein chaque namute cacha coroatajanelanaala rucuhele siriin nena cacha, Cana Coaunera rai cairichainejeein ne, nitajihane rai nihane jaun,” naain jetao nii coriquihona cacha que erena *parabola* que acauru relae Jesoso.

*Nere tonoraain jerihane rijijiein ichaohin nenacaauru beraiha Cana Coaunerane*  
(Mt 6.25-34)

<sup>22</sup> Niritohane baiha jetaote, aina nerelanacaauru rai jetao: “Caa quene inara rai erenaa jereeun. Jiaonriha lenoneein ichaohiche jaanu aina inara cajioneecha que nererojoecaaichene. <sup>23</sup> Jataain nelateein niha lenonene amurijiriinte, jataain nelateein ne inara ichao. Jerichanejeein techu nelateein niha cajionene amurijiriin jataain nelateein ne inara jaberoco.

<sup>24</sup> Coaracuche nachuhinti temule jaain, niicha quiineeuri rucuhecurhane jaanu coloheri siriin, naaonjoaain neeururiha rohirihuru. Nete laen Cana Coaunera, lenoneein ichaauruhane coina acaauruhacha quiine tein ne. Inarate rohirihuru amurijiriin jataain nelateein neeiche.

<sup>25</sup> Inaonjoa saain nihanatiin itolereneein suujua cuhane coaauca cachane nihanatiin, nichao cariaain ichaonaa nainihe. <sup>26</sup> Chanuna aansijiin laajoiri que coacuhin neeichene nihanatiin, ichana nainequichene coaalanaala itolere que nererojoecaaeriin neeiche.

<sup>27</sup> Coaracuche nachuhinti caohachaenanaain omarohin neeuruha caa ajaena ujuanecuru amihanejeein neeuruhane que airijiinne. Nete aihuruha caa ajaena ujuanecurune tocohaneein jataain caohachaain inanacaenelu rey Salomoon, cajione caohacha que necoreteein nihalune saijieein.

<sup>28</sup> Nitohaneein mocoheneein niha caa ajaena ujuanecuru natiinte, caohachaain omarohin neeuruhane jaanu tein ne Cana Coaunera. Tana nii amurijiriin inara- cachaneein neeichene cajione terichaain Cana Coaunera esenetaaicheneta.

<sup>29</sup> Nitohanihane jaun, coa lenoneein, acau cohin, naaonjoaaichene jaanuhacha que nererojoecaaeriin nihache.

<sup>30</sup> Satiin caa chauratane que Cana Coaunera coitucuelanaala nenacaauru cachaaurute, nechu jataain nitohaneein nererojoecaaeriin neeure. Nete laen, satiin inaraacha latei coitucuhin teraneein ne Cana Inaca Cana Coaunera. <sup>31</sup> Nitohanihane jaun jeriha Cana Coaunerane rijijieein ichaauruha cachaaurune jaan Cojoanonaa que coacuhin neeichenete lanaenereein inaraacha latei,” nae jetao aina nerelanacaauru rai Jesoso.

### *Dedeeu charijibana satonohelanaala ichaonaana jaan*

*(Mt 6.19-21)*

<sup>32</sup> Niritiin jetaote: “Jiaonriha casiin neeichene, charijieein teeinti carenero beraain neeure irilaaain sirichaauru, nii rijijieein inara beraain nerichaaun-nine jaun. Inara Cana Coaunera coitucuheneeichenete, jataain coroatajajeein neeiche niqui. Nete jataain inara belaihane jaun rai Cojoanonaa que inara rareein Ofa Cana Coaunera. <sup>33</sup> Aihane jaun, jitariin nii inaraacha sirii rucuhete que necoreteein, cairichanejeein chaelai que latejiojoiiriin nenacaauru coroatajanecuche. Nitohaneein neeichenete, dedeeu charijibana satonoelanaala nena Cana Coauneraacha teeninu rariquicheein. Nerinaain inara caje nii dedeeu inara raineein nena ruluera. Nii bana asijiautooru nihanatiin ecu turuhin inara basijiahuna nainihe. Niheichu cojoano nihanatiin ecu enohin asaaena nainihe.

<sup>34</sup> Nitohanihane jaun jauriaanejeein caohatiin, nii chabana satonoe-lanaala nena, nii ena nitaje rai nena inara ichao, naaonjoai que coacuche.

### *Letonoa jatoraaain neeuche*

<sup>35</sup> Letona jatoraaain inara cajione jiaain neeuche, inara siricho mocohin conohanau. <sup>36</sup> Charijieein teeinti, nesirihatena beseta caje cauhin, acuujuu dadaa fatoroone jana, acuujuu joaracaain raure nii letonocuru. Nii rijijieein jatoraaain neeuche. <sup>37</sup> Raotojoeinte neeurureein nii rai letonocuru, sinilanaala neeuruhane jana acauru eruha nii acauru fatoroone. Esinae

rauhijiriinte raajenihane rori ichoae acaauru lauriaain lenone que acaauru coroaatiha cureein nii acaauru fatoroon. <sup>38</sup> Dede cataaun, janonaa nichae, naaonjoaain turuhane jana, sinilanaala cohacuruhanete, raotojoein neeurureein.

<sup>39</sup> Caohachaain inara rai caitoonjoa aonacuchete coitucuhiche. Chuno-coha loreri erora turuhin basijiauha uha asijiatone coitucuhane, coatiha nii acujua joracarihei, nabana enohin basijiauha nii asijiautone coataa. <sup>40</sup> Nii rijijieein inara netonai nainaan jatoroaain neeuche, turuha urichaaain nacoauneein nii jauriaa acaihaniji inaraacha cohajei Cachaneein nejanohanaa que,” nae jetao acaauru rai Jesoso.

*Letoera tonoraera aina letoera tonoraai*  
(Mt 24.45-51)

<sup>41</sup> Niritoha Jesosone jaun jetaote: “Leinjiin canacaanuhacha ii aina nere-lanaanichaanune relanaa aitohi Curuaanaa, ainihane satiin raine maa-jeeinna aitohi,” naain caje bajaa Fedorone jaun jetaote,

<sup>42</sup> “Tana coitucuhichene. Chariji jian, nii jataain nelateein nere tonoraer-anein loreri beraichanu que ratiri rai fatoroon, turuhanereen tiaain nii rai cachaauru coroaateein acaauru sirihane coina. Tana satiin canuhacha co-coainai neeichene, canu cachaauru beraichaneein neeichene coitucuhichene. <sup>43</sup> Jataain raotojoeinte nereein nii nere tonoraera, nii letoain ratirihane jaa ichaa jerihane rijijieeine jana, eruha nii fatoroone. <sup>44</sup> Nii banate, esinae rauhijiriin jerihane rijijieein ichaohin nere tonoraain nihane, aca cocoinaain itolere niicha sirii coaranu que tereein rai fatoroon.

<sup>45</sup> Jana, ‘Jaitijiecha carajaain lanae turuha rai fatoroone’ naain coacuhin baasoneein niicha beraihuri quichaaauru, enecuru, naaonjoainuri que jaole-quiin acau cohin, lenoneein, ajeein, naaonjoaane jana <sup>46</sup> eruhanete, rai cachaaurunelanaala rai nere tonoraachuru cairichaa curichaaain Cana Coaunerane rijijieein acaentonai cairichaa cureein nii rai fatoroon.

<sup>47</sup> Jana inae nitohaneein coitucuhane saijieein, jatoroaain nelanaala nii letoaa rai fatoroonne tonoraelanaala, nenaate casetecareein jataain banelanaala bisiin rai fatoroon. <sup>48</sup> Nete laen coitucuelanaala nena rai cacha, baaso ichaane nihanatiin coitucuuruhane saijieein baaso ichaeraauru fautaeriin cairichanojoiniha cureein. Nitohanihane jaun, quiicha coitucui coitucuhetherihanune jaancuru cajene, jataain jelai amuritoheriin bajaree-  
unni, canuhacha jerei ichacuruhane coina.

*Jesoso coreniha ita que nejerateeuruha cachaaurune*  
(Mt 10.34-36)

<sup>49</sup> Canune caa chauratane que usi mocoha uun. Bajiaa nachuhinti chajaain mocohane jana turueneenlu. <sup>50</sup> Jataain necairichanaa tabai abaantanunete ne. Nii jaunne, nii que turuhanereen tiaain, que nererojocaeriin neeun. <sup>51</sup> Inacojoein chachu, ‘Caa cana rai chauratane que jecha raoti ichaonaanaja turuaa uun,’ naaiche niqiu. Aihei bajiaa. Raujiaain ita caje neleruhin niha cachane coinane turuunlu. <sup>52</sup> Nitohanihane jaunte, saouquin le lorerijieeincha ita aina ichaonacaauru, ena caje coauneein ita caje neleruhin, nii nichatajaihuri que nejeratiha cuurureein nii coroata-jaihuri. Jana coroatajaihurite, nejeratiha cuurureein nichatajaihuri que. <sup>53</sup> Jana calaohi aina te nejeratereein rai inaca. Nii jana calaohite inaca que nejeratereein. Jana acaauru nebate, rai cacunu que nejeratihane jana, rai cacunu netonai que nejeratereein. Rai nacano que nejeratiha nebaenene janate, nebaene que nejeratereein rai nacano,” naain jetao Fedoro tonoraee Jesoso.

*Janonaa cojoinacaauru coitucuha cachane*  
(Mt 16.1-4; Mr 8.11-13)

<sup>54</sup> Nii baiha jetaote, leeochoaauru cachaauru rai jetao:

“Enoto soo nichajai que nijichorianaa coaraaichenete, ‘Urichaain elo,’ naain ereeichene, nii aitocoichene rijijieein esinae rauhijiriin uhe elo. <sup>55</sup> Jerichanejeein techu, enoto mitu coarajeein cana raotono nichajai caje uaain jiatuha cujuanane, ‘Ajaarotorichaain,’ naaichene esinae rauhijiriin ajaarote. <sup>56</sup> Cha coitucunaa jeriheichuru casajeeuru. Nitohaneein dede, cana rai chauratane, naaonjoain caje coaraain cha coitucuhiche natiinte, canu coaraaiche natiin, ‘Naaonjoaa ichaonaane cointe aicha,’ naain canu coitucunaa jereneeiche.

*Aina nejeratenaa aina raotojoeeein niha cachane*  
(Mt 5.25-26)

<sup>57</sup> Chanuna baaso ichaain neeichene niha natiin, baaso ichaquichene coitucuhi nena jereneeiche. <sup>58</sup> Nitohanihane jaunte, inae ena caje coauneein colurujuenojoi ineriquicheein. Aihane jaun, joesio rene inara amaa inara colurujueranu ajiniha aina rucuecuche. Ainihanete, inae coulurujuenojoi nequichene jaan cojoanonaa que turuhane bana, inara netonai colurujuiha nii nejerateeichene jaan jera joesio raine, inara tiha coaridi-aauru bijihune, caresero kuhane inara enohaurureein. <sup>59</sup> Nii bana jelai caje mituriheecheein nii baaso ichaquichene jaan core nainaaiche jitaain inara coriqui jaohinne reein tiaan,” nae jetao cachaauru rai Jesoso.

## 13

<sup>1</sup> Nii bana jetaote, turuha cuure cachaauru Jesoso rene. Nitohaneein rene turuhin jetaote, “Jerosaleen nena Teenforo asaae lenonecuru sohin moco-hin, Cana Coaunera coroaeca neeuruha Calileea cocoaichacuru tabaaurune janate, acaauru sohin jaonajaain, nii lenone acaauruhacha sohi coichana que acaauru coichana jasiite Filatora,” naain jetao Jesoso rai beure nii cachaauru.

<sup>2</sup> Niritocuruhane jana jetaote: “‘Jataain naraaichuru amurijiriin osaaocuruhane jaun jecha aihure nii Calileea cocoaichacuru’ naaiche niqui. <sup>3</sup> Nete aine. Inara netonaite ohin nitajeriquicheein, inara ichao coreein jeriha Cana Coaunerane rijijieein neneeichene.

<sup>4</sup> Jerichanejeein techu jerihane, ‘Nii leeochoaauru Jerosaleeun ichaonacaaurulu amurijiriin jecha osaaotooruhane jaun, nii le choonca fosanehuri ichoae comoe nii ucuuneein ininaanaja nena Silohe,’ naaiche niqui. <sup>5</sup> Nete aine. Nii aihuruhane rijijieein techu inara netonai ohin nitajeriquicheein, jeriha Cana Coaunerane rijijieein inara ichao coreein ichaonaa jereneeichene,” nae jetao acaauru rai Jesoso.

*Inacaeniha temulene que parabola que cacha relaa Jesusone*

<sup>6</sup> Niritiin jetaote: “Leinjiin cacha nocoana jana leinjiin temule sirihane jaun jetaote, inaacane coaraa cue. Nii jana leinjiinniji inacaenihane jaun jetaote, <sup>7</sup> nii ocoana beraicha cacha rai jetao, ‘Aonaun. Nichata jaanaca naineeinne niqui le jaanacaauru naineein turuhin caa temule coaraa unajacoon. Nena chabana inaacane jana coaraeneeun. Aihane jaun chajaain ena sauhin jaao. Cha inacojoeeinte atane lanaaeca nere,’ naane jana jetaote: <sup>8</sup> ‘Aihachuhisi niquicha curuaanaa. Jauriaa nirijieein coarajeeune, ena ajaanaa kuhane rai nasaji retuhin ajaena setuuru te temurau. <sup>9</sup> Nitohaneein tihanune saijieein inacaenihanete laen nainere sauhin jaohine,’ naain jetao tonorae nii ocoana beraicha,” naain jetao cachaauru relae Jesoso.



*Nebetacanaa cojoanonaa bana leinjiin ene janori raro-hacaera rautaa Jesusone*

<sup>10</sup> Nii baiha jetaote, nebetacanaa cojoanonaa bana sinacoca asae eno-hin jetao, cachaauru relaa cue Jesuso. <sup>11</sup> Nii jana jetaote, ecu ne leinjiin ene- lechoonca fosa jaanacanihane caje coauneein baasoniha jaberocone jaun caaun cunaiteein. Nitohaneein jetaote, suujua cuhane neein jaberoco asaeca coitucuhuhine jaun, nii chariji bana neraujiasilanaala janori raro-hacaain ne. <sup>12-13</sup> Nii ene coaraain jetaote, cotijiaain nichoae biji meracaain:

“Inaen ii cunai caje nerautaaicha ene,” naa Jesusone rijieeoritiin, cunai caje nerautaaain nichaauraaain jetao, Cana Coaunera corojeein rachoojoe nii cunaitenaa ene. <sup>14</sup> Nitohaneein nebetacanaa cojoanonaa bana cunaitenaa rautaa Jesusone coaraain jetaote, obaje nii sinacoca curuaanaa. Nitohaneein obajeein jetaote:

“Niha saota janoneein amihanenaana jaan cojoanonaa. Nii amihane-naana jaan cojoanonaa bana nerautaeratiha uuchera. Coa nebetacanaa cojoanonaa bana nerautaeratiha uhachera,” naa cachaauru raine jana jetaote:

<sup>15</sup> “Chanuna nebetacanaa janonaa bana cha ichaain neeiche inara netonaine saijieein, cha ichaain neeuruha leeochoaurune jereneeiche. Tana inara netonai nebetacanaa cojoanonaa bana, inara baca, inara boro, naaonjoinuri cosi batuhin amaache jesinaaeca cohane coinane. <sup>16</sup> Nii rijijieeiina caa ene Abaraaun nefoerateneein nena, lechoonca fosa jaanacaneein Moconajaera ichanohineein caaun cunaiteein nihane caje, nebetacanaa cojoanonaa bana rautaaun,” naa Jesusone jaun jetaote, <sup>17</sup> jataain nocoejeeure jetao, nii aina nejeratenacaauru. Ne jetaote jataain itolere que nelateein, itolere ichaa Jesusone coaraain jetao coroaecure satiin cachaauru.

*Mosatasa ucuhe que parabola que cuuaain cacha relaa Jesusone*  
(Mt 13.31-32; Mr 4.30-32)

<sup>18-19</sup> Niritiin jetaote: “Coaracuchenachuhinti aansijihan mosatasa ucuhe natiin, nocoana jana temuha cachane jana omarohin fohecane, rai nunecuru que nucuhateeuruha tajaacurune. Nii rijiicha cacha inae Cana Coaunera Cojoanonaa canuhacha tei que ichaoha cachane,” nae jetao Jesuso.

*Faan jorerera que cuaain parabola que cacha relaa Jesusone*  
(Mt 13.33)

<sup>20-21</sup> Niritiin jetaote: “Coaracuchenachuhinti faan ichacuruhane coina neleeriha tabaain nii colihane jaanu que jorerera teein, nichata sajeein coujunaca que arina coujunacate leinjiin ene, inae neleeriha tabaain nii colihane jana caje arajiin faan jaane coina. Nii rijijieeinte neleeriha tabaain colihane coina nena jorerera rijijieein, neruujihaha cacha ichaone coina nena ne Cana Coaunera Cojoanonaa,” naain jetao acaauru relae Jesuso.

*Acuujua jaratoelanaala nena*  
(Mt 7.13-14, 21-23)

<sup>22</sup> Nii baiha jetaote, Jerosaleeun cuuruna jaan jetao, situuruna jaanru nenacaauru nenaanajaaunru, neseuru, naaonjoainuri nainein cachaauru relajeein cuujue Jesuso. <sup>23</sup> Nii jana jetaote:

“Curuaanaa, jataainna corootajaaecuruha caa nosa caje nichote-nacaauru,” naain caje bajaa leinjiinne jaun jetaote:

<sup>24</sup> “Eenjeen. Nitohanihane jaun, nii acuujua jaratoelanaala nena cuhane enooche. Arajiite niqui enonaa jerereein nete nainecurenereein.

<sup>25</sup> Inae ecu tihane bana nimichuhin acuujuua fuha nii loreri erora nete, inara airiniha nedainequichene, ‘Curuaanaa, acuujuua joaracaaune enohacaanura,’ naaichene janate, ‘Inara coitucuhanune coaalanaala, cha nequiche chaainti,’ naa inara rai nii loreri eroranete, <sup>26</sup> ‘Ii ainane lenoneein, acau cohin, naaonjoarejetocooanulu. Iite canacaanu relarejetohti canacaanu berooru cuhanera,’ naaichene janate, <sup>27</sup> ‘Inae inara rai aitocooaan, cha nequiche chaainti. Inara coitucuhaaun. Naain cacaje amuuche, baaso ichaechajeein ichaonacaauru,’ nareein. <sup>28</sup> Nii banate, inara airiniha nedainiquichene inara catu rihoneein chanaa curiquicheein, Cana Coanera Cojoanona que neeuruha satiin *profetacuru*, Abaraaun, Isaca, Jacobo, naaonjoainurine coarajeeincha.

<sup>29</sup> Nitohaneente enoto mitu nichajai coarajeein cana jaabiji nichajai caje, enoto mitu nichajai coarajeein cana raotono nichajai caje, enoto mitu nichajai caje, enoto soo nichajai caje, naaonjoainuri nichajai cajeeurute turuha uurureein cachaauru, Cana Coanera aina rai Cojoanona que neein nelauriaain lenonecuruhane coina.

<sup>30</sup> Nitohanerichaaanne jaunte, nii ena jaolecooruhane jaaunru nelatelanala nenacaauru tabaaurute, ichoaichaniha ranojoneein niha cuurureein. Jana leeochoauru amurijiriin nelaetoha nocoetonacaauru tabaaurute, satononejeein ranojoiniha cuurureein,” nae jetao acauru rai Jesuso.

### *Jerosaleen cocoaichacuru coreniha chanaa Jesusone* (Mt 23.37-39)

<sup>31</sup> Niritohane jana jetaote:

“Chajaain ena caalai caje amuu. Ii sohinte ii jaonaa jere Erodesicha,” naauruha Jesuso rene turuhin fariseeocuru tabaaurune jaun jetaote:

<sup>32</sup> “Aiha niqiu. Chajaain nii ataibinae rai: ‘Enene, eresi, eresi cojoanoo, naaonjoaichurune coitucuhichuru sitaain, cunaitenacaauru rautaaun, naaonjoareeunni,’ naain benichuche. <sup>33</sup> Nena laen enene, eresi, eresi cojoanoo, naaonjoaainchuru canuhacha ichaneni ichaechajeein cuujuereunni, nii Jerosaleeun edaa onaa naineniha leinjiin *profetane* jaun, ecu turuhanune reentiaaincha,” naain Erodesi rai beratihane baiha jetaote:

<sup>34</sup> “Cairichaaajoaache nohane satiin Jerosaleen cocoaichacuru, inara rene Cana Coanera letonocuru, chaen *profetacuru*, naaonjoainuri bodoosiin ajeri que sohin jaonajaaonquichene jaun. Araai saaine niqiu nitaro asae calaohichuru sararaain siniha ataharine rijijieein, inara ranaa jereun, nete cacoitucunaa jereneeiche. <sup>35</sup> Aihane jaunte inaen jelai neriquicheein. Inae cacoharariheeicheein nacoaauneein inara rene turuhane reentiaaincha. Nii nacoaauneein tururichaaunine cojoanona bannate: ‘Raotojoein turuhine Cana Coaneraneein nena cana Curuaanaara,’ nariquicheein canu raicha,” nae jetao cachaauru rai Jesuso.

## 14

### *Laracaain cunaitenaa rautaa Jesusone*

<sup>1</sup> Nii baiha jetaote, nebetacanaa janona bana leinjiin curuaanaa fariseeo loreri asae lenoniha cuha Jesusone jana jetao colurujueeuruhane jaanu leratihane coaracuruhane coina, “Chatohanaicha ichareein,” naauruhane jaun jetao ecu coarajeeure leeochoauru fariseeocuru.

<sup>2</sup> Nii jana, niritiin coaacuruhane que nainane jaun jetaote, ecu rohan niha leinjiin cacha laracaain cunaitenaane jaun jetao:

<sup>3</sup> “Nainihana nebetacanaa janonaa bana rautaeraa leinjiin cunaitenaane. Tonaquiche inara,” naain jetao Cana Coaunera aitoonjoa que cacha relaaurea, chaen fariseeocuru, naaonjoainuri caje jetao bajaee Jesoso.

<sup>4</sup> Nii jana inauheneecha curuaaequuin aonajeeuruhane jaun jetaote, biji que nii cunaitenaa mucuhin rautaain jetao letoae amuhane coina.

<sup>5</sup> Nitohaneein cunaitenaa rautaain jetaote:

“Chariji inara caje nebetacanaa janonaa bana naluha rai toro acau netaojianaja atane jachu ucuacaain nena cuhanene jana, inauheneecha rocoelanaala coarajere. Ainihane rai calaohi naluha acau netaojiana jaan atane jachu cuhanene, nirijieein rocoelanaala coarajere,” naain fariseeocuru caje bajaa Jesusone jana jetaote, <sup>6</sup> tonoraelanaala inauheneecha aonajeeure.

### *Nesirihatena beseta que cotihanojoihuri*

<sup>7</sup> Niritoha Jesusone jana, nelaurianaanaja rori caohacha janijiin nichoae nelauriaauruha nii cotihanojoihurine coaraain jetaote, acauru suujuatiha:

<sup>8</sup> “Chunocoha inara cotihaca nesiriatena beseta quene, jiaonriha rori caohacha janijiin nichoae nelauriaaichene. Nabana turuha uha inara amuritoheriin nelateein nena cotihanohinete, <sup>9</sup> ‘Nii ii rori jianeeute ecu nelauriamiin caa leeochoa,’ naa uha nii inara cotiharane, coejetiin rori baaso ichoae nelauriaa cunaa nainequiche. <sup>10</sup> Aihane jaun nii ajiniha inara cotihara nihane, rori baasonejeein nena ichoae nelauriaauche. Nii banate turuhin, satiin nii ii rohan rori ichoae nelaurianacaauru notaracaae, ‘Caa rori caohacha ichoae nelauriaa uura quiicha belai,’ naa nii inara cotiharane, ichei caohachanere. <sup>11</sup> Nitohaneein leeochoauru amurijiriin nelateein nena jerenacaaurute, necoeje chanunoiiniha cuurureein. Jana nii nelatecuruhane coaratelanaala nenacaaurute, raotojoein ranojoi niha cuurureein,” naain jetao suujuatenajae Jesoso.

<sup>12</sup> Niritiin jetaote acauru cotihara cacha rai jetao:

“Cachauru cotijiaain corootenaa jereeine, jiaonriha ii nejeraauru, charaachuru, iicha belaihuri, ii laurijiracuru coriquihonacaauru, naaonjoainuri cotihaquine. Acauru cotijiaain acauru coroaateeine jana, ii cotijiaain ii coroaateeuruhanete, inae ii rai nii cainaenereein Cana Coaunera.

<sup>13</sup> Nitohanihane jaun beseta ichana jereeine, cairichaihuri, nelatelanaala nenacaauru, bacosacuru, maosacuru, naaonjoainuri cachauru cotihacu.

<sup>14</sup> Acaaurute laen ichei cainana nainecurenihane nihanatiin, Cana Coaunera ichei cainaa cureein, inae rai cachaneein nenacaauru ichatiha oo caje Cana Coaunerane bana,” nae jetao nii cotihara fariseeo rai Jesoso.

### *Cana Coaunera Cojoanona que cacha relaa Jesusone (Mt 22.1-10)*

<sup>15</sup> Niritoha Jesusone jana aonaain jetaote:

“Bajiaanachuhinti Cana Coaunera Cojoanona que neein lenonenihacache,” naa Jesoso rai leinjiin acauru aina rori ichoae nenaane jaun jetaote:

<sup>16</sup> “Coaracuchena chuhinti leinjiin cacha jetao, lenone jaain arajiin cachauru cotiharate. <sup>17</sup> Nitohaneein jetaote, inaen jatoroaa nii lenonene jana jetao rai letono letoae cotihanajaane coina.

Nii jaun jetaote, cuhin acauru rene turuhin: ‘Chajaauchejete lenone, inae jatoroaa lenonera,’ naain cotihanajaane jana jetaote: <sup>18</sup> ‘Saan, naininaaun. Ena atane coretichaaunne jaun coaraa cuhanunete ne. Canu que ii suujua acateeu,’ naain jetao berate leinjiin. <sup>19</sup> Nii jana leeochoa jetaote: ‘Lechooncaain toro amihanena que nelatei coretichaaun enane jaunne,

acaauru coujuhin coaraa cureeun, amihanenaa que nelatecuruhane coitucuhanune coina. Nii jaunne ichei aitoon caque ii suujua acateeine coina,' naain beratihane jana jetaote, <sup>20</sup> leeochoa netonai: 'Ena nesirihatihanune jaun nainihaaun uhanune,' naain jetao satiin ita rijitiin beratihacoaure, acaauru que suujua acatiha acaauru cotiharane coina.

<sup>21</sup> Nii jaun jetaote, jelaiha cauhin nii rai aitocuruhane rijitoein biha cue rai fatoroon rai nii letono. Nii jaun jetaote obajeein, 'Chajaain soroneein nese sacutaain cuhin, cairichaihuri, cache nelatelanaala nenacaauru, maosacuru, bacosacuru, naaonjoainuri cotijiaain cajiha uhanajau,' nae jetao rai fatoroon nii letono rai.

<sup>22</sup> Nii jaun jetaote, nii rai aitohane rijijieein satiin cachaauru chaque nelatelanaala nenacaauru cotijiaain jetao: 'Curuaanaa, inae nii carai aito-hine jaa ichacaun. Nete jaiti caute nelaurihanajaauru,' naa nii letonone jaun jetaote: <sup>23</sup> 'Chajaain nenaanajaauru naineein cuhin, unaa jereraauru leeochoaauru cachaauru cotihanihute nemomiin canu lorericha. <sup>24</sup> Coatiha inae canu loreri asaae lenonecururihaain nii jauriaanejeein cotihanojoin-urita,' nae jetao nii letono rai fatoroon," naain jetao nii cache tonorae Jesoso.

*Jesoso cache nena jerichaane, necairichanaa abaantaacanete ne.*

*(Mt 10.37-38)*

<sup>25</sup> Jelai caje amuha Jesusone jana, arajiin sacuuruha cachaaurune jaun jetaote, acaauru rai: <sup>26</sup> "Chunocoha canu esenetaain canu cachaneein nena jerihane, rai inaca, rai neba, rai comasai, rai bereecuru, rai nejeraauru, rai baihuru, rai jaberoco, naaonjoainuri belaihane amurijiriin cacoelaain quere tonoraain nihanete ne.

<sup>27</sup> Canuneein nihanune coitucuhin canu cachaneein nena jerera, coroso que airichaaunnine rijijieein itolere necairichanaa abaantaain letohaanune jaan ichaain neeine. Jana ainihane, coatiha canu cachaneein nena nainihe chuni.

<sup>28</sup> Tana inara tabaauru, leinjiin loreri janaa jerihane jauriaanejeein nelauriaain: 'Necha besautiana nainerichaaunni,' naain coaucane coitucuhichene. <sup>29</sup> Nitohaneein coacuelanaala ichaain, nunuheniha nena tihane baiha jianihanete, satiin ecu situhin coaraauru nainere: <sup>30</sup> 'Caa leinjiin cachate niqui caa loreri ichana jere. Nete jauriaanejeein besautiaane jaanu que coacuhin ichaenihane jaun ninaelanaala ecu jiane,' naain erena nainecurure que cachaauru. Aihane jaun jauriaa nejeein besautiana nainihane coitucuhane coina coaauca nii loreri icha cachane rijijieein coumiin canu cachaneein nena jerera.

<sup>31</sup> Nii rijijieein techu jauriaanejeein nelauriaain coauna nainere leinjiin rey, leeochoa rey aina sonaana que nena jerihane: 'Necha lechoonca oharaancani soondarooru aina caa coroata choonca oharaancani soodaroo aina nena rey amuritonaa nainichaaun,' naain coaucane jana, <sup>32</sup> nainenihane coitucuhanete, jaiti coriaae niha nii nejeratihane jaa reyne jana, raotojoein jiniiquiin ita aina rucujueein ichaauruhane coina jitariin nii leeochoa rey nejeratenajaacha bajai tihane coina aitiin nere beranu letoare.

<sup>33</sup> Nii rijijieein coacuelanaala, niicha sirii jianena jerelanaala nena, coatihaha canu cachaneein nena nainihe.

*Cotebihane jianihane, nii chaque nelateniha tebene*

*(Mt 5.13; Mr 9.50)*

<sup>34</sup> Coaracuchena chuhinti jataain nelatiha niqui tebene. Nete nii cotebihane jianihane, inae chaque nelateein nenere. <sup>35</sup> Niheichu temule jaacane

coina, atane jasiitihacane jaanu que nihanatiin nelaterihe. Nechu jataain joaereente jaoleneein nere.

Nii rijijieein nii chaque nelaterihe, relaanune rijijieein ichaohane baiha, jianein niha canu cachane. Caa caitoonjoan aonacurumiin uricho nacaauru,” nae jetao nii arajiin sacuurera cachaauru rai Jesoso.

## 15

*Rai nitajenaa carenero eruha carenero beraichane que cuain nena parabola que cache relaa Jesusone*

*(Mt 18.10-14)*

<sup>1</sup> Satiin naraaichuru Jorioocuru cairichaeriin Roma curuaanaa rai *impoestonu* que coriqui que cachaauru cobaraaurera, chaen leeochoaauru cachaauru baasoneein ichaonacaauru, naaonjoainuri jetaote, Jesoso rene turuure irihane aonacuruhane coina.

<sup>2</sup> Nii coaraain jetaote, “Caa cachate osaaonacaauru cachaauru raain nihanatiin acaauru aina lenonenajaque,” naain jetao Jesoso necoeje chanuure Moisesa aitoonjoan que cache relaaaurera aina fariseeocuru.

<sup>3-4</sup> Niritocuruhane jaun jetaote, acaauru rai: “Tana chunocoha inara caje lefashaain carenero siriquichene jana, nitajiha leinjiine nii iscoonchoonca iscooni ratiriin nii nitajenaa carenero ariha curiquiche eruhichenereein tiaaine. <sup>5</sup> Nitohaneein inae eruhichenete raotojoein baijiaain turuaain, <sup>6</sup> loreri asaae inaraacha belaihuri, inara laurijiracuru, naaonjoainuri cotijiaain, ‘Canu coroaecuche. Inae carai nitajenaa carenero eruhanu,’ nanaa naineriquiche.

<sup>7</sup> Nii rijijieein techu osaaocuruhane coitucunaa jerelanaala neeuruha nii iscoonchoonca iscooneeurine jana, leinjiin cache osaaocane coitucuhin, Cana Coaunera lateein rene turuhane, nii iscoonchoonca iscooni coroa-jelanaala, nii leinjiin turunaacha coroaecure dedeeu nenacaauru,” naain jetao fariseeocuru tonorae Jesoso.

*Coretiin nena moneda nitajenaa eruha enene que parabola*

<sup>8</sup> Niritiin jetaote: “Nii rijijieeintechu, leinjiin ene, lechooncaain moneda jataain rai nelateineein nena caje nitajiha leinjiinne, tana raafariin mocohin, eruhanereen tihaain loreri asaji lojoiin caohatiin aririhane.

<sup>9</sup> Nitohaneein ariin eruhane, tana niicha belaihuri, chaen rai laurijiracuru, naaonjoainuri cotijiaain, ‘Canu coroaecuche. Inaen canu rai nitajenaa jataain canu rai nelateineein nena moneda eruhanura,’ nariha nii ene ne.

<sup>10</sup> Nii rijijieein techu, ita corojeein neeure Cana Coaunera rai anjeraauru, nosa caje nichoteein niha leinjiin cachanera,” naain jetao acaauru relae Jesoso.

*Rai calaohi ocoala que suujua acatiha rai inacane que parabola*

<sup>11</sup> Niritiin jetaote: “Niha jetao leinjiin cache corootajaain calaojoiin. <sup>12</sup> Nii jana, nii rai calaohi ocoala jetaote: ‘Ofa, canu rai, ohine bana carainein neeninu iicha sirii irihuru, ii atane, ii rucuhele naaonjoaihunri leruu,’ naane jaun jetao, nii rai ninana aina acaauru nainein jetao lerue nii acaauru inaca.

<sup>13</sup> Nii jana rai nocoala jetaote, nii baiha neeoriin jetao nii que banijiaai que jitariin necoreteein jetao nii coriqui aina coriajai atane cuhin, nechu jataain joaereein jitariin rai coriqui jaohin nichao que ichoae.

<sup>14</sup> Inaen jitariin rai coriqui jaohane jana, nii nihane jaan neniha quinacaine jaun jetaote, ecu mijitena que necairichae.

<sup>15</sup> Nii jaun jetaote, nii nihane jaan nena leinjiin cacha caje amihanenaa ariha cuhane jaun, rai cosichuru beraihane coina jetao letoae nii cacha.

<sup>16</sup> Nii jaun jetaote, nii cosichuru lenone raain que lenonene rijitocojoae. Nejetaote nene rai cha tera.

<sup>17</sup> Nii jaun jetaote: ‘Arajiin neeuruha ofa rai amihanenacaauru natiinte, itolere bana ne banejelanaala acaauru lenonenu, cau mijitenacaun ohajihanu canune jana. <sup>18</sup> Jelaiha cauha cuhanunete ne ofa loreri asae. Chaenne inae ofa rene turuhanune: “Jataainine banejelanaala baaso ichaaun Cana Coanera aina, ii aina, naaonjoaaincha. <sup>19</sup> Aihane jaun jiaonriha inae ii calaohineein caeteinera. Raujiaain ichei amihanenacaauru rijijieein caeteura ofa,” nareunni ofa raicha,’ naain jetao suujua ere nii cacha calaohi ocoala.

<sup>20</sup> Niritiin suujua irihane baiha bero cuhane cuhin jelaiha cauha cuha rai inaca loreri asaene jana jetaote, jaiti nita nihane jana coariin cairichaa-joaain coaraane jaun, soroneein coineteen jetao que baluunetiin, jataain belaa in rae nii rai inaca.

<sup>21</sup> Nii jana jetaote: ‘Jataain banejelanaalane baaso ichaaun Cana Coanera aina, ii aina, naaonjoaaincha ofa. Aihane jaun jiaonriha ii calaohineein caeteinera ofa,’ nae jetao nii calaohi, rai inaca rai. <sup>22</sup> Nejetaote niritohane jana: ‘Chajaain erojoein cajione enachasine uhaain, caa rai cajione coreeuche. Chaen rai biji couturi que leinjiin anicho tein, rai tijia quene maajein safato curuhacuche. <sup>23</sup> Chaen leinjiin baca narejeen coereneti soochete, lenoneein beseta ichacaache, <sup>24</sup> ohin nitajihane rai ne caje turuha uha caa canu calaohine jaun,’ naain jetao rai cachaauru letoae nii inaca.

<sup>25</sup> Nii tonohanau jetaote, neeuruha irihurune jaaun nihane caje cauha uhe nii calaohi inana. Nii jana jetaote, inaan nenaanaja catainaane jana jetao, auno toteen raansauruhane jana erunajae. <sup>26</sup> Nii jaun jetaote, nii leinjiin acaauru cacha cotijiaain jetao: ‘Chatohanai besetate ichaquicheta,’ naain caje bajaane jana jetao, <sup>27</sup> ‘I nejerate jerichanejeen raurohin turuhane jaun, baca narejeen coereneti soerateen beseta ichae ii inacara,’ naain rai biha nii acaauru cacha, nii calaohi inana raine jaun jetaote, <sup>28</sup> jataain obajeen loreri asae turunaa jerene. Nii jana jetaote, raajenihane coineteen raa cue nii rai inaca, acaauru aina nihane coina.

<sup>29</sup> Nii jana jetaote, jataain rautaelanaala jetao: ‘Iite raotojoein araai jaanacaain ichei nelateen nihanune coitucuhi. Chaen nechu canu letoaaine chabana coiintelanaala ichaain neeun. Nii sainejeen chariji bana leinjiin niji carenero tihee carai, canuhacha belaihuri aina sohin beseta ichacaane coinata. <sup>30</sup> Nii saijieeinte turuha caa ii calaohi, ene cojoaeloroerihuru aina nechu joaereen ii coriqui jaoinne janate, rai baca coereneti sohin teeicha,’ naa coetaain rai inaca raine jaun jetaote,

<sup>31</sup> ‘Aiha chuhisicha cacalabi. Iite chuhisi itolere bana canu aina neeicha. Nitohanihane jaunte satiin quiicha sirii icheineein nera. <sup>32</sup> Nete laen ena esinae rauhijiriin caohachae beseta ichaain rachoojoihacachene, ohin nitajihane rai ne caje nacoaauneen turuha ii ocoalane jaunra,’ nae jetao rai inaca,” naain jetao acaauru relae Jesoso.

## 16

*“Caohachaain jecha ichareein,” naain loreri beraichaanu que cacha ratir-  
iha rai fatoroonne que parabola*

<sup>1</sup> Niritiin jetaote, aina nerelanacaauru rai jetao: “Niha jetao leinjiin cacha jataain coriquihonaneen. Nii jetaote, rai loreri beraichaanu que leinjiin cacha ratiri jitariin rai rucuheluuru, rai cachaauru, rai coriqui,

naaonjoaihunri beraichanu que. Nii jana nii rai rucuheleeeuru itajihacoaane jaun jetaote: ‘Inae ichujeleeeuru itajeein, ii coriqui que niicha jerei ichaa taa ii cachara,’ naain jetao biha cuure nii fatoroon rai. <sup>2</sup> Nii jaun jetaote cotiharateein: ‘Chatohanai ichaaine jaunna, ii biha uure canu rai. Chajaain jitariin chamijianeeocuru cocoirichaain uhane coitucue. Inaen nenacaen nainiheeii canu loreri aina canu rucuheleeeuru beraichanu que neeineta,’ nae jetao nii rai fatoroon.

<sup>3</sup> Nii jaun jetaote: ‘Chana nohane jana ichareeun, camijianeeon caje canu sitaa canu fatoroone jana. Coatiha atane que chatohanai amiha-nenaa ichana que nelatejeecaaunne coalanaalata. Chaen nechujataain nocoejeeun cacha caje chaaelai bajaanune quera,’ naain coaucane baiha jetao <sup>4</sup> ‘Saan. Inae canuhacha ichaneni coitucuhanu, canu amihaneen colane nedaanune bana canu raa chunocoha loreri asaaene coina,’ naain jetao suujua ere nii loreri beraichanu que niicha ratirii.

<sup>5</sup> Niritiin jetaote, leinjiana leinjianaain jetao, nii rai fatoroon que re-beeonacaauru cotijiaain: ‘Inaonjoaain rebeeoqui canu fatoroon queta,’ naain bajaane jana jetaote; <sup>6</sup> ‘Lefasha bareranei erene que ne rebeconra,’ naain jetao tonorae nii jauriaanejeein niicha cotijiai. Nii jaun jetaote: ‘Saan, aihachuhisi. Nocoa nii rebeeoquine jaan, ninu nelauriaain saoquichoonca bareranejeeicha laenaaura,’ naane baiha jetao, <sup>7</sup> Leeocha cacha rai jetao: ‘Inaonjoaain jana rebeeoqui ii, canu fatoroon queta,’ naain bajaane jana jetaote: ‘Lefashai costaronei tirico quene rebeconra,’ naain tonoraane jaun jetaote: ‘Saan, aihachuhisi. Nocoa nii ii rebe. Fosachoonca costaronejeeicha cau teein laenaauru,’ nae jetao rai.

<sup>8</sup> Nitohaneein jetaote, jataain nainaan rai caohachanuhacha que coacuhin ichaa nii rai loreri beraichane que ninae nii rai fatoroon.

Nitohaneente Cana Coanera Cojoanonaa que neenihuru amurijiriin, jataain nainaan rai caohachanuhacha que coacuhin neeure Cana Coanera coitucuhichuru,” naane baiha jetaote:

<sup>9</sup> “Inara netonoaite nii rijijieein Cana Coanera tenojoi beraichanein neeiche. Aihane jaun nii itolere inara rai Cana Coaneraacha tei que, aca jerihane rijijieein niicha jerei ichaain neeuche, inae ohichene bana niha raotojoein inara raeranune coina.

<sup>10</sup> Nitohanihane jaun, aansijiin laojoiri raa cachane niha natiin caohachaaain nii rai teraacha jerei icharate, arajiin cha raane jerichanejeein caohachaaain ichareein. <sup>11</sup> Nitohanihane jaun, caa nitajerai nena chauratane que cha siriin neeichene nihanatiin caohachaaain ichaeneeichene coatiha nerinaai inara rai esinaen rauhijiriin chabana nitajenaacharanejeein nena tera. <sup>12</sup> Aihane jaun, inara rai eroraqui tenojoi que caohachaaain cha ichaain neneeichene, coatiha nerihaaain inara rainein neeninu tera.

<sup>13</sup> Nihei chuni coroatajai fatoroon rai niicha latei icharanein nena nainei, nabana leeocha que jaolecuhin, leeochaacha ere tonorana nainihane jaun. Nitohanihane jaun Cana Coaneraacha ere tonoraain nena jerichaane, nii canaacha jerei que coauna nainihaaca,” nae jetao aina nerelanacaauru rai Jesoso.

<sup>14</sup> Niritoha Jesusone jana aonajeein jetaote, Jesoso necoeje chanuure fariseeocuru, acaauru jataain coriquiicha que coacuhin neeuruhane jaun.

<sup>15</sup> Nii jaun jetaote, “Inarate caohacha ichaa nocoetiin neeiche itolere bana cachaauru notaracaae. Nete inara suujua cuhane inaraacha coacui coitucue Cana Coanera. Nitohanein jataain nelateineein cachaauruhacha coarai que te jaoleque Cana Coanera.

*Cana Coaunera rai rauhi inoansi aina Jesosohacha tei rai cojoanonaa*

<sup>16</sup> Moisesa, chaen *profetacuru*, naaonjoainuri cojoanonaate turuha Joaan Baotisitane que tiaaoljaain nelu. Nii caje coauneeinte beebejenojineein nelu Cana Coaunera cojoanonaa canuhacha turuai. Nii quete necounu-jueeure nii canuhacha tei Cojoanonaa sirichuruhane coina.

<sup>17</sup> Canu Cojoanonaa que neeichene nihanatiin satiin Cana Coaunera rai rauhi inoansi tonoraain neeichenete caohachae.

*Comasai joaera que cacha relaa Jesusone*

*(Mt 19.1-12; Mr 10.1-12)*

<sup>18</sup> Leinjiin cacha rai comasai jaohin leeochoa ene raanete jataain osa que nesaruha aicheein. Jerichanejeein techu, lana joaera ene raain niha cachane osa que nesauruha aicheein.

*Jataain coriquihona aina oha cairichainein nena Lasarone*

<sup>19</sup> Niha jetao leinjiin cacha jataain coriquihonanein. Nitohanein coriquihocane jaun jetaote, itolere bana jataain cajione caohacha que necoreetein, lenone caohacha nejesina que beseta ichanajaque. <sup>20</sup> Nii jana jetaote, ecu ne jaberoco nainecojoaain abero siriin leinjiin cairicheinejeein nena Lasaro. Aca jetaote, nii coriquihona loreri chajeniha lauheque nejesinane atani-choae. <sup>21</sup> Nitohanein cairicheinejeein nihane jaun jetaote, nii coriquihona rori caje nalunaa rai lenone con raain que lenonena jere nii cairichei. Nii jana remaaecuru jetaote, rohan turuhacoaain nii rai nabero lojoihure.

<sup>22</sup> Nitohaneinne baiha inaen oha nii cairicheinejeein nena- nii Lasarone jana jetaote, amaaure anjeraauru Abaraaun aina dedeeu nihane coina. Nii jana jetaote, nii coriquihona netonai inae ohane jaun conautecure.

<sup>23</sup> Nitohanein ohin necairichaauruha onacaaurune jaan netiin necairichajeein, nita icharajeriin neein Abaraaun coaraa nii coriquihonane jana jetaote, Abaraaun rohan ne nii jaiti jiniiquiin ichaaoruhane bana niicha cairichaerii Lasaro. <sup>24</sup> Nii jaun jetaote: auhaquiin: 'Cairichaaoljaain cacoharaaura ofa Abaraaun. Atiin nii Lasaro rai aitoote, esinaeca que biji coturi macohin setejiaain calele jelarooa uhinera. Caune jataain necairichajeeun usi tabai janara,' naane jana jetaote: <sup>25</sup> 'Aiha chuhisi niqui. Nete jiniiquiin inara jaberoconein ichaohichene bana, jataain raotojoei ichaonaa que ichaorejetohilura cacalabi. Nii jana caa Lasarote, jataain ichaonaa baaso que ichaohin cairicheinejeein nerejetelu. Nii jaunte nii coacuhin, necairichaaequi iine jana, aca caohachaaain ranojoneein nera. <sup>26</sup> Nii choae tacaain techu, cana cataaun ne jataain ucuacaain ucuha jachu satonoelanaalara. Nii jaun nii inara nichae situnaa nainecuruhi cajicheique nenacaauru. Niheichu inara niha natiin nii cajicheique turunaa nainiheeicheta,' nae jetao Abaraaun, nii coriquihona onaa rai.

<sup>27</sup> Niritoha raine jaun jetaote: 'Nii jaunne ichei aitoon, canu inaca loreri asaae <sup>28</sup> nii neeuruha saouqii canu nejeraaurune jaun Lasaro letohaine, acaauru rai iriha cuhane coina. Nabana caa necairichaecaaunne jaun acaauru netonai uuruhane coataara, ofa Abaraaun,' naa nii coriquihonane jana jetaote; <sup>29</sup> 'Nete Moisesa aina *profetacuruhacha* laenanohin siriin neeure, nii tonoraain neeuruhinera,' naa Abaraaunne jana jetaote; <sup>30</sup> 'Aiha chuhisicha ofa Abaraaun. Nete acaauru rene ichanaain turuhin biha leinjiin onaane, acaauru netonai nii esenetana nainecururera,' naa nii coriquihonane jana jetaote; <sup>31</sup> 'Aiha chuhisi niqui. Nete Moisesa, chaen *profetacuru*,



naaonjoainuri esenetaaurenihalune rijijieein, acaaauru rene ichanaain tuuruuha onacaaurune nihanatiin, esenetana nainecurunerera,' naain tonorae Abaraaun," naain jetao fariseeocuru suujuate Jesoso.

## 17

*Jataain necohalajiine osa que namute cache saruera*  
(Mt 18.6-7, 21-22; Mr 9.42)

<sup>1</sup> Niritiin jetaote:

"Itolere banate nereein osa que inara sarueranu. Nete laen jataain necairichanaa coareein nii osa que leeochoauru saruera cache.

<sup>2</sup> Nitohaneein caa ena Cana Coaunera coitucuhajeraauru sarueratiha osa quene ajinihate caohachare nulunoque ajeri tijichaain cucuana cuhane joaeratenojoi nihane. Aihane jaun nii que necohalajiin neeuche.

<sup>3</sup> Chatohaneein baaso ichaain niha ii nejerane suujua teeu. Suujua teeine jana ii ere tonoraain caohachaain nichao coreein nihane que ii suujua acateeu. <sup>4</sup> Lejiichoo cuhane caaunsi saneein ichei baaso ichaain nihane nihanatiin, caaunsi saneein turuhin, 'Inae laen coaiterihaaunnita,' naa uhane, que ii suujua acateeu," nae jetao Jesoso.

*Esinae rauhijiriin esenetaacane itolere ichana nainichaane*

<sup>5</sup> Nii jana jetaote: "Jataain itolere ichana nainiha Cana Coaunerane esenetaain nihacaanune jaanu teeu canacaanu raicha," naauruha Jesoso rai niicha cocoinaauri afosotoorune jaun jetaote:

<sup>6</sup> "Mosatasa ucuhe laojiri jataain aansijieein nena rijijieein aasaeriin esinae rauhijiriin esenetaaichenete caa shabeento rai: 'Niilai caje nerocohin caa cucuana cuhane omaronihunra,' naaiche caa shabeento raine inara ere tonoraain aiche caa shabeentora," naain jetao acaauru tonorae Jesoso.

*Letononeein nenaacha ichaneni*

<sup>7</sup> Niritiin jetaote: "Inara leinjiin cachaaquichene jana, inara ocoana jana temule jaane jaanu que atane retuhin, baca beraain, naaonjoanne caje cauhane janate rai: 'Nelauriaaute lenoneei,' nanaa coacuhelanaala: <sup>8</sup> 'Chajaain ena canu lenonenu jaain, ena uhaaune lenoneein acau coe. Nii baihate ii netonai lenoneein acau coriquincha,' nariquiche. <sup>9</sup> Nii choae tacaain techu, 'Narihara,' nanaa coitucueneeiche nii inara cache rai, letoaain neeichene jaan ichaain nihane coreniha. <sup>10</sup> Nii rijijieein inara letoaain niha Cana Coaunerane jaan nainaaain neeichene bana, nainihee-iche: 'Jataain cache caohacha neeine nihacaanura' naain erenaa nainihee-iche. Raujiaain: 'Canacaanu letoaain nihalune jaanchane inae nainacaanura,' naauche," nae jetao acaauru rai Jesoso.

*Lechoocain cosibi aonaain caaun cunaitenacaauru rautaa Jesusone*

<sup>11</sup> Jerosaleeun cuhane jaun jetaote, Calileea, Samaria, naaonjoainuri batane cataaun situhin cue Jesoso. <sup>12</sup> Nii jana jetaote, leinjiin neseu turuhane jana jetao, nii nese caje que taca cuure lechooncaain cosibi caaun cunaitenacaauru cachaauru. Nitohaneein cuhin jetaote, cocoaeraa cache rohan turuha nitohanai cunai aonaera cachane jaun jetao, Jesoso caje coriaae netiin:

<sup>13</sup> "Cairichaaajoaain nohane canacaanu coaraaura cache relaera Jesoso," naaunre jetao Jesoso rai ehequuin. <sup>14</sup> Niritocuruha raine jana jetaote:

"Chajaaincha saseredotecuru rene turunichuchete inara coaracurumiincha," naa acaauru rai Jesusone jaun, cuujueeuruhane jana jetaote, inae cosibi caje nerautaaain somaraain neeure, acaauru dadaelanaala aitoaha Jesusone saijieein. <sup>15</sup> Inae nitohaneein nerautaauruha acaauru cosibi cajene

coaraain jetaote, jelaiha nejenohin cuhin, tonijiaain ereein Cana Coaunera coroaajeein jetao, <sup>16</sup> Jesoso acatiha rai tijia asae atanichoae neseoriaain jetao, rachoojoe leinjiin cacha Samaria cocoaicha Jorionelaanaa nena. <sup>17</sup> Nii jaun jetaote:

“Tajian lechooncaauruhani caa cosibi caje nerautanacaaurune. Aan-caauru chaen leeochoaauru iscoon neeurita. <sup>18</sup> Leinjiin caa Jorionelanaala nena cacha estaraajerohachate jelaiha nejenohin Cana Coaunera coroaeca uhe rautaanune corenihara,” naain

<sup>19</sup> “Esinæ rauhijiriin esenetaaine jaunte, ii cunai caje nerautaai, chajaain nimichuhin caunihura,” nae jetao rai Jesoso.

*Naaonjoaain tururichaain quiicha tei Cana Coaunera Cojoanonaane*  
(Mt 24.23-28, 36-41)

<sup>20</sup> Nii baiha jetaote, “Chabana turoreein Cana Coaunera cojononaa,” naain jetao Jesoso caje bajaare fariseecuru.

<sup>21</sup> Nii jaun jetaote: “Coatiha inanacaain tururinaain Cana Coaunera cojoanona. Niheichu, ‘Caute ne. Tajihate ne,’ naain coitucurieeicheein. Inaen inara jana niha quiicha tei Cana Coaunera Cojoanona,” nae jetao acaauru rai Jesoso.

<sup>22</sup> Niritohane baiha jetaote, aina nerelanacaauru rai jetao: “Inæ amuhane baihate jaiti nacoauneein turuenihanune ajiniha le janojoeinniji ena caa canuhacha tei janonaa coarana jereriquicheein niqui, nete coaraeneriquicheein. <sup>23</sup> Nii jana tabaaurute inara rai, ‘Caute ne. Tajihate ne,’ naaurureein. Nete nelatene, niritocuruhane jana acaauru esenetaain acaauru sacuhichene. <sup>24</sup> Nacoauneein turuha urichaaunni acaihaniji cachanein nejanohanaane Cojoanona que turuhane banate, charijijieein teeinti jeraneejoaain dede conaa jiacanone, saain coanojoineein ne. Nii rijijieeinte saain coanojoineein coitunojoiniha cureein inæ nacoauneein turuhanune bana. <sup>25</sup> Nete amuhanune ajiniha jauriaanejeein jataain canu que nererojoecaain canu que jaolecoorureein, caa ena cojoanona que nenacaauru cachaauru.

<sup>26</sup> Charijieein teeinte nihalu Nohene bana ailu, nii rijijieeinte jerichanejeein aiha cureein nacoauneein turuha uhanu canu acaihaniji Cachanein nejanohanune Cojoanona que tihane bana.

<sup>27</sup> Coaracuche nachuhinti nii chaque nererojoecaaeriin nelanaala, nisirihateein, lenoneein, acau cohin, naaonjoaauruhalu cachaauru bote cuhane enohin nichotiha Nohene cojoanona que turuhanereein tiaaine. Nii jana uha elo tabaine jaunte satiin ohacoaurelu.

<sup>28</sup> Nii rijijieein techu cha coacuelanaala raotojoein neein, acau cohin, lenoneein, netemulijiaain, namihaaneeo que necoreteein, niicha latei coreteein, neloheriteein, naaonjoaurelu cachaauru nihalu Lotone bana. <sup>29</sup> Nii jana, Sodoma neseu ichaohane caje amuha Lotone janate, usi aina naluha asofere dede cajene jaun caaun satiin oorelu cachaauru. <sup>30</sup> Nii rijijieeinte jerichanejeein aiha cureein nacoauneein turuha uhanu acaihaniji cachanein nejanohanaa nichaaunne Cojoanona que turuhane bana,” naain jetaote,

<sup>31</sup> “Nii cojoanona bana inara loreri janori ichoae neeichene, jiaonriha jelaiha fauhin inara loreri caje inara rucuhele ranaa coaauquichene. Niheichu inara ocoana jana neeichene jana aihane, inara loreri asae caunaa coacuelanaala rauhijiriincha sorooche. <sup>32</sup> Nitohaniane jaun, niicha ratirii coaacane jaun aihalu Loto comasaine coacuhin nainaan ichaoche. <sup>33</sup> Aihane jaun rai rucuheleuru queecha coacuhin neite rai nichao itajereein. Jana

nii rucuhale que coacuelanaala nichao rainuhacheaque coacuhin neite nichotereein,” naain jetaote,

<sup>34</sup> “Nii airichaaanne cojoanotiin banate, leinjiin eruhari cuhane niha cuurureein coroatajai cachaauru. Nii jana leinjiin amanojoinihane janate, ecu nedaa cureein leeocho. <sup>35</sup> Jana coroatajai enecurute, ederi que chaelai tuuurureein. Nii jana leinjiin amanojoinihane janate ecu nedareein leeocho. <sup>36</sup> Nii jana coroatajai quichaaaurute nocohana jana neeurureein. Leinjiinte amanojoinereein, leeochoate ratirinojoinereein,” naane jana jetaote:

<sup>37</sup> “Chatoanai bana, chucha nitohanereinte Curuaanaa,” naain caje bajaauruhane jaun jetaote:

“Inae ecu tihane banate coitucunojoinereein, canii setu que fauha uha ichotarine jana caje coaraain coitucunojoinihane rijijieein,” nae jetao aina nerelanacaauru rai Jesuso.

## 18

*Joedio necha ansaineein nena rai cacha coulurujihana autanane que parabola*

<sup>1</sup> Coiinteerilanaala Cana Coaunera bajaauruhane, Cana Coaunera bajaauruhane caina *parabola* que cuaain acaauru relaa Jesusone.

<sup>2</sup> Niritiin jetaote: “Coaracuchenachuhinti leinjiin neseu nihalu jetao leinjiin joesio cachaauru que suujua acatelanaala, niheichu Cana Coaunera batohane que casilanaala nena ne. <sup>3</sup> Nii jana jetao, nii neseu ichoae leinjiin autana. Nii autana jetaote, nii joesio rai leinjiin cacha nejeratenaja colurujihana cue. <sup>4</sup> Nii jana jetaote, carajaain nirijieein nere tonorana jerelanaala ne nii joesio. Nejetaote nii baiha: ‘Cachaauru que nihanatiin casuujua acateein, niheichu Cana Coaunera batocooaanne que casiin nihaaun niqii. <sup>5</sup> Nena raotojoein nihanune rohecaain, casuujua rohecaain sacuha caa autanane coataa naitoonjoa tonoraain ichareeun caihanehane caina,’ nae nii joesio. <sup>6</sup> Coaracuchenachuhinti, jataain necha aansaineein nihane saijieein suujua coaraa nii joesione. <sup>7</sup> Nii jaunte nii amurijiriin, nii janijiin nii raauri, janotiinetojoein, jiichoonetojoein, naaonjoaain bajaebajaeraauru cocooaeratenaa nainereein Cana Coaunera. <sup>8</sup> Nitohaneinte carajaain cohacuruhane latelanaala enaacha acaauru cocooaerater. Nena laen inara caje bajaauru, canu inaraacha cohajei cachanein nejanohanaa nichaanne, nacoauneein turuhanune reentiaainacha canuneein nihanune esenetaain caitoonjoa ichaaechajeein neeururichaaain cachaauru,” naain jetao acaauru relaa Jesuso.

*Roma rai coriqui bajaaurera aina fariseeocuru que parabola que cuaain cacha relaa Jesusone*

<sup>9</sup> Nii baiha jetaote, nii acaauruhacha caohachaaain niha nocoetiin leeochoauru que jaoleconacaauru rai jetao, acaauru ichaohacha que *parabola* que cuaain jetao: <sup>10</sup> “Coroatajai cacha jetaote, Teenforo asae cuhin Cana Coaunera bajaa cuure. Leinjiin jetaote, nechua jataain naraaichuru cairichaa Roma rai *impoestonu* que coriqui bajaerane. Jana leeocho jetaote fariseeone. <sup>11</sup> Nii fariseo jetaote, ‘Narihara Cana Coaunera ichoreniha ainacaauru tochaneein asijaautoneein, necha aansaineein ichaohin, joareein ene canu sinijeranelanaala nena aina ichaohin, naaonjoaain nenihanu canune coreniha. Chaen nechua, naraaichuru cairichaa Roma rai *impoestonu* que coriqui bajaaurera rijijieein neneun. <sup>12</sup> Chaen nechua, jataain ii coitucuhanune esenetaaine caina, le semanacuru cuhane coroata saain casuri couu lenone lanaala neein ii bajaee bajajeein, lechooncaain

chaaelai raanu camijianeoo corenihane, rai lechoocani teein neeun ii raicha,' naain jetao Cana Coaunera bajaee chujuhequuin. <sup>13</sup> Nii jana nii naraaichuru cairichaeriin coriqui bajaera jetaote, caje icharaain neein necoeje caaun najabaracaain dede coaraelanaala jetao: 'Cairichaojoaain cacoaraau osaaotohanune jaaunra Cana Coaunera,' nae nalarijia faoneein.

<sup>14</sup> Niritiin bajaane jaunte, inae que suujua acatiha Cana Coaunerane jana jelaiha nenajaun cauha cue nii naraaichuru cairichaa coriqui bajaera. Nete laen nii fariseeo que suujua acatene Cana Coaunera.

Nitohaneeinte nii leeochoaauru amurijiriin Cana Coaunera coitucutiin, itolere que nelaetoha nocoetiin nenacaaurute chaque nelatelanaala jaole-neein neeurureein. Jana rai nichao coitucuhin leeochoaauru amurijiriin nena coacuelanaala nenacaaurute nelateein ranojoinecurureein," nae.

*Canaanaihuru belaiha Jesusone*  
(Mt 19.13-15; Mr 10.13-16)

<sup>15</sup> Jesuso rene canaanaihuru turuaa uuruha acaauru mucuhane coinane jana jetaote, Jesuso rene turuanajaauruhane caohateeure aina nere-lanacaauru. <sup>16</sup> Nii jaun jetaote, nii aina nerelanacaauru cotijiaain jetao:

"Coa rerohecanajaachete canu rene turuuruheine nii canaanainuru. Jiaonriha canu rene turuuruha canaanaihurune caohateeichenera. Cana Coaunera Cojoanonaate, aihuruha caa canaanaihurune rijijieein nenacaauru rainein nena nera. <sup>17</sup> Esinaen rauhijiriine inara rai aitoreeunni. Aihuruha caa canaanaaihurune rijijieein canu raain neniha chunine, coatiha Cana Coaunera Cojoanona que nerihain," nae jetao aina nerelanacaauru rai Jesuso.

*Jesoso aina iriha leinjiin cacha coriquihonane*  
(Mt 19.16-30; Mr 10.17-31)

<sup>18</sup> Leinjiin cocoainanacai jetaote, Jesuso aina iriha uhe. Nitohaneein rene turuhin jetaote:

"Caohachanejei cacha relaera, cha ichareeun chariji bana nitajenaachara ichaonaa caohacha que ichaonaa nainichaaunne coina," naain Jesuso caje bajaane jana jetaote;

<sup>19</sup> "Chanuna 'caohachanejei cacha relaera,' naain cacurujuateei. Lein-jiin Cana Coauneraachate caohachanejein ne," naain jetaote: <sup>20</sup> "Inae raotojoein Moisesa aitoonjoan coitucuhi: 'Jiaonriha nejelau ene ii sinijer-anelanaala nena aina ichaohin neeine. Coa sonajaain jaoha. Coa asijiauha. Coa chamute cacha cairichanaa jerenacaun chuni cacha coacuhin, casaje que ereein niha. Chaen efojiaraauru que ii suujua acateein acaauru coitu-cuhin neeun,' naane coitucuhi," naa rai Jesusone jaun jetaote:

<sup>21</sup> "Aihanu chujian. Canu enamanaca caje coauneeinne jitariin nii naitoon-joan tonoraain neeun," naain tonoraa nii cocoainanacaine jaun jetaote:

<sup>22</sup> "Aihachuhisi niqui. Nete jaiti lanajejen leinjiin tonoraain ichaaine coina. Jitariin nii iicha sirii rucuhele que necoreteein, cairicheihuru rai jitariin nii coriqui chaluu. Nii banate dedeeu ichaonaa caohacha que ichaonaa naineriquiin. Nitohaneein ichaaine baiha canu aina uu," nae jetao rai Jesuso.

<sup>23</sup> Nejetaote niritoha rai Jesusone jaun, jataain inaderae nii cacha jataain coriquihocane jaun.

<sup>24</sup> Nii jaun jetaote:

“Jataainte caaintate Cana Coaunera Cojoanonaa que ichaoa leinjiin coriquihonane. <sup>25</sup> Nii Cana Coaunera Coajoanonaa que ichaaoruha coriquihonacaaurune coina caaintaane fautaain caaintarihei leinjiin camecho rai oco jachu cuhane situhane coina,” nae jetao inaderaa nii coriquihonane coaraain Jesoso.

<sup>26</sup> Nii jaun jetaote:

“Nitohaniane nichotenaa nainerinaain chuni,” naain caje bajaauruha ecu neein aonajeeunrerane jaun jetaote,

<sup>27</sup> “Nii caaintatiin cachaauruhacha coarai, coatiha Cana Coaunera rai caaintajehita,” naa Jesusone jaun jetaote,

<sup>28</sup> “Canacaanune jitariin canacaanuhacha sirii ratiriin ii sacuhacaanulu,” naa Fedorone jaun jetaote:

<sup>29</sup> “Esinae rauhijiriin chunocoha, Cana Coaunera Cojoanonaa que ichaothane coina, rai loreri, rai sinijera, rai bereecuru, rai nejeraauru, rai fojiaraauru, naaonjoin ratirichate, <sup>30</sup> jataain nii amuritoheriin caa chauratane que siriin, nii choae tacaain nii turuha uheni Cana Coaunera Cojoanonaa que chariji bana nitajenaachara ichaonaa siricheeincha,” naain jetao Fedoro tonorae Jesoso.

*Orichaainne bihane nichatasatiha Jesusone*  
(Mt 20.17-19; Mr 10.32-34)

<sup>31</sup> Nii baiha jetaote, jelai nii lechoonca coroatajaain niicha cocoinaauri cotijiaain jetao: “Enate laen Jerosaleeun cuhacache, cuu nii acaihaniji Cachaneein nejanohanaa nichaaunne que aitiin laenacuruhalu satiin *profetacurune* nainaanune coina.

<sup>32</sup> Nitohaneeinte nejelau ataneu nenacaauru estaraanjerooru bijihu canu teeurureein nechu jataain cacotaiha baasoneein caeteein, canu nocoeje chanuhin, canu coluneein, naaonjoaauruhane coina. <sup>33</sup> Nitohaneein canu teeinte, enuha que canu faohacuruhane baiha canu ateinaa cuurureein. Nena nichata janohane cuhane nacoauneein ichanaareeunni,” nae jetao niicha cocoinaauri rai Jesoso.

<sup>34</sup> Nii niritoha acaauru raine jana jetaote, nii naitoonjoan aonacuruhane saijieein esenetana nainecurene.

*Jericoo leinjiin maosa rautaa Jesusone*  
(Mt 20.29-34; Mr 10.46-52)

<sup>35</sup> Niritohane baiha jelai caje amuhin Jericoo turue lalajeein cuujiha Jesusone jana jetaote, bero cuhane lauhequiin coriqui bajaa niha leinjiin maosane jaun jetao, <sup>36</sup> arajiin situha cachane aonaain jetao: “Chauruna toon situha cue,” naain bajaane jana jetaote: <sup>37</sup> “Nasarete cocoaicha Jesusote sacuureraaura cachaauru aina situha cuera,” naain beeuruhane jaun jetao: <sup>38</sup> “Atiin nohane cairichaojoaain cacoharaaura Rabiri nefoerate Jesoso,” naa ehequiin nii maosane jaun jetao, <sup>39</sup> niritohane caohateeure sitonaane coina nii ichohaichaniha cunacaauru. Nejetaote, acaauru ere tonoraelanaala jeelai amuritoheriin ehequiin jetao:

“Atiin nohane cairichaojoaain cacoharaaura Rabiri nefoerate Jesoso,” nae jetao nii maosa.

<sup>40</sup> Nii jaun jetaote, ecu inacuhin raerateein jetao inaen rohan nichuutaane jana jetao:

<sup>41</sup> “Chate jereeita,” naain caje bajaa Jesusone jana jetao:

“Canota rautainene jereeunra Curuaanaa,” naain tonoraa nii maosane jaun jetaote,

<sup>42</sup> “Saan ai. Esinae rauhijiriin quesenetaaine jaunte inae maosaneeine caje nerautaaicha,” nae jetao rai Jesuso.

<sup>43</sup> Niritoha rai Jesusone rijieeoritiin maosanihane caje inae conoha rai notane jaun jetaote, Cana Coaunera corojeein Jesuso sacue nii maosa.

Nitohanein nii maosa rautaane jana, ecu neein coarajeeurera cachaauru netonai jetaote, satiin Cana Coaunera corojeein rachoojoeure.

## 19

### *Saqueeo loreri asae cuha Jesusone*

<sup>1</sup> Jericoo turuhin jetaote, nii Jerico nese cataaun situha cue jetao Jesuso. <sup>2</sup> Nii jana jetaote, ecu ichoae leinjiin cacha, naraaichuru Jorioocuru cairichaeriin nena, Roma curuaanaa rai *impoestonu* que coriqui bajaaurera curuaanaanein nena coriquihona Saqueeo. <sup>3</sup> Aca jetaote, jataain Jesuso coitucunaa jerihane jaun coana jere niqui. Nejetaote, jataain araacha cachane jaun coana nainesine Saqueeo, leeochoaauru fautaain ecoainijihane jaun. <sup>4</sup> Nii jaun jetaote, coana nainihane coina soroneein najiniha cuhin jetao situha curichaaain nii Jesusone jaun nena leinjiin enuha que iniin jetao cohaca cue. <sup>5</sup> Nii jana jetaote, nii iniin cohacane jaan nena enuha asaae situha cuhane jaun, jabatoroaain coaraain jetao:

“Saqueeo, chajaain soroneein niilai caje fauha uu. Enenene ii loreri asae nesurureeunni,” naa rai Jesusone jaun jetaote, <sup>6</sup> soroneein nii enuha caje fauhin jetao, corojeein rai loreri asae Jesuso amae jetao nii Saqueeo. <sup>7</sup> Nii coaraain jetaote: “Chanuna jataain osaaona niha taa cachane coitucuhane saijieein rai loreri asae aina nesuruha cue,” naain jetao Jesuso que ereeure ecu satiin neein coarajeeurera chaaauru. <sup>8</sup> Niritiin Jesuso que ereeuruhane jana jetaote, nichaauraain jetao:

“Aonaun Curuaanaa. Jitariin quiicha sirii rucuhelene leruhin tereeeunni cairichaaihuru rai. Chaen nechua chaaelai que chuni basijiauhin nihanune, jena saain jelai amuritoheriin cainareeunnicha,” nae jetao Jesuso rai nii Saqueeo.

<sup>9</sup> Nii jaun jetaote:

“Caa cacha netonai inara rijijieein, Abaraaun nefoerateneein nihane jaunte, enene caa rai loreri asae turue jianacoon osa caje mitaeranura. <sup>10</sup> Nii acaihaniji cachanein nejanohanaa nichaaunnena, caa chauratane que turuun, nii jaolecohichene jaan chaaauru nitajenaa neein nenacaauru ariin, acaauru ichoterateein raanune coina,” nae jetao rai Jesuso.

### *Coriqui raaurera chaaauru que parabola que cuaain chaaauru relae Jesusone*

*(Mt 25.14-30)*

<sup>11</sup> Niritoha Jesusone jana, ecu neein aonajeeuruha chaaaurune jaun jetaote, acaauru relae *parabola* que. Inae Jerosaleen rohan nichuuntaauruhane jaun, “Inae jerihane turuhelalajiha Cana Coaunera Cojoanonaara,” naain coaacuruhane jaun jetao acaauru rai:

<sup>12</sup> “Coaracuche jetao nihalu leinjiin cacha *rey* araainein nenaane. Nii cacha jetaote, *rey* ineein cocoinaauruhane coina jetao coriaji atane cue, inae *rey* ineein cocoinaauruhane jana jelaiha natane que cauha uhane coina.

<sup>13</sup> Inae amuhane rai jetaote, lechooncaain rai letonocuru cotijiae, acaauru nainein jequuin coriqui chaluhane coina. Nitohanein acaauru cotijiaain coriqui chaluhin jetaote: ‘Caa coriqui aina amihaneeuhe turuhanune reeintiaaincha,’ naain ratirinajae.

<sup>14</sup> Nejetaote, jataain que nererojoeccaure nii natane que nenacaauru cachaauru. Nii jaun jetaote, caaijie acaauru ere beranu que leinjiin letoaaure ‘Coatiha canacaanu curuaanaa *rey* ineein niha caa cachane jerihacaanuta,’ naa cuhane coina.

<sup>15</sup> Nejetaote nitohaneein nere bera letoaauruha caaijiene sajieein, *rey* ineein cocoinaauruhane jaun, *rey* ineein jelaiha natane que turuha uhe.

Inae nenajaun turuhin jetaote, nii letonocuru coriqui teein ratirihane jaaunru cotiharate, ‘Inaonjoaaincha canu coriqui jooocure le cacha cachaauruta,’ naain coitucuhane coina.

<sup>16</sup> Nii jana nii niicha cotiharatei ichoaichaniha rene turunaa jetaote: ‘Curuaanaa lechoonca saneeinte nefae ii coriqui,’ naa turuhinne jaun jetaote;

<sup>17</sup> ‘Saan. Aihane jaun iite jataain caohati canu cachaneein neei. Inae acaihaniji que caohacha ichaai caa coroatajaji coriqui ainane jaunne, lechooncai nese coaranu que coberenadoroneein chetereeeunnicha,’ nae rai nii *rey*.

<sup>18</sup> Nii jana leecha jetaote: ‘Curuaanaa, saoqui saainte nefae ii coriqui,’ naa turuhinne jana jetaote, <sup>19</sup>jerichanetoejin: ‘Saan. Aihane jaun saoquii nese coaranu que coberenadoroneeinte neriquiincha,’ nae jetao rai.

<sup>20-21</sup> Nii jana leecha jetaote: ‘Curuaanaa, nocoia ii coriqui. Jataain necha aansai cacha neeine jaunne ii coasiha, cajione que conajaain cau rucujueun. Chaen chaelai teneeine nihanatiin, enaacha temunojoi taain raain, naaonjoain neeine coitucuhanune jaun,’ naane jaun jetaote;

<sup>22</sup> ‘Ichaajenihanete ii ereecha que necouluruhequi canu cacha baaso. Chanuna chaen, nii chaelai tihanune que airijiin, enaacha temunojoi taain, raain, naaonjoaanune coitucuhi raotojoejin inatiin, <sup>23</sup>baanco cuhane nii canu coriqui tiha cueneei, canu loreri asae turuhanune, jelai amuritoheriin carai cainaainerichaae,’ naain jetao, <sup>24</sup>nii ecu nenacaauru rai: ‘Caje nii coriqui ruluhin, nii lechoonca saneein faera rai teeuchera,’ naane jana jetaote: <sup>25</sup>‘Curuaanaa, chanuna inae lechoonca saneein jelai amurijiriin siriha natiin nacoaauneein tenacare raita,’ naaunruha raine jaun jetaote: <sup>26</sup>‘Inae inara rai aitocooaun, jataain siricha raite jeelai amuritoeeiin terareein. Jana sirihei cajete, coroatajajeein sirihane nihanatiin jitariin caje ruluherareein,’ naain jetaote: <sup>27</sup>‘Chajaain chaen nii *rey* ineein nihanune jerelanaala caque nejeratenacaauru uhaain cau canotaracaae teein sohin jaonajaauche,’ nae jetao nii *rey*,” naain jetao cachaauru relae Jesuso.

### *Jerosaleen cuha Jesusone*

*(Mt 21.1-11; Mr 11.1-11; Jn 12.12-19)*

<sup>28</sup> Niritohane baiha jetaote, Jerosaleen cunajaun, <sup>29</sup>nii Jerosaleen rohan ichuunejeein nena ichatane ucuuno Olibo neeonjoain neein niicha curuateeuri rohan nena Betafajee, Betania, naaonjoainu turuhin jetaote, coroatajaain aina nerelanacaauru rai:

<sup>30</sup> “Chajaain taa cana ajiniha nena neseu cunichuche. Ecute cositenojoi-neein teequi leinjiin boro chabana cacha amunajaniheine eruriquicheein. Chaen cajiha carai cosi rutuhin uhaauche. <sup>31</sup>Inae uhaaichene jana, ‘Chanuna nii boro cosi rutuhin amaaiche,’ naa chunine, ‘Cana Curuaanaate latihane jaun raeratera,’ naauche,” naain jetao letoanajae Jesuso.

<sup>32</sup> Niritiin acaauru letoaa Jesusone jana, nii neseu cuuruhane jaun jetaote, nii acaauru rai aitohane rijijieein nii boro eruha cuure nii aina nerelanacaauru. <sup>33</sup> Nitohaneein ecu turuhin, nii boro cosi rutuhajeeuruhane jana jetaote:

“Chanute nii boro cosi rutuhicheta,” naa acaauru rai nerorane jaun jetao:

<sup>34</sup> “Cana Curuaanaate latihane jaun raeratera,” naaure jetao rai.

<sup>35</sup> Nitohaneein cosi rutuhin jetaote, nii boro ichoae rai cajione teein jetao, Jesoso rene amaaure nichoae nelauriaain cuhane coina. <sup>36</sup> Nitohaneein nii boro amaain Jesoso rene turuaauruhane jana jetaote, nichoae nelauriaain raotojoein cuujiha Jesusone jana jetao, najiniha bero cuhane rai cajione maririjiacoaure cachaauru.

<sup>37</sup> Inae Olibo neonjoain bichatane ucuuno fauque cuujiha Jesusone jana jetaote, itolere cojoaelanaacojoai ichanajaaoncane coaranajaaoncuruhane jaun jetao, cojioriin Cana Coaunera coroaecure satiin nii sacuurera cachaauru.

<sup>38</sup> “Raotojoein turuhine aca neein nenea rijijiein cocoinaain Cana Coaunera letono *Reycha*. Dedeeu raotojoein nihacachene coina icharanein nihane coitucuhin Cana Coaunera coroaecuruhine cachaauru,” naauruha cachaaurune jana jetaote:

<sup>39</sup> “Cacha relaera, toon ii sacuurera cachaauru rai aitoote, toritocuruhane jianecurumiincha,” naauruha nii cachaauru jana cunacaauru fariseeocuru tabaaurune jaun jetaote:

<sup>40</sup> “Esinæ rauhijiriine aitoonra. Toritocuruhane caje inauheneecha neeuruhanete, cojiorichurureein caa ajerichurura,” naain jetao tonoranajæ Jesoso.

<sup>41</sup> Inae Jerosaleen rohan nichuutane jaun, inae inanacaa nii Jerosaleenne coaraane jaun jetaote, ecu nenacaauru cachaauru coreniha chanaain jetao:

<sup>42</sup> “Bajiaana chuhinti caa janonaa cuhane jianacoon inara mitaeraanu que cau turuhanune coitucuhin neneeiche. Nete quesetaain canuneein niha-nune coitucuhin coarana naineneeiche. <sup>43</sup> Nitohaneeichene jaunte, inæn nereein itolere neein inara curuhacaain inara corihateein, inara mucuhin niha nii nejerateein neeiche jaa cojoanonaara. <sup>44</sup> Caa inara nese fejeeinte itajeein, inara cocoaichucuru soajeein jaoha cuurureeincha. Coatiha neri-naain leinjiiniji ajeri ita choæ teein ichanohita. Inara ichoterateein, jianacoon inara mitaeraanu que turuha uhanu inara Coauneraneinne jana canu esenetaain cacoitucunaa jereneeichene corenihara,” nae jetao inaderaain Jesoso.

*Teenforo couluuoca Jesusone*  
(*Mt 21.12-17; Mr 11.15-19; Jn 2.13-22*)

<sup>45</sup> Inae Jerosaleen turuhin jetaote, Teenforo asæ enohin, ecu necoretiha nenacaauru sitaain jetao:

<sup>46</sup> “Cana Coaunera Quiricha inoænsi cuhanete aite: ‘Canu lorerite nasæ neein canu bajæ bajaæacuruhane jaan colohærine,’ naain. Nete necha aansai asijiautooru ucuhaneein teeiche inarara,” nae jetao nii cachaauru rai Jesoso.

<sup>47</sup> Nitohaneein cojoanoonetojoein Teenforo asæ cuhin cachaauru relaæ Jesosone jana jetaote, nechu jataain sohin jaaoruhane jaa lera ariha jetao, cuhin coaracure saseredote curuanaacuru, Cana Coaunera naitoonjoa que cacha relaaureraauru, nii nese curuaanaacuru, naaonjoainuri. <sup>48</sup> Nejetaote, nii chatohaneein teeuruhane jaan lera erusichurene, satiin cachaauru jataain nii acaauru relaane jaa rautatiin aonajeeunruhane jaun.

## 20

*Nitohanai ichaane coina cocoinaain letononiha Jesusone*  
(*Mt 21.23-27; Mr 11.27-33*)



<sup>1</sup> Teenforo asaae nosa caje nichoteeururichaaain cachaaaurune beebejeein, acaauru relaa Jesusone jana jetaote, turuha cuure saseredotecuru curu-anaacuru, Cana Coaunera naitoonjoa que cacha relaaaureraauru, Joriocuru rai nelateein nenacaauru ichauhenaauru, naaonjoainuri. <sup>2</sup> Nitohanein turuhin jetaote:

“Chatohanai cocoainanacaineena neei catohanai ichaaine coina. Chate catohanai ichaaine coina ii cocoainain ii letoaain neta,” naauruhane jaun jetaote:

<sup>3</sup> “Saan. Canuhetonaina inara caje leinjiin erenaa bajareeun catoon-raaichene coina. <sup>4</sup> Cha Joaan letoaain nelu cachaaauru baotisaain cachaauru coujunacatiha uhane coina. Cana Coaunera letoaenihanena, cachaa-ruhachana letoaain nihalu,” naain acaauru caje bajaa Jesusone jana jetaote, <sup>5</sup> ecu inauheneeicha aonajeein jetao: “ ‘Cana Coaunera letononeeinte ailu,’ naacachenete: ‘Chanuna jana esenetaain tonoraain neneeichelu,’ nareein. <sup>6</sup> Niheichu, ‘Cachaauru letononeeinte ailu,’ nanaa nainihaacache. Niritocoaachenete ajeri que cana bodoosiin cana sohin cana atinaaurureein cachaauru, satiiin Cana Coaunera letononeein aihalu Joanne esenetaauruhalune jaun,” naain jetao, ecu nejesinajeein ita rai ereerejeeuruhane baiha jetao: <sup>7</sup> “Coatiha coitucuhaacaanu. Chachainti cacha baotisaain coujunacatiha Joanne coina letoaain neluta,” naaure jetao.

<sup>8</sup> Nii jaun jetaote:

“Niheichu canuhetonai nihanatiin ‘Naaonjoainte canu cocoainain nihane ainane, caa catohanai ichaauru,’ naain benaa nainihaaun inara raita,” naain jetao acaauru tonorae Jesuso.

*Necha aansainein ichaonacaauru ocoana beraichacuru que parabola que cuaain cachaauru relaa Jesusone*

*(Mt 21.33-44; Mr 12.1-11)*

<sup>9</sup> Niritohane baiha jetaote, necha aansainein ichaonacaauru ocoana beraihurera que *parabola* que cuaain jetao: “Leinjiin cacha jetaote, leinjiin ocoana sirihane jaun jetao, que amihanenacaauru rai teein ratiriin jetao, coriajai ataneu cue, latihane nainein rainein nena letoaauruha raine coina.

<sup>10</sup> Nitohanein teein ratiriin jetaote, inaen tainaca que tihane jana jetao, leinjiin letono letoae, nii amihanenacaauru caje rainein niha nii ocoanane coreniha que banihateein niicha taihuri bajaa cuhane coina. Ne jetaote, nii cha telanaala faojaain sohin jelaiha letoaaure. <sup>11</sup> Nii jaun jetaote, nacoauneein leeocho letono letoaa nii ocoana erorane jana jetao, nocoeje chanuhin faojaain sohin, cha colane acaentonai letoaaure. <sup>12</sup> Nii jana coaiten leeocho letono letoaane jana jetaote, jataain cunaitaain jelai caje acaentonai sitaaure nii ocoana que amihanenacaauru.

<sup>13</sup> Nii jaun jetaote: ‘Cha laen ichareeun. Satononejeein caa jataain jereein canuhacha belaa canu calaohi letoaanunete ne. Quete laen acaneein nihane coitucuhin raotojoein raain nere tonoraaurureein,’ nae nii atane erora.

<sup>14</sup> Nejetaote niritiin nii rai calaohi letoaane jana jetao, cuujihane jana coariin: ‘Taate caa atane erora calaohi ne. Acate inae oha rai inacane bana, caa itolere que banijiaain nena rareeinha. Coanete mucuhin sohin jaohacachete cana rainein nedaaine caa iolere que banijiaain nenaara,’ naain ita caje bajaacoaain jetao, <sup>15</sup> nii ocoana caje amaain sohin jaaore nii ocoana que amihanenacaauru.

Nitohanihane jaun, tonaquiche jana nii que inara. Chatohaneicha acaauru tereein nii ocoana erora, nii rai calaohi mucuhin sohin jaaoruhane jaun. <sup>16</sup> Raajenihane uhin inacha nii ocoana que amihanenacaauru sohin

jaohin, leeochoaauru rai nii ocoana teriha nii ocoana erora,” naain jetao *parabola* que cuaain cachaauru rai ereerejeein relanajaen Jesoso.

Nii jana jetaote:

“Jiaonriha icharaa nitohaninera,” naaure jetao nii cachaauru.

<sup>17</sup> Nii jana jetaote, acaauru coarajeein jetao:

“Chaquena jana chaen, Cana Coaunera Quiricha inoaensi cuhane: ‘Nii jaolecooruha loreri icharaaurune jaan ajerite jauriaanejeein loreri nunuhe-neein ichanohineein niha cureeinha,’ nae.

<sup>18</sup> Aihana jaun chunocoha nii ajeri ichoae comoite, nichaluchaluriha cureein. Jana chunucoha ichoae comoha nii ajerinete jitohitoreein,” naain jetao be cachaauru rai Jesoso.

<sup>19</sup> Niritiin acaauru que cuaain, cachaauru relaa Jesusone que nainacuruhane jaun jetaote, nii rijieeoritiin mucueratenaa jerecure saseredotecuru curuaanaacuru aina Cana Coaunera aitoonjoan que cacha relaureraauru. Nejetaote chatohaneein tenaa nainecurene cachaauru coasichuruhane jaun.

*Jesoso mucuuruhane jaan lera ariha Roma curuaanaa rai coriqui teeuruhane bajaauruhane*

*(Mt 22.15-22; Mr 12.13-17)*

<sup>20</sup> Nitohaneein sohin jaonaa jerecuruhane jaun jetaote, acaauru letono letoaaure, belaicha cacha rijijieein turuhin Jesoso caje chaelai erenaa bajaauruhane jana, tonaain acaauru tonoraane nohaneein colurujueeuruha coberenadoro raine coina. <sup>21</sup> Nii jaun jetaote, rene turuhin:

“Cacha relaera, nii aitiin cachaauru relaaaine jaane esinae rauhijiriin chuni que suujuelanaala, satiin cachaauru rai jerichanetoejin aitoehine coitucuhacaanu. Iite esinae rauhijiriin jeriha Cana Coaunerane rijijieein ichaoha cachane coina aitiin cachaauru relaa. <sup>22</sup> Nitohanihane jaunne ii caje bajaa uhacaanu. Caohachaana Romanocuru curuaanaa enferadoro rai *impoestonu* que coriqui tihacaanune,” naain jetao Jesoso caje bajaure.

<sup>23</sup> Nii jaun jetaote, nechu jataain baasoneein coacuhin que iriha aitocuruhane que nainane jaun jetao:

<sup>24</sup> “Saan. Canu que leinjiin nii coretequichene jaan coriqui coarateeuruhane jana coaraain jetaote: “Cha cojunaca caa, ecu laenanohineein curuaa siriin,” naa Jesusone jaun jetaote: “Enferadoro rai,” naauruhane jaun jetao: <sup>25</sup> “Aihane jaun chujian- caa enferadoro raineen nena teeuche enferadoro raicha. Jana Cana Coaunera raineen nena teeuche Cana Coaunera raicha,” nae jetao nii cachaauru rai Jesoso.

<sup>26</sup> Niritoha satiin cachaauru notaracaae Jesusone jaun jetaote, nii chatohaneein mucuhin teeuruhane jaa lera eruurenihane jaun jetao, ecuhacha cojoelatiin inauheneecha neeure nii saseredotecuru letonocuru, niritiin acaauru tonoraane jaun.

*Chatohaniha cacha inae oo caje ichanaane*

*(Mt 22.23-33; Mr 12.18-27)*

<sup>27</sup> Nii baiha jetaote, Jesoso coaraa cuure nii ohane baiha jerichanejeein jaberoco rijijieein niha cacha suujuene esenetaauruhi sadoseecuru. Nitohaneein cuhin rene turuhin jetaote:

<sup>28</sup> “Cacha relaera, Moisesate canacaanu rai laenaain ratirilulu, oha leinjiin cacha nesiriateein nii comasai aina canaanai sirilanaalane, nii autana raain aina canaanai siriha rai ocoalane coina. Nitohaneein nii autana aina canaanai siriha nii ocoalane, aca siricha rijijieein nii onaa calaohineein niha

nii canaanaine caina. <sup>29</sup> Nii janate ita nejera nejesinaneein caaunsineein neeure cachaauru. Jauriaanejeein acaauru inanate, leinjiin ene aina nesirihateein, nii leinjiin niji canaanai sirilanaala ohe. <sup>30-31</sup> Nii janate neeuruha coroatajaain rai nejeraaurune jaun, oha coaiteen nii nihanane jaun nii ene rae nii rai nejera. Nii rijijieein techu satiin nii ene raare acaauru ocoalacuru itolere bana ooruha acaauru inanacurune jaun. Nete leinjiin niji canaanai sirilanaala oore nii caaunsineeuri ita nejeraauru. <sup>32</sup> Nii janate inae oohe nii ene netonai.

<sup>33</sup> Aihane jaun chariji comasainein jana nereein nii ene, inae Cana Coaunera Cojoanona que ichaaoruhane bana, caaunsineeuri ita nejeraauru aina nisiriathalune jaun,” naain jetao Jesoso caje bajaare nii sadoseeocuru.

<sup>34</sup> Niritiin caje bajaauruhane jaun jetaote:

“Caa chauratane que nenacaauru quichaaauru, enecuru, naaonjoainurite nisiriateein naaonjoaunre. <sup>35</sup> Nete laen inae ooruhane baiha oo caje ichanaain Cana Coaunera rene turuhenihuru quichaaauru, enecuru, naaonjoainuri inae oo caje ichanacuruhane nisirihateeurenereein, <sup>36</sup> onaa inaaureniha anjeraaurune rijijieein neeururichaaainne jaun. Chaen techu Cana Coaunera Calahineein neeurureein acaauru ichateein nerichaaain Cana Coaunerane jaun. <sup>37</sup> Jerichanejeein techu ohane baiha ichanaain neeuruha onacaaurune que laenaain coitucuerateein nelu cana que Moisesa, nii nuna laajoiri iihani netiin Cana Coaunera aina irihane bana, ‘Canune, Abaraun, Isaca, Jacobo, naaonjoainuri Coaunera, inara Coaunera neein neeun,’ naalu Cana Coaunera Moisesa raine jaun. <sup>38</sup> Aihane jaun coatihana ichaonacaauruhacha Coaunera neein nihei Cana Coaunera, onacaauru nihanatiin rai ichaohin neeuruhane jaun,” naain jetao sadoseeocuru tonoraes Jesoso.

<sup>39</sup> Niritoha sadoseeocuru rai Jesusone jana jetaote:

“Jataain caohatiinte acaauru rai aitohicha cacha relaera,” naare jetao Cana Coaunera aitoonjoa que cacha relaaaureraauru tabaauru, acaauru laen oo caje ichanaa cachane esenetaauruhane jaun.

<sup>40</sup> Niritoha acaauru rai Jesusone jaun jetaote, inae nenacaaen caje chatohanai bajaanaa nainecurene.

*“Cha caje nefoeratenaane Mesihasi,” naain bajaa Jesusone  
(Mt 22.41-46; Mr 12.35-37)*

<sup>41</sup> Nii jana jetaote:

“Chanuna Rabiri caje nefoeratenaaniha canaacha cohajei Mesihasiine jaun, Rabiri amurijiriin nena naineniha beeiche. <sup>42</sup> Inasiina raajenihane, quiricha Salmo cuhane:

‘Cana Coaunerate,  
Canu Curuaana Mesihasi rai:

“Cau carohan  
canu raotono nichajai que  
nelauriaain coarajeeuna,

<sup>43</sup> nii iniha nejeratenacaauru amuritiin,  
ii bijihu tenajaanune reentiaaicha,”

naa Cana Coaunera, Canu Curuaana Mesihasi raicha,’ naain raajenihane Salmo cuhane bihalu Rabiri inatiin. Chanuna Rabiri amurijiriin nena nainenere Mesihasi. <sup>44</sup> Inasiinna jana chaen amurijiriin nena naineniha Mesihasi saijieein nii Rabiri netonai, ‘Canu Curuaana,’ naain Mesihasi nichaaunne curuaatihalu natiin,” naain jetao bajae Jesoso.

*Cana Coaunera aitoonjoa que cacha relaaurera biha Jesusone  
(Mt 23.1-36; Mr 12.38-40; Lc 11.37-54)*

<sup>45</sup> Niritohane jana satiin ecu neein aonajeeuruha cachaurune jana jetaote, aina nerelanacaauru rai jetao: <sup>46</sup> “Caohachaaain necohalajiin neeuche, caa Cana Coaunera aitoonjoa que cacha relaaureaauru que. Acaaurute acaauru que suujua acatena nainiha cachane jaan cocoajione jiaain, itolere coitucueraneein, caohachaaain niha nocoetocuruhane jaun, chunijihu nenaanaja cataaun nihanatiin, acaauru que suujua acateein niha satiin cachaurune jereein neeure. Chaen techu, sinacoca asae nelauriaauruha jataain nelatenacaaurune jaan rori caohacha janijiin, nichoae ichoaichaniha nelauriaaure. Chaen techu ichoaichaniha nelaurianana jaan janijiin, lenone rohan nelaurihaain lenonecure. <sup>47</sup> Chaen techu cairichei autanaauru caje acaauru lorerichuru nihanatiin ruluhin naaonjoaauru. Nii choae tacaain techu nitohaneeuruhane jaun, jataain nohaniha Cana Coaunera coitucueraniha nocoetocuruha itolere amurijiriine jaun, satiin notaracae Cana Coaunera bajaauruhane carajaain bajaare. Nitohaneeuruhane jaunte leeochoauru osaaonacaauru cachauru amurijiriin, jataain caseteco tabai coaraa cuurureein,” nae jetao aina nerelanacaauru rai Jesoso.

## 21

### *Acaihaniji ichaaojihane jaanu coriqui tiha cairichei autanane* (Mr 12.41-44)

<sup>1</sup> Niritiin Teenforo asae coriqui coreniha Cana Coauneraacha icharatenohi amihanenaa ichacuruhane coina curu cuhane coriqui teeuruha cachaurune jana, ecu coarajenajaa Jesusone jana jetaote, <sup>2</sup> leinjiin autana jataain cairicheinejeein nena netonai coroatajajeein jataain coretelanaala nena coriqui te, <sup>3</sup> jataain teeuruha leeochoaurune fautaaine jaun jetaote:

“Esinae rauhijiriine aitoon inara rai. Caa cairichei autanate, leeochoauru amuritoheriin coriqui te. <sup>4</sup> Satiin caa leeochoaurute nechu jataain inae acaauru rai cauteecha teure. Jana caa autanate, jataain cairicheinejiha natiin jitariin acaihaniji ichaaojihane jaanu te,” nae jetao Jesoso.

### *Nitajerichaain Teenforone biha Jesusone* (Mt 24.1-2; Mr 13.1-2)

<sup>5</sup> Nii jana jetaote, caohatiin ajeri caje ichanohiniha Teenforone coaraain, jataain caohatiin inanacaane coina, nasaa itolere niicha teuri coaraain jetao que ereerejeeure cachauru. Nii jana jetaote acaauru rai:

<sup>6</sup> “Caa ena ajeri caje caohatiin ichanohineein inaraacha coarajeite, inae ecu tihane bana fejeein itajenojoinereein,” nae jetao acaauru rai Jesoso.

### *Nerichaain cojoelanaacojoaine biha Jesusone* (Mt 24.3-28; Mr 13.3-23)

<sup>7</sup> Niritohane jaun jetaote:

“Cacha relaera, chabanacha aicheein nii chaitoonjoan. Chatohanai cojoelanaacojoaicha inae que turuhelalajihane jana coararichaanuhin,” naain jetao caje bajaare.

<sup>8</sup> Nii jaun jetaote: “Caohachaaain nainaan necohalajiin neeuche, inara coritaa chunine coataara. Inae nerichaain arajii canu niha nocoetiin inara coritaeraanuurura. Tabaaurute: ‘Canune acaneeunra,’ naaurureein. Jana tabaaurute: ‘Inae taolu caitoonjoa cojoanonaa que nihacachera,’ naauruha inara raine, jiaonriha esenetaain sacunajaaichenera. <sup>9</sup> Jiaonrihachu nejesinaneein ita sohin neeuruha satiin chauratane que nenacaauru cachaurune coitucuhin neeichene nihanatiin nesoonetohichenera. Nitohaneinte

jaiti nii cojoanonaa que turuenihane ajiniha aicheeincha. Nete nitohanihane nihanatiin jaiti cana janonaa satono que turuhenerееincha,” nae jetao Jesoso.

<sup>10</sup> Niritiin jetaote: “Leeocha atane que ichaonacaauru cachaurute, lauriu ichaonacaauru cachauru aina ita cotaiha cuurureein. Jana leinjiin atane que ichaonacaauru cachaurute, leecha atane que ichaonacaauru aina ita soorureein. <sup>11</sup> Nii janate itolere cana rai chauratane sacuritaain niha cureein jataain mijiaaіneein carora, mijitena, cunai, naajoainuri. Nii jana dede quete jataain coasinaacojoai coaraain, cojoelanaacojoai coaraa cuurureein cachaurura.

<sup>12</sup> Nete nii cojoanonaa que turuenihane ajiniha, inara rerohecaain inara mucuhin sinacoca asae inara amaaın, curuaanaacuru, chaen coberenadorocuru, naaonjoainuri acatiha inara teein inara cairichaain caresero cuhane inara enohaa cuurureein canu ere tonoraera neeichene corenihara. <sup>13</sup> Nitohaneein inara teeuruhane banate, canu nichaaunne coitucuerateriquicheein cachauru quera. <sup>14</sup> Jiaonriha, ‘Tonaainera erereeunta,’ naain inara jabereco coreniha ereeichene jaanu que coacuhin cuhiche inara amaauruhanene. <sup>15</sup> Canune jataain nainaaın ecu ereeichene jaanu tereeeunni inara raicha. Nii bana nii tonaain inara tonoracuruhane jaanu coitucuhin neeururihaain nii inara aina nejeratenacaauruta. <sup>16-17</sup> Nete laen inara cairichaeriin inara cotaairiin nenacaauru coroatajaniha cuurureein nechu jataain inara cairichaa, inara inacaauru, inara nejeraauru, inara araachuru, inaraacha belaihuri, naaonjoainuricha. Nitohaneeinte inara tabaauru sohin jaaoha cuurureein. Satiin caa chauratane que nenacaauru cachaurute Canu ere tonoraera neeichene coreniha inara que nerererojoe-caeriin, inara cairichaeriin, inara cotaairiin, naaonjoaain neeurureeincha. <sup>18</sup> Nete nii leinjiiniji inara couturiji nihanatiin nitajenereein. <sup>19</sup> Nii jaun caohachaaın laraajiin nii inara suujua corelanaala, raotojoeein neeuchete nii caje nichotenaa nainequiche.

<sup>20</sup> Inae Jerosaleen curuhacaain neeuruha soondaroorune coaraqichene, inae nitajerichaaıne cojoanonaa que turuhane que nainacuche. <sup>21</sup> Inae nitohaneeuruhane coaraqichene, Jodea nenacaauru naain ıchatane ucuunocuhin sorooruhine. Jana Jerosaleen nenacaauru, nii nese caje coriaae amuurumiiincha. Jana chunocoha rai nocoana jana nihane jana nitohanihane, jiaonriha jelaiha nii neseu turuha cunaa coaaucaanera.

<sup>22</sup> Inaen nitohanihane coina, niritiin inoaenlu quiricha inoaensi cuhane satiin laenacuruhane jaa cojoanonaa nainaaıne coina jataain caseteco tabai niha curichaaıne jaunra. <sup>23</sup> Jataainte cairichaaıjoaa cuurureein nii cojoanonaa bana ausirineein nenacaauru enecurura, chaen sisiajeein canaanai siriin nenacaauru, naaonjoainuricha. Nitohaneeinte caseteco tabai coaraa cuurureein nii Jodea batane que nena aına Jerosaleen ichaonacaauru cachaurura. <sup>24</sup> Tabaaurute sabere que sohin jaonjoiniha cuureeincha. Jana tabaurute mucunojoneein corihaji ataneeuru amanojoiniha cuurureein. Nitohaneeinte Cana Coaunera coitucuhichuru, nii Jerosaleen nenacaauru itajihı cuurureein caohatenojoiniha nitohanei ichacuruhane jaan que turuhanereein tihaaincha,” nae jetao aına nerelanacaauru rai Jesoso.

*Nacooauneein turuha urichaaunni Canu cachaneein nejanohanaa nichaaunne*

*(Mt 24.29-35, 42-44; Mr 13.24-37)*

<sup>25</sup> Niritiin jetaote “Enoto, atene, arasijie, naaonjoainuri quete cojunacateein coaratenojoinereeincha. Nii jana satiin caa chauratane que

nenacaauru cachaaaurute, nesooniha cuurureein, ‘Naaonjoanne jaunte caa aicha’ naain coitucuurenihane jana jataain tonihaca coasinacaain fichafichanaa cucuanane coaraaincha. <sup>26</sup> Nitohanihane janate inae nitajerichaaain cana rai chauratanene coaracuruhane jaun, coasinacaun acunoha cuurureein cachaauru. Dedeeu nenacaauru netonaite jataain nerurujuaa cuurureein. <sup>27</sup> Nii janate jataain nelateein itolere ichana nainichaaunne coarateein turuha uuhanu Canu Cachaneein nejanohanaaneein dede sacari jana uuhinne coaraa cuurureein cachaauru. <sup>28</sup> Inae nitohanihane nunuhetihane jana, nii chaque tonajelanaala neeuiche, inae inara que nejeratenacaauru caje nichoteriquicheeinine coitucuhichene jaun,” nae jetao acaauru rai Jesoso.

<sup>29</sup> Acaauru rai niritiin jetaote, nechu jataain nainacuruhane jaanu que jetao: “Coaracuchena chuhinti *iquera* aina joaenreein enuhacuru, satiin neroeeca nalone baiha <sup>30</sup> nacoaauneein omaroha nalone, inae elohena que turunaa jerihane que nainaquichene. <sup>31</sup> Nii rijijieein techu inae caa caitoonjoan cojoanonaa que tihane bana, inae coaraguichene, nichuuntaa Cana Coaunera Cojoanonaane que nainariquicheeincha.

<sup>32</sup> Esinae rauhijiriinte jaiti ooreniha caa ena nenacaauru cachaaaurune jana, satiin situha cureein caa caitoonjoan. <sup>33</sup> Dede, chauratane, naaonjoainurite nitajiha cuurureein. Nete laen caa caitoonjoan leinjiiniji nitajelanaala satiin aitocooaunne rijijieein aihane rai ne.

<sup>34</sup> Aihane jaun caohachaaain necohalajiin, nii cajihaneein inara suujua coacuelanaala, nii ajalanaala, nii inara ichaohacha que nererojoecaaeriin neeichene jianeein neeuiche, inae nii cojoanonaa que tihane bana, ujua cuhane foroaa chaelaine rijijieein inara foratiaa nii cojoanonaane coataa. <sup>35</sup> Itolere sacuritaain caa chauratane que nenacaauru cachaauru ichoaete naluha cureein nitohanai. <sup>36</sup> Aihane jaun letona jatoroaain itolere cojoanonaa bana Cana Coaunera bajaabajajeein neeuiche. Aihate caa caitoonjoan tocoaneein situhane bana, caje nichoteein, nii acaihaniji Cachaneein nejanohanaa nichaaunne acatiha raotojoein turunaa nainequiche inara,” nae jetao caje bajaauruhane jaun aina nerelanacaauru rai Jesoso.

<sup>37</sup> Nitohaneein jetaote, jiichoonihane Teenforo asae cachaauru relaain, inae nocohecane jana Oliboneein niicha curuaateeri ichtatane ucuuno cuhin nihane nesururejetelu Jesoso. <sup>38</sup> Nitohaneein jetaote, janohetiin Teenforo asae cuhin, acaauru relaa Jesusone aonaa curejetucurelu satiin cachaauru.

## 22

### *Jesoso mucuuruhane coina ita suujua tacaauruhane* (Mt 26.1-5, 14-16; Mr 14.1-2, 10-11; Jn 11.45-53)

<sup>1</sup> Inae jorerera colane faan quihuruhane jaa cojoanonaa Fasocaa beseta catainaane jana jetaote, <sup>2</sup> Jesoso sohin joaerateeuruhane coina jetao, “Chatohaneein ichanaareta,” naain coaacure saseredotecuru curuaanaacuru aina Cana Coaunera aitoonjoa que cacha relaaaureraauru. Nabana raajenihane mucuhin sohin jaaoruhane, chatohaneein acaauru teuruha cachaaaurune que necasacuruhane jaun.

<sup>3</sup> Nitohaneein inaen sohin jaaoruhane coina que nocousuujuaaruhane jana jetaote, nii aina nerelanacaauru lechoonca coroataja Jodasi Isacariote neein niicha curuaateeri suujua saruha Moconajaerane jaun jetao, <sup>4</sup> batirichuru curuaanaacuru, Teenforo curuaanaacuru, naaonjoainuri

coaraa cue: “Canune naaonjoaain inara rai naineeun, nii Jesuso mucuhinchene coina ecu inara turuaanunera,” naa acaauru raine coina.

<sup>5</sup> Inae niritoha acaauru raine jaun jetaote, jataain corojeein coretena jerecure. <sup>6</sup> Nii jaun jetaote, acaauru suujua rijitoejin cachaauru colane niha Jesusone cojoe, ecu Jorioocuru bijihu Jesuso tihane coina Jodasi.

*Cana Curuaanaa aina lenonecuruha afosotoorune  
(Mt 26.17-29; Mr 14.12-25; Jn 13.21-30; 1Co 11.23-26)*

<sup>7</sup> Nii jana inae jorerera colane ichanohin faan quiin carenero narejeen sooruhane jaan beseta cojoanonaa Fasocoa que turuhane jaun jetaote, <sup>8</sup> Fedoro aina Joaan rai jetao:

“Chajaain Fasocoa beseta cosonaina que canaacha quiine ichanihuchete que lenonichaachera,” naain jetao acaauru letoae Jesuso.

<sup>9</sup> Nii jaun jetaote:

“Chujian ichacaaunne jereeita,” naain jetao caje bajaare.

<sup>10</sup> Nii jaun jetaote:

“Inaen cuhin nii neseu turuhichene janate, baichaje cuhane acuu baalbaaichaain cuujiha leinjiin cachane jana eruriquicheein. Chaen loreri asae enohane reentiaain sacuuchera. <sup>11</sup> Chaen inae nii loreri asae turuhichene, nii loreri erora rai: ‘Taa cana relaerate, Chariji loreri asae nena ecuha cuhane, Fasocoa beseta cosonaina que lenonereeunni canu aina nerenanacaauru ainata, naain ii caje bajaeratera,’ naauche. <sup>12</sup> Niritocoichene janate, nii loreri coroata coarana ecuha seeonjoa siricha coaratereein inara que. Chaen inae nitohaneein inara que coaratihane baiha, ecu sonaina lenonichaachene jaanu jelai rucuhечuchera,” naain jetao letoanajaen Jesuso.

<sup>13</sup> Nii jaun jetaote cuhin, nii acaauru rai aitoha Jesusone rijijieein eruruhane jaun jetao, ecu tein Fasocoa beseta bitoaain, cosonaina que lenonecuruhane jaanu jelai rucuhечure.

<sup>14</sup> Inae nitohaneein enoalauruhane jana jetaote turuhin, inae que lenonecuruhane jaan rijiu tihane jana, rai afosotooru aina rori ichoae nelauriae lenonecuruhane coina Jesuso.

<sup>15</sup> Nitohaneein rori ichoae nelauriaain jetaote: “Jataaine inara aina carijieein caa Fasocoa beseta bitoaain, cosonaina que lenonena jerenajacoon osichaaunne ajiniha. <sup>16</sup> Coatiha laen caa baiha, inaen caa Fasocoa beseta bitoaain inara aina lenonerihaaunni Cana Coanera Cojoanona que turuhanune reentiaain,” naain jetao, <sup>17</sup> curu cuhane, oba caje ichanohin bino teberiaain Cana Coanera bajaane baiha jetao, acaauru rai tein:

“Nocoa, inara nejesinajeein caa leruune leruunein cooche. <sup>18</sup> Inae caa baiha nacoaauneein caa oba caje ichanohin bino corihaaunni Cana Coanera Cojoanona que turuhanunereen tiaain,” <sup>19</sup> naane baiha jetaote, faan mucuhin Cana Coanera bajaain, cataaun nii faan tatuhin beeune beeunein acaauru rai tein jetao:

“Caa inara rai canuhacha teite cajabereoneein ne. Acate jianacoon neeichene coina, inara coreniha cairichanojoneein atinanohinereein. Aihane jaun, itolere bana canunein nihanune coacuhin que lenonecuche,” nae jetao acaauru rai faan teruhin tein Jesuso.

<sup>20</sup> Niritoha acaauru rai Jesusone jana lenonecuruhane baiha jetaote, nii faan que aitohane rijitoejin, acaauruhacha coheni tein jetao;

“Caa oba caje ichanohin binote, inara caohachanu que cacoichana jaohin canuhacha ichaneni icharihanuhinne cojunaca nera. <sup>21</sup> Nitohaneein caque nejeratenacaauru rai caeteraanute ena cau cana aina lenoniha

ne. <sup>22</sup> Nitohaneein acaihaniji Cachaneein nejanohanaa nichaaunne cairichaeriin neeuruhane coina, aitiin neeuruhalune rijijieein aihanete ne. Nete jataain cairichaaajoaa cureein, nii caque nerotohin cacairichaerateranu,” naain jetao bino teberiaain Cana Coaunera bajaane baiha afosotooru rai te Jesoso.

<sup>23</sup> Nii jaun jetaote, “Charijinachara toon totohaneein que nerotohin aina nejeratenacaauru rai coulurujueein cairichaeratiha cureein,” naain jetao ita caje bajaacoaaure aina nerelanacaauru.

#### *Charijina jataain nelateineein ne*

<sup>24</sup> Niritiin jetaote nejesinajeein: “Charijina caa cana caje jataain nelateineein coanojooineein ne,” naain jetao ita caje bajaacoaaure aina nerelanacaauru. <sup>25</sup> Nii jaun jetaote acaauru rai: “Cana Coaunera coitucuelanaala nenacaauru curuaanaacurute, itolere amurijiriin nena jereein cachaauru cairichaeriin neeure. Niite acaauru cairichaaauruhane coitucuuruhane nihanatin coroaacure caohacha ichaa benajaain. <sup>26</sup> Nete laen inara naineneeiche nitohaneein neeichene. Nitohaneein nena coacuelanaala, leeochoauru amurijiriin nelateein nena jeriha chuni inara cajene, leeochoauru ere tonoraain, letoaaauruhane jaan ichaain neeine. Jana chunocoha leeochoauru letoaeraneein nena jerihane satiin rai, chachaeraneein neeine.

<sup>27</sup> Nitohaniane jaun chariji jataain nelateineein nere, nii lenonihane coina rori ichoae nelaurianaana. Ainihane nii lenone chaluherana nelateein nerihane. Aihei jerihane. Nii rori ichoae lenonihane coina nelaurianaate nii lenone chaluera amurijiriin nelateein niha nocoete.

Nena laen canu nitohanelanaala, inara letono rijijieein ena cau inara aina inaraacha latei icharaneein neeun.

<sup>28</sup> Inarate cajiniichaain necairichanaa coaraain nenajaaonquiche. <sup>29</sup> Nii jaunne itolere Curuaanaa neein nelateein nihanune coina canu cocoaainaan caeteein niha Ofane rijijieein, inara netonai cocoaainaan nereeunni. <sup>30</sup> Nii banate inae nii cojoanona que turuhane bana, cajiniichaain rorihuru ichoae nelauriaain acau cohin, lenoneein, naaonjoanriquicheein. Chaen techu baaso ichacurenihane, caohacha ichacuruha lechoonca coroata laurii Israeli cocoaichacurune coaraain coitucuhichene coina cajiniinchaain nii coina banijiaain nena rori ichoae nelauriariquicheein, inae nii cojoanona que tihane bana,” nae jetao aina nerelanacaauru rai Jesoso.

#### *Coitucuha nocoetenerichaaain Fedorone biha Jesusone (Mt 26.31-35; Mr 14.27-31; Jn 13.36-38)*

<sup>31</sup> Niritiin jetaote: “Simoon, inae Canu sacueraneein neeichene bajaa moconajaera inara raane coina. <sup>32</sup> Nena ii coreniha Cana Coaunera bajaaun, canu esetaaine jianeine nihanatiin nacoauneein nelalararajiaain Canu esenetaain neeine coina. Aihana jaun, inae nacoauneein canu esenetaaine bana, inejeraauru coroatajanecuhin caohachaain laraajiin, canu esenetaauruhane jianelanaala raotojooein rachoojooein neeuruhane coina,” nae jetao Simoon rai Jesoso.

<sup>33</sup> Niritoha raine jaun jetaote:

“Curuaanaa, canune ijiniichaain caresero cuhane enohin nihanatiin ii coreniha onaa naineen,” nae jetao rai Simoon.

<sup>34</sup> Nii jaun jetaote:

“Fedoru, enene janotiin cuhanete, iriha janonaa rai ataohari curuaanaane ajiniha, nichata saain canu coitucuha nocoetoeneriquiin,” nae jetao Fedoro rai Jesoso.



*Inae nichuutaa coujunojoiniha Jesusone*

<sup>35</sup> Niritiin jetaote:

“Inara letoaain nihanulu coriqui curu, inara safato, inara atora, naaon-joain colane janana lanaain nihalu inara rai cha,” naain acaauru caje bajaa Jesusone jaun jetaote,

“Aihei. Coatiha nii lanaailu canacaanu rai chata,” naain jetao tonoraare.

<sup>36</sup> Niritocuruhane jaun jetaote:

“Nete laen ena chateeinti coriqui curu siriin, natora siri, nii amaain cuhane caohachae. Chateeinti sabere sirine nii jelaronaa bana niicha jiai cajione burique necoreteein leinjiin sabere coretemiin.

<sup>37</sup> Inara raine aitoon, inae caque aitiin Quiricha inoasi cuhane: ‘Naaon-joaain cairichaaeriinte necha aansai caseteco coaraane rai nenea ichara rijijieeinte teeurureeinha,’ naain itolereneein niritiin caque aitiin laenacuruhalune rijijieein situhane rai te ne,” naa acaauru raine jaun jetaote:

<sup>38</sup> “Curuaanaa, caute ne corotajaain sabere,” naauruhane jaun jetaote:

“Inae nainejerichaain niriimiin,” nae jetao acaauru rai Jesuso.

*Olibo neeonjoaihu Cana Coaunera bajaa Jesusone*

*(Mt 26.36-56; Mr 14.32-42)*

<sup>39</sup> Niritoha acaauru raine baiha jetaote, ecu nesurunajaaoncane jaun, Oliboneein niicha curuaateuri ichatane ucuuno cuha Jesusone jana jetao, caaijie cuure aina nerelanacaauru. <sup>40</sup> Nitohaneein cuhin, inae nii Olibo neeonjoaihu turuhin jetaote:

“Cana Coaunera bajaauche nabana osa que nesaruquichene coataara,” nae jetao acaauru rai.

<sup>41</sup> Acaauru rai niritiin jetaote, nita acaauru aonajeein cuhin neseeonrariin jetao; <sup>42</sup> “Ofa, ii jereeine caa jataain necairichanaa tabai caje canu mitaaura. Nena canu jerichaaunne rijijieein ichaaine jereneeunra. Ii jereeine rijijieein ichaaura,” naain jetao Cana Coaunera bajaa Jesuso.

<sup>43</sup> Niritohane jana jetaote, dede caje ecocohin lararajiaa leinjiin anjerane jaun jetaote, aina suujua nunaaajoae. <sup>44</sup> Nii aina jataain nesoonenaa cataauneein jelai rutaain, Cana Coaunera bajaaebajaaeca Jesusone jana jetaote, atanichoae tabaanaain nalue rai doroana ichananeein.

<sup>45</sup> Nitohaneein inae Cana Coaunera bajaane nainaan, aina nerelanacaauru coaraa cuhane jana jetaote, jataain cotaana aina inaderanaa caaun sinihure. <sup>46</sup> Nii jaun jetaote acaauru rai:

“Chanuna siniiche. Chajaain nimichuhin Cana Coaunera bajaauche nabana osa que nesaruquichene coataara,” nae jetao acaauru rai Jesuso.

*Jesoso mucuuruhane*

*(Mt 26.47-56; Mr 14.43-50; Jn 18.2-11)*

<sup>47</sup> Niritiin jaiti acaauru rai ereerejiha Jesusone jana jetaote, turuha cuure arajii cachaaauru. Nii aina nerelanacaauru lechoonca coroataja neein nena Jodasi jetaote, acaauru ichoaichaniha acaauru amaeraneein cue. Aca jetaote, Jesoso rohan nichuuntaain nechu jataain belaicha rijijieein jetao rai nomeri lioracae. <sup>48</sup> Nii jaun jetaote:

“Jodasi, belaicha rijijieeina nomeri lioracaain nii acaihaniji cache Calaohineein nena teei aina nejerateeriin nenacaauru bijihute,” nae jetao Jesuso.

<sup>49</sup> Inae inooneeuruhane coaraain jetaote:

“Curuaanaa, coanene ii cocoaeratihacaanu sabere quera,” naaure jetao nii Jesoso aina nerelanacaauru.

<sup>50</sup> Niritiin jetaote, leinjiin saseredotecucu curuaanaa letono uricho beuhite, rai raotono nichajai que tacaain sabere que, leinjiin nii Jesoso aina nerelanaa. <sup>51</sup> Nii jaun jetaote:

“Inae nirimiin, coa cunaitaa,” naain jetao jelaiha nii saseredotecuru curuaanaa letono uricho tirichaain jetao rautae Jesoso. <sup>52</sup> Nitohaneein rautaane baiha jetaote, saseredotecuru curuaanaacuru, Teenforo beraihurera, chaen Joriocuru bichauhenaauru, Joriocuru rai nelateein nenacaauru, naaonjoainuri rai jetao:

“Chanuna leinjiin necha ansai ausijiautoneein sonajaain joeraneein nihanune que airijiin sabereuru aina enuhacuru uhaain canu mucuha uhiche. <sup>53</sup> Itolere cojoanona banara, inara aina Teenforo asae nenajacoonna. Nii jana nii chatohaneein coatihana canu dadanajaaohiche. Nete inae nitohaneein nocohena tabai osa que nesaruhin namuritocohichene cojoanona que tihane jaun aiiche inarara,” nae jetao acaauru rai Jesoso.

*Jesoso coitucuha nocoeniha Fedorone*

*(Mt 26.57-58, 69-74; Mr 14.53-54, 66-72; Jn 18.12-18, 25-27)*

<sup>54</sup> Nitohaneein jetaote, Jesoso mucuhin saseredotecuru curuaanaa loreri asae amauruhane jana jetao, nita caaijie coarajeein jetao cuujue Fedoro. <sup>55</sup> Cuu turuhin jetaote, jelarotokane jaun, nenaanaja cataaun tein usi mocohin, curuhacaain nichaatiha neeuruhane jana jetao, Fedoro netonai cuu turuhin acaauru aina nichaatiha usi rohan lauheque. <sup>56</sup> Nii jana saseredotecuru curuaanaa coseenraneein nena leinjiin ene jetaote, cuu usi rohan lauhequiin nichaatiha Fedorone jana, cuu coarajihane baiha jetao coujeluhin:

“Caa netonaite aina nenaane,” naane jaun jetao:

<sup>57</sup> “Ainaaunchenaate. Coatihana Jesoso coitucuhaaunche canute,” naain jetao suujue Fedoro.

<sup>58</sup> Nii baiha neoriin jetaote, leeocho netonai:

“Caa netonaite acaauru aina nenaanera,” naane jaun jetaote;

“Ainaaunnaate, coatihana aca nihaaunte,” naain jetao nii cacha tonorae Fedoro.

<sup>59</sup> Nii baiha carajaaajoaain jetaote, coaiten leeocho netonai;

“Esinae rauhijiriin caa cacha netonaite, aina nenaane. Nii choae tacaain techu Calileea cocoaichanera,” naane jana jetao:

<sup>60</sup> “Coatihana nii carai chaitoonjoan cacha coitucuhaaunte,” nae jetao nii cacha rai Fedoro. Niritiin jaiti ereerejiha Fedorone jana, nii rijieeoritiin iriha ataohari curuaanaane jana, <sup>61</sup> jaotoroaain Fedoro coaraa Jesusone aina jetaote: “Enene cojoanotiin cunanete, nichata saain cacoitucuha nocoetelanaala nesuujuueine jana erereein ataoharicha,” naa Jesoso raine coacuhin nainaan jetao, <sup>62</sup> nii neeurunaja loreri caje mituhin jetao jataain obajeein chanae Fedoro.

*Jesoso que ninichaajeeuruhane*

*(Mt 26.67-68; Mr 14.65)*

<sup>63</sup> Nitohaneein nii Jesoso mucuuruhane jana beraiha nenacaauru cachaauru jetaote, que ninichaajeein faohacure. <sup>64</sup> Nitohaneein faojoaain jetaote, nota conajaain:

“Aihane esinae rauhijiriin profetaneine caa ii soera coitucuura,” naainchuru jetao sohin, <sup>65</sup> jataain que ereinchuru nocoeje chanuure.

*Jataain Joriocuru rai nelateein nenacaauru Junta Suprema acatiha niha Jesusone*

*(Mt 26.59-66; Mr 14.55-64; Jn 18.19-24)*

<sup>66</sup> Nitohaneein teein jetaote, inae janohane jana, ita taojiaaure Jorioocuru coaraneein nenacaauru bichauhenaauru, chaen saseredotecuru curuaanaacuru, Cana Coanera aitoonjoa que cacha relaaureaauru, naaonjoainuri, jataain Jorioocuru rai nelateein nenacaauru *Junta Suprema* acatiha amaauruhane coina. Nitohaneein amaain inae cuu turuhaain jetaote:

<sup>67</sup> “Esinae rauhijiriin Mesihasi neeine canacaanu rai beeune coitucuhacaanura,” naaunruhane jaun jetaote:

“ ‘Aca nichaaunchujian,’ naanune nihanatiin, nii quesenetareeichene coalanaalata. <sup>68</sup> Nii inara caje erenaa bajaanune nihanatiinchu catoonrariquichene coalanaalata. <sup>69</sup> Nena laen inae, enene caje coauneein, itolere Coaneraneein nelateein nena Cana Coanera raotono nichajai que nelauriaa cureeinni, canu acaihaniji cachaneein nejanohanaa nichaaunera,” nae jetao acauru rai Jesoso.

<sup>70</sup> Niritoha acauru raine jaun jetaote, satiin:

“Aihane jaunna, ii Cana Coanera Calahineeii,” naauruhane jaun jetao:

“Esinae rauhijiriinte acanichaaunne que aitocoichera,” nae jetao acauru rai Jesoso.

<sup>71</sup> Niritoha acauru raine jaun jetaote:

“Cha nenacaeneein cana rai berana laterihacache, inae raajenhane nujuaae caje acaniane que aitothane aonacaache natiin,” naaure jetao.

## 23

### *Jesoso coulurejeeuruha Filato raine*

(Mt 27.1-2, 11-14; Mr 15.1-5; Jn 18.28-38)

<sup>1</sup> Niritiin jetaote, satiin nimichucutaain coinetein mucuhin jetao, Filato rene Jesoso amaare. <sup>2</sup> Ecu turuaain jetaote, Filato acatiha teein Jesoso coulurujeeure:

“Caa cachane eruhacaanu, caa cana atane que nenacaauru cachaauru suujua rerohecaain, cana curuaanaa Romanocuru curuaanaa enferadoro rai coriqui tihacachene caohatein, ‘Aca jete nii canaacha cohajei *Rey* Mesihasi ne,’ naain cachaauru suujua auhacaane jana,” naain jetao coulurujeeure.

<sup>3</sup> Niritiin coulurujeeuruhane jaun jetaote,

“Iina chuhisi Jorioocuru Curuaanaa *Rey* ineei,” naain caje bajaa Filatone jaun jetaote:

“Esinae rauhijiriin acanichaaunne quete aitochicha,” nae jetao rai Jesoso.

<sup>4</sup> Niritohane jaun jetaote, saseredotecuru curuaanaacuru, chaen ecu neein aonajeeurera cachaauru, naaonjoainuri rai jetao:

“Coatiha chatohaneein baaso ichaa caa cachane coarahaan canuta,” naa acauru rai Filatone jaun jetaote:

<sup>5</sup> “Nete cachaauru relaane aina cuaain satiin cachaauru suujua auhacae. Nitohaneinte Calileea batane caje nunuhetein, caa Jodea batane netonai que jerichanejeiin ichana jerera,” naain jetao jataain acauru esenetaa Filatone jereein counujeeure.

### *Erodesi rene Jesoso letoaa Filatone*

<sup>6</sup> Niritocuruhane aonaain jetaote: “Calileea cajena nenaana caa cachate,” naain jetao acauru caje bajaee Filato. <sup>7</sup> Niritiin acauru caje bajaane jana, “Aca chujianrana,” naauruhane jaun jetaote, Calileea coberenadoronein bana niha Erodesine jaun rene letoae Filato, nii bana nii Jerosaleeun turuhin niha nii Erodesine jaun. <sup>8</sup> Nitohaneein Jesoso letoaa Filatone jana coaraain jetaote, jataain rachoojoe Erodesi, cojoelanaacojoai ichaane coitucuhin, acaantonai Jesoso coarana jeretohane jana rene letoaauruhane jaun. <sup>9</sup> Nii

jaun jetaote, araai saain niqui, “Chatohaneein nenea neein,” naain caje bajaero Erosedi. Nejetaote, nere tonorana jerene Jesoso. <sup>10</sup> Nii nainiha jetaote, ecu neeure saseredotecuru curuaanaacuru, chaen Cana Coanera aitoonjoa que cacha relaaureaauru, naaonjoainuri, jataain acaauru esenetaain, Jesoso cairichaa Erosidine coina counujeein coulurujiha neeure. <sup>11</sup> Nitohaneein nere tonorana jereniha Jesusone jaun jetaote, coetaain rai soodarooru aina jiniinquiin nocoeje chanuhin jetao cairichaaain, nocoreeteeruha reychurune jaan tocohanai cajione que jetao Jesoso cajione corerate Erosedi. Nitohaneein tein jetaote, nacoaauneein Filato rene letoae Erosedi. <sup>12</sup> Nitohaneein Jesoso cairichaaauruhane bana caje coaauneein jetaote, ita que nejerateeriin neeuruhane baiha jetao, ita belaichaneein neeure Filato aina Erosesihuru.

*Jesoso atinaauruhane coina rucuhecuruhane*  
(Mt 27.15-26; Mr 15.6-15; Jn 18.39–19.16)

<sup>13</sup> Nitohaneein Filato rene letoaa Erosidine jana jetaote, saseredotecuru curuaanaacuru, chaen cocoinacaihuru, satiin ecu nenacaauru cachaauru, naaonjoainuri taojiaain jetao:

<sup>14</sup> “Inarate canu rene caa cacha turuaa uhiche, ‘Cachaauru suujua reroecaain jete, cachaauru suujua auhacae,’ naain coulurujeein. Nena caraa-jenihane inara acatiha tein caje bajaunune janate, nii chatohaneein cotainacai ichaain, nii coulurujeeeichene jaa lera coitucuneeun. <sup>15</sup> Niheichu caa cana rene jelaiha letoaera Erosedi nihanatiin, nii chatoanai ichaane jaa lera coitucuhi. Aihane jaun inae coaraquiche inara, nihei nii chatoaneein cairichaaain ateinaacachene jaan lera. <sup>16</sup> Raujiaainchane casetecaain nii baiha jianereunni, <sup>17</sup> Fasocaa beseta naineein niha coulurujuenojoine, nirijieein jianenajaaoncaanne rijijieein,” naa acaauru rai Filatone jana jetaote,

<sup>18</sup> satiin ita rijitiin jachaatorohaain jetao:

“Jiaohine. Jiaonriha nii Jesoso jianeeinera. Nii Barabasi jianeeujian laenra,” naaure jetao Filato rai Jorioocuru.

<sup>19</sup> Nii Barabasi jetaote, caresero cuhane enohaaure, nii neseu Romanocuru que nejerateein, acaauru aina sonaana que neein leinjiin cacha sohin jaohane coreniha. <sup>20</sup> Nitohaneein nii chatohaneein Jesoso cairichanaa jerenihane jaun jetaote, nirijieein jianihane coina jetao niqui, nacoaauneein acaauru rai ere Filato. <sup>21</sup> Nejetaote, jataain tonijiaain jeelai rutaain jachaatoroaain jetao:

“Letonanocoriin coroso que teute ecu neein ohinera,” naaure jetao ita rijitiin.

<sup>22</sup> Niritocuruhane jaun jetaote:

“Chatohanai baasonajian ichae. Coatiha cairichaaain atinaanune coina chatohaneein baaso ichaain nihane coarahaan canuta. Raujiaainchane casetecaain, nii baiha nirijieein jianereunnicha,” nae jetao acaauru rai Filato nichata saain.

<sup>23</sup> Niritoha acaauru raine jana jetaote, jachaatoraaain ehequuin jetao, “Coroso que tihachaaura,” naauruha araai saaine cotabenihaha jetaote, <sup>24</sup> nii aitocuruhane rijijieein jetao ichae Filato. <sup>25</sup> Nitohaneein jetaote, nii Romanocuru que nejerateein sonaana que neein sonajaain joaera caresero cuhane nenea, acaauruhacha jianeratei cacha mitaain jetao acaauruhacha jerei rijijieein jetao, acaauru bijihu Jesoso te Filato.

*Coroso que Jesoso teeuruhane*  
(Mt 27.32-44; Mr 15.21-32; Jn 19.17-27)

<sup>26</sup> Nii jaun jetaote, coroso que Jesoso teeuruhane coina, amaauruhane jana, situujiha cuha leinjiin cacha Sirene caje unaa Simoonne jaun jetaote, cotijiaain que nii Jesoso teeuruhane jaanu coroso baijiaeratecure. Nii jaun jetaote Jesoso caaijie, nii coroso teeuruhane jaanu amae. <sup>27</sup> Nitohaneein amaauruhane jana jetaote, arajii enecuru, quichaauru, naaonjoainuri jetao, caaijie cuure. Nii caaijie cunacaauru jana cunacaauru enecuru jetaote, cojioriin chanaaure Jesoso coinaderaa. <sup>28</sup> Nii chanaauruhane jana acaauru coaraain jetaote:

“Jiaonriha cacoreniha chanaaichenera Jerosaleen benecuru. Inara bereecuru, inara jaberoco, naaonjoain coreniha chanaauchera. <sup>29</sup> Inae nerichaain inara cairichaauruhane jaan cojoanonaa. Nii banate: ‘Caohatoriha canaanai sirilanaala nihacachene niqui,’ nariquicheein. <sup>30</sup> Nii banate ichatane ecuunooru rai, ‘Canacaanu ichoae neranuu,’ naa cuurureein cachaauru. Jana atane rarororooru raite, ‘Canacaanu asihu,’ naaurureein. <sup>31</sup> Coaracuche nachuhinti chatohanai baaso ichaain nenihanune sainejeein catohaneein caetecuruhane. Nii jaun chatohaneein teeinti inara teeurureein inae amuhanune baiha,” nae jetao acaauru rai Jesoso.

<sup>32</sup> Nii Jesoso jiniichaain jetaote, coroatajaain necha aansai baaso icharaauru cachaauru amaaure, sohin ateinanajaauruhane coina. <sup>33</sup> Inae nii “Couturi Bejero” neein acaauruhacha curuaateihu turuhin jetaote, coroso que Jesoso aina jiniiquiin nii coroatajai necha aansai baaso icharaauru teure. Leinjiin jetaote, Jesoso najaabiji nichajai que teure. Jana leecha jetaote, raotono nichajai que teure. <sup>34</sup> Nitohaneein coroso que teeuruhane jana jetaote:

“Caa catohaneein caetecuruhane coreniha, acaauru que ii suujua acateura Ofa, cha coitucuurenihane jaunte aihurera,” nae jetao Jesoso. Nii jana jetaote, ecu nejesinajeein ita rai Jesoso cajione chaluure soodarooru. <sup>35</sup> Nitohaneein teeuruhane jana jetaote, ecu neein coarajeeure cachaauru. Nii nainiha jetaote, cocoinanacaaihuri netonai:

“Chajaain aihane ena esinae rauhijiriin Cana Coaunera tenojoi Mesihaseinein niicha janijiineein nihane, raajenhane rai jaberoco ichoteratemiin leechaauru ichoteratihane rijijieeinte coaracaachera,” naaure jetao nechu jataain cairichaa que ninichajia.

<sup>36</sup> Nii jana soodarooru netonai jetaote, Jesoso que ninichajeein nechu jataain cairichaa rohan nichuutaacoaain jetao, bino elorajiojoaain nena que jetao cocoaain:

<sup>37</sup> “Aihane esinae rauhijiriin Jorioocuru rai *Rey* neeine, ichaajenhane ijiabereeo ichoterateeune coaracaanura,” naaure jetao rai.

<sup>38</sup> Nitohaneein coroso que teein jetaote, rai bichoeniha teein jetao: “Caate Jorioocuru rai *Rey*neein ne,” naain laenacure.

<sup>39</sup> Nii jana nii necha aansaineein coroso que nena cacha coroataja jetaote, nechu jataain cairichaa cotaiha jetao:

“Aihane esinae rauhijiriin Mesihaseineine, ichaajenhane ijiabereeo ichoterateeute coaracurumiin, chaen canacaanune maajeein ichoterateeune coaracaanura,” naane jana jetaote: <sup>40</sup> “Coa niritoha. Tana ichasetecarichaaain Cana Coaunerane coasiine. Itonai rijijieein caseteconeein neenatiinachura aitohite. <sup>41</sup> Canatejian esinae rauhijiriin itolereneein baaso ichacaane coreniha necairichaecaa cau. Jana caa cacha, nii chatohanai baaso ichaain nihane coreniha caa aihei,” <sup>42</sup> naane baiha jetao:

“Canu coaucuhin ii Cojoanonaa que neeine banara Jesoso,” naa nii baaso icharaauru coroso que nena leechane jana jetaote:

<sup>43</sup> “Enete esinae rauhijiriin raotojoein ichaonaana jaun caniha neriquincha,” nae jetao rai Jesoso.

*Oha Jesusone*

*(Mt 27.45-56; Mr 15.33-41; Jn 19.28-30)*

<sup>44</sup> Nitohaneen inae ohane rai niha Jesusone jana jetaote, enoto chujutora caje coauneen jetao, caohachanainejeein nocoenaneen nedae satiin chau-ratane, nuna macohi ichoae teejiha enotonereetiaain.

<sup>45</sup> Nitohanihane jana jetaote, neleruhin nesoaihacoae nii Teenforo leruera cajione, ecu bujuaneen nena.

<sup>46</sup> Nii jana jetaote, jataain tonijiaain auhaquiin jetao:

“Ii bijihune canu suujue teeunra Ofa,” naain jetao inae ohe Jesoso.

<sup>47</sup> Nii jana ecu beraiha nenacaauru Roma rai sondarooru cafitaain jetaote, Cana Coaunera corojeein jetao:

“Esinae rauhijiriinte, nii chatoanai baaso ichaain nenecaiha caa cachara,” nae jetao.

<sup>48</sup> Nitohanihane jana ecu satiin neen coarajeeurera cachaauru jetaote, nesoone caun rai nalarijia faojoaain jelai caje cauhacoaure. <sup>49</sup> Nejetaote, satiin nii Jesoso coitucuurerauru, chaen Calileea caje coauneen sacuurera enecuru, naonjoainuri jetao ecu neen coarajeeure jelai caje amuelanaala nita netiin.

*Ajeri jachu cuhane Jesoso jaberoco rucuhecuruhane*

*(Mt 27.57-61; Mr 15.42-47; Jn 19.38-42)*

<sup>50-51</sup> Nii jana jetaote, ecu ne leinjiin cache Jodea batane que nena Arimatea cocoaichaneen nena Jose. Aca jetaote, caohacha cachaneen, satiin Jorioocuru rai nelateen Jorioocuru coaraneen nenacaauru- *Junta Suprema* tabaneen nihane sainejeein, turuha uha Cana Coaunerane Cojoanonaane cohajihane jaun jetao, nitohaneen nii Jesoso teeruha nii rai leeochoaauru *Junta Supremacurune* rautaaain coaraene. <sup>52</sup> Nii Jose jetaote, Filato caje Jesoso jaberoco bajaa cue, rucuhecane coina. <sup>53</sup> Nitohaneen bajaain jetaote, coroso caje fauhin jetao, shojoera que conajaain jetao, jaiti chuni onaa teurenihane jaan ichatane ramara que nena ajeri jachu cuhane jetao rucuheca cuure. <sup>54</sup> Nitohaneen jetaote, inae nunuheneelalajiha nebetacanaa cojoanonaane jaun, inae niicha ichanenu ichana nainecuruhane nainejeein jetao, luhecaain nii Jesoso rucuhecure.

<sup>55</sup> Nitohaneen Jesoso jaberoco rucuheca cuuruhane jana jetaote, acaauru aina cuure Calileea caje coauneen jiniichaain unacaauru enecuru. Nitohaneen cuhin jetaote, caohachaaain rai jaberoco rucuhecuruha ajeri jachu cuhanene coaracure. <sup>56</sup> Nitohaneen ajeri jachu cuhane rai jaberoco rucuhecuruhane jana caohachaaain coaracuruhane baiha jetaote, nenajaun cauhin jetao, meetoon rijijieen jujuaain nena ichacuruhane nainaain jetao, Quiricha inoansi cuhane aitoaha Cana Coaunerane rijijieen, nebetacanaa cojoanonaa bana nebetacaure nii enecuru.

## 24

*Oo caje ichanaa Jesusone*

*(Mt 28.1-10; Mr 16.1-8; Jn 20.1-10)*

<sup>1</sup> Nitohaneen nebetacaauruhane cojoanoo janohetiin jetaote, nii teeruhane jaan ajeri jachu coaraa cuure nii acaauruhacha ichai jujui amaain nii enecuru. <sup>2</sup> Ecu turuhin coaracuruhane jana jetaote, elonano hi ne nii ajeri

jachu fuuruhane jaa ajeri jaberoco. <sup>3</sup> Nii jana enohin coaracuruhane jana jetaote, inae ecu Cana Curuaanaa Jesoso jaberoco eruurene.

<sup>4</sup> Nii jaun jetaote, niicha ichanenu coitucuelanaala nesooneetooruhane jana jetao, somaratohanai que cajonequiin, ecu luhecotariin acaauru aina ecocohin temeenete coroatajai catcha. <sup>5</sup> Nii coaraain jetaote, nesoone caaun, suujua acatecuruhane coaratiha nenoracaauruhane jana jetao:

“Chanuna onacaauru jana, ichaohin nena ariiche inara. <sup>6</sup> Inae ichanaane jaun, coatihau caui nihei. Tana Calileea inara aina nihane bana inara rai: <sup>7</sup> ‘Acaihaniji cachaneein nejanohanaaneein nenaate, necha aansainein ichaonacaauru rai tenojoinnein niha cureein. Nii janate coroso que tein ateinaa cuurureein. Nete nichata janohane cuhane ichanareein,’ narejeto-ha inara raine que nainaquicheneta,” naaure jetao ecu ecoonacaauru catchaauru.

<sup>8</sup> Niritocuruha acaauru raine que nainaan jetaote, acaauru rai aitoroae-toha Jesusone coaacure. <sup>9</sup> Nitohaneein inae nainaan, nii atane bana caje jelaiha cauhin jetaote, jitariin nii acaauruhacha coarai biha jetao cuure lechoonca leinjiin afosotooru rai, chaen satiin acaauru aina nenacaauru catchaauru, naaonjoainuri rai. <sup>10</sup> Nitohaneein coaraain afosotooru rai biha cunacaauru jetaote, Maadala bene Mariha, chaen Joana, chaen Saantiaao neba Mariha, chaen leeochoaauru enecuru acaauru aina cunacaauru, naaonjoainurine. <sup>11</sup> Nitohaneein turuhin beeuruhane jana jetaote, acaauru esenetana jerecurene afosotooru. <sup>12</sup> Nejetaote, nii acaauru esenetaaurenihane sainejeein soroneein jelhariin cuhin turuhin, nii atane bana cuhanai coaraa Fedorone jana jetao, nii conaacuruhane jaa shojoeraacha ecu codoheque. Nitohaneein shojoeraacha eruhane jaun jetaote, jataain cojelatiin jelaiha nenaanajaun cauha cue Fedoro.

*Emaoso nese coero cuhane cuuruhane*  
(Mr 16.12-13)

<sup>13</sup> Nii bananeein jetaote, enoto chujutora rijiu fautaain amunaanaja itanejeein nii Jerosaleen caje nena Emaoso neseu jetao, cuure coroatajai Jesoso aina nerelanacaauru. <sup>14</sup> Nitohaneein Jesoso ateinaauruhane que ereerejeein bero cuhane cuujeeuruhane jana jetaote, <sup>15</sup> jaiti que ereerejeeuruhane jana, acaauru rohan nichuutaain jetao, acaauru aina bero cuhane cuujue Jesoso. <sup>16</sup> Nejetaote, acanihanee coitucurene, acanihanee coitucuuruhane jereniha Jesusone jaun. <sup>17</sup> Nitohaneein jetaote, acaauru rai:

“Chaaquena bero cuhane ereerejeein cuujueeiche,” naa acaauru rai Jesusone jaun jetaote, ecu inaderatonanaain inacuhin jetao:

<sup>18</sup> “Ii netonai Jerosaleeun neeinatiinna: ‘Naaonjoain ichacuruha caa janonaacha cuhanera,’ naain coitucuneeite,” naain tonoraa nii bero cuhane cujuenaa coroataja Cureeofasine jaun jetaote:

<sup>19</sup> “Chatohaneuruhanaate aitohi,” naane jaun jetao:

“Nasarete cocoaicha Jesoso, satiin catchaauru notaracae nere que irihane naitoonjoan ichaain, itolere que laraajiin Cana Coauneraacha letoai *profetanein* nihanatiinte <sup>20</sup> Romanocuru rai coulurujueure saseredotecuru curuaanaacuru, chaen cana rai cocoinanacaihuri, naaonjoaihunri, coroso que tein ateinaauruhane coina.

<sup>21</sup> Canacaanune niqui, cairichaerinojoinnein neeuruha Israeli cocoaicha nichaachene ichoteratihane cohajihacaanu. Nete inae nichata janoha nitohaneein ateinaauruhane saijieein, <sup>22</sup> canacaanu aina nenacaauru enecuru tabaauru, janonaa aonain cuhin natane bana coaraa cuuruhane jana, <sup>23</sup> ecu Jesoso jaberoco eruurenihane jaun, jelaiha nenaanajaun cauhin canacaanu

rai beein canacaanu socoinaure. Acauru rai ecocohin jete: ‘ “Coatiha cau nihei Jesoso jaberoco, inae oo caje ichanaane jaunta,” naaunre anjer-  
aauru,’ naain beure. <sup>24</sup> Niritocuruha turuhinne jaunte, canacaanu caje  
nenacaauru tabaauru netonai cuhin, nii atane bana coaraa cuure. Nii janate  
chuhisi, nii aitocuruha enecurune rijijieein, inae ecu nene Jesoso jaberoco.  
Niheichu nii Jesoso nihanatiin coaracuruhi,” nae jetao rai Cureeofasi.

<sup>25</sup> Niritohane jaun jetaote acauru rai:

“Chanuna cha esenetana jerelanaala, nii aitocuruhalu *profetacurune*  
coacuhin esenetana jereneeiche. <sup>26</sup> Tana jauriaanejeein dedeeu cusihane  
ajiniha, catohaneein necairicharichaaain Mesihazine coitucuhicheneta,”  
naane baiha jetao, <sup>27</sup> Moisesa quiricha caje coauneein nunuheteein je-  
tao, que aitiin laenacuruhalu *profetacurune* beebejeein jetao, acauru rai  
ereereje Jesoso.

<sup>28</sup> Nitohaneein nii cuuruhane jaan, Emaoso neseu turuuru jana jetaote,  
rauhijiriin situujiha cunaa rijijieein cuujue Jesoso. <sup>29</sup> Nejetaote:

“Cauna canacaanu aina nesuruure. Inae jataain sohane jaun nocohejia  
natiin,” naain jetao chunaure. Nitohaneein chunaauruhane jaun jetaote,  
ecu acauru aina nesurue Jesoso.

<sup>30</sup> Nitohaneein acauru aina nesuruhin jetaote, lenonecuruhane coina  
nelauriaauruhane jana jetao, faa teberiaain Cana Coanera bajaane baiha  
jetao, acauru rai beeunebeeuneein te. <sup>31</sup> Nitohaneein faan tihane que  
nainaaain jetaote, Jesoso nihane coaraain acanihane coitucuuruhane jana  
jetao, inae acauru caje jianatoroaaain amue.

<sup>32</sup> Nitohaneein jianatoraaain amuha acauru cajene jana jetaote: ecu jelai  
nedaain ita rai nejesinajeein,

“Esinae rauhijiriin acanihane jaun jiara bero cuhane ujuueein, ereerejiha  
Cana Coanera Quiricha inoaensi quene jana, aca netoojoaain naonae cana  
suujua cuhanaina,” naaure jetao ita rai.

<sup>33</sup> Niritocuruhane baiha jetaote, caeneenejelanaala jelaiha bero cuhane  
soroneein cuhin Jerosaleen, ita taojiaain neeuruha lechoonca leinjiin ne-  
nacaauru afosotooru aina acauru leeochoaurune jaan cauha cuure. Inae  
nii Jerosaleen nenacaauru rene turuuruhane jana jetaote:

<sup>34</sup> “Esinae rauhijiriinte inae ichanae Cana Curuaanaara, Simoon raite inae  
ecocoera,” naain jetao acauru rai beure.

<sup>35</sup> Niritocuruha acauru raine jana jetaote, bero cuhane acauru rai net-  
onai ecocohin acauru aina cuujihane beein, acauru aina lenoneein faan  
teberiaain, Cana Coanera bajaain acauru rai tihane que nainacuruhane  
beure jetao nii acauru ajiniha netaojiaain nenacaauru rai, nii coroatajai-  
huri Emaoso coero cuhane cunacaauru.

*Aina nerelanacaauru rai ecooca Jesusone*  
(Mt 28.16-20; Mr 16.14-18; Jn 20.19-23)

<sup>36</sup> Niritiin acauru rai bero cuhane ecoocane que jaiti ereereecuruhane  
jana jetaote, luhecotariin acauru cataaun neeoritiin:

“Raotojoeein neeuche,” naa acauru rai Jesusone jaun jetao: <sup>37</sup> “Rai  
corii jecha coaracure,” naauruhane jaun jetao jataain nesooneetore.

<sup>38</sup> Nitohaneein nesooneetooruhane jana jetaote:

“Chanuna jataain nesooneetohiche. Chanuna nainanacharanejeein, baa-  
soneein inara suujua cuhane coaauquiche. <sup>39</sup> Cacoiiichuru, catihacuru,  
naaonjoaihunri coaracuchenachuhiti, jeelai cajabereeeoneeinte neeure caa  
cajabereecuru. Cajabereeo mucuhin cacoharaauche. Leinjiin onaa corii,



caa cacoaraaichene tocoaneein bucuhin, jaberoconein nichaauraain nena naineriheita,” nae jetao acaauru rai Jesoso.

<sup>40</sup> Niritiin jetaote, coroso que teein, rai tijia, biji, naaonjoain curuabaauruhane jaacuru coarate acaauru que. <sup>41</sup> Nejetaote, jataain esenetana jecurene, jataain cojoelatiin rachoojoeuruhane jaun. Nitohaneuruhane jaun jetaote:

“Tana cau enohalanohineein niha cau chelai lenone nijine,” naain acaauru caje bajaane jaun jetao,

<sup>42</sup> niha ate basichone jaun, rai teeuruhane jaun jetao, <sup>43</sup> ecu acaauru notaracae netiin que lenone. <sup>44</sup> Nitohaneein lenonihane baiha jetaote acaauru rai:

“Caa catohaneein caetecuruhanene quene inara rai berejetoonu, jaiti canu atinaaurenihane jana inara aina nihanune bana. Inae catoaneein caetecuruhane coina, rai quiricha cuhane itolerenein caque aitiin laenaalu Moisesane nainaan, chaen aitiin quiricha cuhane laenacuruha *profetacuru*, Salmo naaonjoain cuhanene rijijieeine inae nainaan,” naa acaauru raine baiha, <sup>45</sup> Cana Coanera Quiricha inoansi cuhane aitoane rijijieein acaauru que coitucuhateein jetaote:

<sup>46</sup> “Laenanohineeinte ne, canu Mesihasi nichaanne ohanune baiha, nichata janohane cuhane ichanacaanne que. <sup>47</sup> Aihana jaun, canuhacha cocoinanohineein Jerosaleen caje nunuhetein, satiin atanecuru sacuritaain cachaauru rai, ‘Esinae rauhijiriinte, coreniha ichoteratenohineein nerichaachein,’ naain beeuchete, nacoaannein Cana Coanera coacuhin suujua corein neeuruhine acaauru osa caje acaauru ichoteratiha Cana Coanerane coina. <sup>48</sup> Inarate caa ohanune caje ichanacaanne coaraneein neeiche. <sup>49</sup> Canune inara rai Ofa aitoonjoalu tereunni. Aihane jaun, jiaonriha caa Jerosaleen caje amuhiche, laraajiin neeichene jaanu dede caje unaa raaichene reetihaaineta” nae jetao acaauru rai Jesoso.

*Dedeeu cauha cuha Jesusone*  
(Mr 16.19-20)

<sup>50</sup> Niritoha acaauru raine baiha jetaote, Jerosaleen caje amanajaain jetao, Betaniau turuanajaain, ecun biji sijirichain jetao acaauru cojiotae. <sup>51</sup> Nitohaneein acaauru cojiotaain coroaenacane baiha jetao, inae dedeeu cauha cue, ecu acaauru ratiriin. <sup>52</sup> Nii jana jetaote, ecu Jesoso coroaecuruhane baiha, jataain rachoojoein jelaiha Jerosaleen cauha cuure. <sup>53</sup> Nitohaneein cauhin jetaote, itolere bana Teenforo asae Cana Coanera coroaerejetecurelu.

## Joanacha laenai Ena Nenea Cana Coaunera Ere

### *Cana Coaunera Ere*

<sup>1-2</sup> Jaurianejeeinte nenea ne caa Erenaa.

Itolere, dede, cana rai chauratane, naajoain coaunaa Cana Coaunerane ajiinihate nelu caa Cana Coaunera Ere, jelai Cana Coauneranein.

<sup>3</sup> Nii jelai Erenaa quete itolere coauneratelu Cana Coaunera. Nihei nii colane necoanaain nei.

<sup>4</sup> Nii Erenaaate ichaonaa teraneein ne.

Nii ichaonaa teerate, cacha cononeein ne. <sup>5</sup> Nii Erenaaate, cononeein nocohena conaeranein ne. Jacatiasihei nocohena tabai.

Charijieein teinti cana rai chauratane conae caa enoto. Nii rijijieinte cacha suujua conae nii Erenaa. Amuritonaa nainesihei nocohena tabai.

<sup>6-9</sup> Inae chauratane que turuelalajia nii cono esine, satiin cachaauru conoeranune janate, Joaan letoae Cana Coaunera, nii cono que ereerejeein cachaauru relaane, aonaain esenetaain coitucuuruhane coina.

<sup>10</sup> Nii Erenaa quete, chauratane coaunerate Cana Coaunera niqui. Nete cajia chauratane que turuhane jana coitucurene caa chauratane que nacaauru, niicha counanohineein neeuruhane saijieein.

<sup>11</sup> Caa niicha counai chauratane que turuhane janate, que jaolequuin raurene cachaauru. <sup>12</sup> Nii janate, atiin raain esenetaaure coroatajajei cachaauru. Nii corenihate, calaohi raane rijijieein acaauru rae Cana Coaunera. <sup>13</sup> Joaereein cacha calaohi rijijieein nihei inae Cana Coaunera ere esenetaane cacha. Rauhijiriinte Cana Coaunera calaohi rijijieein nereein nii Erenaa esenetaane.

<sup>14</sup> Nii Erenaaate, cachaneein nejanoain canacaanu aina ichoae. Nii jaunna aina amuemujueein coaracaanune jaun, leinjiin acaihanejeein Cana Coaunera Calahineein nihane coaracaanu canacaanu nota que, jerichanejeein Cana Coaunera rijijieein chabana nohanelanaala rauhijiriin canacaanu belaihana jaun. <sup>15</sup> Nii janate, turuha uhane jana: "Taa quenara aitonajacoonra, 'Canu caajiete turuha ureein canu ajiniha nenaara,' naain aitonajacoon," nae Joaan, nii Erenaa cojoeluhin.

<sup>16</sup> Inetono janonaa banate, satiin cacha belain cana coroatajane nii Erenaa.

<sup>17</sup> Moisesa quete rai naitoonjoan berateein laenaeratelu niqui Cana Coaunera. Nete tonoraarene cachaauru. Nii natiinte, atiin cachaauru belaiha ichaonaa rauhi que cachaauru relaane coina turue Cana Coaunera Calaohi Jesocurisito, nii cacha relaana jaan ichaonaa rauhi raauruha cachaaurune coina. <sup>18</sup> Chabana Cana Coaunera coaracuruhi cachaauru niqui, nete inaca Cana Coaunera coitucuhane jaun, nii inaca que cana relae, acaihanejei Calahineein nihana jaun.

### *Turuha urichain Jesocurisitone beebejiha Joaan- cacha coujunacaterane*

<sup>19</sup> Joaan renete batirichuru letoaaure nii Jerosaleen nenacaauru bichauhenaauru: "Chaneeita," naain Joaan caje bajaauruhane coina.

<sup>20</sup> Inae Joaan rene turuhin bajaauruhane janate: "Curisito nihaunta," naain rauhijiriin tonoranaaca Joanne jana:

<sup>21</sup> "Chaneei najian. Cana Coaunera ere bera Eliasineeina," naain coaiteen bajaauruhane jana:

"Aca nihaunta," naain coaiteein tonoranaaca Joanne jana:

“Aca neneeina jaun, chaneei najian. Nii turuha niicha jerecuri canacaanuhacha cohajei Cana Coaunera ere beranecaai,” naauruhane janate:

“Ahan- aihei, aca nihaunta,” naain tonoranaaca coaiteenne jana:

<sup>22</sup> “Chaneei najian. Beeinete ne, bihacaanu canacaanu letoaurera raine coina. Chatoanai icharaneei najian,” naain bajauruhane jana:

<sup>23</sup> “Canu quetejian, nerichaaain leinjiin cacha, cacha areeroo cuhin ee-heeheejein cacha cotiaranura: ‘Turuha cana curaanaane jaan coero rau-jiauchera, naain beranura,’ naa Isaihasi najaan nichaaunra,” naain biha Joanne jana:

<sup>24-25</sup> “Chanuna jana chaen, acau que cachaauru coujunacateei, nii canaacha cohajei Mesihasi neein, niheichu Eliasi neein, niheichu leeochoa Cana Coaunera ere bera- *profeta* neein, naaonjoainuri neein nenaalanaala,” naain bajaauruha nii fariseeocuru letonocurune janate:

<sup>26</sup> “Acauhanau teenne canu, cachaauru cojunacatiha baotisanajaaun. Inae turuha urichaaain canu caaijie inaraacha coitucuhi cacha. <sup>27</sup> Canu caaijiete turuha ureein, nii inoaelu nena cacha- jataen canu amuritoeriin cocoainanacai,” naain acaauru rai be Joaan.

<sup>28</sup> Nitohaneeinte, Jorodaan jeraniha nena Betabarau niha Joanne jana, Jerosaleen caje uhin Joaan rene turuhin bajauruhane janate: “Canuna laen cacha areeroo eeheeheejein cacha cotiaraneein neeunra,” naain acaauru rai be Joaan- cacha coujunacatera.

### *Cana Coaunera carenero narejeen*

<sup>29</sup> Nii cojoanoote, tajia uujiha Cana Coaunera Calaohi Jesusone jana coariin: “Notara Cana Coaunera carenero narejeenta. Taate itolere caa chauratane que nenacaauru cachaauru caje osa itajeranu que oha cureeinch. <sup>30</sup> Taa quenara aitonajacoonra, ‘Canu caijiete turuha ureein nii canu ajiniha nena cacha,’ naain aitonajacoon. <sup>31</sup> Inae niqui inoaelu caje coauneein nesianiha niqui, nete caa cacaijie turuha uhe. Canu netonaichu coitucuhaunlu jauriaa nejein. Jianacoo cana mitaeraunu que Cana Coaunera letononeein nihane coitucuhaunlu. Nena laen inae ena coitucun, carai biha caletoerana jaun. Israeli cocoaichacuru que coitucueratihanune coinate, carai beein caletoae caletoera. <sup>32-33</sup> Osa caje cana mitaeranu que letononeein nihane coitucuhaunlu niqui. Nena, ‘Leinjiin cacha choaae fauha uha serori rijijiein Cana Coaunera Suujenete, Cana Coaunera Suujue que coujunacatihate aicheeinha,’ naain carai biha caletoerana jaun, choaae fauha uha dede caje serori rijijieeine coaracaunna jaunna coitucun. <sup>34</sup> Nii jaunna, ‘Acate Cana Coaunera Calaohi inecaihara,’ naaun, nitoaniane coaracaunna jaun,” naain be Joaan.

### *Ichoaechania Jesoso Ere tonoraerauru*

<sup>35</sup> Nii cojoanoote jelaiha Betabarau coroatajai nere tonoraerauru Simoon Fedoro ocoala Aanderesi, chaen canu, naojoaain nihacaanu Joaan ainane jana, <sup>36</sup> situha uhe Cana Coaunera Calaohi Jesoso. Nii janate: “Taa Cana Coaunera carenero narejeen coaracuchera,” naain biha Joaan canacaanu raine jaun, <sup>37</sup> Cana Coaunera Calaohi Jesoso coariin caijie cuhacaanu. <sup>38</sup> Nitohaneein caaijie cuhacaanune janate, jaotoraain canacaanu coariin:

“Chate ichaquiche niriirijieeinta cachaauru,” naa Cana Coaunera Calaohi Jesoso canacaanu raine jana:

“Chute neei aaita cacha relaera,” naacaanune jana:

39 “Chajauchetejian coanicha,” naain canacaanu amaane jana, inae enuna macoijiu teejia enotone jaun, cuu aina sonafaacaanu.

40-41 Nii baihate, nihana Simoon Fedoro ariha cue nii Aanderesi. Ariin, ruhin: “Inae canaacha cohajei jianacoon cana mitaeranu que- Cana Coaunera letono Curisito eruhacaanura,” naain nihana Simoon Fedoro rai biha cue Aanderesi.

42 Nii baihate, Cana Coaunera Calaohi Jesoso rene, Simoon Fedoro turuaa uha Aanderesine jana, Simoon coariin:

“Jonasi calaohi Simoonnee niqiu, nete Fedoro nereein ichurujuara,” naain Fedoroneein curaate Cana Coaunera Calaohi Jesoso, aca laraajiin nere beraneein nerichaine coitucuhana jaun.

### *Ferifi aina Natanaaeli cotihaca Cana Coaunera Calaohi Jesosone*

43-46 Nii cojoanoote Calileea batane que cuna jaaun, Ferifi aina itaque tacauruhana jaun: “Caniha neorihura,” nae Cana Coaunera Calaohi Jesoso, Ferifi rai.

Fedorooru nese Betesaaida caje unaa nii Ferifi netonai.

Niritiin cotihacane jaunte, Natanaaeli ariha cue Ferifi. Ariin, eruin: “Inae turuha nii Cana Coaunera Quiricha Inoasi cuhane turuha uha niicha jerecuri eruhacaanura. Nii cacha- canacaanuhacha eruhite, Jose calaohi-Nasarete cocoaichanera,” naain biha Ferifi, Natanaaeli raine jana jetaote:

“Chaquete nelatere Nasarete cocoaichata,” naane jana jetao:

“Chajaachaautejian coanicha,” naa Ferifine jaun, Ferifi jiniichaain uhin turuha uhe.

47 Nii janate, inae rohan nichuuntaa Natanaaeline jana: “Nocoa inae uha Israeli cocoaicha esine- coritanacae lanaala nenaara,” naa Cana Coaunera Calaohi Jesosone janate:

48 “Inasiinte cacoitucuhita. Cacoitucuhi inachute,” naane janate:

“Eejeen- aihanura. Ii cotihaca uha Ferifine ajinihanna inae ii coitucuun. Nii uheraneein curajaain enuha asaae neeine janana, ichoharajeeunra,” naane janate:

49 “Iite Cana Coaunera Calahineein canacaanuacha cohajei Israeli cu-raanaa Rey neeicha cacha relaera,” naa Jesoso rai Natanaaeline jana:

50 “Nii uhera asaae neeine coaracaunne que aitocoauune najaanchana canu esenetaai. Inae jataain nii amuritoeriin coariquiinha. 51 Rauhijiriina aitoonra. Inae neyoracaa dede bacujuane janate inaraacha cohajei Cacha Calaohi nichaunne choae fauhin, jelaiha iniha cuuruha Cana Coaunera letonocuru aanjeraurune coariquiinha,” nae Cana Coaunera Calaohi Jesoso.

## 2

### *Nisirihatiha cachane beseta*

1 Nii baihate nichata janohi catiariin Calileea batane que nena- Canaau neein curajain nena neseu ne nisirihatiha cachana jaan beseta.

Nii jaunte, cuu nii beseta bitoaa cue Cana Coaunera Calaohi Jesoso neba.

2 Nii janate Cana Coaunera Calaohi Jesoso netonai cotihacure nii beseta que, aina nerelanacaauru aina cuhane coina.

3 Nitohaneein inae nii beseta que neeuru jana jetaote, inae saa binone jana: “Inae nihei binota,” naain Jesoso rai biha nebana jaun:

4 “Saan. Chanuna niriitohi caraite oma. Inasiina jaiti turuha canu amiha- neeon nunuhetihanune jaan cojoinaca que ne coalanaala,” naa neba raine janate:

<sup>5</sup> “Chajaaincha naitoojoancha ichacuchera,” nae nii cuu bino chaluurera rai Jesoso neba.

<sup>6-7</sup> Nii janate cuu ne Jorioocuru rai saotaneein baichaje tabaanaain- atane caje ichanohineein, Cana Coaunera notaracaae biji culejeein itolere acaauru lenonecuru culejeein ratirihuruhana jaanu que jesinaaeca teeuruhana jaan.

Nii jaunte: “Caa cuhane acau raain teeuche nainecolijiaanaaincha,” nae Jesoso nii bino chaluurera rai.

Nii le baichajete baichaje seejoan cuhane coroata baichajihanaai curu-juae.

Inae nii baichaje nainecolijiaanaain acau raain, teein beeuruhane janate: <sup>8</sup> “Soriin amaain, taa beseta erora cocoanhura,” naa Jesusone jaun, soriin amaain nii beseta erora cocoaee nii acau chaluurera.

<sup>9</sup> Nii janate Cana Coaunera Calaohi Jesusohacha rotoi nihane coitucuelanaala coe nii beseta erora. Acaihanejein nii acau raureraachate coitucure.

Nii jaunte nii bino cohin aonaain: <sup>10</sup> “Raotoha caa bino,” naain, “Chajatauraa,” naain, nii ene ranaa jerera cotijiain: “Raaotoha caa ii bino. Aihuruha leeochoaurune rijijieein, bino caohacha que nunueteen cana cocoaerate lanaalate aaita. Taoniin nunueniha canaacha coi amuritoeriinte raaotera,” nae nii beseta erora, nii ene ranaa jerera rai.

<sup>11</sup> Nitohaneeinte Calileea batane que nenea nese Canaau, binoneein jesinaaeca rotoe Jesoso, esinae Cana Coaunera letononeein nihane coitucuruha cachaaurune coina.

Nii coaraaina, esentaacaanu aina nerelanaa nichaanune.

Nitohaneein nunuheteente, itolere cunaitenacaauru rautaain, itolere ichae Cana Coaunera Calaohi Jesoso.

<sup>12</sup> Nii baihane Caferenaanon cuha Jesusone jana, corianiha cuhacaanu, nejeraauru, neba, aina nerelanaa nichaanune naaonjoain, cuu neorihaacaanu inata janojoeine coina.

### *Jerosaleen nenea Teenforo caje necoretenacaauru sitaa Cana Coaunera Calaohi Jesusone*

*(Mt 21.12-13; Mr 11.15-18; Lc 19.45-46)*

<sup>13</sup> Nii janate Jorioocuru beseta Fasocaa que turuelalajihana jaun, turuha cue Cana Coaunera Calaohi Jesoso.

(Fasocaa besetate bitohaure Jorioocuru ajelanaala, nii Teenforo asaae. Cairichaaerinajaain niha Egipto curaanaane caje jianacoo mitanajaa Cana Coaunera najaan- cojoanonaaniha nii Fasocaa besetana jaunte, nitohaneein Fasocaa beseta cojoanonaa bana Teenforo asaae itataojiain Cana Coaunera coroajeein bajaure Jorioocuru.)

<sup>14</sup> Nii janate Jerosaleeun nenea Cana Coaunera rai ita taojiauruhana jaan loreri inoasi- Teenforo asaae necoretiha neeure Jorioocuru, itolere baca, carenero, serori naaonjoain que. Nii janate ecu jelai teein ne cachaauru rai coriqui coreeurera. Niite acaauru coriqui choae laurujua laurujuuruhane jana, <sup>15</sup> sicho coinori que rajirajinajaain, nii acaauru rai bacaauru, carenerocuru, naaonjoain aina curuaataain, acaauru sitaain, nii coriqui coreeurera rai coriqui riariae atane choae. Acaauru coriqui rori raatiin sieitiin, <sup>16</sup> chujuhecoha nii serori que necoretenaane jana: “Naain caa serorichuru amaachera. Coa caa Ofa Cana Coaunera loreri asaae necoretihachera,” naain sitanajae Cana Coaunera Calaohi Jesoso.

<sup>17</sup> Nii jaunte, “Jataain ii loreri beraihanunete ne,” naain aitosihalu Cana Coaunera Quiricha Inoasi cuhane nii canacaanuhacha cohajeine jaun,

“Aca caara,” naain canacaanu suujua cuhane Jesuso coarajiacaanu aina nerelanaa nichaanune.

<sup>18</sup> Nii jaunte sitanajaa Jesusone jaun: “Chatohanai jana ichaain canacaanu notaareei jana, esinae Cana Coaunera letononeeine coitucuhacaanune coinata,” naain Jesuso caje bajaauruha Jorioocurune janate:

<sup>19</sup> “Caa Cana Coaunera loreri chamuhitiin jaohichenena, nichata janojoeincha cuhane michureeunni nacoaauneeincha,” naane janate:

<sup>20</sup> “Inasiinte jenachoonca saota jaanacaain ichacuruhalu jetao natiin, iicha nichata janojoeincha cuhane michureeita,” naaure Joriocuru Jesuso rai.

<sup>21</sup> Rai jaberocohacha quete aite, nii Cana Coaunera loreri que ujuateein. Nii jaunte nichata janojoein ichanae Jesuso- oo caje. <sup>22</sup> Nii jaunte nichata janojoein ichanaane coaracaanune jaun, inae jauriaa aitosihana jaun, canacaanu suujua neeoritohana jaun, nii aitoha Jesusone esenetacaanu, Cana Coaunera Quiricha Inoaesi cuhane aitohana jaun.

### *Satiin cacha suujua coitucuha Jesusone*

<sup>23</sup> Fasocaa bana cuu Jerosaleeun neein, bacosacuru, maosacuru, urichosae, naajoaunri rautaane coaraante, Cana Coaunera Calaohi Jesuso esenetaacoaure arajii cachaauru. <sup>24</sup> Nete, “Najoaante chuhisi, esinae rauhijiriin quesenetaureeincha,” naene Jesuso, acaauru suujua coitucuhana jaun. <sup>25</sup> “Najoaauruha caa cachaaurura,” naain biha chuneine que airijiinte, cacha suujua coitucuhana jaun, sanein esenetanjaene Cana Coaunera Calaohi Jesuso.

## 3

### *Jesoso rene turuha Necodemone*

(Niha lelauriin Jorioocuru fariseeo neein curujaain. Niichurute, “Acaauruhachajete jataain leeochoauru amuritoheriin Cana Coaunera ere tonoraure,” naaure.)

<sup>1</sup> Leinjiin fariseeo Necodemo neein curajaain nenaate nii lelauriin Jorioocuru bichauhenaneein ne, acaauru rai jataain nelateineein. <sup>2</sup> Niite janotiin Cana Coaunera Calaohi Jesuso rene turuha uhe. Turuhinte:

“Eletoaa Cana Coaunerane coitucuhacaanura. Iite itolere bacosacuru aina cunaitenacaauru rautaeraneein neeicha. Nitohanai ichana nainiheijelai cacha Cana Coaunera colaneta, cacha relaera,” naa Necodemone janate:

<sup>3</sup> “Esinaena rauhijiriin aitoreeunni. Enacoaauneein nejanoaeniha cachane, Cana Coaunera aina jiniiquiin nena nainiheijelai” naa Jesusone jaunte:

<sup>4</sup> “Inasiina enacoaauneein nejanoare ichauhena. Inasiinte coaiten neba suuri cuhane neloroaain nejanoare ichauhena,” naa Necodemone janate:

<sup>5</sup> “Esinaena rauhijiriin aitoon. Nihei acau nejei, Cana Coaunera Suujue naojoain que coujunacatenoineniha cachane, Cana Coaunera Ere tonoraeraneein nena nainihein cacha. <sup>6</sup> Jana, cacha caje nejanoaante- jelai cachaneeinne. Jana, suujua culejeein caruruhin coriha Cana Coauneranete, Cana Coaunera cachaneein ne. Colane aihei. <sup>7</sup> Cana Coaunera Calaohi coitucuhin esenetaain nere tonorana jereraaurute nejanoaain Cana Coaunera cachaneein nereein. Coaa caa ichei caritocooaunne cojoaelatiincha caeneein aonajiha,” naa Jesuso, Necodemo rai. <sup>8</sup> Niritiinte, “Charijieein teeinti tiririjiin uha cujuanane, ‘Najojoain cajete uhera,’ naain coitucueenei. Niheichu ‘Cuute cuera,’ naain coitucuheneei. Nii rijijieein techu, ‘Najojoante cacha rai ichaonaa te Cana Coaunera Suujue,’ naain coitucueeneicha,” naa Jesusone janate:

9 “Chatohanihana,” naa Necodemone janate:

10 “Jataain Isaraeli cocoaicha relaeraneei inatiin, ta carihanai coitucuhine. 11 Esinaena rauhijiriin aitocooaanu, canacaanu nota que coaracaanune jaun. Nete, aitocooaanune esenetaeneeichera. 12 Caa cana rai chauratane que aitocooaanune esentaeneeine, chatohaneein jana dedeeu ichaonaa bihanune esenetareei.

13 Nihei chunei dedeeu iniin coara. Canuna laaen dedeeu nihanune caje uhin cau turuun cachaneein, itolere caa chauratane que nena cache rijijieein nihanune coina. Canuna Cache Calahineein inaraacha coha-jeineein neeun. 14 Charijieein teeinti, coata caje acano ichaain, enuha que nujuateein chujuraa Moisesane coitucuhi chachu natiin. Nii rijijieein techu, enuha que nujuateein Cache Calaohi nichaunne chujuraa cuurureein, 15 nitajenaachara nejeein nena ichaonaa raa quesenetaerane coina,” naain,

#### *Chauratane que nenacaauru belaitoha Cana Coaunerane*

16 “Jataain caa chauratane que nenacaauru cachaauru belaitoha Cana Coaunerana jaunte, acaihanejein calaohi nichaunne letoae caa chauratane que Cana Coaunera, nitajenaachara nejeein niha quesenetaain cacoitucurera cachaaaurune coina. 17 Coatiha cache casetecaanune coina calaohi nichaunne letoaa Cana Coaunera. Jianacoo osa caje cache mitaanune coinate, cau calaohi nichaunne letoae Cana Coaunera.

18 Nii Cana Coaunera Calaohi nichaunne esenetaa cachane, caseteco coarinaain. Jana Cana Coaunera Calaohi nichaunne esenetaaite, caseteconeein niha cureein, acaihanejein Cana Coaunera Calaohi nichaunne esenetaenihana jaun.

19 Cono rijijieeinne turuun caa chauratane que Cana Coaunera Calaohi nichaunne, cache conaeranu que niqui. Nete nii cono jerecurene nii Cana Coaunera Calaohi nichaunne esenetaauruhi cachaauru. Acaihanejein nocohena janaachate nena jerecure, nocohenaanau neein suujua coaraelanaala baaso ichacuruhane coina. Nii corenihate caseteconeein neurureein. 20 Baaso ichacuruhane coaracuruhane coataate, cono rohan nichuuntanaa jerecurene saain nii baasoneein nenacaauru cachaauru. 21 Jana caohachaaain ichaauruhanete, cono rohan nichuuntaaure, Cana Coaunera jerenohin ichacuruhane coaracuruhane coina,” naainte Necodemo rai aite Cana Coaunera Calaohi Jesoso raaje neque.

#### *Enacoauneinte Jesoso que ereereje Joaan- Cache Coujunacatera*

22 Nii baihate Jodea batane que cue Cana Coaunera Calaohi Jesoso, aina nerelanaa nichaanune aina, cuu inata janojoei nejeein neoriin, acauhanau cachauru tein coujunacatenajaain baotisanajaane coina. 23 Nii janate, Salim rohan nena Enoon, cachaauru coujunacatiha ne Joaan, cuu niha tabaain acauna jaun. Nii janate cuu turuhajeure cachaauru, acauhanau tein coujunacatenajaain baotisanajaa Joanne coina.

24-26 Inae Joaan enoaene lalajeeuruha caresero cuhane janate, acauhanau tein cachaauru coujunacateein baotisaa Jesusone jaun, ita cotaicha rijiitocure Joaan ere tonoraurera, leinjiin Jorioo aina. Nii baihate Joaan rene turuhin: “‘Cha,’ naau. Taolu ii aina Jorodaan jeraniha nenaalu leinjiin cache canacaanu rai iicha beebejeilute, enene acauhanau tein cachaauru coujunacateein baotisanajaa ne. Saainte inae aca ere tonoraure,” naauruha Joaan rai nere tonoraurerane janate:

27-28 “Saan. Jeriha Cana Coaunerane jaunte aihure. Inae inara rai rauhijiriin aitonajaaocaaun, ‘Coatiha Curisito nihaun,’ nanajaaocaaun. Canute

letoae Cana Coaunera nii beraanu que. <sup>29</sup> Charijieein teeinti, inae coma-sai raa cachane coroaje rai belaicha. Nii rijijieein inachu canu netonai coroajeeun, Cana Coaunera Calaohi Jesoso ere tonoraauruha cachaaaurune. <sup>30</sup> Aca ere tejian tonoraa cuurureein cachaauru, jelaichoae jauhecotojoeriin. Jana canu erete tonoraa cuurureein fautojoeriin. <sup>31</sup> Nii dede caje unaate, itolere cacha curuaanaa neein ne. Jana chauratane que nenea cachate, niicha coaraaicha coitucuujue. Jana aihei dede caje unaa. Itolere dedeeu nenea, itolere caa chauratane que nenacaauru, naojoainte coaraain coitucue. <sup>32</sup> Acate itolere niicha coarai coaraain be niqui, nete esenetaaurene caa chauratane que nenacaauru. <sup>33-34</sup> Jana esenetaa cachanete, esinae rauhijiriin aitoaha Cana Coaunerane coitucuha cureein, jelai Cana Coaunera Suujue que suujuecoha Cana Coaunera Calaohi Jesusone jaun.

<sup>35</sup> Cana Coaunerate, nii letono calaohi belaitohana jaun, itolere cacha curuaanaa nihane coina cocoinae. <sup>36</sup> Nii jaunte Cana Coaunera Calaohi esenetaera, nirijijieein nitajenaachara nejeein nenea ichaonaa raa cureein. Jana, nii Cana Coaunera Calaohi esenetaite nitajiha cureein Cana Coaunera casetecanohi neein,” nae Joaan- Cacha Coujunacatera, nere tonoraaurera rai. Nitohanialu inae Joaan enoene lalajeeuruha caresero cuhane rai.

## 4

### *Samaria bene rai iriha Jesusone*

<sup>1</sup> Joaan cacha coujunacatera ere tonoraauruhane amuritoheriinte, Jesoso ere tonoraaure arajii cachaauru. Chaen “Aca jete, Joaan amuritoheriin acauhanau teein cachaauru coujunacateein baotisanajae.” naain coitucure fariseeocuru. <sup>2</sup> (Coatiha aca, acauhanau teein cachaauru coujunacateein baotisanajaai. Acaihanejein canacaanu aina nerelanaa nichaanunechana acauhanauteein cachaauru coujunacateein baotisanajaacaanu.) <sup>3</sup> Nii jaunte nii coitucuhin, Jodea batane caje mituhin, Calileea cauha cue Cana Coaunera Calaohi Jesoso.

<sup>4-5</sup> Nii Calileea batane que turuhane coina, nii Samaria batane choae situhin, Sicaraneein curuajaain nenea neseu turue Jesoso, calaohi Jose rai Jacoboacha tei atane rohan.

<sup>6</sup> Nii jaunte cuu niha atane jachu ucuaatiin acau mitunajaan Jacobo curuaa siriina jaun, enoto chujutaae lalajeein rijiu ecu lauturoaain lauhecoba Jesusone tonohanaune, <sup>7-8</sup> nii nese Sicarau, lenone coretiha cuhacaanu saain.

Nii jana jetaote canacaanu caaijie tocoriin tajiha acau raa uhe leinjiin Samaria bene.

Nii jaun jetaote: “Caisichuche nii ii acau quera,” naain acau bajaa Jesusone jana jetaote:

<sup>9</sup> “Chanuna Joriooneeinche natiin, cacaje acau bajaaiiche, Samaria beneein nihanuche natiin,” nae jetao nii Samaria bene Jesoso rai, Samaria cocoaichacuru aina ita belaihureniha Jorioocuruna jaun.

<sup>10</sup> Nii jaun jetaote: “Ichei Cana Coauneraacha tenaa jerei coitucuhin, canu nichaaunne coitucuhin cacaje laaen bajaaiichene jana nihanena laaen, canu cocoirenachara nejeein niha cacha najaan acau ichaonaa tera tereeunche icheicha,” naa Cana Coaunera Calaohi Jesusone jana jetaote:

<sup>11</sup> “Chaquena acau soriin rariquiche, raina jaannu sirijieequichene coalanaalata. Ucuhatohache caa atane jachu natiinta. Cha cajete ichaonaa tera acau tereeiche caraita. <sup>12</sup> Canacaanu foeratera inoaei Jacobohacha ratirineein nihache caa atane jachu natiinta. Caje raain niha nete acau



corejetechurelu Jacobo calaohichuru, rai nirihuru, naajoaihunrichera. Iina amurijiriin nena jereeichete,” naa Samaria benene jana jetaote:

<sup>13</sup> “Satiin caa caje acau raain cooerate, jerichanejeein enacooauneein cocoiriha cureeinchera. <sup>14</sup> Jana, canuhacha tei acau coha cachanete, coaiten enacooauneein cocoirenereeeinchera. Quiicha tei acaute, cacha suujua cuhane marohemarohereein, cacha rai nitajenaachara nejeein nena ichaonaa teranu quera,” naa Jesusone jana jetaote:

<sup>15</sup> “Saan. Carai aihane nii acau uhauche coaiten cocoirichaaunchene coataara, enacooauneein coaiten acau raanuchene coataara,” naane jana jetaote:

<sup>16</sup> “Ii sinijiera cotihachanichuchera,” naa Jesusone jana jetaote:

<sup>17</sup> “Niheiche casinejerata,” naane jana jetao:

“Esinaete chuhisi, rauhijiriin niicha que aitocoichera. <sup>18</sup> Jauriaate niqui saoquiin sinijieraoquichelura. Chaeen nii ena ii aina nenaate rauhijiriin isinejera neein nenecheta,” naa Jesusone jaun jetaote:

<sup>19</sup> “Cana Coaunera Ere beraneeina ichoaraaunchera. <sup>20</sup> Caa atane ucuuno quete Cana Coaunera bajaebajaeraetorechelu canacaanu foeratera inoae-sihuruchera. Jana inara Joriooneeichenete, naain Jerosaleeun cuhin Cana Coaunera bajaebajaecaanune jerequichelura,” naa nii Samaria benene jana jetao:

<sup>21</sup> “Quesenetaauchera. Inae ichuunnejeeonria caa atane ucuuno que uhichene laatelanaala, nii Jerosaleeun cuhichene laatelanaala, chunijiu niha natiin Cana Coaunera bajaebajaequichenera. <sup>22</sup> Samaria cocoaicha neeichene, coatiha nii inaraacha bajaebajajei coitucuujueein aitoheeiche. Jana canacaanu Jorioo nichaanunena nii canacaanuhacha bajaebajajei coitucuhin laaen aitocooanuche, Jorioocuru caje ecoona nihache nii janacon cacha mitaerane jaun. <sup>23</sup> Enene caje coauneein, caa atane ucuuno que unaa laatelanaala, nii Jerosaleeun cunaa laatelanaala, rauhijiriin suujua cuhane Cana Coaunera bajaauruhineche nere tonoraeraauru esineeuru. Nitohaneente jereche Cana Coaunera, <sup>24</sup> suujue nejeesiha nijihachena jaun,” naa Jesusone jana jetaote:

<sup>25</sup> “Raotojoeina turuha urichain Cana Coaunera letono Curisitone coitucunche. Acate laen cana relaa ureeinche itolere que,” naa nii enene jana jetaote:

<sup>26</sup> “Saan. Canuna acaneein caa ichei aitoonchera,” nae jetao Cana Coaunera Calaohi Jesoso.

<sup>27</sup> Nii janana eruhacaanu aina nerelanaa nichaanune, nii ene aina ereeree jana. Nii natiine, “Chaquena ereereequiche,” naain bajanaa nainenihacaanu, jataain cana curuaanaa nihane jaun.

<sup>28</sup> Nii jaunte cuu baichaje ratiriin, canacaanu que janoriin naain neseu biha cue nii Samaria bene. <sup>29</sup> Inae neseu turuhin jetaote: “Chajaauchete, taa leinjiin cacha coaraera. Acate naajoaain itolere ichacaunne que aite caraicha. Jerihane acate Cana Coaunera Letono Curisito necaihara,” naa nii neseu nenacaauru rai turuhinna jaun <sup>30</sup> tajiha jiniichaain uhin, nii ratiriha najaun turuhin coaraa uure.

<sup>31</sup> Nii tonohanauna jaiti uujeeuru jana: “Chaelainejein quiorihura,” naain lenonihane coina counujichaanune janate:

<sup>32</sup> “Niha caleeonne inaraacha coitucuhine lanaalara,” naa Jesusone jaun:

<sup>33</sup> “Jerihane chunicohanejeinte coroaatecaihara,” naacaanu itaraine janate:

<sup>34</sup> “Lenoneein inara suujua nunaachene rijjijeeina, casuujua nunaun caletoaera amihaneon ichaain jitaanune. Acate caleonne nera. <sup>35-38</sup> Inoaelu nere bera que catohaneein turuhanune beratiha Cana Coaunerana jaun, turuhanune cohajeein neeuruha cau nenacaauru cachaaurune jaunna inara letoareeunni, inae turuhanune beebejeeichene esenetauruhane, nitajenaachara nejeein nena ichaonaa raauruhane coina,” naa Cana Coaunera Calaohi Jesoso, aina nerelanaa nichaanune rai.

<sup>39</sup> Nii neseu turuhin niriitiin cachaauru rai beein, “Naaajoain itolere ichacaanne quete aitera,” naa nii enene jaun jetaote esenetaaure arajiin nii Samaria cocoaichacuru. <sup>40</sup> Nitohaneein Cana Coaunera Calaohi Jesoso rene turuhin: “Canacaanu aina neeorihura,” naauruhana jaun, acaauru aina coroata janoojeein neeorihacaanuna jaun, <sup>41</sup> jataain jelai amuritoheriin esenetaacoaure, nujuaae caje raaje aitohane jaun.

<sup>42</sup> Nitohaneeinte nii jauriaanejeein Jesoso aina erenaa Samaria bene rai: “Ii cajena aasaariin coitucuhin esenetacaanuchelu. Inae laaen enene esenetacaanuche jataain nujuae caje raaje aitohane aonacaanuchene jaun. Acate Curisitonechera. Acate caa chauratane que nenacaauru itolere cachaauru jianacoon mitaera nechera,” naaure nii ene rai.

*Jorioocuru curuaanaacuru curuaanaa rey rai cocoainanacaineein nena calaohi rautaa Jesusone*

<sup>43</sup> Coroata janohin Samaria batane que nihane baihate, caje amuhin naain Calileea batane que cue Cana Coaunera Calaohi Jesoso. <sup>44</sup> “Naaajoainte Cana Coaunera Letononeein nera,” naain caohachaain coitucuhin, belaa, raaurerichaa in naraaichurune coitucuha raotojoein inatiinte, atiin Calileea cauha cue Jesoso.

<sup>45</sup> Inae Calileea turuhacaanune janate, caohatiin Jesoso raaure jelai batane que ichaonacaauru. Jaurianejeein Jerosaleeun Fasocaa bitoauruhane jana cuu itolere ichaa Jesusone coaracuruhane jaunte caohatiin raaure.

<sup>46-47</sup> Nii jaunte Calileea nena nese- Canaau turuha cue Cana Coaunera Calaohi Jesoso, nii jauriaanejeein bino neein jeesinaeeca rotoha najaun.

Nii janate coitucuuriin coaraa uhe Jorioocuru curuaanaacuru curuaanaa rey rai cocoainanacaineein nena, cunaitiha calaohina jaun que rautaeratihane coina. Tajiha turuhinte: “Atiin canenajau Caferenaanon turuha uute carai canaanai rautaaicha,” naa nii cocoainanacaine jana:

<sup>48</sup> “Saan. Chatohanai coaraeneeiche inara nota quene, cha esenetaheechiche,” naane janate:

<sup>49</sup> “Chajaaajoaau atiin osiha carai canaanaine ajiinihara curuaanaa,” naane janate:

<sup>50</sup> “Chajaaincha chaque tonajelanaala caunihu. Inae nerautaa ii rai canaanaicha,” naa Jesusone jaun, esenetaain cauha cue.

<sup>51</sup> Nii jana jetaote, inae turuhelalajeein cuujihane jana jetao, tajiha que tacaain: “Inae nerautaa ii calaohicha,” naauruha que tacaain cachaaurune jaun jetao:

<sup>52</sup> “Chu teejia enotone jana nejelajaain nerautaeta,” naain bajaane jana jetaote:

“Raca enoto cafetaainte nejelajaain nerautaera,” naaurua najaun jetaote:

<sup>53</sup> “Nii rijjute chujian aite carai Jesusora,” naain jetao, nii caje coauneein jetao Cana Coaunera Calaohi Jesoso esenetaaure saain, sinijiera, bereecuru, naajoain aina jiniiquiin.

<sup>54</sup> Nii quete coroata saain coitucuuruha cachaaurune coina niicha ichai ichae Cana Coaunera Calaohi Jesoso, Jodea caje Calillea nenea neseu turuna jaun.

## 5

### *Jiurona rautaa Cana Coaunera Calaohi Jesusone*

<sup>1</sup> Nii baihate Jerosaleeun cauha cue Jesoso, Jorioocuru beseta bitoane coina.

<sup>2</sup> Nii Jerosaleeunte, carenero bacuujuaneein curuajaain nenea acuuju rohan ne Beteseta neein curuajaain acau netaojia najaan. <sup>3</sup> Ecute saouquin niha lohanarine jana nasaae daraacoore arajiin cunaitenacaauru, maosacuru, bacosacuru, neluhinaauru, jiuronacaauru, niichuru daraaque nerurujuaa nii acau netaojiane cohaca. <sup>4</sup> Nii acau netaojia jetaote, tabaque nichoae fauha Cana Coaunera Letonone, nerurujuae nii acau. Nitohaneein nerurujuaane jana, ichoaaichaniha cuhane fai cunaitenaa jetaote nerautae.

<sup>5</sup> Cuute ne leinjiin cacha, nichatachoonca fosa jaanacain cunaaicha aina nei. <sup>6</sup> Niite tocoecohane jana coarae Cana Coaunera Calaohi Jesoso. Coaraane jana, inae nitohaneein carajaain cunai aina nihana jaunte, rai: “Nerautanaa jereeina,” naain caje bajaa Jesusone janate:

<sup>7</sup> “Eejeen, aihanu niqicha. Nete nene caa acau netaojianaja cuhane canu faeraanura. Faunaa jerichaaunne naineeinte, canu ichoaechaniha faaure leeochoaurura,” naa nii cunaitenaane janate:

<sup>8</sup> “Saan. Chajaain nimichuhin chela seriin amuute coaracaara,” naa Jesusone janate, <sup>9</sup> nii rijieeoritiin caochanaineein nerautain, nela seriin nichaaurain jelai caje amue nii cunaitenaa.

Nii janate nebetacanaa janonaa bana nitohanai ichaane jaun, coaraain: <sup>10</sup> “Ta cocoaeraa chelai baijiera enenene coitucuhinete, nebetacanaa cojoanonaa nihane saijieein anajiin baijiaai,” naauruha rai Jorioocurune janate:

<sup>11</sup> “Aihanu niqui, nete caletoe canu cunai caje carautaera,” naane jana:

<sup>12</sup> “Chate nii nitohanai ichaaine coina eletaeta,” naain niqui bajaauruhane jana <sup>13</sup> coitucue, arajii cacha jana nitajeoriha Jesusone jaun.

<sup>14</sup> Nii baihate nii Jerosaleeun nenea ita taojiaain Cana Coaunera bajauruha Joriocuru najaan Teenforo asaae eruhin:

“Aonaau, inae laaen nerautaicha. Nijiaonria coaiten naosatenaa coauquine. Coaiteeinete jelai amuritoeriin coaraa curiquiincha,” naa Jesoso raine jaunte, <sup>15</sup> Jorioocuru rai biha cue:

“Acate carautaera,” naain. <sup>16</sup> Nii jaunte Jesoso aina nejerateein, jataain sohin jaonaa jerecure Jorioocuru, nitohaneein nebetacanaa janonaa bana cacha rautaana jaun.

<sup>17</sup> Nii jaunte: “Joaenreein bana amianiha Ofana jaunna, jerichanejeein ichaauru,” nae Cana Coaunera Calaohi Jesoso.

<sup>18</sup> Niritoha Jesusone jaunte, jataain jelaichoaae jauhecotojoeriin aina obajeein sohin jaonaa jerecure. Chaen nebetacanaa janonaa que aitocuruhane tonoraelanaala, “Cana Coaunera Calaohi nihane jaun jete, ichaa Cana Coaunerane rijijieein ichae,” naane corenihane maajeein jataain rautaaurene Jorioocuru.

### *Rai inaca Cana Coaunera cocainanohineein niha Cana Coaunera Calahine*

<sup>19</sup> Nii jaunte: “Esinaena rauhijiriin aitoreunni inara rai, Coatih casuuju caje coauneein quiicha jerei ichana nainihaun, Cana Coaunera Calaohi

nichaun natiin. Acaihanejein Ofaacha jerenohichana ichaaun. Itolere Ofaacha ichaichana ichaaun canu netonai. <sup>20</sup> Cacoelaiha Ofa Cana Coaunerana jaunte, itolere niicha ichai que canotajae. Chaaen techu jeelai choae jauhecotojoeriin caque itolere ichaain inara notaaratihane, nii cojoaelatiin coaraa curiquicheein. <sup>21</sup> Onacaauru ichateein acaauru rai ichaonaa tiha Ofa Cana Coaunerana jaunna, canu netonai quiicha belaihuri ichateein acaauru rai ichaonaa teeun. <sup>22</sup> Chabana cacha coujuhin coaraai Ofa Cana Coaunera. Coatiha ichana nainenihane caun aihei. Nii jaunte canu cocoainain caletoae cacha coujuhin coaraaunnuque, <sup>23</sup> chaen rijijieein jataain curuaanaa neein nihanune coitucuhin, rai nere tonoraauruhane rijijieein quere netonai tonoraauruhane coina. Cha teeinti quere tonoraene, niite caletoaera Ofa ere tonoraenereein.

<sup>24</sup> Caletoaera ere esenetaain, quere tonoraain naajoain neeichenena inara coujuhin inara coaraelanaala rauhijiriin nitajenaachara nejeein nena ichaonaa tereeunni inara rai, jaoleneein neeichene coataa. Esinaena rauhijiriin aitoon.

<sup>25</sup> Enene caje coauneeinte Cana Coaunera Calaohineein nihanune ere aonacuruha Cana Coaunera coitucuhi cachaaaurune jana, quere tonoraauruhane, acaauru suujua coriha cureein Cana Coaunera. <sup>26</sup> Raajenihane ichaonaa nitajenaachara nejeein nena ichaonaa teraneein niha Ofa Cana Coaunerana jaunna, jerichanejeein rijijieen nena rai calaohi nichaunna jaun canu netonai nitajenaachara nejeein nena ichaonaa teeun. <sup>27</sup> Inaraacha cohajei- cacha calaohi nichaaunne cocoainainte caletoae, caohachaaain ichaauruhane coaraain baasoneein ichaonacaauru ichao rucueranu que. <sup>28</sup> Coaa caa aitocoauru cojoaelatohache. Inae cojoinaca que turuhane banate, rai nere aonacurureein. <sup>29</sup> Nii banate natane bana caje mituurureein satiin onacaauru, caoacha icharaauru nitajenaachara nejeein nena ichaonaa raauruhane jana, baaso icharaaurute caseteco coaraa cuurureein.

<sup>30</sup> Coatiha casuujua caje coauneein cacha coujuhin coarahaan. Aitiin caletoaa Ofane rijijieeina rauhijiriin cacha coujuhin coaraan.

<sup>31</sup> 'Cana Coaunera Calaohi nichaunra,' naain irihanu caraajenianene caohacharihei. <sup>32-33</sup> Inae Joaan caje bajaerateichene jana, rauhijiriin inara rai bihalu Joaan. Aihana jaun, esenetaaichenete caohachae, Cana Coaunera ere beraneein niha Joanne coitucuichene jaun.

<sup>34</sup> Esinaete rauhijiriinte caque aite Joaan- acauhanau teein cachaaauru coujunacateein baotisaera, caje bajaachene jana niqui, nena cacha aitohane lateneen. Jianacon mituhin neeiche osa cajene jerena caunna, caa niritiin aitoon.

<sup>35</sup> Aca aiha leinjiin conone rijijieein niha Joanne jaunte niqui, coraajeein neeichelu basiijiin reeintiariin. <sup>36</sup> Chaaen techu, 'Acate canaacha cohajeinera,' naain inara rai biha rauhijiriin Joanne choae tacaain techu niqui, inara nota que itolere ichacaunne coaraquiche. Nii quiicha ichaina ichaaun, esinae rauhijiriin caletoaa Ofa Cana Coaunerane coitucuhichene coina.

<sup>37-40</sup> Chariji bana Cana Inaca Cana Coaunera coaraain nere aonaheeiche niqui. Nete, nere bera inoasihuru que catohaneein turuhanune berateein laenaeratihalu Cana Inaca najaan que nerelaache niqui, caje ichaonaa nitajenaachara nejeein nena raaichene coina. Nete nii aitohane rijijieein caletoaa Cana Inacane esenetaeneichene jaun raenereicheein.

<sup>41</sup> Nii jaunna caque tacaain canu corojeein caraaichene jereneeun.  
<sup>42</sup> Chaaen nachu raotojoein Cana Coaunera jereein, nere tonoraain nenee-  
 ichene coitucuun.

<sup>43</sup> Cana Inaca Cana Coaunera niqiu caletoe. Nete, caohachaa in caranaa  
 jereneeiche. Jana inara rene turuhin, ‘Canuna Cana Coaunera letono  
 neeunra,’ naa inara rene turuhin Cana Coaunera letono niheinete laen  
 caohachaa in rariquiche.

<sup>44</sup> Cana Coaunera coacuelanaala itaacha corojeein, ‘Iite caohati cacha-  
 neein neeicha,’ naain neeichene jaunte, quesenetana naineneeiche.

<sup>45</sup> Coatiha Ofa rai inara coulurujuenaa coauhaaun canu. Nii Moi-  
 sesa inaraacha esenetaite laen Cana Coaunera rai inara colurujuereein.

<sup>46</sup> Moisesa aitojoan esenetaaichene jana nihanete, quesenetareeiche, cato-  
 haneein turuhanune que aitiin laenaalu Moisesane jaun. <sup>47</sup> Nii aitiin niicha  
 laenai esenetaeneichene, chatohanein jana aitocoaunne esenetareeiche,”  
 nae Jesuso.

## 6

### *Saoqui oharaancai cacha rai lenone tiha Jesusone*

<sup>1</sup> Nii baihate Calileea conemuri jeraque cuha Jesusone jana, <sup>2</sup> sacuha cuure  
 arajiin cachaauru, cunaitenacaauru rautaane coaracuruhana jaun.

<sup>3</sup> Nii janate cuu atane ucuuno choae iniin nelauriariin lauheque Jesuso,  
 aina nerelanaa nichaanune aina, <sup>4</sup> Jorioocuru beseta Fasocoa catainajeein.

<sup>5</sup> Nii jaunte arajiin turuuruha cachaaurune jaun: “Chu lenone coreter-  
 ihacache, caa arajii cachaauru rai,” naain bajaie Ferifi rai Cana Coaunera  
 Calaohi Jesuso. <sup>6</sup> Niicha ichaneni coitucuha natiinte bajaie Jesuso Ferifi caje,  
 “Toohanrichaaincha,” naain.

<sup>7</sup> Niritiin bajaane jana: “Coroata fashai janonei amihanenaa core  
 jeoneein faan coretichaachene niha natiin coatia caa arajii cacha nainer-  
 iheta,” naa Ferifine baihate:

<sup>8-9</sup> “Caute ne caa canaanai rai saoquijieein faan, nii baiha coroatajaain  
 ate, naaonjoaain niqiu, nete caa araainein cacha nainenere carijiei,” naa nii  
 Simoon Fedoro ocoala Aanderesine jaunte:

<sup>10</sup> “Saan. Acaauru rai aitocuchete nelauriaauruhine satiin,” naa Jesusone  
 jaunte:

“Nii omane choae nelauriaauchera,” naauruhane jana, nelauriaaure nii  
 saoqui oaraancai quichaauru nejeesina, enecuru, canaanaihunru, naa-  
 joain janijilanaala.

<sup>11</sup> Nii janate nii faan teberiaain: “Nariha,” naain Cana Coaunera bajaane  
 baiha, nii aina nerelanaa nichaanune rai nii faan te Cana Coaunera Calaohi  
 Jesuso, chaluhaaanune coina. Chaluhaaanune janate, nii saoqui oharaan-  
 cai cacha naine nii faan. Jerichanejeein techu nainecohanajae nii ate.

<sup>12</sup> Nii janate, inaeneeuruhana jana cautihana jaun: “Caa caute curujuaain  
 raauche nijiaohanne coataa,” naa Jesuso, aina nerelanaa nichaanune raine  
 jaun, <sup>13</sup> curuhacaanune janate ne, elechoonca coroata omariin faan caute.  
 Nitohaneente caute, nii saoquijiei faan nefaaain.

<sup>14</sup> Nii coaraainte: “Caate caa chauratane que turuha uha niicha jerecuri  
 Cana Coaunera letono canaacha cohajeinecaihara,” naaure cachaauru.

<sup>15</sup> Nii jaunte jataain acaauru curuaanaa *rey* neein Jesuso tenaa jereein,  
 counujueein amanaa jerecuruhane coarajihana jaun, acaauru que janoriin  
 amue rautaenihana jaun. Nitohaneente acaauru que janoriin amuhin,  
 atane ucuuno que iniha cue Jesuso, cuu jelai basijjin neeorihane coina.

*Acau choae amuha Jesusone*

<sup>16-17</sup> Nii janane, inae nocohecane jaun, jaiti turueniha Jesoso atane ucu-uno cajena jaun, fauha kuhacaanu. Fauhina, leinjiin bote kuhane naain jera jaoha kuhacaanu, Caferenaan turuhacaanune coina. Nii janate inae nalaquiiin cuhin nocojoe. <sup>18-19</sup> Nii janate, inae bote kuhane fauhin cuujihacaanune jana, canacaanu sacuha uhe Jesoso, acau choaee rurujueein uhin. Nitohaneeinte acau choae uhin canacaanu rohan nichuuntaain, nii acau jiheetohane jana, fichafichanaa tabai nihane jana, nii bote nalaane amuniha canacaanu rai janate coaracaanune jana, tajiha acau choaee uhin rurujue, nii bote nichaee uhin. Nii jaunne coasiha nesoonetohacaanune janate:

<sup>20-21</sup> “Cooa nesoonetohachera. Canuna aihunra,” naane jaun, que tacaain coroajeein, nii bote kuhane fauhin amaacaanu. Nii janana cohaneeriin turutoha kuhacaanu canacaanuhacha coinetihu.

<sup>22</sup> Nii cojoanoote, acaihanejein satononiha jera jaoha cunaa bote kuhane fauhin jera jaoha kuhacaanune jana, canacaanu aina uheniha Jesusone jaun, nii que ereereecure. <sup>23</sup> Nii jana jetaote, Tiberia nese caje uhin turuha uhe leinjiin bote. Turuhin jetaote, najauriaa uhe nii Cana Coanera bajaain niicha tei faan quihuruha najaan rohan. <sup>24</sup> Nii jana cuu nenihacaanune jana, Jesoso netonai niha natiin nenihana jaun, nii bote kuhane nefaujuaain cuhin, nii nihacaanune jaan Caferenaan turuhin ariha uure.

*“Ichaonaa esine tera lenoneneinne neeun,” naa Jesusone*

<sup>25</sup> Nii janate jera jaohin coaraa uuruhane jana, cuu nii Caferenaan ne Jesoso. Nii jaunte rai: “Chabana cau turuhite cacha relaera” naauruhane janate:

<sup>26</sup> “Nii quiicha ichai coaraquiche natiin, ‘Naaajoain caara,’ naain inara suujuau erenaa coacuelanaala, nainain obejeein lenonequichene jaunte cariirijieeiche,” naainte, <sup>27</sup> “Coo sanaa inaera lenone corenihacha amihanihache. Acaihanejein ichaonaa tera- chabana sanaachara nejeein lenone coreniha amihaneeuhe. Nii nitajenachara nejeein niha cacha najaan lenone tihanune coinete caletoe Ofa Cana Coanera. Canuna inaraacha cohajei Cacha Calaohi ineeunra,” naa Jesoso acaauru rai janate:

<sup>28</sup> “Chatohanein nerichaanu Cana Coanera jerenohi ichacaanne coina,” naain bajaauruhane janate:

<sup>29</sup> “Caa niicha letoai nichaanne esenetaichenete jere Cana Coanera,” naa Jesusone janate:

<sup>30</sup> “Chatohanaina ichaain canacaanu notaareei, coaraain esinaaen rauhi-jiriin Cana Coanera letononeeine esenetaacaanune coina. <sup>31</sup> Carene tabai que amuhemuhecuruha najaaun jetaote, neniha lenonene jaun jetao, dede caje faan rijjijeei nena manaa neein curuajaain nena que jetao ichaohin amuhemuhecururejetelu canacaanu inoaesihuru. Nitohanein jetaote, neniha lenonene jaun, ‘Dede caje nena faan rijjijeein nena manaa te Cana Coanera,’ naa Cana Coanera Quiricha inoaei kuhane” naauruhane jaunte:

<sup>32</sup> “Coatiha Moisesa nii dede caje nena faan manaa tihei. Acaihanejein Ofa Cana Coaneraachate nii dedeeu nena faan esine teraneein ne. <sup>33</sup> Nii Ofa Cana Coaneraacha tei faante turue caa chauratane que, cachaauru rai ichaonaa chabana nitajenaachara nejeein nena teranu que,” naa Jesusone jaunte:

<sup>34</sup> “Atiin canacaanu rai inetono janonaa bana, nii faan que canacaanu sihura curuaanaa,” naauruhane janate:

<sup>35</sup> “Canuna cacha rai ichaonaa tera faan neein neeun. Cha teeinte carene uhe aca mijiteriaain. Cha teeinti quesenetae, aca cocoireriaain. <sup>36</sup> Nete inara rai aitocooaunne esenetaeneeiche, inara nota que quiicha ichai coaraqiche natiin.

<sup>37</sup> Satiin Ofa Cana Coauneraacha letoaite carene uhe. Nii jaunna carene uhi nihane sitaenereeeunni.

<sup>38</sup> Coatiha quiicha ichana jerei ichacaaunne coina, dede caje uhin turuha uhaaun caa chauratane que. Acaihanejein caletoaera Ofa Cana Coauneraacha jerei ichacaunne coinana cau turuun. <sup>39</sup> Nabana nitajeuruha cachaaurune coataate caletoae Ofa Cana Coaunera. Nii jaunna satiin nii carai niicha teeuri cachaauru ichateein michunajaa cureeunni inae saa cana janonaane bana.

<sup>40</sup> Nii Cana Coaunera Calaochi coaracuruhane esenetaauruha satiin cachaaurunete jere caletoaera Ofa Cana Coaunera, chabana nitajenaachara nejeein nena ichaonaa raa esenetaeraaurune coina.

Nii jaunna inae saa cana janonaane bana ichateein michuunajaa cureeunni,” naain acaauru tonorae Jesuso. <sup>41</sup> Niritiinte, “Canuna dede caje faunaa faan neeunra,” naa Jesusone jaun nocoeje chanuure Jorioocuru.

<sup>42</sup> Nitohaneente ita rai: “Ta Jose calaochi Jesuso niha caane. Raotojoein inaca, neba, naajoain coitucuhacache natiin, dede caje faunaa nereta,” naauruha ita rai Jorioocurune janate:

<sup>43</sup> “Inae canu necoeje chanuhichene jianecuchera. <sup>44</sup> Chunei carene unaa nainihei, nii jereein neniha caletoaera Ofa Cana Coaunerane. Inae saa janonaane banana nii carene uhine ichatiha cureeunni. <sup>45</sup> ‘Satiinte relareein Cana Coaunera,’ naa Cana Coaunera ere beracuru ioensiuruhacha laenai quiricha cuhane jaunte, satiin Ofa ere aonaain tonoraain que nerelanacaaurute, carene ureeincha.

<sup>46</sup> Chabana Ofa coaraai chunei. Acaihanejein canuhachana coaraaun caje unaa nichaunna jaun.

<sup>47</sup> Esinaena rauhijiriin aitoreeunni. Quesenetaerate ichaonaa chabana nitajenaachara nejeein nena raa cureein.

<sup>48</sup> Canuna ichaonaa chabana nitajenaachara nejeein nena tera lenoneenein neeunra.

<sup>49</sup> Neniha leinjiinejein cacha najaaun carene tabai choae amuhemuhecuruha inara inoaesihurune janate, que ichaaoruhane coina cojoanoo netojoein manaa neein curuajaain nena quinacai nalae Ofa Cana Coaunera, que ichaaoruhane coina. Nete, satiin oore nii quihurera- inara inoaesihuru inae binaaneein. <sup>50</sup> Canuna dede caje faunaa lenone neeun. Nii faan nichaaunne quicha, chabana orihain. <sup>51</sup> Canuna nii lenone neein dede caje faunaa neein neeun. Nii lenone que ichaohin neite nirijijieein nitajenaachara nejeein niha cureein.

Nii lenone quiicha tenaa jereite, cajabereonnein ne. Acane tiha cureeunni, que ichaohin neeuruha caa chauratane que nenacaaurune coina,” naa Jesusone janate,

<sup>52</sup> “Chatohaneina rai jaberoco que cana coroaatere,” naain nejesinajeein ita cotaicha rijitocure Jorioocuru.

<sup>53</sup> Nii jaunte: “Esinaena rauhijiriin aitoreeunni inara rai. Canuna Cana Coaunera Calaochinein, jelai Cacha Calaochinein inaraacha cohajei inein neeun. Cajabereon quiin cacoichana coheneeichene, nihei ichaonaa esine ranaa nainiheeiche. <sup>54</sup> Cajabereon quiin cacoichana coerate, chabana nitajenaachara nejeein nena ichaonaa raa cureein. Acane, saa cana janonaane bana ichateein michuha cureeunni. <sup>55</sup> Ichaonaa tera lenone esine neein niha cajabereonne janate, ichaonaa tera conacai inein ne cacoichana.

<sup>56</sup> Nitohaneein cajabereon quiin, cacoichana coerate, caniha jiniiquiin nereein. <sup>57</sup> Nii caletoaera Ofa Cana Coaunerate ichaonaa siri. Nii jaunna que ichaohin neeun. Nii rijijieein techu, cacoreniha ichaoha cureein caque lenoneein nei.

<sup>58</sup> Nii dede caje faunaa lenone quena aitoon. Coatiha nii inara inoaesihuruhacha quii manaa rijijieein nihei. Nii manaa quihuruha niqui inara inoaesihuru, nete satiin oore nii quihurera. Jana nii caitoojoan dede caje faunaa lenone quiha cachanete, chabana nitajenaachara nejeein niha cureein,” <sup>59</sup> naain relanajae Jesoso, Caferenaanon, acaauru rai sinacoca asaae netaojiauruha Jorioocurune jana.

### *Nitajenaachara nejeein nenea ichaonaa tera erenaa*

<sup>60</sup> Caritiin relanajaa Jesusone jaunte: “Caaintatoha jataain caa naitoojoan. Chate nere tonorare,” naauruha nii caaijie arajiin cunacaauru cachaaurune janate, <sup>61</sup> aohanriin:

“Ta aihane carautaaichene. <sup>62</sup> Toohanreichecha, jauriaa nihanulune jaaun jelaiha iniha cuhanune coaraquichene. <sup>63</sup> Caa quere aonaain esenetaeraaurute, chaelai janonaa bana nitajenereein. Jana, caa aitocoanne esenetaelanaala erenaa tonoraauruhite, ichaoha jaberoco niha natiin, nitajihha cureein suujue. Cha que nelatihei cana jaberoco, cana suujue colane. <sup>64</sup> Nete jaiti caa aitocoanne jaan esenetaaurene inara tabaauru,” nae acaauru rai Jesoso, inae inoaelu caje coauneein, “Acaauru acaaurute quesenetaenereein. Jana, acate naaonjoain cacoulrujeein naaonjoain caeteratiha cureein,” naain coitucuhana jaun.

<sup>65</sup> Nii jaunte: “Nii jereniha Ofane, carene unaa nainihei chunei,” naa Jesusone caijiete, <sup>66</sup> jianijihacoaure nii arajiin aina nerelananichaanune aina amuhemuhenaacaauru niritoha Jesusone jaun.

<sup>67</sup> Nii jaunte: “Inara netonaiha cajoahin caratiriin amuriquiche,” naain bajaa elechoonca coroatajai nichaanune cajene jana:

<sup>68</sup> “Ahan aihei. Chuna nenacae curichaacaanu. Nii canacaanu relaina jaan tejian nenacae ichaonaa chabana nitajenaachara nejeein nenea teraneein ne. <sup>69</sup> Canacaanuna laaen ii esenetaacaanu. Nii jaunna acaihanejein Cana Coaunera Calaohi Curisitoneein neeine coitucuhacaanura,” naa Fedorone janate:

<sup>70</sup> “Canuna lechoonca coroatajai niquichene cotijiaain raain neeun niqui. Nete, nii inara lechoonca coroataja nechua aansain moconajaeranein ne,” nae Jesoso canacaanu rai. <sup>71</sup> Nii Simoon calaohi Jodasi Isacariote quete aite Jesoso, aina nerelanaa nichaanune lechoonca coroataja niha natiin coulurujuerichaaaine coitucuhana jaun.

## 7

<sup>1</sup> Nii baihate, Calileea batane que nenacaauru neseeuu neseeuu cachaauru relaa amuhemujue Cana Coaunera Calaohi Jesoso. Jodea batane que cunaa jerihe, cuu sohin jaonaa jerecuruha cuu nenacaauru Jorioocuruna jaun. <sup>2</sup> Nii janate, inae ichuunejeonriha lohanari beseta bitoaauruha Jorioocurune jaun:

<sup>3</sup> “Coo cau niha. Jodea cunihunte cuu chaelai ichaaaine coaracurumii cuu nenacaauru ii coitucuurera. <sup>4</sup> Coitucuha cachane jeriha chuneine, asiin cha ichana nainihei. Aihana jaun, letonoaneein satiin coarajeerera notaracae ichaute coaracurumii,” nae nocoalacuru. <sup>5</sup> Nihei nocoalacuru nihanatiin esenetaaurenihana jaunte aitocure.



<sup>6</sup> Nii jaunte: “Inasiina jaiti turuha cuhanune jaan cojoinacane coaalanaala cureeun. Inara raite laaen caoachae joaenreein bana cuhichene, <sup>7</sup> neniha chatohaneein inara aina nejerateein, inara cotaain, chatohaneein inara tenaa naineniha caa chauratane que nenacaurune jaun. Canihate laaen nejerateeure, itolere baaso ichacuruhane que rauhijiriin aitocoanne coreniha. <sup>8</sup> Inara cunichuchete beseta bitoaaiche. Jaiti curihaunni canu, turueniha cuhanune jaan cojoinaca quene jaun,” naain <sup>9</sup> nii Calillea nedae Jesoso.

*Lohanari beseta bitoaurera jana turuha Cana Coaunera Calaohi Jesusone*

<sup>10</sup> Nii baihate inae cuuruha nocoalacurune jana, acaantonai cue acaauru caaijie nasina rijijieein, acaauru aina beseta bitoaa.

<sup>11</sup> Nii janate inae nunuheca besetane jana ariirijieeure Jorioocuru: “Aan-cacha nii cacha,” naain <sup>12</sup> cuu nejesinajeein coacuhin ita rai ereerejeein:

“Acate caohachanejein cachaneein ne,” naauruha tabaaurune janate, tabaauru:

“Caohachanejein cacha nihei jana canacaanu rai, cacha coritaain nao-joaanna jaun,” naaure tabaauru. <sup>13</sup> Nete, rauhijiriin “Aca,” naain chaque erenaa nainene chunei Jorioocuru coasiha.

<sup>14</sup> Nii janate, netaojiauruhana jaan loreri Teenforo asaae enoha Jesusone jana, inae sanaa jere nii beseta.

<sup>15</sup> Nii janate cuu relanajaa Jesusone jana cojoaelatoore Jorioocuru. Cojoaelatiinte:

“Chatohaneeina nirijieein nerelaelanaala itolere coitucue,” naauruhane janate:

<sup>16</sup> “Coatiha casuujua caje quiicha rocohi nihei- caa inara relaanune jaan. Caa inara relaanune jaante, nii caletoaera caje unaa ne. <sup>17</sup> Nii jaunte inae jatoroaain Cana Coaunera jerenohi ichana jeratee aitocoanne aonaain coitucuha cureein. Nitohaneeinte esinaae rauhijiriin casuujua caje rocohin aitenihanune coitucuurureein.

<sup>18</sup> Charijieein teeinti: ‘Canuna caoacha cachaneein neeun,’ naain su-ujua caje rocohin raotono que ereereecane, ereereje cacha raotojoein: ‘Caate jataain caohachanejein cachaneein ne,’ naain caohachaaain belaaain coaracuruha cachaaurune coina. Nete rai letoaera curuaanaa coitucuhin coroaecuruhane coina, esinae rauhijiriin aite. Aihana jaun, Nihei nii que: ‘Casaje,’ naain ereereecuruhane jaanu.

<sup>19</sup> ‘Cana Coaunera ere bera Moisesa ere tonoraacaanu,’ naainte ereeiche niqui. Nete: ‘Coa sonajaain jaohache,’ naain aitoha Moisesa natiin tonoraaneeichene jaun, casohin cajaanaa jerequiche,” naa Jesusone janate:

<sup>20</sup> “Chana ishohin ijiaonaa jerete aansai,” naauruhane janate:

<sup>21</sup> “Chanuna jana chaaen, nebetacanaa janonaa bana cunaitenaa rautaanune jana, cojoaelatiin obaaequichelu caniha. <sup>22</sup> ‘Quichaneein nejanoaa inara bereene, inae fosa janoniha nejanoaane jana, rai nacatichi cari jiununuhin saauche,’ naa Moisesane jaunte niqui, nii tonoraain nebetacanaa janonaa bana niha natiin, canaanai nacatichi cari jiununuhin sauhin naaonjoaain neeichelu. <sup>23</sup> Chanuna chaaen nebetacanaa janonaa bana lesajeein cunaitenaa rautaanune coreniha, caniha obajeein caque nererojoecaaichelu. <sup>24</sup> ‘Cana Coaunera aitojoaan tonoraacaanu,’ naaiche inara suujua cuhane natiin, esinae rauhijiriin Cana Coaunera aitoonjoan coitucuhin tonoraain niheeiche. Esinae rauhijiriin Cana Coaunera aitoonjoa coitucuhin neinchene jananihane, caniha obajeein caque nererojoecaaain neriheeiche,” nae acaauru rai Cana Coaunera Calaohi Jesoso.

*“Naojoain cajena unaa neeun,” naa Cana Coaunera Calaohi Jesusone*

<sup>25</sup> Nii janate: “Tana caa cacha ariirijieuruha sohin jaaoruhane coinane,” naauruha nii Jerosaleen nenacaaurune jana, <sup>26</sup> “Nocoo chuianra jianacoo neein satiin coarajera notaracaae ereerejena. Chanuna colaraain inauhene coarajeeure. Jerihanete acaauru esenetaain, ‘Acate Cana Coaunera letono Curisitone,’ naaurucaihha cocoinanacaihuru. <sup>27</sup> Canacaanuna laaen, nii uhana jaan coitucuhacaanu. Jana turuha Curisitone, ‘Naojoain cajete uhera,’ naain coitucuerariaain,” naauruhane janate, <sup>28</sup> cuu nii ita taojiaauruhana jaan loreri Teenforo asaae aonajenajaain,

“Esinaena aihana jaun, canu unajaan coitucuhiche. Coatiha casuujua caje coauneein uhaaun. Inaraacha coitucuhi Cana Coaunerate caletoe. <sup>29</sup> Dede caje, aca caletoeana jaunna coitucuun caje uhanune jaun,” nae Cana Coaunera Calaohi Jesuso tonijiaain.

<sup>30</sup> Niritohane corenihate mucuhin amaain caresero cuhane Jesuso enoanaa jerecure niqiu, nete jaiti cuu tenihana jaun, chatoaneei que biji teeurene. <sup>31</sup> Nete, atiin esenetaain:

“Turuha Curisitone, coatiha aihha caa cachane amuritoheriin araai saain niicha ichai ichaain cacha notaariaain,” naaure arajii cachaauru.

*Teenforo beraihurera folisiaacuru que Cana Coaunera Calaohi Jesuso mucuhin raerateeuruha fariseeocurune*

<sup>32</sup> Jesuso queecha ereeuruha cachaaurune que urichocuruhana jaunte, rautaaurenihana jaun nere tonoraeraauru Teenforo beraihurera folisiaacuru letoaaure nii fariseeocuru, nii cuu nenea batirichuru curuaanaacuru, naojoaihuri, Jesuso mucuhin raacuuruhane coina. <sup>33</sup> Nii jaunte:

“Basijiin reeintiariina cau neeorihun. Nii baihana nii caletoeera rene cauha cureeunni. <sup>34</sup> Canu aririquicheein niqiu. Nete caurueneriquicheein, nii cuhanune jaun turunaa naineneriquicheei najaun,” naa Cana Coaunera Calaohi Jesusone jaunte, <sup>35</sup> nejeesinajeein itarai:

“Chuna curute, ariirijiacachene niha natiin eruhenerihacache. Jerihanete Curiecocuru que najasiiteein nenacaauru Jorioocuru ataneu cunaa jere, Curiecocuru relaane coina. <sup>36</sup> Chatohanerichaaain naate aite: ‘Canu ariichene niha natiin, caururiheicheein cuhanune jaun turunaa naineneriquicheeine jaun,’ nae,” naainte itacaje bajaebajaeure Jorioocuru.

*“Cocoirei carene uhinena cocoe,” naa Jesusone*

<sup>37</sup> Nii beseta satono janonaa banate, beseta nunuhe bana, bajaauruhane amuritoheriin Cana Coaunera bajaure jiniiquiin nii beseta bitoea turunacaauru.

Nii jaunte beseta satono que nimichuhin tonijiaain, nii cuu nenacaauru rai:

“Cocoirei carene uhinena cocoe. <sup>38</sup> Aitoha Cana Coaunera Quiricha Inoasi cuhanene tocohaneein, quesenetaera cacha suujua cajete mitureein acau rijijieein sorohin, jelaiha suujua cuhane maroemaroereein, suujua rucujueein rai ichaonaa nitajenaachara nejeein nenea teraaunu que, chaen leochaauru rai niha natiin tihane coina,” nae Cana Coaunera Calaohi Jesuso, nii beseta bitoaurera rai.

<sup>39</sup> Nitohaneein Cana Coaunera Suujue raaururichaaain esenetaeraauru cachaaurune quete aite Cana Coaunera Calaohi Jesuso, coitucuuruane coina. Jaiti dede curuaanaaneein Jesuso enoanienihana jaunte, esenetaeraauru rai suujue letoaene Cana Coaunera. Nii quete aite Cana Coaunera Calaohi Jesuso.

*Jesoso coreniha ita caje nelerucuruha cachaaurune*

<sup>40</sup> Nii jaunte niritoha Jesusone jaun tabaauru:

“Acate nii turuha uha niicha jerecuri Cana Coaunera ere berane,” naauruhane jana,

<sup>41</sup> “Acate Curisitonera,” naacoauruha leeochoaurune janate, tabaauru jana:

“Inasiin jetao Calileea caje uriha Curisitone coaalanaala. <sup>42</sup> ‘Jerichanejeeinte curuaanaa inoaesi Rabiri rijijieein Beleen cocoaichaneein nereein Curisito, curuaanaa inoaesi Rabiri ichoalaneein nena,’ naa Cana Coaunera Quiricha Inoaesi cuhane natiin, Curisito nere Calileea cocoaicha,” naaure. <sup>43</sup> Niritiinte Jesoso coreniha cuu ita rerohecaain ita caje nelerucure.

<sup>44</sup> Tabaaurute mucuhin amaain caresero cuhane tenaa jerecure niqui, nete ichana nainene chunei.

### *Jesoso esenetaaureniha cocoinanacaihurine*

<sup>45</sup> Nii jaunte, Jesoso colane turuha uuruha nii Teenforo beraihurera folis-aacurune jana:

“Chanuna mucuhin uhaeneeiche,” naain bajaauruha cuu nena fariseeocuru, batirichuru curuaanaacuru, naaonjoaihurine jana:

<sup>46</sup> “Cha corenihana mucuhin uharichaanu joaereein coreniha. Nihei chunei cache irihane rijijieein erei,” naauruhane janate:

<sup>47</sup> “Inae nachu inara netonai coritaate. <sup>48</sup> Esenetaauruha cana curuaanaacuru, fariseeocuru, naaonjoainurine coaalanaala esenetaaiche. <sup>49</sup> Acaihanejein Cana Coaunera Ere coitucuuruhi, Cana Coaunera jaolecuru cachaaurute esenetae,” naauruhane jana:

<sup>50-51</sup> “Nainihej joaereein nere aonaelanaala, joaereein: ‘Naojoainte ichae,’ naain, caohachaain coitucuhelanaa, cache casetecaacachene, niritiin aitoa cana quiricha inoaesi cuhanene jaunne,” naa nii janotiin Jesoso rene turuha cunaa fariseeo Necodemone janate:

<sup>52</sup> “Ii tonaina Calileea cocoaicha neei. Nihei chunei Calileea caje ecocohin Cana Coaunera ere bera. Cana Coaunera Quiricha cuhane arihute coitucuhi,” naauruha leeochoauru fariseeocuru Necodemo rai janate, <sup>53</sup> nenajau cauha cuure nii cuu nenacaauru.

## 8

### *Ene cojoaelorohe*

<sup>1</sup> Nii janate acaauru que janoriin, naain Oliboneein curuajaain nena atane ucuuno cue Cana Coaunera Calaohi Jesoso. <sup>2</sup> Inae janohane janate naain Jerosaleeun cauha cue, coaiten enacooaunein cuu nena Teenforo asaae enohane coina.

Nii janate rene turuhajeeuruha arajii cachaaurune jaun, nelauriaain relanajae Jesoso. <sup>3</sup> Nii janate nejelau quicha que nicharatihane jana ene cojoaeloroe eruhin, mucuhin, tajiha turuaa uure, Cana Coaunera aitoonjoa que cache relaurera fariseeocuru. <sup>4</sup> Nitohanein turuaainte, nii cuu nenacaauru cataaun tein:

“Naojoaain nejelau quicha ainane janana, caa ene eruhin mucuhin uhaacaanura cache relaera. <sup>5</sup> Cana Quiricha Inoaesi cuhanete laenaain cana rai rauhine tein letoaelu Moisesa, nitohaniha ene cojoaelorohe ne, sohin jaohacache ajeri que botosiine coina. ‘Tonaai jana ii,’ ” <sup>6</sup> naain bajaure, nii ene sohin joaeratenaa jerenihane coulurujueeuruhane coina.

Nii janate acaauru tonoraelanaala notoroaain, biji couturi que atane laenaje. <sup>7</sup> Nii janate cuu tonoranajae lanaala atane laenajiha biji couturi quene jana, cuu jeelai coaeneinejeein bajaebajaecuruhana jaun, couturi michuriin:

“Niha cau leinjiin inara jana osa que lanaala, chabana baaso ichae lanaala nenea ne, nii ichoaechaniha focoine ajeri que,”<sup>8</sup> naain coaiten notoroaain atane laenaje biji couturi que Jesoso.

<sup>9</sup> Niritoha Jesusone jaunte, aihuru bana acaauru netonai baaso ichacuruhana jaun, acaauru suujua que tacaana jaun, coejeein, biinaa que ichoaichaain leinjihana leinjihanaain mituhin cauha cuure. Inae satiin mituhin amuuruha nii ene coulurujueurerana jaun, nii eneecha que jerajejeein neeorihana jaun,<sup>10</sup> nimichuhin nichauraain:

“Aancaauruche icholurueraauruta. Ta ishohin ijiaohache chuneine,” naain nii ene caje bajaa Jesusone janate:

<sup>11</sup> “Aiheicheta curuaanaa. Nihei casohin cajaohiche chuneita,” naa nii enene jana:

“Niheichu, canu niha natiin chatohanein chetein, ishohin ijiaonaa nainihaaunche. Inae caunichuche. Jiaonriha caa baiha coaiten nosateichenera,” naain nii ene jiane Jesoso.

### *Canai chauratane cononein niha Jesusone*

<sup>12</sup> Nii baihate coaiten cachauru rai beebeje Jesoso:

“Canuna caa chauratane que nenacaauru cononein neeunra. Quere esenetaerate ichaonaa tera cono siricheein. Chabana nocohenaanau amuhemuheriaain,” naa Cana Coaunera Calaohi Jesusone janate:

<sup>13</sup> “Nohaneicha. Ichaajenihane aitiinte aitohicha. Nii jaun chaque nelatihei nii aitohine jaanta,” naauruha fariseeocurune jana:

<sup>14</sup> “Caraajenihane aitiin aitocooaunne niha natiinte, nelate quere. Canuna nii uhanuluna jaan jelai coitucuun. Jana inara coitucuheeiche. Niheichu canu cunajaanu coitucuheeiche.<sup>15</sup> Nechu jataain Cana Coaunera coitucueneeichene jaunte, joenreein inara suujua cuaaichene jaun, joenreein ereereequiche. Aanca chunei coulurujuerichaaun canu.<sup>16</sup> Canu, cacha coulurujianunete, esinae rauhijiriin coulurujuenojoinee ne, canuhacha jelai caitono nenihana jaun, caletoaera Cana Inaca aina aitocooaunna jaun.<sup>17</sup> Charijieein teeinti ‘Ita rijiitoein ereeuruha coroatajai coaraaurune, esenetaacache nete ne,’ naain aite inara quiricha inoasi cuhane, nitohanein ichaquichene coina.<sup>18</sup> Nirijieeinna coaranein aitoon, nii caletoaera Ofate cajiniichaain coaranein ne. Nii jaun quesenetaaichenetene,” naa Jesusone jaunte:

<sup>19</sup> “Aanca aihane nii chaca,” naain bajaauruhane jana:

“Cacoitucueneeichene jaun, Ofa coitucuheeiche. Cacoitucuhichene jana nihanete, Ofa netonai coitucuriquiche,”<sup>20</sup> naain relanajae Jesoso, nii ita taojiaauruhana jaan lorero Teenforo asaa, nii coriqui teeuruha cachaurune jaan neein. Niritoha Jesusone jaunte mucuhin enoanaa jerecure. Nete enoaurene, jaiti nitohanein teeuruhane jaan cojohinaca que turuenihana jaun.

### *“Nii cuhanune jaaun cunaa nainiheeiche,” naa Jesusone*

<sup>21</sup> Nii baihate coaiten aitiin:

“Inae amuhanune baihate cariirijeriquicheein inacojoein. Nete inara osa caaun cauhacha neein oriquicheein, nii cuhanune jaun cunaa naineneeichene jaun,” naa Jesusone jaun:

<sup>22</sup> “Jerihanete raajenihane nesohin nijiaonreein. Nii jaunte nii cunajaun cuenerihacacheeine que aite,” naain ita rai ereerecuruha Jorioocuruna jaun:

<sup>23</sup> “Inarate, caa chauratane que neeiniquiche. Canuna jana, cana choae caje nenea neeinneeun. <sup>24</sup> Nii jaunte oha curiquicheein osa caaun, canuneein nihanune esenetaeneeichene jaun,” naa Cana Coaunera Calaohi Jesusone jana:

<sup>25</sup> “Chaneeina jian,” naain bajaauruha Jorioocurune jana:

“Inae inara rai aitocooaacaaun turuhanune caje coauneein. <sup>26</sup> Niha arajiin erenaa inara rai quiicha beenei. Nii caletoaerate rauhijiriin esinae aite. Cauricho que aonacaaunna jaunna jerichanetoojeein beebejeeun, caa chauratane que neniquichene rai,” naa Cana Coaunera Calaohi Jesusone <sup>27</sup> janate coitucusichurene, “Naaonjoain Cana Coaunera quete aitera,” naain coitucuurenihane jaun.

<sup>28</sup> Nitohaneein coitucuurenihana jaunte:

“Inara araaineein nihanu natiinte, enuha que ecuu canu nujuateein canu chujuuraa curiquicheein. Nii banate Curisitoneein nihanune coitucuhin, casuujua caje rocohin aitenihanune coitucuha curiquicheein. Acaihanejein carelaa Ofa Cana Coaunerana jaan que aitocooaacaaunne coitucuha curiquicheein. <sup>29</sup> Chabana jelai caratirihei caletoaera Ofa, niicha jerenohin ichacaaunna jaun,” <sup>30</sup> naa Cana Coaunera Calaohi Jesusone jaunte esenetaaure arajiin cachaauru.

*Jelai teein Cana Coaunera cacha, jelai teein Moconajaera cacha*

<sup>31</sup> Nii baihate esenetaaurera Jeroocuru rai:

“Rauhijiriin quere tonoraachenete, canu ere tonoraera esineneein neriquicheein. <sup>32</sup> Nii banate esinae rauhijiriin, Cana Coaunera jerenohi coitucuhin raotojoojin jianacoo ichaonaa naineriquicheein,” naa esenetaauru rai Cana Coaunera Calaohi Jesusone janate:

<sup>33</sup> “Canacaanu foeratera Abaraaun caje coauneein nihein chunei fatoroon canacaanu cailichaera. Inasiinte nii aitohine tocohaneei enene cuhaneecha ichoreniha jianacoo mituhin nerichaanu. Nechu jataaina inoaelu caje coauneein raotojoojin rerohecaeraelanaala ichohacaanu,” naauruha nii esenetaaichuru Jorioocurune janate:

<sup>34</sup> “Satiin quere tonoraauruhite jataain mululuhin osa tabai aiha ne. Nii chunijiu cuhin nichotenea nainerihaain. <sup>35</sup> Cana Coaunera Calaoheein nihanune jaunte ne carai rauhi jianacoo nii osa caje inara mitaanune coina. <sup>36</sup> Canu nii caje jianacoo inara mitaanunete esinae rauhijiriin jianacoo mituhin neriquicheein. <sup>37</sup> Abaraaunte chuhisi inara foeratera ne niqui, nete casohin cajaanaa jerequiche, quere esenetaeneeichene jaun. <sup>38</sup> Carelaa Ofa najaan quena inara rai aitoon. Charijieein teinti, inara relaa inara inacana jaan ichaquiche, nii rijijieeina canu netonai caletooa Ofane jaa ichaun,” naa Jesusone janate:

<sup>39</sup> “Abaraaunte canacaanu inacane,” naauruha Jorioocurune janate:

“Esinae rauhijiriin Abaraaun calaohi neeichene jana nihanetera, aichejetoalune rijijieein neriquiche inara netonai. <sup>40</sup> Nete esinae caletooa Cana Coaunerane que aitocooaacaaunne coreniha casohin cajaanaa jerequiche. Chabana nitohanai que nerurujuanaa jeriheilu Abaraaun. <sup>41</sup> Inarate aiha inara inacane rijijieein neeinche,” naa Cana Coaunera Calaohi Jesusone janate:

“Coatiha unosineein nihaacaanu, Cana Coauneraachate canacaanu inacane,” naauruha Jorioocurune janate:

<sup>42</sup> “Cana Coaunera inara inaca niha netera, canu belaicheeiche, Cana Coaunera caje uhin cau turuhin nihanune jaun. Coatiha casuujua caje coauneein cau uhin turuhaan. Cana Coaunera te caletooa. <sup>43</sup> Quere esenetana jereneeichene jaunte, caa inara rai aitocooaacaaunne aonasineeinche.

<sup>44</sup> Moconajaerate inara inaca ne. Nii jaunte, caje nenea neeichene jaun niicha jereeicha ichaquiche. Nii Moconajaerate inoaelu caje coauneein soserejeein ne. Chabana rauhijiriin chaque irihe. Chaque irihanete nohane, nichaon nihana jaun, casaje nujuaneein nihana jaun. <sup>45</sup> Esinae rauhijiriin aitocoanna jaunte quesenetaeneeiche. <sup>46</sup> Chariji inara caje osaqiin nihanune coitucue. Chanuna esinae rauhijiriin aitocoan natiin quesenetaeneeiche. <sup>47</sup> Cana Coaunera cacha nequichenetera, Cana Coaunera ere rautaain aonaain tonorareeiche. Cana Coaunera cacha neneeichena jaunte, Cana Coaunera ere aohana jereneeiche.

### *Abaraaun ajinhate nesihane Curisito*

<sup>48</sup> Esinaete rauhijiriin osaoquicha- Samaria cocoaicha,” naain Cana Coaunera Calaohi Jesuso cotaihuruha Jorioocurune jana:

<sup>49</sup> “Nihei aansijeein nejein osaaohaun. Nechu acaihanejein Ofaacha jerenohin ichaain nihanune corenhate caansaine que ereeiche. <sup>50</sup> Coatiha, ‘Canuna caohacha cachaneeun,’ naain irihaun. Curuaanaaneente caeteen ne Ofa. <sup>51</sup> Esinaena rauhijiriin aitoon, quere tonoraerate chabana nitajenaachara nejeein nereein,” naa Jesusone janate:

<sup>52</sup> “Esinaete osaoquicha. Inasiinte Abaraaun, satiin Cana Coaunera ere bera inoaesihuru, naajoaihunru inae oosichuruhalu inoaelu natiin, chere tonoraeraacha nitajenaachara nejeein neeurureta. <sup>53</sup> Abaraaun amurijiriinna nereei iite. Inae ohane jana ohacoaauruhalu Cana Coaunera ere bera inoaesihuru netonai natiin. Chaneeina jana ii nereei,” naauruha Jorioocurune janate:

<sup>54</sup> “ ‘Canuna inara curuaanaa caohati neeun,’ naain irihanune caohacharihei. Nete caque: ‘Caate acaihanejein canu calaohine. Nere tonoraache,’ nae Ofa Cana Coaunera. ‘Cacoaunera,’ naaiche niqui. Nete <sup>55</sup> coitucujueneeiche. Canune laaen coitucun. Inara rijijeein casaje nichaaunnena, ‘Coitucuhaun,’ nareeun. Esinaena rauhijiriin caraajenhane coaracaunna jaun, nere tonoraain caletoaana jaan ichaun. <sup>56</sup> Inara foeratera Abaraaunte, cau chauratane que catohaneein tururichaaunine coitucue. Nii jaunte inae ena cau turuhanune jaun corojeein rachoojoe,” naa Cana Coaunera Calaohi Jesusone jaunte:

<sup>57</sup> “Inasina saquichoona jaanacaaine coaalanaala, canacaanu foeratera Abaraaun coareei,” naauruha Cana Coaunera Calaohi Jesuso rai Jorioocurune jana:

<sup>58</sup> “Aihanu. Esinaena rauhijiriin aitoon. Inae inoaeluna Abaraaun ajiniha nesiha neeun canu,” naa Cana Coaunera Calaohi Jesusone jaun, <sup>59</sup> ajeri mucuutaure, que botosihuruhane coina. Ajeri mucuutaauruhane janate, jianatoroain acauru cataan cuhin, Teenforo caje mituhin amue.

## 9

### *Maosa rautaa Jesusone*

<sup>1</sup> Amuhemujuena jaunte leinjiin cacha maosaneein nejanoanaa coarae Cana Coaunera Calaohi Jesuso. <sup>2</sup> Coaraane janate:

“Chanuna maosaneein nejanoae caa cacha. Rai fojiaraauru osa caaun nenihane, rai nosa caaunna,” naain Jesuso caje bajaacaunune janate:

<sup>3</sup> “Aihei, coatiha nosa caun nihei. Niheichu fojiaraauru osa caaun nihei. Cana Coaunera ichanohi coaraa cachane coinete catohaneein nejanoae. <sup>4</sup> Inae caletoaeraacha icharate ichacaunnete ne, nainichaaunne cojoataa. Inae caa baiha nainerihaaunni. <sup>5</sup> Cau chauratane que nihanune quena,

chauratane cononeein neeun,”<sup>6</sup> naainte, atane choaae lune churutaain, biji couturi que laculacunejeein, itacariin nii maosa nota rujuaain:

<sup>7</sup> “Inae laaenra, taa necaojoanaa najaan Silohe inota culeenihura,” naa Jesusone jaun, cuhin culeecane caje turuhane janate, inae conoe nii maosa nota. (Silohe nanaate, Letono nanaa ne.)

<sup>8</sup> Inae nerautaa jana coaraainte: “Caana lauhajelauhajeein coriqui bajana-jaaoca,” naain ita caje bajaare nii laurijiracuru- nii jauriaa nitohanein coaraaauru.

<sup>9</sup> Niritiin ita caje bajaainte:

“Aca chujianrana,” naauruha tabaaurune janate:

“Aca nihane coalanaala. Tocoханиha chuhisi niqui, nete aca nene,” naaure leeochoaauru.

Nii janate raajenihane:

“Acaneeun chujianrana,” naa raajene jaun:

<sup>10</sup> “Inasina jana enene conoe inota,” naain bajaauruhane janate:

<sup>11</sup> “Nii leinjiin cacha- Jesoso neein curuajaain nenaate, atane choae lune churutaain, biji couturi que laculacunejeein, tucuacaain canota rujuaain: ‘Inae laaenra, necaonjoanaana jaaun Silohe culeenihura,’ naain caletohana jaun: ‘Ai,’ naain culeecaunne janate, inae conoe caa canotara,” naain bihane janate:

<sup>12</sup> “Aanca chaen nii cacha,” naain bajaauruhane janate:

“Jm, jm, jm. Aancachainti. Coitucuhaun,” nae nii maosa nerautanaa.

### *Nii nerautanaa maosa caje bajaauruha fariseeocurune*

<sup>13</sup> Nii janate nii maosa nerautanaa amaauruha fariseeocuru renene janate:

<sup>14-15</sup> “Inasiinte enene conoe inotata,” naain cotaain bajaare fariseeocuru nii cacha caje, nebetacanaa janonaa bana atane choae lune churutaain biji couturi que laculacunejeein tucuacaain nii maosa nota rujuaain, rautaa Jesusone jaun. Bajaauruhane janate:

“Itanicha que canota rujuarujuariin culeeratihane jana, culeecaunne janate inae conoe canotara,” naane janate:

<sup>16</sup> “Cana Coaunera caje nenea nihei nitohanai cacha, amihaniha nebetacanaa janonaa banana jaun,” naauruha tabaaurune janate:

“Inasiinte Cana Coaunera tocohaneein ichaa natiin, osaona nihane nitohanai ichanaa naineriheijaa,” naauruha nii leeochoauruna jaunte,

<sup>17</sup> coaiten enacoauneein:

“Tonaai jana ii, nii ichautaera cacha que,” naain bajaauruhane jana:

“ ‘Jerihane acate Cana Coaunera Ere berane,’ naanu canu,” naa nii nerautanaa maosane janate,<sup>18</sup> esentaarene. Esenetaaurenihana jaunte, fojiaraauru caje bajaare:

<sup>19</sup> “Caana inara calaohineein maosanein nejanoaa. Inasiina jana enene conoe rai nota,” naain bajaauruhane janate:

<sup>20</sup> “Aca chujian, acate canacaanu calaohi maosanein nejanoanaa ne.

<sup>21</sup> Inasiin chaaiti conoe enene rai nota. Niheichu nii rautaera coitucuhaacaanu. Cajejian bajaauche. Inae canaanai nihane coalanaala. Acate naine raaje bihane,”<sup>22</sup> naaure nii fojiaraauru, Jorioocuru curuaanaa coasiha.

“Acate Curisitone,” naain iriha chuneine, “Cau sinacoca asaae enohane jererihacacheein,” naauruha nii Jorioocuru curuaanaacurune raotojoein coitucuuhana jaunte:<sup>23</sup> “Cajejian bajaauche. Inae canaanai nihane coalanaala. Acate naine raaje bihane,” naaure nii fojiaraauru.

<sup>24</sup> Nii janate coaiten nii maosa niicha rautain cotijiain:

“Esinaen rauhijiriin beeu, Cana Coaunera notaracaa. Osaatotha nii cachane coitucuhacaanu,” naauruha Jorioocuru curuaanaane janate:

<sup>25</sup> “Osaatotha nii cachane coitucuhaaun canu. Acaihanejein maosa nihane nune caje, inae enene conoha canota neeinchana coitucuujeun,” naane janate:

<sup>26</sup> “Chatohaneente chete nitohanein conoha inotane coinata,” naain bajaauruha coaiteenne janate:

<sup>27</sup> “Inaera inara rai aitoonna. Chatonaaina nenacaaen bereeun. Chanuna coaiteen enacooaunein inara rai bihanune jerequiche. Jerihane inara netonaite nere tonorana jerequiche,” naane janate:

<sup>28</sup> “Iite laaen nii cacha ere tonoraai. Canacaanuna jana, jelai tein Moisesa ere tonoraacaanu. <sup>29</sup> Moisesa aina iriha Cana Coaunera neeichana coitucuhacaanu. Jana nii cacha coitucueraai caoachanainejein. Chacaje chaainti ecoonane,” naain nii maosa nerautanaa cotaicha rijitucuruhane janate:

<sup>30</sup> “Tara canota tihane caje coitucuhichene. Niheichu: ‘Naojoain caje uhe,’ naain coitucuhiche. <sup>31</sup> Cana Coaunera bajaa osaaonaaurune tonoraeniha Cana Coaunerane coitucuhacaanu raotojoein. Acaihanejein nere tonoraain niicha jerei ichaain nena cacha bajaanete coroatajane Cana Coaunera. <sup>32</sup> Nihei chunei, inoaelu caje coaunein nitohanein maosanein nejanoaa leinjiin cachane jana nota cono tera. <sup>33</sup> Cana Coaunera caje unaa nenihane noote catohanai ichare,” naane janate:

<sup>34</sup> “Osaotiin nejanoaaina jaun noote canacaanu relanaa jereeita,” naain nii maosa sitaature ita taojiaauruhana jaan loreri caje.

<sup>35</sup> Inae nii maosa sitaauruhane coitucuriin, coaraa cuha Jesusone janate que taca uhe. Nii jaunte caje bajae:

“Cana Coaunera Calaohi esenetaaina,” naain bajaane janate:

<sup>36</sup> “Eenje. Carai beeuna, rauhijiriin Cana Coaunera Calaohi nihane coitucuhin esenetaera Curuaanaa,” naane jana:

<sup>37</sup> “Canuna acaneeun,” naa Cana Coaunera Calaohi Jesusone janate, <sup>38</sup> nacatiha neseonraain:

“Esenetaanura Curuaanaa,” naane janate:

<sup>39</sup> “Canuna caa chauratane que turuun, maosacuru niha natiin, conoha rai notane coina. Jana, notaa nocoetonacaauru maosanein nihane coina,” naa Jesusone janate, <sup>40</sup> cuu aonajeeuruhana jaun:

“Canacaanu netonainoona maosanein nihacaanu,” naa tabaauru fariseeocurune janate:

<sup>41</sup> “Maosa neeichene, caseteco coariheehichein osa coreniha niqui. Nete, ‘Itolere canacaanuhacha ichai coaraain coitucuhin ichacaanne jaun maosa nihaacaanu,’ naaichene jaun, caseteco coaraa curiquichein nii coreniha,” nae fariseeocuru rai Cana Coaunera Calaohi Jesuso.

## 10

*“Chariji teeinti, acuujuu edaa enoe. Niite asijiauto ne,” naa Jesusone*

<sup>1</sup> Niritohane baihate: “Esinaena rauhijiriin aitoreeunni. Carenero ucuha acuujuu edaa enoite asijiauto ne. <sup>2</sup> Jana, rauhijiriin nacuujuu cuhane enoite beraicha esine ne. <sup>3</sup> Acuujuu beraichate, janone acuujuu joracaain, enohin curuaacuru curuaacuru que curuaatein, nii carenerocuru cotihacane tajiha uure, acaauru beraicha nihane ere coitucuuruhana jaun. <sup>4</sup> Nitohanein cotihanajaain, inae saain mituuru jana, acaauru ajiniha cuujihane jana, caaijie cuure nii carenerocuru, acaauru beraicha nihane coitucuruhana jaun. <sup>5</sup> Jana nejelau cotihanaacanete, que janoriin soroore,



nejelau ere nihane coitucuuruhana jaun,”<sup>6</sup> naain niqwi relanajae Cana Coaunera Calaohi Jesoso, coitucuuruhane coina niqwi. Nete, “Naaonjoain quete aite,” naain aonaain coitucuurene.

*Cachaauru corenihate oha cureein Jesoso*

<sup>7</sup> Nii jaunte, rauhijiriin aonacuruhane coina:

“Leinjiin canuhachana jianacoo cacha mitaeranu que nenea neeun. Cacolane cana Inaca Cana Coaunera rene turunaa nainihe chunei.<sup>8</sup> Nii jauriaa cajiniha unacaaurute, nechu jataain cacha coritaeraaunu que unacaaurulu ne niqwi. Nete, nere tonoraarene cacoitucueranuuru cachaauru.<sup>9</sup> Leinjiin cacorenihachate naine, cana Inaca Cana Coaunera bijiu tacaain aina neeichene.<sup>10</sup> Arajite inara curuaanaaneein nenea jere, nechu jataain nohaneein inara coritaain. Acaauru esenetaain, acaauru ere tonoraeraaurute caoachanainejeein nitajiha cuurureein. Canuna turuun, raotojoein rachoojoein cha latelanaala Cana Coaunera aina neeichene coina.<sup>11</sup> Canuna esinae rauhijiriin inara curuaanaanu que letononeein neeun. Nii jaunna oha cureeunni satiin canu cachaauru coreniha, nabana necairichaauruhane coataa, satiin quere tonoraain esenetaeraauru, necairichanaa coaraelanaala rauhijiriin Cana Coaunera aina nihane coina.<sup>12</sup> Nii curuaanaa neein nenea jereraaurute, nechu jataain core coinaacha aihuruhana jaun, niha acaauru aina nejerateein acaauru coineterane, cachaauru jaohin ratiriin sorooruhane acaauruhacha mucuhin sooruhane, cajihaneein ita caje riaaneure.<sup>13</sup> Nitohaneente rai cachaauru ratiriin soroore, nechu jataain curuaanaa neein nenea jerecuruha core coinana jaun, coaraain cuu nainaauruhane coina.<sup>14-15</sup> Canunajian nenacaaen cao-hacha nejeein curuaanaaneein neeun. Charijieein teeinti cacoitucuhiche nii rijijieeina Ofa coitucuun. Nii rijijieein inachu, canu cachaauru coitucuun. Jerichanejeein techu coitucunajaanune rijijieein cacoitucuure. Canuna canu cachaauru coreniha caraajenhane neteein oha cureeunni.<sup>16</sup> Nihachu naain nejelau canu cachaauru, cotihanaacaaun nete ne, ita aina inara tihanune coina. Cotianaacaaun nete, quere tonoraain uurureein. Inae nitohanihanena leinjiin canuhacha inara curuaanaa neein niha cureeunni, nitohaneein ita aina inara tihanu ne.

<sup>17</sup> Nere tonoraain caletoaana jaan ichacaaunna jaunte, jataain cacoelai cana Inaca Cana Coaunera. Nii corenihana caraajenhane netiha cureeunni, casohin cajaanuruhane coina, nena ichanaa cureeunni.<sup>18</sup> Canu jerenihanune, nihei chunei casohin cajaanaa nainerihe. Nena caraajenhane netiha cureeunni, nitohanihanune coina caletoa Ofa Cana Coaunerana jaun,” nae Cana Coaunera Calaohi Jesoso.<sup>19</sup> Niritoha Jesusone esenetaeraauru Jorioocurute, nii esenetaauruhichuru caje nejelau neleruhin neeure.

<sup>20</sup> Niichurute:

“Chanuna caa osaaonaa nechu aansai jaeloroheneein nenea cacha ere tonoraare,” naaure tabaauru itarai.<sup>21</sup> Nii jana nii esenetaaurerate laaen:

“Osaaocane noote caritiin erere. Chasiina jana osaaocane maosacuru nota cono tere,” naaure ita rai nejesinajeein.

*Cana Coaunera Calaohi Jesoso raarenihia Jorioocurune*

<sup>22</sup> Inae elohena nihane janate, Jerosaleeun ita taojiaain nii loreri inoaei Teenforo besaute beseta bitoaare Jorioocuru.<sup>23</sup> Nii jana nii Teenforo coonri seeonjoan- Salomoon curuaa siriin nenea asaae amuhemuheca Cana Coaunera Calaohi Jesusone jana<sup>24</sup> curuaacotaain, acaauru cataaun teteriin:

“Cha carajana ereree ii coitucuhacaanune coina. Rauhijiriincha letononeein ereeu, esinae Curisitoneeine,” naauruha Jorioocurune jana:

<sup>25</sup> “Inae bihanulu. Nii jana quesetaheehelu. Inae caletooa Ofana jaan ichacaaun inara notaracaae. <sup>26</sup> Nii coaraquiche niqui. Nete jauriaa aitocaaunne tocohaneein canu cacha neneeichene jaunte, caje nainaain quesetaeneeiche. <sup>27</sup> Coitucunajaain nihanune rijijieein techu, cacoitucuhin quere tonoraain neeure canu cachaauru. <sup>28</sup> Canuna acaauru rai nitajenaachara nejeein nenea ichaonaa teeun. Chaelai janonaa bananeriaain nitajeuruhane. Niheichu chaaen cacaje rulunajaera. <sup>29</sup> Satiin curuaanaacuru curuaanaa Ofa Cana Coaunera carai tenajaana jaun, nihei chunei cacaje rulunajaera. <sup>30</sup> Canuna, Ofa aina leinjiin Cana Coauneraneein nihacaanu,” naa Jesusona jaunte, <sup>31</sup> ajeri mucuutaure Jorioocuru, que bodoosihuruhane coina.

<sup>32</sup> Nii jaunte: “Itolere caohachana ichaaun satiin coarajeeichene notaracaae, Ofa letononeein. Chatohanei corenihana nitoaneein ajeri que canu bodoosicheeiche,” naa Cana Coaunera Calaohi Jesusone janate:

<sup>33</sup> “Caohacha ichaaine coreniha ajeri que ii bodoosiriahacaanu. Cana Coaunera niha nocoetiin, Cana Coaunera rohecaaina jaunna ichana jerichaanu. Cana Coaunera nihee. Raujiaain cachaneein natiinte Cana Coaunera niha nocoetohi,” naauruhane jana:

<sup>34-36</sup> “Inarate casohin cajaanaa jerequiche, ‘Ofa cana Inaca calaohi nichaaun,’ naanune coreniha. Chaaen techu nii coreniha, ‘Ofa cana Inaca Cana Coaunera roheca,’ cacoeiche, Cana Coaunera chujian raajenihane, ‘Canu calaohichuru’ naa inoaelu ichauhenaauru rai, rai quiricha inoaei cuhanena jana, esenetaaichelu satiinina jaun chujian, caa chauratane que caletooa Ofa cana Inaca, niicha jerenohi ichacaaunne coina natiin. Inasiina Cana Coaunera rohecareeun, ‘Ofa Cana Inaca calaohi nichaaun,’ naanune coreniha. <sup>37</sup> Ichaa Ofane tocohaneein cha ichaenihanune coa canu esenetaache. <sup>38</sup> Aihane jaun, canu esenetaeneeichene nihanatiin, nii canuhacha ichai coaraain esenetaaichenete caohachae. Nii ainate canu aina niha Ofa Cana Coaunerane jana, canu rai Calahineein aina nihanune esenetaaichene caohachae,” naa Jesusone jana,

<sup>39</sup> coaiten mucuhin amanaa jerecuruhane jana, acaauru que janoriin amue Jesuso.

<sup>40</sup> Acaauru que janoriin amuhinte Jorodaan jerau cauha cue. Nii jauriaa cachaauru coujunacatihalu Joanna jaun turuhin cuu ne. <sup>41</sup> Nii janate rene turuha uure arajiin cachaauru. Cuu turuhin coaraain:

“Esinaete chuhisi rauhijiriin aite Joan, caa cacha que. Niicha ichai ichaain cana notaaca Jesusone rijijieein cana notaacane que airijiinte, esinae rauhijiriin aitohane tocohane,” naainte <sup>42</sup> Jesuso esenetaure cuu nenacaauru cachaauru.

## 11

### *Oha Lasarone*

<sup>1</sup> Naain Betaniau coroatajai baihuru aina nenea Lasaroneein curuajai jetaote, banejelanaala cunaite.

<sup>2</sup> Marata, Mariha, naa nii baihuru curuaa. Nii Marihate, Cana Coaunera Calaohi Jesuso tijia choaae erene jujui jataain coreti chorohin, couturiji que jacoraera ne.

<sup>3</sup> Nii jaunte cunaitiha nii acaauru cona Lasarona jaun, “Cunaitiha iicha belaaicha curuaanaa,” naain Jesuso rai berateure.

<sup>4</sup> Nii jaunte Jesuso rene turuhin beeuruhane jana: “Coatiha nii cuaaeto-ha nii cunai caaun orihaain. Cana Coaunera coitucuhin, ‘Caohatoha Cana Coaunera Calaohi,’ naain Cana Coaunera Calaohi coitucuruha satiin

cachaurune cointe cunaite nii cacha,” naainte cuelanaala cuu coroata janohin ne Cana Coaunera Calaohi Jesoso. <sup>5</sup> Nii baihuru aina curataain belainaaca natiinte <sup>6</sup> “Cunaitiha Lasaro,” naain berateeuruhane jana. <sup>7</sup> coroata janohi cuu nihane baiha:

“Chajaauchete coaiten Jodea cunichaache,” naa Jesoso, aina nerelanaa nichaanune raine janate:

<sup>8</sup> “Jaitinootera carajaje, ishohin ijiaonaa jerecuruha Jorioocuru, ajeri que ii bodoosiine. Nii atiin inachura coaiten ucuaae cunaa jereeite cacha relaera,” naacaanune janate:

<sup>9-10</sup> “Tana, cojoanonaatein caletoaa Ofa Cana Coaunerana jaan ichacaaunne nihane coitucuhichene. Ichaenihanune, canuhachana baasoneein nedareeunni,” nae Jesoso.

<sup>11</sup> Nii baihate: “Siniha cana belaicha Lasaro, nocoa inae nocoa curichaaun,” naa Jesusone jana:

<sup>12</sup> “Aihana jaunte chujian, sinihana jaun nerautareein,” naacaanu. <sup>13</sup> Esinae sininaa que jecha aite naacaanuna jaunte,

<sup>14</sup> rauhijiriin: “Inae oha Lasaro. <sup>15</sup> Caoacha quete cuu nenihanune jana ai. Inae laaen jataain quesenetaa curiquicheein,” naa Jesusone jana:

<sup>16</sup> “Chajaauchete cana netonai aina cunichaache, aina jiniiquiin ohacachene coina,” nae nii Tomasi canacaanu rai. (Nii Tomasite curuaateure Fafione neei, fafione nihana jaun.)

#### *Onaa ichateein, rai ichaonaa tera niha Cana Coaunera Calaohi Jesusone*

<sup>17</sup> Nii janate Betaniau turuha Jesusone jana, inae jena janoha atane neruujuene beure. <sup>18</sup> Saaneein itaraeniha Jerosaleen caje nii Betaniane jaunte, <sup>19</sup> tajiha caje turuhacooaure Jorioocuru, nii onaa cacha baihuru Marata, Mariha, naaonjoain suujua nunaaauruhane coina.

<sup>20</sup> Nii janate turuelalajeein tajiha uujiha Jesusone coitucuuriin que taca uhe Marata. Jana, Marihate, loreri asaae nedae.

<sup>21</sup> Nitohaneein cuhin Jesoso que tacaain: “Cau neeichene jana nihane, oriheiche canejerata curaanaa. <sup>22</sup> Nete, chaelai bajaachene ichei tiha cureeinche Cana Coaunera,” naa Maratane jana:

<sup>23</sup> “Ichanaainte coaiten nichaurareeinche,” naa Marata rai Jesusone jana:

<sup>24</sup> “Eenjeen airichaaainche chuhisi. Inae besautiha cana janonaane bante, coaiten ichanaain ichaoha cuurureeinche oonacaauru niquicha,” naa Maratane jana:

<sup>25</sup> “Canuna onaa ichateein, rai ichaonaa nitajenaa charanejeein nenaana jaan teraneeunche. Quesenetaerate, ohane niha natiin ichaoha cureeinche. <sup>26</sup> Satiin jaiti ichahin nenacaauru quesenetaanete, ohane niha natiin, chabana nitajenereeinche. Caa caitoonjoan esenetaaichena,” naa Jesusone jana:

<sup>27</sup> “Eenjeen, iite Curisito neein- Cana Coaunera Calaohineeinchene esenetaanuchera. Iite caa chauratane que turuha uha niicha jerecuri canacaanuhacha cohajei ineincher,” nae Marata.

#### *Lasaro atanebana choae chanaa Jesusone*

<sup>28</sup> Niritohane baihate, nocoasai Mariha cotihaca cue Marata. Rene turuhinte: “Taute turue cacha relaera. Ichotijiaeratiha jaunna ii cotihaca uun,” naa Maratane jana, <sup>29</sup> luhecotariin nimihuritiin Jesoso coaraa uhe Mariha. <sup>30</sup> Nii janate nii ratiriha Maratana jaaun jelaiha ne Jesoso, jaiti nii neseu turuelanaala. <sup>31</sup> Luhecotariin nimihuritiin uha Marihana jaunte caajie uure nii loreri asaae aina neein suujua nunaa nenacaauru Jorioocuru,

“Naain atanebana choaae jecha inaderaa cue,” naain niqúi caaijie cuure nii Jorioocuru.

<sup>32</sup> Nii janate Jesoso rene turuhin nacatiha neseonraain:

“Cau neeichene jana nihane, oriheiche canejerata Curuaanaa,” naain <sup>33</sup> chanaa Marihane jana, aina chanaauruha Jorioocuruna jaun, jataain inaderaain:

<sup>34</sup> “Chu atane rucuhecure,” naain bajaa Jesusone jana:

“Nota taute atane rucuhecurera Curuaanaa. Chajaautejian coanicha,” naauruhane jana <sup>35</sup> chanae Jesoso.

<sup>36</sup> Nii jaunte: “Jataainte coinaderae,” naaure Jorioocuru tabaauru.

<sup>37</sup> Nii jana leochaaurute jana: “Tajian caa cacha, maosa nota cono tihalune. Tajian jana naineriha chaelai ichaa oheniha Lasarone coinane,” naaure nii leochaauru Jorioocuru.

### *Oo caje ichanaa Lasarone*

<sup>38</sup> Nii jaunte atane bana rohan turuhin, coaiten inaderae Jesoso. Ajeri jachu cuhane ita rucuhecuruha Jorioocuru, jelai ajeri que fuhina jaun:

<sup>39</sup> “Joracaauche,” naa Jesusone janate:

“Inae jerihane nirinichache cacha natiinta. Inae jena janohache aiha cachane natiinta Curaanaa,” naa nii nijiaonaa cacha bai Maratane jana:

<sup>40</sup> “Inaera ichei, ‘Esenetaaichenete Cana Coaunera ichanohin caohati coariquicheeincha,’ naain ichei aitoonchena,” naa Cana Coaunera Calaohi Jesusone jana <sup>41-42</sup> joracauruhane jana, dede coarajeein:

“Nariha Ofa, ii bajaanune satiin quicha bajanojoin tenajaaquui bajaanune naineeine coreniha. Nii jaunna ichei aitoon, aonacuruha nuricho que cau nenacaauru cachaaurune coina, aonain esinae rauhijiriin ii caletohaine esenetaauruhane coinara Ofa,” naane <sup>43</sup> baihate:

“Lasaro, mituu nii lai caje,” naa Cana Coaunera Calaohi Jesoso tonijiaine jana, <sup>44</sup> tajiha conaara tijianeein mituha uhane jana: “Batuhichuchete jianacoon mituhine,” nae Cana Coaunera Calaohi Jesoso.

<sup>45</sup> Nii ainate Cana Coaunera Calaohi Jesoso esenetaaure le lauriin Jorioocuru, nii Mariha corianiha cunacaauru.

### *Jesoso mucuuruhane rai neeuruha fariseeocurune* (Mt 26.1-5; Mr 14.1-2; Lc 22.1-2)

<sup>46</sup> Nii jana, acaauru tabaauru jetaote turuhin biha cuure fariseeocuru rai.

<sup>47</sup> Nii jaun jetaote itataojiaaure fariseeocuru, batirichuru curuaanaacuru, saain cocoainanacaihuri nii que ita rai ereereecuruhane coina. Nii jaun jetaote ita rai:

“Inae itolere ichaa nii cacha. Inasirihacacheta. Maosacuru rautaain, onaa ichateein, lenone faain, itolere ichaa inae. <sup>48</sup> Naajeein inauheneeicha coarajihacachenete, esenetaacoaauruha satiin cachaaurune, cana cairichaurureein Romanocuru rai cocoainanacaihuri. Cana raite caa ita taojianaana jaan loreri Teenforo chamuhitiin cana cairichaurure,” naaure jetao Jorioocuru curuaanaacuru.

<sup>49</sup> Nii jana jetaote, cuune leinjiin Caifasineein curuajaain batirichuru curuaanaa. Nii jetaote:

“Joareeinte ereereequiche. <sup>50</sup> Nita coitucuhichene, cana caohachanu que tejian oha cureein nii leinjiin cacha, nabana necairichanaa coaracaache satiin Israeli cocoaicha nichaachene coataa,” nae jetao acaauru rai nii Caifasi.

<sup>51</sup> (Coatiha suujua caje coauneein rocohin aitohi nii Caifasi. Nii ajaana cuhane batirichuru curuaanaa neein nihana jaunte coroatajane Cana

Coaunera, nabana necairichaa Jorioocurune coataa oha curichaaain Cana Coaunera Calaohi Jesusone que aitohane coina. <sup>52</sup> Coatiha Jorioocuruhacha coreniha oha curihaain niqui. Satiin chauratane sacutaain riaaneein ne-nacaauru Cana Coaunera calaohichuru jitariin taojiaane cointe aicheein.) <sup>53</sup> Nitohaneein oo caje Lasaro ichtihane caje coauneeinte, Cana Coaunera Calaohi Jesuso que necosuujuaaure Jorioocuru rai cocoainanacaihuri, sohin jaaoruhane coina.

<sup>54</sup> Nii jaunte Jorioocuru rai cocoainanacaihuri rai ecocoelanaala nii Jodea batane caje mituhin naain Efaraiun cue Jesuso. Cacha areroo rohan nenea neseu Efaraiun cuhin cuu ne, canacaanu aina.

<sup>55</sup> Fasocaa cataihajein, neseuru neseuru caje naain Jerosaleeun cuhajeure, acaauru necoaauna rijijiein naunatajaain, necaonjoaain jatoroaain Fasocaa beseta bitohauruhane coina. <sup>56</sup> Nii Jerosaleeun turuhinte cuu cajaneein Jesuso ariirijieure. Cuu nenea ita taojiahuruna jaan Teenforo asaae ita taojiaain:

“Beseta bitohanacha urichaii,” naain itacaje bajaare, <sup>57</sup> “Chunocoha, ‘Cuute ne,’ naain coitucuhane, beinete mucuhin raeratihacaanu,” naauruha fariseeocuru, batirichuru curuanaacuru, naaonjoainurine jaun.

## 12

### *Jataain Jesuso belaiha Marihane*

<sup>1</sup> Saota janonejein lanajeeca Fasocaa janonaane janate, nii oo caje niicha ichtatei Lasaro coaraa cue Jesuso naain Betaniau. <sup>2</sup> Nii janate cuu beseta bana rijijiein Jesuso coroaateure, raoti lenone que. Lasaro bai Maratate, acaauru rai lenone lauriae.

<sup>3</sup> Nii jana litoro cataaun uujoaain erene jujui coreti uhaain, que Cana Coaunera Calaohi Jesuso tija rujuaain, couturiji que jacoraa Marihane jana, juujijiaain bijiihaque nii loreri asajai.

<sup>4-5</sup> Nii jaunte: “Chanuna nichata fashai janonei amihanenaa core tochaneein necoretelanaala aihure, cairichaihuri coroatajanenarichaae,” nae nii canacaanu lechoonca coroataja Simoon calaohi Jodasi Isacariote, nii Jesuso coulurujueranu. <sup>6</sup> Coatiha esinaae rauhijiriin cairichaihuri coroatajanena jerihane caaun aitohi. Asijiautonihana jaunte aite, nechu jataain aca nii coriqui raane jerena caaun. Aca canacaanu coriqui beraichaneein nihana jaun raotojoein basijiauhane cointe aite.

<sup>7</sup> Niritoha Jodasine janate: “Coa rerohecaa. Cajabereeo rucuhecuruha najaannu que niicha rucujuei nihana jaunte ichae. <sup>8</sup> Cairichaihuri coroatajanena jereenete, nereein inoaelu netojoein arajiin cairichaihuri. Coatiha inoaelu netojoein cau nerinaaunni inara aina,” nae Jesuso.

### *Lasaro sohin jaonaa jerecuruha Jorioocurune*

<sup>9</sup> Nii baihate, Betaniau niha Jesusone coitucuuriin coaraa cuure Jorioocuru. Coatiha acaacha coaraa aihuruhi. Lasaro- nii oo caje niicha ichtatei coaracuruhane cointane maajeeinte aihure.

<sup>10</sup> Nii jaunte ita suujua rijitojoein, ita suujuau tacaain, “Chatohaneeinte acaentonai sohin jaonaaneeineta,” naain <sup>11</sup> nii Lasaro netonai que necosuujuaaure batirichuru curuanaacuru. Ohane jana ichtiha Jesusone coaraain esenetaauruha le lauriin Jorioocuru, acaauru jianeeinna jaun.

### *Jerosaleeun turuha Jesusone*

*(Mt 21.1-11; Mr 11.1-11; Lc 19.28-40)*

<sup>12</sup> Nii janate Jerosaleeun cuhacoaaure arajiin cachaauru, Fasocaa beseta bitoaa.

Nii cojoanoote turuha urichaaain Jesusone coitucuure. <sup>13</sup> Nitohaneein coitucuhinte, elele alo saaujiin amaain que taca cuure. Que tacaain: “Caohacha quete uhicha- canacaanu corootajaneraunu que Cana Coaunera letono. Cachuura,” naain, “Caa Cana Coaunera letono belaihuruhine itolere cachaauru. Caa Isaraeli Curuaanaa *Rey* belaihuruhinera,” naain, ehequuin corojeein Jesoso raare. <sup>14</sup> Nii janate cabario tocohaneein nena boro ichoaae iniin laulauquuin turuha uhe Jesoso, aitoha Cana Coaunera Quiricha Inoasi cuhanene tocohaneein:

<sup>15</sup> “Coo coasichachera

Jerosaleen cocoaichacuru.

Coaracuche, boro choaaete

laulauquuin turuha ureein

inara Curuaanaa *Reycha*,”

naa Cana Coaunera Quiricha Inoasi cuhanene tocohaneinte turuha uhe Jesoso.

<sup>16</sup> Nii janana caoachanae netojoein aonajihacaanu aina nerelanaa nichaanune. Nii baiha inae dedeeu cuha Jesusone janate, canacaanu sujuau neeorite, niriitiin aitoha Cana Coaunera Quiricha Inoasi cuhanene tocohaneein aihane coaracaanune jaun.

<sup>17</sup> Oo jana nii Lasaro ichatiha Jesusone coaraauru cachaaurute nii leochaauru rai beeuruhana jaun, <sup>18</sup> nitohaneein onaa ichatihane coitucuruhanana jaun, Jerosaleeun turuha Jesusone jana, que taca cuure. <sup>19</sup> Nii janana coarajenajaain: “Inae coaraquiche. Inae cha chana nainihaacheta. Coaracuchera. Saainte aina cuurera,” naain ita rai ereerejeeure fariseeocuru nejesinajeein.

### *Jesoso arihuruha Curiecocurune*

<sup>20</sup> Naain Jerosaleeun cuhin Fasocoo beseta bitoha cunacaauru aina cunacaauru <sup>21</sup> Curiecocuru tabaaurute Jesoso aina nerelanaa Ferifi rene turuhin: “Jesoso coaana jerichaanura curaanaa,” naare. (Nii Ferifite Calileea batane que nena Betesaaida cocoaichane.) <sup>22</sup> Nii janate Aanderesi rai bihana jaun, jiniiquuin cuhin Jesoso rai biha cuure. Jesoso rai beeuruhane janate:

<sup>23</sup> “Inae laen ecu tiha ohanune cojoinaca. Canuna inaraacha cohajei cachaneein neeun. Ohanune baihate satiin curuaanaacuru curuaanaa niha caenoaa cureein Ofa Cana Coaunera,” nae Jesoso. <sup>24</sup> Niriitiinte, “Esinaena rauhijiriin aitoon. Charijeein teeinti lecuhejeein temueraeniha arosone, omaroelanaala jerichanejeein ne. Jana atane choaae naluhane, omarohin arajiin inacaain nefae. <sup>25</sup> Nii rijijieein techu ne cacha netonai. Niicha jereeicha ichaa cachanete, temueraeniha ne, aiha arosone rijijieein jerichanejeein ne. Nirijieeinte, nechu jataain joareein niha cureein. Jana cha que casilanaala Cana Coaunera jerenohi ichaa cachanete, Cana Coaunera bijiu taca cureein. Jana, ainihanete nitajiha cureeinha. <sup>26</sup> Quere tonorana jerera, quere tonoraaine. Nii quere tonoraerate, nii cuhanune jaun niha cureein caniha. Chaen techu, quere tonoraera, Ofa rai coroaenacai ichareein,” nae Jesoso.

### *Orichaaine biha Cana Coaunera Calaohi Jesusone*

<sup>27</sup> Nii baihate: “Nererojoeaa jataain casuujua. Chatohanerihanu coaetaata. Nihei, ‘Cacorataaneeu Ofa, casohin canu ateinaauruhane coataa,’ naain erena nainihaun, nii coina cau turuhanune jaun,” naane baihate, <sup>28</sup> “Ofa, coaiten iicha ichana jerei ichaain caa cachaauru notaacu, aihute coaraain, ‘Caohatoha Cana Coaunerara,’ naaurumiin satiin cachaauru

coaraaincha,” naain Cana Inaca Cana Coaunera baja Jesosone janate dedeeu tonii:

“Inae ichacaaun cacoitucuuruhane coina. Inae coaiten icharichaaunni coaraain canu nichaaunne coitucuuruhane coina,” naain toni dedeeu.  
<sup>29</sup> Naa dedeeu toniine jana:

“Arara jecha,” naaure nii cuu neein aonajeeurera cachaauru. Nii jana tabaauru: “Cana Coaunera letonote aite,” naauruhane jana:

<sup>30</sup> “Coatiha canu rai aitoi. Aonaquichene coinate inara rai aite. <sup>31</sup> Inae chauratane curuaanaa Moconajaera aina jaoleneein neeururichaaain inae Cana Coaunera coitucuuruhi. <sup>32</sup> Inae ecuun coroso que nihanunena, satiin quesenetaaurera raa cureeunnicha,” nae Cana Coaunera Calaohi Jesoso. <sup>33</sup> Niritohane ainate, “Naaonjoaainte oha cureeincha,” naain coitucuure satiin cachaauru.

Niritoha Jesosone jaunte: <sup>34</sup> “‘Onaachara nejeeinte nirijieein niha cureein Curisitora,’ naa canacaanu quiricha inoasi cuhane natiin, chatohaneeina coroso que ecuun nere nii cachaneein nejanohanaa. Charijina nii cachaneein nejanohanaa ne,” naauruha Cana Coaunera Calaohi Jesoso rai jana:

<sup>35</sup> “Canuna cacha cononeein neun. Basijiin reintiariinne inara aina neorihun. Quesenetaauche, inae inara ratirihanune, nocohenaanau nitajeichene coataa. <sup>36</sup> Cau jaiti nihanune cojoataa quesenetaauche, canu cachaneein neeichene coina,” naane baiha jianatoroaain acaauru caje naasi Cana Coaunera Calaohi Jesoso.

### *Jesoso esenetaaureniha Jorioocurune*

<sup>37</sup> Itolere maosa rautaaain, onaa ichateein, lenone faain, naojoaan acaauru notaracae Jesoso natiinte, esenetaaurene Jorioocuru.

<sup>38</sup> Inae niritiin laenaain bihalu inoaelu Cana Coaunera Ere bera inoasi Isaihasi najaunte, nii laconaa nainene:

“Cha canacaanuhacha  
 beebejei esenetaete  
 curuaanaa,”

naainte:

“Chariji jana iicha ichai  
 coaraain esenetaete  
 curuaanaa”

naain laenaelu Isaihasi. <sup>39</sup> Nii jaunte esenetana jerecurenihaluna jaun coaiten laenaain:

<sup>40</sup> “Jauriaa esenetana  
 jerecurenihana jaun,  
 inae acaauru suujua anioaan  
 Cana Coaunerana jaunte,  
 turuha Cana Coaunera Calaohine jana  
 coitucuurene,  
 nota que coaraain  
 nesoone caun  
 enaraa coitucuuruhane coataa.  
 Nitohaneeinte  
 tenajae Cana Coaunera,”

naainte <sup>41</sup> laenaelu Isaihasi inoaelu, cajiha cana rai chauratane que turuha uha Jesosone ajiniha. Ichoaichanhate nii coaraain caritiin laenaelu Isaihasi inoaelu.

<sup>42</sup> Nii natiinte saain esenetaurenihane caniha, esenetaaure araijiriin. Co-cainanacaihuru tabaauru niha natiinte esenetaaure niqui. Nete chunei rai beurene, nii ita taojiauruha najaan loreri sinacoca caje sitanajaa

fariseeocurune coataa. <sup>43</sup> Acaauru belaiha Cana Coaunerane rautaauruhane amuritoheriin acaauru belaiuruha acaauru araichurune jerecuruhana jaun.

*Nereecha que cachaauru coulurujiha Jesusone*

<sup>44</sup> Nii jaunte tonijiaain: “Quesenetaera, coatiha canuhacha esenetari-naain. Nii caletoera Ofa niha natiinte esenetareein quesenetaera.

<sup>45</sup> Cacoharaerate nii caletoera netonai coarae.

<sup>46</sup> Canuna caa chauratane cono neeun. Canuna caa chauratane que turuun, nabana nocohenaana niha quesenetaerane coataa. <sup>47</sup> Quere tonoraeniha chuneine coatihacu canu coulurujuerinaauni. Coatihacu caa chauratane que nenacaauru coulurujueranu que uhaun. Jianacoon niha caa chauratane que nenacaauru cachaaurune coinana turuun. <sup>48</sup> Chariji teeinti, ‘Caohachaaaita,’ naain quere tonoraene. Niite coulurujiha cureein caa quicha beebejei Erenaa, inae saa cana janonaane bana, <sup>49</sup> casuujua caje rocohin aitenihanune jaun. Caletoera Ofa aitoonjoaacha quena caa aitiin inara relaun. <sup>50</sup> Ofate caletoae nitajenaachara nejeein niha canu ere esenetaain tonoraerane coina. Nii jaunna caletohane rijijieein, caa aitoon,” nae Jesuso.

## 13

*Aina nerelanacaauru tijia culeeca Jesusone*

<sup>1</sup> Le janojoein lanajeeca Fasocaa besetane janate, inae Cana Inaca rene cauha cuhane catainaaecane coitucue Cana Coaunera Calaohi Jesuso. Itolere janonaa bana chauratane que nenacaauru cachaauru belaiha coichana aina cutaainna jaunte, esinae rauhijiriin belainaacane coitucuuruhane coina raajenihane netiha cureein. <sup>2-4</sup> Nii jaunte aina nerelanaa nichaanune aina lenone Jesuso. Nii janate cuune canacaanu aina Simoon calaohi Jodasi Isacariote, suujua saruha Moconajaerana jaun Cana Coaunera Calaohi Jesuso coulurujueranu. Nii jana satiin curuaanaa neein tiha Cana Inaca Cana Coaunerane baiha, Cana Coaunera caje uhane coitucuhin, inae jelaiha cauha cuhane coitucue Cana Coaunera Calaohi Jesuso. Nii janane jaiti nitohanein nerichaaaine coitucuelanaala lenonejihacaanune jana, lenoneeo jiaaeriin, nobiri rocoriin, jaleri que faino balutaain, <sup>5</sup> baandeja cuhane acau chotaain, canacaanu tijia culejeein, nii rai faino que canacaanu tijia jacorae Cana Coaunera Calaohi Jesuso.

<sup>6</sup> Nii baihate Simoon Fedoro tijia culeena jeriha Jesusone jana:

“Iina catiha culeena jereeite curaanaa,” naa Fedorone jana:

<sup>7</sup> “‘Naaonjoain coinata caa ichae,’ naain coitucuheei. Nii baihate coitucuriquiin,” naa Jesusone janate:

<sup>8</sup> “Chaaelai janonaa bana nihei catiha culeequine jerichaaunne,” naa Fedorone jana:

“Ii tijia culejenihanune, canu aina nena naineriheini,” naa Jesusone jana:

<sup>9</sup> “Aihana jaun, coa catihacha culeeca, cacoi, cacoturi naaonjoaine maa-jeein culeecura Curuaanaa,” naa Simoon Fedorone jana:

<sup>10</sup> “Enanejeein necaojoanaa, jitariin jaberocone maa-jeein culeera latiheei. Leinjiin rai tijia culeeraachate late, enanejeein necaojoane baiha niha natiin necalanoaeca rai tijia najaun. Saainte niqiu culeenohineein neeiche. Nete ne inara jana leinjiin jaiti <sup>11</sup> culeenojoinelanaala,” nae Jesuso, Jodasi Isacariote que, coulurujuerichaaain Jodasi Isacariotene coitucuha najaun.

<sup>12</sup> Acaauru tijia culeecane baihate, nobiri curujuaain, coaiten mesa choae nelauriaain: “‘Naaonjoane jaunte caa cana tijia culeje,’ naain coitucucuche.

<sup>13</sup> Rauhijiriinte caque, ‘cacha relaera,’ naaiche. Chaen techu, ‘Curuaanaa,’



naaiche, rauhijiriin aca nichaaunna jaun. <sup>14</sup> Canu, inara relaeraneen, inara curuaanaa neein nihanu natiina, inara tijia culejeeun. Nirijieein inara suujua coaraain ita tijia culeequichenete caohachae. <sup>15</sup> Charijieein teeinti aihun, nirijiein chabana necoasitaelanaala, raotojoein ita belaaain neeuche.

<sup>16</sup> Inara curuaanaa neein, inara relaera neein nihanu natiin, inara tijia culejeein nihanune jaun, jerichanejeein carijijieein satiin cachaauru belaaain, inara suujua caje coauneein niha natiin, chaelai ichacuche, 'Naaonjoaain nihanune jaun, naaonjoain ichana nainihaaun,' nanaa coacuelanaala ichacuche. <sup>17</sup> Inara suujua coaraain, ita coroataja neein, ita belaaain, caa caitono aonaain tonoraachenete, raotojoein neriquicheein. <sup>18</sup> Nete, caohachananejeein satiin ena neeichene rijijieein nenereicheein. Janijiina satiin inara raain neeunlu niqui. Nete, 'Caniha nejeratereein leinjiin caniha lenonei,' naalu Cana Quiricha Inoasi cuhanene rijijieeinte, caniha nejeratereein leinjiin. <sup>19</sup> Jaiti aihei niqui, nena letonoha inara rai beeun, inae caque nejeratihane, Cana Coaunera Calaohi Curisito nichaaunne coitucuhichene coina.

<sup>20</sup> Esinaena rauhijiriin aitoreeunni. Chunocoha quiicha letoai raanete, jerichanejeein canu raane rijijieein rareein. Nii canu raane rijijieein techu, caletoaera Ofa Cana Coaunera rareein," nae Cana Coaunera Calaohi Jesoso.

### *Coulurujia Jodasine biha Jesusone*

*(Mt 26.20-25; Mr 14.17-21; Lc 22.21-23)*

<sup>21</sup> Nii janate: "Esinaena rauhijiriin aitoreeunni. Leinjiin inara caje cachate cacoloruheca cureein," naain be Cana Coaunera Calaohi Jesoso. Niritiinte jataain inaderae Jesoso, coulurujerichaaain niicha belaaain jaun.

<sup>22</sup> Nii janana, itaacha cajanacajanaain itaacha coaracaanu aina nerelanaa nichaanune, "Caa quete aite," naain nii naitoonjoa coitucueniha caanune jaun.

<sup>23</sup> Nii jana Jesoso roan neein lenonejianune jana, <sup>24</sup> canu cojoeluhin: "Chana icholuruherete, curuaanaa" naain caque bajaeratiha Simoon Fedorona jaun, <sup>25</sup> Jesoso roan naurutaain nuricho nainejeein metoroaain:

"Charijina icholuruherete, curuaanaa," naain bajaanune janate:

<sup>26</sup> "Saan. Coarajeeujia. Obene que faan setejiariin tihanune jana raerate, aca nereein," naain obene que faan setejiariin, Simoon calaohi Jodasi Isacariote rai te Jesoso. <sup>27</sup> Obene que setejianohin faan raain quiha Jodasine rijieonritiinte, Jodasi suujua sarue Moconajaera, Cana Coaunera Calaohi Jesoso coulurujiane coina.

Nii jaunte: "Letonoaneein, ena nii iicha ichana jerei ichaau," nae Jesoso, Jodasi rai. <sup>28</sup> Nii janana, "Naaonjoain ichaane cointe aite," naain coitucuenihacaanu. <sup>29</sup> Nii jaunna, "Aca canacaanu coriqui beraicha nihana jaun jecha beseta rai chaelai inejei coretihane coina aite," naacaanu. "Ainiane, cairichaihuru rai chaelai inejei coreteein tihane coina jecha aite," naacaanu coitucuenihacaanune jaun. Nii janate aine. <sup>30</sup> Nii setejiariin Jesosohacha tei faan quihane baihate mituha cue, inae nocohecane jana Jodasi.

### *Namu biha Jesusone*

<sup>31</sup> Inae mituha cuha Jodasine janate:

"Inae laaen caohatiin, rauhijiriin inaraacha cohajei Cacha Calaohi nichaaunne coitucuriquicheein, chaen techu canu aina cuaain, 'Naaonjoaan Cana Coaunera' naain Ofa coitucuriquicheein. <sup>32</sup> Charijieein teeinti, aca neein niha Ofane coitucuerateen inara que. Nii rijijieein techu, inara que canu neein nihanune coitucueratereein inae ena sorotiin Ofa Cana Coaunera. <sup>33</sup> Inae carajaain inara aina nerihaaunni canaanaihuru. Canu

aririquicheein niqui. Nete, aitocooaun Jorioocuru raine rijijieein, canu cunajaan cunaa naineneriquicheein. <sup>34</sup> Inae ena nenea caa erenaa bihanu inara rai, cacoichana aina cutaain inara belaihanune rijijieein jiniiquiin ita belaaain neeichene coina. <sup>35</sup> Satiin chauratane que nenacaaurute, quiicha relaurineeeichene coitucuha cuurureein, jiniiquiin ita belaaichene coaracuruhane,” nae Cana Coaunera Calaohi Jesuso.

*Jesoso coitucuha nocoeniha Fedorone*  
(Mt 26.31-35; Mr 14.27-31; Lc 22.31-34)

<sup>36</sup> Niritoha Cana Coaunera Calaohi Jesusone jaun:

“Chuna cureeite Curuaanaa,” naa Simoon Fedorone janate:

“Cuhanune jaun jaiti casaauna nainihe. Nii baihate casaaureeni,” naa Jesusone jana:

<sup>37</sup> “Chanuna ii sacunaa nainenereunte curuaanaa. Nainichaaun ichoreniha ohanune,” naa Fedorone jana:

<sup>38</sup> “Esinae chachu naineei cacoreniha ohine. Esinaena rauhijiriin ichei aitoreeunni. Iriha ataoharine ajiniate, nichata saain, ‘Jesoso cacha nihaunta,’ naa curiquiin,” nae Jesuso, Fedoro rai.

## 14

*Cana Inaca rene turunaa najaan neein niha Jesusone*

<sup>1</sup> “Coa nererojoecaache. Cana Coaunera esenetaaichene rijijieein quesene-taauche. <sup>2</sup> Lanaai Ofa loreri asaae turunaa najaan cuu turuhin raotojoein neeichene jaanu. Nenihae jananihae coatiha berihaun. Aihana jaunna, inara turunajaanu rucuheca cureeunni letonoa inara ajiniha. <sup>3</sup> Inara najaanu rucuheca cuhanune baihana coaiten ureeunni, inara raa tajiha caniha neeichene coina. <sup>4</sup> Inarate nii curichaunnine jaan coitucuhiche. Nii jaunte nii cuhanune jaun turuha cunaa nainiquiche tonajelanaala,” naa Cana Coaunera Calaohi Jesusone jaunte:

<sup>5</sup> “Nii kuhina jaan coitucuhaacaanuta Curuaanaa. Inasiina coitucuhin urichaanuta,” naa Tomasine jana:

<sup>6</sup> “Quere esenetaain tonoraachenete, Cana Inaca rene turuhin aina ichaoriquicheein. Nete laaen cacolane turuenereein chunei, rauhijiriin ichaonaa rauhi tera nihanuna jaun. <sup>7</sup> Rauhijiriin cacoitucuhichenete, Ofa Cana Coaunera coitucuhiche. Inae laaen enene caje coauneein Ofa coitucuhiche, inae cacoharaichene jaun,” naa Cana Coaunera Calaohi Jesusone jana:

<sup>8</sup> “Cana Inaca Cana Coaunera coarateujan canacaanu quena, nii aina raotojoein nihacaanune coinara Curuaanaa,” naa Ferifine janate:

<sup>9</sup> “Inae carajaain inara aina nihanu. Ta jaiti cacoitucuhichenete, Ferifi. Cacoharaerate Cana Inaca coarae. Aihana jaun, chanuna Cana Inaca Cana Coaunera coaratihanu inara quene jerequiche. Tajian, ‘Cacoharaerate Cana Inaca Cana Coaunera coarae,’ naanune aonaquichene. <sup>10</sup> Ta Ofa suujua que suujuaquiin nihanune coitucuhichene. Coatih casuujua caje rocohin quiicha jerei que irihaaun. Acaihanejeein Ofaacha jerenohichana ichaaun, Ofa suujue que suujuequiin nihanune jaun. <sup>11</sup> Aihana jaaun Ofa suujue que suujuequiin nihanune esenetaeneeichene nihanatiin, itolere ichacaunne coaraquiche inara nota que najaun esenetaachenete ne.

<sup>12</sup> Esinae rauhijiriine aitoreeunni. Quesenetaerate quiicha ichai ichareein camuritoheriin niha natiin, Ofa rene tacaain aina nerichaunina jaun. <sup>13</sup> Cuu nihanune jana, cacurajateein chaelai inaraacha latei bajaachenena, tiha cureeunni. Nitohaneena Cana Inaca Cana Coaunera ichanohin coaratiha

cureeunni, Cana Inaca Cana Coaunera coitucuhin coroaquichene coina.  
<sup>14</sup> Nii jaunna, chaelai bajaichene tereeeunni.

<sup>15</sup> Rauhijiriin esinae cacoelaichene, quere tonoraache. <sup>16</sup> Nitohaneen neeichenena, Cana Inaca bajareeunni, inara Coroatajanera letoane coina. Inoaelu netiin chabana satonoe lanaalate inara aina niha cureein inara Coroatajanera. <sup>17</sup> Acate, esinae Cana Coaunera Suujue nereein. Nii Cana Coaunera Suujue coitucunaa nainecuruhi cacoitucuruhi. Inarate laaen, raotojoein coitucuhiche inara aina nihana jaun. Inoaelu netiinte, chabana satonoe lanaala inara aina niha cureein. <sup>18</sup> Coatiha inara jaohin, inara ratir- iha cainerinaain. Turuhana ureeunni, coaiten inara aina nihanune coina. <sup>19</sup> Inae cacoharaaururinaain quesenetaaichuru. Inaraachate laaen cacoharaa curiquicheein, inae coaiten turuhanune. Ohanune caje ichanarihanuhina jaunte, jerichanejeein nitajenaachara nejeein niha curiquicheein, ichaohin nihanune rijijieein. <sup>20</sup> Inae inara suujua cuhane enoha Cana Coaunera Suujuenete, Cana Inaca aina nihanune coitucuhin, canu aina neeichene coitucuhin, coitucuha curiquicheein. <sup>21</sup> Quere tonoraain neite, esinae rauhijiriin cacoelaicha nereein. Niite belaiha cureein Cana Inaca Cana Coaunera. Canu netonainiha natiinna inara belain, inara que necoharaeratereeeunni, raotojoein rauhijiriin cacoitucuhichene coina,” naa Cana Coaunera Calaohi Jesoso canacaanu raina jaun:

<sup>22</sup> “Chanuna canacaanuhacha rai ecocohin, leeochoaauru que necoharaeratereeeite Curuaanaa,” naa nii leeocho Jodasine jana:

<sup>23</sup> “Cacoelaichate quere tonorae. Niite belaiha cureein Ofa Cana Coaunera. Chaenna aina jiniiquiin Ofa aina niha cureeunni. <sup>24</sup> Cacoelaiheite, caa quiicha beebejei esenetaene. Caa inara rai quiicha beebejei inaraacha aonajeite caletoaera- Ofa Cana Coaunera ere ne. <sup>25</sup> Cau inara aina nihanune cojoataana, caritiin inara rai beebejeeun. <sup>26</sup> Chaaen, Cana Inaca rene cuhanunete, cacoreniha Suujue letoareein Ofa Cana Inaca, inara suujua lararajiaain, inara suujuateein, inara coroatajanihane coina. Acate itolere que inara relareein, itolere caitoojoan que coauquichene coina. <sup>27</sup> Raotojoeinna inara rai necoeun. Canuhachana, Cana Coaunera tenojoin- raotojoein neeichene jaannu teeun. Nerinaain cabaiha nii rijijieein raotojoein neeichene jaannu teraanu. Aihana jaun, chaque casilanaala, raotojoein neeuche.

<sup>28</sup> Esinae rauhijiriin besichaaunlune rijijieeina, cau niha ureeunni coaiten. Esinae cacoelaaichenete rachoojoein neriquicheein. Nii caletoaera Ofa renene cureeunni, jelai choaae jauhecotojoeriin inara coroatajanihane coina. <sup>29</sup> Amuhanune ajinihana aitoon, inae ichacaaunne, ‘Esinaete aitelu,’ naain esenetaaichene coina.

<sup>30</sup> Inae nenacaaneen inara rai ereererinaaunni, inae urichaaain canu coitucuruhi cachaauru letoeranu Moconajaerane jaun. Canu jerenihanune, caniha cha chana nainerihe. <sup>31</sup> Nena, inauhene coarajereeeunni, caletoaera Ofa belain nere tonoraanune coaracuruha satiine coina. Chajaauchete amuhacache. Inae jitariin bihanu inara rai, coitucuhichene coina,” naainte canacaanu amaain amue Jesoso.

## 15

*“Canuna esinae rauhijiriin lenacai oba esine rijijieein neeun,” naa Jesusone*

<sup>1-2</sup> Nii baihate aina nerelanaa nichaanune rai:

“Canuna lenacai oba esine rijijieein neeun. Charijieein teeinti, lenacai oba une beraihaca, ajaanaa naineein. Caohatiin anasitiin inaana nuune cataaun uhajeein sauhin jaohaca, caohatiin nujua cutujuaain inaacane coina. Jana inacaeniha le unene, temura nainejeein tacaain sauhin jaohaca.

Nii rijijieein techu, cacoitucue lanaala, suujua coaraelanaala, rai suujua letonohacha ichara, naaonjoain jaoha cureein moconajaera rene Ofa Cana Coaunera. Jana quere tonoraain canuhacha icharatei icharate, jeelai amuritoheriin suujua lararajiaain coroatajanereein Ofa Cana Coaunera. <sup>3</sup>Inara relaanune jaan Ofa Cana Coaunera aitojoan esenetaain, tonoraain neeichene jaunte, inae inara suujua culeje Cana Coaunera, jianacoo neeichene coina.

<sup>4-5</sup>Coanete jiniiquiin Ofa Cana Coaunera jerenohin ichacaache. Ainihane, jelai chujutoroain cacolane ichana naineriheeiche. Charijieein teeinti, nujua caje nebeuha lenacai oba unene, ojoin inae inaana nainene. Nii rijijieein techu cacolane, jelai caohachaain Ofa Cana Coaunera jerenohi ichana naineneriquiche. Jana, jiniiquin canu aina ichaquichenete laaen esinae Ofa Cana Coaunera jerenohi ichariquicheein.

<sup>6</sup>Chunocoha inara tabanejei, quere tonoraane jianihanete, nitajiha cureein cahoachanainejeein, Moconajaera rene jaorichaain Ofa Cana Coaunerana jaun. <sup>7</sup>Esinae rauhijiriin quere tonoraain neeichene, jiaonriha inara relaanune jaan baitiquichene. Chaelai inaraacha latei bajaachenete, tereein Ofa Cana Coaunera.

<sup>8</sup>Nere tonoraain, naitoojoan beebejeeiche cachaauru rainete, inara coaraain, Ofa Cana Coaunera coroaeca cuurureein inara coaraauru. Nii banate esinae rauhijiriin quere tonoraera neein neriquicheein.

<sup>9</sup>Cacoelaiha Ofa Cana Coaunerane rijijieeina inara belaihun. Caa inara belaihanune rijijieein, inara suujua coaraain cacha belaaain neeuche. <sup>10</sup>Caa caitoonjoan tonoraain ichaain neeichenena, itolere bana inara belaichee-unni. Charijieein teeinti caletooa Ofa Cana Coaunerana jaan tonoraain ichaain nihanune jaun, canu belaaain ne, nii rijijieein.

<sup>11</sup>Itolereneein raotojoein rachoojoein canu aina jiniiquiin neeichene coinana aitoon. <sup>12</sup>Caa inara belaaain nihanune rijijieein, ita belaaain neeuche. Nitohaneein neeuche, caa inara rai aitocoaunne rijijieein.

<sup>13</sup>Nainihehi chatohanai, onaa niha natiin coasiin nihacane. Cana belaihaauru coreniha cana raaje netiha cuhacanetejian, nenacaaen caohachae, ichaohin neeuruha canaacha belaihurine jerena caaun. <sup>14</sup>Inarate quiicha belaiineein neriquicheein, caa inara letoaanune jaan ichaain neeichene. <sup>15</sup>‘Canu cachaauru,’ narihaunni. Rauhijiriichana, ‘Canu belaihaauru,’ nareeunni. Chabana, ‘Naaonjoainte ichae,’ naain curuaanaacha ichai coitucuhin neniha cachana jaun. Nii jaunna, ‘Canu belaihaauru,’ naaun inara que. Carai aitiin caletooa Ofa najaan coitucuerati-hanu inara quena jaun, nainihaun canu, ‘Canu cachaauru,’ naain irihanu inara quene. <sup>16</sup>Coatiha inara, cariin carene uhin niheeichelu. Canuna inara ariin inara raain neeunlu. Nii jaunna Ofa Cana Coaunera rai arajiin cacha ariin raeraanu que inara letoaaun, inoaelu netiin neeneinu que. Nitohaneein neeichenete, chaelai latequichene, bajaaiiche cacorenihane, tiha cureein Ofa Cana Coaunera,” nae Cana Coaunera Calaohi Jesoso.

<sup>17</sup>Nii baihate: “Aonacuchena caa que aite, raotojoein jiniiquiin ita belaaain neeuche.

*Rai cachaauru aina curuataain Jesoso cairichaaeriin neeuruha caa chauratane que nenacaurane*

<sup>18</sup>Inara coana jerelanaala, inara belaihureniha caa chauratane que nenacaurune, nii caje nainaauche, nenacaaen canu nichaun natiinte, caco-haranaa jerelanaala cacoelaihurene. Nii jaunte jelai amuritoheriin inara belaihurenereein. <sup>19</sup>Chauratane que nena cacha neneeichena jaunte, inara belaaain, inara coana nainecurenereein caa chauratane que nenacauru

cachaauru. Canuna caa chauratane que nenacaauru caje inara raaunlu. Nii jaunte inara belaa inara coana nainecurene caa chauratane que nenacaauru cachaauru, inae caa chauratane que nena cachaneenechene jaun. <sup>20</sup> Aitocooaunlune tocohaneein, nihei chunei rai curuaanaa amurijiriin nei. Nenacaen canu rohecaauruhaluna jaunte, jerichanejeein inara rohecaa cuurureein. Quere esenetaain tonoraeraurute, jerichanejeein inara ere tonoraain esenetaaurureein. <sup>21</sup> Nitohanihate, cuurureein nii caletoaera coitucuruhi nechua aansaineein nenacaauru cachaauru. Nitohanihate cuurureein, canu ere beebejeichene coreniha.

<sup>22</sup> Acaauru rene turuhin, acaauru relaenihanune jana nihane, chaelai ujuaihoneein neeururihei niqui. Nete inae enene acaauru osa coreniha chunijiun nichoteeurenereein. <sup>23</sup> Nii cacoharanaa jerelanaala quere tonoraichurute, jerichanejeein nii caletoaera Ofa Cana Coaunera ere tonoraaurerene. <sup>24</sup> Itolere, lenone faain, itolere cunaitenacaauru rautaaain, itolere ichaaain acaauru notajaain, naaonjoaain inatiinte, coaracuruha nota que natiin, canu batohin, Ofa Cana Coaunerane maajeein batohin neeuruhane corenihate caseteco coaraa cuurureein. Nii coaracuruha natiin esenetaaurerihanane colane aihururihei. <sup>25</sup> Aitoha acaauru quiricha inoaesi cuhanene rijijieeinte, aihure. ‘Nechu jataain, joaereein corenihate aina nejerateein jerecurenereein,’ naain aitoha acaauru quiricha inoaesi cuhanene rijijieeinte aihure, inae nitohanihanane coina laenanohineein nihana jaun.

<sup>26</sup> Inae turuha urichaaain inara coroatajaneraanu. Canuna Ofa caje letoareeunni. Nii inara coroatajaneraanu- Cana Coaunera Suujuete esinae rauhijiriin caitoojoan que inara relaa ureein. <sup>27</sup> Nii ainate chaque casilanaala laraajiin canu aitoonjoan Cana Coaunera ere beebejeriquicheein cachaauru rai.

## 16

<sup>1</sup> Nii jaunna inara rai aitoon, inara rohecaauruhane, nererojoecaain inara letoaanune jaan jianeeichene coataana, caa caritiin aitoon inara rai, laraajiin abaantaain neeichene coina. <sup>2</sup> Acaauru ita taojiaauruhana jaan loreri asaae enohichene janate, caje inara sitaa cuurureein. Chaaente, chunicocha inara tabanejei sohin jaoruhane, ‘Jeriha Cana Coaunerana jaunne, caa ichaaun,’ naa cuurureein. <sup>3</sup> Nii chabana Ofa coitucuelanaala, canu nihanatiin coitucurenihana jaunte, nitohanain ichaa cuurureein. <sup>4</sup> Inae cuutihane bana, ‘Esinaete aitelu,’ naaichene coinana caa aitoon.

### *Chaelai ichana nainiha Cana Coaunera Suujuene*

Jaiti jelai inara ratirihanune rai nenihanune jaunna, jauriaa caa que inara rai erenajaqueneun. <sup>5</sup> Inae laaen curichaaunni nii caletoaera aina nihanune coina. Nihei chunicochanejein nii cunaa jerichaaunna jaan bajaane que airijiin, <sup>6</sup> satiin inaderaachaquiche caa que aitocooaunna jaun. <sup>7</sup> Inara rai tejian caohachare cuhanune. Jana cuenihanune, urihei inara corianeein inara suujua laraajiaain, inara coroatajaneraaunu. Acate inara suujua laraajiaain, inara corihaneein inara coroatajanereein. Inae cuhanunena, canu letoareeunni. <sup>8</sup> Aca inae turuhanete, cachaa relaa cureein, osaacuruhane coitucuruha cachaaunne coina. Chaaen techu, caohati ichaonaa que cachaa relaa aicheein. Jana ichaonaa caoacha sacunaa jeriheichurute, casetecaa cureein Cana Coaunera, <sup>9</sup> osaacuruhane saijieein quesenetaaurerihanane coreniha. <sup>10</sup> Nii banate, esinae rauhijiriin ichaonaa esine teraneein nihanune coitucuha cuurureein, Ofa nenajaun taca curichaaunnine jaun.

Inae canu coariheicheein cuutihane reentiaain. <sup>11</sup> Nii banate, Moconajaera aina jiniiquiin nosa coreniha caseteco coaraa cuururichaaine coitucuha cuurureein cachaauru.

<sup>12</sup> Niha arajiin inara rai quiicha beeni niqui, nete ‘Quete toon aite,’ naain coitucunaa naineneriquiche. <sup>13</sup> Inae turuha Cana Coaunera Suujuenete, rauhijiriin inara relaa cureein. Coatiha suujua caje rocohin aitoriaain. Aitoha Cana Coaunera najaan quete aitoha cureein, nitohaneein situsihane ajiniha coitucuhin neeichene coina. <sup>14</sup> Acate corojeein canu nichaanne biha cureein, cacoitucuhin neeichene coina. <sup>15</sup> Charijieein teeinti, itolere coauneraneein ne Cana Inaca. Niirijieein inachu canu netonai neun, Cana Inaca calaohi nichaanne. Aihana jaun, coa cojoelatohache canu coitucueratiha Ofa Sujuene.

*Inaderaichene baihate necoriha cureein inara suujua rachoojoenaa neein*

<sup>16</sup> Satonote, caa basijiin cacoharaa curiquicheein. Nii baihajirite canu coaraa curiquicheein coaiten,” nae Cana Coaunera Calaohi Jesoso.

<sup>17</sup> Nii jaunte ita caje: “Tona nena, ‘Satonote cacoharaririquicheein, Cana Inaca rene curichaaunnine jaun. Nii baihajirite cacoharaa curiquicheein,’ nae. <sup>18</sup> Chatonaa nena aite,” naacaanu ita rai.

<sup>19</sup> Nii jaunte, caje bajanaa jerichaanune coarajihane jaun: “ ‘Satonote basijiin cacoharaririquicheein. Nii baihajirite cacoharareeicheein,’ naanune jaunna ita caje bajaache.

<sup>20</sup> Esinaena rauhijiriin aitoreeunni. Inaderanaa caaunte chanaa curiquicheein. Nii janate inara coroaeca cuurureein caa chauratane que nenacaauru cachaauru. Nete rachoojoenaaneein necoriha cureein inara suujua.

<sup>21</sup> Charijieein teeinti, nejanoana jeriha rai canaanaine nererojoeaaure enecuru cunaa caaun. Jana inae lesajeein nejanoaane, inae nii cuna coacuelanaala raotojoein rachoojoein ne, nii canaanai coroaeca.

<sup>22</sup> Nii rijijieeinte nererojoeaaiche niqui ena. Nete, turuhin inara coaraa uhanune, aitohi rijitojoein rachoojoenaa neein niha cureein inara suujua cuhanai. Nihei chunei inara caje nii rulunaa nainera.

<sup>23</sup> Nii bana inae cacaje, ‘Chatohanein icharihacaanu,’ naain cacaje cha bariheicheein, inara netonai coitucuriquicheeina jaun. Chaaelai inaraacha latei bajaache cacorenihanete, tiha cureein Cana Inaca. <sup>24</sup> Nihei caniha neeichene caje coaanneein, cacoreniha chaaelai bajaheeiche. Bajaache cacorenihanete, tiha cureein Cana Inaca, raotojoein rachoojoein neeichene coina.

<sup>25</sup> Inae cuutihane bana caritiin, ‘Charijieein teeinti naojoaen,’ naain cuaain, inara rai berihaaunni. Inae cuu tihane banane, nechu jataain rauhijiriincha cuaain Cana Inaca aitojoan que inara relareeunni, rauhijiriin aonaain coitucuichene coina. <sup>26</sup> Nii banate, inara raaje inaraacha latei baja curiquicheein. Nitohanihane bana, coatiha canu Cana Inaca rai aitorihauuni, <sup>27</sup> inae raujiaain caje uhanune esenetaaichene coreniha inara belaiha Cana Coaunerana jaun. <sup>28</sup> Canuna, Cana Inaca nenaja caje mituhin, caa chauratane que turuha uun. Inae caa chauratane ratiriin, Ofa Cana Inaca Cana Coaunera rene curichaaunni,” naa Cana Coaunera Calaohi Jesusone janate:

<sup>29</sup> “Inae laaen aonacaun rauhijiriin aitohina jaun. <sup>30</sup> Nii jaunna esinae itolere coitucuhin, esinae rauhijiriin Cana Coaunera caje uhine esenetaaanu. Aihana jaun, nihei nenacaen canacaanuhacha bajaanenenu, inae coitucuhacaanuna jaun,” naacaanune jana:

<sup>31</sup> “Nii jaunchana esenetaaiche. <sup>32</sup> Inae cojoinaca que tiha. Enenete satiin ita caje riatoroaain, jelai cajaohin caratiriin amuriquicheein, nena jelai caa neneun, caniha niha Ofa Cana Coaunerana jaun. <sup>33</sup> Coitucuhichene jerena caunna caa aitoon, quesenetaain raotojoein rachoojoein neeichene coina. Chaaen inara netonai, caa chauratane que necairichanaa coaraa curiquicheeina jaunna, raotojoein rachoojoein necairichanaa abaan-taichene coinana aitoon. Caa chauratane curuaanaa Moconajaera amuritoohanune jaun, inara netonai laraajiin caa chauratane curuaanaa Moconajaera amuritoichene coinana, coitucuhichene jerena caaun aitoon,” nae Cana Coaunera Calaohi Jesoso, aina nerelanaa nichaanune rai.

## 17

### *Cana Inaca bajaa aina nerelanaa nichaanune coreniha Jesosone*

<sup>1</sup> Niritohane baihate, jabatoroaain dede coarajeein:

“Inae caletoaina jaan ichacaaunne jaan cojoanonaa que turuha. Chajaain laaen cacorataaneuu, ii jerenohi ichacaaunne coina. <sup>2</sup> Iite ii calaohineein nihanune cocoinaain, caa chauratane que caletoaai, satiin carai iicha teeuri cachaauru rai nitajenaachara nejeein nena ichaonaa teraauu que. <sup>3</sup> Leinjiin iichate nitajenaachara nejeein nena ichaonaa teraneei. Nii jana canuna, leinjiin ii letono Jesocurisitoneein neeun. Nii jaunte nitajenaachara nejeein neeurureein cana coitucuhin nenacaauru. Coatiha chabana nitajeeururinaain. <sup>4</sup> Inae caa chauratane que nenacaauru que ii coitucueratihanu. Chaaen nachu inae caletoaina jaan nainaaun. <sup>5</sup> Inoaenlu, jaiti necoanaeniha caa chauratanene ajiniha, cocoinanacainein nihanulune rijijieein, ii rene turuhanune, coaiten cocoinanacainein caeteeu, coaracuruha satiine coinara Ofa.

<sup>6</sup> Inae caa chauratane caje raain carai iicha tenojoinhuru cachaauru que ii neeine coitucueratihanu. Icheineeinte neeure, caa carai iicha teeuri cachaauru. Niichurute, chere aonaain tonoraain neeure. <sup>7</sup> Inae laaen cacorataaneei jaan aina caletoai jaan ichacaaunne jaunte coaraain inae esenetaaure. <sup>8</sup> Caletoaina jaan que acaauru rai aitocooaunna jaunte tonoraare, carai iicha tenojoihuru cachaauru.

<sup>9</sup> Coatiha caa chauratane que nenacaauru cachaauru, ii coitucuuruhi coroatajaneeine coina ii bajahaun. Caa carai iicha teeuri cachaauru icheineein nenacaauru coroatajaneeine coinana, canu Inaca neeine bajaau. <sup>10</sup> Satiin canu cachaneein nenacaaurute, jerichanejeein ii cachaneein neeure. Jerichanejeein techu, canu cachaneein neeure ii cachaauru. Nii jaunte jerichanejeein aihanune rijijieein ichaooore.

<sup>11</sup> Inae taenetojoein caa chauratane que nerihaunni. Acaaurute jana jaiti caa chauratane que nedaa cuurureein. Canuna laaen inae ureeunni, ii aina nihanune coina. Ofa, carai caa iicha tenojoihuru cachaauru coroatajaneuu iicha jerei chana que. Charijieein teeinti canu coroatajaneein canu rai iicha tei ichana que, nii rijijieein acaauru coroatajaneuu. <sup>12</sup> Enanetojoein cacorataaneeine que, caa carai iicha tenojoihuru cachaauru nihei leinjiinejei nitajihei. Leinjiin caa, ii quiricha inoaesi cuhane been laenaerateeilune rijijieein cacoluruheraachate, inae nitaje.

<sup>13</sup> Inae laaen enene, nii neeina jaau urichaaunni iniha nihanune coina. Jaiti caa chauratane que nihanune cojoataana aitoon, raotojoein rachoojoein nihanune rijijieein, acaauru netonai canu rijijieein raotojoein rachoojoein neeuruhane coina. <sup>14</sup> Ii ere bihanu acaauru raine jana, esenetaain tonorauruhana jaunte, acaauru belaaain, acaauru rautaaain, acaauru

coana nainecurene ii coitucuruhi, aihanune rijijieei, inae caa chauratane que nenea cachaneein neeurenihana jaun.

<sup>15</sup> Ofa Cana Coaunera, coatiha ena, caa chauratane caje ranajaain dedeeu amanajaaine coina caitono nihei. Acaauru que Moconajaera janoriteein, acaauru coroatajaneene jerena caunna aitoon. <sup>16</sup> Moconajaera cachaneein nenihanune rijijieein, carijijieein acaauru netonai inae Moconajaera cachaneein neuruhi. <sup>17</sup> Ii raihurunein neeuruhana jaunna aitoon, acaauru suujua rucujueein, acaauru coroatajaneete, nejelau suujua cuaelanaala leinjiin ii jerenohicha ichacurumii. Ii erete esinaae rauhijiriin ichaonaa caohacha teraneein ne. Chaelai janonaa bana nihei nitajiha ii ere esenetaain tonoraain nenacaaurune. <sup>18</sup> Charijieein teeinti, casuujua laraajaain canu cocoinaain caletoai, nii rijijieeina acaauru cocoinaain acaauru letoaaun, ii ere beebejiha cuuruha caa chauratane que nenacaauru raine coina. <sup>19</sup> Acaauru corenihana nejelau casuujua cuaelanaala caletoaina jaancha ichaun caraajenhane, acaauru netonai aihanune rijijieein nejelau suujua cuaelanaala relanajaanune rijijieein letoanajaanune jaancha ichacuruhane coina.

<sup>20</sup> Coatih acaauruhacha coroatajaneene coina caitono nihei. Canu ere beebejeeuruhane, canu esenetaaichuru suujua rucujueein coroatajaneete, <sup>21</sup> jiniiquiin aihacane rijijieein, ita aina jiniiquiin raotojoein neein, nejelau suujua cuaelanaala ita coroatajaneein, neeuruhinete, esinaae ii caletoaine esenetaauruhine caa chauratane que nenacaauru. <sup>22</sup> Jeelai, nii canu cocoinaain neeina jaana teeun acaauru rai, ita neein nihacane rijijieein, acaauru netonai ita neein neeuruhane coina. <sup>23</sup> Chaaen nachu, casuujua cuhane neeine rijijieein, acaauru suujua cuhane neein, jeelai ita neein neeuruhane coina, nii caje nainaan esinaae ii caletoaine coitucuruha caa chauratane que nenacaaurune coina. Aihute, cacoelaaine rijijieein, belainaaquine coitucuruhine.

<sup>24</sup> Carai tenajaaina jaunna, caniha nii nerichaunnine jaun caniha neeuruhane jereeun, nii ii necaohacha aina canu necaohacha coarajeein neeuruhane coina. Chaaen necaunaa caa chauratanene ajiniha caje coauneein cacoelaaine coaracuruhane coinara Ofa,” naain te, <sup>25</sup> “Rauhijiriin itolere coaunera Ofa neeine coitucuruhi caa chauratane que nenacaauru niqii. Nena laaen canu ichoitucun. Caa carai iicha teurite laaen, esinaae ii caletoaine coitucure, <sup>26</sup> esinaae ii neeine coitucueratihanune jaun. Jelai choaae jauhecotojoeriine, ii coitucueratihajeein sacureeunni, esinaae cacoelaaine rijijieein acaauru belaine coitucuruhane coina, canu netonai nihanatiin acaauru aina nihanune coitucuruhane coina,” naainte Cana Inaca Cana Coaunera bajaabajaje Cana Coaunera Calaohi Jesoso.

## 18

*Caseteconein Cana Coaunera Calaohi Jesoso amauruha Romanocurune (Mt 26.47-56; Mr 14.43-50; Lc 22.47-53)*

<sup>1</sup> Cana Inaca aina irihane baihate, aina nerelanaa nichaanune amaain, Sedroon neein curujajaain nenea nucuesoro jera que cue Cana Coaunera Calaohi Jesoso, cuu nii enuha inaa necojoai turuha canacaanu ainane coina.

<sup>2</sup> Nii jaunte raotojoein Jesoso cunajaa coitucuhana jaun, canacaanu caaijie turuha uhe Jodasi. Belaichaneein niha Jesoso natiin, Jesoso coulurujueein soondarooru uhaain turuha uhe. <sup>3</sup> Nii soondarooru, chaaen batirichuru curuaanaacuru, fariseocuru, naaonjoainuri letono folisiaacuru uhaain turuha uhe nii Jodasi. Rejoon, sabere rijijieein nenea- esefara, naaonjoain que biji achunequiin, raafariin, cohinee, naaonjoain que conoquiin turuha



uure. <sup>4</sup>Nii jaunte inae raotojoein nitohanai que siturichaainne coitucuhana jaun, acaauru que tacaain: “Chate ariicheta,” naain bajaa Cana Coaunera Calaohi Jesusone jana:

<sup>5-6</sup> “Nasarete cocoaicha Jesusona arihacaanura,” naauruhane jana:

“Saan. Canune aca neeunra,” naa acaauru rai Jesusone janate, nii niicha uhauri soondarooru aina jiniiquiin janori nichaae richootoroalaain tocojoaai tacaee nii Jesuso coulurujuera Jodasi. <sup>7</sup>Nii jaunte:

“Chate esinaae ariicheta,” naain coaiten enacoauneein bajaa acaauru caje Jesusone jana:

“Nasarete cocoaicha Jesusona arihacaanura,” naauruhane jana:

<sup>8</sup> “Inae rauhijiriin bihanu inara rai. Canuna aca neeun. Cariha aaichene, caa caniha nenacaauru jianecuchete amuuruhine,” nae acaauru rai Jesuso.

<sup>9</sup> “Coatiha leinjiinejein nitajerinaain carai Ofa tenojoinunri cachaauru,” naain inae aitosiha Cana Coaunera Calaohi Jesusone jaunte nitohane.

<sup>10</sup> Nii janate sabere sirihana jaun rocohitiin, que leinjiin uricho raotono nichajai beuhite Fedoro. Nii niicha uricho beuhitite batirichuru curuaanaa cachaneein nena- Malco ne.

<sup>11</sup> Nii jaunte: “Jelaiha curu cuhane nii ishabere teeura. Ta caletooa Ofana jaan icharichaunnine coitucuhin quesenetaaineta,” nae Fedoro rai Jesuso.

*Batirichuru curuaanaa Anasi rene, caseteconeein Jesuso amaauruha soondadoorune*

*(Mt 26.57-58; Mr 14.53-54; Lc 22.54)*

<sup>12</sup> Nii jaunte Cana Coaunera Calaohi Jesuso mucuure caseteconeein soondadooru acaauru curuaanaa aina uhin, chaan Jorioocuru rai folisiaacuru, naaonjoahunri.

<sup>13</sup> Nitohaneein mucuhinte Cana Coaunera Calaohi Jesuso amaure soondarooru, Anasi loreri asaae. (Nii Anasite, Caifasi tanaa ne.) Nii janate, nii ajaanaa cuhane batirichuru curuaanaaneein ne nii Caifasi. <sup>14</sup> Nii Caifasite, jauriaa Jorioocuru rai “Cana caohachanu quetejian, cana atane coreniha ohane ore leinjiin cachara,” naain Jorioocuru rai erenaane.

*Fedoro caje bajaa nii acujua beraichane*

*(Mt 26.69-70; Mr 14.66-68; Lc 22.55-57)*

<sup>15</sup> Canacaanuna, Simoon Fedoro aina Jesuso sacuha cuhacaanu. Nii jana, canu coitucuha batirichuru curuaanaa jaunna, Jesuso jiniichaain enoon batirichuru curuaanaa loreri asaae. <sup>16</sup> Jana Fedorote nedae airiniha acujua rohan. Nii jaunna, acujua beraicha ranuna rai ereeun, Fedoro enoaane coina.

<sup>17</sup> Nii jaunte Fedoro enoaain: “Tana taa cache aina nerelanaaneeine,” naain bajaa Fedoro caje nii acujua beraichane jana:

“Acanihahaunta,” naain benaa jerene Fedoro. <sup>18</sup> Nii jaunte, jelarotohana jaun usi mocohin que nichaateeuruha Anasi cachaauru, Jorioocuru rai folisiaacuru, naaonjoainurine jaun acaauru aina nichaatiha ne Fedoro.

*“Chaquete cachaauru relaaita,” naain, Jesuso caje bajaa batirichuru curuaanaane*

*(Mt 26.59-66; Mr 14.55-64; Lc 22.66-71)*

<sup>19</sup> Nii jana, cuu nii loreri asaae ucuha cuhane niha Cana Coaunera Calaohi Jesusone janate:

“Chauru caa iicha relaaurineein ne. Chaquete acaauru relaaita,” naain bajaa Jesuso caje batirichuru curuaanaane janate:

<sup>20</sup> “Satiin aonajeeuruha cachaaurune acatiha teeinna canu, rauhijiriin aitonajacoon. Coatiha asinojoneein cachaauru relahaun. Sinacoca asaae,

satiin itataojiauruha Jorioocuruna jaan Teenforo asaaene acaauru relanajacoon. <sup>21</sup> Chanuna nii bajaai cacaje. Nii relanajaanune jana aonaraauru caje bajaate, raajenihane acaauru relaanune jaan beeuruhine,” nae Jesoso.

<sup>22</sup> Niritoha Jesusone janate, ecu niha Teenforo rai folisiaana jaun: “Niriitiina ereree batirichuru curuaanaa rai te,” naain Cana Coaunera Calaohi Jesoso meri faohitohane jana:

<sup>23</sup> “Baaso neeinoona aitoon. Chanuna caque ichohi teein aitohi,” nae Cana Coaunera Calaohi Jesoso nii Teenforo rai folisiaa rai.

*“Acanihahaunta,” naain nesujuiha Fedorone*

*(Mt 26.71-75; Mr 14.69-72; Lc 22.58-62)*

<sup>24-25</sup> Nii batirichuru curuaanaa Caifasi loreri asaae niha Jesusone tonohanate, jelai cuu inae neeorihha Fedorone jana: “Ta ii taa cacha aina nerelanaa neeine,” naain bajauruhane jana:

“Acanihahaunta,” naain benaa jereniha Fedorone jana:

<sup>26</sup> “Tana, ii coaracaunlu aina, enuha inaa neeonjoai jana neeine jananeta,” naain bajaa leinjiin batirichuru curuaanaa cacha- nii niicha uricho beuhiti cacha araineein nenaane janate:

<sup>27</sup> “Acanihahaunta,” naain nesujuiha coaiten Fedorone jana, inae ere ataohari.

*Jesoso coulurujeeuruha Filato raine*

*(Mt 27.1-2, 11-14; Mr 15.1-5; Lc 23.1-5)*

<sup>28</sup> Nii janate Caifasi loreri caje coberenadoro Filato loreri asaae Cana Coaunera Calaohi Jesoso amauruhane jana, inae nemataracajiha janonaana jaun, enonaa nainecurene Jorioocuru, coberenadoro loreri asaae. Jorioo neniha nii coberenadorona jaunte, coberenadoro loreri asaae enonaa nainecurene Jorioocuru, enooruhane Fasocaa beseta bitoanaa nainecurenihane coataa. <sup>29</sup> Nii jaunte airiniha mituhin:

“Chatohanai ichaane corenihana caa cacha colurujueeiche,” naain bajaa coberenadoro Filato, Jorioocuru cajene jana:

<sup>30</sup> “Nechu aansai taebinaen neein nenihanenoona, ichei colurujuerichaanu,” naauruha Jorioocurune jaunte:

<sup>31</sup> “Saan. Aihachuhisi niqui. Inara, amaain jeriquichene tocohaneein teeuche,” naa Filato, Jorioocuru raina jaunte:

“Nihei canacaanu rai rauhi, chunei sohin jaohacaanune coinata,” naaure Jorioocuru Filato rai.

<sup>32</sup> Rauhijiriin coitucuhin, “Naaonjoaainte catinaa cuurureeinha,” naa Cana Coaunera Calaohi Jesusone rijijieeinte, rauhijiriin ichacure.

<sup>33</sup> Nii jaunte coaiten enacoauneein loreri asaae Jesoso cotijiain, caje bajae Filato: “Ii ina Jorioocuru curuaanaa rey neei,” naain bajaa caje Filatone jana:

<sup>34</sup> “Ishuujua cuhane aitiina bajaai. Ainihane leochaauruna ichei Jorioocuru curuaanaa nihanune que aitoha,” naa Filato rai Jesusone janate:

<sup>35</sup> “Chasiinna Jorionichaaunne coalanaala caraajenihane aitiin aitoreeun. Charaachuru, batirichuru curuaanaacurute carai icholurujue. Chatohanai najian ichaate icholuruhecure,” naa Filatone jana:

<sup>36</sup> “Coatiha cajiha caa chauratane que nenacaauru curuaanaa nihaaunta. Caa chauratane que nenacaauru curuaanaa nihanunetera, sonaacurure quere tonoraeraauru, catohaneein caetecuruha Jorioocurune coataa,” naa Jesusone jana:

<sup>37</sup> “Aihana jaun, iina curuaanaa rey neeite,” naa Filatone janate:

“Ejeen, aca nichaaun. Nii aitohine rijijieeine acaneeun. Canuna caa chauratane que uhin nejanoaunlu- cachaneein, esinae Cana Coauneraacha

jerei rauhi coitucuuruha cachaaurune coina. Satiin Cana Coauneraacha jerei rauhi tonoraaurerate quere tonorae,” naa Jesusone jaunte:

<sup>38</sup> “Chatohanai Cana Coauneraacha jerei rauhi esinena,” naain bajaa Filato, Jesoso cajene baihate, enacooauneein coaiten mituhin Jorioocuru aina iriha cue.

“Coatiha chatohanai ichaai carai caa cachata. <sup>39</sup> Inarate, Fasocoa beseta naineei, Fasocoa beseta catainajeein, naaonjoaain niha catohanai casetecone, nii beseta situ reeintiaain jianerate najaaquiche. Tonaquiche, jerecuchene caa Jorioocuru curuaanaa *rey* jiane beseta situ reeintiaain,” naa Filato, Jorioocuru raine janate:

<sup>40</sup> “Aihei. Coa nii jianiha. Nii Barabasi jianeeujan laaen,” naainte nujuaae soaisoaihure Jorioocuru, Filato rai, nii Barabasi asijiautoneein nena que.

## 19

<sup>1</sup> Nii jaunte Cana Coaunera Calaohi Jesoso bisichate rai soondarooru que Filato.

<sup>2</sup> Nitohaneein bisihuruhane baihate, ojoa caje janojoin comai curuhacure Jesoso couturi que. Nii baihate coaiten que cajione lanaajiojoai curuhacure.

<sup>3</sup> Nitohaneein teuruhane baihate, Jesoso rohan turuhin: “Caa Jorioocuru curuaanaa *rey* coaracuchera,” naain Jesoso meri faohafacoaure biji que Romanocuru rai soondarooru.

<sup>4</sup> Nii janate jelai caje mituhin Jorioocuru rai: “Coaraquichene coinana caa cacha mitaa uun, neniha que chatoanai baaso ichaenihane coaracaunna jaun,” nae Filato.

<sup>5</sup> Nii jaunte, inae ojoa que jerichanejeein comaiquiin, lanaajiojoai que cajionequiin mituha uhe Jesoso. Mituha uha Jesusone janate: “Caa cacha coaracuchera,” nae Filato.

<sup>6</sup> Niritoha Filatone jaunte, Jesoso coaraain: “Coroso que teeuche. Coroso que teeuchera,” naain nujuae soaisoaiuruha batirichuru curaanaacuru, folisiacuru naaonjoainurina jaun:

“Inara amaain coroso que teeuche. Neniha carai que chana jaunna, nitohaneein tenaa naineneen canu,” naa Filatone jana:

<sup>7</sup> “Canacaanu quiricha inoasi cuhanete aite, nitohaneein nei nihane sohin jaohacaanune coina. Cana Coaunera Calaohi niha nocoetohane corenihate caohachae, sohin jaohacane,” naauruha Jorioocurune <sup>8</sup> aonajihane jaunte, jataain casi Filato.

<sup>9</sup> Nii jaunte nacoauneein loreri asaae enohin:

“Chaa cajena unaaneei,” naain bajaa Filatone jana, inauhene chujuhequiin aonaje Cana Coaunera Calaohi Jesoso. <sup>10</sup> Nitohaneein tonoraeniha Jesusone jaunte: “Chanuna catoonraeneei. Tana cocoainanacainein nihanune coitucuhine. Canune nainereen coroso que ii teratihanune. Chaaen nachu naineeun caa ii colurujueeuruhane jaan caje jianacoo chetichaaunne,” naa Filatone jana:

<sup>11</sup> “Cocoinanacaine lanaala cheteen nii jereniha Cana Coaunerane, canasia nainihe. Nii jaunte, chamurijiriin osaque caa catohanein ichei caetera,” naa Cana Coaunera Calaohi Jesusone jaunte, <sup>12</sup> Jesoso jianena jere Filato niqui. Nete:

“Jiaohine jianeene. Aca, curuaanaa *rey* neein nena jerihane jaun, caohacharihei jianeene. Jianeenete, satiin inara curuaanaacuru curuaanaa enferadoro aina nejeratena neriquiin,” naauruha nujuae soaisoain Jorioocurune jaun, <sup>13</sup> Jesoso raerate, nii Cabata naauruha Ebereeo ere cuhanene

jaan- ajeri caje ichanohineein nenea aranichoae uhauruhane coina. Nitohaneein raerateeuruhane jaun, raain turaauruhane jana, nii casetecocuru nerujuena jaaun nelauriariin lauheque nelaurianaana jaan rori choaae, <sup>14</sup> enoto chujutaain Fasocoa catainajeein. Nii jaunte nitohaneein raerateein:

“Nocoo inara curuaanaa *rey*,” naa Filato Jorioocuru raine jana: <sup>15</sup> “Coroso que teeuchete coaraain cuu ohine,” naain nujuae soaisoiuruhane jana:

“Chasiinna inara curuaanaa *rey* tereeeun coroso que,” naa Filatone jana:

“Romanocuru curuaanaa enferadorohachate canacaanu curuaanaa *rey* neein nera. Nihei nii baiha curuaanaa *reyta*,” naauruha batirichuru curuaanaacuru Filato raine jaun, <sup>16</sup> acauru que Jesoso amaerate Filato.

<sup>17</sup> Nii jaunte nii Jesoso amaain, que corosonu baijieratecuruhane jana, Couturi Bejoneein curuajaain nenea atane ucuuno que baibaichaain amaain, nii coroso tiha cue Jesoso. (Nii Ebereeo ere cuhane Colocota naauru najaan- Couturi Bejeroo.)

<sup>18</sup> Nii janate cuu coroatajai coroso que, cuu neeuruha coroatajaain soserenacaaurune jaun, acaaru cataaun Jesoso teeure coroso que, leinjiin jera que, leocha jera que, naaonjoaain.

<sup>19</sup> Nii janate, cuu Jesoso curuaa laenaerate Filato. “Nasarete cocoaicha Jesoso, Jorioocuru curuaanaa *rey*” nasiin laenerate coroso que, tabara que teein Filato. <sup>20</sup> Nii jana arajiin Jorioocurute nii Jesoso curuaa Filato-hacha laenaeratei ereretaaure, nii Jesoso teeuruha coroso quene jaan caje icharaeniha Jerosaleenne jaun. Ebereeo ere, Curieco ere, Romano ere, naaonjoain que nichata lauriin erenaa cuhane teeinte laenaare, nii que erenaa inaurera ereretaauruhane coina.

<sup>21</sup> Nii jaunte: “Coo, Jorioocuru Curuaanaa *rey* neein teein laenaratihara,” naaure Joriocuruneein batirichuru curaanaacuru Filato rai. “Nii Jorioocuru curuaanaa *rey* niha nocoeti, nasiin laenaerateeura,” nauruhane jana:

<sup>22</sup> “Nii rijieeincha nedaainera,” nae acauru rai Filato.

<sup>23</sup> Nitohaneein coroso que Cana Coaunera Calaohi Jesoso curaboain teeuruhane baihate, Cana Coaunera Calaohi Jesoso cajione raaure jenai soondarooru. Rai nobirine maajeein raaure. Rai nobiri, coaracuruhane jana nirijieein ijiabereeeonu farueraelanaala tocoonojoi inelanaala niha nii rai nobirine jaun: <sup>24</sup> “Coo soaihachete naajeein amaacache, nenacaantejian caohachare naajeen amaacachene. Aihute que necoatijianaa neeine, chariji rai neeincha nedareein,” naaure soondarooru. “Ita raite cacaijione leruhin raurureein que necoatijiain,” naa Cana Coaunera Quiricha Inoasi cuhanene jaunte, nii Cana Coaunera Quiricha cuhane aitohane nainaane coina nitohaneein teeure soondarooru.

<sup>25</sup> Nii jaunte, inae Jesoso mucuuruhane coitucuuriin, coroso asaae cuhin coaraje rai neba, nichatajai enecuru aina. Nocoasai, Cureeofasi comasainein nenea- Mariha, Mariha- Maadala bene, naaonjoaain. <sup>26</sup> Nii janana cuu nihacaanu, jataain niicha belaii nichaanune temecohacaanu neba ainane jana, neba coariin:

“Nii ii calaoita oma,” naa neba raine baiha:

<sup>27</sup> “Nii chobata,” naa caraina jaunna jerichanejeein cafojiara raanune rijieein raain amaun caloheri asaae.

### *Oha Jesusone niha*

(Mt 27.45-56; Mr 15.33-41; Lc 23.44-49)

<sup>28</sup> Inae nitohaneein nihane coina letoaa Cana Inaca Cana Coaunerane nainaane coitucuha raotojoeinne jaunte, inae Cana Coaunera Quiricha Inoasi cuhane aitosiha inaena jaun: “Cocoiintohanura,” nae Cana Coaunera Calaohi Jesoso.

<sup>29</sup> Nii janate baichaje laajoiri nainecojoain ecu niha bino baasone jaun, enuha que sie rijijieein nenea nujuateein, nii bino sisiaain Jesuso ujuaae que suesuecaauruhane jana, <sup>30</sup> nii bino baaso cohane baiha: “Inae laaenra,” naain ocoai couturi tijitiaain ohe Cana Coaunera Calaohi Jesuso.

*Jesoso jaleri rucuaitha leinjiin soondaro rejoin quene*

<sup>31</sup> Le janojoein lanaa Fasocaa besetane janate, Filato rai aitoha cuure Jorioocuru, coroso que nenacaauru anaae bacoerateein, naain nii coroso caje rocoeratenajaain, naain rucuhenaaratiha Filatone coina, nabana nebetacanaa janonaa bana cuu neeuruhane, coaranaaca cachaaurune coataa, acaauru rai jataain beseta tabaineein niha Fasocaa besetana jaun. <sup>32</sup> Nii jaun soondarooru letoaa Filatone jaun, cuhin nii Jesuso ajiniha coroso que nenacaauru anaae bucu bateeichure soondarooru.

<sup>33</sup> Nii baiha Jesuso rohan turuhin coaracuruhane jana, inae oha Jesusone jaun, rai nanaae bacoorene. <sup>34</sup> Nete laaen rai nanaae bacoorenihane caniha laaen, rai jaleri rucuaaite leinjiin soondaro rejoin que.

Nii janate rai jaleri rucuaithane jana chujuhare ichana, acau que jasisiin.

<sup>35</sup> Canuna coaraneein aitoon inara rai, inara netonai rauhijiriin aonaain esenetaaichene coina.

<sup>36</sup> “Nihei chatohaneei bacoorurihaainta,” naa Cana Coaunera Quiricha Inoaesi cuhanena jaunte, Jesuso bucu bacoorene.

<sup>37</sup> Cana Coaunera Quiricha Inoaensi leeocho cuhanete “Focooruhane janate, inauhene coarajiha cuurureeinha,” naain aitohane rijijieein coara-jeure.

*Oo jana ajeri jachu cuhane Jesoso jaberoco teeuruhane (Mt 27.57-61; Mr 15.42-47; Lc 23.50-56)*

<sup>38</sup> Nii janate Cana Coaunera Calaohi Jesuso jaberoco bajae Filato caje Arimatea cocoaicha Jose, rucuhecuruhane coina. (Nii Josete asinojoneein Cana Coaunera Calaohi Jesuso ere tonoraera ne, leeochoauru Jorioocuru coasiha.)

Nii jaunte, Jesuso jaberoco jianiha Filatone jaun, Jesuso jaberoco raain amae.

<sup>39</sup> Nii janate turuha uhe nii jauriaanejeein janotiin Jesuso rene turuhin ere-naa Necodemo netonai, nichatachoonca quironeein meentoon tocohanein nenea ujjuuai uhain.

<sup>40</sup> Nitohaneein Jesuso jaberoco amaain, nii juujijiai que rujuaain, cajione que baluluhin conajaain, Jesuso jaberoco rucuhaca cuhe Jose, Necodemo aina.

Nitohaneinte onaa rucuhecure Jorioocuru, nitohaniha acaauru ichaona jaun.

<sup>41</sup> Nii Cana Coaunera Calaohi Jesuso teeuruha Jorioocuruna jaaunte ne enuha inaa neenjoai. Nii enuha inaa neeojoain janate ne atanebana. Ecute ne achasineneein ajeri jachu- jaiti lesajeeinejein onaa teurenihana jaan.

<sup>42</sup> Cuhante Jesuso jaberoco teure, ichuunejeein niha cajene jaun, chaaen inae beseta bitoauruhane coina neruujihajeuruha Jorioocurune jaun.

## 20

*Ohane baiha ichanaa Cana Coaunera Calaohi Jesusone (Mt 28.1-10; Mr 16.1-8; Lc 24.1-12)*

<sup>1</sup> Semana nunuhe tomiho cojoanonaa bana nocohejiriin cuhin, jaiti no-cohetoojoane jana turuhin coaraa Mariha Maadala benene jana, inae fueraene nii ajeri jachu. <sup>2</sup> Nii jaunte soroneein jelaiha uhin, Fedoro, canu,

naonjoainihacaanune rai biha uhe. “Aanca chaainti cana curuaanaa. Chu chaainti amaaureta,” <sup>3</sup> naain biha canacaanu raina jaun coaraa cuhacaanu.

<sup>4</sup> Nii jaun, ita jiniichaain soroneein cuhin coaraa cuhacaanune jana, Fedoro reroriin cuhin, turuhin <sup>5</sup> metoraain coaracaunne janate, cuu ne cona. Nena laaen enohin coaraeneeun.

<sup>6</sup> Nii janate canu caaijie turuhin, enohin, coaraa Fedorone jana, cuu ne jaberoco conaauru. <sup>7</sup> Nii janate nejelau ne nii Cana Coaunera Calaohi Jesocurisito couturi cona, nejelau maromarorinohineein seeque.

<sup>8</sup> Nii janane canu netonai enohin coaracaunna jaun, ichanaa Cana Coaunera Calaohi Jesocurisitone esenetaaun. <sup>9</sup> Cana Coaunera Quiricha Inoasi cuhane besihane jana niqui, “Naaonjoarichaaaine quete aite,” naain coitucusinaaunlu. Nena canacaanu nota que coaracaanune jaun, caohachaain coitucuhin esenetaacaanu.

<sup>10</sup> Nitohaneein coaracaanune bihane nenaanajaun cauha cuhacaanu.

### *Oo caje ichanaain ecooca Jesusone*

*(Mr 16.9-11)*

<sup>11</sup> Nii janate cuu nii ajeri jachu rohan nedaain chanaechanaje Mariha-Maadala bene. Chanaechanajeein metoroaain nii ajeri jachu coaraane jana, <sup>12</sup> cuu laurujua laurujuaaure Cana Coaunera letonocuru anjeraauru somanerei que cajionequiin Cana Coaunera Calaohi Jesocurisito jaberoco teeuruhana jaaun, leinjiin couturi nichajai que, leecha tijia nichajai que naajoain.

<sup>13</sup> Niichurute: “Chate coisiita,” naauruhane jana:

“Carai curuaanaa jaberoco amaauruhana jaunna coisiunra. Chu chaainti amaain teeureta,” naane baiha, <sup>14</sup> jaotoroain janori nichajai coaraa Marihane jana, rai chujuhaca Cana Coaunera Calaohi Jesocurisitone jana, acanihane coitucue.

<sup>15</sup> Nii jana: “Chana coisiite ene. Chana arii,” naa Jesocurisitone jana:

“Nii enuha inaa beraicha niha,” beein: “Ii amaaine, carai nii amaain teeine jaa jelai beeune coanicha,” naa Marihane janate:

<sup>16</sup> “Mariha,” naa Jesocurisitone jana, nejaorocoaain rautaain Jesoso coaraain:

“Raboni,” nae Mariha.

“Cacha relaera,” naanete aite Ebereeo ere cuhane.

<sup>17</sup> Niritiin coineteein mucunaa jeriha Marihane jana: “Caiha neeu. Jauriaa coaa cadadaara, jaiti iniin Ofa coaraenihanune jaunra. Chajaaaincha cacoelaichaaauru rai canu benihura. Jaitina iniin, Ofa Cana Inaca Cana Coaunera rene iniha cureeunnicha,” naa Cana Coaunera Calaohi Jesocurisitone jaun, <sup>18</sup> nii Cana Coaunera Calaohi aina nerelanaa nichaanune rai biha uhe Mariha Maadala bene.

### *Aina nerelanacaauru rai ecooca Jesusone*

*(Mt 28.16-20; Mr 16.14-18; Lc 24.36-49)*

<sup>19</sup> Tomiho cojoanonaa bana nihana jaunna, nii cojoanotiin cuhane ita taojiaacaanu nii Cana Coaunera Calaohi Jesocurisito aina nerelanaa nichaanune, caohatiin acuujua fuhin Jorioocuru coasiha.

Nii janate enohin, canacaanu cataaun neeritiin: “Raotojoein rachoojoein neeuchera,” nae canacaanu rai Jesocurisito.

<sup>20</sup> Niritohane baihate, biji que curabo cure, jaleri que rejoin cure, naonjoain coarate canacaanu que.

Nii jaunna rachoojihacaanu aina nerelanaa nichaanune, coaiten canacaanu aina nihana jaun.

<sup>21</sup> Nii baihate enacoauneein: “Raotojoein rachoojoein neeuchera. Charijjein teeinti, caletoae Ofa, nirijjeinna caa inara letoaunra,” nae canacaanu rai Cana Coaunera Calaohi Jesocurisito.

<sup>22</sup> Niritiinte canacaanu couturi jiririin: “Cana Coaunera suujue raauchera. <sup>23</sup> Chunei osaaona que inara suujua acatequichenena, canu netonai nii osaaona que casuujua acatereeunnicha. Jana aineeinchene, canu netonai airihaaunnita,” nae canacaanu rai Jesocurisito.

*“Tomasi, caa canu biji alarjia cuhane ii biji couturi enoain coaraau,” naa Jesusone*

<sup>24</sup> Nii janate, inae amuha Cana Coaunera Calaohi Jesocurisitone jana, turuha uhe Tomasi, nii fafione neein, niicha curuaatehuri. Nii Tomasite Jesocurisito aina nerelanaa nichaanune lechoonca coroataja ne.

<sup>25</sup> Turuha Tomasine janate: “Cana Curuaanaa coaracaanura,” naain bihaaanu Tomasi raine janate:

“Biji larijia que curabo cure coaracaanune banaachane, esenetareeunni. Chaaen cuhane canu biji couturi enoain, chaaen jaleri que rejoin cure cuhane canu biji couturi enoain, naaonjoain coaracaanune banaachane nainereunni esenetaanunera,” nae Tomasi, rai bihaaanune jana.

<sup>26</sup> Nii baihate foosa janonei cuhane, coaiten jelaiha enacoauneein ita taojiacaanune janate laaen, canacaanu aina ne Tomasi. Nii jana caohatiin fueraa acujuane saijjein enohin canacaanu cataaun neoritiin: “Raotojoein, rachoojoein neeuchera,” nae canacaanu rai Jesocurisito.

<sup>27</sup> Nii baihate: “Tomasi, caa canu biji larijia cuhane, ii biji couturi enoain coaraau. Chaaen chu caa canu jaleri que rejoin cure cuhane, ii biji couturi enoain coaraain esenetaachaau, baaso coacuelanaala,” naa Jesocurisitone jana:

<sup>28</sup> “Canu Curuaanaa Cana Coaunera” naa Tomasine jana:

<sup>29</sup> “Inae laaen Canu esenetaai ichaajenhane coaraina jaun. Raotojoeinte niha cuurureein, catohaneein nihanune coaraelanaala quesenetaerauru,” nae rai Jesocurisito.

*Esenetaachene coinata, laenanohineein ne caa erenaa*

<sup>30</sup> Itolere ichaainte coarate Cana Coaunera Calaohi Jesocurisito. Nete satiin laenanohineein nene caa quiricha cuhane. <sup>31</sup> Cana Coaunera Calao-hineein niha Jesusone esenetaachene coinata, laenanohineein ne, esenetaachene, ichaonaa caohacha, chabana nitajeniha cachane jaan raaichene coina.

## 21

*Rede jaohajihacaanune jana, canacaanu rene ecooca Jesusone*

<sup>1</sup> Nii baihate Calileea conemuri auhaniha, aina nerelanaa nichaanune rai ecocoe coaiten Cana Coaunera Calaohi Jesoso, rede jaoha nihacaanune jana. <sup>2</sup> Nii janana laaen Fedoro aina nihacaanu, Tomasi nii fafione naauru najaan, chaaen nii baiha Natanaaeli, Calileea caje unaa Canaau cocoaicha, chaaen Sebedeeo calaohi nichaaunne, chaaen eleechoa coroatajaain, naaonjoaain nihacaanu Fedoro aina. <sup>3</sup> Nitohanihane coinanu quete: “Redena jaoha cureeun,” naa Fedorona jaun:

“Tana iniha uhacaanu,” naacaanune jana:

“Chajaauchetejian aihane cunichaache,” naa Fedorona jaun, cuhin bote cuhane fauhin, cuhin janoaajeein rede jaohacaanu niqui. Nii janane leinji-inejein ate mucuujenhacaanu. <sup>4</sup> Nii jana, inae mataaquiin uha janonaane

jana, nemuri auhaniha ecocoe Cana Coaunera Calaohi Jesoso. Nii janana, aca nihane coitucuenihacaanu.

<sup>5</sup> Nii janate: “Enamanaacuru, ta ate mucuhichene,” naane jana: “Aihahacaanuta,” naacaanune janate:

<sup>6</sup> “Cana raotono nichajai bote jera que, rede jaohichenete ate mucuriquicheein,” naane jana, nii bote jera que jaohacaanune jana, esinae ate mucuhacaanu.

Nii jaunna ate anaai caaun nii rede tijichasinihacaanu.

<sup>7</sup> Nii janate: “Cana Curuaanaate aitera,” naanu Simoon Fedoro raine jana, aohanrihane rijieeoritiin torosaacha baejeein nihana jaun, luhecotariin cajione curujuain acauhanau fautiin Jesoso rene turuha cue Simoon- Fedoro.

<sup>8</sup> Nii janane bote cuhane caaijie cuujueein turuha cuhacaanu rede tarara-jeein, ate caaun lemuequiin, lefasha metoroneein lanaa nemuri auha cajena jaun. <sup>9</sup> Najauriaain inihacaanune jana, cuu ne canacaanu ajiniha usi lanarotiin. Nii jana nii usihanau niha leinjiin atene jana, cuu ne faan.

<sup>10</sup> Nii janate: “Nii ena inaraacha mucuhi ate uhauche,” naa Jesocurisitone jaun, <sup>11</sup> bote cuhane fautiin nii rede tararae Simoon Fedoro, carene choaae. Lefasha saoquichoonca nichatajaa ate tabai inatiinte, nii rede soaine.

<sup>12</sup> Nii janate: “Chajaauchete inara suuri noite,” naane jana, “Chaneeina” naain bajanaa nainenihacaanu, raotojoein Cana Curuaanaa Jesoso nihane coitucuhacaanune jaun.

<sup>13</sup> Nii janate, tajiha uhin nii faan raoriin, canacaanu nainetiin chalue. Jerichanejeein techu, nii ate basicho chalue canacaanu nainetiin.

<sup>14</sup> Nitohaniha Cana Coaunera Calaohi Jesoso, oo caje ichanaain, canacaanu rai ecoocane nichata sai cuhane.

*“Cacoelaaina” naain bajaa Jesoso, Fedoro caje ne*

<sup>15</sup> Inae nainain canacaanu suri noitichaanune janate: “Jonasi calaohi Simoon, cau nenacaauru leeochoaauru amuritoheriina ii coichana aina cutaain cacoelai” naain bajaa Cana Coaunera Calaohi Jesoso, Simoon Fedoro cajene jana:

“Ejeen. Iite ichoelaihanune coitucuhicha curuaanaa,” naane jana:

“Aihane quere esenetaurera beraihura,” naane baihate coaiten:

<sup>16</sup> “Jonasi calaohi Simoon ii coichana aina cutaain cacoelaaina,” naain bajaa Jesocurisitone jana:

“Iite ichoelaihanune coitucuhicha curuaanaa,” naane jana:

“Aihane quere esenetaain tonoraeraauru beraihu,” naane jana coaiten:

<sup>17</sup> “Jonasi calaohi Simoon, ii coichana aina cutaain cacoelaaina,” naain nichata saain bajaane jaunte, inaderaain:

“Ejeen. Iite itolere coitucuhin, esinae ichoelaihanune coitucuhicha curuaanaa,” naane jana:

“Aihane quere esenetaain tonoraeraauru beraihu. <sup>18</sup> Esinaena aitoonra. Enamanaaneeinne banate, necoreetein, chunijiu cunaa jereinajaaun cure-jetohi. Jana, inae biinaa neeinete, ichoii caeacaecaaine jana, ichajione curujuaain, cunaa jereeneina jaun niha natiin chamaaurureeincha,” nae Simoon Fedoro rai Jesoso. <sup>19</sup> Niritoha Jesoso, “Naaonjoainna Cana Coaunera ere tonoraanune coreniha oha cureeunni,” naain coitucuha Fedorone coina.

Nii baihate: “Quere tonoraeraneein neeu, inoaelu netiin,” naane jana, <sup>20</sup> jaotoroaalaain canu coari Fedoro, acaauru caaijie cuhanune jaun.

<sup>21</sup> Nii jaunte: “Chataaenriha jana caa,” naa Fedorone janate:

<sup>22</sup> “Chaquena aasare ichei. Canu jerichaaunete nacoauneein turuhanune que tiaaajoaain ichaonaa naine, Ii laaen querecha tonoraau,” nae.



<sup>23</sup> Niritohana jaunte, orihaunnijiecha naaure ita rai nii canu aina Cana Coaunera Calaohi coitucuurera. Coatiha oenerihanuhinne que aitohi. Netechu jataain, “Chaquena aasare ichei. Canu jerichaaunnete, coaiten turuhanune que tiaaoljaain ichaore,” nae Fedoro rai caque Cana Coaunera Calaohi Jesoso.

<sup>24</sup> Carajenihane coaraain, laenaanune jaunte, esinae rauhijiriin erenaane.

<sup>25</sup> Itolerete niqwi ichae Cana Coaunera Calaohi Jesoso nete saain laenanohineein neene. Satiin laenanohineein nihane, nerihei caa chauratane que tenaana jaan.

## **Cana Coaunera Calaohi Jesoso Cocoainanohichuru Afosotooru Ichanohichuru**

*Afosotooru rai, tururai niha Cana Coauneraacha letoanaa jerei- Cana Coaunera Suujuene*

<sup>1-2</sup> Nii nunuhe caje coauneein, niicha ichanohin ichaain, cachaauru re-laalu Cana Coaunera Calaohi Jesoso dedeeu cauha cuhane que tiaaajoaaine quene, caa ichei beein, jauriaanejeein laenaunlu, jataain ii belaichaaunna jaunra Teofilo.

Chaen techu dedeeu cauha cuhane ajiniha, rai afosotooru- niicha co-coainaenenuuru cotijiaain raain suujua tenajaerate Cana Coaunera Suujue que acaauruhacha ichanenenu coitucuhin ichacuruhane coina. <sup>3</sup> Ohane baiha jetaote, jenachoonca janoneein cachaneein ecocohin, acaauru rai Cana Coaunera Cojoanonaa que ereereje esinae rauhijiriin oo caje ichanaain enacoauneein ichaohane esenetaauruhane coina.

<sup>4</sup> Jaiti Jerosaleeun niicha cocoainaaauri afosotooru aina nihane bana jetaote:

“Jiaaonriha caa Jerosaleen caje chunijiun cuhichenera. Aitocooaunne rijijieein inara rai Ofaacha tenaa jerei cohacuche jauriaara,” naain chunijiun cuuru caohateein jetao,

<sup>5</sup> “Esinaete rauhijiriin acau que cacha baotisaain cojounacateraate Joaan. Nete inara chaabana nejein Cana Coaunera Suujue que, baotisaain cojounacatenohineein niha curiquicheeincha,” naain jauriaanejeein acaauru rai beelu jetao Cana Coaunera Calaohi Jesocurisito nitohaniane coina.

*Dedeeu iniha Cana Coaunera Calaohi Jesusone*

<sup>6</sup> Jesoso aina ita taojiaain neeuru najaaun jetaote:

“Enenena coaiten jianacoo Isaraeli cocoaicha nichaachene mitareeita Curuaanaa, raotojoein cana ichao que ichaohacachene coina,” naain bajaauruha niicha cocoainanenuurune jana jetaote:

<sup>7</sup> “Nainiheeiche inara nii coitucuhichenera. Chatohanai bana chaainti, nii ichaa cureein Ofata. Leinjiin acaachate nii coitucue niquicha. <sup>8</sup> Nete inara ichoae fauha Ofa Cana Coaunera Suujuene, nii aina itolere ichana naineriquicheein inara netonaicha. Chaente chatohanai que casilanaala, laraajiin itolere Jerosaleen sacutaain, itolere Jodea batane, Samaria batane, naaonjoainuri sacutaainchuru amuhemujeein canu ere beebejiha curiquicheein, itolereenein chauratane sacutaain canu coitucuuruhane coinara,” nae jetao acaauru rai Jesoso.

<sup>9</sup> Niritoha acaauru raine jaun jetaote, coarajeeuruhane jana jetao, dede sacari jana nitajeeoriin dedeeu cauha cue Jesoso.

<sup>10</sup> Nii jaun jetaote, coarihurenihane jaun, cuu caaijie cojoaelaauruhane jana jetao, somaratohanai que cajionequiin acaauru rene ecoocure coroatajai anjeraauru

<sup>11</sup> Nitohaneein ecocohin jetaote:

“Chanuna dede cojoaelaachete Calileea cocoaichacuru. Nii coarajeeichene jana dedeeu cauha cuhane rijijieeinte, coaiten turuha ureein Jesusora,” naaure jetao acaauru rai.

*Jodasi coreenraniha Matiasi raauruhane*

<sup>12</sup> Nii jaun jetaote, nii Oliboneein curuajaain nenea ichatane ucuunno neeuru caje cauha cuure Jerosaleeun, Jeroshacha cocoinaauri afosotooru, ichuunnejeein le oaraanca metoro fautaeriin nebetacanaa janonaa bana amuuruha cachaaurune jerecuruha Jorioocurune itaanejeein. <sup>13</sup> Inae nii neseeu turuhin jetaote, ecuunetiin coroatajaain coaranai loreri asaae sinii aihuruhane jaun jetao, iniha cuure ita caaijie, Fedoro, Saantiaao, Joaan, Aanderesi, Ferifi, Tomasi, Bartolomee, Mateeo, Arafeeo calaohi Saantiaao, chaen, Selote naaurunaja- Simoon, chaen, Saantiaao calaohi- Jodasi, naaonjoaainunri. <sup>14</sup> Satiin nii afosotooru jetaote, inetono janonaa bana ita taojiaain, Cana Coaunera bajae bajaecururejetelu, Jেসосо নেজেরাঅুরু, chaen neba Mariha, chaen leeochoaauru enecuru, naaonjoaainunri aina.

<sup>15</sup> Nii cojoanonaa bananeein jetaote, ita taojiaaure lefasha coroata chooncaain nenacaauru- Cana Coaunera Calaohi Jেসосо এসেনেতােরাঅুরু. Nii jana jetaote, acaauru cataaun nichaauraain jetao, acaauru rai:

<sup>16</sup> “Jesocurisito coreniha canejeraauru, inae Quiricha Inoaensi cuhane laenaerateein Rabiri que beratihalu Cana Coaunera Suujuene rijijieein situhanetene. Nii jaunte Jেসосо mucuha cunacaauru aina cue Jodasi, acaauru rai beranu que. <sup>17</sup> Canacaanu aina nere beranu quete niqui ranoinjeein nelu. Nete nitohaneein ichae. <sup>18</sup> Nii Jodasi jetaote, coretecuruhane jaan coriqui coreniha atane coretihane jaun jetao, nii baiha nemarote. Nemarotihane jaun jetao, couturi que chujujuaain tacaane jaun jetao, nefohitoha rai surine jaun, jianacoon chatolene cacha suri. <sup>19</sup> Nii coitucuhinte, nii atane curuaateure Jerosaleen cocoaichacuru Areseramaneein. Acaauru ere cuhane, ‘Areserama’ naanete, ‘Ichana core- coriqui coreniha ranoin atane.’ naane aite. <sup>20</sup> Cana Coaunera Quiricha Inoaensi- Salmo cuhanete: ‘Rai loreri quete jaole que.

Nihei nasaae ichoai.’

naain laenanohineein ne. Chaen techu:

‘Niicha ichaneni neein nenea

icharaaunu quete enoe

corenranu que leeocho cacha.’

naain, Cana Coaunera Quiricha Inoaensi cuhane laenanohineein ne.

<sup>21-22</sup> Nete, cau canacaanu aina neeure- Cana Curuanaa Jেসосо baotisa Joanne caje coauneein- dedeeu cauha cuhanereein tiaaajoaain- canacaanu corihaniha amuhemuhenaauru cachaauru. Aihana jaun, canacaanu lechoonca coroatajanu que, chunocoha acaauru caje enohanete caohachare, canacaanu aina, esinae rauhijiriin ichanaa Jেসোসে coaracuruhane jaun, canacaanu aina beraanu que,” nae jetao Fedoro.

<sup>23</sup> Nii jaun jetaote, “Barasaba Josto” naain acaauruhacha curuaatei Jose, Matiasi, naaonjoainuri, jelai ita rohan tenajaain jetao, niicha jerei biha acaauru rai Cana Coaunerane coina jetao:

<sup>24-25</sup> “Cana Coaunera, iite saatiin cacha suujua coitucuera neein neeicha. Iite, canacaanu que nii coitucueratenaa naineeicha. Chariji, caa coroata- jaihuri caje nainere, niicha jereeeinein nosa coreniha cunaa jerena jaun cunaa corenraniha, iicha tei amihanenaa ichana nainereta,” naain jetao, Cana Coaunera bajaare acaauru rai.

<sup>26</sup> Niritiin Cana Coaunera bajaauruhane baiha jetaote, niha ajeri catu, cojunaca siriina jaun, “Cojunaca siricha mucuerate aca nereeincha,” naauru jana jetaote, rauhijiriin nii cojunaca aina nenea mucue Matiasi. Nii rijiee- oritiin jetaote, lechoonca coroatajaare Jেসোসিতো লেটনোকুরু, lechoonca leinjiin neeuruhane baiha.

## 2

### *Fauha uha Cana Coaunera Suujuene*

<sup>1</sup> Jorioocuru beseta Feentecosetesi janonaa bana nihane jaun jetaote, satiin le laurijieein ita taojiaain neeure, Cana Coaunera bajaauruhane coina Jesocurisito esenetaeraauru.

<sup>2</sup> Nii jana jetaote, cuu le lorerijieein satiin codohacooruhana jana, luhecotariin tonijiaain cujuana rijitiin fauha uhe Cana Coaunera Suujue dede caje. <sup>3</sup> Nitohaneein tonijiaain fauhin jetaote, nii satiin- ecu nenacaauru suujueniha neeoritiin, acaauru bichohe naainetiin, usi lanaro tocokanein lanalanaaonanae. <sup>4</sup> Nii aina jetaote, nejelau nejelaauru, lauri laurichuru caje uhin cuu turunacaauru cachaauru rai, acaauru ere cuhane ereeure satiin Jesocurisito esenetaeraauru, erelanaaca Cana Coaunera Suujuene rijijieein.

<sup>5</sup> Nii bana jetaote, cuu nii Jerosaleeun turuhin neeure lauri lauri atane sacutaainchuru caje unacaauru- Cana Coaunera aitoonjoa rijijieein ichaonacaauru Jorioocuru, ecu Feentecosetesi beseta bitoaaauruhane coina. <sup>6</sup> Nitohaneein inae acaauru ichoaae fauha Cana Coaunera Suujuene jana jetaote, tonijiaain ereeuruha Jesoso esenetaeraaurune jana jetaote, satiin codoonetoore nii lauri lauri caje unacaauru cachaauru, acaauru ereeuru cuhane aitocuruhane aonaain. Nitohaneein jetaote, suujuanu inaoritelanaala <sup>7</sup> cojoaelatonajaain:

“Calillea cocoaichacuru nihanatiin, <sup>8</sup> inasiina cana ere cuhane aitocure aonacaachene coina. <sup>9</sup> Caute nihacache itolere sacutaain caje uhinichaachene, Partia batane caje unacaauru, Media batane caje unacaauru, Elam batane caje unacaauru, Jodea batane caje unacaauru, Capadosia batane caje unacaauru, Poonto batane caje unacaauru, chaen Asia batane caje- unacaauru, <sup>10</sup> Firijia batane caje unacaauru, Paanfilia batane caje unacaauru, chaen Egipto batane caje unacaauru, tajiha Sirene bujua nena Libia batane caje unacaauru. Chaen techu, cau neeure cana aina Romanocuru netonai. <sup>11</sup> Acaauru tabaaurute Jorionecure. Jana leeochoaurute, Jorionecurenihane saijieein Joriooneein nerotocure. Chaen techu cau neeure cana aina Cureta batane caje unacaauru, chaen Arabia batane caje unacaauru, naaonjoaainunri. Nitohaneein araai laurii caje uhacachene saijieeinte, satiin lauri lauri caje uhin nichaachene ereeuru cuhane Cana Coaunera coroaecuruhane jana aonajihancache,” naain jetao satiin cojoelatoore.

<sup>12</sup> Nitohaneein cojoelatiin jetaote: “Chatohanihana,” naain ita caje bajaee bajaecure satiin.

<sup>13</sup> Jana acaauru tabaauru jetaote: “Chaquena ereeure caa ajenacaauru,” naain acaauru batocure.

### *Cachaauru raite ere Fedoro.*

<sup>14</sup> Nii jaun jetaote, lechoonca leinjiin aina ecu nenacaauru afosotooru aina nichaauraaain jetao tonijiaain:

“Aonacuche satiin Jorioocuru. Satiin cau Jerosaleeun neiniquichene raina aitoreeunni coitucuhichene coina. <sup>15</sup> Coatiha aitocohichene jana, aansijiiniin ajeeuruhi caa cachaauruta. Inasiina jaiti janoneniha natiin ajeeurureta. Ena nuna macojiu teejiha enoto natiin, cha caaunna ajeeurure. <sup>16</sup> Nete catohanihane coina, inoaenlu inae aitiin besihalu Cana Coaunera Ere bera inoaensi Joherine rijijieein:

<sup>17</sup> ‘Inara rai quiicha tei janonaa besautelalaje raina, satiin chauratane que nenacaauru choae

canu suujue letoareeunnicha.

Nii banate,

quiicha chana jerei coaraain

beebejiha cuurureein canu coreniha,

inara nefoerateeurura.

Enamanaacuru niha natiinte,

acaauru que quiicha coaratei

coaracurureeincha.

Binaacuru nihanatiinte,

quiicha coaratei

coaraa cuurureein acaauru sinihura.

<sup>18</sup> Nitohaneein inae cutihane banane,

saain canu cachaauru,

enecuru, quichaauru,

naaonjoainuri choae

canu suujue letoareeunni

canu ere beebejeeuruhane coinara.

<sup>19</sup> Chaenna, naain dedeeu

jataain cojoaelanaacojoai

coaratiha cureeunnicha.

Jerichanejeeinachu,

chauratane que coaratiha cureeunnicha.

Nii banate ecooca cureein

ichana, usi tabai,

suruaa neeonjoaain,

naaonjoainuri chauratane sacutaaincha.

<sup>20</sup> Nii banate conoenereein enotora.

Jana atenete,

ichana tocohanai jana niha cureeincha.

Nitohanihate cureein

inae ichuun nejeeonriha

turu rai niha inara Curuaanaane janara.

Nii cojoanonaa banate,

coasinacaain elunareeincha.

Nerinaain nii caje nichotei cachata.

<sup>21</sup> Nete, cairichaaajoaain coaraa

Cana Curuaanaane coina

bajae bajajeein ichaonacaauru,

satiin nii caje nichotiha cuurureeincha.'

naain nere bera inoaensi Joheri que beratihalu Cana Coaunerane rijijieeinte, inae caa aihane jana coaraquichera.

<sup>22</sup> Aihana jaun, caohachaaain rautaaain aitocooaunne aonacuchena, caa que erete aonaquichera Israaeli cocoaichacuru. Satiin coarajeeichene notara-caete, itolere ichaaain inara notaarate Nasarete cocoaicha- Jesoso que Cana Coaunera rai letononeein nihane coitucuhichene coina niquicha. <sup>23</sup> Nete, inae inoaenlu nitohaneein teeichene coina, niicha jerei rijijieein ichaa Cana Coaunerane jaun, inara rai tiha nii terane jana, amaain teeiche nechu aansai cachaauru raine jaun, coroso que teein sohin jaaorelu. <sup>24</sup> Nete onaa caje ichatelu Cana Coaunera, onaa caje colucohin, amuritona nainesiniha onaane jaun. <sup>25</sup> Inoaenlu jaiti caa chauratane que turueniha Jesocurisitone janate, aitorichaaain Jesusone rijitoein:

'Itolere janonaa banate,

cacorataanereein Cana Curuaanaara.

Aihana jaun,

nerinaain chatohaneein canu terata.

<sup>26</sup> Nii jaaunte,  
raotojoeein rachoojoeein ne canu suujuara.

Chaen nechu,  
chaque casilanaala raotojoeein ichaaon,

<sup>27</sup> curu cuhane nitajiha canu jaberecone nainatejelanaala,  
niheichu

setuha canu jaberecone nainatejenereeinine jaunra.

<sup>28</sup> Iite canu que,  
onaa caje ichananaja coarateeicha.

Nii jaunna,  
raotojoeein rachoojoeein nereeunni,  
narichaain Jesoso, Cana Coaunera raine rijitoeinte belu curuaanaa  
inoausi Rabiri que beratiha Cana Coaunerana jaun.

<sup>29</sup> Jesocurisito coreniha canejeraauru, jerecuchene esinae rauhijiriin  
inara rai aitate aonaquiche. Nii coitucuhichene rijijeeinte, ohalu cana foer-  
atera Rabirine jana, conautecuruhane jaun cau ne rai natanebana. <sup>30</sup> Nete,  
esinae rauhijiriin rai nere bera inoausi niha Rabirina jaun, rai nichoala-  
cana curuaanaa-*Rey* neein tihane coina, rai besihalu Cana Coaunerane jaun,  
coara rijijeein coitucuelu- curuaanaa inoausi Rabiri:

‘Ti ichoala ichoalacuru calaohite, Jorioocuru curuaanaa *Rey* niha cureein-  
cha.’ naain que coitucueratiha Cana Coaunerane jaun.

<sup>31</sup> Nii jaunte, inoaulu jaiti turueniha Cana Coaunera letono- Mesihazine  
jana, nota que coara rijitoein:

‘Naaonjoaainte, turuha ureeinha. Nihei nitajerinaain rai jaberecota.  
Niheichu ecu seturinaainta. Oo cajete ichanareein Mesihaseicha,’ naain  
caohacha nanejeein jitariin coitucuhana jaun, Jesoso coara rijitoein  
belu curuaanaa inoausi Rabiri.

<sup>32</sup> Nii jaunna esinae rauhijiriin bihalune rijijeein, canaacaanu netonai,  
canaacaanu nota que ichanaa Jesusone coaracaanu, ichatiha Cana Coauner-  
ana jaun. <sup>33</sup> Nitohaneein ichateeinte, enacoauneein dedeeu rae Cana  
Coaunera, rai raotono nichajai que, aina jiniiquiin nihane coina. Chaaen  
techu, nitohaneein dedeeu raain, nii rai niicha tenaa jerei rai Suujue te. Niite,  
caa inara notaracae canaacaanu nainetiin chaluhanee jaun, satiin coaraain  
aonaquiche. Aihana jaun, inae laen coitucuhiche raaotojoein. <sup>34-35</sup> Coatiha  
Cana Coaunera ere bera- curuaanaa inoausi Rabiri, dedeeu iniha cuhilu.  
Cana Coaunera Calaohi Jesusote iniha cuelu. Nii jaunte,

‘“Iite satiin Curuaanaa neeicha.  
Cau caraaotono nichajai que carohan nelaurihaau,  
ii que nejeratenacaauru amuritohine coina  
ichacaanne reentiaaincha,”

naa Cana Curuaanaa rai Cana Coaunerara,  
naain Jesoso belu Rabiri, beratiha que Cana Coaunerane jaun.

<sup>36</sup> Aihana jaun, satiin Jorioneeichene raina caa beeun raotojoein coitu-  
cuhichene coina. Nii coroso que teein inaraacha focoi- inaraacha atinai  
Jesusote, satiin Curuaanaa Mesihaseinein te Cana Coaunera,” naa Fedorona  
jaun jetaote, <sup>37</sup> que suujua rohecaain, jataaen inaderaain:

“Jesocurisito coreniha canejeraauru, cha charihacaanuta,” naain bajaau-  
ruhane jana jetaote:

<sup>38</sup> “Cana Coaunera notaracae baaso ichaain, osa que nesaruhin naosatein,  
naaonjoaain neeichene jiaanein, Cana Curuaanaa Jesocurisito coreniha  
nebaotisaerateeuche satiinte, inara osa caje inara mitaain, inara rai- rai

Suujue teeine Cana Coaunerara. <sup>39</sup> Catohaneein tihane cointe, inoanlu beratelu Cana Coaunera. Niite nenacaae inara caohachanu neein ne, satiin inara calaohichuru aina, satiin coriaae nenacaauru raine maajeein. Satiin niicha cotihacuri raite, rai Suujue tiha cureein Cana Curuaanaa-Cana Coaunerara,” <sup>40</sup> naain acaauru suujuatiha, nii cachaauru- baasoneein ichaonacaauru caje mituuruhane coina, Fedorone jaun jetaote, <sup>41</sup> nii niicha beebejei esenetaain tonoraeraauru jetaote, baotisaain cojounacatenojoinnein, Jesoso esenetaeraneein neeure, nii bananeein nichata oaraancai cachaauru.

<sup>42</sup> Nii jaun jetaote, satiin rauhijiriin ichaaore, relanajaauruha nii afosotoorune rijijieein, ita suujua rijitoejeen jiniiquuin ita coroatajaneein, ita taojiaain ita aina Cana Coaunera bajaain, ita aina jiniiquuin lenoneein naonjoaunre.

*Raotojoeinte ichaaore Jesocurisito esenetaeraauru.*

<sup>43</sup> Nii jaun jetaote, satiin cojoaelatoore, itolere ichaain- cachaauru no-taaratiha afosotooru que Cana Coaunerana jaun. <sup>44</sup> Satiin nii esenetaeraauru jetaote, ita suujua rijitoejeen neein, ita rai chaelai sirichuruhane ita sihure ita acatiha tacaain. <sup>45</sup> Chaelai acaauruhacha sirii que necoreteeuruhane nenainetiinete, ita aina nii core- coriqui teein ita rai leruhin raure, raotojoein latecuruhane rijiinanaain. <sup>46</sup> Cojoanoonetoejeen jetaote ita taojiaaure, ita taojiaauruhana jaan coloheri- Teenforo asae. Rai lorerichuru asaae nihanatiin jetaote, ita taojiaain, ita rai lenone chaluhin lenonecure jiniiquuin, raotojoein rachoojeen <sup>47</sup> Cana Coaunera coraajeein. Chaen jetao techu, caohachaaain neeuruhane coaracure satiin ecu nenacaauru cachaauru.

Cojoanoonetoejeinte, niicha ichoteratecuri tiha acaauru aina, Cana Coaunerane jaun nejeeotejeen sacuure.

### 3

*Nerautaa leinjiin bacosane*

<sup>1</sup> Nuna macohi choae teejiha enotone jana jetaote, nii ita taojiaauruha Jorioocuruna jaan loreri Teenforo asae cuure Fedoro, Joaan, naonjoainuri cuu Cana Coaunera bajaauruhane coina. Jelai rijiu enoto tiaajianaain jetaote, ita taojiaaure satiin Cana Coaunera bajaauruhane coina. <sup>2</sup> Nii jana jetaote, nii Teenforo acuujuaniha ne leinjiin bacosaneein nejanoa caje coaaneein nena cache. Cojoanoonetoejeen jetaote, nii Teenforo acuujuacaohachajeineein- acaauruhacha curuhateihu amaain teure, coriqui bajaa ecu enonacaauru cajene coina. <sup>3-4</sup> Nii jana jetaote, enooru coina iniiijina cuuruha Fedoro aina Joanne jana jetaote, acaauru caje coriqui bajae nii bacosa. Nitohaneein coriqui bajaa acaauru caje, nii bacosane jaun jetaote, coarajeein jetao:

<sup>5-6</sup> “Aonaanra,” naa nii bacosa rai Fedorone jana,

“Chaelai teeuruhane coina jecha aite,” naain acaauru coarajihane jana jetaote,

“Nihei nohane canacaanu rai coriqui. Nena quiicha sirii tereeni iche-icha. Nasarete cocoaicha Jesocurisito coreniha, nimichuhin nichaauraain amunte coaracaara,” <sup>7</sup> naain nii bacosa biji- raotono nichajai que mucuhin michuha Fedorone jana jetaote, nii rijieeoritiin caohachanaineein nerautae nii bacosa tija aina- rai tajichocuru. <sup>8</sup> Nii jaun jetaote, nimichuhin nichaauraain, nii ita taojiaauruha Jorioocuruna jaan loreri Teenforo asae enoha cue jelhate jelhatiin Cana Coaunera coraajeein.

9-10 Nitohaneein nimichuhin nichaaurain amuhin, Cana Coaunera coroaecane coaraain jetaote, satiin cojoaelatiin coasichure situuruhane nainein Teenforo bacuujuu- Caohachajeinein- acaauruhacha curuaateihu lauhequuin coriqui bajaera nihane coitucuhin.

*Teenforo chajenein nenea loreri Salomoonnein- acaauruhacha curuaateihu neein ereerejiha Fedorone*

<sup>11</sup> Nitohaneein jetaote, Fedoro aina Joaan caje coriaae nalunaa jerene nii bacosa nihane caje nerautaanaa cacha. Nii jana jetaote, Teenforo chajenein nenea loreri Salomoonnein curuajaain nenea asaae neeuruhane jaun, soronein ruhanihajaaintiin cuhin cojoaelatiin coarajeeure satiin nii cuu nenacaauru cachaauru. <sup>12</sup> Nii jaun jetaote, acaauru rai:

“Chanuna canacaanu cojoaelatohichete Israeli cocoaichacuru. Coatiha canacaanuhacha nejeein nihane nerautarihei caa cachata. Niheichu jataain leeochoauru amurijiriin, Cana Coaunera ere tonoraeranein nihacaanune jaun niheinta,” nae Fedoro. <sup>13</sup> Niritiin jetaote:

“Nii cana inoaensihuru- Abaraaun, Isaca, Jacobo, naaonjoainuri coaunera- Cana Coaunerate, jataain nelateein nihane coina, cocoaainain rai letono Jesoso letoaelu. Acate, nii cocoaainanacaihuri rai teeichene jana, jiaanena jeriha coberanadoro Filatone saijieein, caohateein jianena jereneechelu. <sup>14</sup> Nitohaneein caohachanejesina ichara nihanatiinte, jianena jeriha Filatone jana, caohateein neeichelu. Coinanaa, nechu aansai sonajaaineein nenea jianeratequichelu. <sup>15</sup> Nitohaneente, nii ichaonaa tera sohin joerateeichene jana, ichatelu Cana Coaunera. Canacaanuna, nii ichatiha Cana Coaunerane coaranein nihacaanu. <sup>16</sup> Nii Jesoso corenihate nerautae caa cacha- inaraacha coitucuicha. Jesosohacha corenihate, caoachanainejeein nerautae caa cacha inara notaracaaera,” naain jetao:

<sup>17</sup> “Acanihane coitucueeneichene jaun, sohin joerateeichelu inara curuanaacuru aina jiniiquine coitucuhanu raotojoeeincha canejeraauru. <sup>18</sup> Nitohaneein situhin nihanetene. Inae nere bera inoaensihuru que, ‘Naaonjoaate cairichaaeriin inae nirijieein cuaajeein sohin jaoha cuurureeincha,’ naain nere bera inoaensihuru que beratihalu inoaenlu Cana Coaunerane jaunte, Cana Coaunera ere nainaane coina, nitohaneein nii inoaenlu- inara coroatajaneraaunu que- niicha letoanaa jereilu Mesihasi teeichelura. <sup>19</sup> Aihane jaun, chatohaneein baaso ichaain neeichene, suujuelanaala jitariin beein, jiaaneein Cana Coaunera ere tonoraain neeuchete caseteco coaraquichene rai neeichene caje inara ichotemiin- Cana Coaunera. <sup>20</sup> Chaen techu nitohaneein neeichene, nii inoaenlu- inara coroatajaneraaunu que- niicha letoanaa jereilu- Mesihasi- Jesoso letoareein nacoauneeincha. <sup>21</sup> Nete jaiti itolere rucuheca Cana Coaunerane reentiaan, dedeeu niha cureein nere bera inoaensihuru que, inoaenlu beratihala Cana Coaunerane tocohaneeincha. <sup>22</sup> Nii quete, cana inoaensihuru rai:

“Caa nere beraneein caletohane rijijieeinte, inara caje nacoauneein rai nere bera letoareein Cana Coaunerara. Itolere que tonaane, nere tonoraain neeuchera. <sup>23</sup> Nere tonorana jeriheichurute, caohachanainejeein nitajihacuurureeincha.’ naain belu cana inoaensihuru rai Moisesa.

<sup>24</sup> Caritiinte aitoroaetoorelu Cana Coaunera ere bera inoaensi- Samoeri caje coauneein satiin nere bera inoaensihuru, catohaneein turuhane quera. <sup>25</sup> Nii jaun inarate, nii nere bera inoaensihuru que beratihalu Cana Coaunerane rijijieein, nii naitoonjoa sirichaneein neeichera. Chaen techu, inoaenlu cana foeratera inoaensi- Abaraaun rai:

“Satiin caa chauratane que nenacaaurune, caohachaaain teratiha cureeunni ii nefoerateeuru coreniha.’ naelu Cana Coaunera, cana foeratera

naelu Cana Coaunera, cana foeratera



inoausi- Abaraaun rai. <sup>26</sup> Niritohane jaunte, oo caje nii Calaohi ichateein, jauriaanejeein inara rene letoaelu Cana Coaunera, nii coaraain neeichene, baaso ichaaechajeein neeichene jianein neeichene, inara coroatajanein nihane coinara,” nae jetao Fedoro, nii cuu nenacauru cachauru rai.

## 4

### *Cocoinanacaihuri acatiha neeuruha Fedoro aina Joanne*

<sup>1</sup> Niritiin jaiti cachauru rai ereereca Fedoro aina Joanne jana jetaote, tajiha turuha uure saseredotecuru, Teenforo beraihurerafolisihacuru- curuaanaa, sadoseecuru, naonjoainuri. <sup>2</sup> Turuuruhane jana: “Coaraanachuinti oo caje ichana nainiha cachana jaun, oo caje ichanaalu Jesusone. Nii jaunne esinae rauhijiriin oo caje ichana nainiha cachane coitucuhacaanu,” naain cacha relauruha Fedoro aina Joanne aonajeeuruhana jaun jetaote, obaacure sadoseecuru: “Nihei chunei onaa ichatera. Nihei Cana Coaunera niha natiin onaa ichatena nainiheita,” naain cachauru relauruhana jaun.

<sup>3</sup> Nitohanein obajeein jetaote, Joaan aina curuataain Fedoro mucuhin amaain, inae sonaina nihana jaun, caresero cuhane tenajaain cuu janoaeratenajaure.

<sup>4</sup> Nii inatiin jetaote, atiin esenetaaure nii cuu aonajeeurera- arajii cachauru. Nii jaun jetaote, ita que jooraain quichauru nejesina janijiin, saogui oharaancaelalajeein Jesocurisito esenetaeranein neeure, enecuru, canaanaihuru, naonjoainuri janijilanaala.

<sup>5</sup> Nii cojoanoo jetaote, nii que ita rai ereeuru coina, Jerosaleeun ita taojiaaure Jorioocuru curuaanaacuru, satiin acauru bichauhenaauru, chaen Cana Coaunera Quiricha Inoaensi que cacha relaurera, naonjoainuri.

<sup>6</sup> Chaen jetao techu, cuu neeure saseredotecuru curuaanaacuru Anasi, chaen Caifasi, Joaan, Alejaandoro, satiin nii saseredotecuru curuaanaacuru araichuru, naonjoainuri. <sup>7</sup> Acauru jetaote, caresero caje rocoeratena- jaain, Fedoro aina Joaan raeratein, acauru cataaun tenajaain acauru rai:

“Cha cocoinanacainein inara tihane aina caa aaicheta. Cha corenihata,” naain Fedoro aina Joaan caje bajaauruhane jana jetaote, <sup>8</sup> coroatajaniha Cana Coaunera Suujuene jaun, cha que casilanaala jetao:

“Aonacuche satiin caraaichuru curuaanaacuru, satiin Israeli cocoaichacuru bichauhenaauru. <sup>9</sup> Nii cunaitenaa rai caohacha ichara coitucunaa jerein bajaachene jaanna, inara rai berichaanuhincha, coitucuhin neeiche satiine coinara. ‘Nitohaneinna nerautaa caa cachate.’ naain coitucuhichene jereha caunra. <sup>10</sup> Satiin aonajeeichene urichoone berichaanuhin, satiin Israeli cocoaicha neeichene coitucuhin neeichene coinara. Nii coroso que teratein- inaraacha sohin- inaraacha joerateilu Nasarete cocoaicha Jesocurisito- oo caje Cana Coauneracha ichatei corenihate, caohachanainejeein cunai caje nerautaan, caa canaacaanu aina inara acatiha ne caa cunai caje nerautanaa cachara. Inae satiin, inara nota que, caohachanainejeein nerautaane coaraquchera. <sup>11</sup> Caa cacha rautaera- Jesusote, letoae Cana Coaunera, satiin cacha coroatajaneraaunu que niqui. Nete, nere aonana jerelanaala, que jaolequiin neeichera. <sup>12</sup> Acate letoae Cana Coaunera, nabana nitajeein nihacachene coataara. Nihei chunei, leecha cacha tihei Cana Coaunera, caa chauratane queta. Leinjiin acaachate, chabana nitajenaa charanejeein nihacache jaanu teraanu queletononein nena ne, itolere baaso caje- jianacoo cana mitaeraanu quera,” naa acauru rai Fedorona jaun jetaote:

<sup>13</sup> “Caaurute, Jesoso aina amuhemujeen nerelanacaauru nera. Coatiha jataain cana tocohaneein, caohatiin- quiricha inaaure niheita. Nete jataain coitucuera rijitoein, erenaa inaaure caa cachaauru,” naaure cojoaelatiin nii cocoinanacaihuru, cha que casilanaala ereuruha Fedoro aina Joanne jaun. <sup>14</sup> Chaen, cuu acauru aina, chujuhecoha nii cunai caje nerautanaa cachana jaun jetaote, nii chaque tonaain erenaa nainecurene. <sup>15</sup> Nii jaun jetaote, nii ita taojiaauruhana jaan caje, mitaeratenajaure. Nitohanein, mitaeratenajaain jetaote, cuu nejesinajein, ita cotaicha rijitiin:

<sup>16</sup> “Cha charihacache, caa cachaauru ainata. Itolere caa Jerosaleeun nenacaauru cachaaurute, cojoelanaacojoai ichaain, caa leinjiin cacha rautauruhane coitucuerera. Nii que, nainihe, ‘Casaje.’ naain, irihacacheneta. <sup>17</sup> Coanete, taenein cuajein, Jesoso que- cacha relauruhane coataa, nii caohatichachete jianecurumiin, nabana chunei cacha rai, Jesoso que erein neeuruhane coataara,” naain jetaote, <sup>18</sup> Fedoro aina Joan cotijiaain:

“Jiaonriha Jesoso coacuhin que ereerejein chunei cacha relain neeichenera. Nii jianeechacuchera,” naauruha acauru raine jana jetaote:

<sup>19</sup> “Inara suujua coaracuche jauriaanejeeincha. Inasiina Cana Coanera ere tonoraacaanune jianeein inara ere tonorarihacaanu, Cana Coanera ere tonoraacaanune colaihaje tacaainta. <sup>20</sup> Nainihaacaanu nii que ereerejihacaanune jianichaanuneta. Inasiina, canacaanu uricho que- canacaanuhacha aonai, canacaanuhacha coarai, canacaanuhacha coitucui, naojoaihunri que cachaauru relanaa jianerihacaanuta,” naain tonoranaacuruha Fedoroone jaun jetaote, <sup>21</sup> cacha relauruhane caohatein:

“Nenacaen nitohanai ichaain, sacuhichenena, jelai choae jauhecotojoeriin inara casetecarichaanuhincha,” naaure jetao, acauru rai cocoinanacaihuru.

Nitohanein jetaote, casetecanajaelanaala, nirijiein jianenaacure. Jianenaana jerecuruhi jetao niqui. Ne jetaote, nii cacha rautauruha Fedoroone coaraain, Cana Coanera coroaecuruha satiin ecu nenacaauru cachaaurune jaun jetao acauru jianecure.

<sup>22</sup> Nii cojoelanaacojoain nerautanaa cacha jetaote, jenachoonca jaanaca amurijiri.

*Cana Coanera bajaauruha Jesoso esenetaureraauru, acauru lararajihane coina.*

<sup>23</sup> Nitohanein jianenaacuruhana jaun jetaote, nii neeuruha acauru leeochoaurune jaun, turuha cuure Fedoro aina Joan. Cuu acauru rene turuhin jetaote, “Naaonjoainte, canacaanu teure canacaanu casataain, cana araichuru bichauhenaauru, saseredotecuru curuaanaacuru ainara,” naain jitariin, nii acauru leeochoauru rai beeuruhane jaun jetaote, <sup>24</sup> cuu jiniiquiin, aonajeeuruhane baiha:

“Cana Coanera, iite cana janonaa coauneraneein neeicha. Iite cana rai dede, chauratane, cucuana, naaonjoain coauneraneein neeicha. Iite itolere cautenurijihuru coauneraneein neeicha Cana Coanera. <sup>25</sup> Iite, ii Suujue que beratein, ii ere bera inoasi Rabiri que beratein:

‘Chanuna joareein  
rai suujua auhacaain  
nererojoecaure  
laurilauri nenacaauru cachaauru.  
Chanuna nitohanein  
baasonein suujua coaracure  
inacoein cachaauru.

## 26 Chaen techu

Cana Coaunera amurijiriin nenea coacuhin, nii niicha letoai Mesihasi que nejerateeure cana rai chauratane coaraneein que nenacaauru aina *reycuru*.

naain aitiin berateeilune jaun, niritiin bihalu ii ere bera inoasesi Rabirine rijijieeinte, <sup>27</sup> Romanocuru curuaanaacha tei Jorioocuru curuaanaa Foonsio Filato, Jorioocuru *rey* Erodesi, chaen nejelau atane nenacaauru, chaen Isaraelitaauru, naaonjoainuri, caa neseeu netaojiaain nejerateeure, nii ii jerenohin icharaanu que- ii letono Jesoso- iicha janijii iicha rai Mesihasi ainara. <sup>28</sup> Nitohanihane coina, inae inoaelu coacuhin ichaailune rijijieeinte, aihurera. Nitohaneente, aitohine nainaaaurera Cana Coaunera.

<sup>29</sup> Aihana jaun, enene caje coauneein, canacaanu casataauruhane coaraaine, jelai amuritoheriin canacaanu coroatajaneena, cha que casilanaala, cachaauru rai, ii ere beebejihacaanura, Cana Coaunera.

<sup>30</sup> Chaen, laraajiin itolere ichana nainichaanune jaannu teeu, canacaanu rai, cunaitenacaauru rautaaain, cojoelanaacojoai ichaain naaonjoacaanune coina, esinaae rauhijiriin nii ii letono Jesoso letononeein nihacaanune coaracuruha satiin cachaaurune coinara,” naain jetao jiniiquiin Cana Coaunera bajaature.

<sup>31</sup> Inae Cana Coaunera bajaauruhane nainaaauruhane rijieeoritiin jetaote, nerurujuaa nii netaojiaauruhana jaan jelaiine jana, acaauru suujau neeoritiin, acaauru suujua laraajiae Cana Coaunera Suujue. Nii aina jetaote, chaque casilanaala, chaque tonajelanaala, satiin cachaauru notaracae laraajiin, Cana Coaunera Ere beebejeeure.

### *Satiin rucuhelete, satiin acaauru raineein ne.*

<sup>32</sup> Satiin Jesoso esenetaeraauru jetaote, jataain arajiin ita aina neeuruhane saijieein, ita suujua rijitojoein coacuhin jetao, “Coatiha leeinjiin cana rainuhachanu que, nihei caa canaacha sirii rucuheleta. Satiin cana raineente nera.” naaure jetao, satiin, ita rai. Nitohaneein jetaote, satiin raineein ne nii itolere acaauruhacha sirii.

<sup>33</sup> Nitohaneein jetaote, jelai choae jauhecotojoeriin, laraajiin, oo caje ichanaa Cana Curuaanaa Jesusone beebejeeure jetao nii afosotooru, itolere ichaain, acaauru coroatajaniha Cana Coaunerane que cachaauru notajaain. Nitohaneein jetaote, jelai choae jauhecotojoeriin, satiin, acaauru coroatajane Cana Coaunera. <sup>34</sup> Nii jaun jetaote, nii chunei leeinjiinejeein, chaque lanaain neeurene. Tabaauru atane sirichaaauru, tabaauru loreri sirichaaauru, naaonjoainuri jetao, que necoreteein, <sup>35</sup> nii afosotooru rai uhaain niicha raauri coriqui teeure, latecuruhane rijiinanaain acaauru rai luruuruhane coina. <sup>36</sup> Coaraaunachuinti jetao, nii acaauru jana nenea Lebita- Joseneein curuajaain nenea- Chifere cobena que nejanohanaa- Berenabeeneein afosotooruhacha curuaatei. “Berenabeen” naanete, “suujua nunaera” nae. <sup>37</sup> Nii cacha jetaote, atane sirihana jaun jetao, que necoreteein, coreniha coriqui raain jetao, jitaain nii coriqui tee, afosotooru rai.

## 5

### *Osa que nesaruhin, nohaneeuruha Ananihasi, Safira, naaonjoaihunrine*

<sup>1</sup> Nejetaote acaauru aina ne leecha cacha- Ananihasineein curuajai, rai comasai Safira aina. Aca jetaote, nii comasai aina leeinjiin atane que necoreteein, <sup>2</sup> ita suujua rijitojoein leruhin rai core raain, esi rijijieein jitariin amaera rijitiin: “Nocoa coriqui,” naain afosotooru rai teeure. <sup>3</sup> Nii jana jetaote,

“Ananihasi, chanuna ishujua cuhane enoha Moconajaerane rijitoojeen, Cana Coaunera Suujue rai nohanena jereei leruhin coriqui raain. <sup>4</sup> Nihei chunei ichei, ‘Caa atane que necoreteera,’ naain ereein neita. Nitohaneen, eletoaera que necoretenaa lanaalate, icheineen niha satiin coriquine maajeein inatiin, leruhin raain nohaneecha. Nii atane necoreteeina jaan, coatiaa nejelau raineen nihein. Nii jaunte niqui, satiin, coriquine maajeein icheineen nera. Chanuna nitohanai ichana coacuhin ichaai. ‘Canacaanucha jecha coritaai,’ naai jerihane niqui. Nete, Cana Coaunera notaracae canacaanu coritaai,” naa Ananihasi rai Fedorone jaun jetaote, <sup>5</sup> cuu aonajeeorihane baiha, tocojoaain tacaain, inae cuu ohe Ananihasi. Nii coaraain jetaote, satiin nii coasichure banetojoelanaala nii ecu neein coarajeeurera cachauru. <sup>6</sup> Nii jana jetaote, tajiha nichuuntaain coaraain, rai jabereco conajaain amaain conautiha cuure cachauru.

<sup>7</sup> Nii baiha jetaote, nichata oraai cuhane, tajiha turuhin enoha uhe nii onaa Ananihasi autana Safira: “Naaonjoaara,” naain coitucuelanaala, caohachanaenetojeen. <sup>8</sup> Nii jana jetaote:

“Esinaena rauhijiriin, nii beeichene jeeoneei coreneen, inara rai atane que necoreteeiche,” naain bajaa Fedorone jana jetaote:

“Ejeen. Nii bihaaanune jeeonejeeine, necoretihacaanuchera,” naane jana jetaote:

<sup>9</sup> “Chanuna ita suujua rijitoojeen, Cana Coaunera notaracae canacaanu coritaquiche. Nota tajiha uujueeuruhache ii sinijera amaain, conauteraauru cachauruchera. Inae itonaai amaaururichaainchera,” naa Fedorone rijieoritiin jetaote, <sup>10</sup> Fedoro tijia asaae tocojoaain tacaain, cuu ohe nii ene. Nii jana jetaote, rai lana conautecuruhane caje turuhin, enoha cuuruha nii cachaurune jana, inae oha nii enene jaun, rai jabereco amaain, rai lana rohan teein conautecure. <sup>11</sup> Nii jaun jetaote, banetojoelanaala coasichure nii satiin Jesoso esenetaeraauru, satiin nii nitohaniane coitucuurerane maajeein.

*Afosotooru aina cuaain, itolere cojoaelanaacojoai ichaain cachauru no-taaratiha Cana Coaunerane*

<sup>12</sup> Nii afosotooru aina cuaain jetaote, itolere cunai caun cunaitenacaauru, bacosacuru, maosacuru, naaonjoaihunri rautaerateen, itolere icharateen cacha notaarate Cana Coaunera. Nii bana jetaote, nii Teenforo chajeneen nena Salomoonneen curujai asaae ita taojianajaaocure afosotooru, satiin Jesocurisito esenetaeraauru, naojoainunri. <sup>13</sup> Nejetaote, nii chunei acauru aina netaojiana jecurene casi caun, jataain belainaacuruha natiin. <sup>14</sup> Nejetaote, arajiin cachauru enecuru netonaine maajeein Cana Curuaanaa esenetajeein nejeeotejeeure. <sup>15</sup> Nii jana jetaote, itolere cunai caun cunaitenacaauru mitaacoain, cacha situnajaun bero auhaniha teure, nela choae, rai rori choae, naajoaain, tabauru que neconaa Fedoro beraerane, nerautauruhane caina. <sup>16</sup> Chaen nii Jerosaleeun rohan nenacaauru-neseeruru nenacaauru cachauru netonai nihanatiin jetaote, tajiha turuha uure itolere cunai caun cunaitenacaauru, itolere coitucuchuhi cairichano-joinneen ichaonacaauru, naaonjoainuri uhaain. Niichuru jetaote, rai cunai caje rautanaacuruhane, jataain raotojeen satiin nerautaaure.

*Afosotooru que nejerateeruha cocainanacaihunrine*

<sup>17-18</sup> Nii jaun jetaote, itolere cacha, acauru belaihana jaun, nechu jataain necoelai caun, nii afosotooru mucuhin amaain, caresero cuhane tenajaaure nii saseredotecuru curuaanaa aina, nii oo caje cacha ichatena nainiha Cana Coaunerane esenetaaichuru- sadoseeocuru. <sup>19</sup> Nii jana jetaote, janotiin

caresero bacuujuua joracaain, acaauru mitae Cana Coaunera letono- anjera. <sup>20</sup> Nitohaneein mitanajaain jetaote:

“Naain Teenforo cuhane enohin, cacha cataaun nichaauraain, cachaaru rai beebejeein, caa Ena- Cana Coauneraacha Tei Ichaonaa beebejeeuchera,” naain jetao, letoanajae Cana Coaunera letono anjera. Nii jaun jetaote, mituhin cuhin, <sup>21</sup> janohetiin nii Teenforo asaae enohin, beebejeein cachaauru relaaure.

Nii nainiha jetaote, saseredotecuru curuaanaa, chaen acaauru aina nenacaauru, naaonjoaihunri, satiin- acaauru bichauhenaauru cotihacure, netaojiaauruhane coina. Nitohaneein, ita taojiaain jetaote, nii afosotooru raerateeure, caresero caje. <sup>22</sup> Nii jana jetaote, turuhin nii caresero joracaain coaracuruha nii acaauru letonocuru- folisihacurune jana, nii leeinjiinejeein, cuu neeurene. Nii jaun jetaote, letoanajaurera rai, biha cuure. <sup>23</sup> Turuhin jetao te:

“Caohatiin funojoineein, acuujuua naineeinchuru soondarooru que caohatiin beraichaaain nihanatiinte, joracaain coaracaanune jana, neeurene leeinjiinejeeincha,” naain beeuruhane jaun jetaote:

<sup>24</sup> “Nitohaneeuruhane, chachainti ichaa cuurureein nirijieein taeneein cuaajeeinta,” naaure, satiin saseredotecuru curuaanaa, saain Teenforo beraichacuru- folisihacuru curuaanaa, jataain nelateein nenacaauru saseredotecuru, naaonjoaihunrine jana jetaote, <sup>25</sup> tajiha turuhin:

“Nota Teenforo cuhanete, cachaauru relaa neeure caresero cuhane inaraacha enoanojoihurura,” naain, acaauru rai beenajae leeinjiin cacha.

<sup>26</sup> Nii jaun jetaote, nii rijieeoritiin cuhin, rai folisihacuru amaain, ranajaa cue folisihacuru curuaanaa. Nitohaneein cuhin jetaote, inae erunajaain, acaauru uhae, chatohaneein cunaain dadanajaelanaala cunaain, chatohaneein tenajaauruhane, ajeri que bodoosinajaauruha cachaaurune coataa. <sup>27</sup> Nitohaneein, turuanajaain jetaote, Jorioocuru curuaanaacuru, saseredotecuru curuaanaa, naaonjoaihunri acatiha tenajaain jetao:

<sup>28</sup> “Inae inara rai, nii cacha que, cachaauru relaaichene coataa aitiin, caohatihacaanulura. Nii saijieeinte, enanetojoein, nii jianena jereneeichera. Cha ichaquiche, nii que cacha relaainta. Inae itolereenein Jerosaleeun sacutaain, nii que cachaauru relaaichera. Chaentechu, canacaanu que, ohalu nii cachane ujuaitena jerequichera,” naa acaauru rai, saseredotecuru curuaanaane jana jetaote:

<sup>29</sup> “Cacha ere tonoracaanune choae jauhecotojoeriin jataain Cana Coaunera ere tonoraacaanune jaunna aihacaanura. <sup>30</sup> Nii cana inoasihuru Coaunera- Cana Coaunerate, nii coroso que tein, inaraacha sohi inaraacha joailu- Jesoso ichatelura. <sup>31</sup> Nitohaneein jaurihaanejeein, oo caje ichateeinte, raotono nichajai que lauriaain, nii Jesoso cocoaanae, itolere curuaanaa nihane coina, Cana Coaunerara. Chaen, itolere baaso caje- cacha mitaeraaunu quene maajeeinte, te Cana Coaunera, Israeli cocoaichacuru coroatajaneraaunu que, itolere baaso ichaechajeein neeuruhane jianeein neeuruhane, acaauru que suujua acatena nainiha Cana Coaunerane coinara. <sup>32</sup> Canacaanuna, nii coitucuhin, coaranein, que ereerejihacaanu. Chaen, nii nere tonoraain naitoonjoan icharaauru rai, Cana Coauneraacha tei Cana Coaunera Suujue netonoaite, canacaanu que nii coaratera,” naain tonoranaacure, Fedoro aina, leeochoauru afosotooru.

<sup>33</sup> Niritiin, tonoranaacuruhane jaun jetaote, obajeein, acaauru sohin, acaauru jaonaa jerecure. <sup>34</sup> Nii jana jetaote, nii cocoaicaihunri aina cuu ne leeinjiin fariseeo Camalieli. Aca jetaote, Cana Coaunera Quiricha Inoasi

coitucueraneein, acaentonai cocoainanacainein, jataain suujua acatecuroha itolere cachaaaurune jaan ne. Nii jetaote, nimichuhin nichaaaurain, basiinjiin afosotooru mitaerate, aerene. <sup>35</sup> Nitohaneein, inae mituuruhane jana jetaote:

“Aonacuche, satiin- Israeli cocoachacuru. Caohachaaain necohalajiiin aihuchera. Nijiaonriha, joenreein coitucuera lanaala, chatohaneein caa cachaauru terateein neeichene. <sup>36</sup> Aihalu Teeodane coaucuchenaainti. Coaracuchenachuhinti, leesajei que niqui, ‘Aca jete, jataain itolere amurijiriin nelateineeinera.’ naane jaun niqui, esenetaain sacuuruha jena fashai cachaaaurune. Nii jana, sohin jaooruhane jaun, ita caje riaaneein, jianecuruhalu- sacuureraauruneta. <sup>37</sup> Coaraaunachuinti, itolere sacutaain nenacaauru cachaauru janiichatiha Romanocuru curuaanaane bana, coaiteen Romanocuru aina nejeratiha leeinjiin- Calileea cocoaicha- Jodasine jana, jerichanejeein, acaentonoai sohin jaooruhane jaun, rai sacuurera netonoain, ita caje rihaaneein, jianecuruhaluneta. <sup>38</sup> Nii rijijieeintechu, Cana Coaunera letononeein aihureniha caa cachaaaurune, raajenihane jianiha cuurureeinte, rohecanacaaurureta. <sup>39</sup> Aihana jaun, Cana Coaunera letononeein aihuruhane jana, acaauru aina nejerateein, acaauru rohecaachenete, Cana Coaunera aina netonai nejerateriquicheeincha. Aihana jaun, coaa Cana Coaunera aina nejeratenaa amunena coaucachera,” naa Camalieline jaun jetaote, nere tonoraaure.

<sup>40</sup> Nitohaneein nere tonoraain jetaote, raujiaain nii afosotooru cotijiaain bisichatenajaain, “Nijiaonriha nenacae Jesoso que cache relaain neeichenera,” naain jetao, cache relaauruhane caohateein, jianenaacure.

<sup>41</sup> Nitohaneein jianenaacuruhane jaun jetaote, nii cocoainanacaihunru notaracae raotojoein rachoojoein, jelai caje cauha cuure, bisiinajaain mainajeein, acaauru necoejechanuuruha, Jesoso coreniha, Cana Coaunera notaracaene jaun. <sup>42</sup> Nii atiin jetaote, jianelanaala cojoanoonetojoein, nii acaauruhacha cohajei Mesihasi niha Jesosone beebejeein, cache relaaure, Teenforo asaae, loreri naineeine maajeein.

## 6

### *Caainsinein acaauru coroatajaneraaunu teeuruhane*

<sup>1</sup> Nitohaneein jetaote, nii bana nenacaen nejeeontejeein cuujueein, arajiin nefaaure Jesocurisito esenetaeraauru cachaauru. Nii jaun jetaote, nererojoecaaure nii Curieco ere cuhane erenacaauru- Jorioocuru, nii Ebereeo ere cuhane erenacaauru que. Nitohaneein, nererojoecaaain jetaote:

“Chanuna lenone chaluuruhane, inara aina nenacaauru autanaauru rai teeuruhane fautaerihanaain, canacaanu aina nenacaauru autanaauru rai quinacai teeure chaluurerata,” naaure Ebereeo ere cuhane- erenacaauru rai. <sup>2</sup> Nii jaun jetaote, jitariin, nii Jesocurisito esenetaeraauru taojiaaure nii lechoonca coroatajai Cana Coaunera letonocuru- afosotooru. Nitohaneein, taojianajaain jetaote, acaauru rai:

“Coatia caohacharihei, Cana Coaunera ere beebejihacaanune jiaaneein, cache rai lenone teeurera beraichaneein nihacaanuneta. <sup>3</sup> Aihana jaun, canejeraauru, caaunsine cache- itolere coitucuurera- Cana Coaunera Suujue que suujuequiin nenacaauru, inara caje, chariji chaainti esinaae rauhijiriin nitohanai ichana nainaeraaurune, niichuru janijiin beeuchene, canacaanu, acaauru rai amihanenaa tihacaanu, jelai teein, nii coaaraneein neeuruhane coinara. <sup>4</sup> Canacaanuna laen, satiin rai, Cana Coaunera bajaebajajeein, Cana Coaunera ere beebejeein sacurichaanuhicha,” naauruhane jana jetaote, <sup>5</sup> satiin, ita suujua rijitojoein jerecure.

Nitohaneein, jereein jetaote, Jesocurisito ere esentaain- Cana Coaunera Suujue que suujuequiin nenea Eseteba, chaen Ferifi, Poroocoro, Nicanori, Timoon, Paramenasi, chaen leeinjiin cacha- Antioquiha caje nenea- Jorioonein nerotona- Nicolasi, naaonjoainuri janijiin raare. <sup>6</sup> Nitohaneein janijiin ranajaain jetaote, tajiha turuanajaa uure nii neeuruha afosotoorune jaaun. Nii jana jetaote, acauru couturi choae biji merecaain, Cana Coaunera bajaare, acauru cocoainaa Cana Coaunerane coina.

<sup>7</sup> Nii aina, itolere sacutaain riaaneein, Cana Coaunera ere beebejeeuruhana jaun jetaote, nenacaen jelai choae jauhecotojoeriin, Jerosaleeun, jataain nejeeonteure Jesocurisito esenetaeraauru cachaauru. Arajii saseredotecuru- Jorioonein nenacaauru niha natiinte, Jesocurisito esenetaare.

### *Eseteba mucuuruhane*

<sup>8</sup> Nii Eseteba jetaote, coroatajaniha Cana Coaunerane jaun, itolere que laraajiin, itolere cunaitenacaauru rautaain, itolere ichaain cachaauru notajae. <sup>9</sup> Nii jaun jetaote, Cairichaerinojooinee Neeuruhane Caje Mitanojoihuru neein curuajai sinacoca nenacaauru- Sirene caje, Alejaandiria caje, Silisia caje, Asia caje, naajoainuri caje unacaauru tabaauru jetao, Eseteba aina, ita cotaicha rijitocure. <sup>10</sup> Ne jetaote amuritonaa nainesihurene, Eseteba suujuatiha Cana Coaunera Suujuene que laraajiin irihana jaun. <sup>11</sup> Nii coreniha obajeein jetaote, tabaauru coretecure, nechu joaereein caje rochin, irijiaain:

“Baasoneein Moisesa que ereein, Cana Coaunera netonai quete erera,” naain acaauru aina coulurujeeuruha, nechu joaenreeine coina. <sup>12</sup> Nii jaun jetaote, niritii beeuruhana jaun, Eseteba que nejerateein, codoonetiin Eseteba mucuure- satiin cuu nenacaauru, satiin- nii Cana Coaunera Quiricha inoaei- coitucuurera, satiin- acaauru bichauhenaauru, naaonjoainuri. Nitohaneein mucuhin jetaote, tararaain amaain, acaauru curuaanaacuru rai teure, nii rucuhecuruhane coina. <sup>13</sup> Nii choae tacaain jetaotechu, nohaneein acaauru aina colurujeraanu que- casaje cachaauru arihuruhana jaun:

“Canacaanu netonaina chuhisi, aonajenajaaocaanura. Inetono janona bana te, ‘Chaque jete nelatere cana rai Teenforo. Chaque jete nelatere cana rai- Moisesa aitoonjoa- Moisesa ere. <sup>14</sup> Nii Nasarete cocoaicha Jesoso jete, cana rai Teenforo chamuhitiinjien jaohaje cureeinjien. Nii ichoae tacaain jete, cana rai Moisesa aitoonjoa, cana ichao corereinjien.’ nanajaaonca chuhisicha,” naauruha nii cocoaainacaihuri rai, nii casajeeurune jaun, <sup>15</sup> nii Eseteba coarajeeuruha- saain- nii cuu nenacaauru- cocoinacaihuri, satiin- nii cuu nenacaauru- cachaaurune maajeeine jana jetaote, Cana Coaunera letono anjera nomeri tocohanein necore satiin rai nomeri.

## 7

### *Jabereco coreniha iriha Esetebane*

<sup>1</sup> Nii jaun jetaote: “Esinaaena rauhijiriin, ii que erenaaniha,” naain Eseteba caje bajaa- saseredotecuru curuaanaane jana jetao:

<sup>2</sup> “Aonacuche canejeraauru, satiin ichauhenaauruna, nii que rauhijiriin aitete, aonaquichera.

Jaiti Araaun ichaoha cueniha cana foeratera inoaei Abaraaunne ajiniha jetaote, Mesopotamia batane nihane jana, rene ecocohin: <sup>3</sup> ‘Caa ii atane jiaaneein, satiin ii araichuru ratiriin, ichei quiicha coarateeni atane que ichaonihura.’ naa Cana Coaunera, Abaraaun raine jaun jetaote, <sup>4</sup> Caldea

atane caje mituhin, naain nejelau ataneu- Araaun neein curuajaihu ichaoha cuelu Abaraaun. Nii baiha jetaote, inae oha rai inacane jana, caa ena nihacachene jaan atane que Abaraaun letoae jetao- Cana Coaunera niqui. <sup>5</sup> Ne jetaote, nihei aansijineeiniji, rai atane tenelu Cana Coaunera. Ne jetaote, nii caaniha jetao: 'Ohine baihate, ii calaohichuru rai, chichoalacuru rai, naaonjoainuri rai niha cureein atanera. Chaen coroatajajeein nefaaururihaain ii nefoerateeuruta.' nae Cana Coaunera, Abaraaun rai. Nii bana, jaiti neniha leeinjiinejeein Abaraaun rai- canaanai inatiin jetaote, Abaraaun rai nirite Cana Coaunera.

<sup>6</sup> Niritiin jetaote, Abaraaun rai: 'Jauriaanejeeinte, jena fasha jaanacaneein, eroraqui nejelau atane que ichaoha cuurureein, belainohine lanaala, nechu caseteco rijijieein ii nefoerateeurura. <sup>7</sup> Nena, nii acauru cairichaerichaauru cachaauru casetecaain, jelai caje Isaraelitacuru rocoerateein, nii caitoonjoa- acauru que banihateein- quicha rucujuei atane que teratenajareeunni, acauru que banijiaain atane que ichaohin, quere tonoraain ichaooruhane coinara.' nae Cana Coaunera, caa nihacachene jaan atane que. <sup>8</sup> Chaen techu esinaae rauhijiriin, Abaraaun rai aitohane coujounacanu que: 'Quichaneein nejanoha ichei canaanaine, jaberoco cari jiununuerateein saerateeura.' naa Cana Coaunerana jaun, nejanooa rai calaohi Isacane jana jetao, fosa janoneein nejanoha baiha catiaain jetao, coriha cari jiununuerateein saerate Abaraaun. Nii jaun jetaote, jerichanejeein rai calaohi Jacobo icharate Isaca. Jerichanejeein jetaotechu, nii lechoonca coroatajai rai calaohichuru Isaraelitaauru foerateranuuru icharate Jacobo.

<sup>9</sup> Nii Jacobo calaohichuru jetaote, cana inoasihurune. Acauru jetaote, nii acauru ocoala Jose que nererojoecaain, que necoreteeure Egiptoo cunacaauru- cachaauru rai, Egiptoo amaain, que necoreteeuruha Egiptoo cocoaicha raine coina, nechu jataain nocoelai caun cotaiha. Nejetaote, atiin nii jana, Jose coroatajane Cana Coaunera, itolere necairichanaa caje mitaain. <sup>10</sup> Nitohaneein jetaote, itolere necairichanaa caje mitaain, coroatajaniha Cana Coaunerana jaun, itolere coitucuha Josene coaraa Egiptoo curuaanaa Faraaonna jaun: 'Acate, caque jauriineein- itolere coaraneein- itolere curuaanaa neein- nerora rijijieein nihane caohachaera.' naain, coberenadoro neein nii Jose cocoainae jetao Faraaon. Nii jaun jetaote, itolere- Faraaoncha sirii erora rijijieein, itolere atane curuaanaa neein coberenadoro neein nelu jetao Jose.

<sup>11</sup> Nii baiha jetaote, carajaaajoaain catiaain, necairichaaurelu satiin cana inoasihuru, caohachanainejeein neniha quinacai, Canaanun, nii Egiptoo nihanatiina jaun. Itolere caa cana atane sacutaain, niheiluhun chunijihun quinacai arihuruha cana inoasihuru- cana fojiaraaurune jaanu.

<sup>12</sup> Nejetaote, nii bana Egiptoo curuaanaa rai niha tiricone coitucuuriin, rai calaohichuru- cana inoasihuru letoae Jacobo, Egiptoo tirico coretiha cuuruhane coina. Nii tirico coretiha cuuru que jetaote, jauriaanejeein, Egiptoo cunaa nunueteurelu- cana inoasihuru. <sup>13</sup> Nii baiha, coroata saain cuuruhane cuhane jetao te: 'Inara caje- nena neeine neeunra.' naain nihanacuru que, necoitucuerate Jose. Niritohane jaun jetaote: 'Acauru caje nena neeina nihate,' naain Jose coitucue Egiptoo curuaanaa- Faraaon.

<sup>14</sup> Nitohaneein jetaote, nii baiha neoriin, acauru inaca- Jacobo raerate, jitariin calaohichuru aina curuataain, satiin Egiptoo, cuuruhane coina, raeratenajae, rai nejeraauru que Jose. Itolere neein, caaunsichoonca saouii- nenacaauru naraaichuru raerate jetao. <sup>15</sup> Nitohaneein jetaote, Egiptoo ichaoha cuelu jetao Jacobo. Cuu neein jetaote, ohelu. Chaen jetaotechu, cuu



oorelu nii calaohichuru, cana inoasihuru netonai. <sup>16</sup> Nii baiha carajaain neein jetaote, nii Egipto caje mituurelu cana inoasihuru ichohalacuru-Isaraelitaauru. Nitohaneein mituhin jetaote, nii acaauru rinaja- Jacobo bucuuru rocohin amaain, Siqueeun, Amoro calaohichuru caje- Abaraauncha coretei- atane que rai bucuuru amaain rucuhecurelu.

<sup>17</sup> Nii baiha carajaojoaain catiaain jetaote, inae Abaraaun rai jinateein, Isaraelitaauru rai- atane tenaa jeriha Cana Coaunerane cataiinaecane jana, inae arajiin nefaaecure- Isaraelitaauru Egiptoo. <sup>18</sup> Nii bana jetaote enoelu, Jose coitucuelanaala nenea- *Rey*, Egipto curuaanaa- nihane coina. <sup>19</sup> Nii *Rey* jetaote, cana inoasihuru- Isaraelitaauru coritaain cairichaain, acaauru bereecuru- ena nejanoanacaauru- quicha cojoaajihuru joerate, nabana arajiin nefaauruhane, Egipto cocoaichacuru que nejerateeuruhane coataa, necohalaai caun.

<sup>20</sup> Nii bana jetaote, nejanoaelu Moisesa. Nii nejanoaha Moisesane jana jetaote, jataain belaaain coaraelu Cana Coaunera. Nii jana jetaote, nichata atejeeincha sirichurelu asinojoneein rai fojiaraauru. <sup>21</sup> Nii baiha jetaote, acaauru bereecuru- quicha cojoaajihuru jaohacoaauruhane coina, aitha- nii Egiptoo curuaanaana jaun jetao, nemuri auhania, caohachajeein curuteein, nii Moisesa jiaanecure- rai fojiaraauru. Nitohaneein, curuteriin nemuri auhaniha teeuruhane jana jetaote, coaraain raain, rai beree rijijieein- nii Moisesa fojiae- nii curuaanaa- Faraaon cacunu. <sup>22</sup> Nitohanihana jaunte, Egipto cocoaichacuru rijijieein, acaauruhacha coitucui coitucuhin, acaauru relanojoneein, leeinjiin cache mijiaaieein, nere que, nichanaa, naonjoainunru que laraajiin nelu Moisesa.

<sup>23</sup> Ninitohaneein jetaote, inae jena choonca jaanacaaniane jana, naraaichuru Isaraelitaauru rene, turuha cue Moisesa. <sup>24</sup> Nii jana jetaote, cuu leeinjiin- Isaraelita sohajiha- Egipto cocoaichane coaraain niqui, nii naraai Isaraelita cocoaeratiha, nii Egipto cocoaicha sohin joae- Moisesa, <sup>25</sup> nii caje nainaan: ‘Caate, letoae Cana Coaunera, cana coroatajaneraanu quera, naaururichaaain jecha, nii naraaichuru Isaraelitaauru.’ naain. Nete caohacha naenetoheecure.

<sup>26</sup> Nii cojoanoo jetaote, ita sohajeeuruha coroatajai Isaraelitaaurune jana, runajaain: ‘Chanute nejesinajeein ita sohicheta,’ nae niqui Moisesa, nere tonoraa jerenajaain. <sup>27-28</sup> Nejetaote: ‘Chate, nii coaranu que chenoaain, canacaanu curuaanaanu que eletoaeta. Raca, Egipto cocoaicha ichaaine tocohaneein inoonte, casohin cajaanaa jereeita.’ naain cotaain, Moisesa saruhite nii eleecha sohajera Isaraelita.

<sup>29</sup> Niritiin saruhitohane jaun jetaote, jelai caje sorohin, Madiaaun batane cuhin ichaoha cuelu Moisesa. Nitohaneein jetaote, ucuae sorohin, coroatajaain quicha cojoaajineein canaanai siriin, nejelau ataneu nenacaauru aina, ecu ichoaelu Moisesa.

<sup>30</sup> Nii baiha, jena choonca jaanacai baiha jetaote, cache areroo- desiereto cataaun- ichtane ucuuno- Sinaaieein curuajai rohan, chujuhecoha Moisesane jana jetao, iihane- ecu chujuhequi- enuha laojoiri cacaaerii. Nii jana jetaote, nii enuha laojoiri iihaneei cataaun ecooca leeinjiin aanjerana jaun jetao, <sup>31</sup> cojoaelatiin coarajeein, caohachaaain rautaaain coaraane coina, rohan nichuuntaaoriin coaraa Moisesane jana jetaote:

<sup>32</sup> ‘Canuna, ii inoasihuru Coaunera- Inara Coaunera neein neeunra. Canuna, ii inoasihuru- Abaraaun, Isaca, Jacobo, naonjoainuri- Coaunera neein neeunra.’ naane jana jetao, coaneenetojoelanaala coasiha neesonetiin rijijijianiha Moisesane jana jetaote:

<sup>33</sup> ‘Nii ii safato rocoora. Canu turuna jaan nihana jaun, nainiheei nii ii safato ruhacaain caelai shaaquineta. <sup>34</sup> Naain, Egiptoote, inaderaain necairichanaa caun chanaaure canu cachaaurura. Nii jaunna, coaracauna jaun, cau faaun, nii caje jianacoo tenajaanune coinara. Nii jaunna, eletoareeuni Egiptoo, jelai caje canu cachaauru rocoeraanuquera.’ nae Cana Coaunera, Moisesa rai.

<sup>35</sup> Jauriha nejeein Moisesa batohin: ‘Chaate, canacaanu curuaanaa nuque, ii cocoainain, nii coaranuque eletoaeta.’ naauruhalu natiin jetaote, esinaae rauijiriin letono aanjera que Moisesa letoerate Cana Coaunera, nii enuha laajoiri- iihanei cataaun ecocohin cocoainain, nii cairichaeriina- jaauruha Egipto cocoaichacurune caje Isaraelitaauru rocoeranu que.

<sup>36</sup> Nii jaun jetaote, nii Moisesa, Egipto caje cana inoasihuru rocoera nelu jetao, nii atane que, itolere ichaain cachaauru notajaain. Nii Egipto rohan nena Cucuana Lanajaijihu jetaote, nii rai biji achune tochataain jetao, aiha berone rijijieein, nii cucuana tabai jacoraain, acaterate, jera jaoruha Isaraelitaaurune coina. Chaen cacha areroo- desieretoo jenachoonca jaanacanein, itolere acaune maajeein ecoteein, itolere ichaaechajeein, cachaauru notaarejetelu jetao Moisesa.

<sup>37</sup> Nii Moisesa jetaote: ‘Leeinjiin inara cajete, ecooca cureein caa caletohane rijijieein Cana Coaunera letononeein rai nere beraneein neenicha.’ naain belu cana inoasihuru Isaraelitaauru rai. <sup>38</sup> Nii Moisesatechu, cacha areroo desieretoo nasaae nedaaauruha cana inoasihuru Isaraelitaaurune jana, jelai nii ichatane ucuuno- Sinaain ichoae ucuun iniin, Cana Coaunera letono aanjera aina erelu. Nitohaneeinte, aanjera caje, nii cana rai Ichaonaa Tera Erenaa raain telu, cana inoasihuru rai, cana rai beeuruhane coina.

<sup>39</sup> Nitohaneein, nii raane coina, nii ichatane ucuuno que, siichoha Moisesane tonohana jetaote, renaatonorae lanaala, Egiptoo cauha cunaa jerecurelu jetao cana inoasihuru Isaraelitaauru. <sup>40</sup> Nitohaneein jetaote, acaauru rai saseredote inoasi- Aaroon rai: ‘Cha que chaainti neruru- juae, Egipto batane caje canacaanu rocohin, canacaanu uhaeralu- Moisesata. Nii jaunna, canacaanu rai, ecaantooru rijijieein chosichuru ichaaine jerichaanu, cana coroatajanecuruhane coinara.’ naauruhana jaun jetaote, <sup>41</sup> jeriha Aaroone jaun, baca calaohi rijijieein ecaanto ichacure. Nii rai nihane jetaote, lenone sohin teeure, Cana Coaunera rai ichacuruhane rijijieein. Nitohaneein jetaote, acaauru biji que ichanohin- ecaanto- chosi rai, lenone nihane sohin teein, beseta bitoera tocohaneein ichaain, ecaantochosi coroaecure. <sup>42</sup> Nii coaraane jaun jetaote, acaauru aina obajeein, coroatajanenaacane jiaane Cana Coaunera, acaauru chosichuru niha acaauruhacha bei- dedeu nenacaauru, enoto, atene, arasijie, naaonjoainunruhacha coroaecuruhane coina. Nitohanihane jaun jetaote, nere bera inoasihuru que aitiin laenaeratein:

‘Isaraelitaauru:  
coatia carai, nii jenachoonca  
jaanacanein, cacha areroo- desieretoo neeichene bana,  
carai lenone sohin nihane  
terejetoheeicheluta.

<sup>43</sup> Nete, acaihanejeein biji que  
cachaauru ichanohin inara chosi  
niha- inaraacha bei- Moloco raiichate,  
lenone nihane sohesojoein, terejetocoichelura.  
Chaen, Refaan neein curuajai  
inara raajenihane inara chanaa-  
inara chosi neein inaraacha bei- arasijie,

naaonjoai raaichate terejetocoichelura.

Nii jaunna, inara atane caje inara rocohin,

naain Babiloniaun bujuaau inara sitareeunnicha.’

naain, nii ajiniha bihalu Cana Coaunerana jaun, nii rijitjoein laenacurelu nere bera inoasesihuru.

<sup>44</sup> Nitohaneein nere tonoraelanaala, que jaolecooruhane saijieein jetaote, Moisesa que coarateein jetao, canii cari caje nena loreri Taberenacolo icharate Cana Coaunera, nii cacha arero- desieretoo amuhemuhecuruhane jaunru, acauru jiniichaain, nii Taberenacolo amaauruhane coina. Nii taberenacolo jetaote, acauru rai telu Cana Coaunera, ‘Naaajoaainte cana aina ne- Cana Coaunerara.’ naain itolere bana coacuruhane coina. Nii asaaete, nii ajeri que tein- laenanohineein nena Cana Coaunera Ere rucuhecure jetao. <sup>45</sup> Nii Taberenacolo jetaote, inae oha Moisesane baiha carajaain neein, uhaaurelu nii Moisesa coreenraniha nena Josee aina cunacaauru- cana inoasesihuru. Nitohaneein jetaote, nii acauru rai Cana Coauneraacha tenaa jerei- atane que nenacaauru aina, sonohanaque nichaauraaain, acauru amuritoorelu, acauru caje nii atane raauruhane coina coroatajanenaaca Cana Coaunerana jaun. Nitohanihalu jetao, enoha curuaanaa inoasesi Rabirinereein tiaajoaain.

<sup>46</sup> Nii Rabiri coroatajaniha, itolere que Cana Coaunerane jaun jetaote, turuha cana foeratera Jacobo Curuaanaa- Cana Coaunerane jaannu que Teenforo ichana jerelu niqui. <sup>47</sup> Ne jetaote, icharatiha Rabirine caohatiha Cana Coaunerana jaun ichaenelu. Nii janate, inae oha Rabirine baiha jetao, nii Teenforo icharatelu nii calaohi Salomoon, Cana Coaunera turunajaanu que. <sup>48</sup> Coatihani niqui, cacha ichanohineein nena loreri Teenforo asaae ichaohi niqui Cana Coaunera. Nitohanihane jaunte, rai nere bera inoasesihuru que beratihalu Cana Coaunerane jaun, nii aitoroatihane rijitjoein:

<sup>49</sup> ‘Caa dedete, canu nelaurihana jaan ne. Jana chauratanete, catiha rorine. Chaen techu, chatohanai lorerina ichacurure, cuu nebetacaanune coina.

<sup>50</sup> Tana, canu, caa itolere coaunaain nihanulune coitucuuruhaneta,’ naa Cana Coaunerara.”

naain beurelu rai nere bera inoasesihuru.

<sup>51</sup> “Nete, leecha Cana Coaunera coitucuuruhi rijijieein, nere tonorana jereneeichene jaun, urichosae rijijieein neeiche, aohana jereneeichene jaun. Aiha, inara inoasesihurune rijijieeinte, inara suujuatenaa jeriha, Cana Coaunera Suujuene jana, aina nejerateein, aohana jereneeichera. <sup>52</sup> Satiin inara inoasesihurute, Cana Coaunera Ere bera inoasesihuru cairichaaeriin, sohin jaoorurejetelu. Jerichanejeein techu, nii turunaalu- cana coroatajaneraanu que Cana Coaunera letono turu beebejeeurerane maajeein, sohin jaorelu nii inara inoasesihuru. Nii esinaae rauhijiriin, beeuruhane rijijieein turuhane janate, que nererojoecaain, nere aohana jerelanaala, colurujueein, sohin joerateein neinchelu- inara netonai. <sup>53</sup> Inara inoasesihurutejian niqui, laenanohineein Cana Coaunera Ere raaurelu, laenarateein letono aanjera que, teratiha acauru rai, Cana Coaunerane jaun. Nete tonorana jerecurenelu inara inoasesihuru. Nii inara netonai nihanatiin, tonorana jereneeichera,” nae jetao acauru rai Eseteba.

### *Eseteba sohin jaooruhane*

<sup>54</sup> Niritoha acauru rai Esetebane jaun jetaote, obajeein, corajeein nujuae cari calaauere. <sup>55</sup> Nejetaote, Cana Coaunera Suujue suujuatenajoineein, najabaracaain dede coaraa Esetebane jana jetao, neyoracaa dedene jaun jetao, Cana Coaunera coarae. Nitohaneein coaraane jana jetaote, Cana

Coaunera raotono nichajai que chujuheque Cana Coaunera Calaohi Jesoso.  
<sup>56</sup> Nii jaun jetaote:

“Coaracuchedian inara netonai. Nota, neyoracaa dedene jana, Cana Coaunera raotono nichajai que chujuheque nii canaacha cohajeilu-Cacha Calaohineein nenea Jesusora,” naa acaauru rai Esetebane jana jetaote, <sup>57</sup> nuricho mucuutaain aohana jerelanaala, nujuaae soaisohaain, codoonetiin mucuure. <sup>58</sup> Nitohaneein mucuhin jetaote, nii nese caje naain amaain, acaauru cajione buuri rocohin jetao, leeinjiin cacha- Saoroneein curuajai que nii acaauru cajione buuri beraichateein jetao, ajeri que Eseteba bодоosiin sohin atinaaure- nii coulurujueracuru. <sup>59</sup> Nitohaneein, ajeri que bодоosijieeuruhane jana jetaote:

“Canu Curuaanaa Jesoso, cacorataaneeun. Casuujue raaura,” naain Jesoso bajae Eseteba, rai suujue raane coina.

<sup>60</sup> Niritohane baiha, semotorohaain auhaquiin:

“Canu Curuaanaa, jiaonriha catohaneein caeteein, naosateeuruhane ujuaiteei acaauru quenera,” naain inae ohe Eseteba.

## 8

<sup>1</sup> Nitohaneein, Eseteba sohin jaoruhane jana jetaote, rautatelu nii Saoro.

### *Jesocurisito ranojohunru roheca Saorone*

Nii bana caje coauneein nunuheteein jetaote, satiin, Jesocurisito Ere esenetaain tonoraeraauru aina nejerateein, cairichaaerihure Jerosaleeun. Nii jaun jetaote, ita caje riaaneein, Jerosaleen caje soroore satiin Jesoso esenetaeraauru, Jodea batane sacutaain, satiin, Samaria batane sacutaainchuru cuhin soroore. Jana, nii afosotooruhacha jetaote, nii Jerosaleeun nedaaure.

<sup>2</sup> Nitohaneein Eseteba atinaauruhane jana jetaote, mainajeein coisiin conautecure caohachaain rai suujua coaraain ichaonacaauru cachaauru tabaauru.

<sup>3</sup> Nii nainiha jetaote, Jesoso esenetaain- tonoraeraauru rohecaain, lorerichuru naineein enohin, enecuru aina curuataain- quichaauru tararaain amaain, caresero cuhane teratenajaain, cairichanajae Saoro.

### *Jesoso beebejeeuruha Samariaune*

<sup>4</sup> Nitohaneein, rohecanajaaauruhana jaun, nii Jerosaleen caje soronacaauru jetaote, turuuruna jaunru naineein, jianacoo osa caje- cana mitaeraneein niha- Cana Coaunera Calaohi- Jesusone beebejeeure. <sup>5</sup> Nii jana, leinjiin acaauru caje nenea- Ferifi jetaote, nii Samaria batane que leeochoauru nese amurijiriin nenea nese tabaihu cuhin jetao, inae cuu turuhin, cuu nenacaauru rai, Cana Coaunera Calaohi- Jesocurisito beebeje.

<sup>6</sup> Nitohaneein cuu turuhin Jesocurisito beebejiha Ferifine jana jetaote, satiin netaojiaain, niicha beebejei rautatiin aonajeeure- cachaauru, chaen itolere cunaitenacaauru rautaane coaracuruhana jaun. <sup>7</sup> Nitohaneein jetaote, rai suujue cuhane coitucuchuichuru sirichuruha tabaaurune, acaauru caje sitaane, auhaauhaquiin, acaauru caje amuure nii coitucuhichuru. Chaen jihuronacaauru nihanatiin jetaotechu, rautaaain, bacosacuru nihanatiin- rautaa Ferifine jaun jetao, <sup>8</sup> neebana nitohanai coaracuruha, nii neseeuna jaun, cojoaelatiin coarajeein, rachoojoeure- satiin nii nere aonaa turunacaauru cachaauru.

<sup>9</sup> Nii jana jetaote, cuu ne- leeinjiin cacha- Simoon neein niicha curuaateuri- benane. Aca jetaote, batohi aina, Samaria cocoaichacuru coritae jetao, “Aca jete, itolere cacha amurijiriin, itolere que, jataain nelateeeinein ne,” naain esenetaauruha cachaaurune coina.

<sup>10</sup> Nitohaniane jaun jetaote, cocoinanacaihuri nihanatiin, coritaa, rai batohi ainana jaun, rautatiin esenetaain, aonacuruhane jaun: “Caa cachate, Cana Coaunera letono nera,” naaure jetao, nii Simoon que, satiin cachaauru, cocoinanacaihuri, naaonjoaihunri.

<sup>11</sup> Nitohanein jetaote, enanecoriin que airijiin esenetaain tonoraare, rai batohi aina, acaauru coritaana jaun. <sup>12</sup> Nete, nii saijieein Ferificha beebejei- Cana Coaunera Cojoanona, Cana Curuaanaa Jesocurisito, naaonjoaain esenetaauruhana jaun, quichaauru, enecuru, naaonjoaihunru- nebaotisaerateeure. <sup>13</sup> Nii jaun jetaote, nii- benane- Simoon netonai, esenetaain nebautisaerateein, Ferifi corihaniha amuhemujue, itolere ichaain cojoelanaacojoai ichaa Ferifine coaraana jaun, cojoelatiin.

<sup>14</sup> Nitohanein, inae Cana Coaunera beratenojoin esenetaain, tonoraauruha- Samaria cocoaichacurune coitucuhin jetaote, acaauru rene, Fedoro, Joaan, naaonjoaihunri letoaaure- afosotooru- Jerosaleeun nenacaauru, nii Samaria nenacaauru coaraa cuuruhane coina. <sup>15</sup> Nitohanein, letoanajaauruhana jaun cuhin jetaote, acaauru rene turuhin, nii Jesocurisito esenetaain- tonoraeraauru rai, Cana Coaunera bajaare, acaauru coroatajanein, rai Suujue letoaa Cana Coaunerane coina, <sup>16</sup> jaiti leeinjiinejein- acaauru caje nena ichoae fauheniha- Cana Coaunera Suujuene jaun, raujiaaincha- Jesocurisito corenihacha- baotisaain cojounacatenohineincha, neeuruhana jaun. <sup>17</sup> Nii jaun jetaote, acaauru couturi ichoae, biji meracaain Cana Coaunera bajaauruha- Fedoro aina Joanne jana jetao, tajiha, acaauru ichoae fauha uhe, Cana Coaunera Suujue. Nitohanein jetaote, Cana Coaunera Suujue rauure- Samaria nenacaauru- Jesocurisito esenetaeraauru- cachaauru.

<sup>18</sup> Nitohanein, acaauru ichoae, biji meracaain, Cana Coaunera bajaauruha afosotoorune jana, fauha uha, acaauru ichoae, Cana Coaunera Suujuene coarajihana jaun jetaote:

<sup>19</sup> “Carai netonai, nitohanai teeuchena, inara corete coriqui quete, chunicoa- cacha ichoae nihanatiin, cacoi meracaain, Cana Coaunera bajaa- nune, rai Suujue tiha Cana Coaunerane coinara,” naa acaauru rai Simoonne jana jetaote:

<sup>20</sup> “Coaraain, nii ichoriqui aina jiniiquiin nitajeeura. Inacojoein chachu, ‘Coriqui que jecha, coretenacaine Cana Coauneraacha tenojoin,’ naai chachu inacojoeincha. <sup>21</sup> Esinaae rauhijiriin, esenetaain nere tonoraeneeine jaunte, ichei nii tenaa nainene Cana Coaunerara. <sup>22</sup> Nii ishujua baaso jiaanein, Cana Coaunera bajaate, ichei suujua acatena nainihane, suujua acatemiin Cana Coaunerara. <sup>23</sup> Jataainte, banejelanaala necoelaain, osa tabai que nesaruhi rauhineerilanaalara,” naa Fedorona jaun jetao te:

<sup>24</sup> “Atiin carai, Cana Coaunera bajaauche, nii aitohine tochaneein, chatohanein caeteein niha Cana Coaunerane coataara,” nae jetao, nii benane- Simoon, Fedoro rai.

<sup>25</sup> Nitohanein, nii Samaria neseeu, Cana Coaunera Ere beebejeeuruhane baiha jetaote, nii Samaria batane sacutaain nenacaauru- neseeu cuhe cujein, Cana Coaunera Calaohi Jesocurisito que Erenaa Caohati beebejeeuruane baiha jetao, Jerosaleeun cauha cuure Fedoro, Joaan, Ferifi, naaonjoaihunri.

*Ferifi aina, ita que tacaauruha Etiopiha cocoaichane*

<sup>26</sup> Nii baiha jetaote, rai letono aanjera que Ferifi letoaerateein:

“Chajaain nimichuhin enoto mitu uuri- cana raotono nichajai jeroon cuhin, naain Jerosaleeun caje- Casau cunaa bero cuhane cunihura,” nae

jetao, Cana Curuaanaa letono aanjera. Nii bero naitoonjoate, cacha areroo jelson situnaane. <sup>27</sup> Niritoha rai aanjerana jaun jetaote, nimihoritiin cuha Ferifine jana, bero cuhane leeinjiin cacha- Etiopiha cocoaicha aina, ita que tacaure. Nii Etiopiha cocoaicha jetaote, Etiopiha batane curuaanaa eneein nenea rai- coriqui beraichaneein nenea ne. Aca jetaote, Jerosaleeun cuhin, Cana Coaunera coroejeein bajaee bajaecane caje, <sup>28</sup> tajiha cabario que tararaeraain nenea namunaja cuhane lauhequiin, Cana Coaunera ere bera inoaesi Isaihasicha laenai quiricha ereretajeein cauha cue, jelaiha rai nataneu.

<sup>29</sup> Nii jana jetaote, Ferifi rai: “Nii cacha rohan nichuutaain ereeura,” naa rai, Cana Coaunera Suujuena jaun jetao, <sup>30</sup> rohan nichuuntaa Ferifine jana jetao, Cana Coaunera Ere bera inoaesi- Isaihasicha laenai quiricha ereretate- nii Etiopiha cocoaichane jana jetao:

“Nii iicha ereretai aonaaina, coitucuhi,” naain caje baja- Ferifine jana jetaote:

<sup>31</sup> “Aihaaunta. Cha cajena coitucuhin aohanreeunta. Niha chunei carai berane coalanaalata. Chajaaute iniin cau carohan nelauriaera,” naa Etiopiha cocoaichane jaun jetaote, <sup>32</sup> iniin nelauriaain, nii niicha ereretai jelai coaraa Ferifine jana jetao:

“Carenero chacuruhane rijijieeinte,  
amaa cuurureein, sooruhane coina.  
Nii rijijieein techu,  
nujuin saaujiha saaujichane jana  
inauhene aonajiha carenerone rijijieein,  
inauhene aonajenajaain,  
caohachanaainejeein erenereein.

<sup>33</sup> Nitohaneeinte  
batohin joareein coulurujueein,  
cojoaisi aina ajaena rocohin jaonaa rijijieein,  
sohin jaoorureein.

Nitohaneein sohin jaooruhane jaun,  
nerihaain rai neferate,”  
naain *profeta* Isaihasiacha laenailu ereretaain coaraane baiha jetaote, Ferifi caje:

<sup>34</sup> “Atiin carai beeuna coitucuera. Cha quena aite, raaje ne quena aitoha caa Quiricha laenaera *profetate*, ainihane leecha quena aitohate,” naain baja, nii Etiopiha cocoaichane jana jetaote:

<sup>35</sup> “Jesoso sohin jaoorurichaaaine quete aitera,” naain jetao, nii Cana Coaunera Quiricha Inoaesi- Etiopiha cocoaichacha ereretai nunuhe caje coauneein nunuhetein jetao, Jesoso que Erenaa Caohati beebejiha Ferifine jana, <sup>36</sup> niha acauna jaan rohan nichuuntaauruhana jaun jetaote, Ferifi rai:

“Caute ne aaura. Taacha nainereei, cau canu baotisaain, canu cou-  
jounacateineta,” naa nii curuaanaane jana jetaote:

<sup>37</sup> “Ichoichana aina cutaain, esenetainete, naainera,” naa Ferifine jana jetao te:

“Cana Coaunera Calaohi niha Jesocurisito ne esenetaanura,” naane jana jetao, <sup>38</sup> nii acauru amaera- cabario que taraeraneein nenea suraerateein, jiniiquiin fauhin, acauhana fauha cuure. Nitohaneein fauhin jetaote, baotisa Ferifine jana jetao, <sup>39</sup> inae acau caje inihuruhane jana jetao, Ferifi amaa- Cana Coaunera Suujuene jaun jetao, inae coaraene- nii curuaanaa. Nejetaote, raotojoein, rachoojoein bero cuhane cuujue.

<sup>40</sup> Nitohaneein amaa Cana Coanera Suujuene jaun, cuhin jetaote, Aso-too turuhe Ferifi. Nitohaneein Asotoo turuhin jetao, caje coauneein, nunuhetein, nirijieein cuujue cuujeein, Sesareea turuhanereein tiaain, neseeu neseeuuru turunajaauru, Jesocurisito que Erenaa Caohati beebejeein, cuujue jetao Ferifi.

## 9

### *Jesocurisito esenetaeranein nerotoha Saorone*

*(Ich 22.6-16; 26.12-18)*

<sup>1</sup> Nii tonohana jetaote, Cana Curuaanaa ere esenetaain, tonoraeraauru que, nejeratihajeein, atinanaana jereein sacuhane jaun jetao, saseredotecuru curuanaa coaraa cue Saoro, <sup>2</sup> caje nitohanai ichana nainihane jaan-co-coiricha bajaane coina. Nii rai cocoiricha teeuruhane, aina naain Damasoco cuhin, ucuaae nena ita taojiaain Cana Coanera bajaauruhane jaan sinacoca asaae enohin, nii Ena Nena Ichaonaa esenetaain tonoraeraauru ariin, quichaauru aina curuataain, enecuru tararaain uhanajaa caseteconeein Jerosaleeunne coina. <sup>3</sup> Nejetaote, inae nitohaneein ichaain cuujiha, Damasoco nese catainajeein, turuhelalajiha, Saorone jana jetao, luhecotariin conotiin, dede caje jilenete Cana Coanera Cono. <sup>4</sup> Nii jaun jetaote, coasiha atane ichoae nalatoha Saorone jana jetao:

“Saoro, Saoro, chanuna jataain caque nejerateein, cacairichaeriin ichaohi,” naain toniha erenaane jana jetao:

<sup>5</sup> “Chaneei inaate Curuaanaa,” naain bajaa Saorone jana jetaote:

“Canuna, nii nejerateeine jaan neein iicha cairicharii Jesuso neenunra. Canu esenetaeraauru cairichaa aaine nihanatiinte ichaajenihane ijiabereeo- cairichaa nii aaicha,” naa jana jetaote, coasiha rijijijihanein:

<sup>6</sup> “Chatohanai ichacaaunne jereite, Curuaanaa,” naain bajaa Saorone jana jetaote:

“Nimichuhin nichaauraain, nii neseeu turunihunte, cuu ichei, iichanenenenu beeuruhinera,” naain tonorae, nii erena.

<sup>7</sup> Niritohane jaun jetaote, nuricho que aonacuruha acaauru netonoaine jaun, nesoonetoore, nii Saoro- corihaniha cunacaauru cachaauru, nii erena aonacuruha natiin, nii chuni cacha coaracurenihana jaun. <sup>8</sup> Nii jana, atane ichoae tocoha baiha nimichuhin, nenotaain coaraa Saorone jana jetaote, caohachanainejeein conohene rai nota. Nii jaun jetaote, inae caohachanainejeein conoheniha rai notana jaun, rai biji que mucuhin, amaauruha Damasocone jana jetao, <sup>9</sup> cuune nichata janohin, maosanein notaelanaala, nii lenonelanaala, nii acau nihanatiin coelanaala.

<sup>10</sup> Nitohanihane jana jetaote, nii Damasoco ichoae leeinjiin cacha- Ananihasineein curuajaain. Acate, Jesocurisito Ere esenetaain, tonoraera ne. Nii jetaote, notajae Cana Curuaanaa Jesocurisito, rai irihane coina. Nitohaneein, notajaain jetaote:

“Ananihasi,” naain bajaane jana jetao:

“Cauna neeura Curuaanaa,” naane jana jetaote:

<sup>11</sup> “Chajaain nimichuhin, nii bero- Rauhijirineein curuajai cuhane cuhin, Jodasi loreri asaae enohin, Taroso caje unaa leeinjiin cacha- Saoroneein curuajai bajaaura. Acate, Ofa- Cana Coanera bajaebajaecane jana, notaacane jaun, <sup>12</sup> coaraane jana, leeinjiin cacha- Ananihasineein curuajai- turuhin, nichoae rai biji merecae, nacoauneein conoha rai notane coinara,” naa cana Curuaanaa Jesocurisito, Ananihasi raine jana jetaote:

<sup>13</sup> “Netejian, ‘Nechu aansai- ataibiaen rijijieein niha,’ beeurera. Nitohanihane jaun jete, Jerosaleeun, ii ere esenetaain- tonoraeraauru cairichaaeriin

ne, naauruha, coitucueracuru natiinta. <sup>14</sup> Coaraaunachuhinti, saseredote curuaanaa caje, niicha rocohi erenaa uhaa aina, satiin- ii ere tonoraeraauru mucuhin, caseteconein, amaain tiha, saseredotecuru curuaanaa raine coinaneta, Curuaanaa,” naa Ananihasine jana jetaote:

<sup>15</sup> “Chajaaincha cunihura. Nii cachana raain neeun, nejelau ataneu- nenacaauru rai nihanatiin, canu ere beebejeein nihane coinara, itolere, acaauru curuaanaacuru rai nihanatiin, canu ere beebejeein, chaen, Is- araelitaauru raine maajeein beebejihane coinara. <sup>16</sup> Acaentonaite, canu ere beebejihane coreniha, necairichanaa coaraa cureein, baneje lanaalara,” naain letoaa Cana Curuaanaane jaun jetaote, <sup>17</sup> nii niha Saorone jaan- loreri asaae turuha cue Ananihasi. Cuu, loreri asaae turuhin jetao te, nichoae biji merecaain:

“Ichaso Saoro, nii uhina jaan bero cuhane, ichei ecoona Cana Curuaanaa Jesusote caletoe, ichoae cacohi merecaain bajaanune, enacoaunein conoha inotane, ii suujueniha enoha Cana Coaunera Suujuene coinara,” naa Ananihasine <sup>18</sup> rijieeoritiin, jeranu nota caje naluha- ate reje rijiinanaine jana jetaote, inae conoha rai notana jaun, nimichuhin nebaotisaerateein, inae cojounacatenohinein ne- Saoro. <sup>19</sup> Nii baiha jetaote, inae lenonein suujua nunaain, nii Damasoco nenacaauru- Jesocurisito ere esenetaain- tonoraeraauru aina ne, janojanoheriin.

#### *Damasocoo Cana Curuaanaa Jesoso Ere beebejiha Saorone*

<sup>20</sup> Nii baiha jetaote, ita taojiaain- Cana Coaunera bajaauruhane jaan- sinacoca asaae enohin, cachaauru rai, esinaae rauhijiriin, Cana Coaunera Calaohinein niha Jesusone beebejiha Saorone jaun jetao, <sup>21</sup> cojoelatiin coarajeein:

“Taajian, caa cacha, Jerosaleeun, Jesoso aina cuaain Cana Coaunera bajaebajaeracuru que nejerateein, cairichaaerinajaain nena nihaneta. Tana, caa jeelai cacha coaiteen cau turuhalu, Jesoso esenetaeraauru jitariin tararaain amanajaain, saseredotecuru curuaanaacuru rai tenajaane coina neta,” naaure jetao, cojoelatiin cuu nenacaauru cachaauru.

<sup>22</sup> Ne jetaote, niritiin cojoelatooruhane jana, nii que rutaain nelararajiaain laraajiin, canaacha cohajei- Curisitonein niha Jesusone beebejiha Saorone jaun jetao, rai suujua auhacaure Damasocoo nenacaauru- Jorioocuru.

#### *Jorioocuru caje, nichotiha Saorone*

<sup>23</sup> Nii nitohanein araai janohin Damasocoo niha Saorone jana jetaote, ita suujua tacaain, Saoro sohin jaonaa jerecure Jorioocuru. <sup>24</sup> Ne jetaote, nii sohin jaonaa jerecuruhane coitucue Saoro. Nitoanein, que necousujuaain jetaote, ajeri caje ichanohinein nena, nii nese tionoritiin nena rijia ucuuneti bacuujuaniha, janotiinetojeein beraain cohacure, mituha cuhane mucuhin amaain, sohin, jaoruhane coina niqui. <sup>25</sup> Ne jetaote, omari seeonjoa cuhane tein jetao, janotiin tijichaaain, loreri chaje nichajai que nii nese tionoritiin nena rijia bujuaniha faaure Jesocurisito ere esenetaain tonoraeraauru, nii nese caje mituhin nichotihane coina. Nitohanein jetaote, onaa caje nichote Saoro.

#### *Jerosaleeun turuha Saorone*

<sup>26</sup> Nii nitohanein nichotein jetaote, inae Jerosaleeun turuhin, cuu nenacaauru- Jesocurisito Ere esenetaain tonoraeraauru aina netaojiana jeriha Saorone jana jetao, coasiha netaojiana jerecurene, inae acaentonoain, Jesocurisito Ere esenetaain- tonoraeranein nihane coitucuhin esenetaaurenihana jaun.



<sup>27</sup> Ne jetaote, afosotooru rene Saoro amaain: “Naaonjoaain jetaote, bero cuhane cuujihane jana jetao, notajaain, rai erelu Cana Curuaanaa Jesocurisitora. Nitohanihane baiha jetaote, chaque tonajelanaala, nii chaque casilanaala, nii Damasoco nenacaauru rai, Jesocurisito Ere beebejera,” naain acaauru rai, be Berenabeen.

<sup>28</sup> Nitohaneein acaauru rene turuaain, acaauru que coitucueratiha Berenabeenne jaun jetaote, inae raauruha raotojoein, nii Jerosaleeun nenacaauru afosotooruna jaun, cuu acaauru aina neein amuhemujueein, chaque tonajelanaala, cuu cachaauru rai, <sup>29</sup> Cana Curuaanaa Jesocurisito Ere que ereerejeein, Curieco ere inaanrera Jorioocuru aina, ita cotaicha rijitiinchuru, ereereca Saorone jana jetao, sohin jaonaa jerecure, nii ita cotaicha rijitohane jaancuru- Jorioocuru.

<sup>30</sup> Ne jetaote, nii sohin jaonaa jerecuruhane coitucuuriin, Sesareeau, Saoro amaain jetao, caje coauneein Tarosoo letoaaure, Jesuso Ere esenetaeraauru.

<sup>31</sup> Nii inatiin jetaote, Jodea, Calileea, Samaria, naaonjoaihunri batanecuru nenacaauru que, Jesocurisito Ere esenetaain- tonoraeraauru, jeelai choae jauhecotojoeriin, raotojoein, nii baaso coacuelanaala, Cana Curuaanaa Jesuso Ere tonoraare, acaauru coroatajaniha, Cana Coaunera Suujuene aina nejeeotejeein.

### *Nerautaa Eneasine*

<sup>32</sup> Cajianeein amuhemujueein, Jesocurisito Ere esenetaeraauru rene bedaenihane ucuaetoha jetaote, Lidau nenacaauru- Jesocurisito Ere esenetaeraauru rene netonoai, turuha cue Fedoro. <sup>33</sup> Nii jana jetaote, cuu ne, leeinjiin cacha- Eneasineein curuajai. Aca jetaote, fosa ajaanacaain, niirijieein amuelanaala, nenajauhacha tocoecoeha, mucuha jiuronane jaun jetao:

<sup>34</sup> “Eneasi, Jesocurisitote ii rautareeincha. Chajaain nimichuhin, chela seriin amuunra,” naa Fedorone jana jetao, nii rijieeoritiin, nimichuhin nela seriin amue- Eneasi. <sup>35</sup> Nii aichejetenihane baiha nimichuhin, amuha Eneasine coaracuruha- satiin- Lidau nenacaauru, Saroon nenacaauru, naaonjoaihunrine janate, Cana Curuaanaa Jesocurisito ranojoihunru neein nerotojooaare.

### *Oo caje ichanaa Dorocane*

<sup>36</sup> Nii bana jetaote, nii Jofe neseeu nelu, leeinjiin Jesocurisito Ere esenetaain- tonoraera- Tabita neein curuajai. “Tabita” naane jetaote, Curieco ere cuhane, Doroca ne. Nii ene jetaote, caohachanejeein- caohachane neein ichoae. Nii jetaote, chaaelai latecuruha cairichaurine, coroatajaneein, naaonjoae. <sup>37</sup> Nirijieein, ne lacuritiin jetaote, cunaiteein. Inae caun ohane jaun jetao, rai jabereco culejeein, naain ucuun nenea loreri coroata coarana ichoae- ucuha cuhane, rai jabereco rucujueein teure. <sup>38</sup> Nii jana, Jofeu caje, coriaae neniha, nii niha Fedorone jaan- Lidane jaun jetaote, cuu niha Fedorone coitucuuruha Jesocurisito Ere esenetaeraaurune jaun jetao, coroatajai cacha letoaaure:

“Chajaau jera, Jofeu luhecotariincha,” naauruha rene turuhine jaun jetaote, <sup>39</sup> acaauru aina cue Fedoro. Inae nii niha ene jaberecone jaan turuhin niha Fedorone jana jetaote, curuaacaain codohaquiin chanaain, Fedoro que, jaiti ichaohane bana- acaauru cajione niicha tococoi- acaauru rai niicha tei obirichurune maajeein coarateeure- autanaauru. <sup>40</sup> Nii jana jetaote, jelai caje jitariin mitanajaain, nii ene jabereco rohan, neseonraain jetao, Cana Coaunera bajaain, nii ene jabereco coarajeein jetao:

“Chajaain, nimichuura, Tabita,” naa Fedorone jana jetaote, nota toretaain Fedoro coaraain, nelauhithane jetao, <sup>41</sup> rai biji que mucuhin, michuhi-toha Fedorone jana, nichaauraane jana jetao, satiin Cana Curuaanaa Jesocurisito Ere esenetaerauru, satiin, nii autanaauru aina curuataain, cotihanajaain jetao, jabereconein chujuriaain acaauru que coarate- Fedoro. <sup>42</sup> Nii nitohanihane coitucuhin jetaote, Cana Curuaanaa Jesocurisito Ere esenetaain tonoraare- nii Jofe neseeu nenacaauru- arajiin cachaauru. <sup>43</sup> Nitohaneente, araai janohin, nii neseeu ne Fedoro, canii cari rucuhera- Simoonnein curuajai cacha loreri asaae.

## 10

### *Corenerio aina, Fedorone*

<sup>1</sup> Nii jana jetaote ne, leeinjiin cacha, soondarooru curuaanaa- Corenerionein curuajaain, Sesaree neseeu. Nii jetaote, saota fashanei Romanocuru soondarooru, Italia cocoaicha neein acaauruhacha curuaatei, lefashai- curuaanaa cafitaan neein ne. <sup>2</sup> Aca jetaote, niqiu Romanoneein ne. Nejetaote, atiin rai sinijiera, rai bereecuru naaonjoaihunri aina jiniiquiin, jataain Cana Coaunera ere tonoraeraauru ne. Aca jetaote, cairichainein nenacaauru- Jorioocuru rai nihane, coriqui nihane tee tejein, coroatajanenajae. Chaen jetaotechu, inetono janonaa bana, Cana Coaunera bajaebajajeein ne. <sup>3</sup> Nii jaun jetaote, letono anjera que, coarate Cana Coaunera, sona nichae.

Nii jana jetaote, coarajihane jana, nii nihane jaun turuhin enohin: “Corenerio,” naa nacatiha turuhine jana jetao, <sup>4</sup> cuu anjera coaraain, ne- soonetiin:

“Cha ichei ichareeunte, Curuaanaa,” naain tonoraa Corenerione jana jetaote:

“Bajaebajajeein neeine aonaa Cana Coaunerara. Chaen techu, cairichai- huru coroatajaneine coaraain, satiin caohacha ichaaine rautate- Cana Coaunerara. <sup>5</sup> Aihana jaun, Jofeu cacha letoaaute, leeinjiin cacha- Simoonnein curuajaain nena- Fedoro cotihaca cuhinera. <sup>6</sup> Nii cuu nena- cucuana auhaniha loreriquiin nena- jacari nojoenlaain rucuhera rijitocojoai curuajai- leeocho Simoon loreri asaaete nera,” nae jetao, rai Cana Coaunera letono anjera.

<sup>7</sup> Niritohane baiha, inae amuha nii aina erenaa- Cana Coaunera letono anjerane jana jetaote, coroatajai nere tonoraeraauru, chaen leeinjiin soondaro- Cana Coaunera ere tonoraain- jataain Cana Coaunera coitucuera rai suujua rijitoojein nena- niichuru cotijiaain jetao, <sup>8</sup> rai aitoha Cana Coaunera letono- anjerane bee jetao, Corenerio. Nitohanein, acaauru rai bihane baiha jetaote, letoanajae Jofeu.

<sup>9</sup> Nii cojoano jetaote, enoto chujutaelalajeein, turuelalajeein cuujueeru- ruha, Jofeune jana jetao, loreri janori macararo ichoae, ucuun iniha cue jetao, Fedoro, cuu Cana Coaunera bajaane coina.

<sup>10</sup> Nii jana jetaote, rai banetoe niha mijiitenane jaun jetao, lenonene rijitocojoaain jetao, Cana Coaunera baja, lenone enohalaauruha icharaaurune cohaca. Nii jana jetaote, notaaca Cana Coaunerane coina, <sup>11</sup> neyoracaa dede bacujuane jana jetao, caje mituha uhe, shojoera tocohaneein- jaraantiin. Nitohanein ecocohin jetaote, tajiha fauha uhe, jena turiin rulunohineei.

<sup>12</sup> Nii jana, coaraane jana jetaote, nii shojoera tocohanai nainecojoaain jetao, uhe itolere cautenu rijihuru, atane ichoae terei lenone, itolere tajaecuru, itolere ataibinaae acanocuru, itolere Jorionecuruhane lenone niheichuru, naaonjoaihunri jetao, uhe nainecojoaain. <sup>13</sup> Nii jana jetaote, coarajihane jana jetao dede toniin:

“Nimichuhin nichaauraain, niichuru soote que lenoneeicha Fedoro,” naain toniha dedeeune jana jetaote:

<sup>14</sup> “Chabana, Jorionichaanune lenonenihei quinaa nainihaaunta, lanichana nainihaaunta. Nihei ataibinaae quinaa nainihaaunta, Curuaanaa,” naain tonoraa Fedorone jana jetaote:

<sup>15</sup> “Coa Cana Coauneraacha, couluunojoi que, ‘Calanichareta. Ataibinaae quinaa nainihaaunta.’ naain irihara. Jauriaate chuhisi niqui, nainenelu que lenonequichenera, nete inae enene, que lenonena nainequichene coina couluunoinera. Aihana jaun, Cana Coauneraacha coulucohi que, nainiheini niritiin ereeineta,” naain jetao, dedeeu toni. <sup>16</sup> Nitohaneein nichata saain ecoocane baiha jetaote, inae jelaiha dedeeu iniha cue, nii shojoera tocohanai.

<sup>17</sup> Nii jaun jetaote, nii que suujua rohecaain, cuu suujuaau ereerejeein, “Chatohanai ichacaaunne coinacha, catohaneein canotajae Cana Curuaanaata.” naain suujuaau ereereeca Fedorone jana jetaote, turuure acujuaniha nichatajai cachaauru Corenerio letonocuru, Simoon loreri ba-jaebajajeein. <sup>18</sup> Turuhin jetaote, acujuaniha netiin jetao, tonijiaain:

“Cauna niha caa loreri asaae, leinjiin cacha- Simoon- Fedoroneein acaauruhacha curuaatei,” naain jetao bajaure.

<sup>19</sup> Nii jana jetaote, cuu jaiti, nii rene ecoona que suujuaau ereereeca Fedorone jana jetao:

“Aonaun, nichatajai cachaaurute ii ariirijiera. <sup>20</sup> Chajaain nimichuhin, acaauru aina cunihu necoatelanaalara. Canuna acaauru letoaaun ii renera,” nae jetao, nuricho rai Cana Coaunera Suujue.

<sup>21</sup> Nii jaun jetaote, fauhin nii Corenerio letonocuru- cachaauru coaraain jetao:

“Canuna- nii inaraacha ariirijiei neeunra. Chate raaicheta,” naa Fedorone jana jetaote:

<sup>22</sup> “Canacaanu letoaa, canacaanu curuaanaa cafitaan Corenerione jaunne, uhacaanura. Acate, caohacha cachaneein, jataain Cana Coaunera ere tonoraeranera. Nii jaunte, jataain que suujua acateein, belaihure satiin Jorioocurura. Acate, ii cotiharate, rai beein, que ii cotiharatiha Cana Coaunera letonanjerana jaunra. Nii jaunne, ii cotihaca uhacaanu, nenajaun cuhin, iicha coitucui que rai ereeine, aonaane coinara,” naaure jetao, Fedoro rai.

<sup>23</sup> Niritocuruhane jaun jetaote, nii notaaca Cana Coaunerane que nainaain jetao, nii nihanejaan loreri asaae ranajae Fedoro, Jorionecureniha nii cachaaurune saijieein. Nii jaun jetaote, cuu aina sinihuruhane cojoanon, cauha cuuruhane jana jetao, acaauru aina cue Fedoro, corianiha cunacaauru- Jofeu neseeu nenacaauru tabaauru- Jesocurisito esenetaeraauru aina. <sup>24</sup> Nitohaneein cuhin jetaote, cojoanoo Sesareea turuha cuure.

Nii jana jetaote, le laurii naraaichuru, jataain belaichaauru, naaonjoai-hunri cotijiaain, acaauru cojoae- Corenerio. <sup>25</sup> Inae turuha Fedorone jana jetaote, mituhin raain jetao, nacatiha neseeonraain coroaeca Corenerione jana jetaote:

<sup>26</sup> “Nichaauraaura. Canu netonaina, ichejiijieein cachaneein neeunra,” naain michuha Fedorone jaun jetaote, <sup>27</sup> ereerejeein, enoha cuuruhane jana, cuu najiniha netaojiaain cohacure arajii cachaauru. <sup>28</sup> Nii jaun jetaote, acaauru rai:

“Inarate raotojoein coitucuhiche, canacaanu Jorionichaanune, nejelau cachaauru Jorioniheichuru aina, netaojiaain nena nainenihacaanunera. Niheichu. Nejelau cacha loreri asaae enonaa nainihaacaanuta, nitohane niha canacaanu ichaona jaunra. Nete, nii que, canu notajaain carelae Cana

Coaunera, nabana chunein cache que jaolequiin, ‘Nechu aansai ataibinaae,’ naain irihanu chunein nejelau cachaauru quene coataara. <sup>29</sup> Nii jaunna, cacotijiaaichene rijijieein inauheneecha, cha que erelanaala uunra. Nii jaunna, ‘Chanunacha cacotijiaaureta.’ naain, coitucunaa jerichaaunne jaun, carai beeichene jereenra,” naain jetao, acauru caje bajaee Fedoro.

<sup>30</sup> Nii jaun jetaote:

“Inae, jena janoha, enarijiu, cau canu loreri asaae, cosinacaa casuri couu, canu ichaoneein Cana Coaunera bajaebajaecaaun sonainane jana, jataain somajai que, cajionequiin, cau, caatiha neeorite-leeinjiin cachara. <sup>31</sup> Nii cachate, carai: ‘Corenerio, bajaebajaequine aonaa- Cana Coaunerara. Chaen techu, cairichaihuri coroatajaneene coarajeein, nii coacuhin coroaee Cana Coaunerara. <sup>32</sup> Nitohaniane jaun, cachaauru letoaaute, Jofeu, Simoonneein curuajaain nena Fedoro cotihaca cuuruhinera. Nii cucuana auhaniha, loreriquiin, cuu nena jacari nojoelaain rucuhera rijitocojoai curuajai-leeocha Simoon loreri asaaete nera.’ naa carai nii cachara. <sup>33</sup> Nii jaunne, nii rijieeoritiin ii cotiharateenra. Caohachate jataain ichaai uhincha. Aihana jaun, caute jiniiquiin, Cana Coaunera notaracae nihacachera. Nii jaunna, canacaanu rai Cana Coauneraacha beratei que, ereeine aohana jerichaanura,” naain jetao, Fedoro tonoraee Corenerio.

*Nereretaa, Corenerio loreri asaae, Fedorone*

<sup>34</sup> Nii jaun jetaote, acauru rai:

“Inae laen coitucuhanu, coatia nejelauneein, chunein cachaauru coaraain nihein, Cana Coaunerata. <sup>35</sup> Jerichanejeeinte, satiin coaraain, naain coriajai ataneeu nenacaauru nihanatiin, nere tonoraane, rae Cana Coaunerara, caohacha ichaain neeuruhanera. <sup>36</sup> Nitohaniane coina, Israeli inamacooru rai, baaso ichaain, Cana Coaunera que nejeratenaa neein, niha cachane niha natiin, niha leeinjiin, nii rucuhera, raotojoeein neeuruha Cana Coaunera aina cachaaunee que beratelu Cana Coaunerara. Acate, Jesocurisitoneein- satiin Curuaanaanein nena nera. <sup>37-38</sup> Inarate, cachaauru rai, baaso ichaain neeuruhane jianein, nebaotisaerateeuruhane, raotojoeein acauru raa Cana Coaunerane coina, biha Joanne coitucuhiche raotojoeincha. Nii baihate, Nasarete cocoaicha- Jesoso baotisa Joanne jana, nii Jesoso ichoae, rai Suujue letoaa Cana Coaunera, itolere ichaain nena nainihane coinane coitucuhiche. Nitohanein baotisa Joanne caje coauneeinte, Jodea batane sacutaain, amuhemujuelu Jesoso, Calileea nunuheteente, itolere caohacha ichaain, moconajaera ichanohinein cunaiteein necairichanacaaurune maajeein rautaelura.

<sup>39</sup> Nii jana, canacaanune, itolere ichaain niha Jesusone coaranein nihacaanu, aina amuhemuecaanulu, itolere Jodea batane sacutaain, Jerosaleeun nese sacutaain, naaonjoaina jaunra. Nitohaniane baihate, inae coroso que tein atinaaurelura. <sup>40</sup> Nete, atinaaauruhane jana, nichata jano cuhane, ichatelu Cana Coaunerara. Nitohanein ichateente, canacaanu rai, ecoocane coina, letoae Cana Coaunerara. <sup>41</sup> Coatia, satiin cache rai, ecoohai. Leeinjiin canacaanu- Cana Coauneraacha janijii nii beraanu que- niicha ranojoi nichaanune raiichate ecocoera. Nitohanein oo caje ichanaa Jesusone baihana, aina lenonein, aina acau cohacaanura. Inae inoaelu, nitohaniane coina, Cana Coauneraacha ranojohinein nihacaanulune jaunte, <sup>42</sup> canacaanu letoae, itolere ichaonacaauru, onacaauru, naaonjoaihunri coaraanu que- nii Jesoso tein nihalu Cana Coaunerane beebejihacaanu, cachaauru raine coinara. <sup>43</sup> Chaen techu, inoaelu najiincha caje coauneein, nii Jesoso beebejeretocure, nere bera inoaesihuru: ‘Nere tonoraain esenetaeraaurute, baaso ichacuruhalune niha natiin, coreniha caseteco caje

nichotiha cureeincha.’ naain beratihalu, nere bere inoasihuru *profetacuru que*, aitiin Cana Coaunerane jaunra,” naain jetaote, acauru rai beebeje-Fedoro.

*Cana Coaunera Suujue raauruha Jorioniheichuru netonaine*

<sup>44</sup> Nii jana jaiti niritiin beebejiha Fedorone jana jetaote, nii satiin nere aonajeeurera choae, fauha uhe Cana Coaunera Suujue. <sup>45</sup> Nii jaun jetaote, coarajeein cojoaelatoore, nii Fedoro aina unacaauru- Jesocurisito esenetaeraauru- Jorioocuru, Jorioniheinchuru rai netonai, tenojoi niha Cana Coaunera Suujuene jaun, <sup>46</sup> chaen, Cana Coaunera coroaecuruha, nejelau ere cuhane cuaain- nejelau ere que erenacaaurune jaun. Nii jaun jetaote:

<sup>47</sup> “ ‘Nainihaacache cana, caa cachaauru baotisaain coujunacatechaachene, Jorioneeurenihane jaunneti.’ naain erenaa nainihaacache cana, inae cana rijijieein, Cana Coaunera Suujue que, coujunacatenohineein neeuruhane jaunta,” naa Fedoro nii corihaniha cunacaauru Jorioocuru raine baiha jetaote:

<sup>48</sup> “Jesocurisito coreniha, baotisaain coujunacatenohineein neeuruhinera,” nae jetao, acauru rai Fedoro. Nii jaun jetaote, nii baiha, Fedoro chunaure, acauru aina, inata janojoein neeorihane coina.

## 11

*“Chanuna Jorioniheichuru aina lenoneei,” naain Jerosaleeun nenacaauru Jesocurisito ranojoinunru Jorioocuru tabaaurune*

<sup>1</sup> Jodea bataneu netiin jetaote, inae Cana Coaunera ere esenetaain tonoraauruha Jorioniheichuru netonaine coitucuure Jesocurisito letonocuru afosotooru aina- cana nejeraauru Jesocurisito ranojoihunru. <sup>2</sup> Nitohanein coitucuuruhane jaun jetaote, inae Jerosaleeun turuha Fedorone jana jetao, necoejechanuure- Jorioneein Jesocurisito ranojoihunru tabaauru. Niritiin necoejechanuhin jetaote:

<sup>3</sup> “Chanute cocoaeraa- cana Jorionichaachene ichao rai, Jorioniheichuru rene turuhin, acauru aina, naaonjoacachene natiin- acauru aina lenoneeita,” naain bajaure jetao, Fedoro caje.

<sup>4</sup> Nii jaun jetaote, satiin niicha coaraai bee jitariin nunue caje coauneein:

<sup>5</sup> “Naain nii Jofe neseeu nihanune jaaunna niqui, Cana Coaunera bajaunra. Nii jana, canu notaaca Cana Coaunerane jana coaracaunne janate, shojoera tocohaneei jaraantiin, jenaain rulunohineein dede caje fauha uhe caatiha, nii nihanune jaunra. <sup>6</sup> Nii jana, rautaain cuhanai coaracaunne janate, cuu ne, itolere ataibinaecuru, atane ichoae terei lenone, tajaecuru, acanocuru naaonjoaaurunricha. <sup>7</sup> Nii janate, carai dedeeu tonii: ‘Chajaojoaain nimioritiin, soote que lenoneeicha.’ naane janana: <sup>8</sup> ‘Jiaohinera, Curuaanaa. Chabana cujuaae cuhane aansai calaani enohaaunta.’ naanune janate, <sup>9</sup> dedeeu toniin: ‘Coaa, “Aansai calaani,” naain iriha, ii coauneraacha coulucohi quera.’ naain <sup>10</sup> toniha nichata saain dedeeune janate, jelaaiha dedeeu iniha cue- nii shojoera tocohanaicha. <sup>11</sup> Nii rijieoritiinte turuure, Sesareea caje uhin, nichatajai canu ariha unacaauru cachaauru, nii nihacaunnejaan loreri asaera. <sup>12</sup> Nii janate, caletoe Cana Coaunera Suujue, necoatoelanaala acauru aina cuhanune coinara. Nii janate, canu aina cuure caa saotaneein Jesocurisito coreniha- cana nejeraauru. Nitohanein cuhina, Sesareea turuhin, nii canu coithaca unacaauru letoera- cacha loreri asaee enohacaanu saaincha. <sup>13</sup> Nii janate, canacaanu rai: ‘Naaajoaainte, cau ecocoe Cana Coaunera letono aanjerara. Caute

chujuhequiin, “Cachaauru letoaau Jofe neseute, Simoonneein curuajai- Fedoroneein acaauruhacha curuaatei cotihaca cuuruhinera. <sup>14</sup> Acate, ‘Naaonjoaain neeute, satiin, isinejiera, charaaichuru, ichoerejeeuru, naaonjoaihunri aina, raotojoeein jianaacoo neeincha.’ naain ichei bereeincha,” ’ naa canaacaanu raine naainaa- nii loreri erorane jana, <sup>15</sup> acaauru rai irihanune nunuetihanune janate, acaauru chochae fauha uhe Cana Coaunera Suujue, cana chochae fauha uhalune rijijieeincha. <sup>16</sup> Nii janate casuujuaniha neeorite, ‘Acau quete niqui cacha camujuaain, cacha coujounacate Joaanra. Nete inara laaen Cana Coaunera Suujue que, coujunacatenohi niha curiquicheeincha.’ naain aitohalu Cana Curuaanaa Jesocurisito nera. <sup>17</sup> Aihana jaun, Jesocurisito esenetaacachene jana, cana rai rai Suujue tihane rijijieein, leeochoaauru rai netonai, rai Suujue tiha Cana Coaunerane, nainihaaun nii caohatera rijitiin, irihanu canu neta. Chaneeina nereeeun canu, Cana Coaunera colaihaje cuaain, nii caohatera rijitiin irihanuneta,” naa Fedorone janate, <sup>18</sup> inauhene cuuraatoraain, cuu aonajeeure nii Jerosaleeun nenacaauru- Jesocurisito coreniha cana nejeraauru.

Nitohaneein aonajeeuruhane baihate, Cana Coaunera coroaecure, “Caohacha quete, Jorioniheichuru netonai coroatajane Cana Coaunera, acaauru netonai suujua coreein ichaonaa- chabana nitajenaa charanejeein nenaaraauruhane coinara.” naain.

#### *Antioquiha neseeu Jesocurisito ranojineein nenacaauru*

<sup>19</sup> Eseteba sohin jaoruhane baiha neeoriinte, leeochoaauru Jesocurisito esenetaeraauru netonai ariin, rohecaure. Nii jaun jetaote tabaauru Jodea batane caje sorohin, Fenisiau, chaen Chifereu, Antioquihau, naaonjoaihuncuhinchuru sorohacoaure. Nii cuhin sorooruhane jauncuru turuhin jetaote, leeinjiin Jorioocuru raicha Jesocurisito beebejeein, que relanajaure. Coatia jetao laen, leeochoa cachaauru- Jorioniheichuru relaauruhi. <sup>20</sup> Ne jetaote, nii baiha, Chifereu, Sireneu naaonjoaihun nenacaauru- Jesocurisito esenetaeraauru tabaauru, nii Antioquiha neseeu turuure. Cuu turuhin jetaote, nii cuu nenacaauru Jorioniheinchuru rai, Cana Curuaanaa Jesuso que Erenaa Caohati beebejeein, que acaauru relaaure. <sup>21</sup> Nii aina, acaauru coroatajaniha Cana Coaunera Suujuene jaun jetaote, jauriaa acaauruhacha esenetai jianein, Jesocurisito esenetaure arajii cachaauru.

<sup>22</sup> Nii coitucuuriin jetaote, “Chatohaneeuruhachata,” naain Antioquihau Berenabeen letoaure, Jerosaleeun nenacaauru- Jesocurisito ranojoihunru. <sup>23</sup> Inae Antioquihau turuhin, acaauru coaracuruhane jana jetaote, caohatiin acaauru coroatajaniha Cana Coaunerane coaraana jaun jetao, jataain coroaeye Berenabeen. Nitohaneein coroaeeinte, esinaae rauhijiriin Jesocurisito esenetaain, baaso coacuelanaala esinaae rauhijiriin nere tonoraauruhane coina, suujuatenajae Berenabeen. <sup>24</sup> Caohacha cachaneein, Cana Coaunera Suujue que suujuequiin, jataain Jesocurisito esenetaera nihana jaunte, nitohane Berenabeen. Nitohaneein jetaote suujua coreein Jesocurisito ranojoinunru aina neeure arajii cachaauru.

<sup>25</sup> Nii baiha jetaote, Tarosoo cue Berenabeen, Saoro arihane coina. <sup>26</sup> Nitohaneein cuhin jetaote, cuu eruhin, amae Antioquihau. Cuu jetaote neurelu, itolereneein lejaanacaain, cuu nenacaauru Jesocurisito ranojoihunru aina cuu nenacaauru cachaauru relaa. Nii Antioquihau jetaote, jauriaanejeein, “Curisitianoneein” Jesocurisito ranojoihunru curuaateeuruhane nunuheteurelu.

<sup>27</sup> Nii bana jetaote, Jerosaleeun caje cuhin, Antioquihau turuha cuureprofetacuru tabaauru. <sup>28</sup> Niichuru taba- Acaboneein curajai jetaote, ita

taojiaauruha Jesocurisito esenetaeraaurune jana, acaauru cataaun nichaauraaain:

“Aonacuchena, inara rai caa bete, coitucuhichera. Nerinaain jetao cara-jaaajoaain quinacai, Jodea batane sacutaainta,” naain be nii Acabo, que beratiha Cana Coaunera Suujuene jaun.

Nii mijitena jetaote nelu, Romanocuru curuaanaacuru- curuaanaa niha enferadoro- Culaodione bana. <sup>29</sup> Nii niritoha Acabone jaun jetaote, naain Jodea nenacaauru Jesocurisito coreniha cana nejeraauru- coroatajanena jerecure, nii Antioquihau nenacaauru Jesocurisito esenetaeraauru. Nitohaneeinte, ita jeeonijianaain coriqui teein, taojiaaure, le cachaauru cachaauru caje, tenaa nainecuruhane rijiinanaain. <sup>30</sup> Nitohaneein taojiaain jetaote, nii Jodea nenacaauru Jesocurisito esenetaeraauru- bichauhenaauru rai letoaure, Berenabeen, Saoro, naaonjoaihunri aina.

## 12

### *Saantiaao sohin jaohinte, caresero cuhane Fedoro enohaure.*

<sup>1</sup> Nii bana jetaote, Jesocurisito ranojoinunru aina nejeratihane nunuhetein, tabaauru mucuerate jetao, Isaraelitaauru curuaanaa *rey* Erodesi. <sup>2</sup> Nitohaneein jetaote, sabere que, Joaan nejera Saantiaao sohin joerate. <sup>3</sup> Nii rautatiin, coaracuruha Jorioocurune jaun jetaote, Fedoro netonai mucuerate Erodesi. Jorerera colane ichanohin- faan quihuruhane jaan- beseta cojoanonaacuru bana jetaote, nitohaneein Fedoro mucuure. <sup>4</sup> Nii mucuheratein raeratihane baiha jetaote, Fedoro enoerate caresero cuhane- Erodesi. Nitohaneein caresero cuhane enoeratein jetaote, caohatiin beraichate. Jena lauriin, janaanain, nenacaauru soondarooru que, ita rerohereroreein caohatiin beraihuruha le laurichuru cajene coina, letoanajae, nii Fasocoa beseta bitohariin, satiin coarajeeurera notaracae, caresero caje rocohin, coaraain chatohaneein teuruhane coina. <sup>5</sup> Nitohaneein caresero cuhane caohatiin beraichaain niha Fedorone tonohanau jetaote, ita taojiaain, rai Cana Coaunera bajaure mainajein Jesocurisito ranojoihunru.

### *Caresero Caje Fedoro mitaa Cana Coaunerane*

<sup>6</sup> Nii jaun jetaote, eresinejeonriin lanajeeca, satiin coarajiha cachane notaracae, chatohaneein Fedoro tihanerai niha- Erodesine jana jetao, coroatajai soondarooru cataaun, jeranu *cadena* que cosiin sinitoha Fedorone jana, acujua nihacuru neein- beraihuruha soondaroorune jana jetaote, <sup>7-8</sup> rai letono- anjera letoae jetao, Cana Coaunera. Nii jaun jetaote, luhecotariin, Fedoro rohan neeoritoha Cana Coaunera letono anjerane jana jetao, jiiichoo rijijieein conoe, caresero cuhane. Nii jana jetaote, sinitoha Fedorone jana, jaleri dada dadariin nocooain jetao:

“Chajaain nimiichuura,” naa Cana Coaunera letono anjera, Fedoro raine rijieeoritiin jetao, rai biji caje nejasajasariha- nii biji ichora *cadenane* jana jetao: “Chajaaajoaain nimioritiin ichajione jiaain, ii safato jiaain, canu jiniichotaaura,” naa, nii Cana Coaunera letono- anjerane jana jetaote, nii aitohane rijijieein jiniichotae jetao, Fedoro.

<sup>9</sup> Nitohaneein jetaote, mituha cue, Cana Coaunera letono- anjera caaijie cuhin, coetacaineein cuhin, mituha cuhane esenetaelanaala, “Nechu jataaen sini anuu jecha aite.” naain. <sup>10</sup> Nitohaneein cuhin jetaote, jaurihaanejeein acujua beraicha caje situure. Nii leeocho caje situhin jetaote, nii coata que bacuujuana jaun, turuuruhane jana jetao, raajenihane nejoracae, nii coata que bacuujuanaa, naain aerene nena enonaanaja rijia bacuuju.

Nitohanein mituhin, le cocoaantaain bero cuhane cuujueeru baiha jetaote, jelai Fedoro ratiriin amuhe- Cana Coaunera letono anjera.

<sup>11</sup> Nii jaun jetaote, nainacori Fedoro. Nainacoriin jetaote: “Esinaaete, rauhijiriin letono anjera letoae- Cana Coaunera. Jataain cague necosu-ujuaain, canasineene rijitoha Erodesi aina Jorioocurune janate, nabana chatohanein caetecuruhane coataa, letono anjera letoae Cana Coaunera, canu ichoteratihane coinara,” nae jetao Fedoro.

<sup>12</sup> Nitohanein, inae nainaaain jetaote, Joaan Maroconein curuajai- neba-Mariha rene turuha cue. Nii jana jetaote, cuu najiniha, nii Mariha loreri asaae, ita taojiaain, Cana Coaunera baja neeure arajii cachaauru. <sup>13</sup> Nii jana jetaote turuhin, nii aerene nena enonaanaja rijia acujua faofaorihane jana jetao: “Cha cha aite,” naain, coaraa cue leeinjiin ranuna Rodee. <sup>14</sup> Nii jetaote, Fedoro ere nihane aonaain jetao, coroaena caun jetao, nii acujua joracae lanaala soronein biha cue: “Fedoro te aitera,” naain. <sup>15</sup> Nii jana jetaote: “Esinaaenna aitohite,” naauruhane jana jetao:

“Esinaae rauhijiriin acate aicha,” naane jana jetao:

“Rai suujete jerihane ai caihara,” naaure.

<sup>16</sup> Nii tonohanau jetaote, nii acujaniha neein, nii acujua faofaonijiana, acauru bajaebajeein Fedoro. Nii jaun jetaote, nii acujua joracain coaracuruhane jana, esinaae aca nihana jaun, cuu nesoonetiin coarajeeure.

<sup>17</sup> Nii jana jetaote, acauru rai, biji sarasarari, nabana tonaain ereeuruhane coataa. Nitohanein jetaote:

“Naaonjoaainte, caresero caje, canu mitaeratein, canu ichoterate, Cana Coaunerara. Caritiin, Saantiaao rai benichuchera. Satiin, cana nejeraauru-Jesocurisito coitucuurera rai netonai beeuchete, coitucuuruhinera,” naain beratihane baiha jetaote, jelai caje mituhin jetao, amuhe Fedoro.

<sup>18</sup> Nii jana jetaote, jano jana, cuu neniha Fedorona jaun, nesoonetiin: “Cha quena nerurujuae, caa aansai,” naain jetao, acauru suujua auhacaain nererojoeaure- nii beraihurera- soondarooru. <sup>19</sup> Nitohanein, nenihana jaun jetaote, arihuruhane coina, acauru letoaa- nii curuaanaa Erodesine jana, nitohanein Fedoro arihuruhane jana, ruurenihana jaun, nii beraihurera choae nalutiaain jetao, acauru sohin joerate jetao Erodesi. Nii baiha jetaote, nii Jodea batane caje mituhin Sesareeau ichaoha cue jetao Erodesi.

### *Oha Erodesine*

<sup>20</sup> Tiro, Sidoon, naaonjoaain cocoaichacuru aina jetaote, niqui obaje Israelitaauru curuaanaa *rey* Erodesi. Nii jana jetaote, ita suujua tacaain:

“Coanete, atiin rene turuhin raotojoein erena neeina,” naain jetao, jaurihaanejein, nii que jaurii- nere tonoraera Balasito rene turuhin jetao, ereeure nii curuaanaa Erodesi rai, nii Erodesiicha beraai atane cajeecha quinacai raajein ichaauru, nii Tiro, Sidoon naaonjoaain cocoaichacurune jaun. Nii jaun jetaote, nii curuaanaa Erodesi rai:

“Coanete, nii cachaauru corootajanena neeina,” naa nii Erodesi que jaurii- Balasito najaun jetao, <sup>21</sup> “Banajian uunite coana neeina,” nae jetao, nii curuaanaa Erodesi. Nii jaun jetaote, nii aitohane bana, rene netaojiaauruhane jana jetaote, curuaanaa nihane cajione jiaain jetao, nii curuaanaa nihane nelauriana jaan- rori choae nelauriaain jetao, ereereje Erodesi. <sup>22</sup> Nii jana jetaote:

“Coatia caritiin erena nainihe, cana rijijeein cachata. Caate cana chosinera,” naaure jetao, eehequiiin satiin nii cuu nere aonajeeurera cachaauru, nechu jataain acauru belaiha Erodesine coina. <sup>23</sup> Nii jana, coroaeca Erodesine jaun jetaote, nii rijieoritiin, letono anjera letoae- Cana Coaunera,



nichoae cunai nalutiaane coina. Nii jaun jetaote, cunaiteein corianohin rihano jitanoinnein ohe, Cana Coaunera nujuanein coroaeca ne jaun.

<sup>24</sup> Nii jana jetaote, inae jelai amuritoheriin, Cana Coaunera ere coitucuhajeein cuujueure cachaauru, itolere sacutaain, amuhemujueein beebejeeuruhana jaun.

<sup>25</sup> Nii jana jetaote, inae Jerosaleeun, niicha ichanenu nainaauruha najaun jetao, Antioquiha cauha cuure, Berenabeen aina- Saorocuru, acauru jiniichaain “Maroco” naain acaauruhacha curuaatei- Joaan amaain.

## 13

*Letononeein amuhemujueein, Jesocurisito beebejeeuruhane nunueteeuruha- Berenabeen aina Saorone*

<sup>1</sup> Nihalu jetao, Antioquihau Jesocurisito ranojoinunru coaraauru jelai teein, Cana Coaunera caje- erenaa raain acauru rai beeureraauru *profetacuru*, chaen Cana Coaunera aitoonjoa que cache relaureraauru, naaonjoainuri. Niichuru aina jetaote neeurelu, Berenabeen, chaen Simoon- jichojoaineein acaauruhacha curuaatei, chaen Losio- Sirene cocoaicha, chaen nii Calileea coberenadoronein nenaalu- Erodesi aina fohena- Manaen, chaaen Saoro, naaonjoainuri. <sup>2</sup> Niichuru jetaote, coroatajanenaaca Cana Coaunerane coina, cosinacaa suri couu ita taojiaain, Cana Coaunera bajaee bajaecuruhane jana jetaote:

“Carai nii Berenabeen aina Saoro letoaauchete, jelai teein acauru rai quiiicha teei amihanenaa ichaa cuuruhinera. Nii ichacuruhane coinane cotihanajaain ranajaain neeunlura,” nae jetao, acauru rai Cana Coaunera Suujue.

<sup>3</sup> Nii jaun jetaote, coaiten cosinacaa suri couu neein, Cana Coaunera bajaee bajaecuruhane nainaaain jetao, acauru choaae biji merecaain, Cana Coaunera bajaare. Nitohanein acauru rai, Cana Coaunera bajaauruhane baiha jetaote, acauru rai necoeure.

*Chifereu turuuruha, nii Cana Coaunera Suujue letoeratenojoihunru- afotoorune*

<sup>4</sup> Berenabeen aina Saoro jetaote, Cana Coaunera Suujue letononeein Seleosiau cuure. Jelai caje coauneein jetaote, Chifere cunaa bote cuhane fauhin, cucuana cuhane coriaae cuuhin turuure, nii Chifere coobenau nena nese- Salaminau. <sup>5</sup> Nii nese Salaminau turuhin jetaote, nii cuu nena ita taojiaauruhana jaan loreri- sinacoca asaae netaojiaauruha Jorioocurune jana jetao, cuu enohin, acauru rai, Cana Coaunera ere beebejeeure. Joaan Maroco netonai jetaote, acauru aina cue, acauru coroatajanera rijijieein.

<sup>6</sup> Salaminau neeuruhane baiha jetaote, caje cuhin, jitariin nii obena tinonohin cuhin jetao, nii cu nena leecha nese- Pafosoo turuure. Nii Pafosoo turuuhane jana jetaote, cuu nee- leeinjiin benane- Jorioneein casajenetiin- Cana Coaunera letononiha nocoetiin- cachaauru coritaera- Barajesoso. <sup>7</sup> Nii benane jetaote, cuu jataain nainaaain nena- Coberenadoro Serijio Faoro aina nei nejesina ne. Nii coberenadoro jetaote, nii Pafosoo turuhin neeuruha- Berenabeen aina- Saorone coitucuhane jaun jetao, cotiharatenajae, nenajaun cuhin, rai Cana Coaunera que ereereecuruhane aohana jerihane jaun. <sup>8</sup> Ne jetaote, Berenabeen aina Saoro que nejerate nii benane- Barajesoso- “Elima” neein Curiecocuruhacha curuaatei, nabana acauru esenetaa nii coberenadorone coataa. <sup>9-10</sup> Ne jetaote, Cana Coaunera Suujue que suujuequin jetao, nunajeein coarajeein:

“Nechu aansai. Casaje. Moconajaera nebaneen nenea. Ii te itolere caohacha aina nejeratenaaneein neeinha. Chanute Cana Coaunera tenojohin ichaonaa caohacha auhacaaita,” nae jetao Saoro- “Faboro” neein curuaaneni. <sup>11</sup> Niritiin cotaicha rijitiin jetaote: “Nitohaneein neeine corenihate, ichasetecareein Cana Coaunerara. Maosaneeinte nedariquiin carajajoaaincha. Nihei jiiichoo coaririheeinita,” naa Faborone rijieeoritiin jetaote, maosaneein nedae nii benane.

Nitohaneein nocohenaneein nedaa rai notana jaun jetaote, rai biji que mucuhin- amaeranu ari, amaa ne coina- nii Elima, inae conoeniha notana jaun. <sup>12</sup> Nii jaun jetaote, cojoaelatiin, jataain caohatoha nii Cana Curuaanaa- Jesocurisito que aitiin, acaauruhacha beebejei- Cana Coaunera ere esenetae- nii coberenadoro.

*Pisidia batane que nenea- nese leeocho- Antioquihau turuha Faboro aina Berenabeenne*

<sup>13</sup> Nii Pafosoo neeuruhane baiha jetaote, leeinjiin bote cuhane fauhin, Paanfiliau cue nii corihaneraauru aina- Faboro. Jelai caje coauneein jetaote, atane ichoaae cuhin, turuha cuure, nii cuu nenea nese- Perejeu. Nii jana, Joaan Maroco jetaote, cuu ratirinajaain, Jerosaleeun cauha cue. <sup>14</sup> Nii Perejeu caje cuhin jetaote, nii Pisidia batane roohan nenea- nese Antioquihau turuure nii Berenabeen aina Faboro. Cuu jetaote, nebetacanaa janonaa bana- ita taojiaauruna jaan- sinacoca asaae, ita taojiaauruha Jorioocurune jana, cuu enohin nelauriaain, aonajenajaunre. <sup>15</sup> Nii jana jetaote, cuu aonajenajaauruhane jana, Cana Coaunera Quiricha Inoasi ereretaaure. Inae nii nainaaauruhane baiha jetaote, acaauru rai:

“Chasocuru, niha chaelai que ereichene jaanne, ereeuche te, aonaain suujua lararajiaauruhine- caa cachaauru,” nae nii netaojiaauruna jaan- sinacoca curuaanaacuru.

<sup>16</sup> Nii jaun jetaote, nimichuhin nichaaaurariin, acaauru rai, biji sarasarari Faboro, inauheneeicha curuaequiin aonajeeuruhane coina. Nitohaneein acaauru rai, biji sarasarariin jetaote:

“Aonacuche satiin- Israelitaauru, satiin Jorioniheichuru netonai- Cana Coaunera ere esenetaain tonorana jerenacaauru. <sup>17</sup> Egiptoo cuhin ichaooruhane ajiniha jetaote, cana foerateeurera Israeli cocoaichacuru janijiin ranajaelu Cana Coaunera. Nii baiha, rai natane nihei que cuhin, nejelau ataneu- Egiptoo ichaooruha cana inoasihuru Israelitacurune jana jetaote, arajiin fanajaelu Cana Coaunera. Nitohaneein nii nejelau ataneu netiin, inae arajiin nefaauruhane jana jetaote, jelai caje, niicha ichana nainai coarateein roconajaelu Cana Coaunera. <sup>18</sup> Nii Egipto caje roconajaane baiha jetaote, nere tonoraarenihane saijieein, atiin acaauru abaantaelu, jenachoonca janacaneein desieretoo Cana Coaunera. <sup>19</sup> Nitohaneein nere tonoraarenihane saijieein jetaote, acaauru rai neein niha nii atanene coina, Canaan batane que, caaunsineein nenea nese que ichaonacaauru cachaauru itaje jetao Cana Coaunera. <sup>20</sup> Itolereneein, Egiptoo cuuruhane que johin jetaote, jena fasha saoqui choonca ajaanacaneein jetao, acaauru que banihateein inoaelu- niicha tenaa jerei- atane que tenajae jetao Cana Coaunera.

Nii baiha jetaote, acaauru curuaanaacuru tihacoe, Cana Coaunera, enoha nere bera inoasi- Samoerinereein tihaojoaain. <sup>21</sup> Nii jana jetaote, itolere curuaanaaneein- itolere sirichaaunu que jetao leeinjiin *rey* bajaure jetao. Nii jaun jetaote, Beenjamiin lauri caje neferatenaaneein nenea Sisi calaohi- Saoro tee jetao, Cana Coaunera, jena choonca ajaanacaneein, acaauru rai- reyneein nihane coina.

<sup>22</sup> Nii jana jetaote, renaatonorae lanaala, jeriha Cana Coaunerane rijijieein, ichana jereniha Saorone jaun jetao, Rabiri que core jetao Cana Coaunera, satiin Isaraelitaauru curuaanaaneein- itolere sirichaneein-*reyneein* nihane coina. Nitohaneein teein jetaote: ‘Inae laen, casuujuu rijitoejeein nena- cacha ruhanura. Acate, Isaihasi calaohi- Rabiri inera. Acate laen, jatoroaain ne, itolere quiicha jerenohi ichaane coinara.’ naain jetao Saoro mitaain, Rabiri tee jetao, coreeraniha, Cana Coaunera. <sup>23</sup> Nii Rabiri caje neferatenacaauru inamacooru caje nenaaneein jetaote, nenaanelu Jesoso. Aca jetaote, letoaelu Cana Coaunera, nere bera inoasihuru que beratihalune tocohaneein Isaraeli cocoaichacuru ichoteratihane coina. <sup>24</sup> Inae turu catainajiha Jesusone jana jetaote, Joaan letoae jetao Cana Coaunera, satiin itolere Isaraeli cocoaichacuru sacutaain, beebejiha Joanne coina. Nii jaun jetaote: ‘Caohachaain inara suujua rucujueein, coaiten Cana Coaunera aitoonjoa esenetaain tonoraain neeuche te, baotisaain cojounacatenohinee- ichera.’ naain, Isaraeli cocoaichacuru rai aite jetao, Joaan. <sup>25</sup> Inae ohane catainaane jana jetaote: ‘Coatia nii inaraacha cohajei- cacaaijie- nii turuha uhenenu nihaaun. Canute, letoae Cana Coaunera, nii beraaunu que. Acate laen, caichoaae jauhecotojoeriin, jataaen cocoaainain letoanojoneein ne. Nii jaun, rai safato ichora rucuheraane que nihanatiin, nelatihahaun.’ naain jetaote, rauhijiriin be jetao, acaauru rai- Joaan.

<sup>26</sup> Chasocuru, Abaraaun caje neferatenaaneein nenacaauru, satiin- Jorioniheichuru netonai- Cana Coaunera ere tonorana jerenacaauru, satiin, caa inara rai quiicha beebejeite- jianacoo cacha culucohin mitaeranute, satiin- inara rai beratenojoneein ne. <sup>27</sup> Satiin- nii Jerosaleeun nenacaaurulu, acaauru curuaanaacuru, naaonjoaihunrite, cajiha turuha Jesusone jana, coitucuurenenu. Nere bera inoasihuru quete niqui, laenaerateein beratelu Cana Coaunera. Nii jaunte niqui, nii Cana Coaunera ere bera inoasihuruhacha- laenanohilu ereretai nejesinanecure, nebetacanaa janonaa bana naineein. Nitohaneein, ita taojiaauruhana jaan- sinacoca asaae ereretai nejesinanecuruhane sajainejeeinte, cajiha turuha Jesusone jana, ‘Aca caara.’ naain coitucuurenenu. Nii jaunte, sohin joerateuruhana jaun, aitiin: ‘Naaonjoaante, cuureeinha.’ naain nere bera inoasihuru que laenaeratihu beein- Cana Coaunerane nainauruhane coina, <sup>28</sup> Filato rai colurujueein, sohin joerateurelu, Filato que, lera colane. <sup>29</sup> Nitohaneein teinte, inae satiin aitoha Cana Coaunera Quiricha Inoae sine nainaane jana, nii coroso caje fauhin, rai jabereco rucuhecure- ajeri jachu cuhane. <sup>30</sup> Nete, nii jana, oo caje ichate Cana Coaunera. <sup>31</sup> Nii jaunte, nii Calileea caje coauneein, Jerosaleeun tiaetiajeein namu corihaniha amuhemuhenaacaauru rai ecocohin, cuu araai janohi acaauru aina nerejetelu. Acaaurute, enene itolere sacutaain amuhemuhejueein, nii Jesoso que ereereecure, itolere cachaauru rai.

<sup>32-33</sup> Inara caohachanu quena, inara rai, caa caohati erenaa bihacaanu, coitucuhichene coina. Caa quete, cana inoasihuru rai aitelu Cana Coaunera, catohanihane coina. Nii jaunte, acaauru inamaconeein nihacachena jaun, cana rai, cana inoasihuru rai naitoonjoa nainaane coina, catohaneein ichae Cana Coaunera. Acate, oo caje Jesoso ichate, rai Quiricha Inoaei- Salmo- coroatajai cuhane aitohane tocohaneein. Raite, ‘Iite, canu calaohineein neeicha. Canuna, chacaneein neeunra.’ naain laenaeratelu Cana Coaunera, rai Quiricha Inoaei cuhane. <sup>34</sup> Nitohanihane coinante, nii ajiniha: ‘Oo caje jene, ichatereeuni, nabana setuha rai jaberecone coataara.’ naain nii ajiniha- rai Quiricha Inoaei cuhane belu- Cana Coaunera. Chaentechu: ‘Satiin Rabiri rai caitoonjoane, ichaa cureunnicha.’ naain belu

Cana Coaunera. <sup>35</sup> Nitohanihana jaunte, coaiten leecha cuhane, ‘Coatia laen, setuha nii ii letono jaberecone naihatejeriheeinita.’ naain laenaclu Rabiri. <sup>36</sup> Aihana jaun, esinaaente niqui, Rabiri letoaa Cana Coaunerane rijijieein, nii nihane bana nenacaauru cachaauru coroatajanelu. Nete, nii baiha ohin, rai foerateeurera ainane jana, rai jabereco inae setuelu. <sup>37</sup> Nete, nii Cana Coauneraacha ichatei- Jesoso jabereco laen cuu neein setuenelu. <sup>38-39</sup> Aihana jaun, chasocuru, caa inara rai canacaanuhacha beebejei- Jesosohacha corenihate, atiin, osaaocane nihanatiin, rauhijiriin esenetaane, nosa caje nichotena nainereein- saain cachaauru, Jorionihe-ichuru nihanatiin. Aihana jaun, nii nosa coreniha caseteco coaracuruhane rai niha- Moisesaacha benojoinurute, Jesoso coreniha laen nainecurureein nii caseteco caje nichoteeuruhane. Aihana jaun, satiin- nii Jesoso esenetaeraaurute, atiin coreniha- osa caje rocohin- culuhoca cureein Cana Coaunera. <sup>40</sup> Caohachaaain coaracuche, batohin esenetana jereneeichenete, inara choaae nalureein inoaelu laenaratihalu Cana Coaunerane jaun, laenacuruhalu *profetacurune* rijijieein:

<sup>41</sup> ‘Aonacuche.

Satiin caohacha ichaonaa-  
caitoonjoa que jaolequiin nenacaauru  
cojoaelatooche.

Nitajihate curiquicheein, inae ecu tihane bana.

Nii cojoanona banane,

itolere ichaain inara notaaca cureeunnicha.

Chunicoha inara rai, nii que ereein bihane, esenetariheeicheta.’

naain laenacuruhalu *profetacurune* rijijieein,” naain jetao, nii Antioqui-hau nena sinacoca asaae- netaojianacaauru rai ereerejeein jetao beebeje Faboro.

<sup>42</sup> Inae, nii que irihane nainaan jetaote, nii ita taojiaauruha Joriocurune jaan- sinacoca caje corihaneraauru aina mituha cue Faboro. Nii jana jetaote, jiniichaain cuhin mituha cunacaauru- Jorioneein nerotonacaauru jetaote:

“Coaiten leecha- nebetacanaa janonaa bana uhin, coaiten nii que ererejiha uuni, canacaanu rai,” naain jetao, Faboro cotihacure. <sup>43</sup> Inae sinacoca asaae netaojiaauruhane nainaan jetaote, Faboro aina Berenabeen caaijie cuure- arajii Jorioocuru aina- Jorioneein nerotonacaauru- Cana Coaunera ere tonorana jerenacaauru, naaonjoaihunri. Nii jaun jetaote, acaauru rai: “Nijiaonriha, inara belaiha nere aina cuaain, inara cotihaca Cana Coaunerane jaan jianequichenera. Nirijieeincha, jianelanaala, nii jelai sacuchete, inara coroatajaneein, inara belaine Cana Coaunerara,” naain jetao, acaauru suujuateein, acaauru ratirihure.

<sup>44</sup> Nii baiha jetaote, leecha nebetacanaa janonaa bana coaiten, netaojiaaure- nii nese sacutaain caje uhin- coroatajaje lanaanla cachaauru, acaauruhacha beebejei- Cana Curuaanaa Jesocurisito beratenojoi aonacuruhane coina. <sup>45</sup> Nii jaun jetaote, nitohaneein coroatajaje lanaala, tururuha cachaauru, Faboro aina Berenabeen aonaana jaun, nechu jataaen, acaauru que necoelai caun, nabana esenetaauruhane coataa, “Nechu aansai casaje cachaauru,” naain, Faboro necoeje chanuure Jorioocuru. <sup>46</sup> Nii jana jetaote, nii que nelararajiaain, chaque casilanaala:

“Inara Jorioneeichene raite niqui, jaurihaanejeein nere beebejihacaanune coina canacaanu letoain ne Cana Coaunera niquicha. Nete, naitoonjoa batocoichene jaun, rautaaain aohana jerelanaala que jaolecohichera. Nitohaneein, inara rai, ichaonaa sanaacharanejeein nena bihacaanune coinete niqui, canacaanu letoain ne- Cana Coaunerara. Nena aohanna

jereneeiche coarajihacaanune jaun, Jorioniheichuru rene curichaanuhin.

<sup>47</sup> Nitohaneein canaacaanu letoaainte:

‘Canuna, inara letoareeuni,

satiin- caa chauratane que nenacaauru- Jorioniheichuru rai nihanatiin,

amuhemujueein beein, canu neein nihanune coitucuerateein,

acaauru ichoterateein neeichene coinara.’

naain Isaihasi que beratihalune rijijeeinte, ena canaacaanu letoae Cana Curuaanaa- Cana Coaunerara,” naauruha Faboro aina Berenabeen, Jorioocuru raina jaun jetaote, <sup>48</sup> coroaacure- nii Jorioniheichuru.

Nitohaneein coroaajeein jetaote, esenetaain, “Caohatoha jataaen cana rai, Cana Coauneraacha beratenojoincha,” naain esenetaaure, satiin- nii ichaonaa sanaa charanejeein nena raaureraanu que nenacaauru- Jorioniheichuru. <sup>49</sup> Nitohaneein jetaote, nii jelai batane sacutaain nenacaauru- jelai cocoaichacuru rai, Cana Curuaanaa- Jesocurisito beebejeeure. <sup>50</sup> Nii jaun jetaote, nii rautaain coaracurenihana jaun, nii caohachaain suujua coaraain Cana Coaunera bajaaurera- enecuru suujuau tacaure- Jorioocuru. Nii cuu nenacaauru- acaauru rai jataaen nelatenacaauru cachaauru- suujuaune maajeein tacaure, satiin ita suujua rijitocoriin, acaauru que nejerateein, jelai caje Berenabeen aina curuataain, Faboro sitaauruhane coina.

<sup>51</sup> Nitohaneein, jelai caje sitanajaauruhana jaun jetaote, mituuru neein, nii acaauru safato que nena- utuune faofaohin, riariaain, ratiriin amuure. Nii jetaote ichacure: “Aihana jaun, inae canacaanu, nii ujuaihoneein nihaacaanu. Coaraain aihane nitajeeuche.” naauruhane coina. Nitohaneein rai safato que nena- utuune faofaohin riariaain ratiriin jetaote, jelai caje amuhin, Iconio cuure Berenabeen aina Faboro. <sup>52</sup> Ne jetaote, rachoojoenaa cataaun nedaure, nii Antioquiha nenacaauru Jesocurisito ranojoihunru, acaauru suujueniha, niha Cana Coaunera Suujuena jaun.

## 14

### *Iconio turuuruha Faboro aina Berenabeenne*

<sup>1</sup> Antioquihau neeuru baiha, jelai caje amuhin jetaote, Iconioo turuure jetao- Faboro aina Berenabeen. Nii Iconioo turuuruhane jana jetaote, nii cuu nena ita taojiaauruna jaan- sinacoca asaae netaojiaaure Jorioocuru. Nii jana jetaote, cuu turuhin, enohin, Jesocurisito beratenojoi beebejeeuruha rauhijiriin, rauhi cuhane cuaaine jaun jetao, esenetaacoaure arajii- Jorioocuru, Jorioniheichuru naaonjoainuri netonaine maajeein, esenetaacoaure arajiin. <sup>2</sup> Nii jana, esenetaaichuru Jorioocuru jetaote, nii Jorioniheichuru suujuateure jetao, esenetaauruhane coataa, baasoneein Faboro aina Berenabeen que ereein, nechujataain acaauru cotaiha. <sup>3</sup> Ne jetaote, cuu carajaain acaauru aina neeurejetocurelu jetao, nii Jesocurisito letonocuru afosotooru. Nitohaneein jetaote, acaauru corootajanerichaaain Cana Curuaanaane coitucuuruhane jaun jetao, cuu neein Cana Curuaanaa ere beebejerejetocurelu jetao, nii afosotooru. Nii jaun jetaote, acaauru corootajaniha- Cana Curuaanaana jaun jetao, jataain cacha belaiha Cana Coauneraane beebejeein jetao, cunaitenacaauru rautaain cacha notaacure, esenetaauruhane coina, Faboro aina- Berenabeen. <sup>4</sup> Ne jetaote, nelerujuacoaure, nii jelai nese cocoaichacuru cachaauru. Tabaauru jetaote, Jorioocuru cocoaeratiha jetao, jelai tein nelerucure nejesihajeein. Nii jana, afosotooru cocoaera- teeurera netonai jetao, jelai tein nelerucure. <sup>5</sup> Nitohanihana jaun jetaote, cocoinanacaainuru aina ita suujuau tacaure jetao Jorioocuru Jorioniheichuru aina, Faboro aina- Berenabeen que nejerateein, ajeri que bodosina- jaain sonajaauruhanene coina niqui. <sup>6</sup> Nii jana jetaote, nii coitucuriin jetao,

Iconio caje, Licaoniha batane cuhin, Listrau, Derebeeu, naajoainunri rohan nenacaauru neseuru cuhin jetao sorohin, <sup>7</sup> amuemujueein, Jesocurisito beratenojoi- erenaa caohati beebejeure jetao.

*Listrau, Faboro bodosihuruha ajeri quene*

<sup>8</sup> Nitohaneein, nii Listrau turuuruhane jana jetaote, ecu ne- leeinjiin bacosaneein nejanohanaa cacha. Nii jetaote, chabana nichaaurain amuhene, nejanoha caje coauneein. <sup>9</sup> Aca jetaote, Cana Coaunera ere beebejiha Faborone jana, rautatiin, cuu lauhequuin aonaje. Nii jana, rautain coaraa Faborone jana jetaote, esinaae rauhiiriin, nerautaane esenetana nainihane coarajiha, suujua cuhanena jaun jetaote, <sup>10</sup> rai tonijiaain:

“Nimichuhin nichaaurate coaracaara,” naa rai Faborone rijieeoritiin jetaote, chujuleneein, jeluhatiin inae ruharujuae nii cacha. <sup>11</sup> Nii coaraain jetaote, ita rijitiin jachaleneein jetao, nere cuhane cuaain jetao:

“Chosichurute cacha neein cana rai faaurera,” naaure jetao, Licaoniha ere cuhane cuaain.

<sup>12</sup> Niritiin jetaote, nii acaauru ichanohineein nena, acaauru chosineein acaauruhacha tei Seoso jecha naaure jetao, Berenabeen que. Jana Faboro que jetaote, leecha chosi Eremesi jecha, naaure jetao, aca irihane jaun. <sup>13</sup> Nii jana jetaote, turuha uhe jetao, nii nese coenorau nena- acaauru chosi Seoso rai Teenforo rai saseredote. Nii saseredote jetaote, Seoso rai, lenone nihane sohin, mocohin tenajaaocane tocohaneein tajiha itolere torocuru, chaen, caohatiin curuteein rucuhenehin nena- enuha juane, naaonjoaain uhaain turuha uhe jetao, que Faboro aina Berenabeen belain coroaecuruhane coina. <sup>14</sup> Nii jana jetaote, nii coaraain, acaauru chosiniha benajaauruhane que, inae nainacorichure jetao, Faboro aina- Berenabeen. Nitohaneein, nainacoriin jetaote, nobiri soaisoaain jetao, acaauru jana cuhin, acaauru rai nujuaaen soaisoaain:

<sup>15</sup> “Chanuna nitohanain ichana jeriquiche, inara rijijieein, cacha neein nihacaanu natiin. Nitohaneein neeichene jianequichene coinana turuha uhacaanu, inara rai bihacaanune, nii jiaaneein neeichene coinara. Nii jiaanecuchera. Coatia chaelai que nelatejeehai niita. Inae nii jiaaneein, Cana Coaunera eesine- itolere dede, cana rai chauratane, cucuana, nii cuhane coneracuru, naaonjoaain coaunera- Cana Coaunera coroaeein, nere tonoraain neeuchera. <sup>16</sup> Inoaelute niqui, niicha jerei ichaa cachane nihanatiin, inauheneecha coarajerejetelu Cana Coaunerara. <sup>17</sup> Coatia, chaelai janonaa bana, caohacha ichaain nihane jianihei- Cana Coaunerata. Nete, ‘Naaonjoaaine neeunra,’ naain chabana necoharaeratene cacha notajaaincha. Acate, inara corootajane, temulejaain naaonjoaaineeneenera. Inara temule setejiaeraanuque, elo letoaain naaonjoaera. Setejiaane, caoachaain marohin, caohatiin tihane, jeejoiriin nihane, raotojoein quihajeein- aina raotojoein neeichene jaan- teraneein nenaanera,” <sup>18</sup> naain acaauru rai beeuruha Faboro aina Berenabeenne sainejeein jetaote, erenaa tonorae lanaala jetao, acaauru chosi rai ichara tocohaneein jetao, nii irihuru sohin, mocohin, acaauru coroaeein, acaauru belain, acaauru ranaa jerecure.

<sup>19</sup> Nii jana jetaote, Antioquiha caje, Iconio caje, naaonjoaain caje uhin, tajiha turuha uure- Jorioocuru. Nitohaneein, turuhacoaain jetaote, nii ecu nenacaauru suujua elonaauruhana jaun jetaote, ajeri que Faboro bodosiin jetao soore. Nitohaneein sohin jetaote, “Inae jecha atinaauruha,” naain jetao, tararaain amaain, nii nese caje, naain jaoha cuure. <sup>20</sup> Nii jana jetaote, sacuhin, curuhacaain netaojiaain coarajeeuruha Jesocurisito ranojoihun- rune jana jetao, nimichujuaate Faboro. Nitohaneein nimichuhin jetaote,

coaiteen nii neseeu cue. Nii cojoanoo jetaote, Berenabeen aina, naain Derebeeu cuure.

<sup>21</sup> Nii Derebeeu turuhin, cuu raotojoein, Cana Coaunera Ere Caohati beebejeeuruhane jaun jetaote, Jesocurisito esenetaeranein nedaaure arajii cachaauru. Nitohanihana jaun jetaote, cuu neeure arajiin Jesocurisito ranoinunru. Nii Derebeeu, cacha relauruhane baiha jetaote, Listrau, Iconioo, Antioquihau, naaonjoainunri coaiteen cuure. <sup>22</sup> Cuuru turuhin jetaote, Jesocurisito esenetaeraauru suujuateeure jetao, caohatiin, nirijiein jianelanaala, esenetaain tonoraauruha, caoachain rauhijiriine coina. Nitohanein jetaote: “Cana Coaunera Cojoanona que ichaonaa jerichaane, itolere necairichanaa coaraain, necairichanaa abaantaacanete nera,” naain jetao, suujuatenajaunre. <sup>23</sup> Niritiin, suujuatenajaain jetaote, le laurichuru Jesocurisito ranoinunru nainetiin, acaauru coaraanuurune que, acaauru bichauhenaauru tihacoaure. Nitohanein, tihacoain jetaote, acaauru coroatajaniha Cana Coaunerane coina, suri couu neein cosinacain, Cana Coaunera bajaain, nii acaauruhacha esenetai- Cana Curuaanaa bijiu tenajaain ratirinajaure.

*Siria batane que nena Antioquihau jelaiha cuuruha Faboro aina Berenabeenne*

<sup>24</sup> Pisidia batane choaae situhin cuhin jetaote, Paanfiliau turuure. <sup>25</sup> Inae Paanfiliau batane turuhin jetaote, nii neseeu- Perejeu, Jesocurisito beratenojoi beebejeeure, nii cuu nenacaauru rai. Nii baiha jetaote, Ataliau cuure jetao, Faboro aina Berenabeen. <sup>26</sup> Cajee coaunein jetaote, bote cuhane fauhin cuhin, Antioquihau turuure. Nii neeuruhane jana, acaauru teeuruhane acaauru leochaauru, Cana Coaunera icharatenojoi ichacuruhane coinana jaun jetao, turuure, inae nii niicha icharatenojoi jitaauruhane jaun. <sup>27</sup> Nitohanein cuhin jetaote, inae Antioquihau turuhin jetao, jitariin cuu nenacaauru- Jesocurisito ranoinunru taojiaain jetao, acaauru rai, acaauru coroatajaniha Cana Curuaanaa- Cana Coaunerane jaun, Jorioniheichuru netonoai- rai suujua coreein, inae esenetaauruhane beebejeeure Faboro aina, Berenabeen. <sup>28</sup> Nitohanein jetaote, cuu acaauru aina, carajaain neeururejetecurelu Faboro aina Berenabeen.

## 15

*Netaojiaauruha Jerosaleenne*

<sup>1</sup> Nii Antioquihau neeuruha Faboro aina Berenabeenne bana jetaote, Antioquihau cuure nii Jodea nenacaauru tabaauru. Nii Antioquihau turuhin jetaote, nii cuu nenacaauru- Jesocurisito coreniha cana nejeraauru relaaure jetao, aitoha Moisesane jaan que. Inoaelu aitoha Moisesane rijitoein:

“Inara jabereco cari jiuunuhin saaerateneeichene, inara osa cajee inara culucohin, inara ranaa naineriheide Cana Coaunerata,” naaure jetao. <sup>2</sup> Nii jaun jetaote, coreniha acaauru aina, ita cotaicha rijitocure jetao Faboro aina Berenabeen. Nii jaun jetaote, inae Faboro aina Berenabeen que tacaajeein jetao, acaauru aina, nii cuu nenacaauru tabaauru naaonjoainunri letoaaure jetao- nii cuu nenacaauru- Jesocurisito ranoinunru- bichauhenaauru, nii que iriha cuuruha nii Jerosaleen nenacaauru- Jesocurisito ranoinunru bichauhenaauru, afosotooru, naaonjoainunri ainane coina.

<sup>3</sup> Nitohanein jetaote, letoanajaauruhane jaun, nii Antioquihau- nese cajee, Jerosaleen cuure- Faboro aina Berenabeen, cuu nenacaauru- tabaauru

aina. Nitohaneein cuhin jetaote, Fenisia batane, Samaria batane, naonjoainuri choaae situuruneein jetao, nii cuu nenacaauru- Jesocurisito ranojoinunru rai beeure:

“Naaajoaainte, Jorioniheichuru netonai coroatajane Cana Coanera, jauriaa acaauruhacha sacui jianeein, nere tonoraauruhane coinara,” naain beeuruhana jaun jetaote, coroaecure jetao- nii cana nejeraauru- Jesocurisito ranojoinunru, acaauru rai nii beeuruhana jaun coitucuhin.

<sup>4</sup> Inae nii Jerosaleeun turuuruha- Faboro aina Berenabeen jana jetaote, raotojoein acaauru raure satiin- nii Jesocurisito ranojoinunru, saain nii acaauru bichauhenaauru, saain nii afosotooru, naonjoainunri. Nii jana jetaote, satiin itolere ichaain, acaauru coroatajaniha Cana Coaunerane beebejeure, acaauru rai. <sup>5</sup> Nii jaun jetaote, nimichuhin, nichaaurain jetao:

“Nii Jorioniheichuru Jesocurisito esenetaeraauru raite caohachae aito-coachene, aitohalu Moisesane rijijieein rai jabereco cari saerateeuruhane coinara. Nii choaae tacaainte caohachae, satiin Moisesa aitoonjoalu rijijieein ichaohin, esenetaain tonoraauruha nii Jorioniheichurunera,” naaure, tabaauru fariseeocuru- Jesocurisito ranojoinunru.

<sup>6</sup> Nii niritocuruhana jaun jetaote, satiin netaojiaaure- afosotooru, nii cuu nenacaauru ichauhenaauru, naonjoainuri, nii que ita rai ereein, coitucuruha jiniiquine coina. <sup>7</sup> Cuu nii que ereerecuruhane jana jetaote, Fedoro netonoai nimichuhin:

“Curisito coreniha- chasocuru, inarate raotojoein, inae carajaa cato-haneein canu cotijiaain canu raa Cana Coaunerane coitucuhiche, jianacoo nosa caje mitunaa nainecuruha Jorioniheichuru netonaine coina, Jorioniheichuru rai nere beebejihanune, esenetana nainecuruhane coinara. <sup>8</sup> Leeinjiin- Cana Coaneraachate, satiin- cacha suujua coitucujuera. Nii Cana Coaunerate, cana que coarateein, Jorioniheichuru rai, rai Suujue tera. Nii jaunte raotojoein acaauru raane coitucuhacache, cana rai, rai Suujue tihalune rijijieein, acaauru rai netonai, rai Suujue tihane jaunra. <sup>9</sup> Coatia nejelauneein, Jorioniheichuru coaraain nihei- Cana Coauneraata. Satiin cana coaraane rijijieeinte, joaereein cacha coaraain ne Cana Coanera. Nii jaunte, esenetaauruha acaauru netonaine jaun, acaauru suujue coulucoe Cana Coanera, cana rai ichaane rijijieein. Satiinte, itaneein ne cacha. <sup>10</sup> Aihana jaun, chanute inara raajenhane, Cana Coanera leratena jerequiche, caa nere esenetaeraauru rai caaintati ichaonaa- anajiin tenaa jereeinta. Nihei, canacaanu nihanatiin, nitohanai- ichaonaa abaantana nainera lanaalata. Niheichu cana inoaesihuru nihanatiin, nitohanai ichaonaa sacunaa nainesihuruhalune coalanaalata. <sup>11</sup> Nete, rai Calaohi Jesoso coreniha atiin nechu nirijieein core colane, cana suujue ichoterateein, couluuoca Cana Coaunerane coitucuhacachera, jerichanejeein acaauru suujue couluucane rijijieeincha,” naa acaauru rai Fedorone jana jetaote, ereeuruhane jianeein jetao, <sup>12</sup> curuatoroaain, satiin- curuaequiin aonajeeure. Nitohaneein:

“Naaonjoaainte, canacaanu aina cuaain cojoelanaacojoa ichaain, canacaanu coroatajane Cana Coanera, Jorioniheichuru aina nihacaanune janara,” naain acaauru rai jetao beebejeure, Faboro aina Berenabeen. <sup>13</sup> Inae ereeuruhane ninaauruhane jana jetaote, acaauru rerohariha jetao ere Saantiaao:

“Aonacuche satiin Jesocurisito coreniha canejeraneein nenacaauruna, caa que erete aonaquichera. <sup>14</sup> ‘Naaonjoaainte, jauriaa Jorioniheichuru raenihane baiha, inae enene janijiin niicha ranojoinunru- Jorioniheichuru coroatajane Cana Coanera, acaauru netonoai nichao que ichaooruha jerihane rijijieeine coinara.’ naainte canacaanu rai be Simoon- Fedoro.



15 Niritiin inoaelu beein, nere bera inoaesihuru que laaenaeratihalu- Cana Coaunerane tocohaneein:

16 ‘Rabiri inamacooru caje

neferatenaaneein nenacaauruna,  
coroatajaniha cuureeunni.

Leeinjiin canuhacha jerenohicha  
ichana jerenacaauruna,  
coroatajaniha cureeunnicha,

17 itolere chaauruatane sacutaain  
canu ere beebejeeuruhane,

cacoitucuhin carohan nichuuntanaa nainecuruha  
Jorioniheichuru netonaine coinara.

18 Caritiinte,

inoaelu caje coauneein berateein  
Nere laenaeratelu Cana Coaunera,  
coitucuhacachene coinara.’

naain Quiricha cuhane laenacuruhalu Cana Coaunera ere bera- *profetacurune* rijijieeinte, nii nainaauruhane coina aihurera.

19 Aihana jaun, coa Jorioniheichuru rai, caaintati ichaonaa tenaa coau-cache, inae jauriaa acaauruhacha esenetai jianeein, Cana Coaunera ere tonoraauruha natiinta. 20 Raujiaainchate naine, quiricha cuhane laenaain: ‘Jiaonriha, cache ichanohineein nenea chosi rai niicha teeuri lenone quichenera. Jiaonriha, sinijieraaquichene nihanatiin, nejelau ene aina naosatee-ichenera. Niheichu, sinijieraquelanaala neeichene nihanatiin, jiaonriha jelai teein raelanaala, ene aina ichaohichenera. Jiaoarihachu, enecuru nihanatiin, sinijieraaocane nihanatiin, nejelau quicha aina ichaohanera. Niheichu, jiaonriha lanaquelanaala nihane nihanatiin, jelai teein raelanaala quicha aina ichaohanera. Niheichu, jiaonriha raro ruluhin sonojoin lenone quiin naaonjoaichenera. Niheichu chaen, ichana niha natiin, jiaonriha quiichenera. 21 Nii coataate neeure, inoaelu caje coauneein, neseeuu nainetiin, nebetacanaa janonaa bana nainetiin, nii netaojiaauruna jaansinacoca asaae netaojiauuruhane, nii Moisesa aitoojoan ereretaain que cana relaeranuurura.’ naain laenaain letoaacachenete caohachare,” naain jetao acaauru rai ereereje Saantiaao.

#### *Jorioniheichuru rai Jerosaleen caje letoanojoineein nenea- quiricha*

22 Nii jaun jetaote, saain Jesocurisito ranojoinunru, acaauru bichauhenaauru, afosotooru, naaonjoaain jetao Jesocurisito ranojoinunru nejesinanejeein netiin, coacuhin jetao, acaauru tabaauru janiichure, Antioquihau, Faboro, Berenabeen, naaonjoainunru aina, letoanajaauruhane coina. Nitohaneein tabaauru janijiin jetaote, Jodasi- Barasabanein acaauruhacha curuaatei, chaen Silasi, naaonjoainunru letoaaure. Acaauru jetaote, nii Jesocurisito ranojoinunru- cana nejeraauru rai, jataain nelatineein neeure. 23 Nitohaneein letoanajaain jetaote, acaauru aina quiricha laenaain jetao letoaaure, naain Antioquihau nenacaauru- Jesocurisito ranojoinunru rai, nii Jerosaleen nenacaauru- afosotooru, acaauru bichauhenaauru, naaonjoainuri.

Nii quiricha- acaauruhacha laenai cuhane jetaote:

“Saainna- afosotonichaanu nena, inara coaucaanura. Saain, Jesocurisito ranojoineein nenacaauru- cana nejeraauru bichauhenaauru ainane, inara coacuhin, caa laenaain letoacaanura. Saain Jesocurisito coreniha- canacaanu nejeraneein, Antioquihau, Siria, Silisiau

naaonjoainun- Jorionelanaala- neniquichene raina, caa laenaain letoacaanu, <sup>24</sup> canacaanu letononelanaala, caa Jerosaleen caje cuhin, inara suujua rerohecaa cuuruha, inara jabereco cari molohiche, aitoa Moisesane rijijieeine que aitiin, leeinjiin chacoitucuhi rijijieein, inara tenaa jerecuruhane coitucuhacaanune jaunra. <sup>25</sup> Nii jaunna, satiin coacuhin, coroatajaain canacaanu caje nenacaauru- cachaauru letoacaanu, jataaen canaacha belaihuri- Jesocurisito coreniha- cana nejeraneein nenacaauru- Faboro, Berenabeen naaonjoainunru aina, canacaanu aina nenacaauru coroatajai cachaauru letoacaanu, inara coaraa uuruhane coinara. <sup>26</sup> Nii Berenabeen aina Faboro ichaote, jataaen lunajeriin ne, Cana Curuaanaa Jesocurisito ere tonoraain, nere beebejeeuruhane corenihara. <sup>27</sup> Nitohaneeina, nii Jodasi, Silasi naaonjoaain letoacaanu acaauru ainara. Acaaurute, inara rai ereein, jitariin inara rai niriinanai biha cuurureein, nujuaaen cajera. <sup>28-29</sup> Cana Coaunera- Suujue- suujuatenojoeineinte, canacaanu rai caohachae, inara rai ichaonaa caaintati tenaa nainenihacaanura. Raujiaainchane inara rai aitiin laenacaanu: ‘Jiaonriha, cacha ichanohineein nena- chosi rai niicha teeuri- lenone quiichenera. Jiaonriha, raro ruluhin sonojoin lenone quiin naaonjoaachenera. Niheichu chaen, ichana nihanatiin, jiaonriha quiichenera. Jiaonriha, sinijieraaquichene nihanatiin, nejelau ene aina naosateichenera. Niheichu, sinijieraquelanaala neeichene nihanatiin, jiaonriha jelai teein- raelanaala ene aina ichaohichenera. Jiaonrihachu, enecuru nihanatiin, sinijieraacane nihanatiin, nejelau quicha aina ichaohanera. Niheichu, jiaonriha lanaguelanaala nihane nihanatiin, quicha raelanaala jelai teein aina ichaohanera,’ Nihei nenacaan nii baihata. Caa aitocooanune rijijieein, tonoraain ichaohichenete, caohachaaain ichaain, caohachaaain ichaonaa naineriquicheeincha. Raotojoein neeuchera,”

naain jetaote, nii Antioquihau- acaauruhacha letoaaene- quiricha lae-naaure, letoauruhane coina.

<sup>30</sup> Nitohaneein jetaote, inae ninaauruhane jaun jetao, ita rai necoeein, Antioquihau cuure nii Faboro, Berenabeen, Jodasi, Silasi naaonjoainuri. Nii Antioquihau turuhin jetaote, nii cuu nenacaauru- Jesocurisito ranojoinunru jitariin taojiaain jetao, nii acaauru rai- afosotooruhacha letoai- quiricha teeure jetao, acaauru rai. <sup>31</sup> Nii jaun jetaote, joracaain ereretaain coaraain jetao, coroaecure jetao, nii cana nejeraauru- Jesocurisito ranojoinunru, caohatiin acaauru suujuaatein, acaauru suujua laraajiaain, ichacuruhana jaun. <sup>32</sup> Nii Jodasi aina Silasi netonai jetaote, Cana Coaunera caje ere-naa raauruhane, cacha rai beebejeraneein neeure. Nii jaun jetaote, niha acaauru rai rauhina jaun jetao, nii Jesocurisito ranojoinunru rai ereein jetao, acaauru suujua laraajiaain jetao, acaauru suujua nunaure, acaauru rai ereein acaauru suujuatein. <sup>33</sup> Nitohaneein jetaote, cuu carajaa-joaain neeuruhane baiha jetao, inae acaauru rai necoeeure nii Antioquihau nenacaauru- Jesocurisito ranojoinunru. “Raotojoein caunichuchera.” naain jetao, acaauru rai necoeeure, <sup>34</sup> jelaiha Jerosaleeun cauhacuuruha, nii letoanajaurera rene, Jodasi aina Silasichurune coina. <sup>35</sup> Nii jana, Berenabeen aina Faboro jetaote, cuu nii Antioquihau nedaaure. Nii cuu arajiin nenacaauru aina jiniinquuin, cuu jetaote, cojoanoonetojoein Cana Curuaanaa ere beebejeein, cachaauru relaure.

*Misionero neein amuhane coroata satiha Faborone*

<sup>36</sup> Nii baiha carajaaajoaain neein jetaote:

“Coanete, turunichaaca, satiin nii jauriaa Cana Curuaanaa beratenojoi beebejihacaluna jaaunru- neseeuu sacutaaincha. Chatohaneeincha neeure, nii cuuru nenacaauru- cana nejeraauru- Jesocurisito ranojoihunruta,” naa Faboro, Berenabeen raina jaun jetaote niqui, <sup>37</sup> acaauru aina Joaan naain curuajai- Maroco amanaa jeriha aina- Berenabeenne jana jetaote, <sup>38</sup> rautaaajoaenihana jaun, jerecojoaene jetao Faboro, jauriaaneein cuuru bana, Paanfiliau ratirinajaain, cauha cuhalune jaun jetao, acaauru jiniichaaain- acaauru amihaneeon ichajeein sacuenihalune jaun. <sup>39</sup> Nitohaneein jataaen amaane jerelanaala, jataaen coiintiha Faborona jaun jetaote, jelai tein jetao, nii Maroco cotijiae jetao Berenabeen, corianeraaunu que. Nitohaneein cotijiaain jetaote, aina Chifereu cuure jetao, ucuae cunaa bote cuhane fauhin.

<sup>40</sup> Nii jana, Faboro jetaote, jelai tein, corianeraaunu que Silasi cotijiae. Nii jana jetaote, acaauru coroatajaniha Cana Coaunerane coina jetao, acaauru rai Cana Coanera bajaain letoanajaunre nii Antioquihau nenacaauru- Jesocurisito ranojoinunru. Nitohaneein jetaote, jelai caje nerocohin cuure jetao, <sup>41</sup> Siriau, Silisiau naaonjoainun. Cuuru turuuruna jaaun jetaote, nii cuuru nenacaauru- Cana Curuaanaa Jesocurisito ranojoinuru rai ereein jetao, acaauru suujuateeuure, caohachaain rauhijiriin, jianelanaala Cana Coanera ere tonoraain, niicha jerenohicha ichacuruhane coina.

## 16

### *Faboro aina Silasi corihaniha cuha Timoteeone*

<sup>1</sup> Nitohaneein cuhin jetaote, Derebeeu, chaen Listrau, naaonjoaihun, turuha cue Faboro. Nii jana jetaote, cuu leeinjiin cacha- Jesocurisito esenetaera- Timoteeoneein curuajai- Jorio bene que nebaain- Curieco que inacanaa ruha cue Faboro. Nii neba jetaote, Jesocurisito esenetaera ne. <sup>2</sup> Satiin- Listrau, Iconioo, naaonjoaihun nenacaauru- Jesocurisito coreniha cana nejeraauru jetaote, “Aca jete, jataain, caohacha cachaneein ne,” naaure jetao que, coitucuurerauru. <sup>3</sup> Niritiin, rai beeuruhane jaun jetaote, acaauru corihaniha cuha Timoteeone jere Faboro. Nitohaneein acaauru corihaneraanu que amaauruhane coina jetaote, Timoteeo jabereco cari jihununurateein, saerate Faboro. Nabana rautaelanaala, que nererojoecaauruha cuu nenacaauru- Jorioocurune coataa jetaote, nitohaneein terate Faboro, inae, satiin cuu nenacaauru- Jorioocuru, Curieconein niha Timoteeo inacane coitucuuruhane jaun. <sup>4</sup> Nitohaneein, acaauru aina Timoteeo amaain cuhin jetaote, situuruna jaun nenacaauru neseeuu naineein, Jorioniheichuru- Jesocurisito esenetaeraauru rai jetao, aitiin berateeuruha afosotooru aina- Jerosaleeun nenacaauru- Jesocurisito ranojoihunru- coaraaurune rijitoojoein beebejeein jetao cujueeure. <sup>5</sup> Nitohanihana jaun jetaote, jelai choae jauhecotojoeriin, esenetajeein cuujueein nejeeonteejeein, sacuure Jesocurisito ranojoihunru.

### *Leeinjiin Masedonia cocoaicha que, Faboro notaaca Cana Coaunerane*

<sup>6</sup> Asia batane que nenacaauru rene cuhin beebejeeruhane jereniha Cana Coanera Suujuene jaun jetaote, rauhijiriin cuure, Forijia batane, Galasia batane, naaonjoaihunri jelon situhin. <sup>7</sup> Nitohaneein jetaote, rauhijiriin cuhin, Misia batane- nunuhe que turuha cuure. Jelai caje coauneein jetaote, Bitiniau bataneun que turuha cunaa coaacure niqui. Ne jetaote, cuuruhane caohate jetao, Jesoso Suujue. <sup>8</sup> Nii jaun jetaote, nirijieein, rauhijiriin Misiau turue lanaala, rauhijiriin situhin, Toroasi cofauhanaun, turuure. <sup>9</sup> Ecu netiin

jetaote, janotiin sinihu coetacai rijitjoein leeinjiin cacha- Masedonia co-coaicha que notaaca Cana Coaunerane jaun jetao, nii Masedonia cocoaicha aina, itaque taca cue Faboro. Que tacaain jetaote, nacatiha nichaaurain: “Atiin, Masedoniau, turuha uute, cuu canacaanu relaaicha,” nae jetao, Faboro sinihu. <sup>10</sup> Nitohanein notaaca Cana Coaunerane biha Faborone jaunne, nii rijijeein neruujeein, Masedoniau cuhacaanu. “Jerihane, cuu Jesocurisito que erejeein beebejena coinata, cuu cana cotiharate, Cana Coaunerara,” naaina, cuhacaanu.

### *Filipoo turuuruha Faboro aina Silasine*

<sup>11</sup> Nitohaneina, Toroasi cofauhanaun caje, nesaruna- leeinjiin bote cuhane fauhin, cucuana cuhane cuujeein, rauhijiriin Samotoroasi cobenaun, tacanacanejeein cuhacaanu. Nii cojoanoo cuhine, turuha cuhacaanu Neapolisihu. <sup>12</sup> Jelai, cajena, atane choaen cuhin, Filipoo turuha cuhacaanu. Nii Filipino te, Masedonia batane que nena- nese tabaaineein- Romanocuru nejesina que cocoaichaquiin nenaane. Cuuna inata janojoein, neoriha- caanu. <sup>13</sup> Nitohaneinna, cuu, nebetacanaa janonaa bana, naain nese edaa cuhacaanu, nucuhe auhaniha cuhin. Cuu niha netaojiaain- Cana Coaunera bajaauruha- Jorioocuruna jaan coitucuhacaanuna jaun. Cuuna turuhin, nelauriaain, cuu netaojianacaauru- enecuru rai, Jesocurisito que ereere- jeein beebejihacaanu. <sup>14</sup> Nii cuu netaojianacaauru jana nena- leeinjiin- ene curuaate, Lidia ne. Acate Tiatira nese caje unaaneein, cajione caohachalanaajihojoaain que- necoretiha nena ne. Nii enete, aihuruha Jorioocurune rijijeein, Cana Coaunera coroaera nihana jaun, coroatajane Cana Coaunera, rautaain, Faborohacha beebejei aonaane coina. <sup>15</sup> Nii jaunte, saain loreri asae nenacaauru naraaichuru aina jiniiquin, baotisanajoinein neuruhane baiha:

“Esinaaen rauhijiriin Cana Curuaanaa esenetaeranein nihanune esenetaaichene, caloheri asaae, siniha uuchera,” naain canacaanu chunaa Lidiana jaun, cuu nihacaanulu.

<sup>16</sup> Inae, ita taojiaain- Cana Coaunera bajaauruhane jaan cuhacaanune janate, leeinjiin ranuna- coseenranein nena aina ita eruhacaanu. Nii ranunate, saruha Moconajaerane que, enaacha, chaaelai nihane, cojoeluhinae. Nitohanein, enaacha chaaelai nihane, cojoeluhinaane jaunte, que nihane, chaaelai cojoeluhinaeratein, coreniha arajiin coriqui nihane, raer- ajeeure, nii sirichaauru. <sup>17</sup> Nii ranunate Faboro aina, cuujihacaanune jana, canacaanu caaijie uhin, ehequiin:

“Caa cachaaurute, acaihanejei Cana Coauneranein nena- aitoonjoa bee- bejeeureranera. Acaaurute, raotojoein caseteco caje nichoteein jianacoo nena nainiha cachanejaan beeuranera,” nae, ehequiin- nii ranuna.

<sup>18</sup> Nii jaun jetaote, cojoanoonetojoein, niriti nejesina nihane jaun, inauhene aonajenajaocane baiha, inae tabiicha, coetae Faboro, araai janohin, niritonajaaocane jaun, coetaain jetaote, nii chaaelai cojoeluhinaa- enaacha- nii ranunane jaan rai:

“Cana Coaunera Calaohi- Jesocurisito coreniha, nii ranuna caje mituhin amuura,” naa Faborone rijijeein jetaote, caje mituhin amue, nii ranuna saruhera.

<sup>19</sup> Nii jaun jetaote, inae neniha saruherane jaun, chaaelai cojoeluhinasini- hane coaracuruha nii ranuna sirichaaurune jaun inae coreniha coriqui

erunaa nainecurenihane jaun jetaote, Faboro aina curuataain Silasi mu-  
cuure nii ranuna sirichaauru. Nitohaneein, mucunajaain jetaote, amana-  
jaaunre, cocoinanacaihuri acatiha, naain nese cataaun nenea- ita coluru-  
jueeuruhana jaun amanajaaunre. <sup>20</sup> Nitohaneein, amanajaain turuhana-  
jaain jetaote, joesiocuru rai, nechujataain, acaauru cotaiha nohaneein jetao:

“Caa Jorioocurute, satiin canacaanu nese sacutaain, satiin- cachaauru  
rerohecaaurera. <sup>21</sup> Chaentechu, cana Romanonihacachene ichao corenaa  
jereein, nejelau ichaonaa que ichaohacachene coina, que cana relaaurera.  
Aihana jaun nainihe, nii que ereein, que cacha relaauruhane jerichaach-  
enera. Nitohanei ichaonaa que ichaonaa nainihacache, cana Romanoniha-  
cachene jaunta,” naaure jetao.

<sup>22</sup> Nii jaun jetaote, satiin acaauru aina obajeein jetao, mucunajaauruhane  
jana, acaauru cajione rocoerateein jetao, enuha que bisichatenajaaure  
joesiocuru. <sup>23</sup> Nitohaneein, mainajeriin bisichatenajaauruhane baiha je-  
taote, caresero cuhane enohanajaaure, caohatiin berainajaan caresero be-  
raichane coina, aitiin. <sup>24</sup> Niritiin suujuateein letoaauruha joesiocuruna jaun  
jetaote, caresero fuuniha, tenajae, sefo que acaauru tijia mucueratein, nii  
caresero beraicha.

<sup>25</sup> Nii jana jetaote, cuu dede cataaun, Cana Coaunera bajaebajajeein,  
nenatecuruha- Faboro aina Silasine jana jetaote, cuu aonajeeunre, nii cuu  
nenacaauru leeochoauru- casetecocuru. <sup>26</sup> Nii jana jetaote, luhecotariin uhe  
cana lialiaera, mijieeinetiin. Nii jaun jetaote, mijieeineein nerurujuaa nii  
caresero cuhanaine jana jetao, neyoracaacoaa caresero bacuujuaarune jana,  
satiin- nii cuu nenacaauru- casetecocuru caje nerojoirojoiri nii acaauru biji  
ichoracuru- *cadenacuru*. <sup>27</sup> Nii jana jetaote, jitoroaa nii caresero beraicha no-  
tane jana, nii caresero coaraane jana, satiin jetao, neyoracaacoae nii caresero  
bacuujuaauru. Nii jaun jetaote, “Inae jecha sorooruha, nii casetecocuru,”  
naain jetao, rai esefara rocohite, raajenihane nesohin nijiaohanne coina.  
<sup>28</sup> Nii jana jetaote, rai ehequiin:

“Cooa ichaajenihane, chatoaneein necunaitaara. Satiina cau nihacaa-  
nura,” nae jetao, rai Faboro.

<sup>29</sup> Nii jaun jetaote, cono bajaain, soroneein cuhin, enohin jetao, Faboro  
aina- Silasi acatiha, rijijijianein coasina caaun jetao, acaauru acatiha ne-  
seonrae nii caresero beraicha. <sup>30</sup> Nii baiha jetaote, caresero caje mitanajaain  
jetao:

“Cachaauru, cha ichareeun, nitajihanune coataa, nichotihanune coinata,”  
naain bajaane jana jetaote:

<sup>31</sup> “Cana Curuaanaa- Jesocurisito esenetaaute, nichoteei, ii sinijiera, ii  
calaoichuru, satiin ii loreri asaae nenacaauru, naaonjoaihunri ainara,”  
naain jetao, tonoraure, Faboro aina Silasi. <sup>32</sup> Niritiin tonoraain jetaote,  
rai Cana Curuaanaa Jesocurisito beratenojoi beebejeeure, satiin- nii loreri  
asae nenacaauru raine maajeein. <sup>33</sup> Nitohaneein, dede catairijihu nihanatiin  
jetaote, temuha acaauru que- acaauru bisihuruhane jaanne jaun jetao,  
acaauru rai culeje nii caresero beraicha. Nii baiha jetaote, inae rai sinijiera  
aina, saain rai loreri asaae nenacaauru aina jiniiquiin, baotisanajoinein  
neure. <sup>34</sup> Nitohaneein jetaote, rai loreri asaae jetao, Faboro aina curuataain  
Silasi amaain jetao, coroaatenajae nii caresero beraicha. Nitoaneein jetaote,  
rai loreri asaae nenacaacuru aina jiniiquiin satiin- sinijiera aina jetao coroa-  
jeein, raotojoein neure, inae Cana Coaunera esenetaauruhane jaun.

<sup>35</sup> Inae jano jana jetaote, folisihacuru letoaaure jetao, joesiocuru, Faboro  
aina Silasi joracaeratiha cuuruha, caresero beraicha quene coina. <sup>36</sup> Nii jaun  
jetao te:

“Caraita, nere letoaaure joesiocuru, inara joracaain, inara jianichaaune coinara. Aihana jaun, inae nainiquiche, raotojoein mituhin, amuhichen-era,” naa nii caresero beraicha, Faboro raina jaun jetaote, <sup>37</sup> nii folisihacuru rai jetao:

“Canacaanu Romanonihacaanu natiinte, caohachaaain rautaain, canacaanu rai bajaaurihei amuneein, satiin coarajiha cachane notaracae canacaanu bisiin, canacaanu enoerateeure caresero cuhanera. Nii natiinte, nechuhataaen asinojoneein, inae canacaanu mitaeratenaa jerecurera. Aihana jaun coatia miturihaacaanuhi, raajenhane uhin, canacaanu mitaa uuruhinera,” nae jetao, Faboro, nii folisihacuru rai.

<sup>38</sup> Nii jaun jetaote, turuhin beeuruha nii folisihacuru, joesiocuru raine jaun jetao, nesoonetoore jetao, Romano neeuruhane beeuruha acauru raine beeuruha, nii acauru letonocuru- folisihacuruna jaun. <sup>39</sup> Nii jaun jetaote, raaje cuhin jetao, turuhin, Faboro aina Silasi joracaerateein jetao:

“Atiin, inara rai, baasoneein ichacaanuneque, canacaanu que inara suujua acateein, atiin, caaelai caje amuchera,” naaure jetao, nii joesiocuru, acauru mitaain. <sup>40</sup> Nitohaneein, caresero caje inae mitanajaauruhane jaun jetaote, mituhin jetao, Lidia rene, turuha cuure jetao, Faboro aina Silasi, cuu nenacaauru- Jesocurisito coreniha- cana nejeraauru coaraain, acauru suujuateein, acauru suujua lararajiaauruhane baiha jetaote, jelai caje amuure.

## 17

*Tesalonecau turuuruha Faboro aina Silasine jana, acauru que nererjoe-caain, acauru aina baaecuruhane*

<sup>1</sup> Tesalonecau turuuruhanane coina jetaote, Anfipolisi, chaen Apolonia, naaonjoaain neseuru choae situhin, cuhin jetao, turuha cuure Tesalonecau Faboro aina Silasi. Cuu jetaote, ita taojiaauruhana jaan coloheri- sinacoca sirichure cuu nenacaauru Jorioocuru. <sup>2</sup> Nii asaae jetaote, turuha cue Faboro, nitohaniha rai nichaona jaun. Nitohaneein jetaote, nebetacanaa janonaa bana naineein jetao, nii sinacoca asaae cunajaque Faboro. Cuu jetaote, Jorioocuru aina nihane, ita cotaicha rijitonajaaocure jetao, cuu acauru rai, Cana Coanera Quiricha Inoaesi ereretaain, nichata semanaai reentiaain. <sup>3</sup> Cuu nihane jetaote:

“Inae nitohanihanane coina, letononeei nihana jaunte, ohin caje ichanaelu Mesihasi, Cana Coanera Quiricha cuhane aitohane nainaane coinara,” naain jetao, rauhijiriin beebeje Faboro. Niritiin been jetaote: “Caa inara rai-quiicha beebejeite, jeelai Jesosoneein, canaacha cohajei- Mesihazine,” naain jetao, beebeje Faboro.

<sup>4</sup> Nii jaun jetaote, tabaauru Jorioocuru, arajii Curiecocuru- Jorioocuru aina ita taojiaain- Cana Coanera bajaaurera naaonjoainuri jetaote, esenetaa-coaure, arajii enecuru- caohachanejeein nenacaaurune maajeein jetao, esenetaain jetao, Faboro, Silasi, naaonjoainuri aina neeure. <sup>5</sup> Nii jaun jetaote, acauru que necoelai caaun jetao, acauru aina obajeein, chachaelanaala, nelanaae caaun bero cuhane amuhemuhenaacaauru- neechu aansaineein ichaonacaauru ariin jetao taojiaaure, nii esenetaichuru Jorioocuru nii nese sacutaain acauru aina cachaauru rerohecaain, cachaauru suujua auhacaeraanu que. Nitohaneein jetaote, arajiin cacha taojiaain jetao, Jasaan loreri asaae jetao, codoonetoha cuure jetao, Faboro, Silasi, naaonjoaain ariha, runajaauruhane, acauru mucuhin, tararanajaain, cachaauru rai tenajaauruhane coina jetao, niqui. <sup>6</sup> Ne jetaote, cuu Faboro aina Silasi

ruurenihana jaun jetao, Jasoona aina curuataain- cuu nenacaauru- Jesocurisito coreniha cana nejeraacuru- tabaauru amaaure, tararanajaain, cocoinanacaihuru rene. Nitohanein, amanajaain jetaote, cocoinanacaihuru acatiha turuanajaain jetao, ehehequiin:

“Satiin cana rai chauratane sacutaain, cachaauru rerohecaain, cachaauru suujua auhacaaurerate, inae cau netonai turuurera. <sup>7</sup> Nii inatiinte, tururuhane jana raotojoein ranajae, caa Jasoona. Acaaurute, Romanocuru curuaanaacuru curuaanaa eenferadoro- aitoonjoa ichoae iniin: ‘Nihaje leecha curuaanaacuru- curuaanaa- Jesosonein curuajaicha.’ naaure,” naain jetao, coulurujuenajaure Jorioocuru letonocuru- nechua aansainein ichaonacaauru.

<sup>8</sup> Nii jaun jetaote, niritocuruhane jaun jetao, aonacuruhane que nererojoe- caaure saain- nii cuu nenacaauru cachaauru, nii cocoinanacaihuru, naaonjoaihunri. <sup>9</sup> Nejetaote, nii cocoinanacaihuru rai coriqui tee jetao, Jasoona, nii aina nenacaauru aina, inae nii nese caje mituhin amuuruha Faboroorune jana, acaauru rai cainacuruhane coina. Nii aina jetaote, jianenaacure.

#### *Bereau turuuruha Faboro aina Silasine*

<sup>10</sup> Inae nocohecane jana jetaote, luhecotariin, naain Berea nichae, Faboro aina Silasi letoaaure jetao, Jesocurisito coreniha- cana nejeraauru, ucuaae cuuruha soronacanejeeine coina. Cuu turuhin jetaote, cuu nena- sinacoca asaae turuha cue jetao, Faboro aina Silasi. <sup>11</sup> Nii cuu nenacaauru- Jorioocuru jetaote, naain Tesalonecau nenacaauru- Jorioocuru amuritoheriin jetao, caohachaain suujua coaraain neeure. Nii jaun jetaote, nii Faborohacha beebejei- Jesocurisito beratenojoi aonajeeure, corojeein. Nii jaun jetaote, cojoanonetoein, Cana Coanera Quiricha Inoasi ereretaaure jetao, jiniiquiin, esinaae rauhijiriin aitocuruha Faboro aina Silasine rijiichane coaracuruhane coina. <sup>12</sup> Nii jaun jetaote, esenetaaure arajiin cachaauru- Jorioocuru, arajiin Curiecocuru aina acaauru benecuru- caohacha nejeein nenacaauru, naaonjoainuri. <sup>13</sup> Nejetaote, nitohanein, Bereau neein, Cana Coanera aitoonjoa beebejiha Faborone coitucuriin jetao cuuhin, cachaauru suujua rerohecaa cuure jetao coaiteen, nii Tesalonecau nenacaauru- Jorioocuru, acaauru que nejerateeuruha nii Bereau nenacaaurune coina. <sup>14</sup> Nii jaun jetaote, chajaain caeneenejelanaala, nii Bereau, Timoteeo aina Silasi, naaonjoaain ratiriin, luhecotariin jelai caje mituhane coina jetao, Faboro letoaaure jetao, cana temura nichae- cuu nenacaauru- Jesocurisito coreniha cana nejeraauru. <sup>15</sup> Nii jaun jetaote, Faboro corianiha cuure jetao, nii aina amuhemuhenaacuru, Atena neseu tiaain. Nii baiha jetaote, cuu Faboro ratiriin cauha cuure, chajaojoaain coaraa cuuruha Silasi aina- Timoteeocurune coina aitiin, acaauru letoaa Faborona jaun.

#### *Atenau niha Faborone*

<sup>16</sup> Nii Atenau neseu neein, Silasi, Timoteeo, naaonjoaain cohaca nihana jaun jetaote, cuu itolere- araai laurii- cuu nenacaauru ichanohi- ecaanto coaraain jetao, jataain nererojoeae jetao, Faboro. <sup>17</sup> Nii jana jetaote, sinacoca asaae, Jorioocuru aina ita cotaicha rijite jetao, leechaauru- ita taojiaain- Cana Coanera coroaeraauru ainane maajeein. Nitohanein jetaote, cojoanonetoein jerichanetoein, jelai que aitiin, ita cotaicha rijitonajaque, nese cataaun netaojianacaauru aina. <sup>18</sup> Chaen, cuu coroata lauriin nenacaauru- itolere coitucueracuru *filosofooru*, le laurii “epicoreocuru,” le laurii “estooicocuru,” naaonjoaihunri aina jetaote, Faboro aina, ita cotaain jetao:

“Cha quena ereereje caa nereretanaa inatoroa,” naauruha tabaaurune jana jetao:

“Nejelau ataneu nenacaauru rai chosichuru- bera necaihara,” naaure jetao leeochoaauru, raotojoein, oo caje ichanaa Jesusone beebejiha Faborona jaun. <sup>19</sup> Nitohanein jetaote, niha jataain chatohanein, mijieinein rucuhencaine, ita taojiaain rucuhecuruhana jaun jetao, ichatane ucuuno-ajerineejoaain- Areopago neein, acaauruhacha curuaateihu jetao, Faboro cotijiaain amaaain, cuu turuaain jetao:

“Nii canacaanu rai- iicha beebejei- ena ecoona- erenaa benaa naineeina, canacaanu rai, <sup>20</sup> Jataain canacaanuhacha coitucuhi que ereeina jaunna, ‘Naaonjoaain quene aitoonra.’ naain, canacaanu rai beeine jerichaanu, jataain coitucunaa jerichaanune jaunra,” naaure jetao, <sup>21</sup> satiin Atena cocoaichaneeuruhane, chaen nejelau atane caje uhin- cuu nenacaauru naaonjoaihunri, niha chatohanaine, aonaain, que ita rai ereereena rautatoruhana jaun.

<sup>22</sup> Niritiin Faboro caje bajaauruha, nii niha chatohanaine rucuhecuruhane jaan- ichatane ucuuno- Areopago netiine jana jetaote, acaauru cataaun nichaauraaain jetao:

“Satiin inara Atena cocoaichaneeichenete, esinaae rauhijiriin, inara chosichuru corojeein ichaohin neeiche. <sup>23</sup> Nii jaunte, ita taojiaaichene jaancuru naineein, coaracaanne jana, cuuru ne- inara chosichuru rai lenone mocohichene jaancuru rorihuru. Nii rorihuru naineein coaracaanne janate, ‘Chabana coitucueraai Cana Chosi rai’ naain laenanohine- nii leeinjiin rori. Nii coitucuelanaala, inaraacha corojete, Acaihanejei Nena- Cana Coaunerane. Quena, caa inara rai ereere jeein beebejeeun.

<sup>24</sup> Acate, Cana Coauneranein, itolere, cana rai chaauruatane Coauneranein, itolere, que nenacaauru Curuaanaanein, itolere, satiin cana janonaa sirichanein ne. Coatia, raajenihane- cacha ichanohinein nena loreri-Teenforo asaaecha ichaohi. <sup>25</sup> Nieichu chaen, rai chaaelai icharaaunu latihei. Acate, itolere cana rai ichaonaa tein, neraain ichaonaana jaanu tein, itolere maajeein coaunaelu cana rai.

<sup>26</sup> Chaen jetaotechu, jauriaanejeein leinjiin cacha coaunaelu, caje arajiin nefoeratein, laurilauri catohanein- cana rai chauratane sacutaain- neenu que. Nitohanein, cacha coaunaain jetaote, nenajaauru nenajaauru neeuruha le laurichurune coina, acaauru ichaona jaannu jelai been jetao, cuu ichaooruhane jinatelu Cana Coaunera. <sup>27</sup> Chaen, esenetaain coitucunaa nainihane, coitucuha cachane coinete, nitohanein ichaelu Cana Coaunera. Coatia niqui, cana caje corihae nihei Cana Coaunera. <sup>28</sup> Cana Coaunera corenihate, ichaohin, nerurujuaain, naaonjoaain ichaohacache. Inara araichuru tabaauru- raotojoein erenaa que ereereena inaureraauru jetaote: ‘Cana Coaunera cajete, nefoeratenaanein nihacache,’ naain erejetocure. <sup>29</sup> Nitohanein, Cana Coaunera caje, nefoeratenaanein nihacachena jaun, nainihei nejelaunein, cana suujua cuaain, ‘Aiha coata, ajeri, naaonjoaain caje- cacha ichanohinein nena- chosichuru- ecaantoorune tocohaniha jecha, Cana Coaunera,’ naain cana suujua cuaain nihacachene. <sup>30</sup> Inoaelu jetaote laaen, coitucurenihaluna jaun, niicha rautaa ichaa cachane jana, inauheneeicha coarajerejetelu jetao, Cana Coaunera. Jana, enenete laaen, inae jinatihana jaan que tihana jaun, coitucuhin nere tonoraa, itolere sacutaain cachane coina berate. <sup>31</sup> Nitohanein beratihana jaunte, inae Cojoanona- que banihatein- niicha rucujuei que tihane bana, caa chaauruatane que, satiin- neinichaachene coareein Cana Coaunera, esinaae rauhijiriin rai cachanein neein- caohachaaain suujua coaraauru



coitucuha- nii leeinjiin cacha janijiin niicha ranojoi aina cuaaine coina. Niite raotojoein coitucuhacache, aca rai, nii ichaeraanu que, oo caje ichatein nihalone jaun,” nae jetao Faboro.

<sup>32</sup> Niritiin, oo caje ichanarichaaain cachane biha Faborone jaun jetaote, oo baiha ichanaain nenea nainiha cachane esenetaaurenihana jaun jetao, batocure tabaauru. Jana leeochoaauru jetaote:

“Leeocha banana, ii ere aoharihacaanuhincha,” naaure jetao Faboro rai. <sup>33</sup> Niritocuruha raine jaun jetaote, cuu ratirinajaain amuhe jetao, jelai caje Faboro. <sup>34</sup> Nii jana, tabaauru jetaote, esenetaauruhana jaun, caaijie cuure. Nii jana jetaote, cuu acaauru aina cue leeinjiin cacha- Dionisio. Nii jetaote, nii ita taojiaauruna jaan- Areopago- netaojianacaauru bichauheneen, niha chatohanaine rucuheneen nenaane. Chaen leeinjiin ene-Damarisineen curuajai, chaen leeochoaauru naaonjoainuri jetao, Faboro caaijie cuure.

## 18

### *Coriintoo turuha Faborone*

<sup>1</sup> Nii baiha jetaote, nii Atena caje amuhin, Coriintoo cue- Faboro. <sup>2</sup> Cuu jetaote, Poonto batane caje unaa- leeinjiin Jorio- Aquila neen curuajai aina, ita ruure. Aca jetaote, rai comasai- Firisila aina, enanejeein Italia caje turuhin neure Coriintoo. Nii bana, Romanocuru curuaanaacuru curuaanaa- eenferadoro neen nenea- Culaodio, nii Roma caje, satiin mituuruha Jorioocurune coina, mijieinetiin aitohane jaun jetao, jelai caje mituure. Nii jana jetaote, acaauru rene turuha cue jetao, Faboro. <sup>3</sup> Jerichanejeein, acaauru rijijieein, jacari caje lohanarinu que, acaauru ichanaa que amihaniha acaentonaina jaun- coaranaaca cue Faboro, cuu acaauru aina neen, jiniiquiin acaauru aina amihanihane coina. <sup>4</sup> Cuu jetaote, nebetacanaa cojoanonaa bana naineein, ita taojiaain- Cana Coanera bajaauruha Jorioocuruna jaan loreri- sinacoca asae turuha cuhin nejesina ne Faboro. Cuu Jesocurisito beratenojoi beebejeein, Jorioocuru relaain, Jorioniheichurune maajeein relaane, esenetana nainecuruhane coina.

<sup>5</sup> Inae Masedonia batane caje, rene turuuruha Silasi aina Timoteeocurune jana jetaote, jacari caje lohanarinu namihaneoo jianeein, Cana Curuaanaacha beratenojoi benaacha que ne Faboro, rauhijiriin, aitoha Cana Coanera Quiricha Inoaesi cuhanene rijitojoein: “Jesosote esinaae rauhijiriin canaacha cohajei Mesihasi ne,” naain coitucuruha Jorioocurune coina. <sup>6</sup> Ne jetaote, rautaaurenihana jaun, aina obajeein cotaain, Faboro necoeje chanuure Jorioocuru. Nii jaun jetaote, rautaaureniha Jorioocuruna jaun, jelai caje mituhane, cojounacanu que jetao, cuu cajione romaromaain jetao, “Inaraacha jerei ineente, caseteconein nitajeriquicheeincha. Inae canu enene caje coauneein, cha ujuaihonnein nihaaunra. Inarate, nii ujuaihonnein neeiche. Inae aihane amuhanu. Ena caje coauneeine Jorioniheichuru rene aihane cureeunnicha,” nae jetao Faboro, Jorioocuru rai.

<sup>7</sup> Nitohanein, nii ita taojiaauruhana jaan sinacoca caje mituhin jetaote, rohan nenea- leeijiin cacha- Tisio Josto loreri asae turuha cue Faboro. Nii cacha jetao, Jorionihei. Ne jetaote, esiaaen rauhijiriin laaen Cana Coanera ere esenetaain corojeein, tonoraera ne. <sup>8</sup> Nitohanein jetaote, sinacoca curuaanaa- Curisifo, saain rai bereecuru, rai comasai, saain rai loreri asae nenacaauru aina jiniiquiin, Cana Curuaanaa ere esenetaaure. Nitohanein jetaote, arajii- Coriinto cocoaichanecuruhane jetao, beebejiha Faborone aonaain esenetaauruhana jaun, baotisanoinnein neure.

<sup>9</sup> Le janotiin cuhane jetaote, coetacai rijitjoein jetao, Faboro siniha cue Cana Curuaanaa. Sinihu, rai ecocohin jetaote: “Coaa canu ere beebejeeine jianihara. Jiaohine casiin jianeeinera. <sup>10</sup> Canuna, ii aina nereeeunicha. Nerihaain, caohachanainejeein chatohaneein cheterata, cau, caa nese que neeuruha arajiin canu cachaaurune jaunne ichei aitoonra,” nae jetao, Cana Curuaanaa, Faboro sinihu. <sup>11</sup> Nii jaun jetaote, coroata jaanacai cataaun tiaain jetao, nii Coriintoo neein, jelai cocoaichacuru rai, Cana Coaunera ere beebeje jetao Faboro.

<sup>12</sup> Ne jetaote, Acaiha batane coberenadoro neein niha Calioonne jana jetao, Faboro aina nejerateein jetao, ita taojiaaure Jorioocuru. Nitohaneein, ita taojiaain jetaote, Faboro mucuhin amaure, ita colurujueeuruhana jaan coloheri- *tribonal* asae. <sup>13</sup> Nitohaneein, mucuhin amaain, coberenadoro acatiha turuaain jetaote:

“Caa cachate, cachaauru suujua tacaain, nejelauneei Cana Coaunera corojeein tonoraauruha cachaaurune jereein ne, cana rai cocoaeraa nitohanaí ichaonaane saijieein, rautanaa cojoaelanaalara,” naauruhane jana, <sup>14</sup> cuu irihane coina, aonajiha Faborone jana jetaote, cuu Jorioocuru cotaicha rijitiin jetao:

“Jataain baaso ichaain, sonajaain jaohin, naaonjoaain que inara ere nihane jana nihanena, nainereeeun canu rohecaachene latelanaala, jeriquichene rijijieein, inara- Jorionequichene aonacaun tonajelanaalana. <sup>15</sup> Nena, inara aohana naineneeeun, joaereein, nitohaniha inara ichaona jaun aitiin, inara raajenihane inaraacha coacui que aitocohichene jaunra. Inara nii rucuhacuche. Coatia canu, nii que enonaa nainihaaun, nitohanaí rucuharanu que nenihanune jaun,” naain jetao, <sup>16</sup> nii ita colurujueeuruhana jaan coloheri- *tribonal* caje, nii Jorioocuru sitae, coberenadoro Calioon.

<sup>17</sup> Nii jaun jetaote, sinacoca curuaanaa- Sosenesi mucuhin jetao, faohacure, nii ita colurujueeuruhana jaan coloheri- *tribonal* acatiha teein. Ne jetaote: “Coaraain nainauruinaera,” naain jetao cuu coarajenajae coberenadoro- Calioon.

*Antioquihau cauhin, jelai caje nacoauneein misioneroneein cuhane nichata satiha Faborone*

<sup>18</sup> Araai janohin, Coriintoo nihane baiha jetaote, Jesocurisito coreniha-cana nejeraauru rai necoeeeure jetao, Aquila- chaen rai sinijiera Firisila, naaonjoaain aina jiniiquiin- Faboro, Siria bataneu cuuruhane coina. Nitohaneein cuhin jetaote, cucuana cuhane cuujueein, Sencurea turuhin jetao, caje amuhane coina bote cuhane fau rai, rai couturi loroaecaain joerate jetao Faboro, Cana Coaunera rai naitoonjoanlu nainane cojounacaneein.

<sup>19</sup> Nitohaneein cuhin, inae Efesoo turuhin jetaote, cuu Aquila ratiri, rai sinijiera Firisila aina. Nitohaneein cuu ratiriinajaain jetaote, naain nena sinacoca asae turuha cue jetao- Faboro. Cuu turuhin jetaote, enohin cuu nenacaauru- ita taojiaeraauru- Jorioocuru rai ereerejeein jetao, relanajae Faboro. <sup>20</sup> Nii jaun jetaote, cuu carajaain acaauru aina nihane coina, Faboro chunaure. Ne jetaote, ainaa jerelanaala, acaauru rai:

<sup>21</sup> “Jeriha, Cana Coaunera nena, caa baiha inara rene turuha ureeunicha,” naain jetao necoe acaauru rai Faboro.

Nitohaneein, necoeein jetaote, leinjiin bote cuhane fauhin, Efeso caje amuhe Faboro. <sup>22</sup> Nitohaneein amuhin jetaote, Sesareea turuhin, jelai caje coauneein, atane choae cuhin, Jerosaleeun turuha cue Faboro, cuu nenacaauru Jesocurisito ranjoinunru coaraane coina. Nii baiha jetaote, caje Antioquihau cue jetao- Faboro. <sup>23</sup> Nii baiha carajaojoaain neein jetaote,

coaiteen amuhemuhena nunuheteen, itolere Galasia batane, Firijia batane, naaonjoainuri sacutaain amuhemujueen, Jesocurisito esenetaeraauru suujuateen, acaauru suujua lararajiae jetao Faboro.

### *Efeso Jesocurisito que ereerejiha Aforone*

<sup>24</sup> Nii jana jetaote, amuhemuheca Faborone naniha, Efeso turuhe jetao, leinjiin cacha- Alejaandiria cocoaicha- Aforoneen curuajai. Nii jetaote, caohatiin Cana Coaunera Quiricha Inoaesi coitucuhin, raotojoeen ereerejeein, cacha relanaa coitucue jetao. <sup>25</sup> Aca jetaote, esinae rauhijiriin, Cana Curuaanaa aitoonjoa coitucuhin, esenetaain, tonoraain nenaane. Nii jaun jetaote, raotojoeen ereerejeein corojeein, rauhi cuhane cuaain, Jesoso aitoonjoa beebejeein, que cacha relae. Ne jetaote, Jesocurisito esenetaeraauru rai, rai Suujue tiha Cana Coaunerane coitucuhelanaala, acaihanejeein Cana Coaunera ere tonoraera neen niha cachane coujounacanu que, cacha baotisa Joaan neeicha coitucuujiha natiin jetao, nitohaneen cacha relae jetao, Aforo. <sup>26</sup> Nitohaneen jetaote, chaque tonaje lanaala, ita taojiaauruha Jorioocuruna jaan loreri- sinacoca asae cacha relae, satiin aonajera urichoo. Nii jana cuu neen aonajiha Aquila, rai sinijiera Firisila ainane jaun jetao, cotijiaain bujuaihu amaain jetao, rauhijiriin jeriha Cana Coaunerane rijijeein jetao, beeure Aforo rai, jelai amuritoheriin coitucuhane coina. <sup>27</sup> Nii baiha jetaote, Acaiha batane cunaa jeriha- Aforone jaun jetao, quiricha laenaain, aina letoaaure, nii Acaiha nenacaauru- Jesocurisito esenetaeraauru rai, caohachaaain belaaain raauruhane coina. Inae Acaiha turuhin jetaote, Cana Coauneraacha belainojoineein- Jesocurisito- esenetaeraauru corootajane jetao, jataain Aforo. <sup>28</sup> Nitohaneen jetaote, rauhi coaraain, rauhi cuhane cuaain, Jorioocuru rai ere, satiin aonajera urichoo. Nitohaneen, acaauru rai ereerejeein jetaote, acaauru rai Cana Coaunera Quiricha Inoaesi ereretae jetao, Cana Coaunera jerenohineein, letononeen Mesihasi niha Jesoso ne que, aitoaha Cana Coaunerane beein. Nii jaun jetaote, chunijiu cuaain tonaain Aforo batiin tonaain erenaa nainecurene jetao, Jorioocuru, acaauru que coarateen aitohana jaun.

## 19

### *Efeso turuha Faborone*

<sup>1</sup> Coriintoo niha Aforone nainiha jetaote, Efeso cue Faboro. Efeso turuhane coina jetaote, ichatane tabai ucuuno que iniin, ichatane tabai choae situhin, turuha cue jetao, Efeso Faboro. Cuu jetaote, le laurijieen Jesocurisito esentaeraauru aina ita eruure jetao. <sup>2</sup> Nitohaneen, runajaain jetaote, acaauru rai:

“Tana, Jesocurisito esenetaichene nunuheteichene bana, inae Cana Coaunera Suujue raain neeicheluneta,” naain acaauru caje bajaa Faborone jana jetaote:

“Aihahacaanuta. Coatia chaabana niritiin, esenetaeraauru rai, rai Suujue tiha Cana Coaunerane coitucuhaacaanuta,” naain tonoraauruhane jaun jetaote:

<sup>3</sup> “Chatohanai quetejian, baotisanajoineein neeicheta,” naain bajaa Faborone jana jetaote:

“Cacha baotisaain coujunacatihalu Joanne rijijieinchate, canacaanu coujounacateen neeurelura,” naain tonoraauruhane jaun jetaote:

<sup>4</sup> “Aiha chuhisicha. Nii Joante chuisi rauhijiriin Cana Coaunera esenetaeraauru coujounacaatelu baotisaain. Chaentechu nii caajie turuheneeni-

Jesoso esenetaauruha saain cachaaurune coina beebejelu,” naain beebejiha acauru rai Faborone jaun jetaote, <sup>5</sup> Cana Curuaanaa Jesocurisito coreniha, inae baotisaain cojounacatenohineein neure. <sup>6</sup> Chaen, acauru choae biji merecaain, Cana Coanera bajaa Faborone jana jetaote, acauru choae fauha uha Cana Coanera Suujuena jaun, itolere nejelau ere que ereein, aitoroatiha Cana Coanerane beebejeeure. Nitohanein jetaote, rai nere cuhanene maajeein Cana Coanera beratenojoi ita rai beebejeeure. <sup>7</sup> Itolereenein jetaote, lechoonca coroatajaaure, nii cachaauru- Cana Coanera Suujue raeracuru.

<sup>8</sup> Nichata ateein, cuu neein jetaote, netaojiaauruha- Jorioocuruna jaan loreri- sinacoca asaae cuhin, Cana Coanera ere beebeje jetao, Faboro, chaque casilanaala. Cuu jetaote, “Naojoarichaain nii Cana Coanera Cojoanona- Ena Turunaa,” naain beebeje, esenetaauruha cachaaurune coina. <sup>9</sup> Ne jetaote, tabaauru, nechu jataain, cotaiha esenetana jerecurenihana jaun, esenetana jerelanaala jetao, satiin aonajeeurera urichoo baasoneein, nii Ena Turunaa Ichaonaa que ereeuruhane jaun jetao, cuu ratirinajaain, cachaauru relaa- leeinjiin cacha- Tiranoneein curuajaine jaan- coloheri asaae, nii Jesocurisito esenetaeraauru- jitariin amaain jetao, nelonae Faboro. Cuu jetaote, cojoanoonetoein, Cana Coanera ere beebeje jetao, Faboro. <sup>10</sup> Nitohanein jetaote, cuu coroata jaanacaain, cacha relaane jaun jetao, Asia batane sacutaain nenacaauru, Jorioocuru, Jorioniheichurune maajeeinchuru, Cana Curuaanaa aitojoan beebejiha Faborona jaun, aonacure.

<sup>11</sup> Nitohanihana jaun jetaote, Faboro aina cuaain jetao, itolere cojoaelanaacojoi ichaain jetao, cachaauru notajae- Cana Coanera. <sup>12</sup> Nitohanein coroatajaniha Cana Coanerana jaun jetaote, Faboro que, cajione turuaain, amaain jetao, cunaitenacaauru dadaauruhane jetao, nerautaaure- itolere cunai caun cunaitenacaauru, itolere coitucuhichuru ichanaaneinchuru- cunaitenacaauru caje jetaote, nii coitucuhichuru sitae.

<sup>13</sup> Nii jana jetaote, neurelu- benanenein nenacaauru- Jorioocuru- amuhemujeein- moconajaera ichanaanein cunaitenacaauru rautaeraniha nenacaauru. Niichuru jetaote, “Jesoso coreniha mituuche,” naain, nii suujua cuhane moconajaera letono sirichauru caje sitaauruhane coina jetao, coacuhin, ichaa Faborone rijijieein jetao, nii moconajaera ichanohineein coitucuhuhi que, cojoeonacaauru rai jetao: “Faborohacha beebejei- Jesoso coreniha, nii cacha caje mituhin amuura,” naaure jetao.

<sup>14</sup> Leeinjiin Jorio- Esesebanein curuajai calaohichuru- caaunsinein nenacaauru jetaote, nitohanecure. Nii Esesebate, saseredotecuru curuaanaanein ne. <sup>15</sup> Ne jetaote, coitucuhichuru sitanaa jerecuruha, que cojoeonaa cajene jana jetao:

“Canuna, Jesoso coitucuhin, Faborone maajeein coitucunra. Jana laen, inara coitucuhun. Cha nequiche chaainti inarata,” <sup>16</sup> naa nii cacha suujueniha netiin- nii coitucuhine rijieeoritiin jetaote, acauru choae tacaatiin jetao, sonajae jetao, acauru amuritiin nunujetohana jaun jetao, banejelanaala jataain cunaitanajaain, jitariin acauru cajionene majeein, caohachanainejeein, soaisoiriin sonajae jetao, nii coitucuhuhi que- cojoeona cacha. Nii jaun jetaote, machorojoa machorojoaain jetao, nii neerunajaa loreri caje jetao, soroore. <sup>17</sup> Nii nitohanihana jaun jetaote, satiin- nii Efesoo nenacaauru Jorioocuru, Jorioniheichuru, naaonjoaihunri- satiin, nii coitucuhin casihure. Nii jaun jetaote, itolereenein, Cana Coanera Calaohi niha Cana Curuaanaa- Jesocurisitone coitucure jetao, beebejeeuruhane jaun.

<sup>18</sup> Nitohaneein jetaote, arajiin cachaauru nii coaraain esenetaerauru, satiin, aonajeeuruha cachaaurune jana jetao, jauriaa jaiti coitucuelanaala itolere baaso- acaauruhacha ichai beure jetao, jitariin caohachanainejeen.

<sup>19</sup> Chaen, arajiin benanecuru jetaote, nii nerelaauruhana jaan- acaauru quiricha jitariin uhaain jetao, satiin coarajeeurera notaracae teein, jitariin mocoore. Nii acaauruhacha mocoii- acaauru quiricha core rocooruhane jana jetaote, saoquichoonca oaraacani, acaauru coriquineein jataain coretineein jetao mitue rai core. <sup>20</sup> Nii jaun jetaote, itolere sacutaain, jelai amuritoheriin Cana Curuaanaa Jesocurisito esenetaain jetao neure cachaauru. Nii jaun jetaote, esinaae rauhijiriin nelateein- itolere ichaa- Cana Coaunerane coaracuuruhane jaun jetao, leeochoaauru cachaauru netonoai esenetaaure.

<sup>21</sup> Nii nitohaniane baiha jetaote, coaiten Masedonia, Acaiha, naaonjoaihunri, cunaa jere jetao, Faboro, nii caje cuaain, Jerosaleeun cuhin, caje coauneein Romau cunaa jerihane jaun. <sup>22</sup> Nitohaneein coacuhin jetaote, ichoaichania coroatajai- coroatajaneraauru- Timoteeo, Erasto, naaonjoaihunri letoae jetao, Masedoniau, Faboro, turuha curichaaine beeuruha- ichoaichaniha, amaaine caina. Nitohaneein, ichoaichania letoanajaain jetaote, nii Asia batane que nedae jetao, Faboro.

*Faboro aina, rai corihacuru que nejerateein, ita rohecaauruha Efesoo nenacaaurune*

<sup>23</sup> Nii bana jetaote, satiin- nii Efesoo nenacaauru jetao, ita que nejerateein, ita rohecaaaure nejesinajeen, nii Ena Turunaa Ichaonaa que, acaauru relaauruhane jana, esenetaauruhane coreniha. <sup>24</sup> Leeinjiin catcha- Demetirionein curuajai- coata que amihanenaa jetaote, nii leratera ne. Nii Demetirio jetaote, itolere ecaantoneenanain ichae jetao, coata caje, nii acaauru chosineein- acaauruhacha tei- eneneein nenea- Aretemiasa rai Teenforo cojounaca sirijiacoaain. Nii que coretiin que cachaauru rai necoreteein jetaote, nii aina amihanenacaauru coretenajaque jetao, jataain coretiin. <sup>25</sup> Nii Demetirio jetaote, jitariin coroatajaneraauru cotijiae jetao, leeochoa cachaauru- acaauru rijijieein- jelai- ecaanto icharaneein- amihanenacaauru cotijiaain jetao, acaauru rai jetao:

“Niha naaonjoaain- raotojoein amihanein- raotojoein ichaohacachenajaan- cana amihaneeo core aasaerane jaunna, inara cotijiaaun, nii que erenaa coinara,” nae jetao, nii coata caje- ecaanto ichaera- Demetirio. <sup>26</sup> Niritiin jetaote: “Inara netonaite, raotojoein coitucuhin, inara uricho que, nii aonaain neeichera. Nii Faboro naain acaauruhacha curuaatei cachate, cajianeein amuhemujueein, cachaauru rai: ‘Nelatihejie caa canaacha ichai- catcha ichanohineein nenea- cana chosicha.’ naain, arajii cachaauru rai bihana jaun jetaote, inae esenetaaure arajiin cachaauru. Coatia leeinjiin cau Efesohacha nitohanai ichaaita. Itolereneein, Asia batane sacutaae lalajeeinte, amuhemujueein, nii chosi esetaauruhane jiaanecuruha cachaaurune caina relanajaane jaun, esenetaacoaaure. <sup>27</sup> Niite laaen, jataain cana rai ulunaain nedaera. Nabana chunei, cana amihaneon coretena nainenihane, cana amihaneon niha natiinte, nitajenaa naine. Chaentechu, Asia batane sacutaain, satiin chauratane sacutaain coroaenjoineein niha, jataain nelateein nihane corenihane saijieein, caa cana rai chosi- Aretemiasa que jaolecoorureein cachaaurura. Chaen inae turuururihaain rai Teenforo asaae, coroaeca,” nae jetao Demetirio.

<sup>28</sup> Nii jaun jetaote, nii aonaain obajeein nujuae soaisoaain jetao:

“Caohachaain laraajiin neeine- Efeso cocoaichanichaachene- chosi- Aretemiasara,” naaure jetao, nii coata que- amihanenacaauru.

<sup>29</sup> Nitohaneein jetaote, cajiaaneein, ita cotaicha rijitiin jetao, nii coroata-jai cachaauru- Faboro corianiha cunacaauru- Masedonia caje unacaauru- Caiho, chaen, nii leeocho- Arisitaroconein curuajai naajoaihunri curuataain jetao, codoonetiin mucuunajaain jetao, acaauru tararaain, ita taojiaain- chaelai coaracuruhana jaun- *teatro* neein acaauruhacha curu-aateihu amanajaain jetao, ita taojiaeraauru acatiha jetao, tenajaa cuure. <sup>30</sup> Nii jaun jetaote, acaauru coreniha enohin, cachaauru rai, iriha cunaa jeriha Faborone jana jetao, caohateeure, ecu nenacaauru- Jesocurisito- esenetaeraauru, nabana, chatohaneein teeuruhane coataa. <sup>31</sup> Nii cuu- Asia batane nenacaauru- cocoainanacaihuru tabaauru jetaote, Faboro belaichaauru nihana jaun jetaote, “Jiaonriha jera, nenoainera,” naerateeure jetao. <sup>32</sup> Nii nainiha jetaote, nii ita taojiaauruhana jaun jetao, ita rai cajiaaneein nujuae sooaichure jetao, ita rohecaain. Jana, tabaauru jetaote, “Naaonjoaain cointate ne caa netaojianaara,” naain jetao, coitucuurene. <sup>33</sup> Nii jaun jetaote, acaauru tabaauru jetao, “Naaonjoaana jaunte, nii rucuhecuruhane coina, netaojiaaure,” naain jetao, leeinjiin cacha- Alejaandoro neein curuajai rai, beeure. Nitohaneein rai berateein jetaote, acaauru ajiniha tein jetao, Alejaandoro sarasaracaain amaaure Jorioocuru, nii netaojianacaauru acatiha, cuu nichaauraain, nii ita rohecaeraauru rai, iriha Jorioonecuruhane corenihane coina. Nii jaun jetaote, turuhin, nii netaojianacaauru rai jetao, biji sarasarari, curuatoroain aonajeeuruhane, acaauru rai, satiin urichoo, Jorioocuru coreniha, irihane coina. <sup>34</sup> Nitohaneein, irihane jana jetaote, nere cajeecha nainacorichure, acaentonai, Jorionihane que. Nitohaneein, nainacoriin jetaote:

“Caohachaain, laraajiin neeine, Efeso cocoaichanihacachene- chosi- Aretemiasara,” naaure jetao, ita rai nujuauen soaajiin, carajaain, coroata oraain, acaauru chosi niha- Aretemiasa beuruhane jana, esenetaaureniha Jorioocurune coitucuuruhane jaun.

<sup>35</sup> Nii jana, nii neseeu- acaauru rai- chaelai que- ereeuruhane- laenaain rucuhera- “secretario” jetaote, inae aitoaha acaauru raine jaun, sitonaaonjoauruhane jana jetao, acaauru rai:

“Aonacuche, Efeso nese cocoaichacuru. Satiin- itolere cachate, nii jataaincana rai nelateein nena- cana chosi loreri- Teenforo, chaen, nii dede cajerineein Aretemiasa tochaneein nalunaane maajeein beraihane coina nena- neein niha- caa nese cocoaichanihacachane coitucuurera. <sup>36</sup> Nihei chunei, nii que, ‘Nohanenaa,’ naain iriha chuneine jaanu. Nii jaun, inae nii jiaanecuchera. Coa obaecache. Coa caohachaain inara suujua coarihei amunein, chatohaneein, baaso chana coaucachera. <sup>37</sup> Coatia, chatonaain cana chosi que ereein, niheichu Teenforo asaae asijiauhin naaonjoaauruha caa inaraacha mucuhin inaraacha uhaauri- cachaaurune coaalanaalata. <sup>38</sup> Chatonaain, acaauru colurujueein niha, nii coata que amihanenaa- Demetirio, nii aina amihanenacaauru ainane, taute neeure- nii rucuheraaunu que nenacaauru- joesiocuru, chaen, acaauru curuaanaacuru, naaonjoaihunri. Niha chunicoha, acaauru coulurujuerane, taa, nii rucueraaunu que nenacaauru rene amanajaauchete, neruujueeuruhine, ecu le cachaauru jabereco coreniha irihane coinara. <sup>39</sup> Niha esinaae rauhijiriin chatohanaine, rucuhena jerequichene, satiin cocoainanacaihuru aina, ita taojiaain, nii rucujueein neeuchera. Nii banate, esinaae rauhijiriin, caohachaain ita taojiana esineneein rucuhericuicheeincha. <sup>40</sup> Jana, jerichanejuein, sacunaa coauquichenete, cana colurujuenaa nainecurureein, ‘Cana jecha cachaauru suujua rohecache,’ naain. Nii quete, jataain lunaain nihacachera. Charijuein nejeein, coitucuhin, cana caje, ‘Chatoaneein, lerateein, ita rohecaau-

reta,' naain bajaauruha cocoainacaihurune, tonaainte berichaacheta," naain jetao:

<sup>41</sup> "Chajaaincha cauhachanichuchera," nae acaauru rai, nii chaelai que ereeuruha nii neseeu nenacaaurune- laenaain- rucuhera.

## 20

### *Masedonia, Curesia, naaonjoaihunri turuha cuha Faborone*

<sup>1</sup> Inae nitohaneein, cajianeein, ita rohecaauruhane jianecuruhane baiha jetaote, jitariin, nii Jesocurisito coitucuurera cotijiaain jetao, suujuatenajae- Faboro. Nitohaneein, suujuatenajaane baiha jetaote, acaauru rai necoein, Masedonia batane cue jetao. <sup>2</sup> Cuu jetaote, neseeu neseeu nainein, cuu nenacaauru- Jesocurisito coreniha cana nejeraauru rene bedaenein, cuu acaauru suujuatein, jelai amuritoheriin Jesocurisito esenetaauruhane coina, acaauru rai ereereje Faboro. Nitohaneein, acaauru rai ererejeein, acaauru suujua lararajihane baiha jetaote, Curesia batane cue jetao Faboro. <sup>3</sup> Nitohaneein, Curesia batane turuhin jetaote, cuu ne nichata ateein. Cuu nichata ateein nihane baiha jetaote, inae Siriau cuhane coina, bote cuhane fau rai, nihane jana jetaote, que necosuujuaauruha Jorioocurune coitucuriin jetao, jelaiha atane ichoae cauha cunaa jere jetao, nacoauneein Masedonia choae situhin cuhin, Faboro. <sup>4</sup> Nii janate, canacaanu corihaniha uure, Berea cocoaicha- Firo calaohi Sofate, chaen Tesaloneca cocoaichacuru- Arisitaroco aina Secoondo, chaen Derebe caje unaa Caiho, chaen Timoteo, chaen Asia batane caje unacaauru- Tiquico aina- Torofimo, naaonjoaihunri. <sup>5</sup> Satiin niichurute, ichoachania amaain, Toroasihu, canacaanu cohaca cuure, Masedoniau canacaanu ratiriin. <sup>6</sup> Nii janana, canacaanu, Filipino caje nesaruhacaanu, leeinjiin bote cuhane, jorerera colane ichanohi faan quihuruhana jaan cojoanonaa- Fasocoa beseta bitoacaanune baiha. Nitohaneein nesaruhin cuhina, saogui janone cuhane, turuha cuhacaanu Toroasihu. Cuuna canacaanu cohacuruha, nii ichoachania cunacaauru- Jesocurisito coreniha- cana nejeraauruna jaun, cuu erunajaacaanu. Nii Toroasihuna, caaunsi janonein nihacaanu.

### *Toroasihu nenacaauru rene bedainiha Faborone*

<sup>7</sup> Cuuna, semana nunuhe cojoanonaa bana ita taojiacaanu, cana coreniha ohalune coaacuruha, satiin esenetaeraaurune coina, faan chaluhin quihalu- Jesocurisitone rijijiein, ita aina jiniiquiin faan chaluhin quihacaanune coina. Nitohaneein netaojiaacaanune janate, Jesocurisito coreniha cana nejeraauru rai, carajaain itolere que, dede cataaun tiaain, ereereje Faboro, nii cojoanoo, jelai caje amuhane nihane jaun. <sup>8</sup> Nitohaneeina, leeinjiin loreri ucuunetiin nenea nichata coarana saatono que, netaojiacaanu. Cuurute, nihacoae arajiin conooru, moconojoineein. <sup>9</sup> Nii janate, jelai caje nemarote, leeinjiin enamanaa- Eoticonein curuajai. Acuujuua laojoiri bacuujuaniha lauhequuin, cuu carajaain ereereeca Faborone aonajihana jaunte, amuritooriha sinirenana jaun, nemarote, nii loreri ucuunetiin nenea nichata coarana caje. Nii janate, soronein fauhin, michuuruhane jana, inae ohe nii enamanaa. <sup>10</sup> Nii jaunte, fauhin nii enamanaa que baluunetiin, cuu nenacaauru cana nejeraauru rai:

"Coaa nesoonetohachera. Esinaaete niqui inae ohera. Nete, inae ichanaera," nae Faboro.

<sup>11</sup> Nii baihate, jelaiha iniin, faan beeunebeeunein chaluhin quihane baiha, coaiten janohajeein ereereecane baihate, inae jelai amue. <sup>12</sup> Nitohaneein, nemarotein oha nii enamanaane jana, oo caje ichatiha Faboro aina cuaain Cana Coaunerane jaunte, jataain que nelararajiaaure.

*Toroasi cajene Miletoo cuhacaanu.*

<sup>13</sup> Nii janana, ichoaichania bote cuhane cuhin, Asoo, Faboro cohaca cuhacaanu, aca nitohaneein jereein, atane ichoae cuhana jaun. <sup>14</sup> Inae nii Asoo, ita ruhacaanune janate, canacaanu aina, bote cuhane faain cue Faboro, Mitileneu. <sup>15</sup> Jelai caje nesaruhinna, cojoanoo Quihoo situha cuhacaanu. Nii cajena, le janohin turuha cuhacaanu, Saamo cofauhanau. Cajena cojoanoo cuhin, turuhacaanu Miletoo. <sup>16</sup> Asiau jeloon cuhin, carajanaa jerenihana jaunte, Efesoo cunaa jerene Faboro, Jorioonecuruhane beseta-Feentecosetesi bana Jerosaleeun nena jerihana jaun, chajaaajoain Jerosaleeun turuhane coina.

*Efesoo nenacaauru-Jesocurisito ranojoihunru-bichauhenaauru rai ereerejiha Faborone*

<sup>17</sup> Inae Miletoo turuhinte, jelai caje coauneein, Efesoo nenacaauru-Jesocurisito ranojoihunru bichauhenaauru cotiharate Faboro. <sup>18</sup> Inae turuu-ruha nii niicha cotiharateeurine janate, acaauru rai:

“Cau caa- Asia batane que turuhanune caje coauneein, inara ainaacha ichaohanulune jaunte, inara raotojoein canu ichao coitucuhichera. <sup>19</sup> Itolere janonaa banana, joareein cacha rijijieein inara aina amuhemujueein, Cana Curuaanaacha jerenohi ichajeein nerejetoonlu, casuujua fononoichuru, itolere necairichanaa abaantaain, canasinee rijitocuruha Jorioocurune abaantaain. <sup>20</sup> Nena, atiin jianelanaala, inara caohachanu que, tabaauru que inara loreri asae, tabaauru que nenaanaja cataaun, naaonjoaihun teinchuru, satiin aonajeeurera urichoo inara rai, Cana Coaunera ere beebejeein, inara relarejetoonlu. <sup>21</sup> Chaen nechu, Jorioocuru rai, Joriooniheichuru, naaonjoaihunri raine maajeein: ‘Coaiteen enacoauneein Cana Coaunera ere tonoraain, rai Calaohi- Jesocurisito netonoai esenetaain tonoraachera,’ narejetoonlura. <sup>22</sup> Enana laen, inae Jerosaleeun cureeuni, ucuae caletoha Cana Coaunera Suujuene jaun. ‘Naaonjoarichaauni cuura,’ naain coitucuelanaalana, caa cureeunicha. <sup>23</sup> Leeinjiin, neseeuuru naineein, cuhanunejaauru naineeinchurute, cuu turuhanune, caresero cuhane caenoaain, cacairichaururichaaaine benajaque canu rai, Cana Coaunera Suujue, acaihanejei niichane coitucuujuueun. <sup>24</sup> Nena, chaque tonajeneun. Coatia chaque nelatihei canu rai, canu ichao. Nenacaenajian, cacairichauruhane que nelararajiaain, rachoojoein caletoa Cana Coaunera Calaohi- Jesocurisitona jaan nainana jereeun. Niicha beratei- erenaa caohati beebejeein, jataain cacha belaiha Cana Coaunerane maajeeinna beebejereunni.

<sup>25</sup> Esinae rauhijiriine, satiin, cau neniquichene raina, beeoricheeuni, Cana Coaunera Janonaa beebejihanune aonajera neeichene, coatia inae chunei enacoauneein cacohararihaain. <sup>26</sup> Nii jaunna, enene inara rai aitona jereeun, rauhijiriin, nihei chunei coreniha, cha ujuaihonnein nenerihanuhine jaun, <sup>27</sup> nii chunei que suujelanaala, satiin cacha urichoo, Cana Coauneraacha jerei beebejihanune jaunna, cha ujuaihonnein nenereunni. <sup>28</sup> Aihana jaun, itolere que nainaaain, necohalajiin, caohachaaain necoeraain neein, Cana Coaunera rai ita taojiaeraauru beraihuca, acaauru coreniha, coroso que ohalu rai Calahine jaun. Niicha ranojoihunru beraichanu quete, inara cotijiaain, nii beraichaanu que inara te Cana Coaunera Suujue. <sup>29</sup> Inae amuhanune baihate, turuha uurureein nechu aansai ataibinaaeneein cacha quicha rijijieein nenacaauru- cachaauru, nechu jataaen Jesocurisito ranojoihunru itajeene rijitiin. <sup>30</sup> Chaente, inara tabaauru nihanatiin, nechu jataaen joareein caje rocohin, relaa cuurureein, nii casaje esenetaain, acaauru



aina cuuruha Jesocurisito ranojoihunrune coina. Nitohaneente, nechu jataaen casaje que, cacha relaa cuurureein, suujua caje rocohin. <sup>31</sup> Nii jaun, inara aina, nichata ajaanacaain nihanune bana, cojoanoo netojoein, jantii inetojoeinchuru, inara suujuaterejetocooaunlu, casuujua fononohine coacuhin, que nainaan necohalajiin ichaoche.

<sup>32</sup> Nii jaun, Jesocurisito coreniha- canejeraneein nenacaauru, caa inara rai- quiicha beebejei- naitoonjoa nerete, inara coroatajanereein, jelai amuritoheriin caohachaaain coitucuhin, esenetaichene coina. Cana Coaunerate naine satiin rai cachaneein neeninuru rai aitothane tocohaneein, inara coroatajanihane, nitohanein coitucuhin esenetaeraauru coroatajanihane coina aitothaluna jaun. <sup>33</sup> Coatia, canu caohachanu que, inara relarejeto-haaunlu, nirijeein core colane. Nieichu, chunei cacha cajione bajarejeto-haaunlu. <sup>34</sup> Nii jaunte, inara raotojoein, cacoi que amihaneein quiicha latei raain, canu aina nenacaauru rai netonaine, acaauruhacha lateine majeein ranune coaraain coitucuhichelu. <sup>35</sup> Nitohanein, inara netonai, itolere janonaa bana ichaohichene coinana, inara que coarateein, inara rai aitoraaetonlu, chaelai que jataaen carichainejeein nenacaauru coroatajaneechene coina: 'Nenacaetejian, tihacane, raacane amuritoheriin raotojoein nena nainichaa, chaelai que, cairichainejeein nena rai, cha tein coroatajanichaane.' naain cana relaaluu Cana Coaunera Calaoi Jesusone coacuhin ichaquiichene coina," naain jetao, acaauru suujuate Faboro.

<sup>36</sup> Niritoha, acaauru raine baihate, neseonraain, acaauru aina jiniiquiin Cana Coaunera bajae Faboro. <sup>37</sup> Nitohanihane janate, satiin Faboro que baalu baluuneeinchuru, loalocooainchuru coisichure. <sup>38</sup> "Inae caachanijia cacoharariichenera," naain rauhijiriin biha Faborone jaunte, jataain coinaderaare. Nii baihate, corianiha cuure, nii cunaa jerihana jaan- bote nenajaun tiaain.

## 21

### *Jerosaleeun cuha Faborone*

<sup>1</sup> Nitohanein, cuu Jesocurisito coreniha cana nejeraauru ratiriin, leinjiin bote cuhane fauhin, cucuana cuhane, rauhijiriin cuhinna, Cos cobenau turuha cuhacaanu. Nii cojoanoona, Rodasi cobenau turuhacaanu. Jelai caje coauneeina, turuha cuhacaanu, Patara neseeu. <sup>2</sup> Nii Patarauna, leecha bote Fenisiau cunaa eruhin, cuhane fauhin cuhacaanu. <sup>3</sup> Nitohanein cuhinna, Chifere cobena coarajeein situujihacaanu. Caje situhinna, cana ajaabiji nichajai que tacaain, nii Chifere ratiriin cuhacaanu, rauhijiriin Siria batane tiaain. Nii Siria auhaniha nena Tiro cofauhanau, niicha amai rucuhele ratirihane niha nii botena jauna, cuu najauriha cuhacaanu. <sup>4</sup> Cuuna, nii Tiro neseu, Jesocurisito esenetaeraauru eruhin, acaauru aina caaunsi janonein nihacaanu. Nii janate, acaauru que coitucueratiha Cana Coaunera Suujuene jaun, coitucuhin, Jerosaleeun cuha Faborone caohateeu. <sup>5</sup> Nena, caaunsi janonein, cuu, acaauru aina nihacaunune baiha, inae jelai caje amuhacaanu. Nii janate, satiin, canacaanu corianiha uure, acaauru sinijeraauru, acaauru bereecuru, naaonjoaihunri aina jiniiquiin, naain nii nese bujuau tiaain. Cuuna, carene ichoae, acaauru aina neseonraain, Cana Coaunera bajaacaanu. <sup>6</sup> Nii baihana, acaauru rai necoein, bote cuhane fauha cuhacaanu. Nii janate, inae acaauru netonai, nenajaun cauha cuure, canacaanu que janoriin.

<sup>7</sup> Tiro caje cuhinna, cucuana cuhaneincha cuujuein Tolemaidau turuhacaanu. Nii Tolemaidauna turuhin, cuu Jesocurisito coreniha- cana

nejeraauru eruhin, acaauru neeuruhane coitucuhin, cuu acaauru aina nihacaanu, le janohin. <sup>8</sup> Nii cojoanoonna, jelai caje nesaruhin cuhin, Sesareea turuha cuhacaanu. Cuu turuhinna, Ferifi rene turuha cuhacaanu. Acate, Jesocurisito coitucuuruha cachaaurune coina amuhemujueein- Jesocurisito bera- “evangelista” neein afosotooru coroatajaneraauru caaunsine ne. <sup>9</sup> Nii Ferifite, jenaain cacunuque, ichauhenanihacoaain lanaquelanaala. Nii Ferifi cacunucurute, Cana Coaunera caje erenaa raain- cacha rai beeurera-*profetacuru* ne. <sup>10</sup> Inae janojanoheriin, cuu nihacaanune janate, tajiha turuha uhe Jodea caje, Cana Coaunera caje erenaa raain- cachaauru rai bera-*profeta* Acabo. <sup>11</sup> Acate, canacaanu rene turuhin, Faboro ichora raaoriin, canacaanu acatiha, raajenhane biji aina tijia taotaain nichojoaainte:

“Cana Coaunera Suujuete, carai be. Catohaneein jetaote, Jerosaleeun, caa ichora erora teein, nejelau ataneu nenacaauru bijihu tiha cuurureein Jorioocurura,” <sup>12</sup> naain, bihana jaunna, Jerosaleeun cuha Faborone caohatihacaanu, nii Sesareea nenacaauru aina, niqui. <sup>13</sup> Nete:

“Chanuna chanaain, canu inaderaaquiche. Canuna, itolere que jatoroaain neeun. Coatia, leinjiin canu ichojoaain, camaauruhaneicha coina jatoroaain nihaaun. Canuna naineeun, Cana Curuaanaa Jesoso coreniha ohanu Jerosaleeunne,” naainte, canacaanu tonorae Faboro. <sup>14</sup> Nii jaunne, inae tonaain chunjihu cuaain caohatena nainenihacaanune jaun jiha-neein:

“Coanete aihane, aina niicha jerei ichamiin- Cana Coaunerara,” naain jianichaanu. <sup>15</sup> Nii baihana, inae neruujueein Jerosaleeun cuhacaanu. <sup>16</sup> Nii janate, canacaanu corianiha uure nii Sesareea nenacaauru- Jesocurisito esenetaeraauru tabaauru. Acaaurute, canacaanu amaaure Chifere cocoaicha- Manasoon rene, cuu sinihacaanu ainane coina. Inae carajaa Jesocurisito esenetaera neein niha nii Manasoonne.

#### *Saantiaao rene turuha cuha Faborone*

<sup>17</sup> Inae Jerosaleeun turuhacaanune janate, canacaanu coroaajeein, canacaanu raare, cuu nenacaauru- Jesocurisito coreniha cana nejeraauru. <sup>18</sup> Nii cojoanoote, canacaanu aina cuhin, Saantiaao rene turuha cuhe Faboro. Nii janate, cuu neeure satiin Jesocurisito esenetaeraauru coaraneein nenacaauru- bichauhenaauru. <sup>19</sup> Nitohaneeinte, nii jitariin acaauru neeuruhane coitucuhane baiha, acaauru rai jitariin nunuhe caje coaneein, itolere que aina cuaain, Jorioniheichuru netonoai coroatajaniha Cana Coaunerane beebeje Faboro. <sup>20</sup> Nii jaunte: “Caohatoha Cana Coaunerara,” naain, Cana Coaunera coroaajeein:

“Inae coaraai- ichaso. Arajii oharaancanei cana araaichuru Jorioocuru netonoaite, esenetaaure. Satiin acaaurute, jataain cana rai nelatiha Moisesa aitoonjoane que aitiin tonoraacachene jerecure. <sup>21</sup> Nete satiin, nejelau ataneu nenacaauru- Jorioocuru rai jete, Moisesa aitoonjoa tonoraauruhane caohatein, quichaneein nejanoha canaanaine, jabereco macohi cari saera teeuruhane caohatei, chaen cana ichaonijihanai que ichaooruhane jia-neein ichaooruhane coina jete aitoi, naain ii beure. <sup>22</sup> Tonareei jana, canacaanu rai, nii queta. Cha icharichaacheta. Satiin cachate, cau turuhine coitucuha cureeinha. Nihei chunei coitucuelanaala nainejeri-naainta. <sup>23</sup> Aihana jaun, cana Jorionichaachene ichao rijijieein, ichaohine coitucuuruhane coina, cau caa jenaain canacaanu aina nenacaauru- cana araaichuru, Cana Coaunera rai naitoonjoa nainacuruhane coina- nenacaauru <sup>24</sup> amaaui jiniichaaincha. Chaen iitonoai, Jorioniheichuru jana neein iicha ichai caje nuculucohine coina, ii coturiji loroaecaain joera-teein, nii ii aina unacaauruhacha teeninuuu- itolere coreteeute, rai coturiji

loroaeceain joeratenaa nainecurumiincha. Nii banate: ‘Acaentonaite, Moisesa aitoonjoa tonorae. Aihana jaun chujian nohanihate, joaenreein nere rocohin coulurujueeure.’ naaurureein- satiin cachaaurura. <sup>25</sup> Nena laen, Joriooniheichuru netonai esenetaaurera rai, quiricha cuhane: ‘Coa acauru chosineein acaauruhacha tei- ecaanto rai- inara araaichuru tenojoi- lenone quihachera. Nijiaonrihachu, ichana jabereco quiichenera. Nijiaonrihachu chaen, raro ruluhin sonojoin lenone niha natiin quiichenera. Nijiaonrihachu, nejelau ene- inara sinijierane lanaala nenea aina ichaohichera.’ naain laenecaanulura,” naaure nii Saantiaao rene turuhin nenacauru- Jesocurisito esenetaeraauru coaraauru Jorioocuru- bichauhenaauru, Faboro rai.

*Ita taojiaauruna jaan loreri- Teenforo asae Faboro mucuuruhane*

<sup>26</sup> Nii jaunte, niritiin Faboro letoauruhana jaun, nii jenaain cuu nenacauru- Jorioocuru amaain, nii cojoanoo Teenforo acatiha jetao, acaauru aina jiniiquuin neculucoore. Nii baiha jetaote, Teenforo asae enohin jetao, “Naaonjoai banana, caa Cana Coaunera rai canacaanu aitoonjoa nainarichaanuhincha. Jana naaonjoaain banana, Cana Coaunera belaihacaanune jaan- itolere terichaanuhicha,” naain jetao bee Faboro.

<sup>27</sup> Inae caaunsi janone naiinane lalajeeuruhane jana jetaote, Teenforo asae Faboro eruhin, cachaauru suujua rohecaure- Asia batane caje unacauru- Jorioocuru. Nitohaneein Teenforo asae Faboro eruhin jetaote, <sup>28</sup> rene cuhin ruhanihajaaintiin leochaauru Israelitaneeuruhane cotijiain, nujuae soaijiin:

“Canejeraauru, canacaanu coroatajanecuche. Caa cachate, itolere atane sacutaain, cacha relaa amuhemujuera. Itolere Jorionichaache neecha rautai que, nechua jataaen cana cairichaa, itolere Moisesa aitoonjoan tonoraacachene caohatein, chaen, caa ita taojiaain- Cana Coaunera bajanaanaja- Teenforo quene maajeein ereeinchurura. Chaentechu, nejelau cachaauru- Curiecocuru cau enohain, caa ita taojiaanaja- Teenforo aansaerate, jataaen colalajinacai niha, Cana Coaunera loreri nihana jaun natiincha,” naaure jetao.

<sup>29</sup> Jauriaa Efeso caje unaa Torofimo aina, nii neseu coaracuruhane jaun jetaotera, “Teenforo asae jecha nii Torofimo enoaelu Faboro,” naain aitocure.

<sup>30</sup> Nii jaun jetaote, cajihaneein suujua cuaain, satiin obajeein, soroneein ruhaneure, satiin- nii neseu nenacauru cachaauru, codoonetiin Faboro mucuuruhane coina. Nitohaneein inae mucuhin jetaote, tarataracaain mitaure, nii ita taojiaauruhane jaan Teenforo caje. Nitohaneein tarataracaain mitaain jetaote, enonaanaja- acujua fuhitocure jetao, <sup>31</sup> cuu atinanacaneein Faboro sooruhane coina, niqui.

Nii jana jetaote, le lauriin Romanocuru soondaro curuaanaa- comaandaanti rai beeorihure:

“Leinjiin ainate, satiin nejerateure Jerosaleeun nenacaurura,” naain jetao beure. <sup>32</sup> Nii jaun jetaote, coitucuuriin luhecotariin nii rijieeoritiin, acaauru curuaanaacuru, acaauru rai soondarooru, naaonjoaain jitariin taojiaain jetao, soroneein cuhin, nii neeuruha cachaaurune jaun turuha cue comaandaanti. Nii acaauru curuaanaacuru, acaauru soondarooru, naaonjoaain aina cuha nii acaauru comaandaantine coariin jetaote, Faboro faohacuruhane jianecure. <sup>33</sup> Nitohaneein cuhin jetaote, Faboro roha turuhin, Faboro mucuhin, coroatajai *cadena* que ichoharate. Nii baiha jetaote, acaauru caje bajae:

“Chatohanaina caa cacha. Chatohanaina ichae,” naain bajae.

<sup>34</sup> Nii jana jetaote, cajihaneein joaereein nujuaen soaichure. Nii jaun jetaote, cajihaneein, ohaohacooruhana jaun, caohachaain rautaain aonaain, rucuhena nainene nii soondarooru curuaanaa- comaandaanti. Nii jaun jetaote, soondarooru que amaerate, acaauru loreri asae Faboro amaauruhane coina, acaauru comaandaanti. <sup>35</sup> Inae acaauru lorerihu turuaain jetaote, ininaana jaaun turuaain jetao, baijiaain Faboro inaaure soondarooru, nabana chatohaneein Faboro teeuruhane coataa, <sup>36</sup> satiin caijie cuhin nujuae soajiin:

“Coaraain atinaauchera,” naain nujuae soaichuruhana jaun.

### *Satiin cacha notaracae ereerejiha Faborone*

<sup>37</sup> Inae nii soondarooru loreri asae enoanaa jerecuruhane jana jetaote, enoauruhane ajiniha, nii le laurii soondaro curuaanaa- comaadanti rai jetao:

“Erenaa nainichaunna, ii aina basiinjiin,” naain bajaa Faborone jana jetaote:

“Curieco ere inaainajian, <sup>38</sup> Taa ii, jauriaa Egipto cocoaichaneein- cacha areroo jena oharaancai sonajaain jaoreraauru aina cuhin Romanonichaanune aina nejeratenaa neeineta,” naain bajae. <sup>39</sup> Nii niritiin bajaane jana jetaote:

“Canuna Joriooneein, jataaen nelateein nena- Romano nese tabai- Silisia batane que nena- Taroso cocoaicha neein neeunra. Atiin jereeunna, cachaauru rai erete, aonacurumiincha,” naa Faborone jana, <sup>40</sup> jeriha nii comaandaantine jaun jetaote, nii ininaanajaaun nichaauraaain, cachaauru rai biji sarasarari Faboro, inauhene curuatoroaain, curuaequiin aonajeeuruhane coina. Nii jaun cuu inauheneicha, curuatoroaain aonajeeuruhane jana jetaote, Ebereeo ere cuhane cuaain:

## 22

<sup>1</sup> “Canu ere aonacuche, canejeraauru, ichauhenaauru, naaonjoaihunrina, canu jabereco coreniha caa que ere inara raite, aonaquichera,” <sup>2</sup> naain jetaote, acaauru ere- Ebereeo cuhane cuaain, acaauru rai aitohane aonaain jetao, curuatoroaain, inauhene curuaaequiin aonajeeure. Nii jana jetaote, inauhene curuaaequiin, aonajeeuruhane jana jetao:

<sup>3</sup> “Canuhetonoaina- Joriooneeun. Silisia batane que nena Tarosone, nejanohanaaneein neeun. Nena laaen cau, Jerosaleeun fojianohineein nenaaneeun. Jataain itolere coitucuhin nena- Camalieli relanojoneeina, rauhi-jiriin cana inoasihuru jerenohi rijijieein nerelaain neeunlu. Nii jaunna, itolere bana, cacoichana aina cutaain, Cana Coaunera jerenohin ichana jereeun, nii ena netojoein ichaquichene rijijieein. <sup>4</sup> Canuhetonainachu, caa Ena Nena Ichaonaa Caohacha esenetaain tonoraain- sacuurera rohecaain, atinanacaneinchuru, tabaauru mucuhin caresero cuhaneuru, teratenajarejetoonlu, satiin quichaauru, enecuru, naaonjoaihunru aina curuaaeccaain. <sup>5</sup> Satiin batirichuru curuaanaa, satiin Jorionichaachene coaraneein nenacaauru ichauhenaauru, naaonjoaaihunrite, rai nota que nii coaraneein neeure. Acaaurute, nii Damasoco nenacaauru cana araachuru- Jorioocuru rai, quiricha letoaaure, jerecuruha acaauru netonoaine, Jesocurisito esenetaeraauru ariin mucunajaain, cau Jerosaleeun uhanajaanune, caseteco coaracuruhane coina,” naain jetaote:

*Jesocurisito coitucuhin, esenetaane nunuhetihane beebejiha Faborone (Ich 9.1-19; 26.12-18)*

<sup>6</sup> “Nete mucunajaanune coina, Jorionichaachene coaraneei nenacaauru ichauhenaauru caje erenaa rocohin, aina Damasoco cuhanune jana, enoto chujutaain turuhelalajeein, bero cuhane cuujihanune jana, luhantiin, dede caje conotiin, luhecotariin canu que jilenete. <sup>7</sup> Nii jaunne, coasiha nuluna caaun, nii canu cunaja caje nalatoon atane ichoae. Nii janate, canu curuaa que, cacurujuatein: ‘Saoro, Saoro, chanuna, jataain, caniha nejeratein cacairichaaeriin, carerojoecaaita.’ <sup>8</sup> naain tonihana janane:

‘Chaneein inaate Curuaanaa.’ naain, bajaanune janate:

‘Canuna, nii iicha cairichaaerii Nasarete cocoaicha- Jesoso neeunra.’ naain catoonrae nii erenaa. <sup>9</sup> Nii canu corihaniha cunacaauru netonoaite, nii cono coaraain, acaauru netonai nesoonetoore. Nete laaen, nii carai irihane aonacurene. <sup>10</sup> Nii jaunna:

‘Chatohanaina ichareeunte, Curuaanaa,’ naain bajaanune janate:

‘Chajaain nimichuhin, nii cuujueeine jaaun Damasoco neseu cunihute, cuu, ichei, iicha chanenenu beeuruhinera.’ naain, catoonrae Cana Curuaanaa.

<sup>11</sup> Nii jana, maosaneein caratiriha nii conone jaunte, canu biji que canu mucuhin, canu taraetaraecaain, camaaure nii canu corihaneraauru, Damasoco neseu tiaaincha.

<sup>12</sup> Nii janate, cuu nelu, leinjiin cacha- Ananihasineein curuajaain, nii Damasoco neseu. Nii jetaote, jeriha Cana Coaunerane rijijieein, rauhijiriin caohacha ichaain, Moisesaacha laenailu tonoraeraneein ne. ‘Acate, caohacha cachaneein nera.’ naauruha que, satiin Damasocoo nenacaauru-Jorioocuru. <sup>13</sup> Nii Ananihasite, turuhin cacoharaain: ‘Ichaso Saoro, coaiteen, enacoauneein conohine inotara.’ naane rijieeoritiinte, inae enacoauneein conoha canotane jaun, nii Ananihasi coaraaun.

<sup>14</sup> Nii baihate, carai:

‘Cana inoaesihuru Coaunera- Cana Coaunerate, ii coaraain, ichotijiae, niicha jerenohi coitucuhin, esinae rauhijiriin caoacha nejesina icharaneein nenea coitucuhin, chaen raaje nujuae caje ichei irihane aonaaine coinara.

<sup>15</sup> Iite, ichaajenihane, nii iicha coarai coaraneein, aohanraneein, beebejiha curiquiin, itolereneein chauratane que- nenacaauru sacutaaincha.

<sup>16</sup> Chajaain, caeneeneje lanaala cuhin, Cana Curuaanaa Jesocurisito bajaain nebaotisaerateeute, ii colucomiincha.’ naain caletoe nii Ananihasicha,” naain jetaote:

*“Naaonjoaainte, Joriooniheichuru rene caletoe Cana Curuaanaara,” naain beebejiha Faborone*

<sup>17</sup> “Inae Damasoco caje cauhin, Jerosaleeun turuhin, cuu nenea Teenforo asae enohin, Cana Coaunera bajaanune janate, carai ecocoe Cana Curuaanaara. <sup>18</sup> Carai ecocohinte: ‘Chajaain luhecotariin caa Jerosaleen caje amuura. Cauhacha neein canu ere beebejeeine, coatia chesenetaaururihaainta.’ naane janane:

<sup>19</sup> ‘Canu Curuaanaa, acaaurute, raotojoein, satiin sinacocacuru naineein ii ere tonoraeraauru mucuhinchuru raanu, caseteconeeuruhane coinane coitucuurera. Chaentechu, tabaauru faoharatihanune coitucure raotojoeincha. <sup>20</sup> Chaen, ii ere beebejera Eseteba sohin jaoruhane coina, mucuhin, ajeri que bodoosihuruhane janane, cuu neeunlu canuhetonoai, sohin jaoruhane coarajihanune coinara. Chaennachu, canu, nii soeraauru cachaauru- cajione beraichaneein neeunlura.’ naanune saijieeinte:

<sup>21</sup> ‘Chajaain cuhachanihura. Canune eletohaaun, coriajai ataneeuru nenacaauru rai, canu ere beebejiha cuhine coinara.’ naain caletoe, Cana Curuaanaara,” naain jetaote, acaauru rai, beebeje Faboro.

### *Comaandaanti bijihu niha Faborone*

<sup>22</sup> Nii jaun jetaote, inauhene aonajeeonrihuruhanane baiha jetao, nujuae soaijiin jetao:

“Ichaonaa nainiheine caa cachata. Letonoaneein, caa cana rai chauratane caje betacaainera,” naauruha <sup>23</sup> nujuae soaijiin, cajionene maajeein romasiinchuru, cajihanein ucuun cuaainchuru, butuuneneenanain riajaainna jaun jetaote, <sup>24</sup> soondarooru loreri asae, Faboro joerateein jetao, bisichate niqui soondarooru curuaanaa- comaandaanti, “Naaonjoain ichacaaunne corenihate, caniha obajeein caque nejerateeurera,” naain biha Faborone coina niqui.

<sup>25</sup> Nejetaote, inae bisihuruhanane coina, ichohacuruhanane jana jetao:

“Roma rai sioraranooru nihanatiin, bisichene coina nootejian-cocoinanojoneein neeicheta,” naain bajaain jetaote: “Nii ichoae tacaain, niheichu, ‘Naaonjoain corenihate, ai caa cachara.’ naain coitucueralanaala, Roma rai siorarano casetecana nainiheeicheta,” naa nii comaandaanti que jaurii- cafitaan rai Faborone jaun jetaote, <sup>26</sup> nii comaandaanti coinetein jetao:

“Coaraain aihu, taa cacha ainara, Roma rai siorarano jetaora,” naain jetao be nii cafitaan.

<sup>27</sup> Nii jaun jetaote, Faboro rohan nichuuntaain jetao:

“Esinae chachu rauhijiriin, Roma rai siorarano neeinta,” naain bajaa nii comaandaantine jana jetaote:

“Esinae rauhijiriine aca neeunra,” naa Faborone jaun jetaote:

<sup>28</sup> “Caraita, banejelanaala core coriqui que, Roma rai siorarano nihanune coinara,” naa nii comaandaantine jana jetaote:

“Canu nejanoha caje coauneeina aca neein neeunra,” naain jetao, tonorae Faboro.

<sup>29</sup> Niritoha Faborone aonaain jetaote, caje amuhacoaaure nii bisinaa jereraauru. Nii comaandaanti netonoain jetaote, coasiha nesoonete, Roma rai siorarano nihane saijieein, *cadena* que Faboro ichoaratihana jaun.

### *Jorioocuru curuaanaacuru, acatiha niha Faborone*

<sup>30</sup> Nii cojoanoon jetaote, caohachaaain rauhijiriin, Faboro coluru-jueruhane jaan leranu coitucuha rauhijiriine coina jetao, jauriaanejeein Faboro caje *cadena* batuhichatein, jitariin Jorioocuru curuaanaacuru, batirichuru curuaanaacuru, naaonjoaihunri taojiaerate comaandaanti. Nitohanein, taojianaaratein jetaote, nii baiha Faboro raeratein, acaauru acatiha te jetao, cuu irihane aonajeeuruhane coina.

## 23

<sup>1</sup> Nii jaun jetaote, nii Jorioocuru curuaanaacuru netaojiaain nenacaauru coarajeein jetao:

“Chasocuru, enanetojoeine ichaaojoein raotojoein casuujua coaraain neen, Cana Coanera notaracae,” nae jetao Faboro.

<sup>2</sup> Nii jaun jetaote, cuu niha batirichuru curuaanaacuru curuaanaa- Ananihasinein curuajaine jaun jetao, nii Faboro roha nenacaauru letoae jetao, nii Faboro ujuae faohitocuruhanane coina. <sup>3</sup> Nii jaun jetaote, nii batirichuru curuaanaacuru curuaanaa rai:

“Cana Coanera netonaite, ishoeraterein, coitucuha nocoetohi inatiin, caohachaaain ishujua coariheei rijitohina jaunra. Esinae rauhijiriin baaso ichacaaune coaraaine, aitoa Cana Quiricha cuhanene tocohaneein ichaaine coinete, nii ii nelauriana jaun, nelauriaai. Coatia aitoa Cana

Quiricha cuhanene reroitiin, casoerateine coina niheita,” naain jetao tonorae Faboro.

<sup>4</sup> Nii jaun jetaote,

“Niritiina, Cana Coaunera rai batirichuru curuaanaacuru curuaanaa no-coeje chanureeite,” naaure jetao, nii cuu- nenacaauru.

<sup>5</sup> Nii jaun jetaote,

“Batirichuru curuaanaa nihane coitucuhaaunnaate, chasocuru,” naain tonoranajaain jetao, “Cana Coaunera Quiricha inoasi cuhane: ‘Coaa inara curuaanaa que, tonaain baasoneein iriachera.’ naa natiinna, coitucuenihanune jaun aitoonra,” nae jetao Faboro.

<sup>6</sup> Nii baiha jetaote, “Caa batirichuru curuaanaacuru tabaaurute, sadoseeone. Jana tabaaurute, fariseeocurune,” naain, nainain coaranajaain jetaote:

“Chasocuru, canuhetonaina fariseeo neeun, fariseeo caje nefoeratenaneein nenea nichaaunna jaun. Canuhetonai, ichanana nainiha onacaaurune esenetaanune corenihate, cacoluruhecure,” nae jetao tonijiaain Faboro.

<sup>7</sup> Niritoha Faborona jaun jetaote, nejesinajeein, ita cotaicha rijitocure nii fariseeocuru aina sadoseeocuru. Niritiin jetaote, ita cotaicha rijitiin jetao, ita caje nelerucure, <sup>8</sup> “Ohane baiha jera, caje ichanaai nihei cacha. Chaen jera nihei Cana Coaunera letono- anjeraauru. Chaen jera nihei cacha suujue, cacha corii,” naauruha sadoseeocurune jaun. Jana, fariseeocurute laaen, niha nitohanaine esenetaaure, itolereneein. <sup>9</sup> Nitohanein, cuu ita rai nujuae soaichuruha, satiin cuu nenacaauruna jaun jetaote, fariseeocuru laurineeuruha nii cuu nenacaauru cacha relaaurerana jaun jetao, Faboro cocoaeratiha nimichuhin jetao:

“Coatia chatohaneei baaso ichaain nihei caa cachata. Jerihanete, leeinjiin suujue, rai erecaihara. Ainihane, Cana Coaunera letono leeinjiin anjerate rai erecaihara,” naaure jetao, nii Cana Coaunera Quiricha Inoasi que cacha relaaurerana- fariseeocuru.

<sup>10</sup> Nii jaun jetaote, jelai choae jauhecotojoeriin, nejesinajeein ita suujua rerohecaain, ita que nejerateeuruhana jaun jetao, nabana cunaitaain, Faboro teeuruhane coataa jetao nii coasiha rai soondarooru tabaauru cotijiaain jetao, nacoauneein jelaiha soondarooru loreri asaae jetao Faboro joerate, nii soondarooru curuaanaa- comaandaanti.

<sup>11</sup> Nii cojoanotiin, Faboro rai ecocohin jetaote:

“Chaque casilanaala, laraajiin, chaque tonajelanaala, raotojoein neura. Cau Jerosaleeun, quere beebejeeine rijitoejin, jerichanetojoein, Romau cuhin, Romau nenacaauru rai netonai, quere beebejeeinete nera,” nae jetao Faboro rai, Cana Curuaanaa.

*Ita suujuau tacaain, Faboro sohin jaonaa jerecuruhane*

<sup>12</sup> Nii cojoanoon jetaote, janone ita suujuau tacaure Jorioocuru tabaauru, Faboro sohin jaoruhane coina. Nitohanein, ita suujuau tacaain jetaote: “Faboro sohin jaonaareein tiaain, coatia lenoneein, acau coriaha-cacheein. Jana, nii saijieein, Faboro sohin joelanaala lenoneein, acau cohin, naaonjoaacachene, cana carichaine Cana Coaunerara,” naaure jetao, <sup>13</sup> jenachoonca amuritiin Jorioocuru, Faboro sohin jaoruhane coina, ita suujuau tacaain. <sup>14</sup> Nitohanein, coaacuruhana jaun jetaote, batirichuru curuaanaacuru, Jorioocuru coaraauru bichauhenaauru, naaonjoaihunri rene turuha cuure jetao. Turuhin jetaote:

“Faboro sohin jaohacaanune reein tiaain, coatia lenoneein, acau coriaacaanuhinta. Jana, nii saijieein, Faboro sohin joelanaala, lenoneein

acau cohin, naaonjoaacaanune, canacaanu carichaaaine Cana Coaunerara,” naaure jetao, acauru rai. <sup>15</sup> Niritiin jetaote: “Aihana jaun, inara le lauriin neiniquichene, inara leeochoaauru aina, nii coaraneein neiniquichene, esine rijitjoein eresi: ‘Caohachaain rai rucuhenacai bajaacaanu cajene coina.’ naain esine rijitjoein, comaandaanti caje bajaain, cotihacuchete, inara rene jaoha uuruhane jana cojoaain, turuasichuruhane ajiniha, sohin jaohacaanura,” naaure jetao.

<sup>16</sup> Nii jana jetaote, beorihuruhana jaun jetao, coitucuuriin, nii Faboro rai biha cue jetao, soondarooru loreri asae turuhin, rai calaohi riji- rai bai calaohi. <sup>17</sup> Niritiin bihane jaun jetaote, leinjiin cafitaan cotijiaain jetao,

“Carai caa enamanaa amaa comaandaanti renete, leinjiin erenaa beinera,” nae jetao Faboro.

<sup>18</sup> Nii jaun jetaote, nii enamanaa amaain jetao, comaandaanti acatiha turuhaain jetao,

“Nii caseteconeein nenea Faborote, carai ereein caletoe, ii rene caa enamanaa turuanune, ichei leinjiin erenaa bihane coinara,” naain jetao, biha nii cafitaan, nii comaandaanti raine jana jetao, <sup>19</sup> biji que, nii enamanaa mucuuriin taratarajiaain, jelai amaain jetao:

“Tonai erenaate carai benaa jereita,” naain bajaane jana jetaote:

<sup>20</sup> “Jorioocurute, ita suujuau tacaure, ii caje bajaauruha eresine, nii coaraneein nenacaauru rene Faboro letoaaaine coina jetao. Esine rijitjoein: ‘Caje rai rucuhenacai bajaacaanu raotojoeine coinara.’ naaurureein jetao. <sup>21</sup> Nijiaonriha, nii esenetaain neeina. Jena choonca amuritiin acauru cachaaurute, cohacure, bujuaihu netiin, letonoa jatoroaain, Faboro sohin jaoruhane coinara. ‘Faboro sohin jaonaa reein tiaain, coatia lenoneein, acau coriaacacheein. Jana, nii saijieein, Faboro sohin joaelanaala, lenoneein acau cohin, naaonjoaacachene, cana carichaaaine Cana Coaunerara.’ naauruha jetao. Leinjiin, ii letoaineeicha jetaote, cohajeure,” naain biha nii enamanaane jana jetaote:

<sup>22</sup> “Nijiaonriha, caa carai beeine rijitiin, chunei cacha rai beeina,” naain jetao, nii enamanaa suujateein letoae nii comaandaanti, cauha cuhane coina.

### *Coberenadoro Ferisi acatiha nerujue coina, Faboro letoaauruhane*

<sup>23</sup> Nii jaun jetaote, coroatajai rai cafitaancuru cotijiaain, letoanajae jetao, coroata fashai soondarooru taojiaauruhane, tijaacha que cuuruhane coina. Jana, caaunsi chooncaneein cabario choae cuuhenuuru, naaonjoaain nerujueeuru coina. Jana coroata fashai rejoin aina cuhenuuru, naaonjoaain jetao nerujueeure, Sesareea cuuru coina. Nitohanein jetaote, netoona rijihu amuritoheriin, Sesareea cuuruhane coina jetao, niritiin erenaa te nii comaandaanti. <sup>24</sup> Chaen jetaotechu, nichoae cuha Faborone coina, leijiin cabario terateein jetao: “Nijiaonriha chatoanein cunaitaauruhane nainatejeein amaichenera. Nirijieein raotojoein raurono turuanichuchera,” naain jetao, caohatiin beraichateein, Coberenadoro Ferisi rene, Faboro turuaerate jetao nii comaandaanti. <sup>25</sup> Chaen jetaotechu, acauru aina quiricha laenaain letoae, Coberenadoro rai, nii comaandaanti. Cuu jetaote, nii niicha letoai quiricha cuhane jetao:

<sup>26</sup> “Jataaen caohati Coberenadoro Ferisi neeine raina, ii coacuhin caa laenaain, ichei letoaaun. Canuna Calaodio Lisihasi neeun. <sup>27</sup> Jorioocurute, caa leinjiin cacha mucuhin, sohin jaonaa coaacure. Nena, Roma rai



siorarano nihane coitucuuriin, canu rai soondarooru taojiaain, acaauru aina cuhin ichoterateeun.

<sup>28</sup> Nitohaneeinna, ‘Cha jaun cha. Cha corenihacha caa coluru-jueeureta.’ naain caraajenhane coitucuhanune coina, acaauru coaraauru bichauhenaauru- rene amaaunlu.

<sup>29</sup> Nitohaneein, amaain bajaanune janate, acaauru quiricha cuhane aitohane rijijieein que aitiin, joaereein colurujueeure. Niha chatohaneein, sohin jaoruhana jaan lera colane techu, sohin jaonaa jerecure niqui. Nieichu, nii caresero cuhane nihane jaanu lera nihanatiin, nete, nii choae tacaain, sohin jaonaa jerecure.

<sup>30</sup> Nitohaneein, sohin jaonaa coacuruha Jorioocurune coitucuurina, caa ii rene letohaun. Chaennachu, raotojoein, ii acatiha, caohachajeein colurujueeruhana jaan lera beein, rucuhecuruha caa colurujueererane coina aitoonra,”

naain jetaote, quiricha laenaain letoae Coberenadoro Ferisi rai, nii comaandaanti.

<sup>31</sup> Nitohaneein, erenaa teein letohanajaa comaandaantine jaun jetaote, Faboro amaature jetao, janotiin nii soondarooru, Antipatriau tiaain, nii letoanajaane rijijieein. <sup>32</sup> Nii cojoano jetaote, jelaiha soondarooru loreri asae cauha cuure nii tijia que cunacaauru soondarooru. Jana cabario choae cunacaauru jetaote, Sesareea tiaain cuure jetao, Faboro jiniichaain.

<sup>33</sup> Nitohaneein, cuhin jetaote, Sesareea turuhin jetao, nii Coberenadoro rai, nii comaandaanti letono- quiricha teein jetao, Faboro netonai teure jetao.

<sup>34</sup> Nii jaun jetaote, quiricha jasaracaain ereretaain coaraane baiha jetao:

“Chaa cajete, unaa neeita,” naain Faboro caje bajaa nii coberenadorone jana jetaote:

“Silisia batane cajena unaa neeunra,” naain jetao rai be Faboro. Niritiin rai biha Faborona jaun jetaote:

<sup>35</sup> “Inae tururuha nii icholurueraaurunena, ii ere aohareeunicha,” nae jetao Faboro rai, nii coberenadoro.

Nii baiha jetaote, nii caohatiin ajeri caje- Erodesi charatenohin- loreri asae Faboro fuerate, caohatiin beraichateein.

## 24

### *Coberenadoro Ferisi acatiha erejiha Faborone*

<sup>1</sup> Saoqui janohi baiha neeoriin jetaote, turuha uhe nii batirichuru curu- aanaacuru curuaanaa- Ananihasi, acaauru bichauhenaauru tabaauru, ita coulurujueerera coroatajanera Teeorotorosi neei curuajai *abogado*, naaon- joainuri uhaain turuha uhe. Acaauru jetaote, nii coberenadoro acatiha nichaauraaure, Faboro coulurujueeruhane coina. <sup>2</sup> Inae nitohaneein, Faboro mitaain, turuaauruhana jaun jetaote, nii coberenadoro rai ere jetao nii *abogado* Teeorotorosi:

“Jataaen narihara, curuaanaa Coberenadoro. Ii corenihate, raotojoein nihacache. Narihara, itolere coitucuhin, caohachaaain cana atane rucuhaca, nitohaneein ichaaine coreniha. <sup>3</sup> Itolere sacutaain, nitohaneein ichaaine coitucuhacaanu, inetono janonaa bana. Jataaente, caohati coberenadoro neein neeicha, Ferisi. Jataaena, ii coroaajihacaanu banejelanaalara,” naain irihane baiha jetaote, inae Faboro coulurujuenaa nunuhetein jetao:

<sup>4</sup> “Nabana, ii rai caeneenejihacaanune coataa, atiin canacaanu aonauna irihacaanu. <sup>5</sup> Caa cachate, itolere baaso uhai nejesina ne. Acate itolere, cana rai chauratane sacutaain amuhemujeein, Jorioocuru lerurucoai nejesina

ne. Acate le laurii cacha- nasarenoneein curuajaihuri curuaanaa neein nenea nera. <sup>6-7</sup> Chaentechu, rautaenihacaanune asajainejeein, nejelau cachaauru enoae Jorionichaanune rai Teenforo asae. Nii corenihana, mucuhacaanulu. <sup>8</sup> Cajé nachuinti bajaaute, esinae rauhijiriin, itolere ichaane coreniha caa coulurujihacaaune coitucuhi,” naain jetao, nii Faboro couluru-jue nii ita coulurujueeuruha joricocurune, acaauru coroatajanera- *abogado* Teeorotorosi, coberenadoro Ferisi rai.

<sup>9</sup> Nii jana jetaote, jerichanetjoein cuaain coulurujeeure nii cuu nenaauru leeochoauru Jorioocuru netonai. <sup>10</sup> Nii ainate, Faboro rai, biji lalari jetao nii coberenadoro, iriha Faborone coina. Nii jaun jetaote:

“Nihei chaque tonajelanaalana, ichei erereuni cajabereeo coreniha, ii cana atane rai- itolere rucuheraanu que nenaaneei, bajaanacaain, inoaelu caje coauneeine coitucuhanune jaunra. <sup>11</sup> Lechoonca coroata janoheca, Jerosaleeun turuhin, Cana Coaunera bajaebajaecaaunera. Ichaajenihanete bajanaa naineeicha. <sup>12</sup> Coatia chunei cacha aina, ita cotaihajihaanune jana caurucuruhi, chaelai janonaa banata. Niheichu chaen, ita taojiananaja-Teenforo asae nihanatiin, chunei cachaauru rerohecahaunta. Niheichu, ita taojiaauruhane jaancuru sinacocacuru asae nihanatiin. Niheichu, cuu netiin chunijiun cachaauru rerohecahaun. <sup>13</sup> Nii jaun, nihei, chunijiun cuain tonaain cacoluruecuruha caa cachaaurune jaanuta. <sup>14</sup> Nena caraa-jenihane, canu ichao bereeunicha, rauhijiriin. Canuna cana inoasihuru coauneraneein nenea Cana Coaunera rai niicha jerei icharaneein neeunra. Nii Ena Ecoona Ichaonaa Caohacha- Jesocurisito tenojoine, canu, esenetaain tonoraaun, Cana Coaunera ere bera inoasiuruhacha laenanohineein nenea nihana jaun. Nete, nii canacaanuhacha esenetai que, ‘Chaqueje nelatihei,’ naaure, caa canu coulurujueracuru. <sup>15</sup> Aihuruhane rijijieeina, canu netonai inae cuu tihane bana, satiin onacaauru ichaterichaain Cana Coaunerana jaun, ichanacururichaain nechú aansaineein onacaauru, caohacha cachaneein naaonjoainurine esenetaaun. <sup>16</sup> Nii jaauna, caohachaain rauhijiriin, jeriha Cana Coaunerane rijijieein, casuujua coaraain neeun, Cana Coaunera notaracae, satiin cachaauru notaracaene maajeein. <sup>17</sup> Itolere sacutaain, cajihaneein amuhemuhecaun bajaanacaaine baihana, coriqui uhaain, jelaiha canu ataneu caaun, itolere que necairichajeein ichaonacaauru rai teein acaauru coroatajanichaaunne coina, chaen, Cana Coaunera bajanaanaja coloheri Teenforo asae, Cana Coaunera rai, itolere lenonecuru sohin tihanune coinara. <sup>18-19</sup> Nii ina ichaaun, nuculocohin, canu couteri loroaloroariin joeratihanune baiha, aitoha cana Quiricha Inoasi cuhanene rijijieein. Coatia arajii cacha codoriaain, ichahaaunluta. Niheichu chunei cacha rerohecaenihanune janate, nii ita taojiananaja Teenforo asae canu coaracurelu- Asia batane caje unacaauru tabaauru Jorioocurura. Acaaurutejian uhin, cacoluruhecuruhane laaen caohachae, esinae rauhijiriin chatohanai baaso ichacaaunne coaracuruhane. <sup>20</sup> Nete urene. Caa cau turunacaauru Jerosaleen caje unacaaurute, Jorioocuru curuaanaacuru, batirichuru curuaanaacuru, naaonjoaain acatiha teein, acaauru rai, cacoluruhecuruhana jana, ecu neeurelura. Acaaurute aihane jaun naine, chatohaneein baaso ichacaaunne coitucuhin cacoluruhecuruhane caohachae, nete nainecurenera. <sup>21</sup> Acaihanejei, nii cacoluruhecuruhane banaachana, satiin codoaquiin aonajeeuruhane jana, tonijiaain: ‘Ichanana nainiha onaane esenetaanune corenihacha nachura, cacoulurujeein, canasina coauquichete.’ naaunlura,” naain jetao be Faboro.

<sup>22</sup> Nii jaun jetaote, inae raotojoein, Nii Ena Ecoona Ichaonaa coitucuha, nii coberenadoro Ferisine jaun jetao, nirijieein nii ratiriin:

“Inae turuha comaandaanti Lisihasine banana, inara cotiaratereuni ena-coauneein, nii neruujue coina,” nae jetao, Ferisi.

<sup>23</sup> Niritiin jetaote, nirijieein mucuhineein Faboro sirichuruhane coina, cafitaan rai aite Ferisi. Chaen raotojoein Faboro rene turuhin, rai niicha latei tein naaonjoaain, aina erenaa nainecuruha belaichaaurune coina jetao aite. <sup>24</sup> Nii cojoanoo cojoanoo jetaote, nacoauneein turuha uhe Ferisi, rai comasai Dorosila aina. Nii comasai jetaote, Jorioocuru bene ne. Nitohaneein turuhin Faboro cotiharatiha Ferisine jaun jetaote, turuhin acaauru rai Jesocurisito esenetaain, tonoraane que, acaauru rai ereerejiha Faborona jaun jetao, cuu rautatiin aonajeeure, itolere que, acaauru rai ereerejihana jaun. <sup>25</sup> Ne jetaote, “Caohacha nejesina ichaechajeein ichaoinete caohachae. Jana baasohacha ichajeein ichaohine caoachaa, inae cuu tihane bana, satiin colurujihana curichaain Cana Coaunerana jaunra,” naain rai biha Faborona jaun jetaote laen nesoonete, nii Ferisi. Nesoonetiin jetaote:

“Inae, chajaain caunihu. Inae nainichaaune banana, coaiten ii cotiharatereunicha,” nae jetao, Faboro rai, Ferisi.

<sup>26</sup> Niritiin jetaote, coriqui que, coretiha Faborone jeriha, jianihane coinana jaun jetao, araai saain nihane cotijiae, rai irihane coina Ferisi. <sup>27</sup> Nirijieein, coroata jaanacaain ichaane baiha jetaote, coberenadoro nihane caje jetao mitue Ferisi. Inae mituha Ferisine jana jetaote, coreenraniha enoe- Forisio Fesetoneein curuajai. Ne jetaote, jerecuruha Jorioocurune rijijieein ichaane coina jetao, caseteconein Faboro ratiriin jetao, mitue Ferisi, nabana baasoneein cotaairiin coaracuruha Jorioocurune coataa.

## 25

### *Feseto acatiha niha Faborone*

<sup>1</sup> Inae coberenadoro nihane coina, Sesareea turuhin, coberenadoro neein enohane baiha jetaote, nichata janohane cuhane jetao, Sesareea caje, Jerosaleeun cue jetao Feseto. <sup>2</sup> Nii jana jetaote, cuu rai Faboro coulurujueeure jetao, nii Jerosaleeun nenacaauru, batirichuru curuaanaacuru, Jorioocuru rai jataaen nelatein nenacaauru naaonjoainuri jetao, Faboro coulurujueeure. <sup>3</sup> Nitohaneein, coulurujueein jetaote:

“Atiin canacaanu rai, cau Jerosaleeun nii Faboro joerateeura,” naain bajaare jetao, bero cataaun coharateein, Faboro sohin joerateeuruhane coina coacuhin niqiu. <sup>4-5</sup> Ne jetaote:

“Cuute, Sesareea caseteconein nedaelura. Nena, ena chajaaajoaain jelaiha cureeunnicha. Inae jelaiha cuhanune janate, nainecure cajiniichaain uhin, cuu tein, chaaelai que situha, nii cachane, coulurujuenaa nainecure inara rai jataain nelateineein nenacaauru- cocoainanacaihurura,” naachae jetao, acaauru rai Feseto.

<sup>6</sup> Nii Jerosaleeun, fosa janone nihane, lechoonca janoneein nihane baiha jetaote, jelaiha Sesareea cauha cue jetao Feseto. Nii cojoanoo jetaote, ita coulurujueeurera rucuhecuruhana jaan coloheri- *tribonal* asae rori ichoae nelauriaain jetao, Faboro raerate. <sup>7</sup> Inae Faboro turuaauruhane jana, enoha Faborone jana jetaote, rohan nichuuntaacoaain jetao, coulurujueeure Jerosaleen caje uhin turunacaauru- Jorioocuru. Itolere baaso cuhane cuaaichuru, joareein caje erenaa rocohichuru, coulurujueeure jetao, baaso ichaenihane sainejeein. Nii jaun jetaote, esinae rauhijiriin erenaa nihane coitucuurene.

<sup>8</sup> Nii jaun jetaote, acaentonai, rai jabereco coreniha jetao:

“Coatia chatonai baaso que irihaun, Jorioocuru aitoonjoa, Jorioocuru ichao coacuhinta. Niheichu, ita taojiananaja Teenforo coacuhin irihaunta.

Niheichu Romanocuru curuaanaa coacuhin irihaun baasoneeinta,” naain jetao, ere Faboro.

<sup>9</sup> Nii jaun jetaote, caohachaain Jorioocuru aina nedanaa jerihane jaun jetao:

“Cureeina Jerosaleeun, cuu teein nii ichei rucuhenacai rucuhecaanne coinaneta,” naain jetao, Faboro caje bajaee Feseto.

<sup>10</sup> Nii jana jetaote:

“Nena jerichanejeein, Romanocuru curuaanaa- cana netonai curuaanaa- eenferadoro icharatenohi neruujueanaaja coloherihu *tribonal* asae caa neeun, cau teein neruujueanaa nainichaaune coinara,” naain jetao, tonorae Faboro. Niritiin tonoraain jetao te: “Ii te, raotojoein Jorioocuru rai baaso ichaenihanune coitucuhin neeicha. <sup>11</sup> Esinae rauhijiriin, jataain baaso ichaain, baaso que situhin nihanune coaraain, nii coreniha casohin cajaanaa jerera nihane, coatia nii caohaterihaaun, coatia onaa coasihaaun. Jana, esinae rauhijiriin, erenaa nenihane, nihei chunei acaauru rai canu tenaa nainihe, casohin cajooruhane coina. Nii jaunna, ii caje bajareeunni, raajenihane canu rai- rucuhenacai rucuheca Romanocuru curuaanaa- eenferadorone coinara,” nae jetao Faboro.

<sup>12</sup> Nii jaun jetaote, nii cuu nenacaauru rai coroatajaneraauru caohachaain suujua rauhi coaraauru caje jetao bajaee Feseto. Nitohanein, bajaane baiha jetaote:

“Inae Romanocuru curuaanaa, ii rucuhecane coina bajaaina jaunte, Romanocuru curuaanaa rene curiquincha,” nae jetao Feseto, Faboro rai.

### *Curuaanaa Aquirifa acatiha niha Faborone*

<sup>13</sup> Nii baiha neenejeein jetaote, namujera Berenisi aina jiniiquiin cuhin, Sesareea turuha cue, curuaanaa *rey*- Aquirifa, Feseto coaraane coina. <sup>14</sup> Cuu araai janohin aina niha- nii curuaanaana jaun jetaote:

“Cautene leinjiin cacha caseteconein Ferisiicha ratirilura,” naain jetao, bee Feseto. <sup>15</sup> Niritiin beein jetaote: “Jerosaleeun turuhanune janate, carai coulurujeeurelu batirichuru curuaanaacuru, saain Jorioocuru bichauhenaauru, naaonjoainuri, casetecaanune coinara. <sup>16</sup> Nena, acaauru rai: ‘Coatiha nainihe aonaeniha cachane jana, nedaa coulurujeein niha namute cachane, nii coulurujuejojoi cacha casetecain, chatoaneein teein, sohin joaera jereein, naaonjoain niha Romanocuru rai rauhineti. Niha ita coulurujueranete, ita acatiha netiin, nii colurujera aina iriha nii coulurujuejoinete jere Romanocuru rai rauhicha.’ naaina acaauru rai beeunra,” naain jetao beebeje Feseto. <sup>17</sup> Niritiin beebejeein jetaote: “Nii jaunna, cau tururuha nii satiin coulurujueurerane jana, nii cojoanoonecoriin, cacha rucuhecaanna jaan coloheri *tribonal* asae rori ichoae nelauriaain, nii cacha raerateeun, nii rucuhecaanne coina, <sup>18</sup> inacojoein niqui, ‘Chatohanein jecha sosereen, chatohanein Romanocuru curuaanaa aitoonjoa tonoraa cachane caohatihane coreniha jecha carene letoaaure.’ naain niqui. <sup>19</sup> Nete, leinjiin acaihanejeein, nii acaauruhacha esenetai que aitiin, chaen nii onaalu Jesusoneein curuajai queecha maroaain coulurujeeure, ‘Enanetojoein jete, ichoae,’ naa que Faborona jaun. <sup>20</sup> Nii jaunna, nii aina, cha coitucuenihanune jaun, Faboro rai: ‘Cureeina Jerosaleeun, cuu nii ichei rucuhenacai rucuhequine coina’ naain bajaun. <sup>21</sup> Nii janate, ‘Cana curuaanaa, Romanocuru curuaanaa eenferadoro jete, rucuhere raajenihane,’ naain bajaee, cana curuaanaacha rucuhecane coina. Nii jaunna, rucuheca eenferadorone coina letoaanunereen tiaain, caseteconein nihane coina aitoon,” naane jana jetaote:

22 “Canuhetonaina, iriha nii cachane aohana jereeunra,” nae jetao, curuaana *rey* Aquirifa, Feseto rai. Nii jaun jetaote:

“Eresite aohanriquiincha,” naain jetao tonorae Feseto.

23 Nitohaneein jetaote, nii cojoanoo, ita taojiaauruha cachauruna jaan coloheri asae, netaojiaauruhane jana, enoha cuure jetao, jataain nelateineein neeuruhane coarateein Berenisi aina, *rey* Aquirifa, chaen soondarooru curuaanaacuru aina nii cuu nenacaauru nese cocoaichacuru, jataain nelateein nenacaauru naaonjoainuri aina jiniiquiin. Nii jana jetaote, Faboro joracerateein jetao, raerate caresero caje, Feseto. 24 Nii jana jetaote, inae turuaauruhane jana:

“*Rey* Aquirifa, satiin cau canacaanu aina netaojiaain nenacaauru, nocoacaa cacha coulurujuejoin. Satiin Jorioocurute, carai coulurujueure. Saain Jerosaleeun nenacaauru, cau Sesareea nenacaauru, naaonjoaihunrite nujuaen soaisoaihanaain, ‘Sohin joerateeura.’ naain jataain ohane jerecure. 25 Nete, chatoaneein baaso ichaene, caa cacha. Nihein sohin jaoha- cachana jaan leranu carai. Nete raajenhane rucuheca- cana curuaanaa- Romanocuru curuaanaa- eenferadorone coina, bajaana jaun, inae nii jerichaauna jaun, ucuae letoareeuncha,” nae jetao Feseto. 26 Niritiin jetaote:

“Nete nene, ‘Naaonjoaain que situhin, naaonjoaain ichaana jaunte, caa cacha coulurujueurerera.’ naain beein, laenaain, canu curuaanaa Romanocuru curuaanaa- eenferadoro rai, beein quiicha letoaaene. Nii jaunna, satiin cau neeichene jaun, caa raerateeun, caohachaaain, ii cau neeina jaunra curuaanaa Aquirifa. Inara acatiha teein, bajaanune, raotojoein tonaain ereeuruhane, laenaain letoanaa nainichaaun, cana curuaanaa eenferadoro raine coinara. 27 Jana, ‘Naaonjoaain corenihana, caa ii rene, caa cacha letoaaunra.’ naain chaelai que tonaain benihanunete, ‘Chanuna joareein, caa cacha letoae, lera colane.’ naain nii que, nererojocare cana curuaanaa- Romanocuru curuaanaara,” nae jetao Feseto.

## 26

*Coulurujueuruha Jorioocuru najaa lera biha curuaanaa Aquirifa rai Faborone*

1 Nii jaun jetaote, Faboro rai:

“Inae laen naineein, ii jabereco coreniha ereeina,” naa *rey* Aquirifane jaun jetaote, acauru rai ucuun biji sijitaain jetao:

2 “Jataaenna coroejeeun, *rey* neeine acatiha, cau ererichaaunine jaunra, *rey* Aquirifa. Aihana jaun, atiin canu ere aonaunna, itolere que cacoluruecuruha Jorioocuru najaa que, erete aonaain coitucuhicha. 3 Iite laen, jitariin itolere Jorionichaanune ichao coitucuhin, ita rerohecaain ita rai ereerecaanune jaanne maajeein coitucuhin neeicha- curaanaa. Nii jaunna, atiin quere aonaaine jereeunra- curuaanaa,” naain jetaote:

*Jaiti Cana Coaunera coitucuhin, esenetaenhane bana, rai nichao biha Faborone*

4 “Satiin Jorioocurute, canu ichao coitucure, acauru aina ichaorejetocaaunlu, canu ataneu, chaen Jerosaleeun, naaonjoaihun, canu enamacane caje coauneeina jaun. 5 Chaen techu, raotojoein fariseeoneein nihanune coitucuhin, rauhijiriin benaa nainecure ii rai, jerecuruhane. Nii coitucuhichene rijijieina, leeochoauru amuritoheriin jataain rauhijiriin, canaacha esenetai tonoraera neein nihacaanu. 6 Cana inoaensihuru rai Cana Coaunera aitoonjoa nii niicha letoanaa jerei canaacha cohajei esenetaain

tonoraanune corenihate, caa cacoulurujueein, caa chaatiha canu turuaer-ateeurera. <sup>7</sup> Canacaanu lechoonca coroata laurii Isaraeli cocoaichacuru-foeratenojoineein nihacaanunena, nii cana foerateeurera rai Cana Coaunera aitoonjoa cohajihacaanu enanetojoeein. Nii jaunte, Cana Coaunera coroa-jeein bajajeein, naitoonjoan niicha jerenohin ichacaaun, jiicho, janotiin, naaonjoaainchuru. Nii cana inoaensihuru rai Cana Coaunera aitoonjoa-canaacha cohajei ere tonoraanune corenihate, caa cacouluruhecure Jori-oocurura, *rey* Aquirifa. <sup>8</sup> Chanuna onacaauru ichatiha Cana Coaunerane esenetaeneeiche inara.”

*Jesocurisito ranojoihunru rohecaain cairichaerichaaetohalune biha Faborone*

<sup>9</sup> “Canuhetonainechu, jauriaa, ‘Caohacha jecha ichaaun,’ naain, Nasarete cocoaicha Jesoso ere esenetaain tonoraeraauru rohecaain, acaauru cairichaain, <sup>10</sup> Jerosaleeun batirichuru curuaanaa letononeein caresero cuhanena maajeein arajii Jesocurisito esenetaeraauru teraterejetoonlu. Chaennachu, tabaauru sohin jaoruhane rautatiin coroaerejetoonlu. <sup>11</sup> Inaajoan saneein chaainti, acaauru casetecaraetoonlu, ‘Inae jian laaen, tonorarihaacaanuhinta.’ naain, nii acaauruhacha esenetai acaauruhacha ere tonorai- Jesoso ere tonoraauruhane jianecuruhane coina. Jataaenna, nechu ansaineein mijiaaineein, acaauru rohecaeraaetoonlu, naain coriaae nejelau ataneu- nenacaauru neseeurune maajeein cuhinchurura.

*Coaiten, ‘Naaonjoaaina, nunuhetein, Jesocurisito coitucuhin esenetaain tonorana nunuheteunlura.’ naain biha Faborone (Ich 9.1-19; 22.6-16)*

<sup>12</sup> Nitohaneein, Damasoco neseeu nenacaauru mucuhin raanune coina coacuhin cuhanu, batirichuru curuaanaa letononeeine janate, <sup>13</sup> bero cuhane cujihanu, turuelalajeine jana, enoto chujutaain, luhecotariin, canu, nii canu aina unacaauru, naaonjoainihacaanune rohan enoto cono amurijiriin conotiin, luhantiin lanaanete dede cajera, *rey* Aquirifa. Nii jaunne, saain jiniiquiin, <sup>14</sup> atane ichoae nemarotihacaanune janate, carai Ebereeo ere cuhane cuaain: ‘Saoro, Saoro, chanuna jataen caniha nejer-ateein carerojoecaai. Nechu jataaen ichaajenihanete, baaso ichaain, iji-abereeon cairichaain, cunaitaa nii aaicha.’ naain canu caje bajaane jana ne: <sup>15</sup> ‘Chaneeinaate curuaanaa.’ naanune janate: ‘Canuna- nii iichaa cairichaaerii- Jesoso neeunra.’ naainte: <sup>16</sup> ‘Chajaain nimichuuna, ichei erete aonaacha. Cauna ecocoon, ichei irihanune, canu letononeein neeine coinara, chaen ena, caa iicha coarai beein, ii que caa baiha- quiicha coarate-nenine maajeein beein, canuneein nihanune coitucuerateeine coinara. <sup>17</sup> Canuna, Jorioniheichuru, Jorioocuru, naaonjoaihunri caje, ii ichoteratiha cureeunicha. Acaauru renena caa ena elotoareeunnicha. <sup>18</sup> Coanaanihute, acaauru nota jirichaeranuque, acaauru rai canu ere beebejeeite, Acaauru Coaunera nichaanune coitucuhin, quere tonoraain, canune maajeein coitucuuruhine, nabana taeneein cuajeein, moconajaera ere tonoraain sacuelanaala, canu, nosa caje cacha mitaeranichaaunne coitucuuruhane, nosa coreniha caseteconein neeuruhane rai- neeuru caje nichoteein, Acaauru Coaunera nichaanune rene tacanaa nainecuruhane coina, leeochoaauru Jesocurisito ranojoihunru aina jiniiquiin neeuruhane coinara.’ naainte caletoe Cana Coaunera Calaohi Jesusora,” naain jetao:

*Rai ereein letoaa Jesocurisitone tonoraa Faborone*

<sup>19</sup> “Nii jaunna, dede caje ecocohin- caletoaera lacoelanaala, <sup>20</sup> jauriaanejeein Damasoco neseeu nenacaauru rene turuhin, acaauru

rai Jesocurisito ere beebejeeunra, *Rey* Aquirifa. Nii caje cuaaina, Jerosaleeun nenacaauru rai beebejiha cuun, itolereneein Jodea batane sacutaain nenacaauru raine maajeeinchuru, chaen Jorioniheichuru raine maajeeina beebejeeunra, baaso ichajeein, neosatihajeein ichaooruhane jianein, Cana Coaunera esenetaain, niicha jerenohi rijijieein ichaohin, inae esinae rauhijiriin Cana Coaunera esenetaeranein ichaooruhane coarateeuruhane coinara. <sup>21</sup> Nii corenihate, ita taojiananaja Teenforo asaae canu eruuruhane jaun, canu mucuhin, casohin, cajaanaa jerecure Jorioocurura. <sup>22</sup> Nete atiin, cacorataaniha Cana Coaunerane jaun, enanetojoein jaiti ichaojoein, Cana Coaunera ere beebejeein sacuuru, satiin- cairicheihuru rai, saain cocoainanacaihuru raine maajeeincha. Coatia chaelai janonaa bana, Cana Coaunera ere bera inoensihuru- Moisesa, naaonjoaihunri aitoonjoa jojohin, rerohin irihaaunta. Jerichanetojoeina, rauhijiriin, ‘Naaonjoarichaain jetao,’ narejetocuruhalune rijitoein: <sup>23</sup> ‘Ohanete ne nii Cana Coaunera letononein unaa- Mesihasiha. Nete, nitohanein ohane baiha, aca niicha ranojihunru ajiinchateraniha, oo caje ichanananein niha cureeincha. Nii baihate, itolere sacutaain, beebejenojonein niha cureein, satiin cacha nota jirichaeraaunu quera, nii aina, Cana Coaunera coitucuruha, satiin cana araachuru necoina, chaen nejelau ataneu nenacaauru niha natiine coinara.’ naain aitoroaetooruhalune rijitoein aitoonra,” naain Aquirifa rai beebeje Faboro.

*Jesocurisito esenetaain, tonoraa curuaanaa Aquirifane jerein, rai ereerejiha Faborone*

<sup>24</sup> Niritiin, ereerejiha jabereco coreniha Faborone jana jetaote, rai nujuae soaisoain:

“Mainajiriin nerelaacha neeine jaunna, nesooneejoaain joaerein ereeite, Faboro,” naa rai Fesetone jana jetaote:

<sup>25</sup> “Coatiana nesooneejoaain joaerein irihaaunte, caohati coberenadoro Feseto. Caa aitocoanne jaante, esinae rauhijiriin erenaane. <sup>26</sup> Caute ne, caa curuaanaa *rey* Aquirifa- itolere niriinanai coitucuera. Nii jaunna, chaque tonajelanaala, nacatiha caa ereerejeeun, acaentonai niriinanai coitucuhin nihane jaun. Coatia chaelai asinojonein nena que caitono nihei. <sup>27</sup> Cana Coaunera ere beracuru- *profetacuru* inoensihuru aitoonjoa esenetaaina, *Rey*- Aquirifa. Rauhijiriina, itonai esenetaaine coitucuuru,” naa Faborone jana jetaote:

<sup>28</sup> “Basijiin lanajeje, caque jererateeine jaun, canuhetonai Jesocurisito rainein nihanunera,” naa curuaanaa *rey* Aquirifane jana jetaote:

<sup>29</sup> “Coatia jerihane, iicha aiheita, curuaanaa. Satiin cau neein aonajeeurera raina, Cana Coaunera bajaun, esenetana nainecuruhane, caa aiha-nune tochaneein *cadena* que cositenojonein nelanaala esenetaauruhane coinara,” nae jetao Faboro.

<sup>30</sup> Nii jaun jetaote, nimichuhin, naain jelai cuure coberenadoro aina curuaanaa *Rey* Aquirifa, chaen, Berenisi, chaen, nii leeochoauru cuu acaauru aina nelauriaain nenacaauru, naaonjoaihunri aina, cuu jelai tein, <sup>31</sup> nii que ereeuruha nejesinajeein, ita raine coina. Cuu jetaote, ita rai nejesinajeein:

“Coatia chatoanei baaso ichaai caa cachata. Cha corenihate, sohin joaerareta. Nainiheinchu, caresero cuhane nihanatiin caseteconein nihaneta,” naaure jetao ita rai nejesinajeein. <sup>32</sup> Niritiin, ita rai ereeuru baiha jetaote, Feseto rai:

“Raajenihane rucuhca satiin curuaanaanein nenea- eenferadorone coina, aitoa caa cachane colanete, jianena naaieeicha,” nae jetao *Rey Aquirifa*, coberenadoro- Feseto rai.

## 27

### *Romau, Faboro letoaauruhane*

<sup>1</sup> Inae Italiau canacaanu letoanaa jerecuruhana jaunte, casetecocuru coaraain raeraanu que le laurii soondarooru- Eenferadoro raineen- curu- ajaihuru rai cafitaan- Jorio neein curuajai rai, leeochoauru caseteconein nenacaauru teeuruhane jiniichaain, rai Faboro netonai teure. <sup>2</sup> Nii jaunna, Andaramitio cofauhana caje cucuana cuhane cuhin coriae nenea- Asia batane que nenacaauru neseeu- cofauhanau tiaain cunaa bote cuhane fauhin, nesaru rai nihana jaun, cuhane fauhin cuhacaanu. Nii janate, ecu neein, canacaanu corihaniha uhe- Masedonia batane que nenea Tesaloneca cocoaicha Arisitaroco. <sup>3</sup> Nii cojoanoo, Sidoon cofauhanau turuhin, cuu najaurihacaanune janate, jataain Faboro belai, nii soondarooru curuaanaa Jorio. Caseteconein cuha Faboro natiinte, bote caje iniin, belaichaauru rene bedaeniha Faborone coarajeein, cuu rai niicha latei teeuruhane coaraje, belaiha cafitaan Jorio. <sup>4</sup> Nii Sidoon caje nesaruhina, canacaanu que tacaain uha cujuanane jaun, nii cujuana que acateraain, Chifere cobene jeroon cuujihacaanu. <sup>5</sup> Nitohaneen cuhina, cucuana jera jaoha cuhacaanu, Silisia batane auha jeroon. Inae cucuana jera jaohina, Silisia, Paanflia, naaon- joainuri batane auhaniha situhin cuhin, Lisia batane que nenea neseu- Mira turuhacaanu.

<sup>6</sup> Cuute, Alejaandiria caje unaa leinjiin bote Italiau cuujenaa rue, nii soondarooru curuaanaa- cafitaan. Nii cuhanete, canacaanu fauherate, cuhane cuhacaanune coina. <sup>7</sup> Nitohaneene, araai janohin, jataain jeraaen cuujihacaanu. Nii jaunna, necairichajeein turuhacaanu Nidoneen- niicha curuaateuri jeraniha. Nii jana, jaiti canacaanu que tacaain uha cujuanane jaunna, Cureta cobena nichaae nitinonohin, Salomoonneen acaauruhacha curuaatei cobene jeraniha situha cuhacaanu. <sup>8</sup> Nitohaneena, necairichajeein cuhin, Cureta auhanihacha rauhijiriin cujueein, Laseaneen curua- jaa nese rohan nenea- Caohatiin Cofauhanaineen curuajaihu turuhacaanu.

<sup>9</sup> Inae carajaa cuhacaanune jaunte, nii tonohana inae cujuana aina jellarona que turuhelalajihana jaun, luhante- cucuana cuhane amunaa, bane- jeniha cujuanane jaun. Nii jaunte, acaauru rai:

<sup>10</sup> “Aonacuchena caa que erete, aonaquiche. Jataaina banejelanaala, cana rai lunaa curichaain, caa amunaane coitucuun. Baana cauhacha nelanaalate, aihacachera. Saainte, nii iicha amai rucuhele aina jiniquiiin nitajiha cureein, caa botera. Cana niha natiinte, onaa nainichaachera,” naain niqui sujuatenajae Faboro.

<sup>11</sup> Nete, nii bote erora, nii bote curuanaa cafitaan, naaonjoainunru, ereecha tonorae, nii soondarooru curuaanaa- cafitaan, Faboro ere tonora- elanaala. <sup>12</sup> Nii jaunte, caohachaojoeniha saneen, nii neeuruhane jaan cofauhanane jaun, cuu neein cujuana aina jellarona bitoanaa jerecurene. Nii jaunte, satiin lalajeein, leeocho fauhana- nii jeelai Cureta cobena que nenea- Fensiau cunaa jerecure, cuu cujuana aina jellarona bitoauruhane coina. Jelaite, enoto soo jeroon neein, cana raoto nichajai que, cana ajaabiji nichajai que naaonjoaain inanacae.

### *Cucuana cuhane niha cujuana tabaine*



<sup>13</sup> Nitohaneente, “Tonaje lanaala jecha cuujerichaanuhin,” naain nesaruhin cuhacaanu, enoto soo jeroon neein ajaabiji nichajai caje uha raujaain aasaeriin jouhaquuin- cujuanane jaun. Nitohanein kuhina, Cureta auhaniha cuujihacaanu niqui. <sup>14</sup> Nete, nii baiha neeriin, enoto soo nichaae cujueein cana raotono nichajai que, enoto mitu dararo caje uhe jataain mijieeinetiin cujuana. Niite, bote que tacaain, richorocoe. <sup>15</sup> Nitohaneente, richorocoeain, cuanaa jerichaanune jaan edacai que, bote cuae nii cujuana, que tacaain macohi auriteein, acatena nainenihacaanune jaun. Nii jaunna, cuu canacaanu amanaa jerihane jaan jeroon, canacaanu amaane coarajihacaanu. <sup>16</sup> Nitohanein kuhina, leinjiin obena laajoiri Caaodanein curuajai rohan situha cuhacaanu. Ucuajai que saaneein mijieeinetiin tacaeniha cujuanane jaunna, jataain necairichaaoriin, tijichaaain canacaanuhacha amai- naluha botene nichoteeuruhana jaan bote laajoiri inacaanu. <sup>17</sup> Nitohanein mucuhin tararaain inaacaanune baihate, cuu, inori que, nii cuhacaanune jaan bote ichohacure, nunaane coina. Nitohaneente, carene araraca- Siretenein curuajai que tacanaa coasichuruhane jaun, cujuana aina amuuruhane jaan bela serichure, ocoai nichaae cuuain, cujuana ainaacha cujueeuruhane coina. <sup>18</sup> Nii cojoanoo, jaiti mijieeinetiin uha cujuanane jaunte, cucuana kuhane, nii bote coneracuru jaonaa nunuheteure. <sup>19</sup> Nitohaneente, nesarucuaanune nichata jano kuhane, bela nujuaauru tabaauru, chaen itolere nii nichotihacaanune que nelatelanaala nenacaaurune majeein jaore. <sup>20</sup> Nitoaneene, araai janohin enoto coarilanaala, nii arasijie nihanatiin coarinihacaanu. Nechu jataain nirijieein nesurocorihei rijijieein, bote nalaaene amunein sacuha fichafichanaane jaunne, “Inae jecha ecu ohacaanune nitajerichaanuhin,” naacaanu niqui.

<sup>21</sup> Nitohanein, araai janohin lenonelanaala nihacaanune jaunte, satiin canacaanu cataaun nichaauraain:

“Coaracuche cachaurute, quere tonoraelanaala, kuhacha nena richae, Cureta caje cana uhaichelu. Colane chachu, cuu raotojoein nihacache. Colane, catohanai baaso que siturihaacache. Nii colane, chaelai que siturihaacache. <sup>22</sup> Nijiaonriha joareein, inara suujua cuuachene. Coatia leinjiinejein orihaain chunei cache. Caa botete laaen, nitajiha cureein. <sup>23</sup> Enene cojoanotiinte, canu rene, rai cache neein- letononein nihanune rai, letono anjera letoae- Cana Coaunera. <sup>24</sup> Canu acatiha ecocohinte: ‘Coa casihara, Faboro. Atiinte, Romanocuru curuaanaa- eenferadoro acatiha tururiquincha. Ii corenihate, atiin onaa caje nichotiha cuurureein saain nii ii aina bote kuhane nenacaaurura.’ nae carai Cana Coaunera letono- anjera. <sup>25</sup> Aihane jaun, cha que tonajelanaala, joenreein inara suujua cuaelanaala, caa caitoonjoan esenetaachacuche. Nii aitoha Cana Coaunera letono anjerane tocohanihate cureein. Esinaete rauhijiriin aite. Canuna, esinae rauhijirin aitohane coitucuhin esenetaun. <sup>26</sup> Nete laen, leinjiin obena que tacaain baulenetoha caa botene jana, cuu nerarichacheeincha,” naain bee Faboro.

<sup>27</sup> Inae coroata semanaa nesarucuaanunena janate, Ariaticoneein curuajai cucuana kuhane cuujihacaanu, janotiin. Nii janate, dede catai rijiu, cuu cajiinein bote amaa cujuanane jana, inae cucuana auhaniha nichuuntaacaanune que nainacure bote beraihurera- marinerooru. <sup>28</sup> Nitohaneente, inae coitucuuruhane jaun, nucuhaano cojounacatein coaracuruhane jana, nichatachoonca saota metorone rai nucuaano. Nii caje cujueein, coaiten nucuaano cojounacatein coaracuruhane janate, coroatachoonca caaunsi metorone rai nucuaano. <sup>29</sup> Nii jaunte, ajeri que tacanaa coasia, bote

roeniha jenaain anajiin nenea coata- aancla nalaare, cuu bote acateein, cuu mucuhane coina. Nii nalaecuruhane nainihate, Cana Coanera bajaeba- jaaecure, chajaain janohane coina. <sup>30</sup> Nii janate, bote macohiniha anajiin nenea coata- aanclauru nalaera rijijieein, nii- naluha botene nichotee- ruhana jaan- bote laajoiri faunaa nunuheteure nii bote beraihurera- marinerooru, nii bote caje sorooruhane coina. <sup>31</sup> Nii janate, coaranajaain, nii soondarooru curuaanaa cafitaanun rai beein, nii soondarooru raine maajein bein:

“Berainajaeneeichenete, caa bote ratiriin sorooruha acaauruhachane, nenereein nichoteeichene jaanura,” nae Faboro.

<sup>32</sup> Nii jaunte, acaauruhacha amaemajei bote laajoiri ichora saaujihure, nii soondarooru, acauhanau naluhane coina.

<sup>33</sup> Inae janonaa raite, satiin acaauru rai, lenonecuruhane coina:

“Inae coroata semanaa, nirijieein caohachaaain lenonelanaala neein, situha cujuana aina fichafichanaane cohaquichenera. <sup>34</sup> Aihana jaun, chajaain chaelainiji que lenonecuchete, nii aina abaantaain nichotena nainequichene, nichoteeiche. Coatia nitajerihaaain leinjiinejein nihanatiin chunei couturiujicha,” nae Faboro.

<sup>35</sup> Niritohane baihate, satiin acatiha teein, faan teberiaain, nichoae Cana Coanera bajaane baiha, nii faan tatuhin, beeunebeeunein que lenone Faboro. <sup>36</sup> Nii jaunte, lenonena coajueeurenihane baiha, inae satiin lenonecure. <sup>37</sup> Itolereneeina, coroata fasha caaunsi choonca saotanein, nii bote cuhane nihacaanu. <sup>38</sup> Nitohaneeine jerenihacaanune jaun tiaaajoaain, nainaaain lenonichaanune baiha, nii canacaanu lenone tirico caute jaoha- caanu cucuana cuhane, nesaraca nii botene coina.

### *Cucuana cuhane naluha botene*

<sup>39</sup> Nii janate, inae janoe. Nete, “Caelai caara,” naain, nii atane coitu- cuurene nii bote beraihurera marinerooru. Nete atiin, cuu- cucuana auha leororo- carene siricha coaraain, cuu nii bote jauriaanaa coacure niqui. <sup>40</sup> Nitohanein, cuu jauriaanaa coacuhinte, nii bote laracaauruha acau cataaunna jaan anajiin nenea coata- aanclauru ichora saujiin ratir- ihure. Nitohanein teinte, bote cocoihacuru, roeneraauun que nelatein nenea cosi lecoaracaare. Nii baihate, bote macohiniha nenea bela to- coore. Nii jaunte, nii aina inae erojoein cucuana auhania nichuuntae nii bote. <sup>41</sup> Nitohanein cuhinte, nichuuntaain carene araraca rarohaqui choae, baulenetoha cue nii bote. Nii jaunte, caohatiin baulenetoha nii bote macohi nichajaine jaun, carene rarohaco choaee liquinetiin, ruru- juanacaje lanaala nedae nii bote macohi. Nii jaunte, jataaen mijieinein tacaa- fichafichanaana jaun, fichafichanaa caun, nefejein, nichaluni- haje bote roe nichajai. <sup>42</sup> Nii jaunte, nii caseteconein cunacaauru so- hajein jaonaa jerecure nii casetecocuru beraihureraauru soondarooru, nabana joichohin sorooruhane coataa. <sup>43</sup> Nete, caohate nii soondarooru cu- raanaa cafitaan, Faboro coreniha, nabana Faboro netonai sohin jaooruhane coataa. Nitohanein caohateinte, joichona inaurera letoae ichoaichania, acauhana naluhin cuhin, atane que cohanaacuruhane coina. <sup>44</sup> Jana, leeochoauru, acaauru caajie cuuruha tabara choaene jana, tabaauru leeochoauru netonoai cuuruha nii- bote nichalunena jerooru choaene coina, letoanajae- nii cafitaan. Nitohaneeine, satiin, leeinjiin obene que neraain, onaa caje nichotihacaanu.

<sup>1</sup> Satiin, obene que neraaina, Malatanein curuaaca nii obenene coitucuhacaanu. <sup>2</sup> Jelai cocoaichacuru cachaurute, jataain caohacha nejeeuruhana jaun, saain canacaanu belaihure. Nii janate, uheueca elone jaun, jelarotohane jaun, enuha codoriaain mocohin, iihane jana, canacaanu cotihacure, nichaatihacaanune coina. <sup>3</sup> Nii janate, enuha cohi taojiaain raane jaun, usi jana tihajiha Faborone jana, iihaniha usine jaun, ajaano caun sorohalaain, Faboro biji que tijileneein calae acano. <sup>4</sup> Nii Faboro biji que tijileneein calaa acanone coaraainte: “Jerihanete, soserena necaiha caa cachara. Cucuana cuhane naluhin, onaa caje nichotihane jaunte, ichaohane jerene, dedeeu nena- nii rucuherara,” naaure Faboro coarajeein, nii cuu nenacaauru cachacuru.

<sup>5</sup> Nii janate, nii usi iihanei cataaun, nii acano chatachataain siheitiin, cuu tonajelanaala nee Faboro. <sup>6</sup> Nii jaunte, satiin, “Laraarichaain jecha,” naain cuu, laraacane coarajeeure. Nii janate, laracaene. “Luhecotariin jecha cora aonaain, tocojoaain tacaain orein,” naainte niqui, cuu, carajaain coarajeeuruhane jana, tonajeerinihane jaun, suujua elonaain:

“Leeinjiin chosi necaihara,” naaure Faboro que.

<sup>7</sup> Nii nihacaanune jaan rohante ne nii obene que nenacaauru coara Fobirio neein curuajai cacha rai atane. Nii Fobiriote, canacaanu belaaain, canacaanu rae, rai loreri asae. Nii jaunne, cuu aina nihacaanu nichata janohin. <sup>8</sup> Nii janate, ajaa que jeraain ujuee caaun cunaiteein ecu niha nii Fobirio inacana jaun, rene turuha cue Faboro. Rene turuhinte, coaraain nichoae Cana Coanera bajaane baiha, nichoae biji merecaain, dadaain aonaane rijieeoritiin inae nerautae. <sup>9</sup> Nii coitucuhinte, satiin uure nii obene que nenacaauru leeochoauru cunaitenacaauru. Nii jaunte, rautanaaca Faborone jaun, nerautaacoaain caaure. <sup>10</sup> Nii jaunte, satiin canacaanu belaihuruhane jaun, jelai caje amuhacaanune coina, bote cuhane fauhacaanune rai, cuujueein canacaanuhacha quinenue que- canacaanu achanojoaaure, itolere amunaa rai nelatecuri teein.

### *Romau turuha Faborone*

<sup>11</sup> Nitohanein, cuu nichata ateein nii obenue nihacaanune baihana, leinjiin bote- Alejaandiria caje unaa- cuu cujuana aina jelarona bitoha nena bote cuhane fauhin, cuhacaanu. Nii botete, coujunacanu que nihane coina, fafione neein, acaauru chosichurune que Curiecocuruhacha tei- Castaro, Polosi, naain curuajaihuru ecaantooru- coujunaca amaerane, bote macohiniha teein. <sup>12</sup> Nitohanein cuhina, turuha cuhacaanu, Siracosa cofauhanau. Cuuna nihacaanu nichata janohin. <sup>13</sup> Nii cajena, nesaruhin cuujihacaanu, cucuana auhaniha, rauhijiriin Rejioo turuhacaanune coina. Nii cojoanoonte, cuujihacaanune jana, canacaanu cunaja bote roe caje uhe, rauhijiaan jouhaquiin cujuana. Nii cojoanoon cojoanoonna, turuhacaanu Poteeolihi. <sup>14</sup> Cuuna, Jesocurisito coreniha cana nejeraauru tabaauru ruhacuhacaanu. Acaaurute, canacaanu cotijiaain, cuu canacaanu chunaure, le semanaain acaauru aina nihacaanune coina. Nirijieein inacuhe inacujueein cuujueeina, tabiicha turuujihacaanu Romau. <sup>15</sup> Nitohanein cuhin, atane ichoae inacuhe inacujueein cuujihacaanune coitucuruha nii Romau nenacaauru Jesocurisito coreniha cana nejeraaurune jaunte, canacaanu que taca uure, Apio rai Foro neseu tiaain. Nii jana, leeochoaurute, Nichatajai Taberenanein- acaauruhacha curuaatei neseu canacaanu cohacure. Nii cuu neeuruhane coaraainte, corojeein, Cana Coanera bajae Faboro. Nii ainate, raotojoein suujua aonae Faboro. <sup>16</sup> Nii jana, Romau turuhacaanune janate, jelai loreri asae teein, nirijieein caseteconein, jianacoo teein, leinjiin soondaro que beraichaain, Faboro sirichuruhane coina jerecure.

*Romau niha Faborone*

<sup>17</sup> Nitohaneein, nichata janojoein turu baiha neeoriinte, nii Romau nenacaauru- naraaichuru Jorioocuru rai nelateein nenacaauru- jitariin cotiharate Faboro, acaauru rai irihane coina. Inae satiin turuhacoain, netaojiaauruhane janate, acaauru rai:

“Caraichuru, chaelai janonaa bana cana Jorionichaachene que baasoneein irihaaunta. Niheichu, chaelai janonaa bana, cana inoaesihuru ichao coacuhin baaso neein irihaaunta. Nii atiinte, Jerosaleeun cacoulurujueein, baaso ichara nihane rucuheraaunu que Romanocuruhacha cocoainanohi rai canu teeure Jorioocurura. <sup>18</sup> Nii janate, jitariin caohachanainejeein, cacaje bajaauruhane baiha, caihanenaa jerecure, neniha casohin cajaooruhane jaan- leranune jaun niqicha. <sup>19</sup> Nena, onaa caje nichotihanune jerecureniha nii cacouluruheraauru Jorioocurune jaun, canu rucuhaca satiin- curuaanaa neein nena eenferadorone coina bajaauru, nii neniha caraaichuru coulurujihanune jaan lerane saijieeincha. <sup>20</sup> Nitohanihana jaunna, inara jitariin cotiharateeun, inara coaraain, inara rai irihanune coitucuhichene coinara. Cana Isaraelita nichaachene, canaacha cohajei esenetaanune corenihane, cau caa *cadena* que cositenojoneein neeunra,” naa acaauru rai Faborone janate:

<sup>21</sup> “Coatiha chaelai quirichanejeein letoaauruhi Jodea caje canacaanu rai, ii que, ‘Acate, naaonjoaain que situhin nera.’ Nii jaunna, ii berenaa coitucuhenihaaanura. Niheichu, ucujai caje turunacaauru- cana araaichuru- Jorioocuru nihanatiin, ‘Acate, baaso ichaechajeein ne jetaora.’ naain, ii que ereeuruhita. <sup>22</sup> Nena laen, nii le laurijieein- enanenaa Jorioocuru ichao beeine jerichaanura. Tonaai ii, nii queta. Itolere sacutaain, baasoneein nii que ereeuruhane coitucuhacaanune jaunna, ii, coitucuhina jaun, nii beeine aohana jerichaacaanura,” naaure Romau nenacaauru Joriocuru, Faboro rai.

<sup>23</sup> Niritiinte, “Naaonjoaain cojoanonaa banana, turuha urichaanuhin, nii que ereei canacaanu raine, coitucuhacaanune coinara,” naaure. Nii jaunte, nii aitocuruhane cojoanonaa bana, netaojiaaure arajii cachaauru, nii niha Faborone jaan loreri asae. Nii jaunte, janone caje coauneein, acaauru rai ereereje Faboro, Cana Coaunera Cojoanonaa que, sonafaajeein. Nitohaneeinte, Moisesa aitoonjoa quene maajeein, chaen Cana Coaunera ere bera inoaesihuru *profetacuruhacha* laenai, naajoainunru aina cuaain, acaauruhacha cohajei Mesihaseenein niha Jesusone esenetaauruhane coina, acaauru que jerateein, acaauru rai beebeje. <sup>24</sup> Nii ainate, tabaauru, nii aitoha Faborone esenetaain tonoraure. Jana, leechaaurute, esenetana jerecurene. <sup>25</sup> Nitohaneeinte, ita suujua rijitojoenaa jerelanaala, mituhajeein caunaa nunuheteeuruhane jaunte, acaauru rai:

“Esinaete, rauhijiriin nitohaneeichene coitucuhin, inara foerateeurera rai biha nere bera inoasi Isaihasine coina, berateein:

<sup>26</sup> ‘Caritiin benihu,  
taa cachaauru rai:  
Aonaquichene nihanatiin,  
caohachaaain aonaain,  
coitucunaa naineriheeeicheeinta.

<sup>27</sup> Chaen,  
nii coaraquichene nihanatiin,  
coaranaa jeriheeeicheeinta.’

naain berateein:  
‘Banejelanaala nauhaca  
acaauru suujuane jaunte,  
raajenihane aonana jerecurene,

acaauru rai beraane nihanatiincha.  
 Niheichu,  
 acaauru notaracaae nihanatiin,  
 coana jerecuruhita.

Nii jaunte,  
 coitucunaa nainecurenera,  
 nabana nesoone caaun,  
 canu rene necohaleeuruhane,  
 acaauru rautaain nihanune coataara.’  
 naain rai nere bera inoasi- Isaihasi que beratelu jetao, Cana Coaunera  
 Suujuera.

<sup>28</sup> Aonacuche. Caa acaihanejeein Cana Coaunera tenojoin jianacoon  
 cana mitaeranu esenetana jerelanaala, aohana jereneeichene jaun, ena  
 caje coauneein, Jorioniheichuru rai beebejiha cureeunicha. Acaaurute  
 laen, aonaain esenetaain, tonoraa cuurureeinha,” naa Faborone jaunte,  
<sup>29</sup> nejesinajeein, mainajeein ita cotaain cauha cuure Jorioocuru.

<sup>30</sup> Nitohaneeinte, cuu itolereneein, coroata ajaanacaain neelu Faboro,  
 nasae nihane coreniha coretejeein, niicha sirii loreri asae. Nii jaunte,  
 rene turuha cunacaaurunihane, cuu ranajaque. <sup>31</sup> Nitohaneeinte, cuu  
 tonajelanaala, Cana Coaunera Cojoanona beebejeein, Cana Curuaanaa Je-  
 socurisito quene maajeein ereerejenajaque, nii chunei rohecaera colane.

## Roma nenacaauru rai Faborohacha letoai

### *Inara coaaucaun.*

<sup>1</sup> Canune Jesocurisito letono Faboroneein inara rai caa quiricha laenaun. Cana Coaunerate canu janijiin canu raain nelu, jelai teein rai letono afosotoloneein cacha ichoteraneein enachasine ichaonaa beebejihanu cachaauru raine coina.

<sup>2</sup> Niite rai nere bera inoaensihuru *profetacuru* que berateein laenaeratelu rai Quiricha Inoensi cuhane Cana Coaunera. <sup>3-4</sup> Nii niicha berateite, Rabiri inamoconein cachaneein niha Cana Curuanaa Jesocurisitone beraneein nena ne. Nete rai Suujue aina cuaain onaa caje ichateein, rai itolere que laraajiin nihane jaanu teein rai Calaohineein nihane coitucueratelu Cana Coaunera.

<sup>5</sup> Nii rai Calaohi Jesocurisito aina cuaainte, rai letono afosotolo nihanune jaanu teein nelu Cana Coaunera. Acane beebejeeun, chauratane sacuritaain satiin laurilauri nenacaauru cachaauru netonai Cana Coauneraneein nihane coitucuhin, nere tonoraain neeuruhane coina. <sup>6-7</sup> Inara netonai nii Romau ichoainiquichenete laurilauri nenacaauru cachaauru aina jiniiquiin niicha ranojoneein neeiche. Inara belaitohane jaunte, Jesocurisito ranojoneein neein rai cachaneein neeichene coina inara raelu Cana Coaunera.

Satiin inacaneein nena Cana Coaunera, rai Calaohi Jesocurisito naonjoainuri inara rai raotojoein neeichene jaanu teeurumiin.

### *Romau bedainiha cunaa jeriha Faborone*

<sup>8</sup> Jesocurisito aina cuaaine satiin le cachanequichene coreniha, jataain Cana Coaunera corojeeun, esinae rauhijiriin esenetaaichene coitucuuruha itolere sacutaaine coitucuhanune jaun. <sup>9</sup> Rai letononeein casuujua aina cuaritaain rai Calaohi que ereerecaauinne jaan- Cana Coaunerate, itolere bana bajaanune naineein inara coaaucaauinne coarajera ne. <sup>10</sup> Chaen nechu aca jerihane, tabiicha inara coaraa uhanune coina itolere bana caje bajaebajajeeun. <sup>11</sup> Jataaine inara coana jereeun, jeriha Cana Coauneraane rijijieein inara rai beein, inara coroataja nichaaunne, inara suujua corelanaala ijiin neeichene coina. <sup>12</sup> Jiniiquiin esenetaacachene rijijieein, ita suujua que corajerateein nihacachene coinane caa aitoon. <sup>13</sup> Cana Coaunera coreniha cajeraauru, coitucuhichene jerichaaunne jaunne inara rai bereeuni. Araain saaine niqui inara coaraa unaa jereeun. Nene enanetojoein nainesineeun. Charijieeinteeinti leeochoauru lauri lauri nenacaauru aina acaauru rai caohacha ichaa aihun; nii rijijieein inara rai netonai caohacha ichacaunne jerenacaunne inara rene turunaa jereeun. <sup>14</sup> Chaque nelatenihanune saijieein canu rai Cana Coaunera tenojoi raeranichaaunne jaunne, satiin cha coitucuelanaala, aansijiin relanojoneein nenacaauru, itolere coitucueracuru, cha coitucunaa jeriheichuru, naonjoaihunru rai, nii quicha ranojoi tenaa jereeun. <sup>15</sup> Nii jaunne, nii Romau neiniquichene rai, jataain enachasine ichaonaa que inara rai erenaa jereeun.

### *Itolere ichana nainiha enachasine ichaonaane*

<sup>16</sup> Coatilha nii cana rai beratenojoi enachasine ichaonaa bihanune coejihaun, aca niicha ichana nainei ichaa Cana Coauneraane jaan nihane jaun, satiin esenetaeraauru Jorioocuru osa caje jauriaanejeein ichoteratenojoiniha cuururichaaaine jaun. Jorioniheichuru esenetaeraauru netonaite nichoteeurureein. <sup>17</sup> Nii cana rai beratenojoite, cana que esenetaacachene

coreniha, cha ujuaihonelanaala nihacachene coina jianacoon cana tiha Cana Coaunerane coitucuerate. Nitohaneeinte ichae Cana Coaunera, nechu esenetaacachene jauncha. Nitohanihane coinata: “Leinjiin acaacha esenetaerate, niicha ichai ujuaihonelanaala nena rijijieein ichaoreein,” naain laenanohineein ne, Cana Coaunera quiricha cuhane.

*Niicha ichai ujuaihoneein niha satiin cachaaurune*

<sup>18</sup> Cana Coaunerate, caohacha que ichaaoruhane coina cachaaauru rai niicha tei caohateraauru nechu aansaineein ichaonacauru casetecarichaain dede caje coauneeinne coarate cana que. <sup>19</sup> Acaaurute niqui, nii acaauru que Cana Coauneraacha coitucueratei coitucuure raotojoein, raajenihane coaratihane jaun. <sup>20</sup> Cana Coauneraacha ichai asinojoneein nenaate coitucunaa nainichaache, caohachain cana suujua coaraain niicha ichai que coaaucaachene. Necoaaunaain nihalu cana rai chauratanene caje coauneeinte, esinae rauhijiriin Aca Cana Coauneranein nihane jaun chabana satonoenerihani nii niicha ichana naineine coitucuhacache. Nii jaun, nechu aansaineein coitucunaa jeriheichuru nii ujuaihoneein neeuruhane caje nichoteeururinaain. <sup>21</sup> Nitohaneein raotojoein, Aca Cana Coauneranihane coitucuuruhane saijieeinte, chabana nere tonoraain esenetaain, niheichu chabana acanihane coroaecurene. Nitohaneein nena coacuelanaalate, baasohacha que coaacuruhane jaun, inae nauhacaa acaauru sujuane jaun, nocohenaanau nena rijijieein neeure. <sup>22</sup> Itolere coitucueranihate niqui nocoetocure. Nete cha coitucuhin aitocurene. <sup>23</sup> Nitohaneein cha coitucurenihane jaunte, Cana Coauneraacha counanohineein- onaa in-aeranein nena cacha tocohanein nena ecaanto jaaure. Nii choae tacaain techu, tajaacuru, atane choae terecuri, atane choae tijiariin amunacauru, naaonjoainuri tocohanein ecaanto jaainchuru que chabana ohelanaala nena Cana Coaunera necaohacha coreeure.

<sup>24</sup> Nitohaneeuruhane jaunte, nii acaauru suujua baaso letono ichacuruhane coina, inae acaauru jianiha Cana Coaunerane jaun, nejesinajeein ita rai coejenacai ichacure. <sup>25</sup> Esinae rauhijiriin Cana Coaunera niha Cana Coaunerane saijieeinte, aca coroaena coacuelanaala niicha coaunanojoi-hunri coroaecure. Nii Cana Coaunerate, acaauru netonai coaunaain nihalune jaun, itolere bana leinjiin acaacha coraenojoinihane caohachae. Nitohanemiin.

<sup>26</sup> Nii jaunte, inae acaauru que jaolecoha Cana Coaunerane jaun, itolere coejenacai ichajeein necairichaaure. Acaauru benecuru nihanatiinte, inae aina niicha jerei ichaa acaauru lanaaurune jerelanaala, inae nichao coreein namute ene aina niicha jerei ichacure. <sup>27</sup> Nii rijijieein techu, acaauru cocoichacuru netonai, inae acaauru comasaihuru aina niicha jerei ichana jerelanaala namute quicha aina niicha jerei ichacure, baasoneein acaauru letoaa acaauru sujuane rijijieein necoejelanaala. Nitohaneeinte, necha aansaineein, erena tonoraurenihane jaun, caseteconeein raajenihane jaberoco cairichaaure.

<sup>28</sup> Acanihane coitucunaa jerecurenihane coreniha, acaauru suujua baaso letononein niicha ichai coitucuelanaala ichacuruhane coina, acaauru que jaolecoha Cana Coaunerane jaunte nitohaneein neeure. <sup>29</sup> Nitohaneeinte caohacha ichana coacuelanaala baaso nejesinaacha ichaain, itolere bana niicha lateeicha que coacuhin baaso ichaain, namute cacha que necoelajaauharitiin, sonajaain jaohin, suujua acatelanaala, enaacha nohanein, acaauru ichaonihei que ichaohin, namute cacha cairichaa casajenetiin, naaonjoaain neeure. <sup>30</sup> Chaen techu, leeochoauru coacuhin acaauru que baasoneein ereein, Cana Coaunera que nejerateein, cha coitucualanaala

enaacha cacha tonoraain, itolere baasohacha coacuhin necohasitaain, baaso ichaain, inaca ere tonoraelanaala, <sup>31</sup> cha coitucunaa jerelanaala, tonaain ereeuruhane nihanatiin chabana ichaelanaala, nihei chuni belaihuruhi, cacha que suujua acatena inaelanaala, chabana cairichaaajoaain namute cacha coaracuruhi, naaonjoaaunre. <sup>32</sup> Raotojoeente niqui, satiin nitohaneein ichaonacaauru atinanohineein neeuruhane coina, nitohanei rai rauhi tihalu Cana Coaunerane coitucuure. Nete, enanetojoein nitohaneein neeuruhane jianecurenihane jaun, leochaauru netonai nitohaneein neeuruhane rautatiin coaracure.

## 2

*Cana Coaunerate, esinae rauhijiriin niicha ichai ujuaihoneein nenacaauru casetecareein.*

<sup>1</sup> Nitohanihane jaun coatihä ii que suujua acatena nainerinaain Cana Coaunera, ii netonai acaauru rijijieein neeine saijieein acaauru que ereeine jaun. Chatohaneineein neeine nihanatiin coatihä nii caje nichoteriheeini. Acaauru rijijieein ichaohine saijieein acaauru que ereeine jaunte, ii raajeni-hane necoluruhequi.

<sup>2</sup> Nete nitohaneein ichaonacaauru casetecaane bana, esinae rauhijiriin acaauruhacha casetecarihanine coitucuhacache raotojoein. <sup>3</sup> Aihane jaun acaauru rijijieein ichaohine saijieein, acaauru que ereeine jaun jiaonriha ii casetecarihani Cana Coaunerane caje nichotenaä coaaquine.

<sup>4</sup> Nitohaneeinte iicha jerenohicha ichaain neeine que nainaain, aca Cana Coauneraneein nihane coitucuhin neeine coina, ii cojoaain ne Cana Coaunera, chabana cacha belaitohane jianenihane jaun niqui. <sup>5</sup> Nete ii suujua coitucuneeine jaun, Cana Coaunera coitucunaa jerelanaala baasohacha ichaaine jaun, inae ecu tihane bana baaso icharaauru casetecaain, <sup>6</sup> lecachaauru naineein acaauruhacha ichai nainijianaain acaauru coretiha Cana Coaunerane bana caseteco coariquiin. <sup>7</sup> Nitohaneeinte jataain nelateineein chabana satonoelanaala necaohachanaa coaracuruhane coina itolere bana caohacha nejesina ichajeein ichaonacaauru rai, chabana sanaachara ichaonaa tereein Cana Coaunera. <sup>8</sup> Nete laen, cha coitucunaa jerelanaala caohacha icharaauru que nejerateein baaso ichara neein nenacaauru coroatajaneraauru casetecareein obajeein. <sup>9</sup> Satiin baaso icharaaurute inaderanaa aina necairichanaa coaracurureein. Jorioocurute ichoaichaniha casetecanohiniha cuurureein. Jorionihechuru netonai nihanatiinte jerichanejeein caseteco coaracurureein. <sup>10</sup> Nete laen satiin caohacha ichajeein ichaonacaauru rai, rai necaohacha aina jataain nelateineein nihane jaan tereein Cana Coaunera. Jorioocurute ichoaichaniha nitohanai raeraneein neeurureein. Jorionineichuru nihanatiinte nitohanai raeraneein neeurureein.

<sup>11</sup> Nitohanihate cureein leochaneein itolere cacha coaraeniha Cana Coaunerane jaun. <sup>12</sup> Satiin Jorioniheichuru- nii Moisesa rai Cana Coaunera tenojoin rauhi coitucuhelanaala onacaurute, nii rauhi colane oorureein. Nii rijijieein techu Jorioocuru, nii Moisesa rai Cana Coaunera tenojoin rauhi sirichuruhane jaun, inae raotojoein coitucuuruhane saijieein osaque nesarucuruhane jaun, nii acaauruhacha sirii rauhi aina cuaain colurujueno-joinnein caseteco coaracurureein. <sup>13</sup> Coatihä nichoterinaain nii chuni nii rauhi aonaane saijieein tonoraelanaala nenaä. Nii rauhi aonaain, aitothane rijijieein tonoraain ichoaite laen, nii caje nichotereein. <sup>14</sup> Nete Jorioniheichuru, nii Moisesa rai Cana Coaunera tenojoin rauhi coitucurenihane saijieein, nechu acaauru ichaoneein nii rauhi aitoonjoa ichacuruha suujua



caje rocohinne, jelai teein nitohaniha acaauru rai rauhine jaun aihurureein. <sup>15-16</sup> Nii jaunte, acaauru nerurujua caje inanacareein nii rauhi acaauru suujua cuhane acaauruhacha sirii. Acaaurute baaso ichaain, caohacha ichaain, naaonjoaunruhane coitucueratereein acaauru suujua inae saa cana janonaane bana, Calaohi Jesocurisito aina cuaain satiin suujua cuhane asinojoneein cachaauruhacha ichai coitucuerateein rucuhereein Cana Coaunera, caa inara rai aitiin inara relaanune rijijieein.

*Moisesa rai rauhi rijijieein niha nocoetocuruha Jorioocurune*

<sup>17</sup> Iite niqui Jorioneeine jaun, Moisesa rai rauhi coitucuhin, aina inae necoasitaain Cana Coaunera aina niha nocoetohi. <sup>18</sup> Inarate niqui Cana Coauneraacha jerei coitucuhin, itolere caohacha nejesina janijiin coitucueratiha ii que nii rauhine jaun, itolere caohacha coitucuhi. <sup>19</sup> Nii ainate maosaneein nenea rijijieein cha coaralanaala nenacaauru, <sup>20</sup> cha coitucuelanaala nenacaauru, naaonjoainuri relaaain neeine coina jatoroaain niha nocoetohi, ii Cana Coaunera rai rauhi coitucucuhine jaun. <sup>21</sup> Nitohaneein leeochoaauru relaeraneein neeine saijieein, chanuna jana chaen ii raajenihane ii suujua coaraain relaanana naineneei. “Coa asijiauha,” naain ereeine saijieein chanuna asijiauhi. <sup>22</sup> Chaen techu, “Nainihej nejelau ene aina ichaoha cachaneta,” naainte ereei niqui. Chanuna jana chaen, ii nejelau ene aina ichaohi. Chosichuru ecaantooru quete niqui jaolecoha nocoetohi. Chanuna jana chaen nii saijieein, acaauru rai Teenforo asaae coretiin nenacaauru ecaantooru basijiauhi. <sup>23</sup> Cana Coaunera tenojoi rauhi tonoraain cha chaain ichaonaa rijijieeinte niqui ereereequi. Nete rai rauhi tonoraain cha chaeneeine jaun, baasoneein Cana Coaunera coaratiha aitoi. <sup>24</sup> Nii quete esinae rauhijiriin nitohaneichene que: “Inara Jorionequichenete Cana Coaunera que jaoleconaanein Jorioniheichuru terateeiche,” naain laenanohineein ne, Cana Coaunera Quiricha cuhane.

<sup>25</sup> Esinae rauhijiriinte niqui nelate Moisesa rai rauhi tonoraain nihane, rai jaberoco macohi cari saerateein niha cachane. Nete nitohaneein nihane saijieein, nii rauhi tonoraain ichoaenihane, nirijieein jaberoco macohi saeratelanaala nenea cacha rijijieein ne. <sup>26</sup> Nete laen Jorionihechuru, rai jaberoco macohi saeratelanaala neeuruhane saijieein, nii aitoha rauhine rijijieein tonoraain ichaaoruhane, jaberoco macohi saerateein nenea cacha rijijieein coanojoineturureein. <sup>27</sup> Nii jaberoco macohi saeratelanaala nenea, nii aitoha rauhine rijijieein tonoraain ichoaite, nii rauhi siriin rai jaberoco macohi cari saerateein neeuruhane saijieein nii rauhi siriin tonoraalanaala nenacaaru colurujueeurureein. <sup>28</sup> Nitohanihane jaun, coatihā esinae rauhijiriin Jorio esine nihei nii jaberocohacha que Jorio nihane coarateein nenea. Niheichu coatihā Jorio nihei nii jaberocohacha macohi cari saeratera. <sup>29</sup> Esinaen rauhijiriin Jorio esinete, satiin rai suujua cuhanene maajeein aca ne. Nii jaunte, rai suujua caje coauneein coacuhin, rai jaberoco macohi saeratihane latelanaala Jorio esine neein ne. Coatihā laenanohineein niha rauhine lateein aihei. Niite Cana Coaunera Suujue ichanohineein ai. Nitohaneein ichoai cacha, coatihā rijijiei cacha caohacha ichaane coitucuhane coina coujuhin coarana nainerinaain. Leinjiin Cana Coauneraachate rai nichao coujuhin coaraain coitucureein.

### 3

<sup>1</sup> Nitohanihane jaun, chaque nelate Jorio neein, cana jaberoco macohi cari saerateein, naaonjoaain nihacane. <sup>2</sup> Araai laurii coināte niqui nelate Jorio nihacane. Jauriaanejeeinte, Jorioocuru rai nere beratelu Cana Coaunera,

esenetaauruhane coina. <sup>3</sup> Aihane jaun chachareein nii naitoonjoa rijijieein neurenihane coreniha. Nii naitoonjoa rijijieein neurenihane corenihanacha, aitohane jaan ichaenerichaaain Cana Coaunera. <sup>4</sup> Aihei jerihane. Cana Coaunerate, casajenetooruha satiin cachaurune nihanatiin, itolere bana naitoonjoa rijijieein cha chaain nereein. Nitohanerichaaaine quete:

“Inae cuu tihane banate,  
esinae rauhijiriin aitohine rijijieein  
chachaaaine coitucuurureein.  
Nii banate,  
ii esenetaauruhi casetecaai nohanelanaalane  
coitucuurureein.  
Nitohaneeiinte  
joaenreein ii colurujuera amuritoriquiin,”  
naain ne laenanohineein Cana Coaunera Quiricha inoaensi cuhane.

<sup>5</sup> Nete nitohaneein aitocuruha tabaaurune rijijieein canaacha ichai baaso, jataain necaohachaa Cana Coaunerane coaratihane, chanuna jana chaen nii baaso ichacaachene coreniha cana casetecae Cana Coaunera. Nete nii baaso ichacaachene coreniha cana casetecaa Cana Coaunerane nihanatiin baaso icharaniha benaa nainenihacache. <sup>6</sup> Coatiha nitohanihei. Nitohaneein baaso icharanihane, coatiha satiin chauratane que nenacauru cachauru ichao cojuhin coaraain rucuhena nainerihei.

<sup>7</sup> Nitohaneein nohaniha cachane aina jataain necaohachaa Cana Coaunera beeichene saijieein, chanuna jana chaen osaaotoha canu beeiche.

<sup>8</sup> Nitohanihanete satiin baaso icharichaaache, niha caohachane coina. Niritiinte, cacha relaa canacaanu beeure, nechu acaauru esenetaain, canu que jaolecooruhane coina. Nete niritiin erenacauru cachauru inae caseteco coaracureein.

*Satiinte cana osa ujuaihoneein nihacache.*

<sup>9</sup> Chatonaain chaainti coaauquiche. Cana Jorio nichaachenena, Jorio niheichuru amurijiriin cacha caohachaneein nihacache. Aihei jerihane. Inae inaraque, Jorioocuru, Jorioniheichuru, naaonjoainunru aina satiin osaaonaneein nihacachene coitucueratihacaanu. <sup>10</sup> Nii quete:

“Nihei chuni cacha,  
canu rai caohacha ichaain nei.  
Nihei caohachanainejeein leinjiiniji.

<sup>11</sup> Nihei leinjiiniji  
Cana Coaunera coacuhin  
caohacha coitucuhin ichara.

<sup>12</sup> Satiinte  
baaso jelson suujua cuaain  
caohacha ichana coacuelanaala  
baaso ichacure.

Nii jaunte  
nene leinjiiniji caohacha ichara.  
Nihei caohacha nainejeein leinjiiniji.

<sup>13</sup> Acaauru rarote  
leeinjiin calani ne,  
neforacaa atanebanane rijijie.  
Jana acaauru lelete,  
enaacha cacha coritaauruhane jaaneein ne.

Acaauru ujuaaete,  
aiha acano catu corane rijijieein  
cacha cunaitaeraniha ne.

<sup>14</sup> Jana acaauru ujuaae cajete

enaacha mituhe cacha cotaain,  
nechu aansainiha beeuruha ne.

<sup>15</sup> Enaachate  
sonajaain jaaonaa  
jerecuruhane jaun  
cuhin sonajaain jaaore.

<sup>16</sup> Amuuruhane jaaunrute  
aansijiiniji cautijiaelanaala  
niicha eruuri itajeeure.

<sup>17</sup> Nii jaunte,  
chabana caohacha ichaain,  
raotojoein ichaonaa nainecurene.

<sup>18</sup> Nii chabana  
acaauru casetecarichaain  
Cana Coaunerane que  
coacuhin casihuruhi,”  
naain ne laenanohineein Cana Coaunera Quiricha cuhane.

<sup>19</sup> Nete satiin nii rauhi aitoonjoan tonoraain nenacaauru netonai, o-  
aaonaneein neeuruhane coitucuhin neeuruhane coina aitoha nii rauhine  
coitucuhacache. Aihane jaun cacha coujuhin coaraa Cana Coaunerane  
bana, nerinaain nii que tonaain erenaa nainei. <sup>20</sup> Nii jaun coatiha rauhi  
tonoraain nacaauru nihanatiin, nii rauhi tonoraauruhane coreniha acaauru  
osa caje ichoteratenajarinaain Cana Coaunera, nii rauhi, esinae rauhijiriin  
osaaocaachene coitucunaa coinaacha nelatihane jaun.

*Esenetaacachene aina cuaainchate nichoterichaacheein*

<sup>21-22</sup> Nete laen, inae ena nii rauhi colane cana ichoteraterichaaine coitu-  
cuerate Cana Coaunera. Niite coitucunaa nainichaache, nii rauhi aina nere  
beracuru *profetacuru* laenanohi ereretaain coaraain. Leinjiin Jesocurisito  
esenetaacachene aina cuaainchate naine, cana osa caje cana ichoteratiha  
Cana Coaunerane. Nii rijijieein techu, satiin esenetaain nenacaauru netonai  
ichoteratereein. <sup>23</sup> Satiin osa que nesarucuruhane jaunte, Cana ichotera-  
neein niha Cana Coaunerane saijieein que jaolequiin neeure. <sup>24</sup> Nete jataain  
cana belaitohane jaun, Jesocurisito aina cuaain inara ichoterate core colane  
Cana Coaunera. Coatiha rai caohacha ichaain neeichene jaun, inara ichoter-  
atihei Cana Coaunera. <sup>25</sup> Nitohanein jeriha Cana Coaunerane jaunte ohelu  
Jesocurisito, rai coichana aina cuaain cana osa aninoaain, cana que suujua  
acatena nainihane coina. Nechu queecha jaequiin nihacachene coreni-  
hachate, cha ujuaihonelanaala nena rijijieein cana tein cana coaraane  
coitucuerate Cana Coaunera, <sup>26</sup> esinae rauhijiriin luhecotariin cha coetana  
inaenihane jaun. Enate esinae rauhijiriin caohacha ichaain, canaacha  
ichai ujuaihoneein nena caje satiin Jesocurisito esenetaeranichaachene  
ichoteratihane coarate.

<sup>27</sup> Nitohanihane jaun, coatiha chaelai que nelatihei Cana Coaunera coitu-  
cuhin rai caohacha ichaa nocoetiin necoasitaa cachane. Nii necohasitana-  
jate, caohacha nainejeein nitaje. Aihane jaun coatiha nii rauhi tonoraane  
coreniha, osa caje nichoteein nihei chuni cacha. Nechu Cana Coaunera  
esenetaane corenihate nichoteein ne cacha. <sup>28</sup> Nitohaneinte, nii rauhi  
tonoraain nihacachene, cana ichoteraterichaaine coina aitelanaala esene-  
taacachene coreniha osaaocaachene caje cana ichoteratihane coina aitoha  
Cana Coaunerane coitucuhacache inae.

<sup>29</sup> Leinjiin Jorioocuruhacha Coauneraneinna niha Cana Coaunera. Tana  
satiin lauri lauri nenacaauru cachaauru netonai Coauneraneein nihane. Ai-  
hanete ne. Satiin lauri lauri nenacaauru netonai Coauneraneinte ne Cana

Coaunera. <sup>30</sup> Coatiha nihei nii baiha chuni Coaunera. Acate rai jaberoco macohi cari saeratelanaala neein esenetaeraaurune maajein ichoterateraneein ne. <sup>31</sup> Nitohanihane jaunna, nii canaacha esenetai esenetaacachene jaun, inae chaque nelateniha nii rauhi. Coatiha aihei. Nii ainate esinae rauhijiriin nelatiha nii rauhine que aitocoaache.

## 4

### *Cana Coaunera esenetaa Abaraaunne que erenaa*

<sup>1</sup> Nitohanihane jaun, tonarihacache cana foeratera inoaensi Abaraaunne que. <sup>2</sup> Esinae rauhijiriin caohacha ichaane coreniha, osa caje colunohineein nena raane rijijieein teein raa Cana Coauneranete laen caohachare caohacha icharanihane que aitoha Abaraaunne. Nete neniha leinjiinniji caohacha icharane jaun, caohacha icharanihane que aitoha cachane rautaene Cana Coaunera. <sup>3</sup> Nitohanihane quete: “Esenetaa Abaraaunne jaunte, osa caje colunohineein nena raane rijijieein teein rae Cana Coaunera” naain laenanohineein ne Cana Coaunera Quiricha cuhane. <sup>4</sup> Chunocoha amihanein nihane jana, rai coreteraa nii rai namihaneonne, coatiha que nirijieein joaereein coreniha belaiha rai tihei nii coretera. Nii rai namihaneon coretihane jaunte, nii namihaneon cainaeraniha rai tenojoi ne. <sup>5</sup> Nete laen Cana Coauneraacha que jaaequiin neein esenetaera, nii esenetaaneecha coreniha osa caje colunohineein nena raane rijijieein teein rae Cana Coaunera, niicha ichai coreniha rai cha chaain neeuruhane que airijiin. <sup>6</sup> Nitohanein osaaocane nihanatiin, esenetaain niha cachane, osa caje coulunohineein nena neein teein raa Cana Coaunerane quete:

<sup>7</sup> “Rachoojoeinte neure,

baaso ichajein osa que nesarucuruhane nihanatiin,  
osa caje coulunohineein

nenaaneein teein

Cana Coauneraacha ranojoinunri.

<sup>8</sup> Rachoojoeinte ne,

nii nichotenaacha,

rai nosa coreniha

casetecaenerichaaain Cana Coaunerane jaun,”

naain niha erenaane rijitoein aitelu cana inoaensi Rabiri amure.

<sup>9</sup> Rai jaberoco macohi cari saerateeurera *circuncidocuru* raaicha aitenihanena, nirijieein rai jaberoco cari saeratelanaala nenacaauru raine maajein niritiin niha nii erenaa. Inae acaihaniji que esenetaaneecha coreniha osa caje coulunohineein nena raane rijijieein teein Abaraaunne raa Cana Coaunerane coitucuhacache raotojoein. <sup>10</sup> Chatohanein niha Abaraaunne jana osa caje coulunohineein nena raane rijijieein raelu Cana Coaunera. Inae rai jaberoco macohi cari saerateein nihane janana osa caje colunohineein nenaaneein teein raelu Cana Coaunera. Coatiha aihei. Jaiti rai jaberoco macohi cari saeratenihane janate raelu Cana Coaunera. <sup>11</sup> Inae nitohanein osa caje colunohineein nena raane rijijieein teein raa Cana Coaunerane baihate laen, nii cojunacanu que rai jaberoco macohi cari saeratelatu Abaraaunne. Nitohanihane jaunte, satiin rai jaberoco macohi cari saeratelanaala neein, osa caje colunohineein nena rijijieein neeururichaaaine esenetaeraauru netonai inacaneein ne nii Abaraaunne. Nii rijijieein techu, nii esenetaauruhane coreniha osa caje coulunohineein nena raane rijijieein ranajae Cana Coaunera. <sup>12</sup> Jerichanejoein techu, jaiti rai jaberoco macohi cari saerateein nelanaala, esenetaalu Abaraaunne rijijieein neein esenetaeraauru cachaauru inacaneein ne nii Abaraaunne. Nii rijijieein techu, jaberoco

macohi cari saerateein neein, nii aihalune rijjijeein esenetaeraauru netonai inacaneein ne nii Abaraaun.

*Esenetaacachene aina cuaainte, cana rai naitoonjoa tereein Cana Coaunera.*

<sup>13</sup> Cana Coaunerate Abaraaun rai aitelu, rai nefoerateeuru aina nirijieein core colane acaauru rai chauratane tihane, neroraneein neeruhane coina. Coatiha, Moisesa rai rauhi tonoraain niha Abaraaunne jaun, nii rai chauratane tihane coina aitohilu Cana Coaunera. Nechu esenetaane jaunte, nii rai chauratane tihane coina aitiin, osa caje coulunohineein nena raane rijjijeein tein raelu. <sup>14</sup> Nii rauhi tonoraeraauru, nii Cana Coauneracha tenaa jerei raeranuneein neeruhane jana nihane, coatiha chaque nelateein nerihei nii canaacha esenetai. Inacojoeinte esenetarichaache, nii tihane coina aitohalu Cana Coaunerane jaan nihanatiin cana raineen nerihei. <sup>15</sup> Nii rauhite cha ujuaihonnein caseteco coaracaachene coina nenaaneein ne. Nii niha rauhine colane nerihei cha ujuaihonnein caseteco coaraane rai nei.

<sup>16</sup> Nii jaunte satiin nii rai nefoerateeuru aina Abaraaun rai niicha teeni tiha core colane esenetaauruhane aina cuaaine coina aitelu Cana Coaunera. Aihane jaun, coatiha nii rauhi tonoraeraauru raaicha nii tihane coina aitohilu Cana Coaunera. Acate esenetaalu Abaraaunne rijjijeein, satiin esenetaeraauru raineen nena ne. Nitohaneein esenetaane jaunte, satiin cana inacaneein ne Abaraaun. <sup>17</sup> Rai Quiricha Inoainsi cuhane: “Canune, arajii lauri lauri nenacaauru cachaaauru inacaneein ii tereeeunni” naain rai aitohalu Cana Coaunerane rijjijeeinte, nii Abaraauncha esenetai Cana Coaunera, onacaauru rai ichaonaa tein, jaiti coaunanojoinelanaala nena, naaonjoainuri Coauneraneein nena ne.

<sup>18</sup> Inae calaohirichaaanne esenetaeniha Abaraaunne janate: “Arajii lauri lauri nenacaauru cachaaauru inacaneeinte neriquiincha” naa rai Cana Coaunerane esenetaain acaacha cohajihane jaunte, acaauru inacaneein ne Abaraaun, “Caa jeeonihate cuurureein ii nefoerateeurura” naain que arasijie coarateein rai aitohalu Cana Coaunerane rijjijeein. <sup>19</sup> Inae lefasha jaanacaneelalajeein ichaohane jaun, inae rai comasai Sara aina jiniiquiin biinaaneein, leinjiiniji canaanai sirilanaala ooruhane rai neeuru saijjeeinte, nii rai aitoha Cana Coaunerane esenetaane jianenelu Abaraaun.

<sup>20-21</sup> Nitohaneeinte, esenetaane jianena coacuelanaala, jelai amuritoheriin esinae rauhijiriin nii rai naitoonjoan icharihani Cana Coaunerane esenetaane jaun, Cana Coaunera corojeein, acaacha cohajeein nelu Abaraaun.

<sup>22</sup> Nitohaneein esenetaane jaunte, osa caje coulucohin raelu Cana Coaunera.

<sup>23</sup> Coatiha nii esenetaa Abaraaunne jaun, leinjiin acaacha raane coina aitiin laenaeratiheilu Cana Coaunera, <sup>24-25</sup> cana netonai quete aitiin laenaerateluu. Nii jaunte, cana netonai esenetaacachene jaun, cana colucohin cana netonai rae Cana Coaunera. Satiin cana osa coreniha cana coreenraniha ohalu. Cana osa ujuihonnein nena caje cana mitaeranu que Cana Curuanaa Jesocurisitone esenetaacachene jaunte, cana netonai rae Cana Coaunera.

## 5

*Inae cha ujuaihonnein nihaacache.*

<sup>1</sup> Aihane jaunte, esenetaacachene coreniha Jesocurisito aina cuaain inae cha ujuaihonelanaala Cana Coaunera aina raotojoein nihaacache. <sup>2</sup> Nii Jesocurisito esenetaacachene aina cuaainte, cana corootajane Cana Coaunera. Nii ainate cana suujua letono ichana coacuelanaala rachoojihacache, rai Cojoanona que nerichaacheinne cohajeein. <sup>3</sup> Coatiha acaacha nihei.

Nii rijijieein techu, necairichanaa coaracaachene nihanatiin rachoojoein nihacache, nii necairichanaa aina cuaain jelai amuritoheriin laraajiin itolere abaantaain nihacachene coitucuhacachene jaun. <sup>4</sup> Nii necairichanaa abaantaain laraajiin nenaate, inae esinae rauhijiriin ijiin neein canaacha cohajei cohana nainerichaacheein. <sup>5</sup> Nii canaacha cojoai coatiha inacojoein cohahaacache, rai Suujue cana rai niicha tei aina cuaain jataain cana belaiha Cana Coaunerane jaan nihane jaun.

<sup>6</sup> Nitohaneeinte, cana osa caje nichotenaa nainelanaala nihacachene jana, inae cojoinaca que turuhane jana, cana baaso icharanichaachene coreenraniha ohelu Jesocurisito. <sup>7</sup> Coatiha nerihei chuni, leecha cacha baaso ichara coreenraniha nesohin nijioaenrateein nei. Niheichu caohacha ichara cacha coreenraniha nihanatiin nesohin nijioaeratenaa nainihei chuni. Coaraain aihane nihane chachu jerihane, leinjiin caohacha ichara cacha coreenraniha nesohin nijioaenratere chuni. <sup>8</sup> Nete jataain cana belaitohane coaratiha, cana osa coreniha oha rai Calaohi Jesocurisitone coina letoaelu Cana Coaunera. <sup>9</sup> Inae nitohaneein cana osa coreniha ohalu Jesocurisitone jaun, inae cha ujuaihonelanaala nihacachene jaunte, nii amuritoheriin aina cuaain caseteco caje nichoterichaacheein. <sup>10</sup> Nitohaneein jaiti que nejeratenaaneein nihacachene jana ohalu rai Calaohine aina cuaain, aina raotojoein jiniiquuin nihacachene coina ichaalune jaun techu, nii amuritoheriin cana ichoteratereein Cana Coaunera, inae cana que suujua acatihane jaun. <sup>11</sup> Coatiha niicha nijihe. Rai Calaohi Jesocurisito aina cuaainte, Cana Coaunera coroaecaache. Nii Curisito, Cana Coaunera que nejeratenaaneein nihacachene caje, aina jiniiquuin raotojoein cana teraneein nena nihane jaun.

### *Adaan aina Jesocurisito*

<sup>12</sup> Nii rijijieein techu, leinjiin cacha caje nunuheteein caa chauratane que turuhin nelu osa, cacha itajeranu que. Nii cacha itajeranu onaate satiin cachauru lomohelu, osa que nesarucuruha satiine jaun. <sup>13</sup> Nitohaneeinte jaiti neniha Moisesa rai rauhine jana, inae nii ajiniha nesilu chauratane que osa. Coatiha niqui coitucueraailu nii osa, jaiti neniha nii rauhine jaun. <sup>14</sup> Nii jaunte nihalu Adaane caje coaanein nihalu Moisesane que tiaaajoaain osa que nesarucuruhane jaun, ohin nitaje rai neurelu satiin cachauru. Coatihana niqui, leinjiin rauhi tonoraain neurenihane coreniha osa que nesaruhin neuruhilu aiha Adaane rijijieein. Charijieein teeinti, nii jaurianejeein nena Adaan- jauriaanejeein osa raain nelu, nii rijijieein techu, nii Adaan amurijiriin nena canaacha cohajei- leinjiin cacha ichaonaa turuaain nelu.

<sup>15</sup> Nete nii Adaancha ichai nii chaque nelateein nedae ne, amurijiriin jataain nelatiha nii cana belaiha cana rai Cana Coauneraacha teine jaun. Nitohaneeinte baaso ichaa leinjiin cachane coreniha, satiin osa que nesaruhin nitajenaaneein neurelu satiin cachauru niqui. Nete core colane cana belaiha cana rai leinjiin Jesocurisito aina cuaain Cana Coaunera tenojoi, nii amurijiriin nelateein, satiin cachauru rai caohacha ichaeranein ne. <sup>16</sup> Nii naosatiha leinjiin Adaane jaan, coatiha chaque nelateein nedaai, nii cana belaiha Cana Coaunerane jaan aina cuaain. Nii jaunte niqui, leinjiin cacha osa coreniha, satiin caseteco coaracuruhane rai neurelu cachauru. Nete nii cana rai niicha tei aina cuaain, nosa que namuritiin niha cachane nihanatiin, inae nii ujuaihoneein neurenihana cachaurune coina aitelu Cana Coaunera. <sup>17</sup> Nitohaneein leinjiin cacha coreniha, cachauru que niicha ichana nainei ichaain satiin cachauru itajiha nii onaane jaunte, nii amurijiriin niicha ichana nainei ichacurureein, jataain acaauru belaitohane

jaun, Jesocurisito aina cuaain enachasine ichaonaa que ichaohin neeuruha nii core colane osa caje Cana Coaunera roconojoinunru cachaurune caina.

<sup>18</sup> Charijieein teeinti, osa que nesaruha Adaane coreniha satiin cachauru caseteco coaracuruhane rai neeurelu. Nii rijijieein techu, caseteco coaracuruhane rai neeuruha cachaurune jana, niicha ichai aina cuaain, jianacoon osa caje cacha rocoheranu ichaonaa uhaain turuhelu Jesocurisito. <sup>19</sup> Nitohaneeinte erenaa tonorae niha Adaaneecha coreniha arajii cachauru osa que nesarucurelu. Nii rijijieein techu, erenaa tonoraain niha leinjiin cachane coreniha, jianacoon neeureein cha ujuaihonelanaala arajii cachauru.

<sup>20</sup> Moisesa rai rauhite niqui, osa que nesaruhane coitucuhin janiha cachane caina nenaanelu. Nete nii saijieein aina jelai amuritoheriin osa que namuritocurelu cachauru. Nete nitohaneein jataain osa que namuritocuruha cachaurune jana, jeelai amuritoheriin jataain cachauru belaitohane coarate cana que Cana Coaunera. <sup>21</sup> Charijieein teeinti cachauru lomohin ne osa, cachauru atinaain itajihane caina. Nii rijijieein techu itolereneein cachauru lomoritin ne, nii osa caje cacha mitaeranu que cacha belaitohane jaan Jesocurisito aina cuaain ichaonaa satonohelanaala nena Cana Coaunera tenojoin.

## 6

*Osa coreniha onaanein nihacachene nihanatiinte, Jesocurisito coreniha ichaorichaacheein.*

<sup>1</sup> Aihane jaun chajana icharihacache. Osa que nesarujueeinna ichaorichaache, jelai amuritoheriin cana belaiha Cana Coaunerane caina. <sup>2</sup> Aihei jerihane. Inasiina inae osa jianein ichaonaa saijieein, nacoaunein osa que nesarujueein ichaorichaache. <sup>3</sup> Tana inae cana baotisaauruhane aina cuaain, aina jiniiquiin o caje ichanaalu Jesocurisitone rijijieein inae nihacachene coitucuhichene. <sup>4</sup> Nitohaneeinte Jesocurisito aina jiniiquiin cana jaberoco conauteranein ne cana baotisaauruhane jaan. Aina ohin, nii o caje ichatihalu, jataain itolere niicha ichana nainei ichaain Cana Coaunerane rijijieein, cana netonai nii onaa rijijieein nena caje enachasine ichaonaa que ichaohacachene caina.

<sup>5</sup> Aihane jaun inae aina jiniiquiin onaa rijijieein nihacachene jaunte, o caje ichanaain nihalune rijijieein cana netonai aina jiniiquiin cana o caje ichanaain nerichaacheein. <sup>6</sup> Nii jauriaanejeein cana ichao que ichaohacachelune jaunte, inae Jesocurisito aina jiniiquiin coroso que tenojoein itajenojoi nelu. Nii cana ichao rijijieein ichaohin naosatenaanaja itajenojoein nihane jaun, inae nainihe cana saruha osane rijitojoein nacoaunein neosatihajein nihacachene. <sup>7</sup> Leinjiin cacha inae ohane, inae nacoaunein naosatenaa nainihe. <sup>8</sup> Nii rijijieein techu inae Jesocurisito aina onaanein cana jaberoco tihacachelune jaun, aina jiniiquiin ichaorichaacheeine cohajihacache. <sup>9</sup> Chaen techu, inae onaa caje ichanaalune jaun inae nacoaunein ohenerihani Jesocurisitone coitucuhacache, inae aina chachana naineniha onaane jaun. <sup>10</sup> Nii ohalu Jesocurisitonete, osa itajeranu que lesajeeincha ailu, inae chabana nacoaunein ohenihane caina. Nete laen inae enene, Cana Coaunera rai ichaonaa que ichoae. <sup>11</sup> Nii rijijieein techu, inara netonai osa coreniha onaanein inara jaberoco tein, Cana Coaunera rai ichaonaa que Jesocurisito aina jiniiquiin ichaohichene caohachae.

<sup>12</sup> Aihane jaun jiaonriha nenacaenein inara jaberoco ohane rai nena amuritonaa jeriha osane rijitojoein, inara jaberocohacha jerei ichaain neechene. <sup>13</sup> Jiaonriha inara jaberoco aina cuaain niicha jerei baaso

ichaa osane coina, rai inara jaberoco teein neeichene. Nitohaneein nena coacuelanaala, ohin caje ichanaain ainaa rijijieein, Cana Coaunera rai inara jaberoco teeuchete, coujuriu Cana Coaunera rai caohacha ichaeraneein neeiche. <sup>14</sup> Nitohaneein neeichene, coatiha inae inara amuritona nainerinaain osa, inae Moisesa rai rauhi aina nelanaala, inara belaiha Cana Coaunerane jaancha aina neeichene jaun.

### *Jaiti osa aina ichaonaa bana*

<sup>15</sup> Nitohanihane jaun chatohanerihacache. Inae Moisesa rai rauhi aina nelanaala, cana belaiha Cana Coaunerane jaan aina nena jaunna, osa que naosatihajeein ichaorichaache. Coatiha aihei. Nainihe nitohaneein ichaohacachene. <sup>16</sup> Inarate raotojoein leinjiin fatoroon letononeein rai niicha jerei ichaquichene coina aina cuhin neeichene, leinjiin acaacha letononeein rai nere tonoraain neeichene coitucuhiche. Nii rijijieein osa letononeein nena jeriquichenete, ohin nitajeeichene rai neriquicheein. Jana Cana Coaunera esenetaain, Aca jerihane rijijieein neeichene coina ichohichenete, rauhijiriin ichaonaa esine que ichaoriquicheein. <sup>17</sup> Nete jataain caohacha ichae Cana Coaunera, inae inara jauriaa osaacha sacurejetocoichene jianein, inae inara suujua aina cuaritaain inara relaacaanune jaan tonoraain acaacha esenetaain neeichene jaun. <sup>18</sup> Nitohaneinte osa letononeein neeichene caje, inae jianacoon neein rauhijiriin ichaonaa esine que ichaonaa tera letononeein ichaohichene coina neeiche.

<sup>19</sup> Aitoha joareein cachane rijitojoeine caa inara rai beebejeeun, jaiti joareein cacha rijijieein neeichene jaun coitucunaa nainesineeichene coataa. Charijieein teeinti inara jaberoco teeichelu nii baaso icharanein nena rai, aina cuaain baaso ichaane coina, nii rijijieein chu nii inara jaberoco teeuche nii caohacha ichaera rai, aina cuaain caohacha ichaane coina.

<sup>20</sup> Jaiti osa letononeein neeichene bana, coatiha nii rauhijiriin ichaonaa esine rai cha chaeranein ichaohichelu. <sup>21</sup> Nete inara ichao rai caohachanu erunaa naineneichulune jaun, ohin nitajeeichene coinaacha inara sarueranihalu nii baasone jaun, inae enene taolu inara ichao cojeein ichaohiche. <sup>22</sup> Nete laen inae enene, inae nii inara osa letononeein neeichene caje jianacoon neein, jeriha Cana Coaunerane rijijieein inaraacha ichai ichaain neeichene coina jatoroain neeiche. Niite laen jataain inara caohachanu que ichaquiche, Cana Coaunera que banijiaain nena ichaonaa que ichaoha aachene jaun, chabana satonoelanaala nena ichaonaa rariquicheein. <sup>23</sup> Nii inara osa inaraacha sacuhite, nech u inara rai onaa teein, inara itajeranu que nelu. Nete laen, nii ena inara belaiha Cana Coaunera tenojohin, ichaonaa sanaacharanejeein cana Curuanaa Jesocurisito aina jiniiquiin ichaohichene teranein nereein.

## 7

### *Inae nisirihateein nihane aiha cachane rijijiei que erenaa*

<sup>1</sup> Canejeraauru, inarate raotojoein Moisesa rai rauhi coitucuhin neeiche. Nii jaunte nii rauhi, jaiti ichaoha cachane tonohanau rai nelatejee cane coitucuhiche raotojoein. <sup>2</sup> Coaracuche nachuhinti, nii rauhi, leinjiin ene nisirihateein nihane, oha nii lanane reeintiaajeein ainaacha ichaohane coina aitohane. Nete inae oha nii lanane, inae nii rauhi lanaacha aina ichaohane coina aitohane caje jianacoo ne nii ene. <sup>3</sup> Nitohanihane jaunte niqui, jaiti ichaoha rai lanane tonohanau, leocha quicha aina niicha jerei ichaane, osa que nesarurichaanne que aite nii rauhi. Nete inae oha nii



lanane, inae leeocho quicha raane nihanatiin osa que nesaruha aihane que aitene nii rauhi.

<sup>4</sup>Nii rijijieein techu inara netonai inae Jesocurisito o aina cuaain rauhi caje nichoteeichene jaun, inae inara aina cha chana nainene nii rauhi. Nitohaneeinte inae nii o caje ichanaai nena Jesocurisito raineen neeiche. Inae nitohanihane jaunte, jataain Cana Coaunera notaracae rai jataain nelateinnein ne cana ichao. <sup>5</sup>Jaiti joaereein cacha rijijieein naosatihajeein ichao-hacachene banate, cana jaberoco aina cuaain baaso coacuhi baasohacha ichajeein nihacachene jaun, inae ohin nitajihacachene rai nihacachene coaratihana cana quene coinaacha nelateein nelu Moisesa rai rauhi. <sup>6</sup>Nete laen inae ena aitoaha rauhine tonoraain naitoonjoaacha ichajeein nihacachene itajeein jianichaache. Inae colane jianacoon neein, Cana Coauneraacha jerei ichajeein, rai Suujue tenojoi ichaonaa que ichaohacache, raujiaain inoanlu rauhi laenanohineein nena tonoraain ichaohacachene jianein.

*Moisesa rai rauhi colane osa coitucuhaacache.*

<sup>7</sup>Nitohanihane jaunna osa que cana saruhane coina nihalu rauhine que aitorichaache. Aihei, coatihana osa que cana saruhi Moisesa rai rauhi. Nihalu nii rauhine colane, coatihana “Naaonjoaite osa ne” naain coitucurihaanulu. Niheichu: “Jionriha chamute cachacha sirii jereein coaraain que necoelaaine,” naain biha nii rauhine colane, coatihana chabana nii coitucurihaaun. <sup>8</sup>Nete nii rauhi aina cuaain nelararajiaain, nechuh itolere baaso coacuhin aca jerihane rijijieein ichacaaunne coina canu sarue nii osa. Nii rauhi colane nerihai naosateein nihane coitucuhin nei. <sup>9</sup>Nii jaunna jaiti neniha rauhine jana, “Caohachaaunne ichaon,” narejetoonlu. Nete, inae niha nii rauhine aina cuaain canu ichao coaracaaunne jana, ohin nitajenaaneein niha canu ichaone coitucunlu. <sup>10-11</sup>Nitohaneeinte, canu rai ichaonaa telanaala, ohin nitajihanune coina, cacha itajera rai canu te osa, nii rauhi aina cuaain nelararajiaain canu coritaain canu itajihane coina.

<sup>12</sup>Nii inara rai aitocaaunne rijijieeinte, nii rauhi leinjiin acaneein ne. Chaen nii rauhi naitoonjoante casajenelanaala jataain caohachaneein nena ne. <sup>13</sup>Nitohanihane jaunna, nii caohacha ichara canu ichao itajeriha. Coatihana aihei. Nii osa te, esinae rauhijiriin osa nihane coaratihana canu quene coina caohachaneein nena rauhi aina cuaain canu atinaain canu itajelu. Nitohaneeinte jataain banejelanaala baasoniha naosatenaane coitucuerate canu que nii rauhi.

<sup>14</sup>Raotojoeinte Cana Coaunera tenojoineein niha niicha tei rauhine coitucuhacache niqui, nete canu jaberoco, osa letononeein nihanune jaun, itolere bana baaso ichaun. <sup>15</sup>Chanuchainti nitohaneein neeun. Coatihana canuhacha ichai coitucuhin ichahaun. Nena laen, enaacha canuhacha ichana nainiheichi ichaun. <sup>16</sup>Nii canuhacha ichana jeriheichi ichacaaunnena laen, aina cuaain jataain caohacha icharaniha nii rauhine coitucureeun. <sup>17</sup>Nitohanihane coatihana canu raajenihaane ichahaun, canu jaberoco cuhane nena osate nii ichae. <sup>18</sup>Nii joaenreein cacha rijijieein osaaotohanune jaunte, canu jaberoco cuhane neniha caohachane jaun, caohacha ichana jerichaaunne nihanatiin ichana nainesineeun. <sup>19</sup>Nii jaunne caohacha canuhacha ichana jerei ichaelanaala, baaso canuhacha ichana jeriheichi ichaun. <sup>20</sup>Nitohaneein canuhacha ichana jeriheichi ichacaaunne, coatihana canu inae nii ichahaun. Nii osa canu suujueniha nenaate ichae. <sup>21</sup>Nii ainane caohacha ichana jerichaaunne nihanatiin, itolere bana baaso nejesinaacha ichacaaunne que inae naihaun.

<sup>22</sup>Canu suujua cuhanena niqui Cana Coaunera rai nii rauhi rautatoon.

<sup>23</sup>Nete canu suujua cuhane ne canu rai caohacha coaaucaunne caohatera.

Acate nii osa rai rauhineein canu suujua cuhane neein baaso ichacaaunne coina canu suujua sarueraneein ne.

<sup>24</sup> Cairichaaajoaanu nohane. Chajana nohane, nii canu suujua siriha onaane caje, jelai caje canu suujua rocore. <sup>25</sup> Cana Coaunera canuhacha coroaajeite, rai Calaohi Jesocurisito aina cuaain nainere, nii caje canu rocohin nihane. Nete jaiti joaereein cacha rijijieein nihanune jaun, jaiti canu rerohecae osa. Inae satononejeeine Cana Coaunera rai rauhi tonoraain nihanune coina aitoon.

## 8

### *Jeriha Cana Coaunera Suujuene rijijieein ichaohacachene*

<sup>1</sup> Nitohanihane jaun coatiha inae caseteconein neeururinaain leinjiniji Jesocurisito cachaneein Aca jerihane rijijieein aina ichaonacaauru.

<sup>2</sup> Nitohaneeinte Cana Coaunera Suujue rai rauhi, Jesocurisito aina cuaain cana rai ichaonaa tera, cana atinaain cana itajihane rai niha osa rai rauhine caje cana rocoeraneein ne. <sup>3</sup> Rai nichaohacha sacuhin satiin osaaotooruha cachaaurune jaun acaauru aina cha ichana naineniha Moisesa rai Cana Coaunera tenojoin rauhine janate, Cana Coaunera laen nii Moisesa rai rauhicha ichana nainesiheilu ichaelu. Nii icharaanu quete leinjiin cacha rijijieein nena rai Calaohi letoaain nelu Cana Coaunera. Nitohaneeinte turuhin joenreein cacha osaaona rijijieein, satiin cana osa amuritiin coreniha ohelu cana amute cacha rijijieein Jesocurisito. <sup>4</sup> Nitohaneeinte ichaelu Cana Coaunera, satiin cana nii aitoaha rauhine rijijieein tonoraain nihacachene, joaereein cacha rijijieein naosatihajeein ichaohacachene jianeein, jeriha rai Suujuene rijijieein ichaonaa coina.

<sup>5</sup> Joaereein cacha osaaona rijijieein ichaonacaauru cachaaurute, joaereein suujua letonohacha ichajeein queecha coacuhin ichaaore. Nete laen jeriha Cana Coaunera Suujuene rijijieein ichaonacaauru, Cana Coaunera Suujue jerenohicha que coacuhin ichaaore. <sup>6</sup> Nechu jeriha cana suujuane rijijieein coaaucaanete, ohin nitajihacane coina aihaca. Nete jeriha Cana Coaunera Suujuene rijijieein coauncaane laen, jataain raotojoein ichaonaaanaja que ichaohacane coina aihacache. <sup>7</sup> Nii jeriha suujuane rijijieein coacuhin ichaonacaauru cachaaurute, Cana Coaunera que nejerateneaneein ichaaore, jeriha rai Suujuene rijijieein nena jerelanaala, niheichu tonorana jerecurenihane jaun. <sup>8</sup> Nii jaun jeriha osane rijijieein coacuhin ichaonacaauru cachaaurute, Cana Coauneraacha jerei ichana nainecurene.

<sup>9</sup> Nete laen inara, nitohaneein coacuhin ichoaelanaala, inae jeriha Cana Coaunera Suujuene rijijieein coacuhin ichaohiche. Aihachu esinae rauhi-jiriin inara suujueniha niha Cana Coaunera Suujuene. Suujueniha Jesocurisito Suujue sirilanaala nena cacha, coatiha Jesocurisito cachanihei.

<sup>10</sup> Nete inara suujueniha niha Jesocurisito Suujuene, inara rai ichaonaa tiha aicheein Cana Coaunera, inara osa coreniha inae ohin nitajeeichene rai neeichene jana, nii caje inara ichoterateein nihalune jaun. <sup>11</sup> Nitohaneein inara suujueniha ichaoha nii o caje Jesocurisito ichateralu Cana Coaunera Suujunete, nii jeelai Jesocurisito ichateralu ohin nitajeeichene rai neeichene caje inara ichateein inara rai ena nena ichaonaa tereein nii Cana Coaunera Suujue inara suujueniha nena.

<sup>12</sup> Aihane jaun coatiha cana letoaa cana suujuane rijijieein, leeochoauru osaaonaneein nenacaauru cachaauru ichao rijijieein ichaohacachene coina letononeein nihaacacheta canejeraauru. <sup>13</sup> Nitohaneein osaaona cacha rijijieein coacuhin ichaohichenete, ohichene bana nitajeriquicheein. Nete

laen Cana Coaunera Suujue aina cuaain, nii baaso inaraacha coacuhi baaso itajeeichene, nitajenaacharanejeein nenea ichaonaa que ichaoriquicheein.

<sup>14</sup> Jeriha Cana Coaunera Suujuene rijijieein naitoonjoa ichajeein ichaonacaaurute, satiin Cana Coaunera calaohineein neeure. <sup>15</sup> Nii Cana Coaunera Suujue inaraacha ranojoin coatiha coasinacai nihei, osa rene coaiten cacha amaeranenihane jaun. Acate esinae rauhijiriin Cana Coaunera Suujueneein rai calaohineein inara terane. Nii rai Suujue canaacha rai aina cuaainte, Cana Coaunera coaaucaachene naineein, “Ofa” naain coaaucaache. <sup>16</sup> Nii jeelai Cana Coaunera Suujuete, cana suujue aina jiniiquiin ne, inae Cana Coaunera calaohineein nihacachene bihacachene coina. <sup>17</sup> Nitohaneein rai calaohineein nihacachene jaunte, nii cana que niicha banihatei naitoonjoalu raeraneein nerichaacheein. Niite Jesocurisito aina jiniiquiin rarichaacheein, esinae rauhijiriin rai Cojoanonaa que nihacachene coreniha necairichaacachene.

#### *Rai Cojoanonaa que turuhenu*

<sup>18</sup> Coatihä cha nihei, cau caa ena necairichaaecaachene jaan, cana rai caa baiha rai necaohacha niicha teeni aina teein coaracaane. <sup>19</sup> Itolere Cana Coaunera coaunanojoinurute, coitucueratenojoinecuruha Cana Coaunera calaohineein nenacaarune que turuhane luhecaain cohaje. <sup>20-21</sup> Nitohanihalu cana necoaauna, coaunanojoneein nihalune baiha cojiotanohineein nihalune jaun. Coatihä sujuua caje coauneein aca jerihane jaun nitohaneein niheilü. Cana Coaunera nitohaneein ichaane jaunte ailu. Nete osa que nesaruhin necairichanaa tabai que ichaohane caje mitanojoinerichaaïne cohaje itolere bana, jataain necaohachaaïn jianacoon tenojoinecuruha Cana Coaunera calaohineein nenacaarune que nenea nainiha acaentonaine coina. <sup>22</sup> Nitohaneinte necairichaa canaanai cuna aina nebane rijijieein, enanetojoein necairichaaeca nii Cana Coaunera coaunanojohne coitucuhacache. <sup>23</sup> Coatihä acaacha necairichaaï. Cana rai niicha teeni ajiinchateranu que, rai Suujue tiha cana rai Cana Coaunerane saijieeinte, cananetonai necairichaacache. Nitohaneinte, Cana jaberoco netonai jataain mainajeein necairichae, inae rai calaohineein cana raain, ena nenea cana jaberoco tiha Cana Coaunerane que turuhane cohajeein. <sup>24</sup> Nii canaacha cohajei corenihate, ichoteratenojohneein nihacache. Inae nii canaacha cohajei coaracaachene jananihane, coatihä inae coharihaacache. <sup>25</sup> Nete nii Canaacha cohajei coaraenihacache jaitine jaun, itolere bana cana suujua corelanaala neein cohacaachene caohachae.

<sup>26</sup> Nii rijijieein techu, necairichaacachene nihanatiin, nii cana necairichanaja que cana coroatajane Cana Coaunera Suujue. Cana Coaunera bajaacachene nihanatiin, coatihä inaain bajaacache. Nete nii rai Suujue cana rai niicha tei, cana rai Cana Coaunera bajaë, canaacha coitucuhi erena cuhane cuaain. <sup>27</sup> Nete itolere cachaauru suujua coitucueraneein nihane jaun, caje nii rai Suujue bajanojoi coitucue Cana Coaunera, nii Cana Coaunera jerihane rijijieein niicha ichaneni bajanaa jerecuruha cachaaurune rijijieein bajaane jaun.

#### *Itolere laraajihä nocoetonacaauru amuritoeraneinte nihacache.*

<sup>28</sup> Chaentechu rai cachaneein belaichaneein nenacaauru rai, inae nitohaneein ichaane coina coausihalune rijijieein, itolere caohacha icharaneein niha Cana Coaunerane coitucuhacache. <sup>29</sup> Inae nii ajiniha caje coauneein niicha coitucuurite, rai nejeraneein teein raelu rai calaohi Jesocurisito, tabaauru rai nocoalaneein, tabaauru bainein, naaonjoaain neeuruhane

jana, Aca acaauru inananeein nihane coina. <sup>30</sup> Nii nunuhe caje coauneein niicha ranojoneein neenihurune maajeeinte cotijiaain, niicha ichai ujuaihoneein neeuruhane caje jianacoon mitanajaain rai Cojoanonaa que neeuruhane coina tenajaen.

<sup>31</sup> Tonarihacache jana nii que. Nitohaneein cana cocoaeratera neein niha Cana Coaunerane jaun, nerinaain chuni cana inasina nainera. <sup>32</sup> Cana coreniha oha rai Calaohine coina Cana caje chunaelanaala teein nihalune jaunte, nii amurijiriin rai Calaohi rai niicha teeni tereein, Calaohi aina jiniigui raacachene coina. <sup>33</sup> Nii jaun nerinaain chuni Cana Coauneraacha janijiin niicha ranojoinunru colurujuenaa nainera, Cana Coaunera inae cha ujuaihoneein neurenihane que aitiin jianacoon tenajaane jaun. <sup>34</sup> Chajana acaauru casetecareein. Jesocurisitote cana coreniha ohin, nii caje ichanaain ena Cana Coaunera raotono nichajai que neein, cana coreniha bajaeba-jaje. <sup>35</sup> Cha cana belaitoha Jesocurisitone jaan caje cana rocohin nere. Necairichanaa, caaintati ichaonaa que ichaohin, arinojoneein, mijitena, cajione que latejiojiriin, onaa coasina, naaonjoaihunrina cana belaitoa Jesocurisitone jaan caje cana rocohin neriha. <sup>36</sup> Nii quete:

“Ii corenihane saatiin ohacaanune coina jatoroaain nihacaanu.

Carenero sooruhane coina soera rene amaauruhane rijijieeinte canacaanu teure,”

naain ne laenanohineein Cana Coaunera Quiricha cuhane.

<sup>37</sup> Nete nitohanihane saijieein, nii cana belaitora aina cuaain, itolereneein nii cana amuritora amuritiin nihacache. <sup>38-39</sup> Nii jaunna nenerihani nii cana belaitoha Cana Coaunerane jaan caje, cana rocoerane esenetaaun. Onaa, ichaonaa, aanjeraauru, moconajaera letonocuru, ena nenea, cabaiha neenihu, dede, chauratane, leeochoaauru Cana Coaunera coaunanojoneein nenacaauru, naaonjoaihunri nainecururinaain, cana belaitoha Cana Coaunerane caje cana rocooruhane. Niite cana que coarateein coitucuerate Cana Coaunera, rai Calaohi cana Curuaanaa Jesocurisito aina cuaain.

## 9

### *Israelitacuru janijiinte raelu Cana Coaunera.*

<sup>1</sup> Jesocurisito esenetaeraneein nihanune jaunne, inara que asilanaala esinae rauhijiriin caa aitoon. Coatiha nohaniha aitohaaun. Nii ichoae tacaainte, Cana Coaunera Suujue coitucueratenojoneein, esinae rauhijiriin nohanelanaala aitocooaunne coitucue canu suujua. <sup>2</sup> Jataaine itolere bana inaderaaun. Itolere banate jataain cunae casuujua. <sup>3</sup> Canu araineein nenacaauru corenihane caseteconeein nenea jereeun, jelai teein Jesocurisito colane, nii coreniha nichotena nainecuruhane coina niqui. <sup>4</sup> Acaaurute niqui Israeli nefoerateneein neeuruhane jaun, rai calaohineein nenea rijijieein neeuruhane coina ranajae Cana Coaunera. Aca techu rai necaohacha jana acaauru aina neein, acaauru rai tonoraain neeuruhane coina Moisesa rai rauhi teein, ita taojiaain corojeein neeuruhane coina aitiin, cana rai niicha teenine maajeein belu. <sup>5</sup> Acaaurute cana foerateeurera inamaconeein neurelu. Acaauru caje nenaaneeinte cacha neein turuelu Mesihasi jeelai itolere Coauneraneein nenea. Itolere bana acanihane coroaecuruhine satiin cachaauru. Nitohanemiin.

<sup>6</sup> Coatiha Israeli rai ichaane coina naitoonjoan aninoaa Cana Coaunerane jaun, nitohaneein caseteco coaracuruhane rai neuruhi nii Israeli inamaconeein nenacaauru. Esinae rauhijiriin Israeli inamaconeein neurenihana tabaaurune jaunte aihure. <sup>7</sup> Niheichu, Abaraaun inamaconeein nenacaaru nihanatiin, coatiha Abaraaun inamaco esineneei neuruhi tabaauru. Nii

quete: “Ii inamaco esineneei neenihurute, Isacaacha caje nefoeratenaa neein neeurureein,” naain Abaraaun rai belu Cana Coaunera. <sup>8</sup> Niite chuni Cana Coaunera calaohineein nenea naineniha nechu rai lauri coreniha cachane coitucuerate cana que. Nii cana rai niicha teeni bihane esenetaain coreniha rai calaohineein nenacaarute laen esinae rauhijiriin rai calaohi esine neein coitucunojoinnein neeure. <sup>9</sup> Nii coinatate: “Enene rijiu nacoauneein turuhanune janate, inae canaanai siricheein ii comasai Sara,” naain Abaraaun rai niicha ichaneni belu Cana Coaunera.

<sup>10</sup> Nete acaachanejene. Coaracuche nachuhinti coroatajaain, Rebeca aina cana foeratera Isacaacha sirii rai calaohichuru, nii Isacaacha que inacaain neeuruhalu niquine. <sup>11-13</sup> Nete jaiti nejanoa que telanaala, niheichu jaiti baaso aina caohacha ichaain neeurenihane jana: “Rai inanate rai nocoala cachanein nereein,” naain acaauru neba Rebeca rai bihalu Cana Coaunerane rijijieein neeurelu. Nitohanerichaainne que techu: “Jacoboaacha belaainne Esao coiintereeni,” naain ne laenanohineein Cana Coaunera Quiricha cuhane. Nitohaneente inae nunuhe caje coauneein coacuhin, chatohanei ichaa cachane nihanatiin, niicha ichai coitucuhi rijijieein, niicha janijiin raain nihane coina aitohalune nainaelu Cana Coaunera.

<sup>14</sup> Nitohanihane jaunna casajenetiin baaso icharaniha Cana Coaunera berichaache. Aihei. Coatiha niritiin erenaa nainihaacache. <sup>15</sup> Nitohanihane coinatate:

“Canu suujua acatena jerichaaunne jaan quena casuujua acatereeeni. Chaen nechu cairichaaajoaain canuhacha coana jerei, cairichaaajoaain coarareeeni,”

naain Moisesa rai belu Cana Coaunera. <sup>16</sup> Aihane jaun raa Cana Coaunerane coina chatohanineein nenea jeriha cachane nihanatiin coatiha cha que nelatihei, cairichaaajoaain niicha coaraaicha raa Cana Coaunerane jaun.

<sup>17</sup> Nitohanihane jaunte, Egipto curuaanaa rai: “Canune curuaanaanein ii teeunlu, ii que canuhacha ichana nainei ichacaunne, canunein nihanune coitucuuruha satiin chauratane sacutaain nenacaauru cachaaurune coina,” naalu Cana Coaunerane jaan, laenanohineein ne rai Quiricha Inoaensi cuhane. <sup>18</sup> Nitohaneente cairichaaajoaain niicha coarana jerei cairichaaajoaain coarae Cana Coaunera. Jerichanejeein techu cairichaaajoaain niicha coarana jerihe coaraene cairichaaajoaain.

<sup>19</sup> Nete chunocoha nainere: “Nitohanihane cha corenihana jana cha ujuaihoneein cacha tere Cana Coaunera, niicha jerei ichaane jana, niha rai nii caohateein neine coalanaala,” naain bajaane. <sup>20</sup> Chaneeina nereei ii, Cana Coauneraacha ichai que ereeine coina. Coaraaunachuhinti atane codarajoe jaera rai: “Chanuna catohanein canu coaunaain neei,” naain jaera caje bajanaa naineriha. <sup>21</sup> Nii atane caje darohe janaa inaerate, aca ichana jerihane rijijieein ichana naine. Nii jeelai atane cajete naine jataain rai nelateineein neeni, chaen raujiaain rai nelateneni, naaonjoaain ichana naine.

<sup>22</sup> Nechu cacha casetecana nainihane coitucuuruhane coinatate, niicha ichana nainei coarateein, niicha casetecanohineein nitaje rai nenacaauru abaantaain cohanajae Cana Coaunera. <sup>23</sup> Nii aina cuaainte cairichaaajoaain cana coaraane jaun, jataain rai necaohacha coitucuhin nihacachene coina, inae nii ajiniha cana rai rucuhesihalune jaun, cana netonai rai necaohacha sirichanein nihacache. <sup>24</sup> Nitohanihane jaunte tabaauru Jorioocuru caje, tabaauru Jorioniheichuru caje, naaonjoaain neinichaachene cotijiaain raain ne Cana Coaunera. <sup>25</sup> Nii quete, “Canu cachanelanaala nenacaaurune, inae canu cachanein tein ranajareeeni.

Canuhacha belainohinelanaala nenacaurune,  
inae canuhacha belaaaneein teein  
belaicheeunni.

<sup>26</sup> Jerichanejeein techu, taolu  
‘Coatiha inara,  
canu cacha niheeiche,’  
naa Cana Coaunerane jaaun nenacauru raite,  
‘Ichaonaa Cana Coaunera calaohineein neeure,’  
naaurureein,”  
naain laenaclu rai Quiricha cuhane *profeta* Osiasi.

<sup>27</sup> Isaihasi netonai techu Israelitacuru que:  
“Cucuana cuhane nena-  
carene catuneji jeeoneeite niqui  
nfaaurureein Israelitacuru.  
Nete acaauru cautecuruhacha,  
coroatajajeein ichoteratenojooineein neeurureein,  
<sup>28</sup> inae nii aitohalune rijijieein,  
satiin chauratane sacutaain  
naitoonjoa icharihani  
Cana Coaunerane jaun,”  
naain belu Isaihasi.

<sup>29</sup> Nii ajiniha techu:  
“Nirijieein  
cana foerateracuru coarajeein  
nihalu Cana Coaunerane  
colanete,  
aihalu  
Comora aina Sodoma cocoaichacurune rijijieein  
nerichaache,”  
naain aitelu Isaihasi.

### *Jorioocuru aina ena nena Cana Coaunera Ere*

<sup>30</sup> Tonarihacache jana nii que. Cana Coaunerate esenetaauruha Jorioni-  
heichurune coreniha ichoteratenaajain nelu, nitohaneein nichoteeuruhane  
coacuelanaala neeuruhane jana. <sup>31</sup> Nete laen Israelitacuru, Moisesa  
rai rauhi tonoraain nichotenaa coacuruhane saijieein nainesihurene, nii  
aitoha rauhine jitariin tonorasihurenihane jaun. <sup>32</sup> Chanuna nichotenaa  
nainecurene. Esenetaauruhane coreniha nichotenaa nainecuruhane es-  
enetaelanaala, niicha ichai coreniha nichotenaa coacuruhane jaun. Nii  
jaunte nii lacurocuruhane coina tenojoi ajeri que lacurocure.

<sup>33</sup> “Leeinjiin ajerine teun Sioon. Nii ajeri quete lacuroha cuurureein  
cachaauru.

Nii jaunte nii ajeri que jaaequiin nena jaoleneein nenereein,”  
naain Jesoso que aitiin laenanohineein ne Cana Coaunera Quiricha cuhane.

## 10

<sup>1</sup> Canejeraauru, nichotenaa nainecuruha Israelitacurune coinane,  
acaauru que jataain coacuhin Cana Coaunera bajanajacoon. <sup>2</sup> Jataainte  
niqui jeriha Cana Coaunerane rijijieein nena jerecure. Nete esinae  
rauhijiriin coitucuhin aihurenihane jaun nainecurene. <sup>3</sup> Cacha  
ichoterateraneein niha Cana Coaunerane coitucuhin esenetaaurenihane  
jaunte, niicha letoai esenetana coacuelanaala, rai suujua letonohacha  
sacure raajenihane nichotenaa coacuhin. <sup>4</sup> Nii rauhi aitoonjoante  
nelatelu turuhalu Jesocurisitone que tiaajeein. Cajee coauneente laen  
nechu Jesocurisito queecha jaequiin esenetaauruhane coreniha niicha

ichai ujuaihoneein neeuruhane caje couluunojoneein neeure satiin esenetaeraauru.

<sup>5</sup> Nicha bei rauhi tonoraain nihane coreniha nichotena coacuhin nei raite: “Leinjiiniji cautijiaelanaala caa rauhi tonoraain ichoai cachate, coreniha nichotereein,” naain laenaelu Moisesa. <sup>6</sup> Nete laen nii esenetaauruhane coreniha couluunojoneein nihane coina aitiin, “Cha inicheein dedeeu, caje Jesocurisito fauhane coina,” coa naain coaaucaache. <sup>7</sup> Niheichu, “Cha onacaauru rene faureein ucuun Jesocurisito inaane coina,” coa naain coaaucaache. <sup>8</sup> “Nii erenaate inae ii rohan neein ii suujua, ii ujuaae, naaonjoaainunri cuhane ne,” naain ne laenanohineein. Caa erenaate esenetaain nenacaauru rai beratenojoneein nena ne. Nii quene caa inara relaacaanu. <sup>9</sup> Aihane jaun, cana Curuaanaa niha Jesocurisitone coitucuhin que ereerejeein, ii suujua aina cuaritaain o caje ichatihalu Cana Coaunerane esenetaainete nichoteriquiin. <sup>10</sup> Nitohaneeinte, cana suujua aina cuaritaain esenetaain nihacache, couluunojoneein canaacha ichai ujuaihoneein nena caje nichoteein nihacachene coina. Jana cana ujuaaete Jesocurisito coitucuhin inae nichoterichaacheeinne jaan beraneein ne.

<sup>11</sup> Cana Coaunera Quiricha cuhanete: “Esinae rauhijiriin icharihanine esenetaain acaacha cohajeein nena, coatiha inacojoein airinaain,” naain ne laenanohineein. <sup>12</sup> Coatiha nejelau cachaneein neeuruhi Jorioocuru aina Jorioniheichuru, leinjiin Curuaanaa- satiin acaauru Curuaanaa neeincaje acaauruhacha bajai teraneein nihane jaun. <sup>13</sup> Nii coinete: “Cana Curuaanaa coitucuhin que ereerejeein ichaonacaaurute nichoteeurureein,” naain aitelu. <sup>14</sup> Chasiina que ereereena nainecurure, coitucuhin esenetaauruhane coalanaala. Niheichu coitucuhin esenetana nainecuruhi, que acaauru rai ereein nei aonacurenihane jaun. Niheichu aonana nainecuruhi neniha acaauru rai beratenojoi berane jaun. <sup>15</sup> Chasiina nere acaauru rai bera, niha acaauru coroatajanein acaauru letoaeranune coalanaala. “Jataainte caohate cana rene turuuruha Ena nena ichaonaa tera Jesocurisito que erena turuaaurerane,” naain niha Cana Coaunera Quiricha cuhanene rijjijeein.

<sup>16</sup> Nete satiinelanaa tabaauruhacha, ichoteratenojoneein neerurichaine coina beratenojoin esenetaaure. Nii quete: “Curuanaa, cha ii beratenojoi canuhacha beebejei esenetae,” naelu Isaihasi. <sup>17</sup> Nii jaunte, nii canaacha aonai caje unaaneein ne nii canaacha esenetai. Jana nii canaacha aonaita, Jesocurisito que aitiin beratenojoi ne. <sup>18</sup> Nena canu aitoon, acaauru rai beratenojoi aonacurenihane jaunna esenetaaurenihane. Aihei jerihane, aonacuruhane saijieeinte esenetaaurene. Nii que te aitiin:

“Chauratane sacutaainte  
amuhemujueein que ereerecure.

Nii jaunte itolereneein

chauratane sacutaain nenacaauru rene turuhe  
nii erena,”

naain laenanohineein nelu Cana Coaunera Quiricha cuhane. <sup>19</sup> Nii que jaiti nainacurenihane jaunna esenetaaurenihane Isaraelitacuru. Aihei jerihane, nainacuruhanete ne. Jauriaanejeein acaauru rai:

“Canu cachanelanaala nenacaauru que

necoelaichene coinane,

acaauru aina canuhacha ichaneni ichaain,

cha coitucunaa jerelanaala nenacaauru aina

nejerateichene coina ichareeunni,”

naain beratiha acauru rai Cana Coaunerane jaun belu Moisesa. <sup>20</sup> Nii baihate:

“Chabana canu aina nenea coacuelanaala nenacaurute, canu aina neeurureein.

Chaen nechu

canu coitucunaa coacuelanaala nenacauru quene necoitucueratereeunni”

naain,

<sup>21</sup> “Itolere banane

erenaa tonoraelanaala

nechu aansaineein nenacauru cachauru

cotijiaain cohajeeun,”

naa Isaraelitacuru nichaanune que Cana Coaunerane belu Isaihasi.

## 11

### *Janijiin ranojoin nihalu Isaraelitacurune*

<sup>1</sup> Nii quene canu aitoon. Rai cachaneein nenacauru que jaolecohane jaunna cha aitoaha Cana Coaunera. Coatiha aihei. Canuhetonaine Isaraelita neeun, Abaraaun ichoala Beenjamiin lauri caje nefoeratenaa nichaanne jaun. <sup>2</sup> Inoaenlu caje coauneeinte rai cachaneein neeuruha Isaraelitacurune coina ranajaain nelu Cana Coaunera. Nii jaun coatiha ena acauru que jaolecohin nihei. Tana rai Quiricha inoaensi cuhane Isaraelitacuru que: <sup>3</sup> “Cana Coaunera, ichei *profetacuru* sohin jaohinte ichei rorihuru-*altar* ranuusiin itajeeure. Leinjiin canuhachane jaiti ichaaojoeun. Canune maajeeinte inae sohin jaonaa jerecure,” naain Cana Coaunera bajaa Irihasine laenanohineein nihane coitucuhichene. <sup>4</sup> Nete niritohane jana: “Inae acauru chosi Baal coroajelanaala, caainsi oaraancaneein nenacauru cachauru jelai tihanu canu cachanu que,” naain tonorae Cana Coaunera. <sup>5</sup> Nii rijijieein techu, ena coroatajajeeincha neeure Isaraelitacuru nichaanune cautecuru, cairichaojoaauruhane jaun acauru belaiha janijiin ranajaa Cana Coaunerane jaun. <sup>6</sup> Nitohaneein acauru belaiha acauru raa Cana Coaunerane jaun, coatiha rai caohacha ichacuruhane coreniha ranajaain nihei Cana Coaunera. Caohacha ichacuruhane coreniha ranojoinecuruhane, coatiha chanerihei cana belaitohane jaan cana rai Cana Coauneraacha tei.

<sup>7</sup> Nii jaunte nirijieein rai suujua letonohacha ichajeein nichotena coaauruhane jaun, nichoteeurenereein Isaraelitacuru. Nete laen janijiin Cana Coaunera ranojoineein nenacauru nichoteeurenereein. Jana leeochoaurute suujua letonohacha ichajeein neeuruhane jaun nichotena nainecurene.

<sup>8</sup> Cana Coaunera Quiricha cuhane:

“Cana Coaunera

niicha ichai coitucunaa

nainecurenihane coina ichae.

Nii jaunte enanetojoein

cha coitucunaa nainelanaala neeure,

nechu cha coarana nainecurenihane jaan que

acauru nota teein,

cha aonana nainecurenihane jaan que

acauru irichotihane jaun,”

naain laenanohineein nihane rijijieeinte aihure. <sup>9</sup> Rabiri netonai techu:

“Ita taojiaain lenone jaain,

lenonecuruhane jaan baaso ichaain

osa que nesarucuruhane jaaneein neeinete

caseteco coaracurumiin.



<sup>10</sup> Acaauru nota nihanatiin conoeneeinete,  
 cha coarana nainelanaala  
 baaso ichaain neeuruhane,  
 chabana satonohelanaala  
 caseteco coaracurumiin,”  
 naain aitelu.

*Nichoteeuruha Jorionihechurune jaan*

<sup>11</sup> Canune aitoon. Nitohaneein baaso ichaain inae casetecanohineein neeuruhane jaunacha, inae caohachanainejeein jaoleneein neeuruha Jorioocuru. Aihei, coatiha caohacha nainejeein jaoleneein neeuruhi. Nenacaaen tejian erenaa tonoraareniha Jorioocurune aina cuaain, inae ichoteretenojineein neeureein Jorioniheichuru netonai. Nitohaneein inae ichoteratenojineein neeuruhane coaracuruhane banate, acaauru que necoelaihureein Isaraelita nichaaunne laurichuru. <sup>12</sup> Aihane jaun baaso ichaain caseteco coaracuruha Jorioocurune, Cana Coaunera coitucuelanaala nenacaauru Jorioniheichuru rai caohacha ichaa aihuruhane jaan cajete, jataain nii amurijiriin caohacha icharichaain, inae nacoaunnein Jorioocuru raane bana Cana Coaunerane coitucuhacache.

<sup>13</sup> Nena laen canu, inara Jorionelanaala neiniquichene rai erenaa jereun coitucuhichene coina. Nii coinata inara Jorionelanaala neiniquichene rene caletoaain nelu Cana Coaunera. Nii jaunna jataain inara aina neein, jataain corajeein canu amihaneen ichana jereun, <sup>14</sup> inara que necoelaain, canu foeratera caje nenacaauru tabaauru netonai nichotenaa nainecuruhane coina. <sup>15</sup> Nii ranojoinelanaala neeuruha Jorioocurune coreenraniha, inae Cana Coaunera que nejeratenaa rijijieein neeuru caje, ranojoieein Cana Coaunera aina raotojoein neeuruha Jorioniheichurune jaunte, nii amurijiriin ranojineein nena nainecure Jorioocuru. Nii jaunte ohin nitaje rai neeuru caje inae nacoaunnein ichaohin sanaacharanejeein nena que ichaamore. <sup>16</sup> Coaracuche nachuhinti, coliha caje ichoaichaniha ichanohi faan, jelai teein Cana Coaunera que banijiaain nihane jaun, satiin nii coliha netonai que banijiaineein nihane. Nii rijijieein techu leinjiin enuha cojoaisi Cana Coaunera que banijiaain nihane, rai nunecuru netonai que banijiaineein ne.

<sup>17</sup> Charijieein teeinti toroonjoan nujian sauriin cuhane limoon uune temuhacane, rai nujian que nujuaain nena rijijieein inacae nii limoon. Nii rijijieein techu, inara Jorioniheichuru nequichene nii limoon uune rijijieein neeichene jana, Joriocuru nii inara nujian toroonjoan nujian rijijieein neeure. Nitohaneinte nii toroonjoan uune sauhin jaohin, inara Jorioniheichuru nequichene nii limoon uune rijijieein nii toroonjoan nujian necuruha nii Joriocurune jaun, acaauru que temuratenojineein neeiche.

<sup>18</sup> Aihane jaun jiaonriha uune sauhin jaonojineein nena coreenranein neeine jaun, nii uune esinenein neinichaanune amurijiriin nena coahin nihache. Jiaonriha rai nujian esine nein neinichaanune cuhane tein temunojineein neeichene baitiquichene.

<sup>19</sup> Nete, “Aiha niqui. Nete nii jauriaanejeein uune neein nenacaauru sauhi jaohin, canu temuurelu coreenraniha,” nariquiin. <sup>20</sup> Nete esenetaenihacaanune jaun, sauhin jaonojoin rijijieein nihacaanune jana, inara esenetaaichene jaun canacaanu coreenraniha ranojineein neeiche. Aihane jaun jiaonriha niique necohasitaain neeichene. Necohasitanaa coacuelanaala casiin neeichenete caohachae. <sup>21</sup> Nii, rai nune esinenein nihacaanune saijieein jaonojineein nihacaanulune jaun techu nii amurijiriin inara que suujua acatena nainenereein baaso ichaquichene Cana Coaunera. <sup>22</sup> Aonacuche.

Jataainte caohachaneje Cana Coaunera. Nete laen suujua letonohacha ichaa cachane abaantaene. Nitohaneein naitoonjoa esenetaauruhi casetecaa natiinte inara raain nelu. Nete laen inara belaiha inara raain nihalune rijijieein ichaohichene caohachae, inara netonai sauhin jaonojoneein neeichene coataa. <sup>23</sup> Jorionichaanune netonaite, esenetaenihacaanune jianein inae nacoauneein esenetaacaanune, jelaiha nune que tenojoinerichaanuhi, niicha ichana nainei ichaain, jelaiha canacaanu temurichaaain Cana Coauneraane jaun. <sup>24</sup> Coaracuche nachuhinti inara Jorionelanaala neiniquichene, limoon uune rijijieein neeichene saijieein temunojoneein neeiche, nii toroonjoan uune esine neein neinichaanune coreenraniha tenojoineein ne. Nii jaun techu Jorionichaanune inara amurijiriin nacoauneein jelaiha nii rai nujua esine que teein temunojoneein nenea nainerichaanuhi.

*Satononiha ichoteratenojoneein neeururichaaain Isaraelitacurune*

<sup>25</sup> Canejeraauru, Cana Coauneracha ichaneni asinojoneein nenea coitucuhichenena jereeun, nabana cha coitucuera niha nocoetiin neeichene coataa. Isaraelitacurute baaso ichacuruhane jaun, Cana Coaunera que nejeratenaaneein jaoleneein neeurelu, satiin Isaraelitanelanaala nenacaauru netonai ranojoneein neeuruhane que tiaaajoaain. <sup>26</sup> Inae satiin ranojoneein neeuruha Isaraelitanelanaala nenacaaurune janate, satiin ichoteratenojoiniha cuurureein Isaraelitacuru. Cana Coaunera Quiricha cuhane:

“Sioon jelai cajete ureein  
jianacoon cache mitaeranu.  
Baaso ichajeein niha Jacobone cajete,  
nii baaso rocoreein caje.

<sup>27</sup> Nitohaneeinne  
acaauru aina caitoonjoan  
canuhacha ichaneni ichareeuni,  
inae acaauru osa caje jianacoon tenajaanune bana,”  
naain nii coina ne laenanohineein.

<sup>28</sup> Nete beratenojoi niha ichoteratenojoneein neeururichaaain cachaurune aina cuaain, Cana Coaunera que nejeratenaaneein neeure Jorioocuru, inara ichoaichaniha coitucunaa nainequichene teranu que. Nete enanetojoein cairichaaajoaain acaauru coarae Cana Coaunera, acaauru foerateracuru janijiin raalune jaun. <sup>29</sup> Coatihana rai niicha teeni ruluhin nihei Cana Coaunera. Niheichu janijiin niicha raauri que jaoleconaa nainihe. <sup>30</sup> Jauriaalute inara netonai Cana Coaunera ere esenetaain tonoraelanaala neeichelu. Nete nere tonorana jecureniha Jorioocurune jaun, inae enene cairichaaajoaain inara coarae Cana Coaunera. <sup>31</sup> Nii jauriaalu nere esenetaain tonoraelanaala neeichelune rijijieeinte, enene nere esenetaain tonoraelanaala neeure Jorioocuru, nechu cairichaaajoaain inara coaraain nihalune rijijieein, ena cairichaaajoaain acaauru netonai coaraa Cana Coauneraane coina. <sup>32</sup> Cana Coauneraate nitohaneein ita rijijieein nere tonoraeniha cachane coina ichae, ita rijijieein jiniiquiin cairichaaajoaain cache coaraain nihane coina.

<sup>33</sup> Jataainte banejelanaala caohacha icharaneein, itolere ichara neein, cha coitucueraneein ne Cana Coaunera. Coatihana nihei chuni, niicha coacui aina niicha ichaneni coitucuhin beranu. <sup>34</sup> Nii jaun, “Cha Cana Coaunera suujua coitucue. Cha sujuatenaa nainere. <sup>35</sup> Cha rai cha teein nelu rai cainaan nihane coina,” <sup>36</sup> Itolere Cana Coaunera caje unaa neein ne, niicha coaananojoneein nihane jaun. Nii jaunte satiin itolere rainein neure.  
Itolere bana coraenohineein neeine Cana Coaunera. Nitohanemiin.

## 12

### *Cana Coaunera que banijiaineein nena ichaonaa*

<sup>1</sup> Canejeraauru inara raine aitoon. Jataain inara belaitoha Cana Coauneraane jaun, inara raajenihane rai inara ichao teeuche jelai teein que banijiaineein, rautaa Cana Coauneraane rijijieein. Niite laen jataain Cana Coauneraacha jereineein, rai caohacha neein ichariquicheein. <sup>2</sup> Jiaonriha suujua cuhane coacuhin ichaoruha Cana Coaunera coitucuhichurune rijijieein, inae nenacaan coacuhin acaauru rijijieein ichaohichene. Nitohanein ichaonaa coacuelanaala, inara suujua coreein ichaaochete, inara ichao coreein ichaohin, Cana Coaunera jerenohineein, “Naaonjoainte caohachae. Naaonjoaite rautae Cana Coaunera. Caate esinae rauhijiriin caohacha ne,” naain coacuhin, caohacha nejesina coitucuhin ichajeein ichaohiche.

<sup>3</sup> Jataain cana belaitoha Cana Coauneraane jaun, canu cocoaainain caletoain beratihane jaunna satiin inara rai aitoon, nabana leeochoauru amurijiriin nena coacuhin niha chunine coataa. Aihane jaun jiaonriha esenetaichene coreniha inara rai Cana Coauneraacha tei rerohin, cha coacuhin ichana jereein neeichene. <sup>4</sup> Charijieein teinti cana ichao rai nelatihane coina arai lauriin nihacoae cana jaberoco que cana nerurujuana jaan. <sup>5</sup> Nii rijijieein techu arajii Jesocurisito esenetaeranichaachene, ita ichao que ichaohin Jesocurisito aina cuaain leinjiin que jaberocoanaa rijijieein ita jaberoco que jaberocohin nihacache.

<sup>6</sup> Nitohaneinte le cachanichaachene rai aca jerihane rijijieein tenaa jerihane jaancuru rai, lauri lauri canaacha ichaneni ichana nainena jaanu teein ne Cana Coaunera. Aihane jaun, rai nere beraneein cana letoaa Cana Coauneraane esenetaacachene rijijieein coitucuhin ichacaachenete ne. <sup>7</sup> Leeochoauru coroatajanera neein nihachene coina, cana teein niha Cana Coauneraane, jerecuruhane rijijieein acaauru coroatajanichaachenete ne. Jana chunocoha, cacha relaeraneein nihane coina aca tiha Cana Coauneraane, leeochoa ichana coacuelanaala acaacha ichamiin. <sup>8</sup> Jerichanejeein chu, chunocoha cacha suujua anihoeraneein nihane coina tenojoinihane cacha suujua anihoeraneein neeine leeochoa ichana coacuelanaala. Chunocoha cha teein niha leeochoauru raine, chunaelanaala teeine. Jana chunocoha cacha letoeraneein nihane, coujuriu rai namihaneoneein nihane coitucuhin ichamiin. Cairicheihuru rai cha teeichene, tonajelanaala rachoojoein teeuche.

### *Naaonjoaainte caohachae ichaoha Jesocurisito ranojoneein nenaane*

<sup>9</sup> Ita que asilanaala jiniiquiin ita suujua rijijieein ita belain neein, itolere baaso ichana coacuelanaala caohacha nejesinaacha ichacuche. <sup>10</sup> Jesocurisito aina cuaain ita nejeraneein neeichene coitucuhin, jiniiquiin ita belain ita suujua rijijieein coacuhin, itaque inara suujua acatein ichaaoche.

<sup>11</sup> Nelararajiaain coiintelanaala corajeein inara suujua aina cuaritaain Cana Coaunera jerenohin ichacuche. <sup>12</sup> Rachoojoein neeuche nii inaraacha cohajei coreniha. Chaen laraajiin neein necairichanaa abaantaain itolere bana Cana Coaunera bajaebajajeein ichaaoche.

<sup>13</sup> Cha lateein neeuruha Cana Coaunera cachaneein nenacaaurune, inara raajenihane cha latera rijijieein acaauru coroatajanecuche. Inara rene turuhin niha cachane, raotojoein cotijiaain raauche.

<sup>14</sup> Inara rohecaeraauru rai caohacha ichacuche. Jiaonriha, “Coaraain nainamiin,” naain acaauru que ereeichene.

<sup>15</sup> Rachoojoenacaauru aina rachoojoein, inaderaain chananacaauru aina inaderaain chanaauche.

<sup>16</sup> Ita rijjijeein coacuhin ichaauche. Jiaonriha chuni amurijiriin nena coacuhin neeichene. Cairichaaerinojoein ichaonacaauru rijjijeein ichaauche. Jiaonriha leeochoaauru amurijiriin cha coitucueraneein nena coaauquichene.

<sup>17</sup> Jiaonriha chuni inara rai baaso ichaain nihane, inara netonai rai baaso ichana coacuhi nihache. Nitohanena coacuelanaala satiin notaracae, caohacha nejesina ichajeein ichaauche. <sup>18</sup> Atiin leeochoaauru aina jiniiquiin raotojoein acaauru cotainaa coacuelanaala ichaauche. <sup>19</sup> Canejeraauru, jiaonriha inara cairichaera cairichanaa coacuhin neeichene, Cana Coaunera, baaso ichaeraauru ichanohin coitucuhin casetecarichaine jaun. Nii cointe rai Quiricha inoensi cuhane:

“Canune baaso icharaauru coitucuhin casetecaain, caohacha icharaauru coretereunni,”

naain aite Cana Coaunera. <sup>20</sup> Aihane jaun iicha cotaairii mijitihane coroaateeu. Jana cocoirihane acau que cocoaerateeu. Aihute nocoejeein aonamiin.

<sup>21</sup> Jiaonriha baaso nejesina coacuhin jeriha inara suujuane rijitojoein neeichene. Nitohanein baaso ichaelanaala caohacha nejesina ichajeein baaso amuritoche.

## 13

<sup>1</sup> Satiin cocoainanohineein niha cocoainacaine jaun, satiin rai nere tonoraain aca jerihane rijjijeein neeuche. Nihei chuni cocoainanacai, Cana Coaunera tenojoinelanaala nei. Satiin cocoainanacaihurite Cana Coaunera tenojoein cocoainanohineein neeure. <sup>2</sup> Nii jaunte chunocoha cocoainanacai ere tonoraanelanaala nei, Cana Coaunera jerenohin tonoraenihane jaun aicheein. Chaen techu caseteco coaracurureein, nii nere tonoraauruhi, <sup>3</sup> caohacha icharaauru casetecaelanaala, baaso icharaauruhacha casetecaranein niha cocoainanacaine jaun. Aihane jaun ii casetecaa cocoainanacaine coasiinne, baaso ichana coacuelanaala caohachaain neeute, esinae rauhijiriin caohachaain neeine coaramiin cocoainanacaihuri, <sup>4</sup> acaauru jeriha Cana Coaunerane rijjijeein, ii rai caohacha ichacuruhane coina neeuruhane jaun. Nete laen baaso ichaain neeine, cocoainanacai coasiinne ne, esinae rauhijiriin baaso ichara casetecaane coina teein niha Cana Coaunerane jaun. <sup>5</sup> Nii jaunte jeriha cocoainanacaine rijjijeein nere tonoraain ichaohacachene caohachae. Coatiha cana casetecaane coasihacha nihei. Caohachaain cana suujua coaraain ichaohacachene cointe aihacache. <sup>6</sup> Nitohanihane jaunte cocoainanacaihuri rai coriqui teein neeiche, Cana Coaunera jerenohineein leinjiin rai namihaneecha ichajeein neeuruhane jaun.

<sup>7</sup> Le cachaaauru naineein, inara caje acaaruhacha raani teeuche. Niha chatohanei inaraacha coretenenine rai coretecuche. Niha chatohanei, cobiereno rai inaraacha coreteneni *impoestone* coretecuche. Niha cache inara suujua acatequichene jaaneeine que inara suujua acatecuche. Niha cache inaraacha belainenine belaihuhe.

<sup>8</sup> Jiaonrihachu chuni que nerebeteein neeichene. Nete laen jiniiquiin ita belaaichene caohachae. Chunocoha namute cache belaaain ichoaite, aitoa Cana Coaunera rai rauhine rijjijeein, inae ichaohane jaun aicheein. <sup>9</sup> Cana Coaunera rai rauhi cuhanete, “Jiaonriha ii sinijieranelanaala nena ene aina ichaojeraquiin neeine. Jiaonrihachu sonajaain jaohine. Jiaonrihachu asijiauhine. Jiaonrihachu chamute cache rucuhele, rai nirihuru, rai sinijera, naonjoaaihunri jereein neeine,” naain ne laenanohiheein. Nete satiin

nii naitoonjoan coitucuhin nihacachene coina: “Ti raajenihane ijiabereeo belaaïne rijitoojoein chamute cacha belaihu,” naain ne laenanohineein. <sup>10</sup> Aihane jaun namute cacha belaaïn ichoai, coatiha nainiheï baaso ichaa namute cacha raine. Nitohaneein jiniiquiin ita belaaïn nihacachenete, satiin aitoaha nii rauhine rijijieein ichaohacachene jaun airichaacheein.

<sup>11</sup> Satiin sininaa rijijieein ichaohacachene caje nocohin cana ichao coaraain coitucuhin ichaohacachene cojoanonaa que turuhane que nainacaachenete caohachae, inae jauriaanejeein cana rai beratenojoi nihane jana esenetaacachene bana amuritoheriin inae ichuunejeeonriha ichoteratenojoein nerichaacheeinne jaun. <sup>12</sup> Inae satonohelalajiha caa nocohenaanau ichaonaa rijijieein ichaohacachene jaan janonaa. Inae turuhelalajiha nii ena nena jaonaa canaacha cohajeine jaun, nocohenaanau nena rijijieein baasohacha ichajeein ichaohacachene jianein coujurihu Cana Coaunera cachanein nena tocohanein nihacachene coarateein nihacachenete caohachae. Charijieein teeinti letona jatoraaïn ne sondaro, rai curuaanaa aitoonjoan ichaane coina. Nii rijijieein techu cana netonai jatoraaïn nihacache, Cana Coaunera aitoonjoan ichacaache chuni que asilanaala satiin notaracaane coina. <sup>13</sup> Aihane jaun caohacha nejesina ichacaachene coaracuruha cachaaurune coina, nainihaacache joaenreein ene jereein, ajetoritii enaacha joaenreein cha ichaaïn, niheichu canamute cacha cotaairiin coaraain, canamute cacha que necoelaain, naaonjoaain nena nainihaacache. <sup>14</sup> Aihane jaun nitohanein nena coacuelanaala, coujuriu Cana Curuaanaa Jesocuriso cachanein neeichene coarateein laraajiin neeuche, joaereen cacha rijijieein inara suujua letono tonoraelanaala.

## 14

### *Jiaonriha inara nejera ichao que ereeichene.*

<sup>1</sup> Inara rene turuhin niha cana nejera canaacha esenetai aina ijilanaala ne-naane, rai tonaain erena coacuelanaala raotojoein raauche. <sup>2</sup> Coaracuche nachuhinti tabaauru itolere lenone que ita rijijieein lenoneein neeuruhane. Jana tabaauru ijilanaala nena, iniho quilanaala jasisichuruhacha que lenoneeine. <sup>3</sup> Aihane jaun, itolere lenone que lenoneein nenacaauru, nainiheï nii itolere lenone que lenonena nainelanaala nenacaauru que ereein neeuruhane. Jerichanejeein chu nainiheï, nii itolere lenone que lenoneein nena que erena nainiheï nii itolere lenone que lenonelanaala nena, Cana Coaunera acaentonai raain nihalune jaun. <sup>4</sup> Aihane jaun chaneina neei ii, leecha rai niicha latei tera que baaso ichaa beein que ereein neeine coina. Nii acaauru letoaeranein nena Cana Coauneraachate baaso ichaaïn aihurenihane, caohacha ichaa aihuruhane coitucureein. Nete itolerenein caohachaaïn raotojoein neeureein, Cana Curuaanaa raotojoein neeuruhane coina icharanein nihane jaun.

<sup>5</sup> Niha coaiteen tabaauru, jataain leeochoauru janonaa amuritoheriin nelateinein lejanohane coaraauru. Jana tabaaurute satiin janonaa ita rijijieein nelatihane que aitocure. Nii jaunte lecachanichaachene, canaacha esenetai coitucuhin esenetaacachene caohachae. <sup>6</sup> Leeochoauru janonaa bana amuritoheriin le janonaa coaraain, bana Cana Coaunera coroaena jerihane, nii janonaa bana coroaemiin. Jana Cana Coaunera rai caohacha ichaa itolere lenone que lenoneein nena jerihane, itolere lenone que lenoneein Cana Coaunera coroaemiin. Jerichanejeein chu Cana Coaunera rai caohacha ichaa itolere lenonecuru que lenonena nainiheichuru, quilanaala neein Cana Coaunera coroaemiin.

<sup>7</sup> Coatiha cana jerichaachene jaun ichaohin, ohin, naaonjoaain nihaacache. <sup>8</sup> Nii rijjijeein techu ohin, ichaohin, naaonjoaain nihaacachene nihanatiin Cana Coaunera raineen nihaacache. <sup>9</sup> Nii cointate ohin, o caje ichanaain, naaonjoaelu Jesocurisito, ichaonacaauru, onacaauru, naaonjoaainunri Curuaanaaneen nihane coina.

<sup>10</sup> Chanuna jana chaen nitohanihane saijieein, ii nejera ichao que ereein rai necoeje chanuhin neei, Cana Coaunera acatiha satiin tururichaacheein aca canaacha ichai coitucuhin rucuherrichaaaine saijieein.

<sup>11</sup> Nitohanerichaaaine quete:

“Canu ichao coreniha esinae rauhijiriin airichaaanne quene aitoreeunni.

Satiin cachaaaurute canu acatiha neseonriaain canu nichaanune coitucuhin Cana Coaunera coroaecurureein,”

naa Cana Curuaanaane ne laenanohineein Cana Coaunera Quiricha Inoaensi cuhane ne. <sup>12</sup> Nitohaneente le cachanichaachene, cana raajenihane canaacha ichai berichaacheein Cana Coaunera rai.

### *Jiaonriha inara nejera ichao lacuroaaichene.*

<sup>13</sup> Aihane jaun inae nainihaacache cana nejeraneen nenacaauru que baasoneein ereein, chatohanei ichaain, naaonjoaain nena nainihaacache. Chatohanei ichana coacuelanaala neeichenete caohachae, nabana esenetaa cana nejerane lacuroaaichene esenetaane jianihane coataa. <sup>14</sup> Canune esinae rauhijiriin Jesocurisito esenetaeraneen aitoon. Nihei chuni lenone, calanineein quichaenihane coina coaunanojoi. Nete lenone tabaauru, leeochoauru cachaaauru rai lenoneneein nene. <sup>15</sup> Niheichu nainihee quinaa inaelanaala nena ii nejera notaracae rai baaso ichara tocohaneein quiine. Ii lenoneecha coreniha nitajeein niha ii nejera, coreniha netonai ohin nihalu Jesocurisitone saijieeine coataa. Nitohaneein neeine coatiha chamute cache belaaaine coaratiha airiheeini. <sup>16</sup> Aihane jaun itolere lenone que lenonena naineen neeichene jaan aina cuaain nainiheeiche baasoneein inara que ereein neeuruha cachaaaurune jaanu ichaain neeichene. <sup>17</sup> Jeriha Cana Coaunerane rijjijeein rai Cojoanona que ichaonaa jerichaachene, coatiha joaenreein lenone que lenoneein nihaacane latihei. Nete laen esinae rauhijiriin baaso ichaelanaala rai Suujue aina cuaain rachoojoein ichaohin, raotojoein nihaacachene caohachae. <sup>18</sup> Nitohaneein ichaohin Jesocurisitohacha jerei ichaa cachanete laen rautatiin coarae Cana Coaunera. Cachaaauru nihanatiinte esinae rauhijiriin caohacha ichaane coaracurureein.

<sup>19</sup> Aihane jaun, atiin ita aina raotojoein ichaohin nihaacachene jaanuhacha ichacaachenete caohachae. Nii banate laen esinae rauhijiriin, jiniiquiin ita coroatajaneen, jeriha Cana Coaunera Suujuene rijjijeein nerichaacheein. <sup>20</sup> Nainihei lenoneecha coreniha Cana Coaunera ichanohin itajeein nihaacachene. Esinae rauhijiriinte niqui, satiin lenonecuru lenone caohachaneen neeure. Nete caohachaene que lenonelanaala nenacaauru notaracae que lenoneein acaauru suujua lacuroaera tocohaneein nihaacachene. <sup>21</sup> Nii jaunte caohachaene, iniho leeochoauru quinojoinelanaala nena quiin, bino cohin, naaonjoaain nihaacachene. Niheichu leeochoauru suujua lacuroaera tocohaneein nainihei joaenreein chachanaa nainihaacache. <sup>22</sup> Aihane jaun ii joaereen lenone que lenoneeine, Cana Coaunera notaracaecha que lenoneeu. Rachoojoein neeine suujua cuhane nocoatelanaala joaenreein lenone que lenoneein nena. <sup>23</sup> Nete laen inae roaotojoein quinaa naihenihane coituhane saijieein que lenoneein nei, aca nii ujuaihoneein ne, niicha quiinelanaala nenaanihane coitucuhane

saijjeein quihane jaun. Nii jaunte inae canaacha ichana nainihe i chacaa raotojoein coitucuhane saijjeine, osa que nesaruha aihaca.

## 15

*Ii rainuhacha que caohacha ichana coacuelaanaala chamute cacha rai caohacha ichaau.*

<sup>1</sup> Inae cana, jeriha Jesocurisitone rijjjeein laraajiin neinichaachene, nii ena nunuhetein sacuhajeraauruhacha ichai que tonaain erenaa nainihacache. Atiin acaauruhacha ichai rautaenihacachene nihanatiin abaantacachenete ne. <sup>2</sup> Satiin canate, canamute cachaauru rai caohachanu que cha ichaain nihacachene caohachae, caa canaacha esenetai aina ijjeein sacuhajjein ichaauruhane coina. <sup>3</sup> Coaracuchenachuhinti Jesocurisito netonai, aca jerihane rijjjeein nenea nainenihane jaun: “Ti necoeje chanuureraauru coreenranihane canu caseteco coaraaun,” naain que aitiin laenanohiniane nainaaluu, rai suujua letono rijjjeein nenea coacuelanaalane. <sup>4</sup> Satiin Quiricha Inoaensi cuhane laenanohineein nenaate, cana sujuateraanu que laenanohineein nelu, itolere bana jianelanaala, cairichaaajoaain cana coaraane aina cuaain canaacha cohajei ranaa nainichaachene coina. <sup>5</sup> Nii Cana Coaunera itolere bana cairichaaajoaain cana coara, inara coroatajanemiin. Cana relaaluu Jesocurisitone rijjjeein <sup>6</sup> jiniiquiin ita belaa in rachoojoein Cana Coaunera corojeein ichaoche, jeriha Cana Coaunera Cana Curuaanaa Jesocurisito Inacaneein nenaane rijjjeein neeichene coina.

*Jorioniheichuru rai benojoiniha Jesocurisitone que erenaa*

<sup>7</sup> Aihane jaun Cana Coaunera rai caohachanu que inara raain nihalu Jesocurisitone rijjjeein, inara netonai jiniiquiin raotojoein ita raain neeuche. <sup>8</sup> Esinaena aitoreeunni inara rai. Inae cana foeratera inoaensihuru rai, nitohanein ichaane coina aitosihalu Cana Coaunerane nainane coinete, Jorioocuru nichaanune rai nelatihane coina turuhin nelu Jesocurisito, caje esinae rauhijiriin nohanelanaala tihane coina, naitoonjoan ichaa Cana Coaunerane coaracuruha cachaaurune coina. <sup>9</sup> Chaen techu Jorioniheichuru netonai, aca Cana Coauneranein nihane jaun, cairichaaajoaain acaauru netonai coaraane coitucuhin, Acaneein nihane coroaecururichaaaine coitucueratihane coinane maajeein turuhin nelu. Nii ajinihate nitohanerichaaaine que:

“Nitohanei ichaaine corenihane lauri lauri nenacaauru cachaauru aina neein-ineein neeine corojeein nenatereunni,”

naain laenanohineein ne Quiricha Inoaensi cuhane. <sup>10</sup> Quiricha Inoaensi cuhane techu coaiten:

“Cana Coaunera cachanein nenacaauru aina jiniiquiin rachojeuche lauri lauri nenacaauru cachaauru,”

naain ne laenanohineein. <sup>11</sup> Rai Quiricha Inoaensi cuhane techu coaiten:

“Lauri lauri neiniquichene

Cana Coaunera cachanein nenacaauru aina jiniiquiin

Cana Coaunera coroaecuche,”

naain ne laenanohineein. <sup>12</sup> Isaihasi netonai techu:

“Isaihasi caje nefoeratenaa-

Israelitacuru curuaanaa neein nenea-

Rabiri cajete

ocoorein leinjiin Curuaanaa,

Israelitanelanaala nenacaaurune maajeein

curuaanaa neein nihane

acaacha que jaaequiin neeuruhane coina,”

naain laenaelu.

<sup>13</sup> Canaacha cohajei teraneein nenea Cana Coaunera, Aca acaneein nihane esenetaeraniquichene rai, raotojoein rachoojoein jiniiquiin neeichene jaanu tein, inara aina niicha ichana nainei ichaa rai Suujuene coina ichaminte, leinjiin acaacha cohajeein neeiche.

<sup>14</sup> Canejeraauru, saain inara leeochoauru belaa in ichaohin, itolere coitucuhin, jiniinquiin ita suujuatenaa coitucuhin ichaohichene coitucuhanu. <sup>15-16</sup> Nena laen caa quiricha inara rai canuhacha laenai cuhane inara que asilanaala inara rai aitoon, nabana baitequichene chatohanei ichaquichene coataa. Nitohaneein Jorioniheichuru rai caohacha ichaa Jesocurisitone beebejihanune coinata, canu rai caohacha ichaane coina canu raain nelu Cana Coaunera. Nii jaaunne Cana Coaunera beratenojoi ichoteratenojoein neeururichaaanne beebejeeun. Nii canuhacha beebejei esenetaauruha Jorioniheichurune, Cana Coaunera rai iniho mocohin teuruha saseredotecuru Jorionei nenacaaurune rijijiein, Cana Coaunera rai, jeriha rai Suujuene rijijiein couluunojoein Jorioniheichuru tihanune coina.

<sup>17</sup> Coujuriu Jesocurisito letononein nenea tocohanein, Cana Coaunera-acha jerenohi ichaain nihanune jaunne raotojoeun. <sup>18</sup> Nii jaunne Jorioniheichuru relaa in nihanune jeriha Cana Coaunerane rijijiein neeuru coina, canu relaa in nihalu Jesocurisitone jaan caje cuaain, leeocheanein cuaain Jorioniheichuru relanaa coacueneun. Niine ichaun acaauru rai ereerejeein, acaauru aina neein canu ichao que acaauru notajaain, <sup>19</sup> cojoelanaacojoai ichana nainichaaunne jaan aina cuaain, Cana Coaunera Suujue aina cuaain, naaonjoaain. Nitohaneine cana ichoterateraneein niha Jesocurisitone beebejihanune nainaan jataain caohatiin, Jerosaleeun caje nunuhetein itolere sacutaain Iliria batane que tiaaajoaain. <sup>20</sup> Nitohaneine chabana turuureniha leeochoaurune jaaunru cuhecujuein chabana aonaeraniha Jesocurisito que erenaane jaaunru Jesocurisito beebejeeun, nabana leeochoauru amihaneena jaaunru turuhin, acaauru amihaneerohecaanune coataa. <sup>21</sup> Nitohanei ichana coacuelanaalane, “Chabana que erena aonaelanaala nenacaaurute, inae aca Acanihane coaracururein. Chabana aonaelaanaala nenacaaurute, aonaain coitucuha cuururein,” naain laenanohinein niha Cana Coaunera Quiricha cuhanena rijijiein ichaun.

### *Romau cunaa coaauca Faborone*

<sup>22</sup> Jaiti nii ichajihanune jaaunne, araai saain inara coaraa unaa coaaucaanne nihanatiin nainesineun. <sup>23</sup> Nene laen inae ena canu amihaneero nainaan, nii canuhacha beebejei atane sacutaainchurune jaun, inae inara coaraa unaa jereun araai jaanacai baiha. <sup>24</sup> Nii jaunne España cuhanune ucuaetoha, cuujihataain inara rene bedaenereuni, bajaanachuhinti aineeun. Nene laen atiin, inae nainaan inara rene bedainichaaune baiha, jelai caje amuhanune coina canu coroatajaniquichene jereun. <sup>25</sup> Nene jaiti ena Jerosaleeun cureeunni, ecu nenacaauru coroatajaniha leeochoauru cana nejeraauru taojiai tihanu acaauru raine coina. <sup>26</sup> Masedoniau nenacaauru, Acaihau nenacaauru, naaonjoainurite suujua caje coaunein, Jerosaleeun cairicheinejeein nenacaauru coroatajaniha letoauruhane coina, niicha letoenihunru taojiaaure. Nitohaneinte rai suujua caje coaunein coacuhin, jataain caohacha ichacure. <sup>27</sup> Charijiein



teeinti Jorionecurenihane saijieein, acaauru que Jesocurisito coitucuerateurelu, Jorioocuru Jesocurisito esenetaeraneein nenacaauru, nii rijieeinte Jorioniheichuru netonai, Jesocurisito esenetaeraneein nenacaauru Jorioocuru coroatajanecure, acaauruhacha sirii taojiaain letoaain. <sup>28</sup> Nii jaunne inae nii leeochoaauru coroatajaniha acaauruhacha taojiai amaain tihanune baihane laen, Españau cureeunni. Nii ucuaetohane laen cuujihataain inara rene bedaenereeeunni. <sup>29</sup> Inara rene bedaenichaaune, cana coroatajanerichaaain jelai amuritoheriin Jesocurisitone coitucuhanu.

<sup>30</sup> Inara raine aitoreeunicha canejeraauru. Atiin Jesocurisito aina cana belaiha cana rai Cana Coaunera Suujue tenojoi coreniha, caohachaaain cuha canu amihaneeeone coina, canu rai atiin Cana Coaunera bajaachete, <sup>31</sup> canu que chachana nainecureneeine Jodea nenacaauru Cana Coaunera coitucuhichuru. Chaen Jerosaleen turuhanune raotojoeein canu ranaa nainecuruha ecu nenacaauru cana nejeraaurune coina. <sup>32</sup> Jeriha Cana Coauneranena inara rene turuhin bedaenereeeunni, inara coaraain rachoojoeein ecu inara aina neein nebetacaanune coina. <sup>33</sup> Raotojoeein nihacachene teraneein nena Cana Coaunera, inara coroatajanemiim. Nitohanemiin.

## 16

### *Arajii cachaauru coaauca Faboro.*

<sup>1</sup> Jesocurisito rai iclesia neein nenacaauruhacha latei que acaauru coroatajaneraneein Cencrea nenaalu- cana nejeraneein ene neein nena-Febe quene inara rai aitoreeunni, <sup>2</sup> coujurihu Jesocurisito esenetaeraneein nena tocohaneein, inara rene turuhane raotojoeein Jesocurisito coreniha raain, satiin niicha latei que coroatajanequichene coina. Acate leeochoaauru coroatajaneein canune maajeein coroatajanelu.

<sup>3</sup> Canu rai Jesocurisito tenojoi amihanenaa que canu coroatajanera neein nenacaaurulu- Aquila, Firisila, naaonjoainuri coaucaaunne beeuche acaauru rai.

<sup>4</sup> Acaaurute canu coreniha nichao itajerateeuruhane rai neeurelu, canu sohin canu jaonaa jerecuruhane bana. Nii jaun coatiha canuhacha acaauru coaauhaaun, satiin Jesocurisito rai iclesianein nenacaauru- Jorioniheichurute acaauru coreniha Cana Coaunera bajaranajaacure.

<sup>5</sup> Jerichanetojoeinchu Aquila, Firisila, naaonjoainunri loreri asaae netaojianacaauru canejeraauru coaaucaaune beeuche acaauru rai. Jataain canuhacha belai- Efeneto coaaucaaune beeuche. Acate jauriaanejeein Asia batane que Jesocurisito esenetaera neein nelu.

<sup>6</sup> Taolu carajaain inara jana neein, inara coroatajaneraneein nena Mar-ihai netonai coaaucaaune beeuche.

<sup>7</sup> Chaen canu araichuru canu aina jiniiquiin caresero cuhane nenacaaurulu- Andronico, Joniasi, naaonjoainuri rai acaauru coaaucaaune beeuche. Acaaurute afosotooru que caohacha cachanecuruhane coarateein, canu ajiniha Jesocurisito esenetaeraneein neeurelu.

<sup>8</sup> Jesocurisito coreniha jataain canuhacha belainein nena- Ampliato rai coaaucaaune beeuche.

<sup>9</sup> Chaen canu rai Jesocurisito tenojoi amihanenaa que canu coroatajaneraneein nena- Orobano, canuhacha belai Estaquis, naaonjoainunri coaaucaaunne beeuche acaauru rai.

<sup>10</sup> Jesocurisito esenetaeraneein nihane jaun, mainajeein coujunojoeinein nenaalu- Apeles netonai coacuhin, Aristobolo aina rai naraichuru coaaucaaune beeuche acaauru rai.

11 Chaen canu araai Erodion, nii baiha Narsiso aina nejeraauru Jesocurisito esenetaeraneein nenacaauru, naaonjoainuri coaaucaaune beeuche acaauru rai.

12 Jerichanejeein chu Jesocurisito icharatenohi icharaneein nenacaauru-Tirifena, chaen Tirifosa, naaonjoainuri rai acaauru coaaucaaune beeuche.

Chaen cana nejera, Jesocurisito coreniha- cana bainein nena- Persida-nii mainajeein Jesocurisito tenojoi amihanenaa icharaneein nenaalu rai netonai coaaucaaune beeuche.

13 Rofo rai netonai coaaucaaune beeuche. Acate leeochoauru amurito-heriin Jesocurisito esenetaeraneein nihane coarate.

Chaen rai nebate canu neba rijijieein cacoelaichaneein nelu.

14 Chaen Asiincrito, Fleconte, Eremesi, Patrobas, Eremasi naaonjoainuri, chaen acaauru aina nenacaauru canejeraauru netonai rai acaauru coaaucaaune beeuche.

15 Chaen Filologo, Jolia, Nereo aina rai bai Olimpias, naaonjoanunri rai acaauru coaaucaaune beein, canaacha esenetai coreniha canejeraauru rai netonai acaauru coaaucaaune beeuche.

16 Jiniiquiin raotojoein ita rai ereein neeuche, ita nejeraneein nena rijijieein. Satiin Jesocurisito esenetaain rai cachaneein nenacaauru netonainte inara coaacuruhane berateeure inara rai.

17 Inara canejera neeichene raine aitoreeunni, atiin nii jelai leeochoauru lerueraneein- inara amihaneeo lacuroaeraneein nenacaauru coaraain, acaauru que nainaain ichaohichene coina. Nitohanei icharate relanojoneein neeichelune jaan ichaquichene caohateraneein aicheein. Aihane jaun jiaonriha acaauru rohan neeichene. 18 Jesocurisitohacha jerei ichana coacuelanaalate nechu acaauru jerecuruhane rijijieein- raihunhacha que chachaaain neeure. Chaentechu enaacha cacha coritana inatiin aihuruhane jaun, acaauru coitucuelanaala nena cacha coritacure enaacha.

19 Satiinte Jesocurisitohacha jerei tonoraain ichaohichene coitucuure. Nii jaunne jataain rachoojoeun inara coreniha. Aihane jaun baaso ichana coacuelanaala, itolere coitucueraneein neeichene coarateein caohacha nejesina ichacuche. 20 Aihate inara tijia asaae jaoleneein niha nii baaso icharatera moconajaerane coina ichamiin raotojoein nihacachene teraneein nena Cana Coaunera. Inara coroatajanemiin Cana Curuaanaa Jesocurisito.

21 Canu amihaneeo que cacorataaneraneein nena- Timoteo netonaite inara coacue. Chaen canu araichuru- Locio, Jason, Sosipater, naaonjoaihunri.

22 Canu caa Faboroacha laenaeratei quiricha laenara- Tersio nichaaunena canuhetonai cana Curuaanaa coreniha inara coacuun.

23 Chaen caa nihanune jaan- loreri erora Caiho netonaite inara coacue. Acate rai loreri tee, satiin iclesianein nenacaauru- turunacaauru nasaae netaojiaauruhane coina. Chaen caa nihacaanune jaan nese cocoaichacuru rai coriqui beraichanein nena- Erasto netonaite inara coacue. Chaen cana nejera Coarto netonaite inara coacue.

24 Cana Curuaanaa Jesocurisito, satiin inara coroatajanemiin. Nitohaneine.

*Raotojoein rachoojoein Cana Coaunera coroaecuche.*

25 Cana ichoterateranein niha Jesocurisitone que inara relanaanune rijijieein, leeinjiin Acaacha jerihane rijijieein neeichene coina icharanein nena Cana Coaunera coroaecuche. Nii inara relaanulune jaante, chuni que coitucueratelanaala sirihane caje, cana que coitucuerate Cana Coaunera. Acate asinojoneein sirilu, jaiti cana rai chauratane coaunaenihane ajiniha

caje coauneein Cana Coaunera. <sup>26</sup> Nete laen, inae enene cana que coitucuerate nere bera inoaensihuru- *profetacuru* que, aca jerihane rijijieein beein laenaeratihalu Cana Coaunera chabana satonoelanaala nenaane rijijieein. Nii niicha ichaneni asinojoneein nenaate, satiin lauri lauri nenacauru cachaauru que coitucuerate Cana Coaunera, esenetaain tonoraain neuruhane coina.

<sup>27</sup> Leinjiin itolere coitucuhin nena Cana Coaunera necaohacha coitucuhin coaracurumiin chabana satonoelanaala rai Calaohi Jesocurisito aina cuaain satiin cachaauru. Nitohanemiin.

## Coriintoo nenacaauru rai Faborohacha letoai leinjiin

### *Chatohaneein neeiche Coriintoo neiniquichene.*

<sup>1</sup> Canune Faboro neeun. Cana Coaunera jerenohi neeinne, Jesocurisito cocoinanohi afosoto neein neeun. Cana nejera Sosenesi aina jiniiquiin neinna <sup>2</sup> caa quiricha laenacaanu. Satiin Coriinto neseu Cana Coaunera que banijiaineein rai iclesianeein nenacaauru cana nejeraauru raina, caa laenaain letoacaanu.

Satiin inarate Cana Curuaanaa Jesocurisito aina cuaain araai laurii caje ranojoneein neeichene saijieein, Cana Coaunera que banijiaineein le laurii caje nena rijijieein neeiche, itolere sacutaain Jesocurisito coroaeejein nenacaauru aina jiniiquiin.

<sup>3</sup> Cana Coaunera, Cana Curuaanaa Jesocurisito, naaonjoainuri inara coroatajanemiin raotojoein neeichene coina.

### *Jesocurisito aina cuaainte rausiaenojoinichaache.*

<sup>4</sup> Jesocurisito aina cuaain inara rausieca Cana Coaunerane corenihane, itolere bana coroaeeun. <sup>5</sup> Nii rai Calaohi Jesocurisito ere tonoraain esenetaaichene aina cuaainte, jataain inara coroatajane Cana Coaunera, niicha jerenohin coitucuhin que ita rai raotojoein ereeichene coina. <sup>6</sup> Nitohaniane ainate, esinae rauhijiriin erenaa niha Curisito quene coitucuhin esenetaain rijijieein neeiche. <sup>7</sup> Nitohaniane jaun, inara rai lanarinaain caohacha ichaquichene coina inara rai Cana Coaunera tenojoin, ocooca uha Cana Curuaanaa Jesocurisitone coaraqichene que tiajoaain. <sup>8</sup> Inara berairichaaain Cana Coaunera satono que tiaain, inara suujua letono ichaelanaala neeichene coina, nabana turuha Cana Curuaanaa Jesocurisitone bana niha inara que tonaain ereine coataa. <sup>9</sup> Itolere banate, satiin naitoonjoa ichae Cana Coaunera. Acate inara cotijiae, jiniiquiin rai Calaohi Jesocurisito aina ichaohichene coina.

### *Ita caje nelerucuruha Jesocurisito ranojoinunrune*

<sup>10</sup> Canejeraauru, Cana Curuaanaa Jesocurisito corenihane inara rai aitoon, atiin ita suujua rijitojoein nii leechaneein inara suujua cuaelanaala jiniiquiin raotojoein ichaohichene coina. Rachoojoein ichaaoche ita rijijieein coacuhin, ita rijitojoein abaantaain. <sup>11</sup> Nejesinajeein ita coatairiin neeichene coitucuhanu Clohe laurichuru cajene jaunna, caa inara rai aitoon. <sup>12</sup> Chaen techu, inara aina nenacaauru tabaaaauru, “Canune Faboro lauri caje neeun,” jana leochaaurute, “Canune Aforo lauri caje neeun” jana leochaaurute, “Canune laen Fedoro lauri caje neun” jana leochaaurute, “Canune laen Curisito lauri caje neeun,” naaure. <sup>13</sup> Chasiinna araai lauriin neleruhin niha Curisitone coalanaala niritiin ereriquiche. Coatihachu canu Faboro nichaaunne inara coreniha coroso que ohanulune coalanaala. Niheichu, Faboro nichaaunne coreniha baotisanojohi niheeiche. <sup>14</sup> Cana Coaunera coroaeejihanu, Curisifo, Caiho, naajoainunri baotisaanune baiha leochaauru cachaauru baotisaen nihanulune jaun. <sup>15</sup> Nitohaniane jaun nii chuni, Faboro nichaaunne laurinihane coreniha baotisanojohiniha nocoetiin erenaa nainihe. <sup>16</sup> Chaen nechu Esetefana lauri baotisaanlu. Coatihai nii baiha chuni baotisaanune coitucuhaaun. <sup>17</sup> Coatihai cacha baotisaanune coina caletoaailu Curisito. Raujiaaincha

jianacoon nenea nainecururichain cachaurune bihanune coinat caletoaelu. Coatiha amurijiriin cha coitucueraneein nihanune coina caletoaaailu. Nitohanihane saijjeein cha coitucueraneein nenea rijijjeein nere bihanune, cha que nelaterihehi cana ichoteraneein nihane coina coroso que ohalu Curisitone.

*Curisitote, niicha ichana naine aina niicha coitucuhi ichaa Cana Coauneraane jaan ne.*

<sup>18</sup> Nii coroso que ohalu Jesocurisitone que erenaate aonacure nii cha que nelatihei rijijjeein nii nitajeeuruhane coina nenacaauru coitucuhichuru. Nete laen cana rai jianacoon cacha mitaeraneein ne nii erenaa, jeelai Cana Coaunera ichanohineein. <sup>19</sup> Rai Quiricha Inoaensi cuhane:

“Itolere coitucuureraauru coitucunojoi itajeeinne, nainaan ichaaoruha nainanacaurune jaan itajereenni,” naain bihalu Cana Coaunera.

<sup>20</sup> Inae cha que nelateein nedaauruhi itolere coitucuureraauru aina cacha relaaureraauru. Niheichu nelateein nedaauruhi, caa cana rai chauratane que nenacaauru itolere coitucuureraauru niha natiin. Satiin itolere coitucutoha nocoenacaurute, leinjiin aaso rijijjeein ratiri Cana Coaunera. <sup>21</sup> Cana Coauneraate niicha coitucui ichae, nabana nii niicha coitucui aina cuaain niicha tei ichaonaa coitucuhin nichotena nainecuruha nii coitucuhichurune coataa. Nitohanihane jaaunte, rai nere letoae, satiin esenetaain jeriha cachane jianacoon ichaonaa nainihane coina. Nete, nii nere esenetaaichuru, joaenreein nelatihei rijijjeein aonacuruhane niha natiin, esinae rauhijiriin jianacoon cacha mitaeraneein ne.

<sup>22</sup> Nitohanihane jaunte, cojoelanaacojoai coana jerecure Joriocuru nichaaunne. Jana Curiecocuru, cha coitucuuruhane jaanu ariiriichure.

<sup>23</sup> Nena canacaanu, jianacoon cacha mitaeranu que Cana Coaunera letono coroso que onaalu beebejihacaanu. Niite Joriocuru rai leijiin nererojoe-canaaneein acauru tee. Jana Jorione lanaala nenacaurute, nechu joaenreein nelatihei rijijjeein aonacure. <sup>24</sup> Nete Cana Coaunera cotihanoichuru, Jorionein, Curieconein, naaonjoaain nihacachene niha natiin, nii letono Mesihasi Curisitote jeelai Cana Coaunera ichanohin ichaain, niicha coitucui coitucuhin nihane coitucuhacache. <sup>25</sup> Cana Coaunera beratenojoin, joaereein nelatihei rijijjeein coaraa cachane niha natiinte, satiin cachaacha coitucui amurijiriin nelate. Chaen techu Cana Coaunera icharatenohi, nelatelanaala coaraa cachane niha natiin, jataain cachaacha ichai amurijiriin, laraajiin mijiaineein nereein itolere bana. <sup>26</sup> Canejeraauru, coroatajajeeincha inara tabaauru cha coitucuera rijijjeein neeichene saijjeein, jitariin inara cotijiaain niha Cana Coauneraane que nainaan ichaaoche. Nii ichoae tacaain techu coroatajajeeincha inara tabaauru nelateinnein nenacaauru cachaauru lauri caje neein, cocoinanacainein, naaonjoainein neeichene saijjeein jitariin inara rae Cana Coaunera. Nii que nainaan ichaaoche. <sup>27</sup> Nitohanein itolere que nainaa nocoetonacaauru necoeje chanunaa jerenacaunte, jaolecooruha nii nainanacaurune jaancuru cachaauru janijiin cotijiae Cana Coaunera. Chaen techu nii leeochoaauru amurijiriin nelatenacaauru raelanaala, nii nelatelanaala acaauruhacha coaracuri cachaauru raain ne Cana Coaunera, acauru necoeje chanunaa jerenacaun. <sup>28</sup> Nitohaneinte jerenohinelanaala, coiintenojooineein, nelatelanaala, naaonjoaain cachaauruhacha coarai cotijiaain ranajaain ne Cana Coaunera, nechu nii acaauruhacha itolere amurijiriin nelatiha nocoenacaauru que jaoleconaa jerenacaun. <sup>29</sup> Nitohanein Cana Coaunera

acatiha nihacachene jaun, nainihaacache leeochoaauru amurijiriin niha-cachene coaratihacachene. <sup>30</sup> Cana Coaunerate raajenihane inara raain ne, rai Calaohi Jesocurisito aina neeichene coina. Chaen techu nii rai Calaohi Curisito coreniha chabana canaacha coitucuhi coitucuhin, coreniha osa caje mituhin, cha juaihoneein nena caje ichoteratenojoinnein, jelai teein que banijiaain raotojoein nena caje ichae Cana Coaunera. <sup>31</sup> Nitohanihane quete: “Caohachaa cana raajenihane canaacha ichai coreniha necohasitaacachene. Cana Curanaacha ichanojoiincha coroaecaachenete laen caohachae,” nae Cana Coaunera Quiricha Inoaensi cuhane.

## 2

### *Coroso que atinanojoin Curisito beratenojoin*

<sup>1</sup> Aonacuche canejeraauru. Inara rai Cana Coauneraacha ichaneni coitucueraelanaala nena que iriha uhanune bana coatih inaraacha coitucunaa nainihe que irinaaunlu. <sup>2</sup> Nii inara aina nihanune bana, coatih leeocho coacuhin que inara rai irihaaunlu, esinae rauhijiriin coroso que neein onaalu Jesocurisitohachane coacuhin que inara relaaunlu. <sup>3</sup> Chaen nechu inara rene turuhanune nunuheneein, joaenreein cacha chaque nelatihei rijijieein turuunlu. <sup>4</sup> Niheichu Cana Coaunera jerenohin que inara relaanune bana coatih canu esenetaaichene jerenacaaun nii aitocuruha nii itolere coitucuurerane rijitiin ereein inara relahaaunlu. Nena rai Suujue aina itolere ichana nainiha Cana Coaunerane jaan aina cuaain inara que jereratichaaune jaun nii aina esenetaaichelu. <sup>5</sup> Leinjiin Cana Coauneraacha ichanenu esenetaain que jaaecohichene coinane, nitohaneein inara relanajacoon, nabana suujua caje rocohin cachaauruhacha coitucunojoi que jaaecohichene coataa.

### *Rai suujue aina cuaainte necoitucuherate Cana Coaunera*

<sup>6</sup> Nena laen inae acaauru suujua cuhane niicha esenetai aina iinacaauru rai jelai amuritoheriin canacaanu que Cana Coaunera coitucueratenojoi que irihacaanu. Coatih caa chauratane que nenacaauru cachaauruhacha coitucui que nihei. Niheichu acaauru rai cocoainanacaihuri nitajerai nenacaauru coitucunojoinnein nena que aitohaacaanu. <sup>7</sup> Acate caa cana rai chauratane coaunaane ajiniha, enene cana necaohachanu que niicha ichanenine que inae coausilu Cana Coaunera. Nii quene caa inara rai irihacaanu. <sup>8</sup> Nii coitucueraelanaala nena niicha ichanenu coausihalu Cana Coaunerane coitucurenihane jaunte, coroso que teein nii cana rai caohacha icharaannu que letono atinaaurelu. Coitucuuruhane jananihane, coatih coroso que teein atinaaururiheilu caa chauratane que nenacaauru cocoainanacaihuri. <sup>9</sup> Nete Quiricha Inoaensi cuhane:

“Cana Coaunerate  
belaichaauru rai,  
chabana coanojoinelanaala nena  
aonanojoinelanaala nena,  
naaonjoainuri ichaain  
acaauru que banihateein rucujue.  
Niheichu chuni,  
‘Naaonjoanrichaain’ naain que coaaura,”

naain beratihalune nainaane coina ichae Cana Coaunera. <sup>10</sup> Nii niicha ichaneni, niicha coacuilute cana que coitucuerate, rai Suujue aina cuaain Cana Coaunera. Nii Cana Coaunera Suujuete, satiin niicha ichaneni coitucue, satiin suujua cuhane niicha coacune maajein.

<sup>11</sup> Nihei chuni ita suujua coitucuna nainera. Leinjiin nii suujua cuhane nenea, rai suujuete naine cacha suujua coitucuhane. Nii rijjijeein techu nene chuni Cana Coaunera Suujua coitucuera. Acaihaniji rai Suujue rai suujuaacha cuane nenaachate rai suujua coitucue. <sup>12</sup> Coatiha canacaanu, caa Cana Coaunera coitucuelanaala nenacaauru cachaauru rijjijeein Moconajaera suuje rahaacaanu. Acaihaniji Cana Coaunera Suujuene raacaanu, aina cuaain jataain cana belaitohane jaun, cana rai niicha tei coitucunoin aonaain coitucuhin nihacachene coina. <sup>13</sup> Canacaanu relaa Cana Coaunera Suujuene jaan quene aitocooaanu. Coatiha canacaanu suujua cuhane canacaanuhacha coacuhi que aitohaacaanu. Nitohaneeinna Cana Coaunera Suujue beratenojoi bihacaanu, Cana Coaunera Suujue coitucuhin nenacaauru rai.

<sup>14</sup> Nitohanihane jaunte, Cana Coaunera Suujue raenihane coina ichaonaa, nii Cana Coaunera Suujue jerenohi coitucuhin tonorana nainene, nii chaque relatihei rijjijeein aonaane jaun. Niheichu aonaane niha natiin coitucunaa nainihe, Cana Coaunera Suujue sirinihane jaun. <sup>15</sup> Nete laen Cana Coaunera Suujue siricha itolere coitucuhin coulurujuenaa nainereein. Nerinaain que tonaain que ereein aca coulurujuenaa nainera. <sup>16</sup> Nitohanihane coinete, “Nihei chuni suujua cuhane Cana Coauneraacha coacui coitucuera. Niheichu chuni suujuatenaa nainera,” nae rai Quiricha Inoaensi cuhane. Nete laen cana, coaauca Jesocurisitone rijjijeein coaaucaache.

### 3

*Canacaanune Cana Coaunera letononeein ita amihaneeon coroatajaneraneein nihacaanu.*

<sup>1</sup> Canejeraauru, nii jauriaanejeein inara relaa uhanune bana, coatiha Cana Coaunera Suujue letono rijjijeein inae ijiin ichaonacaauru cachaauru relaanune rijjijeein inara relanaa nainihaaunlu. Nii jaunna Cana Coaunera coitucuhichuru cachaauru rijjijeein ichaohichene jaun, Cana Coaunera Suujue letono rijjijeein inara relanaa naineneeunlu. <sup>2</sup> Nitohaneeichene jaunte, caaintaelanaala inara relaanulune jana, tonoraelanaala abaantana naineneeichelu. Niheichu enanetojoein nihanatiin tonorana nainiheechel. <sup>3</sup> Aihuruha Cana Coaunera coitucuhichurune rijjijeein enanetojoein inara suujua coaraquichene jaunte, nii ita que necoelaain, ita que nererojoeaain, naajoaain neeiche, aihuruha satiin Cana Coaunera coitucuelanaala nenacaauru cachaaurune rijjijeein. <sup>4</sup> “Canune Faboroacha ere tonoraaun,” jana leeochoauru “Canune Aforoacha ere tonoraaun,” naain ereeichene jaunte, jaiti Cana Coaunera coitucuelanaala nenacaauru cachaauru rijjijeein ichaohichene jaun aitocoiche.

<sup>5</sup> Coatiha canu Faboro nichaaunne chanihaaun. Niheichu cha nihei Aforo netonai. Canacaanune raujiaain Cana Coaunera letononeein, inara aina niicha ichaneni coitucuerateraneein canacaanu letoaa Cana Coaunerane rijjijeein, niicha icharatenohin icharaneein nihacaanu. <sup>6</sup> Canune inara que Jesocurisito coitucuerateraneein neeun. Jana Afote caohachaain coitucuhichene coina que inara relaeraneein ne. Nete laen Cana Coaunera, nii aina cuaain chabana nitajenaachara ichaonaa teraneein ne inara rai. <sup>7</sup> Nitohanihane jaun, nii inara que coitucueratera nichaaunne, nii inara relaera aina chaneein nihaacaanu. Cana Coaunera laen nii inara relaacaanune jaan aina ijiin ichaohichene coina icharaneein ne.

<sup>8</sup> Nitoanihane jaun, canu inara que nii Cana Coauneraacha ichai cotucueratera nichaaunne, nii que inara relaera aina jiniiquiin ita rijiichaanu. Nete

laen nii inara que niicha ichaneni coitucueratihacaanune cainareein Cana Coaunera.

<sup>9</sup> Canacaanune Cana Coaunera letononeein canacaanu rai niicha tei amihanenaa que ita coroatajaneraneein nihacaanu. Inarate leinjiin ocoana aina leinjiin loreri rijijieein neeiche Cana Coaunera rai. <sup>10</sup> Jana canune, inara que amihanenaa nunuheteraneein neeun Cana Coaunera letononeein. Jana leeochoaurute, nii quiicha banesijiatei bucutejeeure. Nete, le cachanichaachene caohachaain ichacaachene coaraain ichacaachene caohachae. <sup>11</sup> Nihei chuni nainihei nii banesijia quiicha tenojoin coreein leeochoa tenaa nainera. Nii banesijia canuhacha teite Jesocurisito ne. <sup>12</sup> Nii rai banesijia quiicha temunojoin ichoaete nainere, coata coreti, ajeri coreti, enuha, elele, jiarana nujua, naajoain caje nainecurure loreri ichacuruhane. <sup>13</sup> Nete, inae le cachanichaachene ichao cojuhin coaraa Cana Coaunerane cojoanona que turuhane bana, le cacha cachaauru amihaneeon inanacaa cureein. Nii banate, usi tabaineein ureein nii cana ichanaa cojuhin coaraane coina. <sup>14</sup> Chariji ichanaa teeinti mochelanaala nii usi abaantae, nii icharate core raa cureein. <sup>15</sup> Jana mocoha nii niicha ichainete, nitajiha cureein rai namihaneeo. Jana nii que amihaneite, nii usi caje nichotereein cha colane.

<sup>16</sup> Tana Cana Coaunera loreri neeichene jaun, inara suujue cuhane niha Cana Coaunera Suujuene coitucuhichene. <sup>17</sup> Nii Cana Coaunera loreri neeichene jaunte, osa que inara saruhin baasoneein inara teranihane, Cana Coaunera loreri aasaeca aicheein. Niite aca itajiha cureein Cana Coaunera, acaihaniji rai loreri neeichene saijieein inara ichao asaecane coreniha. Inarate nii rai loreri neeiche.

<sup>18</sup> Coa inara raaje necoritaache Cana Coaunera coitucuhichuru rijijieein itolere coitucuha nocoetiin. Nitoaneein neeichene, nii baiteein enacoauneein Cana Coaunera coitucuhin neeuchete, esinae rauhijiriin cha coitucueraneein neeiche. Nii banate laen esinae rauhijiriin cha coitucueraneein neriquicheein. <sup>19</sup> Nii quete, “Nii itolere coitucutoha nocoeuruhane jaan aina raajenihane necoritaauruha que jaoleconacaaurune cointate ichae Cana Coaunera,” naain ne laenanohineein Cana Coaunera Quiricha Inoaensi cuhane. <sup>20</sup> Chaen techu coaiteen, “Nii itolere coitucutoha nocoenacaauru coaunojoite, nii cha que nelatenihane coitucue Cana Coaunera,” naain ne laenanohineein Cana Coaunera Quiricha Inoaensi cuhane. <sup>21</sup> Nitohanihane jaun chunocoha cacha, joenreein namute cacha rijijieein ichaohane nainihei, raotojoein niha nocoetiin necohasitaane. Satiin itolere inaraacha lateite, inara rai teein ne Cana Coaunera. Aihana jaun, Cana Coauneraachate corooaena nainequiche, inara rai itolere teein nihane coreniha. <sup>22</sup> Canu, Aforo, cana rai chauratane, cana rai ichaonaa, caa ena nena, cabaiha neenihun, niichurute Cana Coaunera tenojoineein neeure inara rai. <sup>23</sup> Jana inarate Curisito rainequiche. Jana Curisitote Cana Coaunera raine.

## 4

### *Afosotooru amihaneeo.*

<sup>1</sup> Cana Coaunera ichanohi coitucuheraelanaala nena que Curisito letononeein rai cacha relaeraneein nihacaanune coitucuhichenete caohachae. <sup>2</sup> Chaelai icharaanu que letononeein nihacanete, nii cana letoaera suujua rijijiein nere tonoraain ichacaane caohachae, nere tonoraain nihacane coitucunaa nainiha nii cana letoaerane coina. <sup>3</sup> Nena laen baasoneein ichacaanne coitucueralanaala canu que ereein neeiche cocoinanacaaihuri ainane nihanatiin, cha que tonajeneun. Niheichu canu raajenihane nihanatiin baasoneein, caohachaain, naajoaain ichacaanne



coitucunaa nainihaaun. <sup>4</sup> Nena, nii casuujua cuhane baaso ichaenihanune coaucaaanne, canu baaso ichacaaunne coitucunaa naineneeun. Cana Coaunerate laen, baaso ichaain, caohacha ichaain, naaonjoannune coitucuha cureein. <sup>5</sup> Aihana jaun, “Acate baaso ichae,” naain leeochoaauru que erenaa nainiheeiche acaauru ichao coitucueralanaala. Jauriaanejeein turuha cana Curuaanaane cohacuche. Acate laen nainereein, jitariin nii suujua cuhane acaauruhacha coacuhi, acaauruhacha ichai, naaonjoainuri coitucuhane. Nii banate caohachaaain icharaauru lecachaauru coroaereein Cana Coaunera.

<sup>6</sup> Canejeraauru, inara caohachanu quene caa inara rai Aforo, canu, naaonjoain nichaanune ichanohin que cuaain inara rai beeun, caje coauneein canacaanu ichanohi que coacuhin, rijijieein ichaquichene coina. Nabana Quiricha cuhane aitohane edaa cuaain ichaquichene, nabana leeochoaauru amurijiriin cha coitucueraneein nena coacuhin, acaauru que jaolecohichene coataa. <sup>7</sup> Chariji inara rai leeochoaauru amurijiriin neeichene jaannu teein ne. Chariji inaraacha sirii, Cana Coaunera tenojoinelanaala siriquiche. Tana Cana Coaunera, inara rai itolere tihane coitucuhichene. Nii saijieeinte inara raajenihane cha eruhera rijitiin inara necohasitaacha que neeiche.

<sup>8</sup> Nitohaneeichene jaunte, itolere inaraacha jerei siriin, itolere cacha curuaanaa *rey* niha nocoetiin, canacaanu latiha nocoeteneeiche. Bajaanachuhinti esinae rauhijiriin *rey* esineneein neneeiche, inara caje canacaanuhacha latei bajaain, inaraacha sirii sirichaneein nihacaanu canacaanu netonaine coina. <sup>9</sup> Canacaanu afosotooru nichaanune raite, jataain leeochoaauru amurijiriin necairichanaa coaraain ohacaanune coina ichara tocoaneein canacaanu te Cana Coaunera. Chaen nechu, satiin anjeraauru, cachaauru, naaonjoainuri notaracae nihacaanu, nii cairichei coaraain.

<sup>10</sup> Curisito esenetaain niicha jerenohin tonoracaanune corenihane, aaso cha coitucuhi rijijieein nihacaanu. Jana inarate, itolere Curisitoacha jerenohin coitucutoha nocoetiin neeiche. Chaen techu, joaereein nelatihei rijijieein nihacaanune jana, inara itolere amurijiriin laraajia nocoetiin neeiche. Nitohaneeichene jaunte, inara leeochoaauru aina jiniiquiin, canacaanu que jaolecohiche. Jana leeochoaurute, inara que suujua acatecure.

<sup>11</sup> Enanetojoeein mijitena, cocoiinina, cajione, naaonjoain que necairichaacaanune janihacaanu. Nii canacaanu que jaolecooruhane ichoae tacaain techu, canacaanu que nererojoecaaure. Niheichu nii canacaanu nenaja niha natiin. <sup>12</sup> Chaen nechu cotaecaanu canacaanu bijiicha que amihanejeein. Canacaanu cotaicha raine, caohachaaain nihane coina irihacaanu. Chaen nechu canacaanu rohecaauruhane niha natiin abaantaacaanu.

<sup>13</sup> Canacaanu rai baasoneei iriha cachanena, raotojoeein tonoraacaanu. Nitohaneeinte caa cana rai chauratane que jaoleneein nena utoone rijijieein canacaanu coaraain, enanetojoeein canacaanu que jaolecoore.

<sup>14</sup> Coatiha inara necoeje chanuha aitiin laenahaan. Inara suujuatihane ichaun. Inara belaihanu canu calaohi rijijieein neeichene jaun.

<sup>15</sup> Inara Jesocurisito ranojoneein neeichene relaeraneein neeuruha lechoonca oaraancaneein niha natiin, coatiha acaauru inara inacanihei. Canune laen inara que, nii enene inaraacha esenetai Jesocurisito coitucueratein, nii osa caje nichotiha cachane jaan ichaonaa, naaonjoain beranein inara inacaneein neeun. <sup>16</sup> Nitohanihana jaunne inara rai aitoon, canu ichao rijijieein ichaohichene coina.

<sup>17</sup> Nii ichaohanune rijijieein ichaohichene coinane, nii Cana Curuaanaa coreniha cacalabi- casuujua rijijieein nena Timoteo letoaan. Acate

Jesocurisito esenetaeraneein nihanune ichao rijjijeein, Jesocurisito ranojoi-hunru rene turuhanune jaaunru inara relaunune coaquichene coina inara rai bereein.

<sup>18</sup> Inara tabaaurute inae itolere coitucuha nocoetiin raotojoein neeure, inae inara rene nacoauneein tururichaaunine esenetaurenihane jaun.

<sup>19</sup> Nena Cana Curuaanaa jerihane enanocoojoa inara rene bedaeniha uree-unni. Nii banane, nii itolere coitucutoha nocoenacaauru coareeunni, nii nelatecuruhane coaracaanne coina.

<sup>20</sup> Coatiha erenaacha nihei Cana Coaunera Cojoanona. Acate canacaanu cocoainae, itolere ichana naineein, itolere rucuhena nainichaanune jaannu teein.

<sup>21</sup> Aihana jaun cha jeriquiche. Rauhijiriin inara casetecaa uhanunena jeriquiche. Ainihane jataain inara belaa inara coaraa uhanunena jeriquiche.

## 5

### *Baasoneein ichoi sitaauche inara caje.*

<sup>1</sup> Leinjiin nii inara jana nena, rai inaca comasai- nebaene siriha rai comasaineeinne coitucuhane. Nitohaneein ichaonaate, jataain coasinacai ne. Nii Cana Coaunera coitucuelanaala nenacaauru niha natiin, nitohaneein ichaonaa nainecuruhi. <sup>2</sup> Nii saijjeeinte caohacha ichaa nocoetiin rachoojoeiche, bana nii baaso ichaquichene que coacuhin inaderaelanaala. Aihana jaun inara jana nitohaneein ichaoa cachane sitaauche.

<sup>3</sup> Canu jaberoconein inara aina nenihanune niha natiinne, canu sujua cuhane inara coaareeunni. Nii jaunna caa inara rai canu jaberoconein netiin aitocooanne rijitoein aitoon, canu Jesocurisito cocoainanohineein nii caitoonjoa tocohaneein baaso ichara casetecaaichene coina.

<sup>4</sup> Ita taojiaachenena canu suujua cuhane inara coreniha Cana Coaunera bajareeunni, caohachain inaraacha ichaneni ichaquichene coina. Chaen techu Cana Curuaanaa Jesoso netonai ecu nicha ichana nainei letoareein, ecu inara aina nihane coina. <sup>5</sup> Nii jana laen, nii baasoneein ichaonaa cacha teeuche Moconajaera rai, nitajiha rai jaberocone niha natiin, inae turuha Cana Curuaanaa Jesusone bana rai suujue nii caje nichotihane coina.

<sup>6</sup> Nitohaneein neeichene jaun, nainiheeiche caohacha ichaa nocoetiin ereeichene. Inarate, “Coerai curu cuhane jorerera tihacanete enaicha coerae,” naa erenaane coitucuhiche. Charijjeein teeinti nii jorerera lomohe nii coaerai, nii rijjijeein techu inara ichao aasaeraneein ne nii inara jana nena baaso ichara cacha. <sup>7</sup> Aihana jaun charijjeein teeinti jorerera jaohin, jorerera colane faan jaure Fasocoa beseta bana quihuruhane coina. Nii rijjijeein nii inara jana nena cacha baso jaoche, nabana rai nichao baaso aina inara ichao asaecane coataa. Curisitote, carenero sooruhane rijjijeein Fasocoa bana cana coreniha sohin jaorelu, jianacoon nihacachene coina. <sup>8</sup> Charijjeein teeinti baaso ichara cojunacanein niha jorerera jaun, Fasocoa beseta bana nii jorerera colane ichanohi faan quihacache. Nii rijjijeein techu nii jorerera colane ichanohin faan rijjijeein, aihalu Jesocurisitone rijjijeein, cana jana baaso sirilanaala ichaohacachene caohachae.

<sup>9</sup> Nii leecha quiricha, inara rene canu letoanojoin cuhanena beeun inara rai, nabana namute quicha aina, leecha ene aina, canaanaihunru aina, naaonjoaainunri aina niicha jerei ichana jereein nenacaauru raain neeichene coataa. Nii rijjijeeinchu enecuru nihanatiin namute ene aina, leecha quicha aina, canaanainunru aina, naaonjoaainunri aina niicha jerei ichaai ichaonacaauru ranaa nainiheeiche. <sup>10</sup> Coatiha nii Cana Coaunera coitucuelanaala nenacaauru, namute quicha aina, leecha ene aina, canaanaihunru

aina, naaonjoaainunri aina niicha jerei ichana jereein nenacaauru caje amuhichene coina aitohaaun, Chunijiun cuhichene niha natiin lanaener-ichaa in baaso icharaaurune jaun. <sup>11</sup> Raujiaaine inara rai aitoon nabana nii Cana Coanera coitucuhin neeuruhane saijieein, nii nejelau sinijeranelanaala nena aina ichaonacaauru, barioneein ichaonacaauru, nii ichanohineein nena coaneraacha esenetaeraauru, casajenetiin, ajetoritiin, asijiauharitiin, naaonjoaain nenacaauru aina, “canejera,” naain acaauru rai ereein neeichene coataane aitoon. Jiaonriha Cana Coanera coitucuha nocoetocuruhane saijieein nitohaneein ichaonacaauru aina nelaurihaain lenonequichene.

<sup>12-13</sup> Coatihā nii joaenreein Cana Coanera coitucuelanaala nenacaauru, baaso ichacuruhane niha natiin acaauru rai ereein rucuhena nainihaaun canu. Cana Coanera telaen, nii baaso ichacuruhane coitucuhin, acaauru que niicha ichaneni coitucureein. Nete laen inara nainequiche, nii cana rijijieein Cana Coanera coitucuhin nenacaauru baaso ichacuruhane rucuhequichene caohachae. Aihana jaun, nii inara jana baasoneein ichaonaa cacha sitaauche.

## 6

*Jiaonriha nejesinajeein inara rai niha chatohanai rucuhenacaine Cana Coanera coitucuelanaala nena cocainanacai rene cuhichene.*

<sup>1</sup> Chunocoha inara rijijieein Cana Coanera coitucuera, inara rai baaso ichaane jana colurujena jeriquichene, nainiheii nii Cana Coanera coitucuelanaala nenacaauru cocainanacaihuri jaesiocuru rene coulurujueeichene. Raujiaainchate nainere Cana Coanera coitucuurera bichauheneeuru rai beeichene, caohachae acaauru coitucuhin rucuhecuruhane coina. <sup>2</sup> Tana Cana Coanera coitucuelanaala nenacaauru, baaso ichaain, caohacha ichaain, naaonjoaauruhane coitucuhin, rucuherrichacheein Cana Coanera coitucueraneeine coitucuhichene. Nitohaneein Cana Coanera coitucuhichuru ichanohin coitucuhin rucuherraneein nerichaacheeinne saijieeinte, nii aansijiin laajoiri caaintaelanaala nena rucuhena naineneeiche. <sup>3</sup> Tana Cana Coanera letonocuru, anjeraaurune maajeein baaso ichaain, caohacha ichaain, naaonjoaauruhane coitucuhin rucuhena nainerichacheeine coitucuhichene. <sup>4</sup> Aihana jaun chanuna jana chaen jaiti cau nena ichaonaa que ichaohichene jana inara aina baaso ichaa inara rijijieein Cana Coanera coitucuherrane, nii Cana Coanera coitucuurera rai chanelanaala nenacaauru joesiocuru rai coulurujueein naaonjoaainche. <sup>5</sup> Nocojequichene jaan nuquene caa aitoon inara rai. Tana inara Cana Coanera coreniha ita nejera nejesinaneeinne, ita rai baaso ichaain neeichene nihanatiin niha leinjiin inara jana rucuhena nainerane coitucuhichene. <sup>6</sup> Chaen techu nii ita nejera nejesinajeein ita cotaachene, nirijieein jianena coacuelanaala cocainanacaihuri- Cana Coanera coitucuelanaala nena rene amaain naaonjoaainche. <sup>7</sup> Nitohaneinte, nejesinajeein ita rai aasaeriin baaso ichaquichene coreniha ita coulurujueein jataain banejelanaala baaso ichaquiche. Chanuna baaso ichaain ita coulurujueichene ajiniha, baaso icharanihane abaantaeneeiche. Chanuna coaraain inara basijiaauruhane abaantana naineneeiche. <sup>8</sup> Nete nii abaantana coacuelanaala, Cana Coanera coitucuherrane nejesinaneein ita basijiauhin naaonjoaainche.

<sup>9-10</sup> Tana nitohaneein necha aansaneein nenacaauru, Cana Coanera Cojoanona que nena nainecurerichaaanne coitucuhichene. Nitohanihana jaun jiaonriha inara coritauruha Cana Coanera coitucuhichurune esenetaachene. Coatihā Cana Coanera Cojoanona que neeururinaain namute quicha aina, leecha ene aina, canaanainunru aina, naaonjoaainunri aina

niicha jerei ichana jereein nenacaauru, nii rijjijeeenchu enecuru nihanatiin namute ene aina, leeocho quicha aina, canaanainunru aina, naaonjoaainunri aina niicha jerei ichaai ichaonacaauru, namute cacha ichanohineein nena coauneraniha niicha behuri belaichaauru, sinijeraocuruhane niha natiin leeocho ene aina ichaojeraquiin nenacaauru, namute quicha aina ichaonacaauru, asijiautooru, coriquiicha que coacuhin ichaonacaauru, ajetoriaacuru, namute cacha cairichaa casajenetiin ichaonacaauru, nii nechu namute cacha cairichanaa jerenacaaun baasoneein suujuateeureraauru, naaonjoainurine coitucuhichene. <sup>11</sup> Nii rijjijeeinte nerejetocure inara tabaauru netonai. Nete inae enene nii caje couluunojineein jianacoon neeiche, Cana Coaunera cachaneein. Chaen techu, inae nii ujuaihoneein neeichene caje, inae Cana Curuaanaa Jesocurisito, Cana Coaunera Suujue, naaonjoainuri coreniha jianacoon neeiche.

*Suujua letono ichana nainihe i cacha.*

<sup>12</sup> Chaen techu, “Nainichaaun joenreein quicha jerei ichacaaunne,” naain ereeiche. Esinae rauhijiriinte niqui aitocoiche, nete caohachaene satiin itolere joaereecha ichana jerichaane. Aihana jaun nainihe cana jaberoco amuritoeratihaca nii canaacha ichai que ne. <sup>13</sup> Esinae rauhijiriinte niqui, “Itolere lenonete coaunanojoi ne, que lenoneein ichaohanune coina. Nii rijjijeein techu jatoroaain ne, canu suri jitariin canuhacha quii raane coina,” naain ereeiche. Nete inae ecu tihane bana, lenone, cana jaberoco, naaonjoain satonotereein Cana Coaunera.

Nii rijjijeein techu cana sinijera ainaacha ichaohacachene coina cana coaunaain nelu Cana Coaunera. Coatiha joenreein cana sinijeranelanaala nenacaauru aina canaacha jerei ichaai ichaonaa coina nihein.

Nii jaun nainihaacache joenreein naosateein nihacachene. <sup>14</sup> Nitohaniane jaunte, Aca jerihane rijjijeein tonoraain nena, Cana Curuaanaa ichatiha O cajene rijjijeein cana ichatiha cureein Cana Coaunera. <sup>15</sup> Tana nii nitohaniana jaun, Curisito jaberoco niha inara jaberocone coitucuhichene. Aihana jaun nainihe, Curisito jaberoco niha inara jaberocone jaun, leinjiin coriqui jeriha quicha aricha ene jaberoco rijjijeein inara jaberoco teeichene. Nitohaneein jerihane inara jaberoco tenaa nainiheiche. <sup>16</sup> Tana leinjiin ene cojoaeloroe aina, niicha jerei ichaachane, inae ita jaberoco que jaberocoha cachane coitucuhichene. Cana Coaunera Quiricha cuhane techu, “Ene aina ita raain niha cachanete, jiniquiiin ita jaberoco que jaberocona rijjijeein ichaaurureein” naain ne laenahineein. <sup>17</sup> Nitohaniane jaunte Cana Coaunera coitucuhane, Cana Coaunera suujue aina suujue te cacha. <sup>18</sup> Nitoaniane jaun leeocho ene jereein coaraain, aina inaraacha jerei ichana coaauquichene jelai caje amuuche tonoraanelanaala, nii rai sinijeranelanaala nena ene aina naosatelanaala. Leeocho osa que neosatiha cachane niha natiin, coatiha laen rai jaberoco aasaehai. Nii comasainelanaala nena ene aina niicha jerei ichaain niha cachanete laen, raajenihane rai jaberoco aasajeein naosatiha ai. <sup>19</sup> Tana inara jaberoco, Cana Coaunera tenojoin rai suujue nenaja nihane jaun, inara suujue cuhane ichaoha Cana Coaunera Suujuene coitucuhichene. Aihana jaun coatiha inara, inara raajenihane inara jaberoco eroraniheiche. <sup>20</sup> Cana Coaunera jataain coreein inara coreteein nihalune jaunte, acaihaniji raachaneein neeiche. Aihana jaun naitoonjoan tonoraain niicha jerei ichaain neeichenete caohachae.

## 7

*Nisinijerateein niha cachane que suujuatera*

<sup>1</sup> Enane laen nii quiricha inaraacha letoai cuhane, canu caje inaraacha bajai bereeunni inara rai. Caohachariha niqui ene raelanaala niha quichane.

<sup>2</sup> Nete enaicha joareein ene aina niicha jerei ichana jeriha quichane jaun, le cacha cachaauru comasaihocane caohachae. Nitohanihane jaunte, enecuru netonai niha natiin caohachae nelanajaain neeuruhane.

<sup>3</sup> Chaen techu jiniiquiin nii rai lana aina, ita ere tonoraain raotojoein jiniiquiin ita coiintelanaala neeuruhane caohachae. <sup>4</sup> Coatiha nii ene inae lanaacane raaje jaberoco eroranihei. Rai lanate rai jaberoco erora ne. Niheichu nii quicha niha natiin comasaihocane raaje jaberoco erora nihei. Rai comasaite rai jaberoco erora ne. <sup>5</sup> Aihana jaun nainihei inara sinijera aina ita coiinteein neeichene. Cana Coaunera bajanaa jeriquichenete laen jiniiquiin cosinacaaichene coina nainequiche inara sinijera rai beein, ita suujua rijitoein coacuhin ichaquichene caohachae. Nii baihate naineriquiche coaiteen jiniiquiin raotojoein inaraacha jerei ichaquichene caohachae, nabana inara amuritoha moconajaerane osa que nesarucuichene coataa.

<sup>6</sup> Coatiha inara letoahaaun necoansajiaaichene coina. Niheichu nii coatihia, “Coa necoansajiaache” nahaaun. <sup>7</sup> Raujiaainchane niqui canu rijijieein neeichene jereeun. Nete Cana Coaunera tenojoineein nejelaunihacoaain ichaohacache, tabaauru leechaneein, naonjoaain.

<sup>8</sup> Ene colane nenacaauru, autanaauru, naonjoainuri raine aitoon, niri-jieein sinijeraaona coacuelanaala neeuruha canu rijijieeinne coina. <sup>9</sup> Jana nichao berainaa nainecurenihane necoansajiaauruhine. Nii amuritoeriinte caohachae sinijeraaocuruhane, nabana inacojoein necairichaaauruhane coataa.

<sup>10</sup> Inae sinijera aina nenacaauru raine laen aitoon, casuujua letononeein que airijiin, caa caitoonjoante Cana Curuaanaa aitoojoanne. Jiaonriha inae leesajeein nisinijerateein niha enene, nii rai lana jaonaa coacuhin nihane.

<sup>11</sup> Jana nii rai lana jaohin niha nii enene, jiaonriha nacoauneein leecha quicha ranaa coaucane. Chaen techu naine nacoauneein nii quicha niicha joai rai ereein, ajeteein cainaa nii enene caohachae. Nii rijijieein techu rai comasai jaonaa nainene quicha netonai.

<sup>12</sup> Caa caitoonjoa caje cuaainna laen casuujua caje rocohin inara rai aitoreeunni. Coatiha laen Cana Curuaanaa aitoonjoan nihei. Chunocoa cana nejeraauru inae sinijeraquiin neein Cana Curuaanaa esenetaera nihane jana nii ene Cana Curuaanaa esenetaelanaala nena niha nii enene, ainaacha ichaonaa jeriha nii enene, nainihei nii ene jaoha nii cana nejerane.

<sup>13</sup> Jana ene, inae leinjiin quicha aina nisinijerateein neein Cana Curuaanaa esenetaera neniha nii rai lanane, ainaacha ichaonaa jeriha nii lanane, nainihei nii rai lana jaoha nii enene. <sup>14</sup> Nitohanihane jaunte nii quicha, Cana Curuaanaa esenetaelanaala nena nii Cana Curuaanaa esenetaera ene que sinijeraquiin nihane jaun, Cana Coaunera que banijiaain ne. Jerichanejeein techu Cana Curuaanaa esenetaera ene, Cana Curuaanaa esenetaelanaala nena quicha que lanaacane, inae acaentonai Cana Coaunera que banijiaain ne, nii Cana Curuaanaa esenetaera que sinijeraaocane jaun. Nitohanein nenihane, coatihia Cana Coaunera que banijiaain neein neeururihei inara bereecuru. Nete Cana Coaunera que banijiaain nena bereeneein neeuruhane jaun, jerichanejeein inara rijijieein Cana Coaunera cachaauru aina jiniiquin neeurureein. <sup>15</sup> Aihana jaun nii ene, quicha, naonjoainuri Cana Curuaanaa esenetaelanaala nenacaauru, nii rai sinijera Cana Curuaanaa

esenetaera jaonaa jerihane jaohine. Nitohanihanete nii ene cana nejera, nii quicha netonai cana nejeranihane, nii ujuaihonneeuruhane caje jianacoon neeurureein. Cana Coaunerate inara raain nelu, raotojoein caohacha ichaonaa que ichaohin neeichene coina. <sup>16</sup> Tana ii lana nihane jaun, ii coreniha ichoteratenojoein jianacoon nena nainerihanine coitucuhine. Jana ii, lananeeine tana ii coreniha ichoteratenojoein jianacoon nena nainerihani ii comasaine coitucuhine.

<sup>17</sup> Atiin nainequichene rijijieein, inara rai cha chaquichene jaanu tein nihalu Cana Curuaanane rijijieein neein, nii inara cotijiaain nihalu Cana Coaunerane jana ichaohichelune rijijieein ichaaoche. Caa inara rai aito-coaunne jaan quene, satiin Cana Coaunera ranojoein nenacaauru rai aitoon. <sup>18</sup> Aihana jaun chuni jaberoco macohi cari molonojoin nihane jana cotijiaain niha Cana Coaunerane, jiaonriha molonojoin niha rai jaberoco macohi carine suujihane. Jana chunocoha jaberoco macohi moloeratelanaala nihane jana cotijiaa Cana Coaunerane, jiaonriha rai jaberoco cari moloeratihane. <sup>19</sup> Coatiha chaque nelatihei, molonojoein, molonojoinelanaala, naonjoaan cacha jaberoco carine. Cana Coaunera aitoonjoan tonoraain ichaohacanete nii amurijiriin nelate.

<sup>20</sup> Nitohanihane jaun satiin Cana Coaunera cotihanohichurute naine, nii cotijiaain nihalu Cana Coaunerane jana ichaohalune rijijieein jerichanejeein ichaohane caohachae. <sup>21</sup> Aihana jaun inara amute cacha letononeein core colane rai amihanejeein esclavo neeichene jana inara cotijiaa Cana Coaunerane, coa nii que tonajeein nihache. Nete laen inae ena nii esclavo neeine caje nichotena naineine, raotojoein jianacoo nichoteeu. <sup>22</sup> Nii rijijieeinte Cana Curuaanaa jerenohin esenetaane coina cotihanohichuru osaaonacaauru, inae enene rai nosa caje jianacoon, Cana Curuaanaa letononeein neeure. Jerichanejeein techu nii letononelanaala nenacaauru cotihanohichuru, enene Curisito letononeein rai niicha jerei icharaneein rai esclavo neein neeure.

<sup>23</sup> Cana Coaunerate jataain coreein inara coreteen nelu. Aihana jaun nainiheeiche inara amute cacha letononeein nena coaauquichene.

<sup>24</sup> Aihana jaun canejeraauru, atiin jerichanejeein nii cotihanohineein neeichene bana ichaohichelune rijijieein, inara ichao corenaa coacuelanaala Cana Curuaanaacha jerei rijijieein ichaaoche.

<sup>25</sup> Nii necoansajiaeniha cachane que, carai beniha Cana Curuaanaane jaunna coitucuheneen rauhijiriin. Nete aca canu coroatajanihane aina cuaain, inara rai rauhijiriin beeun. <sup>26</sup> Caraita nii nihane rijijieein, comasaihocane comasaiquelanaala, lanaaocane, lanaquelanaala, naonjoaain neeuruha enecuru aina jiniiquiin quichaaaurune caohachae, caa ena caaintati ichaonaa que ichahocachene jaun. <sup>27</sup> Aihana jaun comasaihoquichene jiaonriha jaohichene. Niheichu inara comasai colane neeichene jiaonrihachu ariichene. <sup>28</sup> Nete necoansajiaain neeichene naosatiha aineriquicheein. Niheichu leinjiin ranuna niha natiin nelanajaane naosatiha aihei. Nete laen necoansajiaain neeichene necairichaa curiquicheein, nitohaneichenena niqui jereneun.

<sup>29</sup> Canejeraauru, caa quene inara rai erenaa jereun. Inae ichuunnejeeonriha cana rai janonaa. Aihana jaun nii sinijeraaonacaauru, rai sinijera colane nena rijijieein neeuruhine. <sup>30</sup> Jana nii onaa coinaderaa nenacaauru, beseta que nena rijijieein rachoojoeeuruhine. Jana nii beseta que nenacaauru onaa coinaderaa rijijieein inaderaauruhine. Itolere rucuhele sirichaaauru, cha sirihei rijijieein neeuruhine. <sup>31</sup> Jana caa cana rai chauratane que netiin raotojoein necoriquijiaain itolere niicha latei siriin

ichaonacaauru, cha sirihei rijijieein ichaauruhine, caa janonaa canaacha coarajei saa curichainne jaun.

<sup>32</sup> Leeocha que coacuhin neeichene cajene niqui inara rocohene rijitoojoeun. Aiha sinijera colane nenea, Cana Coauneraacha jerei que coacuhin nihane jaun. <sup>33</sup> Nete laen inae comasaiquiin nenea, Cana Coaunera que coaucane jianeein, rai comasai rai caohachanuhacha que coacuhin ne. <sup>34</sup> Nitohaneente ita caje neleruhin neeure. Jerichanejeein techu enecuru lana colane nenacaauru, chaen chabana lanaque lanaala nenacaauru, naaonjoainuri Cana Coauneraacha jerei que coacuhin neeure, acaauru jaberoconeein, acaauru suujueneein, naaonjoaain que banijiaain neeuruhane jaun. Jana lanaaonacaaurute, acaauru lana rai caohachanuhacha que coaacuruhane jaun Cana Coauneraacha jerei que coaacurene.

<sup>35</sup> Coatiha inara rai caohatiha aitohaaun. Nenacaeneeinjian inara caohachanu quene aitoon, caohachaaain ichaohin Cana Curuaanaacha jerei ichajeein ichaonaa nainequichene coina.

<sup>36</sup> Chunocoha nii niicha jerei ene ranaa coauca inae ichauhena nihane jaunne, rai caohachaa nii coaucane tocohaneeinne, nii niicha coacuhi rijijieein nii ene raaine. Coatiha naosatenaa nihei ene raain niha cachane. <sup>37</sup> Jana chunocoha nii cha que tonajelanaala jelai jinacoon netiin niicha jerei ichaane coina, rai suujua cuhane sinijeraquenihane coina coaucane, niite rai caohachanu que aicheein. <sup>38</sup> Jerichanejeein techu caohacha ichareein, nii niicha jerei raain nihane. Jana nirijieein sinijeraquelanaala nihanete, jelai amuritoheriin caohacha ichareein.

<sup>39</sup> Inae lanaaocanete nii rai lanaacha sacunaa naine nii ene, oha nii rai lanane que tiaaajoaain. Jana inae oha nii rai lananete nainere chunocoha raain niha rai lananu quene caohachae, aihachu Cana Curuaana coitucuera quicha aina. <sup>40</sup> Nii amuritoheriinte niqui nenea naine raotojoeein, nacauneein lanaquelanaala nihane. Caritoha canu suujua. Chaen nechua Cana Coaunera suujue siriin caa aitoon.

## 8

### *Ichanohineein nenea choosi ecaanto rai tenojoin lenone*

<sup>1</sup> Enane laen ichanohineein nenea choosi ecaanto rai tenojoin lenone que erereunni inara rai. “Satiinte itolere coitucuhacache,” naain irihacache. Nete nii canaacha coitucui aina, inae leeochoaauru amurijiriin itolere coitucueraneein nenea jerichaachene chaque nelatene. Jana laen Cana Coaunera Suujue jerihane rijijieein jiniiquiin nihacachenete caohachae. <sup>2</sup> Aihane jaun chunocoha cha coitucueraneein nenea coaucane, coatiha jitariin nii niicha coitucunaa jerei coitucurinaain. <sup>3</sup> Nete laen Cana Coaunera belaaain niicha jerei ichaa cachane, nii belaicha coitucue Cana Coaunera.

<sup>4</sup> Ichanohineein nenea choosi ecaanto rai tenojoin lenone quiha cachane niha natiin, cha ichana naineniha nii ichanohineein nenea choosi ecaantone coitucuhacache raotojoeein. Nete laen ne, rauhijiriin leinjiin Cana Coaunera. <sup>5</sup> Neeuruha dedeeu, chauratane que, naaonjoain nii acaauru choosichuru. Tabaaaurute ichanohichurune. Arajiinte neeure nii acaauruhacha esenetai choosichuru. <sup>6</sup> Nete laen cana rai ne leinjiin cana inaca Cana Coaunera- itolere Coaunera neein nenea. Chaen techu coreniha rai cachaneein nihacache. Nii rijijieein techu, ne leinjiin Cana Curuaanaa Jesocurisito. Corenihate ne itolereeuu. Cana netonaite coreniha nihacache. <sup>7</sup> Nete satiin Jesocurisito esenetaeraauru nii coitucuhin neeurenihane jaun, tabaauru jaiti enanetojoeein nii choosi ecaanto ichanohineein nenea rai tenojoin que lenonecure, chaelai que nelatiha beein. Jaiti nii acaauruhacha

esenetai aina caohachaa'in ijiniha acaauru suujuane jaunte, jaiti aasaeriin nii choosi ecaanto esenetaauruha acaauru netonaina jaun, "Baasojecha ichacure," naaure. <sup>8</sup> Nete Cana Coaunera jerihana jaun, joaereein lenonichaane niha natiin, chaachaene nii canaacha quii. Niheichu nii canaacha quii coreniha jeelai amuritoheriin caohachaa'in nena nainihaacache. Niheichu quilanaala nihacachene nihanatiin, jeelai amurijiriin baasoneein nerihacacheein. <sup>9</sup> Nete inae inara ijiin neeichene jaun, leeochoaauru jaiti ijilanaala nenacaauru saruhin, osa que acaauru nalutiaaichene jianequichene caohachae. <sup>10</sup> Ii raotojoein coitucuhi natiin, nii ichanohin choosi rai tenojoin lenone quiche nelauriaainne jana, inara coaraain niha leeochoa cana nejera ijilanaala nenaane, acaentonai nelauriaain nii ichanohin choosi belaiha tenojoin lenone quinaa nainere. jaiti caohachaa'in coitucuenihane jaun rai cocoaeraa nitohanei icharane saijieein. <sup>11</sup> Nitohaneente jaiti caohachaa'in coitucuelanaala nena cana nejera itajerateein neeiche, jaiti rai cocoaeraa nii chosi rai tenojoin iniho que lenonihanene saijieein, inae ii raotojoein coitucuhi natiin, notaracaae nii iniho que lenoneeine jaun, acaentonai coreniha ohin nihalu Curisitone saijieein. <sup>12</sup> Nitohaneein cana nejeraauru caohachaa'in coitucuelanaala nenacaauru, niicha esenetai esenetaauruhane jana, acaauru rai bacohin neeichene jaunte, inae Curisito que nejeratenaanein, inara raaje osa que nesarucuiche. <sup>13</sup> Aihana jaun lenone que cana nejera saruhin nihanu canune, caraite caohachare chabana iniho quilanaala nihanune, nabana osa que leeochoa saruhin nihanune coataa.

## 9

### *Esinae rauhijiriin afosotoneein nihacane*

<sup>1</sup> Canune laen cha ujuaihonelanaala jianacoon neeun. Chaen techu ne canu rai rauhi afosoto nichaaunne jaun. Nii ichoae tacaainechu, Cana Curuaanaa Jesoso coaraaun. Inarate, canu amihaneoo caje ecoona neeiche, Cana Curuaanaa icharatenohineein. <sup>2</sup> Tabaauru jerihane afosotonichaaunne esenetaain coana jerecuruhi. Inarate laen afosotonichaaunne coitucuhiche. Nii Cana Curuaanaa esenetaaichene jaan caje coauneente, canu esinae rauhijiriin acanichaaunne coitucuhiche inara. <sup>3</sup> Caate, nii canu que erenacaauru tonoraanune jaan ne. <sup>4</sup> Niha carai rauhi joaenreein lenone, conacai, naaonjoainuri tera nihane, raain naaonjoannune coina. <sup>5</sup> Chaen nechu naineeun leinjiin ene Jesocurisito esenetaera que comasaihocaaunne, aihuruha leeochoaauru afosotooru, Cana Curuaanaa nejeraauru, chaen Fedoro, naaonjoainurine rijijieein. <sup>6</sup> Canu, Berenabeen, naaonjoinichaanune rai netonai te ne rauhi, canacaanuhacha latei teuruha Cana Coaunera coitucuurerane coina. <sup>7</sup> Nihei chuni raajenhane aiha soondarone rijijieein namihaneoo coreteein nei. Niheichu chuni temule temuhane inae nihane bana quilanaala nei. Niheichu chunei, carenero beraihane rai nitaari niicha rocoi coelanaala nei. <sup>8</sup> Jiaonriha cacha suujue caje nena niha caa erenaa beeichene. Moisesa aitoonjoan netonaite jerichanetojoein be. <sup>9</sup> Jerichanejeein techu rauhi rai quiricha cuhane, "Jiaonriha rojoene jaera *buey* ujuae conaquichene," naain ne laenanohineein. Niheichu coatiha *buey* que coaucane jaun aitohi Cana Coaunera. <sup>10</sup> Cana quete aite canaacha que coaucane jaun. Cana corenihate laenanohineein nelu nii rauhi siricha quiricha. Aihana jaunte nii rai nucuhe rojoera aina, nii atane retuurera netonai ita rijijieein inae taojiana que turuhane jana, acaauru netonai leruhin raauruhane coina ichacure. <sup>11</sup> Canacaanune mainajeriin inara coreniha



amihanihacaanu, Cana Coaunera coitucunaa nainequichene coina. Aihana jaun coatiha baasonerihei coreniha canacaanu coroatajanequiche canacaanuhacha latei quene. <sup>12</sup> Coaracuche nachuhinti leeochoaauru acaauru coroatajaneen neeichene jerecuruhane, cha caaunna canacaanu coroatajanequichene jerenerichaanu canacaanu netonai.

Nene jaiti chabana jerenihacaanu. Raujiaainchane abaantajeein nihaacaanu, nabana Curisito que erenaa rerohecaacaanune coataa. <sup>13</sup> Inarate raotojoein coitucuhiche, satiin Teenforo asaae amihanenacaauru, nii Teenforo asaae nena que ichaaoruhane. Nitohaneeinte, nii iniho mocooruhane jaan coaraneen nenacaauru, nii iniho Cana Coaunera rai niicha teuri caute que lenoneen ichaaore. <sup>14</sup> Nii rijijieein techu aitelu Cana Curuaanaa, nii niicha jerenohi que cacha relaera, nii namihaneechoa que ichaoane coina. <sup>15</sup> Nene chabana nitohanai ichana jereneen. Niheichu coatiha carai cha teeichene coina caa aitiin laenahaan. Jataaine raotojoein neen, cha teneiche canu raine jana inara relaanune jaun. Nii colane raotiin nena naininaan. <sup>16</sup> Coatiha carai coretera coina cacha relahaan nii jianacoon cacha mitaera que. Jataain carai caohacha nihana jaunna, chatohaneein niha natiin, cacha relareeunni. Cairichaaajoarichaan cacha relaenihanune. <sup>17</sup> Nii nitohanihane jaunte, canu raajenihane cacha relaanune, inae carai cainanojoein ne. Jana coiintihanune saijieein ichacaaunnena jerichanejeein caletooa Cana Coaunerane jaan ichareeunni. <sup>18</sup> Aihana jaunne, nii carai cainaane jaan aina, jataain raotojoein core bajaelanaala cacha relaanun. Nii canu rai rauhi tonoraelanaala, core bajaelanaa cacha relaanune jaunna, caa aitoon. <sup>19</sup> Coatiha niqui nii chuni rai cha icharaneen ninaan, nena satiin rai niicha jerei icharaneen neen, nainichaaunne jeoneen Curisito rai cachaauru tenaa nainichaaunne coina. <sup>20</sup> Nii jaunna Joriocuru aina nihanune acaauru rijijieein neen, esenetaauruhane reeintiaain. Esenetaauruhane coinane, nii Moisesa aitoonjoa rijijieein ichaonacaauru cachaauru rijijieein canuhetonai neen, nii Moisesa aitoonjoan rijijieein nena nainenihanune saijieein. <sup>21</sup> Jerichanejeein nechu Moisesa aitoonjoan tonoraelanaala nenacaauru que coitucueratena jerenacaan, acaauru jana turuhanune acaauru rijijieein neen. Cana Coaunera aitoonjoan rijijieeina ichaon, inae Curisito aitoonjoan tonoraain rijijieein ichaonune jaun. Nii saijieeina nii acaauru rijijieein neen. <sup>22</sup> Nii jaiti ijii lanaala nenacaauru rene turuhanunena, acaauru ichao rijijieein ichaon, coitucunaa nainecuruha acaauru netonoaine coina. Satiin rijijieeinchane neen, tabaauru ichoteratichaaunne jianacoon nena nainecuruhane coina. <sup>23</sup> Satiin caa caitoonjoaaurunune ichaon jianacoon cana mitaera coreniha, ecu nena nainichaaunne coina.

<sup>24</sup> Inarate coitucuhiche, jiniquuin soronacaauru satiin sorooruhane niha natiin, leinjiincha rai core raane coitucuhiche. Aihana jaun inara netonai sorohichenete ne, nii aihuruhane rijijieein rai core raaichene coina.

<sup>25</sup> Nocoatijianacaaaurute inae leecha aina nocoatijianaa jerecuruhane, chatohaneein acaauru jaberoco tenaa nainera que necohalajiin neruujueeure. Aiha leeinjiin ajaena jujuhin enaicha ohina inaeraneen nena caje nena comai que coretenajaera coina. Jana canate necairichaecaache coreniha chabana ohina charanejeein nena raacachene coina. <sup>26</sup> Aihana jaun coatiha canu joareein coitucuhelanaala sorohaaun. Niheichu coatiha joareein sonacaunne faoracahaan. <sup>27</sup> Nitohanihana jaunna caraajenihane cajabereeo cairichaan, casuujua tonorana nainichaaunne coina. Nabana leeochoaauru relaeraneen nihanune saijieein, cha colane baasoneen nedaanune coataa.

## 10

*Cana Coaunera nelanaala nenea choosi ecaanto belaihuruhane coataate, suujuatenajae Faboro.*

<sup>1</sup> Canejeraauru, jiaonriha acauru conaaca dede sacarine jana, satiin jana cuhin, Cucuana Lanajai jera jaaoruhalu, cana foerateracurune baitequichene. <sup>2</sup> Nitohaneein nii Moisesa aina nii dede sacari que amaeraain cucuana jera jaaoreraaurute ita rijijieein ichaaorelu. <sup>3</sup> Jerichanejeein techu, satiin jiniiquiin Cana Coaunera tenojoi lenone que lenoneein <sup>4</sup> cuuruhane corihanune que Cana Coaunera tenojoin ajeri caje nalunaa acau que netonai cocohin cuuruhane jaun, jerichanetojoein Cana Coaunera tenojoin acau que cocohin neeurelu. Nii ajeri, acauru corihaneraanu que Cana Coaunera tenojointe Curisito nelu. <sup>5</sup> Nete nitohaneein acauru coroatajaniha Cana Coaunerane saijieein niicha rautaa ichacuruhane jaun, cacha arereroo neleruhin amurijiriin ohacoaurelu.

<sup>6</sup> Nitohaneeinte nabana cana netonai rai baaso ichana coauna coataa, nii que nainaan ichaonaa jaan nuque nitohaneein ichaelu Cana Coaunera. <sup>7</sup> Nitohanihana jaun, jiaonriha Cana Coaunera aina iriha niha Moisesane tonohanau nii acaauruahacha ichai choosi ecaanto coroaecuruhalune rijijieein inara netonai ecaanto coroaequichene. “Satiin nelauriaain lenoneein cocoruhane baihate, satiin nimichuhuin rachoojoeure,” naalu Cana Coaunera Quiricha Inoaensi cuhanene rijijieeinte aihure. <sup>8</sup> Aihana jaun niheichu nainihaacache aihuruhalune tocohaneein nejelau ene dadaain nihacachene. Nitohaneeuruhane corenihate coroatachoonca nichata oaraancaain oorelu lejiichoo cuhane. <sup>9</sup> Jiaonrihachu inara casetecaa Curisitone coujuha chatonaain baasoneein que ereein neeichene. Tabaauru nitohaneein baasoneein erenacaurute acano calanojoein ohacoaurelu. <sup>10</sup> Nii rijijieein chu inara netonai baasoneein Cana Coaunera que erenaa nainiheiche, tabaauru Cana Coaunera que baasoneein ereeuruhane jaun cacha atinaera aanjera letoaa Cana Coaunerane jaun, atinanaacane rijijieein inara atinaeratihane coataa. <sup>11</sup> Nitohaneein jetaote cana foerateracuru casetecaeratelu Cana Coaunera, nii caje nainaan ichaonaa coina. Chaen techu cana satiin enene ichaohacachene rai nii beeraanu que Cana Coaunera Quiricha Inoaensi cuhane laenanohineein ne. <sup>12</sup> Nitohanihana jaun chunocoha baaso ichana coacuelanaala, jeriha Cana Coaunerane rijijieein satono que tiaain nenea jerihane, caohachaaain necohalajiin neeine. <sup>13</sup> Nete inara jaiti chabana cacha nejesinanein abaantanacainelanaala, inara coujuera coaraeneeiche. Aihana jaun Cana Coauneraacha que jaeccochete inara beraaine, nabana inara cairichaaain inara nainatijihane, jataain abaantanacaelanaala nenea que cairichanojoequichene coataa. Nii banate inae niha baasoneein inara teranune jana, caje inara ichoteratereein, abaatana nainequichene coina, Cana Coaunera. <sup>14</sup> Aihana jaun canejeraauru, jiaorihha Cana Coaunera nelanaala nenea choosi ecaanto coroaeraauru aina cuhin coroaequichene. <sup>15</sup> Inarate caa inara rai caitoonjoan coitucuhiche. Nii jaunte baasoneein aitenihanune caohachaaain aitocaaunne coitucunaa nainequiche. <sup>16</sup> Nitohanihana jaunte Cana Coaunera corojeein satiin cana ichao coreniha orichaaaine rai neein rai coichana niha been Cana Curuanaacha coi, rai coco bino cohacachene, nii rai coichana aina cuaain coichana que coichanaquiin nenea rijijieein nihacache. Nii rijijieein techu nii jaberoco niha been niicha taturii faan quihacachene, inae rai jaberoco aina cuaain aina ita jaberoco que jaberococonaa rijijieein nihacache. <sup>17</sup> Charijieein teeinti arajiin nihacachene nihanatiin, satiin nii leinjiin faan quihacache, nii rijijieein techu leinjiin jaberoco que jaberococonaa rijijieein nihacache.

<sup>18</sup> Coaracuche nachuhinti cana foerateracuru inoaensihuru Isaraelitacuru, Cana Coaunera rai niicha mocoori iniho quihuruhane, acaauru raajenihane tera rijijieein saain que lenonecuruhane. <sup>19</sup> Coatiha chaque nelatiha Cana Coaunera coitucuhichuru chosine jaun aitoaaun, niheichu rai niicha mocoori iniho leecha iniho amurijiriin nihane jaun aitoaaun. Acate joenreein leecha iniho rijijieein ne. <sup>20</sup> Cana Coaunera coitucuelanaala nenacaauru, acaauru chosi rai lenonecuru mocooruhanete, moconajaera rai ichacure. Nitohanihane jaun coatiha nii moconajaera aina enohichene jerihaaun. <sup>21</sup> Aihana jaun nainiheeiche nii Cana Curuanaa que banijiaain nenea, rai coco bino cohichene baiha, nii moconajaera coroaeca acaauru chosi rai niicha ichacuri iniho quiha nenacaauru aina nenea nainiheeiche. Niheichu nii Cana Curuaanaacha tei bino cohichene baiha nainiheeiche, moconajaera coroaeca coconacaauru aina cocoin naonjoaachene. <sup>22</sup> Chasiina Cana Curuaanaa baijiaeraanu tocohanein, jianein leecha sacurichaache cana casetecaane abaantanaa nainerichaachene coalanaala.

*Leeochaaururuhacha coacuhi que suujua acatein niha Jesocurisito rano-joine*

<sup>23</sup> “Chunite nainere joareein niicha jerei ichaane” naaiche niqui. Esinae rauhijiriinte aitocohiche. Nete caohachaene itolere bana joareeincha ichacaane. Chunite niqui esinae naine niicha jerei ichaane. Nete tabaauru joareeincha ichana jerichaane, coatiha cana coroatajanihei nii canaacha ichai Cana Coaunera jerenohin ichacaane coina. <sup>24</sup> Nitohanihana jaun caohachai cana rai caohachanuhacha ichacaane, satiin rai caohachanu ichacaanete caohachae. <sup>25</sup> Inara rai teraa joenreein iniho ne, inae coitucuhichene jaun bajaelanaala que lenonecuche, <sup>26</sup> satiin caa cana rai chauratane aina que nenacaauru, Cana Curuanaa rai nihana jaun. <sup>27</sup> Chunocoha esenetaeranelanaala nenea inara cotihaca lenonequichene coinane jana, cunaa jeriquichene inae coitucuhichene jaun, bajaelanaala inara rai niicha teeuri que lenonecuche. <sup>28</sup> Nii lenonequichene coina, inara cotihacuruhane jana, chunocoha inara rai, “Caa inihote leinjiin canacaanu choosi rai moconojoine” naain bihane jiaonriha quiichene. Chaen inae raotojoein coitucuhichene jaun, nabana nii inara rai bera cairichaaichene coataa. <sup>29-30</sup> Tabaaurute, “Chanuna nainichaaun joareein lenonichaaunne saijieein caohatere nejelau cacha, itolere bana ‘Nariha Cana Coaunera’ naanu lenonichaaunne naineeinne saijieein, chasiinna canu que ereerure,” naaururein. <sup>31</sup> Nitohanihane jaan caje coauneente, lenonein, acau cohin, cha ichaain, naonjoaachene Cana Coaunera rai caohachanu que ichaquichene caohachae. <sup>32</sup> Jiaonriha baaso ichaain leechaauru relaan neeichene, niheichu nii Joriocuru rai niha natiin, niheichu Jorioniheichuru rai niha natiin, niheichu Cana Coaunera cachanein nenacaauru rai niha natiin ichana nainiheeiche. <sup>33</sup> Canune laen satiincha rai caohachanu ichana jereun, canu raacha caohachanu coacuhelanaala, acaauru netonai nichotena nainecuruhane coina.

## 11

<sup>1</sup> Caa canuhacha ichai rijijieein cha ichaain neeuche. Charijieein teinti, cha ichaain nihalu Curisitone rijijieein cha ichaain neeun, nii rijijieein.

*Inara aina netaojianacaauru enecuru rai*

<sup>2</sup> Jataaine inara corojeeun, itolere bana canu coacuhin inara relaanune jaan tonoraain neeichene coreniha. <sup>3</sup> Nena laen Curisito satiin quicha nichaachene couturi nihane jana, rai comasai couturi niha satiin quichane

rijjijeein, Curisito couturi niha Cana Coaunerane coitucuhichene jereeun. <sup>4</sup> Nitohanihana jaunte, leinjiin quicha, couturi conajaain Cana Coaunera bajaain, Cana Coaunera ere beein naaonjoanne niha natiin rai couturiji conaaca, rai couturi niha Curisitone saijieeinna jaun, nii letoaa rai couturi Curisitone tonoraenihana jaun aicheein. <sup>5</sup> Jana enete laen naine couturiji conajaain, Cana Coaunera bajaain, Cana Coaunera ere beein naaonjoanne caohachae. Jana couturiji conajaelanaala aihanete, rai couturineein nena rai lana tonoraenihane jaun aicheein, loraecaain jaonjoiniha rai couturiji jaun aihane rijjijeein. <sup>6</sup> Nitohanihane jaun leinjiin ene, rai couturiji conajenihanete caohachare rai couturiji loraecaain joeratihane. Jana nii couturiji joeratiha loraecaainne coejiha nii enene, rai couturiji conaamiin. <sup>7</sup> Jana quicha laen nainihei rai couturiji conaacane, Cana Coaunera rijjijeein neein, rai cacha neein nihane coaratihane coina. Enete laen lana que suujua acatihane coaratiha rai couturi conaacane caohachae. <sup>8</sup> Ene caje nena neniha quicha jaberocone jana, quicha jaberoco caje nena niha ene jaberocona jaunte nitoha ne. <sup>9</sup> Coatiha ene ichao coreniha necoau-naain niheilu quicha. Jana enete laen, quicha ichao coreniha necoau-naain nelu. <sup>10</sup> Nitohanihana jaunte anjeraauru naaonjoainuri coreniha, nii cojunacaniha rai couturiji conaaca enene caohachae. <sup>11</sup> Jana Cana Curaanaa Jesocurisito coitucuhin esenetaera nichaachene raite laen, ene colane ichaonaa nainenere quicha, jana ene netonai quicha colane ichaonaa nainihei. <sup>12</sup> Nitohanihane jaunte, esinae rauhijiriin quicha caje necoau-naain nena niha enene rijjijeein, quicha netonai ene caje nejanoaain ne, nitohanein jeriha Cana Coaunerane jaun. <sup>13</sup> Caohachaana inara rai couturiji conajaelanaala Cana Coaunera bajaa enene. <sup>14</sup> Nitohanein niha cana necoaaunane jaan caje coauneente, necoejena ne leinjiin quicha rai couturiji fojiaane. <sup>15</sup> Nete laen enecuru, nelatecuruhane coujunaca nihane jaun, rai couturiji fojiaauruhane caohachae, nii coina tenojoi niha acaauru couturine jaun. <sup>16</sup> Chunocoha caa aitocoaaunne jaan que tonaain erena jerihane, Cana Coaunera ranojoihunru aina jiniiquiin leecha ichaonaa coitucuenihacachene coitucuhin aitomiin.

*Baasonein Cana Curuaanaa que banijiain lenone que lenonecuruhane*

<sup>17</sup> Caa, que jauhecaain canuhacha laenai cuhane laen, inara coroaena naininaaun, netaojiaaiche inara caohachanu quene niha natiin, baaso ichaquichene coreniha. <sup>18</sup> Jauriaanejeeinte canu rai beurelu, Cana Coaunera coroaquichene coina netaojiaaichene, ita caje neleruhin netaojiaaichene que aitiin. Nii jaunna acaauru aitoonjoa tabaauru esenetaaun esinae aitocuruhane jaun. <sup>19</sup> Nii ita caje nelerujuacoaain netaojiaaichenete ichaquiche, le nelerucuru coaraauru esinaen rauhijiriin Cana Coaunera sacueraneein neeichene coarateeichene coina. <sup>20</sup> Nii nelerujuacoaain netaojiaaichene jaun, Cana Curuaanaa que banijiain nena lenone que lenonequichene niha natiin, coatiha jeriha Cana Curuaanaane rijjijeein ichaeneeichene jaun, que banijiaain nena lenone que lenoneriheeicheein. <sup>21</sup> Nii lenonequichene rai neeichene jana, tabaauru inae lenonihane jana, tabaauru mijitenaana neeure, jana nitonohana leechaauru ajeein naaonjoane jaunte, baaso ichaquiche. <sup>22</sup> Chanuna leechaauru sinaa jereneeichene, inara loreri asaecha lenonelanaala, Cana Coaunera cachaauru que jaolecuhin, cha colane nenacaauru necoeje chanuhin naaonjoaainche. Chasiina nitohaneinchene inara coroaena nainereun. Inara coroaena naininaaun nitohanein neeichene jaun.

*Cana Curuaanaa que banijiaain nena lenone.**(Mt 26.26-29; Mr 14.22-25; Lc 22.14-20)*

<sup>23</sup> Canune laen Cana Curuaanaa caje, caa inara relaanune jaan raain neeunlu. Nii coulurujuenojoin nihane cojoanotiin cuhanete faan mucuhin teberiaain, “Nariha Cana Coaunera” naane baiha, <sup>24</sup> cataaun tacaain nii faan tathin, “Caa faante inara coreniha quiicha tei canu jaberoco ne. Caa ena ichacaaunne rijijieein ichacuche canu coacuhin,” naelu Cana Curuaanaa Jesoso. <sup>25</sup> Jerichanejeein techu inae nainaan nii faan que lenonihane baiha, bino mucuhin teberiaain, “Caa binote ena nena Cana Coauneraacha tei rai rauhi coujunaca cacoichana ne. Aihana jaun caa ena ichacaaunne rijijieein ichacuche canu coacuhin,” naelu Cana Curuaanaa. <sup>26</sup> Nitohanihane jaun nacoauneein turuha Cana Curuaanaane que tiaaajoaain ohalune beeichene raite ne, nii lenone que lenonequichene naineein, chaen nii acuu niicha cohi coohichene naineein.

*Cana Curuaanaa lenone que lenoniha cachane.*

<sup>27</sup> Nitohanihane jaunte chunocoha nii bino, nii lenone, naaonjoain que lenonihane, jeriha Cana Curuaanaane tocohanelanaala ichaane, Cana Curuaanaa jaberoco rai coichana naaonjoain sarue osa que nii ichara. <sup>28</sup> Aihana jaunte nii lenone que lenoneein, nii bino cohin, naaonjoanne ajiniha, jaurianejeein rai suujua coaraa cachane caohachae. <sup>29</sup> Jaurihanejeein suujua coarii amuneein, “Naaonjoane jaunte caa Cana Curuaanaa jaberocone. Naaonjoane jaunte caa Cana Curuaanaa coichanaane,” naain coitucuhera amuneein que bino cohin, lenonihanete, raaje rai jaberoco casetecaa aicheein. <sup>30</sup> Nitohanihane jaunte inara tabaauru cunaiteein, aterojoeriin, tabaauru oore. <sup>31</sup> Caohachaaain cana suujua coaraain nihacachene jana nihane, coatiha cana casetecarihei Cana Curuaanaa. <sup>32</sup> Cana casetecaane niha natiinte, raujiaain nacoauneein baaso ichaelanaala, jeelai amuritoheriin caohacha ichana que nerelana coina cana casetecae. Coatiha nii coitucuruhi casetecaane tocohaneein nitajenaa coina cana casetecaa Cana Curuaanaa. <sup>33</sup> Nitohanihane jaan caje coauneein, ita taojiaaiche Cana Curuaanaa lenone que lenonequichene coinane, ita jiniichaaain lenonecuche. <sup>34</sup> Jana chunocoha mijitena caun leeochoaauru ajiniha lenonena jerihane, nenajaun lenonemiin, nitohaneein baasoneein ichacuruhane coreniha inara casetecaa Cana Curuaanaa ne coataa. Nitohaneein neeichenete caohachaera canejeraauru. Inae inara coraa uhanune banane, inara rai leocha rucuhencacai rucuhereunni.

**12***Niicha nainei ichaa cachane jaanu tiha Cana Coaunera Suujuene.*

<sup>1</sup> Canejeraauru, niicha nainei ichaa cachane jaanu tiha Cana Coaunera Suujuene coitucuhichenena jereeun. <sup>2</sup> Inarate jaiti Cana Curuaanaa coitucuhin esenetaeneechene bana, nii chosi ecaanto ichanohineein nena rene inara amaauruhane, aiha maosane rijijieein curejetocohichene coitucuhiche raotojoein. <sup>3</sup> Nitohanihane jaunte inae enene chuni, “Nechu aansaineein ichaonaa Jesoso,” naain erenaa nainene, inae enene Cana Coaunera Suujue letononeein irihane. Nii coitucuhin ichaohichenena jereeun. Chaen nihei chuni, “Jesosote Curuaanaa ne,” naain erenaa nainihei cache, Cana Coaunera suujue letononeein erenihane. <sup>4</sup> Araai lauriin cha ichana nainihane jaannute ranaa naine cache, Cana Coaunera tenojoineein. Nete laen nii tera, jeelai Cana Coaunera Suujueneein leinjiincha ne. <sup>5</sup> Niha araai lauriin rai nelateein nihacane jaanu, cana que jeelai Curuaanaa icharatenojoineein. <sup>6</sup> Jerichanejeein techu araai lauriin ne nelateein cha ichana nainiha cachane

jaannu. Nete araai lauriin nihane nihanatii nii jeelai Cana Coaunera caje satiin unaaneein ne. <sup>7</sup> Cana Coaunerate aina nihacachene coitucuhacachene jaa te rai cachaneein neinichaachene rai, nii aina raotojoein nihacachene coina. <sup>8</sup> Rai Suujue aina cuaainte, le cachaauru tabaauru rai coitucuhin erenaa nainecuruhane jaannu te Cana Coaunera. Jerichanejeein techu jataain itolereneein cha coitucuhin neeuruha cachaurune jaanu teein ne, nii jeelai Cana Coaunera. <sup>9</sup> Tabaaurute esenetaauruhane jaannu rae, jeelai Cana Coaunera Suujue tenojoineein. Tabaaurute, nelateein cunaiteenaa rautaane jaannu rae. <sup>10</sup> Tabaaurute cojoelanaacojai ichaain nelatihane jaannu rae. Jana tabaaurute, Cana Coaunera caje unaa erenaa bihane coina, nelatihane jaannu rae. Tabaauru te, Moconajaera suujue ichanohin aina Cana Coaunera suujue ichanohin coitucuhane jaanu rae. Tabaauru raite, leecha erenaa cuhane erenaa nainecuruhane jaannu te. Chaen techu, tabaauru rai nii leecha erenaa cuhane ereeruhane jaan aonaain benaa nainiha leechane jaannu te. <sup>11</sup> Satiin niichurute te, tenaa jerihane jaanru rai, nii jeelai Cana Coaunera Suujue; janijiin niicha rai cachaauru rai.

*Araaichaache niqui nete leinjiin que jaberocanaa rijijieein nihacache.*

<sup>12</sup> Cacha nichaachene jaberocote, araai lauriin neleruhane niha natiin, jeelai cana jaberoconeein netiin ai. Nii rijijieeinte satiin nihacache araai laurii caje nihacachene nihanatiin Jesocurisito cachaneein neinichaachene. <sup>13</sup> Nii rijijieein techu satiin cana, Joriocuru, Jorioniheichuru, letononeein nenacaauru, letononelanaala nenacaauru, naaonjoainuri aina jiniiquiin coujunacatenohineein nihacache, leinjiin jaberoco que jaberocohin nena rijijieein nihacache, Cana Coaunera Suujue ichanaaneein. Nii rijijieein techu nii jeelai Cana Coaunera suujue caje ocoona que satiin cocohin nihacache. <sup>14</sup> Coatiha le turijieeincha nihei cana jaberoco, araai lauriinte ne cana jaberoco nelerucuru. <sup>15</sup> Nii nitohanihana jaun cana tijia, “Cacha biji neniha-nune jaun coatiha cacha jaberoco nihaaun,” naane, coatiha cacha jaberoconeein nihane jianerihei. <sup>16</sup> Cana uricho netonain, “Chanuna nota neneun,” naain irihane, coatiha cana jaberoco que nihane jianerihei. <sup>17</sup> Satiin cana jaberoco cana nota nejesina nihane, coatiha cha aonaain ichaonaa nainerihaacache. Satiin cana jaberoco cana uricho nihane, chaelai juuno aohanna nainerihaacache. <sup>18</sup> Nete lauri lauri cana jaberocoora coaunaain rai caohachaaain inanacaane jaan jeeloncuru teein coaunaelu Cana Coaunera. <sup>19</sup> Le turijieeincha ijabereeeonu niha cana jaberoco, rai neleru colanene coatiha nerihei cana jaberoco esine. <sup>20</sup> Nitohanihane jaunte araai turiin neleruha cana jaberocone niha natiin, rauhijiriin leinji cana jaberoco. <sup>21</sup> Nii nitohanihane jaan caje coauneein, cana nota nainihei cana biji que, “Latinaaun,” nanaa nainihei. Niheichu cana couturi niha natiin cana tijia que, “Latinaaun,” nanaa nainihei. <sup>22</sup> Nete nii nelatihei rijijieein canaacha coarai cana jaberoco-jataain nelateineein ne. <sup>23</sup> Nii cana jaberoco leechaauru fautaain canaacha colalajiite cajionetein sirichaache. Jana nii cana jaberoco, coanojoinelanaala nenaate, jeelai amuritoheriin cajionetein sirichaache coara coataa, <sup>24</sup> nii cacha notaracaae nena sirichaachene amurijiriin. Cana Coaunerate, nitohaneein cana jaberoco coaunaee, nii coaraelanaala canaacha sirii amurijiriin nii cacha notaracaae nena belaaain, caohatiin be-raain sirichaachene coina. <sup>25</sup> Nabana jeelai jaberoco neein nihane saijieein, rai jaberoco nelerucuru leechaneein coaraelanaala, rai nelatena nainihane coina. <sup>26</sup> Nii nitoanihane jaunte, chatohaneein necunaitaa le turijieein cana jaberocone niha natiin, saain cana jaberoco necairichae leinjiin coreniha. Nitohanihane jaunte, cha lateein niha cana jaberoco nelerune jana, rai teraa

nii niicha lateine, satiin cana jaberoco rachoojoe. <sup>27</sup> Nii rijjijeein techu inara, Curisito jaberoco neleruneein neeichene jaun, le cachanequichene naineein inaraacha ichaneni siriin neeiche. <sup>28</sup> Nii coinata jere, satiin rai cachaauru iclesianeein nenacaauru jana niha afosotooru, Cana Coanera suujue aina cuaain ichaonaa coitucuhin beeurera *profetacuru*, cache relaaureraauru, cojoaelanaacojoai icharaauru cachaauru, cunaitenacaauru rautaeraauru, leeochoauru coroatajaneraauru, cachaauru coaraneein nenacaauru, nejelau erena cuhane erenacaauru, naaonjoainuri neeuruhane jerelu Cana Coanera. <sup>29</sup> Nete saain rai cachaauru afosotonena nainecurene. Niheichu saain *profetane* naanainecuruhi. Niheichu satiin cache relaeraneen nena nainecuruhi. Niheichu saain cojoaelanaacojoai ichana nainecuruhi. <sup>30</sup> Jerichanejeein chu saain cunaitenaa rautaauruhane coina nelatena nainecuruhi. Niheichu saain leeochoa erenaa cuhane erenaa nainecuruhi, jerichanejeein chu nihei saain nii leeochoa erenaa cuhane erenacaauru aohana nainecuruhi. <sup>31</sup> Nii jaunte inara jataain caohachaaain nelatei jerena nainequiche.

## 13

### *Cana coichana aina cutaain belaina inaacane*

<sup>1</sup> Leeochoa cache ere cuhane ereein, anjeraauru ere cuhane niha natiin irihanune saijjeein, cacoichana aina cutaain belaina inaelanaala aihanunena, leinjiin coata tonijiaain nena fautaain chaque nelaterinaaun.

<sup>2</sup> Jerichanejeein techu Cana Coanera que ereerejeein, niicha ichanenu coitucuhin, leinjiin atane ucuunno rurujuanaa nainichaaune coina esenetaanune niha natiin, esinae rauhijiriin cacoichana aina cutaain belaina inaenihanune, coatiha chaque nelaterihe i canuhacha ichai. <sup>3</sup> Cairicheihuru rai jitariin quicha sirii teein, cajabereeeone maajeein tihanu acauru corenihane nihanatiin, esinaen rauhijiriin cacoichana aina cutaain belaina inaenihanune coatiha nii cha que nelaterinaaun.

<sup>4</sup> Esinae rauhijiriin cana coichana aina cutaain belaina inaacanete abaantana coitucuhin, caohachaaain leeochoauru aina neein, chaque necoelailanaala, cana rainuhachaque coacuelanaala, leeochoauru amurijiriin nena coacuelanaala, <sup>5</sup> erenaa baaso que erelanaala, niheichu itolere bana cana rai caohachanuhacha que coacuelanaala, obajelanaala, baaso icharaauru que cana suujua acateein, <sup>6</sup> baaso ichacuruha leeochoaurune corojelanaala, caohacha icharaacha corojeein nihacane te caohachae. <sup>7</sup> Cana coichana aina cutaain belaina inaacanete, satiincha necairichanaa abaantaain, cana coroatajanihane cojoaain, itolereneen esenetaain, itolere abaantaain, naaonjoaain nihacane caohachae.

<sup>8</sup> Nii cana coichana aina cutaain belaina inaacane chabana sarihaain. Inae ecu tihane bana, coatiha nerihain caa Cana Coanera ere bera *profetacuru*. Niheichu coatiha leeochoa erenaa cuhane erenacaauru niha natiin nerihain.

<sup>9</sup> Aihana jaun caa canaacha coitucui aina cana rai *profetacuruhacha* bei, coatiha jitariin canaacha coitucuheni coitucueratihei. <sup>10</sup> Nete inae turuha nii cana relaera esine chaeloon baaso sirilanaala nenaane, sareein nii aasaeriin canaacha coitucui.

<sup>11</sup> Jaiti canaanainichaaunne banane, canaanainichaaunne ere que ereein, canaanainichaaunne suujua que coacuhin, naaonjoan rejetoonu. Nene inae enene ichauhenaneein nii canaanaineein canuhacha coacuhi jianeun.

<sup>12</sup> Enate aasaeriin inanacaa cana suujuane jana coaracaache. Charijjeein teeinti, acuhanau inanacae cana cojunaca nii rijjijeein. Nete inae ecu tihane bana, caohachaaain coaraain coitucurichacheein. Aihane jaun caohachaaain

jaiti ena coitucuaaun. Nene inae ecu tihane bana charijieein teeinti cacoitucue Cana Coaunera nii rijijieein canuhetonai coitucureeunni.

<sup>13</sup> Nichata lauriinte ne itolere bana canaacha coacuheeni. Jauriaanejeein Cana Coaunera esenetaain ichaohacane, nii baiha cana ichao rucujueein niha Cana Coaunerane cohajeein nihacane, satononejeein esenetaain jereein ichaohacane, naaonjoaain nihacachene te caohachae. Nete nii nichata laurii caje ne jataain nii coroatajai amurijiriin jataain itolere que nelateineein nena. Acate cana coichana aina cutaain belaiha inaacane jaan ne.

## 14

### *Leeocha erenaa canaacha aonaai cuhane irihacane.*

<sup>1</sup> Aihane jaun atiin inara coichana aina cutaain belaina inaeraneei neeuche, chaen inara rai Suujue tiha Cana Coaunerane corajeein jerecuchete, inara que niicha beratei, que erenaa beeichene jaannu que nelatei teeine inara rai. <sup>2</sup> Nii aonaelanaala nejelau erenaa cuhane ereite, Cana Coaunera rai iriha aite. Coatiha cache rai aitoi. Nii jaunte aohana nainecurene cachaauru. Nii naitoonjoante Cana Coaunera Suujue caje unaaniane jaun chuni coitucue. <sup>3</sup> Nete laen Cana Coaunera aitoonjoa bera, satiin que coitucuerate, leeochoauru quene maajeein. Chaen techu acauru suujua aninoain acauru suujuate jeriha Cana Coaunera Suujuane rijijieein neeuruhane coina. <sup>4</sup> Nii nejelau erenaa coitucueraelanaala nena cuhane ereite, jelai acaachanejeein Cana Coaunera Suujue coitucuhin aina ijiin ne. Nete laen nii Cana Coaunera aitoonjoan berate, Cana Curuaanaa ranojoneein nenacaauru que coitucuerate aina ijiin, Aca jerihane rijijieein caohachaain neeuruhane coina.

<sup>5</sup> Nitohaniane jaunne niqui, Cana Coaunera Suujuecha tei erenaa cuhane satiin ereeichene jereun. Nena nii amurijiriin, Cana Coaunera aitoonjoan beeichene jereun. Acate jataain caohachane, nii leeochoa erenaa cuhane irihacane amurijiriin. Niite amuooraa latelanaala aonaain, jelai amuritoeriin coitucunaa nainecure Cana Curuaanaa ranojoneein nenacaauru. <sup>6</sup> Nitohaniana jaun canejeraauru, coatiha nelaterihe i inara coaraa uhanune bana, inara rai leeochoa erenaa cuhane irihanune. Caohacharihei inara rai cana ere cuhane Cana Coaunera aitoonjoa que erelanaala, leeochoa erenaa cuhane irihanune. Ainihane ichaonaa rauhi que inara rai erelanaala, leeochoa erenaa que irihanune caohacharihei. Niheichu caohacharihei leeochoa erenaa cuhane, inara rai irihanu, Cana Coaunera beratenojoi erenaa que ne. Niheichu caoacharihei, inara relaelanaala, leeochoa erenaa cuhane inara rai irihanune.

<sup>7</sup> Satiin auno aina, ita rijitoojeein toniha quitarane, coatiha nejelauneein aohanrarihei rai toni. <sup>8</sup> Nii rijijieein chu, coatiha neruujueeururihei ita soha nenacaauru, nii ita sooruhane bihane toni rijitoojeein, toroonfeta toteniha toterane. <sup>9</sup> Nii rijiiquiche inara netonai, aonacuruhane coina ereeichene saijieein, leeochoa erenaa cuhane ereeichene. Chasiina inara ere aohanre, nejelau erenaa cuhane ereeichene, nii ereeichene jaancuru. Nechu joareeinchate ereereeriquiche inacojeein. <sup>10</sup> Esinae rauhijiriinte niqui ne, araai lauriin caa cana rai chauratane que erenaa. Niite le laurichuru nejelaunihacoaain ne rai toni. <sup>11</sup> Nii nitohaniane jaun, canu rai, nere cuhane iriha nejelau cachane coatiha canu rai chaque nelaterihe i nii erenaa. Nii rijijieein chu nii nejelau cache rai canu ere cuhane irihanune jana aonaenihane, chaque rai nelatihei canu ere netonai. <sup>12</sup> Inae inara netonai



Cana Coaunera Suujue caje nenea sirina jeriquichene jaun, nii Cana Curu-  
aanaa ranojoneein rai iclesianeein nenacaauru que jeelai amuritoheriin  
coitucuerateraneein nenea raauche.

<sup>13</sup> Aihana jaun, nejelau erenaa cuhane erei, Cana Coaunera caje ba-  
jaainete, rai amuucane jaannu teeine. <sup>14</sup> Canu nejelau erenaa cuhane Cana  
Coaunera bajaanunete, canu suujue ainaacha Cana Coaunera bajaanunete. Nete  
laen, canu suujua coitucunaa nainene. <sup>15</sup> Aihane jaun Cana Coaunera ba-  
jaanune, canu suujua, canu suujue, naaonjoain aina jiniiquiin bajaanunete  
caohachae. Nenatichaaunne niha natiin canu suujue aina jiniiquiin canu su-  
ujua cuhane coitucuhin aitocooaunnete caohachae. <sup>16</sup> Aihana jaun, inara  
suujue ainaacha Cana Coaunera corojeein que ereereequichene jana, nii  
inara aitoonjoan coitucuelanaala nenea, inara aonaane niha natiin, nii inara  
aitoonjoan coitucuenihane, coatiha inara aina turuhin nii aitocohichene  
jaan aohanna nainerihe. <sup>17</sup> Nii inara aitoonjoante niqui jataain nelateinere,  
nete, leeochoaauru corootajanena nainene, jeriha Cana Coaunera Suujuane  
rijijieein coitucuuruhane coina aonacurenihana jaun. <sup>18</sup> Nariha Cana  
Coaunera, leeocho erenaa cuhane irihanu inara amurijiriinne coreniha.  
<sup>19</sup> Nena, Cana Coaunera coitucuurera rai irihanune, saouqijiei erenaa acaau-  
ruhacha aonai cuhane erenaa jereeun, aonaain acaauru netonai nerelaau-  
ruhane coina, inacojoein leeocho erenaa cuhane lechooca oaraancaneein  
erenaa que acaauru rai irihanune niha natiin aonacurenihane ajiniha.

<sup>20</sup> Canejeraauru, jiaonriha suujua coaauca canaanaine rijijieein inara  
suujua coaauquichene. Itolere baaso rai, canaanai rijiiquichenete laen  
caohachae. Nete laen, inara caohachanu que coaauquiche ichauchenanee-  
ichene suujua que cuaainne caohachae. <sup>21</sup> Ichaonaa rai rauhi rai, quiricha  
cuhanete, “ ‘Leeocha erenaa cuhane ne, caa cachaaauru rai erereunni.  
Chaen nechu, nejelau caje unacaaauru cachaaauru que canu ere beratere-  
unni. Nitohaneein acaauru rai beratihanune niha natiin, coatiha canu  
ere tonoraaururinaain’ naa Cana Curuanaa,” naain ne laenanohinnein.

<sup>22</sup> Aihana jaun, leeocho erenaa cuhane irihacanete, Cana Coaunera coitu-  
cuhichuru que, Cana Coaunera coituhacachene cojunacaniha aitocooache.  
Coatiha laen Cana Coaunera coitucuurera rai cojunacaniha aihacache.  
Nete laen, Cana Coaunera aitoonjoan bihaca, Cana Coaunera coitucuurera  
raine, Cana Coaunera coitucuurera rai Cana Coaunera coitucuhacachene  
cojunacaniha aitocooache. Coatiha, Cana Coaunera coitucuhichuru rai  
nihei. <sup>23</sup> Satiin Cana Coaunera rai iclesianeein neiniquichene netaojiaain  
netiin, leeocho erenaa cuhane ita rai ereereequichene jana, inara rene  
enohin aonaa neechu joaenreein nenea cacha aina Cana Coaunera coitu-  
cuelanaala nenea cachanete nainere, “Caa cachaaaurute joaenreein ereere-  
jeeure jaeloroherihuruhane jaun,” naain erere. <sup>24</sup> Nete laen inara ere  
cuhane Cana Coaunera caje unaa erenaa que ereereequichene jana, enoha  
uha inara rene nechu joaereein cacha, leeocho cacha Cana Coaunera coitu-  
cui, naaajoaurine, le cachanecuruhane laen nainere, nii aitocoichene jaan  
aonaain raajenihane osaaocane coitucunaa naine, jitaain nii aitocoichene  
aonaane jaan. <sup>25</sup> Nii banate, satiin rai suujua cuhane niicha coacui  
coitucuhin, neseonraain Cana Coaunera corojeein, inara aina niha Cana  
Coaunerane coitucureein.

*Cha ichaquichene caohachaaain ichacuche, joaaenreein ichaelanaala.*

<sup>26</sup> Canejeraauru, aihane jaun caa inara rai caitono tocohaneein netao-  
jiaaichene, tabaauru salmo que nenatemiin. Jana tabaaurute nainere  
cachaaauru relaane. Tabaauru que Cana Coauneraacha coitucueratei que  
ereereemiin. Jana tabaauru leeocho erenaa cuhane ereerejeein, leeocho

erenaa aonacuruhi rai beeine, nii niicha beebejei aonaain coitucuhin aina iichuruhane coina. <sup>27</sup> Chaen leeocho erenaa cuhane erenaa jeriquichene, coroatajaain nichatajaain netiin ita reroherererojoein aitocuche le cachanequichene. Jana chunucohate nainere, nii aitocoichene jaan biha leeocho erenaa aonacuruhi raine. <sup>28</sup> Jana neniha cacha, nii erenaa aonaain benaa coitucuelanaala, nii Cana Coaunera rai iclesianeein nenacaauru janane, jiaonriha nii leeocho erenaa cuhane ereeichene. Nii leeocho erenaa cuhane erenaa jeriquichene, le cachaauru ereeine jelai netiin Cana Coaunera aina. <sup>29</sup> Jerichanejeein techu, Cana Coaunera aitoonjoan erenaa que erenaajeriquichene, nainequiche coroatajaain, nichatajaain, naaonjoaain netiin ereeichene caohachae. Nii jana leeochoauru, nii inara aitoonjoan que coaacuruhine. <sup>30</sup> Jana, Cana Coaunera rai ereeichene jana, nii ecu lauheguiin aonajera rai irihane coina aitoha Cana Coaunerane, jauriaanejeein irihane jianiha nii ichoaichaniha erenaane cohamiin. <sup>31</sup> Nii banate satiin le cachaauru irihane jaan que turuhane naineein, Cana Coaunera aitoonjoan bihane, satiin nerelaain suujua aninoain jeriha cuurureein acaauru netonai. <sup>32</sup> Cana Coaunera aitoonjoan que ereite, nainere nii rai aitoha Cana Coaunerane rijijieein sacuhane. <sup>33</sup> Cana Coaunerate, jianacoon raotojoein nihacachene Coauneranein ne; coatiha joareein coaunera nihei, Cana Coaunera.

Satiin Cana Coaunera cachaneein nenacaauru ichanaa rijijieein sacunaa jaun, <sup>34</sup> enecurute nainere netaojiaaauruha Cana Coaunera cachaaunee jana, inauheneeicha erelanaala neeunruhane. Coatiha laen jereraai ereeuruha enecurune. Aitoha Cana Coaunera rai rauhine rijijieein rai lanaacha ere tonoraain jerecuruha acaauru lanaaurune rijijieein neeuruhine enecuru. <sup>35</sup> Aihana jaun, cha bajanaa jerecuruha enecurune, rai lana caje bajaauruhine rai loreri asaae neein. Caohachai leinjiin ene iriha netaojiaanaa que netiinne.

<sup>36</sup> Coatiha inara janaacha nunuhetein benojoineein nihein Cana Coaunera ere. Niheichu, coatiha inaraacha nii Cana Coauneraacha beratei sirichaneein niheeiche. Nii que, itolere bana nainaan ichaaoche. <sup>37</sup> Chunocoha, Cana Coaunera aitoonjoan bera *profetanein* nena coacuhin, Cana Coaunera Suujue aitoonjoa rijijieein nihanete, caa inara rai quicha laenai, Cana Coaunera letononeein ichacaaunne coitucureein. <sup>38</sup> Jana coitucueniha nete, Cana Coaunera coitucuhenihana jaun coitucunereein. Niheichu Cana Coaunera niha natiin acaentonain coitucuriaain. <sup>39</sup> Canejeraauru, nitohanihana jaun, jataain corajeein Cana Coaunera aitoonjoan beeuche. Jiaonrihachu leeocho erenaa coitucueraelanaala nena cuhane ereeuruhane caohateeichene. <sup>40</sup> Nete cha ichaquichene rauhijiriin joenreein ichaelanaala leinjiana leinjianaain ichaquichene caohachae.

## 15

### *Oo caje ichanaa Curisitone.*

<sup>1</sup> Canejeraauru, enane laen inara relaanulune jaan, cana ichoteraneein nena erenaa coaauquichene jereun. Nii inara rai canuhacha bei erenaate esenetaaichene jaun, nii aitohane rijijieein baaso ichana coacuelanaala neeiche. <sup>2</sup> Chaaen techu, nii inara rai beratenojoin erenaa coreniha raotojoein jianacoon ichoteratenojoineein neeiche. Aiha nii naitoonjoan rijijieein, baaso ichana coacuelanaala neeichene. Jana aineeichene, inacojoeinte inara relaanune bana esenetareeichelu.

<sup>3</sup> Jaurihanejeeine, inara que nerelaanulune coitucuerateenlu. Chaen nechu, cana osa coreniha ohalu Curisitone que inara relaaunlu; <sup>4</sup> Ajeri jachu cuhane conautecuruhane janate, “Nichata janone cuhane ichanae,” naain laenanohiniha Cana Coaunera Quiricha inoensi cuhanene rijijieein. <sup>5</sup> Chaen techu, Fedoro rai ococoe. Nii baihate, lechooncai coroatajai afosotooru rai ococoe. <sup>6</sup> Nii baihate laen ococoe saogui fashai amurijirii cana nejeraauru rai. Tabaaaurute jaiti enanetjoeein ichaaore, inae ohacoaauruha leeochoaurune saijieein. <sup>7</sup> Nii baihate ococoe Saantiaao rai. Nii caje cuaante leeochoauru afosotooru rai ococoe. <sup>8</sup> Satononihate inae dedeeu cuhane baiha carajaaajoaain catiaain canu rai netonai ococoe, jauriaanejeein niicha ranojoeinein nihanune que airijiin, esinae aca cana Curuaanaa nihane coitucuhanune coina. <sup>9</sup> Nitohanihana jaunna jataen leeochoauru afosotooru fauhecaain nelateen. Cana Curuaanaa cachaauru rohecaain sorejetocaaunne jaun chanihaaun canu afosotoneein canu curuaateeruhane coina. <sup>10</sup> Nena atiin jataain canu belaiha Cana Coaunerane coreniha canuneein neen. Nete nii canu belaiha Cana Coaunerane inacojoeein aine. Nii jaunna mainajeriin amihaneen, jataain leeochoauru amurijiriin caraa-jenihane aihanune que airijiin; jataain cana belaihana jaun, cacorataaniha Cana Coaunerane aina. <sup>11</sup> Coatiha canu ichacaaneecha que caohacharihei, niheichu leeochoauru ichaane niha natiin caohacharihei. Nete laen caa caitoonjoan Cana Coaunera aitoonjoan ne. Acate nii esenetaaichelu inara.

*Oo cajete ichanacure onacaauru.*

<sup>12</sup> Canacaanune oo caje ichanaa Curisitone que inara relaacaanu. Chanuna jana chaen inara tabaauru oo caje ichanana nainiha cachane esenetaelanaala ereeure. <sup>13</sup> Oo caje ichanana naineniha cachane jana nihane, coatiha oo caje ichanarihei Curisito. <sup>14</sup> Niheichu coatiha nelaterihei naitoonjoan inara relaacaanune jaan, oo caje ichanaeniha Curisitone. Niheichu chaque nelaterihei nii inaraacha esenetai. <sup>15</sup> Nitohanihane chujiangra nechu casajeneein Cana Coaunera que ererichaanuna, Curisito ichatihane que irihacaanune jana, esinae rauhijiriin oo caje ichanaeniha onacaurune jana aito-coaanune. <sup>16</sup> Esinae rauhijiriin oo caje ichanaeniha onacaurune coatiha oo caje ichanarihei Curisito netonai. <sup>17</sup> Jana oo caje ichanaeniha Curisitone, coatiha nii chaque nelaterihei nii inaaraacha esenetai. Jerichanejeeinte inara osaacha aina ichaoriquiche. <sup>18</sup> Nii oo caje ichanaeniha Curisitone chujiangra, nitajeeurure nii esenetaain onacauruna. <sup>19</sup> Curisitoaacha cohajihacache caa ichaonaa que netinne jana, oo caje ichanaenihane chujiangra, Cana Coaunera coitucuhichuru amurijiriin cairichaaajoaain nerichaache.

<sup>20</sup> Nete esinae rauhijiriin oo caje ichanae Curisito. Acate jaurihanejeein ichoaichaniha oo caje ichanaelu. <sup>21</sup> Charijieein teinti caa cana rai chau-ratane que leinjiin cacha coreniha turuhelu onaa. Nii rijijieein techu leinjiin cacha coreniha turuhelu, onaa caje ichanaa cachane jaanu. <sup>22</sup> Nii rijijieein techu Adaan coreniha saain ohe cacha, nii rijijieein techu Curisito coreniha satiin rai nereein ichaonaa. <sup>23</sup> Nete laen le cachanichaachene dadaane rijijieein nerichaacheein. Curisitote nunuhe neein nereein. Nii baihate rijijieein neeurureein rai cachaauru, inae nacoauneein turuhane bana. <sup>24</sup> Nii baihate laen nii curuanaaneein nenacaauru, cocoinanacainein nenacaauru, nii nelaetiin niha nocoenacaauru, naaonjoainuri amuritiin itajeein, rai cojoanonaa tiha Cana Curuanaa Cana Coaunera raine janate, inae Cana Coaunera Cojoanonaa que turoreein. <sup>25</sup> Curisitote nii rucuhacane rai ne, satiin que nejeratenacaauru, rai tijia asae neseonriaauruhane reein-tiaain. <sup>26</sup> Satononiha niicha itajeenite nii cana que nejeratenaaneein nena

onaa ne. <sup>27</sup> Cana Coaunerate satiin itolere Curuaanaa nihane coina nito-haneein telu niqii. Nete laen itolere Curuaanaa nihane coina aitoha Cana Coaunera natiin, Cana Coaunera Curuaanaanena nainene, Cana Coaunera itolere Curuaanaanein cocoainaan tihane jaun. <sup>28</sup> Inae satiin Curuaanaa niha Curisitone coina ichaa Cana Coaunerane baihate, inae satiin itolere bijiu nihane jana, nii rai Calaohi Curisito, Cana Coaunera rai jitaain nii itolere tiha cureein. Nii banate Cana Coaunera itolere Curuaanaanein nereein.

<sup>29</sup> Aihana jaun nii onacaauru coreniha camujuaain baotisanjoinunru niriimiin. Oo caje ichanana naineniha onacaaurune, nainihe i acauru coreniha camujuaain baotisanjoinichaane.

<sup>30</sup> Chanuna jana chaen, neniha ichanaa oo caje onaane jaanne saiieein, necairichaaecaache itolere bana. <sup>31</sup> Canejeraauru, esinaae rauhijiriine inetono janonaa bana ohanune rai neeun. Nii rijijieeinechu raotojoein neeun, Cana Curuaanaa Jesocurisito esenetaeranein neeichene coreniha.

<sup>32</sup> Chaen nech u Efesoo nii necha aansai taibinae neein nenacaauru amuritoonlu mainajeein necairichanaa coaraain. Chaque jana canu rai jelaiha caaujue nii necairichaanune. Chanuna jana neniha onaa caje ichanaa cachane jaanne, inacojoein necairichareeun. Aihana jaun chujianra, “Lenoneein, acau cohin ichaoacache, eresi onaa ajiniha,” naauruha tabaaurune rijijieein ichaorichaachena. <sup>33</sup> Jiaonriha inara coritaauruhane esenetaaichene. Chunocohate inara rai, “Chanuna baaso ichaquiche. Nechu joaenreein casajete nii ichaquiche. Nii jianein caa aihacaanune rijijieein ichaaoche,” naain inara suujua auhacaaurureein. <sup>34</sup> Aihana jaun nacoauneein caohachaaain inara suujua coaraain neeuche, naosate-naa coacuhelanaala. Inara tabaaurute jaiti Cana Coaunera coitucuurene. Necoeeichene jaan nuquene caa inara rai aitoon.

### *Chatohaneeinna oo caje ichanacurure onacaauru*

<sup>35</sup> Tabaaurute jerihane, “Chatohaneeinna oo caje ichanacurure onacaauru. Nitohanihane chatohanai quena jana jaberocore,” naaure.

<sup>36</sup> Jataain aasohachate nainere niritiin coaacane. Chaaelai ucuhe temuhacanete ohe, nii rai nucuhe ichaohin omarona nainihane coina.

<sup>37</sup> Aihana jaun coatih canaacha temuhi nii ajaena neein omarohi. Nechu jataain aansijiin nena cajete omarohe, tirico caje, leecha ucuhe caje, naaonjoaain. <sup>38</sup> Jana Cana Coaunerate Aca jerihane rijijieein tein le laurichuru rai acauru jaberoco te. <sup>39</sup> Coatih saain jaberocohin neinichaachene, ita rijijieein jaberocohaacache. Cana cachanichaachenete jelai tein ne cana jaberoco. Jana lenonecurute jelai tein rai jaberoco que jaberocoore. Tajaacurute jelai tein jaberoco que jaberocoore. Ateuru netonainte jelai tein jaberoco que jaberocohin neeure. <sup>40</sup> Nii rijijieein techu ne dedeeu itolere jaberocoori. Jerichanejeein techu jaberocohacoain ne itolere caa cana rai chauratane que. Nete laen nii dedeeu nena nihane jaberoco necaohacha que necaohachaaain neeure. Jana caa chauratane que nenacaaurute, chauratane que neeuru jaberoco caohacha que necaohachaaain neeure. <sup>41</sup> Enoto cono niha natiinte nejelauneein conohe, atene, arasijie, naaonjoaaihunri cono aina ita rijijielanaala. Jerichanejeein techu arasijieeuru niha natiin nejelaunihacoain conohe, ita rijijieein conohelanaala.

<sup>42</sup> Nii rijiiicha oo caje ichanaa onacaaurune jaan. Rai jaberoco conautenohinte setuhe, jana rai suujue ichanana coatih chabana setuhi. <sup>43</sup> Jaberoco canaacha conautei nii cha que nelatihei. Jana rai suujue ichananate laen,

nelateein necaohacha que necaohachain ne. Nii jaberoco conautenohin, nii cha que nelatihei. Jana, rai suujue ichananate laen nelateein ne. <sup>44</sup> Nii jaberoco conatenohinte jaberocohin bucuhin ne. Jana nii rai suujue ichananate suujue nejesinaneein ne. Nete aiha jaberocohin cachane rijijeein ne, rai suujue netonai.

<sup>45</sup> Cana Coaunera Quiricha inoaensi cuhanete, “Jaurihanejeein cacha nunuheneein nena Adaante cachaneein ichaoin nelu. Jana nii baiha cacha satononeein nena Adaante, suujue nejesinaneein ichaonaa teraneein ne,” naain ne laenanohineein. <sup>46</sup> Nitohanihane jaun coatiha suujue nejesinaneein nena ichoaichaniha niheilu. Jaberocohin nenaate, ichoaichaniha nelu. Nii baihate laen ne nii suujue nejesinaneein nena. <sup>47</sup> Nii jauriaanejeein cacha nenaate atane caje coaunanojoneein nelu. Jana, nii baiha nena cachate laen dede caje nenaane. <sup>48</sup> Caa chauratane que nenacaauru jaberocote, nii atane caje nenaalu cacha jaberoco rijijie. Jana nii dedeeu nenacaauru jaberocoorute, nii dede caje nena jaberoco rijijie.

<sup>49</sup> Nii cacha atane caje coaunanohineein nena tocohaneein nihacachene rijijeein techu, nii dede caje nena cacha tocohaneein nerichaacheein.

<sup>50</sup> Canejeraauru, inara raine benaa jereun, jaberocohin bucuhin nena cacha, Cana Coaunera Cojoanonaa que nena nainihe. Aihana jaun nii setunaa inaera, niha nii setuhelanaala nenaane jaun nena nainihe.

<sup>51</sup> Nena laen coitucueraelanaala nena coitucuhichene jereun. Coatihaa saain orihacacheein. Nete laen, corenejoin niha cureein cana jaberoco.

<sup>52</sup> Inae tonihane satonotiha jaihane janate, cana nota mitaain cana nota toretana rijijeein, inae turoreein Cana Coaunera Cojoanonaa. Inae Cana Coaunera Cojoanonaa que turuhane janate, ichanaa cuurureein onacaauru, inae chabana ooruhane coina que airijiin. Nii jana canate laen, corenejoin niha curichaacheein. <sup>53</sup> Nii cana jaberoco setu rai nenaate, necoriha cureein setunaa inaa que. Jerichanejeein techu nii cana jaberoco onaa inaera nihane caje, onaa inaelanaala nena que corerareein. <sup>54</sup> Inae nii cana jaberoco setunaa inaera, setunaa inaa que coreraain, nii cana jaberoco onaa inaera netonai onaa inaa que necorihane janate, inae Cana Coaunera quiricha cuhane, “Onaate corenejoinne, chabana onaa inaa que. <sup>55</sup> Chu neeinte onaa. Itolere amuritiin nena jerei. Onaa, chu ne cachaauru cairichaeriine jaan,” naain laenanoineein nihane que turoreein. <sup>56</sup> Nii cacha cairichaa onaane jaante osa ne. Jana nii inoaenlu rauhi, acaauru aitoonjoante nii osa lararajaera ne. <sup>57</sup> Nariha Cana Coaunera. Cana Coaunerate, nii onaanaja itajerate Cana Curuaanaa Jesocurisito aina cuaain.

<sup>58</sup> Canejeraauru, aihana jaun nii baaso coacuelanaala, raotojoein itolere bana neeuche. Itolere bana, jelai amuritoheriin Cana Curuaanaacha jerei ichajeein neeuche. Inarate, Cana Curuaanaa aina jiniiquii canaacha ichai inacojoein nenihane coitucuhiche.

## 16

### *Coriqui taojiaauche cana nejeraauru rai.*

<sup>1</sup> Canaacha esenetai esenetaeraneein nenacaauru- cana nejeraauru rai coriqui taojiaaichene, Galasia bataneun nenacaauru, Cana Coaunera coitucuureraauru relaanolune rijijeein ichacuche. <sup>2</sup> Tomiho bana nainein, inara amihaneeo coreniha inaraacha eruujuei neleru rucuhecuche jelai teein, nabana turuhanune janaacha taojiana coauquichene coataa. <sup>3</sup> Aihune inae turuhanune bana, inaraacha letoenenuuru cachaauru letoae, acaauru rai quiricha laenaain teein, nii coriqui inaraacha taojiai aina

amaain teeruha cana nejeraauru raine coina. <sup>4</sup> Canuhetonai cunaa jerichaaunnena, acaauru aina jiniiquiin curichaanuhin.

*Coriintoote cunaa jere Faboro.*

<sup>5</sup> Inae inara rene turuha uhanunena, Masedonia batane jelson cuhin, caje coauneein laen Coriinto turoreeunni. <sup>6</sup> Jerihanena, carajaaajoaain inara aina nereeeunni. Nainichaaunena inara aina nereeeunni, situha elohenane reeintiaain. Nii banate, canu coroatajanena naineriquicheein, jelai caje chunijiun cunaa jerichaaunne. <sup>7</sup> Coatiha canu situneeicha inara coana jerihaaun. Nii jaunna inara aina carajaeriin nena jereeun, jeriha Cana Curuaanaa ne. <sup>8</sup> Nena laen Efesoo nereeeunni, Feentecosetesi janonaa bana que tiaaajoaain. <sup>9</sup> Aiha jataain ecu Cana Curuaanaa rai amihanihanune, caohachaaain mituha canu amihaneonne rai nihane jaun. Arajiin caque nejeratanaanein neeuruhane saijieeinna aicheeunni.

<sup>10</sup> Inae inara rene turuha Timoteeone caohachaaain rauchete raotojoein inara aina neeine. Acaentonainte jerichanejeein canu rijijieein Cana Curuaanaa amihaneon ichana coitucue. <sup>11</sup> Aihana jaun jiaonriha chuni nere tonoraenihane. Raujiaaincha namu que coroatajanecuchete nii chaque situhelanaala raotojoein canu coaraa uhine. Cauna leeochoaauru canejeraauru aina cohajihacaanu.

<sup>12</sup> Canejera Aforo netonai raine maajeeinne niqiu aitoon, leeochoaauru cana nejeraauru aina uhin inara coaraa uhane coina. Nete unaa jerene. Caa baiha nainihane banate ureein.

*Satononihate necoe Faboro.*

<sup>13</sup> Caohachaaain nainaan necohalajiin, itolere que laraajiin baaso ichana coacuelanaala neeuche. <sup>14</sup> Chelai ichaquiche leeochoaauru raine, jataain belaaain corajeein ichacuche.

<sup>15</sup> Canejeraauru, inarate rai naraaichuru aina curuaequiin jauriaanejeein Cana Coanera esenetaalu Esetefana, Acaiha batane quene coitucuhiche raotojoein. Chaen techu acaauru nii cana nejeraauru coroatajaneraneein neeure, canaacha esenetai coitucuuruhane coina. <sup>16</sup> Nitohanihana jaunna nii Cana Coanera coitucuurerana, satiin acaauru coroatajaneraaurune maajeein, que inara suujua acatequichene jereeun.

<sup>17</sup> Jataainne rachoojoeun inara aina nenihanune jana, canu rene turuuruha Esetefana aina Forotonato, Acaico, naaonjoainurine jaun. <sup>18</sup> Acaauru ainate raotojoein nedae casuujua, jerichanejeein inara rijijieein aihuruhane jaun. Acaauru rijijieein caohachaaain nenacaauru cachaauru coitucuhin neeuche. <sup>19</sup> Asia batane que nenacaauru Cana Curuaanaa Jesocurisito ranjoinunrute inara coaacure. Aquila, Firisila, chaen rai loreri asae netaojianacaauru naajoainunrite inara coaacure, Cana Curuanaa Curisito coreniha. <sup>20</sup> Satiin cana nejeraaurute inara coaacure. Raotojoein ita rene turuhichene ita raain neeuche. <sup>21</sup> Canune Faboroneein inara rai canu raajenihane cacoi que caa laenaan inara coacuhin. <sup>22</sup> Chunocoha Cana Curuaanaa belainihane, baaso jana nijiaoine. Inae cataainjian Cana Curuaanaa. <sup>23</sup> Cana Curuaanaa Jesocurisito, inara rai caohachaaain neeinchene jaanu teeine. <sup>24</sup> Satiin inarane jataain belaihun cana Curuaanaa Jesocurisito coreniha.

## Coriintoo nenacaauru rai Faborohacha letoai coroataja

*Coriinto cocoaichacuru rai “Raotojoein neeuche,” naa Faboro.*

<sup>1</sup> Cana Faboroneeun. Cana Coanera jerihane jaunne, rai Calaohi Jesocurisito letono afosotoneeun. Cana nejera Timoteo aina jiniiquiina, Acaiha batane que nena Coriintoo Jesocurisito ranojoneein iclesianein neiniquichene rai, chaen nii Acaiha batane sacutaain Cana Coanera cachanein satiin neiniquichene raine maajeeine caa quiricha laenacaanu.

<sup>2</sup> Cana Curuaanaa Jesocurisito, Cana Inaca Cana Coanera, naaonjoai-hunri raotojoein jianacoon rachoojoein neeichene jaanu teuruhine inara rai.

*Necairichaane biha Faboro.*

<sup>3</sup> Cana Curuaanaa Jesocurisito Inacanein nena Cana Coanera coroaecaachenete ne. Acate satiin Cana Inacanein nihane jaun, cairichaaajoaain cana coaraain cana necairichanaja caje cana suujua nunaeranein ne. <sup>4</sup> Acate satiin itolere necairichaacachene jaanru caje, cairichaaajoaain cana coaraain, cana suujua nunaeranein ne. Nitohaneeinte cana netonai nii cairichaaajoaain cana coaraain cana suujua nunaane rijjijeein, necairichaauruha leochaaurune coaraain, cairichaaajoaain acaauru coaraain acaauru suujua nunaain nena coina ichae Cana Coanera. <sup>5</sup> Nii mainajeein necairichaalu Jesocurisitone te, canacaanu que nerotohane jaunne nii aihalune rijjijeein necairichanaa abaantaacaanu. Nii rijjijeein techu nii Jesocurisito aina cuaain cairichaaajoaain leochaauru coaraain nihacaanu. <sup>6</sup> Nitohaneeine necairichaacaanu, inara netonai ichoteratenojoneein inara suujua nunaeraanu siriin nena nainiquichene coina. Nii rijjijeein techu, Cana Coanera canacaanu suujua nunaane, inara netonai suujua nunanohinein neriquichein, aina cuaain itolere necairichanaa abaantaain neeichene coina. <sup>7</sup> Nitohaneein neriquicheeine esenetaacaanu. Charijieein teeinti necairichaacaanune rijjijeein inara netonai necairichanaa abaantaain neeiche. Nii rijjijeein techu cairichaaajoaain cana coaraain cana suujua nunaain cana rai Cana Coaneraacha tei sirichaneein neeiche.

<sup>8</sup> Canejeraauru, Asia batane que necairichaacaanulune coaucuche. Ecune jataain mijiaaanein cairichanojoneein cojunoinichaanulu. Nii jaunne inae abaantasinihacaanune jaun, “Inae jecha orichaanuhi,” naacaanu, <sup>9</sup> ohacaanune coina ichara tochaneein cairichanojoinichaanune jaun. Nete Cana Coanera onaa ichateein ichoteranihane que jaequiiin nihacaanune coina necairichaacaanulu, Cana Coanera colane nena rijjijeein canacaanu jaberocohacha nejesina que itolere bana jaecohacaanune coataa. <sup>10</sup> Nii Cana Coanerate, necairichaaain ohacaanune rai nihacaanune caje canacaanu ichoteratelu. Nii rijjijeein techu satiin cana ichoteratereein, ohin nitajenaa rai nena caje. Acatechu ohacachene bana nitaje rai niha cana suujuene caje, cana suujue ichoterateraneein nereein. <sup>11</sup> Nitohaneeinte cana ichoteratejееin sacureein, canacaanu aina bajaebajaequichene. Araji cachaauru canacaanu coreniha Cana Coanera bajaanete, arajiin netonai Cana Coanera coroaecurureein, canacaanu rai caohacha ichaane coreniha.

*Coriintoo cuenihane biha Faborone*

<sup>12</sup> Jataaine raotojoihacaanu inara coritana coacuelanaala, niheichu cha-tohaneen caa chauratane que baaso ichaelanaala, niheichu inara aina nihacaanulune bana inara rai baaso ichaenhacaanulune jaun. Coatiha canacaanu raajenihane cha coitucuera nihacaanune jaun aihahacaanu. Cana Coaunerate jataain canacaanu belaitohane jaun, nitohaneei ichaoha-caanune jerihana jaunna aihacaanu. <sup>13</sup> Caa inara rai canacaanuhacha lae-nanajaqui quirichaauru cuhane, coatiha leechaneen inaraacha coitucuna nainiheilaenahacaanu. Bajiaanachuinti jitaain aonaain caohatiin coitucueeneiche. <sup>14</sup> Nii reretaain aonaain coitucuhichene rijijieeinte, canacaanu coreniha raotojoeen neriquicheen, inae nacoauneein turuha Cana Curuaanaa Jesocurisitone bana. Nii rijijieeinechu canacaanu netonai raotojorichaanuhi inara coreniha inae turuhane bana.

<sup>15</sup> Niritiin esenetaainna niqui, jauriaanejeein inara coaraa unaa jereunlu, atiin coroatasain inara rene bedaenichaaunne coina. <sup>16</sup> Jauriaanejeeine niqui, Masedoniau cuujihataain inara rene bedaenena jereun, coaiten caje caaujihataain nacoauneein bedainichaaunne baiha jelai caje coauneein Jodea cuhanune que, nainequichene canu coroatajanequichene coina. <sup>17</sup> Niheichu canuhacha ichaneni coaucaunne, coatiha inara coritaa inae leesajeein “Airichaaunni,” naanune, canu suujua cuhane “Airihaaunni,” naain coacuhin irihaaun. <sup>18</sup> Cana Coaunerate, inara rai cha que erenaa jerichaanune “Airichaanuhi,” naacaanune canacaanu suujua cuhane “Airihacaanuhi,” naenhacaanune coaraje. <sup>19</sup> Nii rijijieein techu, canu, Timoteo, Siribano, naaonjoainichaanune, inara rai canacaanuhacha beebejei Cana Coaunera Calaohi Jesocurisito esinae rauhijiriin acaneein ne. Nii Jesocurisitote esinae rauhijiriin ichaane coina, “Icharichaaunni,” naa Cana Coaunera, suujua cuhane “Icharihaaunni,” naelanaalane jaane. <sup>20</sup> Nii aina cuaainte, satiin niicha ichaneni niicha coacuilu ichae Cana Coaunera. Nii jaunte, Cana Coaunera corojeein bajaacachene, “Nitohaneen ichamiin Cana Coaunera, Jesocurisito aina cuaain” naacache. <sup>21</sup> Chaen techu Aca cana janijiin cana taojiaain Jesocurisito aina cana tein, “Caaurute canu cachaauru ne” naelu Cana Coaunera. <sup>22</sup> Nitohaneen cana janijiin cana raainte, rai cacha cojunacatihane jaanque cana cojunacateen, cana rai rai Suujue telu Cana Coaunera, esinae rauhijiriin cana rai niicha teenu ichoaicha teranu que.

<sup>23</sup> Nena jaiti nii coaaucaanlune rijijieein Coriinto inara rene turuha uhenihanune, inara rai caohacha ichaa aihun. Cana Coaunerate inara rai caohacha ichaa aihanune coitucue. <sup>24</sup> Coatihachu inae caohatiin coitucuhin esenetaaichene jaun inara rai, “Naaonjoain ichaquichenete caohachae” naain erenaa nainihacaanu. Raujiaainchana inara coroatajanena jerichaanu, raotojoeen rachoojoeen esenetaaichene rijijieein neeichene coina.

## 2

<sup>1</sup> Nitohaniane jaunne nabana inara inaderaacaaunne coataa, nacoauneein inara coaraa unaa jerichaaunne baiha aineeun. <sup>2</sup> Inara inaderaacaaunne, neneriha raotojoeen canu rachoojiaeraanune jaun. <sup>3</sup> Nii jaunne inara rene turuelanaala, raujiaaincha inara rai quiricha cuhane aitiin laenaanlu, canu inaderaaquichene coina inara rene turunaa jerenihanune jaun, inae turuhanune bana inaderanaa coacuelanaala, nenacaeneenjia jiniiquiin rachoojihacachene coina. <sup>4</sup> Nena laen nii quiricha laenacaanlune bana, jataain inara coacuhin que nererojoecaain chanaanlu. Coatiha nii que coacuhin inaderaaichene coina nii been



laenahaaunlu, jataain inara belaichaaunne coitucuhichene coinane niritiin beein inara rai laenaaunlu.

*“Nii canu que nejeratena que inara suujua acatecuche” naa Faborone.*

<sup>5</sup> Nitohaneein inara rai baaso ichara cacha, canu raaicha inaderanaa tiha aiheilu, inara rai netonaite inaderanaa tiha ailu. Amuritiin rerohin aitona jerenihanune jaunne caa caritoojeein aitoon. <sup>6-7</sup> Inae nii cacha aina nejerateein mainajeriin casetecaaichene jianeein, que inara suujua acateein, belaaain coroatajanecuche, nabana joenreein suujua cuuaain inaderaane niicha ichanenu coitucuenihane coataa. <sup>8</sup> Nii jaunne inara rai aitoon, jauriaanejeein belaiquichelune rijijieein belaaichene coina. <sup>9</sup> Esinae rauhijiriin, canu ere tonoraain rijijieein ichaquichene coara-caaunne coinane, nechu inara cojuha inara rai quiricha cuhane aitiin laenaaunlu. <sup>10</sup> Nitohaniane jaunne, inara suujua acatequichene jaanque canuhetonai casuujua acatereeeunni. Aiha niha chatohanai que casuujua actichaaunne jaanunena, Jesocurisito notaracaae que casuujua acatereeeunni inara coreniha. <sup>11</sup> Nitohaneein ichaohacachene, coatiha canaque niicha jerei ichana nainerinaain moconajaera, inae raotojooein rai nerurujua coitucuhacachene jaun.

*Toroasihu turuhin raotojoaeniha rai suujuane biha Faborone.*

<sup>12</sup> Jesocurisito beratenojoi beebejihanu cachaauru raine coina, Toroasihu turuhanune janate, Cana Curuaanaa jerenohi ichacaaunne coina jatoroaain neeunlu. <sup>13</sup> Nena ecu cana nejera Tito eruhenihanune jaun, raotenelu casuujua. Nii jaunna ecu nenacaauru rai necooein jelai caje amuhin Masedoniau cuunlu.

*Jesocurisito ainate namuritoroatena coacuelanaala nihacache.*

<sup>14</sup> Nariha Cana Coaunera itolere bana namuritoroatena coacuelanaala, cana aina cuuain Jesocurisitohacha ichai naitoonjoa beratihane jaun, itolere sacutaain bihacachene coreniha. Nii canaque naitoonjoa niicha berateite, aiha jujuhine rijijieein itolere lomoritiin riaaneein aonanojohi ne. <sup>15</sup> Canacaanuna Cana Coaunera rai Jesocurisitohacha mocoi jujui rijijieein, inae nichotenaaneein nenacaauru rene, nitaje rai nenacaauru rene, naaonjoainuri rene letono neein nihacaanu. <sup>16</sup> Nitajerai nenacaauru raite, leinjiin jujui cacha atinaeraanunein toni nii canacaanuhacha beebejei. Nete laen nichote rai nenacaauru rai, leinjiin jujui ichaonaateraneein toni nii canacaanuhacha beebejei. Nihei chuni cacha nitohanei ichana naineraneein nei. <sup>17</sup> Chabana aihuruha leeochoaurune tocohaneein, Cana Coauneraacha beratenojoi beebejihacaanune coreniha, canacaanu coretera jerenihacaanu. Nenacaaennejian nitohaneein nena coacuelanaala, esinae rauhijiriin nohanelanaala Cana Coaunera notaracaae, coujurihu rai letononeein netiin inara relaacaanu, rai calaohi Jesocurisito cachaneein nihacaanune jaun.

### 3

*Ena nena Rauhi Cana Coauneraacha tei*

<sup>1</sup> Niritiin inara rai irihacaanunete, jernihane nechu caohachaain canacaanu raauruha itolere cachaaunne coina necoasitaa aitoa, canacaanu beeiche. Niritiin coaauquichene coataa, coatiha aihuruha nii leeochoaurune rijijieein, cajihaneein amuhemujueein: “Canacaanune naaonjoaineeinne nihacaanu,” naain cachaauru rai ereein nihaacaanu. Niheichu inara rai nihanatiin chabana, “ ‘Naonjoaineeinte neeure,’ naain canacaanu beein cachaauru rai quiricha laenacuchete aina canacaanu

raauruhine,” naain chabana inara rai irihacaanu. <sup>2</sup> Inaraachane latichaanu, inara aina cuaain inanacaa canacaanu suujuau tenojoin que inara relacaanune coarateeiche cachaauru quene coina. Nii ainate canacaanu ichanaa coaraain canacaanu coitucuurureein cachaauru. <sup>3</sup> Nitohaneente, quiricha laenanohineein nenea rijijieein, Jesocurisito ichanohineein, cachaauru rai canacaanu aina cuaain teratenojoneein neeichene coaracure cachaauru. Coatiha nii aiha quiricha laenanohine rijijieein niheeiche. Inarate Cana Coaunera Suujue ichanohineein nitohaneein neeiche. Niheichu atane jeeu que teein laenanohi rijijieein quiricha neein niheeiche. Inarate cachaauru suujuau canacaanu aina cuaain Cana Coaunera teratenojoneein nenea que suujuequiin neeiche.

<sup>4</sup> Nii jaaunne, Jesocurisito aina cuaain, nii aitocooaanune rijijieein ichaa Cana Coaunerane esenetaacaanu. <sup>5</sup> Coatiha canacaanu raajenihane nitohaneichi ichana nainerihacaanu. Cana Coaunerate, nitohaneichi ichana inaeraneein canacaanu teein ne. <sup>6</sup> Nii jaunte Aca canacaanu relae, nii enachasine rauhi naitoonjoan beraneein nihacaanune coina. Nii rauhi coatiha laenanohineein nenea nihei. Acate jeriha Cana Coaunera suujuene rijijieein nenea ne. Nii laenanohineein nenea rauhite, tonoraeniha cachane ohin nitajihane coina aitelu. Nete laen nii ena nenea rauhi jeriha Cana Coaunera Suujuene rijijieein chabana nitajeniha cachane coina ichaonaa tera ne.

<sup>7</sup> Nii rauhi atane jeu que teein laenanohineein nenaate, uhaa Moisesane jana, rai nomeri coaana nainecurenelu Isaraelitacuru, jataain jiquihacoha nii niicha uhai caun rai nomerine jaun. Nii rai cono jiquihaquite, jacaain satonohelu. Nete, nii rauhi cana atinarateraneein nihane saijieein, jataain necaohachaaain cojoelanaacojoaain ococohin nelu. <sup>8</sup> Nii jaun techu jataain nii amuritoheriin necaohachaaain cojoelanaacojoae nii ena turunaa Cana Coaunera rai rauhi- cana suujue cuhane niicha tei rai Suujue. <sup>9</sup> Nitohaneein, itolere canaacha ichai ujuaihoneein nihacachene coina tenojoinihane saijieein, cojoelanaacojoaain nihalu, nii cha ujuaihoneein nenea coina tenojoini jaun, nii amuritoheriin cojoelanaacojoaain nereein ena nenea rauhi Cana Coaunera tenojoi, cha ujuaihonelanaala nenea coina canacaanuhacha beebejei. <sup>10</sup> Nitohanihane jaun, coatiha inae chaque nelateein nihei nii jauriaanejeein nenea rauhi, caa ena nenea rauhi jataain caohachaaain cojoelanaacojoaain amurijiriin nihane jaun. <sup>11</sup> Nitohaneein, nitajerai nihane saijieein, jataain cojoelanaacojoaalu nii jauriaanejeein nenaane jauntechu, nii amurijiriin jataain cojoelanaacojoaain nereein nii chabana satonoelanaala neenihu.

<sup>12</sup> Nitohaneein nii que jaequinne, satiin acatiha queecha ereerejihacaanu cachaauru rai. <sup>13</sup> Coatiha aihalu Moisesane rijijieein, canacaanu meri conajaain aihacaanu canacaanu. Moisesate, nabana jacajeein cuha nii nomeri jiquihaquine coaracuruha Isaraelitacurune coataa, rai nomeri conajaain ererejetelu acaauru rai. <sup>14</sup> Nete nii naitoonjoan aonaain coitucusichurenelu Isaraelitacuru. Enanetojoeinte nii inoaenlu nenea cana aina Cana Coaunera- aacha ichanenu naitoonjoan ereretaauruhane nihanatiin aonasihurene, jaiti acaauru suujua aina, acaauru nota caje itajenojoineniha nii conaarane jaun. Jesocurisitohachate naine, nii conaara itajeein niha cache caje ne. <sup>15</sup> Nitohanihane jaun, enanetojoein nii Moisesa rai rauhi ereretaauruhane nihanatiin, acaauru suujua aninoaane jaun coitucusichurene cachaauru. <sup>16</sup> Nete laen naosatihajeein ichaohane jianein, Jesocurisito esenetaain ichaoha cachane, nii cha coitucuhane coataa, rai suujua conaara itaje rai Jesocurisito. <sup>17</sup> Cana Coaunera Suujueneein niha Cana Curuaanaa

Jesocurisitone jaunte, itolereneein niha nii rai Suujuene jaunru, raotojoein ichaohin, cha ujuaihonelanaala neeurureein cachaauru. <sup>18</sup>Inae cana, Jesocurisito ranojoeinein nihacachene jaunte, inae cana caje nii cana suujua aina cana nota conaara itajihane jaun, aiha esefejo conone rijijieein conohe, cana aina jataain caohacha ichaa Jesocurisitone jaan cono. Nii jaunte Cana ichao corihajeein sacuha itolere bana Jesocurisito rai Suujue aina cuaainne jaun, rijijieein inae ichaohacache.

#### 4

<sup>1</sup> Cairichaaajoaain cana coaraane jaun, canacaanu rai nii amihanenaa tiha Cana Coaunerane jaun, nii canacaanu rai niicha tei amihanenaa bihacaanune coiinteein jianena nainenihacaanu. <sup>2</sup> Nii jaune coejenacai ichana coacuelanaala, niheichu asinojoeinein cha ichaelanaala, itolere que jaolequiin satiin notaracaae niicha icharatei ichacaaun. Coatihachu chaen canacaanu esenetaa cachane jerenacaaun, nohaneein nii Cana Coaunera beratenojoi udaa cuaain cacha relahacaanu. Nitohaneeinne cacha coritana coacuelanaala, esinaen rauhijiriin nii canacaanu coitucuhichene rijijieein, Cana Coaunera notaracaae aitocaaun. <sup>3</sup> Aihane jaun chunocoha, nii osa caje cana ichoteraanu canacaanuhacha beebejei aonaane saijieein coitucuenihanete, inae nitaje rai nihane jaun aicheein. <sup>4</sup> Inae esenetaaurenihane jaunte, maosa rijijieein acaauru te moconajaera, nabana jataain necaohachaa Jesocurisito Cana Coaunera rijijieein nena tenojoin ichaonaane coaraain coitucunaa nainecuruhane coataa. <sup>5</sup> Coatiha canacaanu ichaoque inara relahacaanu. Acaihanijin Cana Curuanaa Jesocurisito ichao quene inara relaacaanu. Jataain canacaanu belaitoha Jesocurisitone jaan aina cuaainne inara rai caohachanu ichaeraneein nihacaanu. <sup>6</sup> Charijieein teeinti nocohena jana conoha conone coina aitoha Cana Coaunerane jaun neconaelu cono. Nii rijijieein techu nii jeelai Cana Coaunera canacaanu suujua cuhane rai cono teein ne, aina cuaain Jesocurisito merique conoha rai conone coitucuhacaanune coina.

#### *Canaacha esenetai aina cuaainte ichaohacache.*

<sup>7</sup> Nete laen nii Cana Coaunera tenojoi jataain nelatei raain, chaque nelatelanaala aiha atane codarojoene rijijieein nena cana jaberoco cuhane sirichaache. Nitohaneainte chaneei nenihacachene saijieein cana aina cuaain rai nelate coarate Cana Coaunera. <sup>8</sup> Nitohanihane jaunne necairichanaa coaracaanune nihanatiin, canacaanuhacha ichanenu chacaanu, chaque casilanaala. Coatiha chabana amuritonojoeinein nihaacaanu. <sup>9</sup> Canacaanu ariiriichuruha canacaanu sohin jaoruhane coina niqui, nete canacaanu nainatejene Cana Coaunera. Canacaanu comaauruha niqui, nete canacaanu itajenaa nainesihurene. <sup>10</sup> Itolereneein cuhacaanune jaunru nihanatiinte, aihalu Jesocurisitone rijijieein cairichanojoeinein ohacaanune rai nihacaanu, ichaohalune rijijieein canacaanu aina cuaain rai nichao coaracuruha cachaaaurune coina. <sup>11</sup> Jataaina necairichaacaanu, Jesocurisito coreniha canacaanu atinaauruhane rai neeuruhane jaun. Nitohaneeinne Jesocurisitohacha tei ichaonaa que ichaohacaanune coaratihacaanu. <sup>12</sup> Nitohaneeinne ohacaanune rai nihacaanu. Nete laen inara, inae raotojoein ichaonaaque ichaohiche, canacaanu que inara rai niicha teratei ichaonaa coreniha.

<sup>13</sup> Niique te, “Esenetaanune jaunne ereeun,” naain aitoha Cana Coaunera Quiricha cuhanene rijijieeinne, canacaanu netonai jerichanejeein esenetaacaanune jaun, que ereereecaanu. <sup>14</sup> Nitohaneeine nihacaanu, ohane caje Jesoso ichatihalune rijijieein, onaa caje canacaanu ichaterichaain

Cana Coaunerane esenetaacaanune jaun. Nitohaneeinte onaa caje cana ichateein cana rareein nacatiha rai calaohi aina jiniiquiin nena coina. <sup>15</sup> Nitohaneeinte, jataain caohacha ichae inara rai Cana Coaunera. Nitohaneein araai laurii que inara coroatajaniha Cana Coaunerane coaracurhanete, araai laurii cachaauru netonai Cana Coaunera necaohacha coroaecurureein. <sup>16</sup> Nii jaunna chabana bihacaanune jianena coacuelanaala, niheichu namuritoroatena coacuelanaala nihacaanu. Cau caa ichaonaa que ichaohinte inae binaanihacache. Nete, cana suujua cuhane, itolere janonaa bana nenamanacainaacache. <sup>17</sup> Cau caa chauratane que ichaohin necairichanaate sorotiin sareein. Nete, nii necairichanaa coreniha, jataain nii amuritoheriin, chabana sanaacharanejeein nena ichaonaa rarichaacheein. <sup>18</sup> Aihana jaun nainihe i tolere cana notaracae nenaacha que coaaucaachene. Nii chabana, coaraelanaala nenaacha que coaaucaachenete caohachae. Nii satiin canaacha coaracurite, satiin nitajerai ne. Nete laen nii chabana canaacha coaraai chabana nitajenereein.

## 5

<sup>1</sup> Cana jaberocote cana amunajau leinjiin loanari sorotiin nelatenenu rijijieein ne. Nete laen chatohaneein itajenojoiniha nii cana jaberecone niha natiin, dedeeu cana jaberoco ena nena rucuheca Cana Coaunerane coitucuhacache. <sup>2</sup> Nii jaunte ichanohineein nena, chabana nitajenaachara jaberoco cuhane inae ichaoha cunaa jere canacaanu suujue. <sup>3</sup> Nii jaberocote laen canacaanu suujue que necurujuareein, machoequiin nenaane rijijieein nihane caje. <sup>4</sup> Jaiti nii loanari rijijieein nena cana jaberoco que jaberocohin ichaohacaanune jaunne, cha lateein, nererojoecaaeriin, naaonjoain ichaohacaanu. Coatih itolere bana, nii canacaanu jaberoco que ichaohacaanune colatiha aihahacaanu. Inae nii canacaanu que banihateein Cana Coaunera ichanohi jaberoco que ichaohacaanunete, nii canacaanu jaberoco jauriaanejeein loanari rijijieein nena, nii ena nena canacaanu jaberoco jana nitajereein. <sup>5</sup> Cana Coaunerate nitohaneein nihacaanune coina canacaanu relaain nii ichoae tacaain canacaanu rai, rai Suujue te, nii cana rai naitoonjoan sirichaneein nerichaanuhine cojunacanu que. <sup>6</sup> Nii jaune satiin nii canacaanu rai naitoonjoa terichaaaine coitucuhin esenetaacaanu. Jaiti canacaanu jaberoconeein ichaohin nihacaanune jaunne, Cana Curuaanaa rohan nenihacaanu. <sup>7-8</sup> Ena niqui coarahaacaanu rohan jaiti nenihacaanune jaun. Nete nitohaneein nerichaanuhine coitucuhacaanu, jataain esenetaacaanune coreniha. Inae niqui caa canacaanu jaberoco ratiriin Cana Curuaanaa rene turunaa jerichaanu. <sup>9</sup> Nii jaunne cana Curuaanaa jerihane rijijieein itolere bana ichaorichaanuhin, ohin, ichaohin, naaonjoaacaanune nihanatiin. <sup>10</sup> Inae itolere baaso ichara, caohacha ichara, naaonjoain ichao coitucuhane coina niha Cana Coaunerane bana nacatiha tururichaacheein, baaso ichaain, caohacha ichaain, naaonjoaachene coitucuhin, lecachanichaachene ichanohi coitucuhin rai niicha tenaa jerei tihane coina.

### *Aina raotojoein nihacachenete jere Cana Coaunera.*

<sup>11</sup> Nii jaunne inae coitucuhacaanune jaun, jeriha Cana Coaunerane rijijieein ichaauruha cachaaurune coina acaauru que jereratiha acaauru rai ereereecaanu. Cana Coaunerate canacaanu coitucuhin, canacaanu suujuane maajein coitucue. Bajiaanachuhinti esinae rauhijiriin rai letononeein Aca jerihane rijijieein ichaohacaanune coitucueeneiche inara

netonai. <sup>12</sup> Coatiha canacaanu raajenhane necohasitaa caa aitohacaanu. Nenacaaenejian raotojoein coitucuhin nainaan, nitohanein suujua cuhane coaralanaala nohanein inara relaa nocoetonacaauru tonorana nanequichene coina caa inara rai aitocaaanu, nenacaaen inara coritaauruhane esenetaaichene coataa. <sup>13</sup> Jeriha Cana Coaunerane rijijiein itolere ichaain nihacaanune jaunte, leinjiin jaelorohe nerurujua cha que nelatihei rijijiein coaracure leeochoaauru cachaauru. Jana inara, esinae rauhijiriin caohatiin coacuhin aihacaanune coaraqichenete, inara caohachanu que aihacaanune coitucuriquicheein. <sup>14</sup> Jataain cana belaitohane jaunte, cana ichao rucuheranein beraichanein ne Curisito, aca satiin ichao coreniha ohalune coitucuhacachene caje coaanein nunuhetein. Nii ohane aina cuaante satiin cana netonai ohacachelu rai ichaonaa que ichaohacachene coina. <sup>15</sup> Nitohaneinte satiin cachanichaachene coreniha ohelu Jesocurisito. Inae satiin cana coreniha ohalune coitucuhin, esenetaain nihacachene jaun jeriha cana suujuane rijijiein ichaonaa coacuelanaala, Aca jerihane rijijiein ichaohacachene coina. <sup>16</sup> Canacaanu netonaine niqui, nii namute cacha que coaucuruha Cana Coaunera coitucuhichurune rijijiein Jesocurisito netonai que coaurejetocaaanulu. Nena laen inae enene nitohanein coacuenihacaanu. <sup>17</sup> Aihane jaun inae Jesocurisito aina jiniiquiin esenetaain ichaoha cachanete, inae nii jauriaanejeein nena rai nichao jianein nii ena nena ichaonaa enachasine que ichoae cacha.

<sup>18</sup> Nitohaneinte Jesocurisito aina cuaain ichae Cana Coaunera, que nejeratena rijijiein nena caje aina jiniiquiin ita belain raotojoein nihacachene coina. Nii jaunte canacaanu letoae inara que coitucueratihacaanune, inara netonai aina jiniiquiin raotojoein neeichene coina. <sup>19</sup> Cana Coaunerate nitohanein Jesocurisito aina cuaain satiin cachanichaachene osa que suujua acatihane, aina raotojoein jiniiquiin nena coina ichaain, nii niicha ichai beranu que canacaanu telu. <sup>20</sup> Nii jaunte acaneei nena rijijiein canacaanu tein inara rai bihacaanune coina berate Cana Coaunera. Niine raajenhane aitoha Cana Coaunerane rijitojoein, caa inara rai bihacaanu. Nitohanein Jesocurisito letononihacaanune jaunne, inara rai aitocaaanu, atiin caa inara rai Cana Coaunera beratenojoi tonoraain esenetaain neeichene, inara osa que suujua acatena nainihane coina. <sup>21</sup> Coatiha aansijieinniji osa que nesaruhin niheilu Jesocurisito niqui. Nete, satiin cana osa coreniha caseteco coaraelu, aina cuaain cana osa que suujua acatein jianacoon cana tihane coina nainatejiha Cana Coaunerane jaun.

## 6

<sup>1</sup> Nitohanein niicha ichai que Cana Coaunera coroatajaneranein nihacaanune jaunne, inara rai aitocaaanu. Nabana jataain inara belaitohane jaun inara rai Cana Coauneraacha beratenojoi que jaoleconaa coacuelanaala que nerausiaequichene coina. <sup>2</sup> Nitohanihane cointe rai Quiricha inoansi cuhane:

“Canu bjaae bjaaequine aonajihanu.

Chaen nechu

nichotenaajerein,

canu ariirijieine jana,

ii ichoterateun,”

naain been laenaeratelu, nii coina Cana Coaunera.

Enate, inae nii aitohalune rijijiein ichoteratenojoin nequichene caohachae, inae rai cojoanonaa nihane jaun. <sup>3</sup> Coatiha chatohanein baaso ichaain chuni notajaain nihaacaanu. Nabana canacaanuhacha ichai baaso rijijiein cha ichaain neeuruhane, inara rai canacaanuhacha

beebejei esenetaelanaala que jaolecohichene coataa. <sup>4</sup> Nitohaneein nenea coacuelanaalane, Cana Coaunera letononeein nihacaanune coaratihacaanu, itolere necairichanaa, latijiojoiiriin, caaintati ichaonaa que ichaohin, <sup>5</sup> taba que canacaanu bisihure, caresero cuhane canacaanu enoaain, taba que canacaanu que nererojoecaaure, jataain mainajeriin amihanenaa, sinerena, mijitena, naaonjoainurine abaantacaanu chabana nererojoeaelanaala. <sup>6</sup> Jerichanejeein nechus esinae rauhijiriin nii chatohaneein baaso ichaelanaala ichaohacaanune coaratihacaanu, esinae rauhijiriin canacaanu aina niha Cana Coaunera Suujuene coaracuruha cachaaurune coina, chunique asilanaala satiin cachaauru belaaain ichaoin. <sup>7</sup> Nitohaneaina nihacaanu, esinae rauhijiriin canacaanuhacha beebejei esenetaain, canacaanu aina cuaain niicha ichanenu ichaa Cana Coaunerane coaracuruha cachaaurune coina. Nitohanihacaanune jaunne, baasoneein canacaanu tenaajerera nihane, chatohaneein baasoneein tenaa coacuhelanaala, rauhijiriin nohanelanaala rai irihacaanu. Nitohaneeine canacaanu rai baaso icharanihane, baaso ichaelanaala ichaonaa esine que ichaohin nihacaanune que cuaain acaauru rai ereein necocaaeratihacaanu.

<sup>8</sup> Nete taba que canacaanu que suujua acateein, taba que canacaanu cotaain, taba que canacaanu que raotojoein ereein, taba que cacha baasoniha canacaanu beein, naajoaain canacaanu que ereeure cachaauru. Nitohaneinte nohanelanaala cachaauru rai irihacaanu natiin, nohanein cachaauru coritaa canacaanu beeure. <sup>9</sup> Chaen techu canacaanu coitucuuruhane saijieein, canacaanu coitucuhi rijjijieein canacaanu coaracure. Canacaanu sohinte niqui canacaanu jaonaa jerecure, nena jaiti ichaaojihacaanu. Canacaanu casetecaauruha niqui, nete canacaanu atinaaurene. <sup>10</sup> Jataain inaderanaanajaanu tochaneeinte niqui canacaanu ichacure, nena atiin raotojoein rachoojoein nihacaanu. Leinjiin cha coitucuhi cairichei rijjichaanu niqui, nene arajii cachaauru rausiaecaanu canacaanuhacha coitucui que, raotojoein neeuruhane coina.

<sup>11</sup> Canejeraauru satiin Coriintoo neiniquichene. Esinae rauhijiriinne canacaanu suujua aina cutaain, inara coreniha canacaanuhacha coacuhi que inara rai caa suujuelanaala aitocaaanu. <sup>12</sup> Coatiha aansijieeinniji inara que asiin irihacaanu. Nete laen inara niha chatohaneine nihanatiin canacaanu que asiiche. <sup>13</sup> Nii jaunne atiin inara rai aitoon, nere tonoraane coina bereecuru rai iriha cachane rijjijieein. Esinae rauhijiriin caa inara rai aitiin nihanune rijjijieein, canu que cha suujuelanaala beein neeichene coina.

#### *Cana Coaunera rai Teenforo rijjijieinte nihacache.*

<sup>14</sup> Jiaonriha chatohanai ichaain neeuruha Cana Coaunera coitucuhichurune, acaauruhacha ichai ichaain neeichene. Baaso ichajeein ichaonacaauruhacha ichai ichana nainihe caohacha nejesina ichajeein ichaonaa cacha. Nii rijjijieein techu jiichoo amuritonaa nainene nocohena. <sup>15</sup> Charijjieein teeinti moconajaera belaina nainene Jesocurisito, nii rijjijieein techu nainene moconajaera cacha aina chatohanai ichaain nenea nainene Cana Coaunera cachaneein nenea. <sup>16</sup> Nitohaneein nenea nainihaacache cana, inae Cana Coaunera rai Teenforo rijjijieein niha cana jaberocone jaun. Nitohaneein nihacachene coinata:

“Inara aina neeine inara aina jiniiquiin amuhemuhereunni. Canuna inara Coauneraneun. Inarate jana canu cachanequiche,” naain raajeni-hane aitelu Cana Coaunera. <sup>17</sup> Nitohanihane coina techu:

“Acaauru aina neeichene caje amuhin jelai neeuche. Jiaonrihachu acaauru chosichuru rai lenone acaauruhacha tei dadaain neeichene. <sup>18</sup> Caa

inara rai aitocooaunne tonoraain neeichenena inara rareeunni, inara Inacaneein nihanune jana, inara canu calaohineein, canu cacununeein, naaonjoaainein neeichene coina,” naain aitelu itolere icharaneein nenea Cana Coaunera.

## 7

<sup>1</sup> Niritiinte aite cana rai Cana Coaunera. Aihana jaun cana casetecarihanine que casiin, cana ichao aasajein, cana suujuene maajein itajenaa nainera que necohalajiin nihacachenete ne. Nii jaun baaso ichaelanaala raujiaaincha cana rai Cana Coaunera aitoonjoan rijijieein ichaoha cachenete caohachaera canejeraauru.

*Cana Coaunera coitucuuruhane coarateeuruha Coriinto cocoaichacurune.*

<sup>2</sup> Caohachaaain inara suujua coaraain canacaanu aonacuche. Coatiha chuni rai baaso ichaain, chuni cairichaaain, chuni coritaain, naaonjoahaa-caanulu. <sup>3</sup> Coatiha inara que iriha aitohaaun. Inara rai aitocooaunlune rijijieeinne, casuujua aina cutaain inara belaaain inara aina jiniiquiin neein ohanune coina jatoroaain neeun, nii te raotojoein coitucuhiche inara. <sup>4</sup> Esinae rauhijiriina inaraneein neeichene coitucuhin, nii chuni que asilanaala inara rai aitoon, raotojoein canu coitucuhin neeichene jaun. Itolere necairichanaa coaraain nihacaanune saijieeine, inara coacuhin jataain raotojoein corajein rachoojoein neeun.

<sup>5</sup> Masedoniau turuhacaanune caje coauneein aansijieinniji nebetacaorihacaanu. Itolereenein turuhacaanune jaaunru naineine necairichanaa coaracaanu. Chaen nechu necairichaecuruha leeochoaurune coaracaanune jaun, canacaanu suujua cuhane casihacaanu. <sup>6</sup> Nete Cana Coaunera, cha ichana coasiha cachane nihanatiin, enaacha que ichana corajerateranein nihane jaun, canacaanu que corajerate turuha Titone aina cuaain. <sup>7</sup> Coatiha turuhane jaauncha nihei, raotojoein neeichene coaraane jaun, acaantonai suujua aninoaain corajihane jaunne, canacaanu netonai canacaanu suujua aninoaain corajihacaanu. Acate jataain canacaanu coana jeriquichene que aitiin, canu coreniha inaderaain canu que coaauquichene beebeje canacaanu rai. Nii jaune jataain jeelai amuritoheriin rachoojoein neeun. <sup>8</sup> Inara rai quiricha laenacaaunlune jaun, coaraain inaderaaichelune que inae enene netojoehaaun. Jariaalune niqui, nii inara rai quiricha laenacaaunne jaun, inaderaaichelu carajaelanaalane coitucuhin netojoetoonlu. <sup>9</sup> Nena laen inae enene nii inara rai quiricha laenacaaunlune corojeeun. Coatiha inaderaaichelune coroaehaaun. Nii inaderaaichelune aina cuaain inae nacoaunein jeriha Cana Coaunerane rijijieein ichaohichene jaune corojeeun. Inarate jeriha Cana Coaunerane rijijieein nii inaderanaa abaantaain neeichelu. Aihane jaun coatiha inara rai baaso ichaa nii quiricha laenahaacaanulu. <sup>10</sup> Nitohanein jeriha Cana Coaunerane rijijieein, inaderanaa abaantaain cana ichao coreein nihacane, nii coreniha nichoterichaacheeine jaun, nihei chaque netojoena jaanu. Nete laen Cana Coaunera coitucuhichuru nechu baasohacha que coacuhin, itolere bana inaderaauruha, niha leiijiin itolere necairichanaa caje cana rocoerane que coacuelanaalane jaun inae nitaje rai neeure. <sup>11</sup> Nete laen inara, jeriha Cana Coaunerane rijijieein inaderaain, cha abaantaain neeichene jaun, inara rai bihanune rijijieein ichaain canu cocoaerateeichelu. Chaen techu nii choae tacaain obajein, casiin, naaonjoaachelu. Nete atiin, nii baiha canu coaana jereein, nii inara jana baaso ichara casetecaaichene coina inae jatoroaain

neeichelune jaun, esinae rauhijiriin inara nii ujuaihoneein neneeichene coarateeichelu. <sup>12</sup> Nii inara rai quiricha laenacaaunlune bana, coatiha nii baaso ichara cacha que coacuhin, niheichu nii baaso ichaane jaan cacha que coacuhin, naaonjoaain laenahaanlu. Cana Coaunera notaracae canacaanu coacuhin aitocooanune rijijieein ichaquichene coarateeichene coinane inara rai laenacaanulu. <sup>13</sup> Niite jataain canacaanu suujua nunaain, canacaanu suujua aninoaelu.

Nete nii amuritoheriin canacaanu rachoojiae Tito, inae raotojoeein neeichene coaraain suujua aninoaain nacoauneein niicha ichaneni corajerateeiche quene jaun. <sup>14</sup> Nii Tito raine, chatohaneein inara rai baaso ichaenihanune jaun, jataain inara aina raotojoeein nihanune que aitoonlu. Nii nohanelanaala inara rai aitocooanulune rijijieein nechuhine, inara coreniha raotojoeein nihacaanu que aitocooanulu nohanelanaala Tito rai. <sup>15</sup> Chaen techu nere tonoraain que inara suujua acateein raaichelune coaucane naineen, inara ainaacha itolere bana nena jere nii Tito. <sup>16</sup> Jataaine rachoojoeun, inae inaraacha ichaneni coitucuhin nena nainequichene esenetaanune jaun.

## 8

### *Arajiin niicha teenihuru taojiaauruha Masedonia nenacaaaurune.*

<sup>1</sup> Canejeraauru enane laen, Masedoniau nenacaauru Jesocurisito ranojoneein nenacaauru belaitohane coaratiha, acaauru que Cana Coaunera berichaanuhin inara rai. <sup>2</sup> Jataain maainajeriin cojunojoneein neeuruhane jaun, necairichauruhane saijieeinte, inae chaque tonajelanaala raotojoeein enene neeure. Nii jaunte cairicheinejeeunruhane saijieein, coriquihonaneen nena rijijieein jataain arajiin, Cana Coaunera rai nii niicha teenihuru taojiaaure. <sup>3</sup> Canuna jataain arajiin nii tenaa nainecuruhane amuritoheriin, chunaelanaala nii Cana Coaunera rai niicha teenihuru teeuruhane coaraan. <sup>4</sup> Chaen techu canacaanu rai aitocure nii niicha taojiaauri amaain, Cana Coaunera cachaneein nenacaauru rai tihacaanune coina. <sup>5</sup> Nitohaneente taojiaaururichaaaine coaucaanne amuritojoaain teeure. Jauriaanejeein Cana Coaunera rai benatecuruhane baihate, jeriha Cana Coaunera rijijieein canacaanu rai teeure. <sup>6</sup> Nii jaunne Tito rai aitocooanu leeochoauru rai caohacha ichaa, inaraacha taojiaa raa uha inara caje, jauriaa aihalune rijijieeine coina. <sup>7</sup> Inara leeochoauru amurijiriin esenetaain neein, cha que tonajelanaala leeochoauru rai erena inaan, itolere coitucuhin inara relaacaanune jaan rijijieein jereen neeichene coina jatoroaain, naaonjoaain neeichene jaun, nii rijijieein leeochoauru amuritoheriin, leeochoauru latijiojiriin nenacaauru coroatajanequichene coina ichaquichenete ne. <sup>8</sup> Coatihane inara letoaa inara rai binaan. Caohatiin ichacuruha leeochoaurune coitucuhin aina cuaain leeochoauru belaaichene coarateein inara netonai tenaa nainequichene coina ne aitoon. <sup>9</sup> Inarate jataain itolere que nelateein itolere ichana naineraneein nihane saijieein, jataain inara belaitohane jaun, aina cuaain rausiaenojoneein raotojoeein neeichene coina, inara coreniha cha que nelatihei rijijieein cairichei coaraain nihalu Jesocurisitone coitucuhiche.

<sup>10</sup> Inara rai caohachanu quene, nii que inara rai aitoon. Inae inara, leeochoa jaanaa bana inae nitohanei ichana nunuheteichelune jaun, satono que tiaain ichana corajeeuche. <sup>11</sup> Aihane jaun nii jauriaanejeein tenaa nunuheteichene bana corajeein teeichulune coarateeichelune rijijieein, enene tenaa nainequichene jeonijihanaain tihajeein leeochoauru coroatajaniha inaraacha teenu taojiaaichene nainacuche. <sup>12</sup> Chunocoha Cana



Coaunera rai cha tenaa jereein tenaa nainihane jeeonejeein tihanete, raotojoein nii niicha tei rareein Cana Coaunera. Coatiha cha sirinihane saiijeein, cha tiha cachane jerihehi Cana Coaunera. <sup>13</sup> Coatiha cha sirineechene nihanatiin, leeochoaauru rai acaihaniji teein necairichaaichene coina erenaa nihein. Raujiaain ita rijijeein ita coroatajanein niha cachane cointate erenaane. <sup>14</sup> Enate inara, acaauruhacha sirihehi siriquichene jaun, acaauru rai tenaa nainequiche. Acaauru netonai cabaiha inaraacha sirihehi sirichuruhane, inara rai netonai tenaa nainecuruhane coina. Nitohanihanete ita rijijeein inaraacha latei siriin neriquicheein, ita amuritoheriin sirina coacuelanaala. <sup>15</sup> Cana Coaunera Quiricha cuhane: “Nihei cautihehi amuritoheriin raera rai. Niheichu lanaai fautaeriin raera rai,” naain laenanohinihane rijijeein.

*Rai corihaneraauru aina Tito letoaaauruhane.*

<sup>16</sup> Nariha Cana Coaunera inara que coaaucaunne rijitoejin inara que coaauca Titone coina, casuujua rijitoejin rai suujua tihane coreniha. <sup>17</sup> Nii jaunte acaentonai inara que coaucane jaun, rai aitocaaunne tonoraain inae suujua caje coaunein inara coaraa uhe. <sup>18</sup> Nii Tito jiniichaaaine inara rene leinjiin cana nejera letoaaun. Acate raotojoein coitucure leeochoaauru Jesocurisito ranojihuru, acaauru rai ichoteratenojonein nerichaacheeine beebejia raotojoeine jaun. <sup>19</sup> Nii jaunte nii ichoae tacaain aca janiichure Jesocurisito rai iclesianein nenacaauru, canacaanu aina amuhemujeein, cairicheinejeein nenacaauru rai Cana Coaunera que canacaanu suujua acatein nere tonoraain leeochoaauru coroatajanena jerichaanune coaratihacaanune coina, taojiaain letoanojoin raeranu que canacaanu coroatajaneraanu que. <sup>20</sup> Nitohaneeine ichana jerichaanu, nabana tonaain canacaanu que ereein neeuruha cachaauru, nii leeochoaauru coroatajaniha tenojoi canacaanuhacha taojiai quene coataa. <sup>21</sup> Nii jaunna Cana Coaunera notaracaae, cachaauru notaracaae, naaonjoain itolereenein caohachaaain ichana jerichaanu.

<sup>22</sup> Acaauru jiniichaaai nechu leeochoaauru cana nejeraauru caje unaa leinjiin cana nejera letoaaun. Acate satiin canacaanuhacha ichai que canacaanu coroatajanein, acaentonai ichaane coina jatoroain nihane coarate. Nii jaunte teriquicheein inara netonaine esenetaane jaun, jataain ena jeelai amuritoheriin ichana jere. <sup>23</sup> Chunocohacuru inara caje: “Chariji cachana caa inara aina uhin turue” naain Tito bajaauruhane: “Caate Faboro corihaneranein, cana coroatajanihane que coroatajaneranein nanaane,” naain acaauru rai beeuche. Jerichanetojoeinchu, nii coroatajaain aina unacaauru cana nejeraauru bajaeranihane: “Caaurute leeochoaauru Jesocurisito rai iclesianein nenacaauru letononein unacaauru ne. Chaen techu Jesocurisito ere tonoraain, naitoonjoan icharaneei nenacaaurune,” naain acaauru rai beeuche. <sup>24</sup> Chaen jataain acaauru belaaichene coarateechete: “Esinaenachuhisi catohanein ichaaoruhane jaun, acaauru coreniha raotojoein neeuruhate,” naain inara coreniha raotojoein nihacaanune esenetaauruhine leeochoaauru Jesocurisito rai iclesianein nenacaauru.

## 9

*Leeochoaauru cana nejeraauru rai inaraacha teenu.*

<sup>1</sup> Inae raotojoein inara rai bihanune latelanaala, tenaa nainequichene coitucuhanune jaunna canaacha esenetai coreniha cana nejeranein nenacaauru rai, taojiaain inaraacha letoaaenu que aitiin inara rai laenaeeneun. <sup>2</sup> Nii jaunna itolere bana raotojoein Masedoniau nenacaauru rai,

inara Acaiha bataneu nenea Coriintoo neiniquichene, inae taolu ajaanaa situsina bana caje coauneen inae nitohaneen leeochoaauru cana nejer-  
 aauru coroatajanequichelu jatoroaain neennee beebejeeun acaauru rai. Nii  
 ainate caohacha ichaa leeochoaauru coroatajaniha ichaquichene coaraain,  
 neleruhin amurijiriin acaauru netonai ichana corajeein, inae jatoroaain  
 neeure, acaauru netonai ichacuruhane coina. <sup>3</sup> Nii coaranu quene caa  
 cana nejeraauru letoaaun inara rai beranu que, letona jatoroaain nee-  
 ichene coina. <sup>4</sup> Nabana inae uhanune bana, canu aina uuruha Masedo-  
 niau nenacaauru tabaaurunijine, acaauru aina uhin jaiti ichaeneeichene  
 jana inara rene turuhacaanune coataa. Nitohaneen ichaquichene esene-  
 taain leeochoaauru rai beebejihanune saijieein, jaiti ichaeneeichene jana  
 turuhacaanunete laen jataain canacaanu rai necoejena tiha airiquicheein.  
 Chaen techu, inara raajenihane inara rai nocoejena tiha airiquicheein.  
<sup>5</sup> Nitohanihane coataanejian, jauriaanejeein ichoaichaniha uhin inara  
 coaraa uruha nii cana nejeraaurune jerichaaunne jaun, acaauru rai aitoon  
 inara coaraa uuruhane coina. Jaiti nii aitocoichelune tocohaneen taoji-  
 aaichene nainaeneeichene, inara coroatajanecuruha taojiana quene coina.  
 Nitohaneen inae jatoroaain taojiaain neeiche jana, inara rene turuha-  
 caanunete laen, esinae rauhijiriin chunaelanaala tenaa jereein teeichene  
 coaratihane leeochoaauru amuritoheriin teriquicheein.

<sup>6</sup> “Chunocoha coroatajajeein temule jaerate, coroatajajeein taicheein.  
 Jana arajiin temuerate arajiin taicheein,” naain niha erenaane que coau-  
 cuhe. <sup>7</sup> Aihana jaun le cachaaurute naine suujua cuhane coacuhin tenaa  
 jerihane jeonijihanaain tihane caohachae. Nainihe chunocoha tenaa  
 jerenihane, tihane coina conujiha chunine. <sup>8</sup> Itolere quete inara coroata-  
 janereein Cana Coaunera, itolere bana latequichene rijijieein inaraacha latei  
 siriin neeiche cauteinne, nii caute que leeochoaauru coroatajaniha acaauru  
 rai teein, naaonjoaain caohacha ichajeein ichaohichene coina. <sup>9</sup> Cana  
 Coaunera Quiricha cuhane:

“Cairicheinejeein ichaonacaauru cachaauru raite,

chunaelanaala

acaauruhacha latei te.

Acate

chabana satonoelanaala

itolere bana

caohacha nejesina ichareein,”

naain laenanohineein ne. <sup>10</sup> Cana Coaunera temule jaera coina rai nucuhe  
 teraneen lenonene maajeein teranihane jaun, nii rijijieein Aca inara rai  
 arajiin nucuhe tereein arajiin temuhin arajiin taojiaain neeichene, latejio-  
 joiriin nenacaauru coroatajaniha teeichene coina. <sup>11</sup> Nii ainate itolere siriin,  
 cha latelanaala raotojoein neein, jelai amuritoheriin leeochoaauru rai tenaa  
 naineriquicheein.

Nii canacaanu aina, inaraacha letoaaenu inaraacha taojiai corenihate,  
 Cana Coaunera coroaecurureein leeochoaauru cana nejeraauru. <sup>12</sup> Coatiha  
 acaauru rai lanaane jauncha, nii acaauru rai inaraacha taojiai amariha-  
 caanuhin, nechu Cana Coaunera coroaecuruha inara corenihane coinane  
 amarichaanuhi. <sup>13</sup> Jesocurisito aina cuaain, enachasine ichaonaa que ichao-  
 hichene coaratihate nii inaraacha sirii taojiaain letoaaiche. Nii te coaraain  
 Cana Coaunera coroaecurureein. <sup>14</sup> Nii ichoae tacaain techu, jataain inara  
 belaaain, inara rai Cana Coaunera bajaaurureein, inara belaitoha Cana  
 Coaunerane coaratihane ichaquichene coreniha.

<sup>15</sup> Narihara Cana Coaunera, nitohanei ichana nainichaachene jaanu ti-hane coreniha. Nihei que tonaain erenaanjaanu.

## 10

### *Afosotoroneein cocoainanohinihane coaratenaa jeriha Faborone.*

<sup>1</sup> Canuna Faboroneein inara belaiha Jesocurisitone rijijieein inara be-laaichaaunne jaun inara rai aitoreeuni. “Inara caje coriaae nihanune-jene, enaacha inara rai tonaain ereeun,” naauruhane coitucuhanune jaun.

<sup>2</sup> Nii jaunna inara rai aitoon, nii joareein cacha rijijieein, cha ichaa canacaanu beracuru aina, nii rucujueein neeichene jana, inara rene turunaa jerichaaunne jaun. Inae niritocuruhane rucuhecaaun acaauru ainane coina jatoroaain urichaaunni. <sup>3</sup> Esinae rauhijiriina niqui cachanichaanu, nena niha chatohanei rucuchenacaine, aihuruha Cana Coaunera coitucuelanaala nenacaaaurune rijijieein rucujuenihacaanu. <sup>4</sup> Coatiha niha chatohanaine caa chauratane que nena que biji achunequuin neein rucuhehaacaanu. Nii canacaanu biji achunete Cana Coauneraacha ichana nainei caje unaa-neein, itolere que laraajiin nena jerenacaauru amuritiin itajenaa nainer-aneein nena ne. <sup>5</sup> Nitohaneeine canacaanu que ereein, Cana Coaunera coitucuuruha cachaaurune coina beebejihacaanune caohateraauru ita-gerichaanuhin. Itolere cachaauruhacha coacune Jesocurisito rai teein ni-hacaanu, leinjiin Aaacha tonoraain neeuruha cachaaurune coina. <sup>6</sup> Nii jaunne esinae rauhijiriin, canacaanuhacha beebejei esenetaain tonaraain neeichene, nii tonoranajerelanaala nenacaauru casetecarichaanuhin.

<sup>7</sup> Inarate itolere bana inaraacha coarai cacha esenetaquiche, itolereenein coitucualanaala. Aihana jaun chunocoha Jesocurisitohacha jerei icharate, canacaanu netonai Jesocurisitohacha jerei ichacaaunne coaraain coitu-cureein. <sup>8</sup> Caa cocoainanohi nichaaunne rerohin canu ere tonoraachene coina inara counujichaaunne que coatiha coejinaaun. Cana Coaunera, canacaanu cocoainaan nihalu inara que Acanihane coitucueratihacaa-nune, nere tonoraain neeichene coinana jaun. Coatiha inara itajihacaa-nune coina, canacaanu cocoainaan niheilulu Cana Coaunera. <sup>9</sup> Niheichu caa quiricha cuhane cuaain inara casataa aitohaaun. <sup>10</sup> Inara aina nenacaauru tabaaurute: “Nechu quiricha cuhaneicha cuaainjene mijiaaaineein inara rai aitoon. Nete laen inae inara aina nihanune, inara rai tonaain miji-aaineein erenereuni. Coatihaje cacha rai irihanune tonijiaain cacha rai erenaa nainichaaunne coalanaala,” naaure. <sup>11</sup> Nena laen mijiaaaineein erenaa nainenihacaanune saijieein, coriaae caje quiricha cuhane cuaain mijiaaaineein aitocaaunune rijijieein, inae inara rene turuhacaanune bana icharichaanuhine coitucuhane nii aitine jerichaanu.

<sup>12</sup> Coatiha nii raajenihane necohasitaain nenacaauru rijijieein nena jerihacaanu. Nete laen acaauru cha coitucuurenihane jaun, leeochoaauru amurijiriin niha nocoetiin raajenihane necohasitaare. <sup>13</sup> Canacaanu laen coatiha canacaanuhacha ichana nainei rerohin necohasitanaa nainihaa-caanu. Nii rijijieein chu Cana Coaunera cachaauru relaacaanune jaanru cojunacateraneein nihane jaun, nii canacaanu rai cojunacatihane jaan rerohin turunaa nainihacaanu. Nii jaunte Aca canacaanu turuaelu Coriintoo neiniquichene rene tiaaajoaain. <sup>14</sup> Aihana jaun coatiha nii canacaanu rai cojunaca rerohin turuhaacaanu. Chabana inara rene turuenihacaa-nune saijieein, ena turuhacaanune jana nihanena laen, canacaanu rai co-junaca rerohitiin tururichaanu. Canacaanune jaiti inara rene turueniha chunine jana, ichoaichaniha inara rene turuhin, Ichaonaa Enachasine teraniha Jesocurisitone beebejihacaanulu inara rai. <sup>15</sup> Coatiha chabana

turuenhacaanune jaan turuhin, chuni amihaneero ruluhin neroraneein nihaacaanu. Nitohaneein canacaanu turunajanihei cunaa coacuelanaalane, inara ainaacha neein Cana Coaunera icharatenojoin amihanenaa ichajerichaanuhi. Aiha leinjiin Acaacha esenetaain ichaohin, ichacaanne jerequichenene airichaanuhin. <sup>16</sup> Chaen nechu, nii neeichene jaan jelaicaje coriaae cuhin, osa caje nichotenaa nainecururichaaaine beebejenaa jerichaanu leeochoaauru rai. Nene laen, inae cachaauru relaauruha leeochoaurune jaan turunaa jerenihacaanu. Nabana leeochoaauru amihaaneero ruluhin necohasitanaa tocohanihacaanune coataa.

<sup>17</sup> Chunocoha raajenhane necoasitanaajerihane, Cana Coaunera coasitaanne. <sup>18</sup> Cana Coaunera coitucueraneei rai cachaneein nena cachate, Cana Coauneraacha ichanohicha coasitaain ichoae, chabana raajenhane necohasitanaa coacuelanaala.

## 11

### *Afosotoneein niha nocoetonacaauru que ereereeca Faborone.*

<sup>1</sup> Bajiaanachuhinti cha coitucuhi jaelorohe rijitoein inara rai ereereecaaunne rautaaain aonaeneeiche. Atiin aonacuchene inara rai aitete coitucuhiche. <sup>2</sup> Jataain leeochoaauru esenetaain acaauruhacha ere tonoraain, Jesocurisito esenetaaichene jianequichene jaan rautaeniha Cana Coaunerane jaan quene inara rai aitoon. Canune rai lanaacha ere tonoraain neeuruha enecurune rijijieein, leinjiin Jesocurisitohacha ere tonoraain neeichene coina, rai inara teein inara que coitucuerateenlu. Nii jaunna leinjiin Acaacha ere tonoraain queecha coaauquiche leeocheanein inara suujua cuaelanaalane coina aitoon. <sup>3</sup> Nena laen Eba coritaalu acanone rijijieein inara coritaeranihane esenetaaichene coasihun. Nabana Jesocurisitohacha que coacuhin neeichene jianein, leeochea que coaauquichene coataa. <sup>4</sup> Inarate inara relaacaanune jaan nihei que, nechu nejelaunein cuain Jesocurisito nihei que inara rai ereeuruhane rautatiin neeichene jaan, Cana Coaunera Suujue inae inaraacha esenetailunihei esenetaain, osa caje ichotenojoineriquicheeine jaan, inaraacha esenetailunihei esenetaaiche. <sup>5</sup> Coatiha nii inaraacha esenetacuri, afosotonichaanune amurijiriin niha nocoetonacaauru fautaain nena jerinaaun. <sup>6</sup> Cacha rai irihanune que nelatinaaun niqui, nena laen esinae rauhijiriin coitucuun banejelanaala. Niite raotojoein coitucuhiche inara, satiin canacaanu ichanaa coaraneein neeichene jaan.

<sup>7</sup> Inara rai baaso ichaana, inara caje core bajaalanaala inara fautaerineein nena rijijieein neein inara relaauunlu ichoteratenojoneein nerichaacheeine que, canu amurijiriin neeichene jerenacaan. <sup>8</sup> Nitohaneeine inara caje chaelai bajanaa coacuelanaala, leeochoaauru Jesocurisito ranojoneein nenacaauru coriqui ruluera tocohaneein raauunlu, inara coroatajanena nainichaaune coina, canu rai teeuruhane rijitoein raanune jaan. <sup>9</sup> Coatihachu inara aina nihanune bana, inara caje cha latein cha bajaain nerejetohaaunlu. Masedoniau caje uhin turunacaauru cana nejeraauruhachate canu rai canuhacha latei terejetocurelu. Aihana jaan coatiha inara caje cha bajarejetohaaunlu. Nirijieeine itolere bana nereeunni. <sup>10</sup> Nitohaneeine satiin Acaaha batane sacutaain turuhanune jaanru nainein neeunlu, esinae rauhijiriin Jesocurisito coitucuhin rijijieein naitoonjoan tonoraain nihanune jaan. Nerinaain canu caje nii ruluera. <sup>11</sup> Coatiha inara cotaiha aitohaaun. Jataain inara belaichaaune jaunne aitoon. Cana Coaunerate jataain inara belaichaaunne coitucue. <sup>12</sup> Nena laen inara aina inae canuhacha ichailu ichajeein sacureeunni,

nabana nii canacaanu rijjijeein raotojoein nenea coaauca nocoenacaauru rausiaecaaunne coataa. <sup>13</sup> Acaaurute nechu casejenein, Jesocurisito letono afosotoniha nocoetocure. Nete esinae acaneein aitocurene. <sup>14-15</sup> Coatiha enaacha nihei nitohanei. Moconajaera netonai, Cana Coaunera cononiha nocoetiin tocohaneein nedaane jaunte, rai letonocuru netonai rijjijeein neeuruhane jaun, cacha caohacha rijjijeein inanacaaure. Nete, caohacha ichacurenihane jaun, ecu tihane bana casetecaain itajenojoiniha cuurureein moconajaera aina jiniiquiin.

*Jesocurisito letono afosoto nihane jaun necairichaa Faborone.*

<sup>16</sup> Nacoauneeine coitucuhichene coina inara rai aitoreeunni. Jiaonriha cha coitucuenihanune jaun leinjiin jaelorohe rijjijeein iriha canu biha chunine. Atiin canu aonacuchene inara rai aasaeriin necoasitaete aonaquiche. <sup>17</sup> Coatiha jeriha Cana Curuanaane jaun nii necoasitar-ihaauni. Nechu cha coitucuhi rijjijeein ereereecaaune jaune aitoreeunni. <sup>18</sup> Coaracuchenachuinti, Suujua caje rocohin niicha ichai coasitaauruha nii leeochoaurune, nii rijjijeeinechu canuhetonai necohasitareeunni. <sup>19</sup> Inarate niqiu itolere coitucuhiche. Nete cha coitucuelanaala nenacaauru cachaauru inara relaauruhane, acaauru aonaain acaauru rautatiin neeiche. <sup>20</sup> Nitohaneeichene jaun te inara basijiauhin, inara coritaain, inara que jaolequiin, inara meri faoracaain, naaonjoauruhane niha natiin acaauru abaantaain neeiche. <sup>21</sup> Jataaine cojeeun, nelatihei rijjijeein nii aihuruhane tocohaneein nenaanainenihacaanune jaun. Nene laen, necoasitanaa coaacuruha nii leeochoaurune canuhetonai necohasitareeunni. Cha coitucuhi rijjijeeine ena caa ereerejeeun. <sup>22</sup> “Canacaanune Ebereeo nichaanu” naauruhane, canuhetonaine Ebereeo neeun. Jana, “Canacaanune Isaraelita nichaanu” naauruhane, canuhetonaine Isaraelita neeun. Jana, “Canacaanune Abaraaun nefoeratenichaanu” naauruhane, canuhetonaine Abaraaun nefoerateneeun. <sup>23</sup> Jana, “Canacaanune Jesocurisito letononein nihacaanu,” naauruhane, canune jataain acaauru amuritoheriin acaneein neeun. Cha coitucuhi rijjijeein aitocoanne nihanatiine, esinae rauhijiriin aitoon. Canune acaauru amurijiriin amihaneein araaisaain caresero cuhane enoanojoneein, acaauru amurijiriin mainajeriin bisinojoneein, araai saain onaa caje nichoteein, naajoaain neeun. <sup>24</sup> Saoqui sai cuhanete, nichatachoonca isocoon tacanei bisicha que canu casetecaaure Jorioocuru. <sup>25</sup> Nii rijjijeein techu nichata sai cuhane enuha que canu faojoaain, lesajei que ajeri que canu bodoosihure. Nichata saicuhanetechu naluha cuhanune jaan botena jaun ohanune rai neeunlu. Nii jaunna lesajei que cucuana cataaun, lejiichoo lejanotiineein neeunlu. <sup>26</sup> Araai saain nucuhe cuhane amuhanune jaaurune necairichanaa coaraaun. Tabaauru quene canu basijiaauruha asijiautoorune que, chatohaneein canu teuruha canu araichuru Jorioocurune que, nejelau cachaauru nihanatiin chatohaneein canu teuruhane que, naaonjoaainunri que casihun. Jerichanejeeinechu, neseeru nihanune jaauru, bero cuhane, cucuhana cuhane, naaonjoainunru nihanune jaauru, necairichanaa coaraain neeun. Nii rijjijeeinechu, necairichanaa coaraain neeun, nii Jesocurisito coreniha cana nejera niha nocoetonacaauru cataaun nihanune. <sup>27</sup> Chaenechu mainajeriin amihaneein necairichanaa coaraaun. Tabaauru que sinilanaala, tabaauru que mijitena aina cocoirena abaantaain, naaonjoaain. Araai saain tabaauru que lenoninaaun. Jelarona caaunne taba que necairichaaun neniha canu cajionene jaun.

<sup>28</sup> Nitohaneein itolere que necairichaanune saijieeine, jeelai amuritoheriin satiin Jesocurisito ranojoneein nenacaauru iclesiacuru que coacuun.

<sup>29</sup> Nii jaunna chunocoha cunaitihane inaderaaun coreniha. Jana chunocoha suujuateeuruha baasoneein suujua coaraane coinanete, jataain canu baijiae. <sup>30</sup> Canu necoasitaanunena nelatenihanune nainejeein canuhacha ichai que necoasitareeuni. <sup>31</sup> Cana Curuaanaa Jesocurisito Inaca Cana Coanera itolereneein coroaenojoneein nenaate, esinae rauhijiriin nohanelanaala aitocooaunne coitucue.

<sup>32</sup> Damasoco nihanulune banate, *rey* Aretasi rai coberenadoroneein nena rai coardiaauru letoaelu, nii nese rai rijia bacuujuuuru naineen neein canu cojoaain canu mucuuruhane coina niqui. <sup>33</sup> Nete nii coitucuuiriin, omari seeonjoa cuhane canu teein, nii nese rai rijia bujuau, acuujuu laojoiri ucuun nena cuhane cuaain canu faauruhane jaun acaauru caje nichotee-unlu.

## 12

### *Notajaain que necoitucueratiha Jesocurisitone beebijiha Faborone.*

<sup>1</sup> Nihei chaelai que rai cainera, raajenihane necohasitaain niha cachane. Nena laen canu, canu notajaain canu que niicha ichai coitucueratiha Cana Curuaanaane bereeunni inara rai. Aihana jaun coatihane canu raajenihane necohasitaa aitorihaauni. <sup>2</sup> Inae lechoonca jena jaanacaa Jesocurisito esenetaeranichaaunne dede nichata burihu amanojoinichaaunlune. Nechaainti canu jaberoconein amanojone nihanulune canu suujueneein amanojoinichaaunlu. Coatihane coitucuhaaun, Cana Coaneraachate coitucuujuue. <sup>3-4</sup> Nena laen esinae rauhijiriin dedeeu amanojoneein, ecu chabana aohanraai erenaa aonaaunlu. Nechaainti canu jaberoconein netiin aonaeihanulune, canu suujueneein netiin aonacaaunlu, Cana Coaneraachate coitucuujuue. Nihei chuni cacha que chabana aohanratenojoneein nihei nii canuhacha aonai erenaa. <sup>5</sup> Chunocoha nitohanein nihanena naineen coasitaanune. Nene laen caraajenihane niritiin necohasitaanaa naineeneun. <sup>6</sup> Coatihane esinae niqui, necohasitaanune nohaniha aitorihaaun, esinae rauhijiriine casajenelanaala aitoreeun. Nena aitona jereneeun, nabana ainihanune saijieein nechu canu esenetaera coina aitoha canu beeuruha cachaaurune coataa. <sup>7</sup> Nitohanein canu notajaain niha Cana Coaneraane aina cuaain nabana canunein nihanune rerohin necohasitaanune coataate, leinjiin moconajaera tenojoi cunai tocohanein, ojoa que foconojoi rijitocojoaain canu jaberoco cunaitaerate Cana Coanera. <sup>8</sup> Nii jaunne niqui, canu jaberoco caje nii cunaitaera jaohane coina nichata saain Cana Coanera rai aitoon. <sup>9</sup> Nete, “Nelatelanaala nenacaauru aina cuaain canuhacha ichana nanei coaratihanune coina ichacaaune jaunte aaicha. Jataain, ii belaitohanune jereeine jaunte nii aaicha,” naain canu tonora Cana Coanera. Nii jaunne, canu rai niritoha Cana Coaneraane jaun, jataain rachoojoein neeun, chaque nelatenihanune saijieein canu aina cuaain niicha ichana nanei ichaa Jesocurisitone coina. <sup>10</sup> Nii jaunna nelatenihanune que ereein, latijiojoiriin, arinojoneein, Jesocurisito coreniha necairichaaun, naaonjoaain nihanune saijieein jataain rachoojoein ichaaon. Nitohaneine, itolere que nelatihei rijijieein nihanune saijieein, jataain itolere que laraajiin neeun.

### *Coriintoo Jesocurisito ranojoneein necaauru iclesiacuru que jataain coaauca Faborone.*

<sup>11</sup> Inara canu rai lerateeichene jaune, cha coitucuhi jaelorohe rijijieein inara rai ereerejeeun. Inara, canu coreniha erenaa nainequichene saijieein, acaauru fautaain nelatenihanu que, inara rai ereeuruha nii Jesocurisito letono afosoto niha nocoetonacaaunne jana, acaauru rijijitoein acaauru

esenetaain acaauru ere tonoraquichene jaunna aitoon. Coatiha nii canu amurijiiriin nenea jeriha nocoein ereeuruhane que tonajihaaun. <sup>12</sup> Nena laen canu Jesocurisito letono esine nichaaune jaun, inara abantaain itolere cojoelanaacojoai ichaain inara notajaain neeunlu. Nii cajete esinae rauhi-jiriin canu afosoto esine nichaaunne coitucuhiche. <sup>13</sup> Inara rai cotainacai que irihanune, canu que inara suujua acatecuche. Jerihane leeochoaauru Jesocurisito ranojoneein nenacaauru iclesiacuru caje, canuhacha latei bajarejetocooaunlune rijijieein, inara caje canuhacha latei bajaenihanune jaaunne jerihane, inara rai baaso ichaaunlu.

<sup>14</sup> Inae jatoroain nihanu, nacoauneein inara coaraa uhanune coina. Quete nichata sareein inara rene turuhanune. Nenechu inara caje canuhacha latei bajaanune coina ainereunni. Coatiha inaraacha sirii latichaaune jaun coina airinaauni. Inara caohachanu que inara coroatajanichaaune coinane inara rene turuha ureeunni. Rai bereecuru caje cha latein nelanaalate, rai bereecuru rai acaauruhacha latei teein ne acaauru inaca. Nii rijijieeinechu canuhetonai inara inaca rijijieein nihanune jaun, inara rai nelatichaaune coina neeun. <sup>15</sup> Nii jaunne, acaihaniji canuhacha ichana nainei ichareeunni inara caohachanu que. Canu jaberoco nihanatine inara coreniha tereeunni. Nete, nitohaneein inara caohachanu ichaain, jataain inara belaaain inara coroatajanena jereein nihanune saijieein, canu que nererojoecaain, canu coointeein, naaonjoaain neeiche.

<sup>16</sup> Coatiha niqui inara rai chatohanei ichaain nihaaunlu. Nete inara tabaauru: “Acaauru coritaainjena baasoneein osa que acaauru ichao saruerateen,” naaure. <sup>17</sup> Niheichu coatiha nii cachaauru canuhacha letoauri que, inara coritaeratihaaunlu. <sup>18</sup> Canu jerichaaune jaunna, nii coroatajai cana nejeraauru aina Tito letoaaunlu, inara coaraa uhane coina. Chaen techu inara raotojoein Tito aina ita rijijieein ita suujua que suujuaain, inara coroatajanichaanulune coitucuhiche. Nii jaun chasiina inara coritare Tito.

<sup>19</sup> Jerihanete: “Canacaanu que inara suujua acatequichene coinajecha inara rai aitocooaanu,” naaiche. Nete aine. Nitohanei coacuelanaalane Cana Coaunera notaracaae, cojoerihu Jesocurisito letononeein nihacaanune jaun, coitucuhichene coina aitocooaanu. Satiin caa inara rai canacaanu aitoonjoate, jelai amuritoheriin Cana Coaunera coituhin ichaohichene coinanera canejeraauru. <sup>20</sup> Inara coaraa uhanune bana, baasoneein neeichene jana inara eruhanune rautaenihanune, inara netonai rautaeneeichene coataane aitoon. Nii jauna ita suujua rijijieein coacuelanaala, ita que necoelaain, ita cotaairiin, inara rainuhacha que coacuhin, leeochoaauru cairichaa nohanein, ita que ereein, necohasitaain, ita caje neleruhin, naaonjoaain neeichene jana, inara rene turuhanune que necoatoon. <sup>21</sup> Chaen nechu nacoauneein inara rene turuha uhanune jana, inae Jesocurisito esenetaeranein neeichene saijieein, chabana nitohanei osa que nesaruna naineniha cachane saijieein, inara amute quicha aina osa que nesaruhuin neeichene Cana Coaunera notaracaae inara que necoejeein chanareeunni.

## 13

### *Acaauru suujuateein necoiha Faborone.*

<sup>1</sup> Nii inara coaraa urichaaunine quete, inae nichata sareein inara rene tururichaaunine. Aihane jaun nii caitono tocohanein niha chatohanei rucuhenacaine, nihanete ne coroatajaain nichatajaain, naaonjoaain baaso ichaane coarain beranu. <sup>2</sup> Nii jauriaa osa que nesarunacaauru rai, satiin inara rai, naaonjoaain raine caa coriaae caje coauneein aitoreeunni. Nii

inara coaraa uhanune coroata sacuhane, caraajenhane inara rai aito-coaunlune rijijieein, inae nacoauneein inara coaraa uhanune bana, niha chatohanei ichara inara janane inae laen nii baaso ichara que canu suujua acaterinaauni, <sup>3</sup> Jesocurisito letononeein aihanune esenetaeneeichene jaun. Coatiha chaque nelatenihane jaun, inara aina niicha ichanenu ichaai Jesocurisito. Acate inara que itolere que laraajihane coaratena naine. <sup>4</sup> Esinae techuhisi cairichei ichara rijijieein coroso que teein atinaaurelu niqui. Nete niicha ichana nainei ichaain ichatihalu Cana Coaunera jaun enanetojoein ichoae. Nii rijijieein nech, canacaanu netonai nelatihei rijijieein nihacaanune saijieein, niicha ichana nainei icha Cana Coaunera aina, aina jiniiquiin ichaohin laraajiin nerichaanuhin inara coroatajanichaaunne coina.

<sup>5</sup> Aihana jaun inara raajenhane inara suujua cuhane Jesocurisito esenetaeraneein neeichene jaun, esinae rauhijiriin baaso ichaeneeichene coaracuche. Tana inara aina niha Jesocurisitone coitucuhichene. Nii jaun coujunojoinequichene rijitoejin inae baaso ichaquichene coitucuriquichene. <sup>6</sup> Nena laen canacaanu jerichanejeein nii leochaneein coacuelanaala nihacaanune coaraain coitucuhichene jerichaanu. <sup>7</sup> Nii jaunna Cana Coaunera bajaacaanu inara coreniha. Nabana nenacaan baaso chaain neeichene coataa. Coatiha canacaanu baaso ichacaanuna jaun nihei. Nechu inara caohachanu ichaquichene jerichaanuna jaunna canacaanu baaso ichara rijijieein aitocaaunu. <sup>8</sup> Nitohaneene nihaacaanu, canacaanuhacha esenetai que jaoleconaa nainenihacaanune jaun. Acaihaniji nii canacaanuhacha esenetai rai caohachanuhachane ichana jerichaanu. <sup>9</sup> Nii jaunna nelatihei rijijieein nihacaanune que rachoojoein nihacaanu. Nii aina nelararajiaain Aca jerihane rijijieein, baaso ichaelanaala neeichene coinana, inara rai Cana Coaunera bajaebajajeein nerichaanuhi. <sup>10</sup> Nitohanihana jaunna inara coaraa uhane ajiniha caa inara rai been laenaan. Nabana Jesocurisito cocoinanohineein nihanune coarateein, jataain mijiaineein inara rai aitocaaunne coataa. Coatiha inara itajihanune coina, cocoinanohineein nihaaunlu, raujiaain esinae coujuriu Cana Coaunera cachaneein neein, itolere bana jelai amuritoeriin coitucuhajeein ichaoichene coina, inara coroatajanichaaunne coinane cocoinanohineein.

<sup>11</sup> Inae satononejeeine jianichaaunne coina caa aitoreeunicha canejeraauru. Jataaina jiniiquiin raotojoein ichaohin, inara ichao rucujueein baaso ichana coacuelanaala ichaohichene jereeun. Esinae rauhijiriin corajeein, raotojoein ita suujua rijijieein coacuhin ichaaoche. Raotojoein ichaohacachene coina cana belaitora Cana Coaunera inara coroatajanereein. <sup>12</sup> Coujuriu Cana Coaunera cachaneein, jelai amuritoheriin ita belaa in ita rai ereein neeuche. <sup>13</sup> Satiin Jesocurisito coreniha cana nejeraaneein nenacaaurute inara coaucure. <sup>14</sup> Cana Curuaanaa Jesocurisito, inara rausiaemiin cana belaicha Cana Coaunera aina. Cana Coaunera Suujue itolere bana inara aina neeine raotojoein neeichene coina.



## **Galasia batane nenacaauru rai Faborohacha letoai**

*“Inara coaaucaun,” naa Faboro.*

<sup>1</sup> Canuna Faboroneeun. Coatiha, cachaauru canu cocoinaain canu letoaain nihei. Jesocurisito aina rai Inaca Cana Coaunera- nii ohane caje ichateralute canu cocoinaain caletoaain nelu. <sup>2</sup> Cau canu aina nenacaauru-canejeraauru aina jiniiquiin neeinna, satiin Galasia batane que Jesocurisito ranojoneein neiniquichene rai caa quiricha laenaan. <sup>3</sup> Cana Inaca Cana Coaunera, rai Calaohi Jesocurisito, naaonjoainuri aina jiniiquiin raotojoein neeichene jaanu teeuruhine inara rai. <sup>4</sup> Nii Jesocurisitote cana osa coreniha ohelu, cau chauratane que itolere curuaanaanein niha moconajaerane jaun aina jiniiquiin caseteco coaracaachene rai nenea caje, aina cuaain cana ichoteratihane coina, nitohanein jeriha Cana Coaunerane jaun. <sup>5</sup> Nii coreniha Cana Coaunera coroaecuruhine itolere bana. Nitohanemiin.

*“Coatiha nihei nii baiha cana ichoterateraanu,” naa Faboro*

<sup>6</sup> Jataaine inara cojoelatoon, inara belaiha rai Calaohi Jesocurisitone coreniha inara raain nihalu Cana Coaunerane saijieein, nii niicha tei erena que jaolequiin leecha cana ichoteranihei erena sacuhichene jaun. <sup>7</sup> Nete nene leecha cana ichoteranu erena. Inara laurijiracuru tabaaurute, inara rohecaain, nii inara ichoteranein niha Jesocurisitone que erena corenaa jerecure. <sup>8</sup> Nete laen, inae nii inara relaacaanune jaan corenaa coacuhin leechanein nenea erena que inara relaera nihane casetecareein Cana Coaunera. Canu leecha erena que inara relaane nihanatiinte canu casetecareein Cana Coaunera. Leinjiin anjera dede caje fauhin, leecha erena que inara relaane nihanatiinte casetecareein Cana Coaunera. <sup>9</sup> Jerichanetojoeine nacoaanein caa aitoreeunni. Chuno-coha inae nii jauriaanejoein nenea erena inara relaacaanune jaan corein leechanein inara relaerate casetecareein Cana Coaunera. <sup>10</sup> Coatiha baaso ichaenihanune caohacha ichacaanne coaracuruha cachaaurune jerenacaan aitohaan. Cana Coaunera baaso ichaenihanune caohacha ichacaanne coitucureein. Jana jerecuruha cachaaurune rijjiejeein jerichaanune coatiha esinae rauhijiriin Jesocurisito letononein nerihaan.

*Jesocurisito letono Afosoto niha nunuhetihane biha Faboro.*

<sup>11</sup> Aonacuche canejeraaurune caa que inara rai aitete coitucuhiche. Coat-ihha cacha suujua caje unaa nihei nii osa caje cana ichoterateraanu erena- caa inara rai canuhacha beebejei. <sup>12</sup> Niheichu, leinjiin cacha nii que canu relaain niheil. Leinjiin Jesocurisitohachate canu que nii coitucueratein nelu.

<sup>13</sup> Nii coitucuhichene rijjiejeeine, canuhetonai jaiti Jorionichaanune ichao que ichaohanune bana Cana Coaunera rai Jesocurisito ranojoneein nenacaauru- iclesiacuru laurichuru que nejerateein, acauru rohecaain acauru itajenaa jereenlu. <sup>14</sup> Nii Jorionichaanune ichao que jaiti ichaohanune banane, jataain leechaauru canu araichuru, canu rijjiu nenacaauru amurijiriin canacaanu foerateracuru ichao rijjiejeein ichahin, nii canacaanu ichao corera caohatein beraain nerejetoonlu. <sup>15</sup> Nete, inae catohanein rai letononein nihanune coina- jaiti nejanoaenihanune jana canu janijiin canu raain nelu Cana Coaunera, jataain canu belaitohane jaun. <sup>16</sup> Nii jaunte, inae nitohanein jerihalune jaan que inae tihane jaun, canu que rai Calaohi coitucuerate, coreniha osa caje nichoteeururichaan

cachaaaurune beebejihanu Jorioniheichuru raine coina. Coatiha nii chuni aina ereein aihaaunlu. <sup>17</sup> Coatihachu, Jerosaleeun nii canu ajiniha Jesocurisito letono afosoto neein nenacaauru coaraain acaauru rai irihanune coina cuhaaunlu. Nitohanena coacuelanaalane jauriaanejeein Arabia batane cuhin- nii baiha Damasocoo cauha uunlu.

<sup>18</sup> Nii baiha nichata jaanacaain catiaainne Jerosaleeun cuunlu, ecu Fedoro coaraain coitucuhanune coina. Ecuna aina neeunlu lechoonca saouqi janohin. <sup>19</sup> Nena laen, leeochoaauru afosotooru coaraeneeunlu, acaihaniji cana Curuaanaa Jesocurisito ocoala Saantiaaochane coaraaunlu. Ecu, niheilulu nii baiha chuni. <sup>20</sup> Cana Coaunera notaracaene esinae rauhijiriin nohanelanaala aitiin caa laenaun inara rai.

<sup>21</sup> Nii baihane Siria, Silisia, naaonjoaiunru batanecuru cuunlu. <sup>22</sup> Nete, jaiti raajenihane canu coitucuurenulu Jodea nenacaauru- Jesocurisito ranojoneein nenacaauru iclesiacuru. <sup>23-24</sup> Raujiaainchate: “Taolu jauriaa cana que nejerateein cana rerohecaain cana itajenaa jerera jetaote, inae enene amuhemujueein caa canacha esenetai erenaa que cachaauru relae,” naain canu benaa coitucuhin, canu coreniha Cana Coaunera coroaecurelu.

## 2

### *Afosoto niha Faborone esenetaauruha leeochoaauru afosotoorune*

<sup>1</sup> Lechoonca jena jaanacaain nii baiha catiaainne, nacoaauneein Jerosaleeun cuhacaanulu Berenabeen aina. Chaen nechu canu jiniichaain Tito netonai amaaunlu. <sup>2</sup> Nitohanein cuhanune jeriha Cana Coaunerane jaunne ucuaae cuunlu. Inae turuhinne, ecu nenacaauru Jesocurisito ranojoihunru coaraneein nenacaauru aina nejesinajeein ita taojiaain, “Naaonjoaainne Jorioniheichuru rai ichoteratenojoinichaachene que erenaa beebejeeun,” naai beeeun acaauru rai, nabana joaereein cachaauru relaa canu beein baasoneein caetena coaacuruhane coataa. <sup>3</sup> Nete, ecu niha canu aina Tito- Curiecocuru caje nenaanihaneein saijieein, jaberoco macohi cari saeratihane coina aitocurene saain nii ecu canu aonajeeureraauru. <sup>4</sup> Nii janate, nechu joaenreein acaneein nelanaala Jesocurisito coreniha cana nejeraauru niha nocoetonacaauru- canacaanu que nasiin turuure nechu esinae rauhijiriin- Moisesa rai Cana Coauneraacha tei rauhi tonoraanelanaala Jesocurisito aitoonjoaacha tonoraacaanune coaracuruhane coina. <sup>5</sup> Nena nii aansijiiniji acaauru ere tonorana jerenihacaanu, nabana inae inara relaacaanune saijieein nii inara relaacaanune jaan jianein acaauru esenetaaichene jerenihacaanune jaun.

<sup>6</sup> Nii iclesianein nenacaauru curuaanaa neein coitucunojoneein nenacaauru, coatiha nii canuhacha beebejei baiha cuaain cha beeuruhi. Nete leeochoaauru curuaanaa neeuruhane niha natiin, canu curuaanaa neeurene, namute cacha rai chanein niha cachane niha natiin leeochoanein coaraeniha Cana Coaunerane jaun. <sup>7</sup> Nitohanein canu relanaa coacuelanaalate, Cana Coaunera, Jorioocuru rene cuhin acaauru relaa Fedorone coina letoaalune rijijieein, Aca, Jorioniheichuru rene cuhin, acaauru netonai osa caje ichoteratenojoneein neeururichaaaine beebejihannune coina canu letoaane que inae nainacure. <sup>8</sup> Nitohaneinte, nii jeelai Cana Coaunera, afosoto neein Fedoro cocoinaain Jorioocuru rene letoaeraafosoto neein canu netonai cocoinaain canu letoaelu Jorioniheichuru rene.

<sup>9</sup> Nii jaunte, nitohanein inae Cana Coaunera, nii canu rai amihanenaa tihane esenetaauruhane jaun, acaauru amihaneeo que acaauru coroaatanera neein Berenabeen aina canacaanu raauruhane coaratihana, satiin

notaracaae canacaanu belaa'in raotojoe'in canacaanu raaure, nii ecu nenacaauru rai jataain leeochoa'uru amurijiriin nelateineein aca'uru coara'nein nenacaauru, Saantiaao, Fedoro, Joaan, naaonjoainuri. Nitohane'in canacaanu raainte, Jorioocuru aina neein aca'uru rela'auruhane tonohanau canacaanu netonai Jorioniheichuru rene cuhin aca'uru rela'acaanune jerecure. <sup>10</sup>Raujiaainchate laen inae jauriaalu caje coa'une'in coa'aucaunlune rijjijee'in, cairicheihuru coacuhin aca'uru coroatajanicha'anu chaelai quene coina canacaanu rai aitocurelu.

*Antioquihau Fedoro suujuatiha Faboro ne*

<sup>11</sup>Nena laen, Antioquihau nihanune jana canu rene turuha uha Fedorone bana, rai nacatiha neein aitoonlu raujiaain baaso neein ichaane jaun, <sup>12</sup>jauriaanejee'in Jorioniheichuru aina lenoneein naaonjoaane saijjeee'in inae ecu turuuruha Saantiaao laurichuru- Jorione'in nenacaa'urune jana inae nii Jorioniheichuru caje nelerue Fedoro, nii ena turunaa jaberoco cari macohi molorera coasihane jaun. <sup>13</sup>Nii jaunte nitohane'in baasoneein ichaa Fedorone rijjijeee'in ichacure leeochoa'uru Jesocurisito esenetaera'uru Jorioocuru, Berenabeen netonaine maajee'in. <sup>14</sup>Nii jaunne, nitohane'in esinae rauhijiriin naaonjoaain osa caje ichoteratenojoe'in nerichaachee'inne que cana rela'alu Jesocurisitone rijjijeee'in ichacurenihane coaraca'anne jaun, satiin ecu Jesocurisito esenetaerane'in nenacaa'uru acatiha nii Fedoro teteriin: "Chanuna jataain baaso ichaa'i Jorioniheichuru rerohecaain, Jorione'in nihacachene ichao rijjijeee'in ichaa'oruhane coina. Ii Jorione'in, inae aca'uru ichao rijjijeee'in jauriaa ichaohilune saijjeee'in," naain rai aitoonlu.

*Esenetaauruhane corenihachate Jorioniheichuru aina jiniiquii osa caje nichoteeurureein Jorioocuru*

<sup>15</sup>Canate cana foerateracuru caje coa'une'in Jorione'in nihacache. Coat'iha leeochoa'uru cachaa'uru, nechu Cana Coaunera coitucuelanaala neein osa que nesaru'jee'in nenacaa'uru rijjijeee'in nihaacache. <sup>16</sup>Nete laen, nii Moisesa rai Cana Coaunera tenojoi ichaonaa rai rauhi tonoraa cachane niha natiin, itolere niicha ichai ujuaihoni'ane caje nichotenaa nainenihane coitucuhacache raotojoe'in. Jesocurisito esenetaa cachanete laen, itolere niicha ichai ujuaihoneein nihane caje ichoteratenojoe'in nereein. Nitohane'in nii Moisesa rai Cana Coaunera tenojoi- rauhi esenetaain tonoraain niha cachane nihanatiin, itolere niicha ichai ujuaihoneein nihane caje nichotenaa nainenihane cachane jaunejian, canacaanu netonai Jesocurisito esenetaacaanu.

<sup>17</sup>Nitohane'in itolere canaacha ichai ujuaihoneein nena caje cana ichoteratiha Jesocurisitone jaaunna, osa que nesaru'hin nihacache. Aihei, coat'iha Jesocurisito esenetaacacachene osa que nesaru'ha aihaacache. <sup>18</sup>Inae nii Moisesa rai Cana Coaunera tenojoi rauhi jianichaa'anne saijjeee'in, nacoa'une'in rijjijeee'in nena jerichaaunena laen osa que nesaru'ha aicheeun. <sup>19</sup>Esinae rauhijiriin, Cana Coaunera tenojoi ichaonaa que ichaohanune coinane Moisesa rai jauriaa niicha teilu rauhi tonoraain ichaohanune jiane'unlu. <sup>20</sup>Nitohane'inte coroso que ohin, itolere baaso ichajee'in ichaohanune jaan itajee'in canu ichao core'in, canu suujueniha rai Suujue te Jesocurisito. Aihana jaun, jataain canu belaitohane jaun, canu coreniha ohalu Cana Coaunera Calaohi Jesocurisitone esenetaanune jaunne, aacha que jae'equiin ichaaon. <sup>21</sup>Coatiha canu belai'ane jaun, canu rai Cana Coauneraacha tei ichaonaa que jaoleconaa nainihaaun. Nitohane'in itolere canaacha ichai ujuaihoneein nena caje cana ichoterane'in niha nii Moisesa tenojoi rauhine chu'jianra, inacojoe'in cana coreniha ore'lu Jesocurisitona.

### 3

#### *Moisesa rai rauhi aina canaacha esenetai.*

<sup>1</sup> Galasia cocoaichacuru- aansocuru. Cha inara suujua auhacaain inara ichao core, cha coitucuhi rijijieein ichaohichene coina. Nii coataane niqui, esinae rauhijiriin cana coreniha Coroso que ohalu Jesocurisitone coitucuerateein, inara que coarateein inara relaacaanulu. <sup>2</sup> Raujiaain canu tonoraachene coinane, inara caje bajareeunni: Moisesa rai rauhi tonaraachene jaunna, inara rai Suujue teein nihalu Cana Coaunera. Tana, nii inara relaacaanune esenetaachene jaun inara rai Suujue tihalu Cana Coaunerane coitucuhichene. <sup>3</sup> Jataainachura cha coitucuhi rijijieein nee-iche, inae acaihaniji que Cana Coaunera Suujue raaichelune saijieein, jerecuruha cachaaurune rijijieein ichaohin nichotena coaauquichene coinane. <sup>4</sup> Jataainachura inacojoein, nii caohacha- inaraacha esenetai jianeriquiche caohacha nainejeeinte. Aihei jerihane. Coatih inacojoein nihei. <sup>5</sup> Nii inara rai Suujue teein cojoelanaacojoai ichaa Cana Coaunerane, coatih nii Moisesa rai rauhi tonoraachene jaaun ichaai. Inae nii inara relaacaanune jaan aonaain esenetaachene jaunte ichae Cana Coaunera.

<sup>6</sup> Coaracuchenachuhinti, rai aitoha Cana Coaunerane esenetaain queecha jaaecoha Abaraaunne jaun, nii esenetaane corenihacha niicha ichai ujuaiho nelanaala teein raa Cana Coaunerane. <sup>7</sup> Aihane jaun, satiin Cana Coaunera esenetaain que jaaequiin nenacaauru, Abaraaun nefoerate esine neein neeururichaaaine coitucuhin neeuche. <sup>8</sup> Inoaelu jaiti turueniha Jesocurisitone ajiniha caje coauneein, nitohanein Jorioniheichuru netonai, itolere niicha ichai ujuaihoneein neeuruhane caje niicha ichai ujuaiho nelanaala tenajarichaaaine jaunte: “Satiin caa chauratane sacutaain nenacaauru cachaaurune ii aina cuaain rausiaereenicha,” naain Abaraaun rai been, nii caohati erena raotono laenaeratel Moisesa que rai Quiricha Inoensi cuhane Cana Coaunera. <sup>9</sup> Aihana jaunte, nii esenetaalu Abaraaun ne rijijieein esenetaerate rausiaereein Cana Coaunera.

<sup>10</sup> Nitohanihana jaunte, nii Moisesa rai rauhi tonoraain ichaoha cachane nihanatiin caseteco coaraa cureein, “Caseteco coaraate cureein, jitaain caa rauhi laenanohi tonoraelanaala nena,” naain been laenaratihalu Moisesa que Cana Coaunerana jaun. <sup>11</sup> Nitohanihane jaunte, rauhijiriin nii Moisesa rai rauhi tonoraain ichaoha cachane coreniha coatih caohacha ichaeranein teein rarinaain Cana Coaunera. “Jesocurisito esenetaain queecha jaaequiin nenaate caohacha ichaeranein teein rareein Cana Coaunera,” naain laenanohineein nihane rijijieein. <sup>12</sup> Nete laen, nii Moisesa rai rauhi, raujiaain esenetaa cachane coreniha ichoteratihane coina aitelanaala: “Esinae rauhijiriin aitoha nii rauhine rijijieein, leinjiin niji cautijiaelanaala tonoraerate ichaoreein,” naain laenanohineein ne. <sup>13</sup> Nitohaneinte, cana cairichaeranu que niha nii rauhine jana, caje cana ichoteratihane coina leinjiin osaaona rijijieein cana osa coreniha ohelu Jesocurisito. Nii quete: “Niicha ichai ujuaihoneein nena- saain enuha que ucuun teein atinanohi cacha,” naain Cana Coaunera Quiricha cuhane laenanohineein ne. <sup>14</sup> Nitohaneinte ichaelu Cana Coaunera, satiin cachaauru rausiaecane coina, Abaraaun rai aitohalune rijijieein, Jesocurisito aina cuaain Jorioniheichuru netonai rausiajeein, nii esenetaain queecha jaaecohacachene, nii naitoonjoan rai Suujue tiha cana raine coina.

#### *Moisesa rai rauhi aina, cana rai tihane coina Cana Coaunera aitoonjoan.*

<sup>15</sup> Aonacuchene inara rai, joenreein cacha rijijieein inara rai aitete coitucuhichera canejeraauru. Leinjiin cacha, chaelai ichaane coina aitiin

laenaain, ecu teein curuaa laenaa ne. Nihei nii niicha laenai jochin, niheichu nii niicha laenai jaonaa nainihei chuni. <sup>16</sup> Nii rijijieeinte, Abaraaun aina rai nefoerate, naaonjoain rai, esinae rauhijiriin niicha teenu tihane coina aitelu Cana Coaunera. Coatiha: “Nefoerateeuru,” naain laenanohinihei Cana Coaunera Quiricha cuhane. Nitohaneein arajii que aitelanaalate leinjiincha que: “Ti nefoerate,” naain laenanohineein ne. Jesocurisito quete nii aite. <sup>17</sup> Naaonjaain quene inara rai caa aitoon; Cana Coaunerate, Abaraaun aina cuaain cana rai niicha teeni tihane coina esinae rauhijiriin nohanelanaala aitelu. Inae jauriaanejeein Abaraaun rai besihalune baiha jena fasha jaanacaneein catiaainte nena ne nii Moisesa rai rauhi. Nii jaunte, nii ichoaichaniha Abaraaun rai aitosihalune jaan itajenaa nainene Cana Coaunera. <sup>18</sup> Nii Moisesa rai rauhi aina cuaain nii Abaraaun rai niicha benatei tiha Cana Coaunera, coatiha chaque nelaterihei nii cana rai niicha benatei. Nete niha Moisesane ajiniha Abaraaun aina cuaain cana rai niicha teenu tiha core colanene coinate aitelu Cana Coaunera. <sup>19</sup> Aihana jaun chaque nelate nii Moisesa rai rauhi. Acate, turuha nii nefoeratenaa-nii Abaraaun rai naitoonjoane reeintiaain, esinae rauhijiriin tonoraain ichaaoreniha cachaaurune coaratihane coina tenojoineein nelu. Rai letono aanjera quete nii rauhi teratelu Cana Coaunera. Jana Moisesate cachaauru rai beraneein nelu. <sup>20</sup> Nete laen, bera colane raajenihane nii niicha teenu que aitelu- leinjiin acaacha neein nena Cana Coaunera.

#### *Naaonjoaain coinate nelu nii rauhi.*

<sup>21</sup> Cana Coauneraacha ichanenu aina ita rijijieein niha nii Moisesa rai rauhina jaunna nii niritiin niha. Aihei, coatiha ita rijijihai. Nii rauhi, cana rai ichaonaa teranihanechujianra, satiin nii rauhi tonoraain nena, itolere canaacha ichai ujuaihonneein nena caje nichoteein nerichaachena. <sup>22</sup> Nete, Cana Coaunera Quiricha aina cuaain, satiin nii Moisesa rai rauhi tonoraain nenihacachene coreniha osaaonaneein nihacachene coitucuhacache. Nitohaneein coitucuhin, Jesocurisito esenetaacachenete, inae nii Cana Coauneraacha teenu ranaa nainerichaacheein.

<sup>23</sup> Nii jaunte, jaiti turueniha nii canaacha esenetai jaaeconaanajane jana, caseteco coaracaachene coina mucuhineein cana sirilu nii Moisesa rai rauhi, turuha nii canaacha esenetaine reentiaaajoaain. <sup>24</sup> Nii Moisesa rai rauhite, canaanaihuru amaa beraichane rijijieein, Jesocurisito rai cana amaeraneein nelu, nii Jesocurisito esenetaacachene, itolere canaacha ichai ujuaihonneein nena caje ichoteratenohineein nihacachene coina. <sup>25</sup> Nii jaunte laen ena, inae turuha nii jaaecohacachene jaan canaacha esenetaine jaun, cana beraichaneein niha nii rauhine caje mituhacache. <sup>26</sup> Nitohaneein inae Jesocurisito esenetaaichene jaunte, satiin inara, Cana Coaunera calaohi rijijieein neeiche. <sup>27</sup> Inae nii esenetaaichene aina cuaainte baotisaain coujunacatenohineein Jesocurisito aina neeichene, niicha tei ichaonaa que ichaohiche. <sup>28</sup> Aihana jaun, Jorioneein, Curieconein, letononeein, nirijieein letononelanaala, quichaauru, enecuru, naaonjoaaineein neeichene niha-natiin, inae nihei nii que cha. Inae Jesocurisito aina jiniiquiin neeichene jaunte, lelaurijiei caje ranojoineein nena rijijieein neeiche. <sup>29</sup> Nii jaunte, Jesocurisito esenetaeraneein neeichene jaun, Abaraaun nefoerateneein, nii rai tihane coina Cana Coaunera aitoonjoalu raeraneein neeiche.

## 4

<sup>1-2</sup> Naaonjoaane jaunne caa inara rai aitoon. Jaiti canaanainiha nii itolere rai inaca rucuhele eroraneein neeninete, jerichanejeein letono rijijieein ne, esinae rauhijiriin satiin nii rucuhele erora nihane saijieein, jaiti canaanai

nihane jaun. Nitohaneente leecha cacha que beraichaaïn ne jinaa tiha inacane jaan que tihane reeintiaain. <sup>3</sup> Nii rijijieein techu, jaiti turueniha Jesocurisitone bana, nechu cana itajeranueein caa chauratane que nena que beraichaaïn nihacachelu. <sup>4</sup> Nete, inae nitohanihane coina jinaa tihalune jaan que inae turuhane jaun, rai Calaohi letoaelu Cana Coaunera, cachaneein leinjiin ene caje nejanoaane coina. Acaachate cana amute cachaneein nii Moisesa tenojoi rauhi tonoraera rijijieein ichoaelu. <sup>5</sup> Nii corenihate cana cairichaeraneein niha nii rauhine caje cana rocohin nelu, rai calaohineein cana tein cana raa Cana Coaunerane coina. <sup>6</sup> Nii jaunte, inae esinae rauhijiriin rai calaohi nihacachene coaratiha rai Calaohi Suujue te cana suujueniha Cana Coaunera. Nii rai Suujuete cana suujueniha neein: “Ofa,” naain Cana Coaunera baja. <sup>7</sup> Aihane jaun inae ii, nii rauhi tonoraeraneein niheei. Iite, inae Cana Coaunera calaohineein neei. Nitohaneein rai calaohineeine jaunte, Aca jerihane rijijieein, ii que banijiainein nena raeraneein neriquiin.

*Jesocurisito esenetaeraauru que suujuaa Faborone*

<sup>8</sup> Jaiti, Cana Coaunera coitucuelanaala neeichene banate, cha nelanaala nena- cana coaunera niha nocoetonacaauru letononeein nerejetocoichelu. <sup>9</sup> Nete laen, inae enene Cana Coaunera coitucuhichene jaun, inara coitucue Cana Coaunera. Aihana jaun, chanuna coaiten nacoaaunein nii chaque nelatiheichuru- cairicheineein nenacaauru tonoraain letononeein nena jeriquiche. <sup>10</sup> Nitohaneein neeichene jaunte, nii enanetoojeein jauriaa aichejetocoichelune rijijieein, atenechuru, cojoinacaauru, ajaanaacuru, naaonjoaaihunri cojoinaca que turuhane inara rai chosichuru coroaeein bitoaaiche. <sup>11</sup> Nii jaunne jataain casihun, cacoichana aina cutaain inara relaanulune saijieein nitohaneein neeichene jaun.

<sup>12</sup> Canejerauru, canu Jorionichaaunne jaunne niqui nii taolu inoaelu nena rauhi tonoraain ichaorejetoonu. Nena inae enene nii jauriaa nii rauhi tonoraelanaala ichaorejetocoichene rijijieein inae enene ichaon. Aihana jaun nacoaaunein nii rauhi colane inoaelu ichaohichelune rijijieein ichaaoche.

Nii jauriaanejeein inara relaanulune bana coatihana canu que jaoleconaa coaauheechelu. <sup>13</sup> Nenacaaentejia cunaitichaaunne saijieein jauriaanejeein inara rai ichoteratenoojeein neriquicheeine beebjihanune bana, jataain rachoojeein canu coroaeein canu raaichelu canu coiintena coacuelanaala. <sup>14</sup> Nii cunaitichaaunlune banate, esinae rauhijiriin, nii canu cunai coreniha canu que jaolequelanaala, niheichu canu coiintelanaala, naaonjoaain leinjiin Cana Coaunera letono- anjera aina Jesocurisito raera rijijieein canu raaichelu. <sup>15</sup> Chanuna jana chaen, inae enene nii aachelune rijijieein rachoojeein nena naineneiche. Esinaete chuhisi niqui, nii cunaitichaaunne jana rachoojoenaa caun roconacainiha inara notane jana nihane, inara nota rocohin teriquichelu canu rai. <sup>16</sup> Nitohanihane saijieein rauhijiriin nohanelanaala inara rai aitocaaune jaaunna inara que nejeratana nichaaun.

<sup>17</sup> Nii cachaaurute niqui jataain inara aina nena jerecure. Nete, caohachaaïn inara tenaa jerenacaaun aihurene. Nechu canacaanu que jaolequuin, acaauruhacha tonoraain neeichene cointe aihure. <sup>18</sup> Esinaetechuhisi niqui caohachae, leechaauru cachaauru rai caohacha ichacaane coina coaaucaane. Aiha esinaen rauhijiriin acaauru rai nelatenenu nihane. Nete itolere bana coacuelanaala, inara aina nihanuneecha que coaacuruhane nelatene. <sup>19</sup> Cacalabi rijijieein neiniquichene corenihane, jataain coacuhin

cunaiteeun. Charijieein teeinti, canaanai janoanaa jerihane cunae rai neba, nii rijijieeine inara coreniha cunaiteeun. Nirijieeine, itolere bana cunaiteeriin nereeuni, esinae rauhijiriin jeriha Jesocurisitone rijijieein nee-ichene reeintiaaajoaain. <sup>20</sup> Bajaana chuhinti ena inara aina neneeun, canu raajenhane inara rai leechaneein raotojoeein aitocooaunne coina. Nena inara caje coriaae nihanune jaun inara aina cha chana coitucueeneun.

#### *Acara aina Sara*

<sup>21</sup> Inara, Moisesa tenojoi- rauhi tonoraain nenea jereraauru, canu rai aitocoichenena jereeun. Tana esinae rauhijiriin, aitohalu nii Moisesa rai rauhine aohanraneein neeichene. <sup>22</sup> Aonacuche: “Coroatajaainte canaanai sirilu Abaraaun. Leinjiin rai calaohite sirilu rai coseenra neein nenea Acara aina. Jana, nii leecha rai calaohi coroatajate sirilu rai comasai esine neein nenea Sara aina,” naain aitohane coitucuhichene. <sup>23</sup> Nii jaunte, nii rai coseenra aina Abaraauncha sirii- rai calaohi cachanichaachene ichao rijijieein nihane coina nejanoaelu. Nete laen, nii rai comasai esine- Sara aina niicha sirii- rai calaohi, rai aitohalu Cana Coaunerane jaan nainaane coina nelu. <sup>24</sup> Naaonjoaane jaunte nii nitohane, nii coroatajai Abaraaun comasaichurute, coroatajaain cana aina niicha ichanenenu ichaa Cana Coaunerane coujunacaneein neeure. Nii Acarte Sinaai bichataneu, Moisesa rai ajeri caje nenea- tabara que teein laenanohineein nenea- rauhi tihalu Cana Coaunerane coujunaca ne. Nii rauhi tonorana nainelanaala neenihurute nii coina nejanoaain neeure. <sup>25</sup> Nitohaneinte, nii Arabia nenea- Sinaai bichataneu Moisesa ranojoi rauhi tonoraeraneein, Jerosaleen cocoaichaneein nenacaauru foeratera ne Acara. <sup>26</sup> Nete laen cana, nii Jerosaleen cana que banihateein coaunanojoi cocoaichaneein nihacachene coina, nii comasai esine Sara aina Abaraauncha sirii nefoerateneein nejanoaain nihacachelune jaun, rai calaohi esineneein nihacache. <sup>27</sup> Nii quete: “Rachoojoeein neeu canaanai sirina inaelanaala nenea ene, cojioriin rachoojoeu chabana canaanai sirineeine saijieein. Jaoleneein neeinne nihanatiin, lanaaona amurijiriin arajiin canaanai siririquiine jaun,” naain laenanohi ne.

<sup>28</sup> Canejeraauru, ichaane coina aitohalu Cana Coaunera, Abaraaun raine rijijieeinte nenaanelu Isaca. Nii rijijieeinte inara netonai nenaaneei nee-iche. <sup>29</sup> Nii bana cachanichaachene ichao rijijieein Acara aina Abaraauncha sirii rai calaohite nii Cana Coaunera Suujue ichanohineein nejanoanaa Isaca ichao rerohecaelu. Nii rijijieein techu enanetojoeein inara netonai rerohecaure nii Cana Coaunera Suujue ichanohinelanaala nenacaauru cachaauru. <sup>30</sup> Nete nii que: “Nii rai calaohi aina, nii ii coseenra sitaaute amuhine. Coatiha nainihe, nii ii comasai esine aina iicha sirii- ii calaohi aina, nii ii rucuhale eroraneein nihane,” naain laenanohineein ne Cana Coaunera Quiricha cuhane. <sup>31</sup> Aihana jaun, coatiha nii coseenraneein nenea nefoerateneein nihaacache. Nii comasai esineneein nenea nefoerateneeinte nihacachera canejeraauru.

## 5

### *Inae Moisesa tenojoi rauhi caje jianacoon nihacache.*

<sup>1</sup> Jesocurisitote, Moisesa tenojoi rauhi coreniha caseteco coaracaachene rai nenea caje cana rocohin nihane jaun, inae raotojoeein jianacoon niha-cache. Aihana jaun, nainiheiche nacoauneein nii Moisesa tenojoi rauhi tonoraain nenacaauru aina acaauruhacha ichai ichaain nihache.

<sup>2</sup> Canu Faboro nichaunne aonacuchena, inara rai aitete onaquiche. Aitocuruha Jorioocurune rijijieein nii Moisesa rai ruhine tonoraain inara

jaberoco macohi cari saerateeichene, coatiha inara rai cha que nelateein nerinaain jianacoon neeichene coina Jesocurisito esenetaaichene jaan. <sup>3</sup> Coaiteen nacoauneeine aitoon. Chunocoha Jesocurisito cachaneein nena Moisesa tenojoi rauhi caje ichoteratenojineein nihalune saijieein nacoauneein nii rauhi tonoraane coina rai jaberoco cari saerateein nenaate leinjiiniji cautijiaelanaala nii Moisesa rai rauhi tonoraanete ne. <sup>4</sup> Inara, inae jauriaa jeriha Jesocurisitone rijijieein ichaohichene coina esenetaaichene saijieeinte, ena Moisesa rai rauhicha tonoraain nena jeriquiche, Jesocurisito aina inara belaiha Cana Coaunerane jaan que jaolequiin. <sup>5</sup> Nete laen cana, rai Suujue cana rai niicha tei aina cuaain esenetaacachene jaun, itolere canaacha ichai ujuaihoneein nena caje nichoterichaacheeinne que jaeequiin cohajihacache. <sup>6</sup> Aihana jaun, Jesocurisito aina jiniiquiin nihacachene, inae nelatihei cana jaberoco macohi cari saeratihacachene. Esenetaain queecha jaeequiin nihacachenete laen nelate, nii esenetaain nihacachene aina cuaain ita belaaain ichaohacachene coina icharihanine jaun.

<sup>7</sup> Inarate niqui inae esenetaain queecha jaeequiin neeichelu. Chariji cache inara coritaane jaun, nii inaraacha esenetai tonoraain neeichene jianequiche. <sup>8</sup> Tana Cana Coaunera jerihane jaun inara cotijiaain nihalune coitucuhichene. <sup>9</sup> Nete, “Aansijiin coerati que rai coliha jasiitihacanete, jitaain nii rai coliha ichonai coeralae,” naain nihane coitucuhiche. Nii rijijieeinte leinjiin cache inara ichao auhacaain aasaeraneein ne. <sup>10</sup> Nena canu, leechaneein inara suujua cuaaichene coataa, inara coroatajanerichaain cana Curuaanaa Jesocurisitone esenetaaun. Nete laen, nii joenreein inara suujua auhacaera cache casetecareein Cana Coaunera. Coatih chunocoha aihane nihanatiin que Suujua acatena nainerinaain.

<sup>11</sup> Canejeraauru, jauriaa aihanulune rijijieein enanetojoein rai jaberoco macohi saerateeuruha satiin Jesocurisito esenetaeraaurune coina acaauru conujichaaunne, coatih canu cairichaururihei Jorioocuru. Nitohanein jerecuruhane rijijieein nii Jesocurisito beratenojoi beebejihanune acaauru baijiaenerichaaunne jaun. <sup>12</sup> Nete, raajenihane jitariin rai jaberoco molohin jaaoruha nii inara suujua rerohecaeraaurune caohachae.

<sup>13</sup> Canejeraauru, inarate cha ujuaihonelanaala jianacoon raotojoein neeichene coina, cotijiaain ranojoneein neeichelu. Nete, inae cha ujuaihonelanaala neeichene jaun, naineneeiche inara suujua letono rijijieein cha ichaain neeichene. Nenacaaentejia caohachae nii amuritoheriin, ita belaaain, cha lateein niha leechane coroatajaneein, naajoaain neeichene. <sup>14</sup> Satiin nii rauhi aitoonjoan cajete leinjiincha neeje. Acate: “Chamute cache belaaain ichaao, ii raajenihane ii jaberoco belaaaine rijitojoein,” nae. <sup>15</sup> Aihane jaun, nii que necohalajiin neeuche. Jana necohalajilanaala nejesinajeein ita aina obaaejeriin, ita cotaairiin, naonjoaain neeichenete inara raajenenihane nitajeriquicheein.

### *Joenreein cache ichao aina, Cana Coaunera Suujue tenojoi ichaonaa*

<sup>16</sup> Nii jaauna inara rai aitoon, jeriquichene rijijieein baasohacha que coacuhin ichoaelanaala, jeriha Cana Coaunera Suujuene rijijieein coacuhin ichaohichene coina. <sup>17</sup> Nii cana suujua cuhane baaso canaacha coacuite, cana aina Cana Coaunera Suujue ichanenu caohateraneein ne. Nii rijijieein techu nii cana suujua, Cana Coaunera Suujue que nejeratenaaneein ne. Nii corenihate inaraacha ichana jerei ichana naineneeiche. <sup>18</sup> Nete esinae rauhijiriin, inaraacha ichanenu ichaquichene coina inara rai beraneein



nihä Cana Coaunera Suujuene, inae nii Moisesa tenojoi rauhi rijijieein cha ichaquichene jianeriquicheein.

<sup>19</sup> Caaintiaai, “Acaauru acaaurute, jeriha suujuane rijijieein baaso ichajeein ichaaore,” naain coitucuhacane. Nitohaneein ichaonacaurute, sinijeranelaanaala nenaä ene que ichaojeraquuin, rai chosi rai niicha teeuri iniho que lenoneein, naaonjoaaurne. <sup>20</sup> Chaen techu, acaauru chosichuru corojeein, benaneneein, ita coiinteein, ita coana jerelanaala, ita que necoelajaauharitiin, enaacha obajeein, ita amurijiriin nenaä coacuhin, ita caje neleruhin, acaauruhacha coaucuruhane rijijieein neeuruha leeochoaurune jereein, <sup>21</sup> ajetoritiin, achotoritiin, naajoaain neeuruhane cajete enaacha nitohaneein ichaonacaauru cachaauru coitucuhaca. Nacoauneeinne inararai aitoreeunni, que nainaan ichaohichene coina. Nitohaneein ichaonacaauru, coatihä Cana Coaunera Cojoanonaä que ichaonaä nainecuruhi.

<sup>22-23</sup> Nete laen Cana Coaunera Suujue tenojoi ichaonaä, ita belaaïn, rachoojoein, raotojoei ichaonaä que ichaohin, cha abaantaain, cana rai chaelai que cainaane latelanaala cacha rai cha teein, nii cana ichao corenaä coacuelanaala, leeochoauru amurijiriin nenaä coacuelanaala, cana suujua letono tonoraelanaala nihacachene coina, naaonjoaain nihacachene jaanu teraneein ne. Coatihä nihei nii chuni rauhi nitohaneein ichaohacachene caohatera. <sup>24</sup> Nitohanihane jaunte, Jesocurisito ranojoeinein nenacaauru, inae coroso que teein itajera rijijieein, itolere rai nichao rijijieein ichaohin neosateein necairichanaä, rai suujua baaso, naaonjoaihunri itajeein inae ichoae. <sup>25</sup> Nii jaun, inae ena Cana Coaunera Suujue aina ichaohacachene jaun, coanete jeriha Cana Coaunera Suujuene rijijieein ichaohacache. <sup>26</sup> Aihane jaun, necohasitaain, ita amuritonaa coacuhin, itaque necoelaain, naaonjoaain nenaä nainihaacache.

## 6

### *Le cachanequichene ita coroatajanecuche.*

<sup>1</sup> Canejeraauru, osa que nesaruha chunocohane coaraqichene, inae inara Cana Coaunera Suujue que suujuecohichene jaun, rai aitocuchete raajenihane baaso ichaane coitucuhin rai suujua coaraain ichaohine. Nete inara netonai, nitohaneein coujunojoeinein neeichene coataä que necohalajiin jataain belaaïn rai aitocoichene caohachae. <sup>2</sup> Nejesinajeein itolere que ita coroatajanein neeichenete, esinae rauhijiriin jeriha Jesocurisitone rijijieein ichaoriquicheein. <sup>3</sup> Jana chunocoha, chanelanaala nihane saijieein leeochoauru amurijiriin nenaä coaucanete raajenihane necoritareein. <sup>4</sup> Nii jaunte caohachae, le cachaauru baaso ichaelanaala caohacha ichaane coitucuhin, raotojoein rachoojoein nihane caohachae. Nete laen, leeochoauru baaso ichacuruhane coaraain, acaauru que necohasitaain rachoojoein nihane caohachaene. <sup>5</sup> Aihana jaun, le cachaaurute naine itolere niicha ichai coitucuhin rai suujua coaraain ichaane caohachae.

<sup>6</sup> Ena Nenaä Cana Coaunera Ere que relanojoeinein nihane, nii relaera coroatajanemiin itolere niicha sirii que.

<sup>7</sup> Jiaonriha inara raajenihane necoritaaichene. Chateeinti baaso ichae, niite baaso raeranein nereein. Jana caohacha ichaerate caohacha raeranein nereein. <sup>8</sup> Nitohanihana jaunte, chunocoha rai suujua letono baasohacha ichajeein ichaonaä itajereein nii baaso- rai suujua cuhane coacuhin niicha ichai. Nete laen, chunocoha jeriha Cana Coaunera Suujuene rijijieein itolere caohacha nejesina ichajeein ichaohane, nii caohacha- rai suujua

cuhane coacuhin caohacha niicha ichaite chabana sanaacharanejeein nena ichaonaa que tereein. <sup>9</sup> Aihana jaun, caohacha ichacaachene coiinteein jianena nainihaacache, inae cojoanonaa que turuhane bana cana rai cainanohinerichaain nii canaacha ichaine jaun. <sup>10</sup> Nii jaunte, satiin rai, nainichaachene jaan que leochaauru belaa in coroatajaneein nihacachenete caohachae. Chaen jeelai amuritoheriin nii canaacha esenetai coreniha cana nejeraneein nenacaauru coroatajaneein nihacachenete caohachae.

*Acaauru suujuateein acaauru rai necoiha Faborone*

<sup>11</sup> Enane laen, canu raajenihane canu biji que caa quiricha laenaun. Nii jaunte, tabaanae caa canuhacha laenai. <sup>12</sup> Nii inara jaberoco macohi cari molohichene coina inara rohecaeraaurute, nechu rai lauri aina caohachaain nena jerenacaun aitocure. Nabana Jesocurisito esenetaeraneein neuruhane coitucuhin acaauru sooruhane coataa acaauru coasiha. <sup>13</sup> Nete, acaauru jaberoco macohi cari moloerateein neuruhane nihanatiin, satiin aitoa nii Moisesa tenojoi rauhine rijijieein tonorana nainecurene. Chaen techu, inara netonai inara jabereco macohi moloerateeichene, inae coujunaca siriha inara jaberocone que necohasitaauruhane coina nii inara rohecaure. <sup>14</sup> Nena laen canu, joareein coreniha necohasitanaa naineeun. Canu coreniha coroso que ohalu Jesocurisitone corenihachane naineeun acaacha coasitaanune. Nitohaneein, canu coreniha coroso que ohalu Jesocurisitone jaun, coitucuelanaala ichaonacaauru cachaauru ichao rijijieein ichaonaa nainihaaun. Niheichu Cana Coanera coitucuhichuru nihanatiin, canu arinaa nainecuruhi acaauru rijijieein ichaohanune coina. <sup>15</sup> Coatiha chaque nelatihei, cana jaberoco macohi cari moloerateein, moloeratelanaala, naonjoaain ichaohacane. Jesocurisito esenetaacachene jaunte, ena coaunanojoi nihacache. Niite jataain nelate.

<sup>16</sup> Satiin caitoonjoan tonorain ichaonacaauru cairichaaajoaain coaramii Cana Coanera, raotojoein neuruhane coina, satiin Cana Coanera cacha esineeuu aina jiniiquiin.

<sup>17</sup> Ena caje coauneein, inae nenacaaen canu cairichaerateeichene jerinaaun. Inae esinae rauhijiriin Jesocurisito letononeein nihanune coujunacaneein cajabereeo que, canu bisihuruhane jaan cure sirichaaune jaun.

<sup>18</sup> Canejeraauru, cana Curuaanaa Jesocurisito jataain jelai amuritoheriin coroajeein neeichene jaanu teine inara rai. Nitohanemiin.

## **Efesoo nenacaauru rai Faborohacha letoai**

*“Chatohaneiche,” naa Faborone*

<sup>1</sup> Canune, Cana Coaunera jerenohineein rai Calaohi Jesocurisito cococainanohineein rai afosoto Faboro neeun. Efesoo satiin, Cana Coaunera cachaneein rai Calaohi Jesocurisito esenetaeraauru raine caa quiricha lae-naaun. <sup>2</sup> Cana Coaunera aina rai Calaohi Jesocurisito inara rai raotojoeein neeichene jaanu teeuruhinete raotojoeein neeiche.

*Naaonjoaainte Jesocurisito aina cuaain rai cachaauru rausiaje.*

<sup>3</sup> Cana Curuaanaa Jesocurisito Inaca Cana Coaunera coroaecaachenete ne. Acate dedeeu cana suujue que itolere caohacha ichaain cana rausiaje, rai Calaohi Jesocurisito cachaneein nihacachene jaun. <sup>4</sup> Jaiti cana rai chauratane coaunaane ajiniate, cana janijiin cana raain nelu Cana Coaunera, rai Calaohi Jesocurisito aina cuaain cha ujuaiahonelanaala notaracaae que banijiainei rai cachaneein nena coina. <sup>5</sup> Jataain cana belaihane jaunte, rai Calaohi Jesocurisito aina cuaain rai calaohineein nena coina ichae Cana Coaunera, nitohaneein coausihalune rijijieein. <sup>6</sup> Nitohaneein raotojoeein nena coina cana belaiha cana rausiaeca jataain niicha belai- rai Calaohi Jesocurisito aina cuaaine coreniate, itolere bana Cana Coaunera coroaecaache. <sup>7</sup> Jataain cana belaitohane jaunte, rai Calaohi coichana aina cuaain cana osa caje cana rocohin, cana que suujua acatelu Cana Coaunera. <sup>8</sup> Nii cana rai itolere coitucuhin, itolere que nainaain, naaonjoaain ichaohacachene jaannu tihane cajete jataain cana belaitohane coitucuhacache. <sup>9</sup> Chaen techu nitohaneein cana belaitohane jaun, cana que nii asinojoeinein nena niicha ichaneni niicha coacui coitucuerate. <sup>10</sup> Inae cuu tihane banate, nii aitiin coaualune rijijieein nii naitoonjoan nainaain, satiin nere tonoraauruha chauratane que nenacaauru, dedeeu nenacaauru, naaonjoainurine coina satiin curuaanaanein rai Calaohi tereein Cana Coaunera.

<sup>11</sup> Acate cana janijiin cana raain nelu, rai Calaohi Jesocurisito aina cuaain rai calaohi rijijieein cana que banihateein niicha rucujuei tiha nii coausihalune rijijieein, niicha jerei ichaane coina. <sup>12</sup> Nitohaneinte jauriaanejeein cana raain nelu Cana Coaunera, rai Calaohi Jesocurisito esenetaain queecha jaaequiin ichaohacachene, cana ichao coaraain, niicha ichai coroaecuruha cachaaurune coina. <sup>13</sup> Nii rijijieein techu, esinae rauhijiriin inara osa caje nichoteriquicheeine beeuruhane aonaain, Jesocurisito esenetaain jerihane rijijieein ichaohichene jaun, rai Suujue aina cuaain rai cachanequichene cojunacate Cana Coaunera, nitohaneein ichaane coina aitohalune rijijieein. <sup>14</sup> Rai Suujuete nii cana que banihateein niicha rucujuei tihane jaan rarichaacheinne cojunacanein ne. Nitohaneinte ichareein Cana Coaunera, satiin nosa caje ichoteratenojoniha rai cachaneein neenihurune coaraain, itolere ichana nainihane coitucuhin coroaecuruha cachaaurune coina.

*Coitucuurera rai, cha coitucuuruhane jaanu tiha Cana Coaunerane coina bajaa Faborone.*

<sup>15</sup> Nitohanihane jaunne, Cana Curuaanaa Jesocurisito esenetaain, satiin Cana Coaunera cachaneein nenacaauru aina ita belaiin neeichene coitucuhanune jaun, <sup>16</sup> inara coreniha bajaanune nainein inara coacuhin, Cana

Coaunera coroaenajacoon. <sup>17</sup> Cana Curuaanaa Jesocurisito Inaca necaohachaain nenea Cana Coaunera cajene bajaauun, inara rai inara suujue cuhane chacoitucuhin neeichene jaanu tihane, nii caje inara aina niicha ichana jerei coitucuhin, jelai amuritoheriin Acanhane coitucuhin neeichene coina. <sup>18</sup> Chaen nechu, “Naaonjoain cohajihacachene coinete cana raain nera,” naain coitucuhichene coina inara suujua que coitucueratiha Cana Coaunerane coina caje bajaauun. Jataainte itolere caohacha amurijiriin necaohachae satiin rai cachaneein nenacaauru que banihateein niicha rucujuei. <sup>19</sup> Nii rijijieeinechu chabana satonoelanaala nenea niicha ichana nainei ichaain, esenetaeranein nenea coina ichaane coitucuhichene coina caje bajaauun. <sup>20</sup> Nii jeelai jataain laraajiin mijjainetiin nenea niicha ichana naineite coaratelu, o caje rai Calaohi Jesocurisito ichateein que jaurineein tein, <sup>21</sup> itolere cocoainanacaaihuri, curuaanaacuru, naaonjoainuri amurijiriin cocoainanacainein niha ena janonaa que, chaen nii baiha neeni janonaa que, naaonjoain quene coina. <sup>22</sup> Nitohaneein itolere curuaanaaneein Jesoso cocoainainte, satiin niicha ranojoihunru, rai cachaneein nenacaauru iclesia curuaanaaneein telu, acaauru suujua raujiaeranein nihane coina. <sup>23</sup> Nii jaunte, satiin niicha ranojoihunru- rai jaberoco iclesianein neeuruhane jaun, itolere que Jesocurisito corihaneranein neeure. Nii Jesocurisito corenihate ne satiin itolere. Nihei colane nenea nainihei itolere cautene rijihuru.

## 2

### *Jataain cana belaiha Cana Coaunerane corenihate cana osa caje nichoterichaacheein*

<sup>1-2</sup> Jauriaalute, ichaaoruha cana rai chauratane sacutaain nenacaauru cachaaurune rijijieein, baaso ichaechajeein osaque nesarujeein ichaohichene jaun, nitajanaaneein nerejetocoichelu, Cana Coaunera coitucunaa jeriheichuru suujua saruera moconajaera inara suujua saruhane rijijieeincha ichaohichene jaun. <sup>3</sup> Nitohaneeinte jauriaa joaereein cana suujua letono rijijieein, baaso ichaechajeein jerichaachene rijijieein ichaorejeto-coachelu satiin. Nii jerichaachene rijijieein, cana suujua letononeein baaso ichaechajeein, osa que nesarujeein ichaohacachelune jaunte niqui, cana casetecaane rai nelu Cana Coaunera. <sup>4</sup> Nete jataain cairichaaajoaain cana coaraain cana belaihane jaun, nii osa que nesaruhin inae nitajenaa neein nihacachene jana, <sup>5</sup> rai Calaohi Jesocurisito aina cuaain, cana osa caje cana coulucohin nelu Cana Coaunera, chabana nitajenaa charanejeein nenea ichaonaa que ichaohin nenea nainichaachene coina. Jataain caohachanijihane jaunte, inara osa caje nichoteeichene jaanu terate inara rai. <sup>6</sup> Nii jeelai Acate, inae ohacachene bana, nitaje rai niha cana suujuene jana, o caje rai Calaohi Jesocurisito ichatihane jiniichaain cana suujue ichateein raain, rohan cana suujue lauriaelu dedeeu. <sup>7</sup> Nitohaneeinte ichaelu, caa baiha rai Cojoanonaa neeni que neein jataain cana belaiha rai Calaohi Jesocurisito aina cuaritaainne coitucunojoneein nihane coina. <sup>8</sup> Inara belaiha Cana Coaunerane jaunte nii esenetaaichene jaan aina cuaain nii nichoteeichene jaan raain neeiche. Nii jaun coatiha inara raajenihane inaraacha eruinein nihei. Acate inara rai Cana Coaunera tenojoneein ne. <sup>9</sup> Coatiha inara raajenihane inaraacha ichai que nii inara osa caje nichotiheeiche. Niicha ichoteratenohineeinte nii inara osa caje nichoteeiche. Nii jaun nainiheeiche inara raajenihane, nii inara osa caje nichotenaa rijitiin, nii que ereein necohasitaachene. <sup>10</sup> Acate rai Calaohi Jesocurisito aina cuaain cana coaunaain

nelu, coujuriu rai cachaneein, aca- Cana Coanera nihane corojeein, ita belaa'in, chaa'elai lateein neeuruha leeo'chaaurune, aca'auru corootajane'in, naaonjoa'in nii inoaenlu coaausihalune rijijie'in nihacachene coina.

*Jesocurisito corenihate, leeo'chane'in nii chuni coaraelanaala ita aina raotojoe'in nihacache*

<sup>11</sup> Inara Jorionene'eichene jaunte, "Jaberoco cari moloelanaala nenaca'auru," na'in inara curuaate'eure Jorioocuru. Jana aca'auru Jorionecuruhanete, rai jaberoco cari molooruhane jaun: "Canate laen, Jaberoco cari moloorera ne'in curuaaca'ache," na'in ra'aje necurujuate'cure. <sup>12</sup> Esinaente chuhisi jauria'alu, inara Jorionene'eichene jaun, Jesocurisito cachanee'in nena' nainelanaala, niheichu Isaraelitacuru rene turuhin, ita rai ere'in, naaonjoana nainerejetene'eichelu, nii que coacuhin neeuche. Chaen techu, nii niicha ichanenu naitoonjoan tenaa nainenelu inara rai Cana Coanera, inara que jaolecohane jaun. Nii jaunte colane nena' rijijie'in, inara corootajanerihanine cohana coacuelanaala nitajenaane'in neeichelu. <sup>13</sup> Nete sati'in coreniha ohalu rai Calaohi Jesocurisitone jaun, nii rai coichana aina cua'in coreniha ati'in Jorionene'eichene sai'jie'in inara ra'in ne, inara netonai esenetaa'ichene jaun. <sup>14</sup> Nii Jesocurisitote, canaca'anu Jorionichaanune, inara Jorionene'eichene aina ita que nejeratenaane'in ita coarajena' caje, ita jaberoco que jaberoco'naa rijijie'in raotojoe'in ita belaa'in, ita corootajane'in, naaonjoa'in nena' coina, nii ita que nejeratenaane'in nihacachene jaan itajee'in, lelaurijiei caje nena' rijijie'in rai cachanee'in cana te. <sup>15</sup> Nitohane'einte nii tonora'in niha cachane coina nena' rauhi cacha relaalune jaan itajelu nii Jesocurisito. Nitohane'in itajee'inte, le laurijiei caje nena' rijijie'in cana ra'in ne, jiniiquiin raotojoe'in ne'in le laurijie'in rai cachanee'in nena' coina. <sup>16</sup> Canaca'anu Jorionichaanune, inara Jorionene'eichene aina lenone'in, inara loreri asaa'e turunaa nainelanaala, naaonjoa'acaanune janate, coroso que ohin nii itajee'in, jiniiquii raotojoe'in Cana Coanera cachanee'in nena' coina, ita jaberoco que jaberoco'naane'in cana te Jesocurisito.

<sup>17</sup> Nitohane'einte Cana Coanera cachanee'in nena' nainene'eichene caje, coreniha inae canaca'anu aina jiniiquiin rai cachanee'in nihacachene coina, cana rai nii enachasine ichaonaa que ichaorichaache'eine bera Erenaa Raotono turua'elu Jesocurisito. <sup>18</sup> Jata'in caohachate ichae cana rai Cana Coanera, rai Calaohi Jesocurisito aina cua'ainte coreniha Jorioniheichuru, Jorioocuru, leeo'cha'auru cacha'auru, naaonjoaihunru aina leinji'in rai Suujue'cha coreniha rai inaca Cana Coanera rene turunaa nainicha'ache sati'in. <sup>19</sup> Aihane jaun inae enene nejelau natane edaa ichaonaa cacha rijijie'in nihee'iche. Inae inara netona'ite, aihuruha Jorioocurune rijijie'in ne inara rai rauhi. Jerichane'jee'in rai cachanee'in neeuruha Jorioocurune rijijie'e'inte, inara netonai, rai cachanee'in nee'iche. <sup>20</sup> Inarate loreri ichacuruha ichara'aurune rijijie'in, loreri ichanohi rijijie'in nee'iche. Nii jaunte, nii loreri nunuhene'in nena' ajeri rijijie'in neeuruha Jesocurisito cocoainanohichuru afosotooru aina *profetacurune* jana, inara aca'auru ichoae teno'jone'in nee'iche. Jana Jesocurisitote, nii loreri ichoae satonon-ihana nuna'era aina janori bucunee'in ne. <sup>21</sup> Charijie'e'inte'inti loreri jaane, jauriaane'jee'in anesijia temuhin jita'in bucute'jee'in loreri besautiae ichara. Nii rijijie'in techu Jesocurisito ranojoinicha'achene, inae sati'in jiniiquiin rai cachanee'in nihacachene jaun Cana Coanera loreri rijijie'in nihacache. <sup>22</sup> Nii rijijie'in techu Jesocurisito rano'jone'in rai loreri Teenforo rijijie'in nee'ichene jaun, inara suujue jana ichoae Cana Coanera Suujue.

### 3

#### *Jorioniheichuru rai Cana Coaunera ere beebejihane coina letononiha Faborone*

<sup>1</sup> Nitohaneeine canu Faboro nichaaunne, Jesocurisito coreniha caresero cuhane neeun, inara Jorioneneeichene rai caohachanuque. <sup>2</sup> Inae coitucuhichene rijijieeinte, jataain inara belaihane jaun, nii inara rai caohacha icharichaaaine beebejeranu que canu teein nelu Cana Coaunera. <sup>3</sup> Acate canu que nii asinojoneein coitucueraelanaala nenea niicha ichanenu coarateein coitucuerate, nii inara rai beein laenacaaunne rijijieein. <sup>4</sup> Inae ereretaain coaraquichenete, esinae rauhijiriin Jesocurisito aina cuaain Cana Coauneraacha ichaneni asinojoneein nenea coitucuhanune coitucuriquicheein. <sup>5</sup> Coatiha niqui nii chuni que nii coitucuerateein niheilu jauriaa. Nete inae enene rai afosotooru, rai *profetacuru*, naaonjoainuri que coarateein coitucuerate rai Suujue aina cuaain Cana Coaunera. <sup>6</sup> Niicha ichaneni asinojoneein coitucueraelanaala nenea niicha coitucuerateite, nii osa caje cana ichoteraanuneein nenea esenetaauruha Jorioniheichuru netonaine jaun, inae acaauru netonai Jorioocuru rai niicha teeni raauruhane rai neeure. Inae acaauru netonai, rai jaberoconein neeuruhane jaunte, rai Calaohi Jesocurisito aina cuaain niicha teeni eroraneein neeurureein.

<sup>7</sup> Jataain baaso ichaechajeein ichaorejetocaaunne saijieeinte, itolere ichana nainihane jaan ichaain, quichao coreein, niicha ichanenu beebejihane coina canu telu Cana Coaunera. <sup>8</sup> Nitohaneein leeochoaauru, rai cachaneein nenacaauru amurijiriin baasoneein chaque nelatenihanune saijieeinte, canu janijiin canu cocoainain Jorioniheichuru rai janiinacajelanaala caohacha icharihani Jesocurisitone que, caohati erenaa beebejihane coina canu raain nelu. <sup>9</sup> Chaen techu niicha ichaneni itolere bana coitucueraelanaala asinojoneein nenea coarateein, inara que coitucueratihanune coina caletoe nii itolere Coauneranein nenea Cana Coaunera. <sup>10</sup> Nitohaneeinte ichaelu, ena caje coauneein janijiin niicha ranojoihunru aina cuaain, itolere niicha coitucui ichana nainihane coaracuruha dedeeu mijiainetiin nenacaaurune coina. <sup>11</sup> Cana necoaauna ajiniha caje coauneein, chabana satonoelanaala inae nitohaneein icharihanine coina coausihalune jaunte, nii coaualune rijijieein rai Calaohi Cana Curuaanaa Jesocurisito aina cuaain ichae. <sup>12</sup> Nii jaunte rai calaohi Jesocurisito aina cuaain inae rene turunaa nainerichaacheein, tonajelanaala acanihanee esenetaacachene jaanu teranihanee coitucuhin. <sup>13</sup> Nii jaun nainiheiche, inara coreniha caa caresero cuhane nihanune que nererojoecaain, inara relaanune jaan rijijieein neeichene jianein neeichene, nenacaanejia inara rai caohacha ichaane ainun, que nelararajiaain neeichene coina.

#### *Naaonjoaainte cana belaiite Cana Curuaanaa Jesocurisito.*

<sup>14-15</sup> Nii corenihane, satiin rai cachaneein dedeeu, caa cana rai chauratane que, naaonjoaain laurilauri neinichaachene Inacaneein nenea Cana Coaunera bajanajacoon neseonriaain. <sup>16</sup> Jerichanejeeinnechu inara rai, Suujue aina cuaain chachana naineein laraajiin neeichene coina, acaihaniji rai jataain caohachaneein nenea tiha inara suujuaune coina Cana Coaunera bajaan. <sup>17</sup> Chaen inara suujuaun ichaonaa nainiha esenetaaichene coreniha Jesocurisito Suujuene coina, nitohaneein nii jataain inara belaiha Jesocurisitone esenetaain, jerihane rijijieein neein sacuhichenete, <sup>18</sup> satiin esenetaeraauru aina jiniiquiin, naaonjoaain itolere cautenu rijihuru ichaa cana belaiha Cana Coaunerane coitucuriquicheein. <sup>19</sup> Nitohaneeinne jataain coitucunaa nainichaachene amuritoheriin cana belaiha Cana Coaunerane

coitucuhichene coina Cana Coaunera bajaun, Aca Acaneein nihane coitucuhin, Acaacha cohajeein queecha jaaequiin neein leeochoa coacuelanaala Cana Coaunera ainaacha neeichene coina.

<sup>20</sup> Aihane jaun, Acaneein nihane coitucuhin Aca coroaecaachenete ne, jataain coaaucaachene amurijiriin cana aina cuaain itolere niicha ichana nainei ichana nainihane jaun. <sup>21</sup> Jerichanejeeinchu coroaecuruhine, rai Calaohi Jesocurisito aina cuaain niicha ranojoihunru cachaauru, cana janonaa besaute que turuhanereein tiaain. Nitohanemiin.

## 4

*Cana Coaunera Suujue aina cuaain ita jaberoco que jaberocoo rijijieein neeuche.*

<sup>1</sup> Nii jaunne Jesocurisito coreniha cau caresero cuhane netiin atiin inara rai aitoon, esinae rauhijiriin caohachaaain inara suujua coaraain Cana Coaunera ranojoneein neeichene jaun nitohaneein ichaaoche.

<sup>2</sup> Leeochoaauru amurijiriin nena coacuelanaala, leeochoaauru belaaain, chatohanai ichaa chunocoha inara leeochoaaurune niha natiin que inara suujua acateein abaantaain, jiniiquiin ita belaaain neeuche. <sup>3</sup> Atiin rai Suujue aina cuaain inara coroatajanihane aina, itolere bana jiniiquiin ita suujua rijijieein coacuhin jataain raotojoein neeuche. <sup>4</sup> Leinjiin Jesocurisito jaberocohachate iclesianein ne. Jerichanejeein techu leinjiincha ne Cana Coaunera Suujue. <sup>5</sup> Leinjiin Jesocurisitohachate Cana Curuaanaa ne. Leinjiinchate ne cana osa caje cana ichoteraanu canaacha esenetai. Jerichanejeein techu leinjiincha ne cana coulucohin cana cojunacatecuruhane jaan baotisimo. <sup>6</sup> Nii rijijieein techu leinjincha ne Cana Coaunera, satiin Inacaneein, satiin ichoae neein, satiin suujue cuhane neein aina cuaain itolere icharanein.

<sup>7</sup> Nete laen tenaa jerihane jaancuru rai le cachanichaachene nainetiin aina cuaain cana que niicha icharatei ichaain nihacachene jaanu te. <sup>8</sup> Nii quete:

“Dedeeu cuhinte jiniichaaain caseteconein nenacaauru amaain, cachaauru que niicha icharatei ichacuruhane jaanu te,” naain belu rai Quiricha Inoaensi cuhane.

<sup>9</sup> Nii Dedeeu cuhalune que aitohane jaante, jauriaanejeein cana rai chau-ratane que turuhin nihalune baiha, jelaiha cuhalu dedeeune que aite.

<sup>10</sup> Nii jeelai dede caje unaate, jelaiha dedeeu cuelu, Aca acaneein itolere-neein dedeeu netonai Acaneein nihane coaratihane coina. <sup>11</sup> Acatechu, tabaauru sacuureraauru cocoinae afosotonein curuaatenajaain. Jana tabaaurute cocoinae *profetanein*, jana tabaauru nosa caje jianacoo neeururichaaain cachaaurune beranein, jana tabaauru esenetaain rai cachaneein nenacaauru beraicha fastoronein cocoinanajaen, jana tabaaurute acaauru relaeranuune que cocoinae. <sup>12</sup> Nitohaneinte acaauru relae ita belaaain ita coroatajanein neeuruhane nefaa rai jaberoco iclesiane coina,

<sup>13</sup> jerihane rijijieein, jiniiquiin ita suujua rijijieein coacuhin niicha ichanenu ichaane coitucuhin nihacachene coina. Nitohanein nihacachenete laen, esinae rauhijiriin itolereenein jiniiquiin canaacha esenetai aina ijiin, aiha Jesocurisitone rijijieein nerichaachein. <sup>14</sup> Inae laen aihuruha canaanainurune rijijieein, joaereein cana suujua letonoacha ichajeein, joaenreein cana relaera esenetaelanaala neein nechu jataain baaso que cana coritana jeriha cachaauru baasonein ichaonacaaurune nihanatiin esenetariaacachein.

<sup>15</sup> Nenacaeneintejian caohachae, esinae rauhijiriin ita suujua rijitoein, ita rai ereerejeein, jeriha Jesocurisitone rijijieein ijieein ichaohacachene caohachae, aca cana suujua temura rijijieein nihane jaun. <sup>16</sup> Nii jaunte

rai jaberoconeein nenea rijijieein neein ita suujua rijijieein coacuhin raotojoein nihacache. Nitohaneein neeinte, cana rai niicha tei aina cuaain jiniiquiin canaacha ichana nainei ichacaachene aina raotojoein ijiin nihacache.

*Jesocurisito ainate, enachasine ichaonaa que ichaohacache.*

<sup>17</sup> Atiin Jesocurisito corenihane, caa que inara rai erenaa jereeun. Jiaonriha inae nenacaaen aihuruha, Cana Coaunera coitucuuruhine rijijieein ichaohichene. Acaaurute joaereein suujua letonohacha ichajeein, niicha ichai coitucuelanaa chachaaain neeure. <sup>18</sup> Nii jaun coatihana niicha tei ichaonaa que ichaauruhi baasohacha coaauca acaauru suujuane jaun, nii niicha tei ichaonaa que jaolecooruhane jaun. <sup>19</sup> Nitohaneein nauhacaa acaauru suujuane jaunte, inae ichaonaa baaso que ichaohin, rai nichao colalajilanaala itolere baaso ichajeein ichaaoore. <sup>20-21</sup> Nete laen inara nabana nitohaneein ichaohichene coataa, Jesocurisito coitucuhin neeiche, esinaen rauhijiriin naitoonjoan aonaain tonoraain neeuche. <sup>22</sup> Aihane jaun nii jauriaanejeein inara ichao, nechuhane inara coritaa inara suujuane sacuha baaso ichajeein ichaohichene jaan jianeein ichaaoche. <sup>23-24</sup> Inarate inae naineeiche inaraacha coacui coreein, inara suujue coreein, naaonjoain ichaohin, nii ena jerihane rijijieein ichaohichene coina Cana Coaunera tenojoin ichaonaa que ichaohin, inae esinae rauhijiriin ichaonaa esine que ichaohichene coaraatein neeichene caohachae.

<sup>25</sup> Aihana jaun inae ita jaberoco que jaberoconeein nihacachene jaun, le cachanequichene inae nainiheeiche inara amute cacha coritaaichene. Chaelai que erenaa jeriquichene, esinaen rauhijiriin nohanelanaala aitocuche. <sup>26-27</sup> Jiaonrihachu ita que nejerateein ita sonaa coacuhin neeichene. Itaque nejerateechene nii rijieoritiin baitecuche. Coa inara suujua cuhane enoha moconajaerane jaanu tera tocohanein sonafaajeein obaacache. <sup>28</sup> Asijiautoneein ichaorejeti, asijiauhane jianeein amihaneenete, chaelai sirijieecane, chalateraauru rai chaelai tenaa nainemii. <sup>29</sup> Jiaonriha erenaa baaso que ereeiche leeochoaauru raine. Erenaa caohacha nejesina que ita rai ereeuchete, caohati erenaa que aitocoichene aonaain, jeelai amuritoheriin esenetaain tonoraain neeuruhine aohanraauru cachaauru. <sup>30</sup> Inae ecu tihane bana, inara osa caje nichoteeichene coina jelai tein rai cachanequichene jaan cojunacanein inara cojunacatiha Cana Coaunerane jaan rai Suujue nocoeje chanuera tocohanein nenea nainiheeiche.

<sup>31</sup> Jiaonriha obajeein, ita cotaairiin, ita que nererojoecaaeriin, leeochoaauru que ereein, naaonjoain neeichene. <sup>32</sup> Charijieinteeinti Jesocurisito coreniha, inara osa que suujua acateein ne Cana Coaunera, nii rijijieein ita que inara suujua acateein, jiniiquiin ita belaaain ichaaoche.

## 5

*Chatohanein nainere ichaoha Cana Coaunera cachaaurune.*

<sup>1</sup> Jataain inara belaaain rai calaohinein tein inara raa Cana Coaunerane jaun, inara netonai belaaain naitoonjoan tonoraain ichaaoche. <sup>2</sup> Charijiein teeinti rai coichana aina cutaain jataain cana belaihane jaun chaelai jujui mocohin que Cana Coaunera belaihuha saseredotecurune rijijieein cana coreniha rai jaberoco telu Jesocurisito, nii rijijieein inara coichana aina cutaain jiniiquiin ita belaaain ichaaoche.

<sup>3</sup> Inae inara, rai cachanein neeichene jaun, inae nainiheeiche leeochoene coacuhin, niheichu que ninichaajeein, erenaa baaso que ereein,



inaraacha lateeicha que coacuhin, barijiitiin, naajoain ichaonaa naini-  
heeiche. <sup>4</sup> Jiaonriha erenaa baaso que ereein neeichene. Coatiha cha  
que nelatejeehai niritiin iriha cachane. Nenacaaentejian, niritiin erenaa  
coacuelanaala, Cana Coaunera corojeein ichaohichene caohachae. <sup>5</sup> Inae  
coitucuhiche, sinijeranelanaala nenea ene aina ichaohin, erenaa baaso que  
ereein, niicha lateeicha que coacuhin, barijiitiin ichoae, nii Cana Coaunera  
aina Jesocurisito Cojoanonaa que ichaonaa nainihe. <sup>6</sup> Jiaonriha rai suujua  
caje rocohin joaenreein inara rai chaque iriha cachane tonoraain neeichene.  
Nitohanein joaenreein rai suujua caje rocohin erenacaaaurute, raujiaeri-  
lanaala casetecareein Cana Coaunera, rai aitoonjoan tonoraelanaala que  
jaolequiin aitocuruhane coreniha. <sup>7</sup> Aihana jaun acaauru rijitiin ereein,  
acaauru rijijieein ichaonaa nainiheeiche inae inara. <sup>8</sup> Inae nocohena tabai  
jana nenea rijijieein ichaorejetocoichelune caje, ena Jesocurisito esene-  
taain naitoonjoan tonoraachene jaunte, inae nii nocohena caje jianacoon  
ena ichaohiche. Aihane jaun cojoeriu jianacoon ichaohichene coara-  
teein, <sup>9</sup> chaelai lateein neeuruha leeochoaurune acaauru corootajanein,  
esinae rauhijiriin baaso ichaelanaala, niheichu nohanelanaala, naaon-  
joaain ichaaoche. <sup>10</sup> Atiin Cana Coaunera jerenohicha ichajeein ichaaoche.  
<sup>11</sup> Jiaonriha nii nocohenaanau nenea rijijieein, chachaeraauru cachaauru  
rijijieein ichaohichene. Acaauru rijijieein ichaonaa coacuelanaala, nii noco-  
hena caje acaauru mitaachete, acaauru netonai jianacoon mituhin, niicha  
ichai coaraain coitucuhin ichaauruhine. <sup>12-13</sup> Jataainte coejenacaain benaca-  
tocojoelanaala nihanatiin, asinojoneein chachaain neeure. Nete inae nii  
nocohena caje mitanajaaichene jianacoon neeuruhane, jitariin niicha ichai  
coitucuhin coaraain neeurureein, inae jianacoon nocohena caje mituhin  
neeuruhane. <sup>14</sup> Nitohanei que tejian:  
“Sininaa rijijieein neeichene caje  
inara nota jirichaauche.  
Ohin nitajeeichene rai neeichene caje  
Jesocurisito aina ichaaochete,  
inara que itolere coarateeinete,  
coaraain coitucuhichera,”  
naain ne erenaa. <sup>15</sup> Aihana jaun chatohanei ichaquichene que necohala-  
jiin neeuche. Jiaonriha chacoitucuhi cacha rijijieein ichaohichene, itolere  
coitucuhin, itolere que nainaan ichaaoche. <sup>16</sup> Atiin necohalajiin neeuche,  
jataain baasoneein ichaonacaauru cachaauru cataaun ichaohichene jaun.  
<sup>17</sup> Jiaonriha chacoitucuelanaala nenacaauru cachaauru rijijieein, joaereein  
chachaain nenea coacuhin neeichene. Atiin jeriha Cana Coaunerane ri-  
jijieein inaraacha ichai ichaain ichaaoche. <sup>18</sup> Jiaonrihachu ajeeichene,  
nabana ajenaacha que coacuhin baasohacha ichajeein ichaohichene, inara  
ichao aasajeein neeichene coataa. Nenacaaen tejian, ajenaa coacuelanaala  
Cana Coaunera Suujue jerenohi nejesinaacha que coacuhin, jerihane rijijieein  
ichaohichene caohachae. <sup>19</sup> Nejesinajeein ita rai salmo beebejeein,  
nenatenanaja que nenateein, inara suujua aina cutaain Cana Curuaanaa  
corojeein rachoojoeuche. <sup>20</sup> Itolere bana Cana Curuaanaa Jesocurisito  
aina cuaain, Itolere Inacanein nenea Cana Coaunera coroaecuche itolere  
niicha tei coreniha.

*Raotojoein sinijera aina ichaauruhine Jesocurisito ranojoihunru.*

<sup>21</sup> Jesocurisito que inara suujua acatequichene coarateein, jiniiquiin  
ita suujua rijijieein ita belaaain ichaaoche. <sup>22</sup> Enecuru nihanatiin jeri-  
iha Cana Coaunerane rijijieein jerecuruha acaauru lanaaurune rijijieein

neeuruhine. <sup>23-24</sup> Charijieein teeinti niicha ranojoihunru iclesia neein nenacaauru coturineein niha Jesocurisitone jaun, rai jaberoconeein itolere-  
neein jerihane rijijieein neeure niicha ranojoihunru, nii rijijieein rai sini-  
jiera coturineein neeuruhane jaun, rai lana jerihane rijijieein nere tonoraain  
ichaaoruhine enecuru. Nii jeelai Jesocurisito techu, nii rai jaberoconeein  
nenacaauru iclesia ichoterateraneein ne. <sup>25</sup> Charijieein teeinti rai coichana  
aina cutaain, jataain niicha ranojoihunru belaihane jaun, acaauru coreniha  
rai jaberoco telu, sohin jaaoruhane coina Jesocurisito, nii rijijieein rai  
coichana aina cutaain sinijiera jereein belaihuruhine acaauru lanaauru. <sup>26</sup>  
Nitohaneinte niicha ranojoihunru coulucoelu rai naitoonjoan aina cuaain,  
acau que camujuaain, <sup>27</sup> esinae rauhijiriin niicha ranojoi iclesia neein,  
jelai teein rainein que banijiaain necaohachaain osa colane neeuruhane  
coina. <sup>28</sup> Charijieein teeinti ii rai caohachanu ichaain neei, nii rijijieein  
ii comasai rai netonai caohacha ichaain neeu. Rai comasai belaaichoa  
cachate, raaje rai caohachanu ichaa aicheein. <sup>29-30</sup> Nihei chuni raajenihane  
rai jaberoco que nejerateein nei. Nitohanein nena coacuelanaalate,  
raotojoein lenoneein, rai jaberoco colalajiin ichoae. Nii rijijieein techu,  
rai jaberoco rijijieein neeuruha niicha ranojoihunrine jaun, acaauru  
colalajiin ichaolanajaen Jesocurisito. Canate nii jaberoconeein nihacache.  
<sup>31</sup> Nii quete:

“Nii jaunte rai inaca aina rai neba naaonjoain ratiriin, rai sinijiera raain  
nereein cache, ita jaberoco que jaberocona rijijieein neeuruhane coina,”  
nae Cana Coaunera Quiricha cuhane. <sup>32</sup> Niite asinojoin rijijieein nihane  
jaun, coitucunaa nainene chuni. Nene laen canu, aiha niicha ranojoinunru  
iclesia aina Jesocurisitone que aitoon. <sup>33</sup> Aihane jaun le cachaaauru rai  
jabereco belaihane rijitoein rai sinijiera belaaichoa neeuruhine. Enecuru  
netonai rai lana que suujua acatein, niicha jerei rijijieein neeuruhine.

## 6

### *Inaca ere tonoraain ichaaoruhine acaauru calaohichuru.*

<sup>1</sup> Ranunacuru, enamanaacuru, naaonjoaineeichene, Cana Coaunerane  
belaichene rijijieein inara inacaauru belaaichoa acaauru ere tonoraain  
neeuche. <sup>2</sup> Jauriaa nejeein tonoraain ichaoha cachane, rai tihane coina  
Cana Coaunera aitoonjoate: “Ii inaca, ii neba, naaonjoainuri belaihu  
Cana Coaunera belaaichoa rijijieeine, <sup>3</sup> raotojoei ichaonaa que  
nerausiaaejeein ichaohi,” naain ne Cana Coaunera Quiricha cuhane.

<sup>4</sup> Aihana jaun, inara acaauru inacaneein, inara belaaichoa inara  
relaa Jesocurisitone rijijieein, inara bereecuru baijiaelanaala  
belaain, chatohanei ichaane coataa suujuatein relaauche.

<sup>5</sup> Nii rijijieein chu caa cana rai chauratane que acaauru fatoroonein  
nenacaauru ere tonoraain, que suujua acatein, amurijiriin nena  
coacuelanaala, que asinojoein chu coacuelanaala, naaonjoain neein  
letoaane jaan ichamiin rai cache, Jesocurisito rai ichaane rijijieein.  
<sup>6</sup> Cojuriu Cana Coaunera cachaneein neeichene jaun, jerihane  
rijijieein inara fatoroon icharatenohin ichaain neeuche. Jiaonriha  
nechu inara aina caohachaain nihane coina, notaracaaecha  
caohachaain chachaain neeichene. <sup>7</sup> Inara letoaane jaan  
ichaquichene, jiaonriha rai ichaquichene que coacuhin ichacache,  
Cana Curuaanaa Jesocurisito rai ichaquichene que coacuhin,  
corajeein ichacuche. <sup>8</sup> Fatoroon cachaneein neein, fatoroon  
cachanelanaala, naojoain netiin, caohacha ichaa cachane, rai  
cainarihani cana Curuaanaa, niicha ichai rijijieeine coitucuhin  
neeuche.

<sup>9</sup> Jana inara acaauru fatoroon nequichene, nii leechaneein chuni coaraeniha Cana Coaunerane coitucuhin, nii inara que suujua acateein jeriquichene rijijieein neeuruha inara cachaurune rijijieein, inara netonai acaauru que inara suujua acateein nii chatohaneein acaauru tenaa coacuhelanaala, naaonjoaain acaauru belaaain neeuche, inae acaauru aina jiniiquiin Cana Coaunera cachaneein neeichene coitucuhin.

*Jesocurisito aina cuaain laraajihurichaain niicha ranojoihurine.*

<sup>10</sup> Jesocurisito aina jiniiquiin neein, nii itolere que laraajiin neeichene jaanu niicha teenu aina cuaain, itolere que laraajiin neeuche canejeraauru.

<sup>11</sup> Nabana inara coritaa moconajaerane esenetaain neeichene coataa, que acatena nainequichene coina, inara biji achune, inara rai Cana Coaunera tenojoi que acateein tonoraelanaala neeuche. <sup>12</sup> Coatihana cana tocohaneein cachaneein bucuhin nena, cana que nejerateein cana saruhin nihein. Acaaurute moconajaera letononeein dede caje uhin, nechu joaenreein baasoneein cacha saruhin, Cana Coaunera coitucuelanaala nenacaauru que niicha ichana nainei ichaane coina letononeein nena neeure. <sup>13</sup> Aihana jaun inara rai nitohanei acateein neeichene jaanu que, inara rai Cana Coauneraacha tei aina jatoroaain neeuchete, chatohaneein inara tenaa coaauca moconajaerane niha natiin, abaataain amuritiin neeiche. Inaen leesajeein jatoroaain neein amuritohichene, nii namuritoratena coacuelanaala neeuche.

<sup>14</sup> Nitohaneein namuritoratelanaala, niheichu nohanenaa coacuelanaala, naaonjoaain neein esinaen rauhijiriin ichaohichene que necouhatein neeuche. <sup>15</sup> Itolere bana jatoroaain neeuchete, Ena Nena ichaonaanaja que jiniiquiin raotojoein neriquicheeinne coina beratenojoi beebejeeiche amuhemujueein. <sup>16</sup> Nii itolere caje inara ichoteratena nainera inaaraacha esenetai, moconajaera rai usi cofatojoi bujuatein caje inara ichoteratemiin.

<sup>17</sup> Jana inara rai Suujue tenojoi rai Nere, inara biji achune neeine. Jana nii jianacoon cha ujuaihonelanaala neeichene coina inara mitaera, inara asihoneein inara coturi bujuatera niha neeine, chatohaneein inara amuritonaa nainiha moconajaerane coataa. <sup>18</sup> Itolere bana Cana Coaunera bajaebajajeein, rai Suujue jerenohin rijijieein neeuche. Itolere que nainaaain jatoroaain inara suujua corelanaala neein, satiin rai cachaneein nenacaauru coreniha Cana Coaunera bajaauche. <sup>19</sup> Bajaachene naineein, atiin canu coacuhin canu rai netonai bajaauche, canu rai laraajiin ereein nihanune jaanu teeine ne, aina laraajiin ereein Aca cana osa caje cana ichoteranihane beebeje coitucuelanaala nenacaauru raite coitucuurumii. <sup>20</sup> Acate corenra niha canu tein rai naitoonjoan beebejihanune coina caletoaain ne. Nii corenihate caa caresero cuhane canu enoaauruhane jaun, ena caresero cuhane neeun. Chaque casilanaala, Acanihane beebejihanune coina canu rai atiin bajaauche.

*Necoiha Faborone.*

<sup>21</sup> Canu rai Cana Coaunera tenojoin amihanenaa que casuujua rijijieein cacorataanera cana nejera Tiquicote, inara rai canuhacha ichai been, canu ichaone maajeein bereein. <sup>22</sup> "Naaonjoaainne nihacaanu," naain inara rai been, inara suujua aninoane coinane nii inara rene letoaaun. <sup>23-24</sup> Cana Inaca Cana Coaunera, rai calaohi Jesocurisito aina esenetaain jiniiquiin ita belaaain raotojoein ichaauruha canejeraaurune jaannu teeine. Jerichaneein chu itolereneein, satiin belaaain naitoonjoan rijijieein jianelanaala nenacaauru canejeraauru rai, raotojoein neeuruhane jaanu teeine.

## **Filipoo nenacaauru rai Faborohacha letoai**

*Caresero cuhane neein Filipoo nenacaauru Cana Coaunera coitucuurera rai laenaa Faborone*

<sup>1</sup> Canuna Faboro neeun. Timoteeo ainane Cana Coaunera Calaohi Jesocurisito cachaneein nihacaanu. Satiin nii Filipoo neiniquichene Cana Coaunera Calaohi Jesocurisito esenetaeraauru raina caa laenain letoacaanu. Saain nii inara beraihurera ichauhenaauru, chaen nechunii inara coroatajaneraauru- diaconooru, naaonjoainuri rai reein tiaaina caa letoacaanu.

<sup>2</sup> Raotojoeein neeichene coina, inara belaa'in inara coroatajaneene Cana Inaca Cana Coaunera, Cana Curuaanaa Jesocurisito, naaonjoain.

*Cana Coaunera Ere esenetaeraauru rai Cana Coaunera bajaaj Faborone*

<sup>3</sup> Inara coaaucaanne naineeine, "Nariha" naaun Cana Coaunera rai inara coreniha. <sup>4</sup> Cana Coaunera bajaanunena, rachoojoe'in bajaau'n inara rai, inara coroatajanihane coina, <sup>5</sup> nunuhe caje coaane'in, Cana Coaunera Calaohi Jesocurisito Ere que cacha relaacache jiniiquiin ena netojoe'ina jaun. <sup>6</sup> Rauhijiriina coitucun, inara suujua rucujee'in coriha Cana Coaunerana jaunte, jerichanejee'in rucuhejee'in sacureein, enacoane'in turuha rai Calaohi Jesocurisito nereein tiaan. <sup>7</sup> Cacoichana aina cutaain satiin inara belaihanuna jaunte ne carai rauhi, nitohane'in inara que coaucaanne coina. Caresero cuhane nihanune janate, cacoelaain cacorataane Cana Coaunera. Chaen techu nii choae tacaain, cocoinanacaaihuri acatiha te'in cacorataane, esinae rauhijiriin jianacoo cana mitaera neein niha Cana Coaunera Calaohi Jesocurisitone que irihanune coina. Nii cacoratanihane rijijee'in inara coroatajanerichaa'in Cana Coaunerane coitucuhanu.

<sup>8</sup> Esinae Cana Coaunerate coaraje, inara belaa'in inara jeriha Cana Coaunera Calaohi Jesocurisitone rijijee'ina jataain inara belaihun.

<sup>9</sup> Jeelai amuritoheriin Cana Coaunera Ere coitucuhin, Cana Coaunera Calaohi Jesocurisito jeree'in, <sup>10</sup> nii que inara suujua coarain, inara suujua coitucuhichene coinana Cana Coaunera bajaau'n inara rai. Nitohane'in neeichenete nenere'in inara que cha, coaiteen turuha Jesocurisitone bana. <sup>11</sup> Nitohanihanete inara coroatajanere'in Cana Coaunera Calaohi Jesocurisito, raotojoe'in jiniiquiin ita coroatajane'in leeochoaauru aina ita belaa'in neeichene coina. Nitohane'in neeichenete, caohatiin inara coroatajaniha Cana Coaunerane aina cuaain rai caohacha ichaquichene coaraain, nii coreniha Cana Coaunera coroaeca cuurure'in cachaauru.

*"Chanu nihei ohanune, jerichanetoheca carai," naa Faborone*

<sup>12</sup> Aonacuchena inara rai erete aonaquiche. Caresero cuhanete niqui caenoaain, cacairichaaure niqui. Nenacaen tejian carausiaaeca catohane'in caetecure, nenacaen jeelai amuritoheriin Cana Coaunera Calaohi Jesocurisito Ere beebejihanu cau nenacaauru raine coina. <sup>13</sup> Nii jaunte Jesocurisito ere tonoracaanne coreniha, caa caseteco neein nihanune coitucure saain Roma curuaanaa rai soondarooru, saain cau nenacaauru, naaonjoainunru. <sup>14</sup> Nitohane'in caseteco neein nihanune coitucuuruhane jaunte, nii que nelararajiaain laraajiin nihei chaque casiirilanaala Cana Coaunera Ere beebejeure cana nejeraauru Cana Coaunera coitucuurera cachaauru.

15-16 Tabaaaurute caichoe ininaa coacuhin Jesocurisito ere beebejeeure. Leeochaaurute laen esinae rauhijiriin, suujua coaraain Jesocurisito ere beebejeeure cacoelaain cacorataanena jerena caun, laraajiin Jesocurisito ere beebejihanune coreniha cau casetecoo neein nihanune coitucuuruhana jaun. <sup>17</sup> Nii caichoe ininaa coaauraurute, suujua coaelanaala Jesocurisito ere beebejeeure, cacairichanaa jerena caaun niqui. <sup>18</sup> Chanu nihei caohatoha nitohanai caraina jaun. Joaenreein cacha Jesocurisito Ere beebejihanena nenacaen rachoojoein nereeeunni.

<sup>19</sup> Nitohanihana jaunna carai Cana Coaunera bajaebajaequichene coreniha cacorataanerihani Jesocurisito suujuene coreniha, raotojoein jianacoo miturichaaunine coitucuum.

<sup>20</sup> Nii jaunna chunei que necoejelanaala nihanune jereeun. Jerichanejeein cuaajeein nenacaen nauruta naurutaain Jesocurisito rijijieein nihanunena jereeun. Chanu nihei ohanune jerichanetoheca carai. <sup>21</sup> Ichaojihanunena jataain Jesocurisito ere tonoraera neein niha cureeunni. Jana ohanunena jian nenacaen raotojoein aina nereeeunni. <sup>22</sup> Jana ainihanena carijieein atiin ichaojoein sacuhanunena, cana Curuaanaa Jesocurisito tenojohin amihanenaa ichana nainereeeunni. Chariji teinti carai caohachare. <sup>23</sup> Tabaquena ohanune luhecaaun, Cana Coaunera Calaohi Jesocurisito aina niha cuhanune coina. Niite laen jataain carai caohachare. <sup>24</sup> Nete laen inara caohachanu que caohachae carijieein ichaojoein sacuhanune. <sup>25</sup> Aihana jaunna jaiti ichaojoeereeeunni, inara coroatajanichaaunne Jesocurisito ere esenetaain, tonoraain raotojoein rachoojoein jeelai amuritoheriin neeichene coina. <sup>26</sup> Nitohanihana jaunna coaiten enacoauneein inara aina nereeeunni. Nii banate raotojoein Cana Coaunera Calaohi Jesocurisito coroejeriquicheein, caohatiin cana belaihana jaun.

<sup>27</sup> Atiin coujurihu Jesocurisito coitucuera neein nena tocohaneein, inara suujua coaraain inara ichao que ichaoche. Inara coaraana uhene rijitoeun niqui, nechaainti nainerichaaunni. Jana inara coaraa uhenihanune nihanatiin, jiniiquiin laraajiin Jesocurisito ere tonoraain neeuche atiin. Nii inara aina nejeratenacaauru coasijirilanaala raotojoein neeuche atiin.

<sup>28</sup> Nitohaneein neeichenete chaque casineeichene coaracuruha inara aina nejeratenacaaurune, raajenihane Moconajaera rene taca cuururichaine coitucuha cuurureein. Nitohaneein coitucuhinte esinae rauhijiriin Cana Coaunera coreniha jianacoo neeichene coitucuha cuurureein, que acaauru notaarichaaun Cana Coaunerana jaun.

<sup>29</sup> Coatihau raujiaain esenetaaichene coinaacha jianacoo inara mitaai Jesocurisito. Coreniha necairichanaane maajeein abaantaain neeichene coinat jianacoo inara mitae.

<sup>30</sup> Ita rijitoeinte necairichanaa abaantaain laraajihacache. Inarate necairichanaa abaantaanulu laraajiine coaraquichelu. Nii rijijieeine chu nii inara rai beeuruhane tocohaneein laraajiin enanetojoein necairichanaa abaantaain neeun.

## 2

### *Suujua coaraa Jesocurisitone rijijieein inara suujua coaraain neeuche.*

<sup>1</sup> Inaderaaichene nihanatiin inara belaaun, inara coroatajaneein, inara suujua laraajiaain, naaonjoan Jesocurisito suujuena jaun, <sup>2</sup> ita belain raotojoein jiniiquiin neeuche, coujurihu Jesocurisito ere tonoraera neein nena tocohaneein. Aihuna inara coaracaunne, raotojoein rachoojoein ne.

<sup>3</sup> Coa leeochoaauru choae ininaa coacuhin, leeochoaauru que necohasitanaa coacuhin nihache. “Acaaurute jian cana amuritoherihure,” naaiche neechate caohachae.

<sup>4</sup> Coa inara caohacha nuhacha que coacuhin inaraacha ichai ichaain nihache. Leeochoaauru rai netonai caohachanu quene maajeein nelateneni coacuhin ichaain neeuche.

<sup>5</sup> Charijieein teeinti suujua coarae Cana Coaunera Calaohi Jesocurisito. Nii rijijieein inara suujua coaraain neeuche. <sup>6-7</sup> Jerichanejeein Cana Coaunera rijijieein niha natiinte, Cana Coaunera letono neein cacha neein nejanoaa natiinte, “Naaonjoaina Cana Coaunera rijijieein neeun,” naain erenelu.

<sup>8</sup> Nitohaneeinte nejanoaaain ichauhena neein letoaa Cana Coaunerana jaun, nere tonoraain leeocho ataibinae necojenaachara rijijieein coroso que ohe, Cana Coaunera rijijieein nihanatiin.

<sup>9</sup> Nii jaunte satiin leeochoa cocoainanacaihuri choae jauhecotojoeriin Jesocurisito cocoaanae Cana Coaunera, <sup>10</sup> jataain cocoainanacai neein nihane coitucuhin, nere tonoraauruha saain dedeeu nenacaauru, caa chauratane que nenacaauru, saain cana asae nenacaauru, naaonjoaihunri nihanatiin nere tonoraauruhane coina. <sup>11</sup> Jataain acaauru curuaanaa que Jesocurisito tiha Cana Inaca Cana Coaunerane coitucuhin, “Iite Cana Curuaanaa neei, nitohanein jeriha Cana Coaunerana jaun,” naain ereeuruha saain caa chauratane que nenacaaurune cointate satiin leeochoa cocoainanacaihuri choae jauhecotojoeriin Jesocurisito cocoaanae Cana Coaunera.

*Chauratane que nenacaauru rai cono rijijieein neeuruha Cana Coaunera esenetaaurerane*

<sup>12</sup> Aihana jaun, caa ena inara caje coriaae inara caje nihanune jaun, inara aina nihanune bana quere tonoraraetohichene amuritoheriin quere tonoraache. Inara suujua coaraain, raotojeein Jesocurisito ere tonoraain neeuche atiin, inara casetecaa Cana Coaunerane coataa. <sup>13</sup> Inara coroatajanerichaaain Cana Coaunera, inara suujua coaraain nere tonoraain niicha jerei ichaquichene coina.

<sup>14-15</sup> Chatohanai amihanenaa que inara letoaera nihane, nii inara letoaera que chaque ere lanaala raotojoein ichacuche, nabana baaso chaquichene inara necoejechanuha chuneine coataa. Nechu aansai ataibinae cachaauru quete laurijiraquiin neeiche. Aihana jaun coa nohanein, cacha coritaain, asijiauhin, naosatein, naaonjoaain nihache, Cana Coaunera Calahinein neeichene jaun.

Aihute neneine inara que tonaain baasoneein chaque erei. Cana Coaunera Ere tonoraachene corenihate jianacoo osa que lanaala neeichene coitucuha cuurureein nii inara curuhacaain nenacaauru, Cana Coaunera coitucuuruhi cachaauru.

<sup>16</sup> Nitohaneeinte coitucuha cuurureein, ichaonaa tera Cana Coaunera ere que ereeiche acaauru raine.

Nitohanein neeichenena raotojoein nereeunni, coaiten enacooaunein cau turuha Jesocurisitone, inacojoein laraajiin inara relanenihanune coitucurichaaunine jaun.

<sup>17</sup> Chanu nihei coaraain casohin cajaanurua Cana Coaunera Ere bihanu inara raine coreniha ne. Nenacaaenna jian raotojoein nereeunni ohanune nihanatiin, atiin Cana Coaunera Calaohi Jesocurisito ere tonora curiquicheina jaun.

<sup>18</sup> Nitohanein raotojoein nihanune jaun, carijitoein caniha raotojoein neeuche inara netonai.

### *Timoteeo letoanaa jeriha Faboro ne*

<sup>19</sup> Jeriha Jesocurisito nena, enanecoojoa Timoteeo letoaaene rijitoojoeun, inara coaraa uhane coina, inara coaraain chunocoha que carai beratihane raotojoein nihanune coina.

<sup>20</sup> Coatiha nihei nii Timoteeo rijijieein coaaucaanne rijijieein inara cao-hachanu que coacuhin nei. <sup>21</sup> Cana Coaunera Calaohi Jesocurisitohacha jerei ichana amuritoheriin acaauruhacha ichana jereeicha que coaacu-ruha saain nii leeochoauruna jaun. <sup>22</sup> Nii coitucuhichene tocohaneeinte caohatiin cacorataane Cana Coaunera Ere beenaa que nii Timoteeo, Fojiara coroatajaniha rai calaohine rijijieeinte cacorataane.

<sup>23</sup> Cha teeinti ichacurureein caniha cocoainanacaihuri. Inae nii coitucuhunena letoaaene rijitoojoeun, inara coaraa uhane coina niqui. <sup>24</sup> Jeriha Cana Curuaanaanena, canu netonai inara coaraa ureeunni enanecoojoa.

<sup>25</sup> Caraita caohachare nii cacorataaneraannu que inaraacha letoailu cana nejera Efaforoto letoaanu ichoachanihane. Acate laraajiin cacorataane camijaneeo que. <sup>26</sup> Cunaitihane coitucuhichena jaunte, nii que suujua rerohecaeriin nihana jaun jataain inara coana jere. <sup>27</sup> Esinaete chuhisi rauhijiriin banejelanaala ninauhene neein cunaitelu niqui. Nete cairichaojoaain coaraana jaun rautae Cana Coaunera. Coatiha leinjiin acaacha cairichaojoaain coaraai Cana Coaunera, canu netonai nihanatiin techu cairichaojoaain coaraana jaun rautae Cana Coaunera, ohane ena amuritoheriin jataain inaderaain nihanune coataa.

<sup>28</sup> Nii jaunna letoanaa jereun, luhecotariin turuhin inara coaraa uhane coina. Inara netonai coaiten coaraain raotojoein rachoojoein neeichene coina. Nitoanihanena canuhetonai raotojoein niha cureeunni. <sup>29</sup> Inara coaraa uhane, coroajeein belaaain raauche, coujurihu Cana Curuaanaa Jesocurisito coreniha ita nejera neein nena tocohaneein. Jerichanejein chu rijijieein nenacaauru belaihuiche. <sup>30</sup> Basijiin lanajeje Jesocurisito jerenohin ichaane coreniha oha ne. Inara raajenihane canu coroatajanenanaine nee-ichene janate, lunaa nitohanai ichana saijieein acaacha canu coroatajanelu.

## 3

### *Ena nena Cana Coaunera Ere rauhi que acaauru relaa Faboro ne*

<sup>1</sup> Cana Curuaanaa Jesocurisito coitucuera neein neeichene jaun raotojoein rachoojoein neeuchera chasocuru. Jauriaana inara rai laenasihunlu niqui. Nena jerichanejein coaiten enacooauneein caa laenaain letoareeunni, raotojoein coitucuhin neeichene coina.

<sup>2-3</sup> Coaracuche, “Esinae rauhijiriin Cana Coaunera Ere tonorana jeriquichene, inara jaberoco cari sauhichenete neere,” naain inara coritaa nii nechuaansai, jaberoco cari saurerane coataa. Nitoaneeinte niqui cojunacaacoa nitohanaine coina cacha relaelu Moisesa inoalenlu niqui. Nete inae cau chauratane que turuha Jesocurisitone jaun, inae nene nitohanai, inae Jesocurisito Suujue que cana suujua cojunacatiha Cana Coaunerana jaun.

<sup>4</sup> Canuhetonaina Israeli nefoerate esine neein- Moisesa aitoonjoan tonoraera neein neeunlu jauriaa itolere amuritoheriin. <sup>5</sup> Inae fosa janoniha nejanoaanune janate, cajabereeon cari jiununuhin moloorelu, Israeli esine nichaaun- Israeli niha canu inacane jaun. Canuna Beenjamiin lauri caje nefoeratenaa neeun. Ebereeo ere quete ereeure cafojiaraauru, jerichanejeina chu acaauru rijijieein Ebereeo ere que ereeun. Canuna fariseeo neein Moisesa aitoonjoan rijijieein ichaera neein neeunlu. <sup>6</sup> Casuujua coarihei amuneeinne Cana Coaunera Calaohi Jesocurisito ere tonoraaurera

cairichaeriin nerejetoonlu. Jataainna rauhijiriin Moisesa aitoonjoan rijj-  
jieein icharaaetoonlu.

Nii jaunte caque chaque erenaa nainenelu chunei.

<sup>7</sup> Nitohaneeinte carai nelateeinneein nelu carai nii Moisesa aitoonjoan  
niqui. Nena inae canu ichao coriha Jesocurisitona jaun, inae enene jianeun,  
inae nelateniha caraine jaun.

<sup>8</sup> Nitohaneeinte inae Cana Coaunera Calaohi Jesocurisito coitucuhanune  
jaun, carai inae nelatene, nii jauriaa carai nelatei. Cana Coaunera Calaohi  
Jesocurisito ere tonoraanuna jaunna jitariin nii itajeeun. Coatiha canu rai  
chaque nelatejeehai nii jitariin canuhacha itajei, inae que jaolecohanune  
jaun. Cana Curuaanaa Jesocurisito coitucuhin <sup>9</sup> aina nihanune coreniha inae  
chaque nelatihei nii jauriaanejeein nena. Coatiha nii Moisesaacha aitoon-  
joan tonoraanune coreniha jianacoo caeterihe Cana Coaunera. Jesocurisito  
esenetaanune corenihate, jianacoo caete Cana Coaunera.

<sup>10-11</sup> Aihana jaunna Cana Coaunera Calaohi Jesocurisito suujua que  
suujuaquiin nihanune jereeun. Acaihanejein nitohaneein nihanunena  
coacuun. Charijiein teeinti necairichanaa abaantaain ohane caje ichanaain  
nelu Cana Coaunera Calaohi Jesocurisito. Nii rijjijieina canuhetonai nena  
jereeun.

*Itolere jianeinna satono que turuhane reentiaain laraajiin nereeunni.*

<sup>12</sup> Coatiha, “Inae esinae rauhijiriin aca jerihane rijjijiein nihanu,” naain  
irihanune jaun aitohaaun. Nena laen Aca jerihane rijjijiein sacureeunni,  
caa baiha rijjijiein nihanune coina.

<sup>13</sup> Coatiha, “Rijjijieinna inae neeun,” naanune caun aitohaaun. Itolere  
canuhacha icharaaetilu jianeinna jelai choae jauhecotojoeriin laraajiin  
nereeunni satono que tiaain, <sup>14</sup> Jesocurisito aina cuaain cana rai niicha teeni  
tihane coina cana raain nihalu Cana Coaunerane jaan raanune coina.

<sup>15</sup> Caitono tocohaneein coaaucaachenete ne, esinae rauhijiriin cana suu-  
jua coitucuhin, Jesocurisito esenetaeranein ijiin niha cana suujuane coina.  
Jana ainihanete, inara que nii coaratereein Cana Coaunera, inara netonai  
nii coaraain coitucuichene coina. <sup>16</sup> Nete laen inae nii coitucuujihacachene  
rijjijiein tonoraain ichaohacachene caohachae.

<sup>17</sup> Chasocuru charijiein teeinti cha ichaain neeun, nii rijjijiein inara  
netonai cha ichaain neeuche. Chaen nii aihacaanune rijjijiein nenacaa-  
ruhacha ichai rijjijiein cha ichaain neeuche inara netonai.

<sup>18</sup> Inae araai saain aitocooaun. Niite jataen canu inaderajae. Atinne  
coaiteen aitoreeunni. “Cana Coaunera coitucuhanu,” naante niqui ere  
cacha tabaauru, nete satiin coreniha coroso que ohin nihalu Jesocurisitone  
saijijiein aina nejeratenaa tocohaneein ichaao, joaenreein necairichanaa  
abaantanaa nainecurenihane jaun.

<sup>19</sup> Nitohaneein ichaonacaaurute nitajiha cuurureein, necoejena chara-  
neein ataibinae rijjijiein ichaoruhana jaun. Cana Coaunera coacuelanaala,  
acaihanejein caa chauratane que nenacaauru itolereeicha que coacu-  
ruhane jaun. <sup>20</sup> Nitohaneein nihaacache laen cana. Dede curuaanaa neein  
niha cana Curuaanaa Jesocurisitona jaunte, dede cocoaicha neein niha-  
cache. Aihana jaunte enacoauneein dede caje fauha uha nii jianacoo cana  
mitaera Jesocurisitone cohajihacache. <sup>21</sup> Acate cana jaberoco coriha cureein  
culocohin rai jaberoco tocohaneein necaohacha que necaohachaaain. Itolere  
amuritona nainihane jaan aina cuaainte nitohaneein ichareein.



## 4

### *Raotojoein inetono janonaa bana rachoojoein neeuche*

<sup>1</sup> Nitohaneein rauhijiriin Cana Curuaanaa ere tonoraachera cacoelaichaauru chasocuru. Jatainna inara coana jeretoon. Inara ainana raotojoein rachoojoein neeun, quesenetaaichene coreniha Cana Curuaanaa coitucuhichene jaun. <sup>2</sup> Aonacuchena inara rai aitete, acaauru rai aitocoiche. Ita aina obaejerihuruhane jianeeincha, jiniiquiin ita belaijeeincha neeuruhine, nii Ebodia, Siintique, enecuru, naaonjoaihunri coujurihu Cana Coanera coreniha cana nejera neein nena tocuhanein.

<sup>3</sup> Nii Filipoo nihanune bana saain Culemente, leeochoauru, naaonjoain aina cajiniichaaain ichaonaa tera erenaa que amihaneeuruhane jaun. Acaauru curuaate inae laenanohinein ne ichaonaa tera- Cana Coanera Quiricha cuhane.

<sup>4</sup> Raotojoein inetono janonaa bana rachoojoein neeuche, Cana Curuaanaa Jesocurisito aina neeichene jaun. Aonacuchena coaiten inara rai aite. Raotojoein rachoojoein neeuche.

<sup>5</sup> Aihute esinae rauhijiriin inara amute cacha belaina inaera cachaneein neeichene coaraain inara coitucuurumiin saain cachaauru itolere bana. Inae cataainjia turuha Cana Curuaanaane.

<sup>6</sup> Jiaonriha aansijiin laojoiiri coreniha nererojoeccaiche ne. Niha inara que chatohanaine Cana Coanera corojeein bajaain, rai beeuchete coitucuhine. <sup>7</sup> Nitohaneein ichaquichenete, inara suujua rachoojiaa cureein Cana Coanera, raotojoein neeichene coina.

Nitohaneeinte itolere cachaauruhacha coitucunojoi amurijiriin raotojoein ichaonaanaja tereein inara rai Cana Coanera. Nii Cana Coanera tenojoin cana suujua rachoojiaerate inara suujue suujuatereein Jesocurisito aina jiniiquiin neeichene coina.

### *Coa cajihaneein inara suujua coaracache*

<sup>8</sup> Satononejeeinne ena cuhane ichei caa que erereunni. Coa cajihaneein inara suujua coaracache. Acaihanejein rauhi cuhane cuaain cana suujuat- era erenaa que inara suujua ereein nii que coaaucuhe. “Leeochoauru bel- laain, caohatiin leeochoauru coaraain, caohatiin camijianeeonne maajeein ichaain, naaonjoain nihanunete caohachae,” naain inara suujua tocharaain inara suujua coaracache.

<sup>9</sup> Nii inara relaanulune jana aonaain esenetaaichelune tocuhanein neeuche. Charijieein teeinti cuu nihanune bana quichao que ichaorejetoon, nii rijijieein inara netonai caohachaaain inara ichao que ichaoche. Nitohaneein neeichenete, inara aina niha cureein cana suujua rucuhera Cana Coanera, raotojoein neeichene coina.

### *Cairicheineein nihanune nihanatiina jerichanejeein raotojoein nereunni.*

<sup>10-11</sup> Tabiicha carajaain cacaoauquichene jaunna, Cana Curuaanaa coroa- jeeun. Naaonjoaainte, “Cocoaaucrenera,” coatiha naa casuujuane caun caitono nihei, neniha chuni letoaichene jaannune jaun, cacoelaai- chene jaannu coriqui letoaeneeichene coitucuhanune jaun. Coatiha inara caje chaelai bajaa caitono nihei. Cairicheineein nihanune nihanatiina jerichanejeein raotojoein nereunni. Inae nitohaneein nerelaain niha- nune jaun. <sup>12</sup> Aihanune banana necairichanaa coaraain neeun. Ai banana, chaque latijiojoiiri lanaala neeun. Nii jaunna itolere necairichanaa, mijitena, naaonjoaain ichaonaa que ichaonaa coitucuhin neeun. Inae nitohanei co- riaanune jaunna, neniha chaelai caraine nihanatiin chaque tonajelanaala neeun. <sup>13</sup> Jatoroaina neeun, chatohaneein caetera nihane abaantaain

nihanune coina. Nitohaneeinna joenreein abaantana naineeun, casuujua laraajiaa cacorataaniha Cana Coaunera Calaohi Jesocurisitona jaun. <sup>14</sup>Chaen caohachate ichaquiche, necairichaaecaaunne jana canu rai coriqui letoaain.

<sup>15</sup> Coaaquiche chachu inara netonai natiin, taolu inara ratiriin Masedoniau cuhanune bana techu, inara Filipoo Jesocurisito ranojoneein neiniquichene coaiten carai coriqui letoaaichelu. Acaihanejein inaraachete Jesocurisito que cacha relaanune nunuhetihanune caje coauneein cacorataanera neein neeiche, Cana Coaunera Calaohi Jesocurisito que inara relaanune cainaera rijijieein. <sup>16</sup> Atiin Tesalonecau nihanune jana techu, coroata sai cuhane coaiten le cachaauru cachaauru caje coriqui taojiajeein carai letoaaichelu.

<sup>17</sup> Coatiha cacorataaneeichene coina caitono nihei. Nitohaneein cacorataaneeichene corenihate jeelai choae jauhecotojoeriin nii cainaa cureein Cana Coaunera dedeeu.

<sup>18</sup> Ena cuhanena raaun latichaaunne amuritoheriin Efaforoto aina inaraacha letoai que jojohin. Nitohaneein inara suujua caje coauneein ichaquiche Cana Coaunera notaracaaena jaunte, nii coaraain rachoojoe Cana Coaunera, nitohaneein ichaera cacha rautaana jaun. <sup>19</sup> Nii jaunte chaelai lateein neeichene inara rai ecotiha cureein Cana Coaunera, Jesocurisito ere tonoraera neeichene jaun. Acaachate Cana Coauneraneein nihana jaun nitohanai ichana naine.

<sup>20</sup> Aihana jaun coanete Cana Inaca Cana Coaunera coroejeein nihacache inoaelunetiin. Nii rijijieein neeine atiin.

*“Inara coaauca jera Faboro,” naain beeuche.*

<sup>21</sup> Satiin nii cuu nenacaauru Jesocurisito coitucuurera rai, “Inara coaauca jera Faboro,” naain beeuche. Cau caniha Cana Coaunera Calaohi coitucuurerate chu inara coaacure. <sup>22</sup> Romanocuru curuaanaa loreri asaae nenacaauru netonai techu inara coaacure, saain cau nenacaauru Cana Coaunera coitucuurera netonai techu inara coaacure.

<sup>23</sup> Inara suujua laraajiaain, inara coroatajaneine Cana Curuaanaa Jesocurisito.

Inae jianichaaun.

## Colosau nenacaauru rai Faborohacha letoai leinjiin

### *Chatohaneein neeiche Colosau neiniquichene.*

<sup>1</sup> Canuna Cana Coaunera jerenohinein, rai Calaohi Jesocurisito letono-afosotoro Faboroneeun. <sup>2</sup> Jesocurisito coreniha cana nejera Timoteeo aina jiniiquine caa quiricha laenacaanu, satiin Cana Coaunera cachaneein, canacaanu suujua rijijieein Colosau Jesocurisito coreniha canacaanu nejeraneein neiniquichene rai. Cana Inaca Cana Coaunera jeelai amuritoheriin inara coroatajaneine jiniiquiin raotojoein neeichene coina.

### *Jesocurisito esenetaeraaru rai Cana Coaunera baja Faborone*

<sup>3</sup> Inara rai Cana Coaunera bajaacaanune naineeine, itolere bana: “Nar-ihara Cana Coaunera,” naain Cana Curuaanaa Jesocurisito Inaca Cana Coaunera coroaecaanu, <sup>4</sup> aiha Jesocurisito esenetaain neein, satiin Cana Coaunera cachaneein nenacaauru aina jiniiquiin ita belaaain neeichene coitucuhacaanune jaun. <sup>5</sup> Inae dedeeu inara que banijiaain rucuhenojonein nena rariquicheeine cohajeein neeichene jaunte, leeochoaauru aina ita belaaain neeiche. Cana osa caje cana ichoteraneein nena erenaa caohacha aonaquichene caje coauneente, nii inaraacha cohajei sirichaaneein neeiche. <sup>6</sup> Nii erenaa inara rai beratenojoite, itolere chauratane sacutaain coitucuhin, inae rijijieein ichaaoore cachaauru. Charijieein teeinti esinae rauhijiriin cana belaitoha Cana Coaunerane beeuruhane aonaaain, esinae rauhijiriin erenaa nihane esenetaaichelune rijijieein. <sup>7</sup> Nii quete jeriha Jesocurisitone rijijieein inara relaain nelu, nii jataain canuhacha belaineein nena Efaforasi. Acate canacaanu amihaneon que canacaanu coroatajaneranein, inara rai jeriha Jesocurisitone rijijieein cha ichaeranein nena ne. <sup>8</sup> Aca techu canacaanu rai, inara suujuatiha Cana Coaunera Suujuene rijijieein leeochoaauru belaaain ichaohichene benaa belu.

<sup>9</sup> Nii jaunna coituhacaanune caje coauneein jianelanaala inara rai Cana Coaunera bajaacaanu, inara que jeelai amuritoheriin niicha jerei coitucueratein, itolere inaraacha ichai coitucuhin, rai Suujue jerenohin coitucuhin, naonjoaainchene coina. <sup>10</sup> Nii ainate Cana Curuaanaa jerei rijijieein itolere caohacha nejesina ichaain neriquicheein, jeelai amuritoheriin Cana Coaunera coitucuhin coujuriu Cana Coaunera cachaneein nena tocuhanein. <sup>11</sup> Nii coinana itolere amurijiriin niicha ichana naineei aina cuaain, inara lararajiaa Cana Coaunerane, laraajiin nererojoecaelanaala neeichene coina bajaacaanu. <sup>12</sup> Nii ainate rachoojoein, nii satiin notaracae rai cachaneein nenacaauru rai niicha teenu- rai Cojoanonaa raain neeichene coina, inara rai teranuneein nena Cana Inaca Cana Coaunera coroaeguiche.

<sup>13</sup> Cana Coaunerate, cana curuaanaaneein niha moconajaerane jana, caje cana ruluhin Cana Curuaanaa niha rai Calaohi Jesocurisitone coina rai Cojoanonaa que cana telu. <sup>14</sup> Nii rai Calaohi corenihate cana osa caje cana ichoteratein, cana que suujua acatelu Cana Coaunera.

### *Ohalu Jesocurisitone corenihate Cana Coaunera aina raotojoein ichaohacache.*

<sup>15</sup> Chabana Cana Coaunera coarahaacache niqui. Nete rijijieein nena- rai Calaohi Jesocurisito coaracaache. Acate, jauriaanejeein rai Calaohinein nelu, itolere coaunaane ajiniha caje coauneein. <sup>16</sup> Aina cuaain techu

itolere dedeeu neenihuru, chauratane que neenihuru, chabana coaano-joinelanaala neenihuru, chabana inanacaelanaala itolere ichana naineraneein itolere que mijiaaaineein neenihuru, naaonjoainuri coaunaeratelu Cana Coaunera. Satiin niichurute raineen nihane coina, aina cuaain coaunanojoneein nelu. <sup>17</sup> Nitohaneeinte itolere ajiniha nenaanelu Jesocurisito. Chaen techu coreniha, Aca jerihane rijijieein neeure satiin niicha coaunaauri. <sup>18</sup> Chaen techu satiin niicha ranojoneein nenacaauru, rai iclesia neein neeure. Nii iclesiate Jesocurisito jaberoco ne. Jana nii jaberoco coturite jeelai Jesocurisitohacha ne. Aca techu itolere ajiniha nihalune rijijieein, aca satiin ajiniha o caje ichanaelu. Nitohaneeinte nelu, itolere que satiin ichoaichateraneein nihane coina. <sup>19-20</sup> Jesocurisito aina itolere bana nena jerihane jaunte, aina cuaain satiin itolere cana rai chauratane, dede, cana janonaa, naaonjoainuri que neein, que nejeratenaaneein neeuruhane caje, aina raotojoein neeuruhane coina ichaelu Cana Coaunera. Niite ichaelu, coroso que rai coichana jaohin ohalu Jesocurisitone aina cuaain.

<sup>21</sup> Jauriaalute niqui Cana Coaunera cacha nelanaala aina inara suujua cuhane que nejeratenaaneein neeichelu, nechu baasohacha ichajeein ichaohichene jaun. <sup>22</sup> Nete laen inae enene, aina raotojoein rai cachaneein que banijiaaaineein neeichene coina, inara que suujua acatelu Cana Coaunera. Nii coinatae joaenreen cacha rijijieein, atinanohinelu rai Calaohi Jesocurisito. Nitohaneeinte inara coulucoelu, nacatiha cha ujuaihonelanaala, osa colane neeichene coina. <sup>23</sup> Nete nitohaneein nena jeriquichene, inara rai benojoiniha ichoteratenojoneein neriquicheeine jaanune jana, aonaain esenetaaichelune rijijieein, leinjiin acaacha cohajeein, leecha ichana coacuelanaala neeichene caohachae. Nii jeelai inara rai beratenojointe, satiin chauratane sacutaain benojoneein ne. Chaen canu Faboro nichaaunnena nii que cachaauru relaaurera coroatajaneraneein neeun.

*Jesocurisito cachaneein iclesiacuru coroatajaneraneein niha Faborone.*

<sup>24</sup> Ena inara coreniha necairichanaa coaracaaune jaunna rachoojoeun. Nii Jesocurisito jaberoco- niicha ranojoneein nenacaauru- iclesiacuru coroatajanena quete Jesocurisito coreenraniha necairichanaa coarae cajibereeo. <sup>25</sup> Nitohaneeinte Jesocurisito cachaneein iclesiacuru coroatajaneraneein nihanune coina, canu telu Cana Coaunera, inara caohachanu que, inara rai niicha beratenojoi beebejihanu, aca jerihane rijijieeine coina. <sup>26</sup> Nii niicha coitucuerateite inoanlu caje coauneein chuni que coitucueratelanaala asinojoneein sirilu Cana Coaunera. Nete laen inae enene, satiin rai cachaneein neinichaachene que coitucuerate. <sup>27</sup> Nii jataain caohachaneein niha Jesocurisitonete, satiin Jorionelanaala nenacaauru que coitucuerate Cana Coaunera. Nii asinojoneein nena niicha coitucuerateite, Jesocurisitoneein inae inara suujueniha ne. Acaachate cohajeeiche.

<sup>28</sup> Nii jaunna Jesocurisito que cachaauru relaacaanune, itolere niicha ichai coitucuhin ichacuruhane coina acaauru suujuatihacaanu, esinae rauhijiriin caohachaaain aca jerihane rijijieein, Jesocurisito rai tenajaacaanune coina. <sup>29</sup> Nitohanei amihanenaa ichacaanne coina canu lararajiaain, itolere ichana nainichaaunne jaanu tiha Jesocurisitone ainana caa niicha icharatei ichaain neeun.

## 2

<sup>1</sup> Laodiseau nenacaauru, chae inara, chaen chabana canu coaraelanaala nenacaauru- canu benaa caje cacoitucuureraauru, naaonjoainuri neeichene corenihane, jataain mainajeriin necairichaaun. <sup>2</sup> Nitohaneeinne caohachaaain rai suujua lararajiaain, jeelai amuritoheriin jiniiquiin corajeein,

itolere bana ita belaa'in neein, nii chuni que Cana Coauneraacha coitucueratelanaala nenea- Jesocurisito coitucuhin neeichene coina jataain laraajihun. <sup>3</sup> Esinae rauhijiriin Jesocurisito coitucuhin neeichenete, rai caohacha aina itolere coitucuhin neriquicheein. <sup>4</sup> Nabana chuni inara coritaa raotojoein inara rai ereein, osa que inara saruhane jana, esenetaaichene coataane caa inara rai beeun. <sup>5</sup> Inara aina canu jaberoconeein nenihanune niha natiine, itolere bana canu suujua cuhane inara coacuun. Nii jaunna jiniiquiin rauhijiriin inaraacha ichai ichaain neein, Jesocurisito esenetaaichene jaun, aca jerihane rijijieein ichaohichene coitucuhanune jaun jataain rachoojoeun.

*Ena nenea ichaonaa teraneeinte ne Jesocurisito.*

<sup>6</sup> Nitohaniane jaun jeriha Jesocurisitone rijijieein ichaohichene coina esenetaaichelune jaun, itolere bana aca jerihane rijijieein ichaaoche. <sup>7</sup> Aihana jaun, leinjiin acaacha jerihane rijijieein inara suujua aina cutaain ichaohin nii acaneein nenea rijijieein ichaohichene coina inara relaauruhalune jaan esenetaaichelune rijijieein, itolere bana Cana Coaunera coroaecuche. <sup>8</sup> Itolere que necohalajiin neeuche, nabana nechu joaereen nichao que inara coritaain nenea jereranihane, esenetaain neeichene coataa. Nii cacha coritaeraneein nenacaauru, coatiha Jesocurisitohacha jerei icharaneein neuruhi. Acaaurute nechu Cana Coaunera coitucuelanaala nenacaauru cachaauru ichao que cacha relaain, moconajaera icharatenohin icharaneein neure.

<sup>9</sup> Jerichanejeeinte rai Inaca Cana Coauneraacha ichai ichana naineraneein ne nii rai Calaohi Jesocurisito. <sup>10</sup> Nii jaunte Jesocurisito aina neeichene jaun, rai Inaca Cana Coaunera aina netonai neeiche. Nii Jesocurisitote, itolere que laraajiin satiin Cana Coauneraacha cocoainanojoein nenacaauru Curuaanaaneein ne. <sup>11</sup> Chaen techu inae Jesocurisito aina neeichene jaun, inae cojunacatenohineein neeiche. Coatiha rai jaberoco que coujunacatenohineein neuruhalu Jorioocurune rijijieein nihei. Niite inae necoriha inara suujuane jaun, inoaelu osa que nesarujueein ichaohichene jianein neeichene jaan cojunacaneein rauhijiriin Jesocurisito caje unaa neein ne. <sup>12</sup> Nii atinaain conautenojoein nihalune caje ichanaalu Jesocurisitone rijijieeinte, inara atinaain inara itajihane rai niha osane caje, Curisito aina cuaain nichoteeichene coujunacaniha acauhanau teein baotisanojoein neeichelu. Nitohaneente neeiche, niicha ichana nainei ichaain oo caje ichateralu Cana Coaunera esenetaain neeichene jaun. <sup>13</sup> Inara Jorionelanaala neiniquichenete jauriaa inara jaberoco que coujunacatenohinelanaala neeichelu, jauriaanejeein nenea Moisesa tenojoi rauhi tonoraelanaala nitajanaanein neeichelune jaun. Nete laen inae ena, Jesocurisito aina jiniiquiin ichaohichene coina, inara rai ichaonaa teein ne Cana Coaunera, nii Jesocurisito cana osa caje cana ichoterateraneein nihane jaun. <sup>14</sup> Nii jauriaanejeein nenea Moisesa rai rauhi tonoraenihacachene jaunte niqui, caseteco coaracaachene rai nihacachelu. Nete coroso que ohalu Jesocurisitone aina cuaain, nii itajeein nelu Cana Coaunera. <sup>15</sup> Nitohaneente Jesocurisito aina cuaain, moconajaera aina rai letononeein nenacaauru amuritoheratelu Cana Coaunera, satiin coarajeerera notaracae tenajaain.

*Itolere dedeeu nenaacha que coacuhin neeuche.*

<sup>16</sup> Aihana jaun, inara ichao que ichaohin, inara lenone que lenoneein, inara coco que cocohin, naaonjoaain neeichene, nihei chuni nii que ereein nenea nainei. Jiaonrihachu nebetacanaa cojoanona bitoaain neein, atene ujuarichuru bitoaain, naaonjoaauruhane rijijieein ichaohichene coina

inara counujeeunruhane tonoraaichene. <sup>17</sup> Nete satiin necorereein inae ecu tihane bana. Jana Jesocurisito tenojoi ichaonaa chabana necorerinaain, niheichu chabana satonorinaain. <sup>18</sup> Jiaonrihachu baaso ichaa inara beein, acaauru rijijieein neeichene coina, inara rai aitiin neeuruha nii Cana Coaunera letono aanjeraauru letononiha nocoetiin, acaauru notaaca Cana Coaunerane beein, nechu jeriha acaauru suujuane rijijieein ichaohin necohasitaacha que nenacaaaurune tonoraain neeichene. <sup>19</sup> Jesocurisito cachaneein rai suujua cuhane sirichurenihane jaunte, jeriha Cana Coaunerane rijijieein, jiniiquiin neein ita belaaain ichaohacahene coina cana tein niha Jesocurisitone saijieein ita caje neleruha cachane jerecure.

<sup>20</sup> Jesocurisito esenetaain neeichene jaunte, inae nii jauriaanejeein inara relaauruhalune jaan jianein neeichelu. Aihana jaun, inae nainiheeiche ichaauruha Jesocurisito coitucuelanaala nenacaaaurune rijijieein ichaohichene. <sup>21-22</sup> Nii jaiti Jesocurisito coitucuelanaala ichaohichene bana: “Jiaonriha dadaain, niheichu quiichene. Niheichu inara biji cuhane teberiana nainiheeiche,” naain dadaain quiichene caohateein inara relaauruhalune jaante, nechu cachaaauru suujua caje unaaneein nihane jaun inae nitaje. <sup>23</sup> Esinaete chuhisi niqiu rauhijiriin Cana Coaunera coitucuera rijijieein neein aitocure. Nete cana jaberoco cairichaeranein ne. Nii acaauru aitoonjoan osaacha que coacuhin nena caje cana suujua corenaa nainenihane jaunte, nii chaque nelatene.

### 3

<sup>1</sup> Nitohaneein inae ohin nitajenaa rijijieein neeichene caje Jesocurisito esenetaain neeichene jaun, rai Inaca Cana Coaunera aina jiniiquiin, rai raotono nichajai que niha Jesocurisitone jaan- dedeeucha que coacuhin ichaaoche. <sup>2</sup> Nii jaun, inae nainiheeiche Cana Coaunera coitucuelanaala nenacaaauru rijijieein coacuhin neeichene. Dedeeu nenacaaauruhacha que coacuhin neeuche. Jiaonriha caa chauratane que nenacaaauruhacha que coaauquichene. <sup>3</sup> Nitohanihana jaun, inae jauriaalu nena inara ichao que ichaohiche, ena nena inara ichaote, Jesocurisito aina Cana Coaunera aina asinojoneein ne. <sup>4</sup> Nitohaneein Jesocurisito, inara ichao sirichaneein nihane jaunte, inae ecu tihane bana nacoaunein turuhane bana, aina jiniichaain inara ocotiha ureein, aina jiniiquiin necaohacha que ichaohichene coina.

#### *Jauriaanejeein nena ichaonaa aina ena nena ichaonaa.*

<sup>5</sup> Aihane jaun, coaacuruha Cana Coaunera coitucuelanaala nenacaaaurune rijijieein coacuhin ichaohichene jianecuche. Jiaonriha joenreein ene aina ichaohin, quicha nejesina neein ichaohin, ene nejesinaneein ichaohin, naaonjoaain Cana Coauneraacha rautaainelanaala nena ichaain, chaaelai siriquichene chunaain, naaonjoaaincha que coacuhin ichaohichene. Nitohanei ichaonaate jataain cana ichao aasaara ne. <sup>6</sup> Nere tonoraelanaala nitohaneein ichaonacaaaurute, jataain mainajeein casetecaeraterreein Cana Coaunera. <sup>7</sup> Nii rijijieeinte inara netonai ichaorejetocoiche, jaiti necoreniha inara ichaone bana. <sup>8</sup> Nete inae necoriha inara ichaone jaun, ita cotaairiin, ene aina ichaohichene coinaacha baasoneein coacuhin, inara amute cache baijiaain, rautanacaai que ereein, naaonjoaain ichaohichene jianequiche. <sup>9</sup> Inae nitohaneein necoriha inara ichaone jaun, jiaonriha jaiti necoreniha inara ichaone bana, inaraacha ichai ichaain, ita coritaain, naaonjoaain ichaohichelune rijijieein ichaonaa nainiheeiche. <sup>10</sup> Nitohaneeinte, ena nena ichaonaa que ichaohin, ena nena cachaneein nena rijijieein, jeriha

Cana Coaunerane rijjijeein ichaohichene, itolereneein niicha jerei coitucuriquicheein. <sup>11</sup> Aihana jaun, coatiha chaque nelatihei, Curieconein, Jorioneein, Jorionelanaala, leocha cachaneein, cha coitucuelanaala cairicheineein, letononeein, letononelanaala, naaonjoaineein nihacane. Jesocurisito cachaneein nihacanete, jataain itolere amurijiriin nelate.

<sup>12</sup> Jataain inara belaitohane jaunte, rai cachaneein neeichene coina, inara janijiin inara raain nelu Cana Coaunera. Aihana jaun, coujurihu inara ichao coreein nenea tocohaneein esinae rauhijiriin cairichaaajoaain ita coaraain, ita corootajanein, leeochoaauru amurijiriin nenea coacuelanaala, ita que nererojoecaelanaala, naaonjoaain ichaaoche. <sup>13</sup> Jiniiquiin ita que nererojoecaelanaala neein, tonaain itaque ereein neeuruha chunocohacurune, que inara suujua acatein, naaonjoaain neeuche, inara que suujua acatein nihalu Cana Coaunerane rijjijeein. <sup>14</sup> Itolere baaso caje inara suujua coreein, ita belaaain jiniiquiin neeuche. <sup>15</sup> Nitohaneein neeichenete, inara suujua raujiareein Jesocurisito, raotojoein neeichene coina. Nii coinete inara raain nelu Cana Coaunera, jiniiquiin rai jaberoco rijjijeein neeichene coina.

<sup>16</sup> Itolere bana inara rai Jesocurisitohacha beratei coaacuche inara suujua cuhane. Inara suujua que coitucueratiha Cana Coaunerane rijjijeein, jiniiquiin ita relaain, ita suujua aninoain, chatohanai ichaain niha chunine coataa ita suujuatein, naaonjoaain neeuche. Inara suujua aina cutaain Cana Coaunera coroaeein, salmo que nenatein, itolere nenatena Cana Coaunera coroaenanaja que nenatecuche. <sup>17</sup> Itolere inaraacha ichai ichaquichene, jeriha Jesocurisitone rijjijeein aina cuaain ichacuche. Jerichanejeeinchu chaelai que ereein neeiche cacha raine, aca jerihane rijitoein ereein neeuche. Chaen chu, nii rai Calaohi Jesocurisito aina cuaain, rai Inaca Cana Coaunera coroaecuche.

### *Curisito ranojoinein nenacaauru ichao.*

<sup>18</sup> Inara ene neeichene, inara lanaauru ere tonoraain jerecuruhane rijjijeein neeuche, acaachate inaraacha ichanenineein ne, coujuriu Jesocurisito esenetaeranein nenea tocohaneein neeichene coina. <sup>19</sup> Jana inara lananein inara comasaihuru belaaain neeuche, jiaonriha inara comasaihuru cotaairiin coaraquichene.

<sup>20</sup> Canaanaihuru nihanatiin, rai fojiaraauru ere tonoraain neeuruhine. Nitohaneein neite rautaaain coarae Cana Curuaanaa Jesocurisito. <sup>21</sup> Jiaonrihachu, inara acaauru inacaneein, inara bereecuru baijiaain neeichene, nabana caoacha coroaecuruhane jianecuruhane coataa.

<sup>22</sup> Fatoroon letononeein nenacaauru, cau chauratane que acaauru fatoroonein nenacaauru ere tonoraain neeuruhine. Jiaonriha coarajeeuruhane notaracaaecha acaauru belaihuruhane jerenacauncha acaauru ere tonoraain neeuruhane. Coaracurenihane jana nihanatiin, suujua aina cutaain, jerecuruha acaauru fatorooncurune rijjijeein neeuruhine, nitohaneein jeriha Cana Curuaanaa Jesocurisitone jaun. <sup>23</sup> Itolere inaraacha ichai ichaain neeichene, esinae rauhijiriin coraeein ichacuche, inara amute cacha rai ichaquichene que coacuelanaala, Jesocurisito rai ichara rijitoein. <sup>24</sup> Inarate inae ecu tihane bana, inara rai aca cana Curuaanaa nihane rai niicha jerei ichara neein neeichene jaun, rainein nenea que inara coreterihani Cana Curuaanaa Jesocurisitone coitucuhiche raotojoein. <sup>25</sup> Nii choae tacaain coatiha nejelauneein chuni coaraain nihei Cana Coaunera.

## 4

<sup>1</sup> Inara, fatoroon neeichene, inara letonocuru aina caohachain inara suujua coaraain, rauhijiriin acaauru aina neeuche. Inara netonai leinjiin dedeeu nena Curuaanaa letononeein neeichene jaun, rai inaraacha ichai beeichene rai neeichene que nainain ichaaoche.

<sup>2</sup> Itolere bana Cana Coaunera coroajeein bajaee bajajeein itolere que nainain ichaaoche. <sup>3</sup> Canacaanu rai netonai Cana Coaunera bajaauçhete canacaanu rai acuujuua joracaaine ne itolereneein cuhin Jesocurisito que Erenaa coitucueraelanaala nena- niicha beratei beebejihacaanu. Nii coitucueraelanaala nena Erenaa canuhacha beebejei corenihane, caa caresero cuhane neeun. <sup>4</sup> Cacoreniha Cana Coaunera bajaauçhene raotojoein aohana nainecuruhane coina, rauhijiriin nii Erenaa beebeje cachaauru rai.

<sup>5</sup> Chaen techu Cana Coaunera coitucuhichuru que caohacha nejesina ichajeein itolere bana ichaohichene coarateein, caohachain coacuhin nii canaacha esenetai que acaauru rai raotojoein beebejeeche caeneenejelanaala. <sup>6</sup> Nitohaneein ereeichene raotojoein ereeuchete itolere bana rautatiin aonacurumiin aohanraauru. Chaen tonaain ereeuruhane niha-natiin, raotojoein baaso coacuelanaala acaauru tonoraain neeuche.

### *Necoilha Faborone*

<sup>7</sup> Canu suujua rijijieein, Jesocurisito icharatenohi amihanenaa que cacorataanera- jataain canuhacha belaa- Jesocurisito coreniha cana nejera Tiquicote, inara rai canu benaa bereein. <sup>8</sup> Nii coinane inara rene aca letoaaun, inara rai: “Naaonjoaaine nihacaanu,” naain inara suujua lararajiaane coina. <sup>9</sup> Ainate uhe inara laurijiraneein nenaalu- jataain canuhacha belaa- Jesocurisito coreniha cana nejera Onesimo. Acaaurute inara rai caelai benaa beeurureein. <sup>10</sup> Canu aina caresero cuhane nena- Arisitarocote, inara coacue. Chaen Berenabeen calaohiriji- Maroco netonaite inara coacue. Inae inara rai bihanulune rijijieein, inara rene bedainiha nii Marocone raotojoein raauche. <sup>11</sup> Chaen techu Josto neein acaauruhacha curuaatei- Jesuso netonai inara coacue. Acaauruhachate canu araaichuru- Jorioocuru caje, Cana Coaunera icharatenohi amihanenaa que cacorataaneraneein, jataain canu suujua nunaeraneein neeure. <sup>12</sup> Inara laurijiraneein nenaalu Jesocurisito cachaneein nena- Efaforasite inara coacue. Acate itolere bana inara rai Cana Coaunera bajaee bajaenaja que, leeoça ichana coacuelanaala itolereneein Cana Coauneraacha jerei ichaquichene coina. <sup>13</sup> Canune nitohaneein, Laodiseau nenacaauru, Erapolisiu nenacaauru, chaen inara, naaonjoaineeichene que, jataain coaunajaaoca nii Efaforasine coarajenajacon. <sup>14</sup> Canuhacha belaaieein nena- docotoro Locasi netonaite inara coacue, chaen Demasi netonai.

<sup>15</sup> Laodiseau nenacaauru Jesocurisito coreniha cana nejeraneein nenacaauru rai acaauru coaaucaanne beeuche. Chaen Ninfasi aina rai loreri asaae netaojianacaauru coaaucaanne beeuche. <sup>16</sup> Inae nainain caa inara rai canuhacha laenai quiricha reretaain coarquichene nainaquichene, Jesocurisito ranojoein Laodiseau nenacaauru rai letoaauchete, acaauru netonai reretaain coaracurumiin. Acaauru netonai, acaauru rai quiicha letoai quiricha, letoaauruha inara rene ne, reretaain coaracuche inara netonai. <sup>17</sup> Chaen Arquivo rai: “ ‘Atiin ichei Cana Curuaanaacha icharatei amihanenaa ichaauje, nii icharatihane rijijieeincha.’ naainte ichei nere letoae Faboro,” naain beeuche.

<sup>18</sup> Inae satonotichaaunne raine Canu Faboronichaaune caraajenihane, caa quiricha cuhane inara coaaucaanne laenaun. Atiin Caresero cuhane



nihanune que coaucuche. Jeelai amuritoheriin inara coroatajanemiin  
Cana Coaunera.

## **Tesalonecau nenacaauru rai Faborohacha letoai leinjiin**

### *Tesalonecau nenacaauru rai laenaauruha Faboroorune*

<sup>1</sup> Canuna Faboro neeun. Inara raina Siribano, Timoteeo, naaonjoain nichaanunena laenaain letoarichaanuhin. Saain nii Tesalonecau nenacaauru Cana Coaunera rai ita taojiaera neeichene raina caa laenaain letoacaanu. Saain nii Cana Inaca Cana Coaunera, Cana Curuaanaa Jesocurisito, naaonjoain coitucuhin neeichene raina caa letoaacaanu. Inara belain, inara coroatajaneene Cana Inaca Cana Coaunera, Cana Curuaanaa Jesocurisito naaonjoainte raotojoein neeiche.

<sup>2</sup> Cana Coaunera bajaacaanune naineeina, “Nariha,” naain coroaeejeen, inara rai bajaacaanu inara coroatajanejeen sacuha Cana Coaunerane coina.

<sup>3</sup> Nitohaneena inara coaucuhin nihacaanu, Cana Inaca Cana Coaunera bajaacaanune naineeinna rauhijiriin inara coroatajanerichaaain Cana Coaunera Calaohi Jesocurisitone esenetaain, caohachaaain laraajiin necairichanaa abaantaain amihaneen leeochoaauru belaaain neeichene jaun. <sup>4</sup> Coichana aina cutaainte inara belai Cana Coaunera. Aihana jaunna, janiijiin Cana Coaunera ranojoein neeichene coitucuhacaanu.

<sup>5</sup> Coatiha joaenreen erena a rijijieen nihei caa cacha relaacaanune jaan Cana Coaunera Ere. Mijiaainetiinte cacha suujua que taca, nitohaneen tiha Cana Coaunera Suujuene jaun. Nitohanihana jaunna esinae rauhijiriin Cana Coaunera Ere neein nihane coitucuhacaanulu.

Inarate canacaanu ichao coitucuhiche, inara aina nihacaanune bana inara nota que canacaanu coaraquicheluna jaun. Nenacaen inara caohachanu que tejian canacaanu coaraquichelu inara nota que, jerichanejeen caohachaaain ichaohichene coina.

<sup>6</sup> Nii jaunte jerichanejeen canacaanu ichao rijijieen, Cana Curuaanaa Jesocurisito naaonjoain rijijieen inara netonai inara ichao que ichaohiche. Nitohaneen caohacha ichaaain ichaohichene corenihate inara rerohecaain, inara cairichaerihure niqui, nete inara coroatajaneen naaonjoan Cana Coaunera Suujuene jaun, raotojoein rachoojoein Cana Coaunera Ere aonaaain tonoraai che atiin.

<sup>7</sup> Nitohaneen atiin laraajiin necairichanaa abaantaain raotojoein neeichene jaunte, inara coitucuuruhana jaun, jerichanejeen inara rijijieen ichaonaa caohacha que ichaonaa coaacure saain Masedonia, Acaiha, naaonjoaihunri nenacaauru Cana Coaunera coitucuurera. <sup>8</sup> Nitohaneente Masedonia batane, Acaiha batane, itolere sacutaain Cana Curuaanaa Ere coitucuerateeichene jaun, esinae rauhijiriin Cana Coaunera esenetaain rauhijiriin nere tonoraain neeichene coitucure itolere neein. Nitohaneen itolere neein raotojoein inara coitucuuruhana jaunna, inae cha que erena nainenhacaanu canacaanu inae.

<sup>9</sup> Nii jaunte inae acaauru rai cha que irihacaanune latecurene, jauriaa nejeen inara rene turuha uhacaanune jana, canacaanu belaaain, canacaanu raain, canacaanuhacha beebejei Cana Coaunera Ere esenetaain tonoraain, nii enuha caje cacha chanohineen nena inara coaunera niha inaraacha tei jianein raatiriin, esinae rauhijiriin nii ichaohin nena Cana Coaunera Esine Ere esenetaain tonoraain, nii beebejeeiche leeochoaauru raine coitucuuruha itolere neeina jaun.

<sup>10</sup> Chaen techu enacoauneen dede caje turuha uha nii Cana Coaunera Calaohi, nii oo caje Cana Coaunera ichatenohin Jesusone cohajeichene

beebejeeure. Nii Cana Coaunera Calaohi Jesusote cana casetecaeratihane rai niha Cana Coaunerane jana jianacoon cana mitaeraneein ne.

## 2

### *Tesalonecau namihaneeo ichaa Faborone*

<sup>1-2</sup> Nii coitucuhichene tocohaneeinte jauriaa nejeein Filipoo turuhacaanune jana, canacaanu batohin, canacaanu necoejechanuhin, canacaanu que jaolecooruha natiinte, inae enene esinae rauhijiriin aitocoanune coitucure. Nii coitucuhichene tocoaneeinte canacaanu aina nejerateeuruha nii Tesaloneca cocoaichacurune jana, canacaanu coroatajane Cana Coaunera, acaauru que casilanaala laraajiin inara rai nere bihacaanune coina.

<sup>3</sup> Nitohaneaina joenreein caje rocohin inara relaenihacaanu. Nitohaneein rauhijiriin aitocoanu natiinte canacaanu ataibinaene beein, naaonjoaunre canacaanu belaiheichuru, chaelai chunei coritana coacuhin joenreein canacaanu ereniriaala que aitona rijitiin.

<sup>4</sup> Canacaanu suujua coarajihana jaunte, canacaanu letoae Cana Coaunera, jianacoon cana mitaain, Cana Rai Ichaonaa Tera Nere bihacaanune coina. Coatiha canacaanu belaa'in niha cachane jerena caaun cacha relaain nihaacaanu. Canacaanu belaiha Cana Coaunerane jerena caaunna jerihane tocohaneein cacha relaain nihacaanu.

<sup>5</sup> Nii coitucuhichene tocohaneein, coatiha canacaanu coretequichene coina inara belaihaacaanu. Esinae Cana Coaunerate coaraje.

<sup>6</sup> Canacaanu cocoainaain canacaanu letoaain niha Cana Coaunera Calaohi Jesocurisitona jaunte niq'ui neere canacaanu rai rauhi. Nena "Naaonjoain canacaanu que suujua acateein neeine cachara," naain erenihacaanu inara rai nihanatiin. <sup>7</sup> Nechu jataen joenreein cacha rijijieein turuhin, canacaanu nerotohin inara belaa'in inara jana amuhemuhecaanulu. Charijieein teeinti bereecuru belaa'in fojiae neba. Nii rijijieeina inara belaa'in inara relaacaanu. <sup>8</sup> Coatiha Cana Coaunera Ereeicha que inara relaacaanuneeicha coina turuhin inara aina nihaacaanulu. Inara netonai canacaanu ichao coaraain jerichanejeein canacaanu rijijieein ichaohichene coinana itolere necairichanaa abaantaain turuhin nihacaanulu, canacaanu coichana aina cutaa'in inara belaa'in nihacaanune jaun.

<sup>9</sup> Jauriaana janotiinnetojoein, laraajiin mainajeein amihaneraetoacaanulune coaauquiche chachu natiin. Nitohaneaina canacaanu raajenihane amihaneein, coreniha canacaanuhacha latei coreteein, Cana Coaunera Ere beebejeein ichaorejetocaaunlu, nabana inara cairichaacaanune, chaelai que latejihojiriin neeichene coataa.

<sup>10</sup> "Baaso chaainjene nihacaanu," naain iriha cacha natiin, chatohaneein baaso chaain nihaacaanu. Inara, Cana Coaunera, naaonjoain neeichenete rauhijiriin canacaanu suujua coaraain, Cana Coaunera coitucuera neeichene que canacaanu suujua acateein nihacaanune coarajerejetocoichelu. Nii jaunte nene nihei chaelai que ujuaiteein canacaanu coulurujiha chuneine jaannu.

<sup>11</sup> Nii choae tacaainachu calaohi suujua nunaain lara'ajiaa inacane rijijieein inara suujua nunaain lara'ajiaain nihacaanune coitucuhiche.

<sup>12</sup> Nitohanihana jaun, coujuriu Cana Coaunera coitucuera neein nena tocohaneein rauhijiriin ichaooche, nii jauriaa inara rai aitocoanulune tocohaneein raotojoein rachoojoein aina neeichene coina inara cotijiaain nihalu Cana Coaunerana jaun.

<sup>13</sup> Coatiha joenreein cacha ere aonajenaa rijijieein Cana Coaunera Ere aonajiheechelu inara rai bihacaanune jana. Nii jaunna Cana Coaunera

bajaacaanune, “Nariha,” naain bajaacaanu. Nii caje coauneeinte esinae rauhijiriin caohachaa inara ichao coreein ichaohichene coarateein neeiche. Nitohanihane cajete esinae rauhijiriin Cana Coaunera Ere nihane que necoarate.

<sup>14</sup> Cana Coaunera Calaohi Jesocurisito ere tonoraaichene corenihate inara aina nejerateeurelu inara araaichuru. Nii rijijieein techu nii Jodeau nena Cana Coaunera Calaohi Jesocurisito ere tonoraaureira aina nejerateeurelu acauru araaichuru Jorioocuru. <sup>15</sup> Nii Jorioocurute acauru rai Cana Coaunera ere beera inoansi sohin jaoruhane rijijieein Cana Curuaanaa Jesoso sohin jaaorera ne. Nitohaneeuruhana jaunte acauru aina nihacaanune bana canacaanu sitaurelu. Nihei aansijieeiniji Cana Coaunera jerenohin ichana coaucuruhi, nechuhatiin cacha aina obaejeriin ichaoruhane neechate laen jerecure. <sup>16</sup> Nii jaunte jianacoon mituhin neeuruha Jorioniheichurune coina, Jorioniheichuru rai Cana Coaunera Ere benaa jerichaanune, caohateure. Nitohaneeuruhana jaunte jataen mululuhin osaquuin neeure. Nii jaunte tabiicha acauru abaantana nainene Cana Coaunera. Nii jaunte inae cuu tihane, nii core coaraa cuurureein acauru notaanaa.

### *Coaiteen Tesalonecau turuha cunaa jeriha Faboro ne*

<sup>17</sup> Inara caje amuhacaanune caje coauneeina, inara coacuhin nihacaanu. Carajaain ita coarinihacache natiine jericha nejeein inara coacuhin nihacaanune jaun, inara coaraa uhene rijitojoihacaanu.

<sup>18</sup> Inara coaraa unaa jerichaanune naineeinte canacaanu acate Moconajaera. Canuna Faboro neein caraaje nihane inara coaraa unaa jereun araa saain.

<sup>19</sup> Inae coaiteen cau turuha Cana Coaunera Calaohi Jesocurisitone banana, raotojoein rachoojoein nereeunni, cacoreniha coitucuhin rai cacha neeichene jaun. <sup>20</sup> Nii jaunna esinae rauhijiriin raotojoein rachoojoein nihacaanu.

## 3

<sup>1</sup> Jataenna inara coaraa unaa jeretohacaanu niqui, nena nainenerichaanuhin. Nii jaunna cau Atenau nerichaanuhin. <sup>2</sup> Acaihanejein cana nejera Timoteeochana letoarichaanuhin inara coaraa uhane coina. Acate Cana Coaunera letononeein canacaanu coroatajane, Cana Coaunera Ere benaa que. Nii jaunte inara coaraa ureein, inara suujua laraarajiaain nihane, nii aina nelaraarajiaain, inara suujua nunaain neeichene coina, <sup>3</sup> nabana chatohaneein nejelau suujua cuuain niha chuneine coataa. Inarate raotojoein niriinanai coitucuhiche. Saain nitohaneein necairichanaa coaraain nihacache nete ne. <sup>4</sup> Nii inara aina nihacaanune bana, inara rai aitocooanulune tocohaneinte nelu cana suujua roeroecaerauru. Nitohaneinte situelu, nii coitucuhichene tocohaneein. <sup>5</sup> Nitohaniha jaunna inara coarateeunlu. “Esinaete chuhisi rauhijiriin Cana Coaunera Calaohi Jesocurisito ere esentaain tonoraain neeure,” naain nitohaneein coitucuhanune jerena caunna inara coarateeunlu. “Baaso que sarunajaain niha Moconajaerane, baaso chaain neeuruhane inacojoein inachujian acauru rai Cana Coaunera Ere benaa que amihanihacaanulu,” naanune jaunne, inara coarateeunlu, nitohaneein coitucuhanune coina.

<sup>6</sup> Nii jaunna nitohaneein esinae rauhijiriin Cana Coaunera Ere esentaain, tonoraain ita belaaain, raotojoein neeichene coitucuhin, inara caje turuhin biha Timoteeo canacaanu raina jaun. Chaen techu canacaanu belaaain canacaanu coacuhin, canacaanu coana jeretohichene be. Inara coana jeretohacaanune rijitojoein canacaanu coana jeretohichene be canacaanu rai.

<sup>7</sup> Nii jaunna necairichaacaanu natiin, raotojoein nii que nelararajiaain atiin rachoojoein nihacaanu. <sup>8</sup> Nitohaneein rauhijiriin Cana Curuaanaa ere tonoraain neechene jaunna, cha que tonajelanaala nihacaanu. <sup>9</sup> Nii jaunna inara coreniha, “Nariha jataen,” naacaanu, Cana Coaunera notaracae. <sup>10</sup> Nii jaunna janotiin netojoein Cana Coaunera bajaain nihacaanu, canacaanu coroatajanihane inara rene turuhin inara rai beebejihacaanune, jataain jelai amuritoheriin esenetaain queecha jaaequiin neechene coina.

<sup>11</sup> Aihana jaunna canacaanu coroatajaniha Cana Inaca Cana Coaunera, Cana Curuaanaa Jesocurisito naaonjoaine jerichaanu inara coaraa uhacaanune coina. <sup>12</sup> Inara coroatajaneine Cana Curuaanaate jelai amuritoheriin esenetaain, tonoraain neein ita belaaain, cachaauru belaaain, naaonjoaain neeiche inara belaichaaunne rijitoein. <sup>13</sup> Aihute nitohaneein rauhijiriin inara suujua coaraain ichaohichene jana inara eruhine Cana Coaunera Calaohi Jesocurisito, rainein nenacaauru aina turuha uhane bana.

## 4

### *Nitohaneein ichaoha cachane jeriha Cana Coaunerane*

<sup>1</sup> Cana Curuaanaa Jesocurisito coitucuera neechene jaunna, atiin inara rai aitorichaanuhin, nii jauriaa inara relaacaanune rijijieein ichaohin neechene coina. Nenacaenjian jelai choae jauhecotojoeriin neechene coinana aitocoaanu, nitohaneein jeriha Cana Coaunerana jaun.

<sup>2</sup> Inarate nere coitucuhiche, canacaanu que inara relaeratiha Cana Curuaanaa Jesocurisitona jaun. <sup>3</sup> Acaiha nejein nere tonoraaiiche neechate jere Cana Coaunera. Nabana ita raelanaala ene aina ichaojeraquiin niha chuneine coataa. <sup>4</sup> Acaiha nejein sinijiera ainaacha ita jerein jiniiquiin suujua coarain niha cacha nete caohachae. <sup>5</sup> Caohachaa, Cana Coaunera coitucuuruhi rijijieein inara suujua coarihei amunein neechene. <sup>6</sup> Coa nejesinajeein ita coritaain ita shaquiin nihache. Nitohaneein neinihanete banejelanaala choae osa nalutiareein Cana Curuaanaa, nii core coaraain nihane coina, nii inara rai aitiin inara relaaain bihacaanulune tocohaneein. <sup>7</sup> Coatiha canaacha jerei ichaechajeein ichaonaa coina cana cotijiaain, cana raain niheilulu Cana Coaunera. Rauhijiriin cana suujua coaraain ichaohacachene cointe cana raain nelu Cana Coaunera. <sup>8</sup> Cha teeinti, caa inara relaacaanune jaan batoe. Nihei canacaanu batoha aitorinaain. Nechu nii rai suujue que cana suujua laraajiaera Cana Coaunera batohate aitoreein.

<sup>9</sup> Jiniiquiin raotojoein ita belaijееin saain itolere cacha belaaain neechene coina, inara relaa Cana Coaunerana jaunna, inae nii que inara relanaa nainenihacaanu. <sup>10</sup> Nitohaniha jaunte, saain Masedonia nenacaauru Cana Coaunera coitucuurera belaaain neeiche. Nii jaunna jelai choae jauhecotojoeriin inara suujua coaraain inara amute cacha belaaain neechene jereun. <sup>11</sup> Inara letoacaanune tocohaneein raotojoein ichaohin, nihei casaje que erenaa coacuelanaala inara amihaneeocho ichacuche. <sup>12</sup> Aihute inara que suujua acatein naaonjoanruhine Cana Coaunera coitucuuruhi.

### *Coaiten turuha uha Cana Curuaanaane*

<sup>13</sup> “Naaonjoaainte neeure Cana Coaunera Calaohi Jesocurisito esenetaain onacaauru,” naain inara netonai coitucuhichenena jerichaanu. Nabana cha coitucuneeichene ohin naaonjoan chuneine, nabana Cana Coaunera coitucuuruhi cachaauru rijijieein jataen tabai inaderanaa que inaderaain neechene coataa.

<sup>14</sup> Charijieein teeinti, ohin ichanae Cana Coaunera Calaohi Jesuso, nii rijijieein techu aina ichanaa cuurureein esenetaain onacaauru.

<sup>15</sup> Nii jaunna inara rai aitocaaanu, cacha relaa Cana Curuaanaane rijitojoein. Cha teeinti, coaiten turuha uha Cana Curuaanaa nereen tiaain ichoae, nii ichoachaniha onacaauru ajiniha Cana Curuaanaa aina niha curinaain. <sup>16</sup> Letonocuru- anjeraauru curuaanaa que beratiha Cana Coauneranete inae toniha Cana Coaunera rai jaihane jana, dede caje fauha uha nii Cana Curuaanaane, ichanaa cuurureein esenetaain onacaauru. <sup>17</sup> Nii baihate acaauru aina jiniiquiin nihacachene coina, dede sacari jana Cana Curuaanaa aina ita ruhin curichaacheein jiniiquiin. Nitohanihanete Cana Curuaanaa aina niha curichaacheein cha bana satonoelanaala. <sup>18</sup> Aihana jaun caa erena que ita suujua lararajiaain neeuche raotojoein.

## 5

<sup>1</sup> “Naaonjoain banate turuha ureein Cana Curuaanaara,” naain coitucuhi chunei, nii coitucuhichene tocohaneein. <sup>2</sup> Nii coitucuhichene tocohaneeinte cha coatajeniha chuneine jana turuha ureein. Charijieein teeinti janotiin turue asijiauto. Nii rijijieeinte turuha ureein. <sup>3</sup> Nitohanerichaine banate, “Jataain raotojoeinte ichaohacache. Coatih nihei cana que nejerateein chatohaneein cana ichao itajeranu,” naain ereein neeurureein Cana Coaunera coitucuruhi cachaauru. Nii lacuritiinte caseteco coaraa cuurureein luhecotariin, acaauru casetecaa Cana Coaunera ne. Nihei chunijihun cuhin nichotenaa nainecururinaain. Charijieein teeinti, canaanai siriha enene, inae saa rai batenene, rai cunaane, cuna caje nichotenaa nainene. Nii rijijieein techu luhecotariin cau turuha Cana Curuaanaane acaauru casetecaane nii cuna aonacurureein. <sup>4</sup> Jana inara laen nesoonenaa coariheeicheein, cohajeeichene jana tururichaina jaun. <sup>5</sup> Cana Curuaanaa jerenohin coitucuhin tonoraachene jaunte, jiichoo conaeracoco cachaneein neeiche. Coatih Cana Curuaanaa ere tonoraauruhi rijijieein nocohenaana nena cacha neein nihaacache. <sup>6-7</sup> Nii jaun nainiheini nauhene neein ajenacaauru rijijieein nihacachene. Itolere bana cana suujua coaraain nihacache nete caohachae. <sup>8</sup> Charijieein teeinti, nalarijia que coata teeure soondarooru, acaauru jaberoco acateraanu que, nabana chatohaneein tenajaera nihane, acaauru que temuhin nihane coataa. Nii rijijieein techu inara netonai, cana acateraanu que Cana Curuaanaa esenetaain, tonoraain, ita belaaain, cacha belaaain, naaonjoain nihacachenete cana acatera niha nereein nii canaacha esenetai. Nitohaniha cachene cana rohan nichuutaain cana coritana nainenereein Moconajaera. Charijieein teeinti, coata caje ichanohin asiho lauriae soondaro, nabana chatohaneein couturi tiha aina nejerateine coataa. Nii rijijieein techu, chatohaneein cana suujua tenaa nainenereein Moconajaera, batoelanaala esinae rauhijiriin jianacoo cana mitaa Cana Mitaerane esenetaacachene. <sup>9</sup> Coatih caseteco coaraain nihacachene coina, cana raain nihei Cana Coaunera. Rai Calaohi Jesocurisito coreniha jianacoo mituhin nihacachene cointate cana raain ne Cana Coaunera. <sup>10</sup> Ohacachene nihanatiin aina nihacachene cointate cana coreniha ohe Cana Coaunera Calaohi Jesocurisito. <sup>11</sup> Nii jaun nii aaichene rijijieein jiniiquiin ita suujua lararajiaain laraajiin neeuche.

### *Satono nejeein Cana Coaunera coitucuurera suujuatiha Faborone*

<sup>12</sup> Aonacuchena inara rai irihacaanu. Nii inara beraihurera que inara suujua acateein, nere tonoraain neeuche, Cana Coaunera coitucuurera beraihaneein neeuruhana jaun. <sup>13</sup> Nii jaun acaauru que inara suujua acateein belainajaain, leeochoauru aina jiniiquiin raotojoein neeuche.

<sup>14</sup> Amihanenaa jeriheichuru cotaicha rijitiin suujuateein letoaauche. Chaen chu nererojoecaain nenacaauru belaaain suujuateechete, suujua

tocharaain suujua nunaain neeuruhine. Chaen chu nacanacaenaauru coroatajanecuche. Raotojoein satiin acaauru suujuatein, acaauru suujua lararajiaain neeuche.

<sup>15</sup> Coaracuche, jiaonriha inara rai baaso chara nihane coa nacatiha tacaain cainaain nihache. Ita belaaain, saain itolere cacha, Cana Coaunera coitucuruhi nihanatiin belaaain neeuche.

<sup>16</sup> Raotojoein rachoojoeeriin neeuche inetono janonaa bana. <sup>17</sup> Cana Coaunera bajaebajajeein neeuche inetono janonaa bana. <sup>18</sup> Chatohaneein inara tera nihane nihanatiin coroaecuche, nitohaneein coujuriu Cana Coaunera Calaohi Jesocurisito esenetaera neein nena tocohaneein neeichene jeriha Cana Coaunerana jaun.

<sup>19</sup> Inara suujuatenaa jeriha Cana Coaunera Suujuene, aonaain tonoracuche.

<sup>20</sup> Cana Coaunera Ere biha Cana Coaunera letonone, nijiaonriha batohin neeichene. <sup>21</sup> Esinae rauhijiriin suujua coaraain inara relaacaanune rijitoein inara relaauruhane esenetaain tonoraache. <sup>22</sup> Itolere baaso jianein neeuche.

<sup>23</sup> Acaiha nejein nere esenetaain tonoraera neein neeichene coina inara suujua coreeine atiin cana rai raoti ichaonaa tera Cana Coaunera. Aihute neculocohin neeine inara jaberoco, inara suujue aina coaiteen turuha Cana Curuaanaa Jesocurisito nereein tiaain. <sup>24</sup> Nitohaneeinte ichareein nii Inara Cotiharalu, nitohaneein nihana jaun.

*Laenaane satononiha acaauru corojeein acaauru coaaucaane biha Faborone*

<sup>25</sup> Cana Coaunera bajaauca canacaanu rai atiin.

<sup>26</sup> “Inara coaaucuruha jera Faborooru,” naauche satiin cana nejeraauru Cana Coaunera coitucuurera rai.

<sup>27</sup> Aihana jaun acaauru rai caa canuhacha laenai ereretaauche, Cana Curuaanaa letoeratenojohin neein nihana jaun.

<sup>28</sup> Inara coroatajaneeine Cana Curuaanaa Jesocurisitote raotojoein neeiche.

Nitohaneein neeine.

## **Tesalonecau nenacaauru rai Faborohacha letoai coroataja**

### *“Chatohaneein neeiche” naa Faborone*

<sup>1</sup> Canu Faboro nichaaune, Siribano, Timoteeo, naaonjoain nichaanunena caa laenaain letoarichaanuhin. Saain nii Tesalonecau nenacaauru Cana Inaca Cana Coaunera, Cana Curuaanaa Jesocurisito naaonjoaunri coitucuurera raina caa laenaain letoaacaanu. <sup>2</sup> Inara coroatajanein Cana Inaca Cana Coaunera, Cana Curuaanaa Jesocurisito naaonjoainte raotojoein neeiche.

### *“Nariha” naain corojeein Cana Coaunera bajaa Faborone*

<sup>3</sup> Esinae rauhijiriin jelai choae jauhecotojoeriin Cana Coaunera esenetaain, ita belaaain neeichene jaun, “Nariha,” naain Cana Coaunera rai inara coroaecaanunete caohachae. <sup>4</sup> Nii jaunna Cana Coaunera rai ita taoji-  
aeraauru rai raotojoein inara beebejihacaanu, Cana Coaunera Calaohi Jesocurisito coitucuhichene coreniha inara rohecaain, inara cairichaa-  
ruhane nihanatiin, cha que erelanaala abaantaain itolere necairichanaa  
abaantaain neeichene jaun. <sup>5</sup> Nitohaneein abaantaain neeichene jaunte  
esinae rauhijiriin caohatiin inara raain niha Cana Coaunerane coaraa cuurureein inara coaraauru.

<sup>6</sup> Nii inara cairichaaeriin nenacaauru cairichaaain niha Cana Coauneranete caohachae. <sup>7</sup> Inae dede caje turuha uha Cana Curuaanaa Jesocurisito, rai letonocuru mijiaainetoori-  
anjeraauru ainane banate, nebetacanaa tereein cana rai Cana Coaunera. Nebetacaacachene jana, acaauru cana rerohar-  
iha necairichaauruhane coina. <sup>8</sup> Cana Coaunera esenetaauruhi, chaen nii jianacoo cana mitaera Jesocurisito ere esenetaauruhi, casetecaa usi tabai  
quene coinata turuha ureein Cana Coaunera Calaohi. <sup>9-10</sup> Canacaanuhacha beebejei esenetaaichene jaunte, Cana Curuaanaa coroaecurureein saain  
esenetaeraauru inae turuhane bana. Nii banate caseteco coaraa cuurureein, cha bana jelai caje mituuruhane coina que aina rijijieein. Nii banate coriae  
Cana Curuaanaa coarihei rijijieein niha cuurureein nii nere esenetaauruhi.

<sup>11</sup> Nii jaunna inara rai Cana Coaunera itolere amurijiriin nena bajaa-  
caanu, inacojoein inara cotijiaeniha Cana Coaunerana jaun. Chaen nachu caohachaaain coaauquichene rijijieein inara tiha Cana Coaunerane coina  
Cana Coaunera bajaacaanu. Chaen nachu nii nunuheteichene rijijieein, jerichanejeein inara amihaneeo ichaaain neeichene coina Cana Coaunera  
bajaacaanu, esenetaain ichaquichene jaun. <sup>12</sup> Nitohaneein ichaquichene jaunte, inara coreniha Cana Curuaanaa Jesocurisito coroaecurureein satiin.  
Nitohaneein Jesocurisito letononeein neeichene jaunte inara coroaeca cuurureein, nitohaneein jeriha Cana Coaunera, Cana Curuaanaa Jesocurisito,  
naaonjoaine jaun.

## **2**

### *Inae cuu tee lalajiha Cana Curuaanaa turune janate niha cureein leinjiin cacha coritaraanu*

<sup>1-2</sup> “Naaonjoainte turuha ureein Cana Curuaanaa Jesocurisito,” naain bi-  
hacaanulu inara raina jaun, coa inara coritaera nihane esenetaain nihache. Inara rene turuhin, “Canacaanu rai beein beratiha Cana Coaunerana jaunna  
coaiteen turuha Cana Curuaanaane bihacaanune coina, cau inara rene turuha uhacaanu,” naa chuneine nijiaonriha esenetaaichene. Chaen chu,  
“Canacaanuhacha letoai je,” naain inara rai quiricha tera nihane nijiaonriha



esenetaain neeichene. <sup>3</sup> Nijiaonriha chatohaneein nihanatiin, tonaain inara coritana jerera nihane esenetaain neeichene. Inae cuu tee lalajiha Cana Curuaanaa turune janate niha cureein leinjiin necha ansai cacha coritaera, Cana Coaunera niha nocoetiin. Nii erete tonoraa cuurureein, Cana Coaunera ere tonorana coacuelanaala. Niqui nete nii acaauruhacha ere tonorai itajiha cureein Cana Coaunera. <sup>4</sup> Niite Cana Coaunera aina nejerateein, niicha tonorai tonoraa cachane, aina nejeratereein. Acaihanejein acaacha ere tonoraacachane jereein Cana Coaunera niha nocoetiin nelauriaa cureein Jerosaleen nena Cana Coaunera Loreri asaae.

<sup>5</sup> Coauquiche chachu natiin, inara aina nihanune banana chu caritiin inara rai bihaaanulu. <sup>6</sup> Inarate cojoinacatiha Cana Coaunerane ajiniha turuenerihanine coitucuhiche raotojoein. <sup>7</sup> Inae nunuejiha nii Osa Neba amihaneon asinojoein. Inae jianiha nii acatera neechate cohaje, <sup>8</sup> ecooca nii nechu aansai atebinaene coina. Nii banate turuha uha Cana Curuaanaa Jesocurisitone, neraaicha que jiheitiin itajiha cureein Cana Curuaanaa Jesocurisito. <sup>9</sup> Nii nechu aansai ataibinaen osaaonate turoreein nechu aansai atebinaen Moconajaera letono neein, nechu jataen itolere ichaain cacha coritaeraanu que, nohaneein itolere ichaain cacha notaaranu que. <sup>10</sup> Nitohaneente itolere que nohaneein ichaonaa rauhi aonana jerecuruhi coritaa cureein. <sup>11</sup> Nitohaneente casajeje esenetaauruhane coina, inauhene coarajenajareein Cana Coaunera, <sup>12</sup> nitajeeuruha nii nere rauhi jerelanaala casajeicha tonoraeraaurune coina.

<sup>13</sup> Nii jaunna inetono janonaa bana, “Nariha,” naain Cana Coaunera coroaecaanu inara coreniha. Jataaente inara belai Cana Curuaanaara, canejeraauru, jauriaa nejeein inara que tacaajeein inara raa Cana Coaunerana jaun. Nere rauhi esenetaaichene corenihate, rai Suujue que inara suujua coreein inara rae Cana Coaunera. <sup>14</sup> Nii jaunte nii canacaanuhacha beebejei nere aina cuaain inara cotijiae Cana Coaunera aina Cana Curuaanaa Jesocurisito rijijieein aina neeiche caohatiine coina.

<sup>15</sup> Aihana jaun nitohaneein rauhijiriin ichaaoche. Coa nii quiricha cuhane reein tiaain inara suujuateein nihacaanune jaan baitichache. <sup>16-17</sup> Inara suujua laraajiaain, nunaaine Cana Curuaanaa Jesocurisito, Cana Inaca Cana Coaunera nii inoaelu caje coauneein cana belaicha, nii cha bana satonohane que ainaa rijijieein aina niha curichaacheine tera. Aihute inara suujua coaraain raotojoein ereerejeein caohacha ichaain neeiche, Cana Coaunera coreniha.

### 3

#### *Cana Coaunera bajaachete, canacaanu coroatajaneeine*

<sup>1</sup> Inae satono nejeeine caa inara rai aitoreeunicha canejeraauru. Cana Coaunera bajaachete canacaanu coroatajaneeinete, itolere sacutaain turuhine caa canacaanuhacha beebejei Cana Curuaanaa ere. Aihute nii aaichene rijijieein caohachaaain esenetaain, caohatiin raain tonoraauruhine. <sup>2</sup> Esenetaeniha saain cachana jaun, aihute nii aansainein nenacaauru canacaanu que janoriteeine Cana Coaunera, nabana chatohaneein canacaanu teeuruhane coataa. <sup>3</sup> Cana Curuaanaate inetono janonaa bana inara suujua laraajiaain inara beraicheein, nabana chatohaneein inara tiha joaenreein chaelaine coataa. <sup>4</sup> Nitohaneente esinae rauhijiriin inara coroatajaniha cureein Cana Curuaanaa caa canacaanu aitoonjoan rijijieein ichaechajein ichaohichene coina. <sup>5</sup> Inara coroatajaneeine Cana Curuaanaate, inara belaaain niha Cana Coaunerane coitucuhin, aiha Curisitone rijijieein chatohanai nihanatiin abaantaain neeiche.

<sup>6</sup> Cana Curuaanaa Jesocurisito cocoainanohineeinna mijjaainetiin inara rai aitiin letoarichaanuhin, chunei cana nejera, Cana Coaunera coitucuera amihanena jerelanaala, caa inara relaacaanune jaan tonorana jerenihane ratiriin caje amuuche. <sup>7-8</sup> Inarate raotojoein coitucuhiche, inara aina nihacaanune bana chaelai janonaa bana nirijieein amihanelanaala nirijieein core colane inara caje lenone bajaain nenihacaanune coitucuhiche. Nitohaneeina janotiin inetojoein amihaneein coreniha canacaanu lenone coreteein nerejetocooanulu, nabana canacaanu coreniha chaelai que latejiojoiiriin niha chuneine coataa. <sup>9</sup> Niha canacaanu rai rauhi, inara caje chaelai bajaacaanune natiina amihaneein coreniha canacaanuhacha latei coreteein nerejetocooanulu, jericha nejeein canacaanu rijijieein neeichene coina. <sup>10</sup> Nii inara aina nihacaanune bana inara rai aitocooanulune rijijieein, “Chunei amihanena jerenihane coa lenoniha,” naacaanulu. <sup>11</sup> Nii inara laurijiracuru tabaauru jetaote, “Nechu jataen nirijieein amihanelanaala nechu jataen amuhemujeeure, joenreein acaauruhacha jerei ichaechejeein,” naaina coitucuhacaanu. <sup>12</sup> Aihana jaunne Cana Curuaanaa Jesocurisito cocoainanohi neein nihacaanune jaun aitorichaanuhin, acaauru rai aitocoichene raotojoeincha amihaneein ichaauruhane coina.

<sup>13</sup> Coa caohacha ichaain neeichene jianichache coiinteein. Jericha nejeeincha sacuuche.

<sup>14</sup> Cha teeinti, erenaa tonoraelanaala caa quiricha cuhane aitiin, aitocooanune tonoraene; nitohanei nihane, nijiaonriha tonaain ereichenete necoejeeine. <sup>15</sup> Nijiaonriha aina obajeein nejerateeichene. Coujuriu Cana Coaunera coreniha ita nejera neein nena tocohaneein, raotono que cuaain suujuateein neeuche.

*Satonotihane rai, “Raotojoein neeuche” naa Faborone*

<sup>16</sup> Inetono janonaa bana inara coroatajaneetine cana rai raoti ichaonaa tera Cana Curuaanaate, raotojoein neeiche. Satiin inara coarajeeine Cana Curuaanaa.

<sup>17</sup> Canuna Faboro neein caraaje nihane cacoi que laenaain caa quiricha letoaaun. Catohaneeina laenaain letoaun canu.

<sup>18</sup> Satiin inara coroatajaneetine Cana Curuaanaa Jesocurisito. Nitohanemiin.

## Timoteeo rai Faborohacha letoai leinjiin

### *Jauriaa nejeein Timoteeo rai Faboroacha letoai quiricha*

<sup>1</sup> Canuna Jesocurisito letono Faboro neeun. Cana Coaunera coreni-hate jianacoo nihacache. Aihana jaun, Jesocurisitohachate cohajiha-cache coaiteen enacoauneein cau turuhane chabana satonoelanaala rai Cojoanonaa que nihacachene coina. Cana Coaunera, Calaohi Jesocurisito, naaonjoainte canu cocoinaain caletoa.

<sup>2</sup> Ii raine caa quiricha laenaunra cacalabi Timoteeo. Cacoreniha Cana Coaunera Calaohi Jesocurisito coitucuhina jaunte, cacalabi neeinha. Rao-tojoein neeine coina rai raotonoque ii rausiajeein ii coroatajaneeine Cana Inaca Cana Coaunera, Cana Curuaanaa Jesocurisito, naaonjoain.

### *Baasoneein cacha relaurera que necoeraain niha Timoteeone coina suuju-atiha Faborone*

<sup>3</sup> Masedonia cuhanulune ajiniha ichei aitocoaunlune tocohaneein nii Efesohacha neeu. Coa baaso que nii quiiha relaauri relaeranihane, coa inauhene coarajiha. <sup>4</sup> Coa nereretanaa inoasesi baasoque nereretanaaauru aina inara suujua cuaain nihache. Coatihana Cana Coaunera Aitoonjoan ichaain tonoraacachene coina cana letoaera nihei. Rauhijiriin relanajaau Cana Coaunera esenetaain tonoraauruha caohatiin saaine coina.

<sup>5</sup> Baaso cocuelanaala caohatiin inara suujua coaraain, esinaaen rauhijiriin Cana Coaunera esenetaain, ita belaaichene coinana caa caritiin inara rai laenaun. <sup>6</sup> Baaso erenaa que ita rai ereerejeein, Cana Coaunera Ere esine tonorana jihaneein raaje nitajeeuruha tabaaaurune jaunna aitoon. <sup>7</sup> Nitorijihanei cachaaurute, cacha relaeraneein nena jerecuree in nechu jataen joaenrein.

### *Jerihana Acane rijijeein ichaoha cachane coinata, aitiin Naitoonjoan laenaerateluna inoanlu Cana Coaunera*

<sup>8</sup> Acaihanejein Cana Coauneraachate, rauhijiriin caohacha ichae. Baasoneein ichaoha cachane coataate niicha jerei tocohaneein aitiin laenaerateluna inoanlu Cana Coaunera, Moisesa que. Aihana jaun, caohachaain rauhijiriin Cana Coaunera Aitoonjoan tonoraacachenete caohache. <sup>9</sup> Coatihana caohacha cachaauru suujuateraannu que aitiin Naitoonjoan laenaeratiheilu Cana Coaunera. Erenaa tonoraauruhi, itolere cacha amuritoheriin suujua coaraain niha nocoetocuri suujuateraannu quete aitiin Naitoonjoan laenaerateluna Cana Coaunera. Nechu aansai osaaonaauru, Cana Coaunera Ere tonoraauruhi suujuateraannu quete nitohaneein laenaerateluna Cana Coaunera. Fojiara que suujua acatieichuru, sonajaain jaorera, <sup>10</sup> chaenchu sinijeranelanaala nena ene aina ichaojeracoori, ene rijijeein namute quicha aina ichaojeracoori, quicha rijijeein namute ene aina ichaojeraqui, cacha basijiauhin necoretenaauru, casajeeuru, chaenchu "Cana Coaunera te coaraje," naain nohanenacaauru, naaonjoainuri suujuateraannu quete niicha jerei tocohaneein aitiin Naitoonjoan laenaerateluna Cana Coaunera. Caohati cacha relanaanajaa caohateraneein nenacaauru suujuateraannu quete, niicha jerei tocohaneein aitiin Naitoonjoan laenaerateluna Cana Coaunera.

<sup>11</sup> Caa inara relaanune jaan caletoaera Cana Coaunera Ere rijijeeinte aite caa Cana Coaunera Aitoonjoan Inoaensi.

*Faboro letoaa Cana Coaunerane*

<sup>12</sup> Jataainna corojeeun, laraajiin cacha relaanune coina caletoaa Cana Curuaanaa Jesocurisitona jaun. Caohachaaïn rauhijiriin icharichaaunnine coitucuhana jaunte caletoae niicha jerenohin ichacaaunne coina.

<sup>13</sup> Baasoneeinna Jesocurisito que erein nere tonoraaurera cairichaerichaetoonlu. Nii atiinte atiin cacoelaaïn caraë Cana Coaunera. Nii bana esenetaain coitucuenihanuluna jaunna nitohaneein nerejetoonlu.

<sup>14</sup> Jataen cacoelaiha Cana Curuaanaana jaunna, nii ucuaetoha caa esenetaain jereein neeun.

<sup>15-16</sup> Esinaente rauhijiriin turuha uhe caa chauratane que Jesocurisito, jianacoon osaonaauru mitaane coina. Jana canuna osaonaauru nujuaaneein neeunlu niqiu. Nete atiin cacoelai Cana Coaunera, osaonaauru nujua belaiha Cana Coaunerane coitucuuruha satiin cachaaurune coina. “Charijieeinteeinti Faboro belai Cana Coaunera. Nii rijijieeintechu canu belaichein,” naain Cana Coaunera esenetaerate nitajenaa charanejeein nenea ichaonaa raa cureein.

<sup>17</sup> Nii coreniha coanete caohatiin chabana onaa charanejeein nenea Cana Curuaanaa que raotojoein ereerejeein nihacache. Coanete acaihanejein chabana coarai Cana Coaunera ere tonoraain, caohatiin que ereerejeein nihacache inoaenlu netojoein.

*Timoteeo suujuatiha Faborone*

<sup>18</sup> Nere beracuru que eletoaeratiha Cana Coaunerane rijijieein, laraajiin, neeunaain nere tonoraain ichaaura cacalabi Timoteeo. <sup>19</sup> Tabaaaurute Cana Coaunera sacunaa jerecuruhane nihanatiin, suujua coaraelanaala neein, rauhijiriin ichacurenihane necairichanaa coaracure. <sup>20</sup> Nitohaneeinte situurelu Imeneeo, Alejaandoro, naaonjoaunri. Nii caaijena Moconajaera que casetecaeratenajaunlu, coaiten enacoauneein Cana Coaunera que baasoneein ereeuruhane coataa. Nijiaonriha iitonai nitoanein situhine.

**2***Bajaebajaecuchete satiin cachaauru coroatajanemiin Cana Coaunera*

<sup>1</sup> Jauriaanejein Cana Coaunera bajaebajaecuchete satiin cachaauru coroatajanemiin. <sup>2</sup> Bajaichenete, satiin curuaanaacuru, cocoinanacaihuri, naaonjoaunri suujuatiha Cana Coaunerane, raotojoein Cana Coaunera ere tonoraain ichaaurureein cachaauru. <sup>3</sup> Nitohaneeinte jeere nii jianacoo cana mitaera Cana Coaunera. <sup>4</sup> Acate satiin jianacoo neein, nere esine coitucuhin neein nihacachene jeere. <sup>5</sup> Jana, Jesocurisitote laen, Cana Coaunera aina caohachaaïn nihacachene coina, nii rucuheraanu que nenea ne. Cana rijijieein cachaneein nihana jaunte naine. <sup>6</sup> Inae nitohaneein letoaa Cana Coaunerana jaunte, raajenihane cana coreniha coroso que ohe Jesocurisito, coreniha osa caje jianacoo nihacachene coina.

<sup>7</sup> Nii jaunna Jorio niheichuru relaeraannu que Cana Coauneraacha letoanojoneein neeun, rauhijiriin Jesocurisito coitucuuruhane coina. Curisito esenetaera nihanuna jaunna, rauhijiriin aitoon noanenaanelanaala.

*Caohachaaïn suujua coaraain neeuruha quichaauru aina enecurune*

<sup>8</sup> Nii jaunna itolere sacutain, Cana Coaunera bajaauruha satiin cachaaurune jereein canu. Ita baijiaelanaala, raotiin suujua aina neein, biji michuin Cana Coaunera bajaa satiin nere tonoraeraaurune jereein.

<sup>9</sup> Coa cajione jataen coreti que necoreeteuuruha enecuru. <sup>10</sup> Coujuriu Jesocurisito esenetaeranein nenea tocohanein cacha belaihuruhine

enecuru. <sup>11</sup> Cacha relaa relaerane, inauheneeicha aonajeein nerelaauruhine enecuru. <sup>12</sup> Coatihachu chaen quichaauru relaauruha enecurune jerinaaun. Nijiaonria quichaauru amuritiin letoaauruha enecurune, <sup>13</sup> necoanaa Ebane ajiniha, Adaan coaunaain niha Cana Coaunerana jaun. <sup>14</sup> Cachaauru coanaa Cana Coaunerane bana, coatiha nii Adaan coritaai Moconajaera. Acaihanejein nii Ebaachate laen coritae. Nii jaunte osa que nesaruelu nii ene. <sup>15</sup> Nii jaunte canaanai sirihane, inae janoaane rai cuna caaun necairichanaa coareein ene. Nete atiin jianacoon niha cuururein ichoteratenajarichain Cana Coaunerane esenetaain nere tonoraaurera enecuru.

### 3

#### *Cana Coaunera cachaauru beraicha neein nenacaauru*

<sup>1</sup> Esinaena rauhijiriin aitoreeunni. Cana Coaunera coitucuurera beraicha neein nena jeriha chuneinete, caohati amihanenaa ichana jererein. <sup>2</sup> Caohachain ichaohanete caohachae, neniha cotaichane coina. Leinjiin ene lananeein nihanete caohachare. Chaen suujua coaraneein nihanete caohachae. Chaen nenajaun turuhi nihane, caohachain raeraneein neinihanete caohachae. Chaen caohachain cacha relaanete nere. <sup>3</sup> Nihein chu chaen ajetoritelanaala, cacha leratelanaala, que tonaain chaque ereinihane abaantaain, coriqui mucuhanajaacha que coacuelanaala, naaonjoain nihanete caohachae. <sup>4</sup> Chaen, caohachain sinijiera suujuateein, bereecuru suujuateein, saain nii loreri asaa nenacaauru suujuateein nihanete caohachare. Chaen suujua acatein, erenaa tonorain neeuruha bereecurunete caohachare. <sup>5</sup> Inasiinte comasai suujuatenaa inaelanaala, niheichu bereecuru suujuatenaa inaelanaala nihane, chaen Cana Coaunera coitucuurera beraiche-beraichacuru. <sup>6</sup> Chaen chu ena Cana Coaunera aina enonaa nihane, caohacharihei leeocho cachaauru amuritoheriin suujua coaraain itolere inaa nocoetohane. Charijieein teeinti ai Moconajaera, nii rijijieein situhane casetecaa Cana Coaunerane coataa. <sup>7</sup> Chaen chu Cana Coaunera coitucuuruhi cachaauru rai nihanatiin, suujua coaraneein nihanete caohachare, nabana batocuruhane coritaa Moconojaerane, nabana baasoneein ichaane coataa. Nitohaniha Cana Coaunera coitucuurera beraichanete caohachae.

#### *Cana Coaunera coitucuurera coroatajanera-diaconooru*

<sup>8</sup> Suujua coaraneein niha Cana Coaunera coitucuurera coroatajaneraneete caohachare. Chaen chu casajenetelanaala, ajetoritelanaala, nihein chu chaen coriqui basijiauna coacuelanaala, <sup>9</sup> chaen chu chatohaneein teeinti nerejetelu Jesocurisito, caohatiin nii coitucuera nihanete caohachare. Chaen chu nii niicha coitucui suujuelanaala nihanete caohachare. <sup>10</sup> Nitohaneein neeuruhane acaauru coujuhin acaauru coaracuchete, neniha acaauru rai lanaine Cana Coaunera coitucuurera coroatajaneraneein neeuruhine. <sup>11</sup> Jerichanejein enecuru netonai, caohachain suujua coaraain neeuruhanete caohachare. Chaen chu casajenetelanaala, nihein chu erenacaotelanaala neeuruhanete caohachare. Itolereenein rauhijiriin caohachain neeuruhanete caohachae. Nitohaneein neeuruha Cana Coaunera coitucuurera coroatajaneraneein nenecaauru-diaconooru enecurunete caohachae. <sup>12</sup> Jana quicha nihane leinjiin ene sinijieraneein nihanete caohachare. Chaen chu, sinijiera suujuateein bereecuru suujuateein, saain nii loreri asae nenacaauru suujuateein nihanete caohachare. Nitohaneein neite caohachae Cana Coaunera coitucuurera coroatajanera-diacono neein nihane.

<sup>13</sup> Nitohaneein caohatiin acaauru amihaneon ichacuruhanete, acaauru belaiha cuurureein cachaauru. Chaentechu jeelai amuritoheriin laraajiin Jesocurisito que cacha relanaa nainecurureein.

#### *Cana Coaunera ranojoihunru cachaauru*

<sup>14</sup> Enanecoojoana turuhin ichoharaa uhene rijitoeun niqui, nechaainti nainerichaaunni. <sup>15</sup> Nii jaunna inaen ichei caa quiricha letoareeunni, cojoainihanune, coujuriu Cana Coauneraacha ranojoneein nenea nicha tei idesia neeichene jaan tocohanein caohachaaain neeichene coina. Cana Coaunera Ere Rauhi acateranihate neeure Cana Coaunera ranojoinunru cachaauru. <sup>16</sup> Jataainte caohate esinaae raujiriin nii canaacha esenetai Jesocurisito niqui, nete coitucuurene Cana Coaunera coitucuruhi cachaauru. Caa chauratane quete ecocoe Jesocurisito cachanein.

Nii janate coujuhin coaraa Cana Coaunera Suujuene jana caohate.

Coujuhin coaraane janate, coarajeure Cana Coaunera letonocuru anjer-  
aauru.

Nii jaunte amuhemujeein laurilaurichuru nenacaauru cachaauru rai be-  
bejeure Cana Coaunera coitucuurera, itolerenein caa chauratane  
sacutaain coitucuruha cachaaurune coina.

Chaentechu enacoauneein dedeeu rae Cana Coaunera. Nitohaneeinte saain  
coitucuhacache.

## 4

#### *Baaso que cachaauru relaurera*

<sup>1</sup> Rijieeri banate Cana Coaunera ere jianeein ratiriin casaje que acaauru relaain, acaauru coritaa osaaonaaurune esenetaain tonoraa cuurureein tabaauru. <sup>2</sup> Nitohaneeinte necoejena charaauru casaje cachaauru ere tonoraa cuurureein, niritiinte be rauhijiriin Cana Coaunera Suujue.

<sup>3</sup> Nitohaneeite ene ranaa jeriha cachane caohatiha cuurureein. Chaentechu nelanajanaa jeriha ene ne caohatiha cuurureein. Chaentechu joenreein lenone que lenoniha cachane caohatiha cuurureein. Raotojoein corojeein Cana Coaunera bajaain que neleenijiaain niha Cana Coaunera Ere coitucuhin esenetaaurera cachaaurune coina, itolere lenone coaunaain niha Cana Coaunera natiinte, que neleenijiaain niha cachane caohatiha cuurureein.

<sup>4</sup> Itolere Cana Coauneraacha coaunanohinte caohachae. Nii jaun naini-  
hei chaque irihacane. Nitohanihana jaunte, corojeein Cana Coaunera ba-  
jaain joaereein raacachene caohachae. <sup>5</sup> Nitohaneein biha Cana Coaunera  
Erena jaunte caohachae. Chaenchu lenonichaachene ajiniha bajaacach-  
enete caohachae.

#### *Jesocurisito letono esine*

<sup>6</sup> Caa caitoonjoan que cana nejeraauru- Cana Coaunera cachaauru re-  
laainete, esinaaen rauhijiriin Jesocurisito letono esineneein niha curiquiin.  
Charijieein teeinti, lenonihane baiha raotojoein nelararajiae cacha. Nii  
rijijieeinte Cana Coaunera ere coitucuhine laraajiin niha curiquiin, nii cao-  
hati nerelana najaan coitucuhin tonoraaine. <sup>7</sup> Aihana jaun, casaje tonorae-  
lanaala Cana Coauneraacha jerenohincha ichajeeincha neeu.

<sup>8</sup> Najaicharooda cana jaberocone cointate nelate cojoanonetoein  
necoatijiaacane. Nii amuritoheriinte nelate itolere que rauhijiriin  
Cana Coaunera Ere tonoraacachene. <sup>9</sup> Esinaaena aitoon, aihane jaun  
esenetaachenete ne. <sup>10</sup> Acaihanejein Cana Coaunera esenetaacachena  
jaunte cana bathin, cana necoeje chanuuruhane niha natiin, neeunaain  
mainajeein amihanihacache.

Satiin cachate coroatajane Cana Coaunera. Jana esinaen rauhijiriin esenetaauruhanete, nii esenetaaurera coroatajaniha cureein, leeochoaauru coroatajanihane amuritoheriin. <sup>11</sup> Caritiin suujuatenajaain relanajaau. <sup>12</sup> Enamanaa neeina jaun, ii batohin, ii necoeje chanuuruhane niha natiin, coa tonoraa. Aihana jaun, atiin caohacha ichaain neeute, ii coaraain icheji-jieein caohachaain neeuruhine Cana Coaunera esenetaaurera. Caohatiin ereerejeein, caohatiin ii ichao que ichaohin, Cana Coaunera, leeochoaauru, naaonjoaainunri belaaain, Cana Coaunera Ere esenetaain, ishujua coaraain, naaonjoaain neeu atiin.

<sup>13</sup> Turuhanune reeintiaain, ita taojiaa cachaurune jana Cana Coaunera Ere coaraain itolere bana ereretaau. Chaenchu Cana Coaunera coreniha cana nejeraauru suujuateein relanajaau. <sup>14</sup> Jiaonriha ichei Cana Coauneraaacha tei amihanenaa jianeeine. Acaauru letoaa Cana Coaunera Suujuene jaunte, ichouturi ichoae biji teein, ii cocoinaunre Cana Coaunera coitucurerera ichauhenauru, nii niicha tei amihanenaa nainaaaine coina. Aihana jaun, coa jianiha.

<sup>15</sup> Atiin itolere bana ii amihaneeon chaaechajeein neeute, taeneein naurutanaurutaain cuujiha ii amihaneeonne coaracurumiin satiin cachauru.

<sup>16</sup> Aonaau. Caohatiin ishujua coaraain necohalajiin neein rauhijiriin cachauru relaau laraajiin. Nitohaneein ichaainete, nichoteein jianacoo nerequiin ii ere aohanraauru aina.

## 5

### *Cana Coaunera coitucurerera aina suujua coaraain nihane*

<sup>1</sup> Baasoneein ichaa chunei ichauhenane, coa cotaicha rijitiin suujuatiha. Charijiein teeinti chaca suujuateeine suujuateei. Nii rijijiein raotojoein belaaain suujuateeu. Chaenchu chocoalacuru belaaaine rijitoein enamanaacuru belaihu. <sup>2</sup> Jericha nejeeinchu choba aina caoachaain neeine rijijieein enecuru aina caoachaain neeu. Jericha nejeeinchu ii baihuru aina caoachaain neeine rijijieein ranunaauru aina netonai caoachaain neeu.

<sup>3</sup> Niha autananeein enene coroatajaneeu, esinaen rauhijiriin cairichainein nihane. <sup>4</sup> Jana, niha calaohi, nichoala, naaonjoainne fojiaraauru nihane coitucuhin, coitucueracuru neein nihane coitucuhin coroatajanecuruhinete, nii acaauru fojiaa acaauru fojjarane acatiha tacaain cainaaauruhine, nitohaneein jeriha Cana Coaunerana jaun.

<sup>5</sup> Canaanai sirilanaala jataen jelai nihanete, Cana Coaunera bajaeba-jaecure janotiin netojoein autanaauru esineeuru, acaauru coroatajanena nainiha Cana Coaunerane coitucuuruhana jaun. <sup>6</sup> Jana, itolere rucuheleeruhacha coacuhin caohatiin neruujuein raotojoein ichaonaa coaauca autanete, ninauhene nena rijijiein niha cureein.

<sup>7</sup> Caritiinchu acaauru relaau, suujuatera latecuruhane coataa. <sup>8</sup> Chunicoha chaelai latiha naraaichurune jana coroatajanena jerenihane choae tacaain fojiaraauru coroatajanenaa jerenihanete, Cana Coaunera coitucuuruhi fautaeriin nereein, "Cana Coaunera coitucuhanu," naane niha natiin, Cana Coaunera Ere tonoraenihane.

<sup>9</sup> Coa joaenreein autana curuaa laenaa, autana esine canaacha coroatajaneeni curuaacuru siricha quiricha cuhane. Caohachaain saota choonca ajaanaca niha autanane curuaa laenaa. Chaen leijiin quicha aina neein autana nihane, curuaa laenaa. <sup>10</sup> Chaenchu jaiti jiniiquiin ichaohin neeuruhane caje coauneein, caohatiin bereecuru fojiara neein, rene bedaenecuruha niicha coitucuuruhi cachaurune jana caohatiin raera neein, rene bedaenecuruha cana nejeraauru- Cana Coaunera coitucurerane jana

jataen belaaïn raera neein, necairichaa chuneine jana coroatajanera neein, naaonjoaain neinihanete caohachare.

<sup>11</sup> Jana jaiti ena nichauhenane cataaun tiha autanane, coa curuaa laenaa quiricha cuhane. Nabana “Inae coaiten nelanajariaunni,” naain iriha Jesocurisito raine baiha, <sup>12</sup> Jesocurisito ere tonorana coiinteein enacoauneein nelanajaane, caseteco coaraane coataa. <sup>13</sup> Chaenchu bajeritiin neein, le lorerichuru asae cuhin cajihaneein casaje que ereerejeein itolere cachaacha rautaaï que enohane coataa.

<sup>14</sup> Nii jaunna, jaiti ranunaniha autanane nelanajaane jereeeun. Nelanajain bereecuru fojiaain, rai namihaneon ichaane jereun, nihei cha que lera-teein coulurujuenaa naineniha Moconajaerane coina. <sup>15</sup> Tabaauru Cana Coaunera jianein, Moconajaera ere tonoraauruha autanaaurune jaun.

<sup>16</sup> Cana Coaunera coitucuhin esenetaeraauru enecuru, autananiha chuni naraaine coroatajanemii. Nabana jataen mainajeein amihaneein coroatajanecuruha Cana Coaunera rai ita taojiaerauru cachaaurune coataa. Nitohanein ichaquichenete, esinaen cairicheineein nenacaauru autanaauru coroatajanena nainecurureein Cana Coaunera rai ita taojiaerauru cachaauru.

#### *Caná Coaunera rai ita taojiaerauru cachaauru ichauhenaauru coroatajanecuche*

<sup>17</sup> Atiin caohatiin Cana Coaunera rai ita taojiaerauru cachaauru suujuateein beraihurera ichauhenaauru belain coroatajanecuruhine. Chaenchu acaihanejein Cana Coaunera Ere beebejeein cachaauru relaaureraacha coroatajanecuruhine, leeochoauru coroatajanecuruhane amuritoheriin.

<sup>18</sup> “Baca amiharateeiche aroso rojoenaa quene, coa aroso quihane coataa borasa que nujuaen conajain amiharatihache,” aitoaha Cana Coaunera ere cuhanaine jaun, amihanihane coreniha quihanete caoachae. Nii rijijiein core raauruha nii Cana Coaunera Ere beebejeein cacha relaaurera ichauhenaaurunete caohachae.

<sup>19</sup> Neniha coroatajaain, nichatajaain, naaonjoain coaraaurune jana ii rai ichauhena coulurujiha chuneine coa tonoraa. <sup>20</sup> Chaenchu baaso ichaechajeein nosatihajeein sacuha chunei ichauhenane, ita taojiaauruha cachaaurune jana, aonajeeuruha satianne urichoo mijiainetiin rai aitiin suujuateeute caje coaraain casihuruhine nii leeochoauru.

<sup>21</sup> Chunei jataain ii suujua acateeine jaan niha natiin baaso ichaane, ita taojiaauruha cachaaurune jana acaauru suujuateeu, caa aitocoanne tocoaneein. Cana Coaunera, Cana Curuaanaa Jesocurisito, chaen janijiin nii niicha raauri letonocuru anjeraauru, naaonjoaihunri notaracaena caa caritiin eletoaun, atiin nitohanein ichaine coina.

<sup>22</sup> Ena Jesocurisito esenetaera nihane, coa Cana Coaunera rai ita taojiaerauru bichauhenanein enoha, nabana enoin baasoneein ichaane, coroatajaneranein ii nerotohine coata. Atiin ishujua coaraain neeu.

<sup>23</sup> Cunaitejerii ii suriquene rijijiein, coa jeesiaanca nejeesinaacha coha. Aansijiin bino cohin coaraau.

<sup>24</sup> Inanacaa tabaauru osaque nesaruhane, “Naaonjoaainte nera,” nain que iriha chuneine latelanaala. Jana tabaauru raite inanacaene, “Naojoaainte nera,” nain que erei colane.

<sup>25</sup> Jericha nejeeintechu nii rijijiein inanacae caohacha ichaain niha cachane. Jana jauriaanejeein inanacaenihane nihanatiinte nirijieein cuajeein inanacaa cue.



## 6

### *Niha fatoroonne*

<sup>1</sup> Rebeeocuruha fatoroon quene, nere tonoraauruhine. Nabana Cana Coanera que ereein, nii Jesocurisito que cacha relaacachene que ereein cana que baasoneein ereeuruhane coataa. <sup>2</sup> Chaenchu Jesocurisito coitucuhin esenetaera niha fatoroonne jerichanejeein nere tonoraauruhine. Jesocurisito coitucuha fatoroonne coreniha acauru nejera rijijiein nihane coreniha, coa baasonein nere tonoraauruha. Nii choae jauhecotojoeriin coroatajanecurumiin nere tonoraain, Jesocurisito esenetaera fatoroon nihane.

### *Itolere coitucuha nocoetocuri*

<sup>3</sup> Caritiin relanajaeniha chuneine, Cana Curuaana Jesocurisito ere rauhi tonoraelanaala neeuruhane coataa, rauhijiriin cana relaa cana relaurerane jaan tonoraelanaala nenaate, <sup>4</sup> itolere coitucuera niha nocoetoreein. Niite ita cotainaa jererein joenrein casaje coreniha nejesinajeein. Nitoeinte ita inasinee rijitoherijitoein, ita cotaain, ita que ereein, ita esenetaelanaala, <sup>5</sup> ita que nejesinnajeein nejerateein ita cotaairiin neururein. Nitohaneinte neeururein esinaen erenaa rauhi baiteein naasae-nacaauru. Nitorijia neinchurute necoriquijiaain, nerujueleitein nena coacuhin Cana Coanera Ere tonorana jererein inacojoein. Nitohanai nihane, caje neloona.

<sup>6</sup> Jataaente nelate, caa chauratane que nena rucuhete que cana suujuatelanaala, raotojoein Cana Coanera esenetaain tonoraacachene.

<sup>7</sup> Charijiein teeinti nejanoaacachene cha colane nejanoaacache. Nii rijijieintechu ohacachene, cha amaelanaala curichaachein dedeeu. <sup>8</sup> Aihana jaun neejiha cana lenone, cana cajione naajeine, niicha aina raotojoein nihacachenete caohachae.

<sup>9</sup> Jana coriqui, rucuhete, naaonjoain taojiana jereraaurute raaje necairichaurure. Inacojoein necoriquihana que suujuateinte, raajenhane necoritaain necairichaururein nitohanein nena jereraauru. <sup>10</sup> Caohachaai jataen coriquiicha jeriha cachane, cacha aasaeranein niha coriquina jaun. Nii corenihate Cana Coanera esenetaain tonorana jianein, raajenhane necairichaaure cacha tabaauru.

### *Jesocurisito esenetaain neunaain ichaau*

<sup>11</sup> Jiaonriha nitohanei ichaain neei Cana Coanera coitucuera neina jaunne. Cana Coanera Ere tonoraain, Cana Coanera Ere esenetaain, Cana Coanera belaaain, cachaauru belaaain, joenreein abaantain, ishujua coaraain, naaonjoaain nii ichaonaa caohachaacha sacuu.

<sup>12</sup> Arajiin aonajeeurera urichoo, "Inaen Cana Coanera Calaohi Jesocurisito esenetaain nere tonorarichaanu," naailune jaun, laraajiin neeunaain, caohachaain nii sanaachara nejeein nena ichaonaa caohati que nemucuhin atiin ichaau. Nii ichaaine coina ichotijiaa Cana Coanera jaan ichaau.

<sup>13</sup> Itolere cachaauru rai ichaonaa tera Cana Coanera notaracae, chaen nii cocoainacai Ponsio Filato rai caohati erenaa que erei Jesocurisito notaracaena, ichei caa aitiin eletoaun. <sup>14</sup> Caa ichei aitocoanne rijijiein rauhijiriin ichaau. Nabana coaiten caa chauratane que turuha Jesocurisitone bana que necocauhataine coataa. <sup>15</sup> Inae cuu tihane banate, Jesocurisito ecotiha cureein acaihanejein Cana Coanera- canaacha belaaai satiin curuaanaacuru curuaanaa. <sup>16</sup> Acate chariji bana onaachara nejeein ne. Chabana cacha turunaja nihein cono tabai jana ne nii Cana Coanera inanacaelanaala

nena. Acate acaneein nereein itolere amuritoheriin laraajiin itolere bana coroaenohineein.

Nitohaneein neeine.

*Coriqui nebaauru suujuatihane*

<sup>17</sup> Coriqui neba niha chuneine, coa “Chabana, cha lateriaunni,” naain leeochoaauru que necohasitaain niha. Enaichate nitajihane, nitajee-oricheein coriqui. “Cana corootajanerihani Cana Coaunerana jaun cha lateriaunni,” naauruhine. Acate canaacha latei teraneein ne, raotojoein cha latelanaala nihacachene coina. <sup>18</sup> Aihana jaun cairichaihuru corootajanejeein neein, raotojoein neein chaelai latecuruha leeochoaurune, acaauru rai tihajeein neeuruhine coriquihonaauru. <sup>19</sup> Nitohaneein neeuruhanete, nii acatiha tacaain belainaanca Cana Coaunerane, nii niicha tei ichaonaa chabana nitajenaachara nejeein nena raa cuurureein, necairichanacaauru corootajanecuruhane jaun.

*Satonotihane rai Timoteeo suujuatiha Faborone*

<sup>20-21</sup> Caa ichei caitoonjoa erenaa rauhi tonoraa inoanlu netojoein. Coa caa chauratane que ecocohin nena erenaa tonoraa. Coa, coitucuhera rijitiin turuhin casaje que inara relaeranihane coa tonoraa. Nitohanai tonorauruhane, Cana Coaunera bero rauhi edaa cuuruha tabaaurune jaun.

Ichoelaain ii beraaine Cana Coaunerara Timoteeo.  
Inaen saa.

## **Timoteeo rai Faborohacha letoai coroataja**

### *Coaiten enacoauneein Timoteeo rai quiricha laenaa Faborone*

<sup>1</sup> Jeriha Cana Coaunerana jaunte caletoe, Jesocurisito que cachauru relaanune, esenetaauruhane ichaonaa esine raauruhane coina. <sup>2</sup> Ii raine enacoauneein laenaunra quiicha belaa cacalabi Timoteeo. Raotojoein neeine coina, rai raotonoque ii rausiajeein ii coroatajaneeuurine Cana Inaca Cana Coaunera, Cana Curuaanaa Jesocurisito, naaonjoain.

### *“Nariha,” naain ichoreniha Cana Coaunera corojeeun*

<sup>3</sup> Jerichanejeein aichejetocuruha caferateracurune rijijieina Cana Coaunera belaa, nere tonoraain casuujua coaraain neeun. Itolere banana janotiin netojoein Cana Coaunera bajaebajaecaaunne jana casuujuaniiha neeoritohine, “Nariha,” naain ichoreniha Cana Coaunera corojeeun.

<sup>4</sup> Itolere banana inonta baca raainaa coaujeeun. Nii jaunna ichoaranaa jereun, jataen raotojoein raachoojoein nihanune coina. <sup>5</sup> Ishuujua coarain Cana Coaunera esenetaaine quena, casuujua ereerejeun coaaucaunne. Jerichanejeein techu Cana Coaunera esenetaaurelu edaa Loira, choba Eonise, naaonjoaaihunri. Nii jaunna, “Daae, rai neba, naaonjoaaihunri rijijieinte esinae rauhijiriin Cana Coaunera tonora Timoteeo,” naain casuujua ereerejeun.

### *Atiin coejelanaala, “Canacaanu Curuaanaa Jesocurisito ere tonoraera nichaaun” naain joaenrein cache rai beeu.*

<sup>6</sup> Nii jaunna ichei aitoon, atiin enacoauneein que nemucuhin, nii Cana Coaunera tenojoin amihanenaa ichaaine coina. Nii ichouturi choae cacoi meecaanune jana Cana Coauneraacha tei amihanenaa ichaau. <sup>7</sup> Coa casiha. Coatiha casiinaa najaannu que rai esenetaera suujua corihei Cana Coaunera. Laraajiin, neunaain, Cana Coaunera, leeochoauru, naaonjoain belaa nererojoecaelanaala neein, suujua coaraain nihane coinate esenetaera suujua core Cana Coaunera.

<sup>8</sup> Atiin coejelanaala, “Canacaanu Curuaanaa Jesocurisito ere tonoraera nichaaun,” naain joaenreein cache rai beeu. Coa caresero cuhane caseteco neein nihanune que necoejiha, Jesocurisito que cache relaanune coreniha caseteco neein nihanune jaun. Aihana jaun, iitonai Jesocurisito que cache relaaine coreniha, iitonai rohecaauruhane, atiin laraajiin neunaain neeu. Ii coroatajanerichaa Cana Coaunerana jaunte, abaantaain neunanaa naineriquiin.

<sup>9</sup> Caohachaaain nihacachene que ainaa tocohaneeinte, cana cotijiaain cana rae Cana Coaunera, acaihanejein nere tonoraera neein nihacachene coina. Niritiin jauriaanejeein aitiin cache coaunaane jaunte, Jesocurisito cache nichaachene coreniha cana belaa cana rae Cana Coaunera. <sup>10</sup> Nitohaniihana jaunte jianacoon cana teranu que Jesocurisito letoae Cana Coaunera, coaraain coitucuhacachene coina. Cana coreniha ohin ichanaa Jesocurisitona jaunte, ohacachene necairichanaa coaraelanaala, neculucohin onaachanejeein nerichaachein coaiten turuha Jesocurisitone.

<sup>11</sup> Nii jaunte canu cocoaain caenoain caletoe Cana Coaunera, rai nere beebejeein Jorioniheichuru relaanune coina. <sup>12</sup> Nii jaunna chaque casilanaala nere beebejeein cachaauru relaanune coreniha, caa catohanein

caseteco neein neeun niq̄ui, nena coejelanaala caa neeun, cana coroatajanera coitucuhanune jaun. Acate laen naine cacorataaneein cacoeraiha ne, coaiteen enacoauneein turuhane reeintiaain.

<sup>13</sup> Nii jauriaa ichelaanulune rijijieein ichaechajeein neeu. Jesocurisito cacha nichaachene jaun, coanete Jesoso esenetaain, Cana Coaunera, leeochoaauru, naaonjoain belaaïn nihacache. <sup>14</sup> Cana suujua cuhane ichaoha Cana Coaunera Suujuena jaun uhaain, atiin que neeunaain nii ichei Cana Coauneraacha tenojoin erena rauhi tonoraain ichaau.

### *Cacoelaain cacorataaniha Onesiforo ne*

<sup>15</sup> Nii coitucuhine tocohaneeinte caque jaolecoore saain Asia cocoaichacuru. Fijelo, Eremojene, naaonjoaaihunri nihanatiinte saain caque jaolecoore.

<sup>16</sup> Onesiforo sinijiera, bereecuru, naaonjoain belaaïn coroatajaneeine Cana Coaunera atiin carai, araai saain cacoelaain cacorataanihane coreniha. Acate caseteco neein nihanu natiin, cacoreniha necoejelanaala cacorataane. <sup>17</sup> Cau Romau turuhinte, mainajeein amuhemujueein caariin, tabiicha cauruhn atiin cacorataane. <sup>18</sup> Nii choae tacaain techu, nii Efesoo nihaca jiniiquiine bana, jataain cana coroatajanelu nii Onesiforo. Nii coreniha atiin belaaïne Cana Curuaanaa Jesocurisito, inae coaiteen cau chauratane que turuhane bana.

## 2

### *Coujuriu Jesocurisito ere tonoraera neein nena tocohaneei necairichanaa abaantaain neeu*

<sup>1</sup> Laraajiin atiin neeunaau, ichorataaniha Jesocurisitona jaunra cacalabi.

<sup>2</sup> Cha teeinti letoaera nihane erena tonorain ichae, nii coaraain relaute leeochoaauru relaera neein neeine. Inae araai saain cachaauru relaanune jana, aonajerejetohilune jaun, nii rijijieein acaauru relaau.

<sup>3</sup> Charijiein teeinti letoaa acaauru curuaanaane, atiin necairichanaa abaantain ichacure caohati soondarooru laraajiuruhane. Nii rijijieein coujurihu Jesocurisito ere tonoraera neein nena tocohaneein necairichanaa abaantaain neeu. <sup>4</sup> Joenreein cacha rijijieein ichaonaa nainihei soondaro. Curuaanaa ere tonoraain nihanete ne. Nii rijijieein chu cana Curuaanaa neein niha Jesocurisitona jaun, abaantaain nere tonoraacachenete ne, rai letono neein nihacachene jaun.

<sup>5</sup> Charijieein teeinti necoatijiaacane, cacha amuritona nainenihaca necoatijianaa beraicha ere tonoraain necoatijiae nihacane. Nii rijijieein techu nii Moconajaera amuritona nainenihaca Cana Coaunera Ere tonoraenihacane.

<sup>6</sup> Charijiein teeinti temule jaacane jana inae nihane, tonajelanaala caje raain que lenoneein nihacache. Nii rijijieein techu Cana Coaunera tenojoin amihanena ichacaachene, tonajelanaala raotojoein nerichaachein, itolere que cana belairichaaïn Cana Coaunerana jaun.

<sup>7</sup> Caa caitoonjoan que ishujua ereerejeein coaacute, coitucuneeine ichorataanemiin Cana Coaunera, aonaaïn coitucuhine coina.

### *Jesocurisito que coaacu*

<sup>8</sup> Cana Curuaanaa inoaainsi Rabiri feratenojoneein niha Jesocurisitone que ishujua ereerejeeu. Acate ohane caje ichanae. <sup>9</sup> Nii beebejeein relanajaanune corenihate, leeocho ataebinae chara tocohaneein *cadena* que canu cositeein, catohaneein cacasetecaaure niq̄ui, nete caa quere cacha relaanune jaan cositena nainecurene laen.

<sup>10</sup> Nii jaunna itolere necairichanaa abaantaain atiin Cana Coaunera jani-inohinchuru relaaun, Jesocurisito coreniha jianacoo neein, nitajenaa charanejeein neeuruha Cana Coaunera janiinohinchuru cachaurune coina.

<sup>11</sup> Esinaena rauhijiriin aitoreeunni.

Cana Coaunera esenetaain ohacachenete aina ichaorichaachein.

<sup>12</sup> Necairichanaa abaantaacachenete, aina rai Cojoanonaa que nerichaachein.

Que jaolecohacachenete, acaetonai cana que jaolecoreein.

<sup>13</sup> Cana aitoonjoan ichaenihacachenete, aca laen naitoonjoan ichaa cureein. Nitohaneein laen niha acana jaun.

### *Caohachaain suujua coaraain niha Timoteeone*

<sup>14</sup> Caohachaeniha nitohanaina jaunna ichei aitoreeunni, suujuatenajaain neeine coina, nabana nitohaneein neeuruhane coataa. “Coa erenaa laojoiriicha coreniha ita cotaaine rijitocoache,” naain Cana Coaunera Ere beeurera suujuateeu, atiin Cana Coaunera notaracae. Nelatihei erenaa laojoiriicha coreniha ita cotaicha rijitiin iriha cachane, nabana que nererojoecaain neeuruha aohanraaurune coataa.

<sup>15</sup> Atiin naineeine jaun uhajeein Cana Coaunera Ere que relanajaun rauhijiriin, charijieein teeinti ai leeinjiin cache, laraajiin amihanihane letoaera que necasaene nii rijijieein Cana Coaunera acatiha caohatiin ichei amihanenaa niicha tei ichaau. “Caohatoha chamijianeeonra,” naain ichei iriha Cana Coaunerane coina. Jana rauhijiriin relanajaeneenete ii necoeje chanureein Cana Coaunera.

<sup>16</sup> Aihana jaun, coa Cana coaunera coitucuruhi rijitiin erenaa baaso que irihache, nabana nirijiein cuaajeein Moconajaeraacha ere tonoraachene coataa.

<sup>17</sup> Charijieein teeinti, nijiriha cachane, inae suujua lomoha nii cunaine ohe. Nii rijijieein techu, nii erenaa baaso que ereerejeein tonoraachene, inara suujua lomoha nii erenaa baasone nitajiha curiquicheein. Nii corenihate nitajeure Imeneeo, Fileto, naaonjoaaihunri, <sup>18</sup> “Chabana oo caje enacoauneein nejaberecaain nichaauraaain nerinaain cache,” naauruhana jaun. Niritiin ereeuruhana jaunte, nererojoecaure acauru aohanrauru tabaauru.

<sup>19</sup> Nii jaun, “Cana Coaunerate esinaen esenetaeraauru suujua coitucue. ‘Cana Coaunera coitucuera nichaun,’ naain iriha chunei cachane, baasonein ichaohane jianemiin,” naa Cana Coaunera Erena jaunte, esinaen Cana Coaunera cachaneein nihacachene coitucuhacache, inae nii jianeein nihacachena jaun.

<sup>20-21</sup> Charijieein teeinti coriquihona loreri asaee ne itolere coata coreti caje ichanohin ojaichu, baichaje, atane caje ichanohin ojaichu, baichaje, darohe, enuha caje ichanohin jecoro, coshara, erauru, naaonjoain; tabaauru nelateein joenreein lenone curunu que; jana tabaauru nechujataain joenreein calani joanaana jaannu que nelatei. Nii rijijieein techu, osa jianeein Cana Curuaanaa Jesocurisito ere tonoraacachene, nelatiha curichaachein Jesocurisito cachaneein joenrein amihanenaa caohati ichacaachene.

<sup>22</sup> Aonaau. Enamanaa neeine rai caohacha tocohaneein nena baaso caje naururuu. Suujua coaraauru cachauru aina jiniiquiin Cana Curuaanaa bajaebajajeein neeu. Cana Coaunera tenojoin ichaonaa rauhi sacuhin, esenetaain Cana Coaunera, chamute cache naaonjoain belaaain raotojoein neeu.

<sup>23</sup> Casaje que ita rai ereerecuruha leechaurune coa iriha, nabana ita baijiaain ita cotaachene coataa. <sup>24</sup> Nainihei Cana Curuaanaa Jesocurisito

ere que cacha relaeraneein nenea namute cacha aina nejerateein nihane. Itolere cacha aina jerichanejeein ita belaaain nihanete caohachae. Chaenchu raotojoeein caohatiin rai suujua coaraain, cotailanaala relaain <sup>25</sup> raotono que cuaain cacha suujuateein nihanete caohachae. Caitono tocohaneein nihanete jerecureniha tabaaurune nihanatiin, acaauru suujuateein acaauru suujua corenaa nainereein Cana Coaunera. <sup>26</sup> Inae nitohaneein acaauru suujua coriha Cana Coauneranete, erenaa rauhi coitucuuruhane caohachanainejeein nichotiha cuurureein Moconajaera caje.

### 3

*Naaonjoaante curureein cana janonaa satono rai coaiteen cajiha turuhelalajihana Jesocurisitone bana.*

<sup>1</sup> Aonaaute coitucuhi. Cana janonaa satonohelalaje raite, Cana Coaunera coitucuurera cairichaeriin roheca cuurureein Cana Coaunera coitucuuruhi. <sup>2</sup> Nitohaneeurite nelaaetoha nocoetiin, jataain coriqui mucunaa coacuhin leechaauru que necohasitaain, ita cotaain, niheichu fojiaraauru ere tonoraelanaala, nechu jataain aansai ataibinaen rijijieein Cana Coaunera Ere tonoraelanaala niha cuururein. <sup>3</sup> Chaentechu necairichanacaauru coroatajanena coacuelanaala, casajenetiin, baaso ichana jerecuruhane suujua coaraelanaala ichaain, naaonjoaan cuurureein. Chaen techu nechu aansai ataibinaen rijijieein itolere ichaonaa caohacha aina nejerateein, naaonjoaan cuururein. <sup>4</sup> Chaen techu itolere coitucuha nocoetiin niicha jerei ichaain niha cuururein, Cana Coaunera arinaa coacuelanaala. <sup>5</sup> Baaso neein ichaohinte Cana Coaunera coitucuha nocoetoha cuururein.

Coa nitohanai cacha raa. <sup>6</sup> Nabana raaichene jana, nechu aaso ene cojoaelorohe coritaain nihane coataa. Nitohaneeurite, suujua coaraelanaala niicha ichana jerei ichaain neururein. <sup>7</sup> Itolere banate niqui nerelaaururein, nete chabana ichaonaa rauhi coitucuururein.

<sup>8</sup> Charijieein teeinti Moisesa ere tonoraarene nii coroatajai benanecuru-Janesi, Jambresi, naaonjoaauri. Nii rijijieein techu Cana Coaunera Ere Rauhi tonoraarenereein nitorijianeini cachaauru. Naasaaheca acaauru suujua cuhanena jaunte, Cana Coauneraacha tei ichaonaa rauhi aasaana jerecururein. <sup>9</sup> Jataain chatohanai ichacururiaain, nechu aasoneeojooauruhane coitucuururichaain saain cachaaurune jaun. Charijieein teeinti aihure nii Moisesa ere tonoraauruhi. Nii rijijieeinte situha cuururein nitohaneuri.

*Timoteeo suujuatiha necairichanaa que Faborone*

<sup>10</sup> Ichelaanune tocohaneente chuhisi caohachaain neei. Chaen techu cachaauru relaane jaan coitucuhin, quichao coitucuhin, camijianeon coitucuhin, esenetaain quiicha belaa coitucuhi. Chaen techu neunaa casuujuane coitucuhi. <sup>11</sup> Chaen techu caniha nejerateeuruhane jana abaan-taanune coitucuhi. Antioquiha, Iconia, Listra neein curuajaihuri neseuru nihanune janate, caniha nejerateein carerojoecaauruhane jana, jianacoo camitaa Cana Coaunerane coitucuhi.

<sup>12</sup> Esinae rauhijiriina caa aitoon. Jesocurisito ere tonorana jereraaurute roheca cuururein niqui, nete <sup>13</sup> raajenihane necairichaa cuururein nechu aansai casajeeuru. Nechu jataain nii rijijieeinte ita coritajeein jeelai amuritoheriin necairichaa cuururein nechu jataain casajene jaun

<sup>14</sup> Ii laen rauhijiriin nii que nerelaaina jaun iicha esenetai sacuu. Iite nii ichelaera coitucuhi. <sup>15</sup> Canaanai neeine caje coauneente, Cana Coaunera

Quiricha coitucuhi. Nii Cana Coaunera Quiricha que nerelaain esenetaaich-enete, jianacoo inara tereein Jesocurisito.

<sup>16</sup> Satiinte Cana Coaunera tenojoineein ne Cana Coaunera Quiricha. Acate cacha relaain, cacha suujuatein, cacha suujua raujiain, naaonjoainu que nelate, ichaonaa rauhi coitucuhin caohachaaain ichaoha cachane coina. <sup>17</sup> Itolere Cana Coaunera jerenohin amihanenaa ichaain niha Cana Coaunera coitucuurerane coina.

## 4

*“Atiin aohana jerecureniha cachaaurune nihanatiin beeu,” naa Faborone*

<sup>1</sup> Cana Coaunera aina nii turuha uhenenu, nii cau chauratane que nenacaauru ichaonacaauru, saain onacaauru, naaonjoaaihunri rucuheranu notaracaena caa mijiaainetiin eletoaaun Cana Coaunera Ere beebjeeine coina. <sup>2</sup> Atiin aohana jerecureniha cachaaurune nihanatiin rauhijiriin beeute esenetaauruhine. Baaso ichacuruhane raotojoein raujiain cuaain suujuatenajaaun, <sup>3</sup> inae ecu tihane bana erenaa rauhi aohana jerecurener-ichaaaine jaun. Nitohaneeinte, baasoneein coacuhin arajiin acaauru relaer-anu ariha cuururein, acaauruhacha jerei tocohanein baaso que relanajaer-aanu que. <sup>4</sup> Nitohaneeinte erenaa rauhi aohana jerelanaala que janoriin amuururein. Amuhin joenreein casajeeicha esenetaain tonoraain raaje necairichaaaururein. <sup>5</sup> Ii laen ishujua coaraain necairichanaa abaantaain Cana Coaunera Ere beebjeeu, jianacoo osa caje mituhin neeuruha esenetaaurerane coina. Nitohanein caohatiin chamijianeeon ichaau.

*Inae Cana Coaunera tenojoin amihanenaa jitaanu*

<sup>6</sup> Inae ichuunejeeonriha ohanune que tihane.

<sup>7</sup> Inae Cana Coaunera tenojoin amihanenaa jitaanu jianelanaala rauhi-jiriin ichaain. <sup>8</sup> Inae nerichaaain canu amihaneeo core, caque banihatein Cana Coauneraacha rucujuei, acaachana inae caa cohajeeun. Inae turuha nii Cana Curuaanaa Joesio, caohacha nejesina ichara neein nenaanete, Aca nii canu amihaneeo coreterein. Coatiha canuhacha rai coreterinaain. Satiin nii turu jerein cohajeraauru rai netonaite coreterein.

*Saatono*

<sup>9</sup> Cacoharaa uu atiin chajaaajoaain. <sup>10</sup> Caquete jaoleque Demasi, caa chauratane que nenacaauru itolere rucuhele cautenu rijihuru jerihana jaun. Nii jaunte naain Tesalonecau cue. Jana Cresentete Galasia bataneu cue. Jana Titote Dalmasia bataneu cue. <sup>11</sup> Acaihanejein Locasichate caniha ne cau. Maroco ariin cotijiaain ijiniichaain uhaau. Acate laen camijianeeo que cacorataanena naine.

<sup>12</sup> Tiquicono laen letoaaun Efesoo.

<sup>13</sup> Toroasihu nihanune banana Carpo loreri asaae quela ratirihunlu, uhaau carai uhine. Chaenchiu nii canu quirichaauru nii quiicha laenajacoaine maajeein uhau.

<sup>14</sup> Nii coata que amihanenaa Alejaandorote, jataain baaso neein caete niqui, nete inae cacocaeraterein Cana Curuaanaa. <sup>15</sup> Coaraau. Necoeraain neeu, Cana Coaunera Ere- canaacha beebjeei que nejeratihana jaun.

<sup>16</sup> Camucuhin, cacaje bajaauruha cocoinanacaaihurine janate, cajahin caratiriin amuure satiin. Nii coreniha jiaonriha chatohanein tenajaa Cana Coaunerane.

<sup>17</sup> Nii janate, canu coroatajanein casujua laraajie Cana Curuaanaa. Nii jaunna, itolere caa chauratane que nenacaauru Jorio niheichuru rai Cana Coaunera Ere beebjeeun, jianacoo neeuruha esenetaaurerane coina.

Nitohaneeinte necha aansai ataibinaen leon ujuaae caje jichorocooain jianacoon caete Cana Curuaanaa. <sup>18</sup> Itolere baaso cajete canu mitaain canu beraicheein, aina dedeeu nihanune caina. Coanete Cana Curuaanaa corojeein belaihacache inoaenlu netiin. Nitohaneein neeine.

*Cana Coaunera esenetaeraauru rai necoiha Faborone*

<sup>19</sup> “Inara coaujiha jera Faboro” naain beeu, Firisila, Aquila, Onesiforo araichuru, naaonjoaihunri rai. <sup>20</sup> Coriintoote nedae Erasto. Jana Torofimona ratirihun Miletoo, cunaitihana jaun. Naineeine elohena ajiniha uu. <sup>21</sup> Eobolo, Poreente, Lino, Cularia, naaonjoaihunrite ii coaucure. Chaenchu saain cana nejeraauru Cana Coaunera coitucuurerate ii coacue.

<sup>22</sup> Ii aina neeine cana Curuaanaa Jesocurisito. Satiin inara belaaain inara coroatajaneeine atiin Cana Coaunera.  
Nitohaneein neeine.



## Tito rai Faborohacha letoai

### *“Inara coaaucaun” naa Faborone*

<sup>1</sup> Canu Faboro nichaunnena, nii coitucuhiche raotojeeinne rijjIEEEIN, Cana Coaunera jerenohineeIN rai CalaoHI Jesocurisito letono afosotoneeun. Acate caletOae, satiIN chauratane sacuritaain janijiIN nii ranojoihunru rai amuhemujueeIN beebEjihanune, <sup>2</sup> rauhijiriIN coreniha cana osa caje nichoteeIN jianacoon neeIN, chabana satonoelanaala nenaA ichaonaa teranihane cohajihacachene coina. Chabana cana coritaai Cana Coaunera. Acate nitohaneeIN cana rai ichaonaa tihane coina aitelu, cana rai chauratane coaunaane ajiniha. <sup>3</sup> Inae nii jihanteeIN aitohalune jaa que turuhane jaaunte, inae nii aca jianacoon cana osa caje cana mitaeranihane coitucuerateeIN beebEjihanune coina caletOaelu Cana Coaunera.

<sup>4</sup> Nii jaunna caa ichei quiricha laenaain letoaaunra Tito. Iite esinaen rauhijiriIN canu calaohineeI, cacoreniha nii canaacha esenetaI Jesocurisito esenetaaine jaun. Cana Inaca Cana Coaunera, Cana Ichotera Jesocurisito, naaonjoaain raotojoeeIN neeine jaanu teeuruhine ii raite aina raotojoeeIN jianacoo neeine coina.

### *Curetau Cana Coaunera coitucuurera relaa Titone*

<sup>5</sup> Nii Curetau cobenau ii ratirihanune ajiniha taone, jaiti rucuhera coina lananacaauru rucujueeIN, iclesiacuru naineeIN Cana Coaunera coitucuureraauru- canaacha relaauri coaranu que acaauru bichauhenauru cocoinaaine coina ichei aitoonlu. <sup>6</sup> Nii le iclesiacuru bichauhenauru bichauhena cocoinanohichuru, cojuriu nitohanei coaraneeIN nenaA tocohaneeIN suujua coaraain ichaohine, nabana que tonaain iriha chunine coataa. Chaen techu leinjiIN eneecha que sinijeraaacane caohachae. Jana rai calaohichuru netonai Jesocurisito esenetaeraneeIN, caohachaain suujua coaraain erenaa tonoraain neeuruhine, nabana baasoneeIN erenaa tonoraelanaala ichaauruhane, acaauru que ereeIN niha chunine coataa. <sup>7</sup> Nii Cana Coaunera ranojoinuri iclesia coaraneeIN- acaauru bichauhenaneeIN nenaate, jeriha Cana Coaunerane rijjIEEEIN caohachaain suujua coaraain, que Cana Coauneraacha icharateI ichaain rauhijiriIN ichaohane caohachae. NainiheI erenaa tonoraelanaala, namute cacha coiintetiIN, ajetoritiiN, ita cotainaa rautatiIN, asijiautoneeIN, naaonjoaain ichaohane. <sup>8</sup> NitohaneeIN baasoneeIN ichoaelanaala, turuhin niha cachane belaaIN, cotijiaain, loreri asae raain, naaonjoaain ichaohine. Chaen techu caohacha ichaera cachaneeIN, caohatiIN suujua coaraain, Cana Coaunera que banijiaaineeIN neeIN, chabana jeriha suujuane rijjIEEEIN ichoaelanaala, naaonjoaain nihane caohachae. <sup>9</sup> Nii esinaen rauhijiriIN aitiIN relaeraalune jaacha tonoraain, acaacha esenetaain que leeochoauru relaaINE, acaauru netonai leeochoauru suujua lararajiaain nerelaacachene jaan coitucuerateeuruhane coina. Chaen nii caohateeIN erenacaauru relaaIN acaauru suujua baaso aninoainete, acaauru netonai esenetaauruhine.

### *Relanajaurera baaso*

<sup>10</sup> Arajiichurute, nii acaauru relaacane jaan tonorana jerelanaala, “Jori-oniheichuru jaberoco macohi cari saeratelaanaala nenaA, nainiheI Cana Coaunera esenetaeraneeIN ranojineeIN nihane,” naain nechU jataain cha

coitucuurenihane jaun cachaauru coritaaure. <sup>11</sup> Niritiin erenacaauru erete, caohachare niritocuruhane coataa caohatihacane. Nii casaje aina cuaainte laurijiracuru aina arajii cachaauru suujua auhacaain, cachaauru coritaain, arajii coriqui ranaa coaacure.

<sup>12</sup> Coaraaunachuhinti nii Cureta cobenau nenea *profeta*, nii jeelai acaauru araaicha: “Satiin Cureta cocoaichacurute casajenetiin, necha ansai ataebinae rijijieein neein, bajeritiin, achotoritiin, naaonjoaunre,” naain acaauru ichao bihalune. <sup>13</sup> Esinae rauhijiriinte acaauru ichao coaraane jaun aitelu. Aihana jaun, caohachaaain laraajiin acaauru relaau, coujurihu Jesocurisito esenetaeraneein nenea tocoaneein neeuruhane coina, <sup>14</sup> nabana, nii suujua caje rocohin relanajaaunruha Joriocurune jaancha esenetaauruhane coataa. Niheichu nainecuruhi Jesocurisito esenetaeraneein neeuruhane sainejeein que jaolequiin, nii naitoonjoan tonoraelanaala nenacaauru ere tonoraauruhane.

<sup>15</sup> Caohachaaain suujua coaraain niha cachanete, itolereneein nichanaane maajeein caohachaaain coanojoi ne. Jana canaacha esenetai esenetaelanaala nenaate baaso nejesina que coacuhin itolere bana baasoneein ne, nichanaane maajeein, nechu jataain baasoneein coacuhin cha ichacuruhane jaun. <sup>16</sup> Cana Coaunera coitucutohate niqui nocoetocure, nete acaauru ichanaacha caje coitucunojoinecure baasoneeuruhane. Namute cacha cotairiin, namute cacha que erenajaaucharitiin, erenea tonoraelanaala neein, nii charijibana caohacha ichaain neeuruhi.

## 2

### *Nohanelanaala relanajaacachene jaan*

<sup>1</sup> Caohachaaain nii ichelaanune jaan tonoraain, esinae rauhijiriin que acaauru relainete caohachae. <sup>2</sup> Nii acaauru bichauhenaurute, esinae rauhijiriin tonaain ereeuruha chaachacuruhane coinane, nii naitoonjoa ichaain ichaauruhane caohachae. Esinae rauhijiriin nii niicha esenetai rijijieein neein, satiin belaaain, laraajiin, naaonjoaain ichaohine, itolere necairichanaa abaataain nenea nainihane coina. <sup>3</sup> Jerichanejeein techu, coujuriu inara bene bichauhenauru jeriha Cana Coaunerane rijijieein ichaohin, ajetoriaanelanaala, erenacaotelanaala, naaonjoaain que coacuelanaala, caohachaacha que coacuhin neeuruhane caohachae.

Coujurihu ranunaauru bichauhenaneein nenea tocohaneein, ranunaauru notajaain, <sup>4</sup> rai sinijeraauru aina rai bereecuru belaaain neeuruha ranunaaurune coina acaauru relaain, <sup>5</sup> caohachaaain itolere que nainaaain suujua coaraain, loreri asae nenacaaaurune maajeein beraain, osa que nesaruhin, barijiitiin, naaonjoaain neeuruhane coataa acaauru suujuateein nihanete caohachae. Chaen acaauru sinijeraauru aina ita suujua rijijieein coacuhin neeuruhine, nabana tonaain Cana Coaunera coitucueraneein neeuruhane sainejeein acaauru que iriha cachane coataa.

<sup>6-7</sup> Jerichanejeeinchu caohacha nejesina ichaain nii enamanaacuru notajaain acaauru que corajerateeu. Acaauru relaaaine caohachaaain ii suujua coaraain, coujuriu ichauhenaneein nenea tocohaneein, <sup>8</sup> raotojoeein acaauru rai ereein canaacha esenetai que aitiin acaauru relaau, nabana tonaain baasoneein cana que erenea nainiha chunine coataa. Nitohanein ichaainete cana que nocoeejееurureein nii acaauru relaacane jaan caohatera rijitiin erenacaauru.

<sup>9</sup> Chaen rai fatoroon ere tonoraain, letoanajaa acaauru fatoroone jaan ichaain, tonaain baasoneein tonorana coacuelanaala neeuruha rai letononeein nenacaaaurune coina suujuateein relanajaa. <sup>10</sup> Jiaonrihachu

asijiauhin neeuruhane. Baaso coacuelanaala caohatiin suujua coaraain neeuruhine. Nii banate, acauru ichao caje jataain caohatoha Cana Coaunera cana ichoterateraneein nenea que acauru relaacachene jaan coaracurureein satiin cachaauru.

<sup>11</sup> Cana Coaunerate cana belaitohane coaratiha, satiin caa chauratane que rai cachaneein neinichaachene ichoteraanu letoaelu. <sup>12</sup> Acate cana relae, Cana Coaunera coitucuhichuru rijijieein baaso ichaaechajeein niha-cachene jianeein, caohacha que coacuhin, coujuriu Cana Coaunera cachaneein nenea tocohaneein rauhijiriin Cana Coaunera corojeein caa chauratane que ichaohacachene coina. <sup>13</sup> Nitohaneeinte nii cana rai tihane coina naitoonjoan nainaane cohajeein raotojoei ichaonaa que ichaohin, turuha urichaaain nii Cana Coauneraneein cana ichoteraneein necaohachaaain nenea Jesocurisitone cohajeein nihacache. <sup>14</sup> Acatechu itolere baaso canaacha ichai cana osa caje cana ichoteratihane coina rai jaberoco teein nelu, oha cana corenihane, nii baaso caje cana coulucohin rai cachaneein caohacha ichanaacha que coacuhin nenea coina ichaelu.

<sup>15</sup> Nii ichei aitocooaunne rijijieein, coointeuruhane nihanatiin, acauru que corajerateein acauru relaau, coujuriu cocoainanohineein nenea tocohaneein, nabana nii relanajaaine jaan tonoraelanaala ii que jaolecoha chunine coataa.

### 3

#### *Esinae rauhijiriin caohachaaain suujua coaraain neeuruha Cana Coaunera coitucuurerane*

<sup>1</sup> Nabana baitecuruhane coataa, acauru rai nacoauneein aitoote, coujuriu Cana Coaunera coitucueraneein nenea tocohaneein, rai curuaanaa, cocoainanacaaihuri, naaonjoainuri ere tonoraain itolere bana jatoroaain neeuruhine caohacha nejesina ichacuruhane coina. <sup>2</sup> Jiaonriha tonaain baasoneein chuni coacuhin ereein neeuruhane. Niheichu ita sonaa coacuelanaala caohacha cachaneein ichaohin, jiniiquiin ita belaaain, caohachaaain neeuruhane coarateein neeurumiin.

<sup>3</sup> Jauriaalute cana netonai tonaain irihacachene joenreein ererejeto-coaache, Cana Coaunera ere tonoraelanaala nechu jataain nitajenaaneein neein, cana suujua letono rijijieeincha itolere baaso ichaonaa ichaaechajeein nerejetocooachelu. Nitohaneeinte baaso ichaaechajeein ichaonaa jana, cana que nererojoecaeriin nerejetecuruha leeochoaurune rijijieein ita que nererojoecaaeriin nerejetocooachelu. <sup>4</sup> Nete satiin caa chauratane que cachaneein ichoainichaachene belaitohane coaratiha, satiin cachanichaachene ichoteratelu cana osa caje Cana Coaunera. <sup>5</sup> Coatiha rai caohacha ichacaachene jaun nii cana ichoteratiheilu. Cairichaojoaain cana coaraane jaunte, nii cana osa caje cana coulucohin cana ichoteratelu. Rai Suujue aina cuaain cana coulucohinte, nacoauneein nejanoaain nenea rijijieein nenea coina cana rai nacoauneein ena nenea ichaonaa telu Cana Coaunera. <sup>6</sup> Jataain cana belaitohane jaunte, rai Calaohi cana Ichoteraneein nenea Jesocurisito aina cuaain, cana rausiaaeca jelai amuritoeriin rai Suujue telu cana rai Cana Coaunera, <sup>7</sup> itolere ujuaihoneein nenea caje caohachaaain neein nii chariji bana sanaachara nejeein nenea- canaacha cohajei ichaonaa que nenea coina.

<sup>8</sup> Esinaetechuhisi nitohaneein cana osa caje cana coulucohin cana raain ne Cana Coaunera. Nii jaounna ichei aitoon, nii Cana Coaunera esenetaeraauru itolere bana caohachaacha que coacuhin neeuruhane, nii leecha relana-jaera ere tonoraelanaala neeuruhane coina acauru rai aitohine coina. Nitohaneein ichaohacachenete, jataain cana rai nelateineein nereein. <sup>9</sup> Nete

laen nii cana rai aitocuruhalu cana coitucueracurune esenetaain, Moisesa aitoonjoan que ita rohecaain naaonjoaain nenea naineneei. Niite nechu jataain nohanenaaneein nii chaque nelatene cana rai.

<sup>10</sup> Niha nitohanei que cachaauru relaain lerunaa jererane, coroata saain, nichata saain, naaonjoaain cotijiaain rai aitohine jana chere tonorana jerenihane, jelai caje sitaate amuhine. <sup>11</sup> Nitohaneein nenacaauru cachaaurute itolere osa que nerotocuruhane jaun aihure. Nitohaneeinte acaauruhacha ichai caje osa que nesarucuruhane coanojoi ne.

*Nicopolisihu canu cohacu*

<sup>12</sup> Inae ichene Artemasi letoanihanune, Tiquico letoaanune, atiin Nicopolisi cuhin canu cohanihute ecu ita coaraca. Ecune jelaronaa bitoanune coina ucuae ureeunni. <sup>13</sup> Chaen nii ecu nenea *abogado* Senasi aina Apolo coroatajaneun acaauruhacha latei tein, nabana nii cuuruhanejaun turuuruhane reetiaain lanaa acaauru rai acaauruhacha lateine coataa. <sup>14</sup> Canaacha relaineein nenacaauru, itolere que caohacha ichaain, cha latein niha chunucohane coaracuruhane coroatajanena que nerelaaurumiin, nelateineein niha acaauru ichaone coina.

*Raotojoein neeuruhane coina aitiin necoiha Faborone*

<sup>15</sup> Satiin caniha cau nenacaaurute ii coaucure. Nii ecu nenacaauru canaacha esenetai Jesocurisito coreniha canaacha belaihuri- cana nejer- aauru coaucaune beeu acaauru rai. Satiin raotojoein neeichene jaanu tein, inara coroatajanemiin Cana Coaunerate raotojoein neeiche.

## Filemoon rai Faborohacha letoai

### *Acaauru coaucane biha Faborone*

<sup>1</sup> Canune Faboroneein Jesocurisito coreniha caresero cuhane neein cana nejera Timoteeo aina, ii canacaanu amihaneeo que canacaanu coroatajaneraneein neeine rai, caa quiricha laenaain letoaacaaanura Filemoon. <sup>2</sup> Chaen Jesocurisito ranojoneein iclesianein nenacaauru- ii loreri asaae ii aina netaojianacaauru, chaen canacaanu amihaneeo que canacaanu coroatajaneranein nenacaauru- cana nejera ene neein nena- Apia aina Arquipo, naaonjoainuri rai netonaine caa laenaain letoaacaaanu. <sup>3</sup> Cana Inaca Cana Coanera, rai Calaohi Jesocurisito, naaonjoainuri jeelai amuritoeriin inara coroatajanecurumiinte raotojoein neeiche.

### *Coichana aina cutaain belaina inaain esenetaain niha Filemoonne*

<sup>4</sup> Cana Coanera bajaanune naineene, itolere bana ii coacuhin Cana Coanera coroajeeun, <sup>5</sup> Cana Curuaanaa Jesocurisito belaaain jataain esenetaaine rijijieein satiin Cana Coanera cachanein nenacaauru belaine beeuruhane jaun. <sup>6</sup> Nii jaunne ii canacaanu rijijieein acaacha esenetaain neeine jaun, jataain canacaanu rai caohacha icharanein, canacaanu coroatajaneranein niha Jesocurisitone coitucuhin neeine coina, Cana Coanera bajaanun ii rai. <sup>7</sup> Jataaina jeelai amuritoheriin corajeein rachoojoeun casuujua cuhane. Jataainte caohacha ichaai canejera, Jesocurisito esenetaeranein nenacaauru belaaain, acaauru suujua nunaaine jaun.

### *Atiin canu coreniha ii letono Onesimo raau.*

<sup>8</sup> Canu Jesocurisito rai afosoto nichaaunne jaunte niqui ne canu rai rauhi, iicha chanenu ichaaine coina ii letoaanune coina. <sup>9</sup> Nena raujiaain nii canaacha belaainein canaacha esenetai coreniha ichei aitoreeunni. Canuna Faboroneein- inae biinaanein- Jesocurisito coreniha caresero cuhane netiin ichei aitoon, <sup>10</sup> cau cajinichaaain caresero cuhane neein, Jesocurisito coreniha cacalabi rijijieein nena Onesimo belaaaine coina.

<sup>11</sup> Jauriaalute niqui ichei chaque nelatelanaala, ii letononeein nelu Onesimo. Nete laen inae ena jiniiquiin cana rai jataain nelateinnein ne. <sup>12</sup> Inae nacoauneein jelaiha ii rene cauhane coina letoaanu. Atiin canu coaraaine rijijieein nii coaraain neeu. <sup>13</sup> Cana Coanera ere beebelijhanune coreniha, cau caresero cuhane nihanune jaunne, iineein nena rijijieein canuhacha latei icharanein nihane coina, cau canu aina nihane jereeun niqui. <sup>14</sup> Nena jereneeine coataa aihane jereneun. Nabana canu ii caje bajaanune jaauncha jereine coataa, ii suujua caje coauneein jereine jerichaaunne jaun. <sup>15</sup> Jerihane ena chabana satonoelanaala ii aina nihane coinat, ii caje amuhin nelu- nii ii letono Onesimo. Nete inae nainenei ii letono siriine rijijieein siriine. <sup>16</sup> Raujiaain ii letono siriine amuritoheriin, ii nejeraneei tein belaaain coaraau. Jataaina belaaain coaraaun canu. Nete nii amuritoheriin joenreein cacha rijijieein coaraelanaala, Cana Curuaanaa Jesocurisito coreniha, ii nejeraneei tein coaraaine caohachae.

<sup>17</sup> Aihane jaun canaacha esenetai coreniha ii nejeranein canu coaraain neeine, nii canu coaraain neeine rijijieein acaentonai coaraain raau. <sup>18</sup> Ichei chatohanein baaso ichaain, ichei rebequuin, naaonjoaain nihalune canu cobaraau coreniha. <sup>19</sup> Canuna Faboroneein ichei aitiin caraajenhane

caa laenaan. Nii ichei aitocooaunne rijijieina, canu ichei coreteree-uni. Nainichaaun niqui canu que ijiabereeo coreniha rebeoquine coaau-  
caaunne. <sup>20</sup> Aihara canejera. Cojuriu Jesocurisito cachaneein nenea toco-  
haneein caa ichei bajaanune rijijieein atiin ichaain, Jesocurisito coreniha  
canejeraneeine jaun canu suujua nunaau. <sup>21</sup> Canuhacha bajai amurito-  
heriin ichariquiin quere tonoraaine esenetaanune jaunne caa ichei aitiin  
laenaan. <sup>22</sup> Nii choae tacaainechu turuhanune jaanu rucuhequine jereeun,  
caresero cuhane nihanune jaun, cacoreniha bajaebajaaequichene tono-  
raain, inara coaraa uhanune jererichaaain Cana Coaunerane cohajihanune  
jaun.

*Ii coaacuruha raotojoein neeu.*

<sup>23</sup> Jesocurisito coreniha caresero cuhane canu aina nenea Efaforasite ii  
coacue. <sup>24</sup> Chaen Maroco, Arisitaroco, Demasi, Locasi, naaonjoainuri canu  
coroatajaneraneein nenacaurute ii coaacure.

<sup>25</sup> Cana Curuaanaa Jesocurisito jeelai amuritoheriin inara coroatajane-  
miin.

## Ebereeocuru rai letoi

*Rai Calaohi aina cuaainte cachaauru rai erelu Cana Coaunera.*

<sup>1</sup> Inoaelu jetaote nere bera inoaesihuru- *profetacuru* aina cuaain araaaisaain cana inoaesihuru rai ere Cana Coaunera, ecoetacaaeneein mituhelanaala, taba que acaauru sinihu, taba que letonocuru anjeraauru letoae, acaauru rai ecocohin beeuruhane coina, naaonjoaain. <sup>2</sup> Nete laen inae enene Calaohi que nere berate Cana Coaunera, Cana Coaunera nihane coitucuhacache itolereeneinne coina. Nii rai Calaohi aina cuaainte, itolere cana rai chauratane, dede, itolere cautenu rijihuru, itolere cana janonaa, naaonjoainuri coaunaain niichuru Curuaanaa neein telu Cana Coaunera.

<sup>3</sup> Nihei chunei cacha niqiu Cana Coaunera coaraai. Nete caje uhin canaacaanu rene ecooca rai Calaohine jaun, canaacaanu rohan turuaain coaracaanune jaun, “Naaonjoaan Cana Coaunera,” naain coitucuhacaanu, jeelai Cana Coaunera tocohaneein necaohachaaain nichao que ichaohana jaun. Acate Cana Coaunera Calaohineein itolere sirichaneein coaraneein ne. Acate Cana Coaunera Calaohineein caa chauratane que ohelu, jianacoon osa caje cana mitaeranu que. Nitohaneeinte inae osa caje cana mitaeranu que ohane baiha, rai Inaca Cana Coaunera raotono nichajai que rori- *trono* ichoae nelauriaa cuelu.

*Anjeraauru amurijiriinte cocoinanojoneein ne Cana Coaunera Calaohi.*

<sup>4</sup> Jataain rai letonocuru anjeraauru cocoinaane amurijiriinte, rai Calaohi cocoinaelu Cana Coaunera, acaauru amurijiriin nihane coina. <sup>5</sup> Nitohanihane jaun, nihei chuni letono anjera rai:

“Iite cacalabineein  
canuhacha jereineein  
canuhacha teineein  
nenaaneeicha,”

naain irihei Cana Coaunera. Niheichu chuni letono anjera que:

“Leinjiin acaacha  
canu calaohineein nihane janana,  
Canu, leinjiin  
inaca neein nereeunicha,”

naain irihei Cana Coaunera. <sup>6</sup> Caa chauratane que nenacaauru cachaauru que, leinjiin acaacha rai calaohineein nihane coitucueratihane coinate laen: “Quere tonoraain

canu coroaeequichene rijijieein,  
jerichanejeein nere tonoraain  
coroaecuche satiin,”

nae, rai letonocuru anjeraauru rai, Cana Coaunera. <sup>7</sup> Nii rai letonocuru anjeraauru quete laen:

“Canu letonocuru- anjeraaurute laen aiha cujuanane rijijieein, usi rijijieein naaonjoaain canuhacha jerei icharaneein neeurureein,” nae Cana Coaunera.

<sup>8</sup> Jana rai Calaohi quete laen:

“Chabana sarinaain  
itolere Curuaanaa neein-  
itolere Coaunera neein neeine.  
Chaen techu  
chabana satonoenereein

caohacha ichaain neeine.  
<sup>9</sup> Nii rijijieein techu  
 caohacha nejesina ichara  
 curuaanaa neein neeina jaun,  
 esinae rauhijiriin  
 baaso ichaain nenacaauru aina nejerateein,  
 caohacha icharaauru belairiquiin.

Nii coinane  
 Canu, Itolere Coaunera neein  
 ii Coauneranichaaunne  
 ii teein neeun,  
 ii, jataain  
 leeochoauru amuritoheriin  
 raotojoeein rachoojoeein  
 neeine coina,”  
 nae Cana Coaunera.

<sup>10</sup> Chaen techu:  
 “Ii canuhacha tei  
 Curuaanaa neeinete,  
 jauriaanejeein  
 nunuhe caje coauneein niha  
 cana rai chauratanene coina  
 aitiin dede coaunaailu.

<sup>11</sup> Satiin iicha coaunanojoite sareein.  
 Jana iite laen chabana nitajenereeini.

<sup>12</sup> Inae ecu tihane banate,  
 siriteein saa cajionene jaohin,  
 enachasine que coreein jianaa rijijieein,  
 janonaa coreriquiin.

Nete laen,  
 ii chabana satonoelanaala  
 ichaoriquiin,”  
 naelu rai Calaohi rai Cana Coaunera.

<sup>13</sup> Nii jaun coatiha chuni, rai letono anjera rai:  
 “Chajaaute  
 caraaotono nichajai que nelaauriaena,  
 ii tijia asaae  
 iniha nejeratenacaauru  
 amuritiin tee te coaraaicha,”  
 naailu Cana Coaunera. Chabana nii Calaohi que aitohane rijijieein letono  
 anjeraauru que irihe.

<sup>14</sup> Nechu raujiaain ichoteratenojoein nerichaacheeinne rai, cha bera-  
 neeichate suujueneein Cana Coaunera tenojoein neeure rai anjeraauru.

## 2

### *Cana ichoterateraneein nena que jaoleconaa nainihaacache.*

<sup>1</sup> Nitohanihana jaun, nere beracuru que Cana Coauneraacha beratei  
 aonaain tonoraain- esenetaain nihacachenete caohachae. Jana nii  
 cana rai niicha beratenojoin aonaain caohatiin coitucunaa saijieein  
 tonoraenihacachenete, aihuruha coitucuelanaala nenacaaurune rijijieein  
 nitajerichaacheein. <sup>2</sup> Coaracuche nachuhinti, nii rai letonocuru- anjeraauru  
 que niicha teratei niha nii rai jauriaanejeein nena- rauhine saijieein  
 tonoraelanaala naosatenacaauru cachaauru- esinae rauhijiriin baaso  
 ichacuruhane coreniha caseteco coaracuruhalune. <sup>3</sup> Nitohanihane jaun,



caseteco caje nichotena nainerihacacheein, nii jauriaanejeein nena amuritoheriin, cana ichoteraneein nena esenetaenihacachene. Esenetaain nihacachene cointate, jauriaanejeein raaje nihane cana rai beein nelu Cana Curuaanaa Jesocurisito. Nii baihate cana rai beurelu aina amuhemujueein nota que coaraauru. <sup>4</sup> Nii ichoae tacaain techu, cana que coitucuerate Cana Coaunera itolere cojoelanaacojoaihuru ichaain. Chaaen techu Aca jerihane rijijieein, le cacha nichaachene rai niicha tei- Suujue aina cuaain cana que coitucuerate.

*Cana nejera rijijieein niha Jesocurisitone*

<sup>5</sup> Coatiha rai letonocuru anjeraauru, nii cabaiha neenihu rai Cojoanona caa ereereecaachene jaan coaraneein neeuruhane coina aitohi Cana Coaunera. <sup>6</sup> Nitohanenihane quete:

“Chaneein ne cacha.

Chatohanaineeina nenaane cacha.

Chanuna acaacha coacuhin,

jataaen queecha coauqui.

<sup>7</sup> Jauriaanejeeinte niqui

ii letonocuru- anjeraauru

cocoinaaine fautaain cocoinaailu.

Nete nii baiha laen,

jataain leeochoauru amurijiriin cocoinaain,

que itolere Curuaanaa nihane comai lauriaain,

<sup>8</sup> satiin nere tonoraain

neeuruhane coina ichaain,

tijia asaee que nejeratenacaauru

teeilu,”

naain ne laenanohineein Cana Coaunera Quiricha cuhane. Nitohanein satiin nere tonoraain nihacachane coina, cocoinaain rai tijia asaee que nejeratenacaauru tihane coina, aitohane saijieein jaiti nitohanein ichaa Cana Coaunerane coarahaacache. <sup>9</sup> Nete laen, inae anjeraauru fautaain nelatihei rijijieein turuhin nihalu carajaojoaain Jesocurisitone coaracaache. Nitohanein turuhinte, rai chanein nenihacachene saijieein, jataain cana belaitohane jaun, cana coreniha ohane coina ichaelu Cana Coaunera. Nii cana coreniha cairichanojineein ohalune corenihate, itolere curuaanaacuru Curuaanaa neein nihane cojunacaneein necaohachaa Cana Coaunerane que comaitenojineein ne.

<sup>10</sup> Satiin itolerete Cana Coaunera rainein ne, niicha coaunanojineein niha itolere jaun. Nii jaunte niicha coaunanojineein rai calaohi neein nihacachene jaun, rai Cojoanona caa baiha neeni que nihacachene jere Cana Coaunera. Nii jaunte cana coreniha necairichaa Jesocurisitone aina cuaain, nii aansijiiniji osa colane telu, satiin niicha coaunanojoinunru ichoteraneein nihane coina. <sup>11</sup> Nitohanenihane jaunte, ita Inaca que Inacaain nihacache, nii cana osa caje cana ichoteratera aina jiniiquiin. Nii jaunte, rai nejera neein inae nihacachene jaun coejelanaala: “Canejeraauru,” nae cana rai Cana Coaunera Calaohi. <sup>12</sup> Niritorichaa ne quete:

“Canejeraauru raine

Iineein neeine beebejeein,

netaojiaain

Ii coroaeraauru cataaun

nenatereeeunni,”

naalune, laenanohineein nelu Cana Coaunera Quiricha cuhane.

<sup>13</sup> Chaen techu:

“Leinjiin Acaachane

niicha ichai ichaane coina  
 cohajereeeunni,”  
 naain.  
 “Cauna neeun,  
 canu rai Cana Coaunera  
 tenojoihunru- cacalabihuru  
 ainara,”  
 naain ne laenanohineein.

<sup>14</sup> Charijieein teeinti, ita araainein niha cachane, ita iniho que inihoquiin, ita coichana que coichanaain, naaonjoaen cache, nii rijijieeinte cache iniho que inihoquiin cache coichana que coichanaain naaonjoaelu Jesocurisito, caa chauratane que ohin, nii cache itajeranein nenea moconajaera amuritohane coina. <sup>15</sup> Nitohanein moconajaera amuritiinte, ohin nitajeururichaaaine que satiin casiiriin ichaonacaauru- cachaauru ichoteratelu. <sup>16</sup> Aihane jaun, coatiha anjeraauru coroatajanihane coina turuhin niheilu, Abaraun nefoeratenein nenacaauru coroatajanihane coinateturuhin nelu. <sup>17</sup> Nitohanihane coinatate, jerichanejeein cana nejeranein, niha cachene rijijieein tenojoinein nelu, Cana Coaunera notaracae coujurihu cana rai saseredotecuru curuaanaacuru Curuaanaanein, cairichaojoaain cana coaraain, cana coreniha cairichei coaraain ohane, satiin cachaauru osa que suujua acatena nainiha Cana Coaunerane coina. <sup>18</sup> Nitohanein raajenihane necairichanaa coaraain, cojunojoinein nihalune jaunte, rijijieein necairichanaa coaraain, cojunojoinein niha cachane coaraane, coroatajanein naaonjoaen.

### 3

#### *Moisesa amurijiriin cocoinanohi niha Jesusone*

<sup>1</sup> Canejeraauru, aihane jaun Cana Coaunera ranojoinein, inae rai cachanein neeichene jaun, niicha icharatenohi icharaanu que niicha tei- Jesocurisitohacha que coaucuche. Nariha jataain coreniha chabana sato-noelanaala esenetaacachene jaun. <sup>2</sup> Jerihane rijijieein nere tonoraain niha Jesocurisitone jaunte, niicha icharatei icharaanu que cocoinaain nelu Cana Coaunera. Nii rijijieein techu, Cana Coaunera cachanein nenacaauru aina, niicha icharatenohi icharanein nelu Moisesa. <sup>3</sup> Charijieein teeinti, niicha jai loreri amurijiriin jataain nelateinein ne loreri ichara, nii rijijieeinte, jataain Moisesa amurijiriin nelateinein nelu Jesocurisito. <sup>4</sup> Itolere lorerite, niha icharane jaun neein naaonjoaen. Nete laen Cana Coaunera coaunaane jaun, neein naaonjoaen itolere. <sup>5</sup> Nii rijijieein techu, rai cachanein nenacaauru rai Cana Coauneraacha icharatei icharanein nihane jaun, raujiaain nota que coaraain, que niicha beratei beranein nelu Moisesa. <sup>6</sup> Nete laen rai Calaohi Jesocurisito, cana rai cachanein- rai loreri rijijieein nihacachene amurijiriin, cocoinaain cana inana neein telu. Nii jaunte, rai loreri rijijieein nerichaachein, esinae rauhijiriin jerihane rijijieein neein, chabana cohajihacachene coiinteein jianelanaala canaacha cohajei cohajihacachene.

#### *Acauru que Cana Coauneraacha banihatihu turuurenerichaaain rai cachaauru tabaaaurune*

<sup>7</sup> Nitohanihane jaun, rai Quiricha Inoaensi cuhane:  
 “Enene cojoanonaa  
 cuhane inara rai niicha jerei  
 biha Cana Coaunerane,  
<sup>8</sup> jiaonriha

inara suujua aohana jerelanaala,  
 aihuruhalu nere tonoraelanaala,  
 nechu acaauru casetecaa  
 Cana Coaunerane cojuhin coaraa  
 cacha areroo ichtatane janane  
 rijijieein nihache.

<sup>9</sup> Ecute  
 jenachoonca jaanacaneein  
 mainajeriin acaauru notajaain,  
 acaauru coroatajanichaaunne saiijieein,  
 acaauru casetacaanune coujuha  
 quere tonoraarenelu- inara foerateracuru.

<sup>10</sup> Nii jaunna,  
 nii inara foerateracuru aina obajeein:  
 ‘Nechu itolere bana  
 joaenreein rai suujua cuaauruhane jaunte,  
 acaauru que  
 canuhacha coitucueratena  
 jerei coitucunaa jerecurene.’

naain:  
<sup>11</sup> Aihane jaun,  
 coatiha acaauru que banihateein  
 canuhacha rucujueihu  
 turuururinaain,”  
 naain biha Cana Coaunera Suujuene jaun ne laenanohineein.

<sup>12</sup> Aihane jaun canejeraauru, le cacha nequichene- inara netonai nabana cana rai Cana Coaunera beratei esenetaain neeichene jianequichene coataa, que nainaan nechalajiin ichaaoche. <sup>13</sup> Nitohaneein nena coacuelanaala, jianein lecacha nequichene jiniiquiin ita suujua lararajiaain neeuche: “Enene cojoanona,” naain aitoaha Cana Coaunera Quiricha cuhanena jaan que turusihane ajiniha. Nabana inara tabaauru saruhin niha osane, rijito-joein chatohanai ichaquichene, inara netonai canaacha esenetai esenetaelanaala naitoonjoan tonoraeneeichene coataa. <sup>14</sup> Nitohanihane jaun, esinae rauhijiriin Jesocurisito aina nena jerichaachene, nii esenetaacachene bana canaacha cohajei que turuhane reentiaain esenetaacachenete ne.

<sup>15</sup> Nii coinata:  
 “Enene cojoanona cuhane  
 inara rai niicha jerei biha  
 Cana Coaunerane,  
 jiaonriha  
 inara suujua aohana jerelanaala,  
 aihuruhalu  
 nere tonoraelanaala  
 nenacaaurulune rijijieein nihache.”  
 nae Nere Inoaesi.

<sup>16</sup> “Charijihuru Cana Coaunera ere aonacuruhane saiijieein nii baiha nere tonorana jerecurenelu,” naaichena. Acaaurute, satiin Egipto batane caje Moisesaacha rocoorinelu. <sup>17</sup> Nii jeelaihuru que techu, nitohaneein nere tonoracurenihane jaun, acaauru que nejerateein acaauru coroatajanihane jianiha jenachoonca jaanacaneein Cana Coaunerane jaun, ichtataneu cacha areroo satiin ohacoaurelu. <sup>18</sup> Chaen techu nii jelaihuru, rai nitohaneein nere tonoracurenihane jaun, esinae rauhijiriin acaauru que banihateein niicha rucujuihu enoorenerichaaine que aitelu Cana Coaunera. <sup>19</sup> Nii jaunte,

esenetacurenihane coreniha nii acaauru que banihateein niicha rucujuihu turuurenerichaaaine coitucuhacache raotojoein.

#### 4

<sup>1</sup> Aihane jaun, jaiti cana rai niicha teeni, rai nebetacanaa cojoanonaa tihane rai niha Cana Coaunerane jaun, ecu turunaa nainichaachene coina, jataain necohalajiin ichaohacachenete caohachae. Nabana inara tabaauru, ecu turunaa nainecurenihane coataa.

<sup>2</sup> Nitohaneein cana netonai ecu turunaa nainichaachene cointate, nii Moisesa que beratihalu acaauru raine rijijieein, cana rai netonai beratelu.

Nete laen inacojoein acaauru rai beratelu, aonacuruhane saijieein, aihuruha nii niicha beratei esenetaain tonoraeraaurune rijijieein, acaauru netonai esenetaaurenihane jaun.

<sup>3</sup> Nete laen cana, esenetaera neein nihacachene jaun, nii Cana Coaunera aitoonjoan- nebetacana jaaun enorichacheein. Nitohaneein nere tonoraaururichaaaine jaun, aitorichaaaine quete:

“Nii jaunna obajeein,  
esinae rauhijiriin

nebetacaanune jaaun  
turuurenerichaaaine que aitoon”

naain belu Cana Coaunera. Nete cana rai chauratane coaunaane nainaalune caje coauneein nelu, nii nebetacanajaa cojoanonaa naitoonjoa.

<sup>4</sup> Nii jaunte rai Quiricha Inoaensi cuhane:

“Caainsi janone cuhane jetaote,  
itolere coaunaane nainaa- bana  
nebetacaelu Cana Coaunera,”  
naain laenanohineein ne.

<sup>5</sup> Nii baihate coaiten rai Quiricha cuhane, nii Israelitacuru que:

“Coatiha canu nebetacana jaaun turuurinaain,”  
naalu Cana Coaunerane, ne laenanohineein.

<sup>6</sup> Nete, nere tonoraain ichoteratenojoein neeururichaaaine aonacuruha ichoaichaniha natiin, esenetacurenihane jaun, nii nebetacana jaan Cana Coaunera aitoonjoaun turuureniha Israelitacurune coina aitohalune saijieein, jaiti neeure satononiha nii naitoonjoan esenetaeraauru, acaauru coreenraniha nii nebetacana jaaun turuheninuunru.

<sup>7</sup> Nii jaunte, nii nacoauneein le janonaa que cojoinacate Cana Coaunera:

“Enene cojoanonaa,”

naain. Nii Quiricha Inoaensi caje coitucuhichene rijijieeinte, que beratihala Cana Coaunerane jaun:

“Enene cojoanonaa cuhane  
niicha jerei beratihala  
Cana Coaunerane,  
jiaonriha tonoraeneeichene,”  
naain belu Rabiri.

<sup>8</sup> Nii aina cunacaaurulu- Israelitacuru turuaalu Josoene jaan jelai que, aitohalu Cana Coaunerane jana nihane, coatihala leecha janonaa berihei Cana Coaunera, rai nebetacana jaaun nihacachene que aitiin.

<sup>9</sup> Nitohanihane jaunte, satiin Cana Coaunera cachaneein nenacaauru rai, ne jelai teeni acaauru que banijiaain nebetacaauruna jaanu. <sup>10</sup> Charijieein teeinti itolere coaunaane nainaa- nebetacaelu Cana Coaunera, nii rijijieein techu, rai namihaneeo caje nebetacaa aicheein, nii Cana Coaunera nebetacanajau turuhin nei. <sup>11</sup> Aihane jaun, nii nere tonoraelanaala nenacaauru rijijieein nena coataa, atiin caaintati ichacaachene coina cana

letoaane nihanatiin nere tonoraacachenete ne, nii rai nebetacanajau turunaa nainichaachene coina.

<sup>12</sup> Nii cana rai Cana Coaunera beratenojoi Erenaate, cana ichao coreein, cana rai leecha ichaonaa teraneein, naajoainein nena ne. Acate aiha soondarooru rai sabere- jerane ajinaain nenaane amurijiriin nihane jaun, cana suujua cuhane enohin cana suujuene maajeein coitucue. Nii jaunte cana suujua cuhane canaacha coacui, canaacha ichana jerei, naaonjoainuri baasoneein, caohachaneein, naaonjoaane coitucue raotojoein. <sup>13</sup> Nitohanihane jaun, nihei chuni Cana Coaunera coaunanojoneein nena, que nasiha nainera. Acate inae ecu tihane bana rai canaacha beenei coitucue.

### *Saseredotecuru curuaanaa Curuaanaa Jesoso*

<sup>14</sup> Cana Coaunera Calaohi Jesusote, acaihaniji cana rai saseredotecuru curuaanaacuru Curuaanaa neein dedeeu cuelu. Aihane jaun, leinjiin acaacha esenetaain cohajihacachene rijijieein, itolere bana jianena coacuelanaala beebejeein, acaacha cohajihacachenete caohachae. <sup>15</sup> Acate cana rai saseredotecuru curuaanaacuru Curuaanaa nihane jaun, coujunojoinichaachene enaacha osa que nesaruna nainichaachene coitucue; acaentonai aihacachene rijijieein coujunojoneein nerejetohalune jaun. Nete laen, nii saijieein chabana osa que nesaruenelu. <sup>16</sup> Aihane jaun, chaque tonajelanaala, atiin cana belaicha Cana Coaunera rori- *trono* rohan netichaachenete ne; cairichaaajoaain cana coaraain, latichaachene nainein cana rai caohacha ichaain cana coroatajanena nainihane coina.

## 5

<sup>1</sup> Satiin saseredotecuru curuaanaacuru curuaanaate, cachaauru jana jani-jiin, Cana Coauneraacha teinein ne, aca cachaauru osa coreniha, Cana Coaunera rai itolere teein, inihocuru mocoeranu *sacrificios* que nihane coina. <sup>2</sup> Nii jaunte acaentonai joaenreein cacha rijijieein nihane jaun, cairichaaajoaain- cha coitucuelanaala nenacaauru, nitajerai nenacaauru, naaonjoainuri coarae. <sup>3</sup> Nitohaneein joaenreein cacha rijijieein nihane jaunte, rai nosa, cachaauru osa, naaonjoain coreniha, Cana Coaunera rai itolere lenonecuru *sacrificios* sohin mocoee. <sup>4</sup> Nihei chuni raajenihane jerihane rijijieein, saseredote neein cocoainanohineein nei. Aaroon jani-jiin raain cocoainalune rijijieein, raain cocoainaa Cana Coaunerane banaachate laen saseredote neein nena naine cacha. <sup>5</sup> Nii rijijieein chu coat-iharaajenihane saseredote neein nihane coina, cocoainanohineein niheilun Jesoso, Cana Coauneraate cocoainaan nelu. Acate rai:

“Iite canu calaohineein,  
enene canuhacha teinein  
neei,”

naelu. <sup>6</sup> Chaen techu, rai Quiricha Inoaensi cuhane:

“Iite chabana satonoelanaala  
saseredote neein neriquiin,  
aihalu Melquisedee ne rijijieeincha,”  
naain ne laenanohineein.

<sup>7</sup> Jaiti cana rai chauratane que ichaohane bana, atinaaururichaaine caje ichoteratiha Cana Coaunerane coina, jataain chanaain, caje bajaa Jesocurisitone janate, jataain nere tonoraeranihane jaun, coroatajanelu nii cairichaaaururichaaine abaantana nainihane coina rai Inaca Cana Coaunera. <sup>8</sup> Nitohaneinte Cana Coaunera Calaohinihane saijieein, necairichanaa coaraain nelu Jesocurisito, jeriha rai Inaca Cana Coaunerane rijijieein nena jerenacaun. <sup>9</sup> Nitohaneein jataain Inaca ere tonoraeranein nihane

jaunte, Aca, satiin nere tonoraain neinichaachene ichoterateraneein ne.  
<sup>10</sup> Nii jaunte Melquisedee rijijieein nenea saseredote neein cocoinaelu Cana Coanera.

*Jataainte elunae esenetaain nihancane jianichaane.*

<sup>11</sup> Niha jataain arajiin inara rai irihanune jaanu niqui. Nete jataain caaintate inara rai bihanune, cha aonaquichene nihanatiin coitucusineeichene jaun. <sup>12</sup> Inae niqui carajaa, inara cacha relaeraneein neeichene jaanu rijijieein Jesocurisito coitucuhin neeichene. Nete enanetjoeein caaintajelanaala cana relaa Cana Coaneraneein jaan que nihanatiin nacoauneein inara relaera jerequiche. Nii jaunte aiha leinjiin canaanai ujuarine rijijieein neeichene jaun, iniho quinaa nainenihane jaun, itariicha cohajiha canaanai ujuarine rijijieein jataain caaintaelanaala nenea que inara relaera jerequiche. <sup>13</sup> Nii itari coha canaanai ujuarine rijijieein, caaintajelanaala relaera jereraaurute, leinjiin canaanai rijijieein neein niicha ichai coitucuelanaala ichoae. <sup>14</sup> Nete laen nii iniho que cuaain inara relaanein jaan Cana Coanera Ere neein nenea ne. Acate, inae acaauruhacha coacui coitucuhin, “Naaonjoainte baaso ne,” jana, “Naaonjoainte caohacha ne,” naain coitucuhin nenacaauru rai benojoi ne.

## 6

<sup>1</sup> Aihane jaun, inae caohatiin jauriaanejeein Jesocurisito que nerela-caachelune jaun, inae leechaneein coacuelanaala, ainaacha iicha cana suujuane reentiaain sacuhacachenete ne.

Inae nainihe nacoauneein jauriaanejeein esenetaacachene nunuhetihacachelune rijijieein neein, baaso ichaquichene coreniha cana nitaje rai nihacachelune rijijieein nenea nainihaacache. <sup>2-3</sup> Raujiaain Cana Coanera esenetaain, cachaauru baotisaain, biji que Jesocurisito esenetaeraauru dadaain acaauru rai Cana Coanera bajaain, o caje ichanaain neeururichaaain onacaaurune, nerichaaain chabana satonoelanaala casetecone, naaonjoainuri coitucuhacache caohatiine jaun, jianeein nenea coacuelanaala que leeochoauru relaacachenete ne. Jeriha Cana Coaneranete nitohaneein icharichaacheein.

<sup>4</sup> Nitohanihane jaun, inae le sajeein itolere coaraain coitucuhin, Cana Coanera Suujue siriin, <sup>5</sup> jataain caohatoha cana rai Cana Coanera beratenjoine coitucuhin, itolere que jataain nelateineein nerichaaain caa baiha neeni janonaa quene coitucuhin, <sup>6</sup> naaonjoaain neeichene saijieein jianequichene, inae nacoauneein jeriha Cana Coaneraneein rijijieein ichaonaa naineriheicheein, coroso que Jesocurisito teein, nocoeje chanuuruhallune tocohaneein rai nocoeje chanuha airiquicheeine jaun. <sup>7</sup> Nete laen atane caohacha que temule jaera rai, atane setejiaa elone caohatiin omarihin inacaain nihane rijijieein, jeriha Cana Coaneraneein rijijieein neeichene, inara rai caohacha ichaain inara coroatajanereein Cana Coanera. <sup>8</sup> Jana nii temule jaera rai ojoa aina omane neeojoaain niha nii temulene rijijieein neeichenete, laen inara cojiotaain inara mocoeratereein Cana Coanera.

*Canaacha cohajete leinjiin acaacha cohajihacachene icharaneein ne.*

<sup>9</sup> Nete, inara rai caritiin aitocooaunne rijijieein, inara inae jeriha Cana Coaneraneein rijijieein ichaohin iiquichene coina, nichoterichaacheeine esenetaaichene caje cuaain leeocheaneein coacuelanaala neeichera canejeraauru. <sup>10</sup> Nii jaunte, chabana baaso ichaenihane jaun, nii enanetjoeein ichaquichene rijijieein, leeochoauru cana nejeraauru-canaacha esenetai esenetaeraauru belaiquichene coarateein, coroatajaneequichelune

baitenereein Cana Coaunera. <sup>11</sup> Nete laen, jataain ainaacha iiquichene reeintiaain, acaacha cohajeein, esinae rauhijiriin corajeein ichaquichene coarateein, inaraacha ichai ichaquichene caohachae. <sup>12</sup> Coatiha chaque nelatihei chachaaain neeichene coiinteein ichaquichene. Charijieein teeinti itolere bana jianelanaala esenetaain neeuruhane jaun acaauru rai tihane coina Cana Coaunera aitoonjoa raeraneein neeure esenetaeraauru, nii rijijieein neeuche inara netonai.

<sup>13</sup> Abaraaun rai niicha teeni tihane coina aitohalune banate, leinjiin Acaacha itolere amurijiriin nihane jaun, inae neniha amurijiriin neine jaun, aca Cana Coaunera neein coarajeein icharichaaaine coina: <sup>14</sup> “Canune ii coroatajaneein, arajiin janiinacajelanaala nefaauruha iicha foerateeurine coina ichareeunicha,” naain Abaraaun rai biha Cana Coaunerane jaun, <sup>15</sup> luhecaelanaala carajaain cojoaain, nii rai tihane coina Cana Coaunera aitoonjoa raelu Abaraaun. <sup>16</sup> Nete laen cachaauru cha chana jerecuruhane, “Cana Coaunera coarajihane jana icharihanine que,” aitiin ichae. Nii jaunte, cha chana jereein nihane esinae rauhijiriin icharihanine esenetaera coina, “Cana Coaunera notaracae icharihanine coina,” aitohane, inae nene nenacaaen rohecaera. <sup>17</sup> Nii rijijieein techu, nii niicha teeni raeraneein neenihuri rai, aansijiinniji nii aitohane corelanaala, esinae rauhijiriin icharichaaaine coitucuuruhane coina, aca Cana Coauneraneein coarajeein icharihanine que aitelu Cana Coaunera. <sup>18</sup> Cana coritaelanaala niicha teeni naitoonjoan, aca- Cana Coauneraneein coarajeein icharihanine coina, Cana Coaunera aitoonjoante raacache, Aca itolere baaso caje cana beraichaneein nihane coina, naitoonjoaacha cohajeein nihacachene jaun. <sup>19</sup> Nii cana rai niicha teeni- canaacha cohajeite, nitajihane coataa cana suujue nunaeraneein ne. Charijieein teeinti, cujuana nichajai que auriteein bote nunaerai nunaera- ancla, nalaa fichafichaanaane coataa nii rijijieein. Nii canaacha cohajeite chabana turunaa nainenihacache Teenforo cuhanai bujuaneein nena ne jaaun- cana turuhaeranu que nenaaneein ne. <sup>20</sup> Nitohaneein ecu cana turuaeranu quete cana rai chabana satonoelanaala nena saseredote- neein nelu Jesoso, aihalu Melquisedee ne rijijieein.

## 7

### *Saseredote inoaensi- Melquisedee rijijieinte nelu Jesoso.*

<sup>1</sup> Nii Melquisedee jetaote- Cana Coaunera rai saseredote neein, Saleen batane curuaanaa neein nelu. Nii Melquisedee jetao techu, leeochoauru curuaanaacuru reychuru cachaauru amuritiin sohin jitariin acaauruhacha sirii ruluha acaauru cajene baiha caaujiha Abaraaunne jana, que tacaain cuhin, coroatajaniha Cana Coaunerane aina leeochoauru amuritohane que aitiin cojiotaain coroajelu. <sup>2</sup> Nitohaneein coroaecane jaun jetaote, nii leeochoauru amuritiin sohin acaauru caje niicha ruluhi lechooncanu telu rai Abaraaun. “Melquisedee” naane jetaote: “Caohacha ichara curuaanaa” naane aite. Jerichanejeein jetao techu: “Saleen” naane: “Raotojoein nena” naa aite. Nii jaun jetaote, nii Saleen batane curuaanaa nihane jaun: “Raotojoein nihacachene tera curuaanaa” naaure Melquisedee que. <sup>3</sup> Nihei coitucueraai rai inaca, rai neba, foerateracuru, naaonjoainuri. Niheichu coitucueraai nejanoa, ohin, naaonjoane. Nii jaunte, acaihaniji chabana satonoelanaala nena Cana Coaunera rai saseredoteneein ne, aihalu Cana Coaunera Calaohine rijijieein.

<sup>4</sup> Coaracuche nachuhinti jataain nelateineein niha nii Melquisedee ne jaun, nii leeochoaauru curuaanaacuru cachaauru sohin, niicha rului lechooncanu tihalu rai, cana foeratera inoansi Abaraaunne. <sup>5</sup> Moisesa tenojoi rauhite niqui, Lebi nefoerateneein nenacaauruhacha- saseredote neein leinjiin acaauruhacha, satiin cachaauruhacha sirii lechooncanu raauruhane coina aitelu, satiin cachaauru, acaauru araainein- acaauru rijijieein Abaraaun nefoerate neeuruha acaauru netonoaine saiijieein. <sup>6</sup> Nii Melquisedee coatiha laen niqui, Lebi inamoco nihei. Nete nii saiijieein, nii Cana Coaunera aitoonjoa raeraneein niha Abaraaun natiin, caje nii niicha rului lechooncanu bajaain Abaraaun cojiotaain coroaje. <sup>7</sup> Nii coitucuhacachene rijijieeinte, nii cojiotaain niicha coroajei cacha amurijiriin nelateineein ne, nii cojiotaera. <sup>8</sup> Satiin caa chauratane que cachaauru caje acaauruhacha sirii lechooncan raaurerate ooruhane rai neein aihure. Nete laen nii Cana Coaunera Quiricha cuhane, Melquisedee que naitoonjoa enanetojoein jaiti ichaonaa que aitona rijitoein aite. <sup>9</sup> Nii rai niicha rului tiha Abaraaunne cajete, nii Lebi inamoconeein nenacaauru- saseredotecuru, enene cachaauru caje acaauruhacha sirii lechooncanu bajaain raeraneein neenihuru netonai, Melquisedee rai niicha sirii teuruhalune coitucuhacache. <sup>10</sup> Nii que taca cuha Melquisedeene jana, rai jaberoco cuhane jaiti najanoaelanaala neeuruha niicha foerateenihurune jana, rai niicha rului tihalu Abaraaunne jaunte, jaiti nejanoaelanaala netiin acaauru netonai acaauruhacha sirii lechooncanu teein neurelu.

<sup>11</sup> Nii coitucuhichene rijijieeinte, Aaroon foeratenojoein nena- Lebi inamocooru- saseredote neein nenacaauru aina cuaain, Israelitacuru rai rauhi teein nelu Cana Coaunera niqui. Nete nii rauhi tonoraeraauru, esinae rauhijiriin jeriha Cana Coaunerane rijijieein neeurenelu. Nii jaunte nacoauneein saseredote letoaelu Cana Coaunera. Nete laen, nii niicha letoai Aaroon nefoerate caje nenaanelanaala nihalu Melquisedeene rijijieein nenaane. <sup>12</sup> Nii jaunte, nitohaneein necoriha saseredotene jaun, Cana Coaunera rai rauhi netonai necore. <sup>13</sup> Nii ena nena cana rai saseredotecana Curuaanaate, leeochoa Israelitacuru lauri caje nena nihane que aitiin laenanohineein ne Cana Coaunera Quiricha cuhane. <sup>14</sup> Nii jaunte, nii coitucuhacachene rijijieein, Jodaa lauri caje nenaanein nelu cana Curuaanaa. Jana Moisesa coatiha nii Jodaa lauri caje nerichain saseredotene coina coacuhin iriheilu, neeururichain saseredotecurune bihane bana.

<sup>15</sup> Nii jaunte, jataain caohati saseredote Melquisedee rijijieein niha, nii ena nena cana Curuaanaa- saseredotene coitucuhacache. <sup>16</sup> Aihane jaun, coatiha aihuruha leeochoaurune rijijieein, “Acate rai laurineein ne,” naain rauhi cuhane laenanohineein nihei. Acate chabana nitajenaachara ichaonaa caje unaanein ne. <sup>17</sup> Nii jaunte, nii rai:

“Iite Melquisedee rijijieein

chabana satonoelanaala

saseredote neein neriquiincha,”

naa Cana Coaunerane, ne laenanohineein Quiricha Inoansi cuhane.

<sup>18-19</sup> Nitohaneinte nii jauriaanejeein nena rauhi, Moisesa rai rauhi, naaonjoain aina chaque nelatenihane jaun, jeriha Cana Coaunerane rijijieein cachaauru ichao rucuhena nainenihane jaun, itajeein nacoaunein jataain amurijiriin nelateineein nena te Cana Coaunera. Acate laen Cana Coaunera rene cana turuaeranein ne.

<sup>20</sup> Chaen techu, aca Cana Coaunera neein coarajeein chabana satonoelanaala nihane coina, cocoinarihanine esenetaacachene coina raajenihane aitelu. Jana leeochoaauru saseredotecuru, coatiha chabana satonoelanaala



neeuruhane coina, aca Cana Coaunera neein coarajeein cocoainaane coina aitohi Cana Coaunera. <sup>21</sup> Nete laen cana Curuaanaa, chabana satonoelanaala nihane coina, aca raajenihane coarajeein cocoainaane que:

“Canune

Cana Coaunera neein

caraajenihane coarajeein

icharihanuhine coina aitoon.

Nii jaun

nii caitoonjoan corerihaaunni.

Iite chabana satonoelanaala

saseredote neein neriquiin,”

naain ne laenanohineein rai Quiricha Inoaensi cuhane.

<sup>22</sup> Nitohaneeinte nii jauriaanejeein nenea amuritoheriin nenea, cana rai Cana Coauneraacha teeni terateraneein nenaane Jesoso. <sup>23</sup> Leechoaauru jauriaanejeein saseredote neein nenacaaurute, cana rijijieein cachaneein neeuruhane jaun, arajiin neurelu, ohin nii baiha ichanana nainecurenihane jaun. <sup>24</sup> Nete laen Jesoso ohin nitajenaa nainenihane jaun, leinjiin acaacha chabana satonoelanaala cana rai saseredoteneein ne.

<sup>25</sup> Nii jaunte, aina cuaain Cana Coaunera coacuhin ichaonacaauru ichoterateerein chabana satonoelanaala nihane rijijieein, acaauru netonai chabana satonoelanaala Cana Coaunera aina neeuruhane coina. Nitohanihane jaunte, chabana ohenihane jaun, itolere bana satiin esenetaeraauru coreniha bajaee bajaareein Cana Coaunera caje.

<sup>26</sup> Nitohaneeinte esinae rauhijiriin canaacha latei saseredotecuru curuaanaacuru Curuaanaa neein letono neein ne Jesoso. Acate Saantoneein baaso colane- niheichu osaqelanaala- osaaonacaauru caje, jelai dedeeu tenojoineein ne. <sup>27</sup> Coatiha leechoaauru saseredotecuru rijijieein, jauriaanejeein rai nosa coreniha, nii baiha chachaauru osa coreniha, naaonjoaain iniho mocohin Cana Coaunera rai tihane coina nenea nihei. Nitohanelanaalate, le sajeein chabana coaiten ohenihane coina, raajenihane cana coreniha rai jaberoco telu sohin atinaauruhane coina. <sup>28</sup> Jana nii Moisesa rai rauhi que cocoainanohineein nenacaauru saseredotecurute- nechu joaereein cachaneein osaaonaneein neurelu. Nete laen, nii Moisesa rai rauhi que cocoainanohichuru baiha, ena nenea saseredote cocoainaane coina, aca Cana Coaunera neein coarajeein icharihanine que aitohalune jaan, rai Calaohineein osaqelanaala- chabana satonoelanaala saseredote neein nihane coina cocoainaelu Cana Coaunera.

## 8

*Ena nenea- cana rai, Cana Coauneraacha teeni terateraneein niha Jesosone.*

<sup>1</sup> Nii cana rai saseredote curuaanaacuru Curuaanaa- caa inara rai ereerecaauune jaante- jataain itolere amurijiriin nelateineein Cana Coaunera rijijieein nihane jaun, Cana Coaunera nelaurihanaja raotono nichajai que nelauriaelu Cana Coaunera rohan. <sup>2</sup> Acate cana rai esinae rauhijiriin saseredote esine neein Cana Coaunera ichanohineein nenea- *santuario* cuhane neein, Cana Coaunera rene cacha turuaeraneein ne. Coatiha aihuruha leechoaauru saseredotecurune rijijieein, raajenihane cacha ichanohineein nenea- *santuario* cuhane nihei. <sup>3</sup> Satiin saseredotecuru Cana Coaunera rai chaaelai teraneein, inihocuru mocohin teranihane coina cocoainanohi nihane jaunte, Jesocurisito netonai nii rijijieein cana osa coreniha raajenihane netelu atinaauruhane coina. <sup>4</sup> Coatiha caa chauratane caje nenea nihane, saseredote nenea nainerihe. Inae

caa chauratane que arajiin neeuruha saseredotecuru, Moisesa rai rauhi cuhane aitohane rijijieein niqiu, Cana Coaunera rai nii Teenforo asaa lenonecuru sohin mocooruhane coina. <sup>5</sup> Nii saseredotecurute, nechu dedeeu ichacuruhane cojunacaneein nitohanei icharaneein neeurelu. Canate esinae rauhijiriin, nechu dedeeu nenacaauru rijijiei icharaneein ichacuruhane coitucuhacache, *santuario* ichaa Moisesane coina rai: “Aonaaun. Nii ichei ichatane ucuunno coaratihanulune rijijieein ichaaura,” naalu rai Cana Coaunerane caje. <sup>6</sup> Nete cana rai saseredote laen, jataain nii leeochoauru amurijiriin, jataain cana rai caohacha ichaain, cana rai tihane coina aitohalu Cana Coaunerane rijijieein, Cana Coaunera rene cana turuaeraneein ne.

<sup>7</sup> Bana caohachaain cachaauru ichao rucuhena nainiha, nii jauriaanejeein nena Cana Coauneraacha teine, coatiha neriheilu Jesocurisito caa ena niicha tei ichaane coina.

<sup>8</sup> Nete nii jauriaanejeein niicha tei rijijieein neeurenihha cachaaaurune jaun: “Inae cojoanona que turuhane banane, Israeli, Jodaa, naaonjoainuri aina, enachasine canuhacha ichaneni ichareeunnicha.

<sup>9</sup> Nii ena acaauru aina  
canuhacha ichanenu,  
coatiha  
Egipto batane caje  
acaauru foerateracuru  
rocohanulune coina,  
canuhacha ichailu rijiirinaai.

Nene,  
nii acaauru aina  
canuhacha ichanenu  
tonoraelanaala  
ichaaoruhane jaun,  
acaauru que jaolecoonlu.

<sup>10</sup> Nii caa baiha Israeli aina  
canuhacha ichanenute,  
acaauru suujua cuhane laenanohineein niha  
Canu rai rauhine,  
suujua caje coauneein  
coitucuuruhane coina  
canuhacha ichanenu ne,  
Canu,  
acaauru Coauneraneein  
nihanune coitucuhin,  
canu cachaneein neeuruhane coina.

<sup>11</sup> Nii bana,  
inae le cachaauru,  
leeochoauru,  
acaauru laurichuru,  
acaauru araaichuru,  
naaonjoainuri,  
inae Canu que  
ita relaauruhane latelanaalate,  
Canu,  
acaauru Coaunera nichaaunne  
coitucuurureein  
satiin ichauhenaauru,  
canaanaihunru,

naaonjoainuri.

<sup>12</sup> Nii banane

baaso ichacuruhane que casuujua acateein,  
acaauru osa que canu suujua acatereeunni,”  
naelu Cana Coaunera.

<sup>13</sup> Nii cana rai nacoauneein enachasine niicha ichanenu biha Cana Coauneranete, inae chaque nelatelanaala nitaje rai niha nii jaurihaanejeein niicha ichanenune coitucueratiha aite.

## 9

*Santuario chauratane que nenaalu aina dedeeu nena santuario.*

<sup>1</sup> Nii jauriaanejeein Cana Coauneraacha teite, caa chauratane que rene nichuuntaauruhane jaanu que *santuario* neein telu Cana Coaunera.

<sup>2</sup> Nitohaneeinte, nii jauriaanejeein *santuario* neleru asaae jetao nelu leinjiin usi nujua, leinjiin mesa Cana Coaunera que banijiaain nena faan siriin, naaonjoain.

<sup>3</sup> Jana, que jauriin nena bujua cuhane jetaote, jelai tein Cana Coaunera turunajaneein curuajaelu. <sup>4</sup> Nii cuhane jetaote, nelu oro caje ichanohineein nena rori, jujui- incienso mocooruhane jaanu que, chaen camela itolereenein oro que carihanojoneein nena. Nii camela cuhane jetaote nelu, oro caje ichanohineein nena- leinjiin baichaje, cuhane manaa neein curuajaain nena quinacai- manaa siriin. Chaen jetao techu, nii camela cuhane nelu Aaroon bastoon omaronalu, Cana Coaunera rai rauhi- ajeri caje nena tabara que tein laenanohineein nena, naaonjoainuri.

<sup>5</sup> Nii camela ichoae jetaote nelu- coroatajai cacha rijiinanai itaroo- jianaain. Acaauru jetaote, ecu niha Cana Coaunerane beraneein jetao, nii nitaro que nii camela fuera asaaraneein ne. Nete ena nelatene jitariin nii coitucueratein niique irihacane. <sup>6</sup> Inae nitohaneein satiin ichanohineein nihane jana jetaote, itolere bana nii nunuheneein nena- Cana Coaunera rene nichuuntaauruna jaan turuure saseredotecuru, ecu Cana Coaunera rene nichuuntaain ereereecuruhane coina. <sup>7</sup> Nejetaote nii que jauriin nena- jelai tein Cana Coaunera turunaja neein nenaau jetao, saseredote curuaanaacuruhacha ecu turue le sajeein le jaanacaauru naineein. Ecu enohane naineein jetaote, lenonecuru coichana amaaure, jauriaanejeein rai nosa coreniha tein, nii baiha coitucuelanaala neosateeuruha cachaaurune coreniha tihane coina. <sup>8</sup> Niite cana que coitucuerate Cana Coaunera Suu- jue, nii nunuheneein nena- Cana Coaunera rene nichuuntanaanaja neein nihane jaun, jaiti neniha nii jelai tein Cana Coaunera turunajaaun cana turuaerane jaan, ecu turunaa nainenihacachene que. <sup>9</sup> Satiin niite, nechau jaiti ichaohacachene tonohanau cana que coitucuerateranu que nelu. Nii itolere inihocuru mocohin Cana Coaunera belaihuruhane jaan, coatiha nitohanei ichaain coroaeraauru cachaauru suujua couluoona nainiheilu.

<sup>10</sup> Acate raujiaain lenonecuru, conacaihuru, naaonjoainuri couluoraneein, cachaauru netonai chatoanai ichacuruhane, rai jaberoco caje niicha ichai jaaoruhane coarateeuruhane jaanu que nelatelu, cana suujue coriha Cana Coaunerane que turuhane reentiaajeein.

<sup>11</sup> Nete laen inae turuhelu Jesocurisito. Acate enene inae cana rai sasere- dotecuru curuaanaa Curuaanaa esineneein- chabana satonohelanaala nereein. Nii saseredote neein niicha ichai ichaane jaan- *santuariote*, esinae rauhijiriin nesineneein nena ne. Coatiha raajenihane cacha chanohi- neein nena nihei, niheichu cau chauratane que nihei. <sup>12</sup> Nitohaneeinte *santuario* cuhane enohelu Jesocurisito, coatiha aihuruha caa chauratane que nenacaauru saseredotecurune rijijieein, Cana Coaunera rai, cabara

curuanaa, toro narejeen, naaonjoainuri coichana tihane coina nihei. Acate raajenhane rai coichana tihane coina, le sajeein enohelu chabana coaitenhane coina. Nitohaneeinte cana rai ichaonaa chabana satonoelanaala nena teraneein nihane jaanu raelu. <sup>13</sup> Esinaete niq̄ui, nii toro narejeen coichana, cabara curuaanaa coichana, baca narejeen moco bajane, naaonjoainunri que, chaaelai Cana Coanera que banijiaelanaala nena cabuuruhane couluorejetelu, Cana Coanera que banijiaaanein nihane coina. Nete laen cacha suujue couluoona nainenelu nii ichanacuru. <sup>14</sup> Nete laen jataain nii amuritoheriin nelateineein ne Jesocurisito coichana, aca Cana Coanera Suujue, chabana nitajenaacharanejeein nena aina cuaain, raajenhane Cana Coanera rai cana coreniha ohane coina netihalune jaun. Nitohaneeinte cana suujua letononeein, canaacha ichai coreniha, cana nitaje rai nena caje, cana suujua corein nelu nii rai coichana- osa colane nena- Cana Coanera jerei ichaain nihacachene coina.

<sup>15</sup> Nii cointate ohelu Jesocurisito, ena nena Cana Coaneraacha ichaneni aina cuaain, ichoaichaniha neein onacaaurulu, ena neinichaachene, naaonjoainichaachene Cana Coanera aina cana tihane, nii inoaelu jauriaanejeein niicha ichai, raujiaain cachaauru osa bujuateraneein nihane caje, acaauru osa que suujua acatena nainiha Cana Coaneraane, satiin niicha ranojoneein nenacaauru netonai nii naitoonjoa niicha teeni chabana satonohelanaala nena ichaonaa raeranein neeuruhane coina. <sup>16</sup> Oha cachane baiha, rai rucuhele niicha cocoirichai raauruhane cointate, jauriaanejeein oha nii cachane coitucuuruhane rai ne. <sup>17</sup> Nii jaun, jaiti oheniha nii rucuhele erora cachane, coatiha nii niicha cocoirichai rucuhele ranaa nainihei cacha. Inae ohane baihate laen naine nii rucuhele raa nii banihatihane jaan ne. <sup>18</sup> Nitohanihane jaunte, nii jauriaanejeein nena Cana Coanera ichai tonoracuruhane coina, carenero sohin rai coichana chororejetucurelu. <sup>19</sup> Jerichanejeein jetao techu, aina nenacaauru cachaauru rai jetao, nii Cana Coanera aitoonjoa rauhi bihane baiha jetao, carenero ujui caje, lana caje ichanohi cajione lanajai aina, leinjiin enuha- isopo uune raain jetao, toro narejeencuru, cabara curuaanaa, naaonjoainuri coichana acau que jasiitenohinein nena que setejaain jetao, Cana Coanera tenojoi rauhi laenanohinein nena ichoae riajaain cachaauru ichoae netonai riajae Moisesa. <sup>20</sup> Nitohanein acaauru ichoae riajaain jetaote: “Caate nelaterichaain nii cana rai tonoraacachene coina Cana Coanera tenojone coitucuhichene coina, coitucuerateranein nena Cana Coanera icharatenohi ichananera,” nae jetao Moisesa. <sup>21</sup> Chaen jetao techu, loanari *santuario* aina, nasaa enohane saseredote rai nelatenei corujueleeuru, naaonjoainuri ichoae riajae Moisesa. <sup>22</sup> Nitohaneeinte, satiin itolere coichana que rujuaain, jelai teein culuonojoneein nihane coina aitelu nii rauhi. Nii jaun, neniha coichana joera cana corenihane, nerihei cana osa que suujua acatiha Cana Coaneraane jaanu. <sup>23</sup> Nitohaneeinte carenerocuru sohin rai coichana que, nii dedeeu nenacaauru cojunaca neein nena couluoocurelu. Nete laen, jataain nii amuritoheriin couluoora latelu nii dedeeu esinenein nena.

*Cana osa caje cana rocoeranu quete ohelu Jesocurisito.*

<sup>24</sup> Coatihai nii Cana Coanera nenaja esine cojunacatiha cachaauruhacha ichai asaa enohilu Jesocurisito. Acate rauhijiriin Cana Coanera nenaja dedeeu cuhin, Cana Coanera rai, enene cana coreniha iriha ne. <sup>25</sup> Coatihai aihuruha saseredotecuru curuaanaacuru, le jaanaca nainein nejelau coichana teeuruhane coina araai saain nii *santuario* enohine rijijiein, araai saain ohilu Jesocurisito. <sup>26</sup> Nitohanihane chujianra, necoaanaa cana rai chauratanene caje coaunein, ore araai saain Jesocurisitona.

Nete aca satononiha ecocohin- le sajeeincha raajenihane neteein oheluchabana satonoelanaala cana osa caje cana rocoeranu que. <sup>27</sup> Charijieein teeinti le sajeein ooruhane caseteco coaracure cachaauru, <sup>28</sup> nii rijijieeinte le sajeein atinaain, arajii cachanichaane, osa aina nena caje cana rocoeranu que tenojoinnein nelu Jesocurisito. Inae nacoauneein tururichaain niqui. Nete osaaonacaacuru ichoteratihane coina ainereein, esenetaain acaacha cohajeein nenacaauru ichoteratihane cointe aicheein.

## 10

<sup>1</sup> Nii Moisesa rai rauhi, nechu raujiaain nii turuha uheneenilu rijijieein nihalu nesinenelanaalane jaunte, acaauru osa caje- nii le jaanaca naineein-araai saain jeelai lenonecuru mocohin Cana Coaunera rai teurera couluoona nainenelu. <sup>2</sup> Bana nii acaauru osa caje acaauru couluooca nii Moisesa rai rauhine jana nihanete, inae osa caje couluoonohineein neeuruhane coitucuhin, inihocuru mocohin teuruha Cana Coaunera raine jianecurure. <sup>3-4</sup> Nete nii toro narejeencuru, cabara curuaanaa, naaonjoainuri coichana, acaauru osa caje, acaauru couluoona nainenihane jaun, osaaonaneein neeuruhane coaauca, nii le jaanacaauru naineein, nii inihocuru mocohi teure Cana Coaunera rai.

<sup>5</sup> Nitohanihane jaunte, inae chauratane que uhane rai:

“Ti rai lenonecuru teein,  
que ii belaihuruhane  
jereneeine jaunte,  
ii rai canu jaberoco tihanune coina  
caletoaaicha.

<sup>6</sup> Niheichu  
acaauru osa caje  
couluoonaquine coina,  
ii rai iniho mocohin teein,  
chaelai que  
ii belaihuruhane coina jerihee.

<sup>7</sup> Aihane jaun, nocoaaun,  
nii Quiricha cuhane  
laenanohineein nihane rijijieein,  
iicha jerei icharaneein  
nihanune coinara  
Cana Coaunera.”

naelu Jesocurisito Cana Coaunera rai. <sup>8</sup> Niritiin nii acaauru osa caje couluoonajaane coina, rai lenonecuru sohin teein, chaelai que belaihuruhane coina aitiin, rai lenonecuru mocooruhane coina aitiin, naaonjoaan, rai naitoonjoan rauhi rijijieeine saijieein, rautaeniha Cana Coaunerane que rai aitohane baihate: <sup>9</sup> “Nocoo inae cuhanu iicha jerei ichacaaunne coina” naain aite Cana Coaunera rai. Nitohaneente nii lenonecuruhacha sohin teeuruhane coina nena rauhi itajeein, raajenihane rai jaberoco tee, ena nena cana rai Cana Coauneraacha teineein nihane coina. <sup>10</sup> Nitohanein jeriha Cana Coaunerane rijijieein, le sajeein chabana coaitenihane coina, cana coreniha ohane coina, raajenihane rai jaberoco tihalu Jesocurisitone corenihate, cana osa caje cana couluocoelu Cana Coaunera.

<sup>11</sup> Chabana osa caje cacha couluoona nainenihane lenonecuru sohin teeuruhane saijieeinte, satiin saseredote Jorioneein nenacaauru, araai saain itolere bana lenonecuru sohin teurelu. <sup>12</sup> Nete laen Jesocurisito, le sajeein, chabana coaiten ichaenihaane coina, osa coreniha rai jaberoco tihane baiha, Cana Coaunera rohan nelauriaelu. <sup>13</sup> Ecute ena neein, que nejeratenacaauru

amuritoeratiha Cana Coaunerane cojoae, <sup>14</sup> rai jaberoco teein coreniha Cana Coaunera cachaneein neeuruha cachaaurune coina couluoocane jaun.

<sup>15-17</sup> Jana Cana Coaunera Suujuete:

“Inae chabanani

acaauru rai canuhacha ichanenite;

acaauru suujua cuhane laenanohineein niha

Canu rai rauhine,

suujua caje coauneein coitucuuruhane jaan nereein.

Nii jaun inae nenacaaeneein

acaauru osa aina baaso ichacuruhane coaaurihaaunni,”

naain aitohalu Cana Coaunerane coitucuerate cana que.

<sup>18</sup> Aihane jaun, inae nitohaneein cana osa que suujua acatiha Cana Coaunerane jaun, inae nainiheini nenacaaen osa coreniha iniho mocohin tenaa nainiheini cacha.

*Cana Coaunera rohan nichuuntaacachenete ne.*

<sup>19</sup> Nitohanihane jaunte rai coichana jaohin ohalu Jesocurisitone coreniha, aina cuaain, inae enene nainichaache, chaque casilanaala tonajelanaala Cana Coaunera nenaja esine *santuario* turuhacachenera canejeraauru.

<sup>20</sup> Nitohaneeinte Cana Coaunera rene turunaa nainenihacachene jaan buju-ateraneein nena itajeein, nii ena nena ichaonaa que turunaa nainichaachene jaanu ajiinchateraneein, rai jaberoco telu Jesocurisito.

<sup>21</sup> Nii jaunte Jesocurisito cana rai saseredote esine neein nihane jaun, aca Cana Coaunera nenaja acatiha cana turuaeraneein ne.

<sup>22</sup> Aihane jaun cana suujua cuhane asinojoneein cha coacuelanaala, niheichu leecha coacuelanaala, canaacha cohajeicha que coacuhin, esinae rauhijiriin cana suujua cuhane coitucuhachene saijieein, chachaaain nihacachene jianein, Jesocurisito aina cuaain couluoonojoonein Cana Coaunera rohan turuhacachenete ne.

<sup>23</sup> Nii jaun coujurihu Jesocurisito esenetaeraneein nihacachene jaun, itolere bana esenetaacachene rijijieein nihacachenete ne. Inae ecu tihane bana, cana rai niicha teenu naitoonjoalu terichaaain Cana Coaunerane jaun.

<sup>24</sup> Nitohanihane jaun ita rijijieein caohachaaain neein, itolere bana ita belaaain nihacachene coina, ita coroatajanein nihacachenete caohachae. <sup>25</sup> Aihane jaun nainiheini aihuruha leeochoaurune rijijieein, ita aina netaojiaain ereerecaachene coiinteein jianena nainihaacache. Coiintelanaalate naine, inae tururichaaain Cana Curuaanaa cojoanonaa que turuelalajihane que nainaaain, jiniiquiin itaque corajerateein, ita rai coitucueratihacachene caohachae.

<sup>26</sup> Jana inae raotojoein Jesocurisito coitucuhin nihacachene saijieein, naosatenaa coacuhin nihacachene inae nerinaain nacoaunein cana osa coreniha ohenu. <sup>27</sup> Nechu usi tabai jana necairichanaa coaraain nita-jeururichaaain Cana Coaunera coitucunaa jerelanaala que nejeratenaa rijijieein nenacaaaurune que banijiaain nenaachate cohajerichaacheein.

<sup>28</sup> Chunocoha, Moisesa rai rauhi tonoraelanaala nihane jana, neeuruha nichatajaain coaraain beureranete, cairichaaajoaain coaraelanaala, sohin jaaorurejetucurelu. <sup>29</sup> Tana, nii amurijiriin casetecanohiniha cuururichaaain, chaque nelatihei rijijieein Cana Coaunera Calaohi teein, cana coreniha ohin rai coichana jaohin naaonjoaan, cana belaiha Cana Coaunera Suujuene saijieein, que jaolequiin nenacaaaurune coitucuhichene. Nii rai coichana cana coreniha ohin niicha joailute niqui, acaauru rai niicha teeni terichaaain Cana Coaunerane coitucuerateein, jelai teein Cana Coaunera cachaneein neeuruhane coina, acaauru couluooraneein nenaane.

<sup>30</sup> Chaen techu: “Canuna cachaauru rai caohacha icharaneein coretereunni,” naain “Cana Coaunerate rai cachaauru rucuhereein,” naelu Cana Curuaanaa.

<sup>31</sup> Nii jaunte, jataain coasihacaine Cana Coaunera nere tonoraain neniha-cane.

<sup>32</sup> Nete inara, jauriaanejeein Jesocurisito esenetaaichene nunuheneein, itolere que laraajiin necairichanaa abaantaachelune coaauquichene caohachae. <sup>33</sup> Inara tabaaurute, satiin notaracaae tein nocoeje chanuhin bisihururejetelu. Nii jana inara tabaaurute, inara aina jiniiquiin necairichaururejetelu inara coinaderaa. <sup>34</sup> Jerichanejeein techu, cairichaojoain caresero cuhane nenacaauru coaraain acaauru coinaderarejetocoichelu. Chaen techu inara rucuhelu ruluuruha inara cajene nihanatiin, raotojoein rachoojoein nerejetocoichelu cochunaelanaala. Inae nii amurijiriin chabana nitajenaa nainelanaala dedeeu niha inaraacha raenine coitucuhichene jaun. <sup>35</sup> Aihane jaun, jiaonriha nitohaneein rariquicheeine esenetaain ichaohichene jianiquichene. Acate inara rai jeelai amuritoheriin cainareein. <sup>36</sup> Nii jaunte, jataain jeelai amuritoheriin necairichanaa abaantaain nena nainequichene jaanu que, itolere que laraajiin neeichene jaanu latequiche. Cana Coaunera jerei ichajeein ichaohichene, tihane coina naitoonjoa raeraneein neeichene coina. <sup>37</sup> Nitohaniane coinata:

“Inae ena caeneenejelanaalate turoreein nii turuha uheni.

Coatiha inae carajarihaain.

<sup>38</sup> Canu cachaneein, canuhacha esenetaain ichaonacaaurute, chabana nitajeeurenereein. Nena laen canu cachaneein nihane jianein, jauriaa ichaohalune rijijieein ichoai que nejeratereeeunni,”

naalu Cana Coaunerane, ne laenanohineein rai Quiricha inoaensi cuhane.

<sup>39</sup> Jana cana, coatiha nii rai cachaneein neeuruhane jianein, jauriaa ichaoruhalune rijijieein ichaonacaauru caseteco coaracuruhane rai nenacaauru nihaacache. Canate esenetaain ichaoruhane jaun, ichoteratenojoneein neeururichaaaine rai nenacaauru rijijineein nihacache.

## 11

### *Cana Coaunera esenetaain niha cachane*

<sup>1</sup> Esinae rauhijiriin Cana Coaunera esenetaacanete, chabana canaacha coaraai terichain cana raine cohajeein ichaohaca. <sup>2</sup> Cana foerateracurute raujiaain esenetaauruhane jaun, cacha caohacha rijijieein acaauru coarae Cana Coaunera.

<sup>3</sup> Cana Coaunera esenetaacachene jaunte, nereecha que chauratane coaunalune coitucuhacache. Nii jaunte, chabana cachaacha coaraai caje coaunanojoneein nene, caa enene canaacha coarai.

<sup>4</sup> Cana Coaunera esenetaane jaun techu, nii rai nihana Caain amurijiriin, jataain caohacha nejesina mocohin que Cana Coaunera belaiha Abeline jaun, caohacha icharanein raain nii rai niicha tei raelu Cana Coaunera. Nii jaunte, inae ohalune saijieein enanetojoein Abeli coaaucaache, Cana Coaunera esenetaeranein nihane coitucueratiha cana quene jaun.

<sup>5</sup> Cana Coaunera esenetaane jaun techu, nabana ohane coataa jaberoconeein Enoco raa Cana Coaunerane jaun, inae nii baiha coarihurenelu. Cana Coaunera Quiricha inoaensi cuhanete, jaiti raeniha Cana Coaunerane ajiniha, jeriha Cana Coaunerane rijijieein ichaohalu Enocone que aite. <sup>6</sup> Nete esenetaenihane Cana Coauneraacha jerei ichajeein ichaonaa nainene chuni cacha. Cana Coaunera aina nena jerichaanete, niha Cana Coaunerane esenetaain, aina nena jerenacaun, niicha jerei ichajeein ichaonacaauru cainaeranein niha Cana Coaunerane esenetae esenetaera.

<sup>7</sup> Cana Coaunera esenetaane jaun techu, inae chabana acaauruhacha coaraai icharichaaaine beein suujuatiha Cana Coaunerane tonoraain, leinjiin bote tabai jaelu Nohe, cuhane rai comasai aina saain rai bereecuru aina nichotihane coina. Nitohaneein esenetaane jaun techu, nii esenetaelanaala chauratane que satiin nenacaauru cachaauru caseteco coaracuruhane jana, esenetaain nenacaauru ichoteratenojoinnein neeruhane rijijieein ichoteratenojoinnein nelu Nohe.

<sup>8</sup> Nii rijijieein techu, Abaraaun netonai Cana Coaunera esenetaane jaun, cotihacane tonoraain rai natane ratiriin, nii cunaja jelai coitucuelanaala cuhin, esenetaeranein nihane cainaeranein, rai Cana Coaunera teenu atane que ichaoha cuelu. <sup>9</sup> Nitohaneein Cana Coaunera esenetaane jaunte, nii rai Cana Coaunera teenu atane que leecha atane caje unaaneein ichoaelu Abaraaun. Ecu jetaote, neloheritelanaala raujiaain loanariicha asaae ichoaelu, aihuruhalu nii rai, Cana Coauneraacha tei raeranein neeninunru Isaca, Jacobo, naaonjoainurine rijijieein. <sup>10</sup> Cana Coauneracha ichai-chabana nitajenaachara nese que ichaonaa jerihane jaunte, leecha neseu cuhin ichoaelanaala loanariicha asaae ichoaelu Abaraaun.

<sup>11</sup> Cana Coaunera esenetaane jaun techu, inae camotojoe nihane jaun canaanai sirina naineniha Sarane jana, inae Abaraaun netonai biinaa nihane saijieein, rai naitoonjoan icharihani nohanelanaalane esenetaane jaun, laraajiaa Cana Coaunerane aina nelaraajiaain canaanai sirilu Abaraaun. <sup>12</sup> Nitohaneeinte, inae jataain biinaa nihane saijieein, jani-inacajelanaala cucuana cuhane nenea carene catu aina arasijie jeoneein, cachaauru foerateranein nelu Abaraaun.

<sup>13</sup> Satiin nii cachaaurute ohelu, jaiti nii acaauru rai tihane coina Cana Coaunera aitoonjoa jitaain raelanaala. Nete jataain Cana Coaunera esenetaauruhane jaun, nota que coara rijijieein coitucuuruhane jaun, nechu leecha atane caje unaaneein, caa cana rai chauratane que ichaauruhane coitucuurelu.

<sup>14</sup> Nitohaneein ichaauruhane coitucuhacachene cajete, jaiti caa chauratane que, nii acaauru rai Cana Coauneraacha teenu chabana sato-noelanaala acaauru ichaonajaanu atane raurenihalune coitucuhacache.

<sup>15</sup> Bana nii jelai nataneecha que coaacuruhane jana nihanete, jelaiha caaururelu. <sup>16</sup> Nete nii acaauru rai Cana Coaunera teenu atane raauruhane coina, jelaiha caunaa nainecurenelu. Nii atane acaauruhacha raenute dedeeu nenaane. Nii jaunte, nitohaneein acaauru que leinjiin nese banihatein rucuhacane jaun, acaauru Coauneranein nihane coejene Cana Coaunera.

<sup>17</sup> Nitohaneein Cana Coaunera esenetaane jaun techu, esenetaane cojuha rai calaohi Isaca sohin mocohane coina, rai aitoha Cana Coaunerane jana, Isaca sohin mocoha nejerele Abaraaun. <sup>18</sup> Nitohaneeinte: “Ii calaohi Isaca cajete nefoerateeurureein iicha foerateeuricha” naa rai Cana Coaunera natiin, acaihaniji rai calaohiniha Isaca ne saijieein rai sohin mocoha Abaraaun ne jere Cana Coaunera. <sup>19</sup> Ohane caje, cacha ichatena nainiha Cana Coaunerane esenetaane jaunte, nii rai calaohi atinaain tihane jere Abaraaun. Nii jaunte, Cana Coaunera rai tihane baiha, nacoaunein nii rai calaohi raelu. Nitohaneeinte jataain chaque nelateinein nelu nii Abaraaun.

<sup>20</sup> Cana Coaunera esenetaane jaun techu, rai calaohichuru- Jacobo, Esao, naaonjoainuri coroatajanerichaain Cana Coaunerane coitucuhin cojiotaelu Isaca.

<sup>21</sup> Cana Coaunera esenetaane jaun techu, inae ohane rai netiin, rai calaohi Jose calaohichuru- le cachaauru cojiotaain coroatajanerichaain



Cana Coaunerane que aitiin, rai nunera que netemeriaain, Cana Coaunera corojelu Jacobo.

<sup>22</sup> Cana Coaunera esenetaane jaun techu, inae ohane rai netiin, Egipto caje mituururichaain rai naraaichuru Isaraelitacurune que aitiin, rai jaberoco amaauruha acaauru jiniichaaaine coina aitelu Jose.

<sup>23</sup> Cana Coaunera esenetaauruhane jaun techu, canaanaihuru soaajeratiha Egipto curuaanaa *reyne* jana, nejanoaa Moisesane jana casilanaala, nichata ateein asinojoneein aina sirichurelu, jataain caohachajei canaanai nihane jaun, rai fojiaraauru.

<sup>24-25</sup> Cana Coaunera esenetaane jaun techu, *Rey* Faraaon cacunu, calaohi rijijieein nenaajerenihane jaun, inae ichauhenaneein rai naraaichuru- Cana Coaunera cacha neein nenacaauru aina jiniinquuin cairichanojoneein nelu Moisesa. Jaiti caa chauratane que osaonacaauru aina ichaohane bana. <sup>26</sup> Nitohaneeinte, jataain Cana Coaunera esenetaane jaun, rai cainarichaain Cana Coaunerane coitucuha nota que coara rijijieeine jaun, Egiptoo raotojoei ichaonaa que ichaonaa nainihalune que jaolequuin, jataain nii amuritoheriin nelateineein cacha ichoteratera- Mesihasi rijijieein cocoinanohineein necairichanaa jerihane jaun, naraaichuru rene cuelu Moisesa.

<sup>27</sup> Cana Coaunera esenetaane jaun techu, sohin jaohane coina arichatiha curuaanaa *reyne* jana, casilanaala Egipto batane caje amuhin, ecu aina neein coarajiha Cana Coaunerane jana ainaan rijijieein, Aca jerihane rijijieein nelu Moisesa. <sup>28</sup> Nitohaneein esenetaane jaun techu, besetanein neeni- Fasocoa janonaa nunuhe bitoaain, satiin Isaraelitacuru nenaja bacujuaauru rujuaerate ichana que Moisesa. Nabana Isaraelitaneeuruhane calaohichuru ajichacuru atinaa Cana Coaunera letono anjerane coataa.

<sup>29</sup> Cana Coaunera esenetaauruhane jaun techu, atane jacoro que ainaa rijijieein, cucuana jera jaaorelu Isaraelitacuru. Jana Egipto cocoaichacuru acaauru caaijie kuhalaain satiin naluhin oorelu.

<sup>30</sup> Cana Coaunera esenetaauruha Isaraelitacurune jaun techu, caainsi janoneein cojoanonetojoein cuhin, caainsi saneein Jericoo nese tinonocuruhane jana, neranuha tinonoritiin nena nii ajeri caje ichanohineein nena nii nese tinoritiin ucuuneti rijiane jana, satiin cocoaichacuru sohin jaaorelu. <sup>31</sup> Cana Coaunera esenetaane jaun techu, nii Jericoo nenacaauru cachaauru sohin jaaoruhane ucuaetoha, nii ecu nena ene cojoaelorohe sohin jaaorenelu. Nitohaneein esenetaane jaun, acaauru letonocuru corootajai cunacaauru raa raotojoein rai loreri asaaene jaun.

<sup>32</sup> Jaitite lanacure Gedeeon, Baraca, Saansoon, Jefete, Rabiri, Samoeri, chaen *profetacuru*, naaonjoainunri que inara rai irihanune, nena inae jianeun. <sup>33</sup> Satiin niichuru jetaote, Cana Coaunera esenetaauruhane jaun, lauri lauri nenacaauru atanecuru ruluhin jetao, jeriha Cana Coaunerane rijijieein ichaain jetao, acaauru rai niicha teeni Cana Coaunera aitoonjoan atane raarelu. Tabaauru leon ucuha cuhane jaonojoneecuruhane nihanatiin quinaa nainenelu leon, leonocuru ujuae fuhane coina, rai anjera letoaa Cana Coaunerane jaun. <sup>34</sup> Jana tabaauru jetaote, Cana Coaunera esenetaauruhane jaun, usi tabai jana jaonojoneecuruhane nihanatiin, tonajelanaala usi caje nichoteeurelu. Chaen tabaauru jetaote, sabere caje nichoteein sonaana que casihuruhane saijieein, nii baiha nelararajiaain sonaana que acaauru que nejeratenacaauru amuritoorelu. <sup>35</sup> Tabaauru enecuru rai jetao techu, acaauru araaichuru onacaauru ichatecurelu.

Jana tabaaurute cairichanojoneein neeuruhane caje nichotenaa coacuelanaala oorelu, ooruhane nihanatiin Cana Coaunera aina raotojoei ichaonaa

que ichaaorurichaaine esenetaauruhane jaun. <sup>36</sup> Jana tabaaaurute acaauru nocoeje chanuhin bisinojooineein, *cadena* que ichoanojooineein caresero cuhane tenojooineein, naaonjoaarelu. <sup>37</sup> Jana tabaaaurute, ajeri que bodoosiin, sera que cataaun terunojooineein, sabere que sonojooineein, naaonjoaain oorelu. Chaen techu, cajihaneein amuhemujueein cairicheinejeein, carenero, cabra, naaonjoainuri ujui que cajionecoojooein, cairichanojooineein nererojoecaaeriin, naaonjoaain neeurelu. <sup>38</sup> Nii cachaaurute chauratane que, nelatihei rijijieein, cunaja coitucuelanaala cajihaneein, cacha areroo cuhin, ichatane ucuunno cuhin, ajeri jioararo jachu cuhane neein, atane jachu ucuacaain nenea cuhaneuru cuhin amuhemujueein nerejeto-curelu.

<sup>39</sup> Nete nitohaneein esenetaain neeuruhane coreniha cacha caohacha rijijieein coaranaaca Cana Coaunera natiin, chuni rai naitoonjoan niicha teeni tenelu, <sup>40</sup> cana coacuhin cana rai jataain caohachaneein niicha tei esenetaeraneein neinichaachene aina cuaain, acaauru netonai cana aina jiniiquiin esinae rauhijiriin caohacha icharaneein ranojooineein neeuruhane coina.

## 12

### *Jesoso coarajeein nenea rijijieein, itolere bana queecha coaaucuhe.*

<sup>1</sup> Nitohaneein inae cana que Cana Coaunera esenetaauruhane coaraatein coitucuherateeuruhalu nii cachaaurune jaun, jeriha Cana Coaunerane rijijieein ichaonaa jerichaachene nihanatiin itolere bana osaacha ichana coacuhin nihacachene coina cana acateraneein nenea jianein, canaacha esenetai jerenohi ichajeein laraajiin ichaohacachenete caohachae. <sup>2</sup> Aihane jaun, nii esenetaacachene jaan tera neein aca cana suujua rucuhaneein niha Jesusone jaun, queecha coaaucaachenete ne. Inae nii baiha raotojooein rachoojooein Cana Coaunera rori-*trono* raotono nichajai que nelauriaain nerichaaanne coitucuhane jaunte, rai nocoeje chanuhin coroso que tein atinaauruhane jana, coejenelu.

<sup>3</sup> Nitohanihane jaun, itolere bana Jesoso cairichaaeriin neeuruhalu osaaonacaauru cachaaurune que, inara suujua cuhane coaaucuhe. Aihane jaun, chatohanei coaraain neeichene nihanatiin, jiaonriha coiinteein esenetaaichene jianequichene. <sup>4</sup> Niheichu nii osa que nesarucuhichene coataa necairichanaa coraquichene jaun coreniha oriheeicheein. <sup>5</sup> Nete inae inara, rai calaohi suujuatiha casetecaane rijijieein, inara suujuatiha inara casetecaa Cana Coaunerane jaan baitequiche. Rai Quiricha cuhanete:

“Jiaonriha  
ii suujuatiha, ii casetecaa  
Cana Curuaanaa que jaolecoinera cacalabi.  
Niheichu  
baaso ichaaine coreniha  
ii casetecaane,  
nainihee  
esenetaaine jianeine.

<sup>6</sup> Niicha belaaite suujuate  
Cana Curuaanaa.  
Jerichanejeein techu,  
rai calaohi rijijieein  
niicha rai casetecaain ne,”  
naain ne Cana Coaunera Quiricha cuhane.

<sup>7</sup> Nitohanihane jaun, inara casetecaane abaantaain neeichenete, rai calaohi belaihane rijijieein inara belaicheein Cana Coaunera. Nihei chuni

canaanai- inacaacha suujuateinelanaala nei. <sup>8</sup> Jana rai calaohi rijijieein nenacaauru casetecaa suujuatihane rijijieein inara suujuatiha, inara casetecaeniha Cana Coauneranete, rai calaohi esinenelanaala, rai nere tonorae neeichene jaun aicheein. <sup>9</sup> Chaen techu, caa chauratane que nenacaauru-cana fojiaraauru- cana casetecaain cana suujuateeuruhane, tonoraain nere-jetocoaachelu, tonaain erenaa coacuelanaala. Nitohaniane jaun, cha caaunna nii amuritoheriin dedeeu nena Cana Inaca Cana Coaunera cana suujuatiha, cana casetecaane abaantaain nenerihacache, chabana satonohelanaala nena ichaonaa raacachene coina. <sup>10</sup> Cana fojiaraaurute, jaiti caa chauratane que ichaohacachene jana, nechuhaujiaain acaauru jerecuruhane rijijieein nihacachene coina, cana suujuateeuru. Nete Cana Coaunera laen, Nesineneein caohacha icharaneein nihane jaun cana rai caohacha icha cana suujuatiha cana casetecae. <sup>11</sup> Coatihani niqui raotohi caseteco coaracaane, rijieeoritiin cunaain tacaane jaun. Nete nitohaneein cana tein cana relaera tonoraain ichaohacane, rauhijiriin raotojoei ichaonaa que ichaohaca.

*Jataainte elunae cana rai Cana Coauneraacha beratei que jaolecohacane*

<sup>12-13</sup> Aihane jaun, nacoauneein nelararajiaain caohachaain ichaaoche. Nacoauneein caohachaain rauhijiriin inara suujua coaraain ichaohin, jericanejeein nacanacaena coacuelanaala neeichene coina.

<sup>14</sup> Satiin cachauru aina raotojoein ichaaoche, cojoerihu jeriha Cana Coaunerane rijijieein ichaohichene coina. Jeriha Cana Coaunerane rijijieein ichaoheniha cachane, nihei chuni Cana Curuaanaa coarana nainerinaain. <sup>15</sup> Atiin jiniinquin, jeriha Cana Coaunerane rijijieein, ita corootajanein neeuche. Nabana chuni nitohaneein nihane jianihane, cacha atinaa ajaena corainei rijijieein leeochoauru ichao aasaecane coataa. <sup>16</sup> Jiaonrihachu chunocoha inara caje, nejelau ene aina ichaohane. Niheichu rai Cana Coauneraacha tei que jaoleconaa nainihe. Nitohaneein ichaane jaunte, nechuhaleonecha coreniha, aca nihana saijieein, rainein nena telu rai no-coala rai Esao. <sup>17</sup> Nii jaunte, nii coitucuhichene rijijieein, rai caohachanu tiha rai inacane coina bajaane saijieein tenelu rai inaca. Mainajeein chanaain bajaane saijieeinte, tenelu inae nitohaniane jaun.

<sup>18</sup> Nete laen inara, aihuruhalu Isaraelitacurune rijijieein, chatohanai dadaain coanacai, usineein iihanei, nocohena tabai, cujuana tabai aina nocohena, naaonjoain nena rohan nii nichuuntaeneeiche. <sup>19</sup> Niheichu toniha jaihane aonaheeiche. Niheichu toniha Cana Coaunerane aonaheeiche. <sup>20</sup> Nii aohanraauru jetaote laen, nii naitoonjoan tonorana nainesihurenihane jaun, abaantasilanaala acaauru rai iriha Cana Coaunerane jianeratecurelu. “Chunocoha, caa nihanune jaan- ichtane ucuunno rohan nichuuntaain, ecu turuhin, jelai shaquiin, naaonjoainte ajeri jaberoco, rejoon, naaonjoain que sohin jaonoinereein, lenone neein aihane nihanatiin” naain iriha Cana Coaunerane jaun. <sup>21</sup> Nitohaneein jataain coasinaca, nii acaauruhacha coaraine jaun jetaote: “Jataaine rijijijianeun canu nesoone caaunra” nae jetao Moisesa. <sup>22</sup> Nete laen inara nii amuritoheriin, Cana Coaunera nenaja esine Sioon bichatane ucuunno, dedeeu nena Jerosaleeun nichuuntaaiche. Chaen techu oaraanca neein netaojiaain Cana Coaunera coroaecuruha coina, netaojiaain neeuruha anjeraaurune jana coaraquiche. <sup>23</sup> Chaen techu, ichoaichaniha Cana Coaunera calaohi neein dedeeu cooirichanojoneein nenacaauru rohan turuhin coaraquiche. Nitohaneinte satiin caohachaain ichaonacaauru cachauru, aca jerihane rijijieein tein niicha ranojihunru rai Joesionein nena- Cana Coaunera rene turuhiche.

<sup>24</sup> Chaen techu nii ena nenea Cana Coauneraacha teratei teraneein nenea Jesocurisito- rai coichana que cana couluoorane maajeein coaraquche. Nii rai coichanate jauriaanejeein cana cairichaeranu que nihalu Abeli coichana jana, jataain nii amuritoeriin cana rai nelateineein ne.

<sup>25</sup> Nitohaniane jaun, cana rai ereein niha Cana Coaunerane que jaolecchin, batiin neeichene que necohalajiin neeuche. Coaracuche nachuhinti nii jaiti cau chauratane que ne bana, suujuatenajaane coina Cana Coauneraacha cotihacurilu, caje nichotenea nainecururiha. Aihane jaun, nii amuritoheriin nichotenea nainerihacacheein dedeeu netiin cana suujuatihane que jaolequiin nihacachene. <sup>26</sup> Nii iriha Cana Coaunerane bana jetaote, nii rai nereecha caun nerurujaelu canarai chauratane. Nete ena laen: “Nacouneeina chauratane rurujuareeunni le sajeein. Coatiha Chauratanecha nerurujuarinaain, cana rai dede netonaite nerurujuareein,” nae Cana Coaunera. <sup>27</sup> Niritiin: “Nacoauneein le sajeein” naain aitohanete, satiin niicha counanajoineein nerurujuanaa naineein nenacaauru itajihane jana, nerurujuanaa nainelanaala nenaacha nedaane coina aitoha Cana Coaunerane coitucuerate cana que. <sup>28</sup> Nii cana rai Cana Coauneraacha teirai Cojoanonaate chabana nitajenaa nainene. Nii coreniha “Narihara Cana Coaunera,” naain jiniiquiin rai cachaneein neeuruhane coarateein aca jerihane rijijieein coroaeraauru aina coaroaecaachenete ne, <sup>29</sup> itolere baaso itajera- usi rijijieein niha Cana Coaunerane jaun.

## 13

### *Naaonjoaain, rai suujua rijijieein nihacachenete jere Cana Coaunera.*

<sup>1</sup> Jiaonriha ita nejeraneein nenea rijijieein, jiniiquiin ita belaa in neeichene jianeein neeichene. <sup>2</sup> Niheichu inara rene turunacaauru belaa in raaichene jianeein nenea nainiheechene. Nitohaneein nenacaaurute, acanihane coitucuelanaala Cana Coaunera letonocuru anjeraaurune maajeein raurelu rai loreri asaae.

<sup>3</sup> Aitiin caresero cuhane nenacaauru netonai coaucuche, acaauru aina jiniiquiin caresero cuhane nenea rijijieein. Chaenchu cairichaaerinoojinee in nenacaauru netonai coaucuche, inara netonai acaauru rijijieein cairichanojinee in nenea nainequichene jaun.

<sup>4</sup> Nitohaniane jaun, inara quichaauru, enecuru, naaonjoaineeichene nisirihateein neeichene, itaque inara suujua acatein, leecha inara sinijerane lanaala nenea coacuelanaala, inara sinijiera ainaacha ichaaoche; satiin baaso ichaain rai sinijerane lanaala nenea aina ichoai casetecarichaain Cana Coaunerane jaun.

<sup>5</sup> Jiaonrihachu coriquiicha que coacuhin neeichene. Inara rucuhele inaraacha sirii ainaacha raotojoe in ichaaoche: “Chabana nihei inara jianeein inara que jaolecchanune” naalu Cana Coaunerane jaun. <sup>6</sup> Niritohalu cana rai Cana Coaunerane jaun chaque tonajelanaala nainichaache:

“Cana Coauneraate canu coroatajanerane in ne.

Nii jaun chaque casinaun.

Chatonai ichana nainihe i canu que camute cacha,” naain erena nainichaache.

<sup>7</sup> Inara suujuate in Cana Coaunera ere que inara relaaurelalu coacuhin, acaauru ichao que coacuhin, esenetaain ichaauruhane rijijieein ichaaoche.

<sup>8</sup> Jesocurisitote jeelainee in nereein, chabana satonoelanaala. <sup>9</sup> Aihane jaun jiaonriha nejelau cuain inara relanaajerera nihane, rijitoojoe in esenetaain neeichene. Nii amuritoeriinte jataain nelate, jeriha Cana Coaunerane

rijijieein cana suujua ilaain ichaohacachene. Coatiha chaque nelatihei, nii niicha quiinelanaala nena iniho quiniha cachane nihanatiin. Coatiha chabana cana rai chaque nelatejeehai nii.

<sup>10</sup> Canate coroso que ohalu Cana Coaunera Calaohi Curisitone coreniha jianacoon osa caje nihacache. Nii *santuario* teein saseredotecuru ichanaa coatiha inae chaque nelateein nedaai. <sup>11</sup> Jana jauriaanejeein nenaalute, saseredotecuru curuanaacha lenonecuru sohin, *santuario* cuhane rai coichana terejetelu osa anihoaeraanu que. Nete laen, nii lenone jabero-cooru, acaauru loanari caje naain amaaain jelai teein mocorejetocurelu. <sup>12</sup> Nii rijijieein techu Jesoso netonai, naain nese caje amaaain jelai teein atinanohinelu; rai coichana que satiin rai cachaneein neinichaachene culucane coina. <sup>13</sup> Aihane jaun, aina jiniiquiin nese caje amanojooinein cana netonai necarichanaa abaantacachenete ne, aihalune rijijieein. <sup>14</sup> Coatiha caa chauratane que nihei cana rai leeinjiin nese chabana nitajenaacharanejeein nei. Nii jaun, chabana nitajenaacharanejeein nena ariirijiacachenete ne. <sup>15</sup> Aihane jaun, itolere bana Cana Coaunera coroaecaachenete ne, rai Calaohi Jesocurisito aina cuaain. Nii Cana Coaunera coroaecaachenete belaiha rai canaacha teenineein nereein. Aihana jaun cana ujuaae caje coroaecaachenete ne. <sup>16</sup> Jiaonriha caohacha ichana baiteein, leeochoauru rai inaraacha sirii teein naaonjoaain neeichene jianequichene. Nitohanein ichoaite rautaaain coarae Cana Coaunera.

<sup>17</sup> Inara relaaurera ere tonoraain jerecuruhane rijijieein neeuche. Acaaurute nebetacaelanaala inara beraaihure, Cana Coaunera rai jitaain inara aina nichanaa beeuruhane rai neeuruhane jaun. Aihane jaun, acaauru jerecuruhane rijijieein, inaraacha ichai ichaain neeuche; acaauruhacha rautaaai ichaelanaala. Jana aineeichene, coatiha inara rai chaque nelateri-aain inaraacha ichai.

<sup>18</sup> Atiin canacaanu coreniha Cana Coaunera bajaauche. Jataain raotojoiha canacaanu suujuanena jerichaanu; itolere que caohachaaain ichana jerichaanune jaun. <sup>19</sup> Jataain inara aina nacoauneein nena jerichaaunne jaunna, inara aina nihanune coina Cana Coaunera bajaauche coina, inararai aitoon.

#### *Raotojoein jiniiquiin neeuche.*

<sup>20</sup> Rai coichana aina cuaain chabana satonoelanaala nena ichaonaa terarai cachaneein nihacachene beraichaneein nena- nii o caje Jesoso ichatera Cana Coaunera, <sup>21</sup> inara ichao rucuerateeine Jesocurisito que, aca jerihane rijijieein cha chaain neeichene coina. Chaen Jesocurisito aina cuaain canacaanu que niicha jerei ichamiin. Itolere bana satonoelanaala, Curisitonein niha Curisitone coitucuurumiin satiin cachaauru. Bajiaanachuhinti aihurene.

<sup>22</sup> Atiin raotojoein caa inara suujua nunaeraanu que inara rai canuhacha laenai rauchera canejeraauru. <sup>23</sup> Cana nejera Timoteeote, inae caresero caje mitue. Enanocoojoa turuhanena, inae inara coaraa uhanune, canu jiniichaain uhareunni.

<sup>24</sup> Satiin inara bichauhenaauru aina, satiin Cana Coaunera cachaneein nenacaauru rai, acaauru coaaucaunne beeuche. Italiau nenacaauru netonoaite inara coaacure.

<sup>25</sup> Jataain jeelai amuritoeriin inara coroatajanemiin Cana Coaunerate, satiin raotojoein neeiche.

## Saantiaaocha Letoai

### *Jesocurisito esenetaeraauru rai Saantiaao letono quiricha*

<sup>1</sup> Canuna Saantiaao neeun Cana Coaunera ere tonoraera neein, calaohi Jesocurisito naajoain ere tonoraeraneenne neeun. Nii Cana Coaunera Calaohi Jesocurisito ere esenetaain nenacaauru, caa cana rai chauratane sacutaain riaanein nenacaauru raina, caa quiricha letohaun.

<sup>2</sup> Aonacuche satiin Cana Coaunera Calaohi coreniha canejeraauru. Chatohanein nihanatiin inara tera nihane chaque tonajelanaala raotojoein rachoojoein neeuche. <sup>3-4</sup> Cana Coaunera esenetaaichene coreniha itolereque coujunojoinequichene coitucuhin, nellararajiaain itolere necairichanaa abaantaain neeuche. Nitohanihane banate itolere necairichanaa nihanatiin abaantana naineriquicheein aina iiquichene. Nii banate esinaae rauhijiriin Cana Coaunera jerenohi ichana naineriquicheein. Aihute coujurihu Jesocurisito ere tonoraera neein nena tocohanein neeiche rauhijiriin.

<sup>5</sup> Inaraacha chanenu coitucuheneeichene, Cana Coaunera caje bajaachete inara coroatajanemiin. Acate inara rai coitucuhichene jaanu tereein, Cana Coaunera canaacha latei tera ne chaque tonajelanaala.

<sup>6</sup> Cana Coaunera bajaachene, esinae rauhijiriin esenetaain necoatoelanaala bajaache. Necoatiin Cana Coaunera bajaerate, esinaae rauhijiriin Jesocurisito ere tonorana nainene, cajianeein suujua letono sacuhane.

<sup>7</sup> Nitohanein neeichene, inara coroatajanena nainerihe Cana Coaunera esenetaeneeichene, <sup>8</sup> leinjiincha que suujua cuaain nena naine niha nitohanein nenacaauru cachaaurune jaun.

<sup>9</sup> Cairichanein neeichene jana, inara raa Cana Coaunerana jaun, raotojoein rachoojoein neeuche. <sup>10-11</sup> Cana Coaunera coitucuhin esenetaera coriquihona neein nihane, coriqui que nanejiaane niha natiin raotojoein rachoojoein neeine, Cana Coauneraacha tenojoin amuritoheriin jataaen nelatena naineniha coriquine coitucuhin. Cana rai Cana Coauneraacha tei ichaonaa laen, chaelai janonaa bana nitajenaa nainihe. Nii coitucuhin raotojoein rachoojoein neeine.

### *Chabana nitajenaachara ichaonaa terichaain Cana Coaunerane*

<sup>12</sup> Nerausiaaequiche esinaae necairichanaa abaantaain Cana Coaunera coitucuhin, esenetaain, jereein, nere tonoraain neeichenete, chabana nitajenaa charanejeein nena ichaonaa caohacha esine tereein inara rai Cana Coaunera, belaa nere tonoraeraauru rai nitohanein tihane coina aitiin nihalune jaun.

<sup>13</sup> Chunei chatohanei baaso ichana coacuhin nihane, coaa "Cana Coauneraate jere caa baaso coaucaunne coina," naain iriha. Coatihajoaereein cacha rijijieein chabaaso coacuhin nihei Cana Coaunera. <sup>14</sup> Nii cana raajenihane canaacha coacuite, ecocoe cana suujua caje baasoneein. Aihana jaun baasoneein sacuichechene coataa, caohachaa coaracuche. <sup>15</sup> Baasoacha coacuhin nenaate, nechu jataaen caohacha nainejeein nitajiha cureein. Coatihacana Coaunera jerihane jaun, nii baaso neein ichaoheiche. Niheichu nii nitajiha chuneine jerihe Cana Coaunera.

<sup>16</sup> Coaa inara raajenihane nohanihache canejeraauru. <sup>17</sup> Coatihacana Coaunera caje uhi chabaaso. Coatihachaelai janonaa bana suujua lonaai

Cana Coaunera. Leinjiin acaachate aca neein ne. Itolere neeincha caohacha nejesinaachate uhe Cana Coaunera caje. Acate itolere rai cono neein ne. Aca techu enoto, atene, arasijie, naajoainunri coaunaelu dedeeu. Chabana coreenrai Cana Coaunera. <sup>18</sup> Nii jaunte nere berate cana rai, aonaain, coitucuhin, esenetaain tonoraacachene coina. Nii jaunte, nere esenetaain tonoraacachene jaun, ichaonaa esine tee cana rai, raotojoein Cana Coaunera nihane coroejeein niicha jerei ichacaachene coina.

<sup>19</sup> Nii coreniha canejeraauru, caohachaaain rauhijiriin esinaae Cana Coaunera ere aonaain, Cana Coaunera ere tonoraache, chaaenchi erenacaotelanaala, chaaenchi joaereein coreniha obaje lanaala, naaonjoaain. <sup>20</sup> Joaereein coreniha obajei cacha, nihei Cana Coauneraacha jerenohi ichaai. <sup>21</sup> Aihana jaun itolere baaso nejesina inaraacha sacui jianecuche. Nii Cana Coaunera ere, inara suujua cuhane inaraacha rucujuei Cana Coaunera ere tonoraache, caohachaaain inara suujua coaraain. Acate osa caje jianacoo inara suujue mitareein.

<sup>22</sup> Cana Coaunera ere coitucuhin neeichene jaun, tonoraain Cana Coaunera jerenochi sacuuche. Aineeichene nelatihei raujiaain aonaquichene. Niite nechua jataaen inara raajenihane necoritariquicheein. <sup>23</sup> Cha teeinti Cana Coaunera ere beebejiha beebejerane aonaa natiin tonoraene. <sup>24</sup> Niite enaacha Cana Coaunera ere baitereein. <sup>25</sup> Cha teeinti aitoha Cana Coaunera erene baitelanaala rauhijiriin tonoraain ne, niite raotojoein nereein. Cana Coaunera ere tonoraacachenete nainichaache caohachaaain ichaohacachene. Niicha jerenohicha ichacaachenete caohachae. Nii jaun Cana Coaunera ere tonoraain naitoonjoan ichajeein sacuhacachenete caohachae, cana aina niha caohachaaain Cana Coaunerane raotojoein ichaohacachene coina.

<sup>26</sup> “Aitoha Cana Coaunerane rijijieeina caohachaaain rauhijiriin neein,” naa natiin joaenreein baaso neein leeocho cacha que irihanete raajenihane necoritae. <sup>27</sup> Cha lateein neuruha ujuatejeeurune corootajanein, cha latein niha autanaaurune corootajanein nihacanete, esinaae rauhijiriin aitoha Cana Coaunerane rijijieein nerichaachein. Nainihei Cana Coaunera Calaohi Jesocurisito coitucuruhi rijijieein nihacachene.

## 2

### *Nejelauneein leeocho cacha coana nainenihachane*

<sup>1</sup> Nitohaniane jaun Cana Coaunera Calaohi Jesocurisito esenetaera neein neeichene jaun, jiaonriha nejelauneein chunei coaraain neeichene. <sup>2</sup> Ita taojiaain Cana Coaunera bajaachene jaan coloheri-Teenforo asaae ita taojiaachene jana, enoha leinjiin coriquihona, oro que anichoquiin, cajione caohacha que necoreeteene jana, cajione siri ruhecaain enoha cairichaiinein nenaane, <sup>3</sup> nii oro que anichoquiin cajione caohacha ruhacaera belaaain, rori caohacha choaae lauriaain, nii cairichai cacha rai, “Nihu chujuhecoo. Ainihane nihu atanichoaae nelaurihau,” naaichenete, <sup>4</sup> baaso ichariquicheein, caohachaaain cairichai belaaain coaraeneeichene. Nii coriquihona belaaichene rijijieein, cairichaihuru belailanaala, “Nelatihei cairichaihuru belaihacane,” naaichene jaun. Satiin coriquihona, cairichai, naajoainunri belaihacanete caohachae. Nihei cana belaihuruha caohachaaaine jerena caun nihei. Nitohanai ichaquichenete baaso ichariquicheein.

<sup>5</sup> Caohachaaain aonacuchena inara rai caa que aite te coitucuhiche. Nere esenetaain tonoraacairichainein nenaacacha netejian, nenacaen belaaain corootajane Cana Coaunera, jeelai amuritoheriin esenetaain tonoraain nihane coina. Cairichainein caa cana rai chauratane que nihane niha

natiinte, belaaïn coroatajane Cana Coaunera, aïtohane tocohaneeïn chaaelai janonaa bana satonoelanaala aina nihane coina. <sup>6</sup> Nete inara, cairichaihuru necoejechanuhin neeiche. Coatiha cairichaihuru, inara necoejechanuhi, inara cairichaaïriïn neeuruhi chaaelai janonaa bana. Coriquihonaaurutejian, inara necoejechanuhiriïn, inara cairichaaeriïn neeure. Cuna jere-neeichene niha natiïn, inara tararaain inara amaaïn cocoina nacaihuru rai inara teeure, caseteconeïn neeichene coina. <sup>7</sup> Chaaen techu inara que baasoneïn ereein neeure, Cana Coaunera Calaohi Jesocurisito sacuhin neeichene coreniha. Caohachaaïn inara belaihuruhane coaraelanaalate inaraacha acauru belaaiche, cairichaihuru belaaichene amurijiriïn. Coa nitohaneïn nihache.

<sup>8</sup> Quiricha cuhane aïtoha Cana Coaunerane tocohaneeïn, charijieïn teeinti nii raotojoeïn ichaonaa jereïn neeiche. Nii rijijieïn raotojoeïn ichaonaa nainecuruha acauru netonaine coina, nii leecha cachauru coroatajanecuchete, acauru netonai raotojoeïn ichaonaa nainecurumiïn. Nitohaneïn neeichenete esinaae rauhijiriïn Cana Coaunera aïtojoan ichariquicheeïn. <sup>9</sup> Inara araachuruhacha caohachaaïn coaraain belaaïn, coroatajaneïn, nii nejelauru coroatajana jereneeichenete osa que nesarureeicheïn, Cana Coaunera notaracae aïtoha Cana Coaunerane tonraelanaala, nitohaneïn rauhijiriïn ichaeneeichene.

<sup>10</sup> Cana Coaunera aïtoonjoan tonoracache neniha natiïn, jitariïn caohacha nainejeïn Cana Coaunera aïtoonjoan tonoraenihacachenete, cana nii ujuaihoneïn nerichaacheeïn. <sup>11</sup> Nabana nitohaneïn neeichene coataa: “Jiaonriha chu chaaen nejelau ene, inara sinijerane lanaala nena aina naosateïn neeichene. Chaaen techu jiaonriha sinijera nelanaala nena quicha aina naosateïn niha enene,” nae Cana Coaunera. Chaen techu, “Jiaonriha sonajaain jaohine,” nae Cana Coaunera. Aihane jaun rai sinijeranelanaala nena aina ichoanehane nihanatiïn sonajaain jaohanete, Cana Coaunera rai rauhi tonoraenihane jaun aicheeïn. <sup>12</sup> Aihana jaun coa nejelauneïn chunei coaraain nihache. Cairichaineïn nihacachene sajainejeïn, cana belaaïn cana raa Cana Coaunerana jaun jerichanejeïn belaaïn cacha coaraain nihacachenete caohachae. <sup>13</sup> Inae ecu tihane banate caseteco coaraa cuurureeïn nechu ansaineïn nenacauru, necairichanacauru que “cairichaaïjoaa” naelanaala nenacauru. Necairichanacauru coroatajana jeriheichurute, “cairichaaïjoaa” naelanaala casetecaeratiha cureeïn Cana Coaunera. Jana, necairicha nacauru que, “cairichaaïjoaa” naïn coroatajaneraaurute, caseteco caje nichotiha cuurureeïn. Niite belaaïn raa cureeïn Cana Coaunera.

### *Cana Coaunera coitucuhin esnetaane coaratiha cachane*

<sup>14</sup> Cana Coaunera coreniha canejerauru, chaque nelatihei raujiaain Cana Coaunera coitucuhin esenetaeranichaaun naïn iriha cachane. Coatiha nii coreniha osa caje jianacoon nerianaain jeriha Cana Coaunerane rijijieïn cha lateeïn niha namute cachane belaaïn coaraain coroatajaneïn netiïn naitonone nihane jaun. <sup>15</sup> Lenone, cajione, naaïjoain que, anejiïn niha, Jesocurisito coreniha cana nejera, cana bai naaïjoain ine jana, <sup>16</sup> “Cairichaaïjoaa nohane, bajiaa nachuhinti chunijihu lenone, cajione, naaïjoain eruuïue ne,” naaca cha telanaalane, nihei cairichai coroatajanihaaca. Niicha laatei teïn coroatajanichaa nete caohachae. <sup>17</sup> “Cana Coaunera coitucuhanu,” naaichene jaun esinaae Cana Coaunera coitucueraneïn neeichene, leechauru notaaquiche nete caohachae. Jana leechauru notajaelanaala, raujiaain esenetaaichene chaque nelateeïn nedariheeicheeïn.



<sup>18</sup> Inasina caohacha ichaain cacha notajaenihane, “Esinaete chuhisi Cana Coaunera coitucuhin esenetaera ne,” naain coitucuurure cachaauru. Jana esinaae rauhijiriin Cana Coaunera coitucuhin esenetaera nihanete, quiricha cuhane aitoha Cana Coaunerane rijijieein ichaa cachane laaen esenetana nainichaache. <sup>19</sup> “Cana Coaunera coitucuhinu canu,” naa chuneine, caohacharia niqui Cana Coaunera esenetaane niqui, nete nechu aansai ataibinaaecuru coitucuhichuru niha natiin, niha Cana Coaunerane esenetaain que casihure nere tonoraarenihane coreniha, acaauru casetecarihani Cana Coaunerane coitucuuruhane jaun. <sup>20</sup> Niicha jerei ichaelanaala, raujiaain esenetaa cachane rarihaain Cana Coaunera. Tana nii coitucuhin neeiche ne.

<sup>21-23</sup> Coaraauna chuhinti nii coitucuhichene tocohaneein, nihei leinjiinejeein canaanai sirilanaala biinaa niha Abaraaunne jana jetaote, “Inae nerichaain ichai leinjiin canaanaicha,” naa Cana Coaunerane jana, esenetaa Abaraaunne jaun, laenaeratelu quiricha inoasi cuhane Cana Coaunera. Nitohaneein Cana Coaunera esenetaa Abaraaunne jaunte, caohachaaain rae Cana Coaunera. Nii baihate Abaraaun coujuhin coarae Cana Coaunera, nechu jataaen coujuha, “Carai nii acaihanejein leinjiin nena ichalabi Isaca uhaain, sohin mocoo carai,” naa Abaraaun rai Cana Coaunerane jana, nere tonoraain calaohi sohin jaohane coina, inae anojoan mucuha Abaraaunne jana: “Ichalabi sohin jaohine coataa, caa carenero soora. Coa canaanai sohin jaohara. Esinaete chuhisi quesenetaain quere tonorana jereeina jaunte, caohacha ichaacha,” nae Abaraaun rai Cana Coaunera. Nitohaniha Abaraaunne jaunte Cana Coaunera belaichaneein Abaraaun curuaateure satiin cana inoaesihuru.

<sup>24</sup> Jerichanejeein techu coitucuhin, nere tonoraain, caohacha ichaain nenaacauru rae Cana Coaunera. Coatiha raujiaain esenetaaneecha coreniha nihei.

<sup>25</sup> Charijieein teeinti ai leinjiin ene- Raba neein curuajaain nena, jaurihanejeein jaelorohe neein nihane jianein, esinae Cana Coaunera coitucuhin esenetaane jaun, coroatajaniha Cana Coaunerane que tonajelanaala, nihei chaque casilanaala Jericoo turuuruha coroatajai Israaeli cocoaichacurune jana, coitucuriin arinajaauruha sohin jaonajaauruhane coina Raba araichurune jana, acaauru coasilanaala nii coroatajai Israaeli cocoaichacuru asi loreri asaae teein Raba, sohin jaonajaauruha Jerico cocoaichacuru Cana Coaunera coitucuuruhine coataa ichoteratenajae.

Nitohaneein caohacha icharate belaaain rae Cana Coaunera. <sup>26</sup> Esinaae rauhijiriin Cana Coaunera esenetaerate, nere tonoraain naitoonjoan ichaain ne. Jana “Cana Coaunera coitucuhinu,” naain iriha natiin Cana Coaunera jerenohi ichaelanaala nenaate Cana Coaunera coitucue. Nitohanein niha cachane coatiha ichaonaa chabana sanaacharanejeein nena ranaa nainerinaain.

### 3

#### *Caaintaeniha baaso que iriha cachene*

<sup>1</sup> Cana Coaunera ere benaa que cacha relaera neein nena jeriquichene caohachaaain aonacuche. Nelatihei joareein cacha, caohachaaain suujua coarae lanaala Cana Coaunera ere benaa que arajiin enonaa jerihane. Nite nere aohanraauru ichoaae jaucotojoeriin caseteco coaraa cureein, nii cacha rai beebjihane rijijieein Cana Coaunera ere tonoraenihane.

<sup>2</sup> Inaajoan sanein chaainti Cana Coaunera rai baaso que nesarucuaache satiin. Chaen techu inaajoan sanein chaainti baaso que irihacache, jerenihacache neniha natiin. Nihei caaintiaai baaso que irihacachene. Chateeinti tonaain baaso que erene. Niite itolere neein caohachaaain ichaonaa naine.

<sup>3</sup> Aonacuche. Tasinojoan cabario natiinte nujuae cuhane coata laajoiri teein, que raujiaeraujiajeein jerichaane jaan jelson rauhijiriin amaaca. <sup>4</sup> Jerichanejeein techu timoon laajoiri que, jerihanajaan jelson raujiaeraujiajeein rauhijiriin bote seejoan niha natiin amae timoon inaera. <sup>5-6</sup> Charijieein teeinti ocoana mocohaca fosocoro busi laajoiri quene, nii fosocoro busi laajoiri caje necoaaunaain tabaain neleereein, jitariin ocoana mocohe nii usi. Nii rijijieein techu chatohaneein, cacha cunaitaain cacha itajenaa nainere baasoneein cana ujuae caje mitunaa cana ere, chatonaain, cacha inauhene cunaain cacha janoriteein nihaca ne. Moconajaerate nii que cana saruhin ne, nitohaneein usi tabai que cacha sarueranihane jaun.

<sup>7</sup> Caaintatohane sainejeeinte, itolere nunaana nenacaauru, itolere tajaecuru, itolere atanichoaae teerei cana lenone, itolere ataibinae, janolari, acano, itolere acauhana nenacaauru, taji, itolere cautenu rijihuru irilaure irilaeraauru. <sup>8</sup> Nete chunei, rai nere baaso jianein nena nainene. Charijieein teeinti cacha calaa acanone nii acano catu caje cuhin, nii cacha coichana lomoha nii acano catu corane, ohe nii acanoacha calai. Nii rijicha cana suujua baaso caje coauneein, cana ujuae caje mitunaa cana ere, leeochoauru cana laurijiracuru, naajoainunri jitariin aasaecane jaun.

<sup>9</sup> Nii jeelai cana suujua baaso, cana ujuae caje mitunaa Cana Inaca Cana Coaunera coroaecaachene jaan quete rijijieein niicha counanojoneein nihane baiteein, “Cha quete nelatere caa cacha,” naain irihacache obajeein cacha aina nererojoecaacachene, “Coaraain nainaaine caa aansai,” naain irihacache, coaraain cuu necairichaane coina, chatohaneein necairichaa cachane coaracaachene. <sup>10</sup> Nii jeelai cana ujuae caje mitunaa quete, Cana Coaunera coroaecaachene jaan que techu cachaauru cotaihacache. Caohachaaai nitohaneein nihacachene, canejeaauru.

<sup>11</sup> Charijieein teeinti le curuhacha caje mitunaa nainene acau ichonai, acau elonai, naajoain. Nii rijijieein techu cana suujua cuhane nefaa baasone, erenaa caohacha que erenaa nainenihacache.

<sup>12</sup> Charijieei teeinti leeocho enuha inaaque inaana nainene *iquera*, nihechu acau cotebei nihana natiin ichonainein nerotona nainihe. Nirijieein techu caohacha que erenaa nainene cacha, baasoneein niha rai suujuane.

### *Cana Coaunera coitucuhane coaratihaa cachane*

<sup>13</sup> Esinaae rauhijiriin Cana Coaunera jerenohi coitucuhin neeichene, inara suujua coaraain, leeocho cachaauru rai caohacha ichaain, itolereneein caohachaaain raotojoeein neeuchete, esinaae rauhijiriin Cana Coaunera jerenohi ichana coitucuhichene coaracurumiin cachaauru. <sup>14</sup> Jana inara leeochoauru que necoelaain, inara suujua cuhane obajeein, inaraacha jerei ichaquichene, “Cana Coaunera coitucuera nihanu,” naain coa raotiin nena coaucache. Niite laen nohanenaa ne, Cana Coaunera esentaenihana jaun. <sup>15</sup> Nitohaneein neeichenete Cana Coaunera coitucuruhi cachaauru rijiriquicheein. Acaaurute nitohaneein coaucure, nitohaneein acaauru suujua tiha Moconajaerane jaun. Nihei leeochoauru cachaauru aina, ita belaiha cachane jerihe Moconajaera. Moconajaerate ita belai lanaala, itaque nejeratiha cachane jere. <sup>16</sup> Nenainetiin rai caohachanuhacha que coacuhin nenacaauru cachaaurute, ita que nererojoecaain, ita que necoelaain naajoaauruhane jaun, nainecurene ita belain

leechoaauru cachaauru aina caohachaaain nenea nainecurene. <sup>17</sup> Nii Cana Coanera coitucuhin nenacaaurute, nejelauneein caohachaaain ichaaore. Cana Coanera ere tonoraauruhana jaunte, caohachaaain ichaaore, rai caohachanuhacha que coaaucuruhane jianeein, leechoaauru belaaain, ita belaaain, ita que nererojoecaelanaala, inae nohanelanaala, leechoaauru coroatajaneein, cha latiha leechoaaurune teein, suujua coaraain, naajoaain neeuruhana jaun. <sup>18</sup> Nitohaneein neeichenete, Cana Coanera jerenohi ichaaechajeein, nauruta naurutaain cuujeein, jelai choaae jauhecotojoeriin caohachaaain ichaohichene, ita aina, leechoaauru, naajoainunri ainane coaraanete, raotojoein nereein inara aina Cana Coanera. Acate inara suujua cuhane raoti ichaonaa esine tereein, rachoojoein neeichene coina. Nitohaneein raoti ichaonaa esine que ichaohichene, coaracuruha leechoaauru nete, acaauru netonai nii inara rai raotojoein ichaohichene jaan ichaonaa esine teera Cana Coanera, ere tonorana jerecureein.

## 4

### *Caa chauratane que nenea baasohacha jereein sacuha cachane*

<sup>1</sup> Nitohaneein Cana Coanera jerenohicha, ichana coacuhincha ichae lanaala, inaraacha jereeicha coaauquichene jaunte, ita que nejerateein, ita que nererojoecaaain neeiche, leechoaauru aina ita belaaain neeichene jeriha Cana Coaneranane niha natiin. <sup>2</sup> Cha teeinti chaaelai sirihane jana, inara rai nenihane que necohelaain, nii niicha sirii rucuhele coreniha que nererojoecaaain cotaain, coaraain inae nii niicha sirii basijiauhichene jana tonaa nii nerorane, inae coreniha sonaa coacuhin que nererojoecaaain, tabaque sohin jaohin, naajoaainche, cha lateein neeichene Cana Coanera caje bajaanelanaala. <sup>3</sup> Tabaque bajaachene niha natiin inara rai terihaain Cana Coanera, niicha jerei ichana coacue lanaala leinjiin inara raihuanha que bajaachene.

<sup>4</sup> Cana Coanera coitucuuruhi cachaauru. Tana caa chauratane que nenaacha jereein sacuera cacha, Cana Coanera que nejeratenaa neein nihane coitucuhichene. Aihane jaun chunocoha caa chauratane que nenacaauru jereein Cana Coanera aitoonjoan que jaolequiin nenaate Cana Coanera que nejeratiha aicheein. <sup>5</sup> Nii que nainaquichene jaanu quete quiricha inoasi cuhane, laenaera que laenaerateein aitoha Cana Coaneranane rijijieein, esinaae rauhijiriin aitohane rijijieein inetono janonaa bana inara suujua letonohacha ichana jerequiche. <sup>6</sup> Nete jataain cana belaihane jaun, itolere janonaa bana cana coroatajane Cana Coanera, rai Quiricha Inoansi cuhane aitohane tocohaneeinte que ninichaaajenaa tocohaneein rai baaso icharaauru que nejerate Cana Coanera. Jana esinae rauhijiriin esenetaain nere tonoraeraaurute belaaain coroatajane Cana Coanera. <sup>7</sup> Nitohanihana jaun nelararajiaauche, Cana Coanera ere tonorana que. Atiin nii Moconajaera sitaauchete inara caje amuhine. <sup>8</sup> Aihana jaun, Cana Coanera rai caohacha rene nichuuntaain Cana Coanera jerenohicha ichajeein ichaaooche. Aihute inara rohan neeine Cana Coanera. Enate ichaonaa baaso que ichaohiche. Nii jaun Cana Coanera bajaacha. Aihute inara suujua rucujueein, baasoneein neeichene caje jianacoo inara mitaain, inara coroatajanemiin Cana Coanera. Aihute nii baaso ichaquichene jianeein itolere bana Cana Coanera jerenohicha ichaquiche. Aihana jaun cajihaneein inara suujua coaraquichene jianecuche. Coa cajihaneein inara suujua coaracache. <sup>9-10</sup> Cana Coanera jerenohi ichaquichene jianeein neeichene coejeein, inara jaberoco coinaderaain, baaso ichaain neeichene coitucuhin,

rauhijiriin suujuelanaala beein Cana Coaunera bajaauche. Bajaachenete inara coroatajanereein jeelai choaae jauhecotojoeriin Cana Coaunera.

*Cunaain nejera coacuhin niha cachane*

<sup>11-12</sup> Canejeraauru jiaonriha cunaain ita coacuhin, ita janoriteein neeichene. Chunei Cana Coaunera coreniha rai nejera inauhene nejerateein ne-naate Cana Coaunera rai baaso ichareein. Inasiina Cana Coaunera colaihaje tacaain nejelaauru ichao coaraain, “Acate naajoaain ichoae,” naain coulurujuera rijitiin ereriquiche. Leinjiin Cana Coaunerate laen, chatohanein baaso ichaain, caohacha ichaain, naaonjoaain ichaonacaauru coaraain, nii que, “Acaauru acaaurute, naajoaain jataaen baaso ichaechajeein ichaaore,” Jana, “Acaauru acaaurute laen caohachaain suujua coaraain caohachaain ichaaore,” naain cacha ichao coitucuhin que erena naine. Aitoha quiricha cuhane Cana Coaunerane tonorae lanaala, leeochoauru ichao coaraain coulurujuera rijitiin ereeichenete, chatohanein inara itajeein, chatohanein inara tenaa nainereein Cana Coaunera. Aca techu chaen naine, jianacoo baasoneein neeichene caje inara mitaane.

*“Naa Joanrichaain eresi,” naain coitucueniha cachane*

<sup>13</sup> Tabaaurute, “Naa joain neseuna cureeunni, cuu amihanenaa que necoreteein coriqui taojiaa,” naaure. Caohachaaai nitohanein coaquichene. <sup>14</sup> Niheichu, “Naa joanrichaauuni eresi,” naain coitucuheehiche. Inoaelu netojoein inoo tejian ichaoriquicheine coitucuhiche. Tana janoneecha mituhin nii baiha nitajiha suruaa neejojaine rijiicha inara ichaone coitucuhichene. <sup>15</sup> Raujiaaincha caohachaain coaucuche. “Cana Coaunera jerihanena ichaajoihanune caa ichaain, leeochoa ichaain, naa joanreeunni,” naauche. <sup>16</sup> Nii inatiinte chaelai nihane coasitaain ereehiche. Caohachaaai niritiin irihacane. <sup>17</sup> Cana Coaunera jerenohi coitucuhacache natiin, nii canaacha coitucuhi caohachaain ichaenihacache nete osa tabai que nesarurihacacheein.

## 5

*Caseteco coaracuurrichaaain cairichaihuru cairichaurera coriquihonaaurune*

<sup>1</sup> Aonacuche satiin coriquihona neein nenacaauru, nii que caohachaain casiin neeichene coina. Tabai inaderanaa caaunte chanaa curiquicheein, ecu tihane bana necairichaa curiquicheeina jaun. Satiin nii inara coriqui aina caohacha nainejeein nitajeeichene coina, tururichaaain Cana Coaunera jaun. <sup>2</sup> Inara coriquihona neeichenete arajiin coriqui jaohiche, leinjiin inaraacha latei corenihacha. Nihei chaque nelaterinaain nii inaraacha sirii rucuhele. Nii inaraacha rucujuei rucuhele nacodohaqui, nii inara coriqui, inara cajione, inara lenone nacodohaqui, nechu inacojoein nelaterinain, coroneein setuhin naa joanrichaaine jaun, chaen quirichaaain cojoanone jaun. <sup>3</sup> Coriqui niha natiinte, caohatiin rucuhequichene niha natiin nitajiha cureein.

Inae saa cana janonaane banate satiin baaso icharaauru itajeratereein usi tabai que Cana Coaunera. Nii banate, nii nacododojoanei acaauruhacha rucujuei rucuhele, chabana lateein neeuruha cairichainein nenacaaurune, acaauru coroatajanein, naa joaunrenihane coaraane jaun, nii coreniha coriquihonanein nenacaauru casetecareein Cana Coaunera. <sup>4</sup> Nitohanein cairichaihuru cairichauruha acaauru amihaneeo corete lanaalanete rautaene jataain Cana Coaunera. Cana Coaunerate jana, nii

cairichaihuru cachaauru cairichaaeriin neeuruha coriquihona neein n-nacaaurune coaraje. Nihei chaen aohana jerecuruhi rai namihaneon coreniha aitocuruha cachaaaurune. Cana Coaunerate laen aitocuruha cairichaihurune aonaje.

<sup>5</sup> Satonote raotojoein caa chauratane que ichaohiche, itolere inaraacha latei que nerujueleteen, nete inae nii coreniha inara que, nii core coaratiha cureein Cana Coaunera inae cuutihane bana. <sup>6</sup> Joaereein lera colane cairichai cha coitucuruhi cachaauru sohin jaohin naajoaache, inara rijijieein neeurinaauruhane jaan que airijiin. Nii corenihate inara casetecaain, jataain inoaelu netojoein inara cairichareein Cana Coaunera.

*Cana Coaunera bajajeein raotojoein cohacuruhine Cana Coaunera coitucuurera*

<sup>7</sup> Nitohaneein cuu tihane bana nii core coaraterichaaain Cana Coaunerane jaun coa nererojoecaache. Nii inara cairichaaurera aina abaantaain, turuha Cana Coaunerane reeintiaain cohacuche. Charijijieein teeinti, nocoana-jaauruhane, temule jaauruhane, omarohin nihane cohajeeure, inacaain, tainacaa que turuhane taihuruhane coina. <sup>8</sup> Nii rijijieein turuha Cana Coaunerane reeintiaain cohacuche. Jiaonriha Cana Coaunera ere tonorana jianiquichene. Atiin cohacuche, inae carajarinaain turuha caa cana rai chauratane que Cana Curuaanaa Jesocurisitone. Nii coreniha atiin inara suujua laraajiaain, Cana Coaunera ere tonoraain sacuuche. <sup>9</sup> Canejeraauru jiaonriha ita que inara suujua rerohecaain ita que nejerateein neeichene. Nitohaneein neeichenete inara casetecaeratererein nii rucueraaunu que nena, nii turuha uhenenu Cana Coaunera.

<sup>10</sup> Chatohaneein necairichaaichene niha natiin, charijieein teeinti aichejetecurelu *profetacuru*, nii rijijieein neeuche. Inoaelu aitiin acaauru letohaa Cana Coaunerana jaan que, cachaauru rai ereerejeein beebejeeure, jataain necairichaaauruhane niha natiin. Nii necairichanaa abaantaain, nihei Cana Coaunera ere beebejeeuruhane janelanaala, nii aihuruhalune rijijieein nihacachenete caohachae. <sup>11</sup> Acaaurute jataain caohatiin neeurelu Cana Coaunera aina. Coaraauna chuhinti, nii inara netonai coitucuhichene tocohanein jetao, tabai inaderanaa que situhin nihalu Joobe ne. Nii baiha caohacha icharichaaain rai Cana Coaunerane esenetaana jaunte, nitohanein jeelai amuritoheriin coroatajaniha Cana Coaunerana jaun, enacoaunein calaojoiin, cacunuquiin, baca siriin, caohatiin raoti ichaonaa que ichaohin nelu Joobe. Aiha Joobene rijijieein necairichanaa abaantaain, inara coroatajanerihani Cana Coaunerane coitucuhin esenetaain neeuche.

<sup>12</sup> Caohachaaain aonacuchena inara rai aite. Baasoneein ichaonaa corihaaichena jaunte joaenreein, “Cana Coaunerate coaraje. Acate esinae aitocooaunne coitucue,” naain esinae rijitiin nohaneiche. Coa niritiin nohanihache inara casetecaa Cana Coaunerane coataa. “Icharichaaunni,” naain chaelai que ereeichene ichacuche. Jana, “Coatiha icharihaaunni,” naaichene coa ichacache. Jiaonrihachu chaen, “Cana Coaunerate coaraje,” naain nohanenaa coaauquichene, nabana inara casetecaa Cana Coaunerane coataa.

<sup>13</sup> Chatohanein necairichajeein niha chuneine, Cana Coaunera bajaaine. Jana chunei inae raotojoein nihane, rachoojoein Cana Coaunera coroaeein nenatemiin.

<sup>14</sup> Chatohanein cunaitiha chuneine, Cana Coaunera coitucuurera ichauhenaauru cotihacuchete, erene que rujuaain rai Cana Coaunera bajaauruhinete, nii cunaitenaa rautaaine Cana Coaunera. <sup>15</sup> Esinae rauhijiriin, nii cunaitenaa rautarichaaain Cana Coaunerane esenetaain

bajaauruha nete, nerautareein nii cunaitenaa. Aihute, chaen chatohaneein osa que nesaruhin nihane niha natiin, atiin que suujua acatena nainemiin Cana Coaunera. <sup>16</sup> Nitohanihane jaun, chatohaneein baaso ichaain osa que nesaruhin neeichene suujue lanaala ita rai been, ita rai Cana Coaunera bajaauche jiniiquiin. Nii banate, chatohaneein baaso ichaain osa que nesaruhin naajoaain neeichene niha natiin, atiin inara que suujua acatena nainereein Cana Coaunera. Caohachaaain nere tonoraera caohachanejein cacha bajaa nete tonorae Cana Coaunera.

<sup>17</sup> Coaraauna chuhinti Cana Coaunera ere bera inoaesi Irihasi. Cana rijijieein cacha neein niha natiin jetaote, uheniha elone coina Cana Coaunera bajaane jana, nichata jaanaca cataaun tiaajoaain uhene elo aansijieeinijin.

<sup>18</sup> Nii baiha coaiteen Cana Coaunera bajaa Irihasine jana jetaote, elo letoae Cana Coaunera, atane setejaane enacooauneein omarona nainiha temulene coina.

<sup>19-20</sup> Aonacuche, saatono neeina inara rai aitoreeunni. Chunei baaso ichaaechaejeein ichaoha Cana Coaunera baiteein inete, ohane bana cuhanete nereein necairichana jaun, cuu nitajihane coina. Nihei nitohaneein chunei casetecana jerihe Cana Coaunera niqui. Esinae Cana Coaunera esenetaera neein nena tocohaneein, nii Cana Coaunera esenetaauruhi rai ereein relaacachenete jere Cana Coaunera, Cana Curuaanaa Jesocurisito naajoaain, acaauru netonai Cana Coaunera esenetaain nere tonoraauruhane nii baaso neein neeuruhane caje roconajaain ranajaa Cana Coaunerane coina. Chaen techu tabaauru Cana Coaunera coitucuurera, inae nere baiteein baaso ichacure. Nabana caseteco coaraa nii Cana Coaunera baiterane coataa, caohachaaain aina ereein coroatajanecuchete nacoaauneein Cana Coaunera ere esenetaain tonoramiin. Nitohaneein osa que nesaruha namute cachane jana, Cana Coaunera rai caohacha que namute cacha suujua raujiaain nenaate, osa que namuritohane niha natiin que suujua acatereein Cana Coaunera.

## Fedoroacha letoi leinjiin

### *Inara coaaucaun.*

<sup>1-2</sup> Canuna Jesocurisito letono afosoto Fedoro neeun. Inae jauriaalu caje coauneein coausihalu cana Inaca Cana Coaunerane rijijieein nii niicha ranojoinequichene, Poonto, Galasia, Capadosia, Asia, Bitinia, naaonjoainuri batane que cuhin inara atane udaa riaanein neinequichene raine caa quiricha laenaain letoaaun. Nitohanein rai cachanein naitoonjoan tonoraain neeichene cointate, jelai teein rai Suujue que inara suujue teein, Calaohi Jesocurisito coichana aina cuaain inara coulucohin inara raain nelu. Aihane jaun, jeelai amuritoheriin inara coroatajanemiin Cana Coaunera jiniiquiin raotojoein neeichene coina.

### *Itolere bana canaacha cohajei ichaonaa*

<sup>3</sup> Cairichaaajoaain cana coaraain, cana coreniha ohane baiha caje ichanaa Jesocurisitone aina cuaain, nacoaaunein ena nejanoaain nenea rijijieein nenea jaun, cana Curuaanaa Jesocurisito Inaca Cana Coaunera coroaecaachenete ne. Nii Cana Coaunerate itolere bana canaacha cohajei ichaonaaaja terein cana rai. <sup>4</sup> Chaen techu aca inara que banihatein dedeeu Cana Coauneraacha rucujuei- nii ichaonaa caohacha inaraacha cohajei terein. Nii inara rai niicha teeni nii chatohanein nitajenaa nainerinaain. <sup>5</sup> Nitohanein esinae rauhijiriin inara ichoteraterichaaain Cana Coaunerane esenetaain neeichene jaunte, niicha ichana nainei ichaain inara be- raicheein, jianacoon neein nii inara ichoteraterichaaaine jaan que turuhichene, inara que banihatein niicha rucujuei coitucueratiha inae ecu tihane bana inara quene coina.

<sup>6</sup> Nitohanein neriquicheeine jaunte, raotojoein rachoojoein neeiche ena, itolere que coujunojoneein cairichanojoneein neeichene nihanatiin. <sup>7</sup> Charijieein teeinti usihanau oro teein mocoore caje mituha baasone coina, nii rijijieeinte inara netonai coujunojoneein neriquicheein. Inae nitohanein coujunojoneein coanojoneequichene jana, itolere necairichanaa abaantaain, inara sarunaa jeriha moconajaerane tonoraelanaala, itolere que laraajiin neeichenete, nii jataain coreti- nitaje rai nenea oro amurijiriin nelateineein neriquicheein. Nitohanein coujunojoneein neeichene abaantaain laraajiin neeichenete, coroaenojoneein neriquicheein inae turuha cana Curuaanaa Jesocurisitone bana.

<sup>8</sup> Coatoha niqui charijibana Jesocurisito coaraain niheeiche inara. Nete coara rijitojoein jataain belaaain coroaeein rachoojoein neeiche. Chaen techu, "Naaonjoaan," naain inara ere nejesinaacha que benaa nainiheeiche, jataain necaohachanaa nihane jaun. <sup>9</sup> Nitohanein inae ichoteratenojoneein niha inara suujuene jaunte, raotojoein rachoojoein neeiche. Nitohanein neeichene cointate Jesocurisito esenetaain neeiche.

<sup>10</sup> Nitohanihane cointate inoaenlu caje coaunein jianacoon cana ichoteraanu que cuaain caohachaaain coitucuuruhane coina que nerelaain, cairichaaajoaain cana coaraain ichoteratenojoi nichaachene jaanu terichaaain cana rai Cana Coaunerane beebejerejetecurelu *profetacuru*. <sup>11</sup> Nitohaneinte inae jauriaalu caje coaunein *profetacuru* que coitucueratelu Jesocurisito Suujue, ateinaauruhane baiha nacoaaunein ichanaain rai caohacha icharaanu que tiha Cana Coaunerane

coitucueratelu. Nii jaunte niqui: “Charijicha nii aicheein. Chatohanai banacha aicheein,” naain niqui coitucunaa jerecure, acauru que coitucueratiha Cana Coaunera Suujuene jaun. <sup>12</sup> Nete acauru raineein nenerihani nii Cana Coauneraacha beratenojoi- inara rai caohachanein neeninu coitucueratelu acauru que Cana Coaunera. Nii jaunte nii ichoteratenojineein neeichene jaan, inae inara que coitucuerateeure nii Ena Nena Cana Coaunera Ere beracuru dede caje letononeein nena Cana Coaunera Suujue aina cuaain. Niite niqui jataain caohatiin coaraain coitucunaa jerecurelu Cana Coaunera letono anjerauru netonai.

*Esinae rauhijiriin aca jerihane rijijieein ichaonaa cointate cana cotijiaain ne Cana Coaunera.*

<sup>13</sup> Nitohanihane jaun jatoraaain niicha que coacuhin coujurihu inara suujua coaraain, nacoauneein turuha uha Jesocurisitone jana inara rai Cana Coauneraacha tenaa jereiicha que jaeequiin neeuche. <sup>14</sup> Coujuriu Cana Coaunera calaohineein nena tocokanein naitoonjoan tonoraain neeuche. Jiaonriha jauriaalu Cana Coaunera coitucuelanaala inara suujua letono rijijieein ichaohichelune rijijieein ichaohichene. <sup>15</sup> Nitohanein ichoaelanaala, Cana Coauneraacha que banijiaaieein saantoneein ichaaoche, nii inara cotihara acaihanejei Cana Coauneraacha Saantoneein nihane jaun. <sup>16</sup> Nitohanihane jaunte rai Quiricha inoansi cuhane: “Acaihanejei inara Coauneranein Saantoneein nihanune jaun, canu que banijiaieein saantoneein leinjiin canuhacha cachanein ichaaoche,” nae Cana Coaunera.

<sup>17</sup> “Cana Inaca Cana Coaunera,” naaiche Cana Coaunera quene jaun, aca chuni ichotelanaala canaacha ichai caje cana ichao coaraain rucuhanein nihane coitucuhin esenetaain ichaohichene coarateein ichaaoche, jaiti cau chauratane que ichaonaa que neein.

<sup>18</sup> Inara foerateracuru ichao rijijieein nii chaque nelatelanaala nitaje rai nena ichaonaa que ichaohichene janate, inara ichoteratelu Cana Coaunera. Nii jaunte inara nii nitajerai nena oro, coriqui, naaonjoain que coretenohineniha nii inara ichaone raotojoein coitucuhiche. <sup>19</sup> Nitohaneinte caohatiin chaeloon baasoneerilanaala nena carenero narejeen sohin acauru osa coreniha coichana terejetocuruhalu cana inoensihurune rijijieein, nii chaeloon osaojoejelanaala nena Jesocurisito sohin, coichana jataain necaohachaain nena que coretenojineein ne nii inara ichao. <sup>20</sup> Inae nitohanein cana coreniha orichaaine cointate jaiti necoanaeniha cana rai chauratanene ajiniha caje coaunein nesilu Cana Curuaanaa Jesocurisito. Nii jaunte inae ecu tihane jaun jeriha Cana Coaunerane jaun, nii bana inara caohachanu que ecocohin nelu. <sup>21</sup> Jesocurisito aina cuaainte, nii oo caje ichateein rai caohacha icharaanu teranein nena Cana Coaunera coitucuhin esenetaain neeiche. Nitohanein inara coroatajaneranein niha Cana Coaunerane jaunte, leinjiin acaacha cohajein que jaeequiin neeiche.

<sup>22</sup> Inae nitohanein Cana Coaunera beratenojoi esenetaain tonoraain neeichene jaunte, inae couluunojineein ne inara suujue, jataain inara suujua aina cutaain jiniquiin Jesocurisito ranojineein nenacauru canejerauru aina ita belaaain neeichene coina. Nitohanein le cacha nequichene atiin ita acatiha tacaain, inara suujua aina cutaain ita belaaain neeuche, nii baaso coacuelanaala. <sup>23</sup> Enate nacoaunein nejanoaain nena rijijieein neeiche. Coatiha cacha onaa inaeranein nena jaberoco caje nii nejanoaheiche. Cana Coaunera Ere chabana nitajenaa charanejein satonoelanaala nena aina cuaainte nii nacoaunein nejanoaiche. <sup>24</sup> Nitohanihane cointate: “Satiin cachate nejanoaain fojoein ichauchenanein inae biinaanihane ohe.



<sup>25</sup> Nete laen Cana Coaunera ere nii charijibana satonoelanaala nereein,” naain laenanohineein ne Cana Coaunera Quiricha cuhane. Nii inara rai beratenojineein nena Erenaa esenetaaichene jaunte, inae ichoteratenojineein neeiche.

## 2

<sup>1</sup> Inae nitohaneein ichoteratenojineein neeichene coina, inara rai beratenojin Erenaa esenetaaichene jaun, jauriaalu baasoneein ichaohin inara amute cacha cairichaa nohaneein, necoelajauharitiin, inara amute cacha cotaairiichene nihanatiin belaicha rijitjoein rai ereein neeichene coarateein neeichene jianein neeuche. <sup>2</sup> Aiha ena nejanoanaa canaanai ujuari, itaariicha que coacuhine rijijieein, Cana Coauneraacha jerei que coacuhin, aca jerihane rijijieein ichaohin, inara suujua ilaauhete ichoteratenojineein neeiche. <sup>3</sup> Nitohaneeinte neriquicheein, esinae rauhijiriin caohacha teraneein niha Cana Coaunerane coitucuhin esenetaain neeichene.

*Ajeri neloheriteeuruhane jaan rijiicha Curisitone que cuaain acaauru relaa Fedorone.*

<sup>4</sup> Nii Cana Coaunera rai ajeri ichaohin nena Jesocurisito, nii chaque nelatihei rijijieein jaolecohin neeuruhalu Isaraelitaacurune jaancha que coacuhin raaicha nelateein neeuche. Nitohaneein nelatihei rijijieein coaracuruhane sainejeeinte, ajeri ichaohin jataain itolere que nelatineein janijiin Cana Coauneraacha tenojineein nena ne. <sup>5</sup> Nirijieein techu esinae rauhijiriin aca jerihane rijijieein ichaohichene- ajeri ichaohin nena caje Cana Coaunera lorerineein ichanohin Teenforo rijijieein rai saseredote esine neein Cana Coauneraacha jerei ichajeein saantoneein neriquicheein. Nete inoaenlu aichejetocuruha saseredotecurune rijijieein, carenerocuru sohin coichana teraneein nenereicheein. Inarate Jesocurisito aina cuaain Cana Coauneraacha jereineein, rai cachaauru sujuateraneein neriquicheein. <sup>6</sup> Nitohanerichaaine quete:

“Sioon neseeune, ajeri jataain nelateinnein nena quiicha janijii teeun.

Aihana jaun esinae rauhijiriin

caohachaniha nii ajeri quiicha teeine coitucuhin esenetaain nena que chabana jaolecorinaauni,”

naain laenanohineein ne Cana Coaunera Quiricha cuhane.

<sup>7</sup> Cana, esenetaera nichaachene rai nii Cana Coauneraacha tei ajerite jataain nelateineein ne. Nete Cana Coaunera Quiricha cuhane laen nii esenetaelanaala nenacaauru que:

“Jaolecooruhane loreri icharaaurune jaan ajerite,

loreri nunuheneein temuraneein nerotoha cureein.

<sup>8</sup> Acate leinjiin ajeri jaberoconeein

lacurocuruhane jaaneein nereein,”

naain laenanohi nihane rijijieeinte, inae lacurocure, nitohaneeuruhane coina inae ichanohineein neeuruhane jaun.

<sup>9</sup> Nete inara le lauriineechene, Cana Curuaanaa rai saseredoteneein niicha janijineein, Cana Coauneraacha jereineein rai cachaneein neeiche. Nitohaneeinte inara raain nelu Cana Coaunera, jataain rai caohachaneein nena niicha beratei beeiche leeochoauru raine coina. Acate nocohenaanau nena rijijieein neeichene jana, inara cotijiaain nelu, rai caohachaneein nena Cojoanona que neeichene coina. <sup>10</sup> Jauriaalu niqui cairichaojoaain inara coaraain niheilulu Cana Coaunera, rai cachaneein neneeichene jaun.

Nete inae enene rai cachaneein neeichene jaun, inae cairichaaajoaain inara coarae Cana Coaunera.

*Cana Coauneraacha icharatei ichajeein ichaaoche*

<sup>11</sup> Canejeraauru, atiin inara suujua coaraain, inae nejelau cachanequichene ichao que ichaaoche, nabana nitajiha inara suujuene coataa. <sup>12</sup> Cana Coaunera coitucuelanaala nenacaauru aina neeichene nihanatiin, coujurihu Cana Coaunera coitucueraneein neeichene coarateein neeuche. Nitohaneein ichaohichenete, baaso ichara niha inara beeuruhane nihanatiin caohacha ichaquichene coaraain Cana Coaunera coroaecurureein, inae le cachaniquichene caje inaraacha ichanohi rucuhecane cojoanonaa que turuhane bana.

<sup>13</sup> Inae Cana Coaunera cachaneein neeichene jaun, satiin inara amute cachaauru- cocoainanacainein nenacaauru ere tonoraain neeuche. Chaen leeochoauru cocoainanacaihuru amuritoheriin cocoainanacainein nena enferadoro ere tonoraain neeuche. <sup>14</sup> Nii rijijieein chu nii rai letonocurubaaso icharaauru casetecaain caohacha ichaeraauru coroaeranein nenacaauru ere tonoraain neeuche. <sup>15</sup> Nitohaneein neeichenete jere Cana Coaunera, nabana tonaain ereeuruha inara que caohacha ichaera cacha nocoeje chanuheriin ichaonacaauru aina cha coitucuhichuru cachaaurune coataa.

<sup>16</sup> Inaraacha jerei ichana nainequiche niqui. Nete laen nii inaraacha ichai aina cuaain naineneeiche leeochoauru rai baaso ichaquichene. Aihana jaun coujuriu Cana Coaunera cachaneein caohacha ichaain neeuche. <sup>17</sup> Satiin que inara suujua acatein jiniiquiin ita belaaain- jeriha Cana Coaunerane rijijieein neein- enferadoro que inara suujua acatein neeuche.

*Cana relaeranu que necairichaaain nihalu Curisitone*

<sup>18</sup> Nitohanihane jaun rai fatoroon ere tonoraain aca jerihane rijijieein neeine letononeein nena. Jiaonriha caohachaaain belaaain aca jerihane rijijieein siriha fatoroone jauhancha nere tonoraain nihane. Nechu aansainein cotaitiin niha fatoroone nihanatiin nere tonoraain neeine. <sup>19</sup> Jeriha Cana Coaunerane rijijieein ichaohacachene coreniha, lera colane rai cacha nihacachene corenihacha cana casetecaain cana cairichaane nihanatiin, jianelanaala abaantaacachenete jataain caohate. <sup>20</sup> Jana esinae rauhijiriin baaso ichaquichene coreniha inara casetecaain neeuruhane abaantaain neeichene, coatiha caohacha ichaa airiheicheein. Nete laen caohacha ichaquichene coreniha, inara casetecaain inara cairichaeranihane, soroelanaala abaantaachene Cana Coaunera notaracae caohacha ichaa airiquicheein. <sup>21</sup> Nitohaneein neeichene coinete, inara cotijiaain nelu Cana Coaunera. Inara coreniha necairichanaa abaantaain nihalu Curisito inara que coarateeine rijijieein, inara netonai necairichanaa abaantaain neeuche. <sup>22</sup> Coatiha niqui aansijieeiniji osa que nesaruhin nihei chuni coritaain niheilulu Curisito. <sup>23</sup> Niheichu nocoejechanuuruhane nihanatiin coatiha acaauru nocoejechanuhin nerejetohilu. Niheichu cairichaaauruhane nihanatiin tonaain ereein nerejetohilu. Cana Coaunera esinae rauhijiriin baaso icharaauru coitucuhin nii rucuhecane coinaachate aitoraaetelu. <sup>24</sup> Nii Curisitote jaberoco aina cuaain cana osa amaain coroso que ohin aina jiniiquiin cana osa atinaelu, aina cuaain ichaonaa esine que ichaohin osa colane nena coina. Nitohaneeinte cana osaacha que nesarujueein nihacachene caje cana mitaeranu que coroso que ohelu Curisito. <sup>25</sup> Jaurihaalute niqui aiha beraicha colane nena carenerone rijijieein nitajenaa neein nerejetocoachelu. Nete laen inae ena carenerocuru beraiha beraichane, nitajenaa nainecurenihane rijijieein inara beraain niha Curisitone jaun, nitajenaa naineneeichene jaan ichaonaa que ichaohiche.

### 3

#### *Naaonjoaai ichaaoruhine sinijeraaonacaauru.*

<sup>1</sup> Aihana jaun inara lanaauru ere tonoraain neeuche enecuru. Aihute inara ichao cajeecha coaraain, acaauru rai erenaa latelanaala, nii Cana Coaunera beratenojoin erenaa coitucuhin esenetaain neeuruhine esenetana jerelanaala nenacaauru inara lanaauru, <sup>2</sup> esinae rauhijiriin caohachaain neein, nii baaso ichaelanaala inara suujua acateein ichaohichene coaracuruhane. <sup>3</sup> Esinae rauhijiriin caohachaain nena jeriquichene, nii nitajenaa inaurera rucuhele oro caje ichanohichuru, cajione caohachaauru, naaonjoainuri que coacuelanaala, <sup>4</sup> inara suujua aina cutaain esinae rauhijiriin Jesocurisito suujue que coacuhin neeuchete raotojoein neeiche. Caohachaain Cana Coaunera notaracae nihacanete jataain nelate. <sup>5</sup> Nii rijijieein techu nerejetocure cana inoaensihuru benecuru- jeriha Cana Coaunerane rijijieein ichaonacaauru. Nitohaneein jeriha Cana Coaunerane esenetaauruhane jaunte, jeriha acaauru lanaaurune rijijieein acaauru ere tonoraain neeurelu nii acaauru benecuru. <sup>6</sup> Nitohanihane jaun techu: “Canu curuaanaa,” narejete lana Abaraanun rai Sara, nere tonoraain aca jerihane rijijieein nihane jaun. Nii aihalu Sarane rijijieein casilanaala coejelanaala neeichenete, rauhijiriin coujuriu nii Abaraanun aina Sara nefoerateneein nena rijijieein neriquicheein.

<sup>7</sup> Jana inara acaauru lananequichene, jeriha inara sinijeraaurune rijijieein jiniiquiin ita suujua rijijieein neeuche. Coa ene neeuruhane amiha- neeon amurijiriin, inara sinijeraauruhacha ichanenu teein nihache. Inara rijijieein acaauru caohachane quete, nitohaneein acaauru rai ichaonaa teein nelu Cana Coaunera. Aineeichenete Cana Coaunera bajaain neeichene, inara ere tonoraenereein Cana Coaunera.

#### *Satiin Cana Coaunera ranojoneein nenacaauruhacha ichanenu*

<sup>8</sup> Aihana jaun ita suujua rijijieein neein ita janojera rijijieein ita belaaain, leeochoauru coroatajaneein, nii leeochoauru amurijiriin nena coacuelanaala neeuche. <sup>9</sup> Jiaonriha tonaain baasoneein inara que ereein neenihane, nii tonaain que baasoneein ereeichene. Niheichu inara nocoeje chanuheranihanee, coa inara netonai nocoeje chanuhache. Nitohanenaa coacuelanaala acaauru rai caohacha ichacuche. Nitohaneein inara rai caohacha ichaane coina inara raain nihalu Cana Coaunerane rijijieein. <sup>10</sup> Nii coinate:

“Chunocoha nichao colalajiin  
raoti ichaonaa que ichaonaa jerihane,  
namute cacha que baasoneein erelanaala,  
nii casajenelanaala,

<sup>11</sup> baasoneein ichaonacaauru aina nelanaala,  
caohachaacha ichaain  
raotojoein ichaohane jaanuhacha ariin  
acaacha sacuhine.

<sup>12</sup> Cana Coaunerate  
caohachaain suujua coaraain ichaonacaauru beraichaneein nihane jaun,  
bajaauruhane aonaain ne.

Nete laen baaso ichajeein ichaonacaauru que  
jaoleconaa rijijieein ne,”  
naa Cana Coaunera Quiricha inoaensi cuhane.

<sup>13</sup> Nitohaneein itolere bana caohacha nejesinaacha que coacuhin neeichene, nerihei inara rai baaso ichara. <sup>14</sup> Nete laen caohacha ichaquichene

coreniha necairichanaa coaraquichene nihanatiin rachoojoein nerausi-aejeein neriquicheein. Jiaonriha nii chuni que casiin nesooneein nee-ichene. <sup>15</sup> Nesooneena coacuelanaala raujiaaincha inara suujua cuhane Cana Curuaanaa Jesocurisito coacuhin bajaebajaecuche. Chaen letona jatoroaain neeuche chunocoha inara caje, “Chatohanihana nii jaecoichene jaan,” naain bajaa inara cajene, raotojoein belaaain beeuchete coitucuhin neeine. <sup>16</sup> Nete acaauru amurijiriin nena coacuelanaala, acaauru que inara suujua acateein acaauru rai beeichene caohachae. Nitohaneein coujuriu Jesocurisito esenetaeranein caohacha nejesina ichaain neeuchete nocoej-ecurumiin inara que baasoneein erenacaauru.

<sup>17</sup> Baaso ichacaachene coreniha necairichanaa coaracaachene amuri-toeriinteja nenacaanein caohachae caohacha ichacaachene coreniha necairichanaa coaracaachene, nitohaneei jeriha Cana Coaunera jaun. <sup>18</sup> Nii rijieein techu Jesocurisito netonai lesajeeincha cana osa coreniha cairichanojoein ohin nelu. Coatiha niqui nii chatohanai baaso ichaain osa que nesaruhin niheilu aca, nete erenaa tonoraelanaala baasoneein ichaonacaauru coreniha necairichaan nelu, rai Inaca Cana Coaunera rene cana amaane coina. Joenreein cacha rijijieeinte niqui ohin nelu rai jaberoco. Nete aca Cana Coaunera suujuenihane jaun oo caje ichanaain enanetojoein ichaohin ne. <sup>19-20</sup> Nitohaneente suujue nejesinanein cuhin, acau tabai itajenojoein moconajaera casetecanohinein nitajenacaauru suujue relaelu. Acaaurute bote nainaa Nohene reentiaain esenetaauruhane cohaca Cana Coaunera sainejeein, esenetaaurenihane jaun nitajeeurelu. Acaauru tabaauru esenetaeraauruhachate, itolerenein fosanejeein acau tabai caje nichoteeurelu. <sup>21-22</sup> Nii acate cana osa jianein ichaohacachene coina baotisanoinichane jaa cojunacanein nenaanelu. Nii aina cuaainte, inae ichoteratenojoein nihacache cana netonai. Coatiha raujiaain culu-onojoiniha cana jaberoco coina baotisanojoi nihaacache. Acate raujiaain cana jaberoco coulocohin, oo caje ichanaai dedeeu cuhin Cana Coaunera raotono nichajai que neein, itolere anjeraauru amurijiriin, cocoinanacaihuru amurijiriin nihane coina nena Jesocurisito aina cuaain, aina nena coina cana suujue couloca Cana Coaunera jaun neein ne.

## 4

### *Cana Coaunera tenojoi inaraacha ichana nainei que leeochoauru coroata-janecuche.*

<sup>1</sup> Aihane jaun cana coreniha jaberoco cairichaan nihalu Curisitone rijieein, inara netonai necairichanaa coaraquichene coina jatoraaain neeuche.

<sup>2</sup> Suujua letono rijijieein ichaohane jianein Cana Coaunera jerenohicha ichane coreniha necairichanaa coaraain neite osa caje nichotereein.

<sup>3</sup> Jauriaalute inara netonai aihuruha nii Cana Coaunera coitucuelanaala nenacaaurune rijijieein nerejetocoichelu. Nitohaneichene jaunte, jataain baasoneein ichaohin, inara suujua coaraelanaala necha ansaineein nerejetocoichelu, jianelanaala cocohin, tonijiaain ichaain ajenacaauru aina niha natiin neein, nii ichanohichuru ecaantooruniha natiin corojeein, naonjoaain nerejetocoichelu. <sup>4</sup> Nete laen inae enene, chabana jianelanaala baaso ichaain nenacaauru aina ichaorejetocoichene jianequichene jaun, inae inara coaracureniha acaauru aina nejaun inara cojoelatiin inae baasoneein inara que ereeure. <sup>5</sup> Nete inae ecu tihane bana onacaauru, ichaohin nenacaauru, naonjoainuriicha ichai coitucuhin nii rucuheraanu que nena cojoanona que tihane bana, raajenihane niicha ichai biha cuururein.

<sup>6</sup> Nii onacaauru raite Cana Coaunera ere berejetecurelu, ohin neeuruhane

nihanatiin aitoha Cana Coaunerane rijijieein suujue nejesinaneein ichaohin neeuruhane coina. Jerichanejeein techu niqui, aitocuruha cachaaaurune rijijieein caohacharelu jaiti jaberoconein neeuruhane bana rucuhenhinihalu niine.

<sup>7</sup> Inae satonoha itolerene que tururichaje. Aihane jaun inara que Cana Coaunera icharatenohin ichajeein Cana Coaunera bajaee bajajeein ichaauche. <sup>8</sup> Itolereneein inara suujua aina cutaain jiniiquiin ita belaaain ichaauche. Jataain ita belaaain ichaoha cachanete arajii rai nosa que suujua acatereein Cana Coaunera. <sup>9</sup> Inara rene turuhin niha chunine tonaain leeochoaauru que erenaa coacuelanaala inara loreri asaae raauche. <sup>10</sup> Coujuriu lauri lauri inara que Cana Coauneraacha icharatenohi icharanein nena tocohaneein, ichana nainequichene rijijieein inara rai Cana Coauneraacha tenojoi aina cuaain leeochoaauru coroatajanecuche. <sup>11</sup> Chunocoha tonaain erenaa jerihane jaa que irihane, jeriha Cana Coaunerane rijijieein ereein neeine. Chunocoha coroatajanera latihane, ii rai Cana Coauneraacha tei que laraajiin coroatajaneeu. Itolere iicha ichai ichaaine, itolere bana caohachaain ichaaute ii coroatajaniha Cana Coaunera aina Jesocurisitone coaraain coroaecuruhine cachaaauru. Acate rai necaohacha que necaohachaain itolere ichana naineranein ne-chariji bana satonoelanaala. Nitohanemiin.

*Coujuriu Jesocurisito ranojoneein nena tocohaneein necairichanaa abaantaauche.*

<sup>12</sup> Canejeraauru, jiaonriha mainajeein coujunojoneein neriquicheeine que jatoroaelanaala neeichene. <sup>13</sup> Raujiaaincha aihalu Curisitone rijijieein necairichanaa coaraain neeichene nihanatiin rachoojoein neeuche-inae turuha necaohachane bana rachoojoein neriquicheeine jaun. <sup>14</sup> Curisito cachaneein neeichene coreniha inara batohin nei nihanete, nerausiaa- quiche jataain caohachaain nena Cana Coaunera Suujue inara aina nihane jaun. <sup>15</sup> Nitohanihane jaun necoejemiin, sonajaain jaohin, asijiaotonein, leeochoaauru rai cotainacai ichaain, naaonjoain ichaane coreniha cairichanojoneein nena. <sup>16</sup> Jana Jesocurisito cachaneein neeichene coreniha inara casetecaain neinihane, jiaonriha nocoejequichene. Raujiaaincha coreniha Cana Coaunera bajaain corojeein neeuche.

<sup>17</sup> Inae cana rai cachanichaachene ichanohi rucuheca Cana Coaunerane cojoanonaa que turuha. Nitohanein rai cachanichaachene que nunuhetein, nitohanein icharichaanine jaun, chatohaneeururichaan Cana Coaunera ere tonoraelanaala nenacaauru. <sup>18</sup> Coaracuche nachuhinti rai catcha nichaachene saijieein, necairichanaa coaraain nichoterichaacheeine. Nii jaun chatohaneeururichaan chaainti, nechu aansainein osaaonacaauru. <sup>19</sup> Nitohanihane jaun, Cana Coauneraacha jerei ichaquichene coreniha necairichanaa coaraain neeichene nihanatiin, itolere bana caohacha ichajeein ichaohin, naitoonjoa rijijieein cha ichaeranein nena Cana Coaunera bijiu inara suujue teeuche.

## 5

*Jesocurisito ranojoneein nenacaauru suujuatera*

<sup>1</sup> Enane laen nii inara aina ita taojieraauru bichauhenaauru suujuatena jereun. Canuhetonaine acaauru rijijieein ichauchenanein cana coreniha necairichaalu Jesocurisitone beranein neeun. Nii rijijieeinechu canuhetonai acaauru aina jiniiquiin Cana Coaunera Cojoanonaa que nereeunni, inae ecu tihane bana. <sup>2</sup> Nii inara que Cana Coauneraacha beraichatenojoi,

rai cachaneein nenacaauru beraihuiche. Nii coinata inara que beraichate-najae Cana Coaunera. Caohachaaain inara suujua coaraain jeriha Cana Coaunerane rijijieein acaauru beraihuiche. Jiaonriha inara letoaera lateein core coinaacha ichaquichene. Raujiaain jeriha Cana Coaunerane rijijieein corajeein ichacuche. <sup>3</sup> Acaauru curuaanaaneein nenea coacuelanaala, raujiaain caohacha nejesina ichaain neeichene coarateeuche acaauru quete, acaauru netonai inara caje nerelaaurumii. <sup>4</sup> Nitohaneein neeichenete, inae turuha cana beraicha esineneei nenaane bana, inara que rai necaohacha que necaohachaaain nenea- comai lauriareein inara couturi que. Nii comai chariji bana setuhin naasaerinaain.

<sup>5</sup> Jana inara enamanaacuru, jerecuruha inara bichauhenaaurune rijijieein neeuche. Satiin ita suujua rijitoejin ita amurijiriin nenea coacuelanaala nii:

“Cana Coaunera,  
itolere amurijiriin nenea jereraauru  
lacuroaeranein,  
cairichanojoejin nenacaauru cairichaojoaain coaraain  
coroatajaneranein ne,”

naain niha erenaane que ninae. <sup>6</sup> Aihane jaun Cana Coaunera bijihu neein, nii chaque nelatihei rijijieein neeuche. Acate inae ecu tihane bana jataain nelateineein neeichene coina ichareein. <sup>7</sup> Coa itolereecha que coacuhin nererojoejaaeriin nihache, itolereecha que inara berairichaaain Cana Coaunerane jaun.

<sup>8</sup> Aihana jaun caohachaaain jataain itolere que ninaain neeuche. Charijieein teeinti jatoraaain quihane rai netiin nesari ariirijie janolari, nii rijijieeinte jatoraaain inara ariirijie moconajaera inara itajihane coina. <sup>9</sup> Charijieeinijin chatohanai que inara sarunaa jereranihane, jiaonriha rijitoejoeichene. Raujiaaincha nii inaraacha esenetai aina cuaain laraajiin, satiin chauratane sacuritaain nenacaauru cana nejeraauru netonai, nii jelai necairichanaa abaantaain neeuruhane coitucuhin abaantaain neeuche. <sup>10</sup> Nete inae carajaojoaain necairichanaa abaantaain neeichene baiha, inara coroatajaniha Cana Coaunerane aina rauhijiriin baaso ichana coacuelanaala laraajiin acaacha esenetaain neriquicheein. Nii jeelai Cana Coaunera, jataain cana belaitohane jaun, rai calaohi Jesocurisito aina cuaain cana cotijiaain cana raain nelu, rai Cojoanona que aina nenea coina. <sup>11</sup> Nitohaneein itolere ichana naineranein neeine chaabana satonoe-lanaala. Nitohanemiin.

*Satono tihane rai nocoiha Fedorone.*

<sup>12</sup> Casuujua rijijieein nenea cana nejera Siribano quene caa quiricha lae-naerateeun inara rai- chaque tonaelanaala inara suujuatiha. Chaen jataain esinae rauhijiriin inara belaiha Cana Coaunerane jaun, coujunacaniha rausiaenojoejin neeichene jaanu tihane coitucuhichene coina. Aihane jaun jataain inara belaiha Cana Coaunerane jaun, aca jerihane rijijieein ichaaoche itolere bana.

<sup>13</sup> Janijiin inara raain nihalune rijijieein, Babiloniau janijiin Cana Coaunera ranojoejin nenacaaurute inara coacue. Cacalabi rijijieein nenea- Maroco netonaite inara coacuhe. <sup>14</sup> Ita rene turuhin neeichene, raotojoejin jiniiquiin ita belaiin ita raain neeuche. Satiin Jesocurisito cachaneein neiniquichene raotojoejin neeuche.

## Fedoroacha letoi coroataja

### *Acaauru coaucane biha Fedoro*

<sup>1</sup> Canuna Jesocurisito letononeein- rai afosotolo Simoon Fedoroneeun. Cana Coanera, chaen nii cana ichoteraneein nena Jesocurisito, naonjoainuri chabana nohanelanaala cana rai caohacha jataain nelatei teraneein neeuruhane esenetaeranequiche canacaanu rijijieeine raine caa quiricha laenaan. <sup>2</sup> Nii Cana Coanera aina Cana Curuaanaa Jesocurisito coitucuhichene jaan aina cuaain, itolere inaraacha latei que inara rausiaemiin Cana Coanera, jeelai amuritoheriin raotojoein neeichene coina.

### *Jesocurisito ranojoi ichao*

<sup>3</sup> Cana Coanerate itolere niicha ichana nanei ichaain, cana ichao rai canaacha latei teein, leinjiin cana suujua coaraain nihacachene jaanu teein ne. Nitohaneeinte nii niicha ichana nanei ichaain, cana cotiharaneein nena coitucuerate cana que Cana Coanera. <sup>4</sup> Satiin nii cana rai niicha tei aina cuaainte, cana rai tihane coina naitoonjoa jataain itolere amurijiriin itolere que nelatein nena te Cana Coanera. Nii aina cuaain niicha tei ichaonaa que ichaohin, nii itolere bana baaso coacuhin nitajerai niha cachane jaan jianeein ichaohichene coina. <sup>5</sup> Aihana jaun, jereniha inara suujuane nihanatiin, atiin jeelai amuritoheriin jeriha Cana Coanerane rijijieein esenetaain cha coitucuhene neeichene coaratein, <sup>6</sup> inaraacha coitucui aina cuaain caohatiin coacuhin, baasoneein coaauquiche inara suujua cuhanene tonoraelanaala, nererojoecaelanaala neein, <sup>7</sup> inara belaiha Cana Coanerane rijijieein jiniiquiin ita belain ichaaoche.

<sup>8</sup> Nitohanai ichaain ichaohichene, coatiha inacojoein nelatelanaala nerinaain inara ichao. Niheichu inacojoein Cana Curuaanaa Jesocurisito coitucuriheecheein. <sup>9</sup> Nete laen, nitohanai ichaelanaala nena, leinjiin maosa rijijieein cha coaraelanaala nihane jaun, jauriaalu rai nosa caje couluonohiniane baiteein nihane jaun aicheein. <sup>10</sup> Canejeraauru, nitohaniane jaun, inae inara janijiin inara raain nihalu Cana Coanerane jaun, esenetaaichene ilaauche inara suujua cuhane. Nitohanein neeichene coatiha chabana esenetaaichene jianeriheecheein. <sup>11</sup> Chaen techu nitohanein neeichene, cana Curuaanaa Jesocurisito Cojoanonaa chabana satonoelanaala nena bacuuja neyoracaane jana ranojoein neriquicheein.

<sup>12</sup> Nii jaunne, inae caohachaain inara relaauruhane jaan coitucuhin jeriha Cana Coanerane rijijieein ichaohichene nihanatiin, itolere bana inara rai coaareeunni nabana baitequichene coataa. <sup>13</sup> Jaiti ichaaojihanune jaunte ne carai rauhi inara suujuateein nihanune coina. <sup>14</sup> Cana Curuaanaa Jesocurisitote, inae enanocoojoa orichaaunine coitucuerate canu que. <sup>15</sup> Nena atiin nainichaaunne jaun tiaajeein inara coroatajanereeeunni, inae ohanune baiha satiin canuhacha ichai coacuhin neeichene coina.

### *Itolere amurijiriin niicha ichana nanei ichaa Jesocurisitone*

<sup>16</sup> Nii niicha ichana nanei ichaain, turuhalu Cana Curuaanaa Jesocurisitone que inara relaacaanune jaan, coatiha raujiaain nereretanaa neein nena nihei. Niheichu coatiha canacaanu suujua caje rocohin cojoeluinain nohaniha aitohacaanu. Canacaanu nota que itolere ichaa Cana Curuaanaa Jesocurisitone jana coaracaanune jaan quena aitocaaanu. <sup>17</sup> Coarajihacaanune jana techu, rai necaohacha teein jataain erena

raotono que ereein rai Calaohi nihane cocoainaa: “Caate jataain canuhacha belaaieein, janijiin canuhacha tei cacalabine,” naain rai nii Calaohi cocoainaelu Cana Coaunera. <sup>18</sup> Nitohaneeine que banijiaain nenea ichatane ucuunno neein, Cana Curuaanaa aina jiniiquiin neein, dedeeu neein rai iriha Cana Coaunerane jana aonacaunlu.

<sup>19</sup> Niite, esinae rauhijiriin berejetocuruha *profetacurune* coitucuhin esenetaain neeichene jaanu neein nenea ne. Aihana jaun, caa canacaanuhacha beebejeite, leinjiin nocohenaanau jeraaen conohajeein conoha conone rijijieein inara conoaera neein, janonaa rai mituhin conoha soaaene rijijieein, inara suujua cuhane conaeraneein nereein, turuha rai cojoanonaane que tiaain. <sup>20</sup> Aihana jaun, esinae rauhijiriin berejetocuruha *profetacurune* esenetaaichenete ne. Nii jaun, satiin Cana Coaunera Quiricha cuhane laenanohineein nenea, coatiha suujua caje rocohin aitocuruha *profetacurune* jaan nihei. <sup>21</sup> Aihana jaun, satiin *profetacuru* coatiha rai suujua caje rocohin aitoroetocuruhi, Cana Coaunera Suujue acaauru que coitucueratihane jaunte, acaauru que coitucueratihane rijijieein berejetocurelu.

## 2

### *Nechu joaenreen nohaneein cache relaauruhane.*

<sup>1</sup> Isaraelitaauru jana nihalu nohaneein cache relaaurera *profetacurune* rijijieeinte, inara jana netonai neeurureein cache coritain cache relaaureraauru. Acaaurute jerichanejeein inara relaa nocoetiin, inara que asi-nojoneein nechu nohaneein inara relaaurureein suujua baaso caje rocohin. Nitohaneeine inara ichoteraneein niha Jesocurisitone saijieein, acaacha esenetaaichene caohateraneein neeurureein. Nitohaneeuruhane jaunte itajenojohi necurureein. <sup>2</sup> Arajichurute nechu nichao aasaeraanu que acaauru ichao baaso rijijieein ichaaurureein. Nii coaraainte chabana satonohelanaala nenea ichaonaanaja coero cuhane cana amaeraneein niha Jesocurisitone saijieein que baasoneein ereeurureein cacheauru. <sup>3</sup> Nitohaneeuruhane jaunte, coriquiicha que coaacuruhane jaun inara cairichaurureein, inara coritain inara relaauruhane coreniha. Nete inae inoanlu caje coauneein casetecanohineein neeuruhane coina, inae ichanohineein nihane jaun caseteco coaracuruhane rai neeure. Nerihaain nii caje acaauru ichotera.

<sup>4</sup> Cana Coaunerate, osa que nesaruhin neeuruha rai letonocuru aanjeraaurune jana, acaauru que suujua acatelanaala, usi tabai aina nocohena tabai jana *cadena* que ichohanohineein jaonajaelu, satiin coulurujuenojoi niha cacheaurune cojoanonaa que turuhane reeintiaain cuu neeuruhane coina. <sup>5</sup> Nii rijijieein techu satiin coitucuelanaala nenacaauru cacheauru que suujua acatenelu Cana Coaunera, inoanlu acau tabai que chauratane jooratihane bana. Acaihaniji Nohechate esinae rauhijiriin aca jerihane rijijieein ichaohin nihane coaratihane jaun ichoterateein, chaen aina caainsineein nenacaauru cacheauru ichoteratelu. <sup>6</sup> Jerichanejeein techu, Sodoma, Gomora, naajoaihunri neseuru cocoaichacuru mocoeratelu ajaneneein nitajeuuruhane que tiaaajoaain Cana Coaunera. Nitohaneeine ichaelu Cana Coaunera, nii baiha neenihuru baaso ichajeein ichaonacaauru cacheauru notaaca niqiu, nii caje nainain baaso ichaelanaala ichaauruhane coina.



<sup>7</sup> Nete laen Loto ichoteratelu, aca caohachaain ichaohin, nii baaso ichacuruha necha aansaineein ichaonacaauru cachaurune rautaaain coaraenihane jaun. <sup>8</sup> Nitohaneein jetaote, cojoanonetoein baaso ichaain neeuruhane coaraain, baasoneinchuru ita rai ereeuruhane aonaane jaun, que suujua rohecaeriin niha Lotone jana ichoteratelu Cana Coaunera.

<sup>9</sup> Nitohaneinte esenetaain rai cachanein nenacaauru ichoterate cairichanojoein neeuruhane caje Cana Coaunera. Nii rijijeein techu, caseteconein neenihuru casetecae, rai cojoanona que turuhanerein tiaain caseteco neeuruhane coina. <sup>10</sup> Nitohaneinte letoaa suujuane rijijeein baasohacha ichajeein, Cana Curuaanaa Jesocurisito batojoeriin nenacaauru casetecarein Cana Coaunera. Chaen techu erena tonoraelanaala enaacha joenreein cha chaain, chaque casilanaala acaauru amurijiriin nenacaauru necoeje chanuhin naajoaunre. <sup>11</sup> Nete laen anjeraauru acaauru amuritoheriin cocoainanohinein neeuruha natiin, acaauru amurijiriin Cana Coauneraacha cocoainanohinein nenacaauru nocoeje chanunaa nainecurene.

<sup>12</sup> Nii suujua letono rijijeein baaso ichajeein ichaonacaauru cachaurute, nechu aihaleinjiin ataebinaene rijijeein cha coitucuelanaala ichaauruhane jaun, cha coacuelanaala joerein niicha ichai ichacure. Chaen techu sohin jaonojoein itajenojoein neeuruhane coina inae ichanohinein neure. Chaen techu niicha coitucuhi que nihanatiin enaacha baasonein ereure. Nete ooruhalein ataebinaecurune rijijeein ohin, <sup>13</sup> acaauru netonai leechaauru cairichaaain neeuruhane coreniha cairichei coaracururein. Raotojoein niha nocoetiin niqui rachoojoenaa nitaje rai nena que rachoojoeure. Chaen techu jataain coejenacai aina osa que inara saruha inara aina rachoojoeure nechu inara coritaa beseta ichaain neeichene.

<sup>14</sup> Chaen techu ene coaracuruhane itolere bana jerein coaracure. Nii jaunte chabana osa que nesarucuruhane coejein jianena nainecurene. Chaen techu enaacha osa que leechaauru saruhin, itolere niicha latei jerein, queecha coacuhin nechu aansaineein ichaore. <sup>15</sup> Nitohanein neeuruhane jaunte, inae nitajenanein neure; Cana Coaunera bero rijijeein rene cana turuaeranein niha Jesocurisitone saijiein, sacuelanaala jianein neeuruhane jaun. Nii jaunte aihalu Beor calaohi *profeta* Balaamne rijijeein neure. Aca jetaote coriqui jeriha baaso ichana jerihane jana jetao, <sup>16</sup> rai suujua coarihei amuneein baaso ichaa cuhane coataa jetao, cacha rijitiin rai erein, baaso ichaane caohate nii amaera cabario rijijeein nena asno.

<sup>17</sup> Nitohaneei cacha relaeranein nenacaaurute, caohacha que cacha relaelanaala, nechu cacha ichao asaeranein nena que cacha relaaure. Nii jaunte chabana satonoelanaala nena nocoheanaanau caseteconein neeururein. <sup>18</sup> Itolere quete niqui ereure. Nete jataain joenreein aitocure. Nitohaneinte, acaauru ichao rijijeein ichaauruhane jianein, ena Cana Coaunera coitucunaa nunuhetejeeureraauru- cachauru saruure osa que. <sup>19</sup> Itolereinein niicha ichana jerei ichaa cachane jereinte niqui ereure. Nete acaauru itajeranu letononein netiin aitocure, satiin cacha, rai suujua saruhera tonoraain nena rai letononein nihane jaun. <sup>20</sup> Nitohanihane jaunte inae Cana Coaunera coitucuhin, cana ichoteranein nena Jesocurisitone maajeein coitucuhin nihane jaun, inae Cana Coaunera coitucuelanaala nenacaauru ichao rijijeein ichaohane caje nichotein nihane saijiein, nacoauneein nii jauriaalu aihalune rijijeein ichaohin niha cachane, jauriaa aihalune amuritoheriin baasonein ichoae. <sup>21</sup> Nitohanihane coataate niqui nirijiein, cana ichoteranein niha Jesocurisitone coitucuelanaala neeuruhane caohachae. Nabana acaauru rai tenojoein niha nii cana

rai beratenojoi Cana Coaunera caje nenaane saijieein que jaolecooruhane coataa. <sup>22</sup> Nete inae nitohaneeururichaaaine que: “Narohane baihate jeelai naro qui remaae. Caohatiin culeenojoinihane saijieeinte inae nacoauneein naticho cuhane cue coosi,” naa acaauru que erenaane rijijieein neeure.

### 3

#### *Nacoauneei tururichaaain Jesocurisitone*

<sup>1</sup> Caa quete, inae coroata sae quiricha laenaain letoaanu jataain canuhacha belaaineein neiniquichene rainera canejeraauru. Nii coroatajai canuhacha laenai quiricha cuhanena inara suujuateun, caohachaain inara suujua coaraain, baaso coacuelanaala rauhijiriin coacuhin neeichene jerichaaunne jaun. <sup>2</sup> Inoaenlu inara rai berejetocuruha Cana Coaunera tenojoineein nenacaauru *profetacurune* coacuhin, inara relaerateein nihalu rai afosotooro que cana ichoteraneein nena Jesocurisitone coacuhin neeuche.

<sup>3-4</sup> Inae caa baihate nechu inara necoeje chanuha: “Aanca Jesocurisito. Nacoauneein turuhane coinete niqui aitelu. Inae ohacoaauruha cana forateracuru niqui, nete jerichanejeein sacue necoaaunaa cana rai chauratanene caje coauneein nihane rijijieein,” naain ereeururichain nechu jeriha acaauru suujuane rijijieein baaso ichajeein ichaonacaauru cachaaurune que nainaaichaaache. <sup>5</sup> Nitohaniha acaauru ichaone jaunte, jaiti necoaaunaniha satiin itolerene ajiniha, inae nesiha dedene jana, acau nesinaneein niha caa chauratanene jana, nitohaneein jeriha Cana Coaunerana jaun, acau caje coaunanohineein nihalu caa cana rai chauratanene coitucuhin esenetana jerecurene. <sup>6</sup> Nii rijijieein techu, elo tabai aina cuaain itajenojoineein nelu caa cana rai chauratane. <sup>7</sup> Nete laen, caa ena nena dede, chauratane, naaonjoainuri, inae nitohaneein jeriha Cana Coaunerana jaun, usi tabai que nitajeeuruhane coina rucuhenehineein neeure. Nii usi tabai, baaso icharaauru itajeranuneein nenaate, acaauru mocoreein cana janonaa satono bana.

<sup>8</sup> Canejeraauru, jiaonriha Cana Coaunera rai le jiiichoo, le oaraanca jaanacanei carajanihane jana, le oaraanca jaanacanei le jiiichoonejihane baitichache. <sup>9</sup> Coatihani niqui aitocuruha esenetaaichuru tabaaurune rijijieein, cana rai naitoonjoan tihane baitihane jaun, caeneenejihei Cana Coaunera. Chuni nitajihane jerenihane jaunte, saain nichoteein niha cachane jerihane jaun, jaiti inara cojoae Cana Coaunera.

<sup>10</sup> Nete inae ecu tihane bana, coitucueraelanaala turuha asijiautone rijijieein, coitucueraelanaala turureein cana Curuaanaa Jesocurisito. Nii janate tonijiaain coasinacaain neranuha cureein caa canaacha coarajei dede. Itolere, que nenacaauru netonaite itajereein usi. Jana chauratanete satiin que nenacaauru aina jiniiquiin coaraain benojoinereein Cana Coaunera rai.

<sup>11</sup> Nitohaneein nitajerichaaain itolerene jaun, leecha que coacuelanaala, jeriha Cana Coaunerane rijijieein ichaaache. <sup>12</sup> Aihana jaun, chajaain jeriha Cana Coaunerane rijijieein neeuchete carajaelanaala turuhine. Inae turuhane banate, usi tabai que itajenojoiniha cureein caa dede canaacha coarajei. Itolereite nii usi jana neein mocoreein. <sup>13</sup> Nete nitohanihane nihatiin, cana laen ena nena dede, ena nena chauratane, naaonjoaihunri cana rai tihane coina Cana Coaunera aitoonjoa cohajerichaaacheein. Ecu coatihani inae nerinaain baaso, caohacha nejesinaachate nereein.

<sup>14</sup> Canejeraauru, aihana jaun, nii que turuhane cohajeein, caohachaain ichaaochete osa colane raotojoein cha ujuaihonelanaala neeichene jana,

inara eruhine Cana Coaunera. <sup>15</sup> Aihana jaun, satiin nichotena coina, cana cohaca jaiti turueniha cana Curuaanaane coitucuhin que nainain neeuche. Nii quete inara rai niicha laenai quiricha cuhane beein laenaeraete cana nejera Faboro, que coitucueratiha Cana Coaunerane caje coitucuhin. <sup>16</sup> Le quirichaauru niicha laenai nainetiinte, nii que aitiin beein laenaeraete cana nejera Faboro. Nete tabaauru coitucunacaene caaintatiin aitothane jaun. Nii jaunte, leeochoaauru Quiricha laenanohineein nena ichacuruhane rijijieein, acaauru jerecuruhane rijijieein rotohi que cacha relaaure, tabaauru caohachain suujua coaraelanaala nenacaauru cachaauru. Nii corenihate, caseteco coaracurureein inae ecu tihane bana.

<sup>17</sup> Canejeraauru, nitohanihane jaun, inae nii ajiniha caje coauneein nii coitucuhin neeichene jaun, inara coritaauruha nechu aansai cachaaurune esenetaaichene coataa que nainain ichaaoche. Nabana inara coritaauruhane esenetaain inara suujua coreein acaauru rijijieein neeichene coataa.

<sup>18</sup> Nete jeelai amuritoheriin cana ichoteraneein nena Cana Curuaanaa Jesocurisito coitucuhin, jiniiquiin aca jerihane rijijieein ita belain neeichene caohachae. Aca acaneein nihane coitucuhin coroaecuruhine chabana satonoelanaala. Nitohaneein neeine.

## Joancha letoi leinjiin

### *Ichaonaa esine tera erenaa*

<sup>1</sup> Necoaunaa cana janonaane ajiniha inoaelu caje coauneein nesina, canacaanuhacha aonai, canacaanuhacha coarajei, naaonjoainne caa been inara rai laenaain letoacaanu, canacaanu nota que coaraain, biji mucuhin, naaonjoacaanune jaun. Acate, ichaonaa chabana nitajenaa charanejeein nenea esine tera Erenaa ne. <sup>2</sup> Canacaanu rene ecocohin iriha nii ichaonaa esine chabana sanaacharanejeein nenea terane jaunna, inara rai nii que ereerecaanu. Acate, Inaca Cana Coaunera aina nelu. Nii jianeein ratiriin turuhinte, canacaanu aina neein, jianacoon teteriin satiin rai beebeje, amuhemujueein itolere sacutaain. <sup>3</sup> Nitohaneeinte itolere ichaain satiin cachaauru notajae. Niine canacaanu raajenhane coaraain beebejihacaanu, inara netonai canacaanu aina jiniiquiin esenetaain neeichene coina. Charijieein teeinti canacaanu, Cana Inaca Cana Coaunera, rai Calaohi Jesocurisito, naaonjoain aina jiniiquiin nihacaanu, nii rijijieein inara netonai canacaanu aina jiniiquiin raotojoeein neeichene coina. <sup>4</sup> Nii jaunna, jitariin been inara rai laenaain caa letoacaanu, inara netonai coitucuhin neeichene, raotojoeein rachoojoeein jiniiquiin nihacachene coina.

### *Cacha cononeein niha Cana Coaunerane*

<sup>5</sup> Caa erenaa- canacaanu relaa Jesocurisitone jaan- inara rai canacaanuhacha beebejeite, cacha cononeein niha Cana Coaunerane jaun, nota beroteniha cachaacha ichaine jaan ne. Nihei charijieein niha natiin jetao, que nasina nainihe chaaelai, Aca itolereenein baaso ichaain nihacachene nii coarajeein nihane jaun. <sup>6</sup> “Ainate jiniiquiin nihacache,” naain irihacachene saijieein, asiin canaacha jerei ichacaache suujueeinete, cana raajenhane nohaneein necoritarichaacheein. <sup>7</sup> Nete laen satiin acatiha cana ichao teteriin aiha Cana Coaunerane rijijieein asinojoinelanaala chachaain jiniiquiin ita suujua rijijieein nihacachene, cana osa culeereein rai coichana que rai Calaohi Jesocurisito.

<sup>8</sup> “Chatohanai baaso ichahaaun. Coatih cha que osaojoeehaaun,” naain irihacachenete, cana raajenhane necoritarichaacheein. Cuute casajenetiin nedarichaacheein. <sup>9</sup> Jana laen chatohanein baaso ichaain nihacachene, suujuelanaala been, Cana Coaunera nitohanei rucuheranein nihane que jaaecohacachenete, cana osa coreniha caseteco coaracaachene rai nihacachene caje, cana que suujua acatein, itolere baaso ichacaachene berotiha cureein cana caje Cana Coaunera. <sup>10</sup> “Chaaelai janonaa bana, chatohanein naosatein nihaaun,” naain irihacachenete, Cana Coaunera ere tonoraene richaacheein. Cuute casaje tocohanein Cana Coaunera ratiririchaacheein.

## 2

### *Cana Coaunera acatiha cana rai cha rucuheranu Jesocurisito*

<sup>1</sup> Cana Coaunera coreniha cacalabi rijijieein nenacaauru, nabana Cana Coaunera ere lachohin, chatohanein nosatein neeichene coataane catohanein laenaain letoaaun. Chunocoha chatohanein baaso ichaain osa que nesaruhin nihane, niha cana rai Cana Coaunera acatiha nii rucuheranu Jesocurisito- esinae rauhijiriin caohacha esine coitucuhin rucuheranein nenea. <sup>2</sup> Osaotohacachene caje cana que suujua acatiha Cana Coaunerane

coinate raajenhane netelu Jesocurisito, coroso que tein atinaauruhane coina. Coatiha leinjiin cana corenihacha aiheilu. Satiin caa chauratane sacutaain que nenacaauru caje osa berotihane coinate nitohaneein nelu.

<sup>3</sup> Esinae rauhijiriin naitoonjoan tonoraacachenete, esinae rauhijiriin Cana Coaunera coitucuera nihacachene coitucunaa nainerichaacheein. <sup>4</sup> Jana tabaauru: “Cana Coaunera coitucuhanu,” naa natiin naitoonjoan tonoraenihanete, nechu jataain casajenetohane jaun aitoreein. <sup>5</sup> Esinae rauhijiriin, nere tonoraerate esinae rauhijiriin Cana Coaunera belaichaneein nihane coitucunaa nainereein. Nii ainate esinae rauhijiriin jiniiquiin, aina nihacachene coitucunaa nainichaache. <sup>6</sup> Chunocoha “Jeriha Cana Coaunerane rijijieeine ichaon,” naain erei, nii ichaohalu Jesocurisitone rijijieein ichaohine.

### *Ena nenea Cana Coaunera aitoonjoan*

<sup>7</sup> Chasocuru, caa inara rai canuhacha laenai canuhacha letoai- Cana Coaunera aitoonjoan, coatiha ena ecoonaneein nihei. Acate inoaelu caje coauneein, inara rai beratenojoneein nenaane. Nii Cana Coaunera aitoonjoante, inae inoaelu caje coauneein inae inaraacha aonai ne. <sup>8</sup> Nete laen, caa ena inara rai quiicha laenai quiicha letoaite, ena Cana Coaunera aitoonjoan- ena nenea ne. Esinae rauhijiriin Curisito aina jiniiquiin nenea neein, inae nocohena caje mituhajeein, jihanacoo jiichoo mituhichene jaunte, inara raajenhane nii coaraain coitucunaa naineriquicheein.

<sup>9</sup> “Cana Coaunera cono conohanau neeinne, jianacoon teteriin chachaain neeun,” naa natiin nejelau namute cacha belainiha chunocohanete, jaiti moconajaera aina nocoenaana nihane jaun aicheein. <sup>10</sup> Chunocoha nejelau namute cacha belaaain neite, jianacoon ichaohane coaratihaha aicheein. Nitohaneein ichaohane nerinaain chuni osa que sarunaa nainera. <sup>11</sup> Jana, namute chachaauru aina nejerateein belaiheite, nocohenaana joaenreein moconajaera aina jaiti amuhemujue aihaha maosane rijijieein, nii nocohena rai suujua aninoane jaun.

<sup>12</sup> Nii jaunna, cacalabihuru rijijieein neiniquichene rai caritiin rauhijiriin inara rai been laenaain letoaaun, inoaelu beratihalune tocohaneein nere nainaane coina, Acaneein nihane aina cuaain inara caje inara osa beroteratiha Cana Coaunerane coitucuhichene coina. <sup>13</sup> Saain ichauchenaneichene raine maajeeinna laenaain letoaaun, inoaelu caje coauneein nii nesina coitucuhin neeichene jaun. Saain enamanacaauru raine maajeeinna, caa caritiin laenaain letoaaun moconajaera amuritiin ichoae iniichene jaun.

<sup>14</sup> Cana Inaca Cana Coaunera coitucuhin neeichene jaunna, caa caritiin inara rai laenaain letoaaunra cacalabihuru. Saain inara ichauchenaneichene raine maajeeinna laenaain letohacaanu, nii inoaelu caje coauneein nii nesina coitucueraneein neeichene jaun. Saain enamanacaauru raine maajeeina letoaaun, chaae inara coichana aina cutaain Cana Coaunera Ere esenetaain, caohachaain laraajiin moconajaera choae iniichene jaun.

<sup>15</sup> Coa nechuhaha jataain cacha sarueraanu que caa chauratane curuaanaa moconajaera tenojoin nichaae inara suujua letoaache. Chunocoha nii moconajaera tenojoin itolere nichaae suujua letoerate, nechuhaha Cana Coaunera que jaolequiin belainihane jaun aicheein, <sup>16</sup> Cana Coaunera caje nenea nenihaa nii chauratane que tenojoin jaun. Nii chauratane que tenojoin, nechuhaha jataain osa que cacha sarueraanu que nenea ne. Acate cana nota rai caohati tocohanihane nichaae suujua letoaera, niichaha sirii aina cuaain leeochoaauru amurijiriin nenea coacuhin, naaonjoaain niha cachane jaan tera ne. <sup>17</sup> Nete inae cuu tihane bana, chauratane aina jiniiquiin nitajiha

cureein, nii satiin cacha sarueranu tera moconajaera. Nete laen chaa-lai janonaa bana nitajenaa charanejeein niha cuurureein Cana Coaunera jerenohi ichajeein ichaonacaauru.

*Esinae rauhijiriin nohanelanaala niha leinjiin ereine, nii caje mitunaa naineniha casajene.*

<sup>18</sup> Aonacuche cacalabihuru. Inae besaute nichaae cuujiha cana janonaa. Nii jaunte, inae uhe lalaje nii Curisito aina nejerateein nena cacha cairichaera moconajaera. Nitohaneeinte, inae caa arajiin ocojoacoaaure Jesocurisito que nejerateein nenacaauru. Nii cajete inae besaute nichaae cuujiha cana janonaane coitucuhacache. <sup>19</sup> Cana ainate neeururejete niqui, nete mituhin amuurelu cana caje. Coatihā acaauru, cana suujua rijijieein coacuhin neeuruhilu. Baana cana suujua rijijieein coacuhin aihuruhalunete enanetojoein cana aina neeurure. Nitohaneeinte neurelu, acaauru caje esinae rauhijiriin cana suujua rijitoein neurenihā cana aina nenacaaurune coitucunaa coina.

<sup>20</sup> Nitohaneeinte inara rai Cana Coaunera Suujue tein nelu Curisito, aina cuaain inara itolere coitucuhin neeichene coina. <sup>21</sup> Esinae nohanelanaala erena niha Curisito que erenaane coitucuneeichene jauna caritiin inara rai laenaun, coatihā coitucuneeichene jaun nihei. Nitohanihane jaun inarate coitucuhiche, casajenelanaala nena caje mitunaa naineniha casajene. <sup>22</sup> Aihana jaun, chateeinti casajenetiin ichoae, niite: “Canaacha cohajei Mesihasi nihei Jesocurisito,” naain Jesocurisito esenetaelanaala que erereein. Acatechu, nii rai Inaca Cana Coaunera aina rai Calaohi Jesocurisito batohin acaauru que nejeratenaaneein ne. <sup>23</sup> Chunocoha cacha, Jesocurisito coitucunaa jerenihanete, acaentonai ranaa jerenereein rai inaca Cana Coaunera. Nete laen chunocoha, nii rai Calaohi Jesocurisito coitucuhin leeochoaauru que coitucuerateraneein nihane, acaentonai coitucuhin rareein rai Inaca Cana Coaunera.

<sup>24</sup> Nii inoaelu caje coauneein, inara rai beratenojoin inaraacha aonai rucujueein sirichuche, inara suujua cuhaneecha. Chaen jiaohine Cana Coaunera Calaohi caje naluhichene. Aihate Cana Coaunera caje netonai naluheneeiche. <sup>25</sup> Nii cana rai tihane coina aitoha Jesocurisitone jaante chabana nitajenaacharanejeein nena ichaonaa esine ne.

<sup>26</sup> Nabana inara coritacuruha nii inara coritana jereraaurune coataane, caa inara rai aitiin laenaun. <sup>27</sup> Nete laen inara, inara relaain inara suujuateeranu lateneeiche, Jesocurisitohacha teratenojoin, Cana Coaunera Suujue siriin neeichene jaun. Nii inara rai niicha teratei Cana Coaunera suujute, caohachaaain rauhijiriin inara relaa cureein, inara suujuateein. Inara rai cha bihane, coatihā nohanenaa nerinaain. Esinaete erena nereein. Aihana jaun, Curisito esenetaaichene jianena coacuelanaala aina jiniiquiin neein inara relaa rai Suujuene rijijieein ichaaoche.

<sup>28</sup> Aihana jaun cacalabihuru, enene caje coauneein, jiaohine Jesocurisito esenetaaichene jianein neeichene. Aihate chaque casiin necoatelanaala jiniiquiin queecha jaequuin, niheichu Jesocurisito que coejelanaala nichacache enacoauneein turu bana. <sup>29</sup> Inarate raotojoein esinae rauhijiriin caohacha ichaeraneein ichaoha Jesocurisitone coitucuhin neeiche. Nii rijijieein techu, baaso ichaelanaala esinae rauhijiriin caohacha nejesina icha cacha, Cana Coaunera calaohineein inae nihane coitucuhin neeiche.

### 3

*Cana Coaunera calaohineein nenacaauru*

<sup>1</sup> Aonacuche. Jataain mainajeein cana belaa'in niha Cana Inaca Cana Coaunerane que nainaa'in coitucuhin neeuche. Nii jaunte nainecure, Cana Coaunera calaohi ineein cana curuaateeuruha cachaa'urune, esinae rauhi-jiriin acaneein nihacachene jaun. Nii jaunte cana coitucuhin, cana belaa'in cana coaana nainecurene caa chauratane que nenacaa'uru cachaa'uru Cana Coaunera coitucuurenihane jaun. <sup>2</sup> Canejeraa'uru, inae esinae Cana Coaunera calaohi neeinte nihacache. Nete nii baiha: "Naa'ojoin ineeinte niha curichaachein," naain rauhi-jiriin coitucuenihacache. Leinjiin, coaiten enacoauneein cau turuha Jesocurisitone bana, rijijieein niha curichaacheinnete laen coitucuhacache, aitohane rijijieein, jerichanejeein coaraa curichaacheinna jaun. <sup>3</sup> Satiin acaacha esenetaain queecha jaaequiin nenaate, raajenhane itolere baaso caje necoulucuhin neeurureein, baaso colane ichaoha Jesocurisitone rijijieein ichaa'oruhane coina.

<sup>4</sup> Nete laen, satiin osa que nesaruhin nenacaa'uru baaso ichaa'in neeure, baaso icharaneein niha satiin osane jaun. <sup>5</sup> Inara netonaite cana caje osa beroteraanu que caa chauratane que turuhalu Jesocurisitone raotojoein coitucuhin neeiche. Coatiha Aca charijieeinijii chaque osaojoejeein niheilu. <sup>6</sup> Nitohanihane jaun, Cana Coauneraacha jerei ichajeein jianelanaala nenaate, osa que nesaruna nainenereein. Nete osa que nesaruhin nenacaa'uru, coaracuruhane niha natiin chabana coitucuureneerein, nii jaun coatiha rai cacha necururinaain. <sup>7</sup> Coa inara coritaain neeuruha nejelau cachaa'urune esenetaain nihachera cacalabihuru. Chateeinti baaso que jaolequiin caohacha nejesina ichae, niite caohacha ichara ne, aihha nii caohacha nejesina icharane rijijieein. <sup>8</sup> Chateeinti osa que nesarujueein ichoae, nii te moconajaera raineein nihane jaun aicheein, inoaelu caje coauneein osa neba niha moconajaerane jaun. Nii jaunte caa chauratane que turuha uhelu Cana Coaunera Calao'hi, nii moconajaera ichanaa itajeein beroteraanu que.

<sup>9</sup> Cana Coaunera coitucuin, Cana Coaunera calaohineein nena, inae osa que nesarujueein ichaonaa nainihe'in, inae rai Cana Coaunera tenojoi ichaonaa que ichaohane jaun. Chaen inae Cana Coaunera calaohi nihane jaunte, inae osa que nesarujueein ichaonaa nainene. <sup>10</sup> Coitucunojoeineinte neeure Cana Coaunera calaohichuru. Nii rijijieein techu coitucunojoeinein neeure moconajaera calaohichuru, caohacha ichaelanaala, namute cacha belailanaala, naaonjoaain nenacaa'uru, Cana Coaunera cachanein neurenihane jaun.

### *Leeocha'uru aina jiniiquiin ita belaa'in nihacane*

<sup>11</sup> Caate nitohaneein nihacachene coina: "Jiniiquiin ita belaa'in, leeo'cha cachaa'uru niha natiin belaa'in, naaonjoaain ichaao'che," naain inoaelu caje coauneein beratenojoeinein nena ne. <sup>12</sup> Aihana jaun, nainihaacache moconajaera cacha neein nihalune jaun nocoala sohin jaohalu Caainne tocohaneein ichaohacachene. Chanuna nocoala sohin joae Caain. Caohachaa'in suujua coaraa nii rai nocoalane jaunte sohin joae, baasoneein ichaoha nii Caainne jaun.

<sup>13</sup> Inara belai'hureniha Cana Coaunera coitucuuruhine coaa nii que nererojoeaache. Coatiha enaacha inaraacha coarai inerinaainta canejeraa'uru. <sup>14</sup> Ohin nitajenaa rai nena janate nii caje cana ichoterate, chabana nitajenaa charanejeein nena ichaonaa que ichaohacachene coina. Nii jaunte cana amute cachaa'uru belaa'in naaonjoaacache, inae raotojoein coitucunaa jaun. Chateeinti namute cacha belaine, niite ohin nitaje rai nihane jaun aicheein. <sup>15</sup> Satiin namute cacha que jaolequiin nenacaa'urute

leinjiin nechu aansai sonajaineein ne. Inarate raotojoein coitucuhin neeiche, nitohaneein nechu aansai sonajaain nena, coatiha chabana ichaonaa nitajenaa charanejeein nena ranaa nainihe. <sup>16</sup> Coichana aina cutaain cana belaiha Jesocurisitona jaunte, Cana osa corenia coroso que neteein ohalune coitucuhacache. Nitohanihana jaunte, raotojoein jianacoon ichaoha cana amute cachane coina coreniha itolere necairichanaa abaantaain acauru coroatajaneein nihacachene caohachae. <sup>17</sup> Raotojoein ichaohane jaanu que coriqui siriin niha chunine jana, jataain cairichei inejeein coroatajanera latein niha leinjiin namute cachane jana tenihanete, aina cutaain Cana Coaunera belainihane jaun aicheein. <sup>18</sup> Cacalabihuru, nainihe cana ereecha que cana amute cacha belaiha nocoetiin ereein nihacachene. Esinae rauhijiriin cana amute cacha belaihaachene, niicha latei tein belaihaachenete ne.

*Chaque necoatoelanaala tonajelanaala Cana Coaunera acatiha nihacachene*

<sup>19</sup> Nitohaneein nenaate, esinae rauhijiriin ichaonaa chabana nitajenaa charanejeein nena tera aina esinae nihacachene coitucuha curichaachein, Cana Coaunera acatiha nena bana. <sup>20</sup> Chatohanei ichaain nihacachene coreniha cana coulurujaha cana suujuane sainejeeinte, canaacha ichai coitucueraneein ne jianacoon cana tera- Cana Coaunera, Aca itolere coitucueraneein nihane jaun. <sup>21</sup> Canejeraauru, jana cana suujua cuhane chatohaneein baaso ichacaachene coaracaachene jana, chatohanei ichaeniha cachene, Cana Coauneraacha que jaequuin nacatiha nerichaacheein. <sup>22</sup> Acate satiin canaacha bajai tereein, cana rai naitoonjoan tonoraain, Aca jerihane rijijieein chachai nihacachene jaun. <sup>23</sup> Nitohaneein tonoraain nihacachene coina cana rai naitoonjoante, rai Calaohi Jesocurisito esenetaain, le cacha nichaachene jiniiquiin ita belain ichaohacachene coina ne. <sup>24</sup> Satiin naitoonjoan tonoraain nenacaaurute, nii naitoonjoan jianena coacuelanaala, aina jiniiquiin neeuruhane jaun, acaentonai acauru aina ichoae. Nitohaneeinte cana aina ichaohane coitucuhacache, cana que coitucueratiha nii cana rai niicha tei rai Suujuene caje.

## 4

*Cana Coaunera Suujue aina nejeratiha moconajaera suujuene*

<sup>1</sup> Aonacuche canejeraneein cacoelaichauruna caa que erete aonaquiche. Coa Cana Coaunera letono niha nocohetiin inara rai satiin erenacaauru esenetaain nihache. Nitohaneein inara coritana jerera nihane, esinae rauhijiriin Cana Coaunera Suujue sirichuruhane coitucuhichene coina coujunajaain coaranaacuche, jataain lanaeniha arajiin caa chauratane que casajeeurune jaun, tabaauru cana Coaunera letononiha nocoetiin ereuruhane jaun. <sup>2</sup> Nitohaneein coujunajaain coaranaaquichenete, esinae rauhijiriin Cana Coaunera Suujue siricha coitucuriquicheein. Satiin, cachaneein turuhin nejanoaalu Jesocurisitone coitucuhin nenacaaurute, esinae rauhijiriin Cana Coaunera Suujue siricheein. <sup>3</sup> Jana nitohaneein niha Jesusone coitucunaa jerelanaala nenacaauru, coatiha Cana Coaunera Suujue siririnaain. Leinjiin Curisito aina nejeratena moconajaera suujuete siricheein. Inarate coitucuhin neeiche, inara uricho que bera aonaain naonjoaain neeichene jaun. Nii moconajaera suujuete inae caa chauratane que turuhin ne. Acate Curisito que nejeratena nera cacalabihuru.

<sup>4</sup> Jana inarate Cana Coaunera Suujue siriin neeichene jaun, nii casajeeuru ichoae inii neeiche. Nii inara suujua cuhane inaraacha siriite, jataain



mijiaainetiin ne, caa chauratane que nenacaauru rai tenojoin ichoae jauhecotojoeriin. <sup>5</sup> Acaaurute jelai teein caa chauratane que nenacaauru neein neure. Nii jaunte raujiaain caa chauratane que nenacaauru itolereeicha que ereereecure. Nii jaunte acaauru ere aonaain esenetaain tonoraare acaauru rijjIEEEIN caa chauratane que nenacaauru cachaauru. <sup>6</sup> Jana canate Cana Coaunera caje nena nichaache. Nii jaunte Cana Coaunera coitucuurera, cana ere aonaain tonorae. Jana Cana Coaunera coitucuuruhite cana aohana jerene. Niicha cajete nainacaache, “Acate Cana Coaunera Suujue siri. Jana acate casaje moconajaera suujue siri,” naain coitucunaa nainichaache.

### *Jataain cacha belaiha Cana Coaunerane*

<sup>7</sup> Canejeraauru, coanete cana laurijiracuru, chaen nejelau cachaauru, naaonjoainuri belaaain nihacache, Cana Coaunera caje coauneein unaaniha ita belaihaachene coinane jaun. Satiin nitohaneein namute cachaauru belaichate Cana Coaunera calaohineein ne. Niite esinae rauhijiriin Cana Coaunera coitucureein. <sup>8</sup> Chateeinti namute cacha belaine, niite Cana Coaunera coitucueine. Cana Coaunera coitucuera, aiha Cana Coaunerane rijjIEEEIN jataain cacha belaihanee jaun. <sup>9</sup> Cana quete jataain cana belaitohane coarate Cana Coaunera, caa chauratane que acaihanejeein rai Calaohi letoaain, nitajenaa charanejeein nihacachene coina. <sup>10</sup> Belaaain cana arihacachene que ainaa tochaneein cana belaiha Cana Coaunerana jaunte Calaohi letoaelu, cana osa coreniha raajenihane onaa que netihane coina, nabana cana osa coreniha necairichanaa coataa, atiin cana ichoterate cana osa coreniha necairichanaa caje.

<sup>11</sup> Aonacuche canejeraauru. Nitohaneein jataain cana belaaain niha Cana Coaunerane jaun, coanete cana netonai cana laurijiracuru, nejelaauru, naaonjoain belaaain nihacache. <sup>12</sup> Coatiha Cana Coaunera coaraain nihei chunei cacha niqui, nete, ita belaaain, cana laurijiracuru, nejelau cachaauru, naaonjoain belaihaachene cana aina nereein Cana Coaunera. Nii cajete cana belaitoha Cana Coaunerane rijjIEEEIN ichaohacachene coaracurureein cachaauru. <sup>13</sup> Nitohaneeinte aina nihacachene jana, acaentonai cana aina nihane coujunacanu que cana rai Suujue te Cana Coaunera. <sup>14</sup> Canacaanune, caa chauratane que osa caje cachaauru ichoteratihane coina, nii rai Calaohi letoaa Cana Inaca Cana Coaunerane coaraneein caa beebejihacaanu. <sup>15</sup> Satiin cacha, Cana Coaunera calaohineein niha Jesusone coitucuhin berate Cana Coaunera aina ne. Jana Cana Coaunera netonaite, aina nereein.

<sup>16</sup> Nitohanihane jaunna Cana belaiha Cana Coaunerane coitucuhin esentaacaanu. Cana Coaunera cana belaihaneein nihane jaun, rijjIEEEIN namute cacha belaihaachene, Cana Coaunera aina ne. Jana Cana Coaunerate aina netonai ne. <sup>17</sup> Nitohaneeine esinae rauhijiriin jianacoo teteriin cacha belaaain nihacaanune jaun, chaelai que casilanaala, chaque tonajelanaala nerichaanuhin, inae cacha coulurujuhane coina coaitee turuha Cana Coaunera Calaohi Jesocurisito bana. <sup>18</sup> Esinae rauhijiriin cana amute cacha belaaain ichaohacachene, nihei chaque casiin ichaonaana jaanu. Ita belaaain ichaohacanete, jaoleneein ne nii cana casataera cana casetecaeraanu. Jana chaque casiin nihacachenete, cana amute cacha belaaai ichaohenihacachene jaun airichaacheein.

<sup>19</sup> Canacaanune Cana Coaunera belaaain nihacaanu, aca jauriaanejein ichoaichaniha canacaanu belaaain nihalune jaun. <sup>20</sup> Chunocoha: “Canune Cana Coaunera belaihun,” naain iriha natiin, namute cacha belaihanee, acate leinjiin casaje neba ne. Coaracuche nachuhinti, notaracae neuruha nii namute cachaaurune saijIEEEIN acaauru belairiha. Nii jaun techu, nii

amuritoheriin Cana Coaunera belaina nainene, chabana coaraain esenetaenihane jaun. <sup>21</sup> Jesocurisitote cana rai: “Chateeinti Cana Coaunera belaa in ne, nii namute cachaauru belaa in neeine,” naain cana letoaain cana ratirilu.

## 5

### *Canaacha esenetai aina cuaainte moconajaera amiritohacache.*

<sup>1</sup> Satiin Cana Coaunera letono Mesihasi niha Jesusone esenetaaurerate Cana Coaunera calaohineein neeurureein. Nii cana inaca Cana Coaunera belaichate, satiin rai calaohineein nenacaauru belaicheein. <sup>2</sup> Cana Coaunera belaichaache esinae rauhijiriinete, cana letoaane jaan icharichaachein. Nii banate Cana Coaunera calaohineein nenacaauru netonai belaichaachene coitucurichaachein. <sup>3</sup> Cana Coaunera belaihacanete, nii cana letoaane jaan tonoraain rijjijeein chaachacaane ne. Niheichu coatiha caaintai ichaonaa nihein nii naitoonjoan. <sup>4</sup> Satiin Cana Coaunera calaohineein nenacaaurute, chauratane que nenacaauru itolere baaso choae ini. Satiin nii canaacha esenetaite cana suujua lararajiain cana coroatajane, chauratane que nenacaauru cana que nejeratenacaauru amuritoeraneein nihacachene coina. <sup>5</sup> Cana Coaunera Calahineein niha Jesusone que jaaequiin nenaate, caa chauratane que nenacaauru moconajaera letonocuru amuritoreein.

*Caa nichata laurii erenaate, “Naaonjoaaineinte ne Jesocurisito,” naain berane.*

<sup>6</sup> Cau chauratane que niha Jesocurisitone janate, acau que baotisanoinneein neein, coroso que ohin rai coichana jaohalune que, naaonjoain que cojunacatenohineein nedaclu. Cana Coaunera suujuete esinaaen nitohanihane coitucuerate cana que. Nii Cana Coaunera Suujuete chabana nohanelanaala cana rai beraneein ne. <sup>7</sup> Nichatajaainte neure rai Suujue que, nii Aca nihane coitucuhin beracuru. <sup>8</sup> Nii coitucuhin nenacaaurute, Cana Coaunera Suujue, acau, ichana, naaonjoainuri ne. Acaaurute ita suujua rijjijeein beraneein neure. <sup>9</sup> Cachaauru, cana rai nii acaauruhacha coarai beebejeeuruane esenetana nainichaache niqui. Nete jataain nii amuritoeriin nelate, “Naaajoaan” naain biha Cana Coaunerane, nii rai Calao hi que aitohane jaun. <sup>10</sup> Cana Coaunera Calao hi esenetaerate, esinae rauhijiriin aitoha Cana Coaunerane rucujeein siricheein suujua cuhane. Chateeinti Cana Coaunera esenetaene, niite casaje tocohaneein Cana Coaunera tereein, Calao hi que aitoha Cana Coaunerane esenetaenihane jaun. <sup>11</sup> Nii erenaajete cana rai chabana nitajenaa charanejeein nena ichaonaa tiha Cana Coaunerane coitucuhacache. Jana rai Calao hi Jesocurisitote nii ichaonaa chabana satonoelanaala nena teraneein nena ne. <sup>12</sup> Chateeinti Cana Coaunera Calao hi esenetaain ne, nii netonaite chabana ichaonaa nitajenaa charanejeein nena rareein. Jana Cana Coaunera Calao hi esenetaaite raenereein.

### *Niicha letoai satonotihane rai acaauru suujuatiha Joanne.*

<sup>13</sup> Cana Coaunera Calao hi esenetaera niquichene raina caa caritiin laenareeunni, ichaonaa chabana nitajenaa charanejeein nena raeraneein neeiche inara netonaine coitucuhichene coina.

<sup>14</sup> Cana Coauneraacha quete jaaequiin nihacache, jeriha rai Suujuene rijjijeein caje cha bajaain nihacachene cana rai nii canaacha bajai teraneein nihane coitucuhacachene jaun. <sup>15</sup> Nii caje cha bajaacachene aonaa Cana Coaunerane coitucuhin nihacachene rijjijeein techu, cana rai nii canaacha bajai terichaaine coitucuhin nihacache.

<sup>16</sup> Osa que nesarujuiha chunei cana nejerane coara chuneine, rai Cana Coaunera bajaaine. Aihate jianacoon osa caje teeine Cana Coaunera, jataain nitajena jaanu osa tabai nenihane. Jana nitajena jaanu que, jataain osa tabai que nesaruhin nei nihane, coa rai Cana Coaunera bajaache. <sup>17</sup> Satiin itolere osate baaso neein ne. Nete ne cacha itajeranune lanaala nena osa.

<sup>18</sup> Saain canate, inacaneein teein Cana Coaunera coitucuera, inae osa que nesaruna nainenihane coitucuhacache. Inae Cana Coaunera Calaohi que beraichaaain nihane jaun inae dadanaa nainihe moconajaera. <sup>19</sup> Canate Cana Coaunera caje nena nichaachene coitucuhacache. Jana caa chauratane sacutaain nenacaauru Cana Coaunera coitucuuruhite satiin moconajaera bijiu neeure. <sup>20</sup> Chaen techu rai Inaca Cana Coaunera coitucuhin nena coina turuhin cha coitucuhin nihacachene jaanu teein cana que rai Inaca Cana Coaunera esine neein nena coitucuerateein nihalu rai Calaohi Jesocurisitone coitucuhin nihacache. Nii jaunte, nii esine neein nena rai Calaohi Jesocurisito aina ichaohacache. Acate Cana Coaunera esine neein, ichaonaa chabana nitajenaa charanejeein nena teraneein ne. <sup>21</sup> Cacalabihuru caohachaaain necoeraain neeuche, nabana inara coritana coaucuruha nechu aansaneein nenacaauru, Cana Coaunera letononiha nocoetonacaauru casajeeurune coataa.

## Joancha letoi coroataja

### *Ichaonaa rauhi aina ita belaa'in nihacane*

<sup>1</sup> Canuna, Cana Coauneraacha janijiineein rai ita taojiaain coroaeraneein neiniquichene bichauhenaneein, inara rai caa quiricha laenaain letoaaun. Jataaine casuujua aina cutaain inara belaihun. Coatiha canuhacha nii inara belaihaaun. Satiin nii canaacha esenetai ichaonaa nitajenaachara tera esenetaeraaurute inara belaihure. <sup>2</sup> Ichaonaa chabana nitajenaa charanejeein nena tera coitucuichene corenihane inara belaa'in neeun. Nii ichaonaa niicha tei cana suujua cuhane nenaate cuu niha cureein, nirijieein inoaelu netiin nitajenaa charanejeein. <sup>3</sup> Atiin cairichaa'joaain inara coaraain inara belaa'in inara coroatajanemiin Cana Coaunera, rai Calaohi Jesocurisito aina.

<sup>4</sup> Jataaina rachoojoeun, jeriha Cana Coaunerane rijijieein caohachaain ichaa'oruha inara caje nenacaaurune jana erunajaanune jaun. <sup>5</sup> Aonacuche quiicha belaihuri canejeraaurune caa que inara rai aite, inara laurijiracuru, nejelauru cachaauru, naaonjoain belaa'in ichaa'oeche. Coatiha niqui ena ecoona cana letoaa Cana Coaunerane jaan nihei, jeelai inoaelu caje coauneein cana letoaa Cana Coaunerane jaan quene, aitiin caa inara rai laenaun. <sup>6</sup> Nii cana letoaa Cana Coaunerane jaante, belaa'in neein ichaohacachene jaan ne. Nii nunuhe caje coauneein aitoha Cana Coaunerane aonaquichene rijijieein ita belaa'in ichaa'oeche.

### *Cachaauru coritaa amuhemuhencaa'auru*

<sup>7</sup> Caa chauratane sacutaainte amuhemujueeure nech u jataain casajeeuru cacha coritaa. Acaaurute itolere que nelatei cachaneein cau nejanoaain turuhalu Jesocurisitone esenetaain coitucunaa jerecurene. Nitohanein ichaonacaaurute, Jesocurisito que nejeratenaaneein icha'oruhane jaun, aihure. <sup>8</sup> Coaracuche, nabana inara coritaa'in neeuruhane nii esenetaain neeichene, joenreein nitajiha inara relaacaanune jaanne coataa. Aihute coreniha inara rai nii cainaain neeine Cana Coaunera. <sup>9</sup> Chateeinti, cacha relaal u Jesocurisitona jaan edaa cuaain cacha relae. Niite Cana Coaunera coitucuenihane jaun aicheein. Chateeinti, jerichanetojoein rauhi-jiriin aitoha Jesocurisitone rijitoejin cacha relae. Niite Cana Inaca Cana Coaunera coitucuhin, nii Calaohi netonai coitucuhana jaun aicheein.

<sup>10</sup> Jana, caa caitono tocohanelanaala rauhijiriin cacha relaelanaala, nejelauneein cuaain cacha relaeraneei, inara rene turuhane, coa inara loreri asaae raache. Coachu tonaain rai irihache. <sup>11</sup> Chateeinti, rai ereein loreri asaae raain ne. Niite nii baaso turuaane ujuaihoneein nereein.

### *Satononejeeinne caa inara rai aitoreeunni.*

<sup>12</sup> Banejelanaalate ne inara rai irihanune jaanu niqui. Nena quiricha cuhane cuaain aitona jereneeun. Nii jaunna inara rene turuha unaa jere-toon caraajenhane. Inae turuha uhanune banana inara rai beebereeeunni, inara netonai nii coitucuhin neeichene, jiniiquin raotojoein rachoojoejin nena caina.

<sup>13</sup> Cana Coaunera rai ita taojiaain Cana Coaunera bajaaurera aina nenacaauru- janijiin Cana Coaunera ranojoinunru inara nejeraaurute saain inara coaacure.

## Joaancha letoi nichataja

### *Caiho coroaeca Joanne*

<sup>1</sup> Canu inara bichauhenaneeinne, caa quiricha laenaain letoareunni jataain esinae rauhijiriin quicha belaa Caiho rai.

<sup>2</sup> Cana Coaunera coreniha quicha belaa Caiho, icheina Cana Coaunera bajaun ichorataanihane, nii ena caohatiin jeriha rai Suujuene rijijieein neeine tocohaneein raotojoein raurohin neeine coina. <sup>3</sup> Jerichanejeein caohachaaain rauhijiriin ii suujua corelanaala Cana Coaunera aitoonjoan tonoraain neeine beeuruha cana nejeraauru tabaauru turuhinne jaunna, nii coitucuhin jataain rachoojoeun. <sup>4</sup> “Esinaete chuhisi aitoaha Cana Coaunerane tonoraajeein neeure Cana Coaunera coreniha cacalabihuru,” naaina jataain rachoojoeun.

<sup>5</sup> Casuujua aina cutaain quicha belaa, jataain caohatiinte erenaa tonoraain nii cana letoaa Cana Coaunerane jaan ichaain neei. Leochaauru cana nejeraauru coroatajanein, nii coriajai caje uhin turunacaauru cana nejeraaurune maajeein coroatajaneine jaunte, jataain jelai amuritoheriin caohacha ichaai. <sup>6</sup> Nii jaunte, turuhin satiin aonajeeuruha Cana Coaunera ranojoneein nenacaaurune jana, jataain acaauru belaaain caohatiin ichaain neeine beebejeeure. Atiin chaelai latecuruha namuna jaan raine quene acaauruhacha latei teeu, jeriha Cana Coaunerane rijijieein. <sup>7</sup> Acaaurute Jesocurisito que erenaa beebejena que amihanenaa ichaa nii uure. Coatiha acaauru coroatajanena jerecuruha Cana Coaunera coitucuhichurune jana jerecuruhi. <sup>8</sup> Nii jaunte, cana itolere que acaauru coroatajanichaachene caohachae, aina raotojoein abaantaain Cana Coaunera ere beebejeeuruhane coina.

### *Baasonein ichaa Diotrefesine jana, caohacha ichaane coaratiha Demetirione*

<sup>9</sup> Cana Coaunera rai ita taojiaain Cana Coaunera bajaaurera raina leinjiin quiricha laenaain letoaaunlu. Nete cocoainanohineein nihacaanune ere tonorana jerene Diotrefesi, acaacha cachacha letoaane rautatohane jaun.

<sup>10</sup> Chaente jataain casajenetiin, nechuh jataain joenreein canacaanu ere rocohin canacaanu irijiae. Nii jaunna rautaenihacaanu. Chaen jetaote, Cana Coaunera coroaecuruhane coina ita taojiaauruhane jana turuuruha cana nejeraaurune, enooruhane caohateein sitanajae. Chaen jetaote, niha cotijiaain ranajaerane caohate. Niina jataain rautaenihanune jaun, inae turuha uhanune bana cotijiaain rai aitoreeunni.

<sup>11</sup> Aonaaun canejera. Jiaonriha ii netonai, nitohaneein baaso jeroon ii suujua cuaain neeine. Caohachacha que ii suujua coaraain neeun. Caohacha ichaera cachate, Cana Coaunera aina nereein. Jana baaso ichaera cachacha, Cana Coaunera aina nerinaain. <sup>12</sup> Satiin cachaurute caohachaaain suujua coara cachaniha Demetirione beeuru, esinae rauhijiriin caohachanejeein nihane jaun. Canacaanu netonainechu caohachanijihane bihacaanu. Iite chabana nohanelanaala irihacaanune coitucuhi.

### *Niicha laenai quiricha satono tiha Joanne*

<sup>13</sup>Jataainte ne banejelanaala ichei irihanune jaanu. Nena quiricha cuhane cuaain ichei aitona jereneun. <sup>14</sup>Nii jaunne ena ichoharaa unaa jereeun, caraajenhane ichei aitocooaunne coina.

<sup>15</sup>Chaque tonajelanaala raotojoein neeun. Satiin cana belaichaurute ii coaacure. Atiin, “Inara coaacuruhajera,” naain nii cuu nenacaauru cana belaichauru rai beeu.

## Jodasiicha Ietoai

### *Inara coaaucaun*

<sup>1</sup> Jesocurisito cachaneein Saantiaao nejera Jodasi nihanunena caa quiricha laenaun, Cana Inaca Cana Coanera niicha jereineein niicha cotihacuri- Jesocurisito berainojoineein nenacaauru rai. <sup>2</sup> Cairichaojoaain inara coaraain inara corootajanemiin Cana Coanera, leeochoauru aina jiniiquiin ita belaa raotojoein neeinchene coina.

### *Nechu jataain nohanena que inara relaaurerauru (1Fd 2.1-7)*

<sup>3</sup> Jataaina niqui inara aina jiniiquiin cana ichoterateraneein nena que cuaain laenana jereeunlu niqui inara rai, canejeraneein neeinchene jaun. Nete laen jataain ena caohachae inara rai laenacaunne, Cana Coanera cachaneein neeichene jianelanaala, canaacha esenetai esenetaain neeinchene coina. <sup>4</sup> Inae Cana Coanera Quiricha cuhane besihalune rijijieein, inara aina neeuruha nechu jataain nohaneein cacha relaaurerauru, caseteco coaracuruhane rai nenacaaurune coitucuhanune jaun. Acaaurute jataain necha aansai cachaauru ne. Necha jataain cana belaiha cana rai Cana Coanera tenojoineein nena aasaaeraneein nenacaauru ne. Chaen techu cana eroraneein nena- Cana Curuaanaa Jesocurisito coitucuha nocoetelanaalane maajeein aihure.

<sup>5</sup> Inae niqui coitucuhiche inara, nena nacoaauneein inara rai benaa jereeun, Egipto caje coitucuurera Israeli cocoaichacuru rocohane baihate, esenetaaurui cachaauru itajelu Cana Coanera. <sup>6</sup> Coaracuche nachuhinti coujurihu Cana Coanera letononeein nena tocohanein neeurenihalu anjeraaurune jaun, charijibana satonoelanaala nena nocoehena tabai jana neeuruha, satiin rucuheca Cana Coanera que tihanereen tiaaine. <sup>7</sup> Nirijieein techu ailu Sodoma, Gomora, naaonjoainuri cocoaichacuru aina curuaequuin, rohan nenacaauru neseeuu cocoaichacurune maajeein, nejelau ene aina ichaohin, ajenaacha que namuritiin, namute quicha aina ichaojeraquuin naaonjoaunrelu, nitohaniha cana ichaone que airijiin. Nii jaunte charijibana satonoelanaala nena usihanaun caseteco coaracure. Niite satiin cana suujua coaraain, que nainaan ichaohacachene coina ailu.

<sup>8</sup> Nitohanein inae coitucuuruha sainejeeinte, nii inara rene turunacaauru cachaauru, nechu joaereen raaje osa que jaberoco aasajeein, sini anuu caje cha coitucuha nocoetiin cachaauru relaain, Cana Curuaanaa Jesocurisito nocoje chanuhin, acaauru amurijiriin cocoinanacainein nenacaauru quene maajeein mainajeein ereeure. <sup>9</sup> Coaraanachuhinti nenacaenein Moisesa jaberoco amanaa jeriha moconajaerane jana, nii tonaain batohin, que baasoneein ereein nocoje chanunaa coacuelanaala, raujiaain acateein: "Ii suujua raujiaaine Cana Coanerara," naain nihalu moconajaera rai anjeraauru curuaanaanein nena Miqueline. <sup>10</sup> Nete niritiin erena nainiha cacha natiin, niicha coitucuhi que nihanatiin ereein neure cachaauru. Nechu jataain leinjiin ataebinae rijijieein neein, nitajia acaauru jaberocone coina, jaberoco teeure.

<sup>11</sup> Jataainte cairichaojoaure, aihalu Cainne rijijieein ichaaoruhane jaun. Aihalu Balaam aina Corene rijijieein coriquiicha que coaacuruhane jaunte, Cana Coanera sacuuruhane jianecuruha erena tonoraelanaalane jaun

nitajerai neeunre. <sup>12</sup> Ita belaaihuruhane jaa beseta bitoaaiche jiniiquiine jaaunrute, nechu jataain inara rai nocoejena tiha, inara aina lenoneein acau cohin rachoojoein naaonjoaunre nocoejelanaala, nii chuni sinaa coacuelanaala. Cacha beraicha niha nocoetiin churute aihure. Nete nii chuni berailanaala, nechu jataain jaberocohacha beraihure. Acaaurute nii conacainelanaala nena acau rijiichure. Aiha temule inaacane cojoanona bana, inacaelanaalane rijijieeinte neeure. Chaen cojoaisi aina curuataain enuha rocohin jaohacane rijijieeinte neeure. <sup>13</sup> Enaachate baaso ichaa cucuana cuhane fichafichanaane rijijieein, chunijihun nihanatiin baaso ichacure coejelanaala. Chaentechu sona nalu rijijieein mituhin janoaajeein cuujueein, jaiti cunajaun turuelanaala, nocoenaanaun nitajia arasijiene rijijieein nitajia cuurureein nocoenaanaun acauru netonai.

<sup>14-15</sup> Chaen techu nitohaneeururichaain nii cachaaurune que aitoroatiha Cana Coaunerane jaun, Adaan que jauriichuru baiha, acauru caaunsini ineein nena- Enoco netonai jetao: “Satiin nere tonoraeraauru cachaauru janijiin raain, jataain necha aansaineein ichaonacaauru, naansaine aina cuhaain nocoejena charaneein, osaaocuruhane jaun naansaine caaun que baasoneein erenacaauru casetecaain itajenajaane coina, araai oaraancanei rai nere tonoraeraauru anjeraauru uhaain uha Cana Coaunera Calaohi Jesocurisitone janane coaraaun,” naain belu beratihha Cana Coaunerane jaun. <sup>16</sup> Chaen techu acauru cha coitucueraniha nocoetiin, satiin que nererojoeaain, satiin que maihajein ereein, niicha jereeicha que coaacure. Nechu jataain cacha que niicha jerei ichacuruhane coinaachate, cacha rai raotojoein ereeure.

#### *Cana Coaunera coitucuurera rohecaeraauru*

<sup>17-18</sup> Canejeraauru, inara rai: “Cana janonaa satonoelalaje raite neerein, nechu jataain baasoneein suujua letonohacha ichajein ichaonacaauru cachaauru,” naain inara rai beeuruhalu Cana Curuaanaa Jesocurisito rai afosotoorune coaacuche. <sup>19</sup> Acaaurute ita caje neleruhin niha cachane jereein, nechu jataain suujua letono rijijieein ichaohin ichacuruhane jaun, Cana Coaunera Suujua sirichurenihane jaun aihure.

<sup>20</sup> Nete inara, coujurihu Cana Coaunera esenetaeranein, rai cachanein Cana Coaunera Suujue que suujuequuin, Cana Coaunera bajaebajajeein neeiche inarane caohachaera cacoelaichanein nenacaauru canejeraauru. <sup>21</sup> Cairichaaajoaain inara raain, inara belaaain nihalune rijijieein ichaohin, chariji bana satonoelanaala nena tiha Cana rai Cana Coaunera Calaohi Jesocurisitone cohajein neeunche.

<sup>22</sup> Atiin cairichaaajoaain nii esenetana jeriheeichuru coaraain neeuche. <sup>23</sup> Nabana nitajeuruha usi tabai jana nii esenetaichurune coataa, cairichaaajoaain acauru coaraain, tabaauru ichoteratecuche usi tabai caje, acauru que nocohalajiin, jataain baasoneein ichaohin nichao aasajeein neeuruhane jaun.

#### *Raotojoein rachoojoein neeuche*

<sup>24-25</sup> Acaihanijin cana ichoterateranein nena Cana Coauneraachate, inara beraicheein chatohanein baaso ichaain neeinchene coataa. Nii chaeloon baasoneerilanaala, aca Cana Coaunera nihane acatiha rachoojoein turuhin neeinchene coina. Jauriaa caje coaunein nii chariji bana satonoelanaala, aca itolere que laraajiin cocoinanacaineein niha Cana Coaunerane coitucueratein neeine Cana Curuaanaa Jesocurisito. Nitohanemiin.



## Jesocurisitohacha Coaratei Afocarifisi

*“Naaonjoanrichaain,” naain coaratiha Jesocurisitone*

<sup>1</sup> Caate, inae nichuuntaa nitohanerichaaenene jaun rai cachaneein nenacaauru que coaratiha rai Calaohi Jesocurisito aina cuaain Cana Coaunerane jaa ne. Nii jaunte rai nere beraneein nena Joaan nichaaunne rene, rai nere bera anjera letoae Jesocurisito, canu que niicha coaratei coaratiha nii anjerane coina. <sup>2</sup> Nii jaunna, canu que coaratiha Jesocurisito aina cuaain Cana Coaunerane rijjijeein, esinae rauhijiriin nii coaranein coaracaunne rijjijeein laenaun.

<sup>3</sup> Nerausiaecururichaaen caa Cana Coaunera beratenojoin reretaera aina aonaain caa laenanohineein nihane rijjijeein tonoraain nenacaauru, inae ichuunejeeoriha nitohanerichaaenene jaun.

*Caaunsi laurineein Jesocurisito ranojineein nenacaauru iclesiacuru rai laenaa Joanne*

<sup>4</sup> Asia batane que caainsii laurineein Jesocurisito ranojineein nenacaauru iclesiacuru raine canu Joanneein caa laenaun. Raotojoein neeichene jaanu tein neeuruhine- nii nunuhe caje coauneein neeina acaneein neein turuha uheneni neein nena Cana Coaunera, rai nelaurianajaan- *trono* acatiha caainsiineein suujuenein nenacaauru aina, <sup>5</sup> chaen esinae rauhijiriin, aca jerihane rijjijeein neein nere beraneein nena Jesocurisitone maajeein. Acate jauriaanejeein ohane caje ichanaelu. Nii jaunte, satiin chauratane sacuritaain nenacaauru curuaanaacuru curuaanaaneein ne Jesocurisito. Nii Curisitote jataain cana belaitohane jaun, rai coichana aina cuaain osa caje cana rocoelu. <sup>6</sup> Nitohaneein cana teeinte, jelai tein rai cachaneein aihuruhalu saseredotecurune rijjijeein- rai Inaca Cana Coaunera rai caohacha icharanein- niicha jerenohin ichacaachene coina cana tein nelu. Aihana jaun Cana Coaunera necaohacha aina, itolere niicha ichana nainei itolere bana Jesocurisito rainein neeine. Nitohanemiin.

<sup>7</sup> Inae nacoauneein dede sacari jana uhin fauha uha Curisitone janate, satiin coanojoinereein.

Nii sohin jaaoreraluniha natiinte coaraa cuurureein.

Nii jana caa chauratane que laurihu laurihu ichaonacaauru cachaurute, chanaa cuurureein coreniha. Aiha nitohanerichaaen.

<sup>8</sup> “Canune nunuhe caje coauneein itolere coauneranein satono que tiaain acaneein neeun,” naa Cana Curuaanaa Cana Coaunera- itolere curuaanaaneein turu rai nena.

*Jataain caohacha que necaohachaain necoaratihha Jesocurisitone*

<sup>9</sup> Canune satiin inara nejera Joanneeun. Jesocurisito corenihate, canu nejeranein neeiche. Nii rijjijeein techu, jiniiquiin coujunojooineein necairichanaa abaantaacache, laraajiin cana coroatajaniha Cana Coaunerane jaun. Nitohanihane jaunne, Cana Coauneraacha jerei Jesocurisitohacha coitucueratei beebejihanune coreniha caseteconeein Patmo cobeneu neeun.

<sup>10</sup> Ecute tomiho cojoanonaa bana, caniha neeoritoha Cana Coaunera Suujuene jana, canu janori nichaae toniin: <sup>11</sup> “Leinjiin quiricha cuhane iicha

coarai laenaain, caainsii laurineein Asia batane que nenacaauru- Efeso, Esmirna, Pergamoo, Tiatira, Sardisi, Filadelfia, Laodisea, naaonjoainun Jesocurisito cachaneein nenacaauru rene letoaau,” naain mijiaaainein toniha carai jaiha rijijieein nenea- toroonfeta rijitiin erenaane jana aonaun. <sup>12</sup> Nii carai erena coaracaanne coina nauriterichaaunne janate, tirichotiin jiquihaquiin ne ecu caainsineein cono nujua- oro caje ichanohin. <sup>13</sup> Nii caainsineein cono nujua- oro caje ichanohin cataaunne cacha tocohaneein-tijia que ujoai cajionequiin, somajain cajione que cajionequiin- nalarijia que ujoaain oro caje ichanohin sintoroon que ichoraane coaraaun. <sup>14</sup> Nii jana rai couturi ujuite dede sacari tocohanein somajae. Jana, rai notate tirichotiin usi lanaro tocohane. <sup>15</sup> Nii jana rai tijiaaurute, orono cuhane tucuhacaain ichanohin bronce tocohanein jiquihaque. Nii jana rai nerete, jataain mijiaaainein caraturi toni rijitiin tonihane jana, <sup>16</sup> rai raotono nichajai que caainsineein arasijie siri biji cuhane. Nii jana rai nujuae cajete mitue jerane jataain ajinaain sabere. Nii jana rai merite, jataain conotiin conoha enotone tocohanein jiquihaque.

<sup>17-18</sup> Nii jaanne coariin tijia asae comoon onaa rijijieein. Nete biji raotono nichajai que canu mucuhin: “Jiaonriha casiine. Canune ichaohin itolere coaanaain satono que tiaain Coauneraneun. Canune niqui oonlu, nene ichanaaun. Inae charijibana orinaaunni. Canune cana asaae nitajenacaauru rai chabi sirihun. <sup>19</sup> Caa ena nenea iicha coarai laenaain, caa baiha neeninu iicha coarai laenaun. <sup>20</sup> Caa canu biji raotono nichajai que caainsineei arasijie, chaen caainsineei cono nujuaneein nenea oro, naaonjoainuri iicha coaraite, charijibana coitucueraelanaala asinojoneein nenea ne. Nii caainsineei arasijiete Cana Coaunera ranojoneein nenacaauru- iclesiacuru beraihurera anjeraauru ne. Jana nii caainsineei cono nujua oro caje ichanohinte, caainsii laurineein Cana Coaunera ranojoneein nenacaauru- iclesiacuru ne.”

## 2

*Caaunsi laurinei iclesiacuru rai beratenojoin. Caate nii caainsii beratenojoi caje Efesoo Cana Coaunera ranojoneein nenacaauru iclesia beraicha- anjera rai beratenojoin*

<sup>1</sup> “Caritiin Efesoo Cana Coaunera ranojoinuri- iclesia beraichanein nenea- anjera rai laenaau.

‘Aonacuche, caritiinte inara rai laenarate nii biji raotono nichajai que caainsineei arasijie siichaain- cainsineei oro caje ichanohi usi nujua cataaun amunaa: <sup>2</sup> Canuna, itolere iicha ichai coitucuhin, caaintatohane niha natiin jianelanaala neeine coitucuun. Chaen nechu, nii necha ansainein ichaonacaauru abaantasineeine coitucuun. Chaen techu, afosotooru niha nocoetonacaauru niha natiin coujuhin coaraaine jana aca necurene. Nitohaneinte casajenetooruhane coitucuhi. <sup>3</sup> Itolere banate coiinteen jianelanaala jataain canu coreniha necairichanaa abaantaai.

<sup>4</sup> Nete jauriaanejeein aailune tocohanein corajeein quiicha jerei icharanein neneei. <sup>5</sup> Aihane jaun, jauriaa aichejetohilune que coacuhin, nii nunuheneein corajeein icharejetohilune rijijieein nacoauneein corajeein quiicha jerei icharanein neeun, jeriha Cana Coaunerane rijijieein. Ainihanena, nii nihane jaa jelai caje, nii cono nujuaneein nenea rulareeuni ii caje, nacoauneein Cana Coauneraacha jerei icharanein ichoaneine. <sup>6</sup> Nete caohacha ichaai, nii Nicolasa sacuureraauru ichanohichuru

rautaain coaraeneeine jaun. Canuhetonaichu acaauru ichanohichuru rautaain coarahaau.

<sup>7</sup> Aohana jereraauru, caa ereretaain Cana Coaunera ranojoinuru- iclesiacuru rai Cana Coaunera Suujue beratenojoin aonacurumiin. Itolere necairichanaa abaantaain satono que tiaain sacuerate, nii chariji bana sanaachara ichaonaa tera enuha inaa Cana Coaunera nenajaun nena que lenonereein,' naain laenau Efeso beraicha- anjera rai,"

nae nii canu notaara.

*Esmirnau Cana Coaunera ranojineein nenacaauru iclesia beraicha- anjera rai beratenojoi*

<sup>8</sup> "Caritiin Esmirnau Cana Coaunera ranojoinuri- iclesia beraichaneein nena- anjera rai laenau:

'Aonacuche, caritiinte inara rai laenaerate nii nunuhe caje coauneein satono que tiaain acaneein nena- ohalune caje ichanaain nena:

<sup>9</sup> Canune jataain necairichanaa abaantaain, cairichainejeein neeichene coaraau. Nete chaque lanaeneriquicheein dedeeu. Chaen nech jataain baasoneein ichei ereeuruha Joriooniha nocoetonacaaurune coitucuun. Acaaurute esinae rauhijiriin moconajaera letono laurineein neeure. <sup>10</sup> Jiaonriha necairichanaa coariquine que casiin neeine. Moconajaerate caresero cuhane inara tabaauru enoeratereein, nii aina cuain satiin inara coujunojineein coanojineequichene coina. Jataainte necairichariquicheein lechoonca janohin. Nete ohichene que tiaaajoaain nirijieein jianelanaala abaantaain sacuhichene, canu nii cainaraanuque chariji bana nitajenaacharanejeein nena ichaonaa tereeeunni inara rai.

<sup>11</sup> Aohana jereraauru caa Cana Coaunera ranojoinunru- iclesiacuru rai Cana Coaunera Suujue beratenojoin aonacurumiin. Laraajiin itolere necairichanaa amuritiin nenacaauru- coatiha ooru baiha nacoauneein ohin nitajerinaain acaauru suujue,' naain laenau Esmirnau Cana Coaunera ranojoinuri iclesia beraichaneein nena anjera rai,"

nae nii canu nae nii canu notaara.

*Pergamoo Cana Coaunera ranojineein nenacaauru iclesia beraicha- anjera rai beratenojoi*

<sup>12</sup> "Caritiin Pergamoo Cana Coaunera ranojineein nenacaauru iclesia beraicha- anjera rai laenaun:

'Caate aitiin laenaerate nii nujuaae cuhane jerane jataain ajinaain sabere siricha: <sup>13</sup> Raotojoeeine moconajaera rori rohan ichaohichene coitucuun. Nete atiin caitoonjoa esenetaain canuhacha icharatei ichaquichene jianelanaala neeiche. Niheichu nii canu ere bera Antipas sohin jaaoruhalu, nii moconajaera neseu natiin, canu esenetaain neeichene jianein niheeiche.

<sup>14</sup> Nete neeje ichei baaso, iniha nenacaauru que ichei aitocoaunne jaanu coitucuhine coina. Nii iniha nenacaauru tabaaurute, Israeli inoensihuru relaain nihalu Balaamne jaacha tonoraain jianena jerecurene. Nii Balaamte baaso que Balac suujuatihane jaun, ecaantooru que banijiaain nena lenone que Israelitaauru coroaatein, itolere osa que sarueratenajaaine maajeein naaonjoaenlu. <sup>15</sup> Chaen techu, tabaauru iniha nenacaauru acaauru relaain nihalu Nicolasa sacuurerane jaan jianena jerecurene.

<sup>16</sup> Aihana jaun, chajaain ena esinae Cana Coaunera esenetaeranein jeriha Cana Coaunera rijijieein quiicha jerei icharanein neeuche. Ainihanena ena inara rene uhin, nii canu ujuae cuhane jerane ajinaai nenaasabere que acaauru soreeunni.

<sup>17</sup> Aohana jereraauru Cana Coaunera raonjoinuru iclesia rai Cana Coaunera Suujue beratenojoin aonacurumiin. Itolere necairichanaa abaantaain satono que tiaain sacuurera raine chariji bana coaraelanaala asinojoneein nena mana que acaauru coroaatereunni. Chaen nech, nii chariji bana coitucuerelanaala nena- cacha curuaa siriin laenanohinein leinjiin ajeri somajain nena tereuni acaauru rai. Nete laen nii ajeri raera, nii curuaa erora coitucureein, naain laenaau Pergamoo Cana Coaunera ranojoinuri iclesia beraichanein nena anjera rai,”

nae nii canu notaara.

### *Tiatirau Cana Coaunera ranojoinuri beraicha- anjera rai beratenojoin*

<sup>18</sup> “Jerichanejeechu, Tiatirau janijiin Cana Coaunera ranojoneein nenacaauru iclesia beraicha- anjera rai laenaau:

‘Caritiinte aitiin laenaerate nii usi lanaro tocohanei notaain- coata lanajai jicharoanohi tocohanei tijiaain nena- Cana Coaunera Calaohi: <sup>19</sup> Canune jitariin iicha ichai coitucun, jataain cachaauru belain, iicha esenetai esenetaain, itolere necairichanaa abaantaain itolere ichaaine coitucuhanu. Chaen nech, jataain jauriaalu amuritoheriin ena caohachaaichaine coitucun.

<sup>20</sup> Nete neejen ichei aitocoaaunne jaanu, Canu cachanein nenacaauru coritaa, nech Cana Coaunera coitucueraniha nocoetiin, ecaantooru que banijiaain nena lenone que acaauru coroaatein, chabana nitohanai osa que nesaruna naineniha cachane saijieein itolere osa que acaauru rohecaaa nii ene Jesabeline abaantaaine jaun. <sup>21</sup> Canune niqui Cana Coaunera coitucueranein nihane cojoaun. Nete ainaa jerelanaala, niheichu osa tabai que nesaruhane jianena jerene.

<sup>22-23</sup> Nii jauna, nii ene cunaitaain bereecurune maajeein ateinareeunni. Chaen nech, nii ene aina ichaojeraquiin neeuruhane jianelanaala nenacaauru ateinaain, jataain necairichanaa tabai que cairichanajareeunni. Nitohanein ichacaunne banate, suujua cuhane cachaauruhacha coacuhi coitucuhanune que nainaa cuurureein satiin Cana Coaunera ranojoneein nenacaauru iclesiacuru. Jana inara raine, le cacha cachanequichene rai, inaraacha ichanohin rijijieein inara rai tereunni.

<sup>24</sup> Nete laen inara Tiatirau neinequichene, nii relanajaain neeuruhane jaan moconajaera suujua asinojoneein nena coitucuhin tonoraain neeichene, nihei nii que tonaain inara rai irihanune jaanu. <sup>25</sup> Aihana jaun, turuhanune reentiaain jerichanejeein sacuuche jianelanaala.

<sup>26</sup> Itolere necairichanaa abaantaain satono reentiaain canuhacha jerei ichajeein sacuureraaurune cocoinareeunni, lauri lauri nenacaauru cachaauru curuaanaanein neeuruhane coina. <sup>27-28</sup> Charijieein teeinti canu cocoinaain nelu Ofa Cana Coaunera, nii rijijieeine inara cocoinareeunni, lauri lauri nenacaauru cachaauru curuaanaanein neeichene coina. Nii banate coata caje nena otiha que erenaa tonoraelanaala lauri lauri nenacaauru tuteneriquicheein, darohe tutenecuruhane rijijieein. Chaen nech, nii choae tacaain janonaarai mitunaa arasijie tereuni acaauru rai.

<sup>29</sup> Aohana jereraauru, caa Cana Coaunera ranojoinuri iclesiacuru rai, Cana Coaunera Suujue beratenojoin aonacurumiin,' ”

naain laenarate nii canu notaara.

### 3

*Sardisihu Cana Coaunera ranojineein nenacaauru iclesia beraicha- anjera rai beratenojoin*

<sup>1</sup> “Caritiin Sardisihu Cana Coaunera ranojoinunru beraicha anjera rai laenaau, naain laenarate nii caainsiinei Cana Coaunera suujue aina caainsiinei arasijie siricha:

‘Canune jitariin iicha ichai coitucuun. Ichaohate niqui ii beeure. Nete inae ohi. <sup>2</sup> Aihana jaun, itolere que caohachaaain nainaaain nii cautenacaauru lararajiaau. Inae ohin nitajeeurhane raite neeure. Chaen nechu esinae rauhijiriin Cana Coaunera notaracae, caohachaaain iicha ichai ichaaain neneeine coitucuun. <sup>3</sup> Nii jeriha Cana Coaunerane rijijieein, caohachaaain ichaohin neeine coina nerelaailune coacuhin- nacoaauneein caohachaaain ichaao. Canu jerichaaune rijijieein, itolere que nainaaain caohachaaain ichaeneeine ne, coitucueniha cachane jana turuhin basijiauha asijiautone rijijieein cha coatejeneeine jana turuhin ii casetecareeunni.

<sup>4</sup> Nete nii Sardisihu neeure coroatajajeein chabana cajione calanoajelanaala nenacaauru. Acaaurute cajione somajai jiaain cajiniichaaain amuhemuhecurureein, nitohaneein neeuruhane coina nelatecuruhane jaun. <sup>5</sup> Itolere necairichanaa abaantaain, canu jerichaaunne rijijieein nenacaaurute, nitohaneein cajione somajai que necoreeteurureein. Nii choae tacaainchu, canu quiricha caje acaauru curuaa elonarinaaunni. Chaen nechu, canu Inaca, rai anjeraauru, naaonjoainuri acatiha tein acaauru coitucureeuni.

<sup>6</sup> Aohana jereraauru, Cana Coaunera ranojoinuri iclesia rai Cana Coaunera Suujue beratenojoin aonacurumiin,' ”

naain laenarate nii canu notaara.

*Filadelfiau Cana Coaunera ranojineein nenacaauru iclesia beraicha- anjera rai beratenojoin*

<sup>7</sup> “Caritiin Filadelfiau Cana Coaunera ranojineein nenacaauru iclesia-beraicha rai laenaun:

‘Caate aitiin laenaerate nii Rabiri rai chabi siricha- Cana Coaunera esineneein nenea. Acate acuujua joracaane, nii chuni funaa nainene. Jana acuujua fuhane, nihei chuni joaracaera. <sup>8</sup> Canune jitariin iicha ichai coitucuun. Aonaaun, ii raine joaracanojineein canu acuujua siricheeunni, nerinaain chuni funaa nainera. Jataain laraajiin neeineque airijiinte, quere tonoraain quiicha jerei icharaneein neei. <sup>9</sup> Canune ichareeunni nii nechu moconajaera rai cacha raeraneein nenacaauru- nii Joriooneeuruhane que airijiin Joriooniha nocoetonacaauru- casajeeuru itiha asae neseeonriaauruhane coina. Nii banate, jataain ii belaitohanune coitucuha cuurureein. <sup>10</sup> Esinaete rauhijiriin, itolere bana caitoonjoan tonoraain canu jerichaaunne rijijieein neei. Nii jaaunne, inae cojunojinecuruhane coina, satiin colurejenojinecururichaaain caa chauratane que nenacaaurune bana, ii beraicheeunni chatohaneein teraaine coataa.

<sup>11</sup> Enane nacoaauneein turoreeunni. Aihane jaun, caa ena neeine rijijieein jerichanejeein sacuu, nabana chuni ii que banijiaain nenea ruluhin raane coataa. <sup>12</sup> Itolere necairichanaa abaantaain sacuureraaurune, Cana

Coaunera loreri banesijianeein tihanune, nii chariji bana satonoelanaala caje mituelanaala ecu neeurureein. Chaen nechu, acaauru jaberoco que teein Cana Coaunera curuaa laenaain, dede caje ena nenea Cana Coaunera nenajan Jerosaleen curuaane maajeein laenareeunni, acaauru jaberoco que teein. Chaen nechu acaauru jaberoco que teein ena nenea canu curuaa laenareeunni.

<sup>13</sup> Aohana jereraauru, Cana Coaunera ranojoinuri iclesia beraicha- anjera rai Cana Coaunera Suujue beratenojoin aonacurumiin, ’ ”

naain laenarate nii canu notaara.

*Laodiseau Cana Coaunera ranojineein nenacaauru iclesia beraicha- anjera rai beratenojoin*

<sup>14</sup> “Caritiin Laodiseau Cana Coaunera ranojineein nenacaauru beraicha- anjera rai laenaan.

‘Caate aitiin laenarate nii Cana Coauneraacha ichai coaraneein, nohanelanaala beraneein itolere Cana Coauneraacha coaunai Coaunera Esine neein Nenea: <sup>15</sup> Canune jitariin iicha ichai coitucuun. Bajianachuhinti canu jerichaaunne rijijieein, corajeein quiicha jerei ichaeneei. Jana ainihane corajeein moconajaeraacha jerei ichaeneei. <sup>16</sup> Nete quiicha jerei corajeein ichaelanaala, niheichu moconajaeraacha jerei corajeein ichaeneeine jaun, nii chaneein neneei. Nitohaneein ajajaineein niheichu, jelajerilanaala, naajoaain neeine jaun, chanein neneeine jaunne ii naraaareeunni canu ujuaae caje. <sup>17</sup> Iite niqui Inae jataain raotojoein nihanu cha latejelanaala, inae caohacha ichacaaune jaun, naain ereei. Nete jataain cairichaaajoaai, cairichanojineein aiha leinjiin cairichai cha colane nenea rijijieein neein- maosa rijijieein neeine jaun. <sup>18</sup> Nii jaunne ichei aitoon, canu caje mocohin tucucanohin oro coreteeine coina. Nii banate esinae rauhijiriin canu jerichaaunne rijijieein neein, aiha leinjiin cairichainejeein cha colane nenea rijijieein neeine caje, cha caohacha ichaain, caohachaaain chaachaaain neeine coaraain neriquiin.

<sup>19</sup> Canune satiin canuhacha belai canu cachaauru baaso ichaain neeuruhane coaracaaunne, acaauru cotaain acaauru suujuateein cairichana- jaaun. Aihane jaun, nii baaso ichajeein neeine janelanaala baasoneein jerichanejeein sacuhinene ii cairichareeunni. Aihane jaun, chajaain ena caje coaunein nunuhetein jeriha Cana Coaunerane rijijieein ichaao.

<sup>20</sup> Aonaan, canune itolere bana acujua beraicha rijijieein acujua niha neein inara cotijaaun. Chateeinti bajaee bajaecaaunne aonaain canu raain ne rai suujua cuhane, nii ainane jiniiquiin lenonerichaanuhin.

<sup>21</sup> Chateeinti itolere necairichanaa abaantaain jerichanejeein janelanaala sacue, nii raine canu rohan nelauriaane jaanu rori tereeeunni. Charijieein teeinti, itolere necairichanaa abaantaanune jaun, canu Inaca Ofa nelaurianajan rori ichoae jiniichaain nelauriaaun, nii rijijieein.

<sup>22</sup> Aohana jereraauru Cana Coaunera ranojoinuri iclesia beraicha- anjera rai Cana Coaunera Suujue beratenojoin aonacurumiin, ’ ”

naainte laenarate, nii Cana Coauneraacha ichai coaraneein nohanelanaala beraneein- itolere Cana Coauneraacha coaunai coaunera esine neein nenea.

## 4

*Dedeeu Cana Coaunera coroaecuruhane*

<sup>1</sup> Niritoha caraine baiha dede coaracaaun jabatoroainne janate, joara-caeratihaneen ne cana dede bacuujuua. Nii janane, jauriaanejeein leinjiin jaiha rijijieein nenea- toroonfeta rijitiin tonihane jana aonacaaunne janate: “Chajaaui cajiha iniha uune, caa baiha nitohaneen airichaaaine coarate ii quete coaraaicha,” naain carai toni eheeona.

<sup>2</sup> Nii rijieeoritiin, caniha neeoritoha Cana Coaunera Suujuene janane, dedeeu jataain caohatiin nelauriananaja rori- *trono* coaracaaunne janate, ecu nii nelauriananaja rori- *trono* ichoae laujuae leinjiin. <sup>3</sup> Nii nelauriananaja rori ichoae nenaate, ajeri jataain caohati colohin nenea- jaspe tocohanenihane cornalino tocohaneein jataain caohatiin colohe rai jaberoco. Nii nelauriananaja rori tinonoritiinte, tinohanre leinjiin iino, jataain conotiin beraurosihojoaain colonaa esmeralda tocohaneein. <sup>4</sup> Chaen nechu nii nelauriananaja rori- *trono* tinonoritiin niha jataain caohatiin coroata choonca jenaain rori caohachaaaurune jana coaracaaune janate, ecu nichoae neeure coroata choonca jenaain ichauhenaauru, somajaain cajione que cajionecohin, oro caje ichanohin comai siriin. <sup>5</sup> Nii rori- *trono* cajete, jataain mijiaaaneen mitue jiacano, erena, arara, naaonjoainuri. Nii janate, nii rori acatiha lanalanaque caainsineen siricho. Nii caainsine lanalanaqui sirichote, nii caainsine Cana Coaunera suujueneen ai. <sup>6</sup> Chaen techu, nii rori- *trono* acatiha cucuana baca tocohaneein, jataain ajiarojoeritiin asaaun tiaain jiquihaquiin inanacae. Nii nelauriananaja rorihuru cataaun nenea rori tinonoritiinte ne, jenaain cacha tocorijianeen, janori, nacatichai, naaonjoain jelon notaacoaain. <sup>7</sup> Nii leinjiinte aain tabai- leon tocohanee. Leeochate jana, baca curuaanaa toro tocohanee. Jana nii acaauru nichatajate leinjiin cacha tocohanee. Jana acaauru nejenate, uujuirii tabai-aquila tocohanee. <sup>8</sup> Nii jenai jelai rai nichao que ichaohi nenacaaurute, nenainetiin saotaneen itarohin, jianacoon, asaaun, naaonjoaain acaauru jaberoco nainecojoaain nota sirichure. Janotiin, jiichoo, naaonjoaainte:

“Cana Curuaanaa Cana Coaunera esine,  
itolere que laraajiin  
itolere ichana naineraneen nenea,  
iite iineen neeilu,  
enanetojoeen acaneen neei-  
iineen turuha uriquiin,”

naaure jiichoo, janotiin, naaonjoaain jianelanaala.

<sup>9-10</sup> Nii cacha tocohaneein nenacaaurute, acaneen necaohachaaain niha- nii rori caohacha ichoae- nii chariji bana ohelanaala nenaane coroaecure. Nii nainihate coroata choonca jenai ichauhenaauru, nii ecu nenacaauru nacatiha neseonriaain corojeein, nii rori acatiha acaauru rai comai si- heitiin:

<sup>11</sup> “Iite esinae rauhijiriin,  
canacaanu Curuaanaaneen canacaanu Coauneraneen-  
ii necaohacha que iineen neei, laraajiin.  
Iite itolere coaunaain neeilune jaan,  
ii jereeine rijijieein necoaunaain nihacoaelu,”

naaure coroaecuruhane naineen.

## 5

*Quiricha laenanohineen nenea aina carenero narejeen*

<sup>1</sup> Nii janate nii rori caohacha choaae lauheconaa coaracaaunne jana biji raotono nichajai que leinjiin Quiricha sichaain lauheque. Nii quirichate retutonohineein, jeranu laenanohineein ne, caainsinei fuera que caohatiin funojoinnein. <sup>2</sup> Nii jana coaracaaunne janate ecu ne leinjiin anjera jataain itolere ichana nainihane que nelateein. Nii anjerate jataain tonijiaain: “Chana jataain nelate que nelateein, caa quiricha fuera beuhin joracanaa naaine,” naain bajaee.

<sup>3</sup> Nete dedeeu, chauratane tinonocoritiin, chauratane asaae, naojoaain niha natiin nene chunei nii quiricha joaracaain coana nainera. <sup>4</sup> Nitohaneein neniha chunei nii coina nelateein nii quiricha joracaain coaraain ereretanaa nainera cachana jaaunne jataain chanaaun. <sup>5</sup> Nii janate: “Coo jataain chanaa. Niha leinjiin nii coina nenea- nainera. Acate Joda lauri caje nenea Leon- cana curuanaa inoansi Rabiri nefoerate ne. Niite nitohanei ichana nainihane coina itolere amuritiin nihane jaun, nii caainsineein nenea rai fuera soaain joaracareein,” nae canu rai leinjiin acaauru bichauhena.

<sup>6</sup> Nii janate, nii nelauriananaja rori caohacha- *trono* aina nii jenaain rai nichao que ichaohin nenacaauru, nii coroata choonca jenai ichauhenaauru, naaonjoaainunri cataaun niha Carenero Narejeen ne jana coaraaun. Nii Carenero Narejeen coaracaaunne janate ecu chujuheque, cairichaaain atinanojoinihalune saijieein, Cana Coaunera Calaohi Jesusoneein. Nii Carenero Narejeente, caainsiniha rai jichone jana caainsine rai nota. Niichurute Cana Coaunera suujueneein satiin chauratane que letononeein neeure. <sup>7</sup> Nii Carenero Narejeente cutiin, nii rori caohacha choaae raotono nichajai que quiricha siichaain lauheconaa caje quiricha raaori. <sup>8</sup> Nitohaneein nii quiricha raaoriha nii Carenero Narejeenne rijieeoritiinte, neseeonriaaure nii Carenero Narejeen acatiha, nii jenaain ichaohin nenacaauru aina, nii coroata choonca jenaain nenacaauru ichauhenaauru. Satiin acaaurute, nenainetiin quitara rijijieein nenea- arapa sirichure. Chaen techu, nenainetiin oro caje nenea acau cooruhane jaan- curu nainecojoaain enuha sacari juuaain nenea sirichure- nii coroata choonca jenai ichauhenaauru. Nii enuha sacari juujuite Cana Coaunera bajaauruha Cana Coaunera cachaneein nenacaaurune jaan neein ne. <sup>9</sup> Nitohaneein neeinte ena nenea nenatena que nenateein:

“Iite nii quiricha fuera soaain joracanaa naineei.

Ii sohin jaaoruhane janate,

ii coichana que acaauru coreteei,

acaauru ranaa nainiha Cana Coaunerane coina.

Nitohaneente,

satiin caa chauratane tinonocoritiin lauri lauri neein nenacaauru  
cachaauru,

lauri lauri nere que ereein,

naaonjoaainunri caje raain,

cachaauru coreteei

acaauru ranaa nainiha Cana Coaunerane coina.

Nitohaneein ichaaina jaunte,

quiricha fuera soaain joracanaa naineei.

<sup>10</sup> Nitohaneente acaauru cocoainaai,

saseredote neein, curuaanaa neein,

naaonjoainein neeuruhane coina.

Nii jaunte, satiin chauratane sacutaain curuaanaa neein neeure,”



naain nenatecure nii coroata choonca jenai ichauhenaauru.

<sup>11</sup> Nii baiha coaracaaunne janate, ecu ereerecure arajiin nii roritrono caohacha rohan nenacaauru anjeraauru. Nii baiha nii jenai ichaohin nenacaauru, nii coroatachoonca jenai ichauhenaauru naaonjoainuri. Nii janate ecu neeure jataain arajiin oaraanca milloonneein amurijiriin.

<sup>12</sup> Acaaurute jataain tonijiaain:

“Jataainte nelate  
nii sohin jaonojoinnein nenaalu Carenero Narejeen.  
Nii jaunte,  
itolere ichana nainihane jaanu,  
itolere nerausiajeein nihane jaanu,  
itolere coitucuhin nihanu jaanu,  
itolere que laraajiin nihanu jaanu,  
coasitanoinihane jaanu,  
necaohacha que necaohachaane jaanu,  
coroaenojoinnein nihane jaanu,  
naaonjoaain raeraneen ne,”

naaure nii araai oaraanca milloonneein nenacaauru anjeraauru.

<sup>13</sup> Nii rijieoritiinne, ereerecuruha satiin Cana Coauneraacha coaunahine jana aonaan. Satiin dede que teein niicha coaunai, atane que teein niicha coaunai, nii baiha satiin cana temurau cucuana cuhane nenacaauru, atane cuhane nenacaauru, naaonjoaainunri Cana Coauneraacha coaunai ere aonaan.

“Nii rori choae lauheconaa,  
chaen nii Carenero Narejeen, naaonjoaaihunrite,  
coroaenojoinnein aca neein  
necaohacha que necaohachaain nelate que  
nelateen neeuruhane jaanu teeure,”

naain ereerecure.

<sup>14</sup> Nii janate, “Nitohaneen neeine,” naaure nii jenai ichaohin nenacaauru.

Nii jana, nii coroata choonca jenai ichauhenaaurute, nii Carenero Narejeen acatiha neseonriaain coroaecure.

## 6

### *Caainsine fuera*

<sup>1</sup> Jaurihanejeein, leinjiin fuera joracaa nii Carenero Narejeenne jana coarajihanune janate, nii jenaain ichaohin nenacaauru caje leinjiin ere arara rijitojoaaintiin tonijiaain toniin: “Chajaau cajiha,” naane jana, <sup>2</sup> coaracaaunne janate ecu leinjiin cabario somajain choae lajuae leinjiin cacha tenuna sijiaain. Nitohaneen comai teeuruha nii cacha raine baihate, amue nii que nejeratenacaauru amuritiin, itolere bana acaauru amuritoeraneen nihane coina.

<sup>3</sup> Nii janate, nii fuera que jaurii joracaa nii Carenero Narejeenne jana, nii ichaohin nenacaauru coroataja: “Chajaau,” naane jana aonaain coaracaaunne jana, <sup>4</sup> ecu mitue leecha cabario lanajaain. Nii janate nii cabario choae nelaurianaa rai nelatei teeure, ita sohin ita jaaoruha caa chauratane sacutaain nenacaauru ne coina. Nitohaneinte leinjiin Sabere seenjoa teeure nii cabario choae nelaurianaa cacha rai.

<sup>5</sup> Nii baiha, nii fuera nichataja joracaa Carenero Narejeenne jana coarajihanune janate, nii ichaohin nenacaauru caje acaauru nichataja:

“Chajaau” naane jana coaracaanne janate, ecu mitue cabario jichojoaain. Nii janate, nii cabario jichojoai choaae lauheconaa leinjiin balaansa siichae.

<sup>6</sup> Nii janate, nii jenai ichaohin nenacaauru caje ecu toniin:

“Le quilojoei aroso rijijieein nenea tiricote corereein le janohin amihane-naa neein. Nii jana, nichata quilojoei aroso rijijieein nenea sebadate corereein le janohin amihanena neein. Coa laen erene, bino, naaonjoaain aasaeca,” naain toni erena nii jenaain ichaohin nenacaauru cataaun toniin.

<sup>7</sup> Nii fuera nejena joracaa nii Carenero Narejeenne janate: “Chajaau,” nae nii jenai ichaohin nenacaauru caje leinjiin. Nii jana coaracaanne janate, <sup>8</sup> ecu ne cabario somaajiojoaain. Nii cabario choaae nelauriaain cunaa curuaate Onaane. Nii ichohachaniha unaa caaijie unaate onaa curuaanaa moconajaerane. Nii Onaa curuaanaa- moconajaera raite, chauratane neleru nejena que niicha ichana nainei ichaane jaanu teeure, ita sohin ita jaoruha arajiin cachaaurune coina, tabai mijitena caaun ooruha cachaaurune coina, cunai caaun ooruha cachaaurune coina, cachaauru sooruha atane que nenacaauru aain tocohaneein nenacaauru coitucuchuhichurune coina.

<sup>9</sup> Inae nii fuera nesaogui joracaa Carenero Narejeenne jana coaracaanne janate, Cana Coaunera belaihuruhane jaan rori- *altar* asaae neeure Cana Coaunera beratenojoin beeuruhane coreniha atinanohichuru.

<sup>10</sup> Nitohaneein ecu neeinte jataain tonijiaain: “Itolere curuaanaacuru amuritoheriin Curuaanaa- osa colane nenea saanto- cha ichaaine coina aito- hine icharaneein nenea, chatohanai bana caa chauratane que nenacaauru ichao colurujueein, canacaanu atinaeraauru cairichareei,” naaure nii ecu nenacaauru onacaauru.

<sup>11</sup> Niritocuruhane janate, acaauru rai cajione somajain teein: “Jauriaa nebetacaorihuche coa carajaaeriin. Jaiti lanajeece, inara sohin jaoruha ne rijijieein, leeochoauru inara nejeraauru Jesocurisito beratenojoin beeurera sohin jaoruhane nainauruhane reentiaain cohacorihuche,” nae acaauru rai.

<sup>12</sup> Nii fuera nesaotane joracaa Carenero Narejeenne jana coaracaanne janate, uhe jataain mijiaaaineein carora tabai. Nii janate, jataain jicholeneein conoene enoto. Nii janate, atene netonai conoelanaala ichana tocohaneein ne. <sup>13</sup> Nii janate, jataain mijiaainetiin uhin liaaca cujuanane jana naluha *iquera* inaa nujuarine amuneein nalue dede caje chauratane choaae arasijie. <sup>14</sup> Nii janate, retutunohiniha faferone tocohaneein nereetuhitiin nitajiheite dede. Nii janate, nerurujuacoaain nelonae satiin situha cataaun nenacaauru obenecuru aina ichatane ucuunooru. <sup>15</sup> Nii jaunte, chauratane que satiin curuaanaa neein nenacaauru atane jachuru cuhane, ichatane cataaun nenacaauru ajeri cuhaneuru nasichure, tabaaihuri aina jiniiquiin, chaen soondarooru curuaanaacuru, coriquihonacaauru, jataain itolere que laraajiin nenacaauru. Cairichanojoneein nenacaauru, chaen cha ujuaihonelanaala nenacaauru, naaonjoainuri nasichure atane jachu, ajeri jachu, naaonjoainunri cuhane. <sup>16</sup> Nitohaneinte: “Canacaanu choaae nefaruhin canacaanu asihu, canacaanu coaraa taa rori caohacha- *trono* choaae laujuaine coataa, jataain necairichanaa cuhane canacaanu casetecaa Carenero Narejeenne coataa. <sup>17</sup> Inae catohaneein caseteco coaraain necairichanaa cojoanona que turuhane jaun, nerinaain chunei abaantanaa nainera,” naaure.

## 7

*Israeli laurichuru cojunacatenohineein nenacaauru*

<sup>1</sup> Nii baiha coaracaanne janate, enoto mitu jeroon, enoto soo jeroon, enoto soo coarajeein cana raotono jeroon, enoto soo coarajeein cana ajaabiji jeroon, naaonjoainuri jeroon chujurijiatocure jenaain anjeraauru. Ecu neeinte situha nii jenai laurii jeroon caje uhin cujuanane coataa acatecure. Nabana situhi chauratane, cucuana, nuna, naaonjoainuri ichoae situhin jiatuhane coataa. <sup>2</sup> Chaen techu coaracaane jana, enoto mitu asajai caje uhe leinjiin anjera. Acate Cana Coaunera ichaohin nena cojunaca *seecho* siri. Nii anjerate tonijiaain eheque, nii jenaain nenacaauru anjeraauru, chauratane, cucuana cuhanai, naaonjoainuri aasaaena nainecuruhane jaanu raaurera rai. Nitohaneein tonijiaain ehequiinte:

<sup>3</sup> “Jiaonriha jaiti Cana Coaunera cachaneein nenacaauru nauri que Cana Coaunera cojunaca siricha *seecho* tenihacachene jana, chauratane, cucuana, nunacuru, naajoainunri aasaaecache,” naain, eeheque nii leinjiin nii jenaai naraai aanjeraauru rai.

<sup>4</sup> Nii jana, aonacaanne janate, le faasha jena choonca oaraancaain satiin Isaraelitaauru lauri caje nauri que Cana Coaunera cojunaca *seecho* sirichaauru curuaacuru janiichure. <sup>5</sup> Nitohaneeinte,

Jodaa lauri caje lechoonca coroata oaraancaain nauri que Cana Coaunera cojunaca *seecho* que cojunacatenoine.

Jana Robeen lauri caje lechoonca coroata oaraancaain.

Jana Gada lauri caje lechoonca coroata oaraancaain.

<sup>6</sup> Jana Asere lauri caje lechoonca coroata oaraancaain.

Jana Nefatalii lauri caje lechoonca coroata oaraancaain.

Jana Manasee lauri caje lechoonca coroata oaraancaain.

<sup>7</sup> Jana Simeon lauri caje lechoonca coroata oaraancaain.

Jana Lebi lauri caje lechoonca coroata oaraancaain.

Jana Isacara lauri caje lechoonca coroata oaraancaain.

<sup>8</sup> Jana Saboloon lauri caje lechoonca coroata oaraancaain.

Jana Jose lauri caje lechoonca coroata oaraancaain.

Jana Beenjamiin lauri caje lechoonca coroata oaraancaain naaonjoaain Cana Coaunera cojunaca siricha *seecho* que acaauru auri que cojunacatenoinecuruhane janiichuruhane jana aonaun.

#### *Arajiin cachaauru somajai que cajonecooruhane*

<sup>9</sup> Nii baiha coaracaanne janate, ecu araai lauriinchuru satiin chauratane sacutaain nenacaauru, araai lauriin nere que ereein nenacaauru, jelai natane que ichaohin nenacaauru, naaonjoainuri cachaauru ecu arajiin neeure. Acaaurute rori caohacha- *trono* aina Carenero Narejeen acatiha ecu arajiin chujuhacoore janiinacaje lanaala. Nitohaneeinte cajione somanerei que cajionecohinte, elele tocorijiane siijiariin cuure. <sup>10</sup> Nitohaneein cuhinte, tonijiaain ehequiin:

“Cana Coaunera- rai rori caohacha- *trono* ichoae nena aina nii rai Carenero Narejeente,  
arajiin itolere, que nejeratenacaauru amuritoeraneein ne,”

naaure tonijiaain nii ecu satiin caa chauratane sacutaain nenacaauru araai laurii cachaauru. <sup>11</sup> Nii janate nii rori caohacha aina nii coroata choonca jenai ichauhenaauru, nii jenai ichaohin nenacaauru, naaonjoainuri tionoritiin chujuhacoore satiin anjeraauru. Nitohaneeinte nii rori caohacha acatiha neseonriaain, atane que nauri turuanacanejeein nenorocaaain Cana Coaunera coroaecure nii anjeraauru.

12 “Nitohaneein neeuruhine.  
 Jataain caohatoha Cana Coaunerane coitucuuruhine itolere bana.  
 Necaohacha que necaohachaa Cana Coaunerane coitucuuruhine itolere  
 bana.  
 Jataain itolere coitucueraneein niha Cana Coaunerane coitucuuruhine itolere  
 bana.  
 ‘Narihara,’ naauruhine acaauru rausiaaeca Cana Coaunerane coreniha itolere  
 bana.  
 Jataain nelatiha Cana Coaunerane coitucuuruhine itolere bana.  
 Acaneein nihane coitucuhin, itolere icharaneein laraajiin nihane coitucuu-  
 ruhine.  
 Nitohaneein neeuruhine chabana satonoelanaala. Nitohaneein neeine,”

naain, Cana Coaunera cocoasitaare satiin nii ecu nenacaauru anjeraauru.

13 Nii janate, nii coroata choonca jenaain ichauhenaauru caje leinjiin canu rai:

“Chauruna caa somajai cajione que cajionecohacoaain cau ne. Chaaelai cajena uure,” naain canu caje bajaane janane: 14 “Iite acaauru coitucuhicha curuaanaa,” naain tonoraaun.

Nii jaunte canu rai: “Caa cachaaurute necairichanaa tabai abaantaauruhana jaaun, Carenero Narejeen coichana aina cuaain somarianohiniha acaauru cajionene jaaun nesomariaain nedae acaauru cajione.

15 Nii jaaunte,

nii Cana Coaunera rai rori caohacha- *trono* acatiha neeure, jiiichoo, janotiin, naaonjoaain Cana Coauneraacha jerei ichacuruha rai Teenforo asaaene coina.

Nii rori caohacha choaae lauheconaate acaauru beraicheein acaauru rohan neein.

16 Mijitena, cocoirena, enoto ajaano, ajaarona, naaonjoaain niha natiin acaauru roeocarinaai,

17 acaauru beraiha nii rori caohacha cataaun nena Carenero Narejeen ne jaaun.

Nii Carenero Narejeente acaauru beraicheein, carenero beraihuraha beraihurerane rijijieein.

Acate, esinaaeca caohacha- ichaonaa tera que acaauru cocoareein, raotojoein ichaauruhane coina.

Inae acaauru coroatajaniha Cana Coaunerane jaun necairichanaa coaraain chanaaururinaai chabana,”

nae nii coroata choonca jenaain ichauhenaauru caje leinjiin.

## 8

### *Nii fuera caainsine aina jujuai mocooruhane jaan curu oro caje nena*

1 Nii fuera caainsine joracaa Carenero Narejeenne janate, carajaaajoaain curuatoraain curuaaecoore dedeeu nenacaauru.

2 Nii catiariine ecu caainsinei anjeraauru coaraaun Cana Coaunera acatiha chujurujua chujurujuaauruhane jana. Nii janate nii caainsiine anjeraauru nainetiin nii toroonfeta teeure. 3 Nii janate uhe leecha anjera, jujuai mocooruhane jaan curu oro caje nena uhaain. Nitohaneein uhinte, nichaaurae nii Cana Coaunera belaihuruhane jaan rori *altar* acatiha. Nii janate tabaain nii enuha sacari jujui teeure, nii rori caohacha oro caje ichanohi *altar* acatiha, ichoae teein mocohane coina. Nitohaneeinte mocohane nainiha Cana Coaunera bajaaree nii ecu satiin Cana Coaunera cachaneein

nenacaauru. <sup>4</sup> Nitohaneein nii enuha sacari juuai mocoha nii anjerane janate, rai biji caje Cana Coaunera acatiha ecuun cue rai cousuraca. Mochane nainiha Cana Coaunera bajaare nii ecu satiin Cana Coaunera cachaneein nenacaauru. <sup>5</sup> Nii baiha, nii enuha sacari juuai mocohane jaan curu raaoriin, Cana Coaunera belaihuruhane jaan rori caje, usi biine taotaoriin nii curu cuhane teein, usi biine joae nii anjera atane choaae. Nii janate, toni arara, erenaa, jiacano, carora, naaonjoainunri jataain mijiaaenein.

### *Toroonfeta toteeuruha anjeraaurune*

<sup>6</sup> Nii janate, inae neruujeeure nii caainsine anjeraauru acaauru rai toroonfeta toteeuruhane caina.

<sup>7</sup> Inae rai toroonfeta totiha nii leinjiin anjerane janate, chauratane ichoae nalue jelajinaa jaberoco aina usi ichana que jasiin. Nii jaunte chauratane neleru nichataja mocohane jaun, satiin chauratane neleru nichataja que nenacaauru nunacuru, chaen omanecuru, naaonjoainunri mocoe.

<sup>8</sup> Nii jana rai toroonfeta totiha nii anjera coroatajane janate, dede caje nalue jataain tabai usi jaberoco cucuana cuhanene jana, nii cucuana neleru nichataja neleruhin ichana tocohaneein nedae rai baca. <sup>9</sup> Nii naluha usi jaberocone jaunte, itolere nii cucuana cuhane nenacaauru nichata saain neleruhin oore. Nii cucuana cuhane nenacaauru boteeuru netonaite nichata saain neleruhin mocohin nitajeeure.

<sup>10</sup> Nii janate, rai toroonfeta totiha anjera nichatajane jana, siricho tocohaneein mocohin dede caje nalue arasijie seeonjoa, satiin nucuhecuro nichata neleru aina atane jachu caje mitunacaauru esinaaeca ichoaae. <sup>11</sup> Nii arasijie curuaate Elonaine. Nii jaunte nichata saain neleruhin elonaa nucuhecuro baca aina atane jachu caje mitunaa esinaaecane jaun, ohacoaaure arajiin cachaauru.

<sup>12</sup> Nii janate rai toroonfeta totiha nii anjera nejenane jana, nichata saain nelerujuacoaain nocohejaaitiin naasajeein conoene enoto, atene, arasijie, naaonjoainunri. Nii jaunte, jiiichoo aina nocohehane nichata neleru que carajaain conoene nii enoto, atene, arasijie, naaonjoain.

<sup>13</sup> Nii jana coaracaaunne janate, dede catai jelon jiaauluhin situha cuha leinjiin uujirii tocohaneine jana aonacaaunne janate: “Jataainte cairichaaajoaaurureein caa chauratane que ichaonacaauru cachaauru, inae toroonfeta toteeuruha nii leecha nichatajai anjeraaurune,” nae leinjiin uujirii tocohane tonijiaain.

## 9

<sup>1</sup> Nii janate, toroonfeta totiha anjera nesaoquine jana dede caje naluha uha arasijie chauratane choaaene jana coaraaun. Nii arasijie raite, cana asajai cochabi teeure. <sup>2</sup> Nii cana asaae nena atane jachu bacuujuu joaracaane janate, jelai caje mitue suruaa orono caje aihane tocohaneein. Nii suruaate nocohenaneein enoto teein, cujuanane maajeein nocohene neein te. <sup>3</sup> Nii janate, nii suruaa caje mituhin chauratane sacuritaain riaaniha sisiincho semanaane jana, aiha canaunne rijijieein cacha cunaitaane jaanu teeure rai. <sup>4</sup> Nitohaneinte letoanajaain, omane, ajaena, enuha, naaonjoainunri aasaecuruhane caohatein, nii nauri que Cana Coaunera cojunaca siricha *seecho* que cojunacatenohine lanaala nenacaauru cunaitaauruhane caina aitocure nii sisiincho semanaa rai. <sup>5</sup> Nete cachaauru atinaauruhane caina letononeeurene. Raujiaaincha cacha atinaelanaala cusihane, canaun cusi rijitocojoaain cunaain saoqui ateein cacha cunaitaauruhane caina aitiin letononeeure. <sup>6</sup> Nii cojoanona banate niqui onaa jerecuroreein cachaauru,

nete oorenereein jaiti ooruhane jaan que turuenihane jaun. <sup>7</sup> Nii sisiinchoorute, sonaana que neeuruhane coina relanojoneein nenacaauru cabario tocorijianein, oro caje nenea-comai tocohanei que asihocoin cacha meri tocorijiane acaauru meri. <sup>8</sup> Nii sisiinchooru couturi ujuite caratohanae ene couturi ujui tocohanein. Rai catute aain tabai tocohanein nenaaleeon catu tocorijiane. <sup>9</sup> Acaauru jaberocote, coata que bujuaain ne. Jana acaauru itarote jataain mijiaaenein toni jiaauluuruha ne. Sonaana que neein caro tararaa cabarione jana tonihane rijitocojoaain toni. <sup>10</sup> Jana rai cusite rai nuseei que ne, canaun cusi tocohanein. Nii rai cusi que cacha cunaitaraneinte neurelu saogui ateein. <sup>11</sup> Nii sisiinchooru curuaanaate cana asaae atane jachu cuhane nenea anjerane. Jana rai curuaate Ebereeo ere cuhane Abadoonne. Jana Curieco ere cuhanete, Apolihoonne.

<sup>12</sup> Nitohaneinte situe nii necairichanaa nunuhe. Nete jaiti lanae coroatajai.

<sup>13</sup> Inae rai toroonfeta totiha nii anjera nesaotanene janate, Cana Coanera acatiha oro caje nenea rori- *altar* que jenaain nenea jicho caje toni eheona.

<sup>14</sup> Nitohanein toniinte:

“Nii jenaai anjeraauru ichoharaain nenacaauru jihaneu. Acaaurute nucue tabai Eofarate auhaniha ichohanohinein neeure,” nae nii eheona.

<sup>15</sup> Nitohaneinte, nii jenai anjeraauru jianecure, cachaauru nichata neleru sohin jaaoruhane coina. Nitohanei ichacuruhane coina jatoroaain neeuruhane bajaanaa, rai batene, cojoanonaa, naaonjoain que inae tihane jaun.

<sup>16</sup> Nii jana aonanaacaunne janate, ecu neeure coroata fasha millonnein cabario choaae cunacaauru soondarooru.

<sup>17</sup> Nii cabario choaae nelaurianacaauru coaracaunne janate, usi lanaro tocohanein nenea que bujuatenohinijiacoe acaauru nalarijiaauru. Nichata lauriinte coloe nii acaauru nalarijia que nenea coata, beraurusiojoaain, lanajiojoaain, asofere tocohanein, naaonjoaain. Jana nii cabariocuru couturite janolari couturi tocorijianihane jana acaauru ujuae caje mitue suraa, usi, asofere, naaonjoain. <sup>18</sup> Nii cabariocuru ujuaae caje cacha cairichaeranu que mitunaa suraa, usi, asofere, naaonjoaain caaunte nichata saain neleruhin ohacoaure cachaauru. <sup>19</sup> Nitohaneinte rai nujuaae cuhane, rai nuseei que, naaonjoaain nii nitohanei ichaane jaanu rai nelate sirichure nii cabariocuru. Nii rai nuseeite acano tocohane. Chaen rai coturi quete cacha cunaitaure. Arajii cachaaurute ohe nii necairichanaa caaun.

<sup>20</sup> Nete acaauru cauteccuru nii necairichanaa caje nichotenacaauru, enanetojoein baaso ichacuruhane jianecurene. Nii jaunte, Moconajaeracuru bajaebajaecuruhane jianecurenihane jaun jerichanejeein oro caje nenea ecaantooru, coata- bronze caje nenea ecaanto, coata plata caje nenea ecaanto, ajeri caje nenea ecaanto, chaen enuha caje nenea ecaanto, naaonjoaain bajaebajaecure, ichaohin, nerurujuaain, amuhin, ereein, notaain, naaonjoaauruhane que airijiin. <sup>21</sup> Niheichu sonajaain jaohin, benane neein, nitohanai osa que nesaruhin nenea naineniha cacha natiin namute quicha aina ichaohin niha natiin, baaso osa que nesaruhin, asijiauhin, naaonjoaain ichaoruhane jianecuruhi.

## 10

### *Quiricha laenanohi siichaa anjerane*

<sup>1</sup> Nii jana coaracaunne janate, dede sacari catauun, couturi ichoaae iino baijiaain, dede caje fauha uhe- jataain nelate que nelatei leecha anjera. Enoto tocohanein jiquihacoha rai merine janate, usi lanaro tocohane rai fero. <sup>2</sup> Nitohaneinte biji cuhane retutunohinein joaracanojoi quiricha

sichaaïn, cucuana ichoaae rai tija raotono nichajai teïn, rai jera najaa biji nichajai te chauratane ichoae. <sup>3</sup> Nii anjerate, nesari corajiha mijiaaïneïn aitoa aainne rijitiïn tonijiaain ere. Nii jana, caainsinei araracurute tonihure. <sup>4</sup> Nii toniha caainsinei ararane baiha, quiricha cuhane laenana jerichaaunne janate:

“Ii suujua cuhane aitiïn toniha nii caainsinei ararane jaan rucuhecu chunei rai belanaala. Coa quiricha cuhane laenaa,” naain dedeeu toni.

<sup>5</sup> Nii ereeuruha caainsinei araracurune catiaaeriinte, nii cucuana choaae raotono nichajai tija chujuhecaain, chauratane que jera chujuhequera, raotono nichajai biji sijitae.

<sup>6-7</sup> “Inae nenacaaen nerinaain cojoanona. Inae toroonfeta totiha nii anjera necaainsinene janate, inae asinojoneïn Cana Coauneraacha siriï que turuhane jaan aicheïn, nii aitiïn berejetocuruhalu nere bera inoaensihurune rijijieïn,” nae, itolere bana ichaohin, dede, chauratane, cucuana, chaen itolereeu coneraneïn nenacaauru, naaonjoaainunri coauneraïneïn nena Cana Coaunera notaracaae neïn aitothane coarateïn nii anjera.

<sup>8</sup> Coaiteen nii dedeeu toniïn quiicha aonai erenaate:

“Chajaain cuhin, nii cucuana aina chauratane choaae chujuhequi anjera caje nii quiricha laojiri joracanojoneïn- niicha siïchai raaorinihu,” nae canu rai.

<sup>9</sup> Niritoha canu raine jaun, cuhin nii quiricha bajaanune janate:

“Nocoa. Quihu. Chujuaae cuhanete irichaje rijitocojoaain ichohantoreïn. Nete laen ii suri cuhane elonaineïn nerotoreïn,” nae carai nii anjera. <sup>10</sup> Nii jana nii anjera biji caje nii quiricha raaoriïn quihanune janate, canu ujuaae cuhane irichaje rijitocojoaain ichohante. Nete inae quihanune baiha, canu suri cuhane elonaineïn nerotoe. <sup>11</sup> Nii janate:

“Coaiteen, araai laurii cachaauru, lauri lauri jelai teïn atane siriïn que ichaonacaauru, nere que ereïn nenacaauru, itolere curuaanaacuru, naaonjoaainunri que aitiïn Cana Coauneraacha beratei beebejiha cuhinete ne,” naaure canu rai.

## 11

### *Niïcha icharateï coaranuuru letoaa coroatajaain Cana Coaunerane*

<sup>1</sup> Nii baihate, carai jiarana tochaneeïn leinjiïn bara teïn: “Chajaain nimichuhin cuhin Jerosaleeun nena Cana Coaunera bajaanuhane jaan coloheri, Cana Coaunera belaihuruhane jaan rori, naaonjoaainunri cojunacateu. Chaen ecu janiïchu, inaaajoaaincha Cana Coaunera coroaaca neeurureïn. <sup>2</sup> Coa Cana Coaunera bajaanuhane jaan coloheri rohan nena airiniha cojunacatiha. Niite teure Jorioniheichuru rai. Acaaurute Cana Coaunera nese cocoaichacuru amiharateeurureïn, jataain cairichanjaain, jena choonca coroata ateïneïn. <sup>3</sup> Canune coroatajai canu ere beeurera letoareeunni, uhin le oaraanca coroata fasha saota choonca janoneïn canu ere beeuruhane coina,” naain canu letoaaure.

<sup>4</sup> Nii coroatajai Cana Coaunera ere beracurute coroatajai olibo nujuan aina coroatajai usi temura neïn neure, cana rai chauratane coauneraneïn nena Cana Coaunera acatiha. <sup>5</sup> Chunocoha chatohaneïn acauru tenaa jerera nihanete, acauru ujuaae caje usi mitaaurureïn jitariïn acauru que neratenacaauru mocohane nitajeeuruhane coina. Nitohaneinte oorureïn nii acauru rerohecaeraauru. <sup>6</sup> Nii coroatajaihurite nelate que nelateïn, cana dede funaa nainecurureïn Cana Coaunera ere beebejээрuhane jana uha elo ne coataa. Chaen techu, ichana neïn acau corenaa naainecurureïn.

Nii rijijieein techu, araai laurii necairichanaa turuanaa nainecurureein caa cana rai chauratane que, acaauru jerecuruhane tocohaneein.

<sup>7</sup> Inae acaauru que Cana Coauneraacha beratenojoi benaa naainaauruhane janate, mitureein cana asajai caje leinjiin neecha aansai ataebinae tabai, acaauru sohin acaauru jaohane coina. <sup>8</sup> Nitohaneein acaauru sohin acaauru jaohane janate, Cana Coaunera Calaohi cairichaauruha coroso quene jaan nese coero cuhane nereein acaauru jaberoco. Jerosaleen nihane saijieein Sodoma, Egipto, naaonjoaineein acaauruhacha curuaateihu. <sup>9</sup> Nichata janohin cataan uujue banate acaauru jaberoco coaraa cuurureein araai laurii nenacaauru, coriaae caje unacaauru, lauriu lauriu nichao que ichaohin nere que ereein nenacaauru cachaauru, naaonjoainuri. Nete, acaauru jaberoco conautecuruhane caohatereein. <sup>10</sup> Nii nainihate jataain rachoojoeurureein caa chauratane que nenacaauru cachaauru, ooruha nii coroatajai Cana Coaunera ere beebejeeurerana jaun. Nitohaneeinte rachoojoein beseta ichaain ita belaiha cuurureein itolere nijihanai que, jataain acaauru cairichaeranuneein aihuruha nii coroatajai Cana Coaunera ere beebejeeurera rautaaurenihane jana, inae atinanohineeuruhane jaun.

<sup>11</sup> Nete coaiteen nichata janohin cataan uujue bana acaauru ichatiha Cana Coaunerana jaan ichanaain nimichucuruhane coaraain jataain casihure satiin nii acaauru coaraauru cachaauru. <sup>12</sup> Nii catiaaeriinte, dedeeu mijiaaaineein toniha erena jana, “Chajaauchete ini,” naain toniha nii erenaane aonacure nii coroatajai Cana Coaunera ere beebejeeurera. Niritoha nii erenaane aonaante nii acaauru que nejeratenacaauru notaracaae dede sacari aina cuhin dedeeu iniha cuure. <sup>13</sup> Nii rijieeoritiinte uha carora tabaine jaun comoe nii nese neleru lechooncaniu nenacaauru lorerichurune jana, oorureein caainsi oaraancani cachaauru. Nii jana acaauru cauteecu nedanacaauru cachaaurute nesoone caaun Cana Coaunera coroaecurureein.

<sup>14</sup> Nitohaneeinte situe nii necairichanaa tabai coroataja. Nete nii baiha coaiteen ureein necairichanaa nichatajanu.

*Toroonfeta totiha anjera necaainsinene*

<sup>15</sup> Nii baiha, toroonfeta totiha nii anjeraauru caainsinene janate, mijiaaaineein dede que toniin:

“Caa chauratanete  
Cana Coaunera aina rai Calaohi Jesocurisito raineen nihane jaun,  
acaauruhacha satonoreein tiaain caa chauruatane Curuanaaneein  
neroranereein,”

naaure. <sup>16</sup> Nii jana, nii coroata choonca jenaain rai rori ichoae Cana Coaunera acatiha neein laurujuauru juanacaauru ichauhenaaurute neeseenraain atane que tiaain nenoroocaain:

<sup>17</sup> “Ii, nunuhe caje coauneein satono que tiaan  
itolere Coauneraneein-  
itolere ichana naineraneein neeine  
coroaecaanura Cana Coaunera.  
Iite ichaohin itolere janonaa bana neein  
itolere que laraajiin chabana satonoelanaala  
Curuanaaneein neeine  
nunuhetei inae.

<sup>18</sup> Ii ainate niqiu obaecure  
caa chauruatane que nenacaauru ii coitucuhichuru.



Nete inae turue acaauru cairichaaaine jaan cojoanonaa.  
 Inae turuha onacaauru rucuequine jaan cojoanonaa.  
 Ii letonocuru- ii ere beebjeein amuhemuhenaacaauru *profetacurute*  
 coroatajaniha curiquiin;  
 acaauru ii cachaneein ii jereeine rijijieein neeuruhane jaun.  
 Inae ii sacuurera coroatajaniha curiquiin,  
 itolere canaanaihuru, ichauhenaauru, naaonjoaain.  
 Nitohaneeite  
 itolere caa chauratane que nenacaauru itajeraneein nenea itajeriquiin,”

naain Cana Coaunera coasitaature.

<sup>19</sup> Nii janate, neyoracae dedeeu Cana Coaunera coroaacuruhane jaan coloheri Teenforone jana ecu inanacaain ne Cana Coaunera rai rauhi curu camela. Nii janate dede caje ococoe jiacanocuru, tonijiainunri, araracuru, caroracuru, jelajinaa jaberocooru, naaonjoainuri.

## 12

### *Leinjiin ene aina leinjiin ataebinae dragon*

<sup>1</sup> Nii janate dede que ecooca leinjiin cana dede cojunacane jana, inanacae leinjiin ene- enoto que conaanojoneein que cajioneconaa rijijieein- rai tija asaae atene siriin, leinjiin comai lechoonca coroatajai arasijie siricha lauhecain. <sup>2</sup> Nii enete canaanai cosuriu nihane jaun janoanaa jereein cuna caaun necairichajeein auhauhaque. <sup>3</sup> Nii catiaaeriinte coaiten ecooca cana dede cojunacane jana inanacae leinjiin ataebinae- *dragon* lanajai tasinojoain- caainsinei couturiin lechoonca jichohin. Satiin nii caainsinei couturi nainetiinte ne rai comai. <sup>4</sup> Niite rai nuseei que dede nichata neleru caje arasijieuru joae chauratane ichoae. Nii ataebinae- *dragonte* ococoe nii ene rene, nii beree nejanoaneni quiha nejanoa rijieeoritiinne coina. <sup>5</sup> Nii janate, inae quicha cojoaajiineein nejanoae nii ene beree. Aca satiin chauratane que lauri lauri nenacaauru curaanaa nihane coina- coata caje nenea otiha que biji achunequiin. Nete inae nejanoa rijieeoritiin nii beree raain amaature Cana Coaunera aina rai rori acatiha. <sup>6</sup> Nii jaaunte, neniha cachane jaan cuhin soroe que banihateein Cana Coauneraacha rucujueihu cuhin nii ene, ecu tein beraichateein coroaaterate le oaraanca coroata fasha saota choonca janohin Cana Coaunera.

<sup>7</sup> Nii baihate, nii dedeeu ita soore nii tabai ataebinae- *dragon* aina, Miqueli aina rai anjeraauru. <sup>8</sup> Nitohaneein ita soorua nii tabai ataebinae ainane janate, acaauru amuritona nainesihurene nii ataebinae rai anjeraauru. Nii jaaunte, inae dede que nenea nainecurene nii tabai ataebinae aina rai anjeraauru. <sup>9</sup> Nitohaneeinte, nii ataebinae- *dragon* tabai jaaore dede caje. Nii ataebinae- *dragonte* inoaenlu caje coauneein nenea acano tabai inoaensi-Moconajaera ne. Acate satiin chauratane tinonoritiin cacha coritaeranein ne. Acate, nii rai anjeraauru aina jiniiquiin chauratane que jaonojonecure.

<sup>10</sup> Nii janane dedeeu mijiaaanein toniin:

“Inae ichoteratenojoi niha cachane jaan cojoanonaa que turuha. Niicha ichana nainei ichaain itolere curuanaa neein niha Cana Coaunera aina cocoinanacai niha Mesihazine jaan cojoanonaa quete inae turue. Inae Cana Coaunera sacuurera coulurujuera Moconajaera jaaorua. Acate acaauru coulurujue, jiichoo, janotiin, itolere cojoanonaa bana, naaonjoaain Cana Coaunera acatiha neein. <sup>11</sup> Cana Coaunera coreniha cana nejeraneein nenacaaurute cana osa coreniha atinanojoneein nenea Cana Coaunera

Calaohi coichana aina, niicha beratei acaauruacha beebejeei, naonjoainuri aina cuaain inae amuritoore. Nitohaneeinte Cana Coaunera ere beebeejeuruhane coreniha coasilanaala ooruhane caina jatoroaain neein ahure. <sup>12</sup> Rachoojoeuche dedeeu neiniquichene. Jana, chauratane que nenacaauru, cana temurau- cucuana cuhane nenacaauru, naonjoaainunrite jataain cairichaojoaure, inae ichuunnijia necairichanaa coaraane cojoanonaa que turuhane que nainaane jaun, acaauru rene fauha cuha jataain obajeein Moconajaerane jaun,” naane jana aonajeeun.

<sup>13</sup> Chauratane choaae jaonjoinihane que nainacoriin, nii ene canaanai janoaera coinetein soha cue nii nechu aansai ataebinae. <sup>14</sup> Nii janate, nii ene itaro jaaure tasionjoaain uujuiri tabai itaro tocohanein, coriaae cuhin nii acano inoaensi caje soroha neniha cachane jaaun cuhine caina. Ecu teeinte, nii ene coroaateure nichata jaanacai cataaun reein tiaain. <sup>15</sup> Nii acano inoaensite nujuae caje acau mitaain nucuhe jae, raotojoein nii ene sohin jaohane caina. <sup>16</sup> Nete, nii ene coroatajane chauratane, nujuaae caje acau jaohin nucuhe jaa nii ataebinae tabai- *dragonne* jana lichurujuaaitiin jacolohitiin. <sup>17-18</sup> Nii jaaunte, jataain nii ene cotaain coraje nii ataebinae- *dragon*. Nii jaaunte cuhin, nii eneecha foerateuri aina rai bereecuru, satiin Cana Coaunera ere tonoraain Jesoso cachaneein neeuruhane beeuruhane que casilanaala nenacaauru, naonjoainuri soha cue nii ataebinae tabai.

## 13

### *Coroatajai ataebinae tabai*

<sup>1</sup> Nii janane caainsine couturiin, le choonca jichohin, naajoaain cucuana caje mituhin iniha uha leinjiin ataebinae tabaine jana coaraaun. Le jichooru naineein niha comaine janate, Cana Coaunera baijiaraanu rijitiin couturichuru naineein laenanohineein ne erenaa. <sup>2</sup> Nii ataebinae tabai canuhacha coaraite, leinjiin aain tocohanein acomari tijia tocohane rai tijia. Nii jana rai nujuaaente, aain tocohanein nena leon ujuaae tocohane. Nii leecha ataebinae- *dragonte*, nii aain tocohanein nena rai, jataain nelatein nihane jaane maajeein rai tein cocoainaan, nelaurianaja rorine maajeein rai te. <sup>3</sup> Nii aain tocohanein nena ataebinae couturi leinjiinte, ohane caina ichanohin tocohanein jataain temuhin cunaitanohi ne. Nete nii rijijieein coichanojoneei nerautaa nii necoasajane coaracuruhane jaun, jataain cojoelatiin coaraain, nii janolari tocohanein nena ataebinae tabai esenetaain sacuire, satiin chauratane sacuritaain nenacaauru cachaauru. <sup>4</sup> Nii jaunte, nii aain tocohanein nena cocoainaa nii leecha ataebinae- *dragonne* jaun, acaneein neeuruhane coroaecure, “Cha caa leinjiin ataebinae tabai- aain tocohanein nena amuritonaa naine. Nihei chuni amuritonaa nainera,” naain acaneein niha nii aain tocohanein nena ataebinae tabaine coroaecure, nii leecha aina curuaecaain.

<sup>5</sup> Chaen techu, Cana Coaunera baijiaraanu rijitiin, itolere que nelaetoha nocoetiin iriha nii janolari tocohanein nena ataebinae tabaine jereein, jena choonca coroata ateein cocoaina nacaineein nihane caina cocoainae nii leecha ataebinae- *dragon*. <sup>6</sup> Nitohaneeinte, Cana Coaunera baijiaraanu rijitiin que nejeratein, rai nenaja *santuario* quene maajeein ereein, dedeeu nenacaauru quene maajeein nejerate. <sup>7</sup> Chaen techu nii ichoae tacaain, coaiteen nii leecha ataebinae cocoainae nii *dragon*. Cana Coaunera cachaneein nenacaauru que nejeratein, acaauru amuritohane reentiaain sonaana que nihane jereein, lauri lauri nichao que ichaohin, lauri lauri

nere que ereein, lauri lauri natane que ichaohin, naaonjoainuri curuaanaa-  
neein nihane coina cocoainae. <sup>8</sup> Nii janolari tocohaneein nenea ataebi-  
nae coroaeraaurute, satiin caa chauratane que ichoteratenojoine lanaala  
nacaauru cachaauru neeure. Coatiha laenanohinihei acaauru curuaa nii  
necoaunaalu chauratanene caje coauneein nichoteeneeuri curuaacuru  
siriin nenea quiricha cuhane. Nii quirichate cana coreniha sohin jaonojoin  
Carenero Narejeen rai nichoteeneeuri curuaa cocoiricha ne.

<sup>9</sup> Chunocoha aonana naineraauru aonacurumiin:

<sup>10</sup> Caresero cuhane neeuruhane coina nenacaaurute, caresero cuhane  
amanojoinecurureein.

Jana sabere que sohin jaonojoinecuruhane coina neeninurute sabere que  
sohin joaeracurureein.

Caute coaarareein esinae rauhijiriin itolere que laraajiin, niicha esenetai  
esenetaauruha Cana Coanera cachaneein nenacaaurune.

<sup>11</sup> Nii baihane, atane caje iniha cuha leinjiin ataebinae tabaine jana  
coaraaun. Nii jana rai jichote carenero narejeen jicho tocohaneein coroata-  
jae. Nete nii leinjiin ataebinae- *dragon* tabai rijitiin ere. <sup>12</sup> Acate nii  
jauriaanejeein nenea ataebinae tabai rijijieein jataain cocoainanohineein  
ne, nii jauriaanejeein nenea acatiha neein. Nii jaunte, nii jauriaanejeein  
nenea ataebinae tabai-temuhin cunaitanohin couturii- coroaecuruha satiin  
caa chauratane que nenacaauru cachaaurune coinane maajeein ichae.

<sup>13</sup> Chaen techu, satiin cachaauru notaracae itolere cojoelanaacojoai ichaain,  
dede caje atane choaee usine maajeein nalutiae. <sup>14</sup> Nii jauriaanejeein  
nenea ataebinae tabai notaracae cojoelanaacojoai ichaane aina cuaainte,  
caa chauratane que nenacaauru cachaauru coritaain- acaauru que nii  
sabere que temuhin cunaitanohin niha natiin ichaohin nenea ataebinae  
tocohaneein ecaanto jaerate. <sup>15</sup> Nii ataebinae tocohaneein niicha ichacuri  
ecaanto rai ichaonaa teeinte erelate nii ataebinae tabai coroataja. Nii  
jaunte, satiin coroajelanaala nenacaauru cachaauru sohin joerate nii  
ecaanto acaauruhacha ichai. <sup>16</sup> Nii choae tacaain techu, satiin canaanai-  
huru, ichauhenaauru, coriquihonacaauru, cairichaihuru, letononeein ne-  
nacaauru, letononelanaala nenacaauru, naaonjoainuri, biji raotono nicha-  
jai que, acaauru auri que, naaonjoaaine maajeein rai cachaneein nee-  
ruhane coujunacaneein acaauru coujunacaterate. <sup>17</sup> Nitohanihane jana  
coaracaanne janate, chuni nii ataebinae curuaa aina rai coujunaca siri-  
lanaala nenea, nii chaelai coreteein, chaelai que necoreteein, naaonjoaana  
nainecurene.

<sup>18</sup> Caute laen coaarareein itolere coitucuurera. Coitucuerate, nii ataebinae  
coujunaca janijiin coitucureein. Nii ataebinae coujunacate, cacha coujunaca  
rijijieein ne. Acate, saota fasha saota choonca saotaneineein ne.

## 14

### *Nenatecuruha le fasha jena choonca jena oaraancai cachaaurune*

<sup>1</sup> Nii baiha, Sioon bichatane ucuuno ichoae chujuhecoha Cana Coanera  
rai Carenero Narejeene jana coaracaanne janate, ecu rai nauri que Care-  
nero Narejeen- atinanohineein nenaalu curuaa aina rai Inaca curuaa siriin  
ecu aina neeure le fasha jena choonca jena oaraancaain cachaauru. <sup>2</sup> Nii  
janane, caraturi caje naluha acaune rijitiin, toniha ararane rijitiin, naaon-  
joaain jataain mijiaaainein toniha dedeune jana aonaun. Aonacaanne  
janate, arajii quitara rijijieein nenea arafa toteeuruha arajiin cachaaurune  
rijitiin netonijiae. <sup>3</sup> Nitohaneein netonijiaainte ena nenea nenatena que

nenatecure, nii rori caohacha ichoae nenea, chaen nii cacha tocorijianein jenaain nenacaauru, chaen nii ichauhenaauru, naaonjoainuri acatiha neein. Nihei nii chuni, nii nenatena que nenatena nainera. Acaihaniji caa atane caje le fasha jena chonca jena oaraancaain ichoteratenojineein nenacaauruhachate, nenatena naine nii nenatena que. <sup>4</sup> Acaaurute, chabana suujua corelanaala niheichu nii chuni acaauru suujua corera tonoraelanaala neein- cunaa jerihane jaaun cuha nii Carenero Narejeene jiniichaain amuhemujeein neeurure. Niichurute, satiin cachaneein neinichaachene caje ichoaichaniha ichoteratenojineein nii Carenero Narejeen aina Cana Coaunera belaiha tenojineein neeure. <sup>5</sup> Acaaurute, nii chariji bana casaje ujuaihonelanaala- niheichu baasoneein ereein, naaonjoaain neeurene.

*Nichatajai Cana Coaunera letono anjera benojoin*

<sup>6</sup> Nii janane dede catai jeloon jiaauluhin situha uha leinjiin anjera, nii chariji bana satonoelanaala nenea beratenojoin erenaa biha uha, lauri lauri natane siriin nenacaauru, lauri lauri nichao que ichaonacaauru, lauri lauri nere que ereein nenacaauru, lauri lauri nenaja que nenacaauru, naaonjoainuri raine jana coaraaun. <sup>7</sup> Nitohaneein jiaauluhin situhinte: “Baaso ichara casetecaera niha Cana Coaunerane coitucuhin Cana Coaunera coroaecuche. Inae caohacha ichaeneeichene, baaso ichaquichene coitucuhane jaa cojoanona que inae turuha. Cana rai dede, chauratane, cucuana, atane suujua caje nalunaa acau, naaonjoainuri coauneraneein nenea Cana Coaunera coroaecuche,” nae tonijiaain ehequiin.

<sup>8</sup> Nii baihate coaiten caaijie uhe rai coroataja- leeocho anjera. Nitohaneein uhinte: “Inae nitajeeuruha Babilonia cocoaichacuru, nechua joaereein jataain baasoneein ichaoha cachane coina ichao ajaelaera que satiin chauratane lauri laurii ichaonacaauru cachaaauru ichao ajaelae ajaelajeein nerejetilu,” nae nii anjera coroataja.

<sup>9</sup> Nii baihate coaiten caaijie uhe rai nichataja leeocho anjera. Acate: “Chunocoha nii ataebinae tabai corojeein nii tocohaneein nenea ecaantone maajeein corojeein, rai nauri, biji, naaonjoain que cojunaca sirichate, <sup>10</sup> obajeein nitohanai icharaauru caseteco coaracuruhane coina acaauru que banihateein Cana Coauneraacha rucupei bino que cocohin, asojoere tocohaneein moconaa usi tabai jana mocooreein, Cana Coaunera rai anjeraauru, rai Carenero Narejeen, naaonjoainuri acatiha netiin. <sup>11</sup> Nii chariji bana satonoelanaalate itolere janonaa bana mocoha cuurureein, janotiin, jiichoo, naaonjoaain nii ataebinae corojeein, nii tocohaneein nenea ecaantone maajeein corojeein, rai curuaa cojunacane maajeein sirichaaauru,” nae ehequiin nii anjeraauru nichataja.

<sup>12</sup> Enate laen itolere que laraajiin neeuruha Cana Coaunera cachaneein nenacaauru, nere tonoraain itolere bana jianelanaala jeriha Jesusone rijijieein ichaauruhane necoharareein.

<sup>13</sup> Nii jana aonacaanne janate:

“Aonaain laenaau: Nerausiaecate cuurureein ena caje coauneein nunuhetein Cana Coaunera esenetaain ooruhane que tiaaajoaain nere tonoraain ichaonacaauru,” naain toniha dedeeune jana:

“Aihachuhisicha. Acaaurute nebetacaaurureein namihaneon caje. Canune acaauru que acaauru amihaneon coaratereunni,” naain tonora Cana Coaunera Suujue.

*Caa chauratane que nenacaauru taojiaera*

<sup>14</sup> Nii jana coaracaanne janate, dede sacari jana laujuae leinjiin cacha tocohaneein nenea- coturi que oro caje ichanohin comai siriin- sabere

ajihanti que biji achunequiin. <sup>15</sup> Nii janate Teenforo asajai caje mitatiin: “Chajaain nii taojiaaine jaanu que iicha amai que- nii iicha raaeninuru taojiaain ranajaau, inae cataa caa iicha raaeninuru- caa chauratane que nenea- inae rai cojoanonaa que turuhane jaun,” naain eheque nii leeocho anjera, dede sacari jana lajuuai rai. <sup>16</sup> Nii jaunte, nii niicha amai sabere que niicha raaeninuru taojiaain, caa chauratane caje ranajae nii dede sacari jana lajuuai.

<sup>17</sup> Nii baihate coaiten dedeeu nenea Teenforo caje mitue leeocho anjera- acaantonai sabere ajinai que biji achunequiin. <sup>18</sup> Nii janate Cana Coaunera belaihuruhane jaa rori caje mitatiin: “Chajaain nii ii sabere que nii chauratane que nenea oba inaa saau. Inae cataa nii oba inaacuru,” naain ehequiin nii sabere que biji achunequiin nenea cotijiae, nii leeocho anjera- usi curuaanaa.

<sup>19</sup> Nii jaunte, sabere que nii chauratane que nenea oba taain, raain, rucuhane jaa cuhane te, ecu teein oba baca rocohane coina. Nii oba tainaate inae caseteco tabai letoaa Cana Coaunerane beraneein ainaa ne. <sup>20</sup> Nitohaneein nii rucuhacuruhane jaan cuhane rucujein, nese udaa nii oba baca rocooruhane janate, ichananein mituhin nichata fasha oaraanca metoronein jelaai jojoe cabario ujuaae ucuunejein ucuacaain.

## 15

*Caaunsine anjeraauru- caainsii laurinei itolere necairichanaa satono uhaaurera*

<sup>1</sup> Nii jana dede coaracaanne janate que ococoe jataain cojoelanaacojoai- coaara coina ecotenojoin tasionjoaain. Nii janate, ecu neeure caainsiinein anjeraauru, itolere necairichanaa que cacha cairichaeranu uhaain. Nii quete, jataain nobaenein niicha coacui satonote Cana Coaunera.

<sup>2</sup> Nii jana cucuana baca coaracaanne janate, usi que jasisii tocohanein ajarotiin ne. Nii cucuana baca tocohanein ajarotiin nenea auhanihate, acaauru rai Cana Coauneraacha tei quitara rijijiein nenea arafa siijiariin neeure arajiin cachaauru, nii ataebinae tabai, chaen nii tocohanein nenea ecaanto, chaen nii coujunaca aina curuaa, naaonjoainuri amuritooreraauru cachaauru. <sup>3</sup> Acaaurute, Cana Coaunera ere bera inoaensi Moisesa nenate que nenatecure. Chaen Cana Coaunera rai Carenero Narejeen naaonjoain- uri nenate que nenateeinte:

“Jataainte, cojoelanaacojoaain janiinacajelanaala itolere que laraajiin, esinae rauhijiriin aitohine rijijiein caohacha ichaacha Cana Coaunera.

Iite, satiin lauri lauri rai natane que ichaonacaauru cachaauru curuaanaa Reyneein neeicha.

<sup>4</sup> Nihei nii chuni ii que suujua acatelanaala naineijeita Curuaanaa.

Neiheichu nii chuni ii corojelanaala nainejei.

Nii jaunte, leinjiin iicha saantonein neeine jaun, satiin lauri lauri rai natane que ichaonacaauru cachaauru ii coroaecurureein, itolere baaso, cao- hacha, naaonjoain ichaain coarateeine jaaunra,”

naain nenatecure.

<sup>5</sup> Nii baiha nojoracaa dedene jana coaracaanne janate, ecu niha acaauru aina niicha ichaneni ichaane coina Cana Coauneraacha icharatei Teen- forone jana, ecu ne Cana Coauneraacha turunajaanu jeelai *santuario*. <sup>6</sup> Nii Cana Coaunera turunajaanu jeelai cajete mituure caainsiinein anjeraauru,

itolere caainsii laurini que cacha cairichaeranu amaain cunacaauru. Cajione somaratiin jiquihaqui que cajionecohin, jaleri cataaun oojoaain oro caje ichanohin siintoroon que siintorooncohin.

<sup>7</sup> Nii cacha tocorijaneein ichaohin jenaain nenacaauru caje leinjiinte, nii caainsiineein nenacaauru anjeraauru rai, oro caje ichanohin cocooruna- jaan curu nainocojoaain casetecocuru que banijiaain nenea- nii chariji bana satonoelanaala nenea Cana Coaunera caje unaa te le anjeraauru nainetiin. <sup>8</sup> Nitohaneente, itolere que laraajiin necaohacha que necaohachaane coaratiha Cana Coaunerane jaan- suruaa caaun nocojoe nii Cana Coaunera turunajaan- *santuario*. Nii jaunte, nii chuni ecu turunaa nainene, nii caainsii laurinei que cacha cairichaeranu jitariin berotecuruha nii amaureraauru caainsiini anjeraaurune reen tiaain.

## 16

### *Casetecocuruhacha coheni curu muruaae*

<sup>1</sup> Nii janane nii Cana Coaunera turunaja *santuario* tonii: “Chajaain nii casetecocuru que banihateein Cana Coauneraacha tei caainsii curuneein nenea- muruaae cuhane nenea chorocuche chauratane ichoae,” naa tonijiaain nii caainsiini anjeraauru rai erenaane jana aonaun. <sup>2</sup> Nii janate, nii curu muruaae cuhane nenea necairichanaa tera choroha leinjiin anjera chauratane ichoane jana, ataebinae cojunaca siriin nii tocohaneein nenea ecaantone maajeein corojeein nenacaauru cachaauru jaberoco que cunaain mitue abero jataain tasionjoaain.

<sup>3</sup> Nii janate, cucuana cuhane leecha curu muruaae cuhane nenea necairichanaa tera choroha nii anjera coroatajane jana, ichana nejesi- neein nerotoe cucuana baca esinaaeca, sonajaain jaoha cachane aihane tocohaneene jaun satiin oore nii cucuana cuhane ichaohin nenacaauru.

<sup>4</sup> Nitohaneente, nucuhe cuhane, atane jachu caje acau nalunajaauru cuhane, naaonjoaain nii necairichanaa tera choroha nii curu muruaae caje anjeraauru nichatajane jana, ichana nejesinaneein nerotocure nii nucuhe bacaauru esinaaecaauru. <sup>5</sup> Nii catiariin aonacaunne janate:

“Iite, esinae rauhijiriin nitohaneein caohacha aina baaso icharaauru coaraain casetecaraneein neei.

Iite Cana Coauneraneein acaihanejei Saantoneein inoaenlu caje coauneein neei.

Chaen techu, nii chariji bana satonoelanaala neriquiin.

<sup>6</sup> Acaaurute ii cachaauru sohin jaohin ii ere beebejeraneein nenea *profetacurune* maajeein sohin jaaorelu.

Nii jaunte, nii niicha sohin niicha jaaorilu coichana que cocooruhane coina acaauru cairichaa ichaai, baasoneein ichaauruhallune jaun. Nitohaneein terate latecure,”

nae nii nucuhe bacaauru esinaaeca asaecane coina que banijiaain nenea Cana Coaunera rai anjera.

<sup>7</sup> Nii janate, Cana Coaunera rai jujuai mocooruhane jaan rori rohan toniin: “Aichuhisi laesinaera, itolere ichana naineraneein neeine jaunra Cana Coaunera, esinae rauhijiriin nii baaso ichaelanaala nenacaauru casetecaelanaala, baaso icharaneein nenacaauru casetecaeraneein neeine jaunra,” naane jana aonaun.

<sup>8</sup> Nii janate, nii niicha amai muruaae conera chohitoha enoto ichoae nii anjeraauru nejenane jana, nii aina cuaain niicha ichana naine ichaain

cachaauru mocoee najaano que nii enoto cono. <sup>9</sup> Nii jaunte, jataain banelanaala mocoore. Nete nitohaneein mainajeein mocooruha natiin, Cana Coaunera coroaena coacuelanaala baijiaraanu rijitiinchuru jataain baasoneein que ereeure, nii itolere cunaihuru amurijiriin niicha ichana nainei icharaneein niha Cana Coaunerane saiijeein.

<sup>10</sup> Nii jana, nii niicha amai muruaae conera chohitoha nii ataebinae nelaurianajan rori ichoae nii anjeraauru nesaquine janate, jataain caohacha nocohenaneein nedae rai cojoanonaa. Nii jaunte, nii mocooruhane curiha cuna caaun lele calaure cachaauru. <sup>11</sup> Nete nitohaneeuruha natiin, nii baaso ichacuruhane janelanaala, nii acauru abero aina acauru moco curihuruha natiin, Cana Coaunera que nejerateein baijiaraanu rijitiin ereeure.

<sup>12</sup> Nii jana, nucuhe Eofarate cuhane nii niicha amai muruaae conera chohitoha anjera nesaotane janate, jera jaonaa nainecuruha enoto mitu nichajai caje unacaauru *reychurune* coina jacoroe nii nucuhe baca.

<sup>13</sup> Nii janane, nii ataebinae tabai- *dragon* ujuae caje, chaen nii necha aansai ataebinae tabai caje, chaen nii *profeta* niha nocoeti, naaonjoainuri ujuae caje mituha dari tocorijaneein nichatajaain nechu coitucuchuhi suujuene jana coaraaun. <sup>14</sup> Acaaurute nii nichatajai coitucuchuhi suujueneein itolere cojoelanaacojoai ichaain, satiin chauratane sacuritaain rai cachaneein nenacaauru *reychuru* taojiaain sonaana que niha uurureein, inae itolere ichana nainera Cana Coaunera Cojoanonaa que turuhane bana.

<sup>15</sup> “Aonacuche, nii nainajeneeichene janane aiha leinjiin asijiautone rijijieein inara rene luhecotariin neeoritoreeuni. Jataainte nerausiaeca cureein caohachaaain nainaaain letona jatoraaain cajione ruhecaain canu cohara, nabana machoharohane, nii machoharohane que coejeein cacha cataaun nihane coataa,” nae Cana Coaunera.

<sup>16</sup> Nitohaneeinte, nii nere cuhane Armajedoonneein Ebereecuruhacha curuaatei ita taojiaaure- nii satiin chauratane sacuritaain nenacaauru *reychuru*.

<sup>17</sup> Nii janate, joaereein nii curu muruae cuhane nenea cabuhitoha nii anjera caainsiinene jana: “Inae jatoroaa,” naain tonijiaain toni erenaa dedeeu nenea Cana Coaunera turunaja *santuario*- nii nelaurianaja rorihu toniin.

<sup>18</sup> Nii janate, jataain mijiaaineein niha jiacanone jana, jataain mijiaaineein toni erenaa arara aina. Nii janate jataain mijiaaineein luhecotariin uha carorane jana, jataain mijiaaineein nerurujae atane, niha caa chauratane que cachaaurune jaan caje coaunein niha leeocho caroracurune amurijiriin jataain mijiaaineein uhane jaun. <sup>19</sup> Nii janate, mijiaaineein uha carorane jana nichata turiin nefaruhe Babilonia nese tabai. Nii jana nefaaruusiha satiin chauratane sacuritaain nenacaauru neseeurune janate, nii Babilonia nese tabai coacue Cana Coaunera, nii nobaaeneein casetecocuru cocoaane coina niicha rucujuei bino elonai que acauru cocoaane coina. <sup>20</sup> Nii jana satiin obenecuru, ichatane ucuunooru, naaonjoainurite nefaruusiin nitajihane jana, <sup>21</sup> dede caje cachaauru ichoae naluhacoe ajeri jaberoco rijijieein nenea-jelajinaa jaberoco jeenachoonca quiro amurijiriin anajiin. Nii jaunte, acauru ichoae nichoroha dede caje uhin nii ajeri jaberoco rijijieein nenea-jelajinaa jaberocone jaun, jataain necairichanaa tabai caseteco nihane jaun, Cana Coaunera que nejerateein baijiaraanu rijitiin ereeure cachaauru.

## 17

*Jataain ene cojoaeloroheri esinenein nenea casetecaauruhane*

<sup>1</sup> Nii caainsii laurinei cacha cairichaeranu curu muruaae amaurera caainsiini anjerauru caje leinjiinte: “Chajaaune, naaonjoain casete-canohinerichaaïn taa cucuana baca ichoae lauhequi ene cojoaelorohene coarate ii que. <sup>2</sup> Caa chauratane curuanaa *reychurute*, taa ene cojoaeloroheri aina ichaojeraquiin neeure. Chabana nitohanai ichaaïn ichaonaa naineniha cachane saijieein, rai nichao baaso aina cuaain satiin chauratane que nenacaauru ichao aasajeein osa que sarunajaelu,” nae canu rai nii anjera.

<sup>3</sup> Nii baihate, Cana Coaunera Suujue coaratenojoin coaracaanne jana, cacha areroo canu amae nii anjera. Nii janate, ecu niha leinjiin ataebinae tasionjoain lanajaanne jana, nichoae lajuuae leinjiin ene. Nii ataebinae tabaite, Cana Coaunera baijiaraanu rijitiin jaberoco sacuritaain laenanohineein rai curuaa siriin, caainsiine couturiin lechooncae rai jicho. <sup>4</sup> Nii jana nii ene cajionete, lanajaain jichohajiojoai que jasiin, oro caje ichanohin que corujuelequiin, jataain coretiin nena a jeri jaberoco que urrerianohineein, jiquihaquiin nena perla, naaonjoainuri que urerianohine rai cajione. Oro caje ichanohin acau cooruhane jaa curu muruaae que biji achunecohin, nainecojoaain rautaaïn coanacaaajoaelanaala nena siri, nechu jataain leinjiin calani dadanacaaajoaelanaala nena amae nechu joaenreein cachaauru que ichaojeraquiin neosateein nihane jaun.

<sup>5</sup> Nitohaneente: “Babilonia nese tabai, ene cojoaeloroherihuru nebaneein satiin chauratane sacutaain itolere cachaauruhacha rautaaï icharaneein nena,” naain laenanohineein curuaa siri nauri que, chabana coaraa nitohanaine que airijiin.

<sup>6</sup> Nii baihane nainaan, Cana Coaunera cachaneein rai nere beebejereaneein neeuruhane coreniha, chaen Jesocurisito beebejeeuruhane coreniha ateanohineein nenacaaurulu, naaonjoainuri coichana caaun ajiha nii ene cojoaeloroherine que. Nii jaunne coarihanune rijijieein jataain cojoelatoon.

<sup>7</sup> Nii jaunte canu rai: “Chanuna jataain cojoelatohi. Tane ichei caa ene ichao coitucueraelanaala nena aina nii caainsiinei couturiin lechoonca jichohin- nii amaera ataebinae tabai, naaonjoainuri beete coitucuhi. <sup>8</sup> Inoaenlute niqui ichoaelu nii iicha coarai necha aansai ataebinae tabai, nete inae nitaje. Nii jaunte, caohacha nitajeeriin nitajesihane ajiniha, nii chariji bana satonoelanaala nena atane jachu caje inicheein. Nii necoaanaa cana rai chauratanene jaa caje coauneein Cana Coaunera coitucuerera curuaacuru siricha quiricha cuhane laenanohineein curuaa sirilanaala caa chauratane que nenacaauru cachaaurute, nii necha aansai ataebinae tabai cojoelatiin coaraa cuurureein, inoaenlu ichaohalu natiin inae nitajihane jaun. Nete inae nacoauneein ichaoreein.

<sup>9</sup> Cauten laen esinae rauhijiriin coarareein niicha coitucui coitucuhin biha coitucuerane. Nii caainsiinei couturiite, caainsiinei ichatane ucuuno nii lauhaca ene cojoaeloroherine jaan beraneein aiha ne. Chaen nii caainsiinei couturichurute nii caainsiinei *reychuru* beraneein aina ne. <sup>10</sup> Nii saouqui *reychurute* inae chaque nelateein nedaurene. Leinjiinchate jaiti itolere curuaanaaneein ne. Nii jana leechate jaiti turuene. Nii acaauru caajie nedanaa turuhenein inae turuhane bana coatihä carajaain nerinaain. <sup>11</sup> Nii inoaenlu ichaonaa necha aansai ataebinaete, acaauru curuaanaa *reyneein* acaauru fosaneineein nelu. Nete inae nitaje. Nii choae tacaain techu, nii caainsiineein nenacaauru caje nena nelu. Nitohaneente, jataain caohachanainejeein raajenihane itajeranu ichajeein sacue.



<sup>12</sup> Nii lechooncaain jicho iicha coaraite, lechooncai *reychuru* neein jaiti curuaanaanein cocoainanohi nelanaala nenacaauru ne. Nete inae cara-jaelanaala, nii necha aansai ataebinae jiniichaain aihuruha *reychurune* rijijieein cocoainanohi neeurureein. <sup>13</sup> Nii lechooncai *reychurute*, ita suujua rijitoein niicha ichana nainei ichaa nii necha aansai ataebinae tabaine coina cocoainaa cuurureein. <sup>14</sup> Nitohaneente, nii Carenero Narejeen aina ita soha cuurureein. Nete acaauru amuritoa cureein nii Carenero Narejeen. Nii suujua rijijieein janijiin Cana Coaunera ranoinurilu rai cachanein nenacaauru aina, satiin curuaanaacuru curuaanaa neein, satiin *reychuru* rai *Reyneen* niha nii Carenero Narejeenne jaun,” nae carai nii anjera.

<sup>15</sup> Chaen techu canu rai: “Nii lauhaca nii ene cojoaeloroherine jaan- iicha coarai acaute, nenaanaja, cachauru, nere que ereein nenacaauru, natane que ichahin nenacaauru, naaonjoainuri beraneein ainaa ne. <sup>16</sup> Jana nii necha aansai ataebinae tabai jicho lechooncaain iicha coaracurite, nii ene cojoaeloroheri que nejerateein, machorocoaain que jaolecohin, rai jaberoco quiin usihanau mocoorurichaaaine jaan beraneein ainaa ne. <sup>17</sup> Cana Coaunerate, acaauru suujua jichochoe, aca jerihane rijijieein niicha jerei ichaain, jiniiquiin ita suujua rijitoein, nii *reyn*eein cocoainanohineein neeuruhane jaan teuruha nii necha aansai ataebinae raine coina. Nitohanein jeriha Cana Coaunerane que tihane jaan que tiaajeein. <sup>18</sup> Nii ene iicha coaraite, itolere amurijiriin nena Babilonia nese que satiin chauratane sacuritaain nenacaauru *reychuru* amuritoeranein nena beraneein ainaa ne,” nae carai nii anjera.

## 18

### *Nitajiha Babilonia nesene*

<sup>1</sup> Nii baihane niicha ichana nainei ichaane coina cocoainanohineein, rai necaohacha que necaohachaain dede caje fauhin chauratane jiliitoha rai cono necaohacha que leecha anjerane jana coaraaun. <sup>2</sup> Nii janate tonijiaain:

“Inae nitajiha itolere amurijiriin nena Babilonia nese tabai.

Inae moconajaera nenajaneente,

itolere lauri lauri coitucuchuhi que suujuequiin,

chaen rautaaain coanacaaajoae lanaala nena itolere ataebinae coitucuchuhi, tajaecuru coitucuhichuru, naaonjoainuri uchaneein inae nerotoe.

<sup>3</sup> Nitohanihane jaunte,

chabana nitohanai ichaain ichaonaa naineniha cachane saijieein,

rai nichao baaso aina cuaain,

satiin chauratane que nenacaauru cachauru ichao aasajeein osa que sarunajaelu.

Chaen techu,

que ichao jeraquiin nerejetocure satiin chauratane que nenacaauru curuaanaacuru.

Chaen techu,

satiin caa chauratane que necoretenacaauru coriquihocure,

nechu jataain joareein baaso ichacuruhane jaanuhacha que necoreteein,”

nae carai nii anjera.

<sup>4</sup> Nii janate, nacoaaunein dedeeu tonii.

“Chajaain nii nese caje amuuche inara canu cachanequichene.  
Nabana nii osaaonacaauru aina neeichene  
acaauru osa leruhiche acaauru ainane,  
necairichaaiche nii necairichaauruhane jaan quene coataa.

<sup>5</sup> Dede quete  
turuhelalajeein laujuae jataain acaauru osa tabai.

Nii jana Cana Coaunerate,  
nii baaso chacuruhane coitucuhin chabana baitenereein.

<sup>6</sup> Leeochaauru cairichaane amurijiriin,  
coroata saain jeelai amuritoheriin nii niicha coheni jataain coaerai jasi-  
iteein que cairichaa.

<sup>7</sup> Jataain necairichanaa tabai que cairichaa,  
leeochaauru cairichaane amuritoheriin.  
Nechu jataain joareein nocohasitaa nocoetohane jaunte,  
rai suujua cuhane:

‘Caune aiha curuaanaane rijijieein raotojoein neeun.  
Coatiha aiha autanane rijijieein necairichanaa coarinaauni,’  
naain necohasitae.

<sup>8</sup> Nii jaunte,  
le jiichonijin cuhane nichoae nalureein itolere necairichanaa, onaa, mi-  
jitena, nererojoecana, naaonjoainuri.

Chaen techu  
usihanau moconojoiniha cureein.

Jataain itolere que laraajiin niicha ichana nainei ichaain  
cha rucuharaniha nii casetecaeranein nenea Cana Coaunerane jaun,”

naa erenaane jana aonaaun.

<sup>9</sup> Inae moco caaun suruaa tabai niha nii nesene coaracuruhanete, jataain  
inaderaain chanaa cuurureein caa chauratane que nenacaauru curu-  
aanaacuru, nechu joenreein nichao aasajeein nii nese aina ichaojera-  
conacaauru, nii baaso ichacuruhane que netojoejееin. <sup>10</sup> Nii jaunte, inae  
caseteconihane coaracuruhane coasiha rohan nichuuntanaa nainelanaala  
caje coriae netiin:

“Jataainte cairichaaajoaai itolere que laraajiin niha  
nocoetohi natiin Babilonia nese tabai, coatejeneeine  
jana luhecotariin ii rene turuha casetecone jaun,”

naaurureein coarajeein.

<sup>11</sup> Satiin chauratane sacuritaain ecu necoretenacaauru techu, nii nese  
coinaderaain chanaa cuurureein. Inae nenerihani nii coroatajajelanaala  
acaauruhacha sirii rucuhele coreterane jaun. <sup>12</sup> Nii itolere, oro, plata  
neein curuajaain nenea coata coreti, ajeri jataain caohatiin coreti, jataain  
cajione caohacha, cajione lanaajionjoai, cajione lanajai, itolere araai laurii  
enuha jujuhi caje nenea, ebucu caje ichanohichuru rucuhaleeuru, enuha  
jataain coretiin nenea, coata lanajai boronce, leecha lauri coata, ajeri  
jaberoco jataain nojoein nenea, <sup>13</sup> arajiin jujuaain nenea canera, sacari  
jujuaain nenea, miraa chaen leochaauru jujuaain nenacaauru, *perfume*,  
bino, erene, arina caohacha, tirico, atane choae terei anajiin icharaauru,  
carenero, cabario, cabario que tararaeraain nenacaauru, chaen cachaauru  
letononeein nenacaauru, naaonjoainuri que necoreteeuruha, nii Babilonia  
cocoaichacuru raine jaun, jataain coinaderaaure. <sup>14</sup> Nii janate jataain  
inaderaain:

“Inae nihei iicha rautati rucuhele coreti satiin iicha sirii.  
Inae chabana nihei jerichanejeein sirii neeine,”

naaurureein nii neseu necoretenacaauru.

<sup>15</sup> Nii neseu necoretenacaaurute jataain coriquihotiin neeure. Inae caseteco coaraane janate, caje coriae neein coinaderaain chanaain coarajeurureein jataain coasina caaun. Chaen techu jataain coisiin:

<sup>16</sup> “Jataainte cairichaaajoaai, itolere nese amurijiriin tabaain nena.  
Cajione caohacha que necoreeteein, lanajaain jichohajiojoai que necoreeteein oro,  
chaen jataain coretiin nena ajeri jaberoco, perla, naaonjoainuri que urerihanohin cajione que necoreetiha leinjiin enene tocohaneei niqui.

<sup>17</sup> Nete luhecotariin coacueneeine jana, inae nitaje nii itolere iicha sirichuri,”

naaurureein.

Satiin bote kuhane curuaanaanein nenacaauru curuaanaacuru cafitaancuru- cucuana kuhane amuhemuhenaacauru, chaen marinerooru, satiin cucuana kuhane nichao que ichaohin raotojeein amuhemuhenaacauru, naaonjoainurite coriae netiin coarajeeure. <sup>18</sup> Inae moco caaun suruaa niha, nii nesene coaraante: “Coatiha catohanein jataain leeochoaauru amurijiriin jataain caohatiin nena nese caa catohanein nedaai,” naaure tonijiaain.

<sup>19</sup> Chaen techu, coinaderaain chanaain, couturi ichoae atane bujuinaa chorohin:

“Jataainte cairichaaajoae taa nese itolere amurijiriin nena, naain chanaaurureein,  
satiin nii cucuana kuhane bote sirii amunacaauru,  
nii nese aina cuaain coriquihonanein nedanacaauru.

<sup>20</sup> Nii nese cairichaa Cana Coaunerane coroaecuche dedeeu Cana Coaunera cachanein janijiin niicha cotihanohinein nenacaauru,  
chaen afosotooru, *profetacuru*, naaonjoainuri. Acaauru casetecaane ucuaetohate, inara rai caohacha ichae Cana Coaunera,”

<sup>21</sup> Nii jaunte, nii itolere que nelateein, niicha ichana nainera neein nena anjera, nii leinjiin ajeri jaberoco seonjoan- cha tutuuruhane jaa tocohaneein nena baihataain cucuana kuhane siheitiin:

“Catohaneente,  
itolere amurijiriin nelaetiin niha nocoetohinatiin,  
inae chaque nelatelanaala neei Babilonia nese. Inae chaelon nihei nacoaunein jerichanejeein neeine jana ichoharaauruhane.

<sup>22</sup> Inae chelai janonaa bana nihei nacoaunein ii que aohanraa, nenatein guitarra rijijieein nena toteein, aunone maajeein toteein, coreneta tocohaneein nena toroonfeta, naaonjoainuri toteeuruhane. Inae nerinaain ii que amihaneeni.

Niheichu aohanrarinaain tonijiainiha natiin ichaain cha tutuera.

<sup>23</sup> Chaen chu

chelai janonaa bana nihei, ii que niha conone jana,  
ii que aohanraa tonijiai ichaain nisirihateeuruhane jaa besetane.

Coatiha

inae chaque nelateein neuruhi ichei rucuhele que necoreteein nenacaauru,

satiin chauratane que nenacaauru amurijiriin itolere que nelaetoha no-coetiin neeuruhalu natiin.

Chaen techu,

benaneniha nocoetohine que,

satiin lauri lauri nenacaauru cachaauru coritaain nerejetohi,”

nae nii anjera.

<sup>24</sup> Nii nese quete erunojoi ne niicha sohin niicha jaaorilu *profetacuru* coichana, chaen nii janijiin Cana Coauneraacha ranjoinurilu rai cachaauru, chaen satiin caa chauratane que sohin niicha jaaorilu coichana, naaonjoainuri.

## 19

<sup>1</sup> Nii baiha jataain arajiin dedeeu tonijiaain ereeuruha cachaaaurune jana aonacaaunne janate:

“Cana ichoteraneein nenea cana Curuaanaa coroaecuche.

Nii itolere ichana naineein,

rai necaohacha que necaohachaain,

naaonjoaain nihane jaunte

cana ichoteraneein Cana Coauneraaneein ne.

<sup>2</sup> Acate

esinae rauhijiriin baaso icharaauru coaraain

casetecaeraneein ne.

Nitohanihane jaunte,

rai jaberoco aina cuaain

satiin chauratane sacuritaain nenacaauru cachaauru saruhin niha osa quene jaun,

nii ene cojoaeloroheri rijijieein nenea casetecae.

Cana Coauneraate

rai cachaneein nenacaauru ateinaain nihalune

core coarate que,”

naaure.

<sup>3</sup> Nii baihate nacoaauneein:

“Cana ichoteraneein nenea cana Curuaanaa coroaecuche.

Nii chariji bana jianelanaalate

ecuun iniha cureein nii ene cojoaeloroheri rijijieein nenea- Babilonia nese moco cousuruca,”

naaure dedeeu tonii.

<sup>4</sup> Nii janate, curuaanaa nihane jaan rori- *trono* ichoae lauhaca Cana Coauneraane jana, nacatiha neseonriaain: “Cana ichoteraneein nenea cana Curuaanaa coroaecuche. Nitohanemiin,” naain Cana Coaunera coroaecure, nii coroata choonca jenaain nenacaauru ichauhenaauru, chaen nii jenaain cacha tocorijianein ichaohin nenacaauru naaonjoainuri. <sup>5</sup> Nii janate, nii curuaanaa nihane jaan rori- caje toniin:

“Satiin inara canaanainuru, ichauhenaauru, naaonjoaineeichene

Cana Coaunera coroaecuche,

nelateein acaneein nihane que casiichene coarateein neinequichene,”

naain toniha erenaane jana aohanrae.

*Rai cachaneein nenacaauru aina beseta ichaa Carenero Narejeene jaan cojoanonaa que turuhane*

<sup>6</sup> Chaen nechu tonijiaain toniha arara aina caraturine rijitiinchuru iriha arajii cachane jana aonaan. Nii janate:

“Cana ichoteraneein nenea Cana Curuaanaa coroaecuche.

Inae itolere Curuaanaa neein nihane nunuhetiha cana Curuaanaa, itolere que nelateein,

itolere ichana naineraneein nenea Cana Coanera.

<sup>7</sup> Aihane jaun

coanete rachoojihacache.

Esinae rauhijiriin

rai necaohacha que necaohachain niha Cana Coaneranane coroaecaache,

inae nisirihatihane Carenero

Narejeenne jaan cojoanonaa que turuhane jaun.

Inae letona jatoraan neruujihane rai comasainu.

<sup>8</sup> Nitohaneein jereraane jaunte,

somajai cajione caohacha jiquihaqui que necoreete nii Carenero Narejeen comasainu.

Nii cajione caohacha somajaain jiquihaquiin nenaate,

esinae rauhijiriin jeriha Cana Coaneranane rijijieein

niicha ranojineein nenacaauru ne,”

naain tonijiaain toni erenaa. Satiin rai cachaneein nenacaauru raa Cana Coanera Calaohi Jesocurisitone que.

<sup>9</sup> Nii janate canu rai: “Caa laenaan: ‘Raotojoein turuuruhine nii Carenero Narejeen beseta que cotihanohichuru.’ naa caraine baihate: ‘Caa erenaate, inae rauhijiriin Cana Coanera beratenojoin erenaane,’ ” nae carai nii anjera.

<sup>10</sup> Nii jana coroaecaane coina, nii anjera tijia asaae neseoriaanune janate: “Caa nitohanai ichana coaauca. Canuhetonaine Cana Coanera cacha neein neein, jerichanejeein nii aaine rijijieein. Aihuruha nii ii nejeraauru, acaauru rai aitoa Jesocurisitone rijijieein, naitoonjoan tonoraain nenacaaurune rijijieein. Aihane jaun, Cana Coaneraacha coroaecu,” nae canu rai nii anjera.

Nii Jesocurisito que erenaa techu, *profetacuru* que beratenojineein nelu.

*Cabario somajain ichoae cunaa*

<sup>11</sup> Nii janate dede que ecooca somajaain cabarione jana, nichoae lajuuae-nii suujua rijijieein nesineneein curuajai. Acate esinae rauhijiriin baaso icharaauru cachauru ichao rucujueein, que nejeratenacaauru amuritiin nelu.

<sup>12</sup> Rai notate jiquihaquiin usi lanaro tocohane. Nii janate, arajiin rai coturi que comai amaane jana, que laenanohineein ne rai curuaa. Leinjiin acaachate nii curuaa coitucujue.

<sup>13</sup> Nii jana rai cajionete, ichana que lomonojoin tocohane. Jana rai curuaate: “Cana Coanera Ere,” nae.

<sup>14</sup> Nii janate caaijie uure dedeeu anjeraauru- cajione caohacha somajai que necoreetein- cabario somanerei ichoae uhin.

<sup>15</sup> Nii janate rai nujuaae caje mitue sabere ajihantiin, satiin lauri lauri nenacaaururu amuritoheraneein nihane cojunacanein. Acate coata caje nenea otiha que biji achunequiin,

acaauru Curuaanaa niha cureein. Acate, cana tijia que oba shaoquiin,

rai baca rocohacane rijijieein, baaso icharaauru coaraain casetecain, rai nobaeneein casetecocuru que banihateein niicha rucujei- bino que acaauru

cocoa cureein nii itolere que nelateein- itolere ichana naineraneein nenea

Cana Coanera. <sup>16</sup> Chaen techu rai cajione, rai nanaae, naaonjoain que:

*Reychuru rey-*  
curuaanaacuru Curuaanaa

naain laenanohineein ne Acaneei nihane coitucueratera rai curuaa.

<sup>17</sup> Chaen nechu enoto conohanau chujuhecoha leinjiin anjerane jana coaracaauinne janate, satiin tajaee iniho que lenoneein ecuun jiaauluhin amunacaauru rai tonijiaain: “Chajaauchete netaojiaete tabai lenone que inara coroaatemiin Cana Coaunera. <sup>18</sup> Aihate Curuaanaacuru *reychuru*, soondarooru curuaanaacuru, laraajiin nenacaauru cachaauru, cabariocuru, nichoae cunacaauru, itolere inihocuru, letononelanaala nenacaauru, letononeein nenacaauru, nelatelanaala nenacaauru, nelateein nenacaauru, naaonjoainuri iniho que lenonequiche,” naain ehequiin nii iniho que lenonenacaauru tajaecuru cotihacane aonaun.

<sup>19</sup> Nii baihane, nii necha aansai ataebinae tabai aina, satiin caa chauratane que nenacaauru curuaanaacuru aina sonaana que neeninuru acaauru soondarooru coaraaun. Acaaurute, nii cabario ichoae lauheconaa aina rai anjeraauru sooruhane coina netaojiaaure. <sup>20</sup> Nii janate, nii necha aansai ataebinae tabai mucuhin casetecaure, nii rai *profeta*- nacatiha neein itolere cojoelanaacojoai ichara aina curuaaecaain. Nii itolere cojoaelanaacojoai ichaane aina cuaainte, nii necha aansai ataebinae tocohaneein niicha ichacuri cojunaca terateein rai ecaanto coroaeraauru cachaauru coritae nii rai *profeta* niha nocoeti. Nii jaunte, nii *profeta* niha nocoeti aina curuaaecaain, nii necha aansai ataebinae tabai jaaore ichaaojihane jana, usi conemuri asojoereneein moconaa cuhane. <sup>21</sup> Nii jana leeochoaurute, sohin jaonojoinecure, nii cabario somajai choae laujuaain cunaa ujuaae caje mitunaa sabere ajainai que. Nii janate, nii onacaauru iniho quihure nainaan obejeein nii iniho que lenonenacaauru tajaecuru.

## 20

*Le oaraanca jaanacaneei ichohanojoi niha moconajaerane*

<sup>1</sup> Nii janane, *cadena* que biji achunequiin atane jachu chariji bana sato-noelanaala nena cochabi uhaain fauha uha leinjiin anjera dede cajene jana coaraaun. <sup>2</sup> Nii anjerate fauhin, nii ataebinae tabai acano inoensimoconajaera ichojoae, le oaraanca jaanacai que tihane reein tiaaajoaain. <sup>3</sup> Nitohaneein ichojoaainte, nii chariji bana satonoelanaala nena atane jachu tabai cuhane fuhin, nii fuera que nii cochabi te, le oaraanca jaanacanei que tihane reein tiaaajoaain, nabana caa chauratane que nenacaauru cachaauru coritaane coataa. Inae le oaraanca janacanei que turuhane banate jianenohiniha cureein carajaelanaala.

<sup>4</sup> Nii jana, nii curuaanaacuru rori- *trono* coaracaauinne janate, nichoae launereure nii baaso icharaauru coaraain rucuherranu que cocoainohineein nenacaauru. Chaen nechu, Cana Coaunera aitonjoan beebejeein, jataain esinae rauhijiriin beratenojoinihane rijijieein Jesocurisito aitonjoan tonoraauruhane coreniha, coturi molonojoinieein onacaauru suujue netonai ecu neure. Acaaurute, rai biji, nauri, naaonjoain que nii necha aansai ataebinae coujunaca teeuruhane jerelanaala, chaen nii necha aansai ataebinae tabai aina nii tocohaneein nena ecaantooru corojelanaala nenacaauru nelu. Acaaurute nii ooruhane baiha nacoaauneein ichanaain le oaraanca jaanacaneein Cana Coaunera Calaohi Jesocurisito jiniichaaain curuaanaanein neeuruhane jana coaraaun. <sup>5</sup> Niichurute ichoaichaniha oo caje ichananacaauru ne. Leeochoauru laen ooruhane baiha ichanacuruhi, le oaraanca jaanaca reein tiaaain. <sup>6</sup> Jataainte nerausiaaejeein niha cuurureein

nii ichoaichaniha oo caje ichananacaauru, inae Cana Coaunera cachaneein aina jiniiquiin neeuruhane jaun. Oha cachane baiha itajeraneein nenea coatiha acaauru aina chaachasihei. Acaaurute Cana Coaunera aina rai Calaohi Jesocurisito rai saseredoteneein le oaraanca jaanacane reein tiaain aina curuaanaa neein neeurureein.

### *Moconajaera amuritooruhane*

<sup>7</sup> Inae le oaraanca jaanacanei baihate, caseteconihane caje mitanojoi niha cureein atane jachu tabai caje nii moconajaera. <sup>8</sup> Nitohaneein mituhinte satiin caa chauratane que lauri lauri natane que ichaonacaauru cachaauru rene cuhin, enoto mitu nichajai jeroon, enoto so nichajai jeroon, enoto mitu nichajai coarajeein cana ajaabiji nichajai jeroon, enoto so coarajeein cana ajaabiji nichajai jeroon, naaonjoainuri nii Gog aina Magog neein niicha curuaateuri coritareein. Nitohaneeinte cucuana cuhane nenea carene catuniji jeeoneein acaauru cachaauru taojiareein sonaana que nihane coina. <sup>9</sup> Nitohaneeite satiin chauratane sacuritaain cuhecujeein, jataain nii Cana Coauneraacha belai nese tinonohin, nii Cana Coaunera cachaneein nenacaauru curuacaain tinonocure. Nete inae dede caje naluha usine jaun, jitariin acaauru mocohin acaauru itaje. <sup>10</sup> Nii jana, nii acaauru coritaera moconajaerate, usi conemuri asofere neein mocohin nenea cuhane jaonojoneei ne, nii *profetaniha* nocoeti aina curuaaecaain, nii necha aansai atae-binae tabai jaaoruhane jaan cuhane. Ecute janotiin, jiichoo, naaonjoaain caseteconein mocoha cuurureein nii chariji bana satonoelanaala.

### *Rori somajai acatiha tein caohacha ichacurenihane, baaso ichacuruhane coitucuuruhane*

<sup>11</sup> Nii jana curuanaacuru rori- *trono* somajai coaracaanne janate nichoae lauhaca leinjiine jana notaracae jataain caohacha nitajeeriin nii chunijihun coarinojoinelanaala nitaje chauratane aina dede. <sup>12</sup> Nii janane itolere que nelateein nenacaauru, chaque nelatelanaala nenacaauru, naaonjoainuri onacaauru coaraaun, nii curuanaacuru rori- *trono* acatiha chujunereeuruhane jana. Nii janate, ecu joaracaeraain nihacooa quirichaurune jana, nii chabana satonoelanaala nenea ichaonaa que ichaohenihuru curuaa siricha leecha quiricha netonai ecu joaracaeraain ne. Nii onacaaurute colurujuenojoneein neeuruhane caje rucuhenojoneein neeure- acaauruhacha ichai rijijieein, nii quiricha cuhane laenanohineein nihane rijijieein. <sup>13</sup> Nii jana satiin nii cucuana cuhane jaonojoneein onacaaurute caje mitaain tenojonecure. Jerichanejeein techu nii ohin aina nenacaauru te, nii onaa curuaanaa neein nenea. Nii janate satiin acaauruhacha ichai rijijieein rucuhenojoneein neeure le cache cachaauru. <sup>14</sup> Nii baihate, usi conemuri cuhane jaonojoneein ne nii onacaauru curuanaa neein nenea, nii nitajerai nenacaauru aina jiniiquiin. Nii usi conemurineein nenaate, oha cachane baiha cache itajeraneein nenea ne. <sup>15</sup> Ecute jaonojoneein neeure, chabana nitajenaachara nejeein nenea ichaonaa que ichaohenihuru curuaa siricha quiricha cuhane laenanohineein curuaa sirilanaala nenacaauru.

## 21

### *Ena nenea chauratane aina ena nenea dede*

<sup>1</sup> Nii baihane ena nenea chauratane, ena nenea dede, naaonjoaain coaraaun, inae nitajiha nii jauriaanejeein nenea dede, chauratane, cucuana, naaonjoainurine saijieein. <sup>2</sup> Nii janate, dedeeu Cana Coaunera acatiha nihane caje fauha uhe Cana Curuaanaa nese neein nenea- enachasine

Jerosaleen. Charijieein teeinti, nelanajanaa jerihane caohatiin necoree-teein ne leinjiin ene, nii rijijieeinte jataain caohatiin rai necaohacha que necaohachaain niha nii ena nenea Jerosaleenne jana coaraaun. <sup>3</sup> Nii janate, nii Cana Coauneraacha nelaurianajaan rori caohacha tonii: “Inae ena caje coauneete, cachaauru aina ichaoreein Cana Coaunera. Nii janate, acaauru aina ichaohane jana, rai cachaneein niha cuurureein. Chaen techu nii jeelai Cana Coaunera, acaauru Coauneraneein acaauru aina nereein. <sup>4</sup> Nii bana inae nerinaain chananaa, nerinaain onaa, inaderanaa, cunaeriin niha cachane jaan, naaonjoaainunri. Nitohaneein inoaenlu nenea ichaonaate inae nitaje,” naa erenaa dedeeu toniine janane aonaan.

<sup>5</sup> Nii janate:

“Canune nacoauneein enachasine neein itolere coaunaain neeun. Caa erenaa ichei aitorichaaunine jaan laenaan. Acate esinae rauhijiriin nohanelanaala ichei aitorichaaunine rijijieein airichaainne coina erenaa ne,” nae canu rai, nii rori caohacha ichoae laujuai.

<sup>6</sup> Nii baihate:

“Inae nitohaneein ichanohiniha. Canune itolere nunuheteraneein satono teraneein neeun. Chateeinti cocoirihane jesinaeca arihane rijijieein Canu ariin ne, niine core colane cocoareeuni, nii chariji bana satonoelanaala ichaonaa tera jesinaeca que. <sup>7</sup> Chateeinti itolere necairichanaa abaataain satono que tiaain ne, nii raite cainanohiniha cureein. Chaen techu rai Coaunera nichaaunne jana, aca canu calaohineein nereein. <sup>8</sup> Nena laen nii Canu sacunaa jeriheichuru, nii Canu esenetana jeriheichuru, namute cacha cotaairiin nenacaauru, sonajaain jaaoreraauru, rai sinijeranelanaala nenea ene aina ichao jeraquiin nenacaauru, namute quicha aina ichao jeraquiin nenacaauru, benaneein nenacaauru, nii ichanohichuru ecaanto coroaeraauru, satiin casajeeuru, naaonjoainurite, nii ohane baiha cacha itajeraneein nenea usi conemuri asofereneein moconaa cuhane jaonjoiniha cuurureein.” nae canu rai.

### *Ena nenea Jerosaleen nese*

<sup>9</sup> Nii janate, nii caausineein anjeraauru nii caainsii muruaaeneein satononejeein cacha cairichaeranu que biji achunequiin nenacaauru caje nenea leinjiin anjera:

“Chajaaute caa coarae. Caate Carenero Narejeen comasainu que nenacaaurune,” nae carai, nii satiin Jesocurisito ranojoneein nenacaauru coarateein.

<sup>10</sup> Nii janate, nii canu que Cana Coaunera Suujue coaratenojoin ichatane ucuuno seeonjoan que canu amaain, dede caje Cana Coaunera acatiha fauha unaa Cana Coaunera nese Jerosaleen coarate canu que, nii leinjiin anjera. <sup>11</sup> Nii janate, conoha Cana Coaunera necaohachane tocohaneein, jataain caohatiin cono te nii nese. Jataain coretiin nenea ajeri jaberoco tocohaneein jiquihaquiin, ajeri jataain nojoein nenea jaspe tocohaneein asaun tiaain inanacatiin. <sup>12</sup> Nii nese tinonocoritiente ne, jataain ecuunein rijia lechoonca coroata bacuujaain. Nii janate, nii acuujuu nainetiin neeure leinjihanaain anjeraauru. Nii nese bacuujuu nainetiinte ne, laenanohineein lechoonca coroata lauriin nenacaauru Isaraelitacuru nefoerate curuaacuru. <sup>13</sup> Nichatajai acuujuate ne, enoto mitu nichajai que. Jana nichatajai acuujuate ne, enoto soo nichajai que. Jana nichatajai acuujuate, enoto soo coarajeein cana raotono nichajai que ne. Jana leecha nichatajai acuujuate, enoto soo nichajai coarajeein cana ajaabiji nichajai que ne. <sup>14</sup> Nii ajeri laenanohineein niha lechoonca coroatajai Carenero Narejeen rai afosotooru curuaacurune jaan ajeri quete temurae nii nese coriha rijia.



<sup>15</sup> Nii canu aina erenaa anjerate, oro caje ichanohin cojunacatihane jaannu amae, que nii nese coujunacateein acuujuuauru, rijia, naaonjoainuri cojunacatihane jaanu que. <sup>16</sup> Nii janate, rai caare aina ita jaraaone rai jaratono. Nii cojunacatihane jaanu que niicha amai que, nii nese cojunacatiha nii anjerane janate, coroata oaraanca coroata fasha quilometorone rai caare, jaratono, nucuuno, naaonjoainuri. <sup>17</sup> Nii baiha nii rijia ucuuno cojunacatiha, joenreein cha cojunacatiha cachaurune rijijiei metoro quene janate, saota choonca saogui metoro.

<sup>18</sup> Ajeri jataain nojoein nenea jaspe caje ichanohiniha rijiane janate, bidirio jicharoaain ichanohin tocohanein, oro nejesina caje ichanohi ne nii nese. <sup>19</sup> Nii janate, jataain coreein nenea araai laurii ajeri caohacha que urerianohineein ne, nii rijia temuracuru ajerichuru. Nii jauriaanejeein nunuhe neein nenea rijia temurate, ajeri nojoein nenea jaspe caje ichanohi ne. Jana nii coroata temurate, ajeri caohacha safiro neein niicha curuaateuri caje ichanohi ne. Jana nii nichatajate, jataain jiquihaquiin nenea agata caje ichanohi ne. Jana nejenate, esmeralda caje ichanohi ne. <sup>20</sup> Nii jana nesaquite, ajeri onesi caje ichanohi ne. Nesaotanete, lanaajiojoaain nenea cornalino caje ichanohi ne. Jana caainsiinite, jataain jiquihaquiin nenea crisolito caje ichanohi ne. Jana fosanite, berilo caje ichanohi ne. Jana isconite, topasio caje ichanohi ne. Lechooncanite, berausiojoaain asaauntiaain inanacaain nenea curisoprasa caje ichanohi ne. Jana nii lechoonca leinjiinte, jataain coretiin nenea ajeri jasinto caje ichanohi ne. Jana nii lechoonca coroatajate, jichosijiojoaain nenea amatista caje ichanohi ne. <sup>21</sup> Nii lechoonca coroatajai acuujuate ichanohi ne, lechoonca coroatajaain jataain ajeri caohachanein nenea perla caje. Le bacuujuuauru acuujuate ichanohi ne, leinjihanaai ajeri perla caje. Jana nii nese cataaun cunaa nese coerote, bidirio tocohanein jiquihaquiin asaaun tiaain inanacaain oro nejesina caje ichanohi ne.

<sup>22</sup> Nii jana coatihana nii leinjiinijin Teenforo coarinaaun nii neseu, cana Curuaanaa itolere que nelateein itolere ichana naineraneein nenea Cana Coanera, rai Calaohi- Carenero Narejeen aina ecu nenea Teenforo neeuruhane jaun. <sup>23</sup> Nii jaun coatihana enoto, atene, naaonjoainuri lateein nihei nii nese conaeranu que, inae rai necaohacha que conaa Cana Coanerane jana, rai cono neein niha Carenero Narejeene jaun. <sup>24</sup> Satiin lauri lauri ichaonacaauru cachaurute, nii nese que conaeraain nii nese que amuhemuhecurureein. Nii jana satiin caa chauratane que nenacaauru curuaanaacuru reychurute, itolere acaauruhacha latei teeurureein acaauru rai. <sup>25</sup> Niheichu nii chariji bana nefurinaain acuujuu. Niheichu ecu nerinaain nocohena. <sup>26</sup> Satiin lauri lauri ichaonacaauru cachaurute, raotojoein neeuruhane jaanu, acaauru necaohacha que necaohachaain neeuruhane jaanu, naaonjoinunru amaaurureein nii neseu. <sup>27</sup> Nete laen, nii chariji bana enoorenereein nii Cana Coanera rai caohachanelanaala baasoneein nenacaauru. Niheichu, nii namute cacha cotaairiin casajenetiin nenacaauru enonaa nainecururinaain. Leinjiin nii Carenero Narejeen nii chabana satonoelanaala nenea ichaonaa que ichaohenihuru curuaa siricha quiricha cuhane laenanohineein curuaa sirichauruhachate, enonaa nainereein nii neseu.

## 22

<sup>1</sup> Nii baihate, leinjiin nucuhe ajiarojoeritiin nenea ichaonaa tera nucuhe coarate canu que nii anjera. Nii janate, Carenero Narejeen nelaurianaja aina, Cana Coanera nelaurianaja rori *trono* jeelai caje mitue nii acau-

ajiarojoeritiin asaaun tiaain inanacanaa. <sup>2</sup> Nii nese cataaun cunaa bero cuhane, chaen nii nucuhe auhaniha, naaonjoaainte ita jeraniha omarohin le ateeuru naineein inacae nii ichaonaa tera enuha. Nitohaneeinte le jaanaca cuhane lechoonca coroata saain inacae nii enuha. Jana nii enuha ichaonaa tera alote nelate que necoichacuruha lauri lauri ichaonacaauru cachaaurune coina. <sup>3</sup> Nerinaain ecu nechu aansaineein ichoai. Cana Coaunera aina Carenero Narejeente, nii neseu nereein jelai Curuaanaa neein cooainanacaineein. Nii jana rai cachaaurute coroaeca cuurureein. <sup>4</sup> Cana Coaunera ainate ita acatiha neein ita coaraain rai nauri que Cana Coaunera curuaa sirichurureein. <sup>5</sup> Ecu nerinaain nocohena. Cono laatecururinaain nii rai cachaauru. Enoto niha natiin laatecururinaain. Cana Coaunerate, acaauru cono neein nereein. Nii rai cachaneein nenacaaurute curuaanaa niha cuurureein chabana satonoelanaala.

### *Ichuunijihä turuha Jesocurisitone*

<sup>6</sup> Nii baihate:

“Caa erenaate esinae rauhijiriin, nii nohane lanaala ichei aitorichaaunine rijijieein airichaaaine coina erenaa ne. Nii Cana Coaunera, nere beebjeeuruha *profetacurune* coina berateralute rai anjera letoae, inae ichuunejeeonriha nitohanerichaaainene jaun, rai cachaneein nenacaauru que coaratihane coina,” nae canu rai nii anjera.

<sup>7</sup> Nii janate aonacaaunne jana: “Carajae lanaalane inae turuha ureeunni. Nerausiaaecate cuurureein caa quiricha cuhane laenanohineein nena Cana Coaunera beratenojoin tonoraain nenacaauru,” nae Cana Coaunera Calaohi Jesoso.

<sup>8</sup> Canune Joaan neein coaraain aonaaun. Nii coaraain aonacaaunne baihane, nii canu que coaratera anjera tijia asaae neseeonriiaan, coroaecaaune coina.

<sup>9</sup> Nete canu rai:

“Coo nitohanai ichaa. Canu netonaine aaine rijijieein, Cana Coaunera cachaneein neeun. Satiin ii nejeraauru, caa quiricha reretaain coaraain tonoraeraauru, Cana Coaunera ere que erenacaauru- *profetacuru*, naaonjoainuri rijijieein neeun canu netonai. Cana Coauneraacha coroaecu,” nae nii anjera canu rai.

<sup>10</sup> Nii baihate coaiten aite carai:

“Cooa leeochoaauru rai belanaala caa quiricha cuhane laenanohineein nena- Cana Coaunera ere rucuheca ii suujuaacha cuhane. Leeochoaauru rai beeu. Inae jataain ichuunijihä nitohanai cojoanonaa que turuhane.

<sup>11</sup> Chunocoha cacha Cana Coaunera ere aohana jerenihane, nihei tonaain erenaa najaanu. Nirijieeincha baaso ichajeein sacuhane coina reroecanaa nainihaacache. Esinae rauhijiriin caohachaaain suujua coaraain Cana Coaunera sacunaa jeriha cachane, jelai teein Cana Coaunera cachaneein nihane jeriha Cana Coaunerane rijijieein sacuhane raite ne,” nae nii anjera canu rai.

<sup>12</sup> Niritiinte: “Aiha. Carajaelanaalane turuha ureeunni. Chaen nechu, acaauruhacha ichai nainejeein cainacaaune jaanu uhaain ureeunni, le cacha cachaauru rai tihanune coina. <sup>13</sup> Canune jauriaanejeein itolere nunuheteraneein satonoteraneein nena neeun” nae Cana Curuaanaa Jesoso.

<sup>14</sup> Nerausiaaecate cuurureein canu esenetaauruhane coreniha rai nosa caje canu ichoteratenojieein nenacaauru, nii ichaonaa tera enuha inaa leein, Cana Coauneraacha rucujuei nenaanajaun enonaa nainecuruhane jaun. <sup>15</sup> Nete laen enoelanaala jianacoon nedaurureein, nii Cana Coaunera coitucuelanaala nenacaauru, baasoneein ichaonacaauru cacha baasooru,

benaneneein nenacaauru, sinijerane lanaala nena e ne aina ichaojera-conacaauru, enecuru nihanatiin rai lananelanaala nena quicha aina ichaojeraquiin nenacaauru, sonajaain jaaorera, ichanohin ecaanto corojeein nenacaauru, satiin nechu jataain coritaraacha ichajeein, acaacha ichajeein nenacaauru, naaonjoainuri. Nii janate:

<sup>16</sup> “Canune Jesusoneein caa canu rai anjera letoaaun, satiin caa aitothane rijitoein, janiin canuhacha raauri canu cachaauru rai biha cuhane coina. Canune Rabiri caje nefoeratenaaneein neeun. Canune janonaa rai mitunaa arasijie rijijeein neeun,” nae.

<sup>17</sup> Cana Coanera Suujue, Carenero Narejeen comasai, naaonjoainurite: “Chajaau,” naauruhane jana: “Chajaaujian,” naaurureein aohanraauru. Chunocoha cocoireein acau conaa jereein uhite, nii core colane ichaonaa tera acau coreein.

<sup>18</sup> Satiin caa quiricha cuhane laenanohineein nena caitoonjoante aito-coaanne rijijeein situreein. Chunocoha cau caa quiricha cuhane nihane amurijiriin jojoin nenaate, caa quiricha cuhane laenanohineein niha caainsii laurini cacha cairichaeranu jaan que cairichaa cureein Cana Coanera.

<sup>19</sup> Jana chunocoha caa canuhacha beratei quiricha cuhane laenanohineein nena coreein, que cacha relaelanaala, naaonjoain nena cajete, nii ichaonaa tera, que banihateein niicha rucujei enuha inaa rulureein. Chaen caa quiricha cuhane laenanohineein nena Cana Coanera nese neein nenaane maajeein caje rulureein.

<sup>20</sup> Caritiin aitiinte: “Aiha, carajaelanaalane inae turuha ureeunni,” nae Cana Curuaanaa Jesoso.

Nitohanemiinjian. Chajaain sorotiin uu Cana Curuaanaa Jesoso.

<sup>21</sup> Cana Curuaanaa Jesoso itolere inaraacha latei tein inara rausiaaemiinte raotojoein neeiche.